

Cohamacu Yare Yahuri Tju

**El Nuevo Testamento con porciones del Antiguo
Testamento en guanano**

**O Novo Testamento com porções do Antigo Testamento
em Guanano da Colômbia (Wanano do Brasil)**

Cohamacu Yare Yahuri Tju

El Nuevo Testamento con porciones del Antiguo Testamento
en guanano de Colombia

O Novo Testamento com porções do Antigo Testamento
em Guanano da Colômbia (Wanano do Brasil)

[gvc]

Texto del Nuevo Testamento: © 1982-2021, Wycliffe Bible Translators, Inc.
Texto do Antigo Testamento: © 2021, Missão Novas Tribos do Brasil

Primera Edición del Nuevo Testamento,
© 1982, International Bible Society

Segunda Edición del Nuevo Testamento,
© 2007, Bible League International

Tercera Edición del Nuevo Testamento,
© 2010, Wycliffe Bible Translators

Primeira Edição do Antigo Testamento,
© 2021, Missão Novas Tribos do Brasil
www.novastribosdobrasil.org.br

Edición para la Web
© 2012, Wycliffe Bible Translators, Inc.
www.Wycliffe.org

Visita www.ScriptureEarth.org/gvc
para más recursos biblicos en Guanano.



Licencia Creative Commons
Reconocimiento-NoComercial-SinObraDerivada 4.0
<http://creativecommons.org/licenses/by-nc-nd/4.0>

ÍNDICE

Antiguo Testamento

Génesis	(Gen).....1	1 Crónica	(1 Cro)...160
Éxodo.....	(Ex)..... 66	2 Crónica	(2 Cro)...163
Levítico.....	(Lev).....120	Salmo.....	(Sal)166
Números	(Num) ..122	Proverbio	(Pro).....171
Deuteronomio.....	(Deu).....131	Isaía	(Isa).....173
Josué.....	(Jos)134	Jeremía.....	(Jer).....178
Jueces	(Jue).....136	Osea.....	(Os)180
1 Samue.....	(1 Sam) .138	Joná.....	(Jon).....181
2 Samue.....	(2 Sam) .152	Miquea.....	(Miq).....187
2 Reyes	(2 Rey) ..155	Zacarías.....	(Zac).....188

Nuevo Testamento

San Mateo.....	(Mt).....190	1 Timoteo	(1Ti)626
San Marcos	(Mr)..... 264	2 Timoteo	(2Ti) 634
San Lucas.....	(Lc)..... 308	Tito	(Tit)..... 640
San Juan.....	(Jn)..... 383	Filemón.....	(Flm) 644
Hechos	(Hch).....437	Hebreos.....	(Heb).... 646
Romanos.....	(Rom)....501	Santiago.....	(Stg)671
1 Corintios.....	(1Co)532	1 San Pedro	(1P)679
2 Corintios.....	(2Co)561	2 San Pedro	(2P) 688
Gálatas.....	(Ga) 580	1 San Juan.....	(1Jn).....694
Efesios.....	(Ef)591	2 San Juan.....	(2Jn).....701
Filipenses.....	(Fil).....602	3 San Juan.....	(3Jn).....702
Colosenses	(Col) 609	San Judas.....	(Jud).....704
1 Tesalonicenses	(1Te).....616	Apocalipsis	(Ap)707
2 Tesalonicenses	(2Te).....622		

Mapas	740
-------------	-----

Antiguo Testamento

Ã joa pahñoerapaihta ahri tjui
yũ yahuare joahi “Jesuta Cristo
Cohamacu to warocariro jira. Tiro
potocãta Cohamacu macuno jira”,
musa ni masihti cjihtire. Ã jina
musa tirore wacũ tuaina Cohamacu
mehne musa ã jirucuhti cjihtire
joahi ahri tjure.

Juan 20.31

GÉNESIS

Cohamacu muanore, yahpa cūhure bajuamehneha

1 ¹Wahmanopure Cohamacu muanore cjihto, yahpa cjihto cūhure bajuamehneha tiha. ²To bajuamehneri yahpa sehe cahno mahnoerari yahpa jisiniha. Nahitiano sahsero jisiniha. Tuhsu, to bajuamehneri yahpare dia wuru dihta ji biharucu susiniha. Ne nohoi dia wuru ji bato tiro mariea tiha. Cohamacu Catia Macariro dihta nuhmirucua tiha, ti dia wuru buire.

³Ā yoa tiro Cohamacu,
—Buhriajaro —ni, bajuamehneha.

To ā nichuta, buhriaa wahaha. ⁴Buhriarore nūno, tiro ji coaha. Ā yoa tó buhriaro mehne nahitiano sahsero jimarirore tju waha. ⁵Tó buhriarore “dachō” wamoā, ā yoa nahitianore “nāmi” ni, wamoaha tiro. Coā ji ducari dachō pihtiha.

⁶Pua dachō waharoi tiro niha:

—Wihno tahtia jijaro, ti dia wuru jimariro cjiro dachō macare to soro, soro tjuahto sehe —niha.

⁷Ā jiro tiro dia wuru tju waha, ti wihno tahtia mehne. Cūno muanopu ti wihno tahtia bui sehere co tjuaaha. Paro yahpa sehe tjuaaha. To nino sehetā jiha. ⁸Ti wihno tahtiare “muanore” wamoaha tiro. Pua dachō wahatjiāha.

⁹Tia dachō waharoi tiro ō sehe niha:

—Yahpare ji biharucu sūri co witi borarucu sūjaro, wuāri yahpa to noano bajuhto sehe —niha tiro.

To nino sehetā wahaha. ¹⁰Ā yoro, tiro wuāri yahpa to bajuachu yorore “dihta” wamoaha. Ā yoa ti witi borarucu sua core tiro “pjiri ma” wamoaha. Noā ti jichu nūno, tiro ji coaha.

¹¹Baharo tiro ō sehe niha tjōa:

—Ahri dihta buire tja capa tia cjihtipe dujaro. Tuhsu, yucuri dica tihti cjihtipe dujaro. Ā yoa jipihtiro yahsaa pūri tia cūhu dujaro —niha tiro.

To nino sehetā wahaha. ¹²Ti dihtapure jipihtiro tja capa tia cjihti, ā jichu yucuri dica tihti cjihti cūhu du muja taha. Noā ti jichu nūno, tiro ji coaha.

¹³Tia dachō wahatjiāha.

¹⁴Ā yoa pititia dachori waharoi tiro ō sehe niha:

—Buhriahti poca muanopure jijaro. Dachō soro, nāmi cūhure soro ti bajuchū yoahti poca jijaro. Ā yoa ti buhria poca sehe dachori, cūhmari, puhiri quihōhti cjihti jijaro. ¹⁵Tuhsu, ti buhria poca muanoi jihti poca dihtapure buhriajaro —niha.

To nino sehetā wahaha. ¹⁶Ā nino, tiro puaria, buja poca bajuamehneha. Cūria bui tuaria sehe dachore buhriahtia jiha. Ā yoa tia doca cure buhriaria

sehe ñamine buhriahtia jiha. Ñ jichu ñahpichoha poca cūhure tiro bajuamehneha. ¹⁷⁻¹⁸Tí pocare tiro muanopu dachorire, ñamirine yahpapure buhriahti cjihti cūha, dachore, ñamine soro bajuhto sehe. Noaa ti jichu ñuno, tiro ji coaha. ¹⁹Pititia dachori wahatjiāha.

²⁰Cinco dachori waharoi tiro ò sehe niha tjoa:

—Bajuajaro co puhichapu jightinape. Ñ yoa wuhtina cūhu jipihtina bajuajaro. Muanopu wujaro —niha.

²¹To ã nino mehne, tiro bajuamehneha. Copu jihtina bujuina, ã yoa jipih-tina copu catiro cjuah-tina, tina curuaripe bajuamehneha. Ñ jichu wuhtina cūhure tina curuaripe bajuamehneha. Noaina ti jichu ñuno, tiro ji coaha. ²²Ñ yoa Cohamacu tinare ò sehe niha:

—Diapu jiina payu masa puti jiga. Ñ yoa jipihtina wuina cūhu payu masa putiga ahri yahpapure —niha tiro.

To ã ni payoa mehne tinare noano wahachu yoaha. ²³Cinco dachori wahatjiāha.

²⁴Seis dachori waharoi tiro ò sehe ni namoha:

—Ahri yahpai jihtina, wahiquina bajuajaro. Bajuajaro nuina, nucu macaina, buaina, chihchōina —niha.

To nino seheta wahaha. ²⁵Tiro jipihtina wahiquina nuina, nucu macaina, buaina, chihchōina, tina curuaripe bajuamehneha. Tinare noaina ti jichu ñuno, tiro ji coaha.

²⁶Ñ yoa tuhsu, Cohamacu ò sehe niha juna:

—Masare mari yoaro seheta jia tihtinare bajuamehnejihna. Tuhsu, tinare wahiquina bui jihtina cjihti cūjihna. Jipihtina wahi, wuina, buaina, chihchōina jipihtina ti cahmano sehe ti yoahtina jijaro —niha tiro.

²⁷Ñ yoa Cohamacu masare

to yoaro seheta jia tihtinare bajuamehneha.

Munore, numino cūhure bajuamehneha.

²⁸Ñ yoa tiro tinare ò sehe niha:

—Payu masa putiga.

Ahri dihtare jipih-tiropure ji sahserucu suga,
musa coyea ji turiaina mehne.

Ñ yoa musare puhtoa cūi nija

wahi, wuina, yahpa macaina jipihtina bui.

Musa cahmano sehe yoaga tinare —niha.

To ã ni payoa mehne tinare noano wahachu yoaha. ²⁹Noano wahachu yoa tuhsu, tinare ò sehe niha tjoa:

—Ñuga musa. Jipihti capa tia, nohoi ahri yahpa duare, ã yoa jipih-tia yucu dichare musa chuhti cjihti cūja —niha tinare.

³⁰Wiho mejeta wahiquina nucu macainare, ã jichu wuinare, buainare, chihchōina sehere tiro ò sehe niha tjoa:

—Jipih-tiro yahsaa pūri tiare ti chuhti cjihti tinare cūja —niha.

To nino seheta wahaha. ³¹Tiro Cohamacu to bajuamehnerire ñuno, tuaro ñu ji coaha. Seis dachori wahachu, tiro tuhsu dapoha.

2 ¹Tó sehe yoa, munore, yahpare, jipih-tia tipu jia cūhure tuhsu dapo, cūha. ²Seis numuri pihtiro waroi Cohamacu to dahraare pahñoha. Pahño, siete numuri waharoi tiro soha. ³To sori dacho jichu ñuno, tí dachore tiro noano tuhotuha. Tuhsu, tí dachore:

—Paye dachori bui jiri dacho jijaro —ni cūha tiro.

⁴Muano macaa, ā jichu ahri yahpai jiare dohse yoa to bajuamehneri quti jira ahri.

Cohamacu Yawe Adāore Edēi űuhto noano jihto noari cuhtui cūha

(“Yawe” niri wama, “ā catirucuro” nino nica hebreo masa ya dusero mehne)

Cohamacu Yawe coā muanore, ā jichu yahpa cūhure to bajuamehne ducari pĵapure, ⁵ne dihtare dahraboriro masuno cjihto mariea tiha. Ā yoa coro cūhure borachu yoaerasinia tiha tiro. Ā jia ne dohse jia tja, ne dohse jia yucuri cūhu mariasinia tiha. ⁶Coro mariesinichu, dihta buire co wijaarucua tiha. Ā wijaarucua, tí co sehe jipihtiri yahpare waa masa sahse wahcāa tiha.

⁷Ā yoa Cohamacu Yawe munore dihta mehne bajuamehneha. Bajuamehne tuhsu, to quē coparipu putiroca sōha, tirore catiro waro taro. To ā yoachu, tiro muno cati ducaha.

⁸Ā yoa tiro, sū muja taro sehe, Edē wama tiroi, cū cuhtu, űuhto noano, jihto noari cuhture cahnoha. Cahn tuhsu, tiro muno to dahrerirore tói cūha. ⁹Ā yoa jipihti dohse jia yucuri jiha tí cuhtui. Tí yucuri űuhto noaa, ā jichu noaa dica cjuaa jiha. Chuhto noaa dica tiha. Tí cuhtu dacho macai padu cūha. Cūdu ā catirucuchu yoadure cūha. Ā jichu padu cūhure noaa, űaa masichu yoadure cūha.

¹⁰Tuhsu, tí yahpai cū ma pohta ti, tí yahpare waa sāa, tí yahpai jiare noano duchu yoaha. Tí yahpa yūhdore tí ma sehe pititia mări tju wa, buruaha. ¹¹Cū ma Pisō wama tiha. Jipihtiro Havila wama tiri yahpare ji majare buruaha. Tí yahpa uru cjuari yahpa jiha. ¹²Tí uru sehe paye baro moreno marieno noaa waro jiha. Tuhsu, yucuri di me sitia cjihti cūhu ji, ā jichu noaa bajua tāa, wapa tia tāa, ónice wama tia jiha tí yahpare.

¹³Ā yoa pa ma Gihō wama tiri ma jiha. Cusu wama tiri yahpa mu suro ji majare buruaha tí ma.

¹⁴Ā yoa pa ma Tigri wama tiri ma jiha. Tí ma sehe Asiria wama tiri yahpare sū muja taro pahrē sehe yūhdu buruaha. Tuhsu, pa ma Éufrate wama tiri ma jiha.

¹⁵Ā yoa Cohamacu Yawe munore Edē yahpai to cahnori cuhtupure to noano dahra, noano űu wihbo duti to cūriore ō sehe ni yahuha:

¹⁶—Jipihti ahri yucuri, ōi ahri cuhtui jia yucuri dichare muhu chu masina. ¹⁷Wiho mejeta cūdureta chu masierara muhu. Noaa, űaa masichu yoadure, ture chu, potocāa yariihca muhu —ni yahuha.

¹⁸Ni tuhsu, tiro to basi ō sehe ni tuhotuha: “Ahrirore cāirocā waro to jichu, noaerara. Ā jii cūcoro to yoaro seheta jia tihticoro, to piti tihticoro cjihtore dahreihťja” ni, tuhotuha.

¹⁹Ahri pano jipihtiri yahpāure jihtinare, wahiquina, ā jichu wūina cūhure dihta mehne dahreha. Tinare dahre tuhsu, muno cahai naaha, tinare to wamoahť sehe. ²⁰Tiro muno sehe jipihtina wahiquinare wamoaha. Nuinare, wūinare, ā jichu nūcu macainare jipihtinare wamoaha tiro. Dohse to wamoano seheta, tí wama tjuaha tinare. Wiho mejeta tina wahiquina watoi, tiro muno sehe jūna to yoaro seheta jia tihticoro, to piti cjihtore bocaeraha tiro.

²¹ Ñ yoa tiro Cohamacu Yawe tirore tuaro wujo tachu yoaha juna. Cuãno waropu to carichu ñuno, cû cohã, to patipahma macari cohãre naha. Na tuhsu, to cohã na wiori caminore to dihi mehneta bihaha tjoa. ²² Na, tiro to patipahma cohã mehne numinore dahreha juna. Dahre tuhsu, tirore ñoha. ²³ Ticorore ñuno, wahchero mehne Cohamacure õ sehe niha:

—¡Ahricoro pini yu dihi mehneta, yu cohã mehneta yoaricoro jira. Ñ yoaaro “numino” wama tirohca, muhu yuhureta mu naricoro jiro! —niha. (*“Numino” nino, “munore nahre” nino nica hebreo masa ya dusero mehne*)

²⁴ Ñ jiro mipu cûhure muno to pucsuma mehne ji, wijaaro, to namono mehne jirohca. Ñ jia tina puaro jipahta, cûiro yoaaro sehe jiahca.

²⁵ Ñ yoa suhti marieina jiha tina, tiro muno, ñ jichu to namono cûhu. Ñ jipahta, ne ti basi buo tieraha tina.

Adão, Eva yuhdurucaha Cohamacu Yawere

3 ¹ Cohamacu Yawe ahri yahpa macaroca macaina to bajuamehneina wahiquina yuhdoro masiriro cûiro agã jiha. Ñ yoa tiro agã numinore õ sehe ni sinitu ñuha:

—¿Cohamacu musare potocãta to cahnoru cuhtu, ñuhto noano, jihto noari cuhtu macaa yucuri dichare jipihtiare chu dutierayupahte? —ni sinitu ñuha.

² To ñ nichu tuhoro, ticoro numino sehe õ sehe ni yuhtiha:

—Jipihti ahri ñuhto noari cuhtu macaa yucuri dichare chu masija sã.

³ Wiho mejeta tiro cûdureta, ahri cuhtu dacho macai jidu dichare chu dutierayuhti sãre. “Tu dichare chuna, ñ jichu ñaha ñuna cûhu, musa yarianahca” niyuhti sãre tiro Cohamacu —ni yuhtiha ticoro.

⁴ To ñ ni yahuchu, tiro agã sehe õ sehe ni mahñoa:

—Ne potocã jierara tí. Ne yariasi musa. ⁵ Tiro masiriro jira. Tu dichare chuna, noaare, ñaare masiina wahanahca. To yoaaro seheta masiina jinahca musa —niha tiro agã.

⁶ Ñ yoa ticoro sehe to ñ nichu, ture ñu muoha. Ñ to ñu muochu, tu dica noaa poca waro jiha. Ticorore tí pocare chu duaro, pja wihiha juna. Masiricoro ji duaro, ticoro tí pocare sua na, chuha juna. Chu tuhsu, to manuno cûhure waha. Tiro cûhu chuha. ⁷ Chu tuhsuata, masiina waha, “Suhti marieina jija” ni, buo tiha. Ñ yoa higeracu pûri mehne dere, ti pototi buo ti sãare muoha.

⁸ Ñ yoa tiro muno, ñ jichu ticoro numino cûhu tiro Cohamacu Yawe jihto noari cuhtui to tinichu, tuhoha. Ñamichaha jiha, wiwnono to yusua cure wã turi pja. Tuho, tina tí cuhtu macaa yucuri watoi duhtiha. ⁹ Ñ yoa Cohamacu Yawe munore pjiha:

—¿Nohoi jijari muhu? —niha juna.

¹⁰ To ñ nichu, tiro sehe õ sehe ni yuhtiha:

—Tuhohi ahri cuhtu, jihto noari cuhtui mu tinichu. Cui nihi. “Suhti marieriro jija” nicu, muhure duhtihi —niha.

¹¹ To ñ nichu, tiro sehe juna sinitu ñu namoha:

—¿Noa muhure “Suhti marieriro jira” niri? ¿Sohõ jidu dichare, yuhu muhure “Chuecu tjiga” yu nidu dichare muhu chui niri? —ni sinitu ñuha.

¹² To ñ nichu, tiro muno sehe õ sehe ni yuhtiha:

—Numino yu piti cjihto muhu yuhure waricoro yuhure tu dichare wahre. Ñ jicu chuhti yuhu —niha tiro.

¹³ Ñ yoa tiro Cohamacu Yawe sehe numinore ò sehe ni sinitu ñuha:

—¿Ne, dohse yoaco taco muhu à yoari? —ni sinitu ñuha.

—Agã yuhure yahusähre. Ñ jico chuhti —ni yuhtiha ticoro numino.

¹⁴ Ñ yoa tiro agã sehere ò sehe niha:

—Mu à yoari buhiri mipure ñano yuhduihca muhu. Jipihtina wahiquina yuhdoro ñano yuhduriro jiihca muhu. Chihchõtjiähca, tiniihca mipure juna. Jipihtina wahiquinare doca tiroto ñ jirucuihca muhu juna. ¹⁵ Numino mehne muhure ñu tuhtichu yoihtja. Ñ yoa muhure ji nunu tihtina, ticorore ji nunu tihtinapu mehne cahma ñu tuhtichu yoihtja. Cũiro ticorore ji nunu tihtiro mu dapure tu dihorohca. Ñ yoa muhu sehe to dahpo dihicai bahcuihca —ni cũha tirore, agãre.

¹⁶ Ñ ni cũ tuhsu, numino sehere ò sehe ni cũha:

—Yuhure mu yuhdurucari buhiri mu pohna tichu, mu caboro bui ca namochu yoihtja. Tuhsu, mipure mu mu suro mu manu bui dihta ji duaricoro tjuara. Mu à jipachuta, mu manu sehe muhure dutihtiro tjuara —ni cũha ticorore.

¹⁷ Ñ yoa tiro Adão cũhure ò sehe ni cũha:

—Mu namore yuhti, tu yuhu muhure chu dutieradu dichare mu churi buhiri, mipure ahri dihta ñano waro waharohca mu ya buhiri. Mu ñano wapu ti, mu dahraa mehne mu chuhti cjihti duahca, mu catisinino puro. ¹⁸ Mu dahraare diaahca jipihti ñaa pota tia. Ñ yoa ti mu suro dua, wiho jia yucari dica cũhure chuihca muhu. ¹⁹ Mu so witia mehne mipure mu chuhti cjihtire bocaihca muhu, te mu yaria, pari turi dihta dojoiputa. Dihta mehne muhure yoahi. Pari turi dihtata dojoihca muhu —niha Cohamacu Yawe munore.

²⁰ Ñ yoa tiro muno to namonore “Eva” ni, wama pisuha, jipihtina masa ñuchono cjihto to jichu. (“Eva” niri wama, “jipihtina masa ñuchono” nino nica hebreo masa ya dusero mehne)

²¹ Ñ yoa tiro Cohamacu Yawe sehe wahiquina cahsari mehne ti suhti cjihtire yoaha, muno à jichu to namono ti sãahti cjihtire. Yoa tuhsu, tiro tinare sãaha.

²² Ñ yoa tiro ò sehe ni tuhoutuha: “Ahrina mipure mari yoaro sehe noaare, ñaare masiina tjuara. Ñ jia ti à catirucuerahto sehe, à catirucuchu yoadu dica cũhure ‘Churi tina’ nina, tinare wiochu, noana” ni, tuhoutuha.

²³ Ñ jiro tiro Cohamacu Yawe Edë yahpai ñuhto noano, jihto noari cuhtu to cahnori cuhtui jimarinare cohã wioha. Munore dihta mehne to yoariore dihtare dahra dutiha. ²⁴ Tinare cohã wio tuhsu, ti jimari cuhture sũ muja tari pahrë sehe cũha wua pahmari cjuainare, à jichu cũ pjĩ, ñosari pjĩ cũhure. Tĩ pjĩ à picha pohna wijaa siterucuri pjĩ jiha. Ñ jichu waha mua, majareroca wihi mujari pjĩ cũhu jiha. Tĩ pjĩ, à jichu tina wua pahmari cjuaina cũhu, à catirucuchu yoadu cahai waharore à ducatarucuha, ne pairo dohse jiriro tu cahai ta, tĩ pocare “Churi” nia.

Ahri quiti Caĩ, Abe ya quiti jira

4 ¹ Adão Eva to namono mehne jiha. Ticoro niji pocoro waha, cũiro muno-cãre, Caĩ cjihtore pohna tiha. “Yawe yuhure to wariro jira. To yoadohoro mehne yuhu tirocãre pohna tija” ni, tuhoutuha ticoro.

² Baharo Abe, Caĩ bahuro cjihtore pohna tiha. Tina puaro bucuari baharo, tiro Abe sehe ovejaare ñu wihboriro wahaha. Caĩ cũhu wesere dahrariro wahaha.

³ Ñ yoa noho puro yoari baharo, tiro Caĩ to wese macaa dichare na ta, waha, Yawere ño payoro. ⁴ Tiro Abe cūhu to ovejaa wahma pohna ti muh-taina cāinare na ta, wajā, noano se tia dihire bese, waha, Yawere ño payoro. Ji coaro mehne ñuha tiro Yawe Abere, ã jichu to ño payoa mehne to wari cūhure. ⁵ Wiho mejeta tó sehe ñueraha Caĩ sehere. Ji coararo mehne ñuha tirore, to ño payoa to wari mehne. Æ jiro tiro Caĩ ñano waro suaha. Ñano sua, ñari susū to wuhduare yoaha. ⁶ To ã yoachu ñuno, tiro Yawe tirore ò sehe niha:

—¿Dohse yoacu ã ñaca sua, mu wuhduare ñari susū yoajari muhu?
⁷ Quihōno yoaga. Mu quihōno yoachu, muhu cūhure ñu ji coaihcā yuhu. Mu quihōno yoerachu, yuhu mehne buhiri tichu yoaa muhure cohtaro nina. Muhare bihoro taropu nina. Æ jipachuta, muhu sehe yuhu mehne buhiri tichu yoare yuhduruca masiihca muhu —ni yahuha tiro Caĩre.

⁸ Æ yoa cū numu juna tiro Caĩ to bahuro Abere tja butu jiropure tinino waharo taro pjiha. To pjichu, tina wahaha juna. Tópū sū, tiro Caĩ sehe to bahuro Abere ñaha, wajānocaha.

⁹ Baharo Yawe sehe tirore ò sehe ni sinitu ñuha:

—¿Nohoi jijari mu bahu Abe? —ni sinitu ñuha.

—Buah. Masieraja. ¿Tirore ñu wihboriro jijari yuhu? —ni yuhtiha tirore.

¹⁰ To ã nichu tuhorō, tiro sehe ò sehe niha:

—¿Dohse yoacu tacu mu bature wajāri muhu? Ñuhi yuhu mu bahu di mu cohāchu. To di “Yuhure wajārirore buhiri dahrebasaga” ni, sañurucuro yoaro sehe coa taca yuhure. ¹¹ Æ jicu mipure òpe tahari buhiri tiihca muhu. Ahri yahpai jiriore muhure cohā wio waroaihtja yuhu, mu bahu to di cohāri yahpare. ¹² Tuhsu, tuaro dahraihca muhu. Tuarō dahrapachuta, mu toaa ne waro dica mariahca. Jipihtiro ahri yahpare paró tini sito taihca, ne soro marieno —niha tiro Caĩre.

¹³ To ã nichu tuhorō, tiro sehe ò sehe ni yuhtiha:

—Ne tó puro waru mu yuhure buhiri dahrechū, yuhu ne bihosi. ¹⁴ Micha muhu yuhure ahri dihtare cohā wiora. Pjacuoriro tini sito taihca yoaropu, yuhure mu ñueraropu. Jipihti ahri dihtare ne soro marieno paró yu tini sito tarucuro watoi, dohse jiriore yuhure ñu, wajā cohānohca —ni yuhtiha tiro Caĩ sehe.

¹⁵ To ã nichu tuhorō, Yawe sehe ò sehe ni yahu cū namoha tjoa:

—Muhure wajāboriro siete tahari waro buhiri tirohca. Æ jia ne noa muhure wajā duasi —ni yahu cūha.

Æ jiro paina Caĩre ñuhtina ti ñu masihtō noano, to pjacure quihō ōha. “Tirore dohse jirore, wajā duariro sehe siete tahari waro buhiri tirohca” ti ni ñu masihtō noano, ã quihō ōha Caĩre. ¹⁶ Æ yoa tiro Yawe mehne durucu ducumariro cjiro wahaa wahaha juna. To jiri yahpare wijaa dojoaro niha. Nodō wama tiri dihtapu sū, tói jiha. Edē yahpa sehere sū muja taro sehe tjuaha tó.

Caĩ ya da poto waro jira ahri

¹⁷ Æ yoa tiro Caĩ sehe tí dihtapure to namono mehne jiha. Ticoro niji pocoro waha, cūiro munocāre Enoco cjihtore pohna tiha.

Æ yoa Caĩ sehe maca yoa dūcaa tiha tóre. Tí macare yoa tuhsu, to macuno wamareta wamoaha. Enoco wamoaha tí macare.

¹⁸ Ñ yoa tiro Enoco cūhu pohna tiha Irade cjihtore. Tiro Irade cūhu pohna tiha, Mehujae cjihtore. Mehujae cūhu pohna tiha Metusae cjihtore. Metusae cūhu pohna tiha Láme cjihtore.

¹⁹ Tiro Láme sehe puaro numiare namo tiha. Căcoro Adá wama tiricoro, pacoro Sila wama tiricoro jiha. ²⁰ Ticoro Adá sehe Jaba wama tirirore pohna tiha. Tiro Jaba sehe coă wahiquina cahsari wuhusere dahre, ji muhtari dahpoto jiha. Ñ yoa wahiquina nuina, wachuare, cabraare, ovejaare nuriro cūhu jia tiha. ²¹ Ñ yoa cūiro bahu tiha Juba wama tirirore. Tiro Juba sehe buaputēa macaare, dahra biha putipeare, tuhsu, paye putipea macaa cūhure coă yoa muhtararo bagaro jiha.

²² Ñ yoa pacoro Sila, Láme namono sehe cūiro pohna tiha Tuba Caī cjihtore. Tiro comaa mehne, ñ jichu paye comaa bronce wama tia mehne cūhure paye baro dahreriro jiha. Tíre wahma dahra muhtari dahpoto jiha tiro. Ñ yoa tiro căcoro baho tiha. Naamá wama tiricoro jiha ticoro.

²³ Ñ yoa tiro Láme sehe cū taha to namosanumiare Adá, Silare ñ sehe niha:
—Noano tuhoga musa.

Michapucacāre cūiro wahmunore wajāhi yuhū,
yuhure to cjā, cami dahreriro buhiri.

²⁴ Caīre wajā duamarirore
siete tahari buhiri tiriho jichu,
tí pja pinihta yuhure wajāro sehe
setenta y siete tahari buhiri tirohca
—niha tiro Láme to namosanumiare.

Adão, Eva pairore pohna ti namoha

²⁵ Ñ yoa Adão, Caī pucuro sehe, to namono mehne ji, ticoro sehe cūiro munocā pohna ti namoha. Pohna tiri baharo, ñ sehe niha ticoro:

—Pairocā yu macucā cjihto Cohamacu yuhure wara tjoa. Caī to wajāro cjiro cohtotariro jira —niha ticoro.

Ñ jiro tirocāre Sete ni wama pisuha. (*“Sete” nino, “to wariro” nino, ahri pua wama cūno sehe bo cure bisica hebreo masa ya dusero mehne*)

²⁶ Ñ yoa tiro Sete cūhu cūiro pohna tiha. Tirocāre “Enoso” ni, wama pisuha.

Ñ yoa tiro Sete to jiri pja macaina sehe Cohamacure ño payoa, Yawe niri wama mehne ño payo ducaa tiha.

Adão ya da quiti jira ahri

5 ¹ Cohamacu to wahma bajuamehneriro Adão ya da quiti jira ahri. Tiro Adãoe bajuamehneno, to yoaro seheta jia tihtirore bajuamehneha.

² Munore, numino cūhure bajuamehneha. Tinare bajuamehne tuhsu,

—Ahrinare noano wahajaro —ni cūha.

To bajuamehneri dachoihta tinare,

—“Masa” wama tijaro ahrina —niha tiro.

³ Ñ yoa Adão 130 cūhmari to cjuachu waro, to macuno masa bajua tiha, Sete cjihto. Tiro to pucuro yoaro seheta jia tiriho jiha. ⁴ To macuno Sete bajuari baharo, Adão sehe 800 cūhmari cati namo, paina mua, numiare pohna ti namoha. ⁵ Jipihtiro 930 cūhmari cjuaro, yariaa wahaha.

⁶ Ñ yoa Sete 105 cūhmari to cjuachu waro, to macuno Enoso cjihto masa bajuaha. ⁷ To masa bajuari baharo, Sete sehe 807 cūhmari cati namo, paina

mua, numiare pohna ti namoha. ⁸ Jipihtiro 912 cūhmari cjuaro waro, yariaa wahaha.

⁹ Ā yoa tiro Enoso 90 cūhmari to cjuachu waro, to macuno Cainā cjihto masa bajuaha. ¹⁰ To masa bajuari baharo, Enoso sehe 815 cūhmari cati namo, paina mua, numiare pohna ti namoha. ¹¹ Jipihtiro 905 cūhmari cjuaro waro, yariaa wahaha.

¹² Ā yoa tiro Cainā 70 cūhmari to cjuachu waro, to macuno Mahalale cjihto masa bajuaha. ¹³ To masa bajuari baharo, Cainā sehe 840 cūhmari cati namo, paina mua, numiare pohna ti namoha. ¹⁴ Jipihtiro 910 cūhmari cjuaro waro, yariaa wahaha.

¹⁵ Ā yoa tiro Mahalale 65 cūhmari to cjuachu waro, to macuno Jére cjihto masa bajuaha. ¹⁶ To masa bajuari baharo, tiro Mahalale sehe 830 cūhmari cati namo, paina mua, numiare pohna ti namoha. ¹⁷ Jipihtiro 895 cūhmari cjuaro waro, yariaa wahaha.

¹⁸ Ā yoa tiro Jére 162 cūhmari to cjuachu waro, to macuno Enoco cjihto masa bajuaha. ¹⁹ To masa bajuari baharo, Jére sehe 800 cūhmari cati namo, paina mua, numiare pohna ti namoha. ²⁰ Jipihtiro 962 cūhmari cjuaro waro, yariaa wahaha.

²¹ Ā yoa tiro Enoco 65 cūhmari to cjuachu waro, to macuno Matusalē cjihto masa bajuaha. ²² Tiro Enoco sehe Cohamacu to cahmano sehere “Potocāta jira” ni, yoa tiha. Ā jiro Cohamacu tirore nū ji coaha. Ā yoa to macuno Matusalē masa bajuari baharo, tiro 300 cūhmari cati namo, paina mua, numiare pohna ti namoha. ²³ Jipihtiro 365 cūhmari waro cati tiha tiro. ²⁴ Cohamacu to ji coaro seheta ahri yahpai jia tiha. Cū numu catirirore Cohamacu to naa wahachu, wacūeno butia wahaha tiro.

²⁵ Ā yoa Matusalē Cohamacu naariro macuno 187 cūhmari to cjuachu waro, to macuno Láme cjihto masa bajuaha. ²⁶ To masa bajuari baharore, Matusalē sehe 782 cūhmari waro cati namo, paina mua, numiare pohna ti namoha. ²⁷ Jipihtiro 969 cūhmari cjuaro waro, yariaa wahaha.

²⁸ Ā yoa Láme 182 cūhmari to cjuachu waro, to macuno cjihto masa bajuaha. ²⁹ To macnocāre “Noé” ni, wama pisuha, masa sochu yoahtiro to jichu masino. Ā jiro wihāiro Noé to dohse jia tihtire ō sehe ni yahu cūha to pucuro Láme:

—Dóiputa ahri yahpai jiina ti yūhdurucari buhiri Yawe tuaro dahrachu yoa dutimaha mari jipihitina masare. Ā jina mari chūhtire tuaro mari dahraa mehne bocaro cahmana. Wiho mejeta ahriro nijinocā marine tíre sochu yoa-rohca —ni cūha. (“Noé” nino, “sochu yoariro” nino, ahri pua wama cūno sehe *bo cure bisica hebreo masa ya dusero mehne*)

³⁰ Noé masa bajuari baharore, Láme sehe 595 cūhmari cati namo, paina mua, numiare pohna ti namoha. ³¹ Ā yoa jipihtiro 777 cūhmari cjuaro waro, yariaa wahaha.

³² Ā yoa tiro Noé sehe 500 cūhmari cjuaro waro, ahрина tiaro muare pohna tiha. Sē, Cā, Jafe wama tiinare Noé pohna tiha.

Masa űaa dihta ti yoari buhiri, Cohamacu mehne buhiri tiha

6 ¹ Ā yoa masa ahri yahpare jiina cjerocā mehne masa putia tiha. Ahri yahpare ji sahsea taa niha tina. ² Ā yoa tina masa pohna numia, nuh-miare Cohamacu yaina sehe noano nū, ji coaha. Ti nū ji coaro sehe tina, ti

ñu ji coa numiare ñu, beseha. Bese, namo tiha. ³Ti ã yoachũ ñuno, tiro Yawe sehe ò sehe ni tuhotuha: “Yuhũ mipure ahrina masare ã catirucuchũ yoasi. Yu yoaro seheta jiina waro jierara. Wiho jiina jira. Ì jiro mipure ciento y veinte cùhmari ti catihtõ tjuasininohca tinare” ni, tuhotuha.

⁴À yoa tí pjare Cohamacũ yaina sehe masa pohna numia, ti besea numia mehne ji, tina pohna tiha. Ti pohna sehe ñano muaina jiha. Tuhsũ, tí pjapure ti tuaro durucu, wacũnohorina jiha. À yoa baharopũ cùhure ãta jia tiha tina.

⁵Yawe to ñuchũ sehere, jipihtina masa ti ñaa jia tia yuhdua wahaha. Tina tiro mehne ñano buhiri tichũ yoaa macaare ã yoarucu, ñaa dihtare ã wacũrucuina baro jia tiha. ⁶Ti ã jia tichũ ñuno, tuaro bujua witiha Yawe. Masa to bajuamehnerina to yajeripohnare tuaro purichũ yoaha. ⁷À jiro tiro ò sehe ni wacũha: “Ahrinare, masa yu bajuamehnerinare, jipihtina wahiquina dohse jiinare, ã jichũ wuina cùhure wajã pahñoihtja. Jipihtinapũ ahri yahpai jiina yariaahca. Yu bajuamehnerina yu yajeripohnare tuaro purichũ yoara” ni, tuhotuha tinare.

⁸À jiparota, Noé sehere noano ñu ji coaha tiro.

Cohamacũ Noére dohoria pjiriare yoa dutiha

⁹Ahri Noé ya quiti jira. Cohamacũ Noére to yahuaire “Potocã jira” ni, yoarucuriro to jichũ, tiro ñu ji coaha tirore. Tiro to catiri pjare tiro mehne macaina watoi tiro dihta Cohamacũ cahmasãare yoa, jia tiha. ¹⁰À yoa tiro tiaro mua pohna tiha, Sê, Cã, Jafe cũhũ cjihtire.

¹¹À yoa Cohamacũ to ñuchũ, ahri yahpai jiina, masa ñaina, cahmacheina, cahma wajãina paró ji sahsea tiha. ¹²Tiro Cohamacũ ñuha tina jipihtina masa noaa jia tia sehere, ñaa mehne ti cohtota, jia tichũ. ¹³À ñuno, tiro Noére ò sehe niha:

—Ahrina masare, ahri yahpau jiinare wajã pahñoi tai nija, ahri yahpa ti cahmachea, ti cahma wajãa, ti ji sahsea wahachũ yoari buhiri. Tuhsũ, ahri yahpa cùhure jipihtiropure dojomehnei tai nija. ¹⁴À jicu muhũ yucuri, noaa yucuri mehne cùria dohoria, pjiria yoaga. Tiare tuhsui, tia puhichapure tahtia poca dahrega. À yoa tuhsũ, comape mehne tiare bihaga. ¹⁵À yoa pjiria dahrega. Ò puro yolaria, ò puro saria, ò puro muaria dahrega. Ciento y treinta y cinco metro yolaria yoa, ã yoa saro sehe veintidó metro saria waro yoa, ã yoa muano sehe trece metro noano pa metro dacho maca mehne muaria dahrega. ¹⁶Tiharica sehere cũ metro dacho maca mujipure wahã suhto pano tiha duhuga. Tuhsũ, tia dohoriare tia tjuru cjuaria dahrega. Cũ buhusehihta sãari sopaca tiria dahrega tiare.

¹⁷Ahri yahpare mmoi tai nija. Jipihitiri yahpare catiro cjuaina yariaahca. Ne cũiro duhsaro baro marieno yariaahca. ¹⁸Wiho mejeta muhũ sehere mionore yu yuhdori baharo, muhure noaa macaare yahu cũ namoihtja yuhũ. Tia dohoriapũ muhũ, mu pohna mua, mu namo, ã jichũ mu macũ namosanumia cũhũ samunahca. ¹⁹Muhũ sehe wahiquina ahri yahpai jiiinapere, muno, numinore dohoria puhichapũ na sãaihca, muhũ mehne ti yuhdu witihto sehe. ²⁰Cãa wahpari wahi-quinape, muno, numino, ã jichũ wuina, chihchõina, buaina, tinape muhũ cahai taahca ti yuhdu witihto sehe. ²¹Tuhsũ, muhũ sehe mu chuhti macaape, wahi-quina cũhũ ti chuhti macaape tia puhichapure wihboihca —niha Yawe Noére.

²²À yoa tiro Noé sehe Cohamacũ to dutiro seheta yoaha.

Yawe jipihtiri yahpare mini pihtiachu yoaha

7 ¹Baharo, tiro Yawe Noére õ sehe ni yahuha:
 —Mũhu cūirota jira, mũhu mehne macaina watore yu yahware
 “Potocã jira” ni, yoarucuro. Ā jicu mũhu, mu namo, mu pohna mua, ā jichu
 mu macu namosanumia cūhu dohoriapure samunahca. ²Ā yoa musa yuhupure
 ño payona, wahiquina wajā, jū wa muonohrinare, cāa curuari macaina
 siete wahpari naga. Ā jichu yuhupure wajā, jū wa muonohoeraina sehere,
 cū wahpa dihta naga. ³Ā yoa wuina sehere mua siete, numia siete naga, ti
 pihtierahto sehe. ⁴Yũhu sehe siete dachori baharo, coro tachu yoai tai nija.
 Cuarenta numuri waro, ā dachori, ñamini, coro tarucurohca. Ahri yahpai
 jiinare, jipihtina yu bajuamehnerinape wajā pahñoi tai nija. Ne cūiro duhsaro
 marieno wajihtja —niha tiro Noére.

⁵Ā yoa Noé sehe tiro Yawe to dutiro seheta to dutiare yoa pahñoha.

⁶Tiro seisciento cūhmari waro cjuaa tiha, ahri yahpa, jipihtiri yahpa mini
 ducachu. ⁷Tiro dohoriapure to pohna mua mehne, to namono, ā jichu to
 macu namosanumia tiaro numia mehne samuha. Jipihtiri yahpa mininore tia
 mehne yuhdu witia taa niha. ⁸Yawepure wahiquina ti jū wa muonohrinape,
 tuhsu, ti jū wa muonohoeraina cūhu, wuina, buaina jipihtina samua wahaha.
⁹Mũno, numino, puaro, puaro dihta Noé cahai ta, tiapure samuha. Cohamacu
 Noére to dutiro seheta wahaha.

¹⁰Siete dachori baharo, jipihtiri yahpa mini ducaha. ¹¹Noé seisciento
 cūhmari to cjuachu waroi, tí cūhma cū sū, pa sūre dieciete dachori ñaha
 wahcānoi, Yawe ahri yahpare paró yitichu yoa, tí wahsaripu co tũhnu wija
 tachu yoaha. Tuhsu, muano cūhare āta tũhnu boraro yoaro sehe tarucuha.
¹²Cuarenta numuri waro ā dachori, ñamini ahri yahpare coro tuaro tũhnu
 boraro yoaro sehe tarucuha, ne duhuro marieno.

¹³Ā yoa coro ta ducari dacho warore Noé sehe dohoriapu samuha, to pohna
 mua mehne, Sē, Cā, Jafe wama tiina mehne. Ā yoa to namono, to macu
 namosanumia tiaro numia, jipihtina tina samuha tiapu. ¹⁴Ā yoa wahiquinape
 nuina, nucu macaina, buaina, chihchōina, ā jichu wuinape cūhu jipihtina
 tina curuaripe samuha, tina masa mehne. ¹⁵Jipihtina wahiquinape Noé cahai
 mũno, numino mehne puaro, puaro dihta taa, samuha tiapu. ¹⁶Wahiquinape,
 jipihtina catiro cjuaina puaro, puaro samuha, mũno, numino mehne. Cohamacu
 Noére to ni yahuriro cjiro seheta wahaha. Ā yoa ti samu pihtichu mũno,
 Yawe to basita tia dohoria samuri sopacare biha dapoha.

¹⁷Ā yoa cuarenta dachori waro ahri yahpare ā mini mujarucuha. Ahri
 yahpa mini mũja taro, cūno potori tia dohoria cūhu pahsa wahcā ducaha
 yahpa buire. ¹⁸Ā yoa tí co sehe sie sehe mehne, sie sehe mehne mini mũja
 taha. Co mujano cūno potori tia dohoria cūhu pahsa mujaha. ¹⁹Tí co wũru
 ahri yahpai tũ yucuri, paye yucuri bui mua yuhdua yucuri sehere tí co wũru
 mini yuhdu mujaa wahaha. ²⁰Mini yuhdu mujaa waha, tí tũ yucuri, paye
 yucuri bui mua yuhdua jia yucuri sehere siete metro waro mini yuhdu mujaa
 namoha. ²¹Masa ahri yahpai jimarina, wuina, ā jichu wahiquina nuina, nucu
 macaina, buaina, chihchōina cūhu noano waro yaria pihtia wahaha. ²²Jipihtina
 waro wuuri yahpai jimarina, yajeri naina baro yaria pihtia wahaha.
²³Tiro Noé, ā jichu tiro mehne tiapure samuina dihta yuhduha. Painapu ahri

yahpai jimarina masa, wahiquina, nuina, n̄c̄u macaina, w̄uina, buaina, chihchōina, tina sehe yaria pihtia wahaha.

²⁴ Ñ yoa ciento cincuenta dachori waro tí co w̄ū sehe jipihtiri yahpap̄ure munano tjuar̄c̄u suha.

Jipihtiri yahpa minimariro witiwe dija d̄ucaha

8 ¹⁻⁴ Cohamac̄u Noé c̄uh̄ure, ã jich̄u jipihtina wahiquina, tia dohoriap̄u samurina jipihtinare wac̄uha. Tó seheta wac̄u, tiro wihnonore wā tu d̄ucach̄u yoaha tí co w̄ū buire. Tuhs̄u, ahri yahpai co t̄uhn̄u wija m̄uja ta wabsari cjirire wijaa duhuch̄u yoaha. M̄uanop̄u pj̄iro coro t̄uhn̄u boraro yoaro sehe tamariro c̄uh̄ure ta duhuch̄u yoaha. To ã yoch̄u, tí co w̄ū sehe witi dija d̄ucaha. Witi dija d̄uca, ã witruc̄uha juna. Ñ yoa tó sehe miniri c̄uh̄mare seis s̄uri pihti, pa s̄u diecisiete dachori ñaha wahc̄anoi, ciento cincuenta dachori mini d̄ucari baharo, tia dohoria t̄uc̄u, Arara wama tiri yahpai jid̄u bui witiwe pja suha. ⁵ Tó witiwe pja s̄uri baharo, tí co w̄ū sehe ã witi dijarucusiniha. Ñ witi dijarucusini, te p̄ua s̄u noano, pa s̄u dacho maca yuhd̄uri baharo, t̄u yuc̄uri sohtoari baju d̄uca tuhs̄u juna.

⁶ T̄u yuc̄u sohtoari baju d̄ucari baharo, cuarenta dachori yuhd̄uri baharo, Noé tia dohoria mahari sopa pahmac̄are pj̄ooha. ⁷ Pj̄oo tuhs̄u, c̄ūiro w̄uriro, ñ̄īiro, ur̄ia chur̄īore wa wioha. Tiro sehe w̄u wijaa wahc̄a, tia dohoria buip̄u majare m̄ujaha. W̄u wahc̄a tjoa, pari turi majare tjuaa wihi m̄uja, yoaha tiro, te ahri yahpa bajua caha such̄up̄u.

⁸ Ñ yoa tiore wa wiori baharo, c̄ūiro buja c̄uh̄ure wa wioha tjoa. Ñ yoaro, “¿Dihta bajutjiāh̄jari?” ni masi duaro niha tiro Noé. ⁹ Tiro buja sehe w̄u wijaa, te nohoi to so pisaboro, to so nuju suboro ne bocaeraha. Co w̄ū sehe jisiniha yahpa buire. Ñ jiro dohoriap̄ure w̄u majare tjuaa wihiha. To ã wihich̄u ñ̄ano, tiro Noé sehe to wamomac̄are siō wio, tiroc̄are ñaha, tia dohoria puhichap̄u naroca sōha.

¹⁰ Ñ yoa tiro Noé siete dachori cohta namoha. Cohta tuhs̄u, baharo tjoa tiro bujare wioha. ¹¹ Tí pja tiro wijariro, nahi dijar̄o wahtar̄oi tia dohoriap̄u w̄u majare tjuaa wihiha. ¡Olivo wama tiri yuc̄uc̄u d̄up̄uc̄are to quēnoc̄a mehne w̄up̄o ñahatjiāh̄no, wihiha! Tí d̄up̄uc̄are to na wihich̄u ñ̄ano, tiro Noé sehe “Dihta bajutjiāh̄ca” ni, masiha. ¹² Ñ yoa tiro siete dachori cohta namo, pari turi tiro bujare wioha tjoa. Tí pja wahariro bujac̄a tiore ne w̄u majare tjuaa wihieraha juna. Ña butinocaha.

¹³ Noé seisciento un c̄uh̄mari to c̄uach̄u waro, dihta sehe buti caha suha. Ñ yoa wahma c̄uh̄mare, wahma ji d̄ucari s̄ure c̄u dacho ñahan̄oi Noé dohoria w̄uh̄u mohanore nawe, ñ̄uroca wioha. Buti caha s̄uri yahpa bajuha. ¹⁴ C̄u s̄u pihti, pa s̄u veintisiete dachori wahar̄oi yahpa sehe w̄ua s̄aa waroaha juna. ¹⁵ Ñ yoa Cohamac̄u Noére ñ sehe niha:

¹⁶ —Ahria dohoriare wijaahga m̄uh̄u, ã jich̄u m̄u namo, m̄u pohna m̄ua, m̄u mac̄u namosanumia mehne wijaahga. ¹⁷ Jipihtina wahiquina w̄uina, nuina, n̄c̄u macaina, buaina, chihchōina c̄uh̄ure m̄uh̄u mehne ahriai jirinare wioa, pari turi ahri yahpa, jipihtiri yahpare paȳu ti masa puti sahsehto sehe —ni yahuha Cohamac̄u Noére.

¹⁸ To ã nich̄u t̄uhoro, Noé, to pohna m̄ua mehne wijaaha. Ñ jich̄u to namono, to mac̄u namosanumia c̄uh̄u wija taha. ¹⁹ Jipihtina wahiquina, n̄c̄u macaina, nuina, buaina, chihchōina, ã jich̄u w̄uina c̄uh̄u tiai jiina wija taha.

²⁰ Ñ yoa wija ta pihtiri baharo juna, tiro Noé sehe tãa mehne pari tuhu dahre muoha. Dahre muo tuhsu, Noé cãina wahiquina, ã jichu wuina cũhure masa Yawere ño payoa taa, ti wajãsoinapere beseha. To beserinare wajã, tãa tuhu, to cahnori tuhu buipu jũ wa muoha. Tó sehe yoa, Yawere ño payoha.

²¹ Noé to wajã, jũ wa muorina me sitiri pohna sehe Yawere suchu, Noé mehne noano ji coaha. Tó seheta ji coaro, tiro ò sehe ni tuhoutuha to yajeripohnapu: “Mipure tina masa, wihãina jiaputa ñaa dihtare tuhoturucu, yuhu mehne buhiri tiina ti jipachuta, tí buhiri ne pari turi ahri yahpare, jipihtiri yahpare ñano wahachu yoa namosi. Ñ jichu wahiquina cũhure jipihtinare masa ya buhiri ne wajã pahño namosi, yu yoariro cjiro sehe” ni, tuhoutuha Cohamacu.

²² Ò sehe ni tuhoutu batoaha:

“Ahri yahpa to jisinchu,
toasori pja jirucurohca.

Tí toa macaa dicha tiri pja cũhu jirucurohca.

Ñ yoa puhiri, cuhmari, dachori, ñamini cũhu
ti jiri pja ã jirucuahca” ni, tuhoutuha Cohamacu.

Cohamacu “Noano wahajaro” ni payoha Noére

9 ¹ Cohamacu Noére, ã jichu to pohndare ò sehe niha:

—Noano wahajaro musare. Payu pohna ti, paró ji siterucu suga ahri yahpare. ² Jiphtina wahiquina musare cui ducuahca. Jiphtina wuina, yahpa macaina, ã jichu co puhichapu macaina cũhu musa doca macaina cjihti cña. ³ Jiphtina wahiquinare musa chu duainare chu masina. Ahrire jiphti musa chuhti cjihtire cña. ⁴ Cũno dihtare, di tia dihire musa ne chu masierara. Tíre chu duana, dire noano cohã pahño muhtaga. Musa chuhtina di mehne catiro cjuara. Ñ jina tíre ne waro musa chu masierara.

⁵ Ñ yoa cñiro masuno, o cñcoro masono paio masunore ti wajächu, wajãrinare wajã cahmano cahmana. Tuhsu, dohse jiro wahiquiro masuno sehere to wajächu, tiro cũhure wajã cahmano cahmana. ⁶ Masare yu bajuamehneinare yu jia tiare cñi. Ñ jiina jichu, cñiro masuno o cñcoro masono paio masunore to wajächu, wajãrinare wajã cahmano cahmana.

⁷ Ñ yoa musa sehe ahri yahpare payu pohna ti, masa putiga. Ahri yahpare paróre ji sahserucu suga musa —niha Noére, ã jichu to pohna cũhure.

⁸ Ñ yoa Cohamacu Noére, to pohna cũhure ò sehe ni namoha:

⁹ —Mipure quihõno waro musare cñihtja. Yu yahuhtire sohtori tihtja musare, tuhsu, musare ji nũnũ tihtina cũhure. ¹⁰ Ata yoihtja wahiquina musa mehne jiinare, wuinare, nuinare, nucu macainare, buainare, chichõinare, jiphtina dohoriapu musa mehne yuhdurinare. Tuhsu, baharopu cũhure dohse jiina jiphtiri yahpai catiro cjuahntinare quihõno yoihtja. ¹¹ Ne musare yu ò sehe ni yahuare cohtotasi. Ne pari turi jiphtina masare, ã jichu wahiquina cũhure ñano yoa, mio wajã pahño namosi. Jiphtiri yahpare ne pari turi mio dojomehne namosi.

¹² Ñ yoa ò sehe jirohca yu musare, ã jichu wahiquina cũhure mipu yu yahua cjiire, “Potocãta jira” ni, musa ã masirucuhto sehe. ¹³ Yu ya buhini soro coro tjurupu bajuaroahca. Yu ò sehe niri cjiire ã wacũ quihõrucuhti soro jirohca tó, musare, ã yoa jiphtina wahiquina cũhure. ¹⁴ Yuhu sehe coro tjururire muja tachu yoihtja. Tõpu ya buhini soro bajuaroahca. ¹⁵ To ã bajuachu ñui, musare,

ã jichu jipihitina wahiquinare michapucacã yu yahware wacũihtja. Ne pari turi jipihitiri yahpare miono mehne buhiri dahre namosi. ¹⁶ ã jicu tí sorore coro tjururi watoi to bajuachũ ñui, yuhũ sehe wacũihtja. Yuhũ masare, ã jichu wahi-quina cũhure yu michapucacã ã niare wacũihtja. Yuhũ tíre ne tuhutu cohtotasi. ¹⁷ Jipihitina masare, ã jichu wahiquina cũhure tí soro mehne yu niriro seheta yoariro yu jirore masi mujachũ yoaihtja —ni yahu batoaha Noé.

Ahri quiti Noé, ã jichu to pohna mua ya quiti jira

¹⁸ ã yoa tiro Noé pohna sehe dohoria mehne yuhdurina Sē, Jafe, ã jichu Cã wama tiina jiha. Mua dihta jiha tina. Cã jiha Canaã pucuro. ¹⁹ Ahrina tiaro masa jipihitiri yahpa macaina, masa curuaripere ji dũcahtina cjihti jiha.

²⁰ ã yoa ti pucuro Noé sehe se toa duca muhtariro ji, se wese cjihtore yoa, toaha. ²¹ Cũ numũ se core sihni, tiro cahaa wahaha. To wuhũ, wahiquina cahsari mehne to yoari wuhui tiro ne suhti marieriro caha cahaa wahaha.

²² ã yoa to macũno Cã, Canaã pucuro sehe Noé to suhti marieriro jichu ñũno, to wahmisumare yahu sitero wahaha. ²³ To ã nichu tuhoa, Sē, Jafe, tina puaro sehe suhti cahsarore na, ti comapariacari buipũ tí cahsarore cjã payo-roca boro, du siti wahcã, ti pucurore moha cũha. Ti ã moha cũno wato, tina pa sehepũ ñurocaha, suhti marierirore ñu duaera.

²⁴ ã yoa tiro Noé sehe, tirore caha parĩni baharo, wahcã wihiha. Wahcã wihi, tiro tuhoha to macũno Cã, dũhsariropu, tirore to yahu siteriro cjirore.

²⁵ ã tuhoriro jiro, Cã ya buhiri to panamino Canaã sehere, ã jichu tirore ji nunũ tihtina cũhure Cohamacure õ sehe ni sini payoha:

—Cohamacu ñano wahachu yoajaro Canaãre,

ã jichu tirore ji nunũ tihtina cũhure.

Cã wahmisumata cahamaca tijaro tina cũhure —ni sini payoha
Noé Cohamacure.

²⁶ Tuhsu, Sē sehere õ sehe ni sini payoha:

—Yawe yu Cohamacu noano wahachu yoajaro Sēre.

ã yoa tiro Canaã cũhu sehe,

Sē cahamaca cjihti waro tjuajaro —ni siniha.

²⁷ Tuhsu, Jafe sehere õ sehe ni, sini payoha:

—Cohamacu noano wahachu yoajaro Jafere.

Payu pohna ti,

masa putichu yoajaro.

Pjiri curua wahachu yoajaro tirore.

ã yoa Sē ya macari watoi jijaro tiro.

ã yoa Canaã, ã jichu tirore ji nunũ tihtina cũhu

Jafe cahamaca tjuajaro —ni sini payoha ti pucuro,
to pohna tiarore.

²⁸ ã yoa tiro Noé sehe tresciento cincuenta cuhmari cati namoha, jipihitiri yahpa miniri baharore. ²⁹ Tiro noveciento cincuenta cuhmari cjuaro, yariaa wahaha.

Yawe jipihitina masa cũ dũsero durucuinare payu dũseri durucuchũ yoaha

11 ¹ Tí pjapũre ahri yahpai jiina jipihitnaputa cũ dũserota durucua timaha. ² ã yoa tina Noé baharo macaina sũ mũa taro sehe wahaa

wahaa tiha. Waha, te Sina wama tiri yahpapu su, tópu cū wapa noano tja tiri wapare boca su, ji caha suha. ³Tí yahpai jia, ti basi ò sehe niha:

—Dihta cjoarire yoa, baharo pichacapu jūjihna ti butihtō sehe —niha.

Ā yoa tina wuhuse dahre muoa taa, dói jia comape mehne doho mujaha. ⁴Ā yoa ti basi ò sehe ni namoha tjoa:

—Mari jipihtina cū maca dahrejihna. Tuhsu, cū wuhu, muanopu sari wuhu yojihna. Mari tó sehe jia tina, wacūnohoina waro jinahca. Baharopure paina masa wacūahca marine. Ā jichu mari tó sehe jia tina, mari jipihtiri yahpare paró waha sitesi —niha ti basi.

⁵Wiho mejeta Yawe sehe tí macare, ā jichu tí macai jiri wuhu, ti muanopu suchu yoa duari wuhure nūno taro, dija taha juna. ⁶Tiro to basi ò sehe ni tuhoutuha juna: “Ahrina cū curua macaina ji, ā yoa cū duserota durucua, ti dohse yoa duaro sehetā yoa masiahca. Ā jia ne ahrire dahre duhu duasi” ni, tuhoutuha. To ā ni tuhouturi baharo, tiro majare mujaa wahaha. ⁷Ti dahre duhu duaerachu nūno, tiro to basi ò sehe ni namoha:

—Basa pari turi dijaana. Mari tinare cū dusero ti durucumararo cjirore payu duseri waro wahachu yojihna, tina ti basi ti tuhoerahto sehe —niha tiro juna.

⁸Tó sehetā yoa, tiro tinare jipihtiri yahpapu waha sitechu yoaha. Ā jia tina ti dahremari macare dahre duhuha juna. ⁹Ā jia tí macare Babe wamoaha. “Tuho bocaeraina wahaha” ni duari wama jica tó. Tó ijinare Yawe ahri yahpape paró waha sitechu yoaha juna.

Ahri quiti Sē ya curua macaina ya quiti jira

¹⁰Ā yoa Sē ya da macaa quiti jira ahri. Ahri yahpa jipihtiropure miniri baharo, pua cuhma yuhduha. Tí pjare Sē cien cuhmari to cjuachu waro, Arfaca cjihto masa bajuaha. ¹¹To masa bajuari baharo, tiro Sē sehe quiniento cuhmari cati namo, paina mua, numia pohna ti namoha.

¹²Ā yoa tiro Arfaca treinta y cinco cuhmari to cjuachu waro, to macuno Sela cjihto masa bajuaha. ¹³To masa bajuari baharo, tiro Arfaca sehe cuatrocientos tres cuhmari cati namo, paina mua, numia pohna ti namoha.

¹⁴Ā yoa tiro Sela treinta cuhmari to cjuachu waro, to macuno Ébere cjihto masa bajuaha. ¹⁵To masa bajuari baharo, tiro Sela sehe cuatrocientos tres cuhmari cati namo, paina mua, numia pohna ti namoha.

¹⁶Ā yoa tiro Ébere treinta y cuatro cuhmari to cjuachu waro, to macuno Péle cjihto masa bajuaha. ¹⁷To masa bajuari baharo, tiro Ébere sehe cuatrocientos treinta cuhmari cati namo, paina mua, numia pohna ti namoha.

¹⁸Ā yoa tiro Péle treinta cuhmari to cjuachu waro, to macuno Reú cjihto masa bajuaha. ¹⁹To masa bajuari baharo, tiro Péle sehe doscientos nueve cuhmari cati namo, paina mua, numia pohna ti namoha.

²⁰Ā yoa tiro Reú treinta y dos cuhmari to cjuachu waro, to macuno Seru cjihto masa bajuaha. ²¹To masa bajuari baharo, tiro Reú sehe doscientos siete cuhmari cati namo, paina mua, numia pohna ti namoha.

²²Ā yoa tiro Seru treinta cuhmari to cjuachu waro, to macuno Naco cjihto masa bajuaha. ²³To masa bajuari baharo, tiro Seru sehe doscientos cuhmari cati namo, paina mua, numia pohna ti namoha.

²⁴Ā yoa tiro Naco veintinueve cuhmari to cjuachu waro, to macuno Téra cjihto masa bajuaha. ²⁵To masa bajuari baharo, tiro Naco sehe ciento diecinueve cuhmari cati namo, paina mua, numia pohna ti namoha.

²⁶ Ñ yoa tiro Téra sehe setenta cuhmari cjuaro, tiaro pohna tiha, muare. Abrā, Harā, Naco jiha ti wama.

Térare ji turiaina ya quti jira

²⁷ Ñ yoa Térare ji turiaina ya quti jira ahri. Téra tiaro pohna tiha, muare. Abrā, Harā, Naco jiha ti wama. To macuno Harā cūhu tiaro pohna tiha. Muno sehe Lote wama tiro, ã jichu numia sehe Milcá, Iscá wama tia numia jiha. ²⁸ Tiro Harā sehe to bajuari maca cjiroihta to pucuro Térare yaria wahyoha wahaa tiha, Mesopotamia yahpai, Ur wama tiri macaihta.

²⁹ Harā munono bahuero Naco sehe tiro munono macono Milcáre namo tiha. Harā munono wahmino Abrā sehe Saraire namo tiha. ³⁰ Ticoro nijinocá bocaera tiha.

³¹ Abrā cūhu pucuro Téra sehe Mesopotamia yahpai jiri maca, Ur jiro wiaa, Canaā yahpapu waharo niha. Tí yahpapu waharo, to macuno Abrāre, to panamino Lotere, ã jichu to macu namono Sarai cūhure naaha tiro. Wiho mejeta tina Canaāputa wahamaina jipahta, Harā wama tiri macapu su, tói tjuaha. ³² Tiro Téra sehe dosciento cinco cuhmari cjuariro tí macai, Harāihta yariaa wahaa tiha.

Yawe “Noano wahajaro” ni payoha Abrāre

12 ¹ Cū numu Yawe Abrāre ñ sehe ni yahuha: —Mu ya yahpare, mu pucure, mu pocore, ã jichu mu coyea poto jiina cūhure duhu dojoa wahaga. Cū yahpa mūhure yu ñohti yahpapu wahaga mūhu. ² Mūhure ñ sehe yoa, noano wahachu yoihtja. Mu panamana, mūhure ji nūñ tihtina cjihti payu wahachu yoihtja. Ñ yoa mūhure masa ti wacūnohorio yoa, tuhsu, noano wahachu yoihtja. Tí yu noano wahachu yoa mehne mūhu sehe painapure, payu masare noano waha turiachu yoiht-tiro cjihto jira mūhu. ³ Mūhure noano yoinare yūhu cūhu noano yoihtja. Mūhure ñano yoinare yūhu cūhu buhiri dahreihtja. Mūhu mehne jipihtina masa curuaripere noano wahachu yoa turiahtja —ni cūha.

⁴ To ã nichu tuhoru, Abrā Yawe dutiro seheta yoaha. To jiri maca, Harāi jiro Canaā yahpapu waha turiaha. To jimari macare wiaa, Canaā yahpapu waharo, tiro setenta y cinco cuhmari cjuaha. ⁵ Tiro waharo, to namono Saraire, to bahuero macuno Lotere, ti cjuaa jipihtiare, ã jichu ti cahamaca cūhu, jipihtinare Harāi jia, ti bocarina cūhure naa pahñoha. Waha, Canaā yahpapu suha juna.

⁶ Tói suro, Abrā waha namo, te Siquēpu suha. Tí maca cahai cūdu yucucu encinacu ducuha. Tu docai tí yahpa macaina cananeo masa ti cohamanare ti ño payori cuhtu jiha. Ti ño payori cuhtu Moré wama tiri cuhtu jiha. Tí cuhtu cahai Abrā cūhu sehe ti wuhuserire tuā dapo, jisiniha. ⁷ Tói Yawe sehe Abrāre baja, ñ sehe niha:

—Mūhure ji turia dijahtina cjihtire ahri yahpa, Canaā yahpare waihtja —niha.

To ã nichu tuhoru, Abrā sehe taa mehne dahre muori tuhu yoa, tirore ño payoha.

⁸ Baharo tū yucuri payuropu waha namoha tjoa. Wahaa, Betel wama tiri macare yuhdua, sū mija taro sehe waha, tōpu ti wuhuserire tuā dapo,

jisinia tjoa. Tói ti jichu, Betel sehe sũ sãano caha sehe tjuaha. ã yoa pa maca Ai sehe sũ muja taro caha sehe tjuaha. Tó cũhure paro tãa mehne dahre muori tuhu yoa, Yawere ño payoha Abrã.

⁹Baharo wahaha tjoa. Soero ji wahcã, pu tí yahpa Canaã yahpai jiri yahpa Néguebe wama tiri yahpau suha.

Abrã Egipto yahpau mahari pja jiro wahamaha

¹⁰Tí pjapure Canaã yahpare tuaro jucaro wahaa tiha. ã wahachu ñuno, Abrã mahari pja Egipto yahpau jiro wahaa tiha. ¹¹Tí yahpau to suhto panocã, Abrã to namono Saraire õ sehe niha:

—Tuhoga yuhure. Numino noaricoro jira muhu. ¹²ã jia pa tehe yoaa, Egipto macaina muhure ñua, “To namono noaputiaricoro jira” niboca. ã nia, yuhure wajã duaboca, muhure maa taa. ¹³ã jico ti sinitu ñuchu, “Yuhu Abrã bahoro jija” ni, yahuga tinare. Mu ã ni yahuchu, yuhure wajãeraboca. Muhure yoa, yuhure noano yoaboca —niha to namonore.

ã ni tuhsu, tina tópu waha, suha Egipto yahpau. ¹⁴Ti suchu, tó macaina sehe to namono noaricoro to jichu ñuha. ¹⁵ã yoa Egipto macariro faraõ to doca macaina puhto cũhu ticorore ñuha. (*“Faraõ” nino “jipihina puhto bui puhtoro” nino nica egipto masa ya dusero mehne*) Ticorore ñu tuhsuata, faraõ cahapu waha, tiore õ sehe ni yahuha:

—Noaputiaricoro numino wihire —ni yahuha.

Ti ã ni yahuchu tuhoru, faraõ sehe to ya wuhupu na ta duti, tópu ji dutiha ticorore.

¹⁶Ticorore cjuaro, Abrãre noano yoaa tiha faraõ. ã noano yoaro, tiore ovejaare, cabraare, wachuare, burroare, ã jichu camelloare waha to nuhtina cjihti. Tinare wa tuhsu, to cahamaca cjihti muare, ã jichu numia cũhure waha. ¹⁷Wiho mejeta Saraire to machu ñuno, Yawe sehe ji coeraha. ã ji coeraro, faraõre, ã jichu to namonore, to pohna cũhure tuaro dohatichu yoaha Yawe. ¹⁸ã waharo mehne, Abrãre pjiroca, õ sehe ni sinitu ñuha faraõ:

—¿Dohse yoai yuhure mahñori muhu? ¿Dohse yoai dóiputa “Ahricoro yu namo jira” ni, poto yahuerari muhu? ¹⁹“Yu baho jira” mu nichu tuhoi, ticorore namo timahi yuhu. ã jicu mu namore wiaja. ¡Pa sehepu naa wahaga ahricorore! —niha Abrãre.

²⁰ã ni tuhsu, faraõ to surarare õ sehe yoa dutiha:

—Abrãre to namono mehneputa, jipihia ti cjuaa mehne Egipto yahpai jijnare wionocaga —niha.

To ã nichu tuhoa, to surara sehe to dutiro sehetu yoaha.

Abrã cũhu soro, Lote cũhu soro ji ducaa tiha

13 ¹Abrã Egipto yahpau jimariro to namono mehne wijaa, jipihia ti ya mehne Canaã yahpau jiri yahpa Néguebepu coha tjuaa wahaha tjoa. ã yoa to baharo macuno Lote cũhu tina mehne wahaha. ²Abrã sehe pache puro jiha. Tiro payu uru cjoari, ã jichu plata si paa cjoari, wapa tia cjoarire cjuaa tiha. Tuhsu, payu nuina wahuquina cũhure cjuaa tiha. ³ã yoa tiro Néguebepu su, waha namoha tjoa. Soero ji wahcã, te Betel wama tiri macare su, yuhdu wahcã, Ai wama tiri maca cahi wahma to ji muhtamarioputa pari turi suha. ⁴Tói suro, to panopu tãa mehne to dahre muori tuhu cjiroi Yawere ño payoa tiha.

⁵ Ñ yoa to bahuro macuno Lote cūhu, pache purota jiha. Tiro cūhu payu ovejaa, cabraa, wachua cjuaa tiha. Ñ yoa masa, to suho jiina cūhure payu cjuaa tiha. ⁶ Wiho mejeta ti jiri yahpa sehe tinare ne mu sueraha. Wahi-quina ti nuina sehe payu waro jia tiha. Ñ jiro wahi-quina ti chūboa ne mu sūera tiha. ⁷ Ñ mu suerachu ñua, Abrā nuinare ñu wihbo cohtaina, to bahuro macuno Lote nuinare ñu wihbo cohtaina ti basi cahma tuhti mujaa tiha. Ñ yoa ti pjapure tí yahpare cananeo masa, ã jichu fereseo masa cūhu jisinia tiha. ⁸ Ñ jiro cū numu Abrā sehe Lotere ò sehe niha:

—Mari basi jina nija mari. Mari basi waro jipanahta, mari ã ñano jia tichu, noaerara. ⁹ Ahri yahpa pjiri yahpa jinocana. Ñ jicu noano mehne muhu cūhu soro jii wahaga. Nohoi mu ji coari duhterore ñu, tói jii wahaga. Yuhu sehe mu bese duhari duhteroi jii wahihtja —niha Abrā Lotere.

¹⁰ To ã nichu tuhoro, Lote sehe ñu siterocaha. Ñ ñu siterocaro, Jordão ma duhtu cahai cū duhtero, noari duhterore ñu bocaha. Pu Soá wama tiri macapu tí duhtero jipihtiro noari wapa ji batoha. Panopu Yawe Adāore to cūmari duhtero yoaro sehe, tuhsu, Egipto yahpa yoaro sehe noano mári tiri duhtero jia tiha tí duhtero. (*Tó sehe jia timaha, Yawe Sodoma, Gomorra wama tia macarire to jū cohāto panore*) ¹¹ Tí duhtero noari duhtero to jichu ñuno, Lote sehe tí duhteropu jiro wahaha. Tí duhtero sū muja taro caha sehe tjuaha. Tó sehe yoa, tina soro ji ducaa tiha juna. ¹² To pucahmino Abrā sehe Canaā yahpapu tjuaha. Lote sehe Jordão ma duhtu cahai jiri yahpapu jiro wahaha. Tí yahpapure macari jia tiha. Ñ jiro Lote sehe Sodoma cahacāpu su, tói jia tiha. ¹³ Sodoma macaina sehe ñaina waro jia tiha. Yawe to ñuchu, bujua buhiri tiina jia tiha tina.

¹⁴ Ñ yoa Lote to wahari baharo, Yawe Abrāre ò sehe ni yahuha:

—Mu jirore sū muja taro sehere, sū sāano sehere, pari taño sehe cūhure noano ñu siterocaga. ¹⁵ Jipihtiro mu ñu siterocaro puro muhure waihtja. Mu ya yahpa, ã jichu muhure ji turiahtina ya yahpa jirucurohca. ¹⁶ Ñ yoa mu panamana, muhure ji turiahtinare payu wahachu yoaihtja, dihta pohca yoaro sehe. Dihta pohcare masa ti quihōa bihoeraro sehetu muhure ji turiahtina cūhu payu jiahca. ¹⁷ Ahri yahpare muhure waihtja. Ñ jicu mipure ñu tinii wahaga to yoaro puro, to saro purore —ni yahuha Yawe Abrāre.

¹⁸ Ñ yoa Abrā tói jimariro to jiri wuhu, wahi-quina cahsari wuhure wawe na, wahaa wahaha tjoa. Waha, Maré wama tiroto ya nūcūcā, encina yucuri jiri nūcūcāpu su, tói jia tiha. Tí nūcūcā sehe Hebrō wama tiri maca cahai jia tiha. Tói jiro, taa mehne dahre muori tuhu yoa, Yawere ño payoa tiha.

14 ¹⁻¹⁰ [...]

Abrā Lotere ã jichu jipihti to cjuaa cūhure yuhdu witichu yoaha

Resumen: Sodomapu Lote to jia tiri pjapure cahma wajāa tuaro jia tiha. Cū numu paye yahparipu macaina puhtoa, pititiaro jiina sehe, ti surara mehne wahaa, Sodoma, Gomorra macaina mehne cahma wajāa sua tiha. Cahma wajāa suina sehe tí macari macainare payu waro wajāa tiha.

¹¹ Pititiaro puhtoa, ã jichu ti surara cūhu Sodoma, Gomorra macaina ti yare, ti chuare, ã jichu ti ya wapa bujua cūhure na pahñonocaa tiha. Na pahño, tjuaa wahaa tiha. ¹² Tí pjapure Lote, Abrā bahuro macuno sehe Sodomapu jia tiha. Ñ jia tiro cūhure ñaha, to ya jipihtiro mehne tirore naa wahaa

tiha tina. ¹³ Wiho mejeta cūiro Sodoma macariro, tinare yuhdu witihiro sehe tí quitire Abrā, hebreo masunopure yahuro suha.

Tí pjapure Abrā sehe Maré ya nūcūcā, encina yucuri jiri nūcūcāi jia tiha. Tiro Maré sehe amorreo masuno jiha. Escó, Aner cūhu ti wahmino jiha tiro. Tina tiaro sehe Abrāre cahma wajādohoina jia tiha.

¹⁴ Ā yoa Abrā sehe to bahuro macunore ti űaha wahcāri quitire tuhoro, to bucuo, to cahma wajā buherinare pji cahmachuha. Tina sehe tresciento dieciocho waro jia tiha. Tina mehne Lotere űaha wahcāinare nūnu ti wahcāha tiro, pu Dā wama tiri macapu. ¹⁵ Tópū tinare mu su, tina mehne cahma wajāno taro, űami tiro Abrā to masare cāa curuari tju wa dapoha. Tju wa dapo tuhsu, wacūenoca tina mehne cahma wajā dūcaha. Cahma wajā nūnu ti wahcāha tinare pu Obā wama tiri macapu. Tí maca sehe Damasco wama tiri maca yuhduropu jiha. ¹⁶ Tó sehe yoa, to bahuro macuno Lotere to ya jipihtihi mehne yuhdu witihi yoa ha Abrā. Tuhsu, numiare, muare tiro mehne űaha-ñorina cūhure yuhdu witihi yoa ha. Tuhsu, jipihitia pache ti yaca wahcāmari cūhure tjua na pahñonocaha.

**Cohamacure dahra cohtariro sacerdote Melquisede
wama tiro Abrāre piti boca, tirore sini payoha**

¹⁷ Abrā tópu cahma wajāno suriro to majare tjua tachū, Sodoma macariro puhtoro sehe tū yucuri watoi jiri duhtero, Savé wama tiri duhteropu Abrāre piti bocaro suha. Mipu macaina sehe “Puhtoro ya duhtero” ni pisuca tí duhterore. ¹⁸ Ā yoa paio Melquisede, Salē wama tiri maca macariro puhtoro cūhu pāore, ā jichu se core naa, Abrāre piti bocaro suha. Tiro sehe Cohamacu Jipihitia Bui Ji Yuhdurucu Surirore dahra cohtariro, sacerdote jia tiha. ¹⁹ Tiro Abrāre piti bocaro suro, ō sehe ni sini payoha tirore:

—Cohamacu Jipihitia Bui Ji Yuhdurucu Suriro,
ahri yahpare, muano cūhure bajuamehneriro,
muhure noano wahachu yojaro.

²⁰ Ā yoa tirore wahche payojihna mari.

Tirota jiri jira
muhure cahma wajā yuhdurucachu yoiro
—ni sini payoha Abrāre.

To ā ni sini payochu tuhoro, Abrā sehe Cohamacure ño payoha. Cohamacure ño payoro, Melquisede sehere paye baro to tjua naripere mahano, mahano waha.

²¹ Ā yoa Sodoma macariro puhtoro ō sehe niha Abrāre:

—Ahri pache jipihitia mu tjua nari mu ya jijaro. Wiho mejeta yu masa pinihtare yuhure wiaga —niha.

²² To ā nichu, Abrā ō sehe ni yuhtiha:

—Yawe, Jipihitia Bui Ji Yuhdurucu Suriro, muano, ā jichu ahri yahpare bajuamehneriro to tuhoroi cua pisaro mehne ō sehe nija: ²³ “Ne mu yare nasi yuhu. Ne cūria yutacā, ne sapato duhteri dare nasi, muhupu, ‘Yuhu jihi Abrāre pache puro wahachu yoi’ niri nicu. ²⁴ Ā jicu cahmaeraja. Wiho mejeta yaina masa musa chuare tí churi pinihtare dohse yoa masieraca yuhu. Ā yoa yuhu mehne macaina, yuhure cahma wajādohorina, Maré, Escó ā jichu Aner cūhu pinihta ti cahmaare najaro” —niha.

“Muhure ō sehe yoihtja yuhū” ni, yahu cūha Cohamacū Abrāre

15 ¹ Lotere to yuhdu witichu yoari baharo, Yawe sehe tiro Abrāre bajua, ō sehe ni yahuha:

—Abrā, ne cuiecu tjiga muhū. Yuhū jija muhure noano ducata, ā ñu wih-borucuriro. Tuhsu, yuhū sehe muhure payu noaare wai tai nija —niha tirore.

²⁻³ To ā nichu tuhorō, Abrā sehe ō sehe ni yuhtiha:

—Muhū Yawe yu Pūhtoro, yu pohna marieriro yu jichu masina. Ā jicu mu yuhure payu noaare wachu, yaba cjihti jierara. Muhū yuhure yu macu cjihtore ne cūiro waerara. Ā jiro yu yariari baharo, jipihtia yu yare cjuā nūnu tihti Eliése, yu cahamacūno, Damasco macariro jirohca —ni yuhtiha Abrā.

⁴ To ā ni yuhtichu tuhorō, Yawe sehe ō sehe ni yuhtiha:

—Jierara. Mu yariari baharo, mu yare cjuā nūnu tihti ahiro mu niri jisi. Mu macu warota jirohca, mu yare cjuā nūnu tihti —niha.

⁵ To ā niri baharo, Cohamacū Abrāre sopacapu na wijaa, ō sehe niha tjōa:

—Muanopu ñu muo, ñahpichoha pocare quihō ñujata. Quihō ñupaihta, quihō bihosi muhū. Mu quihō bihoeraro seheta mu panamana, muhure ji turiahtina cjihti cūhu payu waro jiahca —niha tiro.

⁶ To ā nichu tuhorō, Abrā sehe ō sehe ni tuhutuha: “Āta jica. Yawe quihōno niri jira” ni, wacū tuaha. To ā ni wacū tuachu masino, Cohamacū sehe “Yuhū mehne buhiri marieriro, noariro jira ahiro” ni, ñu ji coaha Abrāre.

⁷ Baharo Cohamacū ō sehe ni namoha:

—Yuhū jija Yawe. Yuhuta muhure Uru, Mesopotamia yahpai jiri macapu jirirore na wiohi ahri yahpa, Canaā yahpa mu ya yahpa cjihtore wai tai —niha.

⁸ To ā nichu, ō sehe ni sinitu ñuha Abrā:

—Yawe, yu Pūhtoro, ¿dohse yoa “Potocāta yu ya yahpata jira” ni, masiih-cari yuhū? —ni sinitu ñuha Abrā.

⁹ To ā ni sinitu ñuchu tuhorō, Cohamacū ō sehe ni yuhtiha:

—Wahiquinare nai wahaga. Cūcoro wachucoro, cūcoro cabra, cūiro oveja, tia cūhma cjuaina dihtare nai wahaga. Ā jichu buja bucuro, buja wihārirocā cūhure na tahga —niha.

¹⁰ Ā yoa Cohamacū to dutiro seheta yoaha Abrā. Wahiquinare na taa, wajāa, cāinare pjarīro dacho macai dute wa boroha. Tuhsu, to dute wa boroa cjoarire pua ca duhu cūha. Ā yoa wūina cūhure wajāa, dute wa bororo marieno pjainata cūha. ¹¹ To ā yoari baharo, yuca sehe chu duaa, duji pja su duamaha. Wiho mejeta Abrā sehe sūro tinare cja nūnu mujaa tiha.

¹² Baharo nahitia dijachu waro, wacūenoca carī yuhdu mua wahaha tiro. Ā carī yuhdu muano, ō sehe cahāha: Cahānopure to ñuchū, wacūenoca tuaro nahitiano wuru wahaha. Ā wahachu ñuno, tiro sehe cua yuhdua wahaha.

¹³ To ā waharo watoi, Cohamacū sehe ō sehe ni yahuha tirore:

—Mu yariari baharo, mu panamana ji turiahtina cjihti dohse ti wahahtire muhure yahuyui tai nija. Tina mu panamana cjihti ahri yahpa, mu mipu jiri yahpa, amorreo masa ti ya yahpare ne jisini. Paina ya yahpau ji tini-siniahca tina. Tina cahapu jia, tinare dahra cohtaina ji, tuaro ti dutipeina jiahca. Tí yahpa pua sehe tinare cuatrociento cūhmari waro ñano dutipeahca. ¹⁴ Wiho mejeta tinare ñano yoa, tuaro dutipeinare yuhū sehe buhiri

dahreihca. Yu ā buhiri dahreri baharo, mu panamana, ti nāno dutipeina cjiro tó macaina ya wapa tiare payu na, yuhdu witi wijaa wahaahca juna.

¹⁵Ā yoa muhu sehe, “Ō sehe waharohca” ni, yu yahuare nusi. Wiho mejeta mu catiro puro noano jiihca muhu. Bucuro wahaa, nāno yuhduro marieno bucuro mu jia tia mehne yariaa wahaihca. Mu yariachu, mu pjacu cjirore mu coyca yaahca.

¹⁶Ā yoa ahri yahpa pua, amorreo masa yuhu mehne buhiri tiina ji tuhsura. Sie sehe mehne tuaro nāno jia ti, buhiri ti namoahca tina. Ti ā nāno jia tiri buhiri, yuhu sehe tinare ahri yahpai jiinare cohāroca wionocaihtja. Wiho mejeta tinare yu buhiri dahrehto duhsasinina. Ā jia yu nino seheta mu panamana sehe paina ya yahpau cuatrociento cuhmari ji tinisiniahca. Tópe cuhmari baharo ahri yahpaihta majare tju wihiahca. Tí pjai yuhu sehe ō macaina amorreo masare buhiri dahre, cohāroca wioihtja —ni to cahānopure yahuha Yawe Abrāre.

¹⁷Ā yoa Abrā sehe tíre cahāriro cjiro wahcā wihiha juna. To wahcā wihichu, nāmipu jiha. Ā wahcā wihiro, ō sehe bajuare wacūenoca bajua muachu, nūha. Pāore ti puhōno, to me tirucuro yoaro sehe bajurore nūha tiro. Tuhsu, picha tia jūrucuro yoaro sehe bajurore nūha. To nūchu, tí sehe wahiquinare to dute wa boro, pua ca to duhu cūrina dacho macai yuhdu wahcāha. ¹⁸Ā wahachu yoariro sehe Yawe jiha. Tíre nōno, Abrāre cua pisaro mehne “Ō sehe yoihtja muhure” ni, yahuro taro niha. Ā jiro ō sehe niha tirore:

—Ahri yahpare muhure ji turiahtina, mu ya curua macainareta waihtja. Tí yahpa Egipto yahpa ji bato tiroi ji dūca, pu pjiri ma, Éufrate ma duhtu cahapu ji batoarohca. ¹⁹⁻²¹Ā jiro ahrina quenita masa, quenisita masa, cademoneo masa, hitita masa, fereseo masa, refaíta masa, amorreo masa, cananeo masa, gergeseo masa, jebuseo masa tina jipihtina ti ya yahpari baharopure mu panamana ji turiaina ti ya yahpari cjihti tjuarohca —niha Abrāre.

Ahri quitu Agar ā jichu to macuno Ismae ya quitu jira

16 ¹Abrā namono, Sarai sehe, tiro mehne jiparota, Abrāre pohna tiba-saera tiha. Wiho mejeta cūcoro, egipto masonore, to cahamacono cjuaa tiha Agar wama tiricorore. ²Ā jiro Abrāre ō sehe niha:

—Nūna muhu, Yawe yuhure to pohna tichu yoaraare. Ā jicu mipure yu cahamacono mehne jiga. Ticoro mehne mu pohna tichu, tinacā jiahca yu pohna cjihti —niha.

To ā nichu tuhoru, Abrā sehe:

—Jai. Mu nino seheta yoihtja —ni yuhtiha ticorore.

³To ā ni yuhtiri baharo, Sarai sehe to cahamacono, egipto masono Agar wama tiricorore Abrāre, “Ahricoro jira mu namo cjihto” ni, wiaha. Canaā yahpare diez cuhmari ti ji wahcāchu waro, ā wahaha.

⁴Ā yoa Sarai to cahamaconore Abrāre to wiari baharo, tiro ticoro mehne ji, ticoro sehe nijinocā bocaa wahaha juna. Ā nijinocā bocaro, to puhtorocoro Sarai sehere, “Yaba cjihti jierara ahricoro” ni, tuhotu dūcaha.

⁵⁻¹⁴ [...]

¹⁵Ā yoa Agar sehe cūirocā pohna tibasaha Abrāre. Tirocāre Abrā sehe “Ismae” ni, wamoaha. ¹⁶Ismae to masa bajuari pjare Abrā sehe ochenta y seis cuhmari cjuariro jiha.

“Cohamacu yaina jija mari” ni, musa wacũhtore yoana,
õ sehe yoaga —ni yahuha Cohamacu Abrã cũhure

17 ¹Noventa y nueve cũhmari Abrã to cjuachu, Yawe tirore pari turi bajuaha tjõa. Å bajuaro, õ sehe ni yahuha tirore:

—Yũhu jija El Sadai —niha. (*“El Sadai” nino, “Cohamacu Jipihitina Bui Tua Yuhdurucu Suriro” nino nica hebreo masa ya dusero mehne*)

Å ninota, õ sehe ni namoha:

—Mipure yũ ñurocaroi noaa dihtare yoarucuriro jiga mũhu. Buhiri tiare yoaro marieno jirucuga. ²Mũhure yũ ya curua macaina cjihti ñũchũno cjihto besei yũhu. Å jicu yũ mũhure niriro sehetã cua pisaro mehne pari turi õ sehe nija: Mũhure ji nũnu tihtina, mũ panamanare payũ wahachu yoihtja —ni yahuha tirore.

³To ã nichũ tuhorõ, Abrã sehe na tuhcuã caha su, muhri caha dijaha, te to wũhduã wapare yahpa pihachũpũ. To ã yoaro watõ, Cohamacu tirore õ sehe niha:

⁴—Cua pisaro mehne mũhure õ sehe ni namõja. Payũ masa curuari ñũchũno cjihto jiihca mũhu. ⁵Å jicu mipure mũ wamare, Abrã ni ti pisuri wamare cohtotai tai nija. Payũ masa curuari ñũchũno cjihto cũi tai nija mũhure. Å jicu mipure Abrahã wama tiihca mũhu. (*“Abrahã” ni pisuri wama, “payũ masa curuari ñũchũno” niri wama jira hebreo masa ya dusero mehne*) ⁶Å yõa mũ panamana, mũhure ji turiahtinare payũ wahachu yoihtja. Tinare payũ masa curuari wahachu yoihtja. Tinata cãina masa curuari pũhtõa cjihti jiahca. ⁷Ahri yũ mũhure ã nia mũ panamana cjihti cũhu boro marieno ã ti cjuã turia wahcãrucuhti jiahca. Å jicu yũhu sehe mũ Cohamacu ã jirucuihtja. Tuhsu, mũ panamana cjihti ti Cohamacu cũhu ã jirucuihtja. ⁸Å yõa ahri yahpa, Canaã yahpa, mipure mũ ji sito tari yahpare mũhure, ã jichũ mũ panamana cjihti cũhure waihtja. Ti ã cjuarucuihtja yahpa jirohca ahri yahpa. Å yõa yũhu sehe ti Cohamacu ã jirucuihtja —niha Abrahãre.

⁹Å ni tuhsu, õ sehe ni namoha:

—Tĩ jira yũ yõahti. Å yõa mũhu, ã jichũ mũ panamana ji turiahtina cũhu boro marieno ã ti yõa turia wahcãrucuhtõ õ sehe jirohca. ¹⁰Jipihitina musa, ã jichũ musare ji turiahtina muare musa cũhnu cũa sohtõa macari cahsarocãre yihso nano cahmana. ¹¹Musa pjacurire ã yõaina dihta jiga. Musa ã yõaro sehe, “Cohamacu yaina jija mari” ni, musa wacũhto jirohca. ¹²⁻¹³Yũ nino sehetã musa mipũ macaina yõa ducaga. Å yõa mũhure ji turiahtina cũhu ti yõahto jira. Musa pohna wahma masa bajuaina, ocho dachori ti cjuachu, ti cũhnu cũa sohtõa macari cahsarocãre yihso naga. Å yõa musa cahamacare, musa cahamaca pohnare, ã jichũ pa sehe macainare musa nuchurina cũhure ãta yõaga. Musa jipihitina musa pjacurire ã yõaina dihta jiga. Musa ã yõaro sehe õ sehe ni musa wacũhto jirohca: “Cohamacu sãre ‘Yũ yaina jira musa’ ni tuhsũhre. To ã nirire tiro ne cohtotasi” ni, musa wacũhto jirohca. ¹⁴Diro musa mehne macariro musa yõaro sehe yõaerariro jiro, ne musa mehne jiero tjijaro, ya curua macainare yũ ã yõa dutirire to yõa duarari buhiri —ni yahuha Cohamacu Abrahãre.

¹⁵Å ni tuhsu, õ sehe ni yahu namoha:

—Mũ namo Sarai sehere mipure “Sarai” ni, wama pisu namoecu tjiga. Mipure Sara wama tirohca ticoro jũna. (*“Sara” ni pisuri wama, “puhtoro*

macono” niri wama jica hebreo masa ya *dusero mehne*) ¹⁶Ticorore noano wahachu yoa, ticoro mehneta cüirocã mu macu cjihtore muhure waihtja. Ahri potocã tjira. Ticorore noano wahachu yoihtja. Â jiro ticoro sehe payu masa curuari ñuchono cjihto jirohca. Ticorore ji nunu tihtina, to panamata caina masa curuari puhtoa cjihti jiahca —ni yahu namoha Cohamacu Abrahãre.

¹⁷To â nichu tuhoro, Abrahã sehe pari turi na tuhcu caha su, muhri caha dijaha, pu to wuhdua wapa yahpa pihachupu. Â yoarota, ô sehe ni buju tuhoutu: “¡Cuenah! Yuhu sehe bucuro waro jija. Cien cuhmari cjuariropu jija yuhu. Tuhsu, yu namo Sara cûhu bucuro waro jira. Ticoro cûhu noventa cuhmari cjuaricoropu jira. ¿Sã â bucuna pohna tibocari?” ni tuhutu bujuha.

¹⁸Â ni tuhuturo, Cohamacu ô sehe ni yuhtiha:

—Jira yu macu Ismae. Mu noano wahachu yohtire tiro sehere mu yahuchu noaboca —ni yuhtiha.

¹⁹To â nichu tuhoro, Cohamacu sehe ô sehe ni yuhtiha:

—Jierara. Mu macu Ismaere ahri yu â nia ne sãerara. Yu nino sehetu mu namo Sara munocãre pohna tirohca. Tirocãre “Isaa” ni, pisuga. Tiro sehe jirohca ya curua macariro cjihto. Â jiro cua pisaro mehne yu muhure yahuri tiro Isaa cjihto cûhure sãna. Â yoa to panamana ji turiahtina cûhu boro marieno â cjuu turia wahcãahca yu â niare. ²⁰Â yoa mu macu Ismaere mu sini payori cûhure tuhohi. Â jicu tiro cûhure noano wahachu yoihtja. Tireore yu noano wahachu yoa mehne tiro cûhu payu pohna tirohca. Tuhsu, tireore ji turiahtina payu masa puti, pjiri curua waharohca. Tiro Ismae doce masa curuari puhtoa cjihtire pohna tirohca. ²¹Wiho mejeta tiro ya curua macariro cjihti jisi. Isaa sehe jirohca ya curua macariro cjihto. Pa cuhmare ahri sũ baroihta tirocãre mu namo Sara pohna tirohca —ni yahu Cohamacu Abrahãre.

²²Yahu tuhsu, wahaa wahaha. ²³To wahari baharo, tí dachoihta Abrahã sehe to dutiro sehetu yoa ducaha. To macuno Ismae cuhnu cûnu sohtoa macari cahsarocãre yihso naha. Â yoa paina tiro mehne macainare, â jichu jipihtina to cahamacare, to cahamaca pohnare, â jichu pa sehe macainare to nuchurina cûhure yihso naha. ²⁴Â yoa Abrahã sehe to cuhnu cûnu sohtoa macari cahsarocãre ti yihso nari pjare noventa y nueve cuhmari cjuaha. ²⁵Â yoa to macuno Ismae sehe trece cuhmari cjuaha. ²⁶Tina puarore cû dachoihta yihsoha. ²⁷Â yoa paina tiro mehne macainare, â jichu jipihtina to cahamacare, to cahamaca pohnare, â jichu pa sehe macainare to nuchurina cûhure tí dachoihta yihso naha.

Yawe Sarare yahu cû muhtaha to nijinocã bocachu yohtore

18 ¹Amorreo masuno Maré ya nucucã, encina yucu tiri nucucã jiha Abrahã. Â yoa cû dacho tóihta Yawe bajuaha Abrahãre, to wahiquina cahsari wuhu sãari sopacai to dujiro watoi. Cohari pja wahtaroi jiha. ²Tiro to ñurocachu, tiaro mua ducuha to potoi. Tinare ñu, sinino waharo, ño duaro mehne wahcãrucu su, muhri caha dija, to wuhdua wapare yahpau pihaha. Tó sehetu yoa, tiro tinare siniha. ³Â yoa ô sehe niha tinare:

—Puhtoro, yoa cûri pja jisiniga musa yuhu mehne. ⁴Musa, “Jai” nichuna, core na ta dutihtja musa dahporire cosahti. Â yoari baharo, mahano yuhu

mehne sosiniga ahdu yucucu docai. ⁵ Ñ yoa mahano chua waihtja musare. Yu ã yoachu, noano yapiina ji, noano mehne wahanahca musa. Noano yoanata yuhure ñuna tari jira musa. Ñ jii chua waihtja musare —niha tiro tinare.

—Noana. Cahmaja mu säre ã yoachu —niha tina tiaro.

⁶ Ti ã nichu tuhoro, to ya wuhupu cjero muroca sãa, to namono Sarare ò sehe niha:

—¡Cjero! Trigo pohcare, noaa pohcare veinte kilo na, tinare pão yoaba-saga —niha.

⁷ Ñ yoa muroca yuhdu wahcã, wachua ducuropu su, cãiro wachu wihãri-
rore paina bui noarirore bese, soaro mehne tiore wajã duti, to suho chuhti
cjihtire yoa dutiro, to cahamacunore waha. ⁸ Baharo ti tuhsuchu ñu, tinare ti
so dujiroihta chua dapoha. Wachucoro pechõre, tuhsu, pechõ mehne chua ti
yoaare, ã jichu dihi cùhure na ta, tinare dapoha. Dapo tuhsu, ti churo wato,
tinare tõihta yucucu docai cohta ducuha. ⁹ Chu tuhsu, tina tiore ñu tinia
tarina sehe ò sehe ni, sinitu ñuha:

—¿Nohoi jicari mu namo Sara? —niha.

—Sohõi jica. Wahiquina cahsari mehne dahreri wuhu puhichapu jica —ni
yuhtiha.

¹⁰ To ã ni yuhtiri baharo, cãiro tina mehne macariro Abrahãre ò sehe ni
yahuha:

—Mipu tari cuhmai, nueve sãri baharo, pari turi musare ñui taihtja tjoa.
Tí pjai mu namo Sara sehe cãiro munocãre pohna tirohca —ni yahu quihõha
Abrahãre.

To ã nino wato, ticoro Sara sehe Abrahãre ã ni yahuriro baharo buhusehe
sehe, ti wuhu sãari sopacai ducuha. Jipihti ti ã ni durucure tuhoroaro niha
ticoro. ¹¹ Tiro Abrahã, ã jichu Sara ñano bucuna quina jiha. Ñ jiro ticoro sehe
bucoro ji, to cahã ñua cùhure duhuricoropu jiha. ¹² To ã nichu tuhoro, to
yajeripohnapu ò sehe ni tuhoutuha: “¿Mipubehta dohse yoa yu pohna ti duaro
seheta wahabocari? Yu manu, yuhu cùhu sã bucuna jija” ni, buju tuhoutuha.

¹³ Wiho mejeta Yawe sehe ò sehe niha:

—Abrahã, ¿dohse yoaro Sara sehe to tuhoutuapure bujujari? ¿“Bucoro jija
yuhu” ni, “¿Potocãta yu nijinocã bocacohcari?” ni, tuhuturo nijari? ¹⁴ ¿Yuhure
mijo yuhdua, yu yoa masieraa baro jijari? Mipu tari cuhmai, nueve sãri
baharo, pari turi musare ñui taihtja tjoa. Tí pjai Sara cãiro nijinocã muno-
cãre pohna tirohca —ni yahu quihõha Abrahãre.

¹⁵ To ã nichu tuhoro, Sara sehe cuia mehne mahñomaha. Ñ jiro tiore ò
sehe niha bajuroi:

—Jierara. Yuhu mu niare ne bujuerahi —nimaha.

Tiro sehe ticorore ò sehe ni yuhtiha:

—Bujuhre muhu. Yuhu muhure masija —niha.

Yawere Sodoma, Gomorra macainare to buhiri dahrerahito sehe siniha Abrahã

¹⁶ Ñ yoa tina tiniri masa tiaro jiina wahcãrucu su, Sodoma wama tiri
macare ñu siteroca bororopu dijaa wahaha. Ñ yoa Abrahã cùhu tinare piti
ti wahcãha. Ti wahahti mahare ño, tinare coha siti, majare tjuaaro waharo
niha. ¹⁷ Dóipu tina tiniri masa, tiaro mehne macariro cãiro jiha Yawe. Ñ

yoa tiro to basi ò sehe ni tuhoutuha: “Abrahāre yu yoahdire yahuro cahmaca yuhure. Ne tirore nuoeraro cahmaca tíre. ¹⁸Yuhu ò sehe ni yahu tuhsuhi tirore: ‘Muhure noano wahachu yoaihtja. Tí yu noano wahachu yoaa mehne muhu sehe painapure, jipihtina masa curuaripe macainare noano waha turiachu yoah tiro cjihto jira muhu. Mu panamana cjihtire payu wahachu yoaihtja. Á yoa tuari curua, ti nu tuhtiinare cahma wajá yuhduruca mujari curua cūhu jichu yoaihtja tinare’ ni, yahu tuhsui tirore. ¹⁹Ahriro Abrahā yu beseriropu jira. Á jiro ahriro to pohnare, á jichu tirore ji nunu tihtina cūhure, yu yoa dutiare yuhti, ‘Potocā jira’ ni, tinare dutihtiro cjihto jira. Á jia tina sehe yu yoa dutiare potocā tuho, poto jiare quihōno yoina ti jichu nuu, yuhu sehe jipihti Abrahāre yu nirire yu nino seheta yoaihtja” ni, tuhoutuha. ²⁰Á jiro Abrahā tó seheta wahahtiro cjihto jichu nuno, tiro Yawe tirore bajuroi ò sehe ni yahuha jūna:

—Sodoma macaina, á jichu Gomorra macaina cūhu ti jia tiare nāno waro ni, ti durucunohoina jira. Yuhu mehne bujua buhiri tiina jira tina sehe. ²¹Á jicu tópu nusini wahi nija, “¿Potocāta yuhu mehne nāno bujua buhiri tiina jia tijari tina?” nicu. Á jicu yu basi masilhca tinare —ni yahuha tiro Abrahāre.

²²Á ni to yahuri baharo, puaro tirore nuu tarina Sodomapu yuhdua wahaha. Á yoa cūiro tina mehne macariro Yawe Abrahā mehne tjuarucu suha. ²³To tjuarucu suchu nuno, Abrahā sehe to cahacāpu su, ò sehe ni sinitu nuha:

—¿Tópure noaina tina naina watoi ti more suhuro jichu, tina noaina cūhure wajānocaihcari muhu? ²⁴Pa tehe cinquenta masa noaina naina watoi jiboca tí macare. ¿Á jipachuta, tí macare cohānocaihcari muhu, tina cinquenta masa noaina ti jipachuta? ¿Pja nuerabocari muhu tinare? ²⁵¡Ne buhiri dahreraboca muhu noinare! ¡Buhiri tiina mehne cūno potori ti yariachu, tó jierara! ¡Á nāno yoi tjiga tinare! Muhu jira ahri dacho paró macaina masa curuaripe macaina buhiri tiinare, buhiri marieinare quihōno beseriro. Á jii buhiri marieinare buhiri dahresi muhu —niha.

²⁶To á nichu, Yawe ò sehe ni yuhtiha:

—Cinquenta masa buhiri marieina tí macai jichu, tinare, “Wajāri” nicu, jipihtina Sodoma macainare wajāsi —niha.

²⁷To á nichu, Abrahā pari turi ò sehe niha:

—Yuhu muhure sinitu nuu namoeraboa. Yu muhure sinitu nuu namochu, pja nūga yuhure. Muhu jira Cohamacu. Yuhu sehe wiho jiriro jija. ²⁸Pa tehe yoaa, cuarenta y cinco masa buhiri marieina jiboca. Á yoa cinco dahsaboca buhiri marieina ti cinquenta suhto. ¿Á jipachuta, tí macare cohānocaihcari muhu? —ni sinitu nuha.

Yawe ò sehe ni yuhtiha:

—Ne wajāsi yuhu tí maca macainare, cuarenta y cinco dihta buhiri marieina ti jichu —niha.

²⁹Á yoa Abrahā ò sehe ni namoha tjoa:

—¿Cuarenta dihta buhiri marieina jichu waro, dohse yoihcari? —niha.

—Cohāsi tí macare, cuarenta buhiri marieina ti jichu —niha Cohamacu.

³⁰Abrahā sehe sinitu namoha tjoa:

—Suroca yu sinitu nūchu, suai tjiga, yu Puhtoro Cohamacu. Sinitu nuu namo duaja tjoa. ¿Treinta masa buhiri marieina ti jipachuta, tí macare cohānocaihcari muhu? —ni sinitu nuha.

—Cohāsi yuhū, tí macare treinta masa noaina ti jichū —niha Cohamacū.

³¹ Abrahā tjueraha sinitu ñuno. Ō sehe niha tjoa:

—Yū Puhtoro Cohamacū, yuhū mūhure sinitu ñū namoeraboa. Yūhure boga. ¿Ā yoa veinte masa noaina ti jichū waro, dohse yoihcari mūhū? —ni sinitu ñūha.

—Veinte sahsero buhiri marieina ti jichū cūhure cohāsi yuhū tí macare —niha Cohamacū.

³² Sinitu ñū batoaro, Abrahā ō sehe niha:

—Suai tjiga mūhū, yū Puhtoro Cohamacū. Ōihta mūhure sinitu ñū batoai tai nija. Baharo ā cariborucusi yuhū mūhure. ¿Dohse jibocari diez masa buhiri marieina ti jichū? —ni sinitu ñūha.

—Cohāsi yuhū tí macare diez dihta ti jichū cūhure —niha Cohamacū Abrahāre.

³³ Abrahā mehne to ā ni durucu tuhsuri baharo, tiro wahaa wahaha. Ā yoa Abrahā sehe to ya wūhupū majare tjuaa wahaha.

Sodoma, Gomorra wama tia macarire jū cohāa tiha Cohamacū

19 ¹Nahi bora tachu waro, puaro anjoa, Cohamacū mehne taina cjiri, Sodoma wama tiri macare suha juna. Tí maca sehe tí maca duhtu cahare tāa mehne ti sahrī sāari maca jiha. Tí sahrīno sāari sopaca wijaroi dujiha Abrahā bahuro macūno Lote. Ā yoa tói dujiro, ti tarucuchū ñū bocaha tiro. Ā ñū bocaro, wahcārucu sū, piti boca wahcāha tinare. Ti cahai sū, na tuhcuca caha suha. Na tuhcuca caha sū, muhri caha dijaha pū to wūhdu wapa yahpa pihachupū. Tó sehe yoa, tinare siniha tiro. ²Ā yoa tiro ō sehe niha tinare:

—Yū coyca, yuhū musare yoadohoihtja. Yū ya wūhui micha ñamine carīsinina taga. Tói musa dahpori cūhure cosawega. Ñamichaca bohrea caharo-cāpū yūhdu wahcāga tjoa —niha.

To ā nichū tuhoa, tina sehe ō sehe ni yūhtiha tirore:

—Noanohca. Cahmaeraja. Wūhuse sopacaripū coā carīnocahtja —ni yūhtiha tirore.

³Ti ā ni yūhtipachuta, tiro sehe tinare, “Jai” nieraha. Payū tahari tinare, “Ya wūhupū carīna taga” ni mujaha. Payū tahari to ā ni mujachu tuhoa, tina sehe tirore yūhtiha. “Jai” ni, tiro mehne to ya wūhupū wahaha juna. Tinare to ya wūhupū na sū tuhsū, to cahamacare noaa chuare yoa dutiha tiro. Pāo curiri cūhure, tíre bucuchū yoare moreno marieno yoa dutiha, “Yoari pja wahari” nino. Tina to wūhui na surina sehe chuare ti tuhsuri baharo, chuha juna.

⁴Ti carīa wahaerasinichuta, jipihtina mua Sodoma macaina sehe ti jiri wūhure cahmachu, soroarucu suha. Wahma yapia, ā jichū bucuna ne cūiro duhsaro baro marieno jiha. ⁵Ā yoa tina Lotere ō sehe ni sañurucu dūcaha:

—¿Micha ñamine mū wūhui wihiina cjiri mua nohoi jijari? ¡Waroca wioga tinare! ¡Numino mehne mari wahāso ro sehe tina cūhure yoana tana nija sā! —niha.

⁶Ti ā nichū tuhorro, Lote sehe tina mehne durucuro wijaaha. To sopa pahmare noano biha tuhsū, ō sehe niha tinare:

⁷—Yūhū mehne macaina, ¿dohse yoana tó puro ñaca tinare ñano yoa duajari musa? Musa ā yochū cahmaeraja. ⁸Yū pohna numia, puaro numia

jira. Tí numia ne cūiro muno mehne ji ñuerasinina. Tina sehere musare wa woihtja. Tí numia mehne dohse musa yoa duaro yoa masina. Wiho mejeta yu cahai wihiina mua sehere ne soro yoaena tjiga. Yuhu jihi tinare ya wuhui pji tariro. Ā jicu tinare ñu wihbo masija —niha tiro tinare.

⁹ Ā yoa tina sehe ō sehe ni yuhtiha tirore:

—Pa sehe wahaga muhū. Tó sehe ni, ducata ducui tjiga tinare. Ō macariro jierara muhū. Ā jipaihta, säre duti, yuhdaruca duajari muhū? Tí pja pini tinare sã ñano yoa duaro yuhdoro muhū sehere yoahtja —niha tina tirore.

Tirore tó sehe niata, to cahai waha, to wuhū sopa pahmare cǵawe mu sãa duaa, tirore tjuroca dapo mujaha. ¹⁰ Wiho mejeta tiro cahai surina sehe, tirore ti ā yochu tuhoa, ti wamomacarine sopacapu siōroca wio, tirore ñaha, wuhū puhicha sehe naroca sōnocaha. Tuhsu, tí sopa pahmare noano bihaha tjoa. ¹¹ Ā yoa sopacai ducuna sehere ne ñu bocaerachu yoaaha tina. Wahma yapia, ā jichu bucuna jipihtina ne ñu bocaeraina wahaha. Ā jipahta, sopa pahmare macama, ne bocaeraha tina.

¹²⁻¹³ Ā yoa to cahai surina sehe, puaro mua Lotere ō sehe niha:

—Ahri macare jū cohāna tana nija sã. Ā Ōre mu coyea paina jicari? Mu pohna, mu bujisuma, mu coyea poto ahri macai muhū mehne ti jichu, tina jipihtinare yoropu naa wahaga. Paina sehe ō sehe ni mujana: “Ahri maca macaina ñano waro jia tiina jira. Cohamacu, buhiri dahrega tinare” ti ni sañurucu mujachu, Yawe tuhoru yoaocamana. Ā jiro tiro säre warocahre ahri macare jū dutiro —niha tina tirore.

¹⁴ Tí ā nichu tuhoru, to bujisuma cjihtire yahuro wahamaha. Ti cahapu su, ō sehe ni yahuha tinare:

—¡Cjero! Ño duaro mehne ahri macare wijaa wahaga musa. Yawe ahri macare jū cohāno taro niyuhti —ni yahumaha tinare.

Wiho mejeta tina sehe cua pisaro mehne tuhoeraha tirore. Bujupero yoro sehe tuhoha.

¹⁵ Tinare to ā ni yahuri baharo, bohrea dija tachu waro, tina puaro anjoa Lotere ō sehe niha:

—Mu namore, ā jichu mu pohna numiare ño duaro mehne pa sehepu naahga, ahri macare sã buhiri dahrechū, yaria duaerana —niha tina tirore.

¹⁶ Tí ā ni yahupachuta, tiro sehe ne soaeraha. To ā soaerapachuta, “Ahriro Yawe pja ñuriro jira” nia, tina anjoa, Lotere, ā jichu to namono, ā yoa to pohna numia cūhure jipihtiro tinare ti wamomacaripe ñaha, ño duaro mehne tuā mu wahcāa wahaha. Ti yariaerahto sehe tí macai jiinare tó sehe yoa, na wioha tina. ¹⁷ Tí maca duhtu cahapu tinare na su, cūiro anjo ō sehe niha tinare:

—Jū yaria duaerana, tjuarucu suro marieno, tuhsu, majare ñuno marieno tū yucuri cahapu muroca wahcāa wahaga. Tí yucuri cahapu suna, yariasi musa —niha tinare.

¹⁸ To ā nichu tuhoru, Lote sehe ō sehe ni siniha:

—Yu puhtoro, pja ñuga muhū yuhure. Tó puro ñaca waro muroca wahcā dutii tjiga. ¹⁹ Masija. Muhū yuhure payu yoadoho tuhsura. Yuhu mehne noariro jicu, yu yariaborore ducataru. Wiho mejeta tū yucuri cahapu sūeraboca yuhū. Maha dacho macai yu muroca wahcārucuchuta, jūno yuhure mu sūchū, jū yariaa wahaboca yuhū. ²⁰ Ō cahacā curei cū maca, mahari

macacā jira. Tí macacāre mu jūchu, cahmaeramaca yuhu. Yuhu sehe tí macacāpu jūnore duhti wahcā duai nimaja. ¿Tópu muhu yuhure warocaerabocari? Potocā nii nija. Mahari macacā jira tí maca —ni siniha Lote anjore.

²¹To ā nichu tuhoro, anjo ō sehe ni yuhtiha:

—Jai. Tí pja pinihta mu yuhure sinino seheta yoihtja. Mu niri macacāre jū cohāsi juna. ²²Ā jicu űo duaro tí macapu wahaa wahaga. Cohamacu tuaro pja űuna muhure. Ā jicu tí macacāpu mu sūerasinichu, ahri macare jū cohāsinisi yuhu —ni yuhtiha.

Lote, “Tí maca mahari macacā jira” ni, to yahuri baharo, tí maca, “Soá” wama ti dūcaha. (*“Soá” ni pisuri wama, “mahanocā” niri wama jica hebreo masa ya dūsero mehne*)

²³Ā yoa bohrea caha yuhduri baharo, Lote Soápu suha juna. ²⁴To suri baharocāta, Sodomare, ā jichu Gomorrare Yawe corō taro yoaro sehe azufre tāare jū bora tachu yoaha. ²⁵Tí macarire, tí macaripu jiinare, ā jichu jipihtia tí macari dūhtu cahari duare jū cohā pahñonocaha. ²⁶Wiho mejeta Lote namono sehe, to manūno baharo mūroca nūnu timaricoro ti tariro cjiro sehe majare űuha. To majare űuri pjaihta yaria mūa waha, moa tuturu dojorucu su mūa wahaha.

²⁷Ā yoa pa nūmu bohrea caharoī Abrahā sehe Yawe mehne to durucu tjuaamariro cjiropu wahaha juna. ²⁸Tópu su, űu siteroca boromano, űu bocaha Sodoma, Gomorra, ā jichu tí macari dūhtu cahari jia ti jū pihtiri baharo. Jipihtiropure tuaro me wahcārucuchū űuha, wese jūri baharo me wahcārucuro yoaro sehe. ²⁹Lote to jiro cahacāi jia macari cjirire tó sehe yoa, jū cohā pahñoha tiro Cohamacu. Tí macarire jū cohā pahñoparota, Abrahāre wacūno, to bahuro macūno Lotere yuhdoha, tó jūno mehne butiborirore.

Isaa cjihto masa bajuaha

21 ¹Yawe Sarare noano wahachu yoaro taro, tó panopu “Mūhu bucurocoro jipacohta cūiro wihārirocā pohna ticohca” to ni yahurirore quihōno yoaha. ²Ā jiro ticoro Abrahāre cūiro mūnocā pohna tibasaha, bucuna quina ti jiri baharopu. Quihōno Cohamacu Abrahāre to ni yahu quihō mūhtari pja baroihta tiro nijinocā sehe bajuaha. ³Sara to cjuabasarirocāre Abrahā sehe, “Isaa” ni, pisuha. ⁴Ā yoa to bajuari baharo, ocho dachori to cjuachu waro, to pūcuro sehe Cohamacu to dutiro seheta tirocāre to pjacu cahsarocāre yihso naha. ⁵Isaa to masa bajuari pjare Abrahā sehe cien cūhmari cjuaa tiha. ⁶Ā yoa Sara ō sehe niha:

—Cohamacu yuhure noaputiaro yoara. Tiro yuhure wahchero mehne bujuchū yoara. Tuhsu, jipihtina ahri quitire tuhoina cūhu yu yoaro seheta wahchero mehne bujuahca —niha.

⁷Baharo ō sehe ni namoha tjoa:

—Jipihtina masa, “Ne Sara Abrahāre pohna tibasasi” ni, tuhutumahre. Wiho mejeta bucuro to jipachuta, yuhu sehe tirore cūirocā pohna tibasaja —ni, wahcheha.

To cahamacono Agare, ā jichu to macūno Ismae cūhure cohā wioa tiha Abrahā

⁸Isaa bucuro curero to wahachu űua, to pūcusuma sehe tirocāre pū duhu dutiha. Tirocā to pū duhuri baharo, Abrahā sehe pjiri bose nūmu yoa payoha.

⁹ Ñ yoa cū nūmū Ismae sehe Isaa mehne papero niha. Tiro Ismae sehe Abrahā pacoro Agar, egipto masono mehne to pohna tiroso jiha. Ti ā papechu ñūno, Isaa pocoro Sara sehe soro tuhotuha. ¹⁰ Ñ soro tuhoturo, Abrahāre ō sehe niha:

—Ahricoro mari cahamaconore, to macūno mehnepūta wionocaga. Mari macū Isaa sehe jica mū cjuare cohtota, cjuahitiro. Ā jiro mari cahamacono macūno mehne dohse yoa cahma tju wa masierara —niha Abrahāre.

¹¹ To ā nichū tuhorō, Abrahā sehe ne ji coeraha. To macūnore wio duaeraha tiro. ¹²⁻¹³ To wio duaerachū ñūno, Cohamacū sehe tirore ō sehe ni yahuha:

—Mū namo Sara mūhure to sinino seheta yoaga. Mū cahamaconore, ā yoa to macūno cūhure cohā wionocaga. Tuhsū, tina mehne ñano yajeripohna tii tjiga mūhū. Masija. Mū cahamacono macūno cūhū mū macūta jira. Ā jicu tiro cūhure pjiri curua wahachū yoaihtja. Wiho mejeta wacūga yū mūhure nirire. Yūhū sehe mūhure, “Ismae yū ya curua macariro cjihto jisi. Isaa sehe jirohca ya curua macariro cjihto” ni tuhsūhi. Ā jicu mū macū Isaa mehneta payū mū panamana cjihti ji turia wahcāchū yoaihtja. Tina sehe jiahca yū ya curua macaina cjihti —ni yahuha Cohamacū Abrahāre.

¹⁴⁻³⁴ [...]

**Cohamacū Abrahāre, “¿Yūhure quihōno wacū tuajari ahriro?”
ni masino taro, cūno mijonore yoa dutiro taro niha**

22 ¹ Yoari baharopū Cohamacū Abrahāre, “¿Yūhure quihōno wacū tuajari ahriro?” ni masino taro, cūno mijono yoa dutiro taro niha. Ā jiro to wamapure pisuha:

—Abrahā —niha.

To ā ni pisuchū tuhorō,

—Ōi jija —ni yūhtiha tiro sehe.

² To ā nichū tuhorō, Cohamacū sehe tirore ō sehe ni yahuha:

—Mū macū cūiro jiriro, Isaare, mū tuaro cahīrirore naaga Moria yahpapū. Tōpū tūcū, yū mūhure ñohtu sohtoapu mū macure wajā, jū wa mūo, yūhure ño payoga —niha.

³ To ā nichū tuhorō, pa nūmure bohrearocā to burrocā buire dujia cahnoha tiro. Cahno tuhsū, to wajāhtirore to jū wa mūohti picha cūhure dute, cahnoha. Cahno tuhsū, to macūno Isaa mehne, ā jichū to cahamaca pūaro mehne Cohamacū to waha dutiropū wahaa wahaha tiro Abrahā. ⁴ Tia nūmū waharoi, tūcū Cohamacū to yahu quihōdu yoaropū bajurucuha. ⁵ Tūcū tūcure ñurocaro, tiro to cahamacare ō sehe niha:

—Ōi tjuaga mūsa burrocā mehne. Yū macū mehne sicū cahapū waha, mūjasinina wahana nija. Sicū sohtoapu sūna, Cohamacure ño payo tuhsū, majare dija tanahca tjoa —ni yahuha tinare.

⁶ To wajāhtirore jū wa mūohti picha cjihtire na dijo, Isaa comapariaca bui duhu payoha, to wūa mūjahto sehe. Ā yoa tiro sehe yihsori pjī, ā jichū pichacare na tuhsū, tina pūaropū mūjaa wahaha. ⁷ Mahano mūjaarucuroi tiro to macūno sehe ō sehe ni sinitu ñūha to pūcuro Abrahāre:

—¡Mai! —niha.

—¿Dohse macū? —ni yūhtiha.

—Pichaca, ā jichu picha cūhure mari naaja. Wiho mejeta ovejacā muno mari wajā, jū wa muhtiro sehe, ŷnohoi jicari tiro mari Cohamacure ño payohtiro cjihto? —niha Isaa sehe.

⁸To ā nichu tuhoro, tiro Abrahā sehe ō sehe ni yuhtiha:

—Cohamacu masinohca tiro ovejacā munore mari wajā, jū wa muhtirore. Tiro masinohca, macu —ni yuhtiha to pucuro.

Tina puaro mujaarucusinia niha. ⁹Ā yoa tina, Cohamacu to yahu quihōdu sohtoapu muja suha juna. Muja suri baharo, Abrahā tāa mehne pari tuhu dahre muoha. Dahre muo tuhsu, to pichare cahno payoha. Cahno payo tuhsu, to macuno Isaare duhteha. Tuhsu, tirore na muo, to tāa mehne dahre muori tuhu bui, picha to cahno payori tuhu buipu payoha to macunore. ¹⁰Tōpu duhu payo tuhsu, yihsori pjine ñahaha. ¹¹To wajāno tachu waro, Yawe sehe manopu tirore pisuroca boroha:

—¡Abrahā! ¡Abrahā! —niha.

Pua taha pisuha.

To ā nichu tuhoro, tiro sehe:

—Ōi jija —ni yuhtiha.

¹²Ā yoa Yawe ō sehe ni yuhtiha tirore:

—Ne ñano yoaecu tjiga tirore. Mipu pini masija cua pisaro mehne yuhure mu ño payoare. Ne soro nieracuhta, “Mu macu cūiro jirirore wajā, jū wa muo, ño payoga yuhure” yu muhure ni sinichu, “Ne yoasi” nierara muhu yuhure —niha.

¹³To ā niri baharo, Abrahā ñurocamahno, ñu bocaaha. Cūiro oveja muno, cūdu yucucu yahpaducā dūpuri payūdui to saharipu suhri wahāriro ducuha. To macunore yoaborire tiro sehere nano waha, wajā, jū wa muo, ño payoha Cohamacure juna. ¹⁴Ā wahachu ñuno, Abrahā to ā wahari cuhture ō sehe ni wamoaha: “Yawe mari cahmaare masi, quihōno wara marine” ni, wamoaha tí cuhture. Ā jia mipu macaina cūhu ō sehe nisinica: “Ahdu tūcu sohtoapu mari cahmaare masi, quihōno wara Yawe” nisinica.

¹⁵Ā yoa tí cuhture to wamoari baharocāta, pari turi Yawe sehe Abrahāre manopu yahuroca boroha tjoa. ¹⁶Ō sehe ni yahuha:

—Yu yoa dutiare ne soro nieracuhta, yoara muhu. “Mu macu cūiro jirirore wajā, jū wa muo, ño payoga yuhure” yu muhure ni sinichu, “Ne yoasi” nierara muhu yuhure. Ā jicu yuhu Yawe sehe muhure cua pisaro mehne yu yahuare potocā sohtori tihtja. ¹⁷Muhure potocāta noano wahachu yoihtja. Muhure ji nūnu tihtina cūhure payu wahachu yoihtja, ñahpichoha poca, manopu jia poca yoaro sehe. Paduro pjiri ma duhtu cahai jia pohca yoaro sehe payu wahaahca. Tuhsu, parore muhure yahu namoihtja: Muhure ji nūnu tihtina sehe tinare ñu tuhtiina mehne ā cahma wajā yuhdurucaina jirucuahca. ¹⁸Tuhsu, muhure ji nūnu tihtina painapu cūhure, payu masare noano wahachu yoa turiahtina jiahca tina, jipihtina ahri yahpa masa curua-ripe macainare. Muhu sehe yuhure ne yuhdurucaro marieno yu nino sehetā yohre. Ā jicu yuhu muhure ō sehe ni yahuare yu nino sehetā muhure potocā sohtori tihtja —ni yahuha Yawe tirore.

¹⁹Ā yoa Cohamacu tirore to ā ni yahu pahñochu ñuno, tiro Abrahā sehe majare dijaa wahaha, ti cahamaca ti tjuariropu. Ti cahapu su, cūno potori tjuaa wahaha Berseba wama tiri macapu. Tōpu su, tí macai jia tiha Abrahā juna.

20-24 [...]

Ahri quiti Sara to yariari quiti jira

23 ¹Abrahā namono Sara ciento veintisiete cūhmari cjuaro waro, yariaa wahaa tiha. ²Ticoro Canaā yahpapu jiri maca Hebrōpu yariaa tiha. Tí maca sehe Hebrō ni, ti wamoahito panopure Quiriate Arba ni, ti pisuri maca jisinia tiha.

Ā yoa to namono yariachu ñño, Abrahā sehe tuaro cahyaro mehne tiia tiha.

³⁻¹⁸ [...]

¹⁹Baharo to nuchuri dihta, Macpela wama tiri dihtapu jiri tūtipu to namono pjacu cjirore duhu cū, cohāa tiha Abrahā. Macpela sehe tiro Abrahā to jiro, Maré wama tiriyo ya nūcucā cahaī sū muja taro caha sehe tjuaa tiha. Tí nūcucā sehe Hebrō cahacāi tjuaa tiha.

²⁰ [...]

Abrahā cahamacuno Isaa namono cjihtore macabasaro wahaa tiha

24 ¹Abrahā bucuro waro jia tiha juna. Tirore to catisinino puro jipihtia to yoaare noano wahachu yoa tiha Yawe. ²Ā yoa cū dacho to cahamacuno, paina to cahamaca bui to wacū tuariro, to ya jipihtiare ñu wihboba-sarirore pjiroca, ō sehe niha Abrahā:

³⁻⁴—Ahri yahpa, yu jiri yahpa, Canaā yahpa macaricorore yu macu namo cjihto cahmaeraja. Ā jicu mu ō sehe yoachu cahmaja. Yu jimari yahpa cjiropu waha, yu coyea poto pohna numiare cūcoro bese, yu macu Isaare sinibasai wahaga. Ā yoa muhu sehe Yawe, muanore, ā jichu ahri yahpa cūhure bajua-mehneriro to ñurocaroi yuhure cua pisaro mehne ō sehe ni yuhtiga: “Jai. Wahaihtja. Mu yoa dutiro seheta yoa, sohtori tihtja” ni, yuhtiga yuhure — niha Abrahā.

⁵To ā nichu tuhoru, to cahamacuno sehe ō sehe ni sinitu ñuha:

—¿Mu macure yu sinibasaricoro yuhu mehne to ta duaerachu, dohse yoaihcaru yuhu? ¿Mu macu sehere ti cahapu mu jimari yahpa cjiropu naama yuhu? —ni sinitu ñuha.

⁶To ā ni sinitu ñuchu tuhoru, Abrahā ō sehe ni yuhtia:

—Jierara. Ti cahapure ne naai tjiga muhu yu macure. ⁷Tóputa yu pucsumu mehne, yu coyea mehne jia timai yuhu. Tí yahpapu jirioreta Yawe, muanore bajuamehneriro yuhure na wiohre. Yuhure to na wiori baharo, cua pisaro mehne ahri yahpare, mipu mari jiri yahpare “Mu panamana muhure ji turiahtinare waihtja” ni tuhsua tire yuhure tiro. Ā jiro cūiro to anjore muhu mehne warocarohca tó macaricoro yu macu namo cjihtore boca, mu na tahto sehe. ⁸Ticoro numino to ta duaerachu pinihtare, buhiri tisi muhu. Wiho mejeta ti cahapure naai tjiga yu macure —niha Abrahā.

⁹To ā nichu tuhoru, to cahamacuno sehe cua pisaro mehne ō sehe ni yuhtia:

—Jai. Mu dutiro seheta yoa, sohtori tihtja —niha Abrahāre.

¹⁰Ā ni yuhti tuhsu, to ñarairo ya, noaa, wapa tia barore beseha. Tí sehe numino to na tahticorore, ā jichu ticoro pucsumare wapa marieno to wahti jiha. Tíre bese tuhsu, diez camelloa, to ñarairo yaina mehne wahaa wahaha Mesopotamia yahpapu. Waha, tí yahpapu su, Abrahā bahuro Naco cjiro to

jimari macapũ sũro cahacãpũ suha. ¹¹Tĩ maca sũro caharoi tĩ maca macaina co ti nari copa cahaĩ to camelloare sũ caha sũ dutiha tiro. Ñamichahapũ jiha. Tĩ maca macaina numia co ti wasori pja jiha. ¹²Tói sũro, Cohamacũre õ sehe ni siniha tiro:

—Mũhũ Yawe, yũ ñarairo Abrahã to Cohamacũ, tiro mehne noairo mũ jia tiare ñoga. Michare yũ cahmano seheta noano wahachu yoaga. ¹³Õ sehe wahachu yoaga. Ahri maca macaina nuhmia ahri copai co ti waa tachũ, õihta jiihca yũhũ. ¹⁴Ã yoa cũcoro ahri copa macaa core wa na, tju payo wahcã-ricorore õ sehe ni sinihtja: “¿Mũ tju payori siture na dijoerabocari mũhũ? Core sihni duamaca yũhũ” ni, sinihtja. Yũ ã ni sinichũ, “Jai. Sihniga. Mũ camelloa cũhũre soro co wacohtja” ni, to yũhtichũ cahmamaca yũhũ. To ã ni yũhtichũ tuhoi, “Ahricorota jica mũ cahamacũno Isaare mũ cahmasãaricoro” ni, masiihca yũhũ. Å yoa yũ sinino seheta wahachu ñui, “Abrahã yũ ñarairore Cohamacũ sehe noano yoara” ni, masiihca yũhũ —ni siniha tiro Cohamacũre.

¹⁵To ã ni sinino watoi, cũcoro nuhmino co to wahti siture tju payoricoro buha tarucuha. Ticoro Betue macono Rebeca jiha. Betue sehe Naco, Milca cũhũ cjiri macũno jia tiha. Naco cjiro sehe Abrahã bahũro jia tiha. ¹⁶Ticoro Rebeca noano pjacu tiricoro ji, ñuhto noaricoro jia tiha. Å yoa ne cũiro mũno mehne jieraricoro jiha. Ticoro co ti wari copapũ buhu sũ, core wa na, majare majaa wahaha. ¹⁷To majare majachuta, Abrahã cahamacũno sehe mũroca mũnũ ti maja, ticorore mũ sũ, õ sehe niha:

—Co sihni duai nica yũhũ. ¿Mũ co tju payori situ macaare mahano waerabocari mũhũ yũhũre? —ni siniha.

¹⁸Ticoro sehe,

—Jai. Wacohtja —ni yũhtiha tirore.

Ã ninota, tĩ siture na dijo, tirore tjuha. ¹⁹To sihniri baharo, ticoro sehe:

—Mũ camelloa cũhũre ti sihnihti co wacohtja noho puro ti sihni duaro puro —niha.

²⁰Ã ninota, ño duaro mehne wahiquina ti sihniri wahwapũ to sihni duhaa core pio sãaha. Pio sãa tuhsũ, payũ tahari co nari copapũ mũroca wahcã, co na ta, camelloare pio sãabasa mũjaa tiha ticoro. ²¹To ã yoachũ, Abrahã cahamacũno sehe durucuro marieno ticoro dihtare ñũrucuha. “¿Ahricorota jibocari Cohamacũre yũ siniricoro?” ni, masi duaro niha, ã ñũno.

²²Ã yoa camelloare to sihõ tuhsũri baharo, tiro sehe cũ sorocã, uru sorocãre na, ticoro to quẽ copari dacho macai duhu yoha. Wamomaca sãa sorori, uru sorori, pua soro cũhũre waha. ²³⁻²⁴Tĩre wa tuhsũ, õ sehe ni sinitu ñũha ticorore:

—¿Noa macono jijari mũhũ? —ni sinitu ñũha.

—Betue macono jija yũhũ. Naco, Milca cũhũ cjiri panamañono jija —ni yũhtiha ticoro.

To ã nichũ, Abrahã cahamacũno sehe õ sehe ni sinitu ñũ namoha:

—¿Mũ pũcũ ya wuhũre sã carĩhto mariebocari? —ni sinitu ñũ namoha.

To ã ni sinitu ñũchũ tuhoro, ticoro sehe õ sehe ni yũhtiha:

²⁵—Ãja. Jica mũsa carĩhto. Tuhsũ, mũ camelloa ti carĩhto, ã jichũ ti chuhti cũhũ jica —ni yũhtiha ticoro.

²⁶To ã ni yũhtichũ tuhoro, Abrahã cahamacũno sehe na tuhcuca caha sũ, Yawere ño payoha. ²⁷Ã ño payoro, õ sehe niha tiro:

—Muhū Yawe, Abrahā yū ñarairo to Cohamacure, pjíro “Noana” ni, wahcheja yuhū. Abrahāre, “Muhure noano wahachū yoaihtja yuhū” mū niro sehetā noano wahachū yoara muhū tirore. Ā yoa yuhū cūhure yū ñarairo Abrahā coyea poto ya wuhūi wihichū yoara —ni sini, ño payoha.

²⁸To ā ni ño payori baharo, Rebeca sehe to pocoro ya wuhupū mūroca mū wahcāa, ticorore waharire yahuha. ²⁹⁻³⁰To yahuchū, ticoro wahmino Labā cūhū tuhoha. To quē copari dacho macai Abrahā cahamacuno to duhu yori sorore, ā jichū to wamomacarii to sāa sorori cūhure ñuha tiro. Ā jiro Abrahā cahamacunore ño duaro mehne piti bocaro wahaha. Co ti wari copa cahai to suchū, tiro Abrahā cahamacuno sehe tóihita jiha to camelloa mehne. ³¹Labā sehe to cahai sū, tirore ō sehe niha:

—Muhū, Yawe to noano wahachū yoariro, taga yuhū mehne. Ōpū maca wijaropū jii tjiga muhū. Yū ya wuhūi musa carih̄tore, ā yoa musa camelloa ti jihto cūhure cahnoyū tuhsuhi —niha tiro.

³²Ni tuhsu, Abrahā cahamacunore ā yoa tiro mehne taina cūhure to ya wuhupū naa wahaha. Na sū, camelloa buipū ti naarire dure dijoha. Dure dijo pahño, tina camelloare ti carih̄topū naa, tinare nuha. Nu tuhsu, Abrahā cahamacunore core waha, tiro mehne macaina mehne dahpori to cosahti. ³³Wa tuhsu, ti chuhtire duhu payoha Labā. To duhu payochū ñūno, Abrahā cahamacuno sehe ō sehe niha:

—Yū chuhtō pano, musa mehne durucu duaja yuhū —niha.

To ā nichū tuhoro, Labā sehe:

—Jai. Durucuga —niha.

³⁴To ā nichū, Abrahā cahamacuno ō sehe ni yahuha tinare:

—Yuhū Abrahā cahamacuno jija. ³⁵Yū ñaraiore noano wahachū yoare Yawe. Pache puro wahachū yoare tirore. Tiro cjuara ovejaare, wachuare, camelloare, burroare, uru cjoarire, plata si paa cjoari, wapa tia cjoarire cjuara. Ā jichū to cahamaca numiare, tuhsu, muare cjuara tiro. ³⁶Yū ñarairo Abrahā namono Sara sehe, bucoro waro jiparota cūirocā pohna tibasaa tiri jire. Ā jiro yū ñarairo sehe jipihtia to cjuare to macunore wahre. ³⁷⁻³⁸Tirore cahīno, “Yū macure ō sehe yoabasaga muhū” nihre yuhure tiro. “Ahri yahpa, mipū yū jiri yahpa Canāā yahpa macaricorore yū macure cahmasāaeraja. Ā jicu yū pūcu cjiro ya curua macaricoro, yū coyea poto maconore, yū macu namo cjihto sinibasai wahaga” nihre yuhure yū ñarairo. Ā ni tuhsu, ō sehe ni yuhti dutihre yuhure: “Mū yoa dutiare quihōno yoa, sohtori tihtja” ni, cua pisaro mehne yuhure yuhti dutihre tiro. ³⁹To ā nichū tuhocu, yuhū sehe tirore ō sehe ni sinitu ñūhi: “¿Mū macure yū sinibasaricoro yuhū mehne to ta duaerachū, dohse yoama yuhū?” ni sinitu ñūhi. ⁴⁰Yū ā ni sinitu ñuchū tuhoro, tiro sehe yuhure ō sehe ni yuhtihre: “Yawere yuhdurucaro marieno jia tirucuja yuhū. Tiro to anjore muhū mehne warocarohca. Muhure yū coyeacorore, yū pūcu cjiro ya curua macaricoro, yū macu namo cjihtore bocachū yoarohca. ⁴¹Tina yū coyea ti maconore ti wa duaerachū pinihtare, muhū ne buhiri tisi” ni, yahuhre yuhure.

⁴²Ā jii michare musa co nari copa cahai wihicu, Yawe, yū ñarairo Abrahā to Cohamacure, ō sehe ni sinihi: “Ahri yahpa, micha yū wihiri yahpai yū yoah̄tire noano waha, sohtori tichū yoaga muhū yuhure. ⁴³Ōi co ti nari copa cahai yū jichū, ō sehe wahachū yoaga: Cūcoro nuhmino ahri copa macaa

core waro taricorore ò sehe ni sinihtja: ‘Mũ co tju payori siture na dijoga. Tí situ macaa core sihnii tai nija’ ni sinihtja. ⁴⁴Yũ ã ni sinichũ, ‘Jai. Sihniga. Mũ camelloa cũhure soro co wacohtja’ ni, yũhure yũhtiricoro, ticorota jijaro yũ ñarairo macunore mũ cahmasāaricoro” ni, sinihi yũhũ Yawere. ⁴⁵Yahue-rohca yũ ã ni sinino wato, ahricoro Rebeca core to wahti siture tju payoricoro to buha tarucuchũ ñũhi. Tí copa cahai wihi, core to nari baharo, ticorore ò sehe nihi yũhũ: “¿Co mũ tju payori situ macaare mahano yũhure waerabocari?” ni sinihi. ⁴⁶Yũ ã ni sinichuta, to co tju payo wahcāri siture na dijo, “Jai. Wacohtja. Mũ sihniri baharo, mũ camelloa cũhure soro wacohtja” ni, yũhtihre yũhure. Ni tuhsũ, yũhure co to wachũ, sihnihi. Æ yoa yũ wahiquina cũhure co wahre. ⁴⁷Æ yoa co to wari baharo, ticorore ò sehe ni sinitu ñũhi: “¿Noa macono jijari muhu?” ni sinitu ñũhi. Yũ ã ni sinitu ñuchũ tuhoro, ticoro sehe yũhure ò sehe ni yũhtihre: “Betue macono jija yũhũ. Naco, Milca cũhũ cjiri panamañoño jija” ni, yũhtihre ahricoro yũhure. To ã ni yũhtiri baharo, yũhũ sehe ticorore to quẽ copari dacho macai cũ sorocã duhu yohi. Æ yoa to wamomacari cũhure pua soro wamomaca sãa sorori sãahi. ⁴⁸Tí sororire to wamomacarii sãa tuhsũ, na tuhcuca caha sũ, Yawe, yũ ñarairo Abrahã to Cohamacure ño payohi. Æ yoa tirore ò sehe ni sinihi: “Mũhure pjíro ‘Noana’ ni sini, wahcheja. Yũ ñarairo Abrahã coyea cahai yũhure wihihũ yoara muhu. Mũ ã yoachũ, to coyea waro maconore, to macunore to cahmasāaricorore boca, naa masija yũhũ, to macũ namono cjihto” ni, sinihi Yawere. ⁴⁹Æ jicu yũhũ sehe masi duaja. “¿Musa coyeiro Abrahãre to sinino seheta msa macore wanahcari? ¿Tirore noano yoanahcari msa?” ni masi duaja. Wa duaerana cũhũ, poto yahuga, “¿Dohse yoaihcari yũhũ?” ni, yũ masihtto noano —niha Abrahã cahamacuno tinare.

⁵⁰To ã niri baharo, Labã sehe to pucuro Betue mehne ò sehe ni yũhtiha tirore:

—Sã cahapu mũhure wihihũ yoariro Yaweta jiri jira. Æ jina sã sehe tirore yũhdurũca, soro ni masieraca. ⁵¹Ahricoro jira Rebeca. Naaga ticorore. Mũ ñarairo macũ namono cjihtota jijaro. Yawe to cahmasãano seheta sohtori tijaro —ni yũhtiha tirore.

⁵²Ti ã ni yũhtichũ tuhoro, Abrahã cahamacuno, Yawere ño payoro, na tuhcuca caha sũ, muhri caha dijaha, pũ to wũhdũa wapa yahpa pihachũpũ. ⁵³Baharo uru mehne, ã jichũ plata si paa mehne ti yoaa, cahmono yosaare, busaa darire, wamo pica sãa sororire, ã jichũ suhti cũhure waha Rebecare. Æ yoa ticoro wahminore, to pocoro cũhure paye baro wapa bujuare waha. ⁵⁴Wa tuhsũ, tiro mehne macaina mehne chũ, sihni, Æ yoa tí ñamine tóihita caríha.

Pa numũ bohrearoi Abrahã cahamacuno ò sehe ni siniha tinare:

—Yũ ñarairo cahapu majare tjuaa duaja yũhũ. ¿Warocabocari msa yũhure? —ni siniha.

⁵⁵To ã nichũ, Rebeca wahmino, to pocoro mehne ò sehe ni yũhtiha tirore:

—Mũ numia naaricoro sã mehne diez dachori waro jisiniaro. Tópe dachori baharo ticorore naaga juna —niha tirore.

⁵⁶Ti ã nichũ tuhoro, Abrahã cahamacuno ò sehe ni yũhtiha tinare:

—Jierara. Yũhure tju cũena tjiga msa. Yawe yũhure noano waha, sohtori tichũ yoa tuhsura. Æ jicu majare tjuaa duaja yũ ñarairo cahapu —ni yũhtiha.

⁵⁷To ã nichũ tuhoo, tina ò sehe niha tirore:

—Jai. Tí pja pinihta Rebecare pjiroca, sinitu ñujihna —niha.

⁵⁸ Ñ niata, ticorore pjiroca:

—¿Wahacojari muhu ahriro mehne? —ni sinitu ñuha.

Ti ñ ni sinitu ñuchu, ticoro sehe:

—Wahacohtja —ni yuhtiha.

⁵⁹ To ñ ni yuhtiri baharo, Rebecare, ñ jichu ticorore bucuoricoro cūhure Abrahā cahamacuno cūhu mehne waha dutiha juna. ⁶⁰ To wahahto pano, to coyea sehe ticorore “Noano wahajaro” nia, ñ sehe niha:

—Muhu, sã coyeacoro, sã cahīricoro

payu pohna ti, payu panamana tiga.

Ñ yoa muhure ji nūnu tihtina payu masa puti,

tinare ñu tuhtiinare cahma wajā yuhduruca,

ti jia macarire ma, tí macaripu jijaro —niha tina.

⁶¹ Ti ñ niri baharo, ticoro Rebeca to cahamaca numia mehne camelloa buipu cahno pja su, Abrahā cahamacuno mehne wahaa wahaha. Tó sehe yoa, Abrahā cahamacuno Rebecare numia naa tiha.

⁶² Ñ yoa Abrahā cahamacuno Rebecare to numia naari pjapure Abrahā macuno Isaa sehe co ti nari copa, “Cohamacu catiriro yuhure ñuna” ni, ti pisuri copa cahai jia tiha. Tó jimariro waha, wuuri dūjuro, yucuri marieri dūjuro, Néguebe wama tiri dūjuropu su, tó jia tiha tjoa. ⁶³ Tó jiro, cū nūmu ñamichahapu tinino wahamahno, camelloa ti tarucu bajuchu, ñu boca. ñu boca.

⁶⁴ Ñ yoa Rebeca cūhu Isaare ñu boca. Tirore ñnuta, to camello buipu pisa-maricoro dijaa wahaha. ⁶⁵ Dijaa, Abrahā cahamacunore ñ sehe ni sinitu ñuha:

—¿Noa jijari siro muno, mari potoi tariro? —ni sinitu ñuha.

—Yu ñarairo Isaa jira —ni yuhtiha tiro ticorore.

To ñ ni yuhtichu tuhoro, ticoro sehe to dapure to moha wahcāri suhtiro mehne to wuhduare mohaha.

⁶⁶ Ñ yoa Isaa ti cahai to suchu, Abrahā cahamacuno sehe tirore piti boca, to tininopu waharire tirore yahuha. ⁶⁷ To yahuri baharo, Isaa sehe Rebecare to pocoro cjiro ya wuhupu, wahuquina cahsari wuhupu na sã wahaha. Na sã, ticorore namo tiha. To namonore tuaro cahia tiha Isaa. Tuaro cahino, to pocoro cjirore to wacūmarine boa wahaha.

25 ¹⁻⁶ [...]

Ahri quiti Abrahā to yariari quiti jira

⁷⁻⁸ Ñ yoa Abrahā payu cuhmari catia tiha. To catisinino puro noano jia tiha tiro. Ñ yoa ciento setenta y cinco cuhmari cjuaro waro, yariaa wahaa tiha. ⁹⁻¹⁰ To yariari baharo, to pohna Isaa, ñ jichu Ismae cūhu to pjacu cjirore tūtipu duhu cū, cohāa tiha. To namono cjirore to cohāri ti cjiroputa to pohna cūhu to pjacu cjirore cohāa tiha. To pjacu cjirore ti cohāri ti sehe tiro cjiro catisininopu to nuchuri dihta, Macpela wama tiri dihtapu tjuua tiha. Macpela sehe tiro Abrahā cjiro to jiro, Maré wama tiriro ya nucucā cahai sū muja taro caha sehe tjuua tiha. Sóha macuno Efrōre to nuchuri dihta jia tiha tí dihta. Efrō sehe hitita masuno jia tiha.

¹¹ Ñ yoa Abrahā cjiro to yariari baharo, to macuno Isaa cūhure Cohamacu sehe noano wahachu yoaa tiha. Tí pjapure tiro Isaa sehe co ti nari copa, “Cohamacu catiriro yuhure ñuna” ni, ti pisuri copa cahai jia tiha.

¹²⁻¹⁸ [...]

Esaú ā jichu Jacobo cūhu cjihti masa bajuua tiha

¹⁹Ahri quiti, Abrahā cjiro macuno Isaa ya quiti jira. ²⁰Isaa cuarenta cūhmari cjuaro, to pucubuhuro macuno Betue macono Rebecare namo tia tiha. Ticoro Rebeca sehe Labā bahoro jia tiha. Tina sehe Padā Arā yahpa macaina jia, “aramo” ni, ti pisuina jia tiha. ²¹Ā yoa Isaa namono Rebeca sehe nijinocā boca masieraricoro jia tiha. To ā jichu űuno, to manuno Isaa sehe, “Yū namore nijinocā bocachu yoaga” ni, sinia tiha Yawere. To ā ni sinichu, Yawe sehe tuhoha. Ā jiro ticoro sehe nijinocā boca wahcātaha juna. ²²To cohtainacā sehe suhūduainacā jiha. Ti pocoro pjacupū jipahta, tinacā sehe ti basi cahma tjuroca mūjaa tiha. Ti ā jia tichu tuhuturo, ti pocoro sehe ne ji coera tiha. Ā jiro ticoro, “¿Dohse jiro baro yuhare ā jicari yū pohna?” ni, masi duaro, Yawere sinitu űuno wahaha.

²³To ā sinitu űuchu tuhoro, tiro sehe ō sehe ni yuhtiha:

—Mū pjaropure jiina, mū pohna,

pua curua, masa curuari macaina ti űuchusuma cjihti jira.

Ti masa bajuari baharo,

ti basi cahma űu tuhti dūcaahca tina.

Tuhsu, baharopū cūhure munanota cūiro ya curua,

paio ya curua mehne űano ti basi cahma űu tuhtirucuahca.

Ā jihtina jia, dóihta mū pjaropure

ti basi cahma tjurocayu tuhsua nina tina.

Tina puaro ya curuari cjihti sehe

cū curua tuari curua, pa curua tuaerari curua jirohca.

To bahuro ya curua sehe tuari curua jirohca.

Ā jiro to wahmino ya curua sehe

to bahuro ya curua docai jirohca —ni yuhtiha Yawe ticorore.

²⁴Ā yoa to pohna tiri pja mū suchu, Rebeca niji wahcō, puarocā suhūduainacāre pohna tiha juna. ²⁵Wahma masa bajua mūhtarirocā sehe noano sohā bihtirirocā ji, tuhsu, jipihtiri pjacupū noano pjoari tirocā jiha. Ā jia tirocāre “Esaú” ni, wamoaha. (*“Esaú” niri wama “pjoari tiro” nino nica hebreo masa ya dūsero mehne*) ²⁶To bahurocā cūhu to baharocāta bajuaha. Tirocā sehe Esaú dahpo dihicacāpū űahatjiāhno, bajuaha. Ā to bajuachu űua, tirocāre “Jacobó” ni, wamoaha. (*“Jacobó” niri wama, “dahpo dihica” nino nica hebreo masa ya dūsero mehne. Tuhsu, paro cūhu “mahñoperiro” nino nica Jacobo nino*) Rebeca tinacāre to pohna tiri pjare Isaa sehe sesenta cūhmari cjuua tiha.

Esaú masa wahmino jiro, to cjuaborire chua mehne cohtota, Jacobore waha

²⁷⁻²⁸Ā yoa tinacā bucua wahaha juna. Esaú sehe yoraropū tini ji coariro jia tiha. Tuhsu, wahiquina muhsioriro jia tiha tiro. Wahiquina to wajāinare to pūcuro sehe chu ji coa yūhdua tiha. Ā jiro tirore tuaro cahia tiha. Jacobo sehe soro jia tiha. Tiro yoraropū waharo marieno wūhūi ji ji coabiaa tiha. Ā jiro Rebeca sehe Esaú bui Jacobo sehere cahia tiha.

²⁹Ā yoa cū nūmū Jacobo chuare doharo niha. To doharo watoi, to wahmino Esaú yoraropū tinino suriro, pumeriro tju wihiha. ³⁰Ā tju wihiro, to bahurore ō sehe niha:

—Juca baa yuhdua wahaca yuhũ. Tí mũ dohaa, sohāare yuhũre wa curega mũhũ —ni siniha.

Ā jiro Esaú pua wama cĵua dũcaha. “Edomo” niri wamare cĵua dũcaha tiro. (*“Edomo” niri wama sehe, “sohāno” nino nica hebreo masa ya dũsero mehne*)

³¹ To ā nichũ tuhoro, Jacobo sehe to wahminore ō sehe niha:

—Mũ yuhũre mari pũcũ to yariari baharo, masa wahmino jicũ, mũ cĵuaborire mũ wachũ, yuhũ sehe mũhũre ahri chuare waithtja —niha.

³² To ā nichũ tuhoro, Esaú sehe ō sehe ni yuhtiha:

—Jai. Waithtja. Juca mehne yariaipũ nica yuhũ. Juca mehne yũ yariari baharo, tí yũ masa wahmino jicũ, yũ cĵuabori ne yaba cĵihtĩ jierara yuhũre —ni yuhtiha.

³³ To ā nichũ, Jacobo sehe ō sehe niha:

—Cohamacũ to ñurocaroihta cua pisaro mehne yuhũre yahuga —niha.

To ā nichũ tuhoro, Esaú sehe:

—Cohamacũ to ñurocaroi mũhũre ō sehe nija. Mari pũcũ to yariari baharo, yũ masa wahmino jicũ, yũ cĵuaborire mũhũ sehere wajaro —niha.

To ā ni yahuro mehne, Esaú to masa wahmino jiro, to cĵuaborire cohtota, Jacobo sehere wa dutiro niha. ³⁴ Ā jiro tirore Jacobo sehe pāore, ā jichũ lenteja to dohaa cori cũhũre waha jũna. To wachũ, Esaú sehe tíre chũ, sihni tu tuhsũ, wahcārũcũ sũ, wahaa wahaha. “Yuhũ masa wahmino jicũ, yũ cĵuaboa ne yaba cĵihtĩ jierara” ni, tuhoutuha tiro.

Jacobore noano wahahti cĵihtire sini payoha Isaa

27 ¹ Isaa bũcũro waro waha, capari ñũ sũerariro tjuaha. Ā jiro cũ ñũmũ to macũno Esaú masa wahminore pĵiroca, ō sehe niha:

—Yũ macũ —niha.

—Ōi jija mai —ni yuhtiha tiro.

² To ā ni yuhtichũ, to pũcũro sehe ō sehe niha tirore:

—Yũ bũcũro waro ĵiare ñũna mũhũ. Pa tehe nii dohse jiri dachoi yariaa wahaboca yuhũ. ³⁻⁴ Ā jicũ yũ yariahto pano, Cohamacũ mũhũre noano wahachũ to yoahĩre sini payoi tai nija. Ā jicũ mũ bũeri netere na, mũ bũea yucũ cũhũre na, wahiquina wajāi wahaga. Baharo yũ chũ ĵi coaro seheta noaa chuare yuhũre yoabasaga. Chũ tuhsũ, yuhũ mũhũre sini payoihtja Cohamacũ mũhũre to noano wahachũ yoahĩre —niha.

⁵⁻⁶ Ā yoa Isaa Esaũre to ā ni yahuchũ, Isaa namono Rebeca sehe tuhoha. Ā jiro Esaú to wahiquina wajāno wahari baharo, to macũno Jacobore pĵiroca, ō sehe niha:

—Michapucā tuhohi yuhũ, mũ pũcũ mũ wahmi Esaú mehne to sũhũduchũ. Ō sehe nihre mũ pũcũ tirore: ⁷ “Cũiro nũcũ macariro wahiquiro wajāi wahaga. Ā yoa tirore chũa yoabasaga yuhũre, noano coaa, yũ cahmano seheta. Tíre chũ tuhsũ, Yawe mũhũre to noano wahachũ yoahĩre sini payoi tai nija, yũ yariahto pano” nihre. ⁸ Ā jicũ macũ, yuhũre tuhoga. Yuhũ mũhũre yoa dutiro seheta yoaga. ⁹ Mari nuina wahiquina ti ducuropũ ñũi wahaga. Tópũ sũ, pũaro cabritore, paina bui noainare bese, wajāga. Baharo yuhũre na tahga. Yuhũ sehe mũhũre chũa yoabasacohtja. Noano coaa, mũ pũcũ to chũ ĵi coaro seheta yoabasacohtja. ¹⁰ Yũ tuhsũchũ, tí chuare na wahcā, mũ pũcũre wai wahaga. Mũ ā yoachũ, tiro mũhũre Cohamacũ to noano wahachũ yoahĩre sini payorohca, to yariahto pano —niha.

¹¹To ā nichu, Jacobo ō sehe ni yuhtiha to pocorore:

—Yu wahmi pjacu pjoari cjuara. Yuhu sehe maeraja. ¹²Ā jiro yu pucu yuhure naha nu, tuhuturo, “Esaú jierara muhu. Jacobo jira” niboca. Ā masino, Cohamacu yuhure noano wahachu yoaborore na, nana sehere cohtota sini payoboca —niha Jacobo.

¹³To ā nichu tuhoro, to pocoro sehe ō sehe ni yuhtiha:

—Macu, ā wahachu pinihtare, yuhu sehere nana wahajaro. Wiho mejeta yu muhure yahuriro seheta yoaga. Mari nuina puaro cabritore ō duaro yuhure nabasai wahaga —niha.

¹⁴To ā nichu tuhoro, Jacobo sehe waha, cabritoa noainare naha, tinare wajā, to pocoro cahai na ta, ticorore wiaha. To wiachu, ticoro sehe chua noano coaa, Isaa to chu ji coaro seheta yoabasaha. ¹⁵Baharo Jacobo to sāah-tire, Esaú ya suhtire, wuhupu to wihboa suhtire, jipihtia bui noanore bese, Jacobore sāaha. ¹⁶Sāa tuhsu, to wamuare, ā jichu to yachurire cabritoa cahsari mehne coma ōha. ¹⁷Ā yoa tuhsu, chua noano coaare to tuhsuripure wiaha Jacobore. Ā jichu pāo to yoabasari cūhure tirore wiaha.

¹⁸To wiari baharo, Jacobo sehe to pucuro cahapu waha, ō sehe niha:

—Mai —niha.

To ā nichu,

—Ōi jija —ni yuhtiha to pucuro.

Ā ninota, sinitu nūha:

—ĀDiro baro sehe jijari muhu? ĀEsaúta jijari? —ni sinitu nūha.

¹⁹—Āja, Esaúta jija. Mu macu masa wahmino jija. Mu yuhure yoa dutiro seheta yoa tuhsuhi. Ahri jira wahiquiro yu wajāriro dihi. Wahcā nuju su, chuga juna. Chu tuhsu, Cohamacu yuhure to noano wahachu yoahtire sini payobasaga —ni yuhtiha.

²⁰To ā ni yuhtichu, Isaa sehe sinitu nūha:

—ĀDohse yoa ā ō duaro wahiquiro bocari muhu, macu? —ni sinitu nūha.

—Mu Cohamacu Yawe yuhure wahre —ni yuhtiha Jacobo.

²¹To ā nichu tuhoro, ō sehe niha tirore:

—Taga yu cahai. Yuhure wahā sui taga. Muhure dahra nui tai nija. Ā dahra nui, muhure masihtja yuhu —niha.

²²Ā yoa to wahā suchu, dahra nu, ō sehe niha:

—Jacobo yoaro sehe mu durucupachuta, mu yachuri sehe Esaú ya yachuri yoaro sehe jira —niha.

²³Ā jiro Isaa, “Jacoboc jica” ni, masieraha. To yachurire Esaú yachuri yoaro seheta pjoa tia tuhoutuha tiro. Ā jiro Jacobore Cohamacu noano wahachu to yoahtire sini payoro taro niha. ²⁴To sini payohto pano pari turi sinitu nu namoha tjao:

—ĀYu macu Esaúta jijari muhu? —ni sinitu nu namoha.

—Āja. Tirota jija —ni yuhtiha Jacobo.

²⁵To ā nichu, to pucuro sehe ō sehe niha:

—Mu wajāriro dihire yuhure na tabasaga. Chui tai nija. Chu tuhsu, Cohamacu muhure to noano wahachu yoahtire sini payohtja —niha.

To ā nichu tuhoro, tirore chuare waha Jacobo. Ā yoa se co cūhure waha. Isaa tīre naha, chu, sihni, yoaha. ²⁶Sihni tuhsu, ō sehe niha:

—Yuhure wahsupu wihmiga, macu —niha.

²⁷To ā nichu, Jacobo to pucurore wahsupu wihmiha. Isaa sehe to suhti sãare wijī ñu, tirore Cohamacu noano wahachu yohtire ō sehe ni sini payoha:

—Yu macu noaputiaro me sitiriro jira.

Yawe coró to waroca borori baharo,

yahpa, noano toahti yahpa macaa me sitia sitica yu macu.

²⁸Mu toaare Cohamacu coró waroca borojaro.

Ā yoa mu toaa sehe noano du, bucua, payu dica tichu yoajaro.

Payu trigo ā yoa payu se co cūhure mūhure cjuachu yoajaro.

²⁹Ā yoa jipiehtia paye yahpari macainare

duti yūhdurucariro jiihca mūhū.

Mu ā duti yūhdurucariro jichu,

masa curuaripe macaina ño payoahca mūhure.

Mu coyea cūhure dutiriro jiihca.

Mūhure ñano yoina Cohamacu to buhiri dahrehtina jiaha.

Ā yoa mūhure noano yoinare

Cohamacu tinare noano yoa cahmanohca —ni sini payoha.

**“Cohamacu yūhū cūhure to noano wahachu yohtire
sini payobasaga” ni, to pucurore sinimaha Esaú**

³⁰Ā yoa Isaa Cohamacu noano wahachu yohtire to sini payori baharo, Jacobo wijaaha. To wijaachu waro, to wahmino Esaú wahiquina wajāno sūriro tju wihiha. ³¹Tiro cūhū chūa noa coaare yoa tuhsu, to pucurore waro sūro, ō sehe niha:

—Wahcā nuju sūga. Chūga ahri chūa noa, yūhū, mu macu, wahiquirore wajāi waha, wahiquiro dihi mehne chūa yu yoabasarire. Chū tuhsu, Cohamacu yūhure to noano wahachu yohtire sini payoga yūhure —niha.

³²To ā nichu, Isaa tirore ō sehe ni sinitu ñūha:

—¿Noa jijari mūhū? —ni, sinitu ñūha.

—Yūhū jija mu macu, Esaú, masa wahmino —ni yuhtiha tiro.

³³To ā nichu, Isaa tuho cua wahaha. Ā yoa teterero mehne ō sehe niha:

—¿Tí pja pinihta noa jihri mu pano wihiriro? Tiro cūhū to wajārirore chūa yoa, tuhsu na ta, yūhure wahre. Yūhū sehe chū tuhsu, Cohamacu tirore noano wahachu to yohtire sini payo tuhsuhi. Yoato Cohamacu noano wahachu yohtire cju tuhsura tiro —niha.

³⁴To pucuro tirore ā nichu tuhoró, tuaro tiha. Ā tiiro, ō sehe ni sañurucuha:

—Mai, yūhū cūhure Cohamacu yūhure to noano wahachu yohtire sini payo curega —ni sañurucuha.

³⁵To ā nichu, Isaa sehe ō sehe ni yuhtiha:

—Mu bahū yūhure mahñono wihihre. To ā mahñochu, yūhū sehe Cohamacu mūhure noano wahachu to yoaborire mu bahū sehere yoato sini payo tuhsuhi —ni yuhtiha.

³⁶To ā nichu, Esaú ō sehe ni yuhtiha:

—¡Quihōno yu bahure “Jacobó” ni, pisuna niri jira musa! ¡Mahñoa mehne mariro jira tiro! ¡Pua taha mehne yūhure ā yoaro nina! Wahmanore masa wahmino jicu, yu ñahaborire yu bahū yūhure mahre. Mipū sehere Cohamacu

yuhure to noano wahachu yoaborire mana. Mai, ¿yuhu cūhure ne cūno mu sini payoboro mariaputijari? —niha.

³⁷To ā nichu, Isaa ō sehe ni yuhtiha:

—Tuhoga muhu. Yuhu yoato Jacobore mu puhtoro cjihto cū tuhsuhi. Ā yoa to coyea sehe to cahamaca jiahca. Tuhsu, cūhmaripe payu trigo, payu se co cjuarucurohca tiro, ni tuhsuhi. Mipu pinihtare, macu, dohse yoa masieraca yuhu muhure —niha.

³⁸To ā nipachuta, Esaú sehe ne tjuaeraha. Sinituha tjoa:

—¿Paye mu yuhure sini payoboa mariaputijari? ¡Yuhu cūhure sini payo curega! —nimaha.

Ā ninota, tuaro sañurucu, tiilha tiro. ³⁹To ā tjuerachu ñuno, Isaa sehe ō sehe niha tirore:

—Noaa yahparire mu cō yoaropu jiihca muhu.

Mu ya yahparire ne coro tasi.

Tuhsu, mu toaa cūhu noano bucuasi.

⁴⁰Paina mehne cahma wajāa, mu maa mehne catiilhca muhu.

Tuhsu, yoari pja mu bahu cahamacuno jiihca muhu.

Jima, pume, to cahamacuno mu jiare

wijaaihca muhu juna —niha tirore.

Jacobo Padā Arā yahpapu wahaa wahaha

⁴¹Ā yoa ti pucuro Isaa Esaúre to sini payoboare Jacobo to mahño, mari buhiri tiro Esaú sehe to bahore tuaro ñu yabi ducaha. Ā jiro tiro ō sehe ni tuhotuha: “Yu pucu bucuro jira. Pa tehe nino to yariahto mahanocā duhsa-boca. To yariari baharo, yu bahure wajā cohānocaihtja” ni, tuhotuha.

⁴²Wiho mejeta ti pocoro Rebeca sehe Esaú to ā yoa duaare tuho bocanocaha. Ā jiro Jacobore pji dutiha. Ā yoa to cahai to wihichu ñuno, ō sehe ni yahuha tirore:

—Muhure mu wahmi Esaú wajāno taro niyuhca, mu tirore yoaa buhiri.

⁴³Macu, tuhoga yu ō sehe niare. Michapucacāta tirore duhti wahcāga yu wahmi Labā cahapu, Harā wama tiri macapu. ⁴⁴⁻⁴⁵To cahapu su, tiro mehne mahari pja jisniga. Mu wahmi muhure tuaro ñu tuhti, to suama pihtiri baharo muhure ta duti, pjirocacohitja. Mu wahmi muhure to wajāchu, paio tirore wajā cahmaboca. Ā wahachu, yuhu sehe cū numuihta musa yu pohna puaropureta boro pjaeraca —ni yahuha.

⁴⁶Baharo to manuno Isaa cahapu waha, “Jacobore pa sehepu warocajaro” nino, ō sehe niha tirore:

—Esaú namosanumia, hitita masa numia mehne pume yuhdua wahaca yuhu. Jacobo cūhu ahri yahpa macaricoro hitita masonoreta to namo tichu, cahyaa mehne yariacohca yuhu —niha ticoro Isaare.

28 ¹⁻³Ā yoa Isaa sehe to macuno Jacobore pjiroca, ō sehe ni yahuha tirore:

—Ō macaricoro, Canaā yahpa macaricorore namo tii tjiga muhu. Mu yare cahno, mu poco coyea cahapu Padā Arā yahpapu wahaga. Tópu sucu, mu ñuchu Betue ya wuhui jiga. Ā yoa mu bachu Labā pohna numiare mu ji coaricorore cūcoro bese, namo tiga —ni yahuha tirore.

Yahu tuhsu, “Yu macure noano wahajaro” nino, ō sehe ni sini payoha:

—Cohamacu Jipihtina Bui Tua Yuhdurucu Suriro Waro noano wahachu yoajaro muhure. Payu pohna ti, muhure ji turia dijahtina payu jichu yoajaro. Á yaro, payu masa curuari ñuchuno cjihto jichu yoajaro muhure. ⁴Muhure, á yoa muhure ji turia dijahtinare noano wahachu yoajaro, mu ñuchu Abrahā cjirore, “Noano wahajaro” to ni cūriro seheta. Ahri yahpa pua yaro sehe jieraja mari. Á jiina mari jipachuta, mu ñuchu cjirore to ni cūno mehne mipure musa ya yahpa waro wahachu yoajaro —ni sini payoha.

⁵To á ni, sini payori baharo, Jacobo sehe Padā Arā yahpapu wahaa wahaha juna. To bachuro Labā cahapu waharo niha tiro. To bachuro Labā sehe Betue macuno jia tiha. Á jiro Jacobo pocoro Rebeca wahmino waro jia tiha. Tina Padā Arā yahpa macaina jia, “arameo” ni, ti pisuina jia tiha.

Esau pacorore namo ti namoha tjoa

⁶Á yoa Jacobo wahmino Esau sehe ti pucuro Isaa Jacobore to sini payoa quitire tuho boca. Tuhsu, tirore Padā Arā yahpapu namo ti duti to warocari cūhure tuho boca. Á yoa tirore ti jiri yahpa, Canaā macaricorore to cahma-sāaeraa quti cūhure tuho boca. ⁷Á yoa Jacobo to pucsumare ne yuhdurucaro marieno Padā Arā yahpapu to wahari cūhure tuho boca Esau. ⁸⁻⁹Tí quitire tuho bocaro, ó sehe ni tuhotuha tiro: “Mipu masija. Yuhu sehe ahri yahpa, Canaā yahpa macaa numiare, puaro numiare namo timahi. Yu pucu sehe tí numiare ñu ji coarari jira. Á jicu tí numiare cohāerapaita waha, yu coyee poto maconore yu namo ti namochu, noaboca yuhure” ni, tuhotuha tiro. Á ni tuhoturo, to ñuchuno Abrahā cjiro macuno Ismae cahapu wahaa wahaha. Tópū su, Ismae macono Mahalatero namo tiha tjoa. Ticoro Mahalate sehe Nebaiote bahoro jiha.

Jacobo Cohamacure cahāha

¹⁰Á yoa tiro Jacobo sehe to pucuro Isaa tirore to waha dutichu tuhorro, waharo niha juna. Berseba wama tiri macai jiriro cjiro to bachuro jiri maca, Harā wama tiri macapu wahari mahai waha dūcaha. ¹¹Tí mahai waharucuha, te sū sāachupu. Sū sāachu ñuno, tiro tjua caha susiniha, carīno taro. To carīhti cuhtui cūria tācare to dapure to ño tuhtia cjihtore na cahno cūha. Tuhsu, tói coā carīha tiro. ¹²Tói carīno, ó sehe cahāha: Cū casario, tu cū mujari casario yahpapu ji duca, te muanopu suri casariore cahāha tiro. To ñuchu, tí casarioi Cohamacu yaina anjoa sehe paina mujaina, paina dija taina jiha. ¹³Á yoa Yawe cūhure to cahai ducuchū, ñurucuro cahāha. To cahai ducuro, Cohamacu sehe ó sehe ni yahuha tirore:

—Yuhu jija Yawe. Mu ñuchu cjiro Abrahā, á jichu mu pucu Isaa cūhu ti ño payoriro, ti Cohamacu waro jija yuhu. Muhure, á jichu mu panamana ji turia dijahtina cjihtire ahri yahpa, mipu mu carī coāri yahpare waihtja. ¹⁴Tina mu panamana ji turia dijahtina cjihti sehe dihta pohca yaro sehe payu waro jahca. Tina payu waro waha, sū muja taro sehe, sū sāano sehe, á jichu pari taño sehe cūhure paró ji sahserucu sua wahaahca. Baharo muhure ji turia dijari curua mehne jipihtia masa curuari macainapu cūhure noano waha turiachu yoihtja. ¹⁵Á jicu mipure yuhu sehe muhu mehne á jirucuihtja. Nohoi mu waharoi muhure ñu wihboihtja. Á yoa ahri yahpaita muhure majare tjua tachū yoihtja. Cohāno marieno muhu mehne á jirucuihtja. Michapucacā yu muhure niriro seheta yoa, sohtori tihtja —niha.

¹⁶ Ñ yoa Jacobo sehe tíre cahãriro cjiro wahcã wihiha juna. Wahcã wihi, ò sehe ni tuhotuha: “Yawe òi jiri jira. Yuhũ sehe tíre ne masierahti” ni, tuhotuha. ¹⁷ To ã ni tuhotuchuta, tirore cuaro wurũ pja wihiha. Ñ cuaro wurũ pja wihichũ, ò sehe ni tuhotu namoha tiro: “Ñ cua pisaro waro jiri jira. Cohamacũ jiro jiri jira. Muanopũ suri casario to dija wihirucũ sũro jiri jira ò” ni, tuhotuha tiro.

¹⁸ Ñ yoa pa numũre ñami curero wahcã wihiha tiro. Wahcã, tí cuhture quihõ cũno taro, tãca to dapure to ño turia cjirore na wahcõ dapoha. Na wahcõ dapo, “Ñ Cohamacũ jiro jiri jira” ni, ño payoro, tia tãcare olivo se mehne pio sihõ dijoha. ¹⁹ Ñ yoa to carĩni cuhtu cahai cẽ maca, Lus wama tiri maca jia tiha. Tí pjai Jacobo sehe tí maca wamare cohtotaha. Ñ cohtotaro, “Betel” ni, wamoaha. (“Betel” niri wama, “Cohamacũ ya wuhũ” niri wama jica hebreo masa ya dũsero mehne)

²⁰⁻²¹ Ñ yoa tói Jacobo sehe Cohamacũ tirore to nirire wacũno, cua pisaro mehne ò sehe ni siniha:

—Yuhũ sehe yũ bachũ cahapũ tinii wahai nija. Ñ jicu muhũ sehe cahãnopũre muhũ yuhũre niriro seheta yuhũre piti ti, noano ñũ wihboihca. Tuhsũ, yũ chũhtire, yũ sãahti suhtire muhũ yuhũre waihca. Ñ yoa yũ pũcũ cahapũ noariro yũ majare tju sachũ yoaihca muhũ yuhũre. Mũ ã yoachũ, yuhũ cũhũ muhũre cua pisaro mehne “Muhũ Yawe yũ Cohamacũ jira” niihca. ²² Tuhsũ, ahri cuhtu, tãcare yũ na wahcõ daporĩ cuhtu, “Ñ Cohamacũ jiro jira” ni, yũ quihõ cũri cuhtu sehe, yũ muhũre wacũ, wahchehti cuhtu cjihto jirohca. Ñ yoa muhũ yuhũre waapere, dohse jia paye barore, yuhũ cũhũ tĩpere muhũre ño payoro mehne mahano, mahano wa mujaihtja —niha Jacobo Cohamacure.

Jacobo Padã Arã yahpapũ suha

29 ¹ Ñ yoa tiro Jacobo sehe to wahari mahai waharucuha tjoa. Tí mahai waha, pũ sũ mũa taro caha sehe macaina ya yahpapũ suha.
²⁻²⁵ [...]

Resumen: Tí yahpapũ to pocoro coyeyã sehe jia tiha. Tí yahpapũ sũ, tina mehne yoari pja jia tiha tiro. Tina mehne jiro, puaro numia, to namosanumia cjihtire bocaa tiha. To bachũro waro pohna numia jia tiha, tí numia. Lía, Raque wama tia numia jia tiha. Tuhsũ, to namosanumia ti cahamaca numia, puaro numia cũhũre namo tiha tiro. Tí numia sehe Bila, Silpa wama tia numia jia tiha. Tí numia pititiaro numia mehne tí yahpapũ jiro, once waro pohna tiha tiro.

31 ³ Ñ yoa Jacobore ò sehe ni yahuha Yawe:
—Mũ coyeyã cahapũ coha tjuaa wahaga muhũ. Mũ ñũchũ quiro munano ya yahpapũ, mipũ mũ pũcũ to jiropũ coha tjuaa wahaga. Mũ tópure wahachũ, yuhũ sehe muhũre piti ti wahcãrucuihtja —ni yahuha.

⁴⁻¹⁶ [...]

¹⁷⁻¹⁸ Ñ yoa Jacobo sehe to pũcũro Isaa to jiri yahpa Canaã yahpapũ coha tjuaaaro taro, to ya jipihtiare cahnoha. Tíre cahno tuhsũ, to namosanumiare, ã jichũ to pohmare camelloa buipũ na payoha. Na payo tuhsũ, Padã Arã yahpai dahra jiro, to wapatarina, wahiquina to nuina cũhũre to panoĩ dapo, to pũcũro ya yahpapũ wahari mahai waha dũcacha juna.

¹⁹⁻⁵⁵ [...]

Jacobo Canaã yahpapu to coha tjuaachu, Esaú sehe tirore piti bocaro taha

32 ¹ Ñ yoa Jacobo Padã Arã yahpapu jiro Canaã yahpapu coha tjuaaro niha. Ñ tjuaarucuro, Cohamacu anjoare piti boca. ² Jacobo sehe tinare ñno, cua yuhdu wahaha. Ñ cuaro, ñ sehe niha:

—Ahrina Cohamacu surara jica —niha.

Ñ jiro tóre “Mahanaí” ni, wamoaha.

³ Ñ yoa tí jpapure Jacobo wahmino Esaú Edomo yahpapu jia tiha. “Seir” ni, ti pisuri yahpa cūhu jia tiha tí yahpa. Ñ yoa Jacobo cāina to muare Esaúpure quti naa dutiro warocaha. ⁴⁻⁵ Ñ sehe ni yahuha to warocainare:

—Musa mehne quti waroca duaja yu wahmi Esaúpure. Ñ sehe ni yahubasaga yuhure: “Yuhu, mu bahu Jacobo, ñ payoro mehne muhare noa dutija. Mari bachu Labã cahai yoari pja dahra jija. Tiro mehne dahra jii, wahiquina nuina wachuare, burroare, ovejaare, cabraare wapataja. Dahra cohtaina muare, ñ jichu dahra cohtaina numia cūhure wahre yuhure, yu dahrari wapa. Mipure tjua taipu nija’ ni, yahurochare mu bahu muhare” ni, yahubasaga yuhure. “Noano mehne mu tirore ñahachu cahmano, ñ payoro mehne ahri quitire säre muhare yahu duti warocahre” niga yu wahmire —ni yahu duti warocaha tinare.

⁶ Ñ yoa tí quitire naarina sehe majare tju wihi, ñ sehe niha:

—Mu wahmi Esaú cahapu suhi sã. Tiro ta tuhsuhre muhare piti bocaro taro. Ñ yoa cuatrociento mua to masa cūhu tiro mehne tahre —ni yahuha.

⁷ Ti ñ ni yahuchu tuhoro, Jacobo sehe cua yuhdu wahaha. Ñ cuaro, ñ sehe ni tuhotuha tiro: “To ya jiboare mahño yu mari buhiri yuhure wajãno taro nica yu wahmi” ni, tuhotu, cuiha. Ñ ni cuaro, to masare pua curua tju wa dapoha. Ñ yoa to wahiquina ovejaa, cabraa, wachua, camelloa cūhure tina mehne tju wa dapoha. ⁸ “Pa tehe nino Esaú ta, cū curua macainare to wajã pahñochu, pa curua macaina yuhdu witiboca” ni, tuhoturo, ñ yoaha tiro.

⁹ Tinare tju wa dapo tuhsu, Cohamacu ñ sehe ni siniha Jacobo:

—Yawe, mu yuhure tuhochu, cahmamaca yuhu. Mihu yu pucu Isaa to ño payoriro Cohamacu jira. Tuhsu, yu ñuchu Abrahã cjiro to ño payoriro Cohamacu jira mihu. Tíre masicu, yuhu cūhure mahano mu tuhochu, cahmamaca yuhu. Padã Arã yahpapu yu jisinchu, mihu sehe yuhure cua pisaro mehne ñ sehe nihre: “Mu ya yahpapu, mu coyea cahapu coha tjuaa wahaga. Noano wahachu yoaihtja muhare” nihre mihu yuhure. ¹⁰ Yuhu wiho jiro jipachuta, mihu sehe yuhure ñ cahirucura. Tuhsu, mu jiro sehet yoa, sohtori tira. Panopure Padã Arã yahpapu wahma wahai, Jordão Mare pahacu, yuhu sehe ne yaba maerariro jia timai. Wahiquinare ñ wihibocu, yu cjuadu, cūdu-reta cjuariro jia timai yuhu. Mipu sehere yaba maerariro jieraja. Cjuaja yu masare, ñ jichu yu wahiquinare. Tinare pua curua yu tju wa daporina mehne coha tjuaai nija. ¹¹⁻¹² Yu coha tjuaarucuro wato cua pisaro waro waharo taro nina yuhure. Yu wahmi Esaú sehe yuhure piti bocaro taro niyuhca. Tí quitire tuhocu, cuija yuhu. “Pa tehe nino tirota yu namosaniare, yu pohnare ñ jichu yuhu cūhure wajãnocaboca” nicu, cuija yuhu. Wiho mejeta mihu sehe wacūca panopure yuhure mu cua pisaro mehne nirire. Mihu sehe yuhure ñ sehe nia tire: “Muhure noano wahachu yoaihtja. Ñ yoa payu muhare jia turiahtina masa putichu yoaihtja. Payu masa puti, pjiri ma dia duhtu caha

macaa padu pohcarire masa ti quihōa bihoeraro sehetā payu wahachū yoaihtja” nia tire muhū yuhure. Ā jicu muhure sinija. Yuhure mu ā nirire wacūi, yu wahmi Esaūre yuhdu witichū yoaga yuhure —ni siniha Jacobo.

¹³ Ā yoa tī űamine Jacobo tōihtā carīha. To carīhto pano, cāina to wahiquinare beseha, Esaūre to wahtina. ¹⁴⁻¹⁵ Beseha doscienta cabraa numia, veinte cabraa mua, doscienta ovejaa numia, veinte ovejaa mua, cuarenta wachua numia, diez wachua mua, veinte burroa numia, diez burroa mua, treinta camelloa numia ti pohnacā pūinacā mehne beseha tiro. ¹⁶ Tinare cāa curuari tju wa dapo, ā yoa tī curuaripeinata to cahamacare bese, tinare űu wihboh-tina cūha. Cū tuhsu, ō sehe niha tinare:

—Ahrinare yu pano naayuga musa. Yu tju wa daporō sehetā, cāa curuari yahcoaro waharucuga musa, moreno marieno —niha.

¹⁷ Ni tuhsu, waha muhtarirore ō sehe niha:

—Yu wahmi Esaū muhure boca suro, ō sehe ni sinitu űunohca: “ĴNoa jijari mu űarairo? ĴNohopu wahi ni jari muhū? ĴNoa yaina jijari ahrina wahiquina, mu naaina?” ni sinitu űunohca. ¹⁸ To ā ni sinitu űuchū, ō sehe ni yuhtiga: “Ahrina wahiquina Jacobo mu bahū, mu cahamacūno cjihto wapa cahmano marieno muhure to warocaina jira. Tiro cūhu tarota nihre yu baharo” ni, yuhtiga —niha Jacobo.

¹⁹ Ā yoa jipihtina tiro waha muhtariro baharo wahaina cūhure āta niha:

—Musa cūhu āta ni yuhtiga, Esaūre boca suna. ²⁰ Ā yoa ahri cūhure boena tjiga. “Mu cahamacūno cjihto cūhu sā baharo tarota nihre” ni, yuhtiga musa cūhu —niha.

Ā yoaro, ō sehe ni tuhoturo niha Jacobo: “Ahrina wahiquina yu pano yu warocayuinare tirore wa, niji suoihtja. Yu ā yoachū, tiro yuhū mehne suasi, tirore yu boca suchū” ni, tuhoturo niha. ²¹ Tō sehe yoa, Esaūre to wahtinare warocayuha. Warocayu tuhsu, tī cuhtuihta carīha Jacobo.

Cūiro masuno Jacobore cĵa suhsu, tiro mehne cahmacheha

²² Ā yoa tī űamihta Jacobo wahcārucu su, to namosanumia puaro numiare, to cahamaca numia puaro numiare, ā jichū to pohna mua, once cūhure Jabocopu na buhu su, tī mácāi tinare űumu pahā dūtiha. ²³ Ti űumu pahāri baharo, paina mehne jipihtia to yare waroca pohōha Jacobo. Waroca pohō tuhsu, cūirota tjuarucu suha. ²⁴ To tjuarucu suchū, cūiro masuno to cahai ta, tirore cĵa suhsu, cahmache dūcaha pu bohrea muja tachupū. ²⁵ Tiro masuno sehe bihoeramahno, Jacobore to duso dohsarucu suroi dotaha. To dotachata, to duso witi mua wahaha. ²⁶ Ā yoa tiro masuno sehe Jacobore ō sehe niha:

—Bohrearopu nina. Yuhure duhuga —nimaha.

To ā nichū tuhorō, Jacobo tirore ō sehe niha:

—Tī pja pinihta yu catisinino puro mu yuhure noano wahachū yoah-tire yahuga. Mu yahuerachūna, duhusi —niha.

²⁷ To ā nichū tuhorō, tiro sehe ō sehe ni sinitu űuha:

—ĴDohse wama tijari muhū? —ni sinitu űuha.

—Yuhū Jacobo wama tija —ni yuhtia.

²⁸ To ā nichū, ō sehe niha tiro muno:

—Mu wamare cohtotaihtja. Muhū “Jacobó” wama tisi juna. Cohamacū mehne, ā jichū mua mehne cūhure cahmachecu, muhū sehetā cahmache,

yuhdurucahre. *Ā jicu mipure “Israe” wama tiilha muhu —niha Jacobore. (“Israe” nino, “Cohamacu mehne cahmacheriro” nino nica hebreo masa ya dusero mehne)*

²⁹ Ā yoa Jacobo cūhu tirore ō sehe ni sinitu űuha:

—Muhu waro, ¿dohse wama tijari? —ni sinitu űuha.

To ā nichu, tiro masuno sehe:

—¿Dohse yoai muhu yuhure masipaihta, sinitu űujari? —ni yuhtiha.

Ā ni yuhti tuhsu, Jacobore to noano wahachu yoahdire yahuha.

³⁰ To yahuri baharo, Jacobo ō sehe ni tuhoutuha: “Ahriro wiho jiro jierari jira. Cohamacuta jiri jira. Cohamacu wuhduare űupaihta, catisinija yuhu” ni, cua pisaro tuhoutuha. Ā jiro ti cahmacheri cuhtu cjirore “Penué” ni, wamoaha. (*“Penué” nino, “Cohamacu wuhdua” nino nica hebreo masa ya dusero mehne*)

³¹ Ā yoa “Cohamacu wuhdua” ni, to wamoari culture to yuhdu wahcāchu, dachopu jiha juna. Tiro sehe pari yuri waharucuha, masuno tirore to dotarirore caro. ³² Ā jia israe masa mipu cūhure wahiquina duso dohsarucu suro macari dihirore chueraca, “Mari űuchu cjirore tó baroihta dotaa tiri jire” nia.

Jacobo, Esaú, ti basi cahma boca suha

33 ¹ Ā yoa Jacobo waharucuro niha tjoa. Ā waharucuro, to wahmino Esaú cuatrociento to mua mehne to ta bajuchu űuha. Ti ta bajuchu űunota, to pohmare ti pocosanumia mehne dapoha. ² To cahamaca numia, puaro numiare ti pohna mehne ti pano dapo muhtaha. Ti baharo, to namono Líare, to pohna mehne dapoha. Ti baharopu pacoro to namono Raquere, to macuno José mehne dapoha. ³ Tinare cū pohna dapo tuhsu, tiro Jacobo sehe ti pano surucu suha juna. Surucu su, Esaúre piti bocaro wahaha. Piti bocaro waharo, Jacobo waha, surucu su, na tuhcuca caha su, muhri caha dijaha pu to wuhdua wapa yahpa pihachupu. Wahcārucu su, pari turi wahaha tjoa. Waha, surucu su, na tuhcuca caha su, muhri caha dijaha tjoa, pu to wuhdua wapa yahpa pihachupu. Siete tahari ā yoa wahcā, Esaú cahacāpu suha juna. ⁴ To ā yoachu, Esaú sehe Jacobo cahapu muroca muhtaa, to wamupu tirore cjā suhsu. Cjā suhsu, tirore wahsupu wihmiha. Ā yoa tina puaroputa tiha. ⁵ Ā cjā suhsu, űu siterocaró, numiare, ā jichu macanacāre ti cahai ti ducuchu űuha Esaú. Tinare űuno, ō sehe ni sinitu űuha:

—¿Noa jijari sina? —ni sinitu űuha.

To ā ni sinitu űuchu, Jacobo ō sehe ni yuhtiha:

—Yu pohna jira. Yuhure, wiho jiriore mu cahamacunore Cohamacu pja űuno, to waina jira —ni yuhtiha.

⁶ To ā nichuta, puaro numia ti cahamaca numia ti pohna mehne Esaú cahapu ta, to potoi na tuhcuca caha suha. ⁷ Ti baharo Líá to pohna mehne ta, tina cūhu to potoi na tuhcuca caha suha. Tina baharopu Raque to macuno José mehne ta, tina cūhu na tuhcuca caha suha. ⁸ Ti ā yoari baharo, Esaú ō sehe ni sinitu űuha:

—Yuhu muhure piti bocai tai, payu wahiquinare yuhdu tahi. ¿Dohse yoai muhu yuhure tinare warocari? —ni sinitu űuha.

To ā ni sinitu űuchu, ō sehe ni yuhtiha Jacobo:

—Muhure wapa marieno yu warocaina jihre. “Yu ā yoachu, noano yuhure űahanohca” nicu, warocahi —ni űo payoro mehne yuhtiha Jacobo.

⁹ To ā nichu, ō sehe ni yuhtiha Esaú:

—Noanohca. Cahmaeraja, bahu. Yuhu payu cjuu tuhsuja. Tina mu yaina muhu mehneta tjuajaro —niha.

¹⁰⁻¹¹ To ã nipachuta, õ sehe niha Jacobo:

—“Cahmaeraja” niecu tjiga. Pja ñuno mehne mu yuhure piti bocachu, wahcheja yuhu. Cohamacu yu muhure ñano yoirare to boriro sehta muhu cuhu bori jira. Æ boriro jii, “Jai. Cahmaja” niga, ahrina wahiquina ño payoro mehne yuhu muhure na tabasarinare. Cohamacu yuhure noano wahachu yoa, pache puro wahachu yoahre. Æ jiro yuhure ne yaba duhsaerara —niha.

Jacobo ã nino, ne tjueraha. Pu Esaú “Jai” to nichupu, duhuha tiro.

¹² Æ yoa Esaú “Jai” ni tuhsu, õ sehe niha:

—Sa wahana. Yuhu musare mu tã wahcãihtja —niha.

¹³ To ã nichu, Jacobo sehe õ sehe ni yuhtiha:

—Noanohca, yu ñarairo. Muhu sehe masica macanacã ti jia tiare. Tinacã ne waha ño duaerara. Æ yoa ovejaa numia, wachua numia ti pohnacã mehne cjuaja yuhu. Tinacãre ño duaro mehne yu naachu, cã dachoihta jipihtina wahiquina yaria pihtia wahaboca. ¹⁴ Æ jicu wahayuga. Mu baharo macanacã ã jichu yu wahiquina ti waharo cūno potori soero waharucuihtja yuhu, pu Edomo mu jiropu suipu —niha Jacobo.

¹⁵ To ã nichu, õ sehe niha Esaú:

—Tí pja pinihta mahaina yu cahamacare muhu mehne cūihtja muhure ti yoadoho wahcãrucuhto sehe —niha.

To ã nichu, Jacobo õ sehe ni yuhtiha:

—Noanohca. Cahmaeraja, yu ñarairo. Cahīno mehne muhu yuhure piti bocachu pinihtare wahcheja yuhu —ni yuhtiha.

¹⁶ Æ yoa tí dachore to tari maha cjiroihta majare tjuaa wahaha Esaú, Edomo yahpapu waharo. ¹⁷ Wiho mejeta Jacobo sehe “Mu baharo wahaihtja” niriro jiparota, Canaãpu wahari maha sehei poto wahaa wahaha. Waha, Sucote yahpapu suha. Tópu su, to ya wuhu cjihtore yoaha. Tuhsu, to wahi-quina ti cohti wuhuse cjihti cūhure yoaha tiro. Æ jiro tí cuhture “Sucote” ni, wamoaha. (*“Sucote” nino, “coa wuhuse” nino nica hebreo masa ya dusero mehne*)

¹⁸ Æ yoa Jacobo Sucote yahpapu jimariro waha namo, Canaã yahpapu suha. Tó sehe yoa, Padã Arã yahpapu jimariro coha tjuaa suha juna. Ti tjuaarucuro puro tinare ne soro wahaeraha. Tópu tjuaa suro, Siquẽ wama tiri maca cahacã ti wuhusere tuã dapo, tói jia tiha. ¹⁹ Tói jiropu tí duhterore nuchuha juna. Tí duhtero pua sehe Hamor pohna jia tiha. Cūiro sehe Siquẽ wama tiro jia tiha. Tinare tí yahpare nuchuro, cien cjoari, plata si paa cjoari mehne wapaha. ²⁰ Æ yoa tí duhteroi cū tuhu tãa mehne dahre muori tuhu yoaha Jacobo. Tí tuhure “El Elohe Israe” ni, wamoaha. (*“El Elohe Israe” nino “Cohamacu potocãta yuhu Israe yu Cohamacuta jira” nino nica hebreo masa ya dusero mehne*)

35 ¹⁻¹⁵ [...]

Ahri quiti Jacobo namono Raque to yariari quiti jira

¹⁶ Baharo tina Jacobo cūhu Betel to ni wamoari cuhture yuhdu wahcãa wahaha. Yuhdu wahcãa, pu Efarata wama tiri macare ti suboro mahano duhsachu waro, to namono Raque sehe niji wahcõ ducaha. To niji wahcõ ducari

baharore nijinocã sehe ne cjero mehne dijaeraha. ã jiro ticoro sehe purĩno mehne yoiri pja wapũ tiha. ¹⁷Yoiri pja wapũ ti, to tuaa pihti yuhduari baharopũ nijinocãre cjuaro taro niha juna. ã jiro to ca ducariro bui tuaro caro niha ticoro. To tuaro cachũ ñũno, ticorore ñũ cohtaricoro sehe õ sehe nimaha ticorore:

—Cũno pjaga mũhũ. Pairo mũ macucã mũnocãre cjuaco nina mũhũ —nimaha.

¹⁸To ã nipachuta, ticoro sehe cũno pjaeraha juna. Yariaropũ niha. To yariahto panocã õ sehe niha ticoro:

—Ahriri yũ macucã Benoni wama tijaro —niha.

ã ni tuhsũ, tirocãre cjuu tuhsũrota, yariaa wahaha Raque. To yariari baharo, ticoro cjiro manũno sehe õ sehe niha:

—Ahriri yũ macucã Benoni wama tiero tjijaro. Benjamĩ wama tijaro —ni wamoaha tirocãre. (*“Benoni” nino, “yuhũre ñano wapũ tichũ yoiriro” nino nica hebreo masa ya dũsero mehne. “Benjamĩ” nino sehe “yuhũre noano yoado-horiro” nino nica*)

¹⁹ã waha, Raque cjiro yariaa tiha. To yariari baharo, Jacobo sehe to namono pjacũ cjirore ti waharucuri maha, Efaratapũ wahari maha dũhtũ cahaita ya cohãnocaa tiha. Tĩ maca Efaratare mipũ macaina sehe “Belẽ” ni, pisuca. ²⁰Baharo Jacobo sehe to namono pjacũ cjirore ya tuhsũ, cũria tãcare na wahcã, to masa copa cjiro buipũ na wahcõ dapoa tiha. Te mipũ cũhũre tia tãca cjiro ducusinica.

²¹ã yoa tiro Israe sehe to namono cjirore ya tuhsũ, wahaa wahaha juna. Yoaro waha, sũropũ jiha cũ wũhũ, mũari wũhũ. Tĩ wũhũ sehe tó macaina ti wahiquinare ñũ wihboa, ti ñũ siteroca bororucuri wũhũ jia tiha. Tĩ wũhũre mahano yuhũ wahcãnoi Israe cũhũ sehe ti ya wũhũseri cjihtire tuã dapo, tói jisinia tiha. ²²Tói ti jichũ, to macũno Rubẽ sehe to pũcũro namono Bila mehne wũana tia tiha. To ã yoiriro to pũcũro Israe sehe tuho bocanocaha. ã tuho bocaro, to macũno mehne tuaro suaa tiha tiro.

Ahri quti Jacobo pohna ti masa bajuari quti jira

ã yoa Jacobo pohna mua jipihtina doce waro jia tiha. ²³Lía mehne to pohna tiina seis waro jia tiha. Ticoro mehne wahma to pohna ti mũhtariro Rubẽ wama tiro jia tiha. To baharore õpeina ticoro mehne pohna ti namoha tiro. Simeõre, Levĩre, Judãre, Isacare, ã jichũ Sabulõre pohna ti namoa tiha.

²⁴ã yoa pacoro to namono Raque mehne sehere pũaro pohna tiha tjoa. Ticoro mehne to pohna ti mũhtariro sehe José wama tiro jia tiha. To doca macariro sehe Benjamĩ wama tiro jia tiha.

²⁵ã yoa pacoro to namono mehne sehere pũaro pohna tiha tjoa. Ticoro mehne to pohna ti mũhtariro sehe Dã wama tiro jia tiha. To doca macariro sehe Neftali wama tiro jia tiha. Tina pocoro Bila wama tiricoro jia tiha. Ticoro Bila sehe Raque to cahamacono jia tiha.

²⁶ã yoa pacoro to namono mehne sehere pũaro pohna tiha tjoa. Ticoro mehne to pohna ti mũhtariro sehe Gade wama tiro jia tiha. To doca macariro sehe Asẽ wama tiro jia tiha. Tina pocoro Silpa wama tiricoro jia tiha. Ticoro Silpa sehe Lía to cahamacono jia tiha.

ã yoa tina Jacobo pohna mua sehe once waro Padã Arã yahpapũ masa bajuaina jia tiha. Benjamĩ cũirota Canaã yahpapũ masa bajuariro jia tiha.

Ahri quiti Isaa to yariari quiti jira

²⁷Baharo Jacobo waharucuro niha tjoa. To pucuro Isaa cahapu waharo niha. Tí pjapure Isaa sehe Jacobo ñuchuno Abrahā cjiro to jiro cjiropu jia tiha. Abrahā cjiro to jiri pjapure tó sehe cū nucū, Maré wama tiro cjiro ya nucucā jia tiha. Á yoa Isaa to jiri pjapu sehere tí nucucā cjiroihta Maré wama tiri maca jia tiha juna. Tí maca sehe Quiriate Arba wama tiri maca cahacāi jia tiha. Tí maca Quiriate Arbare mipu macaina sehe “Hebrō” ni, pisuca. ²⁸⁻²⁹Á yoa tiro Isaa sehe payu cūhmari catia tiha. To catisinino puro noano jia tiha tiro. Á yoa ciento ochenta cūhmari cjuaro waro, yariaa wahaa tiha juna. To yariachu ñua, to pohna Esaú, á jichu Jacobo cūhu sehe to pjacu cjirore tūtipu duhu cū, cohāa tiha.

37 ¹⁻²Ahri quiti Jacobo á jichu to pohna ya quiti jira. Tiro Jacobo sehe Canaã yahpapu, to pucuro cjiro to jiri yahpapu jia tiha.

Á yoa to macuno José sehe, dieciete cūhmari cjuaro, to wahmisuma mehne ovejaare, cabraare ñu wihboriro jia tiha. Tina to wahmisuma sehe to pucuro Jacobo Bila mehne, á jichu Silpa mehne to pohna tiina jia tiha. Á yoa tiro José sehe to wahmisuma ti quihōno yoaerachu ñuno, ti pucuropure yahu mujaa tiha.

³Tiro José sehe ti pucuro Israe bucuro quiro to jichupu masa bajariro jia tiha. Á jiro Israe sehe paina to pohna bui José sehere cahā tiha. Tirore cahino, cūno suhtiro, yoi suhtiro, tuhsu, noano jori tiri suhtirore yoabasa. ⁴José tina bui to cahichu ñua, tirore to wahmisuma sehe ñu yabi ducaha. Tuhsu, tiro mehne suhūdua cūhu purino mehne suhūdu mujaa tiha tina.

⁵Cū ñami tiro José sehe cahāha. Baharo to cahārire to wahmisumare yahuha. ⁶Ō sehe ni yahuha tiro:

—Tuhoga. Yu cahārire musare yahui tai nija. ⁷Mari jipihtina trigo wesepu trigore duhtena nihti. Á yoa wacūenoca yu ya puti sehe yahpapu coāmari puti wahcārucu su mua wahahre. Á wahachu, musa ya putiri sehe soroarucu su pihitia waha, ya putire na tuhcuca caha su, ño payochu ñurucui cahāhi yuhu —ni yahuha tinare.

⁸To á ni yahuchu tuhoa, to wahmisuma sehe ō sehe ni yuhtiha tirore:

—¿Dohse jiro baro á bajuare ñurucui cahāri muhu? ¿Sā puhtoro, sāre dutihtiro ji duai nijari muhu, á bajuare cahāi? —ni yuhtiha tirore.

Á yoa to á cahārire to yahuchu tuhoa, tina sehe ne ji coaeraha. Á jia tirore tuaro ñu yabi namoha.

⁹Baharo pari turi José cahā namoha tjoa. To cahārire to wahmisumare ō sehe ni yahuha tjoa:

—Tuhoga. Pari turi ō sehe cahāhi yuhu. Cahānopure yu ñuchu, yuhure sū dacho macariro, tuhsu, ñami macariro, á jichu ñahpichoha poca, once poca cūhu na tuhcuca caha su, ti ño payochu ñurucui cahāhi yuhu —ni yahuha tinare.

¹⁰To pucurore, á jichu to wahmisuma cūhure to cahārire á ni yahuchu, to pucuro sehe tirore ō sehe ni tuhtiha:

—¿Dohse ni duaro nijari muhu ā cahāno? ¿Yuhu, mu poco, ā jichu mu wahmisuma cūhu muhure na tuhcuca caha su, sã ño payonahcari? —ni tuhtiha tirore.

¹¹ Ā jia to wahmisuma sehe ti bahurore tuaro ñu tuhtiha. Ti ā ñu tuhtipachuta, to pucuro sehe to yahurire, “¿Dohse jiro baro ahriro ā cahāari?” ni, tuhotu nunuha.

To wahmisuma Josére ñu tuhtia, tirore duaha

¹² Ā yoa cū namu José wahmisuma sehe ti pucuro yaina ovejaare, cabraa cūhure Siquē wama tiri macapu naa tiha. Tí macapu na su, tói ovejaare tjare chu duti, ñu wihboa tiha. ¹³ Tópū ovejaare ñu wihbo, ti jiro watoi, ti pucuro Israe sehe ti bahuro Josére ō sehe niha:

—Siquēpu mu wahmisuma yu ovejaare ñu wihboa nica. Tina cahapu wahaga muhu —niha tirore.

—Jai. Wahaihtja —ni yuhtiha tiro José.

¹⁴ To ā ni yuhtichu tuhoro, to pucuro sehe tirore ō sehe ni yahuha:

—Ñui wahaga mu wahmisumare, ā jichu yu ovejaare. ¿Dohse jijari? Tinare ñu pahño, yu cahapu majare tjua ta, mu ñurire yuhure yahuga —niha.

Tirore yahu pahño tuhsu, warocaha. To pucuro to warocachu ñano, to jiri maca Hebrō wama tiri maca, tū yucuri watoi jiri macare wijaa wahaha José. Waha, Siquē wama tiri macapu suha tiro. ¹⁵ Tí macai to suri baharo, tí maca dūhtu cahai to wahmisumare ñu maca dūcaha. Ñu maca wahcāno, yoropu tja dihta jiropu su, ñu maca majare tinibiaha tiro, to wahmisumare macano. To ā ñu maca tinino watoi, cūiro masuno tirore piti boca, ō sehe ni sinitu ñuha:

—¿Yabare ñu maca tinii nijari muhu? —ni sinitu ñuha.

¹⁶ To ā ni sinitu ñuchu tuhoro, José ō sehe ni yuhtiha:

—Yu wahmisumare macai nija yuhu. ¿Muhu cūhu ovejaa ti ñu wihbo coh-tarore masieracari? —ni sinitu ñuha.

¹⁷ To ā nichu tuhoro, tiro sehe ō sehe ni yuhtiha:

—Ōi jimarina waha tuhsuhre. “Dotā wama tiri macapu wahajihna” ti nichu, tuhohi yuhu —ni yuhtiha tiro.

To ā nichu tuhoro, tí macapu macano wahaha tiro José. Tópū tinare boca suha. ¹⁸ Tina cahai to suhto pano, tina to wahmisuma sehe yoropu tarucurirore ñu boca tuhsuha. Ā ñu boca, tirore dohse yoa ti wajāhtore ti basi durucu cahnoha. ¹⁹ Ō sehe ni durucu cahnoha tina:

—¡Nuga! ¡Siro cahā bucuro ta tuhsura! ²⁰ Ōi to wihichu, tirore ñaha, wajā cohānocajihna. Tirore wajā tuhsu, co nari copa cjiropu cohājihna. Ā yoana, “Josére nucu macariro wahiquiro suariro chu cohānocari jire” ni, mahño yahujihna mari pucupure. ¿To cahāri cjiri dohse waharojari tirore? Ñujihna mari —ni durucuha ti basi.

²¹⁻²² Ti ā nichu tuhoro, Josére cahño, ti wahmino Rubē sehe tinare ō sehe niha:

—Wajāena tjiijihna mari bahure. Di yoa sitero marieno tirore ahri copa, co nari copa cjiropu, masa marienopu jiri copapu tjuroca sāajihna. Wiho mejeta tirore ñano cami dahre, wajāena tjiijihna —niha.

Tiro to bahana Josére ti wajāerachu cahmano, ā yoa ti pucuro cahapu na tjuaa duaro, ā nimaha.

²³ Ñ yoa ti bahuro ti cahai suchu ñua, tina sehe tirore ñaha mua waha, to suhtiro, noano jori tiri suhtirore tjuwe nanocaha. ²⁴ Tuhsu, tirore naa wahcā, co nari copa cjiropu tjuroca sāaha. Tí copa sehe posa marieri copa, noano wuuri copa jiha. ²⁵ Tí copapu tirore ti tjuroca sāari baharo, nuju su pihti, chu dujirucua tina.

Ti chu dujirucuchu waro, ismae masa sehe Galaapu surina ti camelloa mehne taa bajuha. Ti camelloa buipu me sitia, balsamo, mirra wama tiare Egiptopu ti duahtire naa niha tina. ²⁶ Tinare ñuno, Judá sehe ò sehe niha:

—Mari bahure wajā nuona, yabare wapatasi mari. ²⁷ Tirore wajāena tji-jihna. Mari bahuta jimana. Sina ismae masare duajihna —niha tiro.

To ā nichu tuhoa, to wahmisuma, ā jichu to bahana cūhu:

—Jai. Mu nino sehetā yoajihna —ni yuhtiha tirore.

²⁸ Ñ niata, ismae masa ti cahai wihichu, ti bahuro Josére, copapu ti tjuroca sāarirore na wioha. Na wio, tinare duaaha. Ti duachu, tina sehe plata si paa cjoari, wapa bujua cjoari, veinte cjoari tinare wapaha. Wapa tuhsu, tirore Egiptopu naa wahaha juna.

²⁹ Ti ā naa wahcārire Rubē sehe ñueraha. Ñ jiro baharo tí copa cahapu wahaha. Josére na wioro waharo nimaha tiro. To suchu, tiro sehe tí copapure mariaha juna. To mariachu ñuno, tuaro cahyaha tiro. Ñ cahyaro, to suhtirore tuhrēha. ³⁰ Baharo to bahana cahapu majare tjuaa wahaha tiro. Ti cahapu su, tinare ò sehe niha:

—¡Mari bahure ne bocaerahti yuhu! ¿Dohse ni yahuihcari yuhu mari pūcure? —niha tinare.

³¹ To ā niri baharo, tina José ya suhtiro cjirore na, ti wajāriro cabra di mehne wisōha. ³² Wisō, tí suhtirore ti pūcuro cahapu naa, ò sehe ni sinitu ñuha:

—Ahri suhtirore bocahi sā. Noano ñuga mūhu. ¿Mu macu ya suhtiro cjiro jierajari? —ni sinitu ñuha.

³³ Ti ā ni sinitu ñuchu, ti pūcuro sehe tí suhtiro cjirore ñu masino, ò sehe niha:

—De, yu macu to ya suhtiro cjirota jira. Yu macure nucu macariro suariro bahca site, churo niboa —niha tiro.

³⁴ Ñ ninota, tiro to suhtirore tuhrēha. Tuhrē tuhsu, pa suhtiro, to cahyaro sāari suhtiro sehere cohtota, sāaha. Sāa tuhsu, tihiha tiro. Tuhsu, yoari pja tiro cjirore wacūrucu, cahyarucua tiha. ³⁵ To ā tuaro cahyachu ñua, jipihtina to pohna sehe tirore noano yoaa timaha. “Cahya duhujaro” nia, ā yoaa nia timaha tina. Ti noano yoapachuta, tiro sehe munanota cahyariro jia tiha. Ñ jiro ò sehe niha:

—Yu macu yariariro cjirore ne bosi. Yuhu āta cahyarucuihtja, te yaria, to cahapu suipu boihtja yuhu —niha tiro.

³⁶ [...]

Ahri quiti José, ā jichu to puhtoro Potifar namono ya quiti jira

39 ¹ Ñ yoa ismae masa Josére Egiptopu na su, tó macariro Potifar wama tirirore dua turiaha. Tiro Potifar sehe Egipto macariro faraō doca macariro puhtoro jia tiha. Faraōre ñu wihbo cohtainare dutiroro jiha tiro Potifar.

² Ñ yoa Yawe sehe Josére noano ñu wihboa tiha. Ñ jiro to puhtoro Potifar ya wuhupu to dahrachu, tirore noano wahaa tiha. ³ Yawe Josére to noano ñu wihbochu, Potifar sehe masiha. Tuhsu, jipihti José to dahraa quihõno wijachu yoariro cûhu, “Yaweta jica” ni, masiha tiro. ⁴ Ñ masino, Josére, “Ahriro noano dahrariro jira” ni, ñua tiha. Ñ jiro to doca macariro puhtoro cjihto sõha tirore. Ñ sõno, to ya wuhure dahra cohtaina bui dutihtiro cjihto sõno niha. Ñ yoa jipihtia to cjuaare ñu wihbohtiro cjihto cûhu cûno niha. ⁵ Potifar Josére to doca macariro puhtoro to sõri dachoi Yawe sehe Potifare, to ya wuhure, ñ jichu jipihtia to toaa cûhure noano wahachu yoa ducaha. ⁶ Ñ jiro Potifar sehe jipihtia to yare José to ñu wihbobasa cohtachu, ne tju nununo tuhoutuera tiha. To chuhti cjihti dihtare wacûa tiha tiro.

Ñ yoa tiro José sehe noano pjacu tuariro jia tiha. Tuhsu, ñuhto noariro jia tiha. ⁷ To ñ jiriro jichu ñuno, to puhtoro namono sehe tirore ñu ji coa ducaha. Ñ jiro cû numu tirore õ sehe niha:

—Yuhu mehne jicu taga —niha.

⁸ To ñ nichu tuhoro, José sehe ticorore õ sehe ni yuhtiha:

—Jierara. Yu puhtoro ahri wuhui yuhure cûno, muhu mehne jihtiro cjihtore cûno nierahre. Jipihtia to cjuaare ñu wihbobasahtiro cjihtore cûno nihre tiro yuhure. Ñ jiro yu puhtoro sehe õi yu jichu, ne tju nununo tuhoutuera. ⁹ Ñ jicu yuhu cûhu ahri wuhure to basi to dutiboro seheta dutiriro jii nija. Tuhsu, ahri wuhui jia jipihtiare ñaha masija yuhu. Muhu to namono pinihtare yuhure cûerahre tiro. Ñ jicu muhu mehne tó puro wuru ñano waro yoa masieraca yuhu. Tó sehe yoai, Cohamacure yuhduruca, buhiri tia wahaiha yuhu —ni yuhtiha ticorore.

¹⁰ To ñ niri baharo jipachuta, ticoro sehe dachoripe tirore, “Yuhure piti ti, yuhu mehne jicu taga” ni mujaa tiha. To ñ ni mujapachuta, tiro sehe ticorore ne yuhtiera tiha.

¹¹ Ñ yoa cû numu tiro sehe dahraro taro, wuhupu sãa wahaha. Tí wuhupu to sãa sari pjare paina dahra cohtaina mariaha. ¹² Ñ jiro ticoro sehe to bui sãari suhtirore ñaha mua wahaha. Ñ ñahano, õ sehe niha:

—Yuhu mehne jicu taga —niha tirore.

To ñ nichuta, tiro sehe tunuwe wijaa wahaha. To bui sãari suhtiro dihta ticoro mehne tjuaha. ¹³⁻¹⁴ Tí suhtirore cjuaro, ticoro sehe to cahamaca tói dahra cohtainare pji cahmachuha. Ti cahmachu pihtichu ñuno, tinare õ sehe ni mahñoa:

—Musa ñuna yu manu to na tariro hebreo masuno marine to ñano bujupe, doca dahre duare. Tvaro mehne yuhu mehne ji duaro, ya tahtiapu sãa sumahre tiro. To sãa suchu ñuco, yuhu sehe tuaro sañuhi. ¹⁵ Yu tuaro sañurucuchu tuhoro, tiro sehe cuaa waha, muroca wijaa wahahre. Ñ muroca wijaaro, ahri suhtiro, to bui sãari suhtirore cohã cû mu wijaa wahahre —ni mahñoa tinare.

¹⁶ Ñ ni tuhsu, tí suhtirore wihboha, to manuno wihichu, ñono taro. ¹⁷ To wihichu, tiro cûhure tó seheta ni mahñoa.

—Mu na tariro mu cahamacuno hebreo masuno yu ya tahtiapu sãa sumahre, yuhu mehne ji duaro. ¹⁸ Wiho mejeta yu tuaro sañurucuchu tuhoro, ahri suhtirore yu cahai cohã cû mu wijaa wahahre. ¹⁹ Ñ yohare yuhure mu cahamacuno —ni mahñoa to manuno cûhure.

To ā ni mahñoču tuhoro, to manūno Potifar sehe potocā tuhoha. Ā potocā tuhoro, sua yuhdu mua wahaha. ²⁰ Ā jiro Josére ñahaha. Ñaha, faraō peresu to yoari wuhupu tirore naa, biha daponocaha. ²¹ Peresupu to jipachuta, Yawe sehe tirore noano ñu wihboa tiha. Tuhsu, tirore noano yoaa tiha. Ā noano yoaro, peresupu jiinare ñu wihboriro sehere Josére noano ñu ji coachu yoaha. ²² Ā jiro peresupu jiinare ñu wihboriro sehe Josére tirore ñu wihbodohoh-tiro cjihto sōha. Peresupu jiina dohse ti yoahti cjihtire dutihtiro cjihto sōha Josére. ²³ Yawe jiha Josére ā noano wahachu yoaro. Tuhsu, tirore jipihti to yoaa cūhure noano wijachu yoaa tiha. Ā jiro José puhtoro sehe tirore dahraa cūno, tí mehne tju nūnūno tuhoutuera tiha.

Puaro masa ti cahārire quihōno yahuha José

40 ¹ Jia tiha puaro mua faraō to cahamaca. Cūiro sehe tirore se co wa cohtaina puhtoro jia tiha. Pairo sehe tirore pāo dahrebasa cohtaina puhtoro jia tiha. Cū dacho faraō to dutiro seheta yoaeraha tina. ² To dutiro sehe ti yoaerachu ñūno, faraō sehe tina mehne sua yuhdua wahaha. ³ Ā suaro, peresu ti yoari wuhupu tinare biha dapo dutiha. Ti peresu yoari wuhupu sehe faraōre ñu wihbo cohtaina puhtoro Potifar jia tiha. Tí wuhupu José cūhu peresu jia tiha. ⁴ Tinare to biha dapo dutichu ñūno, Potifar sehe Josére tina cūhure ñu wihbo dutiha. Ti biha daporī baharore tina sehe payu dachori peresu jia tiha.

⁵ Ā yoa cū ñami faraōre se co wa cohtaina puhtoro jimarīro, ā jichu pāore dahre cohtaina puhtoro jimarīro cūhu cahāha. Ti cahāri sehe soro ni yahu dua jia. ⁶ Ti ā cahāri ñami bohrearoi José sehe ti cahapu sāa suha. Sāa su, tinare to ñuchu, tina sehe bujua witiina jia. ⁷ Ti ā jiina jichu ñūno, tiro sehe ō sehe ni sinitu ñuha tinare:

—¿Dohse yoana musa ā bujua witiina jijari? —ni sinitu ñuha.

⁸ To ā ni sinitu ñuchu, tina sehe ō sehe ni yuhtiha:

—Micha ñami sā cahārire cahyana nica sā. “¿Dohse jiro baro sā ō sehe cahāari?” ni, masi duana nimaja. Sāre yahuboriro sehe mariahna —ni yuhtiha tirore.

Ti ā ni yuhtichu tuhoro, José sehe ō sehe niha tinare:

—Musa cahārire Cohamacu dihta quihōno yahu masica. Tirore ño payoriro jija yuhu. Ā jina musa cahārire yuhure yahuga —niha tinare.

⁹⁻¹⁰ To ā nichu tuhoro, faraōre se co wa cohtaina puhtoro jimarīro sehe to cahārire Josére yahuha:

—Yuhu ō sehe ñurucui cahāhi. Yuhu potoi secu cūdu tia dupu dupuri tidure ñuhi. Yu ñuchuta, tí dupuri sehe noano pūri ti mua waha, tuhsu, noano cohorī ti mua wahahre. Baharo tí cohorī sehe se tōhorī dojo mua waha, dói noano ñia tōhorī waha mua wahachu ñurucui cahāhi yuhu. ¹¹ Ā wahachu ñucu, yuhu sehe faraō to sihniri wahware cjuahi. Ā jii yu basita tí tohōrine na, tí wahwapu wipe sāa, tirore tí core warucui cahāhi yuhu —ni yahuha.

¹² To ā ni yahuchu, José ō sehe ni yuhtiha tíre:

—Mu cahāri ō sehe ni duaro nina. Tia dupu, se dupuri tia numu quihōno ñia. ¹³ Tia numu baharo, tiro musa puhtoro faraō sehe mūhure peresupu jirirore wiorohca. Wio tuhsu, mu dahrariro cjiro seheta pari turi mūhure

cūnohca tjoa. ¹⁴Ā jicu muhu sehe mu dahramariro seheta pari turi faraõre se co wa cohtariro jiihca tjoa —ni yahuha tirore.

¹⁴⁻¹⁵ Ā ni tuhsu, õ sehe ni namoha:

—Mu puhtoro mehne pari turi dahrai, yuhu cūhure wacū curega. Yoado-hoga yuhu cūhure. Yuhu sehe buhiri marieno õpure peresupu jii nija. Tuhsu, hebreo masa ya yahpau yu jisinchu cūhure wiho warota paina tuaro mehne ti yaca tariro jija yuhu. Ahri quitire yuhure yahubasaga mu puhtoropure. Tí quitire tuhoro, yuhu cūhure wioboca tiro —niha José.

¹⁶⁻¹⁷ Ā yoa noaa quti tirore to yahuchu tuhoro, pãore dahre cohtaina puhtoro jimariro cūhu to cahārire Joséré yahuha:

—Yuhu cūhu õ sehe cahāhi. Cahānopure tia bati, pão posa tia batirire tju payo, faraõpure naabasai nihti. Tí batiri buipu pisari batiro sehere payu pão sãhti. Tí sehe paye soro sehe bajua, paye cūhu soro sehe bajua jia peri jihre. Ā yoa yu tju payo wahcārucuro wato, minichahca peri sehe wu dija pja su, tí batiripu sãare chu pahñochu ñurucui cahāhti yuhu —ni yahuha Joséré.

¹⁸ To ā ni yahuchu tuhoro, José sehe to cahārire tirore õ sehe ni yahuha:

—Mu cahāri muhu sehere õ sehe ni duaro nina. Tia bati, mu ñua batiri sehe tia dacho quihōno nia. ¹⁹ Tia dacho baharo, faraõ muhu cūhure peresupu jiriore wiorohca. Wio tuhsu, muhure wajā cohānoca dutirohca. Tuhsu, mu pjacu cjiore yucucupu pihō yo dutirohca. Baharo yucaa dija taa, mu pjacu cjiore chu pahñonocaahca —ni yahuha tirore.

²⁰ Ā yoa pua numu yuhdu, tia numu waharo waroi faraõ to masa bajuari dacho cjiro jiha. Ā jiro tí dachore yuhdoro taro, jipihtina to doca macaina puhtoare pji cahmachu, tinare suho churo taro niha. Ā jiro pjíro chuare yoa dutiha tiro. Ā yoa tí dachoihta to doca macaina puhtoa ti ñurocaroi, pere-supu jijnare tirore se co wa cohtaina puhtorore, ā jichu pãore dahre cohtaina puhtoro cūhure wio dutiha. ²¹ To wio dutiri baharo, se co wa cohtaina puhtorore to dahrari cjiirireta pari turi dahra dutiha. Ā jiro tiro sehe pari turi faraõre se co wa cohtariro jiha tjoa. ²² Pãore dahre cohtaina puhtoro sehere wajā cohānoca dutiha. Tuhsu, to pjacu cjiore yucucupu pihō yo dutiha. José ti cahārire to yahuriro seheta waharo niha. ²³ To niriro sehe wahachu ñupa-rotā, faraõre se co wa cohtaina puhtoro sehe Joséré ne wacū payoeraha.

Faraõ to cahārire quihōno yahuha José

41 ¹ Ā yoa pua cūhma yuhduri baharo, cū ñami faraõ Nilo ma duhtu cahapu ñurucuro cahāha. ² Tóito ducuchu, siete nuina wachua, noano dihi tiina ñumu maja taa bajuha. Ñumu maja su, waju watoi jia tjare chu ducua niha tina. ³ Ti baharo tópeinata maja taha tjoa. Tina sehe ne dihi marieina jiha. Ñumu maja ta, tí ma duhtu cahai ducu suha, paina noano dihi tiina cacacāi. ⁴ Baharo noano dihi tiina wurire tina chu pahñonocaha.

Tíre cahāri baharo, faraõ wahcā wihiha. ⁵ Baharo pari turi carīno, õ sehe cahāha tjoa. Cū sa, trigo sare siete tōhori, noaa tōhori, noano yapari tia tōhori jiha. ⁶ Baharo tí sata tópe tōhorita dica ti namoha tjoa. Wiho mejeta tí tōhori sehe cūhma wiñnono mehne ñaia tohōricā, yapari mariea tohōricā jiha. ⁷ Tí tōhori, yapari mariea tohōricā sehe noaa tōhori, noano yapari tia tohōrine chu pahñonocaha.

Baharo tiro faraõ sehe carīmariro wahcā wihi, “Cahāi niri jica yuhu” ni, tuhoutuha. ⁸ To cahāri ñami bohrearo to cahārire wacūno, “¿Yaba pano yuhu

ã cahãari?” ni, tiro cariputiro tuhoutuha. ã jiro jipihtina tí yahpa macaina yayare, ã jichu paina noano masiina cühure pji cahmachuha. Ti cahmachu pihtichu ñuno, “¿Dohse wahahto pano ã cahãari yuhu?” ni, masi duaro, to cahãrire tinare yahuha. To yahuchu, ne cüiro to cahãrire yahu masieraha. ⁹Ti yahu masierachu ñuno, faraõre se co wa cohtaina puhtoro sehe tirore õ sehe ni yahuha:

—Mipü yuhu mähure yahuborire wacü bocai coa taca. ¹⁰⁻¹¹Muhu päore dahre cohtaina puhtoro cjiro mehne, ã jichu yuhu mehne mü suari pjare sã puarore mähure ñu cohtaina surara puhtoro Potifar ya wuhupü, tí peresu yoari wuhupü biha dapo dutiri pjare, tópu sã peresu jiro watoi, cü ñami yuhu soro, ã jichu päore dahre cohtaina puhtoro cjiro cühü soro jiare ñarucuna cahãhi. ¹²ã yoa tópu sã mehne macariro hebreo masuno wahmuno cüiro jihre. Tiro mähure ñu wiho cohtaina surara puhtoro cahamacüno jihre. Sã cahãrire tirore sã yahuchu, tiro sehe, “Musare õ sehe wahahto pano ã cahãna nia musa” ni, quihõno yahuri jire sãre. ¹³Yuhu sehe to yahuriro seheta pari turi yu dahraa cjiirireta dahrai tjoa. Wiho mejeta paio sehere to nino seheta muhu wajã cohã duti, to pjacü cjirore yucacupü pihõ yo dutire. Sãre to yahuriro cjiro seheta wahahre —ni yahuha tiro faraõre.

¹⁴To ã nichu tuhoru, faraõ sehe Josére peresupü jiriore pji dutiha. To pji dutichu tuhoa, tirore ño duaro mehne wiõha. Ti wiori baharo, tiro José sehe to duse pjoarire wuhawe cohã, suhti cohtota, faraõ cahai wahaha. ¹⁵To cahai suchu ñuno, faraõ sehe tirore õ sehe niha:

—Yuhu õ sehe cahãhti. Wiho mejeta yu cahãrire õre ne cüiro, “Õ sehe wahahto pano ã cahãi niri jira muhu” ni, yahuboriro mariahna. Wiho mejeta muhu sehe masa ti cahãrire yahu masiriro jiyuhti —niha.

¹⁶To ã nichu tuhoru, José sehe õ sehe ni yuhtiha tirore:

—Yu mü suro yahu masieraca yuhu. Cohamacü dihta mähure noano wahahto sehe mü cahãrire yahurohca —ni yuhtiha.

¹⁷To ã ni yuhtichu tuhoru, faraõ sehe to cahãrire yahuha:

—Yuhu Nilo ma duhtu cahapü ñarucui cahãhi. ¹⁸Yu tói ducuchü, siete wachüa nuina, noano dihi tiina wuri diapü ñumu maja tahre. Ñumu maja taa, wuju watoi jia tjare ti churucuchü ñuhi. ¹⁹Ti baharo paina tópeinata maja tahre tjoa. Wiho mejeta tina sehe ne dihi marieina jihre. Õ Egipto jipih-tiropure tó sehe dihi marieinare ne cü taha ñuerasinija. ²⁰ã yoa tina dihi marieina sehe wahma ñumu maja tainare noano dihi tiina wuri chü pahño-nocahre. ²¹Tinare chü pahñoapahta, munainata ne dihi marieina tjuahre tina. Masa sehe tinare ñua, wachüa payü ti churire masieraboa.

ã yoa tíre cahãricu wahcã wihi, pari turi caria wahahi tjoa. ²²ã carü, õ sehe cahãhi. Trigo sa cü sare siete tõhori, trigo tõhori jihre. Tí tõhori noaa tõhori ji, noano yapari tia tõhori jihre. ²³Baharo tí sata siete tõhori dicha ti namohre tjoa. Tí tõhori sehe cühma wihtonon mehne ñaia tohõricã cjiiri jihre. Tuhsu, yapari mariea tohõricã jihre. ²⁴Tí tõhori, yapari mariea tohõricã sehe noaa tõhori, noano yapari tia tohõrine chunocahre. Tó sehe yu cahãrire yayare yahumahi. Wiho mejeta ne cüiro yu cahãrire, “Õ sehe mähure wahahto pano ã cahãi niri jira muhu” ni, yahu masierahre yuhure —ni yahuha faraõ Josére.

²⁵To ã nichu tuhoru, José sehe tirore õ sehe ni yuhtiha:

—Pua taha macaa mu cahāri cūnota jira. Tí mehne Cohamacu to yoahti cjihtire muhure ñoyuro nica. ²⁶ Wachua siete, noano dihi tiina, ā jichu trigo siete tōhori, noano yapari tia tōhori mehne siete cūhmari posa quihōno nica. Tí puaro jipahta cūnota ni duaro nica. ²⁷ Ā yoa paina wachua, siete dihi marieina, ā jichu trigo siete tōhori, cūhma wihnono mehne ñaia tohōricā, tí puaro mehne siete cūhmari posa quihō namono nica. “Tōpe cūhmari jucaro waharohca” ni, yahuro nica. ²⁸ Yu nino seheta waharohca. Cohamacu to yoahtire muhure ñoyuro nica. ²⁹ Egipto yahpare siete cūhmari chua payu jahca. ³⁰⁻³¹ Ā yoa tí cūhmari baharore siete cūhmarita tuaro jucaro waharohca. Ahri yahpa jipihtiropure noaa cūhmarine ti toari sehe dichu tie-rapahta, yaria pihtia wahaahca. Ā yoa payu chua ti cjuamari cūhu pihtia wahaahca. Ā wahachu, masa sehe tuaro ñano yuhduahca. ³² Ā yoa “¿Dohse yoi cūno potori ni duaare pua taha cahāri yuhu?” ni, mu sinitu ñachu, ō sehe ni duaro nica tiro muhure. Cūno mehne ō sehe ni duaro nica. “Muhure yu ñoriro seheta sohtori tihtija. Tíre ne cohtotasi” ni duaro nica. Ā yoa paro mehne sehere “Yu ā wahachu yoahto cūhu mahanocā dūhsara” ni duaro nica muhure. Ā jii cūno potori ni duaare pua taha cahāri jira muhu.

³³ Ā jicu muhu sehe cūiro noano masirirore besega. Bese, tirore Egipto macainare waja muhtahtiro cjihto sōga. ³⁴ Tuhsu, paina puhtoa to doca macaina cjihti bese, sō namoga. Sō tuhsu, tina puhtoare siete cūhmari, chua payu jisninino puro Egipto yahpa jipihtiropure chuare na cahmachu tini dutiga. Masa sehe ti weseripu waha, ti chuhti cjihtire ti na tjua ta mujachu, cāina cinco puhuse ti posa wahpo dapochu ñua, tina puhtoa sehe cāinare cū puhuro na mujajaro. ³⁵ Tí siete cūhmari payu chua jiro puro tó sehe yoa, trigore na cahmachu wahcājaro. Na cahmachu, mu dutiro seheta soro wihbojaro. Macaripe tíre mu dutiro seheta wihbo wahcājaro, baharo masa ti chuhti cjihti. ³⁶ Tó sehe yochu, siete cūhmari jucaro wahachupure chua ā jirucuahca. Ā jia masa sehe juca mehne yariasi —niha José faraōre.

Josére egipto masa puhtoro cjihto sōha faraō

³⁷ To ā ni yahuchu, faraō, ā jichu jipihtina to doca macaina puhtoa cūhu José to yahuaire “Potocā jira” ni tuhotu, ji coaha. ³⁸ Ā jiro tiro faraō sehe to doca macaina puhtoare ō sehe niha:

—Ne pairo ahriro yuhdoro masirirore bocasi mari. Ahriro sehe Cohamacu to yoadohoa mehne noano masiroro jiri jira —ni yahuha tinare.

³⁹ Ā ni tuhsu, Josére ō sehe niha:

—Ahri jipihtiare Cohamacu muhure masichu yoari jira. Ā jiro muhu bui masiroro ne mariaha. ⁴⁰ Ā jicu yu yare ñu wihbohtiro jiga muhu. Tuhsu, puhtoro jicu, yu jiri wuhui dahrainare dutihtiro jiga. Ā yoa jipihtina ahri yahpa macaina mu dutiro seheta yoaahca. Yuhu faraō dihta muhu bui dutiro jiihca. ⁴¹ Ā yoa Egipto jipihtiropure dutihtiro cjihtore sōja yuhu muhure —ni yahuha Josére.

⁴² Ā ninota, to ya wamo pica sāari sorore, macaripu masare to joarocaa pūrine to dota ōri sorore nawe, José wamo picai siō sāa ōha. Tuhsu, suhti noaa cūhure tirore sāaha. Ā yoa busari da, uru da cūhure tirore buoha. ⁴³ Tíre wa tuhsu, José to puhtoro sāanore masa ti masihtore yoaro, faraō sehe ō sehe yoaha tirore. To tunua buso, cawaloa ti wajaa buso puaria jiha. Faraō to yaria

waro mehne wahachu, paria sehe to baharo nunu ti mujaria jia tiha. Ñ jiro baharo nunu ti mujariapu Josére samu dutiha. Ñ yoa paina sehere José to wahahti mahare, “Ducatarucuenta tjiga” ni, to pano sañurucu muhta wahcã dutiha. Tó sehe yoa, Egipto jipihtiropure dutihtiro cjihto sôha faraõ Josére.

⁴⁴Sô tuhsu, ò sehe niha tirore:

—Yuhu sehe ahri yahpa macaina puhto a ti bui puhtoro jija. Yu puhtoro jipachuta, jipihitina masa ahri yahpa macaina sehe ti yoa duaare muhu sehere siniahca. Muhure sinino marieno ne yoasi —niha.

⁴⁵Ñ yoa tiro faraõ sehe José to wamare cohtotanocaha. “Safena Panea” ni, pisuha tirore. Tuhsu, faraõ sehe tirore cūcoro Asena wama tiricorore namo dahreha. Ticoro sehe Ono macariro sacerdote Potifera wama tiroiro macono jia. Baharo José sehe Egipto jipihtiropure dutihiro tjuaha juna. ⁴⁶Faraõ to doca macariro puhtoro to sôri pjare tiro José sehe treinta cūhmari cjuariro jia tiha.

Baharo faraõre coha sitiha tiro. Coha siti tuhsu, dahra ducaro taro, Egipto jipihtiropu ñu tinino wahaa wahaha. ⁴⁷Ñ yoa siete cūhmari waro, noaputia cūhmari jiha. Tí cūhmarine masa ti chuhti cjihti payu waro dicha tiha. ⁴⁸Tí cūhmarine José sehe payu waro chuare na cahmachuha. Jipihitia macarire ti toa macaa chuare na cahmachu, tí macaripe wihbo wahcã tiha. ⁴⁹Dia pjiri ma macaa padu pohcari yoaro sehe trigore payu waro na cahmachuha tiro. Tiro sehe tíre quihōrucuma, quihōrucuma, quihōno bihoeraha juna. Tí sehe payu waro wahaha.

⁵⁰Ñ yoa ñano juca wahahti cūhmari pano, José to namono Asena mehne puaro pohna tiha. ⁵¹Wahma ti pohna ti ducarirore “Manasé” ni, pisuha. Ñ ni pisurota, ò sehe niha: “Cohamacu yuhure yu ñano yuhduri cjiire, ã jichu jipihitina yu coyea yuhure ñano yoari cūhure bochu yoare” niha. (“Manasé” nino, “bochu yoariro” nino nica hebreo masa ya dusero mehne) ⁵²Ñ yoa paio to macu-nocāre, duhsariro sehere tiro “Efrai” ni, pisuha. Tiro cūhure ã ni pisurota, ò sehe niha tiro: “Yu ñano yuhduri yahpapu Cohamacu yuhure pohna tichu yoara” niha. (“Efrai” nino, “Yuhu pohna tija” nino nica hebreo masa ya dusero mehne)

⁵³Baharo Egiptopure chua payu jia cūhmari cjiri pihtia wahaha. ⁵⁴Tí cūhmari pihtichu, paye siete cūhmarita jucaro waharo taro niha. José to yahuriro cjiro seheta ã waharo taro niha. Ñ jiro jipihitia yahparipu macaina ti toaa sehe dicha tierapahta yaria pihtia wahaha. Ñ yaria pihtia wahachu, tuaro jucaro waha ducaha juna. Egiptopu cūhure ãta waha ducaha. Ñ wahapachuta, tí yahpa sahse-rore chua jirucua tiha. Tí sehe José na cahmachu duti, to wihbo dutiri jiha. ⁵⁵Ñ jia Egipto macaina sehe juca baa ducaa, faraõ cūhapu chuare sinia wahaa tiha. Tiro cahai su, chuare ti sinichu, tiro sehe jipihitia Egipto macainare ò sehe niha:

—Josére sinina wahaga. Ñ sinina, tiro musare to dutiro seheta yoaga musa —ni yuhtiha tinare.

⁵⁶Ñ yoa Egipto jipihitiri yahpare jucaro wahachu, José sehe chuare to wihboa wuhusere pjōo, Egipto macainare dua ducaha. Sie sehe mehne tuaro jucaro wahaha. ⁵⁷Ne cū yahpa, chua jiri yahpa mariaha. Ñ jia jipihitia yahpari macaina Josére chua nuchua wahaa, Egiptopu sua tiha.

José wahmisuma Egiptopu suha

42 ¹Ñ yoa Jacobo sehe Egiptopu trigo jia quitire tuho bocaha. Ñ tuho bocaro, to pohinare ò sehe niha:

—¿Yabare cohtasinina nijari musa? ²Egiptopu trigo jiyuhca. Nuchuna wahaga musa cūhu, maripu juca mehne yariari —niha tinare.

³To ā nichu tuhoa, José wahmisuma diez waro jiina sehe trigore nuchua wahaha. ⁴Wiho mejeta Jacobo sehe Benjamí, José bahurore warocaeraha, “Soro wahaboca” ni, tuhuturo. ⁵Tí yahpa Canaā yahpa jipihti tiro macaina sehe juca baa niha. Á jia tina cūhu Egiptopu trigore nuchua wahaa niha. Ti wahachu, Jacobo pohna cūhu tina mehne nuchua wahaha.

⁶Á yoa tí pjare tiro José sehe Egiptopure puhtoro jia tiha. Tiro jipihti yahpari macaina to cahai suinare chua duariro jia tiha. Á jia tópu sua, tina to wahmisuma sehe to potoi ducu su, tirore ño payoa, na tuhcuca caha su, muhri caha dijaha, pu ti wuhduca wapari yahpa pihachupu. ⁷Ti ā yoachu ñuno, tiro José sehe to wahmisumare dói ñu masiha. Ñu masiparota, ñu masierariro yoro sehe tinare piti bocaha. Á jiro susinino mehne tinare sinitu ñuha:

—¿Nohopu macaina jijari musa? —ni sinitu ñuha.

To ā ni sinitu ñuchu tuhoa, tina sehe:

—Canaā yahpa macaina jija sā. Tópu macaina chūare nuchuna tana tahi —ni yuhtiha tirore.

⁸Tiro José to wahmisumare ñu masiha. Wiho mejeta tina sehe tirore ne ñu masieraha. ⁹Á yoa tina ti na tuhcuca caha su, muhri caha dijachu ñuno, tiro sehe wacūha tina mehne jiro, to cahāri cjiripure. Á jiro tinare ō sehe niha:

—Jieraca. ¡Mahño ñu duhti sito taina jica musa! Ōre ahri yahpare ducata mahnoeraare mahño ñu duhti sito tana nica musa —ni tinare tuhtiha.

¹⁰To ā nichu, tina sehe ō sehe ni yuhtiha:

—Jieraja, puhtoro. Tó sehe yoina baro jieraja. Sā sehe chūare nuchuna tana tahi. ¹¹Cūro pohnta jija sā. Quihōno yoina baro jija. Ne mahño ñu duhti sito taina jieraja sā —ni yuhtiha.

¹²Ti ā ni yuhtichu tuhora, José sehe tinare ō sehe niha:

—¡Potocā jieraca! Ñu duhti sito tainata jica musa —niha.

¹³To ā nichu tuhoa, tina sehe ō sehe niha:

—Jieraja, puhtoro. Sā sehe Canaā macaina jija. Cūro pohna doce waro jija. Cūro pinihta butia wahari jire. Wiho mejeta paio sā bahu dūhsariro sā pucu mehne tjuahre —ni yahuha tina.

¹⁴Ti ā nipachuta, tiro sehe tinare ō sehe niha:

—Jierara. ¡Yu nino sehetā jira! Musa mahño ñu duhti sito tainata jira. ¹⁵⁻¹⁶Wiho mejeta musa nia “¿Potocāta jijari?” ni masi duaca yuhu. Á jina ō sehe yoa ñujihna. Cūro musa mehne macariro waha, yuhure musa bahure na tabasarahca. Tiro to waha, tjua taro puro musa dūhsaina sehe ōi peresu jinahca. Cua pisaro mehne ō sehe nii nija faraō to wama mehne: Musa ōre ne wijaasi. Pu musa bahu to wihichupu, wijaanahca musa. Mari ā yoro mehne yuhu sehe “¿Musa ā nia potocāta jijari?” ni, masii tai nija. Potocā jierachu, “¡Ahrina mahño ñu duhti sito tainata jira!” ni, masiihca yuhu musare —niha tinare.

¹⁷Á yoa tia dacho waro tiro José to wahmisumare peresupu cūha. ¹⁸Bato tiri dachoi tinare ō sehe niha:

—Yuhu cua pisaro mehne Cohamacure ño payoriro jija. Á jicu wiho warota musare wajā duaeraja. Á jii musa ō sehe yoachu, musare wajāsi. ¹⁹Musa potocā niina jina, cūro musa coyeyrore ōi peresupu cū, musa dūhsaina trigo wajure na tjuaaga, musa mehne macaina ti chuhti cjihti. ²⁰Á yoa musa bahu

dusarirore na, majare tjua taga. Ñujihna, ¿musa potocã niina barota jijari? Musa potocã niina jina, yariasi —niha José.

To ã nichu, tina sehe, “Jai. Noanohca” ni, yuhtiha.

²¹Yuhti tuhsu, ti sahsero õ sehe ni durucuha:

—Mari bahure ñano yoana, buhiri tiinata wahari jica mari. Tiro marine pja ñu duti, tuaro to sinipachuta, mari sehe tuho duaeraí, pjacuoro to sañurucuchu ñupanahta. Á jiro mipure marine ã ñano wahara —ni, ti basi durucuha.

²²Ti ã ni durucuchu, ti wahmino Rubẽ sehe õ sehe niha:

—Musareta yahumai yuhu. “Wahmunore wajãena tjijihna” ni, yahumahi yuhu. Musa tuho duaerari buhiri mipure mari õ sehe yuhduca —niha tiro.

²³Ti ã ni durucuchu, José sehe tuhonocaha. Wiho mejeta tina sehe “Ahiro tuhoca” ni, masieraha. Tiro sehe tina mehne suhũduro, Egipto macaina ya mehne suhũduhua tiha. Tí mehne to suhũduchu, pairopu tina sehere to ni duaare yahu turia mujaa tiha. Á jia tina sehe, “Ahiro tuhoeraca mari yare” ni, tuhutumaha. ²⁴Wiho mejeta José sehe ti ã ni durucuchu, tuhoriro jiro, ti ñueraropu sãa, tiha. Tii tuhsu, wija wihiro, Simeõre soro dapo, to coyea ti ñurocaroi tiore duhte dapo dutiha.

José wahmisuma Egiptopu surina Canaãpu majare tjuaaha

²⁵Baharo José sehe tiore dahra cohtainare to wahmisuma ya wajupu trigore posa wahpo dutiha. Tuhsu, tí wajuhta ti wapamari niñeru cũhure sãa dutiha. Á yoa mahapu ti chu wahcãhti cũhure tinare wa dutiha. To ã yoa dutichu, tiore dahra cohtaina sehe to dutiro seheta yoaha. ²⁶Baharo José wahmisuma sehe ti burroa buipu ti trigo wajure duhte payo, na tjuaa wahaha.

²⁷Á yoa ti carihti cuhtui ti suri baharo, cũiro ti coyeiro sehe to burrore nuno taro, to trigo wajurure pjõoha. Tí wajurure pjõomahno, to wapamari niñeru cjirire ñuha. ²⁸Á ñuno, to coyeare õ sehe niha:

—Ñuga! Yu wapamari niñeru cjiri yu wajurupu sãana. Tina yuhure wia niri jira —ni ñoha tinare.

To ñochu, tina to coyea sehe cua yuhdua wahaha. Á cuaa, teterea wahaha. Tuhsu, ti basi õ sehe ni sinitu ñuha:

—¿Dohsearo marine Cohamacu ã yoajari? —ni sinitu ñuha ti basi.

²⁹Á yoa ti jiro Canaãpu tjuaa suapu, tina ti pucurore jipihtia ti dohse yuhdure yahuha:

³⁰—Sãre tó macaripo puhtoro susioputiaro nihre. “Ahri yahpare ducata mahnoeraare mahño ñu duhti sito taina jira musa” ni, sãre wiho warota tju õhre. ³¹To ã nichu, sã sehe õ sehe ni yuhtihi tiore: “Sã mahño ñu duhti sito taina jieraja. Quihõno yoaina baro jija. ³²Cũiro pohnata doce waro jija sã. Cũiro dihta butia wahaa tiri jire. Sã bahu dusariro pinihta sã pucu mehne Canaãpu tjuahe” ni, yuhtihi sã tiore. ³³Sã ã nichu tuhoro, tiro sehe sãre õ sehe nihre: “Yuhu sehe musa jia tiare masieraja. Á jiina õ sehe yoajihna. Musa coyeiro cũirore õi yuhu mehne cũga. Cũ, musa dusaina trigore na, musa coyea ti chuhti cjihtire na tjuaabasaga. ³⁴Á yoa pari turi tana, musa bahu dusarirore yuhure na tabasaga. Musa ã yoachu, ‘Potocã tjira. Ahrina quihõno yoaina barota jira’ ni, masiihca yuhu. Tuhsu, musa mahño ñu duhti sito taina musa jieraa cũhure masiihca. Á masicu, musa coyeiro yu biha dapo

dutirirore wioihca yuhu. Tí pjapu msa sehe ahri dihtare nohoi msa tini duaroi tininahca” nihre sare —ni yahuha tina ti pucurore.

³⁵Yahu tuhsu, ti trigo wajure pjawe, poho cūa tama, tina cāina ti ya wajupu ti wapamari niñeru wajucā sāachu ñuha. Tíre ñu, tina cua yuhdua wahaha. Ti pucuro cūhu cua yuhdua wahaha. ³⁶Ā cuaro, ti pucuro sehe tinare ō sehe niha:

—Yuhure pohna marieriro yoaro sehe tjuachu yoa duana nina msa. José mari mehne maria, Simeō cūhu mariaha. ¿Mipure tjoa Benjamíre yuhure mana tana nijari msa? Tí mehne yuhuta jija ñano yuhdu mujariro —ni tuhtiha tiro tinare.

³⁷To ā nichu tuhoru, Rubē sehe to pucurore ō sehe niha:

—Yuhure Benjamíre ñu wihbohtiro cjihtore cū, yuhu mehne tirore warocaga. Yuhu tirore naa, na majare tjua ta, tirore muhure wiahtja. Tirore yu na majare tjua taerachu pinihtare yu pohna puaro jiiinare wajānocaga —niha tiro.

³⁸To ā nichu tuhoru, Jacobo ō sehe ni yuhtiha:

—Msa mehne yu macu ne wahasi. To wahmino José yoato yariaa wahare. Ahriro dihta duhsara Raque cjiro mehne yu pohna tiro. Yuhu sehe bucuro waro jija. Tópu msa naachu, tirore soro wahaboca. Tí mehne yu cahya, yariachu, msa buhiri tinahca —niha tinare.

Benjamíre to wahmisuma Egiptopu naa wahaha

43 ¹Sie sehe mehne tuaro jucaro waharucuro niha Canaāpure. ²Ā yoa Jacobo pohna Egiptopu ti nuchua suri trigore Jacobo cūhu chu pah-ñonocaha. Ti chua pihtichu ñano, tiro sehe to pohare ō sehe niha:

—Pari turi mahaa nuchu namona wahaga —niha.

³To ā nichu tuhoru, to macuno Judá sehe tirore ō sehe ni yuhtiha:

—Jai. Wiho mejeta sare tó macariro puhtoro ō sehe nihre: “Msa bahu duhsarirore na taerana, yu cahapu taena tjiga” nihre sare. ⁴Ā jicu mu macu Benjamíre sā mehne warocaga. Mu warocachu, muhure chuare nuchubasana wahanajtja. ⁵Mu warocaerachu, wahasi —niha tiro.

⁶To ā nichu tuhoru, ti pucuro Israe sehe tinare ō sehe ni sinitu ñuha:

—¿Dohse yoana tana ā niri msa? ¿Yuhure ñano wahachu yoana tana ā niri? Tirore, “Sā bahu paio jihre” ni, yahueraboa msa —niha.

⁷To ā nichu tuhoa, tina sehe ō sehe ni yuhtiha:

—Tiro sehe noano sā jia tiare, ā yoa mari jipihtina mari jia tia cūhure sinitu ñu nunuhre. Ō sehe ni sare sinitu ñuhre: “¿Msa pucu catijari? ¿Pairo msa bahu jijari?” ni, sare sinitu ñuhre. To ā sinitu ñua taharipe yuhtihi sā. Wiho mejeta sā sehe, “Msa bahu duhsarirore yuhure na tabasaga’ ninohca” ni, masierahti —ni tirore yuhtiha.

⁸Ā yoa Judá sehe to pucurore pari turi ō sehe niha:

—Mu macu wahmunore ñu wihbohtiro cjihtore yuhure cū, warocaga. Tirore mu warocachu, dói wahanajtja sā. Ā jina mari jipihtina jua mehne yariasi. ⁹Yuhu sehe tirore ñu wihbohtja. Yu ā ñu wihbochu, tópure to dohse yuhdurire yuhu sehere sinitu ñuihca muhu. Yuhu ōpu tiro mehne coha tjuaa wiaerai pinihta, yu catisinino puro muhu mehne buhiri tiro tjuita niuhca yuhu. ¹⁰Wiho mejeta ā wahasi. Sā mehne tirore warocaga. Dói cure mu

warocari baharo jichuna, pua tahapu waha, majare tjuaa wihiinapu jiboa sã —ni yuhtiha Judá.

¹¹To ã nichu tuhoro, ti pucuro sehe tinare ò sehe ni yuhtiha:

—Jai. Ne dohse yoahto basioerara marine. Æ jina ò sehe yoaga: Tirore wapa sinino marieno musa wahtire musa wajupu posaa, naahga. Mari jiri dihta macaa bui noaare naabasaga tirore. Pjacu wisõa se bálсамore, me sitia mirrare, paye me sitiare, yucu dica pistácioire, almendrare, ã jichu miquina mine tí payu noaare mahaa tirore naabasaga. ¹²Tuhsu, paye musa nuchuhti niñeru cūhure naahga. Æ yoa musa wajupu ti duhu sãa niñeru cūhure naa, musa basita wiana wahaga tirore. Pa tehe nino to ya wajure doro, tiro tí wajupu wihboboa. ¹³Æ yoa Benjamí cūhure naa, tó macariro puhtoro cahapu ñuna wahaga. ¹⁴Cohamacu Tua Yuhdurucu Suriro sehe, musare pja ñuchu yoajaro. Æ pja ñuchu yoaro, yu macu peresupu jirirore wiochu yoajaro. Æ yoa Benjamí cūhure yu cahai coha tju wihichu yoajaro. ¡Wiho mejeta yuhu sehe pohna marieriro tjuai, ãta tjuai nica! —niha tinare.

¹⁵To ã nichu tuhoo, to pohna sehe puhtorore wapa sinino marieno ti wahtire cahnoha. Tuhsu, ti nuchuhti niñerure, ã jichu ti wiahti niñeru cūhure naha. Na tuhsu, ti bahuro Benjamí cūhure pji, Egiptopu wahaa wahaha. Wahaa, José cahapu suha. ¹⁶To cahapu suchu ñuno, José sehe to bahuro tina mehne to jichu dói ñu masiha. Æ ñu masino, to wuhure duti cohtarirore ò sehe yoa dutiha:

—Ahrinare wuhupu naahga. Na su, wachure wajã, chua yoayuga. Cohari pja jichu, yuhu mehne chua taa nina —ni warocaha.

¹⁷To ã ni warocachu tuhoro, tiro wuhu cohtariro sehe José dutiro seheta to ya wuhupu tinare naaha. ¹⁸Tópure to naa suchu ñua, José wahmisuma sehe soro tuhutu, cua yuhdua wahaha. Æ cuaa, ti basi ò sehe ni durucuha:

—Ahrina marine mahñoepa nina. Tó panopu mari wajupu posaa, ti wiari niñeru mehne mahño, marine ñaha, dutipea taa nina. Æ yoa mari burroa cūhure maahca tina —ni ti basi durucuha.

¹⁹Æ jia tí wuhupu sãari sopacai sua, wuhu cohtariro potoi ducu su, ò sehe niha:

²⁰—Puhtoro, tó panore wihina, chware nuchuna wihina nihi. ²¹Wiho mejeta sã majare tjuaa, sã carihti cuhtui su, sã naari wajure pjõo, sã ñuchu, jipihtia sã wapamari niñeru tí wajupu sãari jire. Æ jina tíre na tahi, sã basita wiana tana. ²²Æ yoa paye niñeru na ta namohi, sã chware nuchuhti cjihtire. Wiho mejeta sã sehe, “¿Noa tí sã wapamari niñerure duhu sãari?” ni, masieraja —niha tirore.

²³Ti ã nichu tuhoro, tiro wuhu cohtariro sehe ò sehe niha:

—Jai. Noanohca. Cuiena tjiga. Pa tehe nino musa Cohamacu, musa pucu ño payorirota jiboa tíre sãano. Yuhu sehe musa wapaare yu basita tíre ñahahi —ni yahuha tinare.

Æ ninota, tiro sehe waha, Simeõ peresupu jirirore wio, tina cahapu na suha. ²⁴Na su, José ya wuhupu tina jipihtinare suho na sãaha. Suho sãa su, tópu tinare ti dahpori cosahti core waha. Tuhsu, ti burroa ti chuhti cūhure waha. ²⁵Æ yoa puhtoro mehne ti chuhti cūhure yahuha tiro. To yahuchu tuhoo, tina sehe Josére wapa sinino marieno ti wahtire cahnoha. Cahno tuhsu, cohari pja jichu to wihitore cohtaha.

²⁶Æ yoa José to wihichu ñua, tina sehe tirore ti na tabasarire wiaha. Wia tuhsu, to potoi na tuhcuca caha su, muhri caha boraha pu ti wuhdua wapari yahpa pihachupu. ²⁷Æ yoa José sehe tinare ò sehe ni sinitu ñuha:

—¿Ne noamajari mûsa? ¿“Sã pûcu bucuro quiro” mûsa niriro, noari? ¿Catisiniri tiro? —ni sinitu ñûha tinare.

To ã ni sinitu ñûchû, paio sehe José to ni duaare tinapure ti ya mehne yahu turiaha.

²⁸ To ã ni sinitu ñûchû, ò sehe ni yûhtiha tina:

—Ája, puhtoro. Catisinihre sã pûcu. Noahre tiro —ni yûhtiha.

Ã ni yûhtiata, pari turi na tuhcuca caha su, muhri caha boraha tjoa.

²⁹ Ti ã yoachû, José sehe to bahuro Benjamíre ñuroca ôha. Tina puaro sehe cûiro pohnata jiha. Tuhsu, cûcoro pohnata jiha. Ã yoa to bahurore ñuroca ôno, ò sehe niha tiro:

—¿Ahriro jihri “sã bahû dũhsariro” mûsa niriro? —ni sinitu ñûha.

Ã ninota, tiore:

—¡Macû, muhure Cohamacû noano wahachû yoajaro! —niha.

³⁰ Ã ni, to bahurore cahino mehne to ñuroca ôchû, payû wacûa pja wihiha tiore. Ã payû wacûa pja wihihû, tii duaro pja wihiha. Ã waharo, to ya tahiapû mûroca sãa, tiha tiro. ³¹ Tii tuhsu, to wuhduare cosawe, pari turi wija taha. Wija ta, tiore dahra cohtaina sehere chuare na ta dutiha.

³² To na ta dutichû tuhoa, tiore dahra cohtaina sehe chuare na ta, José to dujihti mesai payoha. Wiho mejeta egipto masa sehe hebreo masa mehne cûnoi duji, chuera tiha. Tina egipto masa sehe ò sehe ni tuhutua tiha: “Ahrina hebreo masa mari cohamanare ño payoina jierara. Ã jiina mehne cûnoi duji, mari chûna, buhiri tiina wahanahca” ni, tuhutua tiha tina. Ã jiro ti dujihti mesari sehe tia mesa jiha. José to dujihti mesa soro, to wahmisuma cûhu ti dujihti mesa soro, egipto masa José cahai chuina ti dujihti mesa cûhu soro jiha. ³³ To wahmisuma ti dujia tachû, José sehe tinare ti dujihtire yahu quihôha. Ti masa wahmino to nuju su dũcahtore, pu ti bahuro dũhsariropu to nuju su batohtore yahu quihôha tiro. Tina sehe to nino seheta nuju su buroha juna. Ti masa bajua dũcariro seheta to duji dutichû ñua, tina sehe “¿Dohse yoa ahriro marine ã noano masijari?” ni, tuhutua, cûa yuhduahahaha. Ã ni tuhutua, ti basi cahma ñûha.

³⁴ Ã yoa jipihtina ti dujiri baharo, dahra cohtaina sehe José to dujiri mesai ti payoa chuare na, tinare witiha juna. Ã witiha, painare ti witiro bui José to dutiro mehne to bahuro dũhsariro sehere pjíro witiha. Ã yoa to wahmisuma mehne José chû, sihni, jipihtina wahcheina jiha juna.

Benjamí ya wajurupu José sihniri wahware bocaha

44 ¹ Ã yoa José to wuhû cohtarirore ò sehe yoa dutiha:

—Ahrina ya wajupe trigo ti naa bihoro puro tinare posabasaga. Tuhsu, cãina ti wapamari niñeru cûhure tí wajuhihta trigo bui duhu sãaga. ² Ti bahuro Benjamí ya wajuru sehere yû ya sihniri wahware, comaa plata mehne ti yoari wahware, to wapamari niñeru cjiri mehneta cûnoi posaga —ni, yoa dutiha.

To ã yoa dutichû tuhoro, to wuhû cohtariro sehe to nino seheta yoaha.

³ Ã yoa pa dacho sũ muja tachû waro, José to wahmisumare coha siti, ti burroa mehne warocaha. ⁴ Tí macare yoaro ti wahaerasinichuta, José sehe to wuhû cohtarirore ò sehe yoa dutiha:

—Tinare nunû ti wahcãga. Nunû ti wahcã, mu sucû, tinare ò sehe niga: “¿Dohseana tana yû puhtoro to noano yoapachuta, tiore mûsa sehe ñano

yoari? To sihniri wahware yaca tari jire m̄sa. ⁵Tí wahwa to sihniri wahwa jia tire. Tuhsu, tí wahwa mehneta baharopu wahahti cūhure masiyua tire tiro. ¡Ñabiario yoari jira m̄sa!” niga tinare —ni warocaha José.

⁶To ā yoa dutichu tuhoro, tiro wuhu cohtariro sehe tinare nunu ti wahcāha. Nunu ti wahcā, m̄s s̄ro, José to ni dutiro seheta niha tinare. ⁷To ā nichu tuhoa, tina sehe tirore ō sehe ni yuhtiha:

—¿Dohse jiro baro s̄re ā nijari muhu? ¡Tó sehe yoaina jieraja s̄a! ⁸Ñujata. Canaapu majare tju su, s̄a wajupu s̄a wapamari niñerure bocana, wiana tahi s̄a. ¿Ā yoaina jipanahta, m̄s puhtoro platare, to urure yacaboari s̄a? ⁹Wiho mejeta m̄s nia potocā jichu, noa m̄s puhtoro to sihniri wahware yacariro yariajaro. Ā yoa s̄a duhsaina m̄s puhtoro dāhra cohtahtina tjuanahtja —ni yuhtiha.

¹⁰Ti ā ni yuhtichu tuhoro, tiro wuhu cohtariro sehe tinare ō sehe ni yuhtiha:

—Musa nino seheta yoachū, noana. Wiho mejeta tiare yacariro dihta yuhure dāhra cohtahtiro jijaro. Musa paina duhsaina sehe buhiri marieina tjuanahta —ni yuhtiha.

¹¹To ā nichu tuhoa, tina sehe ño duaro mehne ti ya wajure na boro, pjāha. ¹²Ti pjā tuhsuchū, tiro wuhu cohtariro sehe ti wajure wa macaha. Masa wahmino ya wajurupu wa maca dāca wahcā, duhsariro ya wajurupu wa maca batoha. Ā yoaro, to puhtoro sihniri wahware Benjamí ya wajurupu bocaha. ¹³To ā bocachu ñua, to wahmisuma sehe tuaro cahya, ti suhtire tuhreha. Baharo ti wajure ti burroa buipu na payo, tí macaputa majare tjuaa wahaha tjoa.

¹⁴Judá, to bahana mehne José ya wuhupu ti majare tju suchū, tiro sehe jisiniha. To cahai su, na tuhcu caha suha tjoa, pu ti wuhduu wapari yahpa pihachupu. ¹⁵Ti ā yoaro watoi, José sehe tinare ō sehe ni sinitu ñuha:

—¿Dohse yoana tana ā yoari m̄sa? Wiho jiro jieraja yuhu. “Mari ā yoachū, tiro noano masiriro jiro, mari yacarire masiboca” ni, ¿tuhotuaerari m̄sa? —ni sinitu ñuha.

¹⁶To ā ni sinitu ñuchū tuhoro, Judá sehe tirore ō sehe ni yuhtiha:

—¿Dohse ni muhure yuhtibocari s̄a? ¿Dohse yoa “Buhiri maeraja. Tó sehe yoerahi s̄a” ni, muhure ñobocari? Panopu s̄a ñano yoa, nuoa tihi. Tí buhiri Cohamacu s̄re buhiri dahrero nica. Ā jina ā yuhduca s̄a. Mipure s̄a jipihtina m̄s sihniri wahware yacariro mehneta muhure dāhra cohtaina tjuanahtja —ni yuhtiha.

¹⁷To ā nichu tuhoro, José sehe ō sehe niha:

—Jierara. Yu ya wahware yacariro dihta yuhure dāhra cohtahtiro jijaro. Musa paina ā jica nino marieno m̄sa pucu cahapu tjuaa wahaga. Ne cūiro musare caribosi —niha tinare.

“Yu bahu Benjamí to wahmisuma mehne tjuaajaro” ni, sinibasaha Judá

¹⁸To ā nichu tuhoro, Judá sehe José cahai waha, ō sehe ni siniha tirore:

—Yuhu muhure sinija, puhtoro. Yuhure tuho curega muhu. Masija. Muhu cūhu faraō dutiro yoaro seheta dutiriro jira. Ā jicu cua pisaro mehne muhure ñuja yuhu. Mu ā puhtoro choro jicu, yuhure wajā duacu, wajā masina. Yuhure m̄s wajā duachu, paio m̄s bui dutiriro yuhure ducatoriro mariahca. Wiho

mejeta pja ñuga yuhure. Yuhu mehne sui tjiga. ¹⁹⁻²⁰Muhuta sare sinitu ñuhre. “¿Pucu tiina jijari musa? ¿Á yoa paio musa bahu ji namojari?” ni, mu sinitu ñuchu, sa sehe yuhtihi. “Ája. Pucu tija. Mipure bucuro waro jira tiro. Tuhsu, cūiro wahmino jira sa bahu. Sa pucu bucuro quiro to jichupu, masa bajuare tiro” ni, yuhtihi sa muhure. Á yoa o sehe ni yahu namohi: “Sā bahu pocoro sehe sa pucu mehne puaro pohna timare. To wahmino yariaa wahare. To bahuro cūirota jia tihre mipure. Á jiro sa pucu sehe tirore tuaro cahia tihre” ni, yahuhi. ²¹Sā ā nichu tuhocu, muhu sehe, “Musa bahure yuhure na tabasaga. Yuhu tirore masi duaca” nihre muhu. ²²Mu ā ni, na ta dutichu, sa sehe o sehe nimahi: “Sā bahu sa pucure cūirota cohā ta masierara. To cohā tachu, sa pucu sehe cahya yariaa wahaboca” nimahi sa muhure. ²³Sā ā nipachuta, muhu sehe sare tuho duaerahre. Á jicu o sehe nihre: “Musa bahure na taerana, ne pari turi ñu namosi musa yuhure” nihre muhu.

²⁴Á yoa sa jiropu tju suna, sa pucure jipihtia mu niare yahuhi sa, puhtoro. ²⁵Baharo sare chua pihlichu ñuno, sa pucu, “Mahaa nuchu namona wahaga tjoa” nihre sare. ²⁶Wiho mejeta sa sehe, “Sā bahure sa mehne mu warocae-rachu, waha masieraja sa. Tó macariro puhtoro sare o sehe nihre, ‘Musa bahure na taerana, ne yuhure ñu namosi’ nihre” ni, yuhtihi sa pucure. ²⁷Sā ā ni yuhtichu, sa pucu sehe o sehe nihre sare: “Musa masina. Yu namo Raque puaro pohna tibasare yuhure. ²⁸Cūiro waha, āta butia wahari jire. To ā wahari baharo, pari turi ne ñu namoeraja. ‘Pa tehe nino wahiquiro suariro bahca wajāno niboa tirore’ ni, masija yuhu. ²⁹Mipure to bahurore musa naachu, tiro cūhure ñano wahaboca. To soro wahachu, yuhu sehe cahya yariaa wahaihca. Yu yariari buhiri musa sehe buhiri tinahca” nihre sare sa pucu.

³⁰⁻³¹‘Ahriro Benjamí sa pucu tuaro to cahiro jira. Á jiro sa bahu sa mehne to tjuaa suerachuna, sa pucu tirore ñueraro, cahya yariaa wahaboca. Sa pucu to yariaro mehne sa sehe tí buhiri pjíro buhiri tinahca. ³²“Tiropu ā wahari” nicu, yuhu sehe opu sa tahto pano, o sehe nihi tirore: “Yuhu mu macure ñu wihboihtja. Tirore naa, na majare tjua taihtja. Na majare tjua taerai pinihta, muhu mehne buhiri tia wahaihca yuhu, yu catiro mu suro” nihi tirore. ³³Á jicu yuhu muhure ā ni sinija, puhtoro: “Yuhu sehe yu bahu cohtotaro muhure dahra cohtahtiro cjihto tjuahtja. Á yoa yu bahu sehe to wahmisuma mehne tjuaajaro” ni, sinija yuhu muhure. ³⁴Tirore mu waroca tjuaaerachu, yuhu cūhu ne tjuaasi. To tjuaa suerachu ñuno, yu pucu to cahya yariachu, ñu duaeraca yuhu —ni siniha Judá Josére.

José to wahmisumare “Yuhuta jija musa bahu José” ni, bajuroi yahuha

45 ¹Á yoa Judá to yahuaire to tuhochu, tiro Josére payu wacūa wihiha. Tuhsu, tii duaro pja wihiha. Á waharo, tiro sehe tirore dahra cohtaina ti ñuocaroi tii duaeraro, tinare wijaa dutiha. Wijaa duti tuhsu, to wahmisuma sahserore “Yuhu José musa bahu jija” ni, bajuroi yahuro taro niha. ²Á jiro tuaro tiiha tiro. To ā tuaro tiichu, tirore dahra cohtaina sehe tuhoha. Á tuhoa, painapure tí quitire yahu turiaha. Pu faraopu cūhure tí quiti suha. ³Á yoa José sehe ā tiiro, to wahmisumare ti ya dusero mehne o sehe ni yahuha:

—¡Yuhu jija José musa bahu! ¿Yu pucu catisiniri? —ni sinitu ñuha.

To ā nichu tuhoa, tina sehe cua yuhdua wahaha. Ā cua, ne dohse ni yuhti masieraha. ⁴Ti ā wahachu ñuno, tiro sehe tinare ō sehe niha:

—Taga musa jipihtina. Yu cahacāpu taga —niha.

Ā yoa to cahai ti suchu ñuno, tinare pari turi ō sehe niha tjoa:

—Yuhu jija José musa bahu. Painapure musa duariro cjiro jija. Tinare musa duari baharo, tinapu yuhure ahri yahpa macainapure dua turiare. ⁵Wiho mejeta tí buhiri musa basi ñano tuhotu, suaena tjiga. Musa jierari jire yuhure ā yoana. Cohamacu jiri jire yuhure ā yoaro. Musa pano yuhure ōpu warocayuro niri jire tiro. Ōpu yuhure waroca, musare juca baa yariaboinare yuhdohtiro cjihto yuhure warocaro niri jire. ⁶Pua cuhma jucaro yuhdu tuhsura. Cinco cuhmari jucaro waha namonohca. Tí cuhmari waharo puro, masa sehe toare ne toasi. Tí toachu cūhure, ne dusi. Ā jiro ti chuboa ne marienohca. ⁷Wiho mejeta Cohamacu jiri jire yuhure musa pano warocayuro. Musare juca baa yariaboinare yuhdo dutiro warocaro niri jire. Jucare musa yuhdu witiri baharopure musa panamana ji turiaina, “Payu ji turia wahcājaro” nino, ahri yahpapu yuhure warocaro niri jire tiro. ⁸Ā jina musa jierari jire yuhure ā wahachu yoana. Cohamacu jiri jire yuhure ōpu warocaro. Tirota yuhure faraō yoachtire yahu quihōhtiro cjihto cūri jire. Tuhsu, to ya wuhu macaare ñu wihbohtiro cjihto cūri jire. Ā yoa faraō doca macariro puhtoro cjihto cūno, jipihtina Egipto macainare dutihtiro cjihto cūhure cūno niri jire tiro yuhure. ⁹Ā jina musa sehe mipure ño duaro mehne yu pucū cahapu tjuaaga. Tópu su, tirore ō sehe ni yahubasaga yuhure: “Mu macu José ō sehe ni yahurocahre mūhure: ‘Ōpu Cohamacu yuhure na ta, Egipto jipihtiri yahpa macaina puhtoro sōhre. Ño duaro mehne yuhure ñuno tajaro. ¹⁰Ōpu wihiro, Gosē wama tiri dihtai jirohca tiro. Tói jipihtina to pohna, to panamana, to wahiquina, ā jichu jipihtia to cjuaa mehne yuhu cahacā curei jirohca tiro. ¹¹Cinco cuhmari jucaro wahasininohca. Wiho mejeta ōpu yuhu sehe tirore, tuhsu, to coyea cūhure, ā jichu jipihtina tiro mehne jiinare chūare waihtja. Ā jia tina pjacūoro yuhdusi’ nirocahre mūhure mu macu” ni, yahubasaga yuhure mari pūcure. ¹²Yu basita yu bahu Benjamí tuhorocaroi, ā yoa musa tuhorocaroi ā nija. ¹³Ōi Egiptoi yu puhtoro jicu, yu tuaa tiare, tuhsu musa basita jipihtia musa ñua cūhure yu pūcure yahuna wahaga. ¡Ño duaro mehne waha, na tabasaga yu pūcure! —niha tiro to wahmisumare.

¹⁴Ā ni tuhsurota, to bahu Benjamíre cjā suhsu, tiha. To cjā suhsuchu, to bahu cūhu tirore cjā suhsu, tiro cūhu tiha. ¹⁵Baharo José to wahmisuma jipihtinare cjā suhsu, ti wahsupuri wihi, tiha. To ā yoachu ñuapū, to wahmisuma sehe wacū tua cure, tiro mehne durucuha jūna.

¹⁶Ā yoa tí quití faraōpu cūhure suha. Tí quitire tuhoro, faraō sehe wahcheha. Ā yoa to doca macaina puhtoa cūhu wahcheha. ¹⁷Ā jiro faraō sehe Joséré ō sehe niha:

—Mu wahmisumare ti burroa bui chūare duhte payo duti, Canaā yahpapu tjuaa dutiga. ¹⁸Tópu ti suri baharo, ti pūcurore, ti namosanumiare, ti pohna jipihtinare yu cahapu na tajaro. Ti wihichu, ōi Egiptoi jiri yahpa, pototi noari yahpare tinare waihtja. Tuhsu, ahri yahpa macaa chūare jipihtia bui chuhto noaa cūhure waihtja. ¹⁹Ō macaa buso, cawaloa waja busore naa dutiga tinare. Tí buso mehne ti namosanumiare, ti pohinare, ā jichu ti pūcuro cūhure na tajaro tina. ²⁰Tí busore ñua, “Paye baro sā cjuaa ahri busopure mu

susi” ni, tuhoturo marieno tajaro. Õpu ti wihiri baharo, ahri yahpa macaa jipihtia bui noare cjuahca tina —niha faraõ Josére.

²¹To ã ni yahuri baharo, José sehe to wahmisumapure tíre yahu turiaha. To yahuchu tuhoa, to wahmisuma sehe faraõ to dutiro sehta yoaha. Baharo José sehe to wahmisumare faraõ to naa dutia busore waha. Tuhsu, chuare mahai ti chu wahcãhti cūhure waha. ²²Å yoa cāinare cū suhtiro, wahma suhtiro, ti cohtotahti suhtiro cjihto waha. To baharo Benjamí sehere plata si paa cjoari wapa bujua cjoarire, tresciento cjoari waro waha. Å jichu wahma suhti, cinco suhti waha. ²³Å yoa to pucuro sehere diez burroa Egipto macaa noare ti dūhte payoinare warocaha. Tuhsu, paina tópeinata trigore, pāore, ā jichu chuare to pucuro mahai taro to chu tahtire ti dūhte payoina cūhure warocaha. ²⁴Wa tuhsu, to wahmisumare coha sitiro, õ sehe niha:

—Musa waha, tjua taro puro, cahma tuhtiena tjiga musa basi —niha.

To ã niri baharo, tina sehe tjuaa wahaha. ²⁵Tjuua, Canaãpu ti pucuro Jacobo jiropu tju suha tina. ²⁶Tju su, ti pucurore õ sehe ni yahuha:

—Josére ñuhi sã. Tiro catihre. Tirota jihre Egipto yahpa macariro puhtoro —ni yahuha.

Ti ã ni yahuchu tuhoro, ti pucuro sehe tuho cuua wahaha. Ti yahua ne potocã tuhoeraha. ²⁷Å yoa tina sehe noano José to niare yahu pahñoha tirore. Yahu pahño, José tirore to warocaa busore ñoha tirore. Ti ñochu ñunopu, tiro sehe yajeri sãaha. Tuhsu, tuaro wahcheha. ²⁸Å yajeri sãa, wahchero, tiro õ sehe niha:

—Jai. Noana. Yu macu catisiniri jira. Yu yariahto pano tirore ñu batoai wahaihtja yuhu —niha tiro.

Egipto yahpapu waharo niha Jacobo

46 ¹Å yoa Jacobo sehe jipihtina to namosanumia, to pohna, to panamana mehne ti yare cahno, Egipto yahpapu waharo niha. Å waharucuro, Berseba wama tiri macai tjua caha su, tói to pucuro Isaa cjiro to ño payoriro Cohamacure ño payoro taro, wahiquinare wajã, jũ wa muo, ño payoha tiro. ²To ã yoari ñamine Cohamacu tirore pisuha.

—Jacobo —ni pisuha.

To pisuchu tuhoro, Jacobo sehe:

—Õi jija yuhu —ni yuhtiha.

³⁻⁴To yuhtichu, Cohamacu tirore õ sehe ni yahuha:

—Yuhu jija Cohamacu. Mu pucu cjiro to ño payoriro jija. Egiptopu waha duacu cuui tjiga. “Ahri yahpare Cohamacu yuhure to wari yahpare cohānocaca yuhu” ni, tuhoturo marieno wahaga. Mu tópu wahachu, yuhu cūhu muhu mehneti waharucuihtja. Tópu su, mu jiri baharo, mu panamana ji turiahtina cjihtire pjiri curua wahachu yoaihtja. Å yoa mu yariari pjare mu macu José muhu cahaita jirohca. Mu yariari baharopure yu basita mu panamana ji turiahtina cjihtire ahri yahpapu na majare tjua taihtja tjoa —ni yahuha.

⁵Baharo Jacobo Bersebai jiro Egiptopu waharo niha tjoa. To pohna sehe tirore, ti pohna, ā yoa ti namosanumia cūhure, faraõ to warocaa busopu samu dutiha. ⁶⁻⁷Ti wachua, ti ovejaa, ā jichu jipihtia paye baro Canaãpu dahraa ti wapataro cūhure naaha. Å yoa jipihtina to pohna, to panamanare tiro mehne naa wahaha Jacobo.

Resumen: Ñ yoa José sehe to пүсүрö cāññ Egiptopñ ti suchñ ñño, tuaro wahchea tiha. Ñ wahchero, tirore cǵ suhsu, tiha tiro. Baharo tirore faraō cahapñ naaha. Tópñ sñ, “Aññiro jira yñ пүсү” ni ññha. Ñ yoa faraō sehe Jacobore noano yoa tiha. Ñ noano yoa, Gosē wama tiri dñhteropñ tirore ji dutia tiha. Tópñre Jacobo sehe diecisiete cñhmari wahchero mehne noano jinocaa tiha. Ñ yoa ciento cuarenta y siete cñhmari cññaro waro, yariaa wahaa tiha tiro. To yariachñ ñña, to pohña sehe to пјасñ cññore Canaā yahpapñ naa wahaa tiha. Tópñ na sñ, tñtipñ duhu cñ, cohāa tiha tina.

Ñ yoa to macño José sehe, to пүсүрö cññro to yariari baharo, payñ cñhmari egipto masa пñhtoro jisinia tiha. To noano waja mñhtachñ ñño, faraō sehe tirore noano yoa tiha. Ñ yoa to coyea cñññre noano yoa tiha tiro.

8-34 [...]

ÉXODO

Egipto yahpapu israe masa wapu tiro mehne jia tiha

1 ¹ Jacobo to pohna mehne Egipto yahpapu wahaa tiha. Jipihitina tina to pohna ti namosanumia, ti pohna mehne wahaa tiha. Ō sehe wama tiina jiha tina: ²⁻⁴ Rubē, Simeō, Leví, Judá, Isacá, Sabulō, Benjamí, Dā, Neftali, Gade ā jichu Asé jiha. ⁵ Ā yoa cūiro to macuno José Egipto yahpapu ji tuhsua tiha. Tina Jacobo pohna, ā jichu to panamana jipihitina mehne setenta waro jia tiha.

⁶ Ā yoa tōpu ti sūri baharo, payu cūhmari baharo, tina Jacobo pohna yaria pihtia wahaa tiha. Ā yoa jipihitina paina tí tjuru macaina cūhu yaria pihtia wahaa tiha. ⁷ Wiho mejeta Jacobo cjirore ji turia dijaina, israe masa ti niina sehe, payu masa puti, tuari curua waha, paró Egipto yahpare ji sahsea wahaha.

⁸ Ā yoa payu cūhmari baharo, Egipto yahpare paio faraō sāa tiha tjao. (*“Faraō” nino “puhtoro” nino nica egipto masa ya dusero mehne*) Tiro sehe José cjiro Egipto yahpare noano to yoarire masiera tiha. ⁹ Ā jiro ō sehe niha to coyea egipto masare:

—Ahrina israe masa mari bui payu masa putia nina. Ā jia tina mari bui tuari curua wahaa nina. ¹⁰ Ā wahaa, cū dacho marine ñu tuhtiina ti cahma wajā yūhdurūca sāa tachū, ahrina cūhu tina mehne sāarūcu sū, marine cahma wajā yūhdurūcaboca. Ā cahma wajā yūhdurūca, tina marine yūhdu witi wijaa wahaboca. “Ā wahari” nina, marine soro yoaro cahmana tinare —niha tiro wahmairo puhtoro to coyea, egipto masare.

¹¹ To ā nichu tuhoa, egipto masa sehe israe masare ñano cahamaca ti dūcaha. Ā cahamaca ti dūcaa, tina israe masare ñu nūnu, tuaro mehne dahra dutihtina cjihtire cūha. Tuhsu, tinare pua maca dahre dutia tiha. Pitō wama tihti maca cjihto, ā jichu Ramesé wama tihti maca cjihto yoa dutia tiha tinare. Tí macari cjihti sehe tí yahpa macaa toaa dichare na cahmachu duti, to wihbo dutihti macari cjihti jiha.

¹² Ā yoa israe masa sehe, ti ā ñano dutipepachuta, payu masa puti namoha. Ā jia egipto masa sehe tinare tuaro cuia tiha. ¹³ Ā cuia, tinare ti dahra duti-mariro bui tuaro dahra dutia tiha. ¹⁴ Dihta sohāare na duti, tíre tu sahba duti, tí mehne dihta cjoari dahre duti, tí cjoari mehne wuhuseri dahre dutia tiha tinare. Ā yoa toaa ti toahti weseri cūhure tuaro dahra duti, pja ñuno marieno dahra dutia tiha. Ā yoa, israe masare ti catisinino puro tuaro wapū ti, purino tuhutuchū yoa tiha tina.

¹⁵ Ā yoa jia tiha puaro numia, Sifrá, Puá wama tia numia. Tí numia sehe hebreo masa numia ti pohna tichū cohtaa numia jiha. Cū nūmu faraō tí numiare pji dutiroca, ō sehe niha tí numiare:

¹⁶—Hebreo masa numia ti pohna tichu ñuna wahana, ò sehe yoaga: Muacã ti pohna tichu, ti pohna tiri pjaihta ti pocosanumia ti ñuerasinichuta, wajã-nocaga tinacãre. Á yoa numiacã ti pohna tichu, wajãena tjiga tí numiacãre —niha faraõ. (*Israe masareta pa wama “hebreo masa” ni, pisua tiha tí pjapure*)

¹⁷Wiho mejeta ti pohna tichu cohtaa numia sehe Cohamacure ño payoa numia jia tiha. Á jia ti puhtoro to dutiro sehe yoaera tiha. Muacã ti masa bajuachu cühure, wajãera tiha tí numia. ¹⁸Ti wajãerachu ñuno, faraõ sehe tí numiare pji dutiroca, ò sehe ni sinitu ñuha tí numiare:

—¿Dohse yoana musa tina muacãre wajãerajari? —ni sinitu ñuha.

¹⁹To ã ni sinitu ñuchu, tí numia sehe tirore cuia, ò sehe ni mahñoa:

—Hebreo masa numia sehe egipto masa numia yoaro sehe jierara. Ti niji wahcõri baharocãta, pohna ti tuhsu mujana tí numia. Á jina sã sehe tí numiare ñuna wahana, nijinocã ti ñahari baharopu su mujaa tija —ni mahñoa.

²⁰⁻²¹Á yoa Cohamacu sehe ti wajãerachu ñuno, “Ahrina numia yuhure cua pisaro mehne ño payoa numia jira” ni ñuha. Á ni ñuno, tí numiare noano wahachu yoaha. Tí numiare nijinocã boca masieraa numia cjiirire pohna tichu yoaha tiro ti manusuma mehne. Á yoa israe masa pohnacãre ti wajãerachu, tina israe masa sehe payu masa puti, tuari curua waha namoha. ²²Ti ã tuari curua waha namochu ñuno, faraõ sehe to coyea egipto masare ò sehe niha tjoa:

—Hebreo masa pohna muacã ti masa bajuachu, tinacãre diapu doca ñono-ca. Numiacã sehere doca ñoena tjiga —niha.

Moise cjihto masa bajuaha

2 ¹Á yoa cū dacho cūiro Leví cjiro ya curua macariro namo tiha. To namo tīricoro cūhu tí curua macaricorota jiha. ²Ticoro sawēnicoro wahaa, baharo cūiro munocãre pohna tiha. Noarirocã to bajuchu ñuno, tirocãre tia sū waro nuo, cjuaa tiha ticoro. ³Wiho mejeta yoari pja tirocãre nuo, cjuaa masieraha. Á jiro wuju puhurore comape mehne bihaa, tí puhuropu tirocãre duhu sãaha. Duhu sãa, Nilo ma duhtu cahapu wuju sari watoi duhu pohoha. ⁴To ã yoachu ñuno, tirocã wahmiono sehe yoropu duhti ñu ducuha, “¿Dohse waharohcari tirocã?” nino.

⁵Baharo faraõ macono sehe to cahamaca numia mehne tí mapu cuhsuro buhaha. To cuhsuro watoi to cahamaca numia sehe tí ma duhtu cahai ñu sito taa niha. Á yoa faraõ macono tói cuhsuro, cū puhuro wuju sari watoi pah-sachu ñu bocaha. Á ñu bocaro, to cahamaconore tí puhurore na dutiha. ⁶Á yoa tí puhurore pjõo, to ñuchu, cūiro nijinocã tii sãaha. Tirocãre ñuno, tuaro pja ñuha ticoro. Á pja ñuno, ò sehe niha:

—Ahrirocã hebreo masunocã jira —niha ticoro.

⁷Tirocãre to bocachu ñuno, nijinocã wahmiono sehe to cahai wihi, ò sehe niha ticorore:

—¿Dohse jibocari cūcoro hebreo masonore yu mūhure macabasaco wahachu? Ticoro tirocãre pū bucuobasaboca mūhure —niha.

⁸To ã nichu tuhoror:

—Jai. Macabasaco wahaga —niha faraõ macono.

To ã ni yūhtichu tuhoror, ticoro sehe tirocã pocoro warore pjiro wahaa, na tabasaha. ⁹To na wihichu ñuno, faraõ macono sehe to na wihiricorore ò sehe niha:

—Ahrirocäre naa, yuhüre pü bucucobasaga. Yuhu sehe mähüre wapacoh-tja —niha.

To ä nichu tuhoru, nijinocä pocoro sehe tirocäre naa, pü bucucobasaha. ¹⁰Pü bucurocä cure to wahachu nü, faraõ maconore wiaro wahaha. To wiachu, faraõ macono sehe nijinocä pocoro waro yoaro sehe tjuaha juna. Ä yoa ö sehe niha ticoro:

—Ahrirocä diapü yu bocarirocä jihre. Ä jico “Moise” ni, wama pisucohtja tirocäre —niha.

Ahri quiti Moise Egipto yahpai jimariro to duhti wahcäri quiti jira

¹¹Ä yoa Moise wahmua tuhsuriropu jiha. Cü nümü tiro to coyeare ti dahraapu nü tinino wahaha. Ä nü tinino, tuaro mehne tinare ti dahra dutipechu nüha tiro. Ä yoa cüiro to coyeirore egipto masuno sehe ñano to cjächu, nüha.

¹²Ä ñuno, nü site maca pahño, ne cüiro tire ñuriro mariachu nü, egipto masunore wajänocaha. Wajä tuhsu, to pjacu cjirore paduropu ya nuonocaha, “Painapu tiro cjirore ñühri” nino.

¹³Ä yoa pa dacho nü tinino wahaha tjua. Ä nü tinino, to coyea puaro ti basi cahmacheinare nüha. Tinare ñuno, tiro cjäriro sehere ö sehe niha:

—¿Dohse yoana musa basi jipanahta cahmachena nijari musa? —niha.

¹⁴To ä nichu tuhoru, cjäriro sehe ö sehe ni yuhtiha tireore:

—Sä puhtoro jierara muhu. Tuhsu, säre yahuboriro cühu jierara. ¿Egipto masunore mü wajäriro cjiro sehetu yuhu cühüre wajäi tai nijari muhu? —ni yuhtiha tireore.

To ä nichu, tuho cua wahaha. Ä jiro ö sehe ni tuhotuha Moise:

—Yu wajäri cjirire masa jiphtina masi tuhsuri jira —ni tuhotuha.

¹⁵Ä yoa to wajäri quitire faraõ cühu tuhoha. Ä tuhoru, Moisere wajänoca dutimaha tiro. To wajä duaa quitire tuho cuiro, Moise sehe Madiä yahpau duhti wahcäa, töpu jiro wahaha. Tí yahpau su, ti co nari copa cahai dujirucuha.

¹⁶Tí yahpai cüiro sacerdote Jetro wama tiro jia tiha. Tiro sehe siete numia pohna numia tiro jia tiha. Ä yoa co nari copa cahai Moise to dujirucuhu, tí numia sehe wihiha. Tí copau co na, wahiquina ti sihnia wahwaripu pio sä, ti pucuro nuina cabraare, ä jichu to ovejaare ti co sihnichu cohtaa taa niha tí numia. ¹⁷Ti ä yoaro wato, paina cühu ti ovejaare ti co sihnichu cohtaa taa, wihiha. Wihi, tí numiare cjä nünüha. Ti ä cjä nünüchu ñuno, Moise sehe tí numiare cjä nünüinare ducataha. Ducata tuhsu, tí numia wahi-quinare core pio säa cübasaha.

¹⁸Ä yoa tí numia sehe ti wahiquina ti sihni tuhsuchu nüa, dóicäa tjuaa wahaha juna. Ä dóicä waro ti tjuaa suchu ñuno, ti pucuro sehe tinare ö sehe ni sinitu nüha:

—¿Dohse yoana musa michare dói waro tjua tari? —ni sinitu nüha.

¹⁹To ä ni sinitu nüchu tuhoa, tí numia sehe ö sehe ni yuhtiha:

—Cüiro egipto masuno säre yoadohohre. Paina cühu sä cüno potori su, ti nuinare co sihö muhta duaa, sä sehere cjä nünühre. Ti ä cjä nünüchu ñuno, tiro egipto masuno sehe säre ducatahre. Ä yoa tiro säre core nabasa, wahi-quina ti sihnia wahwaripu pio säa cübasahre —ni yuhtiha tí numia.

²⁰Ti ä nichu tuhoru, ti pucuro sehe ö sehe niha:

—¿Nohoi jiri tiro? ¿Dohse yoana tirore pji taerari musa? ¡Pjina wahaga, mari mehne to churo tahto sehe! —niha.

To ā nichu tuhoa, to pohna numia sehe tirore pjia wahaha. Pjia surina, ti tju wihichu, tina jipihtina tirore suho chuha.

²¹Ā yoa ti chu tuhsuri baharo, tiro Jetro sehe Moisere to ya wuhui carī dutiha. Baharo, tirore to cahai ji waroa dutiha juna. To ji dutichu tuhoru, Moise sehe to cahai jiha juna. Baharo tirore cūcoro to macono Séfora wama tiricorore namo dahreha. ²²Ticoro mehne Moise cūirocā pohna tiha. Tirocāre “Gersō” ni, wama pisuha Moise. Ā wama pisuro, ō sehe niha:

—Paina ya yahpapu ji sito tariro jija yuhu. Ā jiro ā wama tijaro —niha. (*“Gersō” nino, “ji sito tariro” nino nica hebreo masa ya dusero mehne*)

²³Ā yoa payu cuhmari baharo, Egipto macariro faraō sehe yariaa wahaha juna. To yariari baharo jipachuta, israe masa sehe munanota nāno ti dutipeina jisinia tiha. Ā jia ō sehe ni sañurucu mujaa tiha: “Nāno yuhduna nija mari. Ne dohse yoa yuhdu witi masieraca ahrīre” ni, sañurucu mujaa tiha. Ti ā ni sañurucuaru tuhoha Cohamacu. ²⁴Tīre tuhoru, ō sehe ni wacūha: “Ahrina ti nuchusuma cjiri Abrahā, Isaa, Jacobo cūhu cjiripure ‘Musare, tuhsu, musare ji turiaīnapu cūhare noano wahachu yoihtja’ nia tihi yuhu. ²⁵Yu ā niri baharo jipachuta, ahrina ti nāno yuhduchu, noaerara” ni, caripu-tiro tuhoutuha Cohamacu.

Cohamacu Moisere bajua, tirore Egipto yahpapu faraō mehne durucuro waha dutiha

3 ¹Ā yoa tiro Moise sehe to marechuno Jetro nuina ovejaare ā jichu cabraare nu wihbo cohtariro jia tiha. Cū namu tiro wahiquinare tjare ti chuchu cohta tinino waharo, tinare wuuri djuropu naaha. Naa, yoaro waha, suropu cūdu tūcu Sinaí wama tidu cahapu tinare na suha. Tu tūcu sehe, “Ahdu Cohamacu to bajua mujadu jira” ni, cua pisaro mehne ti nūdu jiha. ²Ā yoa tói cūdu yucucacā jūrucuducāpu Yawe Moisere suhūduro taro niha. Ture Moise noano to nūchu, tu sehe jūdu yoaro sehe bajuparota jū pihtieraha. ³Ā jū pihtierachu nūno, tiro ō sehe ni tuhoutuha:

—¿Yaba baro choro jijari sohō? ¿Dohse yoaro jūrucuparota jū pihti boraerajari? Cahacāpu nūi wahaihtja —ni, nūno wahaha.

⁴Moise cahacā curepu to suchu nūno, Cohamacu sehe tu jūrucuducāpu tirore: —¡Moise! ¡Moise! —ni pisuha.

To pisuchu tuhoru,

—Ōi jija —ni yuhtihā Moise.

⁵To yuhtichu, Cohamacu sehe tirore ō sehe niha:

—Tóihā tjuarucu suga. Tjuarucu su, mu dahpo suhtire tjuwega. Yuhu ōi jichu, ahri yahpa noari yahpa jiro nina —niha.

Ā ni tuhsu, ō sehe ni namoha:

⁶—Yuhu jija Abrahā, Isaa, Jacobo mu nuchusuma cjiri ti Cohamacu —niha.

To ā nichuta, Moise sehe, “Ahrīro Cohamacure nūi, yariaa wahaboca yuhu” ni, cuiro, muhri yo, to wuhduare to wamomacari mehne ducataha. ⁷To ā yoachuta, Yawe sehe tirore ō sehe niha:

—Yuhu nūja yu masa, Egiptopu jiina ti nāno yuhduchu. Tinare nu nūnu, tuaro mehne ti dahra dutichu nāno wapū tia, ti sañurucuchu, tuhoja yuhu.

Masija tuaro ti ñano yuhduare. ⁸ Ñ jicu dija tahi yuhu. Yu masa ñano yuhduinare, egipto masa ti bui tuaina jia, cahamaca ti cjuainare na wioi tai dija tahi. Tinare na wio, cū yahpa, pjiri yahpa, noari yahpapu naaihtja tinare. Tí yahpa cananeo masa, hitita masa, amorreo masa, fereseo masa, heveo masa, jebuseo masa ti jiri yahpa jira. ⁹ Yu nino seheta yuhu tuhoja yu masa wapu tia, ti sañurucuchū. Á yoa ñuja egipto masa tinare ñano ti dutipechu. ¹⁰ Ñ jicu yuhu sehe muhure warocaihtja tí yahpa macariro puhtoro cahapu. Tópu su, yu masa israe masare tí yahpai jiinare puhtoro mehne sūhūdu, tinare na wioa muhu —niha Yawe tirore.

¹¹ To ñ nichū tuhorō, Moise sehe ñ sehe ni yuhtiha:

—Yuhu wiho jiro jija. Faraō cahapu waha, tinare na wio masieraja yuhu —ni yuhtiha.

¹² To ñ nichū tuhorō, Cohamacu sehe tirore ñ sehe niha:

—Cuii tjiga. Yuhu cūhu muhu mehneta jiihca tópure. Tuhsu, yu masa curua, Egipto yahpapu jiinare mu na wiori baharo, ōputa tina mehne wihihca muhu. Á wihiču, ahdu tūcūputa tinare yuhure suho ño payoihca muhu. Á ño payoiču, muhu sehe “Potocāta Cohamacuta jiri jira yuhure tinare na wio duti warocariro” ni, yuhure masiihca muhu juna —niha Cohamacu Moiserē.

¹³ To ñ nichū tuhorō, Moise ñ sehe ni sinitu ñuha:

—Israe masa cahapu su, “Mari ñuchusuma cjiri ti Cohamacu musa cahapu yuhure warocahre” yu nichū, tina yuhure ñ sehe ni sinitu ñuahca: “¿Dohse wama tiroro jihri tiro?” ni, yuhure sinitu ñuahca tina. Ti ñ ni sinitu ñuchū, yuhu sehe tinare dohse ni yuhtihcari? —ni sinitu ñuha.

¹⁴ To ñ ni sinitu ñuchū tuhorō, Cohamacu sehe ñ sehe ni yuhtiha tirore:

—Yuhu jija ñ catirucuriro. Á jicu muhu sehe, “¿Dohse wama tiroro jihri tiro?” ni, muhure ti sinitu ñuchū, ñ sehe ni yuhtiga tinare: “Yuhu jija ñ catirucuriro’ to basi niriro yuhure musare na wio dutiro, musa cahapu warocahre” ni, yuhtiga tinare. ¹⁵ Á ni tuhsu, yuhure tinare ñ sehe ni yahubasa namoga: “Ti ñuchusuma cūhu cjiri Abrahā, Isaa, Jacobo cūhu cjiri ti Cohamacu jija yuhu. Yuhu Yawe wama tija. Á jia tina sehe yuhure mipure ñ dihta ni, pisu ño payo mujajaro. Tuhsu, tinare ji turia dijaina cūhu boro marieno yuhure ñ dihta ni, pisu ño payo mujajaro tina cūhu’ ni, yahurocahre musare Yawe” ni, yuhure tinare yahubasaga —niha Cohamacu Moiserē. (“Yawe” nino, “ñ catirucuriro” nino nica hebreo masa ya dusero mehne)

¹⁶ Á ni tuhsu, ñ sehe ni namoha:

—Wahaga ti cahapu. Ti cahapu su, israe masare suho ji muhtainare pji cahmachu, ñ sehe ni yahuga tinare: “Yawe, mari ñuchusuma cūhu cjiri Abrahā, Isaa, Jacobo cūhu cjiri ti Cohamacu yuhu mehne durucuro wihihre. Wihi, yuhure ñ sehe ni yahubasa dutirocahre musare: ‘Yuhu ñuja egipto masa yu masare ñano dutipe ti cjuachu. ¹⁷ Á ñui, tinare, Egipto yahpai ñano yuhdu jiinare na wioi tai nija. Na wio, cananeo masa, hitita masa, amorreo masa, fereseo masa, heveo masa ñ jichū jebuseo masa tí curuari macaina ti ya yahpapu tinare naai tai nija. Tí yahpa noaputari yahpa jira. Tuhsu, jipihtia chūa jiri yahpa jira. Á jicu tinare tí yahpapu naai tai nija’ nirocahre Yawe musare” ni, yahubasaga yuhure tinare. ¹⁸ Mu ñ ni yahuchū, yu masare suho ji muhtaina sehe muhure potocā tuhoahca. Á jicu tinare yahu tuhsu, muhu

cūhu tina mehneta wahaga. Waha, Egipto macariro faraō mehne durucuna wahaga. To cahapu su, ō sehe ni siniga tirore: “Yawe sã hebreo masa Cohamacu sãre tirore ño payo dutiro taro pjirocahre. Ā jicu muhu sehe sãre wuari dujuro, yucuri marieni dujuropu tia dacho waha, suropu sãre warocasiniga. Tõpu suna, sã sehe sã wahiquinare wajã, jũ wa muo, sã Cohamacu Yawere ño payona wahana tana nija” ni, siniga tirore. ¹⁹⁻²⁰ Wiho mejeta yuhu sehe masija yuhdurucariro to jia tiare. Ā yuhdurucariro jiro, tiro musare, musa ā ni sinipachuta, wa wiosi. Ā jicu yuhu sehe yu tuaa tiare masa ti yoaa bihoe-raare egipto masare yoa ñoihtja. Tí mehne tinare ñano yuhduchu yoa, tuaro buhiri dahrehtja. Yu ā tuaro buhiri dahleri baharo, musare Egipto yahpai jiinare cohãroca wiorohca tiro juna. ²¹⁻²² Tó sehe yoa, musare egipto masa ti ño payochu yoaihtja. Ti ā ño payochu, jipihtina israe masa numia sehe, musa wijaahto pano, ti ya wuhu cahacã macaina numia ti wahma sitiare sinijaro. Ti siniina numia mehne jiina numia ya cūhure sinijaro. Ōpere sinijaro tí numiare. Uru, ā jichu plata wama tia comaa mehne ti yoaa, cahmono yosaare, busaa darire, wamo picari sãa sororire, ā jichu suhti cūhure sinijaro. Sini tuhsu, tí jipihtiare ti pohnare wajaro. Tó sehe yoa, egipto masa ti cjuare manahca musa. Ā jina musa wijaaana, paye baro maeraina wijaaasi —niha Yawe Moiserere.

Cohamacu Moiserere to tuaa mehne yoa ño dutiha

4 ¹ Ā yoa Yawe to ā nichu tuhoro, Moise sehe tirore ō sehe ni yuhtiha: —Yu coyea ti wacũ tuariro jieraja yuhu. Ā jia tina yuhure, “Potocãta muhure Yawe bajuari jira” ni, potocã tuhosi —ni, yuhtiha.

² To ā nichu, Yawe sehe ō sehe ni sinitu ñuha tirore:

—¿Yaba baro mu wamomacai cjuajari? —ni, sinitu ñuha.

—Yu tjuadu jira —ni, yuhtiha Moise.

³ —Ture yahpai doca cūga —niha Yawe.

To ā nichu tuhoro, Moise sehe doca cūha. To doca cūchuta, tu sehe agã dojo mua wahaha. To ā dojo mua wahachu ñu, cuiro, yoa cureropu ducu suha tiro. ⁴ To ā yoachu ñuno, Yawe sehe tirore ō sehe niha:

—Cuiecu tjiga. To pichonoi tirore ñahaga —niha.

To ā nichu tuhoro, Moise sehe:

—Jai —niha.

“Jai” ni, agã pichonoi ñahaha. To ñahachuta, agã cjiro sehe to tjuadu dojo mua wahaha tjoa.

⁵ Tó sehe yoa duti, Moiserere yoa ñoha Yawe. Yoa ño tuhsu, ō sehe niha tirore:

—Yu muhure yoa ñono cjiro seheta israe masa cūhure yoa ñoga. Mu yoa ñochu ñua, “Potocãta jiri jira. Mari ñuchusuma cūhu cjiri Abrahã, Isaa, Jacobo cūhu cjiri ti ño payoriro Cohamacu Yawe bajarota niri jira muhure” ni, potocã tuhoahca tina —niha.

⁶ Ā ni tuhsu, ō sehe ni namoha:

—Mipure mu suhtiro docai mu wamomacare siō sōga —niha.

To ā nichu tuhoro, Moise sehe to suhtiro docai to wamomacare siō sōha. Siō sō, na wio to ñuchu, cami baari wamomaca cjiro jiha. Tuhsu, ñano wapoari wamomaca cjiro jiha. ⁷ Moise to ñuri baharo, Yawe sehe ō sehe niha tirore:

—Mu wamomacare siō sōga tjoa —niha.

To ā nichu tuhorō, Moise sehe:

—Jai —ni, siō sōha. Siō sō, na wio to ñuchu, noari wamomaca jiha tjoa.

⁸Tirole tó sehe yoa ño tuhsu, ō sehe niha tjoa:

—Wahma mu yoa ñono mehne muhure tuho duaera, baharo mu yoa ñono mehne tina muhure potocā tuhoboca. ⁹Tí puaro mehne ti tuho duaeraputiachu ñui, Nilo ma macaa core waa na, yahpapu pio site cūga. Mu ā yoachu, tí co sehe di dojoahca —niha.

¹⁰To ā nichu tuhorō, ō sehe ni yuhtiha Moise:

—Yu Puhtoro, cuhcuro jija yuhu. Ā cuhcuro jicu, noano durucu masieraja yuhu. Mipu mu yuhu mehne durucuchu, ā wahi niera. Dóiputa ā jiro masa baja tiri jicuru yuhu —niha.

¹¹To ā nichu tuhorō, Yawe sehe tirole ō sehe niha:

—Mu cuhcuro jichu cūhure, noanohca. Yuhu sehe muhure yoadohihta. Yuhuta jija masare dusero cjuaina masa bajuachu yoiri. Ā yoa durucuerainare, tuho suinare, tuho suerainare, ñu suinare, tuhsu, ñu sueraina cūhure yoiri yuhuta jija. ¹²Ā jicu cuiri marieno wahaga. Mu wahachu, yuhuta muhure mu noano durucutire yoadohihta. Tuhsu, mu nihti cūhure muhure yahihta —niha Yawe tirole.

¹³To ā nichu tuhorō, Moise sehe tirole ō sehe ni yuhtiha:

—Pja ñu curega muh yuhure, Puhtoro. Yu cohtotaro pairi warocaga —niha.

¹⁴To ā ni yuhtichu tuhorō, Yawe sehe suaa wahaha tiro mehne. Ā suaparota, ō sehe niha tirole:

—Jai. Mu wahmi Aarō, “Levita” ni, ti pisuri, noano durucuro jira. Tiro muhure piti bocaro ta tuhsure. Piti boca, muhure ñuno, tuaro wahcherohca tiro. ¹⁵⁻¹⁶To ā piti bocari baharo, musa puaro Egipto yahpapu wahaga. Tópū suna, ō sehe yoanahca musa. Muhu sehe yu muhure yahuri cjiro sehta quihōno mu wahmipure yahu yuhdoga. Tiropu musa coyeare muhure yahu turiabasarohca juna. Ā yoi, muh sehe to cohamacu choro mu jiboro sehta jii niha. Ā jicu jipihta to nihtire tirole quihōno yahu yuhdoga. Ā yoa tiro cūhu mu ya cohamacu choro yare to yahu muhtaboro sehta quihōno tinare yahu turiarohca. Ā yoa yuhu cūhu yu niri sehta musa noano durucutire musare yoadohihta. Tuhsu, paye musa yoahti cūhure musare tópu yahu namoihta. ¹⁷Ā yoa ahdu mu tjuadu cūhure naaga. Tu mehne cūhure tinare yoa ño mujaiha muh —ni yahu namoha Yawe Moiseri.

Cohamacu to waha dutiro sehta Egipto yahpapu wahaha Moise

¹⁸Yawe to ā niri baharo, Moise sehe wahiquire pji cahmachu, tina mehne majare tjuua wahaha juna. Tjuua su, to marechuno Jetrole ō sehe ni sinitu ñuha:

—Egiptu yu coyeare ñui waha duamaca yuhu. “¿Tina catisinijari?” ni, ñui waha duai nimaja. ¿Noabocari, mu tuhotuchu? —ni sinitu ñuha Moise.

To ā ni sinitu ñuchu, to marechuno sehe ō sehe ni yuhtiha:

—Jai. Noanohca. Ñui wahaga —ni yuhtiha.

¹⁹Ā yoa Moise Madiā yahpai to jisinchuta, Yawe tirole ō sehe niha tjoa:

—Egipto yahpapu waha masina muh. Muhure wajā duamarina cji yaria pihta wahahre —niha.

²⁰To ā nichu tuhoro, Moise sehe to namonore, ā jichu to pohnacāre burro buipu na mūo payo, Egipto yahpapu waha dūcaha. To tjuadu, “Ahdu mehne yoa űoga mūhu” Cohamacu to nidu cūhure naaha.

²¹Ā yoa Egiptopu to waharucuro watoi ō sehe ni namoha Yawe Moisere:

—Payu cuaa chorire yoa űo duticu, mūhure yu tuaare wahi yūhu. Ā jicu Egipto yahpapu sui, tō macariro faraō to űurocaroi jipihtia yu mūhure yoa űo dutiare tirore yoa űoga. Tī jipihtiare tirore mu yoa űopachuta, tiro sehe mūhure yuhti duasi. Yuhuta jiihca tirore ā yuhdurucariro wahachu yoariro. Yu ā yoachu, tiro mu coyea israe masa curuare wa wio duasi. ²²To ā wa wio duaerachu űucu, mūhu sehe yūhure ō sehe ni yahubasaga tirore: “‘Israe masa curua yu wahma pohna ti mūhtararo yoaro sehe jiri curua jiro nina. ²³‘Tī curuare wa wiojaro yūhure ti űo payoa wahahto sehe’ yu niropachuta, mūhu sehe tinare wa wio duaerare. Mu ā wa wio duaerachu űui, yūhu cūhu mu macu mu wahma pohna ti mūhtaroro wajānocaihtja’ ni, yahurocāhre Yawe mūhure” ni, yūhure yahubasaga tirore —niha Yawe Moisere.

²⁴Ā yoa Moise cūhu Egiptopu waharucua, nahi tōa wahaha tjoa. Nahi tō, ti carīnoi Yawe sehe wacūenoca ti cahai wihi, Moisere wajāno taro nimaha. ²⁵⁻²⁶To wajāno tachu űūno, Moise namono Séfora sehe űo duaro mehne to macunocā cuhnu cūnu sohtoa macari cahsarocāre tāca pīja, noano siori pīja mehne yihso naha. Yihso na tuhsu, tī cahsarocāre Moise dahporoi duhu payoha. Ā duhu payoro, ō sehe niha:

—Israe masunore manu tieraco, ō sehe yoeraboa yūhu. Israe masuno mu jichu űūco, mari macucā to dire cohāchu yoaja yūhu —niha.

To ā yoachu űūno, Yawe sehe Moisere wajāboriro wajāeraha jūna.

²⁷Ā yoa Aarō cūhure Egiptopu jiriore ō sehe niha tiro Yawe:

—Mu bahu Moise wuari dujuropu tarucuro nina. Tirore piti bocai wahaga mūhu —niha tirore.

To ā nichu tuhoro, Aarō sehe to bahurore piti bocaro wahaha. Yoaro waha, suropu tūcu Sinaī cahapu tirore piti bocaha. Tu sehe, “Ahdu tūcu Cohamacu to bajua mūjadu jira” ni, masa cua pisaro ti űudu jia tiha.

Ā yoa tōi Aarō sehe to bahu Moisere piti boca, tirore wahsupu wihmiha.

²⁸To ā yoari baharo, Moise sehe jipihtia Yawe to nirire Aarōre yahu turiaha jūna. Ā yoa to basi to yoa űohti cūhure tirore yahuha. ²⁹To yahu tuhsuchu, tina puaro Egipto yahpapu wahaa wahaha. Waha, tī yahpapu sua, israe masare suho jī mūhtainare pji cahmachuha. ³⁰Pji cahmachu, jipihtia Yawe Moisere to nirire Aarō sehe tinare yahuha jūna. To yahu tuhsuchu űū, Moise cūhu Cohamacu to yoa űo dutiro seheta israe masare yoa űoha.

³¹Ā yoa tina israe masa sehe Aarō to yahware tuhoa, tuhsu, Moise to yoa űoare űua, tinare potocā tuhoha. Ā potocā tuhoa:

—Ahrina Cohamacu to warocarinata jiri jira —niha tina.

Ā nia, ti basi ō sehe ni durucuha:

—Yawe ōpu mari űano wapu ti jiare masiyuhca. Ā masino, tiro marine yoa-dohoro taro niyuhca —niha.

Ā niata, na tuhcuca caha su, Cohamacure űo payoha tina.

Moise, ā jichu to wahmino Aarō tina puaro faraō mehne durucua wahaha

5 ¹Ā yoa Moise cūhu faraō mehne durucua wahaha jūna. Waha, to cahapu sua, ō sehe niha tina tirore:

—Yawe, sã Cohamacu, sãre õ sehe ni muhure yahu dutirocahre: “Sã to masa curuare wuuri dujuro, yucuri marieni dujuropu warocajaro, tópu sã wahchea mehne tiore bose numu yoa payo, sã tiore ño payona wahahto sehe” ni, sãre yahu dutirocahre Yawe muhure —niha tina tiore.

² Ti ã nichu tuhoru, faraõ sehe tinare õ sehe ni yuhtiha:

—¿Noa jijari tiro “Yawe, sã Cohamacu” musa niriro? Masieraja yuhu tiore. Yu masieraritore yuhti masieraja yuhu. Á jicu israe masa curuare ne wa wiosi —ni yuhtiha faraõ.

³ To ã nichu tuhoa, Moise cûhu sehe õ sehe ni yuhtiha:

—Muhure sã niriro seheta sã hebreo masa sã Cohamacu sã mehne sũhu-duhre. Á jina sã sehe muhure sinina nija. Sãre wuuri dujuro, yucuri marieni dujuropu warocaga. Tópu tia dacho waha sũropu sã Cohamacu Yawere ño payona waha duana nija. Sã wahiquinare wajã, jũ wa muo, tiore ño payona waha duana nija sã. Sãre mu wa wioerachu, tiro sehe sãre puria dohatia mehne, tuhsu, cahma wajãa mehne buhiri dahre, sãre wajãnocahito jiyuhti —ni yuhtiha Moise cûhu faraõre.

⁴⁻⁵ Ti ã nichu tuhoru, faraõ sehe tinare tuaro mehne õ sehe niha:

—¿Dohseana tana musa coyea noano ti dahra jinocanore dojomehnena tajari musa? Ti dahraa mehne noano dahra jinocaa nina tina. Tí cjihtita ahri yahpapore payu masa puti jira tina. Á jina musa sehe tinare noano ti dahra jinocanore cariboena tjiga. ¿Ti dahraroputa tinare suho na tjuaaga tjao! Tinare wa wiosi yuhu —niha faraõ.

⁶ Á yoa tí dachoihta faraõ sehe ti puhtoare, tinare tuaro mehne dahra dutiinare pji cahmachuha. Tuhsu, israe masa coyea, tinare suho dahra muhtaina cûhure pji cahmachuha. Pji cahmachu, tinare õ sehe niha:

⁷⁻⁹ —Israe masa marine dahra cohtaina capa bujuina jira. Á capa bujuata, tina marine duhti wahcã duaa nina. Á duhti wahcã dua, tina marine õ sehe ni mahñoa: “Sã Cohamacure ño payona tana, sã wahiquinare wajã, jũ wa muo, tiore ño payona waha duana nija sã. Sãre wa wioga” ni, mahñoa tina marine. Ti ã ni mahño wijaa duari buhiri musa sehe tinare tó pano ti dahramariro bui tuaro dahra dutiga. Á tuaro dahra dutina, õ sehe yoa dutiga tinare. Tó pano dihta sohãa cjoarire ti yoa mujachu, musa sehe tinare tí dihta sohãa mehne ti tju morehti cjihti tjare wa mujaa timare. Mipu sehere waena tjiga juna. Musa waerachu, tina sehe dachoripe ti mu suro tjare maca, tíre dihta sohãa mehne more, dihta sohãa cjoari yoa mujajaro juna. Musa ã yoa dutichu, tó pano ti dahramariro cjiro bui tuaro dahraahca tina. Ti ã tuaro dahra mujapachuta, musa sehe tinare tó pano ti yoa cjoari cjiripeta mipu cûhure yoa duti mujaga. Ne cû cjoa duhsaro marieno tinare yoa duti mujaga. Tuhsu, tinare ne soro marieno dahra dutiga. Musa ã yoachu, tina sehe Moise, Aarõ cûhu ti mahño yahuchu, ti tuhobori pja cjuasi —niha faraõ tinare.

¹⁰ To ã ni yahuchu tuhoa, tina sehe israe masare yahua wahaha. Waha, ti cahapu sua, faraõ to nirire tinare yahuha. Ó sehe ni yahuha tinare:

—Mipure faraõ tó pano musare tjare to waroca mujano seheta warocaera mujahito jiyuhti juna. ¹¹ To ã warocaerachu, musa sehe musa basita tjare maca mujahitina jiyuhti. Á maca wapũ tipanahta, tó pano musa yoiari cjiripeta dihta sohãa cjoarire mipu cûhure yoa mujahitina jiyuhti musa. Á ni sãre yahu dutirocahre faraõ musare —ni yahuha tinare.

¹²Ti ā ni yahuchū tuhoa, israe masa sehe ti basita tjare macaa wahaa, Egipto jipihtiri yahpapū waha sitea wahaha. ¹³Ti ā maca wapū tichū űupahta, tinare tuaro mehne dahra dutiina sehe pja űuera tiha tinare. Ā pja űueraa, tó pano dihta sohāa cjoari ti yoari cjiripeta, dachoripe tinare yoa duti mǵjaa tiha tjoa. Wiho mejeta tina sehe tópe peri yoa bihoera tiha juna. ¹⁴Ti bihoe-rachū űua, ti puhtoā tinare tuaro mehne dahra dutiina sehe israe masa coyea, tinare suho dahra muhtaina sehere tjana mǵjaa tiha. Ā tjanaa, tinare ō sehe ni tuhti mǵjaa tiha:

—Cjero dihta sohāa cjoarire tó pano mǵsa yoari cjiripeta yoaga tjoa —ni tuhtipe mǵjaa tiha tinare.

¹⁵Ti ā ni tuhti, tjanape mǵjachū, tina sehe ne ji coaera tiha. Ā ji coaera, faraō mehne durucua wahaha. Waha, to cahapū sua, ō sehe nimaha tina tirore:

—¿Dohse yoai muhū sehe sāre ā tuaro mehne dutipe mǵjajari? Ā yoaera-boca muhū sāre. Muhure dahra cohtaina jina nija sā. ¹⁶Ā yoa sohō jiina, sāre űu nūnū duticu, mu cūrina cūhū sāre tjare waerapahta, tó pano sā yoari cjiripeta dihta sohāa cjoarire yoa duti mǵjana sāre. Wiho mejeta sā sehe sā basita tjare maca wapū tiina tó pano sā yoari cjiripeta yoana bihoeraja juna. Sā ā bihoerachū űupahta, tina sehe sāre wiho warota tjanape mǵjaa tira. Wiho mejeta sā ya buhiri jierara. Mǵsa coyea, sāre mu űu nūnū duti, mu cūina ya buhiri sehe jira —nimaha tina tirore.

¹⁷Ti ā nichū tuhoro, faraō sehe tinare ō sehe ni yuhtiha:

—Capa bujuina jira mǵsa. Ā capa bujunata, yuhure ō sehe nina mǵsa: “Sā Cohamacu Yawere űo payona waha duana nija sā. Sā wahiquinare wajā, jū wa muo, tirore űo payona waha duana nija. Ā jicu muhū sehe sāre wa wioa” nina mǵsa yuhure. ¹⁸Musa yuhure ā ni mahñori buhiri cjero mǵsa dahraapū dahrana wahaga tjoa. Waha, dihta sohāa cjoarire yoana wahaga. Yu coyea, mǵsare dutiina tja mehne mǵsare ti yoadohoerapachuta, mǵsa sehe dihta sohāa cjoarire, tó pano mǵsa yoari cjiripeta dachoripe pari turi yoa mǵjaga tjoa —ni yuhtiha faraō tinare.

¹⁹To ā ni yuhtichū tuhoa, tina sehe ō sehe ni tuhoutuha: “Tó pano mari űano yuhduro bui űano yuhduna nica mari” ni, cariputiro tuhoutuha tina. ²⁰Faraō mehne tó sehe ni, ti suhuduro wato, Moise cūhū sehe ti suhuduri wuhū wijaroi tinare cohtarucua niha. Ā jia tina sehe suhudu tuhsu, wijaa, Moise cūhū mehne piti bocaha. ²¹Ā piti bocaa, ō sehe ni tuhtiha tinare:

—Sāre ō sehe űano yuhduchū yoana tana, mǵsata wahmanore ōpu ta, “Sā coyeare wa wioa” ni, dojomehne ducahre. Ā nina, faraō sehere to doca macaina puhtoā mehne sāre ti űu yabi ducachū yoahre mǵsa. “Ahrina űainare tuaro dutipe, wajā pahñonocajihna mari” ni, sā sehere ti űu tuhti ducachū yoahre mǵsa. Sāre mǵsa ā űu tuhtichū yoari buhiri, Yawe sehe tǵre űuno, mǵsare buhiri dahrejaro —ni tuhtiha tinare.

Yawe mehne durucuro wahaha Moise

²²Ā yoa Moise sehe to coyea ti ā ni tuhtichū tuhoro, Yawe mehne durucuro wahaha. Tiro mehne durucuro, ō sehe niha Yawere:

—Puhtoro, mu masa curuare wiho warota űano yuhduchū yoai nina muhū. Tuhsu, yuhū cūhure wiho warota ti cahapū warocari jira muhū. “Tinare wioi

wahaga” mu nichu tuhocu, opa tamahi yuhu. ²³OPA wihi, faraore mu yuhure yahu dutirotarire yahumahi yuhu tirore. Yu yahuri baharo jipachuta, tiro sehe to pano to dutipemariro bui tinare dutipe namono nina. Muhu cuhu ti nano yuhdachu nupaihta, tinare na wioeraputiaa —niha Moise Yawere.

6 ¹Á yoa Moise to á nichu tuhoro, Yawe sehe tirore o sehe ni yuhtiha: —Mipu nuhica muhu faraore yu dohse yoaitire. Yuhu tirore musare to ya yahpai jinare wiochu yoaihtja. Potocata tuaro mehne musare waroca wiorohca tiro —ni yuhtiha.

Cohamacu israe masare to na wiohtire Moisere yahuha

²Á yoa Cohamacu Moisere o sehe ni yahu namoha:

—Yuhu jija Á Catirucuriro. Yu niri cuhure, cohtotaro marieno, sohtori ti mujariro jija yuhu. Á jicu Yawe wama tija. (*“Yawe” nino “á catirucuriro” nino nica. Tuhsu, “to niri cohtotaro marieno sohtori ti mujariro” nino nica hebreo masa ya dusero mehne*) ³Á yoa panopure musa nuhusuma cjiri Abrahá, Isaa, Jacobo cuhu cjirire yu wama, pa wamare yahua tihi yuhu. Tí wamare yahucu, o sehe nia tihi yuhu tina cjirire: “Yuhu jipihitina bui tua yuhdurucu suri jija. Tuhsu, masare noano wahachu yoariro cuhu jija. Á jicu El Sadai wama tija” ni, yahua tihi yuhu tina cjirire. (*“El Sadai” nino, “Cohamacu Jipihitina Bui Tua Yuhdurucu Suriro” nino nica. Tuhsu, “noano wahachu yoariro” nino nica hebreo masa ya dusero mehne*) Tuhsu, potocata El Sadai jicu, yu jia tiare tina cjirire yoa noa tihi yuhu. Yuhu á yoa nochu, “Potocata jipihitina bui tua yuhdurucu suri jira. Á jiro El Sadai wama tira tiro” ni, yuhure masia tire tina cjiri. Á yoa yu mähure yahuri wama Yawe niri wama cuhure yahua tihi yuhu tina cjiri cühure. Á yahupaihta, Yawe jicu, yu jia tia sehere tina cjirire yoa noera ticuru yuhu. Á jia tina cuhu yuhure potocata á jirucurirota yu jia tiare, tuhsu, yu niri cohtotaro marieno sohtori tiro yu jia tia cühure masiera tire tina cjiri. ⁴Á yoa yuhu sehe tina cjirire paye masa watoi ti ji tiniri yahpa, Canaá yahpare cua pisaro mehne o sehe ni yahua timai yuhu tina cjirire: “Ahri yahpa, musa ji tiniri yahpare waihtja musare” ni, yahua timai yuhu tina cjirire. Á ni yahupaihta, yu á niri cjirire sohtori tiera ticuru yuhu tina cjirire.

⁵Á yoa mipure tina cjiri panamana mu coyee israe masare Egipto yahpa macaina sehe tuaro dahra dutipea nina. Ti dutipechu, nano yuhdua, dachoripe ti sanurucu mujachu tuhoja yuhu. Á tuhoi, musa nuhusuma cjirire yu niri wacuja. ⁶Á jicu muhu sehe mu coyee israe masare o sehe ni yuhure yahubasai wahaga: “Yuhu jija Á Catirucuriro. Yu niri, cohtotaro marieno, sohtori ti mujariro jija yuhu. Á jicu Yawe wama tija. Mipure Yawe yu jia tiare tina sehere masichu yoi tai nija juna. Á jicu ti nuhusuma cjirire yu niri tina sehere sohtori tii tai nija. Israe masa curuare Egipto yahpa macaina ti nano dahra dutiperi curuare naroca woi tai nija. Yu naroca wiohto pano, egipto masa sehere tuaro buhiri dahresinihtja. Tinare tuaro buhiri dahre, yu tuua tiare tinare yu niori baharo, israe masa sehere naroca wiohtja. ⁷Á naroca woi, yu ya curua jichu yoaihtja tinare. Egipto masa ti nano dahra dutipeinare to sehe yoa, yu na wiori baharo, tina yuhure masiahca juna. Á masia, ‘Potocá tjira. Yawe mari Cohamacuta jiri jira’ ni, masiahca tina yuhure. Á jicu yuhu sehe ti Cohamacu jiihca juna. ⁸Á yoa ti nuhusuma

cjiri Abrahā, Isaa, Jacobo cūhū cjirire cua pisaro mehne ‘Ahri yahpa, Canaā yahpare musare waihtja’ yū niri yahpa cjiropū tinare naaihtja. Tí yahpapū na su, tí yahpare waihtja tinare. Yūhū jija Yawe. Ā jicu panopū yū ni cūri cjirire mipū musa mehne sohtori ti tai nija’ ni, yahurocahre musare” ni, yahubasai wahaga yūhure —niha Yawe Moisere.

9-27 [...]

Yawe Moise mehne pari turi durucu namoha

28-29 Ā yoa Moise mehne Egiptopū to durucuri pjare, Yawe tirore ō sehe ni yahu namoha:

—Yūhū jija Yawe. Ā jicu mūhū sehe faraō cahapū waha, mipū yū mūhure yahughtire jipihtiare tirore yūhure yahu turiabasai wahaga —niha.

³⁰To ā nichū tūhoro, Moise ō sehe ni yūhtiha Yawere:

—Puhtoro, noano yahu mihniriro jieraja yūhū. Tó sehe yū jiro jichū, yūhure faraō ne tūho duasi —ni yūhtiha.

7 ¹Ā yoa Moise to ā nichū tūhoro, Yawe sehe ō sehe ni yūhtiha tirore:

—Noanohca, Moise. Cariputiro tūhotui tjiga. Tó pano yū mūhure niriro cjiro seheta yūhū sehe mūhure yū cohtotaro, cohamacū mū jiboro seheta jichū yoihtja. Ā yoi, faraōre dutiriro mū jichū yoihtja mūhure. Ā yoa mū wahmi Aarō cūhure cohamacū jicu, mū yahuare to yahu turia-boro seheta to yahuchū yoihtja tiro cūhure. Ā yoi, tirore cua pisaro mehne faraōpure to yahu turia mūjachū yoihtja tiro cūhure. ²Ā jicu mūhū sehe jipihitia israe masare wa wio dutichū, yū faraōre yahurocaare mū wahmi Aarō sehere yahu turia mūjaga. Tiropū tīre faraōpure yahu turia mūjanohca jūna. ³⁻⁴Wiho mejeta musa ā ni tirore sinipachuta, yūhū sehe faraōre tuaro musare yūhdurucariro jichū yoihtja. Yū ā yoachū, tiro musare ne yūhti duasi. To ā yūhti duaerachū ñucū, yūhū sehe Egipto jipihtiri yahpare payū ñū cuachū yoa baro chori mehne ñano wahachū yoa, tinare buhiri dahre mūjaihtja. Ā ñano wahachū yoa, tinare yū buhiri dahre mūjachū ñuparota, tiro sehe musare ne wa wio duasi. Ā wa wio duaera, musare to yūhdurucachū, yūhū sehe to masare ā jichū tiro cūhure yū buhiri dahre mūhtari bui, tuaro waro tinare buhiri dahreihtja. Tinare yū ā tuaro buhiri dahrea mehne yū ya curua, israe masa curua sehere naroca wioihtja jūna. Tí curuare cū curua jiparota, doce curuari cahma, tju wa dapo, ji dijari curuare cāa curuari ti cahno-rucū sūri baharo, tinare Egipto yahpai jimarinare naroca wioihtja. ⁵Tó sehe yoa, israe masare yū naroca wiori baharo, tuhsū, egipto masare yū ā tuaro buhiri dahreri baharo, tina egipto masa yū jia tiare masiahca jūna. Ā masia, cua yūhdua waha, “Yawe potocāta tua yūhdurucū sūriro warota jiri jira” ni, masiahca yūhure —ni yahuha Yawe Moisere.

⁶Ā yoa jipihtiare Yawe to dutiro seheta Moise, Aarō mehne yoa pahñoha.

⁷Moise sehe faraō mehne to durucuro sūri pjare ochenta cūhmari cjuaa tiha. Ā yoa to wahmino Aarō cūhū ochenta y tres cūhmari cjuaa tiha.

Aarō to tjuadure agā dojo mua wahachū yoaha Yawe

⁸Ā yoa Yawe sehe Moisere, ā jichū Aarōre ō sehe ni namoha tjoa:

⁹—Musare bujūpe duaro, tiro Egipto macariro puhtoro yoa ño dutirohca. To yoa ño dutichū, mūhū sehe mū wahmi Aarōre to tjuadure faraō to

ñurocaroi yahpapu doca cū dutiga. To doca cūchuta, tu sehe agā dojo mua waharohca —niha.

¹⁰To ā niri baharo, tina puaro faraō cahapu wahaa wahaha. To cahapu su, Yawe to yoa ño dutiro sehetā yoa ñoha. To tjuadure puhtoro ā jichu to doca macaina puhtoā ti dujiro potoi doca cūha Aarō. Tu sehe to doca cūchuta, agā dojo mua wahaha. ¹¹Ti ā yoachū ñuno, faraō cūhu tí yahpa macaina yayare ā jichu paina noano masiinare pji dutirocaha. To pji dutirocaina wihi, tina cūhu ti mu suro ti masia mehne ti yoa ñoriro sehetā yoa ñomaha. ¹²Tina cūhu ti tjuaa yucure yahpapu doca cūha. Ti doca cūchuta, tina cūhure tí yucu agāa dojo mua wahaha. Wiho mejeta Aarō tjuadu agā dojoinare chu pahñonocaha. ¹³Ti ā yoa ñopachuta, faraō sehe Moise cūhure ne tuho duaeraha. Yawe to niriro sehetā ā yuhdurucariro waharo niha tiro.

Nilo ma macaa core di co dojoinare yoa Yawe

¹⁴Ā yoa Yawe sehe Moiserē ō sehe niha tjao:

—Yu muhure niriro cjiro sehetā faraō sehe muhure yuhti duaerara. Ā yuhti duaeraro, tiro israe masare ahri yahpai jinare wa wio duaerara. ¹⁵Ā yoa ñamichaca bohrea caharocā tiro Nilo mapu buharohca. Ā jicu muhu cūhu to buhu suhtoī cohta, tói tirore piti bocai wahaga. Ā piti bocai wahi, mu tjuadu agā dojoinare cjiro cūhure naaga. ¹⁶Tirore piti boca, pari turi yuhure ō sehe ni yahubasaihca muhu tjao: “Yu masare wa wiojaro wuuri dujiro, yucuri marieni dujiropu yuhure ti ño payoa wahahto sehe’ ni, yahurocahre Yawe, sā hebreo masa Cohamacu muhure” ni, yuhure yahubasai wahaga tirore. Yu ā ni yahuroca mujapachuta, tiro sehe yuhdurucariro waro jiro, yu masare wa wio duaera mujana. ¹⁷⁻¹⁸Ā jicu ō sehe ni yuhure yahubasa namoga tirore: “Ahri pjai yuhure pari turi to yuhtierachu, yuhu sehe tirore buhiri dahrehtja juna. Yu ā buhiri dahrei tachū, Aarō sehe to tjuadu mehne tí mai cjárōcaporohca. To ā cjárōcapochuta, tí ma sehe yu basi yu cjárōcapoboro sehetā, di ma dihta waha mua waharohca. Ā wahachu, tí ma macaina wahi cūhu jipihtina yaria pihtia wahaahca. Ā yariaa, ñano ti ūrichū, egipto masa tí core yabia, ne sihni namosi. Yu ā yoa, buhiri dahrechū ñunopu, tiro sehe Yawe yu jia tiare masinohca juna” ni, yuhure yahubasai wahaga tirore —niha Yawe Moiserē.

¹⁹Ā yoa Yawe ō sehe ni yahu namoha Moiserē:

—Mu wahmi Aarō to tjuadure naroca muo, tu mehne mári bui, toaa watoi ti saha wahsari co wahaa wahsari bui, pja tarori bui, ā yoa jipihtiro nohoi co jia bui ñui purocajaro. To ñui purocachuta, tí sehe di co dojo pihtia wahaahca. Te yucuri mehne, tãa mehne ti yoa situ puripu posa tia co cūhu di co dihta dojo pihtia wahaahca —ni yahu namoha Moiserē.

²⁰To ā ni yahuri baharo, Moise sehe Aarō mehne Yawe to yoa ño dutiro sehetā yoa juna. Faraō ā jichu to doca macaina puhtoā ti ñurocaroi Aarō sehe to tjuadure naroca muo, jipihtiro nohoi co jia bui ñui puroca pahño tuhsu, Nilo mapu cjárōcapoha. To ā yoachuta, co sehe di dojo mua wahaha. ²¹Ā wahachu, tí ma macaina wahi cūhu noano yaria pihtia wahaha. Ā yoa ñano ūrini ma tjuaha tí ma. Ā wahachu, ne dohse yoa co sihniera tiha egipto masa. Jipihtiro Egipto yahpa macaa co di co dihta dojo pihtia wahaha.

²² Ñ yoa faraõ yaina yaya ã jichu paina noano masiina cûhu ti yoaro seheta ti masia mehne yoa ñoha. To yaina cûhu ti yoaro seheta ti yoa ñochu ñuno, Moise cûhure faraõ sehe yuhdurucaha tjoa. Ñ yuhdurucaro, tinare ti siniare yuhti duaeraha. Yawe to niriro cjiro seheta waharo niha tiro. ²³ Ñ jiro puhtoro jiro to jiri wuhupure maja suro, tiro ã jica nino marieno jinocaha. ²⁴ Noano to jinocano wato, egipto masa sehe noaa core macaa, Nilo ma duhtu cahapu sahaa copari yoaa nia tiha.

²⁵ Ñ yoa Nilo ma macaa core Yawe di co to dojochu to yoari baharo, siete dachori yuhdu tuhsua tiha.

Diapu jiina mua perire pu site maja tachu yoaha Yawe

8 ¹ Ñ yoa Yawe sehe Moisere ò sehe niha tjoa:

—Faraõre ò sehe ni yuhure yahubasai wahaga: “Yû ya curuare wa wiojaro, yuhure ti ño payoa wahahto sehe. ² Tinare to wa wio duaerachuna, to ya yahpa jipihtiropure mua peri mehne buhiri dahrehtja. ³ Nilo ma, dia pjiri mare mua peri ji sahsea wahaahca. Ji sahsea waha, pu maja taahca juna. Pu maja taa, to ya wuhupu sâahca. Sâahca to carîni tahtiapu, to carî coâno buipu, to doca macaina puhtoia ya wuhusepu, ã jichu jipihitina egipto masa ya wuhusepu cûhure sâahca. Ñ jichu pão yoaa taa, ti tju morea wahwaripu, ti pão puhõa coparipu cûhure pu site sâahca. ⁴ Ñ yoa faraõre, to doca macaina puhtoare, ã jichu jipihitina egipto masa cûhure tina mua peri pu site wahã suahca. Yû ya curuare to wa wioerachu, ã waharohca tinare’ ni, yahurocahre Yawe muhure” ni, yuhure yahubasai wahaga faraõre —niha Yawe Moisere.

⁵ Ñ ni tuhsu, ò sehe ni namoha:

—Mu wahmi Aarõ to tjuadure naroca muo, jipihitia mâri buipu, toaa watoi ti saha wahsari co wahaa wahsari buipu, pja tarori buipu ñui purocajaro. To ã yoachuta, Egipto yahpa jipihtiropure mua peri pu maja taa, noano ji sahserucu sua wahaahca —niha.

⁶ Ñ yoa Moise to wahmino Aarõre tí quitire to yahuri baharo, tiro sehe to tjuadure naroca muo, Egipto yahpa macaa mâri, jipihitia mâri buipu ñui purocaha. To ã yoachuta, tí mâri macaina mua peri sehe pu site maja taa, Egipto yahpare paró ji sahserucu sua wahaha juna. ⁷ Moise cûhu ti ã yoachu ñua, tí yahpa macaina yaya ã yoa noano masiina cûhu ti yoaro seheta ti masia mehne mua peri pu site maja tachu yoaha.

⁸ Mua peri payu waro ti pu site maja ta namochu ñuno, faraõ sehe Moisere ã jichu Aarõre pji dutirocaha. To pji dutirocari baharo, ti wihichu ñuno, tinare ò sehe niha faraõ:

—Säre musa sini payobasachu cahmaja yuhu. Musa puhtoro Yawe säre ahrina mua perire ti buti pihtia wahachu to yoabasahtire musa sini payobasachu cahmaja yuhu. Säre musa sini payobasachu, yuhu cûhu musa masare wa wioihtja, tina cûhu ti wahiquinare wajã, jû wa muo, musa Cohamacu Yawere ti ño payoa wahahto sehe —niha faraõ tinare.

⁹ To ã nichu tuhoro, tire ò sehe ni yuhtiha Moise:

—Jai. Muhure, mu doca macaina puhtoare ã jichu mu masa jipihitina cûhure sini payobasaihtja. Yû sini payori baharo, tina mua peri musa wuhusepu jiina yaria pihtia wahaahca. Ti yaria pihtiri baharo, duhsaina diapu dihta jiahca juna —ni yuhtiha Moise faraõre.

Ni yuhti tuhsu, ò sehe ni sinitu ñuha:

—¿Dohse jichu waro yu musare sini payobasachu cahmajari muhu? ni sinitu ñuha.

¹⁰To ã ni sinitu ñuchu tuhoru, faraõ sehe ò sehe ni yuhtiha tirore:

—Ñamichaca yuhure mu sini payochu cahmaja —ni yuhtiha.

To ã ni yuhtichu tuhoru, Moise sehe ò sehe niha tirore:

—Jai. Mu nino seheta yoaihtja. Mu cahmano seheta wahachu ñuipü, “Mariahca paio Yawe ti Cohamacu yoaro sehe jiro” ni, masiihca muhu.

¹¹Ã jia mua peri cjiri sehe ne muhure, ne mu doca macaina puhtoare, ne mu masa cühure caribo namosi. Musa wuhusepu jiina yaria pihtia wahaahca. Ti yaria pihtiri baharo, paina duhsaina mua ti jimariro cjiro seheta diapü dihta jiahca —ni yuhtiha.

¹²Baharo puhtoro cahapu jimarina Moise cühu sehe wijaa wahaha juna. Ñ yoa Moise sehe faraõ to siniro seheta pa dacho bohrearoi tinare sini payoha.

¹³To sini payochu tuhoru, Yawe sehe to sinino seheta wahachu yoaha. Ñ yoaro, tina mua perire masa wuhusepu jiinare, ti wuhuse duhtu cahai jiinare, ã jichu jipihina tí yahpa macaa macari duhtu cahai jiina cühure noano yaria pihtia wahachu yoaha. ¹⁴Ti ã yariachu ñua, egipto masa sehe tina peri cjirire payu tuhuri saa cahmachu cüha. Ti saa cahmachu cüri baharo, tina peri cjiri sehe Egipto yahpa jipihiti yahpapore paró urí sahsea wahachu yoaha. ¹⁵Ã wahachu ñuparota, faraõ sehe munanota yuhdurucariro jisiniha tiha. Yawe to niyuriro cjiro seheta ã yuhdurucariro waharo niha tiro. Ñ jiro Moise cühu israe masare wa wio duti ti sinichu, tiro sehe tinare yuhti duaeraha tjao.

Wihmiina perire bajuachu yoaha Yawe

¹⁶Ã yoa faraõ to yuhti duaerachu ñuno, Yawe sehe Moisere ò sehe ni namoha tjao:

—Mu wahmi Aarõ to tjuadure naroca muo, yahpai cjã cüjaro. To ã cjã cühuta, jipihiti Egipto yahpapore dihta pohcari sehe payu wihmiina peri dojo mua wahaahca —niha Yawe Moisere.

¹⁷To ã nichu tuhoru, Moise sehe tíre Aarõpüre yahu turiaha. To yahu turiachu tuhoru, Aarõ sehe to niro cjiro seheta yoaha. To tjuadure naroca muo, yahpai cjã cüha. To cjã cühuta, jipihiti Egipto yahpapore dihta pohcari sehe payu wihmiina peri dojoa wahaha. Ñ dojoa, masare ã jichu wahuquina cühure payu wahã su, tinare di wihmiha. ¹⁸Moise cühu wihmiina ti bajuamehnechu ñua, tó macaina yaya ã jichu noano masiina cühu ti masia mehne wihmiinare bajuamehne duamaha. Wiho mejeta ne bajuamehne masieraha tina. ¹⁹Ã bajuamehne masieraa, ti puhtore ò sehe nimaha tina:

—Wihmiina perire bajua muachu yoriro potocãta Cohamacuta jira —nimaha.

Ti ã nichu tuhoparota, faraõ sehe munanota yuhdurucariro jisiniha. Yawe to niyuriro cjiro seheta waharo niha. Ñ jiro Moise cühu ti siniare yuhti duaeraha tiro.

Nunana perire bajuachu yoaha Yawe

²⁰Ã yoa faraõ to yuhti duaerachu ñuno, Yawe sehe Moisere ò sehe ni yahuha tjao:

—Faraõ bohrea caharocã pitamahapũ buharohca. To buhachũ ñũ, muhũ cũhũ to cahapũ buhaga. To cahapũ buhu sũ, yuhũre õ sehe ni yahubasaga tirore: “Yũ ya curuare wa wiojaro, yuhũre ti ño payoa wahahto sehe. ²¹ Tinare to wa wio duaerachũna, tirore, to doca macaina puhtoare, ã jichũ to masa curuare nunana perire waroca, tinare buhiri dahreihitja. Yũ ã warocachũ, tina nunana peri ti wuhuserire ji sahsea wahaahca. Æ yoa yahpa cũhũre paró bua sahserucũ sua wahaahca. ²² Tinare ã waharo watoi yũ ya curua ti jiri si, Gosẽ wama tiri si sehere soro cũihtja. Tó sehere ne cũiro nunanairo marienohca. Æ wahachũ ñũnopũ, ‘Potocãta Yawe jira yũ ya yahpare ã wahachũ yoariro’ ni, masinohca tiro yuhũre. ²³ Yũ niriro seheta yũ ya curuare soro cũihtja. Tuhsũ, to masa curua cũhũre soro cũihtja. ‘Ñamichacata muhũre ã waharohca’ ni, yahurocahre Yawe muhũre” ni, yuhũre yahubasai wahaga faraõre —niha Yawe Moiserẽ.

²⁴ Pa dacho “Æ waharohca” ni, to yahu dutiromo seheta yoaha Yawe. Payũ nunana perire Egipto yahpa jipihitiropure waroca, tí yahpare ji sahserucũ sua wahachũ yoaha. To ã yoachũ, tina peri sehe faraõ ya wuhũpũ, tuhsũ, to doca macaina puhtoa ya wuhusepũ cũhũre sãaha. Tuhsũ, tí yahpa macaina jipihitinare ñano yuhũdũchũ yoaa tiha tina.

²⁵ Æ wahachũ ñũno, Moiserẽ, ã jichũ Aarõre pji dutiroca, õ sehe niha faraõ: —Mipũ pinihtare waha, musa wahiquinare wajã, jũ wa muo, musa Cohamacure ño payona wahaga. Wiho mejeta ahri yahpaihta ã yoaga —niha.

²⁶ To ã nichũ tuhoro, õ sehe ni yuhtiha Moise:

—Ahri yahpaihta sã ño payochũ, noasi. Yawe, sã Cohamacure ño payona tana, sã wajãsoina baro sehe cua pisaro waro musa ñũina jira. Wahiquina cua pisaro musa ñũinare wajã, jũ wa muo, sã Cohamacure sã ño payochũ ñua, mu masa sehe sãre tãa poca mehne doca wajãnocaahca. ²⁷ Æ jina yoropũ tia dacho waha suropũ wuuri ñujuro, yucuri marieni ñujoropũ Yawe sã Cohamacure ño payona wahanajtja sã. Sãre to yoa dutiro seheta wahiquinare wajã, jũ wa muo, tirore ño payona wahanajtja —ni yuhtiha Moise.

²⁸ To ã nichũ tuhoro, faraõ sehe õ sehe ni yuhtiha:

—Jai. Noanohca. Musa waha duachũ, musare wa wioihtja, Yawe, musa Cohamacure wuuri ñujoropũ musa ño payona wahahto sehe. Wiho mejeta yoropũ wahaena tjiga. Æ yoa musa wijaahito pano cjero, musa Cohamacure sinibasaga yuhũre, ahriina nunana perire butichũ to yoabasahto sehe —niha.

²⁹ To ã nichũ tuhoro, õ sehe niha Moise:

—Mu ya wuhũ jiri wija suita, sini payobasaihjtja muhũre. Tuhsũ, mu doca macaina puhtoare, ã jichũ mu masa cũhũre sini payobasaihjtja. Yũ ã sini payobasachũ, ñamichacata nunana peri buti pihtia wahaahca. Wiho mejeta muhũ sehe sãre mahño namoi tjiga. Sã Cohamacũ Yawere ño payona wahaboinare dũcata namoi tjiga —niha.

³⁰ Æ yoa Moise faraõ to ñujiroi jiri wija surota, Yawere siniha. ³¹ To ã sinichũ, to sinino seheta yoaha Yawe. Æ jiro faraõre, to doca macaina puhtoare, ã jichũ to masa cũhũre nunana perire buti pihtia wahachũ yoabasaha. Buti pihtia wahachũ to yoabasari baharo, ne cũiro nunanairo mariaha juna. ³² Æ mariachũ ñũparota, faraõ sehe munanota yuhũdũrucariro ji, ne israe masare wa wio duaeraha tjoa.

Egipto masa ti nuina wahiquinare yariachũ yoaha Yawe

9 ¹ Æ yoa Moiserẽ faraõ to yuhũdũrucachũ ñũno, Yawe sehe tiro Moiserẽ õ sehe niha tjoa:

—Yuhure faraõre õ sehe ni yahubasai wahaga: “Yũ masa curuare wa wiojaro, yuhure ti ño payoa wahahto sehe. ²⁻³To wa wio duaera, yuhure munanota to yudurucarucuchũ ñui, yuhũ sehe egipto masa ti nuinare ñano puria duti mehne yariachũ yoihtja. Ñ yoi, ti cawaloare, ti burroare, ti camelloare, ti wachuare, ti ovejaare, ti cabraare, tina jipihtinare payũ yariachũ yoihtja. ⁴Wiho mejeta israe masa ti nuina wahiquina sehere ne cüiro soro wahachũ yoasi. Ñ jia ti nuina sehe tí dohatia mehne yariasi. ⁵Yũ masa curuare to wa wioerachũna, ñamichacata ñ waharohca tirore’ ni, yahu-rochahre Yawe, sã hebreo masa Cohamacũ mũhure” ni, yuhure yahubasai wahaga faraõre —niha Yawe Moiserere.

⁶Ñ yoa to wa wioerachũ ñũno, Yawe sehe pa numũ bohrearoi to niriro seheta yoaha juna. Egipto yahpa macaina ti nuina wahiquinare payũ yariachũ yoaha. Ñ yariachũ yoaparota, israe masa ti nuina wahiquina sehere ne cüiro yariachũ yoeraha.

⁷Ñ yoa tiro faraõ sehe to ya yahpa macaina ti nuina wahiquina payũ yariachũ ñũno, to masare israe masa ti nuinare ñũ dutiro warocaha, “¿Potocã ti nuina yariaerajari?” nino. Baharo tina ñua surina sehe õ sehe ni yahu tju suha:

—Cohamacũ potocã nino niri jire. Israe masa nuina wahiquina sehe ne cüiro yariaerari jihre —ni yahu tju suha tina.

Ti ñ ni yahu tju sachũ tuhparota, tuaro yuhdurucariro jisiniha faraõ. Ñ jiro israe masare wa wio duaeraha tjoa.

Yawe egipto masare musuripoca mehne buhiri dahreha tjoa

⁸Ñ yoa faraõ to wa wio duaerachũ ñũno, Yawe sehe Moise cühure õ sehe niha tjoa:

—Dihta cjoarire ti jüri picha nujare musape orẽ na, faraõ cahapũ wahaga. To cahapũ su, Moise, mũhũ sehe faraõ to ñurocaroi tí nujare doca site mũoga. ⁹Mũ doca site mũochũta, tí nuja cjiri me yoaro sehe tí yahpare paró ji sahserucũ sua waharohca. Tí me ji siterucũ suro puro masare, ñ jichũ wahiquinare musuripoca wija, tí poca tuhũũ site, ñano camĩ baaina wahachũ yoihtja —ni yahuha Yawe Moise cühure.

¹⁰To ñ ni yahuri baharo, Moise cühũ sehe picha nujare orẽ naha. Orẽ na, faraõ cahapũ wahaha. To cahapũ su, to ñurocaroi tí nujare doca site mũoha Moise. To ñ yoi baharo, masare ñ jichũ wahiquinare musuripoca peri wijaha. Tí poca peri tuhũũ site, tinare ñano camĩ baaina wahachũ yoaha.

¹¹Moise cühũ ti ñ yoachũ, Egipto macaina yaya sehe yoa ñoa taeraha. Tina cühũ musuripoca dohatia niha. Ñ jia yoa ñoa taeraha juna. ¹²Ti ñ wahapachũta, Yawe sehe munanota faraõre yuhdurucariro jisinchũ yoaha. Ñ jiro Moise cühũ faraõre ti sinichũ, tiro sehe tinare yuhti duaeraha. Yawe to niyuriro seheta ñ waharo niha.

Coro taro watoi co butiapoca chorire bora tachũ yoaha Yawe

¹³Ñ yoa faraõ to yuhti duaerachũ ñũno, Yawe sehe Moiserere õ sehe niha tjoa:

—Ñamichaca bohrea caharocã faraõ cahapũ waha, yuhure õ sehe ni yahubasai wahaga tirore: “Yuhure ti ño payoa wahahto sehe faraõ yũ ya curuare

ahri yahpai jiri curuare wa wiojaro' ni, yahurocahre Yawe, sā hebreo masa Cohamacu muhure" ni, yuhure yahubasai wahaga faraöre. ¹⁴ Ñ ni yahu tuhsu, ñ sehe ni yuhure yahubasa namoga: "To wa wio duaerachu ñui, yuhu sehe tó pano yu buhiri dahreriro cjiro bui tirore buhiri dahreihitja. Tuhsu, to doca macaina puhtoare ñ jichu to masa jipihtinare ñano yuhdachu yoa, buhiri dahreihitja. Yu ñ buhiri dahrechu ñua, tina sehe, 'Ne paio mariahca ahri dacho jipihtiri dachopure to yoaró sehe jiro' ni, yuhure masiahca juna. ¹⁵ Ñ yoa yuhu sehe faraöre ñ jichu to masa cühure dóihta wajā duariro baró jicu, ñaa dohatia bajuachu yoa, tinare wajā tuhsuboa. ¹⁶ Wiho mejeta yuhuta jia tirore 'Catisinijaro' ni cūriro. Ñ cūcu, 'Yu tuua tiare noano masijaro' nicu, tirore wajāerasinija yuhu. Tuhsu, 'Tirore yu ñ yoa mehne ahri dacho jipihitiri dacho macaina cūhu yu jia tiare noano masijaro' nicu, wajāerasinija yuhu tirore" ni, yuhure yahubasa namoga faraöre. ¹⁷ Wiho mejeta tiro sehe, "Yuhu cūhu tuarirota jia" ni, tuhotumana. Ñ ni tuhoturo, yu ya curuare wa wio duaerara tiro. ¹⁸ Ñ jicu muhu sehe yuhure ñ sehe ni yahubasa namoga tirore: "Ñamichacare, ahri pja baroihta co butiapoca chorire coro mehne payu bora tachu yoihtja. Yu ñ yoachu, tiro sehe co ñ ñaca waro ñano wahachu ñno ninohca. Tó panopure ne di pja tó sehe tuaro co butiapoca bora ñuerare Egipto yahpare. ¹⁹ Ñ jiro faraõ sehe to masare jipihtina ti nuinare ti wahi-quina wuhusepu wihbo dutisinijaro. Tuhsu, tinare dahra cohtaina cūhure ti jia wuhusepu sāa dutisinijaro. Yuhu sehe co butiapoca chorire coro mehne tuaro bora tachu yoi tai nija tinare. Yu ñ yoachu, dohse jiina ti nuina wahi-quina ñ jichu masa cūhu ti wuhusepu jieraina yaria pihitia wahaahca" ni, yuhure yahubasa namoga faraöre —niha Yawe Moiseré.

²⁰ Ñ yoa caina, faraõ doca macaina puhto, Yawe to niare potocā tuho, cuiha. Ñ jia tinare dahra cohtinare ño duaro mehne ti wuhusepu sāa dutiha. Ti nuina wahi-quina cūhure ti jia wuhusepu na sōha. ²¹ Yawe to niare potocā tuhoeraina sehe tinare dahra cohtinare ne yahueraha. Ti wahi-quina cūhure ti jia wuhusepu ne wihboeraha.

²² Ñ yoa Yawe sehe ñ sehe niha Moiseré:

—Muanoḡ mu tjuadure ñui puroca muoga. Mu ñ yoachuta, Egipto jipihtiri yahpapure co butiapoca chori coro mehne tuaro bora dija taahca. Ñ bora dija taa, tí poca sehe masapure, wahi-quinapure, ñ jichu Egipto jipihtiri yahpapu dua yucuripu cūhure bora pjaahca —ni yahuha.

²³ To ñ ni yahuri baharota, to tjuadure muanoḡ ñui puroca muoha Moise. To ñ yoachuta, Yawe sehe wupo, oroca sitero mehne tuaro coro tachu yoaha. Tí mehne Egipto yahpa jipihitipure co butiapoca chori cūhure payu borarucuchu yoaha. ²⁴ Pjiro coro ta, oroca site, wupo pjaro watoi, co butiapoca chori cūhu ne tjuarucu sūro marieno borarucuha. Tó panopure ne cū taha ñ ñaca waro ñano waha ñuera tiha tí yahpare. ²⁵ Ñ yoa tí poca sehe Egipto yahpa jipihitipure ducataro marienoi jiina, masare ñ jichu wahi-quina cūhure payure bora pjaa, wajāha. Ñ yoa ti toaa cūhure payure bora pjaa, nuhnu pihitia wahachu yoaha. Tuhsu, yucuri waro cūhure bora pja, dūpurire noano nuhnu site bora pihitia wahachu yoaha. ²⁶ Ñ ñano wahapachuta, Gosē wama tiri si, israe masa ti jiri si sehere ne tí poca baró boraeraha.

²⁷ To ya yahpare ñ ñano wahachu ñno, faraõ sehe Moise cūhure pji dutiro-caha. Pji dutiroca, ti wihichu ñno, tinare ñ sehe niha faraõ:

—Mipure Yawe mehne buhiri tiro jija yuhu. Tuhsu, yu masa cūhu tiro mehne buhiri tiinata jira. Säre tirore yuhdurucainare tiro buhiri dahrero, quihōno buhiri dahrero nina. ²⁸Sā ā buhiri tiina jipachuta, säre mu sini payochu cahmaja yuhu. Tó purota wupore, ā jichu co butiapoca chori cūhure säre bora ta duhuchu yoabasajaro mu puhtoro. Ā yoa yuhu cūhu to dutiro seheta musare wioihtja juna. Musare ducata namosi —niha faraō tinare.

²⁹To ā nichu tuhorō, ō sehe ni yuhtiha Moise:

—Jai. Ahri maca duhtu cahai suita, yu wamomacarine muanopu naroca muo, Yawere sinihtja. Yu tirore sinichuta, wupo pjaa duhu mua waharohca. Ā yoa co butiapoca chori cūhu bora duhua wahaahca. Ā waharo mehne Yawe sehe mūhure ñono ninohca. “Ahri dacho, yu jiri dacho, potocāta Yawe ya dachota jiri jira” ni, mu masihtore ñono ninohca tiro mūhure. ³⁰Wiho mejeta yuhu sehe masija. Mūhu sehe sā Cohamacu Yawere cuieraputiasinina. Ā jichu mu doca macaina puhtoa cūhu tirore cuieraputiasinina. Ā cuierana, to dutiro sehe yoerara musa —ni yuhtiha Moise faraōre.

³¹Ā yoa co butiapoca chori ti borari pjare ti toaa sari, yuta dari ti yoaa, lino wama tia sari sehe cohoa waro jimaha. Tí sari noano muta pihitia wahaha. Tuhsu, cebada sari cūhu wahma dica pohnari wijaa waro jimaha. Tí sari cūhu noano muta pihitia wahaha. ³²Wiho mejeta trigo sehe ne duerasiniha. Ā jia tí ne soro wahaeraha.

³³Baharo Moise sehe faraō ya wuhupu tiro mehne durucuro suriro cjiro wijaa wahaha. Wijaa, tí maca faraō to jiri maca duhtu cahai surota, to wamomacarine muanopu naroca muo, Yawere siniha. To sinichuta, wacūenoca co butiapoca tuaro borarucumariro cjiro bora duhu mua wahaha. Tuhsu, corō, wupo mehne tamaro cūhu ta duhu mua wahaha. ³⁴Wiho mejeta faraō ā jichu jipihtina to doca macaina puhtoa cūhu tí jipihtia ta duhu mua wahachu űupahta, mūnanota yuhdurucaina jisiniha. ³⁵Tó panopu Yawe Moisere “Faraōre yuhdurucararo jichu yoihtja” to niyuriro cjiro seheta ā waharo niha. Ā jiro faraō ne israe masare wa wio duaeraha tjoa.

Egipto yahpa macaina ti toaare chu pahñochu yoaro taro, poreroa peri tachu yoaha Yawe

10 ¹Ā yoa israe masare faraō to wa wio duaerachu űuno, Yawe sehe Moisere ō sehe niha tjoa:

—Faraō mehne durucu űui wahaga tjoa. Ā wai, “Wiho warota waihaica yuhu” ni, tuhotui tjiga muhu. Tó panore yu mūhure niriro seheta, yuhuta jija faraōre, ā jichu to doca macaina puhtoa cūhure ā yuhdurucaina jichu yoaroro. Yu ā yoaa mehne yuhu sehe űu cuachu yoaa baro chorire tinare yoa űo, yu tua yuhdurucu suriro yu jia tia cūhure tinare űo mujai nija. ²Tíre musa cūhu űuna, yu egipto masare doca dahre, payu űu cuachu yoaa baro mehne tinare yu buhiri dahre mujachu. Yu ā yoaa mehne potocāta Yawe yu jia tiare musare masichu yoi nija yuhu. Tíre masina, musa sehe musa pohnapure, musa panamanapu cūhure jipihtia yu ā yoirire yahu turianahca. Ā jicu cariputiro marieno faraō mehne durucu űui wahaga tjoa —niha Yawe Moisere.

³To ā ni yahuri baharo, Moise cūhu sehe faraō cahapu wahaha tjoa. Waha, to cahapu sua, tirore ō sehe niha:

—Yawe sã hebreo masa Cohamacu õ sehe nirocahre mûhure: “¿Noho puro yoari pja tiro yûhure yûhdurucurucurohcari? Dói waro ‘Yûhu sehe wiho jiro jija. Yaweta jiri jira tua yûhdurucu suriro waro’ yûhure to nichu, no-nohca” nirocahre Yawe mûhure. ã yoa õ sehe ni namorocahre mûhure: “Yû masare wa wiojaro, yûhure ti ño payoa wahahto sehe” ni, sãre yahu duti-rocahre Yawe mûhure. ⁴Sãre mu wa wioerachu, ñamichacata ahri yahpa, mu ya yahpare poreroa perire tachu yoa, buhiri dahrehto jiyuhti mûhure. ⁵Tina poreroa peri ahri yahpare payu ji sahserucu su, dihtarore ne bajue-rachu yohti jiyuhti. ã yoa musa toaa, co butiapoca chori ti bora pja nuha dâharicã cjiri cûhure noano chu pahñonocahti jiyuhti tina. Tuhsu, yucuri waro dâhsaa yucuri pûricã cûhure noano chu pahñonocahti jiyuhti. ⁶Mu ya wuhusepu cûhure sãahti jiyuhti. Mu doca macaina puhtoã ã yoa mu masa ya wuhusepu cûhure paró ji biharucu sua wahahti jiyuhti. “Ti ñuchusuma cjiri, ã jichu ti pucusuma tó sehe ñano wahachu ti ñueraa cjirire tina sehe ñuahca” ni, yahurocahre Yawe mûhure —niha Moise faraõre.

ã ni tuhsu, faraõ cahapu jiro majarerucu su, wijaa wahaha Moise. ⁷Moise to wijaari baharo, faraõ doca macaina puhtoã sehe õ sehe niha tiro faraõre:

—Puhtoro, siro Moise ñariro marine buhiri dahre namoen tjjaro. Mûhu cûhu tirore yuhti curega. Cjero israe masare mua sahserore wa wioga, ti Cohamacu Yawere ti ño payoa wahahto sehe. ¿Mari ya yahpa to ñano waro wahachu, ñuerajari mûhu? —niha tina ti puhtore.

⁸Ti ã nichu tuhoru, faraõ sehe Moiseru, ã jichu Aarõre ño duaro mehne pji dutiroca, õ sehe niha tinare:

—Yawe musa Cohamacure ño payona wahaga. Wiho mejeta masi duaja. ¿Nohopeina musa wahanahcari? —ni sinitu ñuha tinare.

⁹To ã ni sinitu ñuchu tuhoru, õ sehe ni yuhtiha Moise:

—Yawe, sã Cohamacure pjiri bose numu yoa payo, tirore ño payona wahana tana nija sã. ã jina sã jipihtina sã namosanumia mehne, sã pohna mehne, ã jichu bucuna quina jipihtina mehne wahanahca sã. Tuhsu, sã nuina ovejaa, sã cabraa, sã wachua jipihtina tina cûhure naanahca sã —ni yuhtiha Moise.

¹⁰Moise to ã nichu tuhoru, faraõ sehe õ sehe ni yuhtiha tirore:

—¿Mipu masija! ¡ã ni mahño, yûhure yûhdu witi wijaa duana niri jira musa! Musa mahñoare potocã tuho, musa namosanumiare, ã jichu musa pohna cûhure yu wa wiochu, Yawe musa Cohamacu sehe, “Faraõ bui tuariro jija yûhu” ni, tuhotuboca. Wiho mejeta tiro yûhure yûhduruca duaro bihosi. ¹¹ã jicu yûhu sehe, jipihtina mehne musa waha duachu, wa wiosi musare. ¡Ne, ã cahmaeraja! Potocãta musa Cohamacu Yawere ño payona waha duaina jina, musa mua sahsero tirore ño payona wahaga —niha.

ã ni tuhsurota, Moise cûhure tuaro mehne waroca wionocaha. ¹²Tinare tuaro mehne to waroca wiori baharo, Yawe sehe Moiseru õ sehe niha tjõa:

—Mu yachure Egipto yahpa bui ñui purocaga. Mu ã ñui purocachu, poreroa peri payu taahca. Ta, dohse jia pûri tiare, co butiapoca chori ti bora pja, ti wajã dâhaa yucuri pûricã cjirire chu pahñonocahca —ni yahuha Yawe Moiseru.

¹³To ã ni yahuchu tuhoru, to tjuadure Egipto yahpa bui ñui purocaha Moise. To ñui purocachu, Yawe sehe sũ mûja taro caha sehe wihno ti mu mûja

tachũ yoaha. To ã yoachũ, tí wihnono sehe cũ dacho, cũ ñami tí yahpare wã turucuha. Ñ yoa pa numu bohrearo sehere tí wihnono mehne poreroa peri payũ wihia juna. ¹⁴Wihi, tí yahpa mu suro puro wũ site sahserucu sua wahaha. Wũ site sahserucu su, duji caha suha juna. Tí dachore ti wihiro sehe ne cũ taha tópeina peri wihi ñuera tiha tó panopure. Ne pari turi tí yahpare tópeina peri bajua namosi. ¹⁵Ñ yoa tina peri duji caha su, yahpare ne bajaerachu yoaha. Ñ yoa jiphtia yahsaa pũri tiare, ñ yoa yucu dichare co butiapoca chori ti bora pja, wajã duharicã cjiri cũhure tina peri noano chu pahñonocaha. Ti ã chu pahñochũ, ne cũ pũcã yucu pũcã baro, tuhsu ne cũ da tja dacã baro tjuaeraha juna.

¹⁶Ñ wahachu ñuno, faraõ sehe ño duaro mehne Moisere ã jichũ Aarõre pji dutiroca, õ sehe niha tinare:

—Yawe musa Cohamacure ñ yoa musa cũhure yuhduruca, buhiri tija yuhũ.

¹⁷¿Yu buhiri tiare pari turi yuhure boerabocari musa? Tuhsu, ahrina poreroa peri cũhũ sãre ñano juca dapora. ¿Ti juca daporo mehne sã yariaborore to ducatahto cũhure Yawe musa Cohamacure yuhure sinibasaerabocari? —niha.

¹⁸To ã nichũ tuhoro, Moise sehe faraõ ya wũhũ jimariro wijaa, Yawere siniha. ¹⁹To sinichuta, Yawe sehe sũ muja taro sehe wã muja tamari wihnonore wã majarerucu suchũ yoa, sũ muja taro seheta pari turi tuaro mehne wã majare tjuaachu yoaha. Tí wihnono mehne poreroa perire na cahmachuroca, pjiri ma Sohãri mapũ tinare cohãha. To ã yoachũ, Egipto jiphtiri yahpare ne cũiro pore-roiro tjuaeraha juna. ²⁰Wiho mejeta Yawe sehe faraõre munanota yuhdurucariro jisinchũ yoaha. Ñ jiro tiro israe masare ne wa wio duaeraha tjao.

Egipto yahpare nahitiasoro bui tuaro nahitiachu yoaha Yawe

²¹Ñ yoa israe masare faraõ to wa wio duaerachu ñuno, Yawe sehe Moisere õ sehe niha tjao:

—Mu yachure muanopũ naroca muoga. Mu ã yoachuta, Egipto yahpa jiphtiropure tuaro nahitiano waharohca —niha.

²²To ã nichũ tuhoro, Moise sehe to yachure muanopũ naroca muoha. To naroca muochuta, Egipto yahpa jiphtiropure ñamine nahitiasoro bui tuaro nahitiano wahaha. Ñ waharo, tia dacho waro tuaro nahitiano jirucuha. ²³Ñ tuaro nahitiano jichũ, Egipto yahpa macaina sehe ti basi cahma ñũ bocaera tiha. Tuhsu, ne pa sehẽpũ tini macaa wahaera tiha. Wiho mejeta israe masa ti jiri si sehere noano buhriaro jinocaa tiha.

²⁴Faraõ sehe, ñ wahachu ñuno, Moisere, ñ jichũ Aarõre pari turi pji dutiroca, tinare õ sehe niha:

—Mipũ pinihtare musa masa curua mehne Yawe musa Cohamacure ño payona wahaga. Musa namosanumiare, musa pohna cũhure naaga. Musa nuina, ovejaa, cabraa, wachua pinihtare naaena tjiga —niha.

²⁵To ã nichũ tuhoro, õ sehe ni yũtiha Moise:

—Jierara. Sã nuina wahiquina cũhure sã mehne warocarõ cahmana muhure. Sã sehe Yawe sã Cohamacure ño payona tana, wahiquinare wajã, jũ wa muo, tireore ño payoa tija. ²⁶Ñ jina sã wahiquina jiphtinare naanahca sã. Tópu sã basi besenahca sã wahiquina sã wajã, jũ wa muo, Yawere sã ño payohtina cjihtire. Wiho mejeta tópu suerasinina, “¿Diina baro sehere wajã-nahcari mari?” ni, masierasiniya sã —ni yũtiha Moise faraõre.

²⁷To ā nichu tuhoru, faraō sehe ne ji coaeraha. Yawe tirore munanota yuhdurucariro jichu yoaro niha. Ā jiro faraō ne wa wio duaeraha israe masare. ²⁸Ā wa wio duaeraro, Moiseru ō sehe ni tuhtiha faraō:

—Ahri wuhu, ya wuhure wijaahga muhu. Noano yoaga. Ne pari turi ahri wuhu, yu ya wuhure sāa ta namoi tjiga. Pari turi yu cahapu tai, yariaa wahaihca muhu —ni tuhtiha faraō.

²⁹To ā ni tuhtichu tuhoru, Moise ō sehe ni yuhtiha:

—Jai. Mu nino seheta yoaihtja. Ne pari turi mu cahapu ta namosi —ni yuhtiha faraōre.

Moise egipto masa ti pohna ti muhtaina mua dihta ti variahtore yahu muhtaha

11 ¹Moise faraōre to ā ni yuhtiri baharocāta, Yawe sehe Moiseru ō sehe ni yahuha:

—Pari turi buhiri dahre batoai tai nija faraōre ā yoa to masa egipto masare. Yu ā buhiri dahreri baharo, faraō musare noano mehne “Wijaa duana, wijaa masina musa” nisi. Tiro tuaro mehne cohā wiorohca musare.

²Ā yoa muhu sehe israe masare ō sehe ni yahuga: “Mua, numia, Egipto macainare, ti wuhuseri cahacāi jiina, ti nu masinare sinijaro noano wapa tia uru mehne ti yoaare. Ā jichu, comaa plata mehne ti yoa cūhure sinijaro tinare” —ni, yahu dutiha Yawe Moiseru.

³Ā jiro tiro Yawe egipto masare noano waro ji coachu yoaha, israe masare. Faraō doca macaina puhtoā, ā jichu ti masa cūhu Moiseru, “Pjiri waro jira ahriro” ni, tuhotuha.

⁴Ā yoa Moise sehe faraōre ō sehe ni yahu batoaha:

—Yawe yuhure ō sehe ni yahu dutihre muhure: Nami dacho macai ahri yahpa, Egipto yahpai jipihtiropu wahahto jiyuhti tiro. ⁵To wahachu, wuhuseripe macaina masa bajua muhtaina mua dihta, variahti jiyuhti. Mu macu, masa wahmino, muhure puhtoro ji cohtotaboriro cūhu variahti jiyuhti. Tuhsu, paina puhtoā pohna, ti pohna ti muhtaina cūhu variahti jiyuhti. Te wiho jiina pohna cūhu ne cūiro duhsaro marieno variahti jiyuhti. Wahiquina musa nuina ti pohna ti muhtaina cūhu, mua dihta variahti jiyuhti. ⁶Ā jia mu masa ahri yahpa jipihtiropu nāno cahyaro mehne tihti jiyuhti. Ne tō panopure tō puro wuru tiieraina cjiri, ā tiia nihto jiyuhti. Baharopure ne pari turi tō puro wuru tii namoerhti jiyuhti tina.

⁷Ā yoa mu masare ā nāno waharo wato, israe masa ti jiri sipu sehere, ne tō sehe nāno wahaerahto jiyuhti tinare. Ā jia tina ti nuina wahiquina mehne noano jinocahti jiyuhti. To ā yochu nu, tiro Yawe dohse cāa curuari macainare to yoaare masihtina jiyuhca musa. Ā ni, Yawe yuhure yahu dutihre muhure.

⁸Ā yoa to ā yochu nuapu, tina mu doca macaina puhtoā, yuhu cahai ta, na tuhcu caha sutjiāa, yuhure ō sehe niahca: “¡Wijaahga muhu! ¡Jipihitina muhu mehne macaina mehne wijaahga!” niahca juna. Yuhure ti ā nierasi-nichu, ne wijaasi —ni batoaha Moise faraōre.

Ni tuhsu, Moise faraō cahai jiri susinino mehne majarerucu su mu wijaa wahaha juna. ⁹Ā to wijaa baharo, Yawe sehe Moiseru ō sehe ni namoha:

—Yu muhure niriro seheta faraō ne tuho duasi musa niare. Ā jicu buhiri dahrei tai nija tjoa. Tí yu buhiri dahrea mehne tuariro yu ji yuhdurucu sua tiare noihtja Egipto yahpa macainare —niha juna.

¹⁰Tó panore, faraō ñurocaroi Yawe to buhiri dahre dutiape yoa ñomaha Moise, to wahmino Aarō mehne. Ti ā yoa ño mujapachuta, Yawe sehe tuho duaerachu yoa mujaha faraōre. Ā jiro faraō sehe to ya yahpai jiina, israe masare, “Wijaahga” ni duaeraha.

Yawe israe masare wajā dūhari ñami waharo taro niha

12 ¹Ā yoa Egipto yahpai tiro Yawe sehe Moise, Aarōre ō sehe ni yahuha: ²—Mipure ahri sū, wahma cūhmare musa quihō dūcahti sū jirohca cūhmaripe. ³Ā yoa jipihtina israe masare ō sehe niga: “Ahri sū, wahma sū diez dachori wahachu waro, ti wuhuserire suho jiinape mua, cūiro wahiquiro munore besejaro. Ovejare bese duaa, bese o cabrare bese duaa, besejaro. Diro ti ji coarirore, cūirota besejaro.

⁴Ā yoa cū wuhu macaina, mahainacā waro jichu, tiore wajāhto pano wacūyujaro. ‘Tirore chu bihoeraboca’ nino, tiro wuhu suho jiro sehe to wuhu cahma caharicā jiina mehne wahiquirore suho chujaro. Wahiquiro dihi mu su duaro puro quihō, masare pji cahmachu, tinare suho chujaro.

⁵Ā yoa tina wahiquina mua, cū cūhma cjuarina jijaro. Tuhsu, dohatia mae-raina dojori wahya jieraina cūhu jijaro. Tina wahiquina ovejaa muare bese dua bese, o cabraa muare bese dua, besejaro.

⁶Ā yoa tina wahiquina ti beserinare nu, ñu wihbosinijaro te ahri sū wahma sūre catorce dachori suchupu. Ā yoa jipihtina israe masa tí dachore, tina wahiquinare wajājaro, ñamichaha waro. ⁷Ā wajāa, ti di cūhure najaro. Na tuhsu, tina wahiquinare ti chua wuhuseripe, tí di mehne tí wuhuseri sāa sopacari duhtu caha macaa pjinipu wisōjaro. ⁸Nahi cahari baharo, tí ñami waroi, tina wahiquinare puhōtjiā chujaro. Tina ti wajārinare suēa pūri mehne chujaro. Ā yoa pāo bucuachu yoa mehne more mahnoeraa pāo saherore chujaro. ⁹Ā yoa diina ti bese, ti wajārinare, ti dapu poca, ti dahpori, ti ñahma sawari, ti ture werewe pahño, ti tu misi tuhsu, paye jipihtiro mehne tina wahiquinare jiina majaina, puhō chujaro. Ne cū dihiro, catiri dihirore chuea tjiaro. Tuhsu, dohatjiā ne waro chuea tjiaro tina. ¹⁰Ne cū dihiro baro pa namupure duhsaero tjiaro. Cū dihiro baro duhsachu wiho jū cohājaro. ¹¹Tina Egipto yahpai jimarina ti wijaahiti ñami saro taro nina. Ā jia ti chuhto pano, dahpo suhtire sāayujaro tina. Waha taa ti sāa suhti cūhure sāa, ti tjuayucu cūhure ti wamomacai cjuayujaro. Ā jia cjerocā chujaro. Ā yoa tí ñami sehe musa yuhure ño payohti ñami jiro nijaro. Yuhu Yawe musare yu wajā dūha wahcāhti ñami jiro ninohca.

¹²Ā yoa tí ñamine jipihtiro Egipto yahpapure yuhu wahaihtja. Yu ā wahacu, wajāihtja jipihtina egipto masa pohna, wahma masa bajua muhtainare. Wajāihca ti wahiquina ti pohna ti muhtaina cūhure. Ā yoacu, egipto masare, ‘Mari cohamana jipihtina wiho jiina jira tina. Yawe tinare yuhduruca pahñohre’ ni, masichu yoaihtja. Yuhu Yawe jija ā wahachu yoahitiro.

¹³Ā yoa mu coyea israe masa sehe, wahiquina ti wajāina di mehne ti wuhuseri sāa sopacari duhtu caha macaa pjinipu wisō, quihō cūjaro. Wiho mejeta yuhu ti pohna sehere ne cūirore wajāsi, yuhu egipto masa pohnare yu wajāno wato. Ti wuhuse sāa sopacari duhtu caha macaa pjinine di mehne ti wisōa wuhuserire ñui, poto tinare wajā dūha wahcāihtja.

¹⁴Ā yoa tina sehe tinare yu wajā dūhahti ñamine wacūjaro. ‘Yawe marine ahri dacho baroihta noaputiaro yoabasahre’ ni, wacūjaro tina tí dachore. Ā

ni wacûa, cûhmaripe tí dacho baroihta tina jipihtina cahmachu, bose numu yoa mujajaro. Tuhsu, tinare ji turiainapu cûhu boro marieno cûhmaripe bose numu ti yoa mujahiti dacho jijaro.” Æ ni, yûhure israe masare yahubasaga — ni yahuha Yawe Moise cûhure.

**“Bucuachu yoaare ti more mahnoeraa pãore ti chua
bose numurine õ sehe yoa, yûhure wacûrucujaro israe
masa” ni, yahu namoha Yawe Moise cûhure**

¹⁵ Æ yoa Moise cûhure õ sehe ni yahu namoha Yawe:

—Tí bose numure ti yûhdori baharore, cû somana waro bucuachu yoaare ti more mahnoeraa pão dihtare chujaro tina. Æ jia wahma ti chu ducari dachore pãore bucuachu yoaare ti wuhuseripu ti cjuaare na, pa sehepu wihbosinijaro mini. Yû Æ ni yahuri baharo jipachuta, diro tí somanare bucuachu yoaare ti morea pãore to chuchû, tirore cohã wionocajaro. Mu yahu turiiare to yûhdurucari buhiri, tiro ne pari turi israe masa curua mehne cûnoi ji namoeno tjijaro.

¹⁶ Æ yoa tí dacho bucuachu yoaare ti more mahnoeraa pão dihtare ti chu ducari dachore õ sehe yojaro tina. Jipihtina cahmachu, yûhure ño payojaro. Æ yoa ti chu batoari dacho cûhure âta yojaro. Æ yoa tí pua numure ne dahraea tjijaro tina. Chua pinihtare dahre, chujaro.

¹⁷ Æ yoa yûhu sehe tina israe masare, cû curua jiparota, doce curuari cahma, tju wa dapo, ji dijari curuare, cãa curuari ti cahnorucu sari baharo, tina Egipto yahpai jimarinare naroca wioi tai nija. Yû Æ yoi dacho cjirore wacûa, cûhmaripe cahmachu, bucuachu yoaare ti more mahnoeraa pãore ti chua bose numurine yûhdo mujajaro. Æ yoa tinare ji turiainapu cûhu boro marieno Æ ti yûhdo mujahiti dachori jijaro tí dachori. ¹⁸ Wahma cûhma sãari sûre catorce dachori waharoi sũ sãachu waro chu ducajaro bucuachu yoaare ti more mahnoeraa pãore. Pu veintiuno waharoi sũ sãachu waro chu batoajaro.

¹⁹⁻²⁰ Æ yoa yû niriro sehetã tí dachorire pãore bucuachu yoaare ti wuhuseripu jiare pa sehepu wihbosinijaro. Yû Æ ni yahuri baharo jipachuta, diro yûhduruca, tí numurine bucuachu yoaare ti morea pãore to chuchû, yû niriro sehetã tirore cohã wionocajaro. Israe masuno to jipachuta, tirore cohã wionocajaro. Paye masuno to jichu cûhure, cohã wionocajaro tiro cûhure. Mu yahu turiiare to yûhdurucari buhiri ne pari turi israe masa curua mehne ji namoeno tjijaro tiro.

Æ yoa tina israe masa nohoi ti jiroi tí dachorire pãore chua, bucuachu yoaare ti more mahnoeraa pão dihtare chujaro. Ahrire yûhure tinare yahubasaga —ni yahu batoaha Yawe Moise cûhure.

**Bose numu cjihto wahma ti yoa ducahtore
yahu turiaha Moise israe masare**

²¹ Æ yoa to Æ ni yahuri baharo, tiro Moise sehe jipihtina bucûna, to doca macaina puhtoare pji cahmachu dutiha. Ti wihi pihtichû ñuno, õ sehe ni yahu turiaha tiro tinare:

—Yawe yûhure õ sehe ni yahu turia dutihre musare. Tiro musa ya curua macainare to wajã duha wahcãhti ñami saro taro niyuhti. Æ jina cãa

wuhuseri macaina suho ji muhtaina sehe, tí ñamine ti suho chuhtiro cjihtore cüiro wahiquirore besehtina jiyuhti. Ovejare o cabrare bese duana, besehtina jiyuhti. Bese tuhsu, tinare wajähtina jiyuhti musa. ²² Æ wajäna, musa cäa wuhuserire suho jiinape tina wahiquina dire wapari, bujua wapari mehne nahtina jiyuhti. Na tuhsu, isopocu dupuri mehne pja bocari yoa, tí bocari mehne tí dipure soha, wuhuseri, musa jia wuhuseri säa sopacari duhtu caha macaa pjänpä wisöhtina jiyuhti. Tuhsu, ne cüiro wuhu puhichapü jiriore bohreahto pano sopacapü wijaa dutierahtina jiyuhti. ²³ Musa ä yoachu, Yawe sehe egipto masa pohnare to wajäno wato, musa pohna sehere wajäe-rahto jiyuhti. Musa jia wuhuseri säa sopacari duhtu caha macaa pjänine di wahächu ñuno, poto wajä duha wahcä wahahto jiyuhti tiro. Ä yoaro to wajä duti warocariro anjore musa wuhuseripü säa dutierahto jiyuhti tiro.

²⁴ Ä yoa musa sehe ahri musare to ä yoa dutirire cuhmaripe ä wacürucu, ä bese numu yuhdorucuhtina jiyuhti musa. Ä jichu musare ji nunu tihtinapü cühu tíre ä wacürucu, ä bese numu yoarucuhti jiyuhca tina cühu. ²⁵ Yawe musare “Waihtja” to niri yahpare to niriro cjiro seheta musare to wa, sohtori tichu, musa cühu tí yahpapure jina, cuhmaripe ahrire ä wacürucu, yuhdorucuhtina jiyuhti. ²⁶ Ä yoa musa pohna sehe musare: “¿Dohse jiro baro mari ö sehe ä yoa mujajari?” ti ni sinitu ñuchu, ²⁷ musa sehe tinare ö sehe ni yuhtihtina jiyuhti: “Mari ö sehe bese numu yoa, ahрина ovejaare wajä, puhö chu mujana, Yawe mari ñuchusuma cjirire to yoirire wacüna, Yawere ä ño payo mujana nija. Panopure mari ñuchusuma cjiri Egipto yahpapü cahamaca jimarina cjiri yuhdu witi wijaa tiri jire. Tí yahpapü ti yuhdu witi wijaari ñamine Yawe sehe egipto masa pohnare wajäa tiri jire. Ä wajäno, mari ya curua macaina ya wuhuseri sehere poto yuhdu wahcäa tiri jire. Ä yuhdu wahcäno, mari coyea pohna sehere wiho wajä duha wahcäa tiri jire tiro” ni, yuhtihtina jiyuhca musa, musa pohnare —ni, jipihtina bucuna to doca macaina puh-toare yahu turiaha Moise.

To ä ni yahu turiachu tuhoa, tina sehe jipihtina na tuhcuca caha su, Yawere ño payoha. ²⁸ Ño payo tuhsu, Yawe Moiseri, Aaröre to niriro seheta yoaha tina.

Yawe egipto masa pohna, masa wahmisuma muare wajäha

²⁹ Ä yoa to quihöri dacho mu suchu, Yawe sehe ñami dacho maca waroi egipto masa pohna, masa wahmisumare wajäha. Wuhusepere masa bajua muhtaina mua dihtare wajä wahcäa tiro. Egipto masa bui puhtoro choro faraö macuno, masa wahmino, to pucurore puhtoro ji cohtotaboriro cühure wajäha. Ä jichu paina puhtoa pohna cühure wajäha. Pü faraö to masa curua macaina wiho jiina ti pohna ti muhtaina mua cühure, ne cüiro masa wahmino duhsaro marieno jipihtina wajäha. Ä yoa ti wahiquina ti pohna ti muhtaina mua cühure wajäha. ³⁰ To wajächu ñua, tiro faraö, to doca macaina puhtoa, ä yoa jipihtina egipto masa tí ñamine wahcä pihitia wahaha. Ne cü wuhure cüiro yariaerarior mariaha. Ä jia jipihitiro Egipto yahpapure tuaro cahyaa mehne tiilha.

³¹ Ä yoa tiro faraö sehe tí ñamihta Moiseri, ä jichu Aaröre pji dutirocaha. To cahai ti wihiri baharo, ö sehe niha tinare:

—Musa, ä jichu musa masa cühu yu ya yahpare wijaa dojoa wahaga. Yawe musa Cohamacure, ño payona wahaga musa yuhure siniriro cjiro seheta.

³² Tuhsu, musa nimano cjiro sehetu, musa ovejaa, cabraa, ã jichu wachua, jipihtina tina musa nuina, tjare chuina baro cühure naaga. Æ yoa yuhu cühure Yawe to noano wahachu yoahore sini payona wahaga —niha faraõ tinare.

³³ Æ yoa tina egipto masa sehe ti ya yahpare cjero mehne wioha israe masa sehere. “Ti wijaaerachu, jipihtinapu yarianahca mari” ni, wacüha tina egipto masa.

³⁴ Æ yoa ti ã cjero wiochu ñua, israe masa sehe juna pã puhti bucuachu yoaa mehne ti more mahnoeraare, waparipu na sãa, ti suhti mehne coma, ti comapariacari buipu na payo, naa wahcãha. ³⁵ Æ wahaa, tinare Moise to yoa dutiriro cjiro sehetu egipto masare paye baro siniha. Uru mehne ti yoaa, comaa plata mehne ti yoaa, ã jichu suhti cühure siniha egipto masare. ³⁶ Æ yoa Yawe sehe tina ti siniina sehere cahño marieno ti siniapere noano mehne wachu yoaha. Æ sinia, egipto masa ya wapa tiare mano yoaro sehe yoa, pjacuro yoaha tinare.

Israe masa Egipto yahpai jimarina cjiri wijaa dojoa wahaha

³⁷ Tó sehe yoa, tina israe masa Ramesé wama tiri macai jirina wijaa, Sucote wama tiropu wahaa niha. Payu masa jiha tina. Numia, macanacã quihöerapachuta, tina mua, veinte cühmari bui cjuaina sahsero sehe seisciento mil wahtaroi jiha. Tina surara jiboinapu jia niha. ³⁸ Payu paye masa curuari macaina cühu israe masa mehne wijaaha. Wahiquina nuina, tjare chuina baro, ovejaa, cabraa, ã yoa wachua cühu tina mehne wijaaha. ³⁹ Æ wahaa, tina dahre chu duama, soha. Egipto masa tinare ño duaro mehne ti cohã wiochu, tinare ti dahre chuboro waeraha. Tuhsu, ti naari pã puhtire bucuachu yoaa mehne ti moreboro cühu waeraha. Æ jia tina wiho pjaa curiri dahre, chu bahrañoa tiha.

⁴⁰ Æ yoa tina israe masa cuatrociento y treinta cühmari waro Egipto yahpai jia tiha. ⁴¹ Tópe cühmari quihõno suchu waro, Egipto yahpare wijaa wahaha tina. Yawe ya masa curua, cü curua jiparota, doce curuari cahma, tju wa dapo, ji dijari curua, cãa curuari ti cahnoracu suri baharo, wijaa wahaha juna.

⁴² Tí ñamine, Egipto yahpare ti wijaari ñamine, Yawe tinare noano cahño mehne ñaare ducatabasaha. Æ jiro tí ñami sehe cühmaripe tirore ño payoa taa, ti ã wacürucu, ti ã bose numu yuhdorucuhti ñami tjuaha tinare, ã jichu tinare ji nana tihtina cühure.

“Musare yu wajã duhari ñami cjirore yuhdona tana, õpe wacü namoga musa” ni, yahu cüha Yawe

⁴³ Æ yoa tiro Yawe Moiseru, ã jichu to wahmino Aarõre, õ sehe ni yahu cü namoha:

—Musare yu wajã duhari ñami cjirore yuhdona tana, õpe wacü namoga musa. Ne cüiro musa ya masa curua macariro jierariro tiro oveja, musa puhõrrore chu masieraca. ⁴⁴ Æ jipachuta, musa cahamacuno, niñeru mehne musa nuchuriro sehe, to pjacu macari cahsarocãre ti yihso nari baharo, oveja musa puhõrrore chu masica tiro. ⁴⁵ Æ yoa ne cüiro pa yahpa macariro, musa cahai ã tinini masuno cühu musa puhõrore oveja chu masieraca. Tuhsu, ne cüiro

pa yahpa macariro masa cahai dahra, wapata jiroro cūhu oveja o cabra masa puhōrirore chu masieraca.

⁴⁶“Ā yoa masa sehe tiro masa puhōrirore masa ya wuhusepu chunahca. Masa churiro dihirore wuhu sopacapu na wijaa masieraca. Ā yoa to cohāri cūhure ne nuhaena tjiga masa. ⁴⁷Ahri namine musare yu wajā duhari namine yuhdonahca masa, israe masa jipihtina, ne cūiro duhsaro marieno.

⁴⁸“Ā yoa pa tehe cūiro pa yahpa macariro masa mehne tí namine yuhure ño payo dua, musare yu wajā duhari namine to yuhdo duachu, ō sehe yoaga tirore. Tirore, to pohna muare, ā jichu tiro mehne jiina mua jipihtina cūhure ti pjacuri macaa cahsaricāre yihso naga. Yihso nari baharo, tina masa mehne tí namine yuhdo masina. Ā yoa masa mehne cū curua macariro yoaro sehe jirohca tiro juna. Wiho mejeta ne cūiro dohse jiroro muno to pjacu macari cahsarocāre yihso naerariro jiro, ne chu masieraca. ⁴⁹Ā jina masa israe masa, tuhsu, israe masa jieraina cūhu, tí bose numure yuhdohtina ahri jipihtiare yu wacū dutiare wacū, yoa masina. Ā jiro ō sehe yu yoa duti cūno jipihtinare yu duti cūno jiro nina —ni yahu cū batoaha.

⁵⁰Tina israe masa tíre Yawe Moiserere, Aarō cūhure ti wacū duti, to cūiro sehetā tina quihōno yoa pahño dapoha. ⁵¹Ā yoa tí dachoihta, israe masa curua, cāa curuari tju warucu su, ti cahnorucu suri baharo, Yawe sehe tina Egipto yahpai jimarinare naroca wioha.

Jipihtina israe masare coā ti pohna ti muhtaina muacāre, ā jichu ti nuina coā ti pohna ti muhtaina muacā cūhure soro cū dutiha Yawe

13 ¹Ā yoa Yawe sehe Moiserere ō sehe ni yahuha tjoa:

²—“Jipihtina israe masa coā ti pohna ti muhtaina muacāre soro yuhure cūbasajaro. Ā jichu ti nuina wahiquina coā ti pohna ti muhtaina muacā cūhure soro yuhure cūbasajaro. Tina ti soro cūina yu yaina cjihti jiahca” ni, yahubasaga yuhure —niha Yawe Moiserere.

“Bucuachu yoaare more mahnoeraa pāore masa chua bose numurine yuhdona, ō sehe yoa, wacūrucuhtina jiyuhca masa” ni, yahu turiaha Moise israe masare

³⁻⁴Ā yoa Moise ō sehe ni yahu turiaha to masare:

—Ahri sūre, wahma cūhmare mari quihō ducari sūre, abibe wama tiri sūre catorce dachori waharoi wijaara masa Egipto yahpare. Egipto masa ti ñano dutipe, ti cjuamarinare to tuaa mehne michare musare Yawe na wiora. Ā jina cūhmaripe ahri dacho, masa wijaari dacho cjirore wacūhtina jiyuhca masa. Ahri dacho cjirore wacūna, ō sehe yoahtina jiyuhca masa. Bucuachu yoaare ti moreri pāore chuerahhtina jiyuhca masa. Tí more mahnoeraa pāo dihtare chuhtina jiyuhca masa.

⁵“Ā yoa mari ñuchusuma cjiri Canaā yahpapu ti jia tiri pjapure Yawe sehe to basi tina cjirire cua pisaro mehne ō sehe nia tiyuhca: “Ahri yahpa, cananeo masa, hitita masa, amorreo masa, heveo masa, jebuseo masa cūhu ti jiri yahpare masa panamana musare ji turiaiapure waihtja” nia tiyuhca tiro tina cjirire. To ā niri yahpa cjiro sehe noari yahpa, jipihtia chua jiri yahpa jiyuhca. Tí yahpapu Yawe musare to na sāachu, ahri yahpa Egipto yahpare masa wijaari dacho cjirore wacūhtina jiyuhca masa. Tí dacho cjirore wacūna,

cuhmaripe wahma cuhma sãari sũhi bõse numuri yoa mujahtina jiyuhca. ⁶⁻⁷Tí bõse numurine yuhdona, õ sehe yoahntina jiyuhca musa. Cũ somana waro bucuachu yoaare ti more mahnoeraa pão dihtare chuhtina jiyuhca. Tí somanare musa jihti yahpa jipihtiri yahpapurẽ pãore bucuachu yoa ne mariahto jiyuhca. Tuhsu, pãore bucuachu yoaare ti morea pão cũhu mariahto jiyuhca. Á yoa bato tiri dachore pjiri bõse numu yoa, tiro Yawere ño payo mujahtina jiyuhca musa.

⁸“Tí dachõrre yuhdona, musa pohñare õ sehe ni yahuhtina jiyuhca musa: “Ahri bõse numurine yuhdona, Yawe mari masa curuare Egipto yahpapu jimarinare to na wiorire wacũna nija mari” ni, yahuhtina jiyuhca musa tinare. ⁹To na wiorire wacũ, bõse numuri yuhdona, musa yachuripu ã yoa musa wuhdua waparipu musa wacũhtire duhte õ, musa wacũboro sehta yoahntina jiyuhca musa. Á yuhdona, Yawe musare Egipto yahpai jiinare to tuua mehne na wiorire musa basi suhdu, tĩre wacũ mujahtina jiyuhca musa. ¹⁰Á jina cuhmaripe musa wijaari dacho cjiro suchu, bõse numuri yuhdo mujahtina jiyuhca musa. Tí jiyuhca Yawe musare to naroca wiori dacho cjirore wacũna, musa yoahnti cjihti —ni yahu turiaha Moise to masare.

Israe masa coã ti pohña ti muhtaina muacãre Yawere ño payoro mehne ti wahtore, ti nuina coã ti pohña ti muhtaina muacã cũhure ño payoro mehne ti wahto cũhure yahu turiaha Moise israe masare

¹¹Á yoa Moise israe masare õ sehe ni yahu turia namoha tjõa:

—Tiro Yawe mari ñuchusuma cjiire ã yoa musa cũhure cua pisaro mehne to yahuriro cjiro sehta mipure yoa, sohtori tiro taro niyuhca. Á jiro to niriro cjiro sehta musare õi jiinare na wio, cananeo masa ti jiri yahpapu na su, tí yahpare musare wa, sohtori tihto jiyuhca. ¹²Á yoa musa sehe tí yahpapu jina, õ sehe yoahntina jiyuhca. Musa pohña ti muhtaina muacã ti jichu, tinacãre Yawere wahtina jiyuhca musa. Á yoa musa nuina wahiquina coã ti pohña ti muhtaina muacã ti jichu, tinacã cũhure tirore wahtina jiyuhca musa. Tinacã musa wahtinacã to yaina cjihti jihti jiyuhca. Tinacãre wana cũhu, Yawe musare Egiptopu jimarinare to na wiori dacho cjirore wacũno mehne ã yoahntina jiyuhca musa.

¹³Á yoa musa nuina wahiquina coã ti pohña ti muhtainacãre Yawere wana, õ sehe yoahntina jiyuhca musa. Tinacãre wajã, tiropure jũ wa muo, wahtina jiyuhca musa. Á yoa burroa numia ti coã pohña ti muhtainacã cũhu tirore musa wahtinata jiyuhca. Tinacãre Yawere wana tana, “Ahrirocã mu yairo cjihto jira Yawe” ni, tirocãre wiho wamua nuha wajã, Yawere wahtina jiyuhca musa, jũ wa muono marieno. Tinacãre wajã duaerana, ti cohtotaro ovejacã sehere wajã, jũ wa muo, Yawere wahtina jiyuhca musa.

Á yoa musa pohña, coã musa pohña ti muhtainacã cũhure Yawere wana tana, õ sehe yoahntina jiyuhca musa. Tinacã cũhu musa wajã, jũ wa muoboinata jiyumahca. Wiho mejeta musa sehe ti yariaborirore niñeru turi, wapa tia turi mehne wiho wapahtina jiyuhca. Tí jiyuhca paye Yawe musare to na wiori dacho cjirore wacũna, musa yoahnti cjihti.

¹⁴Á yoa baharopu musa pohña tihtina cjihti, musare, “¿Dohse yoana mari sehe ã yoa mujari?” ni, ti sinitu ñuchu, õ sehe ni yahuhtina jiyuhca musa tinare: “Panopure sãre Egipto yahpa macaina ti ñano dutipe cjuamarinare

Yawe to tuaa mehne na wioa tire säre. ¹⁵To säre na wiohto pano, faraõ sehe Cohamacure yuhdurucariro waro jia tire. ã jiro säre wa wio duaera tire. To wa wio duaerachu ñuno, Yawe sehe jipihtina egipto masa ti coã pohna ti muhtaina muare wajānoca tire. Ti nuina wahiquina ti pohna ti muhtaina mua cūhure wajānoca tire tiro. To ã yoari cjiire wacūna, mari sehe mari wahiquina ti pohna ti muhtaina muacāre wajā, jū wa muo, ño payoro mehne Yawere wa mujaja mari. ã yoa mari pohna, mari coã pohna ti muhtaina muacā cūhure tirore wa mujaja mari. Tina mari pohna ti muhtaina-cāre Yawere waro seheta yoana, õ sehe yoa mujaja mari. Tinacā cūhu mari wajā, jū wa muoboina ti jipachuta, ti yariaborirore niñeru turi, wapa tia turi mehne wiho wapa mujaja mari” ni, musa pohnapure yahuhtina jiyuhca musa.

¹⁶ ã yoa “Yawe marine to noano yoabasarire maripū bori” nina, musa yachuripū, musa wuhdua waparipū tīre duhte õ, musa cjuaboro seheta, musa pohna ti muhtaina muacāre, musa nuina ti pohna ti muhtaina muacā cūhure Yawere wa mujahtina jiyuhca musa. Tó sehe yoa mujana, õ sehe ni ã wacūru-cuhtina jiyuhca musa: “Yawe marine Egiptopū jiinare to tua yuhdurucu sua tia mehne na wioa tire” ni wacūno mehne tīre yoa mujahtina jiyuhca musa —ni yahu turiaha Moise israe masare.

**Yawe me curuapū, ã jichu picha pohnapū jitjiāhno,
israe masare suho mu tā wahcārucua tiha**

¹⁷ ã yoa Cohamacū sehe israe masare faraõ to wiori baharo, tinare Canaã yahpāpūre suho naano, filisteo masa ti jiri yahpai yuhdu wahcāri mahai poto naaera tiha. Tie sehe Canaã yahpāpūre suro, cahacā curero jimaha. Wiho mejeta Cohamacū sehe õ sehe ni tuhotuha: “Filisteo masa ti ya yahpai israe masare yu na yuhdu wahcāchu, ti basi cahma wajāa wahaahca tina. ã cahma wajāa, cuia, Egipto yahpāpū ti majare tjuaachū cahmaeraja yuhū” ni, tuhotuha. ¹⁸ ã ni tuhoturo, tinare wuuri dūjuro, yucuri marieri dūjuro macari mahapū suho naa tiha. Dia Sohāri Mapū wahari maha jia tiha tí maha.

ã yoa tina israe masa Egipto yahpare wijaa, jipihtia ti wamo mehne wijaa tiha.

¹⁹ ã yoa Moise sehe tí yahpare wijaa, José cjiro pjacu cohārire naa wahaa tiha. Tiro José cjiro sehe catisininopū cua pisaro mehne israe masare õ sehe ni yahu cū tuhsua tiha: “Cū nūmū Cohamacū musare ahri yahpai jiinare na wioro tarohca. To na wiochu, wahana, yu pjacu cohāri cjiiri cūhure naa wahaga” ni, yahu cū tuhsua tiha. To ã ni yahuchū tuhoa, israe masa sehe cua pisaro mehne, “Jai, mu nino seheta yoanahtja sã” ni, yuhtia tiha. Tí quitire masino, Moise sehe José cjiro pjacu cohāri cjiire naa wahaa tiha juna.

²⁰ ã yoa ti jiri maca cjiro Ramesépū wijaa, Sucote wama tiri macapure su, yuhdua wahaha. Wahaa, Etā wama tiropū su, ti ya wuhuseri cjihtire tuā dapo tuhsu, tói jisiniha tina. Wuuri dūjuro, yucuri marieri dūjuro duhtu cahapū jiha Etā sehe.

²¹ ã yoa dachorire Yawe me curua yoaro sehe bajuri pohnapū jitjiāhno, tinare suho mu tārucu wahcāa tiha. Tó sehe yoa, tiro tinare ti wahahtore ño mu tāno niha.

ã yoa ñamirine tjoa tiro pichaca pohna yoaro seheta bajuri pohnapū jitjiāhno, buhria mu tāa tiha tinare, ñamirine ti noano wahahto sehe. Tó seheta yoaha tiro tinare ã dachori, ñamini cūhure ti wahahto noano.

²² Dachorire me curua yoaro sehe bajuri pohnapu jitjiāhno, tinare suho mu tārucua tiha. Ā yoa ñamini sehere pichaca pohna yoaro sehe bajuri pohnapu jitjiāhno, tinare suho mu tārucua tiha.

Yawe israe masare Sohāri ma pa buhusehe cjoapu pahā suchu yoaha

14 ¹ Etā wama tiropu ti jisinchu Moiserē, “Ō sehe ni yahu quihōga mu masare ti waha, suhtore ti masihtō sehe” niha Yawe:

²—Ti tamariro cjiro caha cure majare wahcājaro. Pihahiro wama tiri co potoi waha, tōi ji caha susinijaro tina. Sohāri ma, ā yoa Migdo wama tiri cuhtu dacho maca wahtaroi Pihahiro sehe tjua. Baal Sefō wama tiri cuhtu cūhu tō cahacā cure tjua.

³ Ā yoa tōi ti ji wama tichu tuhorō, faraō sehe ō sehe ni tuhoturohca: “Israe masa ti wahaboriropu wahaa nierara. Yu ya yahpare tina ne yuhdu witi wijaa masierara. Ā jia tina wuuri dūjuro, yucuri marieri dūjuropu wisia, doca wahā tinina” ni, tuhoturohca tiro. ⁴ To ā ni tuhotuchū, yuhū sehe tirore ō sehe ni tuhotu namochū yoaihtja. “Yuhū tinare nūnu ti wahcā, na majare tjua taihtja tjua” ni, tuhotu namochū yoaihtja tirore. To ā ni tuhotuchū, yuhū sehe tirore, ā jichū to surara cūhure yuhdurucahtja yu tuua tia mehne. Tō seheta tinare yu yoachū, egipto masa dūhsaina ō sehe ni, yuhure masiahca: “Tiropu jiri jimana Yawe waro” ni, yuhure masiahca tina. Ā ni yahuga mu masa sehere —niha Yawe Moiserē.

Ā yoa israe masa sehe Moise to yahu turiachū tuhoa, to yahuro seheta yoaha. ⁵ Ti ā yoari baharo, faraō sehe israe masa to ya yahpare ti yuhdu witi wijaa duari quitire tuhoha. Tī quitire tuhorota, to doca macaina puhtoare pji cahmachu, tina cūhure yahuha. Ā ni yahurota, ō sehe niha:

—Marine dahrabasamarina cjirire “iWijaahga musa!” nieraboa mari —niha tina.

⁶ Ti ā niri baharota, faraō sehe to yaria tunuria, to cahma wajāriare cahnoyu dutiha. Ā yoa to surarare ti ya cūhure cahnoyu dutiha. ⁷ Ti cahnorī baharo, tiro to tunua buso, wiho jia cahma wajāa busore cahnoyu dutiha. Ā jichū seisciento buso, tī buso bui noa yuhdua buso cūhure tiro cahnoyu namo dutiha. Tī busopu surarare dutiina cūhu ducu wahcāhti jiha.

⁸ Ā yoa tō pano Yawe sehe faraōre “Tinare nūnu ti wahcā, na majare tjua taihtja” ni, tuhotuchū yoa tuhsuha. Ā jiro to ā ni tuhotuchū yoaro mehne faraō sehe ti baharo nūnu ti wahcāno taro niha. Yawe tirore payu tahari to tuua tia mehne to yuhduruca mujapachuta, tiro israe masare āta nūnu tirucusinino taro niha.

⁹ Ā yoa faraō to cahma wajāa busore, ā jichū to surara ya cūhure to cahnoyu dutiri baharo, tiro tina mehne israe masare nūnu ti wahcāha juna. Tinare nūnu ti, pjiri ma duhtu cahai, Pihahiro wama tiri co potoi, ā jichū Baal Sefō wama tiri cuhtu cahacāi ti wuhuserire tuā dapo ti jichū waro, tōi tinare mu sua taa nimaha. ¹⁰ Ti mu suro cahachū waro, israe masa sehe faraōre ā jichū to surara cūhure ñu boca. Tinare ñu boca, cua yuhdua wahaha. Ā cua yuhdua, Yawere tuaro waro siniha. ¹¹ Ā tuaro sinipahta, Moise sehere ō sehe ni tuhtiha:

—¿Dohse jiro baro muhu säre ō sehe yoari? Ōpu wuuri dūjuro, yucuri marieri dūjuropu säre na ta yariachū yoaeraboa muhu. ¿Mu ñuchū,

Egiptopure säre yaboro mariari? ¿Dohse yoi tai säre, Egiptopu jiinare na tari muhu? ¹² Ahrieta sã basi tópu jisninina, yahumahi sã muhure. “Tinare caha-maca tjua duaja sã. Tinare sã cahamaca jiro sehe bui noana, wuuri dujuro, yucuri marieri dujuropu yariarore” nimahi sã —ni tuhtiha Moiserere.

¹³ Ti ã ni tuhtichu tuhoro, Moise sehe õ sehe ni yuhtiha to masare:

—¡Cuiena tjiga musa! Tóihita ducu su, wacũ tuaga Yawe michare dohse yoa musare to yuhdohtire. Michapucacã egipto masare, musa ñuinare ne pari turi ñu namosi musa. ¹⁴ Yawe musare cahma wajãbasarohca. Ñ jina ã jica niena tjiga —niha Moise tinare.

¹⁵ To ã niri baharocãta, Yawe sehe Moiserere õ sehe niha:

—¿Dohse yoi yuhu musare yuhdohtire sini mujai nijari yuhure? ¡Wiho mu masare suho waha bahrañoga! ¹⁶ Mu tjuadure na muo, cjã yoroca pohõga Sohãri ma bui. Mu ã yoachũ, tí co dacho maca mehne suru pahã waha, pari maha, co marieni maha, wuuri maha tjua caha surohca, mu masa tí mahapu ti pahãhto sehe.

¹⁷ Ñ yoa yuhu egipto masa sehere: “Israe masare nunu ti wahcã, na majare tjua tanahtja tjua” ni, tuhotchũ yoihtja. Yu ã ni tuhotchũ yoaro mehne tinare tí mahapu musare nunu tichũ yoihtja. Ñ jicu yuhu faraõ surara jipih-tinare, to cahma wajãa busore, ã jichũ paina to surara cawaloa buipu cahma wajãinare mio wajãihtja. Yu ã yoaro mehne tuariro yu ji yuhdurucu sua tiare ñoihtja painapure. ¹⁸ Yuhu tinare buhiri dahrea mehne tuariro yu ji yuhdurucu sua tiare yu ñori baharo, tina duhsaina, Egipto macaina sehe yuhure õ sehe ni, masiahca: “Tiro jiri jimana Yawe waro” ni, masiahca —ni, yahuha Yawe Moiserere juna.

¹⁹ Baharo israe masa egipto masa surarare ti ñu bocachũ, Cohamacu to anjo sehe juna israe masare mu tã wahcãmariro cohtota, ti baharo buhusehe sehe majare ducu sua wahaha. Yawe cũhu me curua yoaro sehe bajuri pohnapu jitjiãhno, tinare suho mu tã wahcãrucumariro cohtota, ti baharo buhusehe sehe majare ducu sua wahaha tiro cũhu. ²⁰ Ñ majare ducu sua, tina puaro sehe israe masa curua, egipto masa surara curua, ti dacho macai ducu sua wahaha juna.

Ñ yoa Yawe tí curuapu ji, ñami jipachuta israe masa sahserore noano buhriarucuchũ yoaha. Egipto masa surara sehere ñamine nahitiano bui tuaro nahitiano tjuachũ yoaha. Ñ tinare nahitia yuhduachũ, tí ñami puro israe masare ne ñaha masieraha.

²¹ Tinare ti mu su masieraro wato, Moise sehe to tjuadure na muo, cjã yoroca pohõga Sohãri ma bui Yawe to dutiro sehetã. To ã yoachũ, Yawe sehe sũ muja taro sehe ñami puro wihnono tuaro wã turucuchũ yoaha. To ã wã turucuchũ yoaro mehne, tí ma, pjiri ma macaa co sehe suru surucu sua waha, tí ma caha sũro cũhure wua sã caha suchũ yoaha. ²² Tó sehe yoa, ti pahãhti maha cjihtore bajuamehne cũha. Tí maha co wuru sehe, pu buhu-seheri tjuarucu sua wahaha poto buhusehe sehei, cõ buhusehe sehei. To ã wahachũ ñua, israe masa pahãa wahaha, tí co pu buhuseheri tiharicari yoaro sehe bajuro watoi.

²³ Ñ yoa faraõ cahma wajã buso mehne cahma wajãina sehe, ã jichũ cawaloa buipu cahma wajãina cũhu tí maha dacho macapu wahaa, tinare nunu ti pahãmaha. ²⁴ Ti nunu ti pahãrucusinino wato, bohrea parĩ caharoi,

Yawe sehe me curua, ã jichu pichaca pohna yoaro sehe bajuri pohnapu jitjiäho, egipto masa surarare ñuroca dijoha. Ñ ñuroca dijoro, tiro cuichu yoaha tinare. Ti ã cuichu, tuho masia pihtia wahaha tinare. ²⁵ Tuhsu, tiro ti cahma wajãa buso tunua sorori cühure cahtachu yoaha. Ñ jia ño duaro mehne waha masieraha juna. Ñ waha masieraa, tina egipto masa surara ti basi õ sehe niha:

—Yawe israe masa curua sehere cahino, marine buhiri dahrero nina. Ñ jina tinare nunu ti duhu, majare tjuaa wahajihna mari —nimaha ti basi juna.

²⁶ Wiho mejeta Yawe sehe Moisere õ sehe yoa dutiha:

—Pari turi mu tjuadure na muo, cã yoroca pohõga Sohãri ma bui. Mu ã yoachu, tina egipto masa surarare, ti cahma wajãa busore, ã jichu paina cawaloa buipu cahma wajãinare, tí co wuru to jimariporu tjuarucu su, cã piti boca, tinare mionohca —ni yahuha.

²⁷ To ã yoa dutichu tuho, Moise sehe to tjuadure na muo, cã yoroca pohõga Sohãri ma bui. Ñ yoa bohrea parí cahachu, pjiri ma sehe to jimaripo cjiro sehetu tjuaa mua wahaha tjoa. Tí ma ã wahachu ñua, tina egipto masa surara sehe yuhdu witi duamaha. Ti yuhdu witi duapachuta, Yawe sehe tí co wurure noano cã piti bocachu yoa, tinare noano mini pihtichu yoaha. ²⁸ Pjiri ma to jimaripo cjiro sehetu to tjuaachu, jipihtina israe masare nunu tirina cjiri, ti cahma wajã buso, cawaloa buipu cahma wajãina cuhu, ne cüiro duhsaro marieno mini yaria pihtia wahaha tina.

²⁹ Wiho mejeta, israe masa sehe pjiri mare wua caha suri mahapu pahãa wahaha. Tí co wuru sehe, ti poto buhusehe sehei, ti cõ buhusehe sehei tjuarucu sua watoi, pa buhusehe cjoa sehe pahã surucu suha tina.

³⁰ Tí numi Yawe israe masare yuhdoha, egipto masa surara ti ñahaborore. Baharo tina cjirire pjiri ma duhtu cahai ñuha. ³¹ Yawe tó sehetu tuariro to ji yuhdurucu sua tiare tinare to ñochu, tina sehe ñu cuaa wahaha. Cohamacu tinare noaputiaro to yoabasachu ñua, tina tirore tuaro ño payoha. Ñ jia tirore wacü tuaha. Ñ yoa to cahamacu Moise cühure wacü tuaha.

Moise to masa curua mehne Yawere basa payoha

15 ¹ Ñ yoa Sohãri Mare to coyeare suho pahã surucu su, tina mehne õ sehe ni, Yawere basa payoa tiha Moise:

—Yawe to tua yuhdurucu sua tiare ñona yuhure.

Tiro cawaloa buipu pisa, cahma wajãa tainare

dia pjiri mapu mio wajãnocana.

Ñ jicu tirore basa payoja.

² Yawe yuhure tuariro wahachu yoara.

To ã yoachu, wahchero mehne tirore basa payoja.

Tirota yuhure yuhdu witichu yoara.

Tiro yu Cohamacu waro jira.

Ñ jicu yuhu tirore ã ño payorucuihtja.

Tiro yu pucu cjiro to ño payoriro Cohamacu jira.

Ñ jicu pjiriro to ji yuhdurucu sua tiare masicu,
tirore ã basa payorucuihtja.

³ Tiro Yawe cahma wajã tua yuhdurucu suriro jira.

Tuhsu, ã catirucuriro cuhu jira.

- ã jiro “Yawe” wama tira tiro.
 4 Tiro faraô surarare, tuhsu ti cahma wajã buso cûhure
 ahri ma, dia pjiri mai mio wajãnocana.
 Ti puhtoa, noano cahma wajã tuaina cûhure
 dia pjiri ma Sohãri Mai mini yaria pihitia wahachu yoara.
 5 Dia pjiri ma topapu tina cjiri diha caha su pihitia wahara.
 ã jia tâca tí ma topapu to diha caha suboro seheta
 diha caha su pihitia wahara tina cjiri.
 6 Mûhu Yawe, tua yûhdurucu suriro jira.
 ã jicu masa ti yoaeraboare yoara.
 Mûhure ñu tuhtiinare mu dute siteboro seheta
 tinare wajã pahñonocana mûhu.
 7 “Tirore mari cahma wajã yûhdurucjihna mari” ni,
 tuhotumarinare mûhu seheta
 mu tua yûhdurucu sua tia mehne
 tinare cahma wajã yûhdurucanocara.
 Mu suachu, picha pohna wuru jû mûjarucuro yoaro sehe wahara.
 Tí pichaca wuru tjare to jû pahñoboro seheta
 mûhu sehe tinare mio wajã pahñonocara.
 8 ã yoa putirocaro yoaro sehe wihnonore mu warocachu,
 tí ma dacho macare cuãno jimariro cjiri
 pu buhuseheri sururucu sua waha,
 co sehe biha ducataro yoaro seheta butirucu sua wahara.
 9 ã yoa sãre ñu tuhtiina sehe ô sehe ni durucuri jimahre:
 “Tinare nûnu ti wahcã, mu sunocajihna mari.
 Mu su, ti yare ma, noho puro mari cahmano puro
 mari basi cahma tju wajihna.
 ã yoana, dohse jia mari cahmaa mehne tjuanahca mari.
 Tuhsu, tinare mari cahma wajãa pjini mehne
 wajã pahñonocajihna” ni, durucuri jimahre tina.
 10 Ti ã ni durucuri baharo jipachuta,
 mûhu sehe putirocaro yoaro sehe wihnonore warocara.
 Mu ã warocaro mehne ahri mapu mini yaria pihitia wahara tina.
 Picha yapa diapû to diha caha suboro seheta
 bujua pahcõri tiropu diha pihitia wahara tina.
 11 Yawe, mu yoaro sehe jiriho paio cohamacu mariahca.
 Tuhsu, ne mu yoaro sehe buhiri marieriro,
 noariro ji yûhdurucu suriro cûhu mariahca.
 Masa ti yoaeraboare, tuhsu, masa ti ñu cuachu yoaa barore
 yoariro jira mûhu.
 12 Mu tua yûhdurucu sua tia mehne sãre nûnu timarinare
 yahpa to chu cohãboro seheta
 diapû mini yaria pihitia wahachu yoara mûhu.
 13 Mûhu sãre ã cahirucura.
 ã jicu sã mu yûhdorinare noano suho mu târucura mûhu.
 Tuhsu, tuariro mu ji yûhdurucu sua tia mehne
 sãre mu besebasari yahpapu naai nina mûhu.

- Tí yahpapu muhu sehe noariro mu jia tia mehne
säre suho jiihca.
- ¹⁴ Tí yahpapu säre mu naa quitire
masa curuaripe macaina tuhoahca.
Tí quitire tuho cuua wahaahca tina.
Ä cuua, cuiro mehne tuaro tetereahca tina.
Filisteo masa cūhu cuia, purinore ti caboro seheta
tina cūhu ñano tuhotuahca.
- ¹⁵ Edomo masa curua puhto cūhu tuaro cuiahca.
Tuhsu, moabita masa curua puhto cūhu cuiro mehne tetereahca.
Ä yoa jipihtina Canaā yahpa macaina cūhu
cuiro mehne, “Tinare bihosi mari” ni, tuhotuahca.
- ¹⁶ Wacūenoca tinare cuaro pja suchu,
cua yuhdua wahaahca tina.
Yawe, tua yuhdurucu suriro mu jia tia
quitire tuho cua waha,
ne dohse yoa masisi tina.
Ti ä wahachu, sä, mu wiorina,
tuhsu, mu yaina wahachu mu yoarina sehe
ti ya yahpari cahai yuhdu wahcānahca.
Sä ä yuhdu wahcāchu, tina sehe
tāca munānoi to coāno yoaro seheta säre ne soro yoasi.
- ¹⁷ Ti ä waharo wato, muhu sehe
mu beseri tūcupu säre naa suihca.
Ture besecu, muhu sehe ō sehe ni tuhotuhre:
“Ahdu tūcupu yuhure ti ño payoa tachu, cahmaja yuhu.
Yuhu cūhu tina mehne tūpu jiihca” ni, tuhotuhre muhu.
Ä jicu tūpu sä cūhure noano jinocachu yoaihca muhu.
- ¹⁸ Tópu muhu sehe sä puhtoro ä jirucuihca
—ni, basa payoha Moise, to coyea mehne.

Miriā to coyea numia mehne Cohamacure basa payoa tiha

¹⁹ Ä yoa israe masa dia pjiri mare, wua caha suri mahapu pahāa waha tiha. Ti pahāchu ñua, faraō surara cūhu, ti cahma wajāa buso mehne, tuhsu ti cawaloa mehne tí mahapu ti baharo pahāmaha. Ti pahāchu ñuno, Yawe sehe tí mahare pari turi co wuru ji mua wahachu yoaha. Ä yoaro, tinare noano mini yaria pihitia wahachu yoaha.

²⁰ Yawe to ä yoachu ñuno, Aarō wahmiono, Miriā, Cohamacu yare yahu muhtaricoro sehe cū tu, wachu cahsaro mehne ti dahreri ture na, tí ture cjanota, dahpo tiha. To ä yoachu ñua, jipihtina paina numia cūhu tí turi barore na, cjanota, tí numia cūhu dahpo tiha. ²¹ Ä yoa Miriā sehe tinare ō sehe ni basa muhtaa tiha:

—Yawe tua yuhdurucu suriro to jia tiare marine ñona.

Tiro cawaloa buipu pisa, cahma wajāa tainare
dia pjiri mapu mio wajā pahñonocana.

To ä yoachu ñuja mari.

Ä jina tirore basa payojihna mari —ni basa muhtaa tiha ticoro.

Co suêa core suêeraa co wahachũ yoaħa Yawe

²² ã yoa Moise seħe israe masare Sohãri ma duħtu cahapũ jimaĩnare wuãri dujuro, yucuri marieri dujuro, Sur wama tiri dujuropu suħo mu tã wahcãa wahaa tiħa. Tĩ dujurore tia dacho waro waharucua tiħa tina. Tia dacho ti waharucuro puro ne core bocaera tiħa. ²³ Baharo Mara wama tiroi tinare na sua tiħa. Tóre co jia timaha. Wiħo mejeta ñano suêa co jia tiħa. ã jia tĩ core siħniera tiħa tina. ã jiro Mara wama tiħa tó. (*“Mara” nino, “suê nina” nino nica hebreo masa ya duero mehne*)

²⁴ Tóre ti siħniboa co mariachũ ñua, Moise to masa curua seħe to tuħoe-raroĩ tirore ñano ni, durucu coħtaa tiħa. To tuħoro cũħure tirore õ seħe ni tuħti, sañurucua tiħa:

—Cjero sãre sã siħniħti core na tabasaga —ni tuħti, sañurucua tiħa.

²⁵ Tĩ ã ni tuħti, sañurucuchũ tuħoro, Moise seħe tuaro Yawere yoadohoa siniħa. To sinichũ tuħoro, Yawe seħe cũ sicã, yucucu sicãre tirore ñoha. To ñochũ, Moise seħe tĩ sicãre na, co suêa copu doca ñoha. To doca ñochuta, tĩ co cjiro seħe siħniħto noaa co wahaha juna.

ã yoa tói ti jisiniħũ, Yawe seħe, “¿Aħrina yu cahmasãano seħeta jia tiah-cari?” ni, masino taro, tinare õ seħe ni yahua tiħa:

²⁶ —Yũħu jija Yawe musa Cohamacu. Musare yu yahuaire noano tuħo, tíre ñaha, yu nino seħeta jia tiga musa. Tuħsu, yu dutiare yũħdurucaro marieno cjuaga musa. Yu nino seħeta musa jia tichũ ñucũ, egipto masare yu buħiri dahrea doħatia baro mehne buħiri dahresi musare. Musa doħatichũ, yũħuta jija musare yũħduchu yoariro —niħa tinare.

²⁷ Baharo tina israe masa seħe Mara wama tiroi jimarina yũħdu wahcãa, Elĩ wama tiropu suħa. Tói co wijaa copari, doce copari jia tiħa. Tuħsu, dátĩl wama tia pũ, setenta pũ waro jia tiħa. ã jia tói mahari pja tjua caha su, jisinia tiħa tina.

Manãre, pjuruare chu dutiro, israe masare waha Yawe

16 ¹ ã yoa israe masa Elĩ wama tiri cuħtupu jimarina yũħdu wahcãa, wuãri dujuro, yucuri marieri dujuro, Sĩ wama tiri dujuropu sua tiħa. Tĩ dujuro seħe tũcu Sinaĩ wama tidupu suro caharoĩ tjuaa tiħa. Egipto yahpare ti wijaari baharore, cũ sũ baro suħa tina tĩ dujuropure. ² Tĩ dujuropu ñano yũħdua tiħa israe masa. ã jia tina jipiħtina Moiserẽ ã jichũ Aarõre ñano ni durucu coħta ducaa tiħa. ³ Baharo tinare õ seħe ni tuħtiħa:

—Egipto yahparu jina, ñano yũħdupanaħta wahiquina diħire ã jichũ doħse jia chua cũħure sã chu duaro puro chua timai sã. Tóputa Yawe sãre to wajã-nocachũ noa yũħduaboa. Musa cũħu sãre õpure masa marienopure na tana, juca mehne jipiħtina sãre yariachũ yoa duana, na tari jira musa —ni tuħtiħa tinare.

⁴⁻⁵ Tĩ ã nichũ tuħoro, Yawe seħe õ seħe ni yahua Moiserẽ:

—Tĩ chuħtire coru taro yoaro seħe muãnopu bora tachũ yoabasaiħtja tinare. ã jia dachoripe bohrea cahachũ ñu, wijaa, tíre cũ numu ti chuħti sahsero saa mujajaro tina. ã yoa somanaripe seis dachori waharoĩ puã dacho ti chuħti cjiħti saa mujajaro. Tĩ saari dachoi ti chuħti cjiħti, ã jichũ pa dachopu ti chuħti cjiħti cũħure saa mujajaro tina tĩ dachore. Saa tuħsu, tíre

chua yoa, chu mujajaro tina. Yu ã yoa dutia mehne “¿Ahrina yu cahmasãano seheta yoa, jia tiahcari?” ni, masii tai nija —ni yahuha Yawe Moisere.

⁶⁻⁸To ã ni yahuri baharo, Moise cûhu sehe ti masare õ sehe ni, yahu turiaha:

—Yawe tuhoyuhti, sãre purîno mehne tuhti, musa cahmaare musa sinichu. Musa ã sinichu ñuno, tiro michare sũ sãachu waro musare wahiquina dihire wahto jiyuhti. Á yoa ñamichaca bohrea caharocã sehere musa mehne noaputiaro to jia tiare musare ño, paye chuare musare wa namohto jiyuhti tiro. To wachu, noho puro musa chu duaro puro chuhtina jiyuhca musa. Musare Egiptopu na wio, õpu na taina waro sã sehe jieraja. Musare chuare to ã wachu ñuna, musa sehe, “Potocãta Yawe sehe jiri jira marine Egipto yahpapu jimarinare na wioriro” ni, masihtina jiyuhca musa. Yu nino seheta sãre musa ñano ni tuhti, musa cahmaare musa sinichu, Yawe sehe tuhoyuhti. Musa cahmaare purîno mehne sini, sãre tuhtina, sã warore tuhtina nierari jihre musa. Yawe sehere tuhtina niri jire. Sã sehe wiho jiina jija. Musa sinia barore bajua-mehne, musare wa masieraja sã —ni yahu turiaha Moise cûhu ti masare.

⁹Á ni tuhsu, Aarõ sehere õ sehe niha Moise:

—Jipihtina mari masare õ sehe niga: “Musare sã niriro seheta Yawe tuhoyuhti sãre musa tuhti, musa cahmaare purîno mehne musa sinichu. Á jiro to basi musare yuhtiro taro niyuhca. Á jina musa sehe jipihtina to ñurocaroi ducuna taga” niga tinare —niha Moise Aarõre.

¹⁰Á yoa Aarõ sehe Moise to ni dutiriro seheta niha jipihtina ti masare. Tinare to yahuro wato, tina sehe tí ñujarore ñu siterocamaa, wacüenoca Yawe to jiri curua, me curuapu to si site muachu ñuha. ¹¹Á si site muano, Yawe õ sehe ni yahuha Moisere:

¹²—Tuhoi yuhu israe masa yuhure ti ñano durucu cohtachu. Á jicu tinare õ sehe ni yahubasaga yuhure: “Micha ñamichaha nahi cahachu waro wahiquina dihire chuahca tina. Á yoa pa numu bohrea caharocã sehere paye chuare chuahca. Ti chu duaro puro chuahca tina. Yu ã yoachu ñua, masiahca tina yuhure. “Yaweta jiri jira mari Cohamacu waro” ni, masiahca tina’ ni, yahuroahre musare Yawe” ni, yahubasaga yuhure —niha Yawe Moisere.

¹³Á yoa Yawe Moisere to niriro cjiro seheta nahi caha dija tachu waro, pjurua peri payu wihiha. Wihi, ti carîni cuhture noano ji sahsea wahaha. Á yoa pa dacho bohrea caharocã sehere ñahpichoha co yaparicã perire ti carîni cuhtu cahai ñuha tina. ¹⁴Á yoa tí yaparicã sehe sũ si muja taro mehne wua pihtia wahaha. Ti wua pihtiri baharo, yehsea yaparicã peri sahsero tjua cahaa suha juna. ¹⁵Tí cahsaricã perire israe masa sehe ñu masiera tiha. Á ñu masieraa, ti basi õ sehe ni sinitu ñu mujaha:

—¿Yaba baro jijari ahri? —ni, sinitu ñu mujaha.

Ti ã ni, sinitu ñu mujachu tuhoro, Moise sehe tinare õ sehe ni yahuha:

—Chua jira. Yawe chu dutiro, marine to waa jira. ¹⁶Á jiro “Ahrire õ sehe yoajaro” nihre tiro musare. “Nohopeina ti ya wuhusere ti jiro puro cãina puu litro posa saa cahmachujaro ti chuhti cjihtire” nihre musare —ni yahuha Moise tinare.

¹⁷Israe masa sehe to yahuro seheta yoaha. Cãa wuhuse macaina payu jia, ti chuhto puro payu saa cahmachuha. Á yoa paye wuhuse macaina cûhu mahainacã jia, ti chuhto puro tina cûhu saa cahmachua tiha. ¹⁸Ti quihõ

ñuchupure, payu saa cahmachuinare ti payuro puro quihôno mu suha. Ñ yoa mahaa saa cahmachuina cûhure quihôno mu suha. Jipihtinare cû dacho ti chuhto puro quihôno mu suha.

¹⁹ Ñ yoa Moise sehe tinare ò sehe ni yahuha:

—Ahri chua micha sahsero musa chuhti jia nina. Ñ jina ahrire ne duha chuena tjiga —ni yahuha.

²⁰ Moise to ã niri baharo jipachuta, caina tina mehne macaina sehe yuhduruca, wihboha. Tí sehe pa dachopure ti ñuchu, ñano dachoa tia ji, tuhsu ñano uria jiha. Ti ã yoachû ñuno, Moise tina mehne suaa wahaha.

²¹ Ñ yoa bohrea caha taharipe cû dacho ti chuhti cjihtire saa mujaa tiha israe masa. Ti saari baharo, duhsaa cahari sehe sũ siro mehne co dojo pihitia waha mujaa tiha. ²² Ñ yoa coã ti saa ducari somanare seis dachori waharoi Yawe to niriro seheta pua dacho ti chuhti cjihtire tina saaha juna. Caina cuatro litro saaha. Ti ã saari baharo, ti puhtoa Moise doca macaina puhtoa sehe “¿Mari coyea quihônota yoaa nijari?” ni, masi duaa, Moise cahapu waha, tirore sinitu ñuha. ²³ Ti sinitu ñuchu tuhora, Moise sehe ò sehe ni yuhtiha tinare:

—Namichaca marine Yawe so duti, to cûri dacho jiro nina. Tuhsu, tirore ño payo duti, marine to cûri dacho cûhu jiro nina. Ñ jia mari coyea sehe quihôno yoaa nina. Tiro Yawe marine ò sehe ni yahu tuhsuhre: “Somanaripe seis dachori waharoi pua dacho ti chuhti cjihtire saa mujajaro tina. Tíre saa tuhsu, tí dachoihta, pa dachopu ti chuhti cûhure chua dahreyu bahrañojaro. Noa cataropu puhô duaina puhôjaro. Ñ yoa noa doha duaina cûhu dohajaro. Tíre tuhsu, chujaro tina. Ñ yoa ti sori numupu ti chuhti cjihti cûhure soro duhajaro” ni, yahu tuhsure Yawe marine. Ñ jia mari coyea quihôno yoaa nina —ni, yuhtiha Moise tinare.

²⁴ Ñ yoa israe masa sehe to niriro seheta yoaha juna. Chuare pa dachopu ti chuhti cjihtire duhaha. Ñ yoa ti duhari sehe pa dachopure ti ñuchu, noaa jiha. Ne dachoa mariea ji, tuhsu, ne uriera jiha.

²⁵ Ñ yoa tí dacho, ti sori dachoi Moise tinare ò sehe ni yahuha tjoa:

—Micha Yawe marine so duti to cûri dacho jira. Tuhsu, tirore ño payo duti, to cûri dacho jira. Ñ jina michare chuare saana wahaena tjiga. Saana wahana cûhu, bocasi musa. Ñ jina musa duhari dihtare chuga michare. ²⁶ Ñ yoa mipure cû somanare seis dachori jiahca chuare musa saa cahmachu mujahti dachori. Siete dachori waharo pinihtare chua coã mujasi. Tí dacho musa so mujahti dacho jiro ninohca. Ñ jiro michata jira tí dacho, musa so mujahti dacho —ni yahuha Moise tinare.

²⁷ To ã ni yahuri baharo jipachuta, caina tina mehne macaina sehe tí dachore chuare macaa wahamaha. Tíre macapahta, tíre bocaeraha tina. ²⁸ Ti ã yoachû ñuno, Yawe sehe Moisepure ò sehe niha:

—¿Di pja musa yuhure yuhduruca duhunahcari? ²⁹ Yu nirire wacûga musa. Yuhu Yawe sehe somanaripere siete dachori waharoi musa sohti dacho cjihto cû tuhsuhi. Ñ jina tí dacho suchu, so mujanahca musa. Tuhsu, tí dacho, musa sohti dachoi musa chuhti cjihti cûhure tí dacho panocã waihca, ni tuhsui musare. Ñ jina musa sori dachore musa duharire chu, musa ya wuhusepu jinocaga —niha Yawe Moisere.

³⁰ To ã ni yahure Moise sehe israe masapure yahu turiaha tjoa. To yahuri baharo, tina siete dachori waharore dahraera tiha juna.

³¹ Ñ yoa israe masa sehe tí chuare “maná” ni, wamoaha. (*“Maná” nino “¿Yaba jijari ahri?” nino nica hebreo masa ya dusero mehne*) Tí sehe noano yehsea yaparicã jia tiha. Tuhsu, miquina mi mehne ti morea yoaro sehe coaa jia tiha.

³² Baharo Moise sehe Yawe to nirire israe masapure ò sehe ni yahu turiaha tjoa:

—Mari panamanapu ti ñuhti cjihti Yawe marine pua litro manáre wihbo dutihre. Tí maná sehe ò sehe ni ti ñuhti cjihti jiyuhca: “Yawe mari ñuchusuma cjirire Egipto yahpapu jiinare na wioa tiha. To na wiori baharo, wuari dũjuro, yucuri marieri dũjuropu tinare to na taa tiri pjapure tina sehe chua maeraina tarucua tiha. Tí ã maerachu ñño, Yawe sehe ti chuhti cjihti tinare ò sehe bajuare waa tiha” ni, ti ñuhti cjihti jiyuhca —ni yahu turiaha Moise tinare.

³³ Ñ ni yahu tuhsu, Aarõ sehere ò sehe niha:

—Marine ji turia napu ti ñuhti cjihtire cũ situ, dihi situcãpu pua litro manáre posaa, Yawe to ñurocaroi wihbo dapoga —niha.

³⁴ Ñ yoa Aarõ sehe to niriro seheta yoaha. Dihi situcãpu pua litro manáre posaa, tí situcãre Cohamacu to dutiare ti wihbori caro cahai wihbo dapoha.

³⁵ Ñ yoa cuarenta cuhmari waro israe masa manáre chua tiha. Cũ numu tina masa jiri yahpapu sua tiha. Tí yahpa sehe Canaã yahpapu sũro caha cureropu tjuaa tiha. Tí yahpapu suapu israe masa manáre chu duhua tiha juna.

³⁶ [...]

Tăcapu co wija tachu yoaha Yawe

17 ¹ Ñ yoa israe masa sehe Sĩ wama tiri dũjuro, wuari dũjuroi jimarina pa sehẽpu wahaha tjoa. Yawe to dutiro seheta soaero ji wahcãrucua tiha tina. Ñ soaero waharucua, Refidĩ wama tiri cuhtui su, tõi tjua caha sũsinia tiha. Tóre co ti sihniboa co mariaha. ² Ti sihniboa co mariachu ñua, Moise mehne pari turi suaa wahaha tina. Ñ suaa, ò sehe ni saũu payoha tiore:

—Sãre cjero core waga, sã sihnihti co cjihti! —ni saũu payoha tjoa.

Ti ã ni saũu payochu tuhorõ, Moise sehe ò sehe ni yuhtiha tinare:

—¿Dohse yoana yũhu mehne suajari musa? ¿“Yawe marine ñũeraputiara” ni, tuhotujari musa? —ni yuhtiha.

³ To ã nipachũta, tina sehe ne tjueraha. Ñnano ñahma yapioro tuhotua niha tina. Ñ jia Moisere ñano ni durucu cohta ducaa tiha. Baharo to tuhorõ tiore ò sehe niha tjoa:

—¿Dohse yoai tai sãre Egipto yahpapu jiinare na tari muhu? ¿Sã jipihitnare sã wahiquina mehnepũta ñahma yapioro mehne yaria pihtia wahachu yoa duai, õpu na tari muhu sãre? —niha tina.

⁴ Ti ã nichu tuhorõ, Moise sehe Yawere yoadohoa sinino, tiore ò sehe ni sinitu ñuha:

—Yũhure ahrina ã ni, saũu payo, tãa mehne doca wajã taapu nica! ¿Dohse yoama yũhu tinare? —ni sinitu ñuha.

⁵ To ã ni sinitu ñuchu tuhorõ, Yawe sehe tiore ò sehe ni yahu quihõha:

—Cãina ti puhtoare pji cahmachuga. Pji cahmachu, tina mehne israe masa pano wahayuga. Tuhsu, mu tjuadure Nilo Mapu mu cã pohõdu cjiro cũhure

naahga. ⁶Yuhu sehe mu pano tūcu Sinaípu cūria tāca cahai ducu, muhure cohtaihtja. Tópū su, tia tācare mu tjuadu mehne cjāga. Tiare mu cjāchuta, tiapū co wija tarohca musa sihnihti co cjihti —ni yahu quihōha tirore.

Ā yoa Moise sehe Yawe to yahu quihōriro cjiro seheta yoaha. Cāina israe masa puhtoare pji cahmachu, to yahu quihōriropū wahaha. Tópū su, ti nūro-caroi tia tācare to tjuadu mehne cjāha. To cjāchuta, tiapū co wija taha juna.

⁷Ā yoa Moise sehe tói ti carīni cuhture pua wama wamoaha. Cū wamare “Meribá” niri wama mehne wamoaha. “Meribá” nino, “Marine suho waja muhtainare ōi sañu payoja mari” nino nica israe masa ya dusero mehne. Ā yoa pa wamare “Mása” niri wama mehne wamoaha. “Mása” nino, “¿Yawe marine nūeraputiaro warota nijari?” ni masi duaja” nino nica israe masa ya dusero mehne.

Israe masa sehere amalecita masare cahma wajā yuhdurucachu yoaha Yawe

⁸Ā yoa israe masa Refidī wama tiri cuhtui ti jiro wato, amalecita masa sehe tina mehne cahma wajāa wihiha. ⁹Tina mehne ti cahma wajāa wihichu nūno, Moise sehe tirore yoadohoriro Josuére, ō sehe niha:

—Cjero mari mehne macaina cahma wajā mihniinare bese, namichaca tina mehne waha, amalecita masa mehne cahma wajāi wahaga. Musa cahma wajāno wato, yuhū cūhu ahri tūcu buhuropū mujaa, tópū jiihtja. Tópū yu tjuadu, Cohamacu yuhure “Ahdū mehne yoa noga muhu” to nidure cjuariro jiihtja yuhū cūhu —niha.

¹⁰Ā yoa Josué sehe Moise to dutiro seheta yoaro, cāina muare cahma wajā mihniinare nū, beseha. Bese tuhsu, pa dacho bohrea caharoi tina mehne waha, amalecita masa mehne cahma wajāa tiha juna. Ā yoa ti waharo cūno potoriga, Moise cūhu to wahmino Aarō mehne, ā jichu Judá cjiro panamino ji turariro Ur wama tiriro, tina puaro mehne to yahu quihōri buhuropū mujaa wahaa tiha. ¹¹Ti mūja sūri baharo, Moise sehe to tjuadure muanopū narūca muo, cjuaha. To ā yoachu, Josué cūhu sehe cahma wajā tuaina wahaa tiha. Wahya yuhdua waha, ture to na dijochu, amalecita masa sehe cahma wajā tuaina waha mujaa tiha tjoa. ¹²Ā yoa Moise to wahya yuhdua mujachu nūa, Aarō cūhu sehe cūria tācare na ta, tiare to dujihtia cjihto duhu cūha. Ā yoa tiai to dujichu, tina puaro to yachurire tju nahadohoa tiha. Cāiro cū buhu-sehe yachure, pairo pa buhusehe yachure tju nahadohoa tiha. Ti ā yoachu, Moise sehe dacho puro cūno pjaa tiha juna. ¹³To ā yoaro mehne Josué cūhu sehe amalecita masa surarare cahma wajā yuhdurucanocaa tiha.

¹⁴Ā yoa ti cahma wajā yuhdurucari baharo, Yawe sehe Moisere ō sehe niha:

—Musa yu ya curua mehne amalecita masa ti cahma wajāa tari buhiri, yu basita tí curuare wajā bonocaihtja. Ā ni, yuhure Josuére yahubasaga. Ā yoa muhu sehe yu musare ā ni cūrine joa na, wihboga tíre, musa boerahto noano —niha Yawe Moisere.

¹⁵To ā niri baharo, Moise sehe, Cohamacure wahche payoro taro, taa poca mehne cū tuhu dahre muoha. Dahre muo tuhsu, tí tuhure ō sehe ni wamoaha: “Yawe jira yuhure cahma wajā yuhdurucachu yoiaro” ni, wamoaha tí tuhure. ¹⁶Wamoa tuhsu, ō sehe ni batoaha:

—Yawe ya curua israe masa curua mehne
 amalecita masa ti cahma wajãa tari buhiri
 Yawe to basi tina mehne ã cahma wajãrucurohca.
 Tuhsu, tinare ji turiainapu mehne cûhure
 ã cahma wajãrucurohca tiro.
 Ne di pja tiro mehne ti basi cahma noano jisi —ni batoaha Moise.

Israe masa Sinaí wama tiri yahpai suha juna

19 ¹⁻² ã yoa israe masa Refidí wama tiri cuhtui jirina wijaa, Sinaí yahpai yucuri marieri dujuropu su, tói tûcu dahpoto cahai ti wuhuserire tuã dapo, ji caha susiniha. Tia sũ ñaha wahcãno waroi tópu suha, Egiptopu ti wijaari baharo. ³ Ti ji caha sari baharo, Moise sehe tûcupu mujaha Cohamacure piti bocaro waharo. Tópu to mûja suchu, Yawe sehe õ sehe niha tiore:

—Ahrire yahuga Jacobore ji nûnu tirinare, israe masare: ⁴ “Egipto masare yu buhiri dahrerire ñuhre musa. ã yoa musare yu noano cahã mehne noano ñu wihbo, musare opu yu na tariro cûhure masina musa. ⁵ Tíre masina, yu musare dutihtí cjihtire quihõno yoa, yuhure yuhduracaena tjiga. ã yuhduracaerana, yu yaina cjihti jinahca. Jipihti masa curuari macaina yu bajua-mehneina dihta jira. ã jicu yuhu musa ya curua sehere beseihtja musa yu dutihtire musa quihõno yoachu. ⁶ ã jihtina musa jichu, yuhu sahsero musare duti masiihca. ã jina musa cûhu yu dutia dihtare tuho, yoa mujanahca. ã yoa sacerdotea yuhure dahra cohtaina yoaro sehe jihti curua jinahca musa. ã jina yu ya curua cjihto jinahca.” ã ni yahuga mu masare —niha Yawe Moisere.

⁷ To ã niri baharo, Moise sehe dijaa wahaha. Dija su, tiro bucunare to doca macaina puhtoare pji cahmachuha. Pji tuhsu, tinare yahuha Yawe to nirire. ⁸ Moise doca macaina puhtoa cûhu tíre israe masare yahu turiaha. Israe masa cûhu ti yahu turiachu tuhoa, tinare õ sehe ni yuhtiha:

—To dutia jipihti yoanahca —ni, cãno potori yuhti pihtiha.

Ti ã ni yuhtiri baharo, Moise sehe tûcupu majare mujaa, ti yuhtirire yahu turiaro waharo niha Yawere. ⁹ To majare mûja su tuhsuchu, Yawe sehe õ sehe ni namoha Moisere:

—Ñichuri curua watoi mûhu mehne durucuihtja mu masa yu mûhu mehne durucuchu ti tuhohto sehe. Tó seheta yu mûhu mehne durucuchu tuhoa, masa mûhure wacû tuarucuahca —niha.

To ã ni tuhsuchu, Moise sehe to masa ti yuhtirire tiore yahu turiaha. ¹⁰ Tíre to yahu tuhsuchu, Yawe sehe tiore õ sehe ni yahu namoha tjoa:

—Dijaa, mu masare yahurisa. Michare, ñamichaca cûhure, jipihtina yuhu mehne ti basi cahnoyujaro, baharo yuhure ti ño payohto sehe. ã yoa ti suhti cûhure cosayujaro. ¹¹ ã yoa ñamichaca bohrearo, tûcu Sinaí sohtoapu yuhu duji pja suiha jipihtina masa ti ñurocaroi. ¹² Yuhu duji pja suhto pano, tu dahpoto suro caharoi mûhu sehe quihõ cûga, masa ti yuhdu sãaerahto sehe. Quihõ cû tuhsu, tinare õ sehe ni yahuga: “Tuhotunohma musa. Ahdu tûcure ne mûjaena tjiga. Ne ahdu dahpoto cahapu cûhure tjuhaena tjiga. Dohse jiina masa, ã jichu wahiquina cûhu, Yawe to quihõ cû dutiire ti yuhdu sãachu, wajãnocaga tinare. ¹³ ã jina yuhdu sãainare ne ñahaena tjiga. Wiho tãa poca mehne, buea yucuri mehne wajãnocaga tinare. Masuno jichu, o wahiquiro

jichu cūhure, Yawe to quihō cū dutirote ti yuhdu sāachu, wajānocaga tinare” ni, mu masare yahuga. Ā yoa mu masa, oveja muno saharore putiro yoaro sehe bisichu dihta wahajaro tūcu dahpotopu —ni yahuha Yawe Moiserere.

¹⁴To ā ni yahu tuhsuchu, Moise sehe dijaa wahaha. Dija su, to masare mahanocā ti jia tiare duhusini duti, soro jia tisini dutiha Yawere ti ño payohto sehe. To ā dutiri baharo, tina ti suhtire cosayuha. ¹⁵Tuhsu, Moise ō sehe ni yahu namoha to masare:

—Ŋamichaca bohrearo Yawe tūcu sohtoapu duji pja suhto jiyuhti. Ā jina to duji pja suhto pano muno, numino mehne ne jiena tjisiniga —niha.

¹⁶Baharo, tia dacho waharoi, paró wupo pjarucu, oroca siterucuha. Ā yoa cū curua, ñichuri curua tūcu sohtoapu duji pjaha. Tuhsu, oveja muno saharore putiro yoaro sehe bisiro cūhu tuaro bisi yuhdurocaa wahaha. Ā jia masa ti ji caha sua wuhusei jiina, cua yuhdua wahaa, tetera wahaha. ¹⁷To ā bisichu tuhoru, Moise sehe to masare suho na wahcāha. Na wahcā, tu tūcu dahpoto cahi to quihō cūriropu suho tjuarucu suha, Cohamacu to dutiare to yahuchu, ti tuhohto sehe.

¹⁸Ā yoa tūcu Sinaipu Yawe to duji pjachu, paró tūcu tūcu mu sūro jū wija siterucu sūdu yoaro sehe bajurucuha. Tuhsu, tūcu mu sūro ñuhmirucuha. ¹⁹Ā yoa oveja muno saharore putiro yoaro sehe bisiro cūhu sie sehe mehne, tuaro waro bisi yuhdurocaa wahaha juna. To ā waharo watoi Moise Cohamacu mehne durucuha. To durucuchu, Cohamacu sehe tirore tuaro wupo pjaro yoaro sehe yuhtiroca dijo mujaha.

²⁰Tiro Sinaí sohtoapure duji pja tuhsuriru, Moiserere to cahapu majare muja ta dutiha. ²¹To majare muja suri baharo, Yawe ō sehe ni yahuha tirore:

—Dija sui, mu masare pari turi ō sehe ni yahuga tjoa payu waro ti yariae-rahto sehe: “Ahdū tūcure ne muja taea tjiaro. Yuhure ñua muja ta duaa, mu quihō cūnore yuhdu sāa, yariaa wahaahca. ²²Ā yoa sacerdotea, yuhure dahra cohtaina cūhu yuhu mehne ti basi cahnoyujaro, tina cūhure yu wajāerahto sehe” ni, yahuga mu masare —niha Yawe Moiserere.

²³To ā nichu tuhoru, Moise sehe ō sehe ni yuhtiha:

—“Ahdū tūcu Yawe buhiri marieriro to duji pja suhtu jira” ni, masi tuhsuhre tina. Muhu sehe ahdū tūcu dahpoto cahi quihō cūyu duti tuhsuhre. Ā jia yu masa sehe ahdure ne muja tasi —ni yuhtiha tiro.

²⁴To ā nipachuta, Yawe sehe tirore ō sehe niha:

—Dijaaga. Baharo Aarō mehne majare muja taga tjoa. Wiho mejeta sacerdotea yuhure dahra cohtaina, ā jichu jipihitina paina masa cūhu, mu quihō cūnore yuhdu sāa, muja taea tjiaro yu cahapu. Diina yuhdu sāaina ti jichu, tinare wajāihtja —niha.

²⁵To ā nichu tuhoru, Moise sehe dijaa waha, tina israe masare yahu turiaha, Yawe to yahu dutiare.

Cohamacu to diez dutiare israe masare yahuroca dijoha

20 ¹Ā yoa Cohamacu tūcu sohtoapu jitjiāhno, ahri jipihitiare yahuroca dijoha israe masare:

²—Yuhu jija Yawe musa Cohamacu. Yuhu jiji musare, egipto masa cahamaca jirinare na wioriro.

³Ā jina mipure paina cohamana, musa ño payohtina cjihtire, bese tjiāhna cjuaena tjiga.

⁴Ne dohse jia masurine ño payoa, cjuarena tjiga. Muanopu catiina o catieraare, ã jichu ahri yahpare catiina o catieraare, ã yoa pjiri mare catiina o catieraare, dohse jia tí masurine dahretjiãhna, ño payoa, cjuarena tjiga. ⁵Yuhu jija Yawe musa Cohamacu waro. Ñ jina ne tí masurine na tuhcuca caha su, ño payoa cjuarena tjiga. Yuhu jija musare cahĩro waro. Ñ jicu musare yuhure ñu yabi, paina cohamanare ño payoa musa cjuachu, buhiri dahre turiahtja musa pohmare, musa panamanare, ã jichu musa panamana pohna cũhure. ⁶Wiho mejeta, yuhure cahĩ, “Yawe to yoa dutia quihõno jira” ni, yoaina sehere tuaro cahĩhtja. Tuhsu, musa yuhure cahĩ cahmaina pohmare, ã jichu musa panamana, musare ji nũnu tihtina cũhure, payu tjururi macainapure cahĩ turia dijaihtja.

⁷Ñ yoa yu wama Yawe musa Cohamacu wamare wiho warota wama payo, pisuena tjiga. Musa durucua quihõno jierapachuta, wiho warota yu wamare musa wama payo pisuchuhna, musare buhiri dahrehtja.

⁸Ñ yoa yuhu musare so duti cũri dachore paye dachori bui jiri dacho wacũ, sogã musa. ⁹Ñ yoa somanaripe seis dachori waro dahra masina musa. Dohse musa dahra duaare dahra masina tí dachore. ¹⁰Siete dachori mu suri dacho pinihta Yawe musa Cohamacu ya dacho, sori dacho jiro ninohca somanaripe. Ñ jina musa tí dacho sehere ne waro dahra masierara. Ne musa pohna, musa cahamaca, wahiquina musa mehne dahraina, pa sehe macariro musa cahai jiri cũhu ne waro dahra masierara tí dachore. ¹¹Yuhu seis numuri bajua-mehne pahñoi, muanore, yahpare, ã jichu pjiri ma cũhure, tuhsu, jipihtia, jipihtinare tíre jia cũhure. Siete numuri suri dachoi sohi yuhu. Ñ jicu yuhu tí dachore noano tuhotu, paye dachori bui jiri dacho sori dacho cjihto cũhi. Ñ jina musa cũhu tí dachore so mujaga.

¹²Musa pucsumare, musa pocosanumia cũhure ño payoga musa. Tó sehe musa pucsumare ño payoa mehne jia tina, yu musare wahti yahpapure yoari pja jinahca.

¹³Ñ yoa masũno, dohse jiriore wajãena tjiga musa.

¹⁴Ñ yoa mua namo tiinapu, paye numia mehne jiena tjiga. Numia, manũ tia numiapu cũhu, ne paina mua mehne jiena tjiga.

¹⁵Ñ yoa paina yare yacaena tjiga.

¹⁶Musa mahñoa mehne paire, “Tiro jihre” ni, tju õena tjiga, paina sehe tiore ñano ni durucuerahito sehe.

¹⁷Ñ yoa paio ya wuhure, ã jichu to namono, to cahamaca, to wahiquina tiro mehne dahrinare, jipihtia to wuhui dohse jia to cjuaa cũhure cjoena tjiga —ni batoaha tinare.

Israe masare cua yuhdua wahachu yoaha Yawe

¹⁸Israe masare Yawe to ã ni yahuro wato, tina sehe oveja saharore tuaro putiro yoaro sehe bisirocachũ tuhoha. Tuhsu, wupo pjaare, oroca siteare ã jichu tũcupũ jũ wija siterucua yoaro sehe bajua cũhure ñuha tina. Tíre ñua, cua yuhdua wahaha. Ñ jia yoaropu surucu su, ñuroca ducua. ¹⁹Tõpu ducua, tuaro cuuro mehne õ sehe niha tina Moiserere:

—Mũhu cũirota Cohamacu to yahware tuho, sãpure yahu turia mujaga. Cohamacu to durucua tuho, cuina, yariaa waha duaca sã —niha tina.

²⁰Ti ã nichu tuhoro, Moise sehe õ sehe ni yuhtia tinare:

—Cuiena tjiga. Musa ñurocaroi to tuaa tiare ñono nina tiro musare. Ñono, ño sehe ni tuhutu, jia tirucuchu yoa duaro nina tiro musare: “Tua yuhdurucu suriro waro jira Cohamacu. Ñ jina mipure tirore yuhdurucaro marieno cua pisaro mehne ñ ño payorucujihna mari tirore” ni, tuhutu, jia tirucuchu yoa duaro nina musare —ni yuhtiha Moise tinare.

²¹ Ñ yoa tina sehe yoropu ñurocarucuha. Tõpu ti ducuro wato, Moise cûirota tûcupu mujaa, Cohamacu to jiri curua ñichuri curua cahacâpu suha.

Resumen: Cohamacu cahapu to mûja suchu, tiro sehe Moisere jipihtia israe masa ti jia tihti cjihtire yahu quihõha. Òpere yahu quihõha Yawe: Tirore ño payoa taa, ti dohse yoahti cjihtire yahu quihõ muhtaha. Baharo ti cahamaca care dohse yoa ti cjuhti cjihtire yahu quihõha. Tíre yahu quihõ tuhsu, ti basi ti cahmacheri buhiri dohse yoa ti cahnohti cjihtire yahu quihõha. Tíre yahu quihõ tuhsu, masa mehne, tuhsu, ti wahiquina mehne cûhure wacûenoca soro waha muachu dohse yoa ti cahnohti cjihti cûhure yahu quihõha. Tíre yahu quihõ tuhsu, ahri cûhure yahu quihõha tirore: Cûiro masuno paio yare to yacachu, dohse yoa ti cahnohti cjihtire yahu quihõha. Tíre yahu quihõ tuhsu, jipihtia paye dohse yoa ti jia tihti cjihti cûhure yahu quihõha Yawe Moisere.

22-26 [...]

Yawe to dutirire cua pisaro mehne yuhti ducaha israe masa

24 ¹ Ñ yoa Yawe tûcupu jiro, ñ sehe niha Moisere:

—Dijaa, yu muhure yahuare israe masare yahu turiai wahaga. Yahu tuhsu, pari turi õpu mûja taga tjoa. Ñ mûja tai, Aarõre, ñ jichu to pohna Nadabe, Abiú cûhure pji mûja taga. Tuhsu, paina mu doca macaina puh-toare setenta waro bese, tina cûhure pji mûja taga. Mûja wihi, yoa cureropu tjuarucu su, na tuhcuca caha su, yuhure ño payoga musa. ² Musa ño payori baharo, muhu cûirota yuhdu mûja ta, yu cahapu wihiga. Ñ yoa muhu mehne mûja tahtina sehe yu cahacâpu wihiro marieno musa ño payohti cuhtuputa tjuajaro. Ñ yoa paina masa yahpapu ducuina cûhu õpure mûja taea tjijaro —ni yahuha Yawe Moisere.

³ To ñ ni yahuchu tuhoro, Moise sehe to coyee cahapu dijaa, jipihtia Yawe to yoa dutirire tinare yahu turiaha. To yahuchu tuhoa, israe masa sehe ñ sehe ni yuhtiha tirore:

—Jipihtia Yawe to yoa dutiare yoanahtja sã —ni yuhtiha.

⁴ Ti ñ ni yuhtichu tuhoro, Moise sehe jipihtia Yawe to yoa dutirire joa na, wihboha.

Ñ yoa pa dacho bohrea caharoi tu tûcu dahpotoi cû tuhu tãa mehne dahre muoha. Tí tuhu sehe wahiquinare wajã, duhu payo, ti jû wa muohti tuhu cjihto jiha. Tí tuhure dahre muo tuhsu, tí tuhu cahai bujua tãa pjîni, doce pjîni waro duhu dapoha. Tina cû curua macaina jipahta, doce curuari tju wa dapo, jiri curuare tí curuaripere duhu dapobasaro niha Moise. ⁵ Tí pjînine dapo tuhsu, cãina wahma yapiare pjiroca, ñ sehe niha tinare:

—Wachua wihãa cureinare wajã, pjainata Yawepure jû wa muoga musa. Baharo paina tó sehe jîinareta wajã, tina sehene wiho yihso, cãa sirire jû wa muoga. Duhsaa siri sehene tóihita jipihtina mari israe masa puhõ chujihna. Ñ puhõ chuna, ñ sehe ni wacûjihna mari: “Cohamacu marine to ya curua cjihti wahachu yoahe” ni, wahchea mehne wacûjihna mari —niha Moise tinare.

To ā nichu tuhoa, tina wahma yapia sehe to dutiro sehetā yoaha. ⁶Baharo Moise sehe wahiquina ti wajārīna cjiri dire dacho maca mehne wapariṗu pio na, wihbo dapoha. Duhsaa di sehere to dahre muori tuhupū wājā site sihōha cua pisaro mehne. ⁷Wājā site sihō tuhsu, Yawe to yoa dutirire joa na, to tju turēri tiare na, israe masare ni ñoha. To ni ñochu tuhoa, israe masa sehe tirore ō sehe ni yuhtiha:

—Jipihitia Yawe to dutiare yuhdurucaro marieno yoanahtja sā —ni yuhtiha.

⁸Ti ā ni yuhtichu tuhoro, Moise sehe to wihbo dapoa dire na, cua pisaro mehne tinapure wājā site sihōha. Wājā site sihōnota, ō sehe ni yahuha tinare:

—Yawe marine, payu masa curuari watoi jiri curuare to ya curua cjihto besehre. To ā besechu, musa cūhu, “Yawe marine to yoa dutiare yuhdurucaro marieno yoanahtja sā” ni, yuhti tuhsura. Ā jiro Yawe to basi marine cua pisaro mehne ahri di mehne mari tiro mehne durucuro sehetā mipure cua pisaro mehne tīre mari yoa dūcahtire ñono nina tiro marine —ni yahuha Moise tinare.

⁹Ā ni yahu tuhsu, tūcupu pari turi mujaa wahaha Moise. Tiro mehne Aarō, Nadabe, Abiú, ā jichu Moise doca macaina puhtoā setenta cūhu muja. ¹⁰Muja su, ti puhtoro Cohamacure ñuha tina. Ti ñuchu, to ducuri yahpa sehe taa poca wapa tia poca, noano yahsaa, co sitia poca chori mehne ti yoari yahpa yoaro sehe bajuri yahpa choro jiha to ducuro. Wete marieni dachore mari ñu muochu, noano yahsaro yoaro sehe bajuri yahpa choro jiha to ducuri yahpa.

¹¹Ā yoa tina israe masa puhtoā Cohamacure bajuroi ti ñupachuta, tiro sehe tinare ne soro yoeraha. Ā jia to ñurocaroihta chu, sihni, yoaha tina.

Moisere tūcu Sinaípu jiriore muja ta namo dutiha Yawe

¹²Baharo, Yawe Moisere ō sehe niha tjoa:

—Ahdu tūcupu muja ta namoga. Muja ta namo, yu cahai tjuasiniga. Taa pjinine, yu dutiare yu joa ōa pjinine muhure wai tai nija, tí pjini mehne israe masare noano mu yahuhto noano —niroca dijoha tirore.

¹³To ā nichu tuhoro, to mujaa namohto pano, Josué tirore yoadohoriro mehne ti naahtire cahnoyuha Moise. ¹⁴Cahnoyu tuhsu, bucuna setenta to doca macaina puhtoare ō sehe ni yahu quihōha:

—Sāre ōihta cohtaga musa. Ā yoa Aarō, ā jichu Ur cūhu ōihta musa mehne tjuaahca. Ā jina musa sehe mari ya curuapure dohse jia mijoa wahachu, tīre cahno bihoerahna, tina cahai wahaga. Tina musare cahnodohoahca —ni yahu quihōha Moise bucunare, setenta to doca macaina puhtoare.

¹⁵Ā ni yahu tuhsu, muja namoa wahaha juna. Ti mujarucuro watoi, tu sohtoare me curua ji biharucu sua wahaha. ¹⁶⁻¹⁷Tí me curua biharo wato, Yawe sehe tu sohtoapu duji pja suha. To duji pja suchuta, tu sohtoa sehe noano si sitea wahaha. To si siteare israe masa ti ñuchu, tu sohtoapu pichaca pjíro to jūrucuro yoaro sehe ñano cuaro wuru bajurucuha. Tuhsu, me curua cūhu ture seis dachori waro biharucuha. Seis dachori pihti, pa dacho waharo waroi, Yawe sehe Moisere muja ta namo dutiha. ¹⁸To muja ta namo dutichu tuhoro, Moise sehe muja namo, me curuare yuhdu sāa, to cahapu suha. Tópu su, cuarenta dachori, cuarenta ñamini jiha juna.

**Yawe to ya wuhu cjihto, ti na wahcā masihti wuhu cjihto
ti yoahiti macaare cahmachu dutiha israe masare**

25 ¹Ā yoa Yawe Moisere ō sehe ni israe masare yahu dutiha:
²—Yuhure ti wahtire cahmachujaro. Jipihtina diina yuhure wa
duaina ti yajeripohna ji coaro mehne wajaro. ³Ā yoa ō sehe wama tiare cah-
machujaro. Uru mehne ti yoaa, comaa plata mehne ti yoaa, ā jichu paye
comaa cobre ewu tia, si pa mehne ti yoaa cūhure cahmachujaro. ⁴Suhti
cahsari cūhure ō sehe bajua cahmachujaro. Yahsaa suhti, ñapi ñia yoaro
sehe bajua suhti, sohāa suhti, ā yoa poto yehsea suhti cahsari cūhure
cahmachujaro.

⁵Ā yoa cabraa pjoari cūhure cahmachujaro. ⁶Ā yoa ovejaa mua cahsari,
sohāa mehne ti ñimioa cahsarire, ā yoa paye cahsari, noaa cahsari cūhure
cahmachujaro.

⁷Ā yoa paye acacia yucu pjīni cūhure cahmachujaro.

⁸Tuhsu, olivocu dicha se cūhure cahmachujaro sihā daporipū posa ti
sihā dapohti macaa cjihti. Ā yoa noano me sitia pohca, yuhure ño payoa taa
ti jū wa muo mūjahti cjihti cūhure cahmachujaro. Ā yoa tí noano me sitia
pohca sehe, olivocu dicha se ti na cahmachuri baharo, tí puarore mahanocā
na, ti morehti cjihti jiahca. Ā yoa tí me sitia pohca mehne morea se sehe,
wahma sacerdotēa sāainare ti dapu bui pio payo, painapure, “Tiro sāna” ti
ni, masichu yoahiti cjihti jiahca.

⁹Ā yoa sacerdotēa yuhure dahra cohtaina bui puhtoro cjihto cūiro jirohca. Ā
jia to ya suhtire duhu ōhti cjihtire ahri cūhure cahmachujaro: wapa tia taa, cor-
nalina wama tia taa pocacāre cahmachujaro. Tí taa sehe sacerdotēa bui puhtoro
ya suhtiro cā sāari suhtiro comapariacari buipū ti duhu ōhti cjihti jiahca. Tuhsu,
paye taa, noaa tāare, daa pocacāre cahmachujaro. Cū pjī, suhti mehne dahrehti
pjīpū duhu ō, ti bui puhtoro to cutiro potoi duhu ōhti cjihti jiahca tí taa.

¹⁰Ā yoa paro, cū wuhu, ti na wahcā mūja masihti wuhure, yu tina watōi
jihti wuhu, yu sahsero cjuahiti wuhu cūhure dahrebasajaro yuhure. ¹¹Tí
wuhu, yu jihti wuhu cjihtore yoaa taa, tina sehe yuhu mūhure ñohti yoaro
seheta bajua warota yoajaro. Ā jichu tí wuhu puhichapū jihti cjihti macaa
cūhure, āta yoajaro tina —ni israe masare yahu dutiha Yawe Moisere.

**Yawe diez to dutiare to joa ōa pjīni cjihtire ti
wihbohti caro cjihtore yoa dutiha Moisere**

¹²Ā yoa Yawe Moisere ō sehe ni yahu duti namoha, israe masare:

—Yuhure acacia yucu pjīni mehne, cū caro, pari caro, ya wuhui jihti caro
cūhure dahrebasajaro. Cū metro diez centímetro yoari caro, ā yoa sarore
sesenta y cinco centímetro sari caro, ā yoa muano cūhure sesenta y cinco
centímetro muari caro dahrejaro.

¹³Tuhsu, urure doha, wetere bo cohā, ne wete mariea mehne pja cahsari
dahre, tí caro buire duhu ō sitoajaro. Ā yoa puhicha cūhure duhu ōjaro.
Puhicha duhtu caharire yuhdu mūjaa pjīni ō dapojarō, bihahti pjī ti yoa
carechu boraerahto sehe.

¹⁴Ā yoa tí caro yoari pahrē macaa ñuchua sohtoarire uru sorori duhu
ōjaro, cū buhusehe ñuchucu sohtoare cū soro, pa buhusehe ñuchucu sohtoare

pa soro. Ñ yoa pa buhusehe pahrē, yoari pahrē sehe cūhure cū buhusehe ñuchucu sohtoare cū soro, pa buhusehe ñuchucu sohtoare pa soro duhu ôjaro. Jipihiti pititia sorori, uru sorori duhu ôjaro.

¹³ Ñ yoa tí carore ti wuahti yucuri cjihtire acáciacu mehne puadu dahre-jaro. Tuhsu, uru mehne pja cahsari dahre, tí yucuri bui cūhure ôjaro. ¹⁴ Duhu ô tuhsu, tí caroi ti duhu ôa sororipu tí yucurire siô sô ôjaro, ti wua wahcāhto noano. ¹⁵ Wiho mejeta tí sororipu ti siô sô ôri baharo, tí yucurire ne pari turi nawea tijjaro. Tóihita tjua dojoajaro.

¹⁶ Ñ yoa pua pjī, taa pjīnipu musare “Ahrire yoaga” ni, yu yahuare joa ôihtja yuhu. Tí pjīni cjihtire tí caro puhichapu wihbo sāanahca musa.

¹⁷ Ñ yoa tí caro bihahti pjī cjihtore yoaa taa, urure doha, wetere bo cohā, ne wete mariea mehne cū pjī yoajaro. Tí caro yoaro puro, saro puro yoajaro tí pjīne. ¹⁸ Baharo martero mehne tí pjīne cjā, pua masu, wua pahmari cjuaa masu dahrejaro. Tí pjī to yoarore pu buhuseheri batori ducuahca. ¹⁹ Ñ yoa tí pjī, tuhsu ti pua masu mehne cūnoihta dahrehti pjī jijaro, ne dohoru marieno. Tina tí pjī to yoarore cū buhusehe sohtoare cūiro ducu, pa buhusehe sohtoare paio ducuahca tina. ²⁰ Cahma ñu piti boca ducuína yoaro sehe ducuahca. Wiho mejeta tí pjīpu ñuroca dijo waroaina yoaro sehe ducuahca. Tuhsu, ti wua pahmari mehne ñui pu piti boca, tí pjīne moha ducuahca.

²¹ Ñ yoa musare “Ahrire yoaga” ni, yu yahuri cjirire pua pjī, taa pjīnipu joa ô, mūhure wiahtja yuhu. Tí yu joa ôhti pjīnine tí caro puhichapu wihbo sāajaro tina. Tuhsu, tí caro bihari pjī mehne bihajaro.

²² Ñ yoa tí carore bihari pjī buipu wua pahmari mehne cahma ñui pu piti boca masuri watoi jiihca yuhu. Tói mūhure piti bocaihca. Ñ yoa tói jicu, paye israe masare yu dutihti cjihtire mūhure yahuihtja tjoa —ni yahuha Yawe Moiserere.

Pāore ti duhu payo mūjahti mesa cjihtore yoa dutiha Yawe Moiserere

²³ Ñ yoa tíre yahu quihō tuhsu, ô sehe ni namoha Yawe Moiserere:

—Mesa cūhure yoaga. Tí mesa cjihtore yoana, acacia yucu pjīni mehne yoaga. Ñ yoa ô puri mesa yoaga tí mesare. To yoarore noventa centímetro yoari mesa yoaga. To saro sehere cuarenta y cinco centímetro sari mesa yoaga. Ñ yoa to muano sehere sesenta y cinco centímetro muari mesa yoaga.

²⁴⁻²⁹ [...]

³⁰ Tí mesapu pāore yu ñurocaroi ñ payo mūjaga musa. Ñ payo mūjana, yuhure ño payoro mehne ñ yoa mūjana ninahca musa —ni yahuha Yawe Moiserere.

Sihā dapoa poca pisahtu cjihtore uru mehne yoa dutiha Yawe Moiserere

³¹⁻³² Ñ yoa tíre yahu quihō tuhsu, Yawe Moiserere ô sehe ni namoha:

—Cūdu sihā dapoa poca pisahtu cjihto cūhure uru mehne dahrega. Tu cjihtore yoana tana, wahmanore uru wete mariea mehne cū pjī, uru pjī dahre muhtasiniga. Tí pjīne tuhsu, martero mehne payu tahari tí pjīne cjā, ô sehe bajudu dahrega juna. To ducuhto cjuadu, uru cohoru cjuadu, tuhsu dupuri cjuadu yoaga ture.

Ñ yoa tu dupuri sehere cū buhusehere tia dupu, pa buhusehe cūhure tia dupu yoaga. Ñ yoa uru cohoru sehe ture noadu bajuchu yoahiti cohoru cjihti

jiahca. Tuhsu, ture yoana, dohoru marieno yoaga musa —ni yahuha Yawe Moiserere.

33-36 [...]

37 Æ ni tuhsu, õ sehe ni yahu namoha:

—Tu dæpuri bui sihõ payohti poca, siete poca dahrega. Tí poca tu potoi buhriahti cjihti jiahca —niha Yawe Moiserere.

38-40 [...]

26 ¹⁻³⁰ [...]

**Yawe to ya tahtia cjihto warore duhu yoroca boro,
ti ducatahti cahsaro cjihtore yoa dutiha**

31 Æ yoa Yawe õ sehe yoa duti namoha Moiserere tjao:

—Cjã tu mihniina, cū cahsaro pjiri cahsaro yuhure cjã tubasajaro. Tí cahsarore yoa taa, payu yuta poca, soro sehe, soro sehe bajua poca mehne cjã tubasajaro yuhure. Yahsaa poca, ñapi ñia yoaro sehe bajua poca, sohãa poca, ã jichu poto yehsea poca mehne cjã tubasajaro yuhure. Æ yoa tí cahsaropu, puu masu, wua pahmari cjuua masu awicã mehne pihõ, dahrebasajaro yuhure.

32 Æ yoa comaa plata cjoari, pititia cjoari yuhure dahrebasajaro. Tí cjoari sehe tí wuhu puhichapu sari pahrẽ sehe, ti duhu cū mu pahãhti cjoari jijaro. Tí cjoari dacho macai susua cjoari cūhu jijaro. Tí coparipu acacia yucuri botarire duhu sãa dapohti cjihti jijaro. Æ yoa tí botari sehe uru mehne ti dahrea cahsari mehne ti duhu õa botari jijaro. Tí botari sohtoari docacã pja yawiri, uru mehne ti yoa yawiri cjuua botari jijaro. Tuhsu, tí yawiripu, yu cjã tu dutiri cahsarore duhu yoroca borohti yawiri jijaro.

33 Æ yoa tí wuhu mohaa cahsari sari pahrẽ sehere, to dohsa wahã suri da docacã tí cahsarore duhu yoroca boro, yu ya tahtia waro cjihtore ducatajaro tina. Duhari tahtia sehe yuhure dahra cohtaina sahsero ti sãa ta mujahti tahtia cjihto jijaro.

Æ yoa yu musare yoa dutia yu joa õa pjĩnine wihbohti caro sehe, ti duhu yoroca boro, ducatahti cahsaro baharo buhusehe sehei, yu ya tahtia pahrẽ sehei jijaro tí caro —ni yahu namoha Yawe Moiserere.

34-37 [...]

Wahiquinare ti jũ wa muohti caro cjihtore yoa dutiha Yawe

27 ¹ Æ yoa Yawe õ sehe ni yahu namoha Moiserere:

—Cū caro, wahiquinare yuhure ti jũ wa muohti carore dahrebasajaro yuhure. Tí caro cjihtore yoaa, acacia yucu pjini mehne susuri caro dahrejaro. Tí carore puu metro veinticinco centímetro yoari caro dahrejaro. Tuhsu, to yoaro purota sari caro cūhu dahrejaro. To muano sehere cū metro veinticinco centímetro muari caro dahrejaro.

2 Æ yoa tí caro puhacari bui tiro sehere pja sawwiri acáciacu sawwiri tiri caro yoajaro. Tí sawwirire yoaa, dohoru marieno dóiputa tí caroputa jia sawwiri yoajaro. Tí carore yoa tuhsu, comaa bronce mehne pja cahsari dahre, jiri caro purore duhu õ sitoajaro. Æ yoa tí caro puhicha sehe cūhure duhu ôjaro.

³ [...]

⁴Comaa bronce mehne pari tene, wahiquinare jũ wa muoaa taa, ti payohti tene cjihto dahrejaro. Tí tene puhacaripere pititia sorori, comaa bronce sorori õjaro. ⁵Tuhsu, tí tenere tí caro susuri caro ji dijaro dacho macai, tí sororipu duhu yojaru juna —ni yahu namoha Yawe Moiserere.

⁶⁻²¹ [...]

Yawe Moiserere sacerdotea cjihti bese, sō dutiha

28 ¹Ã yoa Yawe Moiserere õ sehe ni yahu namoha:
—Mu wahmi Aarõre, ã jichu to pohna Nadabe, Abiú, Eleasa, Itama cũhure pjiga. Tinare pji, yuhure dahra cohtahtina sacerdotea cjihti sōga tinare —niha Yawe Moiserere.

²⁻⁴³ [...]

**Yawe cũ tuturu, me sitia pohcare payo, tiropure ti jũ
wa muo mujahti tuturu cjihtore yoa dutiha**

30 ¹Ã yoa õ sehe ni yahu namoha Yawe Moiserere:
—Yuhure ño payona tana, me sitia pohcare poho payo, tí pohcare musa jũ wa muohto cũhure cũ tuturu dahrega. Tí tuturu cjihtore yoana cũhũ, acáciacu mehneta yoaga. ²Õ puro pjíro yoaga tí tuturu cjihtore. To yoarore cuarenta y cinco centímetro yaro yoaga. To saro cũhure tó purota saro yoaga. To muano sehere noventa centímetro muano yoaga. ã yoa tí tuturu puhacari bui tiro sehere pja sawhiri cjuari tuturu yoaga. Tí sawhirire yoana, dohoru marieno dói tí tuturuputa jia sawhiri yoaga. ³Tí tuturure tuhsu, uru wete mariea mehne pja cahsari dahrega. Baharo tí cahsari mehne tí tuturu jipihtiore duhu õ sitoaga. Duhu õ tuhsu, tí tuturu sawhiri docacái paye pjíni, uru pjínicäre duhu õ sitoaga tjõa —ni yahuha Yawe Moiserere.

⁴⁻¹⁶ [...]

**Yawe cũ wahwa, wamo cosahti wahwa cjihto bronce
wama tia comaa mehne dahre dutiha**

¹⁷Ã yoa Yawe Moiserere õ sehe ni namoha:

¹⁸—Cũ wahwa, yuhure dahra cohtaina ti wamo cosahti wahwa cjihto dahrebasaga. Tí wahware yoi, bronce wama tia comaa mehne yoaga. Tí wahwa to duihto cũhure tí mehneta yoaga. Tí wahware duhu daponu, ya wuhũ wijaroi, wahiquirore musa jũ wa muori caro cahai duhu dapoga. Duhu dapo tuhsu, tí wahwapu core pio sãa mujaga. ¹⁹⁻²⁰Tí co mehne yuhure dahra cohtaina Aarõ, ã jichu to pohna dachoripe yu ya wuhupu ti sãahto pano, ti wamomacarine, ã jichu ti dahpori cũhure cosa mujajaro. Tuhsu, yuhure ño payoa taa, wahiquirore ti jũ wa muoaa wahahto pano cũhure cosa mujajaro. Ahri yu dutiare ti yoaerachuna, wajãnocaihtja tinare. ²¹Ã jia yu dutiro seheta yuhdurucaro marieno ti wamomacarine, ã yoa ti dahpori cũhure cosa mujajaro tina. Tuhsu, tinare ji turianapu cũhũ yu nirire yuhdurucaro marieno ã yorucujaro —niha Yawe Moiserere.

²²⁻³⁸ [...]

Cohamacu to ya wuhũ macaa cjihtire yoahtiore beseha

31 ¹Ã yoa Yawe Moiserere õ sehe ni yahu namoha:
²—Besalere jipihtia yu ya wuhũ macaa cjihtire yoahtiore cjihtore besehi yuhũ. Tiro Uri macuno, Ur panamino, Judá cjiro ya curua macariro

jira. ³Tirote yu Catia Macariro Espíritu Santore wahi yuhu. Yu ā wachu, tiro sehe paye baro ñuhto noaare mijono marieno yoa mihnihtiro cjihto wahahre. ⁴Ā jiro tiro uru mehne, plata wama tia comaa mehne, ā yoa bronce wama tia comaa mehne paye baro to yoachu, noano ñuhto noaa dihta wijaahca tirote. ⁵Tuhsu, tãa, wapa tia tãare taha, tí mehne paye baro to yoachu cūhure, noano ñuhto noaa dihta wijaahca. Yucuri mehne cūhure paye baro to yoachu, noano ñuhto noaa dihta wijaahca tirote. Jipihtia tí mehne dohse jia paye baro ñuhto noaare dahre mihnihtiro cjihtore besahi yuhu tirote —ni yahu namoha Yawe Moisere.

⁶⁻¹⁷[...]

¹⁸Ā yoa Cohamacu tūcu Sinaí sohtoapu jiro, Moise mehne sūhādu batoaha juna. Ā jiro tiro pua pjī, tãa pjīnipu to dutiare to basi to joa ōa pjīnine Moisere wiaha.

**Moise tūcu sohtoapu to yoiari pja butichu ñua, wachu
wihāriro masure dahre, ño payoha israe masa**

32 ¹Ā yoa tina israe masa Moise tūcu sohtoapu to yoiari pja butichu ñua, Aarō caha sehe soroarucu su pihtia wahaha. Ā yoa tina Aarō sehere ō sehe niha:

—Tiro jimahre marine Egiptopu jiinare na tariro. Tiro Moisere dohse waharo wahaga. Āta butinocana tiro. Ā jicu mūhu sehe cohamana yoaga, marine waja muhtahtina cjihtire —niha.

²Ti ā nichu tuhoro, ō sehe ni yuhtiha Aarō:

—Jai. Tí pja pinihta cahmori yosaa musa namosanumia ya, musa pohna mua ya, ā jichu musa pohna numia ya uru mehne ti dahreare cahmachu-tjiāhna, ōi na tahga —ni yuhtiha tinare.

³To ā ni yuhtichu tuhoa, tina jipihtinapu uru mehne ti dahrea, cahmori yosaa yosaina ti yare na cahmachu, Aarōre waha. ⁴Ā yoa tiro tíre ñaha, dohaha te ti sipi pihtichupu. Tiro sehe to ā yoahto pano dihta mehne wachu wihāriro muno masure, puhichapu susurirore dahre tuhsu. Ā jiro tí uru sipi pihtichu ñuno, tiro tí masu bui jiri copapu, tí core pio sōha.

Ā yoa tí masu butichu ñuno, Aarō dihta sehere poha siteroca dijoha. Baharo to yoiari masure to capari cjihti, to dūsero cjihto, ā jichu paye cūhure cjāwedū mehne cahno pahñoha wachu wihāriro yoiaro sehe to bajuhto noano. Cahno pahño tuhsuchū, israe masa sehe tí masure ñua, jipihtinapu ō sehe nimaha:

—¡Ahriro jira mari cohamacu, marine Egiptopu jiinare na wioriro! —nimaha.

⁵Ti ā nichu tuhoro, tiro Aarō sehe wachu wihāriro masu panocāi, tãa mehne pari tuhu ovejaare, ti jū wa muohti tuhu cjihto dahre muoha. Tí tuhure tuhsuro, tiro tuaro sañuno mehne ō sehe ni yahurocaha to masare:

—¡Namichaca bose numu yoajihna Yawe warore ño payona! —niha.

⁶Ā yoa pa numu bohrearocā tina wahcāa, wachu wihāriro masure ño payoha. Pua taha macaa tí masure ño payoa mehne waha. Aarō to dahre muori tuhu buipu, wahma ti ovejaa wajāinare, ti cohamacure jū wa pahño, ño payoha. Baharo, paina ovejaa ti wajāinare, tinare cāa dihi yihso na, tãa tuhu buiputa jū, ño payoha tirote. Duhsaa dihi sehere puhō, ti basi

chunocaha. Tó sehe yoaa, “Mari cohamacu ñurocaroi noano jia tijihna mari basi” ni, tí tuhutua mehne ã yoaa niha. Baharo tíre chu, ti sihnia ti yoaa cãhure sihni, caha wahaha. Æ cahaa, mua, numia mehne ñano yoaha. ⁷Ti ã yoachu ñuno, tiro Yawe sehe Moiserere, tãcu sohtoapu jiriore ò sehe niha:

—Dijaaga. Mu masa Egiptopu mu na taina yuhu mehne dojori tia wahara.

⁸Tina dói waro yu dutiare yuhdurucara. Æ jia uru mehne wachu wihãriro masu, ti dahrerirore ño payoa nina juna. Ovejaare wajã, tãa tuhu buipũ jũ waa, ño payoa nina ti cohamacure. Æ yoaa seheta, ò sehe nia nina, “Ahriri jira mari cohamacu, marine Egiptopu jiinare na wioriro” nia nina mu masa.

⁹Mipu ñuja ahrinare. Tuho duaeraina waro jiri jira yu dutiare. ¹⁰¡Sua yuhdua wahaja yuhu. Ne yuhure niji suoi ninohbu, yuhu tinare wajã pahñohto sehe! Wiho mejeta mu panamana muhure ji turia dijahtina pinihtare, payu waro masa putichu yoa, pjiri curua wahachu yoihtja —niha.

¹¹To ã nichu tuhoro, Moise sehe Yawe to Cohamacure ò sehe ni ño payoro mehne sinitu ñuha:

—¿Yu Puhtoro, egipto masare mu buhiri dahrea mehne tuariro mu ji yuhdurucu sua tiare ño, mu masare Egiptopu jimarinare mu na wiopaihta, dohse yoai suajari muhu tina mehne? ¹²Suaeraboca muhu. “Tinare wajã pahñoi tai nija” ni, mu yoa duaro sehere yoeraboca. ¿Dohse yoai egipto masa sehe ò sehe nichu yoihcari muhu? ¿“Yawe israe masare, tũ yucuri dahpotopu ñano tuhuturo mehne wajã pahño, boro taro tinare naari jira” nichu yoihcari muhu? ¿Noano mehne duhueraboari? ¹³Muhure dahra cohtaina cjiri Abrahã, to macuno Isaa, to panamino Israe cãhure mu yahu cãri cjiripure wacuboca muhu. Muhu sehe quihõno mu niriro seheta yoariro jira. Æ jicu cua pisaro mehne tinare mu ò sehe ni yahu cãri cjiripure wacuboca: “Musare ji nãnu tihtinare payu waro wahachu yoihtja, ñahpichoha poca yoaro sehe. Æ yoa yuhu ahri yahpare musa panamanare waihtja ti ã cãua turia dijahito sehe” nia tiha muhu tina cjirire cua pisaro mehne. Mu ã ni yahu cãri cjirire wacuboca muhu —ni Moise ño payoro mehne sinitu ñuha Yawere.

¹⁴To ã nichu tuhoro, Yawe sehe israe masare “Wajã pahñoihtja” nimariro cjiro wajãeraha juna. Noano mehne duhunocaha juna.

¹⁵⁻¹⁶ Æ yoa Moise sehe tãcu sohtoapu Yawe mehne suhãduro cjiro dijarucuha. To dijaahito pano, Cohamacu to basita tí tãa pjĩnine dahre, tí pjĩni pu buhuseheripureta to dutiare joa ò, Moiserere waha. Æ jiro Moise sehe tí pjĩnine cãuariro dijarucuha. Dijarucu, pu to piti ti mija tariro tiore tãcui cohtariro Josué cahapu dija suha.

¹⁷ Æ yoa Moise Josué cahapu to dija suri baharo, tina puaro dijasinia niha. Ti dijaaro watoi, masa sañurucuro yoaro sehe tuhoha. Ti ã sañurucuchu tuhoro, Josué sehe Moiserere ò sehe niha:

—Pa curua mari ya curua mehne cahma wajã, sañurucuro yoaro sehe tuhorocahca yuhu, mari tuã dapoa wuhuseri cahai —niha.

¹⁸ Wiho mejeta Moise sehe, ò sehe ni yuhtiha tiore:

—Cahma wajã, yuhdurucu su, bihoina ti sañurucuro yoaro sehe ne jieraro coa tara. Cahma wajã bihoeraina cãhu ti sañurucuro ne jieraro coa tara. Poto masa ti basachu tuhorocaja yuhu —niha.

¹⁹ Æ niata dijarucuha. Dijaa, tãcu dahpotoi ti tuã dapoa wuhuseri cahai dija suha juna. Tõpu dija sua, tina wachu muno masure ñu, ã jichu ti basachu

cūhure űuha. Ti ā yoachū űuno, Moise sehe sua yūhdua wahaha. Sua, to na dija ta pĵīnine tīcū tūcū dahpotopū doca muto cūnocaha tiro. ²⁰To doca muto cūri baharocāta, tiro wachū muno masū cūhure narocatĵiāhno, pichacapū doca tiā cūnocaha. To doca tiā cūri baharo, tiro wachū muno masū cĵiro sipī cahaa wahaha. To sipī cahari baharo, tiro sehe daa pohcaricā doca mutoha. Ā yoa tī pohcaricāre co ti sihniri macā bui, poho site poha. Poho site po tuhsū, tī uru wete coreta israe masare tuaro mehne sihni dutiha Moise. ²¹Baharo Aarōre ō sehe ni sinitu űuha:

—Ahrinare űano waro buhiri tiina wahachū yoari jira mūhū. ĴDohse yoai tinare ducataeraputiari mūhū? —ni sinitu űuha Moise.

²²To ā ni sinitu űuchū tuhorō, Aarō sehe ō sehe ni yūhtiha:

—Yūhū mehne suai tĵiga. Masina mūhū ahrina ti mū sūro űano ti jia ti duaare. ²³Ā jia tina ō sehe nihre yūhure: “Moise jimahre marine Egiptopū jiinare na tariro. Wiho mejeta dohse to waharire ne masieraja mari. Āta butinocana tiro. Ā jicu mūhū sehe cohamana yoaga, marine mū tāhtina cĵihtire” nihre yūhure tina. ²⁴Ti ā nichū tuhocū, yūhū sehe noa cahmori yosaa, uru mehne ti dahreare cĵuainare cahmachu dutihi. Ti na cahmachuri baharo, tīre pichacapū doca tiā cūhi. Yu ā yoachū, ahriro wachucā uru mehne ti dahrerirocā bajuahre —ni yūhtiha tiro.

²⁵Ā yoa Moise to űuchū, israe masa sehe Aarō to ducataerari buhiri űano jia tia niha. Ti ā űano jia tichū űuno, ō sehe ni tuhoutuha tiro: “Marine űū tuh-tiina űano ni, buĵupechū yoaa taa nina ahrina” ni, tuhoutuha. ²⁶Ā ni tuhuturo, ti tuā dapoa wūhuseri cahapū sāano waroi sūrucū sū, ō sehe niha:

—Noa Yawe yaina ji duaina cĵero yūhū cahai ducuna taga —niha.

To ā nichū tuhoa, Levī cĵiro panamana, ji turiaina sehe Moise cahai cahmachurucū suha. ²⁷Ti cahmachurucū sū pihtichū űuno, Moise sehe tinare ō sehe niha:

—Yawe mari israe masa Cohamacū ō sehe yoa dutira musare. Musa cahma wajāa pĵīni mehne diina tirore yūhdurucainare wajā dutira. Musa tuā dapoa wūhuseripū wahatĵiāhna, musa coyeare, musa piti ti ji coainare, tuhsū musa wūhuseri cahacāi jiina cūhure diina Cohamacure yūhdurucaina ti jichū, tinare wajānoca dutira. Wajā wahcā, wajā majare tĵua ta mūja dutira —niha Moise tinare.

²⁸To ā nichū tuhoa, Levī cĵiro panamana, ji turia dijaina sehe Moise to dutiro seheta Cohamacure yūhdurucainare wajāha. Ti ā wajāchū, tī nūmure tres mil wahtaroi masa yariaha. ²⁹Tinare ti wajāri baharo, ō sehe niha Moise Levī cĵiro panamanare:

—Musa pohnare, ā yoa musa coyea cūhure michare wajāhre musa Yawere ti yūhdurucari buhiri. Mijono waro jipachuta, to dutiro seheta yoahre musa. Musa ā yoachū űuno, tiro musare noano wahachū yoara. Ā jina musa basi besero yoaro seheta Yawere dahra cohtahtina cĵihti tĵuara musa mipure —niha Moise tinare.

³⁰Ā yoa pa dachoi jipihtina israe masare pĵi cahmachu, tinare ō sehe ni yahuha Moise:

—Musa basita Yawere űano waro yūhdurucari jihre musa. Ā jiro cuaro waro wahaca musare. Ā jicu yūhū sehe, musa ā yūhdurucarina jipachuta, pari turi tūcupū mūjaa, tīre musare durucubasai wahaihtja. Tiro mehne yu

durucuchu, pa tehe nino tiro masare to ñano buhiri dahreborire boboca —ni yahuha.

³¹ Ñ ni yahu tuhsu, tucupu mujaa wahaha tjoa. Muja su, Yawere ò sehe niha:

—Yu masa sehe uru mehne ti cohamacu cjihtore dahre, ño payoa, ñano waro muhure yuhduraca niri jire. ³² Ti ñ ñano yoari baharo jipachuta, tinare mu pja ñachu cahmamaca yuhu. Boga ti ñano yoarire. Bo duaera, tinare waja pahñonoca duai pinihta, yuhu cuhure wajānocaga —niha Moise.

³³ To ñ nichu tuhoru, Yawe sehe tirore ò sehe ni yuhtiha:

—Yuhure yuhdurucarina dihtare buhiri dahreih-tja. ³⁴ Mipure dijaaga. Dija su, mu masare suho naaga yu muhure yahu quihōri yahpapu. Anjo, yu warocariro, masa wahahtore ño muhtanohca masare. Wiho mejeta yu niriro seheta cū numu mu masa yuhure yuhduraca, duhsaina cjiire buhiri dahreih-tja —ni yuhtiha Yawe Moisere.

³⁵ To ñ nirire sohtori tiro, tina yuhdurucarinare puria dohatia mehne buhiri dahrea tiha Yawe.

Yawe Moisere to doca muto cūa pjini cjiiri cohtotaro, paye pjini poha dutiha

34 ¹ Ñ yoa Yawe Moisere ò sehe yoa dutiha:

—Pua pji, taa pjini tó panopu yu muhure waa pjini yoaro sehe bajua pjini pohaga. Mu doca muto cūa pjiniyu yu joa òa cjiireta pari turi joa òi tai nija tjoa. ² Tuhsu, mu yare cahnoyu muhtaga ñamichaca bohrearocā ahdu tūcu, Sinaí sohto waropu yu cahai mu muja tahto sehe —niha Moisere.

Resumen: Ñ yoa Moise Cohamacu mehne tūcu sohtoapu sūhūduro sūriro cjiro dija taha. Cohamacu to dutiare tiro Moise to basi taa pjiniyu to joa narire na dija taro niha. Na dija wihi, to masare tí jipihtiare ni ño, yahu turiaha Moise.

Tíre yahu tuhsu, Cohamacu to ya wūhu macaa cjihtire ti na cahmachuhti macaa cūhure yahu turiaha. Tí macaare yahuro, ò sehe ni yahu turiaha Moise tinare:

—Yawe yuhure ò sehe ni masare yahu dutihre. To ya wūhu cjihtore tirore yoabasahtina jiyuhca masa. Ñ jina noa tí wūhure yoahti cjihtire wa duaina ji coaro mehne na cahmachuhtina jiyuhca masa. Na cahmachu, to niriro seheta tí wūhure yoahtina jiyuhca masa —ni yahu turiaha Moise to masare.

To ñ ni yahuchu tuhoa, tina israe masa sehe pjíro wahcheha. Ñ wahchea, ò sehe ni yuhtiha tina tirore:

—Jai. Āta yoanahtja sā. To niriro seheta tí wūhure yoanahtja —ni wahchero mehne yuhtiha tina.

Baharo jipihtia tí wūhure ti yoahti cjihtire na cahmachuha. Ñ na cahmachua, payu waro na cahmachuha tina. Ti ñ payu waro na cahmachuchu ñño, Moise sehe tinare tó purota na cahmachu dutiha.

Ñ yoa tina tí wūhu macaa cjihtire yoa dūcaa tiha juna. Tíre tinare suho dahra muhtariro sehe Cohamacu to beseriro Besale jia tiha. Cohamacu to basi to beseriro jiyuchu, tina israe masa cūhu tiro mehne ji coaro dahraa tiha. Ñ jiro ti dahraa cūhu tinare quihōno wahaa tiha. ³⁻³⁵ [...]

39 ¹⁻⁴¹ [...]

Israe masa Cohamacu ya wūhu macaa cjihtire yoa pahñoha

⁴² Ñ yoa Yawe Moisere to dahre dutiriro cjiro seheta tina sehe tí wūhu macaa cjihtire yoa pahñonocaha juna. ⁴³ Ti tuhsuri baharo, Moise sehe tíre

ñu beseweha. To ñuchu, Yawe tirore to yoa dutiro sehta quihôno yoari jiha tina. Ti ã quihôno yoari baharo jichu ñuno, tiro Moise sehe tinare Cohamacure ò sehe ni sini payoha:

—Musare mari puhtoro Cohamacu noano wahachu yoajaro —ni sini payoha tiro tinare.

40 ¹⁻¹⁶ [...]

Moise to coyea mehne Cohamacu ya wuhu cjihtore tuhsu dapoha

¹⁷Israe masa Egiptopu jimarina ti wijaari baharo, cû cûhma noano, pa cûhmare cû dacho ñaha wahcârucuro nia tiha. ã yoa tí dachoihta Moise cûhu Cohamacu ya wuhure tuhsu dapoa tiha. ¹⁸Tí wuhure tuhsu daporu taro, ò sehe yoaha tiro: Ti wahcô dapohtore plata wama tia comaa cjoari, copa tia cjoari mehne quihô cû muhtaha. Quihô cû tuhsu, tí coparipu acacia yucu pjînine duhu sâa dapo wahcâ, tiha dapoha. Tuhsu, tí pjînipu wahâa sororipu yucurire siô sô, tí wuhu tiharicare tua ñaha dapoha. Tí wuhu tiharicare tuhsu, Cohamacu ya tahtiare ti biha ducatahtoi botarire dapoha. Tuhsu, tí wuhu sopaca cûhure paye botarire dapoha.

¹⁹Tí botarire dapo tuhsu, ò sehe yoaha tjoa: Cabraa cahsari mehne ti dereri cahsaro wuru mehne tí wuhure mohaha. Tí cahsaro wuru buipu pa cahsaro wurure moha payo, tuâ dapo namoha. Tí wuhu sopaca dihtare bihaerasingi. ã yoaro, Yawe to dutiro sehta yoaro niha Moise.

²⁰ã yoa tuhsu, ò sehe yoaha tjoa: Cohamacu to dutiare to joa naa pjînine na, tí pjînine Cohamacu to wihbo dutiri caropu wihbo sâaha. Wihbo sâa tuhsu, tí carore ti wuahti yucurire tí caroi wahâ sororipu siô sâa ôha. Tuhsu, tí carore bihaha juna. ²¹Biha tuhsu, Cohamacu ya wuhupu na sâa, to jiri tahtiapu tí carore wihbo cûha. Wihbo cû tuhsu, cjâ turi cahsaro mehne duhu yoroca dijo, tí carore ducata dapoha. ã yoaro, Yawe to dutiro sehta yoaro niha Moise.

²²ã yoa tuhsu, ò sehe yoaha tjoa: Cohamacu to ya tahtia wijaro macari tahtia poto buhusehe sehe Cohamacu to yoa dutiri mesare duhu dapoha. ²³Duhu dapo, tí mesai Yawere ño payoro mehne ti waa pâore payoha. ã yoaro, Yawe to dutiro sehta yoaro niha.

²⁴ã yoa tuhsu, ò sehe yoaha tjoa: To duhu daporu mesa potoi sihâ dapoa poca pisahture duhu dapoha. ²⁵Duhu dapo, tu dupuri sohtoripu sihâa dapohti pocacâre duhu payo, Yawe to ñurocaroi tí pocacâpu sere pio sâa, sihâ dapoha. ã yoaro, Yawe to dutiro sehta yoaro niha.

²⁶ã yoa tuhsu, ò sehe yoaha tjoa: Me sitia pohcare ti jû wa muohti tuturu, uru cahsari mehne ti duhu ôri tuturu na taa, Cohamacu ya tahtiare ti ducataru cahsaro cahacâi duhu dapoha. ²⁷Duhu dapo tuhsu, me sitia pohcare tí tuturupu duhu payo, jû wa muo, Cohamacure ño payoha. ã yoaro, Yawe to dutiro sehta yoaro niha Moise.

²⁸ã yoa tuhsu, ò sehe yoaha tjoa: Cohamacu ya wuhupu ti sâahti sopacare ti cjâ turi cahsaro mehne duhu yoroca boro, ducata dapoha. ²⁹Tuhsu, tí wuhu wijaro, sopaca potoi wahiquinare wajâ, ti jû wa muo mujahti caro cjihto cûhure duhu dapoha. Tuhsu, tí caropu wahiquinare duhu payo, jû wa muo, Cohamacure ño payoha. Jû wa muo tuhsu, trigore olivo se mehne ti morea cûhure tí caroihta duhu payo, jû wa muo, Cohamacure ño payoha tjoa. ã yoaro, Yawe to dutiro sehta yoaro niha.

³⁰ Ñ yoa tuhsu, ñ sehe yoaha tjoa: Ti jũ wa muori caro, ñ jichu Cohamacu ya wuhu sopaca, tí dacho macai ti wamo cosahti wahwa cjihto cũhure duhu dapoha. Tuhsu, tí wahwapu core pio sãa dapoha. ³¹⁻³² Tí co mehne Moise, Aarõ, ñ jichu Aarõ pohna cũhu Cohamacu ya wuhupu ti sãahto pano, ñ yoa wahiquinare wajã, jũ wa muo, ti ño payoa wahahto pano cũhure ti wamomacarine, ti dahpori cũhure cosaa tiha. Ñ yoaa, Yawe to dutiro seheta yoaa niha tina.

³³ Tí jipihtiare yoa tuhsu, Moise sehe tí wuhure sahrĩ sãaha juna. Wahiquinare wajã, duhu payo, ti jũ wa muo mujahti caro cũhu tí sahrĩno puhicha sehe tjuaha. Ñ sehe yoa, sahrĩ sãaha tiro. Bronce wama tia comaa cjoari, copa tia cjoari mehne ti sahrĩ sãahto cjihtore quihõ cũ majareha. Tuhsu, tí coparipu acacia yucu botarire duhu sãa dapo wahcãha. Tí botaripu suhti cahsarire tuã dapo majarea, sahrĩ sãa dapoha juna. Tí sahrĩnopu ti sãahti sopaca cjihto sehere ti cjã turi cahsaro mehne duhu yoroca boro, ducata dapoha. Tó sehe yoa, tí wuhure tuhsu dapoha Moise.

**Cohamacu ya wuhure ti tuhsuri baharo, tí
wuhu buipu me curua surucu suha**

³⁴ To tuhsuri baharota, Cohamacu jiri curua, me curua sehe tí wuhure bihaa wahaha. Ñ wahachuta, Yawe to si sitea cũhu tí wuhure tuaro si site sahsea wahaha. ³⁵ Ñ wahachu, Moise sehe tí wuhupure ne sãa masieraha. ³⁶⁻³⁸ Baharo tí curua, Yawe to jiri curua sehe tjuwe muja, to ya wuhu buipu surucu sua wahaha juna. Ñ yoa tí curuare israe masa sehe masa marienopu waharucua, ñ ñua tiha. Dachore me curua yoaro sehe bajurucua tiha tí curua. Ñami sehere picha pohna yoaro sehe bajurucua tiha. Tí curua to wahachu ñua, israe masa cũhu ti tuã dapo, ti jia wuhuserire nawe dijo, cahno, tí curua baharo nunu ti wahcã mujaa tiha. Tí curua wahaerachu ñua, tina cũhu wahaera tiha.

LEVÍTICO

1 ¹ Ā yoa Yawe to ya wuhu puhichapu jiro, Moiserē ō sehe ni yahuroca wioha:

²—Mū coyea, israe masare ō sehe ni yahuga. Diro wahiquinare wajā, jū wa mūo, yuhure nō payoro taro, wachua, cabraa, ā jichu ovejaa wahiquina mūa, nuina barore cūioretā bese, wajā, jū wa mūojaro yuhure.

³ Ā yoa diro wachure wajā, pjarirore jū wa mūo duariro baro, to pjacure ne soro jia baro marierirore na tajarō. Pari turi yuhū mehne to noahito sehe, tiro masuno, to wachure yu ya wuhū sāari sopaca cahai naa wahcājaro. Tōi Aarō panamana ji turia dijaina, yuhure dahra cohtaina to wachure nahaba-saahca yuhure juna. ⁴ Baharo, wahiquiro puro sehe to wahiquiro dapu bui to wamomacare duhu payojaro. To duhu payori baharo, masuno, yuhū mehne buhiri ti, to yariaboro sehere, wahiquiro sehe cohtota, yariabasaro hca. Tiro wahiquiro masuno ya buhiri yariachū, yuhū masuno sehere buhiri dahresi. ⁵ Tiro sehe yu ya wuhū potoi to basi wahiquirore wajājaro. To wajāri baharo juna, yuhure dahra cohtaina sehe wahiquiro dire na, ti wahiquina wajāinare ti jū wa mūori caropū, tī dire wajā site sihōjaro pititia buhuseheripureta —ni yahuroca wioha Yawe Moiserē.

⁶⁻¹⁷ [...]

16 ¹ [...]

**Yawe to ya tahtiapure to yahu quihōri dacho
sahsero Aarō to sāhtore yahuha Moiserē**

² Ā yoa Yawe Moiserē ō sehe niha:

—Mū wahmi Aarōre ō sehe ni yuhure yahubasaga: Yu yahu quihōeraa dachorire yu ya tahtiapure yuhdu sāaeno tjiijaro tiro. Yuhū sehe tī tahtiapū jiri caro, yu musare dutiare yu joa ōa pjinine mūa wihbori caro cahapū jija. Tī carore bihari pjī bui jiri me curuapū jija yuhū. Tōi yu jichū, tī tahtia sehe nāa marieni tahtia waro jira. Ā jiro yu yahu quihōeraa dachorire sāaeno tjiijaro tiro. To mū sūro sāano pinihta, yariaa waharohca. ³ Ā jiro Aarō sehe “Yuhupū yariari” nino, yu yahu quihōri dacho dihtare sāa mūajaro. To sāahto pano ō sehe yoa mūajaro tiro: wachū wihā curerirore, tuhsū, oveja mūnoro naa mūajaro tiro. Cohamacū mehne to buhiri tiare boa sinino taro, to wajā, jū wa mūohtina cjihti jijaro tina. Ahrire Aarōpure yuhure yahu turiabasaga —niha Yawe Moiserē.

⁴⁻¹⁴ [...]

¹⁵ Ā yoa Yawe Moiserē ō sehe ni namoha:

—Ahri cūhure Aarōpure yuhure yahu turiabasaga. Tiro cabra sehe, masa yuhū mehne ti buhiri tiare to boa sinibasaro tachū, to wajā, jū wa mūohtiro

cjihto jijaro. Ñ yoa to di cūhu yu ya tahtiapu na sāa, yu musare dutiare yu joa ōa pjīnine musa wihbori carore bihari pjī buipū to wajā site sihōhti cūhu jijaro. Tuhsu, tí carore to ñuroca ōri pahrē cūhure to wajā site sihōhti cūhu jijaro. Wachu di mehne to yoiaro cjiro seheta yojaro cabra di mehne cūhure. Ahri cūhure Aarōpure yahu turiabasaga yuhure —ni yahu namoha Yawe Moiserē.

16-34 [...]

NÚMEROS

Resumen: Moise, israe masa mehne, Cohamacu ya wuhure to tuhsu dapori baharo, cū sū noano tū tūcu Sinaí dahpotoi jisinia tiha tina. Tói ti jisinchu, Cohamacu sehe sacer-dotea, tirere dahra cohtahtina to beserina cjiri Aaröre, to pohna pititiaro cūhure to ya wuhui ti dahrahti macaare coā yahu quihōha. Tuhsu, tinare yoadohohtina cjihti Leví cjiro panamana ji turiainare bese, sōha Cohamacu. Tina sehe israe masa pa sehepu ti wahaa tachu, Aaröre, tuhsu, to pohmare Cohamacu ya wuhure wa site borodoho, naa wahcādoho mujahtina cjihti jiha.

Tíre tinare to yahu quihōri baharo, israe masa sehe tū tūcu Sinaí dahpotoi jirina cjiri wahaa wahaha juna. Payu dachori waha, pu Canaā yahpa suro cahacāpu suha juna.

Canaā yahpare duhti ñua wahahtinare bese, waroca dutiha Yawe Moisere

13 ¹ Ñ yoa Moisere ñ sehe yoa dutiha Yawe:

² —Yu musare wahti yahpa, Canaā yahpare duhti ñua wahahtinare besega. Israe masa curuare, cū curua jiparota doce curuari cahma tju wa dapo jiri curuare tí curuaripe macainare cūiro ti puhtorore bese, waro-caga —niha.

³ Yawe to ñ nichu tuhoru, to dutiro seheta yoaha Moise. Wuari dujuro, Parā wama tiri dujuroi jisiniinare, israe masare, cāa curuaripe macainare cūiro ti puhtorore beseha. Bese tuhsu, jipihtina doce waro warocaa tiha Moise.

⁴⁻¹⁶ [...]

¹⁷ To warocahto pano, ñ sehe ni yahu quihōha Moise tinare:

—Canaā yahpa mari ya yahpa cjihto sehe Néguebe wama tiri dujuroi ji ducaca. Ñ jina musa sehe tí dujuroi duhti ñu duca wahcāga. Duhti ñu wahcā, tū yucuri jiri buhusehe sehe waha, tí yucuriputa mujaa, duhti ñu wahcāga.

¹⁸⁻²⁰ Ñ duhti ñu wahcāna, tí yahpa macaina ti jia tiare noano ñuga. Ōpe macaare ñu, besewega. “¿Tuaina jijari? ¿Payu jijari? Tuhsu, ¿ti ya macari cūhu taa mehne ti biha ducata, ti sahrī sāa macari jijari?” ni, tí cūhure noano ñuga. Tuhsu, ti jiri yahpa cūhure ōpe macaare ñu, besewega. “¿Toaa cahmari dihta jijari? ¿Yucuri jiri dihta jijari?” ni, tí jipihtiare ñuga. Tuhsu, musare cuapachuta, cāa ti toaa dichare na tahga —ni yahu quihōha Moise tinare.

Ñ yoa ti duhti ñua wahari pja sehe se dari dicha wahma ti ñisori pja jiha.

²¹⁻²² Baharo tina sehe to niriro seheta tí yahpare duhti ñu tinia wahaa wahaha juna. Sī wama tiri dujurore poto yuhdu wahcā, Néguebe wama tiri dujurore pu su, tói duhti ñu duca wahcāa tiha tina. Tí dujurore duhti ñu wahcā, pu Hebrō wama tiri macapu suha. Tí macai tiaro mua Aimā, Sesai, ñ jichu Talamai wama tiina jia tiha. Tina sehe Anaqui cjiro panamana ji turiainapu

jia tiha. Tiro cjiro panamana ji turiaina sehe muaina wuri ji, tuhsu, pjacu tuaina wuri cūhu jia tiha.

Tina wuri ti jiri maca Hebrō sehe bucu maca waro jia tiha. Egipto yahpapu jiri maca Soāre maca ti pjāhto panopu tí maca Hebrō sehe ji tuhsua tiha.

Baharo tina sehe Hebrōre yuhdu wahcāa, Rehobe, Hamate wama tia macari suro cahacāpu sua tiha. Tí macari sehe Canaā yahpa ji batoaro caha curepu jia macari jia tiha. Tí macari suro caha curepu duhti ñu batoa tiha tina. ²³⁻²⁴Duhti ñu batoa tuhsu, majare tjuaarucua, tū yucuri watoi jiri duhteropu sua tiha. Tí duhteroi se tōho wurure, tí tōho dupu mehneputa dute naa tiha tina. Dute na, tí tōhore yucucupu duhte ō, puaro mua wua wahcāa tiha. Tí tōho wurure ti dute nari duhtero cjirore “Escó” ni, wamoa tiha. (*“Escó” nino, “se tōho wuru” nino nica hebreo masa ya dusero mehne*) Tuhsu, granada dichare, ā jichu higo dica cūhure tí duhteroihta naa tiha tina.

²⁵Ā yoa cuarenta dachori waro duhti ñu tini, majare tjuaa wahaa tiha tina.

²⁶Majare tjuaa, ti wijaa ducari maca Cadeseputa majare tju suha tjoa, Parā wama tiri dujuroi jiri macapu. Tju su, Moisere, Aarōre, ā jichu israe masa cūhure Canaā yahpapu ti ñurire yahuha. Tuhsu, tó macaina ti toaa dichare, ti na tari cūhure tinare ñoha. ²⁷Ō tuhsu, Moisere ō sehe ni yahuha:

—Sāre mu duhti ñu dutiri yahpare duhti ñuna suhi sā. Potocāta jiri jihre. Mu niriro seheta jiri jire. Tí yahpa noaputiari yahpa jihre. Mari chusoa baro, mari sihnisoa baro cūhu jipihtinocahre tí yahpapore. Ñuna muhu ahri ti toaa dica, tópu sā na tarire —niha tina tirore.

²⁸Ā ni tuhsu, ō sehe ni yahu namoha:

—Tí yahpa macaina masa cūhu tuaina bajuhre. Ti jia macari cūhu bujua macari wuri jihre. Tuhsu, taa mehne ti biha ducataa macari chori cūhu jihre. Tuhsu, tí sahsero ñuerahi sā. Cū curua, masa curua macaina pjacu tuaina wuri ji, tuhsu, muaina wuri cūhure ñuhi sā, Anaqui cjiro panamana ji turiaina chorire. ²⁹Ā yoa tí yahpapore masa payu curuari macaina jihre. Jihre amalecita masa, hitita masa, jebuseo masa, amorreo masa, cananeo masa jihre tí yahpapore. Amalecita masa sehe wuari dujuro, Néguebe wama tiri dujuropu jihre. Ā yoa hitita masa, jebuseo masa, ā jichu amorreo masa tina tia curua macaina sehe tū yucuri caha pahrē sehe jihre. Ā yoa cananeo masa sehe dia pjiri ma, Mediterráneo wama tiri ma duhtu cahapu jihre. Jordão wama tiri ma duhtu cahapu cūhure cananeo masata jihre —ni yahu namoha tina.

³⁰Ti ā ni yahuchu tuhoa, masa, Moise potoi ducuina sehe, nure ducaha. Ti nurechu tuhoro, cūiro duhti ñuina mehne suriro Calebe sehe:

—Dihta mariaha masa —niha.

Ā ni tuhsu, ō sehe ni namoha tiro:

—Ti jiri yahpare mana wahajihna mari. Tí yahpare mana wahana, bihono-canahca mari —niha tiro tinare.

³¹To ā nichu tuhoa, paina tiro mehne duhti ñua surina sehe ō sehe niha:

—Tí yahpare mana wahana, bihosi mari. Tina sehe mari bui tuaina wuri jihre —niha tina.

³²Calebere ā ni yuhti tuhsu, ti ñurire ō sehe ni israe masa sehere mahño yahuha tina:

—Sā duhti ñuna suri yahpa cuari yahpa waro jihre. Tí yahpa macaina tuaro ti basi cahma wajāa nihre. Ā yoa tí yahpa macaina cūhu muaina wuri

jihre. ³³Tuhsu, Anaqui cjiro panamana ji turiaina wuri cūhure űuhi sā. Tina mehne űu piti bocachu, sā sehe poreroacā yoaro sehe tjuahi. Ā yoa tina cūhu poreroacā yoaro seheta űuhre sāre —ni mahño yahuha tina israe masare.

Israe masa Cohamacure yuhdurucaha

14 ¹Ā yoa israe masa sehe űaa quitire tuhoa, tuaro cuiha. Ā cuia, tí űamine tuaro mehne sañurucu, tiha tina. ²Ā wahaa, tina jipihitina Moisere, ā jichu Aarōre űano ni tuhtiha. Ō sehe ni tuhtiha tina:

—Egipto yahpapu sā yaria pihtia wahachu noaboa sāre. Tuhsu, ahri dujuro, wuari dujuroihta sā yaria pihtiachu cūhure noa yuhduaboa sāre. ³ĶYawe cūhu dohse yoaro sāre tí yahpapore na sāa duajari? ĶTópū sāa, cahma wajā, yaria pihtiachu yoaro taro na tari tiro sāre? ĶSā yaria pihtiri baharo, sā pohnare, sā namosanumiare cahamaca tipechu yoaro taro na taboari tiro? ĶEgiptopu majare tjuaa wahachu noaboca sāre! —ni tuhtiha tina Moisere, ā jichu Aarōre.

⁴Tinare ā ni tuhti tuhsu, ti sahsero ō sehe ni durucuha:

—Pairo mari puhtoro cjihto bese, sōno cahmana marine. Tiro marine Egiptopu suho mu tā tjuaarohca —ni durucumaha tina.

⁵Ti ā nichu tuhoa, Moise, Aarō tina puaro tuaro cahyaha. Ā cahyaa, masa jipihitina ti űurocaroi na tuhcuca caha su, muhri caha dijaha, pu ti wuhduu wapari yahpa pihachupu. Tó sehe yoa, Cohamacure siniha tina. ⁶Ā yoa ti ya yahpa cjihtore duhti űua surina mehne macaina, Nū macuno Josué, ā jichu Jefone macuno Calebe tina puaro cūhu cahyaro mehne ti suhtire tuhreha. ⁷Tuhre tuhsu, ti coyea israe masare ō sehe ni yahumaha tina:

—Sā duhti űuna suri yahpa sehe mari ya yahpa cjihto sehe noaputiari yahpa jihre. ⁸Ti yahpapore mari chusoa baro, mari sihnisoa baro cūhu ji yuhduahre. Yawe marine űu ji coariro jiro, tí yahpare machu yorarohca marine. Ā yoa tí yahpare marine warohca tiro. Marine űu ji coarerariro jiro, tí yahpare machu yoasi tiro marine. ⁹Ā jina masa cūhu Yawere tó puro űaca waro yuhdurucaena tjiga. Tuhsu, tí yahpa macaina cūhure cuiena tjiga. Tina sehe tinare yoadohoriro cjaerara. Mari sehe Yawere cjuaja, marine yoadohoriro. Tiro mari mehne jira. Ā jina cuiro marieno tinare yuhdurucajihna mari —ni yahumaha tina.

¹⁰Ti ā ni yahupachuta, israe masa sehe tinare tuho duaeraha. Ā tuho duaera, tinare taa mehne doca wajā duamaha. Ti ā doca wajā duachu űuno, masa jipihitina ti űurocaroi Yawe sehe to wuhu bui wacūenoca si site mua wahaha.

Moise to masare pja űuno mehne Yawere sini payoha

¹¹Ā yoa Moisere ō sehe niha Yawe:

—Ahrina mu masa yuhure wiho jiriro yoaro sehe űuna. Masa ti yoea-raare tinare yu yoa űo mujapachuta, yuhure ne wacū tuaerara tina. ¹²Ā jii tinare puria dohatia mehne dohati yaria pihtiachu yoihtja. Ā yoi, muhure ji turiaina sehene tina cjiri bui pjiri curua, tuhsu, tina cjiri bui tuari curua wahachu yoihtja —niha Moisere.

¹³To ā nichu tuhoru, Moise sehe Yawere ō sehe ni siniha:

—Tua yuhdurucu suriro mu jia tia mehne israe masare Egiptopu jirinare na wiohre muhu. Mu na wiorina ti jipachuta, tinare mu wajā pahñochu,

noaeraboca. Mu wajā pahñochu, Egipto macaina sehe mu ā yoa quitire tuhoboca. ¹⁴Ā tuhoa, Canaā yahpa macainapure yahu turaboca tina. Wiho mejeta Canaā yahpa macaina sehe sā israe masa mehne mu jia pinihtare masi tuhsura. Me curuapu mu ā jirucuchu, dachoripe mūhure sā űua cūhure masi tuhsura tina. Mūhū sehe dachore tí curuapu jitjāhcu, sāre suho mu tāru-cura. űami cūhure tí curuapu jicu, jūri pohna yoaro sehe bajuro yoatjāhcu, sāre suho mu tā wahcārucura mūhū. Tí cūhure masi tuhsura tina. ¹⁵Ā yoa paye masa curuari macaina cūhū sāre mu noano yoa quitire tuho tuhsura. Ā tuhoa, mūhure cui, űo payora. Ti ā cui, űo payori baharo jipachuta, israe masare mu wajā pahñochu, noaeraboca. Mūhure ti cui, űo payoborirore űano ni ti bujupechu yoa duai niboca mūhū, ā yoi. ¹⁶Mu ā yoachu, ō sehe ni bujupeboca tina: “Israe masare cua pisaro mehne ‘Waihtja’ to nimari yahpapu tinare na sā bihoeramahno, wuuri dūjuropu tinare wajā pahñonocahre Yawe” ni, bujupeboca tina, mu ā yoachu. ¹⁷Ā jicu mūhure ō sehe ni sinija yūhū. Noaputiaro mu pja űua tiare, mu cahā tiare yū masare mu űochū cahmamaca yūhū. Mu basi mu yahuriro seheta mu yoachu cahmamaca yūhū. Mūhū sehe ō sehe nihre: ¹⁸“Yūhū Yawe dōi waro suariro jieraja. Yū masare ā cahīrucuja yūhū. Tina yūhure yūhdurūca, ti űano yoaare bo mūjaja yūhū. Ā bo mūjariro jipaihta, buhiri tirirore, ‘Ahriro buhiri marieriro jira. Buhiri dahresi tirore’ nieraja. űano yoaina warore buhiri dahreja yūhū. Ā yoa ti pohnare, ā jichū ti panamana ji turiaina cūhure buhiri dahreja yūhū” nihre mūhū. ¹⁹Mu ā nirire wacūcu, mūhure sinija. Ā cahīrucuriro mu jia tiro seheta yū masa űano ti yoirire mu bochu cahmamaca yūhū. Egipto yahpare wijaa, ōpu sāre mu na tarucuro puro ti űano yoirire bo mūja tuhsahre mūhū. Mu ā bo mūjariro seheta, mipu ti űano yoi cūhure pari turi mu bochu cahmamaca yūhū —ni sinihā Moise Yawere.

Cohamacu israe masare tirore ti yūhdurucari buhiri buhiri dahreja

²⁰Moise to ā ni sinichū tuhorō, Yawe sehe ō sehe ni yūhtiha:

—Jai. Mu yūhure sinino seheta mu masa yūhure ti yūhdurucarire boihtja.

²¹Ā bopaihta, “Noanohca. Jia nojaro. Tinare buhiri dahresi” nieraja. Ā jicu yūhū ā jirucuriro, ahri yahpa jipihtiuro macainare yū noaputiaro yū ji yūhdurucu sua tiare masichū yoiaro, tinare cua pisaro mehne ō sehe nija yūhū: ²²⁻²³Ne cūiro yūhure yūhdurucariro cjiro tinare yū wabori yahpapure sāasi. Tina sehe yū tina mehne jichū, yū si siteare űumahre. Ā yoa Egipto yahpapure, tuhsu, wuuri dūjuropu cūhure ti yoa bihoeraare yū yoa űochū cūhure űumahre tina. Ā űupahta, yūhure masieraina yoaro sehe yūhdurūca, diez tahari waro tuaro mehne ti cahmaare yūhure sinihre. Ti ā yoi buhiri ti űuchusuma cjiropure cua pisaro mehne, “Waihtja musare” yū niri yahpapure ne sāasi tina. ²⁴Calebe, yūhure dahra cohtariro pinihta yūhure yūhdurucaro marieno ā wacū tuarucuriro jira. Ā jiro tiro to duhti űuno suri yahpa cjiropu sāanohca. Ā yoa to panamana ji turiaina cūhū tí yahpare pu ti jiahca —ni yūhtiha Yawe Moiserē.

Ā ni yūhti tuhsu, ō sehe ni yahu namoha:

²⁵—Ā yoa musa sehe Canaā yahpapure wahasiniena tjiga. Musare tí yahpapu jiina amalecita masa, cananeo masa cūhū musa taa quitire tuhoa, musa mehne cahma wajā taa, tū yucuri watoi bucua caha cohtaapu nina. Ā

jina mûsa sehe ñamichacata wuuri ñujuropu majare tjuaa, Sohãri ma caha sehe wahasiniga —ni yahu namoha Yawe Moisere.

²⁶Moisere ã ni yahu tuhsu, Aarõ to tuhoroi õ sehe ni yahu namoha:

²⁷—Ahrina israe masa ñaina, yuhure ñano ni, ti durucu mujaa mehne pome yuhdua wahaca yuhu. Michapucacã yuhure ti ñano ni durucua cühure tuhoi yuhu. ²⁸Ã jina mûsa sehe yuhure õ sehe ni yahubasaga tinare: Yuhu Yawe ã jirucuriro cua pisaro mehne õ sehe nija: “Ti ñano ni durucuchu, tuhoi yuhu. ‘Ahri ñujuro, wuuri ñujuroihta sã yaria pihtiachu noa yuhduaboa sãre’ nihre tina yu tuhochu. ã jicu ti siniriro cjiro sehetã wahachu yoihtja tinare. ²⁹Ahri ñujuroihta wapa marieina yoaro sehe yaria pihtia wahaahca tina. Jipihtina diecinueve cühmari bui cjuaina, tó panopu mûsa quihõ, ti wamare mûsa joa narina, yuhure ñano ni, ti durucuri buhiri yaria pihtia wahaahca. ³⁰Yuhu musare cua pisaro mehne, ‘Tí yahpai ji dooachu yoihtja’ yu niri yahpare ne sãasi tina” nihre musare —ni yuhure yahubasaga tina mu coyeare.

‘Ã yoa yu niriro sehetã Jefone macuno Calebe, ã jichu Nû macuno Josué tina puaro pinihta tí yahpapore sãahca. ³¹Ã yoa yuhure yuhdurucaina cjiro pohnapu cühu tí yahpapore sãahca. Ti pucsuma sehe cuia, õ sehe nimahre: “Sã pohinare sãre ñu tuhtiina tuaro mehne ñaha, cahamaca tipeboca” nimahre. Ti ã nimarina cjiro sehe tí yahpapore sãahca. ã jia ti pucsuma cjiro cuia, ti sãa duaerari yahpa cjirore ti pohnapu sehe tí yahpare wahchero mehne pu ti jahca. ³²Ti pucsuma sehe ahri ñujuroihta wapa marieina yoaro sehe yaria pihtia wahaahca. ³³Ti pohna cühu tí yahpapu ti sãahto pano, ti pucsuma ya buhiri cuarenta cühmari waro ahri ñujuroi ti nuina wahi-quinare noho ti waharoi ñu wihbo sito ta tinisiniahca. Tópe cühmari ñano yuhdu tiniahca tina, ti pucsuma Cohamacure ti yuhdurucari buhiri. Pu ti pucsuma ahri ñujuroi ti yaria pihtichupu, Canaã yahpapu sãahca juna.

³⁴‘Ã yoa mu duhti ñu duti mu warocarina sehe “Mûsa israe masare waihtja” yu niri yahpare cuarenta dachori waro duhti ñu tinia suri jimare. ã jiro tópe dachori jiboriro sehetã cuarenta cühmari waro jirohca israe masa ti buhiri tihto. ã jia cuarenta cühmari waro ahri ñujuroi ñano yuhdu tiniahca tina. ã waharo mehne “Cohamacure mari yuhdurucachu, cua pisaro waro jira” ni, masiahca tina. ³⁵Ã jicu yuhu Yawe mahõono marieno õ sehe nija tinare: “Ahri ñujuroi tinare ñano yuhdu sito ta, yaria pihtia wahachu yoihtja. ãta yoihtja tinare, yuhure cohã duaa, cahmachu, ñano ni, ti durucuri buhiri.” ã ni, mu masare yahu turiabasaga yuhure —niha Yawe Moisere, ã jichu Aarõre.

Moise to duhti ñu duti warocarina cjirore diez waro wajãha Yawe

³⁶⁻³⁷Ã yoa Moise duhti ñu tini duti to warocarina cjiro sehe diez waro ñaa quiti, quiti ti wihiha. ã ñaa quiti ti wihia, israe masa sehere Yawere yuhdurucachu yoaha. Israe masare ti ã yuhdurucachu yoari buhiri, Yawe sehe ñaa quiti ti wihirina cjirore puria dohatia mehne dói wajãnocaha. ³⁸Josué ã jichu Calebe tina puaroreta wajãeraha Yawe.

³⁹⁻⁴⁵ [...]

Tãcapu co wija tachu yoaha Yawe

20 ¹Wahma cühmare wahma ti quihõ ducari sãi israe masa wuuri ñujuro, yucuri marieni ñujuropure sua tiha. Tí ñujuro sehe Sî wama

tiri dujuro jia tiha. Tí dujuroi cū maca, Cadese wama tiri maca jia tiha. Tí macai tina israe masa sehe mahaa dachori jisinia tiha. Tói ti jichu, Moise wahmiono Miriã yariaa wahaa tiha. To yariachu ñua, to pjacu cjirore tóihta yaa tiha tina.

²⁻³ Æ yoa tóre ti sihniboa co mariea tiha. Æ mariachu ñua, tina israe masa Moise cūhu mehne suaha. Æ suaa, jipihtina cahmachu, tuaro mehne tinare ò sehe ni sañu payoha:

—Yawe mari coyea cjirore yariachu yoahre. Tina cjirore to yariachu yoari pjaihta sã cūhure yaria pihtia wahachu yoaro, noaboa. ⁴Säre Yawe ya curuare, ¿musa cūhu dohseana tana òpu wuuri dujuropu na tari? ¿Sã nuina wahiquina mehneputa yaria pihtiachu cahmana, na tari musa? ⁵¿Dohseana tana säre Egiptopu noano jimarinare na wio, ahri yahpa, ñari yahpapure na tari musa? Toaare toa, yoahito basioerari yahpa jira ahri yahpa. Tuhsu, mari chusoa baro cūhu mariahna. Ne trigo, ne higuera yucuri, ne se dari, ne granada yucuri cūhu mariahna. ¿Sã sihnihti co cūhu mariahna! —ni sañu payoha tina.

⁶Ti ã ni sañurucuchu tuhoa, Moise cūhu sehe ti cahai jirina Cohamacu ya wuhui wahaha. Waha, tí wuhu sãari sopaca cahai su, Cohamacure sinia taa, na tuhcuca caha suha. Na tuhcuca caha su, muhri caha dijaha, pu ti wuhduu wapari yahpa pihachupu. Ti ã yoachu ñuno, Yawe sehe wacūenoca si site mua wahaha. ⁷Si site mua waha, Moiserere ò sehe niha:

⁸—Mu tjuadure nai taga. Na tuhsu, Aarō mehne jipihtina masare pji cahmachuga. Pji cahmachu tuhsu, jipihtina ti ñurocaroi cūria tācapu co wija ta dutiga. Mu wija ta dutichuta, tia tācapu co wija tarohca. Tí co musa sihnihti co jiahca. Æ yoa musa nuina wahiquina cūhu sihniahca tí core —niha Yawe Moiserere.

⁹Yawe to ã nichu tuhoro, Moise sehe to nino seheta to tjuadure, Yawe ya tahtiapu jidure nano sãaha. ¹⁰Na tuhsu, Aarō mehne jipihtina israe masare cūria tāca cahai pji cahmachuha. Ti cahmachu pihtichu ñuno, tinare ò sehe niha Moise:

—Musa yuhduruca payuina, säre mahano tuhorocasiniga. Macanacã yoaro sehe musa cahmaare säre musa sini mujachu, pome yuhduu wahaca sã. Pomepanahta, ahria tācai musa sihnihti core wija tachu yoa, wanahtja musare —niha tinare.

¹¹Æ ninota, to tjuadure naroca muo, tācare pua taha cjāha. To cjāchuta, wacūenoca tia tācapu pjiro co wuru wija taha. Tí core israe masa ã jichu ti wahiquina cūhu sihniha juna.

¹²Baharo Yawe sehe Moiserere, ã jichu Aarōre ò sehe niha:

—Israe masa tuaro mehne sañurucu, ti cahmaare yuhure ti sinipachuta, yuhu sehe tinare ti cahmaare noano mehne wahi. Æ yoacu, yu noariro jia tiare ñoi nimahi tinare. Yu ã ñopachuta, musa sehe yuhure wacū tuaerara. Æ wacū tuaerana, jipihtina israe masa ti ñurocaroi yuhure yuhdurucahre musa. “Noano mehne tācapu co wija ta dutiga” yu nipachuta, musa sehe yuhure yuhdurucana, tiare cjāhre. Tí buhiri, “Musare waihtja” yu niri yahpapure israe masare ne mu tā sãasi musa —niha Yawe tinare.

¹³Æ yoa israe masa sehe tí cuhture “Meribá” ni, wamoaha. (“Meribá” nino, “Yawere òi sañu payoja mari” nino nica hebreo masa ya dusero mehne) Tí cuhtui

israe masa Yawe mehne suaa, tirore ñano ni durucuha. Ti ã ñano ni durucupachuta, tiro sehe tinare to noariro jia tiare ñoha.

**Edomo yahpa macariro puhtoro israe masare
to ya yahpai yuhdu wahcã dutieraha**

¹⁴⁻¹⁵ Ñ yoa israe masa Cadese wama tiri macapũ ti jisinchũ, Moise sehe cãinare bese, Edomo yahpa macariro puhtoro mehne durucu dutiro warocaha. “¿Mũ ya yahpai sã poto yuhdu wahcãchu, noerabocari?” ni, sinitu ñũ duti warocarõ niha. Ñ jia to warocarina sehe tí yahpapũ sua, Moise to sinitu ñũ dutiro sehetã õ sehe ni sinitu ñũha tina:

—Puhtoro, mũ coyea israe masa ahri quitire muhũre yahu dutia, mũ cahapũ warocahre sãre. “Muhũ sehe masina sã ñuchũsuma cjiri Egipto yahpapũ waha, tũpũ yoari pja ti jirire. Tí yahpapũ ti jichũ, tũ macaina sehe sã ñuchũsuma cjirire, ã yoa sã cũhũre ñano cahamaca tipehre. Ñ jicũ Egiptopũ sã ñano yuhdurire masina muhũ. ¹⁶ Ñ ñano yuhdũna, Yawere yoadohoa sinihi sã. Sã sinichũ, tiro sehe sãre cũiro anjore sã cahapũ warocari jihre. Ñ yoa tiro anjo sãre Egiptopũ jiinare na wiohre juna. Ñ jina sã mipũre mũ ya yahpa cahacã jiri macai Cadese jija” ni, muhũre yahu dutia warocahre sãre. ¹⁷ Tuhsũ, sãre muhũre õ sehe ni mũ yoadohore sinitu ñũ duti warocamahre. “¿Tiro marine to ya yahpai yuhdu wahcãri mahapũ yuhdu wahcã dutierabocari? Mari sehe tí mahapũ yuhdu wahcãna, ne ti toaare ñaha macasi. Ti co naa copari macaa cũhũre ne sihnisi. Mari wahiquina mehne ne pa sehẽpũ suha macano marieno poto yuhdu wahcãnahca mari to ya yahpare” ni, muhũre sinitu ñũ dutia warocamahre sãre —ni, tirore sinitu ñumaha tina.

¹⁸ Ti ã ni sinitu ñuchũ tuhoro, tí yahpa macariro puhtoro sehe õ sehe ni yuhtiha tinare:

—Yũ ya yahpai musa yuhdu wahcãchu, cahmaeraja yuhũ. Musa yuhdu wahcã duachũ, musare yũ surara mehne ducataihtja —ni yuhtiha.

¹⁹ To ã ni yuhtichũ tuhoa, Moise to warocarina sehe õ sehe ni sinitu ñũ namomaha tjoa:

—Musa toapũre cariboro marieno poto yuhdu wahcãnahtja sã. Wiho mejeta sã mehne macaina, tuhsũ, sã nuina cũhũ musa co naa copari macaare ti sihnichũ, sã sehe wapanahhtja —ni sinitu ñũ namomaha tina.

²⁰⁻²¹ Ti ã nichũ tuhoro, puhtoro sehe õ sehe ni yuhtiha:

—Jierara. Ne musa yuhdu wahcãchu cahmaeraja —ni yuhtiha.

Ñ ni tuhsurota, “Tinapũ yũ ya yahpai jiri mahapũ yuhdu wahcãri” nino, payũ to surara wamoa cjuaina mehne ducataro wahaha. To ã ducatachũ ñua, israe masa sehe pa mahapũ wahaa wahaha.

Ahri quiti Aarõ to yariari quiti jira

²² Ñ yoa jipihtina israe masa Cadese wama tiri macai jimarina waha namo, tũcũ Hor wama tidũ cahapũ suha. ²³ Tu sehe Edomo yahpa duhtũ cahapũ ducuha. Tũpũ ti suri baharo, Moiserẽ ã jichũ Aarõre õ sehe niha Yawe:

²⁴ —Musa puaro Meribã wama tiri cuhtupũre yũ yoa dutiare yuhdurũcahre. Tí buhiri muhũ Aarõ Canaã yahpare, “Israe masare waihtja” yũ niri yahpapũre ne sãasi juna. Ñ jicũ tí yahpapũre yũ masa ti sãahto pano yariaa wahaihca muhũ. ²⁵ Ñ jicũ Moise, muhũ sehe ahriro Aarõre, ã jichũ to macũno

Eleasare ahdu tūcu sohtoapu pji mujaaga. ²⁶Tu sohtoapu tina mehne muja su, Aarō sacerdotea bui puhtoro jiro, to sārī suhtirore tjuwe naga. Tjuwe na, Eleasapure tí suhtirore sāaga. Mu ā yoari baharo, Aarō sehe tóih̄ta yariaa waharohca —niha Yawe Moisere, ā jichu Aarōre.

²⁷Ā yoa Moise sehe Yawe to dutiro seheta yoaro, jipihtina israe masa ti ñurocaroi Aarōre, ā jichu Eleasare tūcu Hor sohtoapu pji mujaa wahaha. ²⁸Pji mujaa su, Aarō sacerdotea bui puhtoro jiro, to sārī suhtirore tjuwe na, Eleasare sāaha. To ā yoari baharota, tu sohtoaputa Aarō yariaa wahaha. To yariari baharo, Moise, ā jichu Eleasa, tina puarota dijaa wahaha juna. ²⁹Tina puarota ti dija wihichu ñua, israe masa sehe, “Aarō yariaa wahari jira” ni, masiha. Ā masia, tuaro cahya, tiha tina. Ā yoa cū sū waro tina cahyarucuha.

21 ¹⁻³ [...]

**Agāa puriina yoaro sehe bajuri masu comaa bronce
mehne dahre dutiha Yawe Moisere**

⁴Ā yoa israe masa tūcu Hor wama tidu dahpotoi jimarina, pjiri ma, Sohāri mapu wahari maha sehe ti tariro cjiroputa majare wahcā wahaha tjoa, Edomo wama tiri yahpare “Yuhdu sārī” nia. Tina ti majare wahcāsinino wato, ji coaera wahaha juna. ⁵Ji coaera waha, Cohamacure, ā jichu Moise cūhure ō sehe ni tuhti wahcāha:

—Sāre Egiptopu jimarinare ōpu wuuri dūjuro, yucuri marieri dūjuropu yariachu yoana tana, sāre na tari musa? ¡Sā sihnihti co baro, sā chua baro cūhu ne mariahna ahri yahpare! ¡Maná wama tiare dachoripe chuna, yabi yuhduaja sá! —ni tuhtiha.

⁶Ti ā tuhtichu tuhoro, tiro Yawe sehe tinare buhiri dahrero taro, agāa puriina barore paróre ti ji caha sua wuhuseri watoī warocaha. To ā warocachu, payu masa cohō, yariaa wahaha. ⁷Tinare ā wahachu ñua, Moise cahai waha, ō sehe niha tina juna:

—Yawe mehne buhiri tiina wahahti sā, tirore, ā yoa muhu cūhure ñano ni tuhtimana. Ā jii muhu sehe sāre sini payobasaga Yawere, “Ahrina agāa puriinare pa sehēpu wiojaro” nicu —niha.

Ti ā sini dutichu tuhoro, tiro sehe tinare sini payobasaha Yawere, tiro mehne ti buhiri tiare to bohto sehe. ⁸To ā sini payobasachu tuhoro, Yawe sehe ō sehe ni yuhtiha Moisere:

—Ahrina puriina baro agāa yoaro sehe bajuri masu comaa bronce mehne dahrega. Dahre tuhsu, yucucu, mu dapoh̄tu sohtoapu ōga tiro agā masure. Ā yoa diina agā cohōina jia, tiro agā masure ñuroca ōa, noaa wahaahca —niha.

⁹To ā yoa dutichu tuhoro, Moise sehe comaa bronce mehne agā masu dahre, yucucu sohtoapu ō, dapoha. Ā yoa diina agā cohōina, tiro agā masure ñuroca ōa, noaa wahaha juna.

¹⁰⁻³⁵ [...]

Moise cohtotaro, suho ji muhtahtiro cjihtore beseha Yawe

27

¹⁵⁻¹⁷Ā yoa Moise sehe to yariahto pano Yawere ō sehe ni siniha:

—Muhu jira Yawe, yu Cohamacu. Jipihtina masa curuaripe macai-nare catia wariro jira muhu. Ā jicu muhure sinija. Mu masa curua ovejaare

ñu wihboriro maeraina yoaro sehe ti tjuachu cahmaeramaca yuhu. Ñ jicu muhu sehe yu yariari baharo tinare suho waja muhtahtiro cjihtore cüiro sã mehne macarimore bese, sôga. Tiro mu sôhtiro sehe cuiro marieno to masare suho cahma wajã muhtahtiro jijaro —ni siniha.

¹⁸ To ã ni sinichu tuhoro, Yawe sehe tirore õ sehe ni yahuha:

—Nũ macuno Josué, dohse jia dahraa jichu, dahrariro baro jira. Ñ jicu muhu sehe mu cahapu tirore pjirocaga. ¹⁹ Pjiroca tuhsu, jipihtina mu masa cühure pji cahmachuga. Ti cahmachu phtichu ñu, Josuére na wahcã, sacerdote Eleasa to ñurocaroi ã yoa masa jipihtina ti ñurocaroi dapoga tirore. Dapo tuhsu, mu wamomacarine to dapu bui payo, jipihtina ti tuhocaroi õ sehe ni yahuga tirore: “Muhuta jira yu cohtotaro, ahrinare suho waja muhtahtiro” ni, yahuga tirore. ²⁰ Ñ ni tuhsu, masa sehere õ sehe ni yahuga: “Yu cohtotaro, musare suho ji muhtahtiro cjihto ahrirota jira. Ñ jina yu puhtoro jichu, yuhure masa ño payoriro cjiro seheta ahriro cühure ño payoga. Tuhsu, to dutiro seheta yoa mujaga musa” ni, yahuga tinare.

²¹ Ñ yoa Josué sahsero pji, ahrire yahu namoga tirore: “To mu suro masare waja muhtaeno tjijaro tiro. To yoahtire masi duaro, sacerdote Eleasa sehere sinitu ñu mujajaro tiro. To sinitu ñuchu, Eleasa sehe Urĩ wama tia pocare yu ñurocaroi doca payo mujajaro. To ã yoaro mehne yuhu sehe Eleasare masichu yoihtja Josuére yu yoa dutiare. Ñ masino, Eleasa sehe yu yoa dutiare Josuépure yahu turia mujajaro juna. To yahu turia mujano seheta Josué sehe israe masare suho waja muhtajaro.” Ñ ni, Josuére yahu namoga —niha Yawe Moisere.

²² Ñ yoa Moise sehe Yawe to dutiriro seheta yoaha. Josuére pjiroca, tirore na wahcã, sacerdote Eleasa to ñurocaroi, ã jichu jipihtina masa ti ñurocaroi dapoha. ²³ Dapo tuhsu, to wamomacarine Josué dapu bui payo, “Muhuta jira yuhure cohtota, ahrinare wajahtiro” ni, yahuha tirore.

DEUTERONOMIO

18 ¹⁻⁸ [...]

“Canaã yahpa macaina ti ñano jia tiare ñu cū, jia tienā
tjiga musa” ni, yahu turiaha Moise israe masare

⁹ Ñ yoa Moise sehe Cohamacu to yahurire israe masare ò sehe ni yahu turiaha tjoa:

—Yawe mari Cohamacu yuhure ò sehe ni, musare yahu turia dutihre: “Mipure tiro sehe musare musa noano jinocahti yahpa cjihtore waro taro niyuhca. Ñ jina musa sehe tí yahpapu sūna, tí yahpa macaina ñano ti jia tiare ñu cū, yoerahtina jiyuhca. ¹⁰⁻¹⁴ Tí yahpa macaina sehe Yawe to ñu yabiare tuaro yoa mujaina jiyuhca. Ōpe jiyuhca ti ñaa yoaa. Ti pohnare wajā, ‘Mari cohamanare ño payona nija mari’ ni, jū wa muo mujayuhca tina. Ñ yoa ti coyea caina sehe ñuweina jiyuhca. Paina sehe yaya jiyuhca. Paina sehe wete yaya jiyuhca. Ñ yoa paina sehe dojaina baro jiyuhca. Paina sehe yariaina cjiri mehne durucuina baro jiyuhca. Ñ yoa tina mari ya yahpa cjihto macaina sehe pa tehere tinare ñano wahachu ñua, yairo cahapu waha, ‘¿Dohse jiro baro yuhure ñ ñano waharo nibocari? Ñubasa curega muhu yuhure’ ni, sinitu ñua waha mujaa tiyuhca tina. Ñ yoa pa tehere ti dohse wahahtire masi duaa cūhu, ñuweina cahapu wahaa, ‘¿Baharopure dohse waharohcari säre?’ ni, sinitu ñua waha mujaa tiyuhca tina. Ti ñ jia tiare Yawe sehe tuaro ñu yabiyuhca. Ti ñ ñano jia tichu ñu yabirota, cohā wioro taro niyuhca tiro tinare. Ñ cohā wioro, ti cohtotaro, musa sehere tí yahpare pu ti, noano jinocachu yoaro taro niyuhca tiro. Ñ jina musa sehe ti ñ ñano jia tiare ñu cū, yoerahtina jiyuhca. Yawe, mari Cohamacu to ñurocaroi musa sehe buhiri marieina jia tihtina jiyuhca.

¹⁵ Ñ yoa yuhure ò sehe ni, musare yahu namo dutihre tiro. Cū dacho cūiro mari ya curua macarirore bese, to yare musare yahu muhtahtiro cjihtore cūhto jiyuhca. Ñ jiro tiro to besehtiro cūhu yu yoaro seheta to yahware tuho, musapure yahu turia mujahtiro jihto jiyuhca tiro cūhu. Ñ yoa musa sehe to yahu turiaare tuhona, tirore yuhdurucaro marieno yuhti mujahtina jiyuhca. ¹⁶ Tiro Yawe sehe sohō jiri pjapure tūcu Sinaí dahpotopure musa cahmachu, yuhure musa sinirire tuhoa tiyuhca. Tí pjapure musa sehe yuhure ò sehe ni sinia tire: ‘Yawe sã Cohamacu säre pjiri pichaca wurure to ñochu, cui yuhduaca sã. Tuhsu, to basi to durucuare tuhona cūhu, cui yuhduaca. Ñ cuina, yariaa waha duaca sã. Sã ñ cuichu, Yawe sehe säre pja ñuno, ñ yoa namoero tjijaro’ ni, sinia tire musa yuhure.

¹⁷‘Musa yuhure ā ni sinirire tiro Yawe sehe ‘Ahrina quihōno sinia nina’ ni, tuhoa tiyuhca. ¹⁸Ā jiro tiro michapucā yu nino seheta cūiro mari ya curua macarimore bese, to yare musare yahu muhtahtiro cjihto cūhto jiyuhca tiro. Ā yoa tiro to besehtiro cūhu yu yoaro sehe jia tihtirota jihto jiyuhca tiro cūhu. Yawe sehe musare to yahu duaare tiro sehere yahu mūjahto jiyuhca. To ā yahu mūjachu, tiropu musa sehere yahu turia mūjahto jiyuhca. ¹⁹To ā yahu turia mūjachu, musa sehe tirore yuhdurucaro marieno to yahuro seheta yoa mūjahtina jiyuhca. Noa to yahuare yuhdurucaina pinihtare Yawe to basita tinare buhiri dahrehto jiyuhca.” Ā ni yuhure Yawe musare yahu turia dutihre —ni yahuha Moise israe masare.

20-22 [...]

Ahri quti Moise to yariari quti jira

34 ¹⁻³Ā yoa tiro Moise sehe to masa curua mehne Moabe wama tiri yahpai jisinia tiha. Tí yahpa, Moabe yahpa, cū buhusehe sehe tū yucuri marieni yahpa jiha. Pa buhusehe sehe tū yucuri payuri yahpa jiha. Ā yoa tí yahpa, tū yucuri payuri yahpa sehe Nebo wama tiri yahpa jiha. Tí yahpai cūdu tūcu Pisiga wama tidu jiha. Tu sehe Canaā yahpai jiri maca, Jericó wama tiri maca cahacā curei ducudu jiha, Jordão ma pa buhusehe cjoa sehe.

Ā yoa Moise sehe, tū yucuri marieni yahpapu jimariro yuhdu wahcā, Yawe to yahu quihōiro seheta tū yucuri payuri yahpapu suha juna. Tí yahpapu sūro, tu tūcu Pisiga wama tidu sohtoapu mūjaa wahaha. Tu sohtoapu to mūja suchu, Yawe sehe tirore Canaā yahpare ñono taro niha juna.

To ñono tachū, Moise sehe sū sāano poto sehe ducu, ñu siteroca ducuro niha. Tói to ñu siteroca ducuchū, Yawe sehe tirore to ñu siterocarucuro caha sehe jia yahparire ño ducaha. Wahmanore Neftali ya curua macaina ya yahpa cjihtore ño ducaha tirore. Tí yahpare ño tuhsu, ōpe curuari macaina ya yahpari cjihtire ño namoha tjoa. Manasé ya curua macaina ya yahpa cjihtore, Efraī ya curua macaina ya yahpa cjihtore, Judá ya curua macaina ya yahpa cjihtore ño namoha tirore. Pu pjiri ma Mediterráneo wama tiri ma duhtu cahapu ñoroca batoha tirore.

Baharo pari taño sehe macaa yahparire tirore ño namoha tjoa. Wahmanore poto buhusehe sehe macaa yahparire ñoha tirore. Galaa wama tiri yahpare ño dūca, pu Dā ya curua macaina ti ya yahpa cjihtopu ñoroca batoha tirore.

Te sehe macaa yahparire ño tuhsu, cō buhusehe sehe macaa yahpari cūhure tirore ño namoha tjoa. Te sehe pahre sehere jiha cū dūjaro, wuari dūjaro, Néguebe wama tiri dūjaro. Tí dūjoropu Moisere ñoroca batoha Yawe.

Ā yoa tūcu, to ñu siteroca boro ducudu dahpoto sū sāano caha sehere Jordão ma coā buruaha. Tí ma pa buhusehe cjoa sehere Jericó wama tiri maca coā tiha. Tí macare payu pō, dátil wama tia pō jia tiha. Ā yoa Yawe sehe tí macare ñonota, Jordão ma duhtu cahai jia yahpari cūhure ñoroca būro namoha tirore. Pu Soá wama tiri macapu ñoroca batoha. ⁴Tí yahparire ño tuhsu, ō sehe ni yahuha tirore:

—Ahri yahpata jira Canaā yahpa. Ahri yahpare yuhū sehe musa ñuchusuma cūhu cjiri Abrahā, Isaa, ā jichu Jacobo cūhu cjirire cua pisaro mehne ō sehe nia tihi tina cjirire: “Ahri yahpare musa panamana ji turiaina cjihtipure

waihtja” nia tihi yuhu tina cjirore. Tinare yu ã niri yahpa cjirore yuhu sehe muhure ñu siteroca dutii nija. Wiho mejeta muhu tí yahpapu ne sãasi —ni yahuha Yawe Moiserere.

⁵To ã ni yahuri baharota, tiro Moise Yawere dahra cohtariro cjiro sehe tũcu sohtoaputa yariaa wahaha juna. To jisiniri yahpa, Moabe wama tiri yahpaihta yariaa tiha tiro cjiro. Yawe tiro cjirore to niriro cjiro seheta wahaha.

⁶To yariachu ñuno, Cohamacu sehe to pjacu cjirore tí yahpaihta tũ yucuri watoi jiri dihtapu yanocaa tiha. Bete Peo wama tiri maca cahacã yaa tiha tiro cjirore. To yari cuhtu cjiro sehere ne cũiro masiera tiha. Mipu cũhure to yari cuhtu cjirore masi mahnoeraca. ⁷Tiro cjiro sehe ciento y veinte cũhmari cjuaro waro, yariaa tiha. Tõpe cũhmari cjuaparota, noano capari ñu suriro ji, tuhsu, pjacu tuariro jisinia tiha tiro cjiro.

⁸Ã yoa israe masa sehe Moise cjiro to yariachu, tuaro cahyaa tiha. Tiro cjirore wacũa, dahraro marieno, tuhsu, pa sehẽpu waharo marieno cũ sũ waro cahyaina jirucua tiha tina.

⁹Ã yoa tiro Moise cjiro sehe catisininopu tirore cohtotahtiro Nũ macũno Josuẽre to dapu bui to wamomacarine payo, tirore Cohamacure sini payoa tiha. To sini payori baharo, Josuẽ sehe masare to suho waja mihnia tiare cjuu dũcaa tiha juna. Tĩre cjuaro, israe masare noano suho wajaa tiha tiro. Ã yoa israe masa cũhu tirore noano yuhtia tiha. Ã yuhtia, jipihtia Yawe Moise cjiro mehne to cũri dutiare yuhtia nia tiha tina.

¹⁰⁻¹¹Ã yoa Moise cjiro to yariari baharo, paina to yoaro sehe jiina mariea tiha juna. Tiro Moise cjiro sehe Yawe to tuua mehne õpe yoa mujaa tiha. Tiro cjiro sehe Yawe mehne suhũduro, masuno mehne to suhũduboro seheta suhũdu mujaa tiha. Suhũdu, to yahuare israe masapure yahu turia, tinare wajaa tiha tiro cjiro. Tuhsu, Egipto macariro faraõre, tiro faraõ doca macaina puhtoare, ã jichu jipihtina egipto masa cũhure ñu cuachu yoaa baro chorire yoa ño, tinare buhiri dahre mujaa tiha tiro cjiro. Ã yoa ñono, masa ti yoeraa baro chorire yoa ño, buhiri dahre mujano nia tiha tiro cjiro.

¹²Ã yoa to masa curua cũhure Cohamacu to tuua mehne ñu cuachu yoaa baro chorire tina cũhure yoa ño, suho waja muhtaa tiha tiro cjiro. Ã yoa to yariari baharo cũhure jia tiha paina Cohamacu yare yahu, israe masare suho waja muhtaina. Wiho mejeta ne cũiro Moise cjiro yoaro sehe yoa mujariro mariea tiha juna.

JOSUÉ

**Moise yariari baharo, Josué sehere israe masare
Canaã yahpapu suho mu tā sāa dutiha Yawe**

1 ¹ Ā yoa Yawere dahra cohtariro Moise cjiro to yariari baharo, tiro cjirore yoadohoriro Nū macuno Josuére ō sehe niha Yawe:

²—Yuhure dahra cohtariro cjiro yariaa wahahre. Ā jicu mipure muhu sehe to cohtotaro jipihtina israe masare Jordão mare suho pahāga. Tí ma pa buhu-sehe cjoapu suho pahā su, musare yu wahti yahpa Canaã yahpapu tinare mu tā sāaga. ³ Mu tā sāa, tí yahpai jiina mehne noho ti jiroi cahma wajā wahcārucuna wahaga. Musa cahma wajā wahcārucuna wahachu, yuhu sehe Moise cjirore yu ni cūiro cjiro sehetā musa sehere tinare cahma wajā yuhdurucachu yoihtja. Ā cahma wajā yuhdurucachu yoai, ti jia yahpari cjirore musa sehere pu ti wahcārucachu yoihtja. Yu ā yoachu, musa sehe tí yahpa Canaã yahpa jipihtiri yahpare pu tinahca juna.

⁴ Pjiri yahpa jirohca musa ya yahpa cjihto. Sū muja taro caha sehere hitita masa ya yahpa yuhduroi Éufrate wama tiri ma duhtu cahapu ji batoarohca. Sū sāano caha sehere pjiri ma Mediterráneo wama tiri ma duhtu cahapu ji batoarohca. Ā yoa pari taño cō buhusehe sehere wuuri dujuropu ji batoarohca. Ā yoa pari taño poto buhusehe sehere tū yucuri payuri yahpa, Líbano wama tiri yahpa ji ducaropu ji batoarohca musa ya yahpa cjihto.

⁵ Ā yoa yuhu sehe mu catisinino puro muhure ā piti tirucuihtja. Moise cjirore yu piti tiro cjiro sehetā muhu cūhure ā piti tirucuihtja. Ne di pja muhure cohā wahcāsi. Yu muhure ā piti tirucuchu, ne cūiro muhure cahma wajā yuhdurucasi.

⁶ Ā yoa musa űuchusuma cjiropure yuhu sehe cua pisaro mehne ō sehe ni cūa tihi: “Canaã yahpare musa panamana, musare ji turainapure waihtja” ni, yahu cū tuhsua tihi yuhu tina cjirore. Ā jicu muhu sehe noano wacū tuariro jirucuga. Tí yahpare musa mari baharo, muhuta jiihca tí dihtare tju wa, mu coyeare ti jihti dihtarire witihtiro. ⁷⁻⁸ Ā jicu noano wacū tuariro jirucuga muhu. Yuhure dahra cohtariro Moise cjiro mehne yu cūri dutiare dachoripe mu basi ni űo, tíre ā buherucuga. Tíre ā buherucui, tíre yuhdurucaro marieno noano jia tirucuga muhu. Mu ā noano jia tirucuchu, noho mu waharoi muhure noano waharohca. ⁹ Ā yoa yuhu Yawe mu Cohamacu cūhu noho mu waharoi muhu mehne ā jirucuihtja. Ā jicu yu niriro sehetā noano wacū tuariro jirucuga muhu. Ne cuii tjiga. Tuhsu, ne ji coa pihti, cahyariro jii tjiga —ni bosaha Yawe Josuére.

Jordão mare israe masa ti pahāhto pano tinare cahnoyu dutiha Josué

¹⁰ Ā yoa Josué sehe to doca macaina puhtoare ō sehe niha:

¹¹—Tia dacho baharo, Jordão mare pahāna tana nija mari. Tí mare pahā su, Yawe mari Cohamacu marine to wahti yahpare mana wahana tana nija mari. Ā jina mūsa sehe mari carīni cuhtupū waha, mari coyeare yahuna wahaga, tópu wahaa, ti chuhti cjihtire ti macayuhto sehe —niha Josué to doca macaina puhtoare.

¹²⁻¹⁸ [...]

11 ¹⁻²² [...]

**Canaā yahpare ti mari baharo, Josué to coyeare
ti jihti dihtarire tju wa, waha**

²³ Ā yoa Moise cjirore Yawe to niriro cjiro sehetā Josué sehe Canaā yahpare manocaha jūna. Tí yahpare ma tuhsu, israe masa curuare, cū curua macaina jipahta doce curuari cahma tju wa dapo jiri curuare, tí curuaripere tí dihtare tju wa, waha. Tí dihtari, to tju wa, waa dihtari sehe ti panamana ji turiaipapū cūhū ti cja turiahti dihtari jia niha.

Ā yoa Josué to tju wa, wari baharo, israe masa sehe cahma wajāno marieno tí yahpai noano jinocaa tiha jūna.

**Josué bucuro quiro waro jia tiha. Ā jiro to coyeare
to masichu cahmaare tinare yahu batoaha**

23 ¹ Ā yoa Canaā yahpapure israe masare nū tuhtiina cjiri, payu curuari macaina tí yahpaputa jisia tiha. Ā jipachu, tinare israe masa mehne cahma wajāno marieno noano jinocachu yoa tiha Yawe.

Ā yoa payu cūhmari baharo, Josué sehe bucuro waro jia tiha. ² Ā jiro tiro cū nūmū jipihtina israe masa curuare, ā jichu ti puhtoa tinare ji muhtaina cūhure pji cahmachuha. Ti cahmachu pihtiri baharo, ō sehe ni yahuha tiro tinare:

—Coyea, mipure yūhū bucuro jija....

³⁻¹³ [...]

¹⁴ Ā jicu wacūeni pja musare mū cō yariaa wahaboca yūhū. Ā jicu musare ahrire yahu batoa duaja. Yawe, mari Cohamacu marine payu noa to ni cūri cjirire tí jipihtiare ne cūno duhsaro baro marieno to niriro cjiro sehetā quihōno yoa, sohtori tira tiro marine. Tiro ne cū taha marine mahñoerare. Tíre noano masina mūsa. ¹⁵⁻¹⁶ Āta yoare Yawe, mari Cohamacu marine. Wiho mejeta marine ā noano yoiro cjiro to jipachu, mūsa tirore cahmaera, paina wiho jiina cohamana sehere bese, tina potoi na tuhcuca caha su, mūsa nō payona, cua pisaro mehne “Mū dutiare yoa pahñonahtja sā” ni, tiro mehne mūsa durucu cahnori cjirire yuhdurucana ninahca mūsa. Ā jiro tiro potocāta mūsa mehne sua, musare buhiri dahrerohca. Ā buhiri dahrero, tiro musare ahri yahpai noari yahpai to cūmarinare cohāroca wionocanohca musare —ni, to coyeare yahu batoa tiha Josué cjiro.

JUECES

2¹⁻⁵ [...]

Ahri quti Josué to yariari quti jira

⁶ Ñ yoa Josué israe masare to tju wa, waa dihtaripu ji dutiro warocaha juna. To warocachu, tina cãa curuari ti ya dihtari cjihtire pu ti, jia tiha.

⁷⁻⁹ Ñ yoa tiro Josué Nũ macuno, Yawere dahra cohtariro sehe jipihtina israe masare Yawe dihtare suho wacũ tua, suho ño payo muhtaa tiha. Ñ yoa tiro ciento diez cuhmari cjuaro waro, yariaa wahaa tiha juna. To yariachu ñua, to coyea cjiri sehe to pjacu cjirore to ya duhteroihta yaa tiha. Tí duhtero sehe tũ yucuri payuri yahpa, Efraĩ wama tiri yahpai tjuaa tiha. Ñ jia tiro cjiro coyea sehe to pjacu cjirore tũcu Gaas wama tidu cahacãi yaa tiha, Timna Sera wama tiri macai.

Ñ yoa Josué cjiro to yariari baharo cũhure, to doca macaina puhtoa cũhu israe masare noano suho ji muhtaa tiha. Tina cũhu Yawe to tuaa tia mehne ti ya curuare to yoadohochu ñurina jia tiha. Ñ jia tina cũhu ti catisinino puro israe masare Yawe dihtare suho ño payo, suho ji muhtaa tiha.

Israe masa Yawere ño payo duhu, paina cohamana sehere ño payo ducaa tiha

¹⁰ Payu cuhmari baharo, jipihtina Josué cjiro ya tjuru macaina, Yawere noano wacũ tuarina cjiri yaria pihtia wahaha. Ti yaria pihtiri baharo, ti panamana sahsero tjuaha juna. Tina sehe ti ñuchusuma cjiripure Yawe to noaa yoarire ñueraina jia tiha. Ñ jia Yawe ti Cohamacu waro sehere cua pisaro mehne ño payoera tiha tina. ¹¹⁻¹³ Ñ ño payoeraa, Yawe to ñuchu, israe masa ñaa dihtare yoaina wahaha. Paye masa curuari, ti jiro cahacãi jiina sehe ti dahrea masurine “Ahrina cohamana jira” ni, ño payoa tiha. Ti dahrea masuri sehe Baal wama tiriro masuri, ñ jichu Asatarote wama tiricoro masuri jia tiha. Tí masurine ti ño payochu ñua, israe masa cũhu tinare ñu cũ, tina cũhu tí masurine ño payo ducaa tiha. Tí masurine ño payoa, Yawe ti ñuchusuma cjiri ti Cohamacu, Egiptopu jinare na wioriro sehere ño payoera tiha juna. Ti ñ ño payoerachu ñuno, Yawe sehe tina mehne tuaro suaha. ¹⁴ Ñ suaro, tinare ñu tuhtiina, ti ya yahpa cahacãi jinare israe masare yuhdurũca sãa tachu yoa, cahma wajã yuhdurucachu yoaa tiha. Tuhsu, dohse jia ti cjuare noano ma wahcã pahñochu yoaa tiha tinare. Ñ yoaro, israe masa sehere ne cahma wajã tuaeraina wahachu yoaa tiha. ¹⁵ Ti cahma wajã wahaa taharipe Yawe to basita tinare ñ ñano wahachu yoaro nia tiha. Tiro

Yawe sehe to masa curuare cua pisaro mehne yahu cū tuhsua tiha. Õ sehe ni yahu cūa tiha tiro tinare: “Yū musare cūri dutiare yuhdurucaro marieno musa jia tirucuchū, noano wahachu yoihtja musare. Yū cūri dutiare musa yuhdurucachu pinihtare ñano musare buhiri dahreihitja” ni, yahu cū tuhsua tiha Yawe to masa curuare. Æ jiro israe masa ti yuhdurucachu, tó panopu to niriro cjiro seheta tinare buhiri dahrero nia tiha tiro. To Æ ñano buhiri dahrechū ñua, tina sehe “¿Dohse yoanahcari mari?” ni, ñano tuhutua tiha.

¹⁶ Ti Æ ñano tuhutuchū ñuno, Yawe sehe ti puhtoro cjihto, tinare suho wacū tua, suho wajahtiro cjihtore bese, sōbasaa tiha. Tiro to puhtoro sōriro sehe tinare maa tainare, Æ yoa tina mehne cahma wajāa taina cūhure to masa mehne cahma wajā yuhdurucanocaa tiha. ¹⁷ Tuhsu, to masare “Yawe dihtare wacū tua, ño payojihna mari” ni, yahua timaha tiro. To Æ ni yahu mujapachuta, tina sehe tirore yuhduruca mujaa tiha. Æ yuhdurucaa, paina cohamana sehere ño payo mujaa tiha tina. Ti ñuchuno Josué cjiro ya tjuru macaina cjiri sehe Yawe to dutiro seheta yoina jia tiha. Æ yoa tina cjiri panamana sehe ti ñuchusuma cjiri ti jia tiriro sehe jia tiera tiha juna. Tina sehe dói waro Cohamacure yuhduruca mujaina jia tiha.

¹⁸⁻¹⁹ Æ yoa tinare ji turia dija taa tjururi macaina cūhū sie sehe mehne sie sehe mehne Cohamacu ti ño payoboriro waro sehere ño payo duhu wahcārucua nia tiha. Æ jia tuaro waro Yawere yuhdurucaina wahaa nia tiha juna. Ti Æ yuhdurucaina jichū ñuno, Yawe sehe tó pano macaa tjururi macainare to buhiri dahreri cjiro seheta buhiri dahre mujaa tiha tina cūhure. Æ jiro tina cūhure tinare ñu tuhtiina cahma wajā yuhduruca sãa tachū yoa, tinare ñano dutipechū yoa, buhiri dahre mujaa tiha tinare. Ti Æ ñano dutipechū, israe masa ñano yuhdua tiha. Ti Æ ñano yuhduchū ñu, pja ñuno, Yawe sehe ti puhtoro cjihtore bese, sōbasaa tiha tina cūhure. Æ sōno, tiro mehne tinare noano yoadoho mujaa tiha. To Æ yoadohochū, tiro puhtoro sehe to catisinino puro to masa mehne tinare ñu tuhtiinare suho cahma wajā yuhduruca mujaa tiha. To yariari baharo, pa tjuru macaina cūhū pari turi mñanota “Cohamana jira” ni, ti ño payoa masurine ño payo mujaa tiha tjoa. Æ ño payoa, tó pano macaa tjururi macaina cjiri ti yuhdurucaro bui tuaro yuhdurucaa nia tiha tina. Tina cūhū ti ñano jia tiare ne duhuera tiha.

²⁰ Ti Æ ñano jia tichū ñu, suaro, Yawe sehe õ sehe niha:

—Ti ñuchusuma cjiripure yuhū õ sehe nia tihi: “Yū ya curua macaina jira musa. Æ jina jipihia yū dutiare noano yuhti mujaga musa” nia tihi yuhū tina cjirire. Yū Æ nirire ahrina sehe tuaputiaro yuhdurucaa nina juna. ²¹ Ti yuhdurucari buhiri Canaã yahpai ji muhtaa curuarire, Josué cjiro cohā wioeraparota, to yaria mū cōa curuarire ne cū curuare cohā wioisinisi. ²² Pa tehe nia tí curuari mehne ti basi ñano jia tia, yuhū sehere tuaro macaboca, Josué cjiro ya tjuru macaina yuhure ti macariro cjiro seheta —niha Yawe.

²³ Æ nino, tí curuarire dói waro cohā wioerasinia tiha.

1 SAMUE

Israe masa ti puhtoro rey cjihto coã sôbasa dutiha Samuere

8 ¹ Æ yoa Samue israe masare suho waja muhtariro sehe bucuro quiro waro jiha. Æ jiro tirore suho wajadohohtina cjihtire to pohna cûhure puhtoa sôha tiro. ² To macuno masa wahmino sehe Joe wama tiroiro jia tiha. To bahuro sehe Abia wama tiroiro jia tiha. Tinare to puhtoa sôri baharo, tina sehe Berseba wama tiri macapu jia tiha. Tôpu ji, ti pucurore masare suho ji muhtadohoa tiha tina cûhu. ³ Wiho mejeta tina to pohna sehe ti pucuro yoaro sehe masare noano suho ji muhtaera tiha. Æ noano suho ji muhtaeraa, masa ti ñano jia tiare cahnoera tiha tina. Æ cahnoeraa, ti buhiri dahreboina cohtotaro, buhiri marieina sehere buhiri dahre mujaa tiha. Ti buhiri dahreboina sehe tinare ô sehe ni mujaa tiha: “Säre buhiri dahrena tjiga. Sã sehe musare wapanahtja” nia tiha tinare. Ti ã nichu tuhoa, tina cûhu wapata duama, buhiri maeraina sehere wiho warota “Ahrina jira buhiri tiina” ni, tju ô, tina sehere buhiri dahre mujaa tiha. ⁴ Ti ã jia tiare masia, jipihtina paina Samue doca macaina puhtoa israe masare dutiina sehe cahmachu, tiro Samue to jiri maca, Ramapu waha, tiro mehne suhudua suha. ⁵ Æ suhudua sua, ô sehe niha tina tirore:

—Samue, muhu sehe bucuro quiro waro jira. Æ yoa mu pohna, mu basi mu puhtoro sôrina cûhu säre mu suho ji muhtano seheta suho ji muhtaerara. Æ jina sã sehe puhtoa ti ji namochu cahmaeraja juna. Paye curuari macaina mehchu ti puhtoro rey cjuaina jira. Æ jina sã cûhu säre dutihtiro rey cjihto säre mu sôbasachu cahmaja —niha tina.

⁶ Ti ã nichu tuhoru, Samue sehe ne ji coaeraha. Æ ji coaeraro, Yawere sinitu ñuha. ⁷ To sinitu ñuchu, Yawe sehe tirore ô sehe ni yuhtiha:

—Muhure ti sinino seheta yoaga. Ti puhtoro cjihto paioire cahmaa, muhu dihtare cohãa nierara tina. Yuhu cûhure cohãa nina. Yuhuta jimaja ti puhtoro waro. Yu ã jipachuta, tina sehe tinare yu waja muhta namochu cahmaeraa, ã yoara. ⁸ Panopure ti ñuchusuma cjiri yuhure ti yoariro cjiro seheta mipu macaina cûhu yuhure ã yoaa nina tjoa. Ti ñuchusuma cjirire, Egiptopu cahamaca jiinare na wio, yu na taa tiri pjaputa tina cjiri cûhu yuhure duhu muja, paina cohamana sehere ño payo duca muja tuhsua tire. Mipu cûhure tina cjiri panamana ji turia dijaina cûhu âta yoa mujana tjoa. Æ yoaa, yuhure ti cohã mujano seheta muhu cûhure cohãa nina. ⁹ Æ jicu muhure ti sinino seheta yoaga. Ti puhtoro rey cjihtore bese, sôbasaga tinare. Wiho mejeta mu sôhto pano, rey tuaro mehne to masare to dutihti cjihtire noano yahu muhtaga mu masa curuare, mu sôri baharopu “Rey ñaa niri jira” ti nierahto noano —ni yuhtiha Yawe Samuere.

¹⁰To ā niri baharo, Samue sehe Yawe to nirire to cahapū surina israe masa pūhtoare yahu turiaha. ¹¹⁻¹²Ō sehe ni yahu turiaha tiro tinare:

—Musa cahmariro rey musare ō sehe yoahto jiyuhca. Cāina musa pohna muare to surara cjihti tuaro mehne sōhto jiyuhca tiro. Ā yoa to surara sōh-rinare tia curua tju wa dapohto jiyuhca. Cū curuare ti cahma wajāa buso, cawaloa ti wajaa busopu sā, cahma wajāhtina cjihti cūhto jiyuhca. Pa curuare to tunuria cawaloa ti wajaria mehne noho to waharoi to pano muroca mahta, űu cohtahtina cjihti cūhto jiyuhca. Pa curuare to surara pūhtoa cjihti cūhto jiyuhca. Ā cūno, cāinare mil surarare dutihtina pūhtoa cjihti cūhto jiyuhca. Painare cincuenta surarare dutihtina pūhtoa cjihti cūhto jiyuhca.

Ā yoa musa pohna to surara sō dūharinare tjoa cāina bese namohto jiyuhca tiro. Ā besero, cāinare to cahma wajāa buso dojochu, ti cohtotahti cjihtire yoahtina cjihti cūhto jiyuhca. Painare to surara ti ya cahma wajā macaa wamoa cjihti dahrebasahtina cjihti cūhto jiyuhca. Painare toaare to toahti yahparire saha musiōbasahtina cjihti cūhto jiyuhca. Saha musio cū tuhsu, tirore toabasahti jiyuhca tina. Ā yoa ti toari cjiri ti bucuarucu suchu űua, tinata tí dichare tirore nabasahti jiyuhca.

¹³Ā yoa musa pohna numia cūhure cāina numiare tirore dahra cohtahti numia cjihti tuaro mehne sōhto jiyuhca tiro. Ā sōno, cāa numiare tirore me sitia dahrebasahti numia cjihti cūhto jiyuhca. Paye numiare tirore chua dahrebasahti numia cjihti cūhto jiyuhca. Paye numiare tirore pāo dahrebasahti numia cjihti cūhto jiyuhca.

¹⁴Ā yoa musa ti pūcusuma sehere ō sehe yoahto jiyuhca tiro. Musa toaa weserire tí weseri bui noano dicha tia weserire űu, tiro musare tuaro mehne manocahto jiyuhca. Ōpere mahto jiyuhca tiro musare. Musa trigo weserire, musa se weserire, ā yoa musa olivo weseri cūhure mahto jiyuhca tiro musare. Ma tuhsu, tí weserire tiro mehne dahrahtinare ti ya weseri cjihti wahto jiyuhca tiro.

¹⁵Ā yoa musa weseri to ma dūhaa weseri macaa cūhure ti dicha tiri pjare tjoa tí dichare tuaro mehne nahto jiyuhca tiro tjoa. Ā nano, trigore cien pūhuse musa na cahmachurire, tiro cūhu diez pūhuse nahto jiyuhca. Ā yoa musa se weseri macaa cūhure āta yoa, nahto jiyuhca tiro. Tí to na cahmachuri sehe to doca macaina pūhtoare, ā jichu paina tiro mehne dahrahtina cūhure to wahti cjihti jihto jiyuhca.

¹⁶Ā yoa musa cahamaca cūhure cāinare mahto jiyuhca tiro musare. Ā mano, musa cahamaca muare, numia cūhure mahto jiyuhca tiro. Ma tuhsu, to ya dahraare dahra cohtahtina cjihti cūhto jiyuhca tinare. Ā yoa musa nuina wachua cūhure, musa burroa cūhure paina bui noainare, tuhsu, bujuina wūrire űu, musare mahto jiyuhca tiro. Ma tuhsu, tinare to weseri cjihtire dihta saha musiōhtina cjihti, tuhsu, nūcua paye barore naa mūjahtina cjihti cūhto jiyuhca tiro.

¹⁷Ā yoa paina musa nuina cabraare, musa ovejaa cūhure tjoa tuaro mehne musare mahto jiyuhca tiro. Ā mano, cien cabraa musa cjuachu, tiro sehe to yaina cjihti diez waro nahto jiyuhca. Ā yoa cien ovejaa musa cjuachu, tina cūhure diez waro to yaina cjihti nahto jiyuhca tiro. Ā yoa musa jipihtina cūhu tirore dahra cohtaina yoaro seheta tjuauhti jiyuhca juna.

¹⁸Musare to ā yochu űūna, musa sehe cahyaro mehne ō sehe ni sañuru-cuhtina jiyumahca: “Ahiro rey mari beseriro űabiario marine yoaro nina.

Tíre ne dohse yoa yuhdu witi masieraca mari” ni, sañurucuhtina jiyumahca musa. Musa ã ni sañurucu mujachu tuhoparota, tiro Yawe sehe musare yoa-dohoerahto jiyuhca. Æ ni yuhure yahu turiabasa dutihre Yawe musare —ni yahu turiamaha Samue to cahapu surina israe masa puhtoare.

¹⁹To ã ni yahuchu tuhopahta, tina sehe tirore ne cua pisaro tuhoera tiha. Æ jia õ sehe niha tina:

—Noanocanhca. Sã cùhure rey cjihto sôbasaga. ²⁰Sã cùhu paye masa curuari rey ti cjuaro yoaro sehetã sãre dutihtiro rey cjihto cahmaja. Sãre ñu tuhtiina ti cahma wajãa tachu, sãre suho cahma wajã muhtahtiro cjihto cahmaja sã —niha tina.

²¹Ti ã ni yuhtichu tuhorõ, Samue sehe jipihtia ti ã nirire Yawepure yahu turiaha. ²²To yahu turiachu tuhorõ, Yawe sehe:

—Jai. Noanohca. Ti cahmano sehetã yoaga. Tinare dutihtiro rey cjihtore puhtoro sôbasaga tinare —ni yuhtiha.

To ã ni yuhtichu tuhorõ, Samue cùhu tinare õ sehe niha:

—Jai. Noanohca. Yuhure musa sinino sehetã musare rey cjihtore puhtoro sôbasaihtja —niha.

Æ ni tuhsu, tinare ti jia macaripu coha tjuaa dutiha Samue.

10 ¹⁻¹⁶ [...]

**Saulo wama tiroiro israe masa puhtoro cjihto
rey ti niriro coã sãa ducaa tiha**

¹⁷Æ yoa cù namu jipihtina israe masare Misapa wama tiri macapu pji cahmachuha Samue. ¹⁸Pji cahmachu, ti wihi pihtichu ñano, õ sehe ni yahuha tiri tinare:

—Yawe, mari Cohamacu, õ sehe ni yuhure yahu dutihre musare: “Musa sehe masiyuhca tiro Yawe musa ñuchusuma cjiire Egiptopu ñano yuhdu jiri curuare na wio, opu to na tarire. Æ yoa mipu cùhure opure jipihtina paye masa curuari macaina musare ñano ti dutipe mujachu, tinare musa yuhdu witi mujachu to yoabasaa cùhure masiyuhca musa. ¹⁹Tirota jiyumahca musa Cohamacu waro. Æ jiro tirota jiyumahca jipihtia musa ñano wahaare musare yuhdu witichu yoa mujariro. Tiro musare to ã noano yoa mujapachuta, musa sehe musa basita tirore cohãna tana niyuhca. Æ cohãna, paio puhtoro “rey” musa ni pisuhtiro sehere musare to puhtoro sôbasachu cahmana niyuhca musa. Æ jiro mipure tirore musa siniriro cjiro sehetã musare yoabasaro taro niyuhca juna. Æ jina musa doce curuari macaina jipihtina to ñurocaroi cãa curuari macaina soro, soro surucu su burohtina jiyuhca. Æ yoa Cohamacu sehe musare cùiro musa watoiro jiroiro, musa coyeirore bese, musare puhtoro sôbasahito jiyuhca.” Æ ni, yuhure mari Cohamacu Yawe yahu turia dutihre musare —ni yahuha Samue to masare.

²⁰To ã ni yahuchu tuhoa, tina sehe to niriro sehetã Yawe to ñurocaroi cãa curuari cahmachurucu su, surucu su buroha. Ti ã cahmachurucu suri baharo, Samue sehe Cohamacu to basita tinare ti puhtoro cjihtore to ñochu cahmano, ti ñurocaroi docapeare docape ñuha. To ã docape ñuchu, “Benjamí cjiro ya curua macariro jirohca musa puhtoro cjihto” ni, tinare masichu yoaha Cohamacu.

²¹Æ yoa to ã masichu yoari baharo, Samue sehe Benjamí cjiro ya curua macaina mua sahserore to cahapu pji wioha. To pji wiochu, tina sehe cãinape ti pohna,

ti panamana mehne to cahapu waha, surucu su buroha. Ti surucu suri baharo, jipihtina ti nurocaroi docapeare docape nuha tjoa. To a docape nuhu, “Matari wama tiro panamino ji turiario jirohca” ni, tinare masichu yoaha Cohamacu. To a masichu yoari baharo, Samue sehe jipihtina Matari panamana ji turiaina mua sahserore pji wioha tjoa. Pji wio tuhsu, jipihtina ti nurocaroi docapeare docape nuha tjoa. To a docape nuhu, Cohamacu sehe “Matari panamino, Quis macuno Saulo wama tiro jirohca musa puhtoro cjihto” ni, israe masare masichu yoaha.

To a masichu yoari baharo, israe masa sehe tiro Saulore macamaha. Wiho mejeta tirore ne bocaeraha tina. ²² A bocaeraa, Yawepure sinitu nuha:

—¿Nohoi jijari tiro mu beseriro? ¿Tirota jijari sa puhtoro cjihto mu beseriro? O ¿paio jijari? —ni sinitu nuha tina tirore.

Ti a ni sinituchu, Yawe sehe tinare yuhtiha:

—Tirota jira musa puhtoro cjihto yu beseriro. Musa pache watopu duhtinocahre tiro —ni yuhtiha tinare.

²³ To a ni yuhtichu tuhoa, tina sehe muroca wahca, topu Saulore bocaha. Boca, tirore na ta, masa watopu dapoha juna. A yoa masa ti nuhu, tiro Saulo sehe muariro wuru jiha. A jiro ti watoi ducuro, tina bui muariro wuru bajurucua tiha tiro.

²⁴ A yoa Samue sehe tina israe masare o sehe ni yahuha juna:

—¿Ahrirota jira musa puhtoro cjihto, Yawe to basi masare to besebasariro! ¡Ne paio jierara! —ni yahuha Samue israe masare.

To a ni yahuchu tuhoa, jipihtina israe masa sehe Saulore wahche payoha. A wahche payoa, o sehe ni sañurucuha:

—Jai. ¡Ata jijaro! ¡To catisinino puro noano ji, marine noano suho ji mhtarucujaro tiro! —ni sañurucu, wache payoha tina tirore.

A ni wahche payoa, tirore paye baro wapa marieno waha tina.

²⁵ A yoa Samue sehe Saulore to puhtoro sori baharo, jipihtina israe masare tiro Saulo puhtoro jiro, dohse yoa tinare to suho ji mhtahti cjihtire yahuha. Ti to yahua sehe, to baharopu rey sahtina cuhu ti yohti cjihti jia niha. A jiro tinare to yahuri baharo, jipihtia to yahurire joa na, Cohamacu ya wuhupu cua pisaro mehne tire wihboa tiha Samue. Baharo jipihtina israe masare ti jia macaripu coha tjuaa dutiha tjoa.

²⁶ To a coha tjuaa dutichu tuhoro, Saulo cuhu to ya maca Gibeapu coha tjuaaro nia tiha. To a coha tjuaachu nuno, Yawe sehe caina mua cuirio maerainare ti tuhotuapu noa tuhotua pja suchu yoaha. A jia tina cuhu Saulo mehne dahra ducaa taa, ji coaro mehne wahaa wahaha tiro mehne. ²⁷ Wiho mejeta caina ti mu soro niano jia tiina sehe wiho tirore doca dahrenocaha. A doca dahrea, o sehe niha:

—¿Ahriro a cuia bucuro mari puhtoro jibocari? Wiho jiriyo waro jira tiro. A jiriyo waro marine nu tuhtiinare cahma waja yuhdurucasi. A jiriyo waro marine nu tuhtiinare marine yuhdu witichu yoasi —ni tirore doca dahreha.

A nia, paye baro wapa marieno paina ti waro yoaro sehe waeraha tina. Ti a yoachu, Saulo sehe puhtoro choro ti soriyo jiparo, tinare buhiri dahreraha. A tuhotunocaha tiro.

**Puhtoro Saulo to masa mehne amonita masa
surarare cahma waja yuhdurucaha**

11 ¹ A yoa cu numu Naha wama tiro israe masa mehne cahma wajaño wahaa tiha to surara mehne. Tiro Naha sehe Amō wama tiri yahpa

macaina amonita masa puhtoro jia tiha. Ñ yoa tiro Naha israe masa mehne cahma wajāno waharo, ti jiri yahpa, Galaa yahpare yuhdu sā, Jabe wama tiri macapu suha. Tí macapu su, tí macare noano soroa bihatorucu sua wahaha. Ti ã yoachu ñua, tí maca macaina sehe cua yuhdua wahaha. Ti ã cuachu ñua, ti puhtoa sehe Naha cahapu waha, ò sehe nia suha tirore:

—Musa mehne cahma wajāna bihosi sā. Á jina dói waro mu cahamaca cjihti tjua bahrañonahtja. Á jicu muhu sehe sā puhtoro cjihto tjuahtja. ¿Dohse ni tuhutujari muhu sā ã ninore? —nia suha tina Nahare.

²Ti ã nichu tuhoru, Naha sehe tinare ò sehe ni yuhtiha:

—Jai. Noanohca. Wiho mejeta yuhu sehe musare cūno yoa namo duaja. Musa jipihtina ahri macai jiinare musa capariaca poto buhusehe sehe macariare dota tihā pahñonocaihtja musare. Yu ã yoaro mehne jipihtina musa israe masare doca dahrei niilha yuhu. Yu ã ninore musa “Jai” nichu, musa nino sehetā yoajihna mari —ni yuhtiha Naha tinare.

³To ã nichu tuhoa, Jabe macaina puhtoa sehe tirore ò sehe ni yuhtiha:

—Jai. Tí pja pinihta sāre cū somana waro cohtasiniga. Tí somana waharo puro ahri quitire sā coyeare yahu site ñusininahtja. Pa tehe nia tí quitire tuhoa, cāina sā coyea sāre yoadohoa taboca. Tí somana waharo puro ti wihierachu pinihta, sā sehe muhure sā nino cjiro sehetā mu cahamaca tjuahtja —ni yuhtiha tí maca macaina puhtoa Nahare.

Ti ã nichu tuhoru, Naha sehe “Jai” ni, yuhtiha tinare.

⁴Ñ yoa ti sininore Naha “Jai” to ni yuhtichu tuhoa, tina Jabe macaina puhtoa sehe ti coyea ti jiri yahpapu tí quitire yahu site tini dutia, payu masa wa siterocaha. Ti ã wa siterocachu, cāina sehe waha, pu ti puhtoro sōriro Saulo to jiri maca Gibeápu yahu sitea suha. Á yahu sitea sua, jipihtia tinare waharire, ã jichu ti jiri maca Jabe macaina puhtoa amonita masa puhtoro mehne ti suhuduri cjiri cūhure yahuha. Tí quitire ti yahuchu tuhoa, tí maca macaina sehe tuho cua wahaha. Ñ tuho cua, cahyaro mehne tuaro tiilha tina. ⁵Ti ã cahya, tiiro wato waroi ti puhtoro sōriro Saulo sehe to wachua mehne yahpare saha musiño suriro cjiro tju wihiha. Á tju wihiro, to ya maca macaina cahyaro mehne tuaro ti tiichu ñuha tiro. Á ñuno, sinitu ñuha tinare:

—¿Ne dohse wahari musa? ¿Dohse yoana ã ñaca waro tiijari musa? —ni sinitu ñuha tiro tinare.

To ã ni sinituchu tuhoa, tina sehe Jabe macaina puhtoa ti quiti warocarire tirore yahu turiaha. ⁶Tí quitire Saulo to tuhochuta, Cohamacu Catia Macariro Espiritu Santo sehe to cahapu dija wihi mua wahaha. Á dija wihirota, tirore sua yuhdu mua wahachu yoaha. ⁷To ã suari pjaihta Saulo sehe to wachua puarore cjero mehne wajāha. Wajā tuhsurota, payu siri dute siteha. Dute site tuhsu, tí dihire cāina tiro mehne macainare wiaha. Ñ wiaro, to coyea jia macari, jipihtia macaripu ò sehe ni yahu site tini dutiha tiro tinare:

—“Yuhu Saulo mari coyea Jabe macaina puhtoa ti yahurocaa quitire tuhoja. Á tuhoi, mipure Samue mehne waha, tópu tina amonita masa surara mehne cahma wajāi wahai tai nija. Á jina musa cūhu ne cūiro duhsaro marieno sāre cahma wajādohona taga. Noa yuhure cahma wajādohoa ta duaeraina ñuga ahri dihi yu dute sitea dihire. Noa yuhure cahma wajādohoa ta duaeraina ti wachua cūhure ò sehetā yoaihtja yuhu” nirocahre mari puhtoro Saulo musare —ni yahu site tini dutiha Saulo tinare.

Ã yoa tí quitire yahu site tini duti to wa siterocarina sehe to dutiro sehetá yahu site tinia wahaha júna. Ti á yahu tinichu túhoa, israe masa sehe túho cua yúhdua wahaha. Á túho cuaa, ò sehe niha tina:

—Mari puhtoro Saulore Yawe jiri jira á ñaca waro suachu yoaro. Á suachu yoaro, Yawe tiro Saulo mehne mari coyeare yúhdu witichu yoaro taro niri jira. Á jina mari cūhu tirore cahma wajādohona wahajihna —niha tina.

Á nia, ne cūiro dúhsaro marieno Saulo cūhure cahma wajādohoa wahaha. ⁸Waha, Beseque wama tiri macapú sú, tópu tirore piti boca, cahmachurucu suha tina. Tina israe masa cahma wajādohoa suina sehe pua yahpapu tju warucu sú, jiina jiha. Á jia cū curua macaina sehe Israe wama tiri yahpa macaina jiha. Pa curua macaina sehe Judá wama tiri yahpa macaina jiha. Á yoa Saulo sehe “¿Nohopeina masa yuhure cahma wajādohohtina jijari?” ní, masino taro, tinare quihōha. To quihō ñuchū, Israe yahpa macaina sehe tresciento mil waro jiha. Judá yahpa macaina sehe treinta mil waro jiha.

⁹Á yoa tina cahma wajāa wahahtinare quihō ñu tuhsu, Jabe macaina quti na tarina sehere ò sehe niha Saulo cūhu:

—Musa mipure musa ya macapú tjuuaga. Tjuua suna, mari coyeare ò sehe ni yahuga: “Ñamichacare cohari pja suhto panore amonita masare mari coyea cahma wajā yúhduruca tuhsuhti jiyuhti” ní, yahuga tinare —ni yahu duti, waroca tjuha Saulo cūhu.

Á yoa tina sehe waha, ti ya macapú tjuua sua, Saulo cūhu ti yahu duti-rocarire tinare yahu turiaha. Ti yahua quitire túhoa, tina Jabe macaina sehe tuaro wahcheha. ¹⁰Baharo tí maca macaina puhto amonita masa puhtoro Nahare ò sehe ní mahño yahua suha:

—Mari durucu cahnoriro cjiro sehetá sá sehe ñamichacata noano mehne sá basi mu cahamaca cjihti tjuanahtja. Á jii muhu sehe säre mu yoa duaro sehetá yoa masiihca —ní mahño yahua suha tina.

¹¹Á yoa Saulo sehe noano ti cahma wajáhto noano, tí ñamine to surarare tia curua waro tju wa dapoha. Tju wa dapo tuhsu, amonita masa surarare wajāa wahaha júna. Waha, bohrea muja tachu waro, ti cahapu sú, wacūenoca tinare wajāa dúcaha. Á wajāa, cohari pja suhto panore yoato amonita masa surarare wajā pahñoa taapu niha. Ti á wajā pahñoa tachu ñu, cuia, cāinacā ti wajā dúharinacā sehe paró muroca site wahcāa wahaha. ¹²Tó sehe yoa, Saulo cūhu amonita masa surarare cahma wajā yúhdurucacha júna. Á cahma wajā yúhduruca tuhsuata, Samuere ò sehe niha tina:

—¿Diina jijari mari coyea Saulore mari puhtoro sōri pjare tirore ñano ní, durucu cohtaina cjiri? Cjero säre tinare ñoga. Wajā cohānocana tana nija sá —niha tina Samuere.

¹³Samuere tí á nichu túhoro, Saulo sehe tinare ò sehe ní yuhtiha:

—Jierara, coyea. Ne á yoaena tjiga musa. Micha dacho mari wahchehti dacho jiro nina. Michare Yawe marine to yoadohoro mehne amonita masare cahma wajā yúhdurucanocai mari. Á jina mari coyeare ne cūirore wajāena tjiga musa —ní yuhtiha Saulo tinare.

¹⁴Á yoa Saulo to á ní yuhtiri baharo, Samue sehe jipihti israe masare ò sehe ní yahuha:

—Potocā tjira, coyea. Saulore mari coā puhtoro sōri pjare cāina tirore to puhtoro sāachu cahmaeramare. Á cahmaeraa, tirore ñano ní, durucu cohtare.

Ã jina mipure mari jipihtina Gilgapu cahmachuna wahajihna. Tõpu jipihtina cahmachu, ne cãiro duhsaro marieno Saulore puhtoro sõ cahnojihna mari —niha.

¹⁵To ã nichu tuhoa, jipihti israe masa Gilgapu wahaha. Waha, tí macapu suha tina. Ti suri baharo, Yawe to ñurocaroi cua pisaro mehne Saulore puhtoro sõ cahnoha juna. Puhtoro sõ cahno tuhsu, Yawere wahche payoa taa, wahiquina noainare wajã, cãa sirire jũ wa muoha tina. Å yoa duhsaa sirire tina jipihtina wahchero mehne tõi puhõ chua. Å puhõ chua, tina jipihtina tuaro wahcheha.

13 ¹[...]

**Jonatã to surara mehne filisteo masa surarare to cahma wajã
yuhdurucari buhiri, ti coyea sehe israe masa mehne suaha**

²Å yoa cũ numu Saulo to surara cjihtire besero taro, jipihtina to coyeare pji cahmachuha. Ti wihi pihtichu ñuno, tres mil waro beseha tiro. To bese duhainare ti jia macariputa waroca tju pahñonocaha.

Å yoa to beserina sehere juna pua curua tju wa dapoha. Cũ curua macaina cjihtire dos mil waro tju wa dapoha. Pa curua macaina cjihti sehere mil waro tju wa dapoha.

Å yoa cũ curua macaina mil surara to tju warina sehere Gibeã wama tiri macapu to macuno Jonatã mehne warocaha. To warocachu, Jonatã sehe tinare tí macapu suho naa wahaha. Suho na su, tí macare tinare suho ñu cohtaa tiha tiro. Tí maca sehe Benjamí cjiro ya curua macaina ti jiri yahpapu jia tiha.

Å yoa pa curua, dos mil surara to tju warina sehere tiro Saulo to basita tinare Mima wama tiri macapu suho naa wahaha. Suho na su, tí macare, tuhsu, tũ yucuri payuri dihtapu jiri maca Betel cũhure tinare suho ñu cohtaa tiha tiro cũhu.

³Å yoa Jonatã cũhu ti ñu cohtari maca Gibeã wama tiri maca cahacã curei pa maca israe masa ya maca Geba wama tiri maca jia tiha. Tí maca cahacã tinare ñu tuhtiina, filisteo masa surara cũhu ji cohtaa tiha. Å yoa Jonatã sehe ti wijaachu cahmano, to surara mehne ti cahapu waha, tina mehne cahma wajãno sua tiha. Å cahma wajãno suro, tinare cahma wajã yuhduruca, wionocaa tiha tiro.

Å yoa filisteo masa surara coyea sehe Jonatã tinare to ã cahma wajã yuhdurucaa quitire tuhorocaha. Å tuhorocaa, israe masa mehne tuaro suaha.

Å yoa Jonatã pucuro Saulo cũhu filisteo masa ti suaa quitire tuhoha. Å tuhoro, quiti naa mujainare pjiroca, tinare õ sehe niha:

—Musa cãina jipihtiri yahpa mari ya yahpapu waha sitetjiãhna, mipu wahari quitire yahu site tinina wahaga. Å yahu site tinina, nohoi musa sua macaripure suna, oveja muno saharore puti, masare pji cahmachu mujaga.

⁴Å yoa ti wihi pihtichu ñuna, õ sehe ni yuhure yahubasa mujaga tinare: “Yuhu Saulo musa puhtoro jija. Å jiro yu macu Jonatã to surara mehne, filisteo masa surara Geba cahacãpu jijnare cahma wajã yuhdurucanocayuhca, yu dutiro mehne. Å jia filisteo masa surara coyea sehe mipure marine ti ñu tuhtiro cjiro bui ñu tuhtia niyuhca. Å jina mari jipihtina Gilgapu cahmachujihna. Tõi mari cahmachurucu suri baharo, mari jipihtina filisteo masa

surara mehne cahma wajāna wahajihna' ni, mari puhtoro Saulo sāre yahu dutirocahre musare" ni, yuhure yahu site tinibasana wahaga mari coyeare —ni, tinare wa siterocaha Saulo.

To ā wa siterocachu, tina cūhu to dutiro seheta waha sitea wahaha. Ā waha sitea, Saulo tinare to yahu site tini dutiare ti coyea jiri yahpa, jipihtiri yahpau yahu site tiniha tina. Ti yahu site tiniare tuhoa, israe masa cūhu Saulo to sinino seheta tirore yuhtiha. Ā yuhtia, jipihtina Gilga wama tiri macapu wahaha. Waha, tí macapu tirore piti boca, tópu cahmachurucu suha tina.

⁵ Ā yoa filisteo masa surara cūhu tina mehne cahma wajāa taa, Mima wama tiri macapu wihi tarucu su, tói cahmachurucu sua tiha tina cūhu. Ā cahmachurucu sua, padu pohcari yoaro sehe waro payu wihi tarucu suha tina. Cāina dahporo mehne wihiha. Paina tres mil buso, cawaloa wajaa buso, ti cahma wajāa buso mehne wihiha. Ā yoa tí busopu wihiina surara sahse-
rore ti quihō ñuchū, seis mil waro jiha. Ā yoa ti cahmachurucu suri maca Mima sehe Betavē wama tiri macai mari ñurocachū, sū muja taro caha sehe tjuaa tiha.

⁶ Ā yoa israe masa sehe juna, ti ā payu waro wihi tarucu sua quitire tuhoa, cua yuhdua wahaha. Ā cuaa, tina ne dohse yoa masieraha juna. Ā jia tinare wiho duhti site wahcā wahaa tiha tina. Cāina tū yucuripu jia coparipu, paina ñariōpu, paina tāa wahsari wuripu, paina tāa copari ti saha copari wuripu, paina co ti naa copari, wua caha sua copari cjiripu duhti sitea wahaha. ⁷ Ā yoa paina sehe Jordão ma pa buhusehe cjoapu duhti pahāa wahaha. Duhti pahāa, Gade ā jichū Galaa wama tia yahparipu duhti site wahcāa wahaha tina.

Ti ā duhti site wahcāri baharo, Saulo sehe to surara mehne ā jichū paina to pjirocarina ti duhti site wahcā duharina mehne Gilgaputa jisiniha. Tina tiro mehne jiina sehe cuiro mehne tuaro tetereha.

Saulo Yawere to yuhdurucari buhiri, tiro mehne buhiri tia wahaha

⁸ Ā yoa Saulo Gilgapu to wahahto pano tirore Samue sehe ō sehe niha:

—Tópu mu suri baharo, cū somana waro yuhure cohtasiniga muhu. Yuhū sehe tí somana waharo puro dohse jiri numui mu cahapu suihca. Tópu sui, musa cahma wajāna wahahto pano mari puhtoro Yawe musare to yoadohoh-tire sinibasai waihtja. Ā sinibasai, waihuinare wajā, cāinare pjainata jū wa muoihtja, Yawere ño payoro mehne. Painare cāa sirta jū wa muoihtja. Ā yoa duhsaa sirire mari jipihtina tói puhō chunahca mari —niha Samue Saulore.

To ā niri baharo, Saulo sehe Gilgapu jiro, cū somana waharo puro Samuere cohtaro niha. Wiho mejeta Samue sehe to cahapu suerasiniha. Ā yoa Saulo mehne tjuarina cūhu cuia, sie sehe mehne, sie sehe mehne tirore cohā wahcā pihitia taapu niha. ⁹ Ti ā cohā wahcā ducachu ñuno, Saulo sehe paina tiro mehne macainare ō sehe niha:

—Waihuina Samue to wajā jū wa muoborinare yuhure na tabasaga. Yu basita tinare Samue to jū wa muoboro seheta jū wa muo, Yawe to yoadohoa sinii tai nija —niha Saulo tiro mehne macainare.

To ā nichū tuhoa, tina cūhu to nino seheta waihuinare na taa, to cahai dapoha. Ti ā na tari baharo, wahmanore, pjainata to jū wa muohtinare wajā ducaha Saulo. Wajā, Cohamacupure jū wa muo, ño payoha tiro.

¹⁰To ā yoaro wato waroi, Samue sehe ta bajuha juna. To ta bajuchū ñuno, Saulo cūhū tirore piti boca, sinino wahaha. ¹¹To sinino tachū, Samue sehe dói tirore sinitu ñū bahrañoha:

—¿Dohse yoai ā yoari muhū? —ni sinitu ñūha tirore.

To ā ni sinitu ñuchū tuhoro, Saulo sehe ō sehe ni yuhtiha:

—“Yū masa cuiro mehne yuhure cohā wahcā pihtia taapu nina” nicū, ā yoahiti. Muhū cūhū “Taihtja” ni, mū yahu quihōri somanare dói cure wihie-rahre. Mū wihieraro wato, filisteo masa sehe yoato Mimapū wihi taruca tuhsuhre. ¹²Ti wihi tarucachū ñucū, ō sehe ni tuhotuhi yuhū: “Yawere yoadohoa yū sinierapachuta, filisteo masa säre wajāa taapu nina” ni, tuhotuhi yuhū. A ni tuhotui, mū bajuerachū ñucū, yoa duaerapaihta, yū basita wahi-quinare wajā, jū wa mūo, ño payoi nija —ni yuhtiha.

¹³⁻¹⁴To ā ni yuhtichū tuhoro, Samue sehe ō sehe niha Saulore:

—Ā yoeraboa muhū. Ā yoai, mari Cohamacū Yawere yuhdurūcai niri jira muhū. Yuhupū jija sacerdote. Yuhupure tí dahraare cūhre tiro. Muhū sehe poto cohtasiniboa. Ā jii mū ā yoacu, Cohamacūre yuhdurūcai niri jira. Mū ā yuhdurūcari buhiri mipure muhū cūirota puhtoro ji, buti dijaa wahaihca juna. Tuhsū, mū pohna, mū panamana muhure puhtoro ji cohtotaborina cūhū ne ji cohtotasi juna. Ā jiro Yawe to basi paio muhure puhtoro ji, cohtotatihiro cjihto bese sōnohca. Ā sōno, to cahmasāano seheta yoahitiro cjihtore bese, to masa curuare suho ji muhtahtiro cjihto sōno ninohca tiro —niha Samue Saulore.

¹⁵⁻²³ [...]

Resumen: Ā yoa Saulo to cahma wajādoho duti, to pjirocarina sehe filisteo masa surara payū waro ti jichū ñua, cui, duhti site wahcā pihtia wahaha. Ā yoa Saulo to surara waro cūhū payū duhti wahcāha tirore. Ā jia tres mil surara jimaina cjiri seiscientocāta tiro mehne tjuaha.

Ā yoa Cohamacū sehe Saulo to yuhdurūcariro to jipachuta, tina seisciento suracā mehne filisteo masa surara perire cahma wajā yuhdurūcanocachū yoaha tirore. Cohamacū Saulore ā cahma wajā yuhdurūcachū yoaro taro, filisteo masa surara sehere tinare tuaro cuiina wahachū yoaha. Ā cuiina ti wahachū, Saulo sehe tinare cahma wajā yuhdurūcanocaha to surara mehne.

Davire israe masa puhtoro cjihto beseyu muhtaa tiha Yawe

16 ¹Ā yoa Yawe ō sehe niha Samuere:

—Tó purota Saulore yū cohā wiorire cahya duhuga muhū. Yū niriro seheta to yariari baharo, ne to pohna, ne to panamana ji turiaina cūhū israe masa puhtoa cjihti ti jichū cahmaeraja yuhū. Ā jicu mipure muhū sehe Belēpu wahaga. Tópu wahaí, oveja saharopū olivo sere posaa, naaga. Ā yoa Belēpu sucū, Jesé wama tiriro ya wuhui sūga. Yuhū sehe cūiro to macunore beseyu tuhsuhi israe masa ti puhtoro cjihto —niha.

²To ā nichū tuhoro, Samue sehe ō sehe niha:

—Ne ā yoa duaeraja yuhū. Yū ā yoaa quitire tuhoro, Saulo yuhure wajā-nocaboca —niha.

To ā nichū tuhoro, Yawe sehe Samuere ō sehe ni yuhtiha:

—“Saulopū yuhū mehne suari” nicū, ō sehe yoaga muhū. Tópu wahaí, cūcoro wachūcoro wihā curericorore naaga. Naa, tópu sui, ō sehe niga tó

macainare. “Yawere ño payoi tai, õpu tahi yuhu. Ahricoro wachucorore wajā, jū wa muo, tirore ño payoi tai tahi” niga Belē macainare. Mū ā yoachu, Saulo sehe masisi mū yoa duaare. Ā jiro tiro muhu mehne suasi —niha.

³ Ā ni tuhsu, õ sehe ni namoha:

—Mū wachucorore wajā, jū wa muoi tai, Jesére to pohna cūhure pjiga, muhu mehne yuhure ti ño payohto sehe. Ā yoa yuhu sehe cūiro to macunore mūhure ñoihtja mū puhtoro sōhtiro cjihtore. Yū ā ñochu, muhu sehe tirore to dapu bui olivo sere pio payo, puhtoro sōga —ni namoha Yawe Samuere.

⁴ Ā yoa Samue sehe Yawe to niriro seheta Belēpu wahaa wahaha juna. Waha, tōpu to suchu, tí maca macaina puhtoa sehe cua yuhdua wahaha. Ā cua, teterero mehne tirore piti boca, õ sehe ni sinitu ñuha tina tirore:

—¿Ne Samue, tahri muhu? ¿Noano mehne sā cahai ñu tinii tai niri muhu? O ¿Yawe sāre to buhiri dahre dutichu, buhiri dahre tai nirita? —ni sinitu ñuha tina tirore.

⁵ Ti ā nichu, Samue sehe tinare õ sehe ni yuhtiha:

—Jierara, coyea. Musa nino seheta noano mehne musare ñu tinii tai nihi. Ahri maca, musa ya macapu ahricoro wachucoro wihāricorore wajā, Yawepure jū wa muo, ño payoi tai tahi yuhu. Ā jina yū ā yoahito pano, musa cūhu musa buhiri tiare tirore boa siniga. Musa siniri baharo, yuhu mehne tirore ño payona taga. Ā ño payona tana, musa suhti cūhure wete mariea suhtire sāaga musa —ni yuhtiha Samue tinare.

Baharo Jesé ya wuhupu wahaa wahaha. Waha, tōpu to suchu, Jesé sehe tirore to pohna mehne piti bocaha. Ti piti bocachu, tiro sehe tinare Yawepure boa sini payobasaha. Sini payobasa tuhsu, tina cūhure suhti wete mariea suhtire sāa dutiha. Ti sāari baharo, tina cūhure tiro mehne Yawere ño payo dutiro pjia Samue.

⁶ Ā yoa ti wihi pihtichu ñuno, Samue sehe cūiro Jesé macuno Eliabe wama tirirore ñuroca õha. Ā ñuroca õno, to mū suro õ sehe ni tuhoutuha: “Ahrirota jiboca israe masa ti puhtoro cjihto Yawe to beseriro —ni tuhoutuha tiro.

⁷ To ā ni tuhoutuha ñuno, Yawe sehe tirore õ sehe niha:

—Tiro noariro bajura. Tuhsu, muariro wuru jira. Wiho mejeta tí mehne ñu wisiai tjiga muhu. Tiro jierara yū beseriro. Yuhu sehe masare besei, masa ti besero yoaro seheta beseraja. Masa sehe masunore besea, to bajua tiare ñu, besera. Wiho mejeta yuhu sehe ā jieraja. Masare besei, yuhure ti wacū tuaa tiare, yū yare ti cahmaa tiare, ā yoa paye noaa ti tuhoutuha cūhure ñu, beseja yuhu —ni yuhtiha Yawe Samuere.

⁸ Ā yoa Jesé sehe to macuno Abinadabere pjiroca, tirore Samue cahapu dapoha. To dapochu, Samue sehe õ sehe niha:

—Ahriro cūhu Yawe to beseriro jierara —niha.

⁹ To ā ni yuhtiri baharo, paio to doca macariro Sama wama tirirore pjiroca, Samue cahapu dapoha tjoa. To dapochu, Samue sehe:

—Ahriro cūhu Yawe to beseriro jierara —ni yuhtiha tjoa.

¹⁰⁻¹¹ Āta yoa, tina to pohna sietere Samue cahapu pjiroca wio, tirore ño pahñonocaha Jesé. To ño pahño tuhsuchu ñuno, Samue sehe tirore õ sehe ni sinitu ñuha:

—Ahrinare Yawe ne cūiro beserara. ¿Pairo mū macu maerajari muhu? —ni sinitu ñuha.

To ā ni sinitu ñuchũ tuhoru, Jesé sehe ō sehe ni yuhtiha:

—Jica cūiro duhsariropũ. Tiro ovejaare ñũ wihboro nica —ni yuhtiha.

—Tí pja cjero tirore pji dutiga. Tiro marieno, Cohamacure jũ wa muo, ño payosi mari —niha Samue.

¹²To ā nichũ tuhoru, Jesé sehe tirore pji dutiro, painare warocaha. Ā yoa tina to maca dutiina sehe tiro mehne tju wihiha juna. Tiro sehe Samue to ñuchũ, ñuhto noariro jiha. Ā yoa Yawe sehe Samuere ō sehe niha juna:

—Ahrirota jira israe masa ti puhtoro cjihto yũ beseriro. Ā jicu muhũ sehe tirore olivo sere to dapu bui pio payoga —niha Yawe.

¹³To ā nichũ tuhoru, Samue sehe to wahmisuma ti ñurocaroi oveja cjiro saharopũ olivo se to posarire cua pisaro mehne to dapu bui mahano pio payoha. Ā yoaro,

—Ahrirota jira israe masa ti puhtoro cjihto, Yawe to beseriro —ni, ñono niha Samue. Tiro Yawe to beseriro sehe Davi wama tiroro jiha.

Ā yoa to ā yoari pjaihta Yawe to Catia Macariro Espiritu Santo cũhũ Davire yoadohoro taro, dija wihi mua waha, tirore piti ti ducaha juna.

Ā yoa Samue sehe ā yoa tuhsũ, tinare coha siti, to ya maca Ramapũ coha tjuaa wahaha.

Puhtoro Saulore dahrabasa cohtahtiro cjihto sãa tiha Davi

¹⁴Ā yoa Yawe to Catia Macariro Espiritu Santo sehe juna puhtoro Saulore piti ti, yoadohomariro cjiro tirore piti ti duhunocaha juna. To ā piti ti duhuchũ, Yawe sehe to cohtotaro demonio sehere Saulore caribo dutiro warocaha. To warocari baharo, tiro sehe cãa tahari Saulore wacũenoca caribo, tuaro wisiachũ yoa mujãa tiha. ¹⁵To ā wisia mujachũ ñua, to cahamaca sehe tirore ō sehe niha:

—Cohamacũ to warocariro demonio jira muhure ā ñano wisiachũ yoa mujano. ¹⁶Ā yoa cūiro arpare noano buaputẽ mihnirirore maca, sã muhure na tabasachũ, noana. Tiro sehe muhure wacũenoca demonio to ñano caribo mujachũ, to buaputẽnore buaputẽ mujanohca. To ā buaputẽ mujachũ, demonio cũhũ muhure caribo duhu mujanohca. To ā caribo duhu mujachũ, noano ji mujaihca muhũ —niha tina tirore.

¹⁷Ti ā nichũ tuhoru, Saulo sehe tinare ō sehe ni yuhtiha:

—Jai. Noanohca. Musa nino seheta noano buaputẽ mihnirirore yuhure macabasana waha, yũ cahapũ na tahga —ni yuhtiha Saulo to cahamacare.

¹⁸To ā nichũ tuhoru, cūiro tina mehne macariro sehe ō sehe ni yuhtiha tirore:

—Yuhũ cūiro Belẽ macariro Jesé macunore masija. Tiro arpare noano buaputẽ mihniriro jia tihre. Tuhsũ, õpe ji namoa tihre to jia tia. Tiro cuaro waharo watore cuierariro baro jia tihre. Tuhsũ, noano cahma wajã mihniriro jia tihre. Tuhsũ, masa cũhure noano suhũduriro baro cũhũ jia tihre tiro. Tuhsũ, noano ñuhto noariro cũhũ jia tihre. Yawe cũhũ tirore piti ti, noano yoadohoa tihre tirore —ni yuhtiha tiro.

¹⁹To ā nichũ tuhoru, Saulo sehe to quitu naa duti mujainare pjiroca, Jesé cahapũ warocaha tinare. Ā warocaro, tina mehne ō sehe ni tiropũre quitu warocaha tiro: “Mu macũ ovejaare ñũ wihbo cohtariro Davire yũ cahapũ warocaga” ni, quitu warocaha Saulo.

²⁰ Ñ yoa Saulo to warocarina sehe Jesé cahapũ waha, to cahapũ sua, tí quitire tirore yahuha. Ti yahuchu tuhoru, Jesé sehe to macũno Davire Saulo cahapũ warocaha. Ñ warocaró, tiro mehne paye baro Saulopũre wapa marieno warocaha. Cũiro cabra wihã cureriro, ã jichũ cũ wajuru, wahiquiro cahsaro wajuru, se co to posari wajurure warocaha. Tuhsũ, cũiro burrocã buipũ pãu payũ duhte payo, tí jipihitia mehne tirocã cũhũre wapa marieno warocaha.

²¹ Ñ yoa Davi Saulo cahapũ sũro, tiro mehne dahra jia tiha jũna. Ñ dahra jiro, to dutiro seheta yoa tiha tiro. To ã noano dahrariro jichũ ñũno, Saulo sehe tirore to macũnore to tuaro cahĩno yoa sehe cahĩa tiha. Ñ cahĩno, to surara mehne to suho cahma wajãno wahari pjare to wamoare cjuabasahtiro cjihto sãa tiha tirore. ²² Sõ tuhsũ, Davi pũcũro Jesépũre õ sehe ni quiti warocaha: “Mũ macũ Davi yũ dutiro seheta noano dahrariro jira. Ñ jiro mipũre tiro yũhũre dahra cohtahtiro cjihto tjua dojaarohca” ni, quiti warocaha Saulo.

²³ Ñ yoa Davi pũhtoro Saulore to dahrabasa jia tiri pjapũre Cohamacũ to warocariro demonio sehe Saulore wacũenoca ñano caribo, tirore tuaro wisiachũ yoa mũjaa tiha. To ã ñano caribo mũja taharipe Davi cũhũ to arpare na, buapũtẽ mũjaa tiha. To ã buapũtẽ mũjachũ, tiro demonio sehe Saulore caribo duhu, wahaa waha mũjaa tiha. To ã waha mũjachũ, noano jinoca mũjaa tiha Saulo.

Resumen: Ñ yoa Davi tí pjapũre Saulo mehne yoa tiri pja dahra jia tiha. Saulo mehne to dahra dũcaa tiri pjapũre wahmũno waro jia tiha Davi. Tiro mehne ã dahra jiro, Saulo to surara mehne to cahma wajãno waha mũjachũ, to wamoã cũhũre cjuabasa cohtariro jia tiha tiro.

Ñ yoa Cohamacũ sehe Davire noano piti ti, jipihiti to yoaare noano wahachũ yoa mũjaa tiha tirore, tirore to wacũ tuariro to jichũ ñũno.

Ñ yoa nohope cũhmari baharo, Saulo sehe cãina to surarare suho cahma wajã mũhtahtiro cjihto sãa tiha tirore. Cohamacũ sehe Davire noano cahma wajã mihnichũ yoa tiha. Ñ jiro tiro Davi, pũhtoro Saulo bui cahma wajã mihniro tjuaa tiha jũna. Tuhsũ, to coyea cũhũ “Ahrĩro marine ñũ tuhtiinare noano cahma wajã yũhdũrucabasa mũjana marine” nia, tirore tuaro wacũ tua dũcaa tiha. Ti ã wacũ tua dũcachũ ñũno, pũhtoro Saulo sehe “Ahrĩro yũ cohtotaro, pũhtoro sãanocaboca” nino, tirore cũ buhusehe soro tuhotu, ñũ tuhti dũcaa tiha. Ñ jiro tirore wajã duaa tiha Saulo. To ã wajã duaa quitire masino, Davi sehe tirore paró duhti tini dũcaa tiha. To ã duhti tinichũ, nohoi Davi to jia quitire tuho bocaro, pũhtoro Saulo to surara mehne tirore nũnũ ti wahcã mũjaa timaha, wajã duaro. Wiho mejeta Davi sehe Cohamacũ israe masa ti pũhtoro cjihto to beseriro pũ jia tiha. Ñ jiro tirore wajã bihoera tiha Saulo.

Ahri quiti pũhtoro Saulo yariari quiti jira

31 ¹⁻² Ñ yoa filisteo masa surara sehe tũ yucuri watoi jiri duhtero Jezree wama tiri duhteropũ ti cahmachurucũ suri baharo, waha namo, israe masa surara mehne cahma wajãa sua tiha. Ñ cahma wajãa sua, israe masa surara ti cahmachurucũ suri buhuro, tũcũ buhuro Gilboa wama tiri buhuro pũ mũjaa, tina mehne cahma wajãa tiha. Ñ cahma wajãa, israe masa surarare payũ wajãa tiha. Ti ã payũ wajachũ ñua, dũhsaina surara sehe

tinare wiho duhti wahcāa wahaha. Tina mehne tiro Saulo cūhu, to pohna Jonatā, Abinadabe, Malquisua tina tiaro mehne tiro cūhu duhti wahcāa tiha. Ti ā duhti wahcāchu nūa, filisteo masa surara cūhu tinare nūu ti wahcāha. Ā nūu ti wahcāa, Saulore, ā jichu to pohna cūhure tuaro macaa tiha tina. Ā macaa, tinare boca sunocaha. Boca su, to pohna sehere wajā muhtaa tiha tina. ³Tinare ti wajāri baharo, ti pucuro cūhure soroarucu su, ti buea yucuri mehne tirore nāno cami dahreha. ⁴Ti ā nāno cami dahrechū, Saulo sehe cūiro wahmūno, tirore wamoa cjuabasa cohtarirore ō sehe nimaha:

—Ahrina Cohamacure maeraina jia, naina waro jia nina. Ā jia tina yuhure catiriroreta nāhaa, nāputiaro yoa, yuhure wajāahca. Yuhure ti ā nāno yoa, wajāchu cahmaeraja yūhu. Ā jicu muhu sehe yuhure mu cahma wajāri pjī mehne dōi wajā bahrañoga —nimaha Saulo tirore.

To ā nichu tuhoro, tiro wahmūno sehe cua yuhdua wahaha. “Ahiri puhtoro choro jira” nino, tirore ne wajā duaera tiha tiro. To wajā duaerachu nūno, Saulo sehe to cahma wajāri pjīne naroca, to basi nōsa, yariaa wahaha. ⁵To ā yariachu nū cuamahno, tiro wahmūno cūhu to cahma wajāri pjīne naroca, tiro cūhu to basi nōsa, yariaa wahaha. ⁶Ā waha, tiro wahmūno, tiro Saulo, to pohna tiaro cūhu yariaa tiha. Ā yoa tí dachore Saulo cjiro surara cūhure ne cūiro duhsaro marieno filisteo masa surara wajā pahñonocaa tiha.

⁷Ti ā wajā pahñochu, israe masa coyea ti cahma wajāno caha curei jiina sehe nūa tiha. Ā nūa, cuiro mehne ti jia macarire duhu, duhti site wahcāa wahaa tiha tina. Ā yoa paina israe masa Jordāo ma sie cjoa pahrē sehei jiina cūhu filisteo masa surara ti ā yoaa quitire tuhoa tiha. Ā tuhoa, tina cūhu cuiro mehne ti jia macarire duhu, duhti site wahcāa wahaa tiha. Ti duhti site wahcāri baharo, filisteo masa sehe ta, ti jia macari cjiire pu ti, tí macaripu ji caha sua tiha.

⁸Ā yoa ti cahma wajāri dacho, pa dacho sehere filisteo masa surara sehe ti wajārina cjiri ya wapa tiare na tinia wahaa, ti cahma wajāriro cjiropu sua tiha. Ā sua, puhtoro Saulo pjacu cjiore, ā jichu to pohna ti pjacuri cjiri cūhure bocaa tiha tina. ⁹Ā bocaa, Saulo cjiro dapure dute taha nanocaa tiha. Dute taha na tuhsu, cahma wajāno to sāari suhtiro cjiro cūhure to wamoa cjiri jipihti mehneputa nanocaa tiha. Na tuhsu, ti coyeare tí cjiire ti ya yahpapu naa dutiha. Ā naa dutia, ti cohamanare ti nō payoa wuhusepu, ā jichu ti coyea ti jia macaripu cūhure tí cjiire nō tini dutia niha tina. Ā nō tini dutia, ti cahma wajā yuhdurucari quti cūhure yahu site tini dutia nia tiha tina.

¹⁰Baharo filisteo masa surara sehe puhtoro Saulo cjiro to cahma wajāri suhtiro cjiore to wamoa jipihti cjiri mehneta ti cohamaco Asatarote wama tiricorore ti nō payori wuhupu cūa tiha juna. Ā yoa to pjacu cjiro sehere ti cahma wajāriro cjiro cahacā curepu jiri maca Bete Sā wama tiri macapu naa tiha. Tópu na su, tí macare taa poca wuri mehne butiro ti biha ducataricapu cjā puha ōa tiha tina to pjacu cjiore. Tuhsu, to pohna ti pjacuri cjiri cūhure tí tiharicaputa cjā puha ōa tiha tina.

¹¹Ā yoa israe masa coyea Galaa yahpapu jiri maca Jabe macaina sehe filisteo masa Saulo cjiro pjacure ti ā yoaa quitire tuhoa tiha. ¹²Ā tuhoa, tí macai jiina cāina wacū tuaina sehe to pjacu cjiore Bete Sāpu macaa wahaa, nāmi puro wahaa tiha. Waha, tópu sua, tiro cjiro pjacure, ā jichu to pohna cjiri

ti pjacuri cūhure na boro, naa wahaa tiha tina. Naa, ti jiri macapɯ sua, tina
cjiri ti pjacurire jū cohānocaā tiha. ¹³ Jū cohā tuhsu, ti cohāri cjirire na, tí
macai jidu yucɯcu docai yaa tiha. Ya tuhsu, cahyaa, cū somana waro chuera
tiha tina.

2 SAMUE

Resumen: Ñ yoa puhtoro Saulo cjiro to yariari baharo, Davi sehe israe masa Judá cjiro ya curua macaina puhtoro sãa tiha. Tó panopu Cohamacu sehe “Israe masa puhtoro cjihto sãaihca mûhu” ni cûyu tuhsua tiha tirore. Ñ jiro to ã ni cûyuriro cjiro seheta puhtoro sãano nia tiha Davi. Ñ jiro Judá curua macainare noano suho ji muhtaa tiha Davi, Cohamacu to yoadohoro mehne. To ã yoadohoro mehne Judá curua sehe noano tuari curua bucua mujaa tiha.

Wiho mejeta paina to coyea once curuari macaina sehe ne tirore ti puhtoro to jichu cahmaera tiha. Ñ jia tina cûhu ti mu suro Saulo cjiro macuno Isbosete wama tirirore bese, ti puhtoro cjihto sãa timaha tina cûhu. Tuhsu, Judá curua macainare wiho warota cû buhusehe ñu tuhtia tiha. Ñ jia cãa tahari Judá curua macaina mehne cahma wajã mujaa tiha tina, siete cûhmari waharo puro. Wiho mejeta Judá curua macainare cahma wajãa bihoera tiha.

Ñ yoa tó seheta ñano jia tina, pome yuhdua wahaa tiha tina. Ñ jia cû numu puaro ti coyea sehe ti puhtoro Isbosetere wajãnocaa tiha. Ti ã wajãri baharo, tinare ji muhtararo maeraina tjuaa tiha tina. Ñ jia Davi mehne sehe majareruca, tiro sehene ti puhtoro to jichu cahma ducua tina cûhu, “Ahriri mari cûhure noano suho wajarohca” nia.

Davi jipihtina israe masa ti puhtoro sãa tiha

5 ¹Ñ yoa tí pjapure Davi sehe Judá cjiro ya curua macaina puhtoro jia tiha. Ti puhtoro jiro, Hebrô wama tiri macapu jia tiha tiro. Ñ yoa tópu to jichu, cû numu paina to coyea israe masa curuari, once curuari macainare suho ji muhtaina sehe tiro mehne suhudia sua tiha. Ñ suhudia sua, ò sehe niha tina tirore:

—Mari payu curuari tju wa dapo jipanahta, cû curua macaina jina nija. ²Ñ yoa mari coyeiro Saulo cjiro mari puhtoro to jia tiri pjapure, muhuta jia tire jipihtina mari israe masa curua macainare suho cahma wajã muhtararo. Ñ yoa tí pjaputa mari Cohamacu Yawe cûhu muhure ò sehe ni cûa tiri jire, “Yu ya curua, israe masa curua puhtoro cjihto jiihca mûhu. Ovejaa ñu wihboriro ovejaare to noano ñu wihboro seheta mûhu cûhu yu ya curuare noano ñu wihbohtiro cjihto jiihca” ni cû tuhsua tiri jire Cohamacu Yawe muhure. Ñ jina sã cûhu sã puhtoro rey mu jichu cahmaja —niha tina tirore.

³Ti ã nichu tuhoru, Davi sehe ò sehe ni yuhtiha:

—Yawe sehe musa ã niare tuhoca. Ñ jicu yuhu cûhu to tuhorocaroi cua pisaro mehne “Áta jijaro” ni yuhtija musare —ni, yuhtiha tiro tinare.

To ã ni yuhtichu tuhoa, tina sehe olivo sere to dapu bui pio payo, tina cûhu tirore puhtoro sôha. Tó sehe yoa, tina jipihtina doce curuari macaina Davire puhtoro rey cjua ducua tiha juna.

⁴⁻⁵Ñ yoa Davi coã puhtoro ji ducaro, treinta cûhmari cjuaa tiha. To puhtoro jia cûhmari ôpe cûhmari jia tiha. Hebrô wama tiri macapu, to coyea Judá

cjiro ya curua macaina warore ti puhtoro jiro, siete cuhmari noano, pa cuhma dacho maca waro ti puhtoro jia tiha. Á yoa paina to coyea once curuari macaina cūhu tirore ti puhtoro sōa suri baharo sehere tiro tina jipihtina doce curuari macainare treinta y tres cuhmari waro suho puhtoro ji namoa tiha tjoa, Jerusalē wama tiri macapū. Á jiro jipihtiro cuarenta cuhmari noano, pa cuhma dacho maca waharoi, tópe cuhmari puhtoro jia tiha Davi.

6-25 [...]

Davire to noano wahachu yoahdire yahu cūa tiha Yawe. Tuhsu, tirore ji turia dijahtinare to noano wahachu yoahiti cūhure yahu cūa tiha

7 ¹Á yoa Davi puhtoro to jichu, Yawe sehe tirore noano yoadohoa tiha. To ā yoadohochu, tiro sehe jipihtina tirore ũu tuhtiinare cahma wajā yuhduruca pahñonocaa tiha. Á cahma wajā yuhduruca pahñono, pa sehepu waha, cahma wajā tinino marieno, puhtoro jiro to jiri wuhu wurupu jinocaa tiha juna. ²Tí wuhupu jiro, cū numu Cohamacu yare yahu muhtariro Natāre ō sehe niha Davi:

—Yuhu sehe puhtoro jicu, ahri wuhu noari wuhu wurupu noano jinocaja. Á noari wuhu wurupu yu jinocano wato, Cohamacu to cūri dutiare mari wihbori caro sehe mari tuā daporu wuhucā, wiho jiputiari wuhucā cjiropu jira —niha Davi Natāre.

³To ā nichu tuhoro, Natā sehe tirore ō sehe ni yuhtiha:

—Āta jira. Quihōnota jira mu ā ni tuhotua. Muhu mari Cohamacu Yawere to ya wuhu cjihto yoabasa duai, yoabasaga. Cohamacu muhure noano piti tira. Tuhsu, tiro jipihti mu yoa duaa cūhure noano wahachu yoahre. Á jiro ahri dahraa cūhure noano wahachu yoarohca —ni yuhtiha Natā tirore.

⁴To ā ni yuhtiri baharo, tí űamihta Natāre ō sehe niha Yawe:

⁵—Davi, yu cahamacunore ō sehe ni yahubasai wahaga muhu: “Tiro jierara yu ya wuhu, noari wuhu wuru cjihtore yuhure dahrebasahtiro. ⁶Panoputa israe masa curuare Egipto yahpapu jiri curuare na wio, yu na taa tiri pjaputa wuhu, noari wuhu wuru maera tihi yuhu. Á maera, israe masa ti opu tarucua tiri pjapure ti tuā dapo mujari wuhucapu jia tihi yuhu. Te mipu cūhure tí wuhucaputa jisinja yuhu. ⁷Á yoa tinare suho waja muhtahtina cjihti yu sō mujaina cūhure ne cūirore wuhu, noari wuhu wuru siniera tihi yuhu tina cjirire. ⁸Á nicu, ‘Davi to tuhotua űa nina’ nii nieraja. Noa nina to tuhotua. Á jicu muhu sehe yuhu musa Cohamacu Yawe Jipihtina Bui Ji Yuhduruca Surirore ō sehe ni Davi, yu cahamacunore yahubasa namoga: Yuhuta jia tihi tiro cūhure panopure ovejaare űu wihbo cohtariro to jia tiri pjapure puhtoro cjihto besei. Á besei, yu ya curua israe masa curua ti puhtoro choro cjihto sōa tihi yuhu tirore. ⁹Á yu sōri baharore nohoi to waharoi yuhu cūhu tirore ā piti tirucua tihi. Á piti tirucui, yuhuta jipihtina tirore űu tuhtiinare to cahma wajā yuhdurucachu yoa mujaa tihi tirore.

‘Á yoa mipure tirore ō sehe wahachu yoa namoihtja tjoa. Jipihtina masa curuari macaina ti wacūnohoriro choro wahachu yoaihtja yuhu tirore. Á yoi, paina ahri dacho macaina puhtoa chorire masa ti wacūno yoaro sehetā tiro cūhure masa ti wacūnohoriro jichu yoaihtja.

¹⁰⁻¹¹ ‘Á yoa mipu musa yu ya curua macaina musa jiri yahpa cūhure yuhuta jia tihi, musare besebasariro. Á besebasai, cuiro marieno, tuhsu, cahma

wajāno marieno noano musa jinocahti yahpa cjihtore besebasai nia tihi yuhu musare. Wiho mejeta ahri yahpapu wihi, musa ji ducari baharore payu masa curuari macaina naina cahma wajā yuhduruca sāa ta, musare nāno dutipe mujana. Ā yoa mipure ā waha mujasi juna. Yuhu yu basita tiro Davire cahma wajāno marieno noano musare to suho jinocachu yoihtja.

‘Ā yoa ahri cūhure yuhure tirore yahubasaga: Tirore ji turiahtina cjihti cūhure puhtoa ti ji cohtota turia tia cūhure pihtichu yoasi. Ā puhtoa ji cohtota turia wahcārucachu yoihtja yuhu, to ya da macainare. ¹² Ā jii yuhu sehe, to yariari baharo, cūiro to macunore bese, to cohtotaro puhtoro sōihtja. Ā sōi, tiro cūhure puhtoro tuariro choro jichu yoihtja. Yu ā yoachu, tirore ne cū curua macaina yuhduruca duaa, bihosi. ¹³ Ā yoa tiro yu besehtiropu jirohca juna yu ya wuhu cjihtore dahrebasahtiro cjihto. Ā yoa to yariari baharo cūhure to macunota tirore puhtoro ji cohtota turia wahcānohca. Ā yoa to pohna, to panamana tirore ji turiaa cūhu ā dihta puhtoro ji cohtota turia wahcāhca.

¹⁴ ‘Ā yoa Davi macuno yu besehtiro sehe yu macu yoaro sehe jiro ninohca. Ā jii yuhu cūhu tirore to pucuro yoaro seheta jii niihca. Ā jii, tiro yuhure to yuhduruca mujachu, masa ti pohnare ti buhiri dahrero seheta yuhu cūhu buhiri dahre mujaihca tirore. ¹⁵ Ā buhiri dahre mujapaihta, puhtoro Saulo cjirore yu yoariro cjiro sehe yoasi. Ā jicu puhtoro to jirore masi yuhu tirore. Ā pja nūrucu, ā noano yoarucuihtja yuhu tirore. ¹⁶ Ā yoa yu niriro cjiro seheta Davi cūhure to puhtoro to jiare masi yuhu. To ya curua macaina cūhure puhtoa ti ji cohtota turia tiare ne masi.” Ā ni, yu cahamacuno Davire yahu turiabasai wahaga muhu yuhure —niha Yawe Natāre.

¹⁷ To ā ni yahuri baharo, Natā sehe Davi cahapu waha, jipihtia Yawe to yahu dutirire tirore yahuha.

18-29 [...]

2 REYES

Resumen: Ñ yoa Davi macuno, Salomō Cohamacu ya wuhure to tuhsu dapori baharo, payu cūhmari baharo, Yawere yūhdurūca payūriro wahaha. Cū nūmū tiro Salomō cjiro yariaa wahaa tiha. To yariari baharo, to macuno Roboā wama tiro sehe tirore puhtoro ji, cohtotaa tiha tjoo. Tiro Roboā israe masa curua, jipihtiri curuare puhtoro ji muhtabrori jimaha. Wiho mejeta Cohamacu sehe, Roboā pūcuro Salomō cjiro to tirore yūhdurūca payūri buhiri, payu israe masa to macuno to puhtoro jichu cahmaerachu yoaha. Tuhsu, tī mehne ti basi tuaro cahma sayochu yoa, israe masa curuare cū curuata ti jimanore pua curua tju warucu suchu yoaha. Tuhsu, ti jiri yahpa cūhure pua yahpa tju warucu suchu yoaha. Judā wama tiri yahpa, ā jichu Israe wama tiri yahpa tju warucu suchu yoaha. Judā wama tiri yahpa sehere Judā curua macaina, Benjamī curua macaina jia tiha. Israe wama tiri yahpa sehere israe masa dūhsaa curuari, diez curuari macaina tju warucu su, jia tiha.

Ñ yoa Cohamacu sehe to ā tju warucu suchu yoahto panopu Davi cjirore ō sehe ni yahu cū tuhsua tiha: “Muhure ji, cohtota turiaina mu pohna, mu panamana sahsero yu ya curua israe masa ti puhtoa ji, cohtota turia wahcāahca. Puhtoa ti ji, cohtota turia wahcā tia sehe ne pihtisi” ni, yahu cū tuhsua tiha. Ñ jia Cohamacu to ya curuare pua curuari to tju warucu suchu yoari baharo, Judā wama tiri yahpa macaina sehe ti nūchūno Davi cjirore ji, cohtota turiainare cūiro bese, ti puhtoro cjihto cja turia wahcā tiha, Cohamacu to yahu cūiro cjiro sehetā.

Wiho mejeta Israe wama tiri yahpai tju warucu su, jiina sehe Davi cjirore ji turiainare ti puhtoro cjihto cahmaera tiha juna. Ñ jia tina cūhu ti mu sūro Nabate macuno Jeroboā wama tirore sehere bese, puhtoro sōa tiha tina cūhu. Ñ yoa tiro Jeroboā sehe to masa curuare dōi waro Yawere ño payo duhuchu yoa tiha. Ñ ño payo duhuchu yoaro, pua masu, wachua masuri dahre duti, tī masuri sehere suho ño payo dūcaa tiha tiro. Ñ yoaro, to masare Yawe sehere tuaro waro yūhdurūcachu yoa tiha.

Ñ jia to yariari baharo cūhure, tiro cjiro masa sehe Yawere ā yūhdurūcarucuina jia tiha juna. Ti puhtoro cjiro to ñano suho ji muhtari cjirore duhu duaera tiha tina. Ti ñaa jia tiare ti duhu duaerachu ñuno, Yawe sehe tirore dahra cohtaina to yare yahu muhtaina mehne tī buhiri tinare to buhiri dahrehtire yahu tuhsua timaha. Ti yahu mujapachuta, tina sehe tinare tuho duaera tiha. Ti ā tuho duaerari buhiri, Yawe sehe Asiria yahpa macaina mehne tinare buhiri dahrea tiha juna.

Asiria yahpa macariro puhtoro mehne israe yahpa macainare buhiri dahreha Yawe

17 ¹ Ñ yoa tī pjapure Israe yahpare Osea wama tiroro puhtoro sāa tiha. Tiro Osea, Elā wama tiroro macuno jia tiha. Ñ yoa tiro Osea Israe yahpare to puhtoro sāari pjare ti coyee Judā yahpa macaina puhtoro sehe Aca wama tiroro jia tiha. Tiro Aca sehe Judā yahpare doce cūhmari waro noano puhtoro ji wahcārucuro nia tiha. Tōpe cūhmari to puhtoro ji wahcāchu waro, Osea cūhu Israe yahpare puhtoro sāa tiha. Ñ yoa to puhtoro sāari baharo, tiro

cūhu nueve cūhmari waro noano Israe yahpare puhtoro jia tiha. ¹ ã puhtoro jiro, Samaria wama tiri macapu jia tiha tiro. ² Tiro cūhu puhtoro jiro, Yawe to ñu ji coeraa barore yoaa tiha. Wiho mejeta to pano macaina puhtoa cjiri ti ñaa yoiroro cjiro sehe tó puro ñaca waro yoaera timaha tiro.

³ ã yoa cū nūmū Asiria yahpa macariro puhtoro Salamanasa wama tiroto to surara mehne Samariapu sū, Osea mehne cahma wajāno sua tiha. ã cahma wajāno sūro, Oseare cahma wajā yuhdurucanocaa tiha. To ã cahma wajā yuhdurucari baharo, tiro Osea sehe Salamanasa to cahamacuno yoaro sehe tjuaa tiha. ã jiro Salamanasa sehe tirore cūhmaripe bujua wapa sini mujaa tiha. ⁴ To ã wapa sini mujachu, Osea sehe wapama, pume yuhdua wahaha. ã pumeno, puhtoro Salamanasa to masieraro, Egipto yahpa macariro puhtoro So wama tiriropure to yoadohoa sinirocamaha tiro, cahma wajādoho dutiro. ã sinirocaro, Salamanasa cūhmaripe to wapa sini mujanore wapa namo duaeraha. To ã wapa namo duaerachu, Salamanasa sehe Osea tirore to yoa duaare masinocaha. ã masino, to surarare Oseare ñaha, peresupu biha dapō dutia tiha.

**Asiria yahpa macariro puhtoro Israe yahpa macainare cahma
wajā yuhduruca, tinare cahamaca naa wahaa tiha**

⁵ ã yoa Oseare peresu ti yoiri baharo, Salamanasa sehe to surara mehne Israe yahpapu suha tjoa. Tópū sū, tí yahpa macaina surara mehne cahma wajāa tiha. ã cahma wajāa, tinare cahma wajā yuhduruca wahcāa tiha tina, pū puhtoro Osea ya maca Samariapu. Tópū sū, to surara mehne tí macare ducata bihatorucu sua tiha. ã ducata bihatorucu sua, tí maca macainare peresu yoaro sehe cjuaa tiha, tia cūhma waro. ⁶ Tia cūhma waharo puro Samaria macaina cūhu tinare yuhdurucanoca duamaha. Wiho mejeta bihoera tiha tina.

ã yoa Salamanasa sehe Osea nueve cūhmari to puhtoro ji wahcāchu waro, tí maca Samariare taa mehne ti biha ducatarī sahrīnore yuhdu sāa, tí macapū jīinare cahma wajā yuhdurucāa tiha juna. Cahma wajā yuhduruca tuhsū, israe masare payū cahamaca naa tiha to ya yahpa Asiriapu. Tí yahpapu tinare na sū, cāinare Ala wama tiri macapū ti cahamaca cjihti cūa tiha. Painare tí yahpapu jiri ma, Abor wama tiri ma duhtu cahapū tí ma yoaro puro pū buhusehe cjoariputa cū yojaa tiha. ã yoa to ya yahpa cahacāi pa yahpa Media wama tiri yahpa jia tiha. Tí yahpapu jia macaripū painare cahamaca cūa tiha tiro.

⁷ ã yoa Israe masare tó sehe yoa, ñano yuhduchu yoiroro sehe Yawe ti Cohamacuta jiha. Tiro sehe ti ñuchusuma cjiri Egiptopū cahamaca ti jisinichu, tí yahpa macariro faraōre yuhduruca, tinare na wioa tiha. Wiho mejeta tina cjiri panamana sehe tina cjirire na wiororo Cohamacure ne ño payoera tiha juna. ã ño payoeraa, “Cohamana jira” ti nia masuri sehere ño payoina wahaha.

⁸ ã yoa Canaā yahpai ti pano ji muhtaina cjiri sehe Cohamacu to ñu yabia barore tuaro yoina jia tiha. ã jiro Cohamacu tinare cohā wionocaa tiha. To ã cohā wiorina cjiri ti ñaa jia tiare israe masa cūhu ñu cū, ñano jia tiha tina cūhu.

ã yoa ti puhtoa cūhu tjoa tinare Cohamacu warore ño payo duhunoca dutia tiha. ã ño payo duhu dutia, masuri sehere ño payo dūca dutia tiha. Ti

ã ño payo dutichu, tina cûhu ti dutiro seheta tí masurine ño payoa tiha. Ñ jia tina cûhu buhiri tiina wahaa tiha.

⁹Tuhsu, payu ñaa, ti Cohamacu Yawe to ñu yabia baro cûhure yoaina wahaha. Ñ jia bujua macarire, daa macaricã cûhure ne cû maca duhsaro marieno ti cohamanare ti ño payohti culturi cjihti yoa tiha tina. ¹⁰Ñ yoa tí macari duhtu cahai jia tû yucuri buhuripu cûhure tãa mehne, yucuri mehne ti dahrea masurine dapoa tiha. Tuhsu, yucuri, bujua yucuri doca cûhure tí masuri baro dapoa tiha. ¹¹⁻¹²Tí masurine ño payoa taa, me sitia pohcare poho cû, tíre jû, ño payoa tiha tina. Tó sehe ñano jia tia, tí yahpai ji muhtaina cjiri, Yawe to cohã wiorina cjiri ti ñano jia tiro cjiro seheta ñano jia tia nia tiha tina cûhu. Wiho mejeta Yawe sehe israe masare õ sehe ni yahu cû tuhsua timaha: “Ne dohse jia masurine dahre, ño payoena tjiga musa” ni, yahu cû tuhsua timaha tinare. To ã ni, yahu cûri baharo jipachuta, tina sehe masurine ño payoia wahaha. Tí buhiri tina mehne tuaro waro suaa tiha Yawe.

¹³Wiho mejeta Yawe sehe “Tinapu ã wahari” nino, tó panopu to yare yahu muhtaina mehne Israe yahpa macainare, Judá yahpa macaina cûhure payu tahari õ sehe ni yahu tuhsua timaha: “Musa ñaa jia tiare tó puro duhuga musa. Musa ñuchusuma cjirire yu cûri dutia sehere wacû nunu, tí mehne sehe jia tiga musa. Tí yu cûri dutiare yahu tuhsui yuhu musa cûhure yu yare yahu muhtaina mehne. Ñ jina yu yahuriro cjiro seheta jia tiga musa” ni, yahu mujaa timaha Yawe tinare, to yare yahu muhtaina mehne.

¹⁴Ñ yoa Israe yahpa macaina sehe, Yawe yare yahu muhtaina tinare payu tahari ti yahu mujapachuta, tinare tuho duaera mujaa tiha. Tí ñuchusuma wachu masure yoa, ño payorina cjiri ti tuho duaerariro cjiro seheta tuho duaera tiha tina cûhu. Ñ jia Yawe ti Cohamacu warore wacû tua duaera tiha tina cûhu.

¹⁵Tó panopu Yawe sehe ti ñuchusuma cjiri mehne õ sehe ni durucu cahno tuhsua timaha: “Musa sehe yu cûri dutiare yuhdurucaro marieno quihõno yuhti mujaga. Musa quihõno yuhti mujachu, yuhu cûhu musa Cohamacu jiihtja. Tuhsu, musare noano wahachu yoaihtja” ni, durucu cahno tuhsua timaha tiro tina mehne. To ã ni durucu cahnori cjirire tina cjiri panamana sehe cua pisaro tuhoera tiha. Tuhsu, to yare yahu muhtaina mehne tinare to bosachu cûhure tuho duaera tiha. Ñ tuho duaera, wapa mariea masuri sehere ño payoa tiha tina. Ñ jia wapa marieina yoaro seheta tjuaha tina cûhu.

Ñ yoa tí yahpa, Canaã yahpai ti sãahto panopu Yawe sehe tinare õ sehe ni yahua timaha. “Tí yahpa macaina ti ñano jia tiare ñu cû, jia tiena tjiga musa” ni, yahua timaha Yawe tinare. To ã ni yahua cjiri cûhure yuhdurucaha tina.

¹⁶Ñ yoa Yawe ti Cohamacu tinare to cûri dutia jipihtiare yuhdurucaina wahaha tina. Uru mehne wachu masuri, pua masu dahre, tí masurine ño payoa tiha. Tuhsu, Baal wama tiro masurine, ã jichu Asatarote wama tiri-coro masuri cûhure dahre, ño payoia wahaha. Tuhsu, ñahpichoha pocare, sũ dacho macarirore, ã jichu sũ ñami macariro cûhure ño payoia wahaha tina.

¹⁷Ñ yoa Moloque wama tiro masuri cûhure dahre, ño payoia wahaha tina. Tiro Moloque masurine ño payoa taa, ñabiaro yoa, ño payoa tiha tina. Tí pohnacã numiacãre, muacã cûhure ti tuaro cahĩboinacãre wajãa tiha. Wajã tuhsu, ti pjacuricã cjirire jû, tirore ño payoa tiha tina. Ñ yoa tinare ñaa wahachu cûhure, ñuweinare, wete yayare maca, ñu dutia tiha tina. Paye

ti masi dua a jichu cūhure, tina baroreta maca, ñu dutia tiha. Bujua witiro marieno ñaa dihtare a yoarucua tiha tina. Ti a ñano jia tichu ñuno, Yawe sehe tina mehne tuaro waro suaha. ¹⁸ Ñ suaro, tinare to wari yahpa Israe yahpa macainare cohā wio pahñonocaa tiha Yawe. Ti coyee Judá wama tiri yahpa macaina sahserore cohā wioerasinia tiha.

¹⁹ Ñ yoa tina Judá yahpa macaina cūhu ti Cohamacu Yawere yuhdurucainata jia tiha. Ti coyee Israe yahpa macaina tói jisinia, ti ñaa yoaare ñu cū, ñano jia tiha tina cūhu. ²⁰ Ñ jiro Yawe sehe ti coyee israe yahpa macainare to buhiri dahreriro cjiro seheta Judá yahpa macaina cūhure buhiri dahrea tiha. Tinare ñu tuhtiina wihi, cahma wajā yuhduruca sãa, tinare ñaha, ti ya yahpau na su, ñano cahamaca tipechu yoaha tina cūhure. Tó sehe yoa, to wari yahpai jimainare cohāroca wionocaa tiha Yawe tina cūhure.

²¹⁻²³ [...]

²⁴ Ñ yoa Asiria yahpa macariro puhtoro Salamanasa sehe Israe yahpai jiina israe masare to cahamaca naari baharo, to ya yahpa macaina sehere payu na taa, ti jia macari cjiropu ji duti cūa tiha. Ōpe macari macainare na taa, cūa tiha tiro: Babilonia macaina, Cuta macaina, Avá macaina, Hamate macaina, Sefaravāi macaina tinare na ta, ji duti, cūa tiha tiro. Tó sehe yoa, to masare israe masa ya macari cjiirire pu ti, jichu yoa tiha tiro.

²⁵⁻⁴¹ [...]

25 *Resumen: Ñ yoa Asiria yahpa macariro puhtoro Israe yahpau jiinare to cahma wajā yuhduruca, to cahamaca to naari baharo, ciento y dieciete cūhmari waro yuhdu tiha. Tópe cūhmari baharo, paio Babilonia yahpau macariro puhtoro Nabucodonoso wama tiro cūhu Asiria yahpa macariro puhtoro to cahamaca naarina cjiro coyee, Judá yahpau jiina mehne cahma wajāno sua tiha tiro cūhu. Ñ cahma wajāno suro, tinare cahma wajā yuhdurucanocaa tiha tiro cūhu. Tinare cahma wajā yuhduruca tuhsu, ti puhtoro Joaqui wama tirirore peresu naa wahaa tiha Babilonia yahpau. Ñ yoa paina cūhure payu peresu yoa, to cahamaca cjihti naa tiha Nabucodonoso. Tuhsu, to cahamaca naa duhaina sehere ti puhtoro cjihto cūiro ti coyeyro Sedequia wama tirirore bese, tinare puhtoro sōbasaa tiha. Sedequiare a puhtoro sōno, to cahma-sāano seheta yohtiro cjihto sōno nia tiha Nabucodonoso.*

To a puhtoro sōri baharo, ocho cūhmari waro puhtoro jia tiha Sedequia. Ñ yoa cū dacho tiro Sedequia Nabucodonoso to dutiro docai puhtoro ji namo duaeraha. Ñ jiro tirore yuhduruca duaro, Egipto macariro puhtoropure cahma wajādoho dutiro, to yoadohoa sinirocamaha. Wiho mejeta Nabucodonoso sehe to a yuhduruca dua quitire masinocaha. Ñ masino, to surara mehne Sedequia to jiri macapu waha, tiro mehne cahma wajāno suha.

**Israe yahpa macainare to buhiri dahreriro cjiro seheta
Judá yahpa macaina cūhure buhiri dahrea tiha Yawe**

¹ Ñ yoa tí pjpure Judá yahpa macariro puhtoro Sedequia wama tiro jia tiha. Tiro Sedequia sehe puhtoro jiro, Jerusalē wama tiri macapu jia tiha. Ñ yoa tí yahpare ocho cūhmari waro noano puhtoro jia tiha tiro.

Ñ yoa pa cūhmare diez sūri to puhtoro ji wahcārucuchu waro, Babilonia yahpau macariro puhtoro Nabucodonoso wama tiro sehe, to surara mehne Jerusalēpu tiro Sedequia mehne cahma wajāno sua tiha. Ñ cahma wajāno

suro, tí maca duhtu cahai to surara peri mehne noano soroa bihatorucu su, bucua caha jia tiha. Tí maca Jerusalē sehe taa ti pohaa pahtari mehne butiro ti sahrī sāari maca jia tiha. Ā jia Nabucodonoso cūhu sehe tí sahrīnore yuhdu sāa dua, dihta tuhuri wuri poho cū majarea tiha tí sahrīno duhtu cahai. ²⁻³ Ā yoa tina cū cūhma noano, pa cūhma dacho maca waro Jerusalēre bucua cahaa jia tiha. Tó puro yoiari pja ti bucua caha jichu, tí maca macaina sehe ti chuboa tjoaa waha, juca baa niha.

⁴ Ā yoa cū dacho Nabucodonoso surara sehe Jerusalē macari sahrīnore cū copa pohawe sāa wahaha. Ti ā pohawe sāachu, Sedequia sehe tí nāmihta to toaa jiri cuhtui to surara mehne waha, to ya wuhu macari sahrīno sopacapu wijaa wahaha. Wijaa, tí maca macari sahrīno sopaca cūhure yuhdu wijaa wahaha. Yuhdu wijaa, Jordāo mapu buhari mahai duhti wahcāa wahaa timaha tiro, ti bucua caha jiro watoihta. ⁵ Ti ā duhti wahcāchu, Nabucodonoso surara cūhu sehe tinare nū boca, tinare muroca nūnu ti wahcāha. Muroca nūnu ti wahcā, pu Jericó wama tiri maca cahacāpu tinare mu sua taapu niha. Ti mu sua tachu nūa, Sedequia surara sehe tirore mu cō, duhti site wahcāa wahaha. ⁶ Ti ā duhti site wahcāri baharo, Nabucodonoso surara sehe Sedequiare nahanocaha juna. Naha tuhsu, ti puhtoro Nabucodonoso cahapu peresu naa wahaha. Tiro sehe tí pjare Siria yahpapu jiri maca, Ribilapu jia tiha. Tópu ti na suri baharo, Nabucodonoso sehe Sedequiare to buhiri tirire yahuha, tirore to buhiri dahrehto pano. ⁷ Yahu tuhsu, to nūrocaroihta to pohnare wajānoca dutiha. Ti wajāri baharo, ti pūcuro Sedequiare to caparire cjā tihānoca dutiha. Ā yoa comaa dari mehne tirore duhte, Babilonia yahpapu peresu naa turiaa tiha.

⁸ Ā yoa cū sū baharo, Nebusaradā wama tiroiro Jerusalēpu wihia tiha. Tiro sehe Nabucodonoso to surara puhtoro jia tiha. Tuhsu, to puhtoro Nabucodonoso to yoahtire durucu cahnodochoriro cūhu jia tiha tiro. Ā yoa Jerusalēpu to wihiri cūhmare to puhtoro Nabucodonoso sehe diecinueve cūhmari waro puhtoro ji wahcārucuro nia tiha.

⁹ Ā yoa tiro Nebusaradā sehe tí pjai wihiro, israe masa Yawere ti nō payori wuhu, Salomō to dahreri wuhu cjirore jūnoca dutia tiha to surarare. Tuhsu, Puhtoro Sedequia ya wuhu cjiro cūhure jūnoca dutia tiha. Tuhsu, puhtoa yoaro sehe jiina ti ya wuhuse cjiri cūhure noano jū boro pahñonoca dutia tiha tiro. ¹⁰ Tíre jū boro pahño tuhsu, tí maca macari sahrīno cūhure cjā poha site boronoca dutia tiha.

¹¹ Ti ā yoiari baharo jipachuta, tí maca cjiro Jerusalēpure payu masa jisinia tiha. Jia tiha tí maca macaina waro. Tuhsu, ti coyea wiho jia macaricā macaina cūhu ti cahma wajāri pjare cui, tí macapu duhti sāarina cjiri jia tiha. Tuhsu, Judá masa coyea jipahta, Babilonia surarare cuirō mehne tina mehne sāarucu surina cjiri cūhu jia tiha tí maca cjiropu. Ā yoa Nebusaradā sehe tina perire Babilonia yahpapu naa wahaa tiha, ti cahamaca cjihti. ¹² Pjacuro yuhduinacā sahserore naaera tiha tiro. Tinare ti coyea ti toaa cjirire, ti se weseri cjiri cūhure dahra duti cūa tiha Judá yahpaihta.

13-30 [...]

1 CRÓNICA

Cohamacu ya wuhu cjihtore ti yoahti cjihtire ñu quihōyua tiha Davi

22 ¹ Ñ yoa ò sehe niha puhtoro Davi:

—Ahri cuhtui mari Cohamacu Yawe to ya wuhu cjihtore dahrebasanahca mari. Ñ jina tí wuhu wurure mari tuhsuri baharo, tí wuhu wijaroi mari wahiquinare mari wajã, mari jũ wa muo mujari carore cūnahca mari —niha.

² Ñ yoa to ã niri baharo, jipihtina paye masa, ti ya yahpai ji cohtainare pji cahmachu dutia tiha Davi. Baharo, ti wihi pihtichu ñuno, tinare dahra dutia tiha. Ñ dahra dutiro, tinare tãare poha, noaa cjoari wuri yoahtina cjihti cūha. Tí cjoari wuri sehe Cohamacu ya wuhure ti tihahti cjoari cjihti jia tiha.

³ Ñ yoa comaa cūhure payu na cahmachu dutia tiha Davi. Tí sehe peregu ti yoahti cjihti jiha. Tuhsu, bujua sopa pahmari wurire ti cjã biha ñahahti pjĩni cjihti ti yoahti cūhu jia tiha. Ñ yoa comaa bronce cūhure payu ne quihōna bihoeraa waro na cahmachu dutia tiha. ⁴ Ñ yoa cū maca Tiro wama tiri maca macaina, tuhsu, pa maca Sidō wama tiri maca macaina cūhu payu yucuri noaa baro, cedro ti nia yucurire na taa tiha. Tí yucuri cūhure Davi sehe noaa yucurire payu bese, soro cūa tiha Cohamacu ya wuhure ti yoahti cjihti.

⁵ Ñ yoa tí jipihtiare na cahmachu dutiro, ò sehe ni tuhutua tiha Davi: “Yawere yu macu to dahrebasahiti wuhu wiho jiri wuhu jichu cahmaeraja yuhu. Noaputiari wuhu wuru wijachu cahmaja yuhu. Tuhsu, jipihtiri yahpa macaina masa ti wacūnohohti wuhu wuru cjihto jichu cahmaja. Wiho mejeta yu macu Salomō tí wuhure dahrehtiro sehe wahmuno waro jira. Ñ jiro tiro dohse jia dahraare ne masierariro waro jisinina. Ñ yoa yuhu cūhu bucuro wahai nija. Ñ jicu noho puro yu catisinino puro yu basita tí wuhure to dahrehti cjihti jipihtiare na cahmachubasahtja tirore. Ñ jiro yu macu Salomō noaputiari wuhu wuru wiorohca” ni, tuhutua tiha Davi. Ñ ni tuhuturo, tí wuhure to yoahti cjihtire payu na cahmachubasa dutia tiha.

⁶ Ñ yoa cū numu to macuno Salomōre dohse to yoahti cjihtire yahuro taro, tirore pji dutia tiha. To wihichu ñuno, cua pisaro mehne ò sehe nia tiha tirore:

—Macu, mūhuta jira mari israe masa mari Cohamacu Yawe to ya wuhu cjihtore dahrebasahitiro cjihto. ⁷ Wahmanopure yuhuta jia timai tirore to ya wuhu cjihtore yoabasa duamariro. “Masa jipihtiri yahpa macaina yu Cohamacu Yawere masijaro” nicu, yoabasa duai nia tihí yuhu. ⁸ Yu ã yoa duachu ñuno, tiro sehe yuhure ò sehe nia tire: “Mūhu payu masa curuari macaina mehne cahma wajāhre. Ñ cahma wajāi, payu masare wajāhre mūhu. Ñ jicu

yū ya wūhū cjihtore yoabasa masierara mūhū” nia tire Yawe yūhūre. ⁹⁻¹⁰ Ā nino, cua pisaro mehne ō sehe ni yahu namoa tire yūhūre: “Cūiro mū macū jirohca mūhūre puhtoro ji, cohtotahtiro cjihto. Tiro sehe jirohca yū ya wūhū cjihtore yūhūre dahrebasahtiro. Ā yoa tiro puhtoro jiro, cahma wajāno marieno mū masa curuare noano suho ji mūhtanohca. Tuhsū, puhtoro tuariro choro jirohca tiro. To ā tuariro jichū űūa, paye masa curuari macaina tirore űū tuhtiina sehe tiro mehne cahma wajāa tasi. Wiho mejeta yūhūta jiihca ā wahachū yoariro. Yū ā yoachū, tiro sehe to catisinino puro cahma wajāno marieno noano yū ya curua, israe masa curuare suho ji mūhtanohca. Ā jiro tiro Salomō wama tirohca. (*“Salomō” nino, “cahma wajāno marieno jiriro” nino nica hebreo masa ya dusero mehne*) Ā yoa yū macū waro yoaro seheta jiro ninohca tiro. Ā jii yūhū cūhū tirore to pūcūro yoaro seheta jii niihca. Ā yoa tirore ji turia dijaina cūhū ne cohtotaro marieno israe masa puhtoa cjihti ā ji turia wahcāahca” ni, yahu namoa tire yūhūre Yawe.

¹¹ Ā yoa yūhūre Yawe to ā niriro cjiro mūhūta jira macū. Ā jiro tiro mūhūre ā piti tirucujaro. Ā piti tirucuro, yūhūre to niriro cjiro seheta to ya wūhū cjihtore dahre sohtori tichū yoajaro mūhūre. ¹² Ā yoa tiro mūhūre masia tia cūhūre wajaro. Tuhsū, to ya curua macainare noano mū suho ji mūhta mihnihti cjihti cūhūre wajaro. Ā waro, marine to cūri dutia to nino seheta suho ji mūhtachu yoajaro mūhūre. Ā ni, mūhūre sini payoja yūhū. ¹³ Ā yoa mū basi cūhūre ō sehe ni yahuihtja. Mū puhtoro jia tia noano waha, sohtori tichū cahmai, tiro Yawe Moise cjiro mehne marine to cūri dutiare noano yūhtiga mūhū. Mū ā noano yūhtichū, dohse jia mū yoa dua jipihtia quihōno dihta waha, sohtori tiahca mūhūre. Ā yoa dohse jia mūhūre mijoa wahachū cūhūre, tí mehne ji coa pihti, pumei tjiga. Mūhūre űāno wahapachūta, cuii tjiga. Duhuro marieno Yawere ā wacū tuarucuga —nia tiha Davi to macūno Salomōre.

¹⁴ Ā ni tuhsū, ō sehe ni yahu batoaha:

—Cohamacū ya wūhūre mū yoahiti macaa cjihti cūhūre na cahmachui, tuaro dahrahi yūhū. Ā jii tres mil y cuatrocienta tonelada waro urure na cahmachu dutihi yūhū. Ā yoa comaa plata cūhūre treinta mil y cuatrocienta tonelada waro na cahmachu dutihi. Ā yoa comaa bronce, ā jichū hierro cūhūre payū ne quihōna bihoeraa waro na cahmachu dutihi yūhū. Ā yoa yucurire, ā jichū tāa, ti pohaa cjoari, noano potoa cjoari wuri cūhūre payū na cahmachu dutihi. Wiho mejeta tí tāa pinihtare paye na cahmachu duti namoihca mūhū. Tuhsū, yucuri cūhūre na cahmachu duti namoga.

¹⁵⁻¹⁶ Ā yoa tí wūhūre dahrehtina pinihta jipihti tuhsūra. Jira tāare pohahitina cjihti, yucuri mehne dahrehtina cjihti, tiharicarire tāa cjoari mehne dahre mūohtina cjihti tina jipihtina ji tuhsūra. Ā yoa uru mehne, comaa plata mehne, comaa bronce mehne, comaa hierro mehne tí jipihtia mehne dohse jia paye barore dahre mihniina cūhū ji tuhsūra. Ā jicū mūhū sehe Yawe ya wūhū cjihtore dahre dūca bahrañoga. Tí wūhū cjihtore mū dahrechū, tiro to basi mūhūre tí jipihtiare noano wahachū yoajaro —niha Davi to macūno Salomōre.

¹⁷ Baharo, jipihtina to doca macaina puhtoare to macūno Salomōre yoadoho dutia tiha Davi. Ā yoadoho dutiro, ō sehe ni bosaha tinare:

¹⁸ —Yawe, mari Cohamacū, marine ā piti tirucu, marine to ā yoadohoruare masina mūsa. Ā yoadohorucuro, mari ya yahpai ji mūhtamarinare

musare yu suho cahma wajã yuhdurucachu to yoari cùhure masina musa. To ã cahma wajã yuhdurucachu to yoaro mehne, mari ya yahpapurẽ Cohamacu to ñu yabiare yorarucuina cùhu mariahna juna. Tuhsu, marine cahma wajã yuhduruca duaina cùhu mariahna juna. Ì jina cahma wajãno marieno noano jinocaja mari mipure.

¹⁹ Ì yoa musa sehe to ã yoari cjiire masina. Tíre masina, ji coaro mehne tirore macarucuga musa mipure. Tuhsu, to yoadohoa cùhure tirore sinirucuga. Ì yoana, to ya wuhu cjihto cùhure yoa ducaga musa. Tí wuhure musa tuhsuri baharo, Yawe marine to cùri dutiare mari wihbori carore tí wuhupu na sãa, wihbo cùnahca mari. Tùhsu, mesa, sihã dapodu, jipihtia paye muna wuhu cjiropu jia, tirore cua pisaro mehne ño payona, mari cjuaa cùhure na taa, tí wuhuputa cùnahca mari. Tuhsu, tí wuhu, noari wuhupu mari Cohamacu Yawere ño payo ducanahca mari. Ì jina ji coaro mehne tí wuhure yoa ducaga musa —ni bosaha Davi tinare.

29 ¹⁻²⁵ [...]

Ahri quiti puhtoro Davi cjiro to yariari quiti jira

²⁶⁻²⁷ Ì yoa Davi, Jesé cjiro macuno, coã puhtoro to sã ducari baharo, siete cùhmari waro puhtoro jia tiha tiro, Hebrō wama tiri macapu. Baharo treinta y tres cùhmari waro puhtoro ji namoa tiha tjoa, Jerusalē wama tiri macapu. Ì jiro jipihtiro cuarenta cùhmari waro israe masa curua ti puhtoro jia tiha tiro. ²⁸ Ì yoa to catisinino puro noano jia tiha tiro. Tuhsu, pache puro, masa ti ño payoriro jia tiha. Tó sehe jiro quiro cù nümü yariaa wahaa tiha juna, bucuro to jia mehne. To yariari baharo, to macuno Salomō wama tiro tirore puhtoro ji, cohtotaa tiha.

²⁹⁻³⁰ [...]

2 CRÓNICA

Puhtoro Salomō Yawe ya wuhu cjihtore yoa ducaro taro nia tiha

2 ¹ Ā yoa puhtoro Salomō Yawe ya wuhu cjihto, tirore ti ño payohti wuhu cjihto yoa ducaro taro nia tiha juna. Tiro cūhu to basi ya wuhu cjihtore yoaro tarota nia tiha. ² Ā jiro tí wuhusere ti yoahti macaare durehtina cjihtire setenta mil waro pji cahmachua tiha tiro. Ā yoa tū yucuripu, tāare poha duti, to warocahtina cjihti sehere ochenta mil waro pji cahmachua tiha. Ā yoa tí jipihtia dahraare suho dahra muhtahtina cjihti sehere tres mil y seisciento waro pji cahmachua tiha.

³ Baharo, cū maca Tiro wama tiri maca macariro puhtoro Irā wama tirirore ō sehe ni quiti warocaha:

—Muhu sehe yu pucu Davi cjirore yucuri noaa cedro wama tia yucurire duaa tire. Tí mehne tiro sehe to ya wuhu cjihto noari wuhu yoa tire. Ā jicu yuhu cūhure mu duachu cahmamaca yuhu. ⁴ Yuhu sehe mipure yu Cohamacu Yawere sã ño payohti wuhu cjihtore yoa ducari tai nija. Tí wuhu to ya wuhu cjihto sahsero jiro ninohca. Ā yoa sã sehe tí wuhupu me sitia pohcare jū wa muo, tirore ño payo mujanahca. Ā yoa pã cūhure to ya mesai tirore ño payoro mehne to ñurocaroi ā payo mujanahca. Ā yoa dachoripe bohrea cahape tahari tí wuhu wijaropu wahiquirore wajã, jū wa muo, Yawere ño payo mujanahca sã. Ā yoa ñamichahari cūhure ā dihta yoa mujanahca. Tuhsu, sã soa numuri sabadorire, ā jichu sūripe wahma ji ducari dacho cūhure āta yoa mujanahca sã. Ā yoa cūhmari cūhure tia taha bese numuri yuhdoa tija sã. Ā jina tí bese numuri cūhure wahiquinare wajã, jū wa muo, Yawe sã Cohamacure ño payo mujanahca sã. Tí sã ā yoa tia sehe Cohamacure yuhdurucaro marieno ā sã yoarucuhti jia nina. ⁵ Tiro sã Cohamacu sehe israe masa jieraina ti ño payoina cohamana bui ji yuhdurucu sūriro jiro nina. Ā jicu tirore pjiri wuhu wuru yoabasai tai nija yuhu —ni puhtoro Irāpūre quiti warocaha Salomō.

Resumen: Ā yoa puhtoro Irā sehe Salomō yucuri to sinirocari quitire tuhoha. Ā tuhoro, to sinirocariro cjiro seheta yucuri payu warocaha Irā. Tuhsu, cūiro to coyeiro Urā wama tirirore warocaha. Tiro sehe yucuri mehne, comaa mehne, tãa mehne dohse jia mehne paye baro dahre mihniriro jiha. Ā jiro tirore bese, warocaro niha Irā, “Salomōre yoadohojaro” nino.

Ā yoa Salomō sehe jipihti Cohamacu ya wuhu cjihtore to yoahti cjihtire cjuu pahñonocaa tiha juna. Ā jiro tiro tí wuhu cjihtore dahre muo ducaa tiha juna. Tuhsu, jipihti tí wuhupu jihti cjihti cūhure dahre ducaa tiha.

6-18 [...]

**Cohamacu to diez dutiare to joaa pjini ti wihbori carore to
ya wuhu, wahma wuhupu wihboa tiha sacerdotea**

5 ¹ Ñ yoa puhtoro Salomō, Yawe ya wuhu cjihtore tuhsu dapoa tiha juna. To tuhsuri baharo, to pucuro Davi cjiro Cohamacure ño payoro to wari cjirire na ta, tí wuhu wurupu jia tahti pocapu wihboa tiha tiro. Tí sehe uru, ã jichu comaa plata ti nia jia tiha. Tuhsu, tí baro mehne paye baro wapa tia ti yoari cūhu jia tiha. Ñ yoa tí tahti poca sehe masa Cohamacure ño payoro mehne ti warire ti wihbohti tahti poca cjihtita jia nia tiha.

² Ñ yoa tíre wihbo tuhsu, israe masa doce curuari macaina puhtoare, tuhsu, ti doca macaina puhtoa cūhure jipihti Jerusalēpu pji cahmachuha Salomō. Ñ pji cahmachuro, ti ñurocaroi Yawe to cūri dutiare ti wihbori carore to dahrerí wuhu, Cohamacu ya wuhupu wihbo cū dutiro taro nia tiha. Tí caro sehe tí pjare tí maca Jerusalēreta Siō ti ni pisuri pahrēpu ti wihbori caro jia tiha. Ñ yoa tí pahrēre pa wama mehne Davi Ya Maca ni pisua tiha tina. ³ Ñ yoa israe masa sehe cūhmaripe siete sūri mu su wahcāchu waro, Jerusalēpu bose numuri yuhdoa taa, ã tōpu cahmachu mujaa tiha. Ñ jiro Salomō cūhu tí numurita jipihti israe masa curuari puhtoare tí macapu pji cahmachuha. Ñ pji cahmachuro, tina jipihtina ti ñurocaroi Yawe to dutiare ti wihbori carore to ya wuhu, wahma wuhupu na ta duti, wihbo cū dutiro taro nia tiha.

⁴ Ñ yoa Salomō to pji cahmachurina puhtoa sehe wihi pihtitiha juna. Ti wihi pihtichu ñuno, tiro Salomō sehe Cohamacu ya wuhupu dahrainia sacerdoteare ã jichu Leví cjiro ya curua macaina cūhure Yawe to cūri dutiare ti wihbori carore Cohamacu ya wuhupu na ta dutia tiha juna. ⁵ Ti na taro watota, paina sacerdotea, ã jichu Leví cjiro ya curua macaina cūhu Cohamacu ya wuhu ji muhtamari wuhu, wahiquina cāhsari wuhu cjirore wa site boro, wahma wuhu wurupu tíre dure taa tiha tina cūhu. Tuhsu, tí wuhu cjiropu jia, Cohamacure ño payoa taa, ti cjuaa cūhure jipihti dure ta pahñonocaa tiha tina.

⁶ Ñ yoa tí jipihtiare Cohamacu ya wuhu cahapu ti na wihichu ñuno, puhtoro Salomō sehe Yawe to cūri dutiare ti wihbori caro potoi ducu suha. Ñ yoa jipihtina israe masa cūhu tí caro potoi cahmachurucu suha. Tói cahmachurucu su tuhsu, ti ovejaare, ti wachua cūhure payu ne quihōna bihoeraina waro wajāha, ti payuro puro. Wajā tuhsu tjoa, wahiquinare ti jū wa muori caropu payo, tinare jū wa muo, Cohamacure ño payo mujaa tiha tina. ⁷ Tó sehe yoa, Cohamacure ti ño payo tuhsuri baharo, sacerdotea sehe tí carore yo wua na, Cohamacu ya wuhu wurupu na sãa wahaa tiha juna. Na sãa, Cohamacu ya tahtia, cjā turi cāhsaro mehne duhu yoroca boro, ti ducatarí tahtiapu tí carore wihbo cūa tiha. Tí tahtia sehe tí wuhu wuru topapu tjuaa tiha. Ñ yoa tí tahtiapure pua masu, cjā mua dupuri cjuaa masuri ducua tiha. Ñ ducua, wu wahcāhtina yoaro sehe ducua tiha. Ñ jia sacerdotea sehe Yawe to cūri dutiare ti wihbori carore tí masuri cjā mua dupuri docai wihbo cūa tiha. ⁸ Tói ti wihbo cūchu, tí cjā mua dupuri sehe tí carore ã jichu tí carore ti wua naa yucuri cūhure moharucuro yoaro sehe bajurucua tiha.

⁹ [...]

¹⁰ Ñ yoa tí caropure tãa pjini, pua pjí, Yawe to diez dutiare to joaa pjini sãa tiha. Tí pjini sehe Moise cjiro to wihbo sãa pjini jia tiha. Israe masa Egiptopu cahamaca jimarina ti wijaari baharo waha, tūcu Sinaí cahapu su, ti jisinino

wato, Yawe sehe tinare tí to dutiare wiho yahusinia tiha. Tíre yahuro taro, ò sehe nia tiha tiro tinare: “Yũ dutiare masa quihôno yuhtichũ, payũ masa curuari watoi jiri curuare yũ ya curua cjihto beseihtja musare. A jina yũ cahĩina waro jinahca masa” ni, yahua tiha tiro tinare. Ñ yoa israe masa sehe Yawe to diez dutiare to yahuchũ tuhoa, “Mũ dutia jipihtiare yuhtinahtja sã” ni, yuhtia tiha tirore. Ti ã ni yuhtiri baharo, Yawe to basi tíre tãa pjĩnipũ joa ò, tinare waa tiha jũna.

¹¹ Ñ yoa sacerdotea Yawe to cūri dutia ti wihbori carore na sãarina sehe majare wijaa wahaha jũna.

¹² [...]

¹³ Ñ ti wijaari baharo, paina sacerdotea wijaropũ jiyurina sehe ti trompetarire puti ducaha, Yawere wache payoa taa. Ti putichuta, comaa wapari, noano coaro tia wapari cjuaina, tuhsũ, buaputẽa cjuaina cũhũ cũno potori yuhti pihti mua wahaha. Tó sehe yoa, tina jipihitina ji coaro mehne Yawere basa payoa tiha jũna. Ò sehe ni basa payoha tina:

—Yawe mari Cohamacũ masa noariro jira. Marine tiro ne cahĩ duhusi —ni basa payoa tiha tina.

Ti ã ni basa payorucuchũ waro, wacũenoca me curua, Yawe jiri curua sehe tí wuhũre ji biha mua wahaha. ¹⁴ Tuhsũ, to si sitea cũhũ tí wuhũ puhichapũre noano si site sahse mua wahaha. Ñ wahachũ ñua, sacerdotea tí wuhũ puhichapũ dahra sãaborina sehe sãa masiera tiha.

SALMO

Salmo 16

1-9 [...]

Davi masare yuhdohtiro to basi to yahuboro sehta masare
yuhdohtiro to wahahtire yahu quihō mūhtaha

¹⁰ Israe masa bui puhtoro Davi ō sehe ni yahu quihō mūhtaa tiha:

—Yawe mūhu sehe, yuhure masa copapu
tācai ti sahari copapu cohā waroasi.

Yuhure, mū cahīrirore, ne buhiri tierarirore
yū pjacu yariapachuta baachu yoasi mūhu
—ni yahu quihō mūhtaa tiha Davi.

¹¹ [...]

Salmo 22

1-5 [...]

Cohamacu Davi to wahaa mehne masare yuhdohtiro
cjihto to wahahtire nui puyuha

⁶ Tiro israe masa puhtoro Davi to cahyari pjare ō sehe ni Cohamacure
durucuha:

—Masa yuhure ti bujupe, ti yabichu,
wiho jiriro waro tuhoutuhi, dachoiro yoaro sehe.

⁷ ã yoa masa yuhure ñuroca ō tuhtia,
ñano yuhure bujupe, sua, ti wuhdua pocare pja sūsūri yoa,
ti dapu poca cūhure yuhure yureata ō sehe nihre:

⁸ “¿Yawere mū wacū tuapachuta,
dohsearo mūhure yuhdoerajari?
¿Tiro mūhure tuaro waro cahīparota
dohsearo mūhure yoadohoerajari tiro?” ni, bujupehre tina.

⁹⁻¹⁵ [...]

¹⁶ ‘Dieya suaina baro yoaro sehe soroarucu sūhre yuhure
masa Cohamacu mehne dojori tiina baro.

Tina ã dojori tiinata yū wamomacarine,
yū dahpori cūhure cami dahrehre.

17 [...]

18 ‘Tina yu suhtire ti basi tju wa taa,
 “¿Ahri suhti noa ya suhti tjuaahcari?” ni, masia taa,
 tina docapea poca mehne cahma docape quihõhre tina
 —niha tiro Davi Cohamacure.

19-31 [...]

Salmo 27

1-11 [...]

**Cohamacu Davi to waha mehne masare yũdohtiro
 cjihto to wahahtire ñui puyuha tjoa**

12 Israe masa puhtoro Davi õ sehe ni yahu quihõ muhtaa tiha:
 —Yawe, ahrina yũhure wiho warota tju õinare,
 yũhure ñu tuhti, wajã duainare,
 ti yoa duaro seheta yoachu yoai tjiga
 —ni yahu quihõ muhtaa tiha puhtoro Davi.

13-14 [...]

Salmo 41

1-8 [...]

**Cohamacu Davi to waha mehne masare yũdohtiro
 cjihto to wahahtire ñui puyuha tjoa**

9 Israe macainare dutiro Davi to ñano dohatirowatowi õ sehe ni durucuha Cohamacure:

—Ahriro yu piti waro, yu wacu tuarirowatowi jimahre tiro.
 Yu ya wuhui ã suho churucumahi yuhũ tire.
 Yu ã yoapachuta wacueno mehne
 yũhure yabi ñu tuhtiro dojowa wahahre tiro
 —ni durucuha Davi Cohamacure.

10-13 [...]

Salmo 68

1-17 [...]

18 Israe masa bui puhtoro Davi masare yũdohtirore bajuroi to niboro seheta õ sehe ni joaa tiha:

—Muha mujaai, muhure ñu tuhtiina
 mu cahma wajã yũdurucarinare na mujarucuhre.
 Tuhsu, masa payu muhure paye baro ã wanocahre.
 Tuhsu, paina muhure yabi, tuho duaeraina cũhu
 ãta wanocahre muhure —ni joaa tiha puhtoro Davi cjiro.

19-35 [...]

Salmo 69

1-3 [...]

**Cohamacu Davi to wahaa mehne masare yuhdohtiro
cjihto to wahahtire ñui puyuha tjoa**

⁴Israe masa bui puhtoro Davi to tuaro cahyari pjare ò sehe ni durucuha Cohamacu mehne:

—Yuhu soro yoerapachuta, yuhure wiho waro yabiina sehe
yu dapu pjoari bui payu waro jira.

Tinare yu soro yoerapachuta, yuhure wiho waro ñu tuhtiina
sie sehe mehne payu waro waha namona.

Tina yuhure ti yare yu yacerapachuta,
tuaro mehne “Mu yacarire wiaga muhu” ni mujana
yuhure wiho warota —ni cahyaro mehne
Cohamacure durucuha Davi.

5-36 [...]

Salmo 90

1 [...]

²Moise cjiro Cohamacure ò sehe ni, ño payoa tiha:

—Muhu sehe Cohamacu, mu masa bajuari dacho maerariro jira.

Tuhsu, mu yariahti dacho cuhu maerariro jira.

À jirucuriro jira muhu.

Ahri dachore mu bajuamehnehto panopu,
tuhsu, ahri dachopu jia tũ yucurire mu bajuamehnehto panopu,
jiju tuhsua tiri jire muhu.

À jicu ã jirucuriro jira muhu —ni ño payoa tiha Moise cjiro.

3-17 [...]

Salmo 139

Puhtoro Davi Cohamacu to noaputia jia tiare masino, tiore wache payoha

¹Puhtoro Davi Cohamacure ò sehe ni basa payoha:

—Muhu Yawe yu Cohamacu, muhu sehe yu durucuare tuhoca.

Tuhsu, yu tuhotuare, ã jichu yu jia tia cuhure ñuca.

À jicu yuhure noano masica muhu.

²Yu nuju suchu, yu wahcârucu suchu,

jipihtia dohse jia yu yoachu ñuca muhu.

Tuhsu, yu yoa duaa cuhure muhu sehe yoaropu jipaihta masiyu
tuhsuca.

³Dachoripe yu wahcã wihiri baharo, nohoi yu tinirire,

nohoi yu dohse yoarire, yu yuhdari cuhure

tí jipihtiare noano waro masica muhu, te yu sochupu cuhure.

⁴Tuhsu, yu ni duaa cuhure yu ni wiohto panopu

tí jipihtiare masiyu tuhsuca muhu.

- ⁵ Ā masicu, mu tuaa mehne
yuhure soroa ducataro yoaro seheta yoacu,
yuhure ñaa wahaboare dobasara muhu.
- ⁶ Ā yoa mu yuhure ã noano waro masi yuhdurucu sua sehe
bujua waro jira.
Ā jicu yuhu sehe tíre noano waro tuho ñaha duapai,
tuho ñaha nuhri pja bihoeraja yuhu.
- ⁷ Mu ã jiriro choro jichu, nohoi yu tininoi
mu Catia Macariro Espíritu Santo yuhure ã piti tirucura.
Ā jicu yuhu muhure duhti duai cūhu,
nohoi yu duhtiboro bocaeraja.
- ⁸ Ñahpichoha poca buipu yu muja suchu, tópu cūhure muhu cūhu jica.
Tuhsu, ahri yahpa docapu yariaina cjiri ti jiropu
yu dija suchu cūhure tópu muhu cūhu jica.
- ⁹ Ā yoa sū muja tari pahrē sehepu waha,
tópu yu suchu, tópu muhu cūhu jica.
Ā yoa sū sāari pahrē sehepu waha,
dia pjiri ma ji bato tirucu surupu yu suchu,
tópu cūhure muhu cūhu jica.
- ¹⁰ Tópu cūhure mu tuaa mehne
yuhure suho waja muhtarucu masica.
Tuhsu, tópu cūhure yuhure yoadohorucu masica muhu.
- ¹¹⁻¹² Pa tehe dacho jipachu,
“Nahitiano wuru wahachu cahmamaca yuhu,
Cohamacu yuhure to ñuerahito cjihto sehe” nicu cūhu,
wiho waro ã nii niboia yuhu.
Nahitiano, buhriaro cūhu cūno sehe jinocaca muhure.
- ¹³ Ā yoa yu masa bajahto panopu,
yu poco to niji suhtiropu yu ji bucuchapu cūhure,
muhuta jiga jipihitia yu pjacu macaa cjihtire dahrebasariro.
- ¹⁴ Ā jicu yuhu sehe mipure yu pjacure ñui,
“¿Cohamacu, muhu sehe yu pjacu cjihtore yoacu,
noacaro yoa mihniri?” nicu,
cua pisaro mehne wahche payorucuja yuhu muhure.
Jipihitia mu yoaa noaputiaro wijara muhure.
Tíre potocāta masija.
- ¹⁵ Ā yoa muhu sehe yu pjacu cjihto
yu poco to niji suhtiropu nahitianopu,
ne noa ñuenopu to coā ji bucua ducachu,
yuhu cjihtore ñuga muhu.
- ¹⁶ Ā ñucu, “Tópe dachori, tópe cūhmari catirohca ahriro” nicu,
mu ya tjupu tíre noano joa na pahño tuhsuga muhu,
ahri yahpapu yu masa bajahto panopu.
- ¹⁷ Ā yoa yu nino seheta muhu yu Cohamacu,
mu tuhhotua bujua waro jira yuhure.
Mu tuhhotuare yu tuho ñaha pahño duachu,
tuho ñaha nuhri pja pahñohto basioeraputiaro yuhure.

¹⁸ Mũ tũhotua padũropũ jia padũ pohca bui payũ waro jira.

 Ã jicũ mũ tũhotuare quihõ ñũ duacũ,

 ne di pja quihõ pahño bihoeraboa yũhũ —ni basa payoha
 pũhtoro Davi Cohamacũre.

¹⁹⁻²⁴ [...]

PROVERBIO

13 ¹⁻²³ [...]

²⁴ “Sā pohnare ne tjanasi” ni, tūhotuina ti pohnare cahīerara.
Ti pohnare cahīina sehe dói tinare buhiri dahre bahrañona.

²⁵ [...]

14 ¹ Numino noano tūho masiricoro jiro,
to manūno mehne to pohna cūhū mehne noano jinocana,
to wūhure noari wūhū to yoaboro seheta.

Wiho mejeta ticoro tūho masieraricoro jiro,
to manūno mehne to pohna cūhū mehne
to noano jia taborore ñano dojomehnena,
to wūhure to basita to wamomacari mehneta
cjā site boro pahñoboro seheta.

²⁻³⁵ [...]

22 ¹⁻⁵ [...]

⁶ Cūiro wahahti mahare quihōno to ñono seheta,
mū pohnare ti quihōno jia tihtire noano buhega.
Tó sehe buhechū, baharo būcūna wahaapū mū buheare ne duhusi.

⁷⁻¹⁴ [...]

¹⁵ Tūho masieraa baro mari pohna tūhotuapū ji yūhduara.
Wiho mejeta mari pari wasōcā mehne tinare tjanana,
tíre duhuchū yoanahca.

¹⁶⁻²⁹ [...]

23 ¹⁻¹² [...]

¹³ Ne tjuarūcū sūro marieno mū pohnare buhiri dahrega.
Tinare tjana mūjai, yariachū yoasi.

¹⁴ Tinare tjana mūjai, ti tūho masieraa mehne
yariaboro sehere yūhdu witichū yoaihca.

¹⁵⁻³⁵ [...]

29 ¹⁻¹⁴ [...]

¹⁵ Mū pohnare pari wasōcā mehne tjanachū,
noano tūho masiina wahaahca.

Wiho mejeta ti cahmano jia ti būcūaa,
būoro yūhduchū yoahca ti pocoro sehere.

¹⁶ [...]

¹⁷ Мн поhnare yahuro mehne, tjanano mehne буснога.

Тó sehe мн бусночн, мнуре noano jinocachн уoa,

пjíro wahchechн уoaahca tina.

¹⁸⁻²⁷ [...]

ISAÍIA

7¹⁻⁵ [...]

¹⁴Yawe yare yahu muhtariro Isaíia ò sehe ni yahuha israe masa puhtoro Acare:

—¿Dohse jiricoro numino mehne tarohcari marine yuhdohtiro?
mari noano masihtu noano,

Yawe ò sehe ni yahu quihō cū muhtana marine:

“Cūcoro ne cū taha munore piha ñueraricoro
munocāre pohna tirohca.

Tirocā Emanue wama tirohca”

ni, yahu quihō cū muhtana Yawe marine —ni, yahuha Isaíia puhtoro
Acare.

(“Emanue” niri wama, “Cohamacu mari mehneta jira” ni duaro nina)

¹⁵⁻²⁵ [...]

9¹⁻⁵ [...]

Cohamacu masare yuhdohtiro to warocahtore yahu cū muhtaha Isaíia

⁶Ā yoa Isaíia Acare, tí pjare israe masa puhtore, ò sehe ni yahu quihō cū
muhta namoha:

—Cūiro nijinocā masa bajuachu yoa,
tirocāre mari yairo cjihto warocarohca Cohamacu marine.

Tirocā sehe jipihitina Bui Puhtoro cjihto jirohca.

Tuhsu, tiro payu wamari cūhu cjuarohca.

“Masare noano bosa mihni yuhduriro” niri wama,

“Cohamacu ji yuhdurucu suriro waro” niri wama,

“Mari Pucu ne di pja cati dcaerariro,

ne di pja yariaerahtiro” niri wama,

“Jipihitina Bui Puhtoro macuno, masapere noano yajeri sāa,

noano jinocachu yoahitiro” niri wama,

tópe wamari cjuarohca tiro.

⁷Ā yoa tiro israe masa puhtoro Davi cjiro ya da mehne tarohca.

Tuhsu, to ñuchuno Davi Jerusalēi,

puhtoa ti duti jiri macapu puhtoro to jisniri pjapu,

to masare to dutiriro cjiro seheta tiro cūhu dutirohca

mari Bui Puhtoro waro cjihto cūhu.

Tiro paró ahri dacho mu saro macainare ā dutirucurohca.

Tuhsu, ā noano waro yajeri sāachu yoa,

ti basi noano jinocachu yoarucurohca tiro.
 Ne tí pihtisi.
 Noano waro dutirohca to masare jipihtiri yahpa macainare.
 Masa quihõno jia ti yoaa, ã jichu quihõno jieraa ti yoaa cūhure
 tiro besewerohca.
 Ñ yoa tiro quihõno jia baro yoinare wahcherohca.
 Tuhsu quihõno jieraa baro yoinare tiro buhiri dahrerohca.
 Tó seheta ã jirucurohca to dutia tia.
 Mari Yawe to cahĩina waro jija.
 Ñ jiro tiro Jipihtina Bui Ji Yūhdurucu Sūriro Waro
 mipu to ã ni cūare to niriro seheta wahachu yoarohca
 —ni yahu quihõ cū mūhta namoha Isaía puhtoro Acare.

8-21 [...]

10¹⁻⁴ [...]

**Yawe Efraĩ yahpa pahrē sehe macainare to buhiri
 dahrehtore yahu mūhtaha Isaía**

⁵ Ñ yoa Yawe israe masare Efraĩ yahpa pahrē sehe macainare buhiri dah-
 rehto jiha. Ñ jiro Isaía sehe Yawe to yahu dutiro seheta tĩre õ sehe ni yahu
 cūyuha tinare:

—Tiro Asiria yahpa macaina bui puhtoro sehe
 yu yucu tia, yuhu sua yūhdu, masare buhiri dahrei tai,
 yu tinare cjāri tia yoaro sehe jirohca tiro.
⁶ Yuhu sehe Yawe musa Cohamacu jipachuta,
 musa ne yūhure wacū duaerara.
 Ne waro yu dutiare yoa duaeraputiara.
 Yuhu mehne dojori tia waha tuhsura.
 Ñ jicu yuhu, tiro Asiria yahpa macariro puhtorore,
 to surara mehne cahma wajāa, yūhdurucu dutiitja musare.
 Musa yūhure suachu yoara.
 Ñ jicu musare buhiri dahrehtja tiro mehne.
 Tirore musa cahai ta, jipihtia wapa tia,
 musa cjuaa barore ma pahño dutiitja.
 Ñ yoa musare, ã jichu musa pohna cūhure cahamaca ti,
 ti ya yahpapu naa wahcā dutiitja tirore.
 Ñ yoa paro cūhure yoa duti namoihtja tirore.
 Pari sahbare, mahai jiri sahbare mari tu sahbaro yoaro sehe,
 yuhu tirore doca dahre dutiitja musare —ni yahu cūyuha Isaía
 israe masare Efraĩ yahpa pahrē sehe macainare,
 Yawe to yahu dutiriro cjiro seheta.

7-34 [...]

11¹ [...]

**Yawe to Catia Macariro masare yūhdohtiro cjihto
 mehne to ã jirucuhtore yahu mūhtaha Isaía**

² Ñ yoa Isaía to masare õ sehe ni yahu quihõ cū mūhtaha:
 —Cohamacu Catia Macariro, Yawe to warocahtiro sehe

masare yuhdohtiro mehne jirucu, ā dahrarucurohca.
 Tiro Cohamacu Catia Macariro ō sehe jia tiro jira.
 Dohse jia masiare, noano waro masi sahseriro jira.
 Jipihtiare, dohse jiare tuho ñaha pahño mihniriro cūhu jira.
 Ā jiro tiro bosa mihni yuhdurucu suriro cūhu jira.
 Jiphtinare, jipihtiare ji yuhdurucu suriro waro jira tiro.
 Ā yoa tiro, Yawe to niare tuho duariro cūhu jira.
 Cohamacu Catia Macariro, Yawe to warocahtiro
 tó sehe jia tiro, masare yuhdohtiro cjihto mehne jirucu, ā
 dahrarucurohca
 —ni yahu quihō cū mūhtaha Isaía.

3-16 [...]

40

1-26 [...]

Yawe tuaa pihtierariro sehe tuaa pihtiinare tuachu yoarohca

- ²⁷ Isaía Cohamacu yare yahu mūhtariro ō sehe ni yahu turiaa tiha to masare.
 —¿Dohse jiro baro mūsa israe masa,
 Jacobo mūnono panamana ō sehe ni, Yawere tju ō mūjajari?
 ¿“Sā ñano yuhduchu tiro ne ñu payoerara.
 Sāre quihōno wahaerachu cūhure ne yaba cjihti jieraputiara tirore”
 ni, tju ō mūjajari mūsa?
- ²⁸ ¿Tirore noano masierasinijari mūsa?
 ¿To jia tia cūhure ne tuhoerasinijari?
 Cohamacu Yawe ā catirucuriro, variaerariro jira.
 Ahri tjuru jiphtiro bajuamehne pahñoriro jira.
 Ne waro wahyaera, pumerariro jira.
 To masia tia cūhu ne pihtierara.
- ²⁹ Tuhsu, diina tuaa pihtiina cūhure
 tuaina wahachu yoarohca tiro.
- ³⁰ Paina wahma yapia jipahta, tuaa pihtia wahara.
 Tina wahya yuhduina waha masina.
 Tuaa yuhduina cūhu wahyaina waha, puha tu bora masina.
- ³¹ Ti ā wahya yuhdupachuta, diina Yawere noano cohta,
 wacū tuaina sehere, ti wahyapachuta
 wahma tuaa cja mūjachu yoarohca tiro.
 Ā jia cjaa muanopu wu sito taa, ti wahyaeraro seheta,
 tina cūhu wahyasi.
 Tuhsu, paina mūrocapepahtaa, ti tuaa pihtieraboro seheta,
 Yawere wacū tuaina cūhure ti tuaa ne pihtisi.
 Paina yoaro tinipahta, ti wahyaeraboro seheta,
 tina cūhu ne wahyasi —ni yahu turiaa tiha Isaía to masare.

50

1-5 [...]

Masare yuhdohtiro cjihto to ñano yuhduhtire yahu mūhtaha Isaía

⁶ Cohamacu yare yahu mūhtariro Isaía, (*masare yuhdohtiro to variahtore, to dohse ñano yuhdu, to wapū tihtire to basi waro to yahuboro seheta*) ō sehe ni yahu quihō mūhtaha:

—Yuhure yabi, ñu tuhtiina sehe ti buhiri tiinare tjanasoa dari,
 sohtoaripu sioa yawiri cjuaa dari baro mehne,
 yu baharo buhusehepure ti tjanaye duachu,
 yuhu sehe tinare wiho dúhtu ducu suhi,
 yuhure ti ñano tjanayehto sehe.
 Ñ yoa yu wuhdua cühure ne nuerahi tinare,
 yu duse pjoarire ti tuã burepe, yuhure ñano buoro ti yoaro wato.
 Ti yuhure chacho puti sihõchu cühure äta tuhötunocahi
 —ni yahu quihõ muhtaha Isaía.

7-11 [...]

52¹⁻¹³ [...]

**Yawe cahamacuno, masare yuhdohtiro noariro jiparota,
 mari ya buhirire buhiri ti yariabasaroheca**

¹⁴Yawe yare yahu muhtararo Isaía, (*masare yuhdohtiro, to dohse ñano wapu tihtire*) ò sehe ni yahu cū muhtaha tiro:

—Yawe cahamacuno, masare yuhdohtiro wuhdua,
 ñano cami tiri wuhduare mari ñuchu,
 ne masuno yoaro sehe bajuaerare.
 Ñ jina tirore ñu cuaa wahai mari.

¹⁵ [...]

53 ¹“Yawe masare yuhdohtirore warocare.
 Tiro mehne to tuaa tiare yoa ñore masare”
 ni, yahumai yuhu.

Yuhu masare ã ni yahupachuta,
 ne noa yu ã ni yahuaire quihõno tuho duaerare.

²Yawe to cahamacuno masare yuhdohtirore,
 yucucucã noaducã du muja tadu yoaro sehe ñure,
 wuari dihtapu jipachuta.

Wiho mejeta mari sehe Yawe to ñuriro seheta ñuerai tirore.
 Tiro ñuhto noariro jierare mari sehene.
 Ñ jina tirore ñuna, goa pjaerai mari.

³Mari tirore ñu yabi, ne noano mehne ñahaerai.
 Tiro sehe ñano yuhdutoriro ji, ã cahyaporiro cūhu jire tiro.
 Mari sehe “Ahiri wapa marieriro waro jira.
 Wiho waro mari tirore ñu wahāboca” nii mari tirore.
 Ñ nina, tirore dúhtu ducu sui mari.

⁴Mari tó sehe tirore yabipachuta,
 tiro sehe mari ñano yuhduborirore
 ñano yuhdubasare.
 Ñ yoa mari caina purino mehne cahya tuhötuboare,
 tñreta tiro cūhu tuhötubasare.

Wiho mejeta mari sehe ò sehe ni tuhötumai:
 “Ahiri Yawe mehne buhiri tiro jira.
 Ñ jiro tirore buhiri dahrere” nimahi mari.

⁵Wiho mejeta ã jierare.
 Tiro mari ya buhiri ñano cami tia wahare.

Mari ya buhiri tirore ñano tjanayere.

Tó sehe yuhdure tiro, marine yuhdoro taro,
mari Yawe mehne noano jinocahto sehe.

Mari sehe camí, yati masieraa camí cjuaina yoaro sehe
jija mari buhiri tia mehne.

Ã jiro tiro ñano yuhdure

tí camine yatia wahachu yoaro seheta yoaro taro.

⁶ Ovejaa ti chua wahari mahai waha,

tja tiropu tjare maca chu, cáina waha site wahcã,

ti majare tjua tabori mahare bocaera mujaa tira.

Tina yoaro sehe jija mari cūhu.

Nohoi mari mu suro cáina doca wahã tiniina yoaro sehe jija.

Mari ã jiina jichu ñano,

Yawe sehe mari cáina ya buhirire to cahamacunopure

duhu payoro yoaro seheta yoa, buhiri dahrere tirore juna.

⁷ Tina tirore ñano tjanaye, ti ñano purichu yoapachuta,

tiro sehe áta tuhutu, ne cū dusero waro nierare.

Ovejacã munore ñaha ti wajãa tachu,

ne tunu witi, sañuerariro yoaro sehe jire tiro.

Ovejacoro to pjoarire ti saa tachu, ne tunu witi,

sañueraricoro yoaro sehe jire tiro.

Ne “Yuhure ã yoaena tjiga” nierare tiro.

⁸ Tina tirore buhiri tia macaare wiho waro tju òre.

Ã jia tirore wiho waro ñaha buhiri dahrere.

“Musa wiho waro tirore buhiri dahrena nina”

nidohoriro baro cūhu ne mariare.

“¿Tó puro waro ñano yuhdurucari tiro?” ni,

pja ñuriro baro cūhu ne mariare.

Yawere mari yuhdurucari buhiri tirore wajānocare tina.

⁹ Tiro ne cū taha mahñope ñuerariro jire.

Ne buhiri maerariro cūhu jire.

To ã buhiri maerariro jipachuta, to yariari baharo,

to pjacu cjiore bujua buhiri tiinare ti cohānopu

cohã duamare.

Tópū cohã duapahta, cohāerare juna.

Noanopu pache bucurore ti cohābori copapu,

tāa copapu cohāre tina.

¹⁰⁻¹¹ [...]

¹² Tiro “Noanohca yu buhiri tiriro yoaro sehe yariachu”

to ni yariachu,

tiro Yawe sehe to cahamacuno, masare yuhdohtirore

ño payoro mehne jipihtina puhto bui

dapu cūre tirore juna.

Jipihtina masa ya buhiri, tiro sehe yariabasare.

Ã yoa Yawere tiro sinibasare mari ya buhirire to bohto sehe

—ni yahu muhtaha Isafa.

JEREMÍA

6¹⁻¹² [...]

Yawe Jeremíare israe masa, Judá yahpa pahrē sehe macainare to yare yahu muhtaina, tuhsu, sacerdotea cūhu ti mahño yahuare yahuha

¹³ Yawe Jeremíare, to yare yahu muhtaritore ò sehe ni yahuha:
—Jerusalēpu jiina, puhtoa sehe jiina, te wiho jiinacā cūhu ne cūiro duhsaro marieno mahñoa mehne, yacaa mehne wapata duaina sahsero jira.

Tuhsu, yu yare yahu muhtaina baro, ā jichu sacerdotea, yuhure dahra cohtaina baro cūhu yacaa mehne, mahñoa mehneta wapata duaina cūhu jira.

¹⁴ Ā jia yu masa ti buhiri tia mehne ñano suaro sāa cami tiina yoaro sehe ti jipachuta, ahrina ti puhtoa sehe yu masare “Wiho jia camicā jira tí cami. Yatia wahaahca” ni, tinare mahñopera.

Ā jia pa sehe macaina puhtoa, ti surarare òi musa cahai ti cahma wajā dutiroca duapachuta, yu masa puhtoa sehe “Jierara. Tasi. Ā jica nieraina jinocajihna” ni, mahñopera yu masare —ni yahuha Yawe Jeremíare.

¹⁵⁻³⁰ [...]

20¹⁻³ [...]

Resumen: Ā yoa cū nūmū Jeremía Cohamacu yare yahu muhtariro Judá yahpapu, ā jichu, tí yahpapu jiri maca Jerusalēpu cūhure Cohamacu ya yahu tinino nia tiha tjoa. Tí pjapure Jerusalēpure cūiro sacerdote Pasu wama tiro, Cohamacu ya wuhupu dahrainare dutihiro jia tiha. Ā yoa Jeremía tí macapu Cohamacu ya to yahuro suchu, tiro Pasu cūhu tuhoha. Ā tuhoro, tíre tuhō ji coaeraro, Jeremía mehne sua yuhdua wahaha. Ā jiro tirore tuaro mehne ñaha duti, tjana duti, tuhsu, Cohamacu ya wuhu sopaca wijaro ducuri tuturupu comaa da mehne tirore duhte dapō dutiha, masa ti ñurocaroi to buoro yuhduhto sehe. Ā yoa pa dachopu tirore pjā dutiro taro, to cahapu suha tjoa. To suchu ñūno, Jeremía sehe Cohamacu to yahu dutirire pari turi tirore yahuha tjoa.

⁴⁻⁵ Jeremía Pasure ò sehe ni yahuha tjoa:

—Cohamacu Yawe to basi yuhure ò sehe ni yahu dutirocahure mūhure: “Pasu, mūhu sehe Jeremía mehne yu masare yahurire tuho duaerahre. Wiho mejeta yu niriro cjiro sehetā Babilonia macaripo puhtoro to surara mehne mū coyēa Judá yahpa macainare to cahma wajā yuhdurucachu yoaihca

yuhũ. To ā cahma wajā yuhdurucachu yũ yoachu, m̃sa wapana sehe m̃hu mehne macaina warore m̃ ñurocaroi ñosaa pjĩni mehne ti wajānocachu ñũihca m̃hu. Tuhsu, painare tuaro mehne ñaha, ti ya yahpapũ ti ñano m̃a tipehtina cjihti ti naachu cũhure, ñũihca m̃hu. Tuhsu, painare tóih̃ta ti ñosaa pjĩni mehne ti wajānocachu cũhure ñũihca m̃hu. Tuhsu, jipihtia wapa bujua, ahri maca Jerusalēpu jia, m̃sa puhtoā cjiri ti wihbo turia tari cũhure manoca, ti naa pahñonocachu yũ yoachu cũhure ñũihca m̃hu. Ā yoa tí jipihtiare m̃a basi ñacupũ, ‘Cohamacu to yahuri potocā tjiri jira’ nicupũ, c̃a yuhd̃ua wahaahca” ni, m̃hure yahu dutirocah̃re Cohamacu Yawe yuh̃re — ni, yahuha tjoa Jeremía Pasure.

6-18 [...]

OSEA

**Masare yuhdohtiro cjihtore Egiptopu jisinirirore
Yawe to pji wiohtore yahu muhtaha Osea**

11 ¹Yawe to yare yahu muhtariro Oseare ò sehe ni yahu muhta dutiha israe masare:

—Panopure israe masa mahainacã ti jisinia tiri pjapure yuhure yu macu yoaro sehe tina cahñohre.

Ã jii tinare cûiro yoaro sehe “Macu” nihi.

Baharopure yu macure Egiptopu jirirore pji wiohi

—ni israe masare yahu muhta dutiha Yawe Oseare.

²⁻¹² [...]

JONÁ

Joná Yawere to yuhdurucari buhiri, tirore buhiri dahreha

1 ¹Tí pjapure Amitai macuno Joná wama tiro Cohamacu yare yahu muhtariro jia tiha. Cũ numu tirore õ sehe nia timaha Yawe:

²—Joná, cũ maca, pjiri maca, Nínive wama tiri macapu cjero wahaga. Tí macapu sucu, tó macainare yuhure õ sehe ni yahubasaga: “Cohamacu Yawe to ñuchu, tiro mehne bujua buhiri tia macaa yoana niyuhca musa. Tí buhiri tiro musare buhiri dahrero taro niyuhca” ni, yuhure yahubasai wahaga tinare —nimaha Yawe Jonáre.

³To ã nichu tuhorota, to yare cahno bahrañoa Joná. Cahno tuhsu, pjiri ma duhtu cahapu jiri maca, Jope wama tiri macapu buhaa wahaha tiro. Tí macapu buhu su, bujua buso wuri ti wahã suri pitamahapu buhaa wahaha. Tí pitamahapu to buhu suchu, tói cãria España pu wahahtia pahsaha. España sehe sũ sãano caha sehe tjuaha. Cohamacu Jonáre to warocari maca Nínive sehe sũ muja taro caha sehe tjuaha. Á jiro Joná sehe Cohamacu to warocari macapu waha duaeraro, España sehenu duhtia waharo nimaha. Á jiro tia purore niñeru wapa, tiapu samuha tiro.

⁴Á yoa ti waharucuro wato, yoaerachuta, Yawe sehe wihnono tuaro wãchu yoaha. To ã tuaro wãchu yoaro mehne pahcõri, bujua pahcõri wahcãha. Á waharo mehne tia dohoria wuru sehe tuaro waro yureha. Á yurero, nu wahti site ñojahto cuaro waro wahaha. ⁵Á wahachu ñua, tia dahraina sehe cua yuhdua wahaha. Á cua, tina cãinape ti ño payoina cohamanare sañurucuro mehne ti yoadohoa sinimaha tina. Á siniata, “Maripu mini dijaahri” nia, ti naama, pachere diapu doca ño pahñonocaha tina.

Á yoa ã cuaro waharo wato, Joná sehe tia dohoria wuru topapu carĩno niha. ⁶Á yoa tia dohoria wurure dutiriro sehe tia topapu sãamahno, Jonáre tói ñu bocaha. Á ñunota, tirore tuaro mehne “¡Wahcãga! ¡Wahcãga!” ni, bua careha. Á yoa to wahcãchu ñuno, õ sehe niha tirore:

—Marine cuaro waro waharo nina. ¿Dohse yoa õi carĩ sãai nijari muhu? Yuhu mehne dahraina cãinape ti ño payoina cohamanare sinia nimana. ¡Cjero! Muhu cũhu mu ño payoriro cohamacure sini bahrañoa. Pa tehe nino tiro marine pja ñuno, mari mini yariaborore yuhdoboca —niha dohoriare dutiriro Jonáre.

⁷Á yoa tia dahraina sehe, ã wahachu ñua, ti basi õ sehe ni durucuha:

—Mari cãinape mari ño payoina cohamanare yoadohoa sinimaja mari. Mari sinipachuta, ne diro seheta marine tuhoerara. Pa tehe nino cãiro mari mehne wahariro jiboca mari cohamanare yuhduruca, suachu yoaro. Á jina

docape ñua mehne docape ñu, masijihna mari cohamanare suachu yoarirore —ni durucuha tina ti basi.

Ã niata, ti docapea poca mehne docape ñuha. Ti ã docape ñuno mehne, “Joná jira” ni, masiha tina. ⁸Ã masia, tirore noano masi namo duaaha tina. Ã jia tirore õ sehe ni sinitu ñuha tina:

—¿Noa baro jijari muhu? ¿Nohopu macariro tahri muhu? ¿Potocāta mu ya buhirita marine õ sehe wahajari? —ni, sinitu ñuha tina tirore.

⁹Ti ã ni sinitu ñuchu tuhoru, tiro sehe tinare õ sehe ni yuhtiha:

—Yuhu hebreo masuno jija. Ã yoa yu ño payoriro Cohamacu sehe Yawe wama tiroro jira. Tiro yu ño payoriro muano macariro jira. Ã yoa tirota jiri jire ahri yahpa, jipihtiri yahpare bajuamehneriro. Tuhsu, bujua mári wuri cūhure bajuamehneriro tirota jiri jire.

¹⁰Ã yoa tiro yu Cohamacu Yawe yuhure dahraa cūmahre. Yuhu sehe tí dahraare yoa duaeraí, tirore yuhdurucahi. Ã jicu ahriapu samu, duhti wahcāi nimahi yuhu —ni, yuhtiha Joná.

To ã nichu tuhoa, tina sehe õ sehe niha:

—¿Dohse yoai mu cohamacure yuhdurucari muhu? Mu cohamacure ne yuhdurucaeraboa muhu. Mu yuhdurucari buhiri sã cūhu yaria pihitia wahana tana nica —niha tina.

Ã nia, ti cuimariro cjiro bui cuiha tina.

¹¹Ã yoa wihnono sehe juna, sie sehe mehne tuaro waro wāno niha. Ã wahachu ñua, tina sehe Jonáre õ sehe ni sinitu ñuha:

—Mu ya buhiri marine õ sehe cuaro waharo nina. ¿Ã jina dohse yoama sã muhare? —ni, tirore sinitu ñuha.

¹²Ti ã ni sinitu ñuchu, Joná sehe tinare õ sehe ni yuhtiha:

—Yu ya buhiri musare õ sehe cuaro waharo nina. Ã jina musa sehe yuhure diapu doca ñonocaga. Yuhure musa doca ñochu, wihnono wā duhua waha, tuhsu, pahcōri wuri cūhu wahcā duhua wahaahca —ni yuhtiha tiro tinare.

¹³Ã yoa Joná tinare, “Yuhure doca ñonocaga” to nipachuta, tina sehe tirore doca ño duaeramaha. Ã doca ño duaera, ti tuaro mu sūro wajamaha. “Ahri ma duhtu cahapu waja wahā sunocajihna mari” nia nimaha. Wiho mejeta wihnono sehe sie sehe mehne tuaro waro wāno niha. Tuhsu, pahcōri cūhu waja wahcāno mejeta jiha. Ã jia tí ma duhtu cahapu waja wahā sū bihoeraha tina. ¹⁴Ã waja wahā sū bihoerama, Joná to Cohamacu Yawe sehere õ sehe ni siniha tina:

—Cohamacu Yawe, ahriro Joná ya buhiri sã cūhu yaria duaeramaca. Tuhsu, tirore sã doca ño, mini yariachu sã yoari buhiri, muhu mehne buhiri ti duaeramaca sã. Muhuta jira õ sehe cuaro waro wahachu yoariro. Muhu sehe õ sehe cuaro wahachu yoai, quihōno yoai nica. Wiho mejeta sã sehe buhiri maeraja —ni siniha tina.

¹⁵Ã ni sini tuhsu, Jonáre ñaha, tí ma wurupu bujua pahcōri watopu doca ñonocaha. Tirore ti doca ñochuta, wihnono tuaro wāmariro cjiro wacūeno wā duhu mua wahaha. Tuhsu, pahcōri wuri cūhu bujua wahcāmariro cjiro wahcā duhu mua wahaha. ¹⁶Ã wahachu ñua, tina sehe ñu cua yuhdua wahaha. Ã ñu cuaa, ã wahachu yoariro Yawere ño payo ducaha tina. Ã ño payoa, wahiquirore wajā, jū wa muo, cua pisaro mehne ño payoha. Tuhsu, cua pisaro mehne õ sehe niha tina tirore:

—Ā mūhure ō sehe yoa, ño payorucunahtja sã —niha.

¹⁷Ā yoa Jonáre diapũ ti doca ñori baharo, Yawe sehe tirore wahi pjiriro wurũ chunocachu yoaha. Ā yoa Joná sehe wahi wurũ to chu sãari wajurupũ tia dacho, tia ñami cati sãaha.

Joná wahi pjiriro pjaropũ sãaparota, Cohamacũ mehne suhũduha

2 ¹Ā yoa Joná wahi wurũ to chu sãari wajurupũ sãano, to Cohamacũ Yawere ō sehe niha:

²⁻⁷—Yũ Cohamacũ Yawe, mūhũ sehe dohoría macainare

cuãri ma wurupũ yūhure doca ñonoca dutihre.

Mũ dutiro mehne yūhure ti ā doca ñori baharo,

ñano yūhũhi yūhũ.

Ahri ma wurũre ne dohse yoa yūhdũ witi masierahi yūhũ.

Diapũ yũ pahsachu, bujua pahcõri wuri

yūhure doca wahã su mujahre.

Yūhure ā waharo wato, yūhũ sehe ō sehe ni tuhotumahi:

“Yūhũ Yawe mehne buhiri ti tuhsuhti.

Ā jiro tiro yūhure ñũ payoerara.

To ā ñũ payoerachu, yariaa wahi tai nica yūhũ.

Ā yariacu, Cohamacũ buhiri marieriro to ya wūhũ,

Jerusalēpũ macari wūhure ne pari turi ñusi” ni, tuhotumahi.

Ā yoa wahya yūhdũa waha, diha minia wahi yūhũ juna.

Diha minia, dia topapũ macaa tũ yucuri dahpotopũ

diha caha suhi.

Yũ ā diha caha suchũ, dia topapũ macaa tja sehe

yũ dapupũ suhriahre.

Ā cuãnopũ jicu, ō sehe ni tuhotumahi yūhũ:

“Mipũ pinihta yūhure tó puro tjica.

Yũ yūhdũ witiboro mariahna.

Yajeripohna duhua wahi taipũ nica yūhũ” ni, tuhotumahi.

Ā ni tuhotuihta, mūhũ cūhure wacũ batoahi yūhũ.

Ā jicu sañurucuro mehne mũ yoadohoa sini batoahi yūhũ.

Yũ ā sini batoachu, yũ mūhure siniri sehe

mũ cahapũ su muano yoaro sehe wahari jire,

mūhũ buhiri marieriro ya wūhupũ mũ jiro wato.

Ā jicu mūhũ Yawe yũ Cohamacũ sehe

yūhure yũ mini yariaborore yūhdoi tai,

wacũenoca ahriro wahi wurũ yūhure chunocachu yoahre.

⁸⁻⁹ Ā jicu mipure yũ catisinino puro wahchea mehne

mūhure ā basa payorucuihtja.

Tuhsũ, wahiquirore wajã, jũ wa mũo, mūhure ā ño payorucuihtja.

Ā yoa “Noho mũ yūhure warocaroi, waihihca”

ni tuhsuhi yūhũ mūhure cua pisaro mehne.

Ā jicu yũ niriro cjiro sehetã yoa, sohtori tihtja.

Ā yoa mūhũ sahsero potocãta masare yūhdoriro

mũ jia cūhure masija yūhũ.

Wiho mejeta paina sehe wiho jia masurine

“Mari cohamana jira” ni ño payomana.

Tina pinihta mu ã cahîrucuro mu jia tiare ne di pja masisi

—niha Joná Yawere, wahi pjaropu to sãano wato.

¹⁰To ã ni tuhsuri baharo, Yawe sehe wahi pjiriro wurure tirore cho wio dutiha. To ã cho wio dutichu, wahi wuru sehe dia pjiri ma duhtu cahapu nujaa, tirore cho wio cûnocaha juna.

Joná Cohamacu to yahu dutirire Nínivepu yahuro suha

3 ¹Ã yoa Yawe Jonáre pari turi ò sehe niha tjoa:

²—Pjiri maca, Nínive wama tiri macapu waha, tópu macainare yu muhare yahu dutirire cjero yahui wahaga —niha tjoa.

³To ã nichu tuhoru, Joná sehe tí maca, Nínivepu wahaa wahaha, Yawe to dutiro seheta. Tí maca Nínive sehe pjiri maca jiha. Tí macare dahporo mehne tini sito tachu, tia dacho posa jiha. ⁴Ã yoa Joná sehe juna tí macapu su, cû dacho noano Cohamacu tó macainare to yahu dutirire yahu site tiniha juna. Ò sehe ni yahu site tiniha tiro:

—Musa ò macaina jipihti Cohamacu Yawe to ñuchu, tiro mehne bujua buhiri tia dihta yoana niyuhca musa. Tí buhiri, tiro musa jipihtinare buhiri dahrero taro niyuhca. Musare to buhiri dahrehto sehe cuarenta dachorita duhsayuhca —ni yahu site tiniha tiro tó macainare.

⁵Ã yoa Joná to ã ni yahu sitechu tuhoina sehe ti basi ò sehe ni durucuha:

—Potocã tjica. Cohamacu mehne buhiri tiinata jica mari. ã jiro ahiro mehne Cohamacu marine quihónota yahuro nica —ni durucuha tina ti basi.

Ã niata, ti basi ò sehe ni durucu cahnoha tina:

—Cohamacu mehne mari buhiri tiare cahyaro cahmana marine. ã jina mahaa dachori chu duhusinijihna mari. Dohse jia sihnia cûhure sihni duhusinijihna. Tuhsu, cahyana, mari sãasoa suhti cûhure sãajihna mari —ni ti basi durucu cahnoha tina.

Ã ni durucu cahnoa, ti durucu cahnoriro cjiro seheta yoaha tina. Pache pua, pache pua jieraina cûhu tina jipihti cahyaa, ti sãa suhtire sãaha.

⁶Ã yoa Nínive macariro puhtoro cûhu Joná to na sua quitire tuhoha. ã tuhorota, puhtoro jiro to dujiroi dujimariro wahcârucu su, puhtoro jiro to sãari suhtirore tjuweha. Tjuwe, cahyaro, to sãasori suhtiro sehere cohtota sãaha tiro cûhu. Sãa tuhsu, to wuhure wijaa, pichaca nujano cjiropu nuju suha tiro. Tó sehe yoaro, to cahyaare ñono niha. ⁷⁻⁸Tuhsu, tí maca macaina jipihtinare ò sehe ni quiti wa siterocaha tiro:

—Yuhu musa puhtoro jija. ã jicu yuhu, yu doca macaina puhtoa mehne ò sehe ni durucu cahnohi: “Musa jipihti ahi maca macaina musa pohna mehne maha dachori chu duhusiniga. Tuhsu, dohse jia sihnia cûhure sihni duhusiniga. ã yoa musa jipihti cahyana, musa sãasoa suhti sehere sãasiniga. ã yoa musa wahiquina cûhure chua, sihnia wasiniena tjiga. Tuhsu, tina cûhure musa cahyana, musa sãasoa suhti baroreta waja sãaga. ã yoa payu ñaa musa yoa tia cjuara musa. Tí cûhure tó purota duhuga musa. Tuhsu, Cohamacure tuaro siniga musa. ⁹Mari ã yoachû ñuno, tiro pa tehe nino mari mehne sua duhuboca. ã sua duhuro, tiro marine pja ñu, wajãeraboca” ni, durucu cahnohi yuhu yu doca macaina puhtoa mehne. ã jina yu dutiro seheta yoaga musa —ni tí maca macainare quiti wa siterocaha ti puhtoro.

Ã yoa tí maca macaina sehe ti puhtoro to warocaa quitire tuho sahsea wahaha. Ã jia tina jipihti ti puhtoro tinare to dutiro seheta yoaha.

¹⁰Ã yoa jipihti Nínive macaina, ti puhtoro to dutiro seheta ti yoachũ ñũno, Cohamacũ sehe tinare “Wajã pahñonocaihtja” nimariro cjiro wajãeraha juna.

Joná wiho warota Cohamacũ mehne suaha

4 ¹Ã yoa Cohamacũ Nínive macainare to buhiri dahrerachũ ñũno, Joná sehe ne ji coera, tuaro waro suaha. ²Ã suaro, Yawere õ sehe niha:

—Yũ Cohamacũ Yawe, yũhũ sehe mũ jia tiare masi tuhsũhi. Mũhũ sehe ñainare cã buhusehe noariro jira. Pja ñũriro cũhũ jira. Tuhsũ, so suaerariro cũhũ jira mũhũ. Cahĩa tia pihtierariro cũhũ jira mũhũ. Tuhsũ, mũ buhiri dahreboina muhere ti quihõno tuhochũ, buhiri dahrerariro baro cũhũ jira mũhũ. Yũhũ sehe ahri mũ jia tiare masi tuhsũhi. Á masicũta, tó pano mũ yũhũre õpũ warocachũ, ta duaeramahi yũhũ. Á jicũ Españapũ duhti wahcãa wahamahi yũhũ. Yũhũ sehe õ sehe ni masi tuhsũhi: “Yũ tópũ waha, tinare Yawe to yahu dutiare yũ yahuchũ, tina sehe tíre potocã tuhoahca. Ti ã potocã tuhochũ, Yawe sehe tinare buhiri dahreboriro buhiri dahresi” ni, masi tuhsũhi yũhũ. ³Ã jicũ õ macainare mũ buhiri dahrerachũ, ne ji coeraca yũhũ. Yũ yariaa wahachũ noa yũhduaboa yũhũre. Á jicũ mũhũ sehe tinare mũ wajãboriro cohtotaro, yũhũ sehere wajã bahrañoga —niha Joná Cohamacũre.

⁴To ã nichũ tuhoro, Yawe sehe tirore õ sehe ni yũhtiha:

—Mũ basi sehe “Quihõno suai nica yũhũ” ni, tuhutumana mũhũ —ni yũhtiha Yawe.

⁵Ã yoa Joná sehe Yawe to ã nichũ tuhoro, ne ji coeraha. Á jiro tí maca Nínive duhtu cahapũ suhaa wahaha sũ mũa taro caha sehe. Suhaa, tópũ cori wuhucã dahre, tí wuhucã docai ñũ pio dujiha. “Pa tehe nino Cohamacũ to tuhoutuare tuhutu cohtotaboca. Tó pano ‘Ahri maca macainare buhiri dahreih-tja’ to nimariro cjiro seheta, tinare buhiri dahreboca” ni, ñũ pio dujiro niha tiro. ⁶To ã ni, ñũ pio dujichũ waro, Yawe sehe to caha waroi wacũeno cũdũ yucucucã du mũ mũa tachũ yoa, to bui waroi co dũcu sua wahachũ yoaha. To ã wahachũ, Joná sehe “Mipũre yũhũ sia cañosi” ni tuhuturo, wahcheha.

⁷Ã yoa pa dacho sehere bohrea mũa tachũ waro, Cohamacũ sehe tũ yucucũ ñũcõrire chũ dutiro, dachoirore warocaha. Á yoa tũ ñũcõrire dachoiro to chũri baharota, tũ yucucũ sehe ñairucũ sua wahaha juna. ⁸Ã yoa tjoa bohrea cahari baharo, sũ mũa taro caha sehe, wiñnono ñano siri wiñnono wã tu mũ mũa tachũ yoaha tiro. Á yoa tí dachore sũ cũhũ tuaro waro siha. Á jiro Joná sehe sũ siro mehne mahano yariamaha. Á yaria moñono, õ sehe niha tiro:

—Ñaputiaro yũhduca yũhũ. Poto yũ yariaa wahachũ, noaboa yũhũre —niha.

⁹To ã nichũ tuhoro, Cohamacũ sehe tirore õ sehe niha:

—Ahdu yucucucã muhere corucuducã to yariachũ, suacu, wiho warota suai nina mũhũ —niha Cohamacũ tirore.

To ã nichũ tuhoro, tiro Joná sehe Cohamacũre õ sehe niha:

—Wiho warota suai nieraja. Quihõno suai nija yũhũ. Michapucacãta yũ yariaa wahachũ, noaboa yũhũre —ni yũhtiha.

¹⁰To ã nichũ tuhoro, Cohamacũ Yawe sehe õ sehe ni yũhtiha Jonáre:

—Tũ yucucucã sehe cũ ñami to mũ sũro duhre. Tuhsũ, to mũ sũro bucuacũrũcũ suhre. Á yoa pa ñami sehere tũ yucucũ yariaa wahahre. Á jipachũta,

muhũ sehe tu yucũcũ, muhũre to corucuchũ ñũcũ, cahĩmana muhũ. ¹¹ ã yoa yuhũ pini ahri maca Nĩnive macainare cahĩcũ, quihõno cahĩi nija. Tina payũ waro jira. Tuhsu, macanacã cũhu ti watore ciento veinte mil waro jira. Tinacã “Ahri ñaa jica. Ahri noaa jica” ni, bese masieraina jira. ã yoa wahiquina cũhu payũ waro jira. ã jicũ yuhũ pini Nĩnive macainare cahĩcũ, quihõno cahĩi nija —ni yuhtiha Yawe Jonáre.

MIQUEA

5 ¹ [...]

**Masare yuhdohtiro to masa bajuahti maca cjihtore
yahu cū mūhtaha Cohamacū Miqueare**

² Cohamacū to yare yahu mūhtariro Miqueare ò sehe ni yahu quihōyu
dutiha israe masare:

—Musa Judá pohna wiho jiri curua ya yahpai
cū maca Belē Efarata wiho jiri macacā jira.

Ā jiri macacā to jipachūta, tí macaihta
cūiro musa coyeiro waro masa bajuaro hca,
jipihtina israe masa bui puhtoro cjihto.

Tiro wihāriro, masa bajuahtiro ñuchuno sehe,
jipihtina israe masa ti ā wacūnohohtiro jirohca.

Tó sehe jiriore ñuchū tirohca tirocā
israe masa bui puhtoro cjihto sehe

—ni yahu quihōyu dutiha Cohamacū Miqueare.

³⁻¹⁵ [...]

ZACARÍA

Resumen: Yawe, to yare yahu muhtariro Zacariare paina yaina ovejaare noano ñu wihbo dutiha, baharo to ñu wihbori quiti mehne israe masare to piti dahre buhehto sehe. Ñ yoa Zacaría sehe to dutiro seheta yoaha. Tina ovejaa sehe ne tirore tuho duaeraina dihta jia tiha. Ñ jiro cū dacho tiro sehe ñu wihboma, pomea wahaha. Baharo tiro ovejaare to ñu wihbori wapa ovejaa puare wapa saaro wahaha.

11 ¹⁻¹¹ [...]

Zacaría ovejaare to ñu wihbobasari wapa, ovejaa puare wapa saaha. Baharo tícäre Cohamacu ya wuhupu cūha.

¹² Ñ sehe nihi yuhu ovejaa puare:

—Musa ovejaare yu noano ñu wihbori wapa yuhure wapa duana, wapaga. Yuhure musa wapa duaerachu cūhure noanohca. Musa basi masiga —nihi tinare.

Yu ñ nichu tuhoa, mahanocā waro treinta cjoari, comaa plata cjoaricā dihta yuhure wapamahre. ¹³ Tícäre yuhure ti wapari baharo, Yawe sehe yuhure ñ sehe yoa dutihre: “Tícäre muhure bujua mejeta ti waparicäre ya wuhupu naa, yu niñeru ti cahmachusoriapu duhu sāaga” nihre. To ñ nichu tuhoi, yuhu sehe tí treinta cjoaricäre mahanocā wapa tiacäre Cohamacu ya wuhupu naa, niñeru ti cahmachusoriapu tícäre duhu sāahi juna —ni yahuha tiro Zacaría.

¹⁴⁻¹⁷ [...]

12 ¹⁻⁹ [...]

¹⁰ (Ñ yoa masare yuhdohtiro to wahahtire to basi to ni ducuruboriro seheta Yawe Zacariare yahu cū muhta dutiha israe masapure.) Ñ jiro ñ sehe ni yahuha Zacaría:

—Cū dacho yuhu, puhtoro Davi cjiro ya da poto macainare, ñ jichu paina Jerusalēi jiina cūhure yu noariro jia tiare masichu yoihtja. Tuhsu, yuhure tuho duaina wahachu yoihtja. Yuhure sini duaina, maca duaina cūhu wahachu yoihtja tinare. Ñ jia tina yuhure ti ñosariro cjirore ñua, tuaro tiiahca. Cūiro masuno to macuno masa bajua muhtariro, cūiro jiro to yariachu, purino mehne tuaro to tiiboro seheta tiiahca tina —ni yahu cū muhta dutiha Yawe Zacariare.

¹¹⁻¹⁴ [...]

Nuevo Testamento

San Mateo

Jesucristo Cohamacu macuno to coyea panopu macaina jira

(Lc 3.23-38)

1 ¹ Jesucristo coyeare panopu macainare õ sehe ni yahuihtja yuhu. Jesucristo ñuchuno cjiro panopu macariro Davi wama tiro jia tiha. To jihto pano ti ñuchuno cjiro Abrahã wama tiro jia tiha.

² Abrahã Isaa pucuro jiha.

Isaa Jacobo pucuro jiha.

Jacobo Juda cuhu pucuro jiha.

³ Juda pohna puaro jiha. Fares, Zara jiha. Ti pocoro Tamar wama tiricoro jiha.

Fares Esrom pucuro jiha.

Esrom Aram pucuro jiha.

⁴ Aram Aminadab pucuro jiha.

Aminadab Naasón pucuro jiha.

Naasón Salmón pucuro jiha.

⁵ Salmón Booz pucuro jiha. Booz pocoro Rahab jiha.

Booz Obed pucuro jiha. To pocoro Rut jiha.

Obed Jesé pucuro jiha.

⁶ Jesé Davi pucuro jiha.

Davi sehe Israe masa bui puhtoro jiha. Tiro Uria wama tiro cjiro namonore to nuari baharo Salomo wama tirirore pohna tiha.

⁷ Salomo Roboã pucuro jiha.

Roboã Abías pucuro jiha.

Abías Asa pucuro jiha.

⁸ Asa Josafat pucuro jiha.

Josafat Joram pucuro jiha.

Joram Uzías pucuro jiha.

⁹ Uzías Jotam pucuro jiha.

Jotam Acáz pucuro jiha.

Acáz Ezequia pucuro jiha.

¹⁰ Ezequia Manase pucuro jiha.

Manase Amón pucuro jiha.

Amón Josia pucuro jiha.

¹¹ Josia Jeconia cuhu pucuro jiha. Tina ti jiri pjare Israe yahpa macainare Babilonia macaina sehe ñaha wahcãha ti ya yahpau.

¹² ã yoa Babilonia yahpai ti suri baharo,

- Jeconia Salatiere pohna tiha.
 Salatie Zorobabe pucuro jiha.
¹³ Zorobabe Abiud pucuro jiha.
 Abiud Eliaquim pucuro jiha.
 Eliaquim Azor pucuro jiha.
¹⁴ Azor Zadoc pucuro jiha.
 Zadoc Aquim pucuro jiha.
 Aquim Eliud pucuro jiha.
¹⁵ Eliud Eleazar pucuro jiha.
 Eleazar Matán pucuro jiha.
 Matán Jacobo pucuro jiha.
¹⁶ Jacobo José pucuro jiha. José María manuno jiha. María sehe Jesu pocoro jire. Jesu sehe masare yuhdohtiro jiro Cristo ti ni pisuriro jire.

¹⁷Tó sehe jiro Abrahāre mari quihō muhtachu, pū Davipure mari quihō batoachu ahrina jipihtina ti panamana ji turiaina mehne jia, catorce curuari waro jiha. Pari turi Davire mari quihō muhtachu, pū Babiloniapu Israe masare ti naahto pano mari quihō batoachu jipihtina ti panamana ji turiana mehne jia, catorce curuari waro pari turi jiha. Ā yoa tuhsu Babiloniapu ti suri baharo mari quihō muhtachu, pū Cristo to masa bajuachapu mari quihō batoachu jipihtina ti panamana ji turiaina mehne jia, catorce curuari waro jiha tjoa.

Jesucristo to masa bajuarire yahuha

(Lc 2.1-7)

¹⁸Ā yoa ō sehe Jesucristo masa bajuari jire. To pocoro María sehe José namono cjihto jiri jire. Wiho mejeta ti puaro ji dūcahto pano Espíritu Santo to tuaa mehne wahma nijinocāre bocaro masiha ticoro to basi. ¹⁹Ā yoa José to manuno cjihto quihōno yoiriro jiro, tíre masino, ticorore cohāno taro nimaha. Masa ti ñurocaroi ticorore buhiri tichu yoa duaeraro, masa ti tuhoe-rasinichuta yaroca ticorore cohāno taro nimaha. ²⁰Tíre to tuhoturo watoi Cohamacu anjo sehe cahānopu Josére bajuaro, ō sehe niha:

—José, Davi cjiro panamino, Mariare buo tiro marieno namo tiga. Ticoro Espíritu Santo to yoadohoro mehne wahma nijinocāre bocaricoro jira. Ā jicu buo tiro marieno namo tiga ticorore. ²¹Ticoro pohna tirohca. Tirota to macu-nota to masare, pichacapu wahaborinare yuhdohtiro jirohca. To ā yuhdohtiro jichu ñacu, Jesu ni wama pisuihca muhu —niha anjo Josére.

²²Panopu macariro Cohamacu yare yahu muhtariro cjiro “Ā waharohca”, to ni joariro seheta ahri jipihtia ā wahaa tiha. Ahri ā wahahtore ō sehe ni joa dutia tiha Cohamacu tirore:

²³“Cācoro nuhmino, ne muno mehne jieraricoro, nijinocāre bocaro pohna tirohca to macunocāre.

Tirocā Emanuel wama tirohca”,
 ni joaa tiha Cohamacu yare. (Emanuel nino: “Cohamacu mari mehneta jira”, nino nica.)

²⁴Cohamacu anjo Josére to ā ni yahuri baharo José sehe wahcā, anjo to dutiriro seheta tiro María mehne wamomaca dūhteha. ²⁵To macunocāre to

pohna tihto pano José sehe ticoro mehne jiera tiha. Baharo ticoro sehe pohna tia wahaha. Tiro sehe wihārirocāre Jesu wamoaha.

Sū muja taro macaina Jesucāre űua suha

2 ¹Herode Judea yahpa macaina ti bui puhtoro to jiri pja tí yahpai jiri macai Belēi Jesu masa bajuaha. To ā masa bajuari baharo űahpichohare buheina űahpichohare noano masiina sū muja taro macaina ta, Jerusalēpu wihia. ²Ā wihia, masare tó macainare sinituha:

—¿Judio masa ti bui puhtoro jihtiro cjihto mipure nohopu masa bajuacari tiro? Sū muja taropu jina, űahpichohaca to wahma bajua wahā suchu űua, “Puhtoro masa bajuaro nica”, ni masihi sā. Ā to bajuachu űua, sā cūno mehne tirore ño payona tana tahi opu —ni yahuha buheina masare.

³Ā yoa paina Herodere tīre yahua tiha. Ti ā yahuchu tuhoru Herode sehe soro tuhotuha. Ā jia jipihtina Jerusalē macaina cūhu to yaro sehta soro tuhotuha tina cūhu. ⁴Ā jiro Herode sehe jipihtina sacerdotia puhtoare, mari judio masare buheina cūhure to pjirocari baharo ti cahmachu pihtichu űuo, tinare sinituha tiro:

—¿Nohopu masa bajuarohcari Cristo sehe masa tuhotuchu? —ni sinitu űua tiro.

⁵Ō sehe ni yahuha tirore:

—Belēi, Judea yahpai jiri macai Cristo masa bajuarohca. Ō sehe ni joa tiha Cohamacu yare yahu muhtararo cjiro:

⁶“Belēi yu yainare Israe masare dutihtiro tarohca.

Ā jiro paye macari Judea yahpai jia macari yuhdoro jira Belē”, ni joa tiha Cohamacu yare —ni yahuha tina Herodere.

⁷Ti ā ni yahuri baharo Herode masa ti marieno watōi sū muja taropu tari-nare pjirocaca. To cahapu tina ti suchu űuo, tinare sinitu űua. To ā sinitu űuchu tuhoa, űahpichohacare ti űuri dachore yahuha tina. ⁸Ti ā yahuri baharo Herode sehe tinare Belēpu warocaro ō sehe niha tinare:

—Tirocāre noano macaga. Tirocāre bocana tjuahna yūhure yahu tjuahga. Yūhu cūhu tirocāre ño payoi wahi tai nija —nimaha tinare Herode.

⁹To ā niri baharo, tina wahaa wahaha. Ti ā wahachu sū muja tarōi ti űuria űahpichohaca sehe mu tārucuha. Ā yoa wihārirocā to jiro bui waroi tjuu wahā suha tia sehe. ¹⁰Ā jia űahpichohacare űua, tuaro wahcheha tina. ¹¹Wihārirocā to jiri wuhupu su, sāa wahaha tina. Ā sāa sua, wihārirocāre to pocoro mehne jirocāre űua tina. Ā űua tina na tuhcu caha su, tirocāre ño payoha. Ño payo tuhsu ti caa pocare naroca pjiroca, urure, inciensore, mirra wama tia me sitia cūhure na wio, tīre tirocāre wapa marieno waa tiha. ¹²Tīre wa tuhsu carīa wahaha tina. Ti ā carīchu cahānopu Cohamacu yahuha tinare: “Herode cahai tjuuena tjiga”, ni yahuha Cohamacu tinare cahānopure. To ā ni yahuri baharo, tina sehe wahcāha. Ti ā wahcāri baharo pa mahapu ti ya dihtapu tjuu wahaa tiha.

José cūhu Jesucāre Egiptopu na duhti wahcāa wahaha

¹³Ti ā wahari baharo Cohamacu anjo cahānopu Josere bajuaro, ō sehe niha:

—Wahcāga. Herode sehe maharirocāre wajāno taro, macano nina mipure. Ā yoa maharirocāre, to pocoro cūhure Egiptopu cjero na duhti wahcāa wahaga. Tōpure yu niriro purota jiga —ni yahuha anjo Josere.

¹⁴To ã nichu tuhoro, José sehe ñamiihta wahcã, maharirocãre to pocoro cãhure Egiptopu na duhti wahcãa wahaha. ¹⁵Egiptopu sua, Herode to catiro puro tãpũre jiha tina. Ñ yoaha panopu macariro Cohamacu yare yahu muhtariro cjiro to ni joariro seheta. Tĩre tirore Cohamacu joa dutia tiha. Õ sehe ni joaa tiha Cohamacu yare: “Egiptopu jiriore yu macũre pjirocahi”, ni joaa tiha Cohamacu yare.

Herode macanacãre wajã dutiri jire

¹⁶Ñ yoa ñahpichohare buheina ti duhti yũhduachu tuhoro Herode sehe sua yũhduaha. Ñ suaro, Belẽ macainare, tĩ maca dũhtu caha macaina cãhure ti pohnare mũa pohnare puã cũhma cjuainacãre wajã batoa dutiha tiro. Wahmanore ñahpichoha buheina ñahpichohacare ti ñuri dachore yahuha Herodere. Ti ã nichu tuhoro tiro to wajã duarirocã to masa bajuari dachore masino, “Õpe cũhmari cjuara” nino, puã cũhma cjuainare wajã batoa dutiha. ¹⁷Panopu macariro Jeremía Cohamacu yare yahu muhtariro cjiro to ni joariro seheta ã wahaha. Õ sehe ni joaa tiha tiro:

¹⁸“Ramã wama tiropu bisiro coa tarohca.

Tuaro cahyaa mehne tiiro coa tarohca.

Raquel panamana numia ji turia numiapu Israe masa namosãnumia ti pohnare tuaro tiiaha.

Ti pohnare ti wajãchu ñũa, ne cahya duhusi”,
ni joaa tiha panopu.

¹⁹Ñ yoa Herode to yariari baharo Egiptoi jiriore Josẽre Cohamacu yairo anjo cahãnopu bajuaha. Ñ bajuaro õ sehe niha Josẽre:

²⁰—Maharirocãre wajã duaina cjiro yariaa wahahre. Ñ jicu tirocãre to pocoro mehne Israe yahpau na tjuaa wahaga muhũ —ni yahuha anjo Josẽre.

²¹To ã niri baharo tiro wahcã, maharirocãre to pocoro mehneta Israe yahpau na tjuaa wahaha. ²²Wiho mejeta Arquelao Herode macuno sehe to pũcũro cohtotariro to jichu tuhoro José sehe Judea yahpai cuiro, tjuaeraha. Ñ jiro pari turita cahãnopu tirore yahu namoha tjoa. Tirore pari turi Judea yahpare ji dutieraha. To ã ni yahuri baharo, tina Galilea yahpau wahaa wahaha. ²³Tĩ yahpau Nazare wama tiri macai jiha tina. Ñ yoaha tina Cohamacu yare yahu muhtaina cjiro ti joariro seheta. Õ sehe ni joaa tiha: “‘Cristo Nazare macariro tjira’, niaha masa”, ni joaa tiha Cohamacu yare yahu muhtaina panopu macaina.

João masare bautisariro masare yahuha

(Mr 1.1-8; Lc 3.1-9, 15-17; Jn 1.19-28)

3 ¹Ñ yoa baharopu João masare bautisariro jiha. Judea yahpai masa marienopu tiro Cohamacu yare yahu dũcaha masare. ²Õ sehe ni yahuha tinare:

—Muano macariro Cohamacu musa puhtoro to suho jihto mahanocã dũhsara. Ñ jina “Ñano yoaeraja”, musa ni tuhotumari cjirore duhuga. Musa ñaa buhirire cahya, Cohamacu sehere cahmaga musa —ni yahuha tiro tinare.

³Panopu macariro Isaia Cohamacu yare yahu muhtariro cjiro João to buhehtore õ sehe ni joaa tiha:

“Masa marienopu cũiro saũurucu, õ sehe ni buherohca:

‘Mari puhtoro to tahto pano tirore cahmaeraina cjiro musa tuhotuare cohtota, tirore cahmaina jiga musa’, ni sañurucu buherohca”, ni joaa tiha Isaia cjiro João cjihtore.

⁴Tiro João camello pjoari suhtirore sãariro, wahiquiro cahsaroreta tuã dihoriro jiha. Poreroare, macaroca macaina miquina mi cūhure chūa tiha.

⁵Jerusalē macaina, jipihti Judea yahpai jiina, Jordão wama tiri ma cahai jiina cūhu tirore tuhoa taha. ⁶Wihi, tirore tuho, ti ñaa yoirire Cohamacure yahuha tina. Ti ã ni yahuchū tuhorō Jordão wama tiri mai João tinare bautisaha.

⁷Ã jiro payu fariseo curua macaina, saduceo curua macaina cūhu Joãore ti bautisa dutia tachū ñũno tiro tinare õ sehe ni yahuha:

—¿Musa cūhu agāa ñima tiina yoaro sehe musa mahñoa buhea mehne masare dojomehneina jina, Cohamacu musare to buhiri dahrehto pano tirore cui, duhti masierara musa? ⁸Ã jina potocāta musa ñaa buhirire bujua witi, Cohamacure cahmana jiihna, noaa yoa ñoga.

⁹Õ sehe ni tuhotuena tjiga: “Panopu macariro Abrahā mari ñuchū cjiro jia tiha. Æ jina to panamana jina mari Cohamacu yaina jija”, ni tuhotuena tjiga musa. Musare niita nija. Abrahā panamana jiina jimana musa. Musa ã jipachuta tí musa ã jia yaba cjihti jierara. Cohamacu sehe ahri tãa mehne Abrahā coyeare dahre masina. Æ jiro Abrahā coyea musa jia wiho waro jira tãa ti wiho waro jiro seheta. ¹⁰Õ sehe jira: Masa yucuri yoaro seheta jira. Cohamacu sehe coma mehne yucurire cã cohãriro yoaro sehe jira. Æ jiro noaa dica maria yucure nuhcõri mehneputa cã cohãnohca tiro. Tíre to cã cohãri baharo, pichacapū jū cohãnohca tiro. Åta yoaro taro nina masa cūhure tirore cahmaerainare. ¹¹Yū baharo yū bui tuariro tarohca. Noa yuhduariro jira tiro. Tiro yoaro sehe jieraja yūhu sehe. Æ jicu tirore tuhotucu, “Wiho jiro jija yūhu”, ni tuhotuaja yūhu. Yūhu sehe musa ñaare tuhotumari cjirore tuhotu cohtotainare diapū bautisacu, co mehne yoamahi. Tiro sehe yū yuhdoro yorohca. Espiritu Santore masa mehne ã jirucuchū yorohca tiro. Wiho mejeta paina sehere ñaare ti tuhotumari cjirore duhu duaeraina sehere tiro pichaca mehne buhiri dahrerohca. ¹²Yū baharo tariro cahsari cohãriro yoaro sehe jira. Cahsari cohãriro to batiro mehne jipihtia to trigo yapari cahsarire putiwera. To ã putiwera baharo trigo sehere to wihbori wūhui wihborohca. Tó seheta yorohca tirore cahmainare yū baharo tariro. To putiwea cahsari sehere tiro jūnohca. Tí pichaca ne yatisi. Åta yorohca tiro yū baharo tariro tirore cahmaerainare —ni yahuha João.

João Jesure bautisaha

(Mr 1.9-11; Lc 3.21-22)

¹³Baharo Jesu Galileapū jiro jira waha, Jordão wama tiri mapū buhu suha Joãore bautisa dutiro. ¹⁴Wahmanore João tirore bautisa duaeramaha.

—Neho, mūhu sehe yū yuhdoro tuariro yūhu sehere mū bautisachu noaboa. Mūhure bautisaboriro jieraja yūhu —ni yuhtimaha João Jesure.

¹⁵Jesu sehe õ sehe ni yuhtiha tirore:

—Yūhure bautisasiniga. Õ sehe yoana, Cohamacu to dutiro sehetā sohtori tina nija mari —niha Jesu.

To ā nichu tuhorō:

—Jai —ni yuhtiha João.

¹⁶Ā ni tuhsu, Jesure bautisaha. To bautisa tuhsuchu Jesu diapū ducuriro maja surucu suha. To maja surucu suchuta, muano parī muaha. Cohamacu to Espiritu buja yoaro sehe tiro bui to duji tachu űuha. ¹⁷To ā duji tachu muanopu durucuro coa taha:

—Ahriro yu macu yu cahiro jira. Tiro mehne tuaro wahcheja —nino coa taha muanopu.

Watino űaare yoa dutimaha Jesure

(Mr 1.12-13; Lc 4.1-13)

4 ¹Ā yoa Espiritu Santo sehe Jesure masa marienopu naaha, tōpu watino tirole űaare to yoa duti űuhto sehe.

²Tōpu suro cuarenta dachori waro churo marieno jiha Jesu. Ā jiro juca baaha. ³Juca to baachu űuno watino sehe tiro cahapu suro, ō sehe niha:

—Muhu Cohamacu macuno jicu, ahri taa pocare chua dojomehnega —nimaha tiro Jesure.

⁴Jesu ō sehe ni yuhtiha:

—Yoeraja. Cohamacu yare ti joari pui ō sehe nina: “Masare chua mehne dihta catieraro cahmana. Jipihtia Cohamacu to ya yahua mehne jiro cahmana”, nina Cohamacu —ni yuhtiha Jesu watinore.

⁵To ā ni yuhtiri baharo watino sehe Jerusalēpu “Cohamacu ya maca”, ti niri macapu Jesure naaha. Tōpu na suro, Cohamacu ya wuhu bui Jesure na suha tiro. ⁶Na su tuhsu, tirole ō sehe nimaha:

—Cohamacu yare ti joari pui ō sehe nina:

“Cohamacu to anjoare muhure űu wihbo dutirohca. Ā jia tina sehe muhure űu wihboahca,

‘Tācapu puha tu muari’ nia”,

nina ti joari pui. To ā niri potocā jichu muhu Cohamacu macuno jicu yahpapu pju bora űoñujata yuhure. Muhure tina ti yoadohochu űoñujata yuhure —nimaha watino.

⁷Jesu pju bora űo duaeraro ō sehe ni yuhtiha:

—Cohamacu yare ti joari pui ō sehe nina: “Musa puhtoro Cohamacu to niri cjiire ‘¿Potocā tjiari?’ ni masi duana Cohamacure yoa űo duti macaena tjiga”, nina Cohamacu yare ti joari pui —niha Jesu.

⁸To ā ni yuhtiri baharo muu yuhdudu tucapu Jesure na mujaha watino tjoa. Tu buipu muja pja su, jipihtia macarine űoroca boroha Jesure. Ti cjuaa cūhure űoha. ⁹Ā űono Jesure ō sehe nimaha:

—Yuhure na tuhcuca caha su, űo payoga muhu. Mu ā yoachu jipihtia ahri macarine muhure waihtja —ni yahumaha watino.

¹⁰To ā nichu Jesu ō sehe ni yuhtiha:

—Satana, wahaga muhu. Ō sehe nina Cohamacu yare ti joari pui: “Mu puhtoro Cohamacu dihtare űo payoga. To ya dutia dihtare yoaga”, nina Cohamacu yare ti joari pui —niha Jesu watinore.

¹¹To ā nichu tuhorō watino wahaa wahaha. To wahari baharo anjoa sehe wihi, Jesure yoadohoa tirole chua waha.

Galilea yahpai Jesu buhe dūcaha

(Mr 1.14-15; Lc 4.14-15)

¹² Ā yoa Joāore peresu ti yoachu tuhoru, wahaa wahaha Jesu. Waha, Galilea yahpapu suha. ¹³ Tói jiri macapu Nazarepu waha, yuhdu wahcā, Capernau wama tiri macapu suha. Galilea wama tiri bucupariro duhtu cahai jira Capernau. Tí maca Zebulō yahpa cahai, Neftalí yahpa cahai jire Capernau. Tópu su, jiha Jesu. ¹⁴ Āta yoaha Jesu panopu macariro Cohamacu yare yahu muhtariro Isaia cjiro to ni joariro seheta. Ō sehe ni joaa tiha:

¹⁵ “Zebulō yahpa cahai, Neftalí yahpa cahai, bucupariropu waharoi, Jordão pa buhusehe coapu Galilea yahpa jira.

Tí yahpa judio masa jieraina ya yahpa jira.

¹⁶ Tó macaina Cohamacu yare noaare masierara.

Ā masierapahta noarirore nuapu masiahca.

Tina sehe Cohamacure ne masierara.

Ā jia pichacapu wahaborina jimaha.

Ā jiro cūiro tinare Cohamacu yare masichu yoarohca”,

ni joaha Isaia cjiro.

¹⁷ Tópu jiro, Cohamacu yare yahu dūcaha Jesu:

—Musa űaare tuhotumari cijirire duhu, noaa sehere tuhotu cohtota, Cohamacureta macaga musa. Muano macariro Cohamacu jipihtina bui puhtoro to suho jihto mahanocā duhsara —ni yahu dūcaha tiro.

Pititiaro wahi wajāinare tiro mehne macaina cjihtire pjiha Jesu

(Mr 1.16-20; Lc 5.1-11)

¹⁸ Ā yoa Galilea wama tiri bucupariro duhtu cahapu Jesu sito wahcāmahno űuha Simore, to bahuro Andre mehne. Simota Pedro ti ni pisuriro jiha. Tina sehe wahi wajāina jia, ti wañuyucurire doca ño mujaa niha bucupariropu.

¹⁹ —Yuhu mehne macaina cjihti taga musa. Yuhu mehne musa tachu, musa wahire űaha cahmachuina musa jiro seheta, Cohamacu yaina cjihtire masare pji cahmachuina cjihtire yoaihtja musare. Yuhu mehne musa tachu ā yoah-tina cjihtire cūihtja musare —niha tiro tinare.

²⁰ To ā nichu tuhoata ti wañuyucurire cūnoca, tiro mehne wahaa wahaha.

²¹ Ā yoa Jesu tina mehne yuhdu wahcā, Santiagore to bahuro João mehne boca suha tjoa. Tina Zebedeo pohna jiha. Ti yaria dohoriai ti pucuro mehne tina cūhu ti wañuyucurire cahnoa niha. Tina puarore tiro pjirocaha. ²² To ā pjirocachu tuhoa, tina sehe dóihtia ti pucurore, dohoria cūhare cū, Jesu mehne wahaha.

Payu masare buheha Jesu

(Lc 6.17-19)

²³ Ā yoa jipihtiro Galilea yahpare Jesu buhe tiniha. Judio masa mari buhea wuhusepu noaa buheare, muano macariro puhtoro to suho jia tiare buheha. Tinare buhe, dohatiinare noaina wahachu yoaro jipihtia dohatiare cohāha tiro. ²⁴ To ā yoaare tuhoa Siria yahpa macaina jipihtiropu tí yahpai jiina tirore masi dūcaha. Ā masia, soro jia dohatia cjuainare, tuaro puriāre cjuai-nare, watīa ti sāanohrinare, űama yaria munare dohatiinare, tini masieraina

cũhure na suha. Ti ā na suchũ ñũno jipihtina tinare noaina wahachũ yoaha Jesu. ²⁵To ā yoachũ ñũa, Galilea yahpa macaina, Decapoli wama tiropũ jia macari macaina, Jerusalẽ macaina, Judea yahpa macaina, Jordão pa buhu-sehe coa macaina payu masa tiro mehne wahaha.

Tũcupũ muja, tói buheha Jesu masare

5 ¹Masa payu to cahai ti suchũ ñũno Jesu tũcupũ mujaha. Muja su, tói dujiha. Tói to dujichũ to buheina sehe tiro cahapũ suha. ²Ti suchũ ñũno õ sehe ni buhe dũcaha:

Õ sehe jiina jira wahcheina

(Lc 6.20-23)

³—Ti ñaa tuhotumari cjirire duhu, noaa sehere tuhotu cohtotaina Cohamacũre cahmaina wahcheina jira. Muano macariro puhtoro to suho jiropũre wahaahca tina. Muano macaa ti ya jira.

⁴'Yahco tiina cũhũ wahcheina jira. Tinare wahchechũ yorohca mari Pũcu.

⁵'Painare yũhdũrũca duaeraina ā jica nieraina wahcheina jira. Cohamacũ "Waihtja", tinare to nirire cjuaahca tina.

⁶'Cohamacũ to dutiro sehe yoa duaina, noaare yoa duaina wahcheina jira. Cohamacũ to yoadohochũ tina noaare yoa sohtori tiaha.

⁷'Painare pja ñũina wahcheina jira. Ti ā pja ñũchũ Cohamacũ tina cũhure pja ñũnohca.

⁸'Ti ñaa buhirire cosanohrina wahcheina jira. Cohamacũre ñũahca tina.

⁹'Masare bosaina wahcheina jira. Tinare "Yũ pohna jira", ninohca Cohamacũ.

¹⁰'Cohamacũ dutiare ti yoi buhiri ti ñano yohanohrina sehe wahcheina jira. Muano macariro puhtoro to suho jiropũ to yare cjuaahca tina.

¹¹'Yũ yare mũa yoi buhiri paina mũare ti tuhtipachũta wahcheina jira mũa. Mũare ti ñano yoapachũta wahcheina jira mũa. Yũ yaina mũa jiri buhiri mũare jipihtia ñaa ti quti dojomehnepachũta ti mahñopachũta wahcheina jira mũa. ¹²Cohamacũ yare yahu muhtainare mũa pano jiiinare tinapũreta ñano yoa muhtaha. Mũa cũhure ti yoiro sehe ti yoachũ wahchega. Noano yajeripohna tiga. Ā jiro muanopũ mũa suchũ pjĩro noano yorohca mũare Cohamacũ —ni yahuha Jesu.

Moa yoiro sehe, buhriaro yoiro sehe jira Jesu yaina

(Mr 9.50; Lc 14.34-35)

¹³Ā yoi Jesu õ sehe ni buhe namoha:

—Moa wahiquiro dihire to ñano wahaerachũ yoiro seheta mũa sehe yũ yaina sehe jipihtina painare ñaare ti yoi duaerachũ yoiro. Wiho mejeta moa sehe ti ñaa wahachũ pari turi noaa yoahto basioerara. Tí moa ne noaerara. Ti ā wahachũ tí moare cohãno cahmana. Ti ā cohãri baharo tí bui masa tũ cũna. Ne yaba cjihti jierara tí moa ti cohõa. (Ti yaba cjihti jieraro seheta jiena tjiga mũa. Cohamacũ ya sehere cohãena tjiga) —ni yahuha Jesu.

¹⁴Ā yoi tiro õ sehe ni buhe namoha:

—Buhriaro marine to ñũchũ yoiro seheta mũa sehe yũ yaina sehe ahri yahpa macainare Cohamacũre masichũ yoiro. Tũcu bui jiri macare nuohto

basioerara. ¹⁵ Ñ yoa sihãriare masa sihãa, biato docapu nũoerara. Tiare sihãriare muanoi duhu payora tí wũhu macaina jipihtina ti ñũhtiare. ¹⁶ Õ seheta musa cũhu buhriaro yvaro sehe jiina jina, noaare yoaga. Musa ã yoachu ñua masa mari Pucu muano macarirore ño payo, “Tuariro, noariro jira”, niahca —ni yahuha Jesu.

Cohamacu to dutiare to joari cjirire yahuha Jesu

¹⁷ Ñ ni tuhsu, tinare õ sehe ni yahu namoha:

—Ahrire musa masichu cahmaja yuhu. Cohamacu to dutiare Moise cjirore to cũrire, to yare yahu muhtaina cjiri ti joari cjiri cũhure cohãi tai nierahi. Tí dutiare musare noano yahu potoi tai nii. Tí dutiare ti quihõno jichu ñoi tai. Ti niriro seheta yoa sohtori tii tai nii. ¹⁸ Potocã musare nii nija. Pihtiri dacho pano jisnichu Cohamacu dutia Moise cjirore to cũrire ne mahanocã baro cohãsi mari. Ahri yahpa, muano cũhu ti jisino puro to dutia cũhu jirucuahca. Ñ jirucua ti niriro seheta sohtori tirohca. ¹⁹ Ñ jia tí dutiare cãina yuhdurucaa, painare tó sehe yuhduruca dutia, muano macariro puhtoro to suho jiropu cahamaca yvaro sehe jahca. Cũno dutiacã to jipachuta tina yuhdurucaa, cahamaca yvaro sehe jahca tina. Paina tí dutiare noano yoa, painare tí yvaro sehe yoa dutia, muano macariro puhtoro to suho jiropu puhtoa yvaro sehe jahca tina sehe. ²⁰ Musare niita nija yuhu. Judio masare buheina, fariseo curua macaina cũhu Cohamacu cahmaare quihõno yoaerara. Tina ti ywariro yuhdoro Cohamacu cahmaare yoaga musa sehe. Musa ã yoaerana, puhtoro Cohamacu to suho jiropure ne sũsi musa —ni yahuha Jesu.

Susiniare yahuha Jesu

(Lc 12.57-59)

²¹ Ñ ni tuhsu, tinare õ sehe ni yahu namoha:

—Panopu macaina õ sehe ni ti yahuri cjirire tuhori jimare musa: “Masare wajãena tjiga. Masare wajãriro ti buhiri dahrehtiro jira”, ti niri cjirire tuhori jimare musa. ²² Ahri ti yahuri yuhdo curero musare ahri sehere yahu namoihtja. To coyeiro mehne susiniriro sehe ti buhiri dahrehtiro jira masunore wajãriro yvaro seheta. To coyeirore tuhtiro, “Ne tuho masia maerariro jira muhu”, niriro buhiri dahre dutiina cahai ti naahtiro jira. “Tuho masierariro jira muhu”, to coyeirore nirirore pichacapu wahahto cua yuhduara tirore.

²³ Musa coyeiro musare to ñu tuhtichu õ sehe yoaga. Cohamacu wuhupu Cohamacure musa ño payohto pano, wahiquirore jũ muo, musa wahto pano õ sehe yoaga. ²⁴ Musa wahtire duhu cũ, musa coyeiro cahapu waha, “Pari turi cahmachena tjijihna. Tó purota duhujihna tire”, niga tirore. Musa ã niri baharo Cohamacure wa, ño payona wahaga to wuhupu.

²⁵ Pairu muhure to yahusã duachu, puhtoro masare beseriro cahapu muhure to naa duachu, tiro mehne suaro marieno wahaga. Masare beseriro cahapu to na suhto pano tiro mehne noano jiga. Mu ã yoachu ñuno tiro muhure yahusãeraboca. Mu ã yoaerachu tópure musa suchu tiro sehe muhure masare beserirore yahusãnohca. To ã yahusãchu, beseriro sehe peresu yoi-napure muhure warohca. Ñ jia tina muhure peresu yoaahca. ²⁶ Potocã nii nija muhure. Tópu jisinihca muhu. Pu ti wapa dutirire muhu wapa pahñoipu wijaaahca muhu —ni yahuha Jesu.

Pairo namono mehne ñano yoaare yahuha Jesu

²⁷ Õ sehe ni yahu namoha Jesu:

—Panopu macainare ò sehe ti ni yahuri cjiire tuhori jimare musa: “Pairo namono mehne ñano yoaena tjiga”, ti niri cjiire tuhori jimare musa. ²⁸ Ahri ti yahuri yuhdo curero musare ahri sehere yahu namoihtja. Numinore ñahaeraparota, cüiro tiorore ñano goa pjaro, ñano wacü tuhuro ñano yoa tuhsuha ticoro mehne.

²⁹ Æ jicu mü capariaca poto buhusehei jiriacã mehne ñano yoaçu, tiare orewe na mü cohaboriro seheta ti ñaa yoaare duhuga. Tíre duhueracu pichacapu wahaihca. Mü capariacare mü cohächu tia capariaca dihta butira. Múhu sehere pichacapu mü wahachu ña yuhduara. Æ jicu tí ñaa yoaare duhuga. ³⁰ Æ jicu mü wamomaca poto buhusehei jiri wamomaca mehne ñano yoaçu, tí wamomacare mü dute cohaboriro seheta tí ñaa yoaare duhuga. Tíre duhueracu pichacapu wahaihca. Mü wamomacare mü cohächu tí wamomaca dihta butira. Múhu sehere pichacapu mü wahachu ña yuhduara. Æ jicu tí ñaa yoaare duhuga —ni yahuha Jesu.

To namonore cohãare yahuha Jesu

(Mt 19.9; Mr 10.11-12; Lc 16.18)

³¹ Õ sehe ni yahu namoha Jesu:

—Panopu ahri cühure niha: “To namonore cohã duariro to cohãhtore yahuri pü mehne tiorore cohã masina”, nimaha panopu. ³² Ahri ti yahuri yuhdo curero musare ahri sehere yahu namoihtja. To namono pairo mehne ñano yoaeraricoro to jipachuta to manuno tiorore cohãboca. To ã cohã daporicoro paioire manu tiro ñano yoaaro nica ticoro paioire mehne jiro. To manuno tiorore ã cohãno tiorore paioire mehne ñano yoaçu yoaara. To baharo namo tiriho cühu ticoro mehne ñano yoaaro nina —ni yahuha Jesu.

Wama payo niare yahuha Jesu

³³ Õ sehe ni yahu namoha Jesu:

—Panopu macaina ò sehe ti ni yahuri cjiire tuhori jimare musa: “Musa niriho seheta yoa. ‘Cohamacu mehne potocã ã yoihtja’, musa niriho seheta yoa”, ti ni yahuri cjiire tuhori jimare musa. ³⁴ Ahri ti yahuri yuhdo curero musare ahri sehere yahu namoihtja. “Muano mehne potocã nii nija”, ni muano mehne wama payo niena tjiga. Muano sehe Cohamacu mari puhtoro to suho jiro jira. Wiho jiro jierara. To ã jichu ñuna muano mehne ã niena tjiga. ³⁵ Ahri yahpa mehne ne wama payo “Potocã nii nija”, niena tjiga. Ahri yahpa Cohamacu ya yahpa jira. To ã jichu ñuna ã niena tjiga. “Jerusalẽ mehne potocã nii nija”, ne wama payo niena tjiga. Tuariro mari puhtoro ya maca jira Jerusalẽ. Wiho jiri maca jierara. To ã jichu ñuna ã niena tjiga. ³⁶ “Yu dapu mehne potocã nii nija”, ni wama payo niena tjiga. Musa pjoari ti yehsea wahachu yoa masierara musa. Ti ñia wahachu cühure yoa masierara musa. Æ yoa masieraina jina “Yu dapu mehne potocã nii nija”, ni wama payo niena tjiga. ³⁷ “Yoanhtja”, nina wama payoro marieno ò sehe dihta tíre nirucuga. “Yoasi”, nina cühu wama payoro marieno nirucuga. Musa wama payo nina, watño ñariro to dutiriho seheta yoaana nica musa —ni yahuha Jesu.

Ti cahma suaare yahuha Jesu*(Lc 6.29-30)*

³⁸ Õ sehe ni yahu namoha Jesu:

—Panopu õ sehe ti ni yahuri cjiire tuhori jimare musa. “Muhure paio mu capariacare to cja tihãiro sehetu muhu cûhu tiore cja tihã cahmaga. Mu piriacare to cja nuhariro sehetu muhu cûhu cja nuha cahmaga”, ti niri cjiire tuhori jimare musa. ³⁹ Ti yahuri yuhdo curero ahri sehere yahu namoihtja musare. Muhure ñano yoiriõre ã ñunocahga. Cû buhusehe mu wahsupure to cjaçu, pa buhusehe cûhure cja dutiga tiore. ⁴⁰ Pairo buhiri dahre dutiriõre muhure to yahusãçu, dutiõro sehe mu camisare muhure yahusãiriõre wa dutiboca. To ã wa dutichu, tiore waga. Mu bui macari suhtiro cûhure wa namoga tiore. ⁴¹ Pairo surara paye barore cû kilõmetro muhure to naabasa dutichu, pa kilõmetrore waha namoga tjoa. ⁴² Muhure siniriõre waga. Tuhsu, paio muhure to waso dutichu wasoga tiore —ni yahuha Jesu.

Musare ñu tuhtiinare cahiga*(Lc 6.27-28, 32-36)*

⁴³ Õ sehe ni yahu namoha Jesu:

—Masa õ sehe nina: “Musa mehne macainare cahiga. ã yoa musare ñu tuhtiinare ñu tuhti cahmaga tjoa”, ti niri cjiire tuho muhtari jimare musa. ⁴⁴ Ti yahuri cjiire yuhdo curero ahri sehere yahu namoihtja musare: Musare ñu tuhtiinare cahiga. ã cahina tinare noano yoaga. Musare ñano yoinare ti ya cjihtire Cohamacure sini payoga. ⁴⁵ Musa ã yoana mari Pucu muano macariro pohna jira musa. Cohamacu sehe cûno potori yoara masare. Ñaina cûhure, noaina cûhure sũ sichu yoara tiro. Tuhsu, Cohamacu dutiare yoina cûhure, yoaeraina cûhure coro tachu yoara tiro. Masare cûno potori to yoiriõ sehetu musa cûhu yoaga. ⁴⁶ Musare cahina dihtare musa cahichu tí ne yaba cjihti jierara paina sehere musa cahierachu. Puhtoa ya cjihtire wapa na cohtaina cûhu tó sehetu yoara. ã jina jipihtinare cahiga. ⁴⁷ Musa coyea dihtare musa noano piti bocachu tí cûhu ne yaba cjihti jierara paina sehere musa noano piti bocaerachu. Cohamacure masieraina cûhu tó sehetu yoara. ã jina jipihtinare noano piti bocaga. ⁴⁸ Ñaa marieina jiga musa. Musa Pucu muano macariro to ñaa marieriõ to jiriõ sehetu musa cûhu ñaa marieina jiga —ni yahuha Jesu.

Noaa yoaare yahuha Jesu

6 ¹ Pari turi tiro õ sehe ni yahu namoha:

—Cohamacu ya cjihtire noaare yoana, “Cohamacu yare yoa pahñoina jija sã”, ni yahuena tjiga painare. Musa ã ni yahuri buhiri noaare musa yoiri cjiire ne yaba cjihti jierara. ã jiro Cohamacu muano macariro noaare musa yoiri wapa musare ne wasi. ² ã jina pjacuoinare yoadohona, tíre masare yoa ñoena tjiga. Masa ti ñuenoi yoadohoga tinare. Cãina noaa ti yoaare yoa ñohna mahapu jinare, judio masa mari buhea wuhusepu jiina cûhure. Tina mari baharo buhusehe ñano yoa cohtaina jira. ã yoa ñohna tina, “Noaina jira”, masare ni ñu dutia. Ti ã ni ñuchu ã yoa ñoina sehe wahche tuhsure. “Noaina jira” ni, masa ti ño payochu wahche tuhsure tina. ã jiro Cohamacu

sehe ne wahche namochu yoasi tinare. ³ Ñ jina pjacuoinare yoadohona, masa ti ñuenoi yoadohoga tinare. Musa mehne macaina mehne jina ti ñuenoi pjacuoinare yoadohoga. ⁴ Masa ti ñueraropu masa yoadohopachuta Cohamacu sehe ñuna. Ñ ñuno masa ã yoari wapa warohca musare —ni yahuha Jesu.

Cohamacure siniare yahuha Jesu

(Lc 11.2-4)

⁵ Pari turi tiro ñ sehe ni yahu namoha:

—Cohamacure sinina, mari baharo buhusehei ñano yoa cohtaina yoaro sehe yoaena tjiga masa. Judio masa mari buhea wuhusepu ducu, mahapu cūhure ducu, Cohamacure sini ñohna tina masare. Ñ sini ñoa potocā masa tinare ti ño payochu tí mehne tina wahche tuhsure. ⁶ Cohamacure sinicu tacu, mu ya tahtiapu biha sāaga. Biha sāa, masa Pucu ñumahnorerarirore siniga. Musa ã yoachu masa marienoi masa sinipachuta masa Pucu musare tuhorohca. Ñ tuhero musare noano yorohca tiro.

⁷ Ñ jina Cohamacure sinina, tuhoturo marieno masa sinirireta pari turi sini majare tjua mujaena tjiga. Ñ sehetu yoara Cohamacure masieraina. “Payu durucua mehne Cohamacure sā sinichu tiro sāre tuhorohca”, ni tuhotumana tina. ⁸ Tina yoaro sehe yoaena tjiga. Musa sinihto pano masa Pucu masa cahmaare masi tuhsura. ⁹ Ñ jina ñ sehe ni sininahca Cohamacure:

“Sā Pucu, muano macariro muhu ñaa marieriro ã jirucura.

¹⁰ Mipure jipihtina bui puhtoro jiga.

Muanopu mu dutiro sehetu ti yoariro sehetu ahri yahpa macaina cūhu yojaro.

¹¹ Ñ jicu dachoripe sā chuhtire warucuga sāre.

¹² Paina sāre ti ñano yoirire sā boja.

Ñ jicu muhu cūhu sā ñano yoirire boga.

¹³ Ñ jicu sā ñaare yoa duana sā goa pjachu ñucu tíre yoa dutii tjiga.

Ñ jicu sāre ñaare yoaerachu yoaga.

[Muhu sā puhtoro tuariro ã jirucuihca. Jipihtina muhure ã ño payorucuahca],

ni siniga Cohamacure.

¹⁴ Paina musare ti ñaa yoirire masa bochu ñuno, masa Pucu muano macariro cūhu masa ñaa yoirire borohca. ¹⁵ Wiho mejeta paina musare ti ñaa yoirire masa boerachu masa Pucu cūhu masa ñaa yoirire ne bosí —ni yahuha Jesu.

Chu duhuare buheha Jesu

¹⁶ Ñ jiro tiro tinare ñ sehe ni yahu namoha:

—Cohamacure ño payona tana chu duhuna bujua witiina yoaro sehe yoa ñoena tjiga. Tó sehe yoara mari baharo buhusehei ñano yoa cohtaina. Tina ti wuhdua poca cahyaina yoaro sehe jira. Ti ã jiina jichu ti chu duhuchu ñu masina masa. Potocāta musare nii nija. Tinare masa ño payochu cahmana tina. Ñ jia tinare ti ño payochu ñua tina wahche tuhsure. (Cohamacu sehe tirore ti ño payori wapa tinare wahchechu yoasi. Ñ jina tina yoaro sehe yoa ñoena tjiga masa.) ¹⁷ Musa chu duhuna, masa pjoarire co mehne wa payo wuha majare payoga. Ñ jina masa wuhdua pocare cosaga. ¹⁸ Musa ã yoachu

musa chu duhuchu ñu masisi masa. Mari ñu mahnoerariro Cohamacu dihta musa chu duhuare ñu masinohca. Musa sahsero musa jichu tiro musa mehne ã jirucura. Ñ ñuno tiro musare noano yoarohca tirore musa ño payori wapa —ni yahuha Jesu.

Muano macaare cjuua dutiha Jesu

(Lc 12.33-34)

¹⁹ Ñ jiro tiro õ sehe ni yahu namoha:

—Ahri yahpa macaare na cahmachuena tjiga. Ñ macaa baa wahaboca. Ti baaerachu yacariro naboca tíre. To yacaerachu machu tuaboca. Ñ jia ahri yahpa macaa nu butihtu cuara. Ñ jina ahri yahpa macaare tuaro cahmaena tjiga. ²⁰ Muano macaa sehere cahmaga musa. Muano macaare machu tua masierara. Tópũ musa cjuua ne baaerara. Tópũre yacariro na masierara. Ñ jina muano macaare cahmaga musa. ²¹ Tópũ musa cjuua ti jichu, muano macaare Cohamacu yare tuaro wacũna musa —ni yahuha Jesu.

Masa ti tuhoturo seheta yoara

(Lc 11.34-36)

²² Ñ jiro õ sehe ni yahu namoha tinare:

—Sihãria to noano buhriachu mari ñu masino seheta Cohamacu yare tuhotuna to yare noano yoa masinahca musa. Musa tuhoturo seheta yoara musa. Cohamacu yare tuhotuna noare yoara musa. ²³ To yare tuhotuerana ñaare yoara musa. Musa ñaa dihtare musa tuhoturucuchu tí ñaa sehe ñabíaa jira —ni yahuha Jesu.

Niñerure cahĩna, Cohamacu sehere cahĩerara

(Lc 16.13)

²⁴ Ñ jiro tiro õ sehe ni yahu namoha tinare:

—Cũiro Cohamacu sehere wacũno, tuabiaro niñeru sehere wacũerara. Niñeru sehere tuabiaro wacũno Cohamacu sehere wacũerara. Niñeru dihtare cahmariro jiro Cohamacure wahchechu yoaerara. Cohamacu cũhure, niñeru cũhure puarore cahma yuhdurucahto basioerara musare —ni yahuha Jesu.

Cohamacu to pohnare ñu wihbora

(Lc 12.22-31)

²⁵ Ñ jiro tinare õ sehe ni yahu namoha:

—Ñ jicu musare nii nija: Musa chuare, sihniare, suhti cũhure pjíro cahya tuhotuena tjiga. Musare bajuamehneno chuare chuhtina cjihti dihtare suhti sãhtina cjihti dihtare Cohamacu yoaeraha musare. ²⁶ Minichahca perire Cohamacu to ñu wihboare masiga musa. Tina weseri maeraina jira. Ñ yoa chuare ti wihboa wuhuse tinare mariahna. Musa Pucũ muano macariro sehe tinare ti chuhtire wara. Minichahca yuhdoro musa sehere cahĩna Cohamacu. Ñ jiro musa cũhure ñu wihborohca tiro. ²⁷ Pjíro musa tuhotua mehne cũ hora musare cati namochu yoa masierara musa. Ñ jiro musa pjíro tuhotua yaba cjihti jierara.

²⁸ Ñ jina musa suhti sãhtire pjíro cahya tuhotuena tjiga. Macaroca macaa cohoi ti cohoare tuhotuga. Tí cohoi ti basi suhtire yoaerara. Wiho mejeta

tí cohorí noaa suhti yoaro sehe noaa cohorí bajura. ²⁹Salomo cjiro noaa suhtire sãariro to jipachuta tí cohorí sehe tiro yuhdoro noabia cohorí waro jira. ³⁰Cohorire noaa cohorí yoara Cohamacu sehe. Tí cohorí sehe mahaa dachoricã jirucuma ñai boraa wahara. Mahanocã ji, pa dachoi pichacapu jãa wahara. Ti ã jipachuta cohorire noaa cohorí jichu yoara Cohamacu. Á jiro Cohamacu cohorire to noaa cohorí to yoariro yuhdoro musa cùhure noano yoarohca. Suhtire warohca. Cohamacure mahanocã wacũ tuara musa. ³¹Á jina musa chuhtire, musa sihnihtire, musa suhti sãhtire pjíro cahya tuhoutuena tjiga. ³²Cohamacure cahmaeraina sehe tíre ã macarucua nina. Musa Pucu muano macariro jipihtia musa cahmaare masina. To ã masichu pjíro cahya tuhoutuena tjiga. ³³Cohamacu musa puhtoro to jihto cjihtore cahma muhtaga musa. Jipihtia paye baro yuhdoro tiore cahmaga musa. Noare to yoa dutia cùhure cahmaga. Musa ã yoari baharo Cohamacu sehe musa cahmaa duhsachu warohca. ³⁴Á jina ñamichacapure musa dohse wahahtore pjíro cahya tuhoutuena tjiga. Musa ã pjíro cahya tuhoutuena payubiaa jiahca musa tuhoutuhe sehe. Micha macaa dihtare musa tuhoutuhe tó purota mu sũrohca —ni yahuha Jesu.

Painare “Ñaina jira”, niena tjiga

(Lc 6.37-38, 41-42)

7 ¹Á jiro tiro tinare õ sehe ni yahu namoha:
—Painare “Ñaina jira”, niena tjiga musa. Musa ã nierachu Cohamacu musare “Ñaina jira”, nisi. ²Painare “Noano yoaerara”, musa ni ñũriro seheta Cohamacu sehe musa cùhure ãta ni ñũnohca. ³Mari piti dahre buhechu õ sehe yoina jira musa. Musa coyeiro to capariacapu mahari pohcarocã to sãachu tí pohcarocãre noano ñuna musa. Musa ya capariaca sehere pjiri pjĩ to jipachuta tí pjĩne ne ñũerara musa. Mahari pohcarocãre musa ñũno seheta musa coyeiro to ñano yoa sehere noano ñuna musa. Musa basi musa ñaare tuaro yoapanahita tíre masierara musa, pjiri pjĩne musa ñũeraro seheta. ¿Dohse jiro baro ã jijari musa? ⁴Õ sehe niina jira musa: “Coyeiro, ñaare yoi nica muhu. Á jicu tíre duhuga”, niina jira musa. Á niina jipanahta pjíro ñaare yoara musa sehe. ¿Dohseana musa ñaare yoapanahita tíre masierajari musa? ⁵Masa ti baharo buhusehei ñano yoa cohtaina jira musa ã yoina. Pjiri pjĩne musa capariacai jiri pjĩne musa na muhtaboriro seheta musa ñano yoa sehere duhu muhtaga. Musa ã yoari baharo musa coyeiro to ñano yoaare duhuchu yoa masiboca, mahari pohcarocãre musa naboro seheta.

⁶Dieya yoaro sehe jiina, yesea yoaro sehe jiina cùhu ñabiainare Cohamacu ya noa yuhduare ti ño payoeraare yahuena tjiga tinare. “Tinapu bujupe, ñano ni, musare ñabiario yoari”, nina yahuena tjiga tinare —ni yahuha Jesu.

Cohamacure mari siniare yahuha Jesu

(Lc 11.9-13; 6.31)

⁷Á jiro tiro tinare õ sehe ni yahu namoha:

—Cohamacure siniga musa. Musa sinina musa sinirire ñahanahca. Musa sinirire bocanahca. Tiore ã sinirucuga musa. Musa ã yoachu tiro musare warohca. ⁸Jipihtina Cohamacure siniina naahca. Á yoa ti sinirire bocaahca. Jipihtina Cohamacure ã sinirucuinare tiro tinare warohca.

⁹¿Musa pohna pão curire musare ti sinichu tãca sehere wabocari musa tinare? Ne wasi musa. ¹⁰¿Musa pohna wahire musare ti sinichu agã sehere wabocari musa tinare? Ne wasi. ¹¹Musa ñaina jipanahta musa pohmare noaare waa tíre musa. Ñ jiro Cohamacu sehe musa yuhdoro noaare wara musare to pohmare tirore siniinare. Musa pohmare musa wariro yuhdoro Cohamacu sehe to pohmare wara.

¹²’Paina musare ti noano yoachu cahmana musa. Tinare musa noano yoachu cahmano seheta musa cùhu noano yoaga tinare. Ti noano yoera-pachuta musa sehe tinare noano yoaga. Ñta yoa dutira Cohamacu dutia Moise cjirore to cùripu Cohamacu yare yahu muhtaina cjiri ti joari cjiri cùhu —ni yahuha Jesu.

Mahari sopacacã quitire yahuha Jesu

(Lc 13.24)

¹³Ñ jiro tiro ò sehe ni yahu namoha tinare:

—Muanopu Cohamacu cahapu waha duana to yare yoaro cahmana musare. Ñ jina to yare ã yoamacanocaeraro cahmana. Mahari sopacacãpu musa sãa duachu mijo curera. Tó seheta mijo nina Cohamacu cahapu musa waha duachu. Pichacapu masa ti wahachu mijoerara. Pjiri sopacapu mari sãachu mijoerara. Tí sopacapu masa ti sãaboro seheta pichacapu masa ti wahachu mijoerara. Ñ jia payu masa tópu waha nina. ¹⁴Cohamacu cahapu musa waha duachu mijo nina. Mahainacã masa tópu wahaahca. Tópu wahaina jipihtia dachoripe Cohamacu mehne jirucuahca —ni yahuha Jesu.

Masa ti yoirire ñuna ti jia tiare masija mari

(Lc 6.43-44)

¹⁵Ñ jiro tiro ò sehe ni yahu namoha tinare:

—Noano yoaga. “Cohamacu yare yahu muhtaina jija”, ni mahñoinare tuhoena tjiga musa. Tina oveja yoaro sehe suaeraina sehe bajumana. Ti tuhotuapu ñaina jira tina. ¹⁶Ti ñano yoachu ñuna, ñaina ti jichu masinahca musa. Ti noano yoachu ñuna noaina ti jichu masinahca musa. Agã potacu se tōhorine dicha tierara. Pota tidu cùhu higuera pocare dicha tierara. ¹⁷Noadu yucucu noaare dicha tira. Ñadu sehe ñaare dicha tira. ¹⁸Noadu yucucu ñaare ne dicha tierara. Ñ yoa ñadu noaare dicha tierara. ¹⁹Noaare dicha tiera yucure dute cohānoca, pichacapu jūnohca. Ñta yoarohca Cohamacu to cahmaare yoaerainare. ²⁰Ñ jina “Cohamacu yare yahu muhtaina jija”, ni mahñoinare ò sehe masinahca. Ti yoirire ñuna, mahñoina ti jiare masinahca —ni yahuha Jesu.

“Musare ne masieraja”, ninohca Cohamacu payu masare

(Lc 13.25-27)

²¹Ñ jiro tiro ò sehe ni yahu namoha tinare:

—Payu yuhure “Puhtoro”, niina jipahta muano macariro puhtoro Cohamacu to suho jiropure wahasi tina. Yu Pucu muano macariro to cahmaare yoina dihta puhtoro to suho jiropure wahaahca. ²²Pihtiri dacho jichu payu masa ò sehe niahca yuhure: “Puhtoro, mu yare sã buhehi. Mu wama mehne watĩare cohã wiohi. Ñ yoa mu tuaa mehne payu yoa ñoñi sã”, yuhure niina

jiahca. ²³ Õ sehe ni yuhtiihca tinare: “Musare ne masieraja. Ñaa buhiri tiina jira msa. Ñ jina yu cahai taena tjiga”, ni yuhtiihca tinare.

Pua wuhu yoaina quitire yahuha Jesu

(Lc 6.47-49; Mr 1.22)

²⁴ Ñ yoa jipihtina ahri yu buherire tuhoriga yu dutiare yoaina, noano tuho masiriho wuhu dahreriho yoaro sehe jira tina. Tiro sehe cuãa copari tãa wapapu saha, wuhure noano dapo ducaha. ²⁵ Tí wuhure to tuhsuri baharo coro tuaro ta, dia mini yuhdua waha, tuaro wihtonno wãha. Ñ to tuaro wãpachuta tí wuhu cuãno tãa wapa bui to dapori wuhu jiro ne waha su cahaerara. ²⁶ Ñ jia jipihtina yu buherire tuhopahta yu dutiare yoaraina, tuho masierariho wuhu dahreriho yoaro sehe jira. Tiro sehe to wuhure paduro buicã dapo, noano yoa ducaraha. ²⁷ Tí wuhure to tuhsuri baharo, coro tuaro ta, dia mini yuhdua waha, wihtonno tuaro wãha. Ñ tuaro wãno tí wuhu sehere wãroca cunocaha. Ñ jiro tí wuhu tuaro bora su cahaa wahaha —ni yahuha Jesu.

²⁸ To ã ni buhechu tuhoa, cuãa wahaha masa. ²⁹ “Tiro potocãta puhtoro jira. Ñ jiro noano masi pahñoriho marine buhera tiro. Mari judio masare buheina yoaro sehe buherara”, ni tuhoutuha tina.

Jesu cami baarirore noariro wahachu yoaha

(Mr 1.40-45; Lc 5.12-16)

8 ¹ Jesu tucapu buhe dujiriho cjiro dujia wahaha. To ã dujiachu ñaa masa payu tiro baharo wahaha. ² To ã wahachu cüiro cami bucü baariro tiore piti boca, na tuhcuca caha su, tiore siniha:

—Puhtoro, muhu yuhure noariro yoa duacu yoaga —niha.

³ To ã nichu tuhoro to wamomaca mehne Jesu tiore ña payoha.

—Jai, muhure noariro wahachu yoaga —niha Jesu tiore.

To ã nichuta tí to cami baari cjiro yati mua wahaha. ⁴ Ñ ni tuhsu Jesu tiore ò sehe niha tjao:

—Yu muhure ò sehe yoiri ne painare yahui tjia. Mu pjacure noari pjacu to waharire sacerdotere ñoi wahaga. Moiseri Cohamacu to cüiro sehta sacerdotere minichahcare waga mu yuhdurire ti noano masihto sehe —niha Jesu.

Surara puhtoro to muno to dohatichu Jesu noariro wahachu yoaha tiore

(Lc 7.1-10)

⁵ Tó baharo Jesu Capernau wama tiri macapu to suchu cien surara puhtoro to cahai su, tiore tuaro ò sehe ni siniha:

⁶ —Puhtoro, yuhure dahra cohtariho pjacu buhariho jiro waha masierajiahno tiore tuaro purichu yu wuhupu coahre tiro —niha tiro Jesure.

⁷ To ã nichu, Jesu “Jai”, ni yuhtiha:

—Tirore to dohatiare yuhduchu yoai wahaihtja —niha Jesu.

⁸⁻⁹ To ã nichu ò sehe niha surara puhtoro:

—Puhtoro, noanohca. Tai tjia. Yu yuhdoro noa yuhduariho jira muhu. Ya wuhui muhure sãa ta dutiboriho jieraja yuhu. Mu masia mehne noariro wahachu yoaga tiore. Mu ã yoachu yu yuhure dahra cohtariho noariro

waharohca. Yuhure yu bui jiina paina puhto dutira. Yuhu cūhu surarare dutija. Cūirore “Wahaga”, yu nichu tiro wahara. Pairore “Taga”, yu nichu tiro tara. Yuhure dahra cohtarire “Ahrire yoaga”, yu nichu tīre yoara. (Muhu cūhu dutirirota jira. Ā jiro mu dutiro seheta tiro dohatiriro yuhdūrohca) — niha tiro.

¹⁰To ā nichu tuho cuaa waharo payu masa tiro mehne jiinare ō sehe niha Jesu:

—Potocāta masare niita nija. Ahriro surara puhtoro Israe masuno jierariro Cohamacure tuaro wacū tuara. Tiore dahra cohtarire yu noariro wahachu yohtire masi tuhsu. Ne Israe masare ahriro yoaro sehe jiinare nūerasi-nija. ¹¹Masare niita nija. Payu ahriro yoaro sehe Cohamacure wacū tuaina jipihtiro macaina muano macariro puhtoro to suho jiropu sua, tōpu jiina mehne chuahca. Abrahā, Isaa, Jacobo mehne chuahca tina. ¹²Masa paina sehe puhtoro Cohamacu to suho jiropu wahaborina ti jipachuta nānopu nahitianopu cohānocanohca tinare. Tōpu to cohārina tuaro tii, cahyaa mehne bahca dihoahca —ni yahuha Jesu.

¹³Tīre ā ni tuhsu, surara puhtore ō sehe niha:

—Tjuahga mu ya wuhupu. Muhure dahra cohtariro yuhdūrohca. “Potocāta yuhdūrohca”, ni mu tuhoturiro seheta yuhdūrohca —niha Jesu.

To ā nino watoilta tiore dahra cohtariro sehe noa tuhsu.

Pedro marechonore dohatiricore yuhdoha Jesu

(Mr 1.29-31; Lc 4.38-39)

¹⁴Baharo Jesu Pedro ya wuhupu su, Pedro marechono dohatichu nūha tiro. Juaro tichu cama bui coāha ticoro. ¹⁵To ā jichu nūtjiāhno to wamomacare nā payoha. To ā nā payochuta juaro surua wahaha. Suruchu tuhoturo ticoro sehe wahcārūca, tinare chuare payoha.

Jesu payu dohatiinare yuhdoha

(Mr 1.32-34; Lc 4.40-41)

¹⁶Ā yoa nāmichahapu payu watia ti sāanohrinare masa na wihiha Jesu cahapu. Ti ā na wihihu nūno cū tahata to waha dutichu watia wahaa wahaha. Tuhsu, jipihtina dohatiina ti na surinare ti dohatiare cohā pahñoha Jesu. Ā jia noaa wahaha tina. ¹⁷Āta yoaha tiro panopu macariro Cohamacu yare yahu muhtariro Isaia cjiro to niriro seheta. Ō sehe ni joaa tiha: “Mari dohatiare yuhdonocanohca tiro. Mari duti tiare cohānocanohca”, ni joaa tiha Isaia cjiro Jasure.

Cāina Jesu mehne waha duamaha

(Lc 9.57-62)

¹⁸Jesu payu masa to cahai ti jichu nūno:

—Sie coapu basa pahājihna —niha.

¹⁹Ti pahāhto pano judio masare buheriro Jesu cahapu su, ō sehe niha:

—Buheriro, muhu mehne waha duaja nohoi mu waharoi —niha.

²⁰Jesu ō sehe ni yūhtiha:

—Cāina macaroca macaina wahiquina ti copari cjuara. Minichahca cūhu ti suhti cjuara. Yuhu masuno Cohamacu warocariro sehe yu carīri wuhu

maeraja. (Ã jina yuhũ mehne tana ñano yuhdũnahca mũa) —ni yũhtiha Jesu.

²¹Ã yoa paio Jesu buheriro õ sehe niha:

—Puhtoro, yũ pũcu to yariachũ yasinii wahaihtja. Ã ya tuhsũ pinihta muhũ mehne wahaihtja —niha tiro Jesure.

²²Jesu õ sehe ni yũhtiha:

—Yũhũre cahmaeraina yariaina yoaro seheta jira. Tina sehe yariainare yajaro. Ã jicu muhũ sehe yuhũ mehne macariro cjihto taga —niha tiro.

Jesu wihnonore yũsũ dutiha

(Mr 4.35-41; Lc 8.22-25)

²³Ã ni tuhsũ Jesu to jiriapũ dohoriapũ samuha. Ã jia to buheina cũhũ tiro mehne waha, samuha. ²⁴Tĩ bucu-pariropũ ti pahãchũ waro wihnono tuaro taha. Ã jia pahcõri dohoriare mionocamaha. Ã wihnono wãpachũta Jesu sehe carĩno niha. ²⁵To ã wahachũ ñua tina tirore wahcõha. Wahcõ õ sehe niha:

—Puhtoro, yũhdoga. Mari mini yariana tana nija —niha tina.

²⁶Ti ã nichũ Jesu õ sehe ni yũhtiha:

—¿Dohse jiro baro cuimacanocana nijari mũa? Yũhũre wacũ tuaeraina jira mũa —niha Jesu tinare. Ã ninota wahcãrucũ sũ, wihnonore pahcõri cũhũre “Yũsua wahaga”, niha. To ã nichũ wihnono yũhdũa wahaha. Ã jia pahcõri cũhũ yũsũ boraahã wahaha. ²⁷To ã yoachũ ñũ cũaa, õ sehe niha tina:

—¿Cue, dohse jiro baro masũno jijari ahriro? Ahri wihnono, pahcõri cũhũ to dutichũ yuhdũrucaerara tirore —niha tina.

Watĩare cohã wioha Jesu

(Mr 5.1-20; Lc 8.26-39)

²⁸Tinare ã wahari baharo pahã sũ, Gadara macaina ya yahpapũ suha. Tõpũ ti sũchũ puaro mũa masa copari watopũ jiina Jesure piti bocaha. Tina watĩa ti sãanohorina cuaina jiha. Ã jiro tõpũ masa ti wahamahnoeno jiha. ²⁹Tirore piti boca, õ sehe ni saũurucuha:

—¿Muhũ Cohamacũ macũno dohse yoai tai tajari muhũ sã cahapũre? ¿Sãre Cohamacũ to buhiri dahrehti pja to jierapachũta sãre buhiri dahrei tai nijari muhũ? —ni saũurucuha tina.

³⁰Tõ cahai payũ yesea maca chũa niha. ³¹Tinare ñua, watĩa õ sehe niha Jesure:

—Sãre cohã wiocũ sina yesea cahapũ yeseare sãa dutiga sãre —ni siniha watĩa Jesure.

³²—Jai, wahaga —niha Jesu.

To ã nichũ watĩa puaro masa mehne jirina cjiri waha, yesea ti pjacuripũ sãaha. Ã yoa tinare ti sãari baharo, yesea pari cunũpũ mũroca buha, bucu-pariropũ bora ñoja, mini yaria pihtia wahaha.

³³Ti ã wahachũ ñua yeseare ñũ wihboina sehe cui, mũrocaa wahaha. Macapũ sũ, yesea ti minirire yahu site pahñoha. Watĩa ti sãanohrinare Jesu to cohã wiori cũhũre yahu pahñoha tina. ³⁴Ã ti yahu siteri baharo tĩ maca macaina jipihtina Jesure ñua taha. Ã jia tirore ñua, tuaro mehne waha dutiha tirore.

Pjacu buharirore noariro wahachu yoaha Jesu

(Mr 2.1-12; Lc 5.17-26)

9 ¹ Ñ ti waha dutiri baharo Jesu dohoriapu samu, bucupariropu pahã, to bucuari macapu suha. ² Tópu paina pjacu buharirore to coãri cahsaro mehne yo wua wihia Jesu cahai: “Jesu ahrirore to dohatiare yuhduchu yoa-rohca”, ni tuhoutuha tina. Ti ã ni tuhoutuha masino dohatiriore ò sehe ni yahuha Jesu:

—Macu, wahchega muhu. Ñ nano mu buhiri tiare cohã tuhsuja yuhu —niha tiro.

³ To ã nichu tuhoa cãina mari judio masare buheina ò sehe ni tuhutumaha: “Ahriro wiho jiriore ã nino, ‘Cohamacu jija’, nino nina. Ñ nino Cohamacure ñano nino nina”, ni tuhutumaha tina. ⁴ Ti ã ni tuhoutuha masino, ò sehe niha Jesu:

—¿Dohseana ã ñano tuhutuari musa? ⁵ “Ñ nano mu buhiri tiare cohã tuhsuja”, yu nichu, “Mahñoriore jira”, nina musa noano masierapanahta. “Wahcãruca, wahaga”, yu nichu yu niri potocã jia jichu dóihta musa masinahca. ⁶ Yuhu masuno Cohamacu warocariro ahri yahpai masa ti ñano buhiri tiare cohã masija yuhu. Masa ti ñano buhiri tiare cohãhtiro cjihtore cüre Cohamacu yuhure. Yu ã cohãire musa masihtu sehe ò sehetu yoa ñoihtja masa ñuhti cjihtire —niha Jesu.

Tinare ã ninota, pjacu buharirore ò sehe niha:

—Wahcãrucaga. Mu coãri cahsarore na wahcãga mu ya wuhupu —niha tiore.

⁷ To ã nichu tuhoru pjacu buhariro wahcãrucu su, to ya wuhupu tjuaa wahaha. ⁸ Masa to ã wahachu ñua cuiha. Ñ yoa Jesure Cohamacu to tuare to wachu ñua masa Cohamacure ño payo, noano durucuha.

Jesu Mateore pjiha

(Mr 2.13-17; Lc 5.27-32)

⁹ Ti ã yoari baharo Jesu tópu jiriore ta, yuhure Mateore boca wihire. Puhtoa ya cjihtire masare wapa na cohtariro jimai. Ñ jicu tí pjare yu dahrari tahtiapu dujii. Tói yu dujichu ñuno ò sehe nire yuhure:

—Yuhu mehne macariro cjihto taga muhu —nire Jesu yuhure.

To ã nichu tuhocu wahcãruca tiro mehne wahai.

¹⁰ Baharo ya wuhupu Jesu cühu chua tare. Payu puhtoa ya cjihtire wapa na cohtaina, “Ñano yoaina”, ti niina cühu sã mehneta chure. ¹¹ Tina mehne sã chuchu ñua, fariseo curua macaina sãre Jesu buheinare ò sehe nire:

—¿Dohsearo musare buheriro wapa na cohtaina mehne, ñano yoaina mehne chujari? —nire tina sãre to buheinare.

¹²⁻¹³ Ti ã nichu tuhoru Jesu sehe piti dahre buhea mehne yuhtire:

—Dohatieraina duhturure macaerara. Dohatiina dihta duhturure macana. Ñaare yoaina dohatiina yoaro sehe jira. Ñ jicu ñaare yoaina dihtare ti ñaare ti tuhutumari cjiire duhu, noa sehere ti tuhutu cohtotachu yoai tai nii yuhu. Ti basi “Noaina jija sã”, ni tuhutuina barore yahui tai nierahi. Cohamacu to nirire ti joarire masiga musa. “Wahiquinare musa wajã, jũ muoa mehne yuhure musa ño payochu cahmaeraja. Painare musa pja ñuchu sehere

cahmaja”, ni joaha. Ahri to joari to dohse niare masiga musa. Tíre noano buhe namona wahaga —nire Jesu fariseo curua macainare.

Chu duhuare sinituha João buheina Jesure

(Mr 2.18-22; Lc 5.33-39)

¹⁴Baharo João masare bautisariro to buheina Jesu cahapu su, ô sehe ni siniture:

—Sã João buheina sehe Cohamacure ño payona tana, chu duhuja. Fariseo curua macaina cûhu âta chu duhura. ¿Dohse yoaa mu buheina sehe chu duhuerajari? —nire tina Jesure.

¹⁵Jesu to tuhutua mehne piti dahre buhero taro tinare ô sehe ni yũtire:

—Ô sehe jira tí: Wamomaca duhteropu ti pjírocaina wamomaca duhteriro mehne jia, chu duhu masierara. Tó seheta yu buheina cûhu yuhú mehne jia, chu duhu masierara. Yuhú wamomaca duhteriro yoaro sehe jija. Wamomaca duhteriro bose numu to yoachú tiro mehne macaina cahyaa mehne jierara. Á jia chu duhuina jierara. Yu Pucu Cohamacu yuhure to naari baharo pinihtare yu buheina mehne jisi yuhú. Á jia tí pjaputa yu buheina cûhu chu duhuahca —ni yũtire Jesu.

¹⁶Panopu macaa buhea wahma buhea mehne ti buhe more duachu ñuno ô sehe ni namore Jesu tinare piti dahre buhero:

—Ne wahma cahsaro suhtiro cahsaro mehne munano suhtirore sere ñno cahmaerara. Á yoachú wahma cahsaro mari cosari baharo munano suhtirore waja cahmachu, pjibiario tuhnuču yoara. (Ahri yoaro sehe ni, muna buhea wahma buhea mehne piti dahre buheraro cahmana.) ¹⁷Á jina ne se co bisia core wahi-qui-ro cahsaro wajuru mehne muna wajuru mehne posaeraro cahmana. Á yoachú se co bisia pahmoapu muna wajurure tuhrēnocahna. To tuhnuču se co cûhu, wajuru cûhu cohōa wahara. Á jina se co wahma core wahma wajurupu posaro cahmana. Á yoachú se co cohōeraa, wajuru cûhu cohōerara. (Tó seheta wahma buhea muna buhea mehne buhe moreraro cahmana) —ni yahure Jesu tinare.

Jairo maconore noaricoro yoa, cahã ñuricoro cûhure noaricoro yoaha Jesu

(Mr 5.21-43; Lc 8.40-56)

¹⁸To ã ni yahuro watoi judio masa mari buheri wuhú puhtoro Jesu cahapu wihire. Wihi, na tuhcuca caha su, ô sehe nire:

—Yu maco yoatapu yariaa wahahre. Tícorore mu wamomacare duhu payoi taga. Mu ã yoachú masanohca —nire tiro Jesure.

¹⁹To ã nichu tuhoro Jesu wahcârúca tiro mehne wahare. Sã to buheina cûhu wahai. ²⁰Sã mahai waharucuchú tói numino ã cahã ñurucuricoro Jesu baharo buhusehei ta, to suhtiro sohtoare ñaha ñuha. Doce cahmari waro dachoripe cahã ñurucuricoro jiha. ²¹Ô sehe ni tuhutuha ticoro ã yoaro: “To suhtirore ñaha ñuco, noaricoro wahacohca”, ni tuhutuha ticoro. ²²To ã yoachú masino Jesu majarerucu su, tícorore ô sehe nire:

—Maco, wahchega muhu. Mu yuhure wacú tuua mehne noaricoro tjuara muhu mipure —nire tiro.

To ã nichuta noaa wahare ticoro.

²³Á yoa tuhsu Jesu puhtoro ya wuhupu sure. Sãa suro, ñahacaha tiinare teneniaca yoaro sehe jiriare putiinare ñure. Payu masa ti ñano bisichu cûhure tuhore tiro. ²⁴Ti ã nichu tuhoro masare ô sehe nire:

—Wijaahga musa. Yariaerari jira ticoro. Carīno nina —nire tinare.

To ā nichu tuhoa, “Ā nimacanocano nina ahriro”, nia masa bujare tireore.
²⁵ Ā jiro wuhu puhichapure masare to wio pahñori baharo yariaricoro cahapu su, to wamomacare ñahaha. To ā ñahachu masa caha su, wahcārucu suha ticoro. ²⁶ To ā yoirire tuhoa, tó macaina masa jipihtina yahu sitere.

Puaro capari bajuerainare ñuchu yoaha Jesu

²⁷ Ā yoaro Jesu tói jiro to wahachu, puaro capari bajueraina tireore pisu nuna tire: —Davi panamino masare yuhdohtiro, säre pja ñuga mahu —ni sañurucure tina.

²⁸ Ti ā nichuta Jesu pa wuhupu säre. To ā sächu masia capari bajueraina to cahapu sãa wahare. Ti ā sãa suchu ñuno tiro sehe siniture tinare:

—“Marine ñuchu yorohca tiro”, ñni tuhutujari musa yuhure? —nire tiro. —Puhtoro, äta ni tuhutuja sã —ni yuhtire tina.

²⁹ Ti ā nichuta ti caparire ña payore. Ā ña payorota õ sehe nire:

—Yuhure “Ā yorohca”, musa ni tuhoturiro seheta ā yoaja —nire Jesu.

³⁰ To ā nichuta ti capari sehe noaa wahare. Ā yoa Jesu õ sehe nire tinare:

—Ahri yu õ sehe yoirire painare ne yahuena tjiga —nire.

³¹ To ā nipachuta waha, tói jiinare yahu sitere tina to ā yoirire.

Durucuerarirore durucuchu yoaha Jesu

³² Tí wuhure ti wijaachu waro cūiro durucuerarirore na tare masa. Watīno tiro mehne jiro tireore durucuerachu yoaha. ³³ Ti na suchu ñuno watīnore Jesu cohã wiore. To ā cohã wiochu watīno to sãanohriro cjiro sehe durucua wahare. To ā yoachu ñua jipihtina cua pihtiare.

—Ne, ahri yaha Israe yahpapore õ sehe yoaare ñuera tih mari —ni durucure tina ti basi.

³⁴ Fariseo curua macaina sehe soro ni durucure:

—Watīa puhtoro to tuua mehne watīare cohãna ahriro —ni durucure tina.

Masare pja ñuha Jesu

³⁵ Ā yoa jipihtia macari tói jia macaricäre, bujua macari cūhure buhe tinino wahare Jesu. Noaa buheare judio masa mari buhea wuhusepu buhero wahare tiro. Ā jiro puhtoro Cohamacu to suho jiltore yahure. Jipihtia dohatia cūhure tó macainare yuhdore tiro. ³⁶ Masa payu ñano yuhduina, pjacuoro wahaina ti jichu ñuno Jesu tinare pja ñure. Tina oveja pua marieina yoaro sehe ti jichu ñuno Jesu tuaro pja ñure tinare. ³⁷ Ā jiro õ sehe nire tiro säre to buheinare, piti dahre buhero:

—Yo payu ti bucua tuhsuchu payu jichu dahraa pjíro jira. Wiho mejeta dahraina sehe mahainacã jira. (Tó seheta noaa buheare tuhohtina payu jichu pjíro jira mari dahraa. To ā jipachuta mahainacã dahrari masa yoaro seheta noaa buheare buhehtina cūhu mahainacã jira.) ³⁸ Ā jina noaa buheare buhehtinare painare to warocahtore siniga Cohamacure —nire Jesu.

Jesu doce waro bese dapoha to warocahtinare

(Mr 3.13-19; Lc 6.12-16)

10 ¹ Baharo doce säre to buheinare Jesu pjiroca, tuaare cüre säre. Watīare sã cohã masihtti cjihtire jipihtia dohatiare sã cohã masihtti cjihtire cüre säre.

² Õ sehe wama tii sã Jesu to bese cūrīna: Simo jire. Tiroreta Pedro ni pisure Jesu. Simo bahuro Andre cūhū jire. Santiago cūhū to bahuro João mehne jire. Tina Santiago cūhū pucuro Zebedeo wama tire. ³ Felipe, Bartolomé, Toma, yūhū Mateo jii sã. Yūhū sehe puhtoā ya cjihtire masare wapa na coh-tariro jimai. Sã mehne pairo Santiago jire. Tiro sehe Alfeo macano jire. Ā jiro Tadeo cūhū jire. ⁴ Simo cananeo ya curua macariro cjiro, Juda Iscariote cūhū jire. Juda sehe Jesure ñu tuhtiinare ñohtiro jire.

Jesu to buheinare buhe dutiro warocaha

(Mr 6.7-13; Lc 9.1-6)

⁵ Ā yoa sãre doce to buheinare warocaro, “Õ sehe musa yoanahca”, ni yahu quihõre sãre Jesu:

—Judio masa jieraina cahapure wahaena tjiga. Ne Samaria yahpai jia macaripu cūhure wahaena tjiga. ⁶ Israe yahpa macaina cahapu sehere wahaga. Tina oveja peri wisia wahaina yoaro sehe Cohamacure masieraina jira. ⁷ “Muano macariro to suho jihto mahanocā duhsara”, ni buhega tinare. ⁸ Ā jina cami bucū baainare, paye payu soro jia dohatiare cjuaina cūhure noaina yoaga. Yariainare masoga. Watia masare ti sāanohorinare cohā wioga tinare. Musare ā wanocai nija ahri tuaare. Ā jina musa cūhū yu ā wanocariro seheta masare noaina ā yoanocahga.

⁹ Musa wahana niñerure ne naaena tjiga. ¹⁰ Ne musa wajure, puaro camisare, pua wahpa dahpo suhtire, musa tjua yucu cūhure naaena tjiga. Musa sāano dihtare sãa wahcāga. Paye suhtire naaena tjiga. Musa buhena waharopu jiina tina sehe musare musa puhī cjihtire waahca. Āta waro cahmana tinare.

¹¹ Tí macaripu suna, ji coaro mehne carīnore warirore macaga. Ā jina tí wuhuihta tjuasiniga. Pu, coā wahanapu wijaahga tí wuhure. ¹² Ā jina wuhupu sãahna, “¿Jimajari musa?” niga tí wuhū macainare. ¹³ Musare noano ti cahmachu “Cohamacu mehne noano jiga musa”, niga tinare. Musare ti cahmaerachu, musa ā niborire niena tjiga. ¹⁴ Ā jina musare ti cahmaerachu, ti tuho duaerachu tí wuhure wijaahga. Wijaana, dahpo suhti macaa dihta pohcarire wajā site cūga musa tinare ti ya buhirire masichu yoana. Tí maca macaina musare ti cahmaerachu āta yoaga tina cūhure. ¹⁵ Potocā musare niita nija. Ahri dacho pihtichupure Sodoma macaina, Gomorra macaina cūhū tuaro buhiri tihtinata jira. Ti ā jipachuta tina yuhdoro musare cahmaeraina buhiri tihtina jiahca —ni yahure Jesu.

Jesu yainare paina ti ñano yoahcore yahuha Jesu

¹⁶ Ā ni tuhsu õ sehe ni namore:

—Yuhure tuhoga musa. Oveja yoaro sehe jiinare musare ñaina watoi warocai nija. Tina ñaina macaroca macaina yaya suaina yoaro sehe jira. Ā jina musa sehe paina wahiquina wacū masiina yoaro sehe jiga. Ā jiina jipanahta buja yoaro sehe ne suaeraina jiga musa. ¹⁷ Noano yoaga musa. Masa musare puhtoare waahca. Tuhsu Judio masa mari buhea wuhusepu cjapeahca musare. ¹⁸ Ā jia yu yaina musa jiri buhiri macari macaina puhtoā cahapu ti bui jiina puhtoā cahapu cūhure naahca musare. Ā jina musare tópu ti naachu tinare judio masa jieraina puhtoā cūhure noaa buheare buhenahca musa. ¹⁹⁻²⁰ Musare puhtoare ti wachu tinare

musa nihtire “Cue, masieraboca”, ni tuhoutuena tjiga. Musare ti sinituchuta musa nihtire masinahca. Ā masina tinare yahuna musa tīre musa mu saro durucuna nisi. Cohamacu sehe musa Pucu to Espíritu mehne musare durucuchu yorohca.

²¹ Tí pjare ti wahmisuma ti bahanare wajā dutia waahca puhtoare yu yaina ti jiri buhiri. Ti pucsuma ti pohnare wajā dutia waahca puhtoare. Ti pohna sehe ti pucsumare wajā dutia waahca puhtoare. ²² Jipihtina masa sehe yu yaina musa jiri buhiri musare ñu tuhtiahca. Ti ā yoapachuta ahri yahpai musa catisinino puro musare ti ñano yoirire cūno pjana yuhure, yu buhea cūhure duhuerana, yuhdunahca musa. ²³ Cūmacai musare ti ñano yoachū pa macapū duhti wahcāga. Potocā musare niita nija. Israe yahpai jia macarine jipihtia tí macaripū musa duhti wahcāhto pano, yuhū masuno Cohamacu warocariro ahri yahpapū tjua taihtja.

²⁴ Ne cūiro buheriro tirore yahuriro buipū jierara. Cahamacuno cūhu to puhtoro bui cure jierara. ²⁵ Ā jiro ō sehe tuhuturo cahmana buherirore: “Yuhure buheriro yoro sehetā jiihtja”, ni tuhuturo cahmana. Cahamacuno cūhure āta ni tuhuturo cahmana. “Yu puhtoro yoro sehetā jiihtja”, ni tuhuturo cahmana. (“To bui jiihtja. Ā jicu yu puhtoro to ñano yuhduriro sehetā ñano yuhdusi yuhū sehe”, ni tuhutueraro cahmana.) Yuhū sehe wuhū puro yoro sehe jija. Musā sehe tí wuhū dahraina yoro sehe jira. Ā jia masa yuhure “Beelzebú jira”, ni yahusā, musa cūhure yu yainare ñano ni durucuahca tina —ni yahure Jesu.

“¿Diro barore cuichu noajari?” ni yahuha Jesu

(Lc 12.2-7)

²⁶ Ā ni tuhsū ō sehe ni namore:

—Ā jina musare ñano yoinare cuiena tjiga. Masa ti ya sāari cjirire baharo paina masiahca. Ā jia ti nuori cjiri cūhure paina masiahca. ²⁷ Musare yaroča yu yahuri cjirire payu masa watōi buhe turiaga musa. ²⁸ Masunore wajāina to pjacu dihtare wajāna. To yajeripohna yariaerara. Ā jina musare wajā duainare cuiena tjiga. Cohamacu sehere cuiga. Tiro musa pjacurire, musa yajeri-pohnari cūhure pichacapū cohā masina. Ā jina tiro sehere cui, yuhtiga musa.

²⁹ Puario siripia wapa mariahna. Ti ā wapa mariapachuta cūirocāre Cohamacu ne boerara. Cohamacu to dutierachu ne yarierara tirocā. ³⁰ Ā jiro musa pjoarire ne cū pjoada duhsaro marieno masi pahñona Cohamacu. Tó sehetā musa jia tia cūhure masi pahñona Cohamacu. Ā masino musare ñu wihborucura. ³¹ Siripiare to cahīno yuhdoro, musa sehere cahīna Cohamacu. Ā jina pjīro tuhoutuena tjiga musa —ni yahure Jesu.

Jesure musa wacū tuari cjirire yahuga masare

(Lc 12.8-9)

³² Ā jiro tinare ō sehe ni yahu namore:

—Cūiro “Jesu yairo jija”, masare to ni yahuchū yuhū cūhu tirore “Yu yairo jira”, ni yahuihtja yu Pucure muano macarirore. ³³ Wiho mejeta cūiro “Jesu yairo jieraja”, masare to nichū yuhū cūhu “Yu yairo jierara tiro”, ni yahuihtja yu Pucure —ni yahure Jesu.

Jesu masare tju wachu yoara

(Lc 12.51-53; 14.26-27)

³⁴ Ā ni tuhsū ō sehe ni yahu namore:

—¿Dohse ni tuhotujari musa yuhure? “Tiro masare to buheri baharo paina tinare ñu tuhtisi”, ¿ni tuhotujari musa? Ñ jierara. Masare yu buheri baharo cãina yu yare tuhoahca. Paina sehe tinare ñu tuhtiahca. Cãno potori waro jisi masa. ³⁵Bucuna yu buheare ti tuhori buhiri ti pohna yu buheare cahmaeraa, tinare ñu tuhtiahca. Bucu numia yu buheare ti tuhori buhiri ti pohna numia yu buheare cahmaeraa, tinare ñu tuhtiahca. Ti marechosanumia yu buheare ti tuhori buhiri ti macu namosãnumia yu buheare cahmaeraa, tinare ñu tuhtiahca. ³⁶Ñ jia masa ti coyeare ñu tuhtiina jiahca.

³⁷Yuhure ti cahĩboriro yuhdoro ti pucsuma sehere cahĩ yuhdurũcaa yu yaina jisi tina. Yuhure ti cahĩboriro yuhdoro ti pohna sehere cahĩ yuhdurũcaa yu yaina jisi tina. ³⁸Ñ jia paina crusapũ yu yariahto seheta yu yaina ti jiri buhiri ñano yuhduahca tina cũhu. Tó sehe ñano yuhdu duaeraina yu yaina jisi tina. ³⁹Masa yuhure wacũno marieno ti mu sũro yoaa, pichacapũ wahaahca tina. Ñ jia yu yare ã yoarucua jipihtia dachoripe yuhũ mehne jiru-cuahca tina —ni yahure Jesu.

Mari wapatahtore yahuha Jesu

(Mr 9.41)

⁴⁰Ñ ni tuhsũ õ sehe ni yahu namore:

—Musare yu yainare cũiro noano cahmano, yuhũ cũhure cahmano nina tiro. Ñ yoa tiro yuhure noano cahmariro yuhure warocariro cũhure cahmano nina. ⁴¹Ñ jiro Cohamacu yare yahuriro wapatarohca. Tiore noano yorohca Cohamacu. Ñ jiro to yare yahuriro to jichũ ñũno paio tiore noano cahmano, yahuriro yoro seheta wapatarohca tiro cũhu. Ñ yoa paio noano yoriro wapatarohca. Tuhsũ, noano yoriro to jichũ ñũno paio sehe tiore noano cahmano noano yoriro yoro sehe wapatarohca tiro cũhu. ⁴²Yu yairo cũiro to jichũ ñũa, wiho jiro to jipachuta dohse jiina tiore core ti sihõchũ mahanocã ti wapachuta potocãta tinare noano yorohca Cohamacu —ni yahure Jesu.

João masare bautisariro to buheinare Jesure sinitu ñu dutiro warocaha

(Lc 7.18-35)

11 ¹Sãre to buheinare to ã ni yahuri baharo tó cahai jia macaripũ buhero wahare Jesu.

²Ñ yoa to yoirire João peresui jiro tuhorocaha. Ñ tuhoru João to buheinare Jesure sinitu ñu dutiro warocaha. ³Ñ jia Jesu cahapũ sũ, sinitu ñũre tina João buheina.

—¿João “Yu baharo paio tarohca”, to niriro tjijari muhu? ¿To niriro mu jierachũ paioire cohtanahcari sã? —ni sinitu ñũre tina sehe Jesure.

⁴Ti ã nichũ tuhoru Jesu õ sehe ni yuhtire:

—Mipure musa tuhorire, musa ñũrre Joãoire yahuna wahaga: ⁵“Capari bajueraina ñũna. Tini masieraina tinina. Cami bucũ baina noaina wahara. Tuho bocaeraina tuhoa wahara. Yariaina masaa wahara. Tina jipihtinare noaina wahachũ yoahi yuhũ. Tuhsũ, pjacũoinare noaa buheare yahuja. ⁶Yuhure tuhoriro ‘Potocã tjira’, niriro tiro wahcheriro jira” ni, Joãoire yahuna wahaga —nire Jesu.

⁷João buheina ti wahari baharo, Jesu sehe João to jia tiare yahu dũcare payũ masare:

—Masa marienopu João cahapu suna, tjare wihnono to wāroca cohtotachu yoariro seheta to buheare cohtota mujarirore nuna suerare musa. ⁸ “Noaa suhti tirirore nuna wahajihna”, nierare musa João cahapu masa marienopu wahana. Noaa suhti tiina wapa bujuare cjuaina puhto ya wuhusepu jira. ⁹ Masa marienopu suna Cohamacu yare yahu muhtarirore nuna sure musa. Potocā tjira. João Cohamacu yare yahu muhtarirore jira. Paina Cohamacu yare yahu muhtaina yuhdoro jiro jira tiro. ¹⁰ Panopu Cohamacu yare ti joari pui Joāore ō sehe ni yahu joaa tiha:

“Cohamacu to macunore ō sehe niha: ‘Mu pano muhure yahuyuhtirore warocai nija’, niha”,

ni joaa tiha panopure Joāore. ¹¹ Musare potocā niita nija. Paina jipihtina bui jira João bautisariro. Ahri turupure to ā jipachuta muano macariro puhtoro to suho jiropure jipihtina docapu jiro pinihta João bui jira.

¹² João masare bautisariro to buhe, bautisa ducachu payu masa muano macariro puhtoro to suho jirore pihtichu yoa duaa, ti mu sūro cahmache, tíre yoa duamana. ¹³ Cohamacu yare yahu muhtaina ti joari cjirore, Cohamacu Moise cjirore to cūri cjiropu cūhure buhena puhtoro Cohamacu to suho jihtore masija mari. João cūhu tíreta yahure. ¹⁴ “Elia tarohca”, panopu ti niriro cjirota jira João sehe. Panopu macaina ti nirire “Potocā tjira”, ni duana João ti ā niriro cjiro to jichu masinahca musa. ¹⁵ Noano tuhoga musa ahrire.

¹⁶ “Mipu macaina masa yabaina yoaro sehe jijari tina, musa tuhutuchu? Tina macanacā yoaro sehe jira. Paina ti cahmano sehe ti yoaerachu tó wahae-rara tinacāre. Pache duaropu pape dujia, ō sehe ni pisurucura tinacā ti basi: ¹⁷ “Musa basahti cjihtire sā putipemahi. ¿Dohseana musa basaerari sā tíre putipechu? Sā tuaro nahacaha tiipe, sañurucumahi. ¿Musa sehe dohseana sā mehne tiiperari?” nirucuina yoaro seheta jira mipu macaina cūhu. Mipu macaina ti cahmano seheta sā yoaerachu nua tó wahae-rara tinare. ¹⁸ Tina yoaro sehe yoana ō sehe yoara musa mipu macaina. João bautisariro Cohamacu ño payoro taro chu duhuro vinore sihnierare. To ā sihnierachu nuna “Watīno to sāano-hriro, tuho masierariro jira”, nimare musa tiro sehere. ¹⁹ Yuhu masuno Cohamacu warocariro jicu yuhu chu, sihnija. Yu ā yoaachu nuna ō sehe nina musa yuhu sehere: “Nuga. Ahriro pjíro chūriro, cahariro jira. Wapa na cohtaina, ñano yoaina cūhu ti piti tiriro jira ahriro”, nina musa yuhure. (Ā nina macanacā yoaro sehe durucuina jira musa. Musa cahmano sehe sā yoaerachu tó wahae-rara musare. Ne sahsaerara musa.) Ā masierapanahta sā yoirire nuna, Cohamacu masiare sā cjuachu masinahca musa —nire Jesu tinare.

Ti ñaare cahyaeraina ya macari macainare tuhtiha Jesu

(Lc 10.13-15)

²⁰ Baharo macari macainare tuhtire Jesu. Tí macarine paye macari yuhdoro Cohamacu tuua mehne yoa ñomare tiro. To ā yoa ñopachuta ti ñaare tuhutumarire duhuerasinire tina. Ā jiro ō sehe ni tuhtire tinare tiro:

²¹ —Corazī macaina, musa ñano yuhdunahca. Betsaida macaina, musa cūhu ñano yuhdunahca. Musa ya macaripure Cohamacu tuua mehne yoa ñomahi. Tiro wama tiri macare, Sidō wama tiri maca cūhure to tuua mehne yu yoa ñochu nua panopu tó macaina sehe ti ñaare cahyaboa. Ā yoa ti ñaare

tuhotumari cjiire tuhutu cohtotaboa. Cahyaa suhtire sãa, niti pohcare tina bui dahra site payoboa ti ñaa cahyaare ñoa. ²²Musare niita nija. Buhiri dahrehti dacho jichu Cohamacu Tiro macaina, Sidõ macaina yuhdoro ñaina musa jiri buhiri musare ñano waro buhiri dahrerohca tiro. ²³Capernau macaina, musa mu sũro muanopu waha duamana. Musare Cohamacu pichacapu cohãnohca. Musa ya macapu Cohamacu tuaa mehne yoa ñomahi. Musa yuhure tuhoerare. Sodoma wama tiri macare Cohamacu tuaa mehne yu yoa ñochu ti maca sehe mipu jisinihoa. ²⁴Musare niita nija. Buhiri dahrehti dacho jichu Cohamacu Sodoma macainare to yoriro yuhdoro, musa sehere musa ñaa buhiri ñabiario buhiri dahrerohca —nire Jesu ti macari macainare.

“Yu cahapu sona taga”, niha Jesu

(Lc 10.21-22)

²⁵Ti pjare õ sehe nire Jesu to Pucuro mehne durucuro:

—Yu Pucu, muhu muano macaina bui puhtoro, ahri yahpa macaina bui puhtoro jira. Ahri mu buheare “Noano masiina jija sã”, niinare masichu yoerare muhu. Buhe pahñoeraina sehere mu yare masichu yoare muhu. Mu ã yoachũ, “Noana”, nija yuhu muhure. ²⁶Ã tjira. Tina sehere ti masichu cahmare muhu —nire Jesu to Pucurore.

²⁷Ã ni tuhsu, masare õ sehe ni yahu namore:

—Yu Pucu jipihtiare yuhure ware. Tiro dihta yuhure noano masina. Ã jina sã dihta yuhu yu masi dutiina mehne yu Pucure masija sã. ²⁸Musa ñano buhiri tia nucua yoaro sehe jira. Nucua muna musa tahrino sehetã ñano buhiri tiare pumea wahara musa. Ã pumeina jina yuhure cahmaga musa. Musare sochu yoihtja. Musa ñaa yoare duhuchũ yoihtja. ²⁹Yu dutiare yoaga. Yu yare noano masiga. Yuhu niji siaro yoriro jija. Yu ã jiriro jichu yu yare noano masiga musa. Ã yoa yuhu mehne sogã musa. Ã sona noano yajeripohna tinahca musa. ³⁰Yu yare musa yoachũ mijoerara. Ã yoa musa muri cjiiri ti nucueraro sehetã yuhu sehe musa bihoro purota yoa dutija musare —nire Jesu.

Judio masa ti sori dachoi trigo parorire pahaha Jesu buheina

(Mr 2.23-28; Lc 6.1-5)

12 ¹Mahanocã to ã ni buheri baharo Sabado jichu sã Jesu mehne trigo wesepu sui. Sã to buheina juca baana, trigo parorire paha, chu tuhsu yuhdu wahcã sã. ²Sã ã yoachũ ñua, fariseo curua macaina Jesure õ sehe nire:

—Tuhosiniga sãre. ¿Dohse yoa tina Sabado mari sori numu to jipachuta dahrajari, trigo parorire ã pahaa? Mari dutiare yuhdurucã nina —nire tina.

³⁻⁴Jesu yuhtire. “Yu buheina yuhdurucã nierare”, ni yahuro taro õ sehe ni yuhtire:

—Davi cjiro tiro mehne macaina mehne juca baaro Cohamacu wuhupu sãa, Cohamacu ya pãore chuha. Ti pãore sacerdotea dihtare chu dutira. Cohamacu dutiare ti joari pu painare ti pãore chu dutierara. ¿Davi cãhu tãre ti yoari cjiire Cohamacu joari pũpu buherari musa? (Ti pãore chũro Cohamacure yuhdurucaro nieraha. Michare ahri yaparire chua yu buheina cãhu Cohamacure yuhdurucã nierara.) ⁵Ã yoa Cohamacu wuhui dahraina sacerdotea

ne soerara mari soa nūmūrīne. Ñ soerapahta Cohamacu dutiare yūhdurūcaina jierara. ¿Tīre buherari musa Cohamacu Moise cjirore to cūri pūi? ⁶ Musare niita nija. Cohamacu wūhure ño payona tí wūhui dahraina ti soerachu ñupanahita “Noanohca”, nina musa. Tí wūhu yūhdoro yūhu sehere ño payoro cahmana. ⁷ Cohamacu yare ti joari pū ò sehe nina: “Wahiquinare wajā, jū mūoa mehne yūhure musa ño payochu cahmaeraja. Painare musa pja ñuchū sehere cahmaja yūhu”, nina to yare ti joari pū. To ã nirire musa noano tuhona yū buheinare tuhtieraboa musa. Tina tīre chua yūhdurūcaa nierare. Ñ jina tinare tuhtieraboa musa. ⁸ Yūhu masuno Cohamacu warocarīro ahri dacho Sabado dachore masa ti yoachtire yahurirota jicu puhtoro tjija —nire Jesu fariseo curua macainare.

Wamomaca buhariro quitī jira

(Mr 3.1-6; Lc 6.6-11)

⁹ To ã niri baharo waha, judio masa mari buheri wūhupū sui sã Jesu mehne. ¹⁰ Tóī wamomaca buhariro jire. Ñ jia fariseo curua macaina sehe Jesure yahusãa taa, tirore ò sehe ni siniture:

—Sabado dachoi mari sori dachoi masunore noariro yoa dutierara Cohamacu. ¿Ā tjijari mū tuhotuchū? —ni siniture tina.

¹¹ Jesu ò sehe ni yūhtire tinare:

—¿Musa yairo oveja Sabado jichū copapū to bora sãachū tirore na wioerabocari musa? Na wionahca musa. ¹² Oveja yūhdoro jira masuno sehe, Cohamacu to ñuchū. Ñ jiro Sabado jichū masunore yūhdochū noa nina —ni yūhtire Jesu tinare.

¹³ Ā ni tuhsū, wamomaca buharirore ò sehe nire:

—Mū wamomacare siōrocaga —nire tiro.

To ã nichū buhariro sehe siōroca, noari wamomaca wahare. ¹⁴ Ti sori nūmūi to ã yoachū ñua, fariseo curua macaina waha, ti basi ò sehe niha:

—¿Dohse yoa Jesure wajānahcari mari? —niha tina ti basi.

Cohamacu yare yahu mūhtariro panopū macariro Jesure yahuha

¹⁵ Jesu ti ã nirire masino, wahaa wahare. To ã wahachū payū masa tirore nūnū tire. Ti ã nūnū tichū ñuno tiro sehe jipihtina tina mehne macainare dohatiinare noaina wahachū yoare. ¹⁶ Ñ yoaro dohatiina cjirore tinare to yūhdorire painare yahu dutierare tiro. ¹⁷ Ñ dohatiinare noaina wahachū yoaro Cohamacu yare yahu mūhtariro Isaia cjiro panopū to ni joariro seheta yoaro nire Jesu. Ò sehe ni joa tiha Isaia:

¹⁸ “Ò sehe nina Cohamacu:

‘Ahrīro yū cahamacuno jira.

Tiro yū beseriro jira.

Tirore cahīja.

Ā jicu tiro mehne wahcheja.

Yū Espiriture tirore waihtja.

Ā jiro yū tuaa mehne jipihtina masare yū buheare yahurohca tiro.

¹⁹ Ñ yahuro tiro ne purīno mehne yahusi.

Ā yoa niji siaroca yahuriro jiro sañurucusi.

Tuhsū, maca macari mahai payū masa watōi tiro tuaro sañurucu yahusi.

²⁰ Wujacu o muquearacu suchu to nuhnuerachu yoaro seheta masa cūhure niji siaro dero yoarohca tiro.

Pjiroca jūri pichacare to yaeraro seheta masa cūhure noano yoarohca tiro.

Āta yoarucurohca tiro watīnore to yūhdurūcahto pano.

²¹ Ā jia payu masa tirore wacū tuaahca', nina Cohamacu',
ni joaa tiha Isaia.

“Jesu watīno tuaare cjuara”, ni yahusāha masa

(Mr 3.19-30; Lc 11.14-23; 12.10)

²² Cū dachoi watīno to cohtotarirore masa na tare Jesu cahapu. Tiro sehe watīno cjuaro durucu masierare. Tuhsu, capari ne űuerare. Ti ā na wihichu űu, noariro wahachu yoare Jesu tirore. To ā yochu watīno to cohtotariro cjiro űu, durucure. ²³ To ā wahachu űua, masa űu cuua wahare.

—ĴAhriro Davi cjiro panamino masare yūhdohtiro jijari? —nire tina ti basi.

²⁴ Jesu watīare to cohārire tuhoa fariseo curua macaina ō sehe ni tuhoture:

—Beelzebū watīa puhtoro to tuua mehne watīare cohāna Jesu —ni tuhoture tina.

²⁵ Ti ā ni tuhotuchu masino, Jesu quti mehne piti dahre yahure tinare:

—Watīno ya tuua mehne watīare cohāi nieraĵa. Cū yahpa macaina ti basi cahma wajāa, tí yahpa macaina yaria phtia wahaboa. Cū maca macaina ti basi cahmachea tí maca macaina waha phtia wahaboa. Cū wūhu macaina cūhu āta wahaboa. ²⁶ Ā jia Beelzebū watīa puhtoro sehe watīare cohāno, tina watīa ti basi cahmachea niboa. Ā jia tina cūhu waha phtia wahaboa. ²⁷ Ō sehe ni yahusāna musa. Musa mehne macaina cūhu watīare cohāna. ĴWatīno to tuua mehne watīare cohājari tina cūhu, musa űuchu? Ā cohāerara. Tīre masina musa. Yūhu cūhu watīno tuua mehne watīare cohāeraja. ²⁸ Ā jicu yūhu sehe watīare cohācu Cohamacu to Espīritu tuua mehne tinare cohāĵa. Yū ā cohāchu űūna ō sehe masiga musa: Cohamacu masa bui puhtoro ahri yahpapure ji tuhsura mipure.

²⁹ Ō seheta jira mari piti dahre buhechu: Tuariro ya wūhupu pairo sāa su yaca masierara. Tuarirore duhteraro to ya wūhupu sāa su yaca masierara. Tiore to duhteri baharo sāa su yaca masina —ni yahure Jesu. (Ā ni yahure watīnore to yūhdurucarire yahuro. Watīno tuariro to jipachuta Jesu tiore yūhdurucara watīare cohāno.)

Ā ni tuhsu ō sehe ni yahu namore Jesu:

³⁰ —Cūiro yūhure cahmaeraro, yūhure űu tuhtiriro jira. Cūiro yūhure yoadohoeraro, yūhure wapū tichu yoaro nina.

³¹ Ā jicu musare potocā niita nija yūhu. Jipihtia űaare masa ti yochu ti durucuchu cūhure Cohamacu bo masina. Ā boparota Espīritu Santore ti űano ni durucuchu tí pinine ne bosu. ³² Yūhure masuno Cohamacu warocarirore yūhure ti űano ni durucurire bo masina Cohamacu. Espīritu Santo sehere ti űano ni durucurire ne bosu Cohamacu. Mipure, phtiri dacho baharopu cūhure ti ā niri cjiire bosu tiro —ni buhere Jesu tinare.

Masa ti durucutare tūhona ti jia tiare masija mari

(Lc 6.43-45)

³³ Ā ni buhe tuhsu, piti dahre buhero ō sehe ni yahu namore tinare:

—Noadu yucucu noaare dicha tira. Ñaadu yucucu ñaare dicha tira. Yucucu dichare masina “Tü dichata jira”, ni masija mari. (Mari ã masino seheta masa ti durucuaare tũhona ti jia tiare masija mari.) ³⁴ Agãa ñima tiina yoaro sehe ñaina jira musa. Musa ñaina jina, noaare ni masierara musa. Mari wacũapũ mari tũhoturiro seheta mari duseroi wijara. ³⁵ Noariro noaare tũhotura. Æ jiro noaare durucura. Ñariro ñaare tũhotura. Æ jiro ñaare durucura. ³⁶ Musare niita nija. Noano tũhotu durucuina jiga musa. Noano durucuerana, buhiri dahrehti dacho jichũ musa ã nimacanocarire Cohamacũre yahu yũhdũnahca. ³⁷ Quihõno musa durucurire masino “Noaina jira”, ninohca Cohamacũ. Tuhsu, ñano musa durucurire masino “Ñaina jira”, ninohca tiro —nire Jesu tinare.

Masa ñaina Jesure Cohamacũ tuaa mehne yoa ño dutiha

(Mr 8.12; Lc 11.29-32)

³⁸ To ã niri baharo mari judio masare buheina, fariseo curua macaina cũhu tirore õ sehe nire:

—Buheriro, Cohamacũ warocararo jicu Cohamacũ tuaa mehne yoa ñoga sãre —nimare tina.

³⁹ Jesu õ sehe ni yũhtire:

—Mipũ macaina ñaina, Cohamacũre cahmaeraina Cohamacũ tuaa mehne yu yoa ñochũ ñũ duamana. Ti ã ñũ duapachũta Cohamacũ yare yahu muhtarirore Jona cjiro panopũ macarirore Cohamacũ to tuaa mehne to yoari dihtare yoa ñonohca masare. ⁴⁰ Jona tia dacho waro pjiriro wahi pjaro puhichapũ jiha. To ã wahariro seheta yũhũ cũhũ masũno Cohamacũ warocararo tia dacho waro masa copapũ jiihca. ⁴¹ Nĩnive macaina sehe Jona Cohamacũ yare to yahurire tũhoa ti ñaa yoarire cahya, Cohamacũ mehne macaina tjuaha. Æ tjuaina jia buhiri dahrehti dacho jichũ tina mipũ macainare ti ñaare tũhotumari cjirire duhuerainare “Ñaina jira”, ni yahusãahca. Jona cjiro tinare Cohamacũ yare to yahuchũ tũhoa noaare cahmaha tina sehe. Æ cahmaa noano yoaa niha mipũ macaina yũhdoro. Æ jia tina mipũ macainare “Ñaina jira”, ni yahusãahca. Musare niita nija. Mipũ musare yu buhea Jona cjiro to buheri yũhdoro jira. ⁴² Æ yoa buhiri dahrehti dacho jichũ puhtorocoro sur macaricoro panopũ macaricoro ducu, mipũ macainare “Ñaina jira”, ni yahusãnohca ticoro cũhũ. Ticoro Salomo panopũ macariro to masiare tũho duaro yoaropũ ahri yahpa pa buhusehepũ jiricoro Salomore tũhoro taha. Æ yoaro noano yoaro niha mipũ macaina yũhdoro. Æ jiro ticoro “Ñaina jira”, ni yahusãanohca mipũ macainare. Musare niita nija. Mipũ musare yu buhea to buheri yũhdoro jira —nire Jesu tinare.

Watĩno pari turi masũnore to sãari qũtire yahuha Jesu

(Lc 11.24-26)

⁴³ Æ ni tuhsũ, pari turi Jesu to tũhotua mehne õ sehe ni piti dahre buhere tinare:

—Watĩno masũnore cohtotararo cjiro waha, tiro co marieni yahpai tini, to jihto cjihtore macamaha. ⁴⁴ Æ bocaeraro, õ sehe ni tũhotuha tiro. “Masũno yu cohãriro cjiro mehneta pari turi jii wahaihtja”, ni tũhotuha tiro. Æ ni tũhoturo tiro tjuaa waha, to cohãriro cjiroreta bocaha. Æ to bocachũ masũno sehe noariro jimaha. ⁴⁵ Æ jiro watĩno paina siete watĩare to yũhdoro ñainare

pjiro wahaha. To ā pjichu tina jipihtina tiro mehne jiha. Masuno sehe tó pano cūiro watino to cohtotariro jiro, ñariro jimaha. Mipū sehere payu watia ti cohtotariro jiro, tó pano to jiro yuhdoro ña yuhduariro jiha. Mipū macaina Cohamacure masimarina tirore cohāa, tina cūhu ñaa yuhduina warota wahaahca —nire Jesu tinare.

Jesu coyey tiro mehne sūhūdu duaha

(Mr 3.31-35; Lc 8.19-21)

⁴⁶Masare to ā ni durucuro watoi to pocoro to bahana mehne sopacai ducu, tiro mehne sūhūdu duare. ⁴⁷Ā jiro cūiro Jesure ō sehe ni yahure:

—Mū poco mū bahana mehne sopacai ducura, mūhure sūhūdu duaa —nire.

⁴⁸To ā nichu tuhorro tirore yahurirore ō sehe nire Jesu tinare buhero taro:

—¿Noa jijari yu poco, yu bahana cūhu, musa ñuchu? —nire.

⁴⁹Ā nino, säre to buheinare ñuipuro, ō sehe nire:

—Ahrina jira yu poco yu bahana yoaro sehe jiina. ⁵⁰Tina yu Pucū mūano macariro to cahmaare yoara. Tó sehe yoaina yu bahu, yu baho, yu poco yoaro seheta jira —nire Jesu tinare.

Jesu wesere toari masuno quitire yahuha

(Mr 4.1-9; Lc 8.4-8)

13 ¹Tí dachoihta Jesu wūhūi jiro wijaare. Wijaa, bucūpariropū waha, bucūpariro dūhtu cahai dujire. ²To ā dujichu ñua payu masa tiro cahapū cahmachu wahpata yuhdua, bihsaro yoare Jesure. Ā bihsachu ñūno dohoriai samu, tiapū dujire tiro. Masa sehe padūroi ducure. ³Ā jiro payu to tuhotua mehne piti dahre yahure tinare buhero taro. Ō sehe nire tiro:

—Toari masuno toaro, to toaa yaparire doca site cūno wahaha. ⁴To ā doca site cū wahcāchu paye yapari maha dūhtu cahai bora caha sūha. Ā bora caha sūare tí yaparire minichahca duji ta, chūnocaha.

⁵Ā yoa paye yapari sehe taa wapa buicā bora caha sūha. Taa wapa buicā dihta mariea cureroi dóihta dumaha. ⁶Ā duri jipahta, sū to tuaro sichu, nuhcori mariaa, ñaia wahaha. ⁷Paye yapari sehe tja watoi bora caha sūha. Tja sehe dia yuhdua waha, toaa sehere wajānocaha. ⁸Paye yapari sehe noari yahpai bora caha sūha. Noano dua jia noano dicha tiha. Paye yucu cien yapari, paye yucu sesenta yapari, paye yucu treinta yapari dicha tiha. ⁹Ahrire tuho duaina noano tuhoga musa —nire Jesu.

Jesu quitī mehne to buherire yahuha

(Mr 4.10-12; Lc 8.9-10)

¹⁰To ā niri baharo sā to buheina tiro cahai sū, sinitui sā tirore:

—¿Ne, dohseacu masare quitī mehne piti dahre buhejari mūhu? —ni sinitui sā.

¹¹Jesu ō sehe ni yūhtire:

—Mūano macariro masa bui puhtoro masare to noano sūho jiare panopū macaina ti masierari cjirire mūare yu buheinare masichu yoara Cohamacu. Paina sehere ā yoerara tiro. ¹²Ā jiro masiinare masi namochu yoarohca tiro. Ā jia tina sehe noano masiahca. Masieraina sehe mahanocā ti masipachuta

tina sehere masierachũ yoarohca tiro. ¹³ ã jicũ quti mehne buheja. Õ sehe jira. Mipũ macaina ñupahta, ñueraina cjiri yoaro sehe tjuara. ã jia tuhopahta masierara. Tíre tuhoeraina yoaro sehe jira tina. ¹⁴ ã jiina jia Isaia cjiro panopũ macariro to ni joariro seheta yoara tina. Õ sehe ni joaa tiha:

“Õ sehe nina Cohamacũ: ‘Yũ yare tuhonahca musa.

ã tuhopanahta, ne masisi musa.

¹⁵ Musa dapu butiina tjuara.

Tuhsũ, musa cahmo coparire bihara musa, “Tuhori”, nina.

Musa caparire wihmitjiahna musa, “Ñuri”, nina.

ã yoaerana noano ñuna masiboa musa.

ã yoa tuhona, masiboa musa.

Musa wacũapũ noano masiboa.

ã masiina baro jina, musa tuhotumari cjirire tuhotu cohtota, yuhũre macaboa.

Musa ã macachũ ñuno, yuhũ sehe musa buhiri tiare cohãboa’, nina Cohamacũ”,

ni joaha Isaia cjiro.

¹⁶ Musa sehe musa capari mehne ñuna, masina. Musa cahmo mehne tuhona, masina. ã jina wahcheina jira musa. ¹⁷ Musare niita nija. Mipũ musa ñuare musa tuhoare panopũ macaina Cohamacũ yaina cjiri tuaro ñũ duamaha. Cohamacũ yare yahu muhtaina cjiri cũhũ tíre tuaro ñũ duamaha. Wiho mejeta ne ñueraha. Mipũ musa tuhoa cũhũre tuaro tuho duamaha tina. ã masi duapahta tíre masieraha —ni yahure Jesu sãre to buheinare.

Jesu wesere toari masũno quitire yahu pahñoa

(Mr 4.13-20; Lc 8.11-15)

¹⁸ Baharo Jesu sãre ò sehe ni yahu namore:

—Tuhoga musa. Wesere toari masũno quitire musare yahuihtja. Yuhũre tuhona, noano masiga. ¹⁹ Doca site cũa yapari noaa buhea yoaro sehe jira. ã jia maha duhtũ cahai boraa yapari noaa buhea yoaro sehe jira. Masa noaa buheare tuhopahta ne masierara. Noaa buheare masa ti tuhochũ ñuno watĩno sehe ta, tí buheare noaa buheare masi dutierara masare. Minichahca tí yaparire ti dota nariro seheta yoara watĩno. ²⁰ ã yoa tãa wapa buicã boraa yapari noaa buhea yoaro sehe jira. ã jia masa noaa buheare tuho, wahchea mehne dóihtã tíre tuho nana. ²¹ ã tuho napahta tãa wapa buicã jia yucũ nuhcori mariea yucũ yoaro seheta ahrina masa cũhũ tuaerara. ã tuaeraa ñano yuhdua, yũ yaina ti jiri buhiri paina tinare ti ñano yochũ ñua yũ ya sehere duhunocahna. Paina tinare ti ñano yochũ tíre cũno pjaeraa, yũ yare duhunocahna. ²² ã yoa tja watoi boraa yapari noaa buhea yoaro sehe jira. ã jia masa noaa buheare tuho, ahri yahpa macaare pjĩro cahya tuhotua, niñerure cahĩna. Ti ã yochũ tí sehe noaa buheare ducatarã. Ti ã ducatachũ masa noaa sehere yoaerara. ²³ ã yoa noari yahpai boraa yapari noaa buhea yoaro sehe jira. Masa noaa buheare tuhoa, tíre noano masina. ã masiina jia, Cohamacũ to cahmano seheta noaare yoara tina. Cãina pjĩro noaare yoara cien yapari dicha tiro seheta. Paina doca curero noaare yoara sesenta yapari dicha tiro seheta. Paina mahanocã noaare yoara treinta yapari dicha tiro seheta —ni yahure Jesu sãre.

Trigo watoi tja diari quitire yahuha

²⁴ Ñ yoa pari turi to tuhotua mehne piti dahre buhere Jesu:

—Muano macariro masa bui puhtoro to suho jiro ñ sehe jira. Wese puro to wesepu noaa yaparire to toariro seheta jira muano macariro masa bui puhtoro to suho jiro. ²⁵ Wese puro jipihtina tiro mehne macaina cūhu ti carino watoi tirore ñu tuhtiriro tara. Ñ taro trigore to toariro tjure toaha. Toa tuhsu wahaa wahaha. ²⁶ Baharo trigo duha. Ñ jiro ti dica tja cahachu waro diaa wahaha. ²⁷ Ñ jia wese purore dahra cohtaina tiro cahapu su, yahua: “¿Puhtoro, noaa yapari dihtare mu wesere mu toapachuta, dohse yoa tja cūhu diajari ti wesere?”, niha tina. ²⁸ “Yuhure ñu tuhtiriro jia ti tjure toaro”, niha wese puro. “¿Tjure sã curechu cahmajari mahu?”, nimaha tirore dahra cohtaina. ²⁹ “Tjure curena tjiga, tjure curemahna ‘Trigo sehere cureri’, nina. ³⁰ Trigo tja mehnetu bucuawah-nosinjaro. Dicha ñaini pja jichu, trigo dica nainare ñ sehe nihtja: ‘Tjure cure mahaga. Tuhsu masa curerire jūga. Baharo trigore pahaga. Paha pahño, tje yu wihbori wuhupu cūga’, nihtja tinare”, niha wese puro —nire Jesu, qiti mehne yahuro.

Mostaza yapa quitire yahuha Jesu

(Mr 4.30-32; Lc 13.18-19)

³¹ Ñ yoa paye qiti mehne sãre ñ sehe ni buhere tjao:

—Muano macariro masa bui puhtoro to suho jiro mostaza yapacã yoaro sehe jira. Ti yapacã mahabiari yapacã jira. ³² Ti yapacãre wesepu to toari baharo, noano dura. Ñ jiro pji curedu wahara. Ñ wahachu minichahca peri tu dūpūripu suhti suhara. (Tó seheta muano macarirore mari puhtoro masiina mahainacã ti ji muhtapachuta baharopu tina payu wahaahca) —ni yahure Jesu.

Pão bucuaro quitire yahuha Jesu

(Lc 13.20-21)

³³ Ñ yoa paye qiti mehne sãre ñ sehe ni buhere tjao:

—Muano macariro masa bui puhtoro to suho jiro pão bucuaro yoaro sehe jira. Tíre numino cū wajuru trigo pohcare co mehne noano tíre dahra morena pão bucuahore. To ã yoachu pão bucuaro sehe trigore noano sahserucu sara. (Tó seheta pão bucuaro to sahserucu saro seheta muano macarirore mari puhtoro payu masa jipihtiro macaina masiahca) —nire Jesu.

Qiti mehne Jesu to buherire yahuha

(Mr 4.33-34)

³⁴ Ahri jipihtiare buhero, qiti mehne yahure Jesu. Qiti marieno yahuerare tiro tinare. ³⁵ Ñta yoare tiro Cohamacu yare yahu muhtariro cjiro to ni joariro seheta. Ñ sehe ni joaa tiha panopu:

“Qiti mehne yahuihtja.

Cohamacu ahri yahpare to bajuamehneri baharo ne masare to yahuerari cjirire yahuihtja”,

ni joaa tiha Cohamacu yare yahu muhtariro cjiro.

Trigo watoi tja diari quitire yahu pahñoa

³⁶ Ñ yoa masare coha siti, wuhupu sãa wahare Jesu. Ñ jina sã to buheina tiro cahapu su, sinitui sã:

—Trigo watoi tja diari quitire yahu pahñoga säre —nii sã tirore.

³⁷ Jesu ò sehe ni yuhtire säre:

—Wese puro noaa yaparire toairi yoaro sehe jija yuhũ. Yuhũ masuno Cohamacu warocariro jija. ³⁸ Wese sehe ahri yahpa yoaro sehe jira. Noaa yapari dua muano macariro puhtoro to suho jiropu jihtina cjihti yoaro sehe jira. Tja sehe watino yaina yoaro sehe jira. ³⁹ Wese purore ñu tuhtiri toairi toairi watino yoaro sehe jira. Tí ñaini pja sehe pihtiri dacho yoaro sehe jira. Ā jia trigore naina anjoa yoaro sehe jira. ⁴⁰ Tjare ti cure jũriro seheta pihtiri dacho jichu watino yainare, pichacapũ jũ cohãahca tinare. ⁴¹ Yuhũ masuno Cohamacu warocariro yũ anjoare warocaihtja. Yũ ā warocachu anjoa sehe ñaare yoa dutiinare, ñaare yoinare puhtoro yũ suho jiropure jimarinare na wioahca. ⁴² Na wio tuhsu pichacapũ cohãahca tinare. Tõpu tina tuaro tii, cahyaa mehne bahca dihoahca. ⁴³ Ā jia Cohamacu yaina ti Pucuro puhtoro to suho jiropu jiaha. Tõi jia, sũ dacho macariro yoaro sehe noano buhriaahca tina. Ahrire noano tuhoga musa —ni yahure Jesu.

Noa yuhduare to nuorire to bocari quitire yahuha

⁴⁴ Ā yoa paye qiti mehne ò sehe ni yahure tjõa:

—Muano macariro masa bui puhtoro to suho jiro niñeru to nuori yoaro sehe jira. Masuno tĩre wesepũ wacũeno boca, pari turi tĩre nuo namona. Ā yoaro tuaro wahcheha tiro. Ā jiro to bocari cjirire nano taro, tí wesere nuchũ duaha. Ā nuchũ duaro to yare dua pahño, tí wesere nuchũha. Muano macariro puhtoro to suho jiro to bocari cjiri yoaro sehe jiha. (To bocarire to cahma yuhduariro seheta muano macarirore masa bui puhtoro noano ti masini baharo masa tuaro cahmana tirore) —ni yahure Jesu.

Wapa bujuri yapa quitire yahuha

⁴⁵ Ā yoa paye qiti mehne ò sehe ni yahure tjõa:

—Muano macariro masa bui puhtoro to suho jiro wapa bujua yaparire perla wama tia yaparire nuchuriro yoaro sehe jira. ⁴⁶ Tí yaparire macano noa yuhduri yapare bocaha. Ā bocaro, tí yapare nuchũ duaro, jipihtia to yare dua pahño wahaha. Ā dua tuhsu tí yapare wapa bujuri yapare nuchura. (Tí yapare tuaro to cahmariro seheta muano macarirore masa bui puhtoro noano ti masini baharo masa tuaro cahmana tirore) —nire Jesu.

Waũno quitire yahuha

⁴⁷ Ā yoa paye qiti mehne Jesu ò sehe ni yahure tjõa:

—Muano macariro masa bui puhtoro to suho jiro waũno ti docañodu yoaro sehe jira. Tũ waũno mehne payu wahi soro jiinare ñahana. ⁴⁸ Tũ to wahpaa wahachu wahi wajãina sehe tũre paduropũ waja maja, noaina wahire besera. Noinare ti puhusepũ bese sãana. Ñaina wahire cohãnocahna. ⁴⁹ Pihtiri dacho jichu ò sehe jirohca. Anjoa sehe masare beseahca. Ñainare na wioahca noaina cahapũ jimarinare. ⁵⁰ Na wio, tinare pichacapũ cohãahca. Tõi tina tii, tuaro cahyaa mehne bahca dihoahca ñaina sehe —ni yahure Jesu.

Mũna buheare, wahma buhea cũhũre yahuha

⁵¹ To ā ni yahuri baharo tiro ò sehe ni siniture säre:

—¿Ahri jipihtiare tuhojari masa? —ni siniture tiro.

—Tuhoja sã —ni yuhtii sã.

⁵²Sã ã nichu tiro yahure sãre:

—Judio masare buheina muano macariro masa bui puhtoro to suho jirore buhea, puaro buheare yahura. (Panopu ti buhea cūhure mipu ti buhea cūhure yahura.) Tina, Judio masare buheina wuhu puro yoaro sehe jira. Tiro to wuhui jiare noare na wioro, wahmaare, muna cūhure na wiora tiro —nire Jesu sãre.

Jesu Nazarepu wahaha

(Mr 6.1-6; Lc 4.16-30)

⁵³Tí quitire to buheri baharo, wahai sã tiro mehne. ⁵⁴Waha, to bucuari macapu suhi. Tópu su, judio masa mari buhea wuhusepu buhere tiro. To ã buhechu tuhoa, tuho cuaa wahare tina.

—Cuenah, ¿ahriro nohopu tuhoari ahri buheare? ¿Dohsearo noano masi pahñojari ahriro? Cohamacu tuua mehne yoa ñona tiro to basi. ⁵⁵Ahriro taboa dahrari masuno macuno jimanaro. Á yoa to pocoro María jimanaro. Á yoa Santiago, José, Simo, Juda, to bahana jimanabu. ⁵⁶Mipure to bahana numia ahri macai jira. Á jiro tiro mari yoaro sehe jiriro tjira. ¿Á jiparota nohopu tuhoari tiro ahri buheare? —ni durucure tina ti basi.

⁵⁷Á jia tina tiore cahmaerare. Ti ã cahmaerachu ñuno õ sehe nire Jesu tinare:

—Cohamacu yare yahu muhtarirore paina ño payora. Ti ã ño payopachuta to ya maca macaina, to coyea tiore ño payoerara. Á jina yuhure ño payoerara musa õi yu bucuariro jichu —nire tiro tinare.

⁵⁸Á jiro tiore ti wacū tuaerachu ñuno “Cohamacu macuno jira”, ti ni duaerachu ñuno, tí macai Cohamacu tuua mehne payu tahari yoa ñoerare Jesu.

João bautisariro cjiro to yariarire yahuha

(Mr 6.14-29; Lc 9.7-9)

14 ¹Tí pjare Herode Galilea macariro puhtoro Jesu to yoiare tuhorocaha. ²Á tuhoro õ sehe nimaha:

—João masare bautisariro yariariro cjiro pari turi bajuaro nica. Á jiro mipure to bajuari baharo ahri tuaare cjuara tiro bajuamehneare yoaro —nimaha Herode to cahamacare. (Jesure “Joãota jira”, ni tuhotumaha tiro Joãore ti wajãri baharo.)

³⁻⁵Joãore to wajã dutihtu pano Herode to bahu Felipe namonore namo tiha. To ã yoachu ñuno João bautisariro Herode sehere õ sehe nia timaha:

—Mu bahu namonore namo ticu Cohamacu dutiare yuhderucai nina muhu —nia timaha João.

To ã niri buhiri Herode tiore wajã duamaha. “ ‘João Cohamacu yare yahu muhtariro jira’, ni tuhotura judio masa” nino, tina sehere cuiha Herode. “Joãore yu wajachu tina suaboca” nino, tinare cuiha. Á cuiro Joãore wajã duaeramaha. Á wajã duaeraparota Herode tiore ñaha duhte duti, peresu yoaha. To namono Herodia to dutiro mehne ã yoaha. ⁶Á yoa Herode to masa bajuari dacho jichu bose numu yoaha tiro. Tói Herodia macono bose numu wihiina ti ñurocaroi basa ñoha. To ã basa ñochu ñuno Herode wahcheha. Á wahchero ticorore õ sehe niha:

⁷—Cohamacu mehne potocã niita nija. Yuhure mu sinino purota waihtja yuhu muhure —niha juna Herode sehe Herodia maconore.

⁸To ã nichu tuhoru Herodia to maconore to sinihtore yahuha ticorore. To ã yahuchu to macono sehe ò sehe ni siniha Herodere:

—João masare bautisariro dapure cjã ta dutiga. Æ yoacu waparo mehne tí dapure waga yuhure —niha ticoro.

⁹To ã nichu tuhoru Herode tuaro cahyaha. Masa ti ñurocaroi “Waihtja muhure”, niha tiro. Æ jiro tiro buo tiro “Muhure to dapure waeraja”, ni masie-
raha ticorore. Æ jiro ticoro to dutiriro seheta Herode sehe to cahamacare João wajã dutiha. ¹⁰João dapure cjã taroca dutiha juna. ¹¹Æ cjã ta tuhsu, waparo mehne to dapure na taha tina. Herodia maconore to dapure ti wachu, ticoro sehe to pocorore yuhdoha tjoa.

¹²Ti ã yoari baharo João buheina ta, to pjacure masa copapu na cüha. Æ cü tuhsu, tina tíre Jesure yahua tare.

Cinco mil bui masare chua waha Jesu

(Mr 6.30-44; Lc 9.10-17; Jn 6.1-14)

¹³Ti ã ni yahuchu tuhoru, Jesu sã mehne dohoriai samu, masa marienopu suho wahare. Jesu tópu to wahachu tuhoa, masa ti ya macaripu jirina ta, mahapu tirore nunu ti wahcäre. ¹⁴Tuhsu, sã wahã suri baharo tiro payu masare ñuno, pja ñure tinare. Æ pja ñuno tina mehne macaina dohatiinare noaina wahachu yoare. ¹⁵Ñamichahapu sã to buheina tirore ò sehe nii:

—Ñamichahapu jira. Ò masa marienopu jira. Æ jicu macaripu masare ti chuhtire nuchu dutiga ti puhu tihti cjihtire —nimai sã tirore.

¹⁶Jesu yuhtire säre:

—Wahaea tjijaro tina. Musa basita chuare waga tinare —nire säre.

¹⁷—Cü wamomaca pihtia pão curi, puaro wahi mehne jira säre. Tí dihtare cjuaja sã —ni yuhtii sã.

¹⁸—Tíre yuhure na tahga musa —nire säre.

¹⁹To ã nichu tuhona na wahcãhi sã to cahai. Sã na suri baharo tja bui masare tiro duji dutire juna. Ti dujichu cinco pão curire, puaro wahire na, manopu ñu muo, Cohamacure “Noana”, nire. Æ ninota pão curire nuha, säre to buheinare ware. To ã wachu sã sehe tíre masare witii. ²⁰Æ jia jipihtina noano chu, yapi yuhdua wahare. Ti yapi wahyorire doce puhuse waro na cahmachu, wahpo dapoi sã to buheina. ²¹Tói tíre churina mua dihtare mari quihõchu cinco mil mua jire. Numia, macanacã cühu jire.

Jesu co bui ducu wahcãha

(Mr 6.45-52; Jn 6.16-21)

²²Baharo säre to buheinare Jesu bucupariro pa buhusehe coapu pahâyu dutire masare to coha sitirowat. ²³Coha siti tuhsu, tucupu muja, Cohamacure sinino wahaha. Ñamine tói tiro cüirota jiha. ²⁴Tí pjaihta bucupariro dacho macai dohoria mehne paharucuna nimai sã. Wihnono tuaro ta, pahcõri bujua wahcã, dohoriare cjã sãare. ²⁵Wihnono tuaro to wachu bohrea muja tahto pano Jesu co bui ducu tare sã cahapu juna. ²⁶Sã cahapu to tachu ñuna cui nii sã. Æ cuina sañurucumai sã:

—Yariariro cjiro pjacu jira —ni sañurucumai sã.

²⁷Sā ā cuichu ñuno Jesu ō sehe nire:

—Ne yuhure ñu cuaena tjiga. Yuhuta jija —nire säre.

²⁸To ā nichu tuhoru Pedro ō sehe nire tiore:

—Puhtoro, potocāta mūhuta jicu, co bui yuhure mu cahapu ducu wahcā dutiga —nire tiro.

²⁹—Taga —ni yuhtire tiro sehe.

To ā nichu Pedro dohoriapu jiriro co bui ducu su Jesu cahapu ducu wahcāmare. ³⁰Wihnono tuaro to tachu ñuno cuire tiro. Ā cuiro diha boraa wahamare.

—Yuhure yoadohoga puhtoro —ni sañurucure tiro Jesure.

³¹To ā nichuta to wamomacare ñaha:

—Mahanocā wacū tuara mūhu yuhure. ĀDohseacu yuhure wacū tuaerajari mūhu? —nire tiro Pedore.

³²To ā niri baharo dohoriapu samu tare tina. Ti ā samu tari baharo wihnono yusu borare. ³³Ā jina sā to buheina dohoriapu jiina na tuhucua caha su, Jesure ño payoi:

—Potocāta mūhu Cohamacu macunota jira —nii sā tiore.

Genesare macaina dohatiinare yuhdoha Jesu

(Mr 6.53-56)

³⁴Ā yoarina cjiri pahā, Genesare wama tiri yahpapu sui. ³⁵Tó macaina Jesure ñu masire. Ā masia tó cahi jinare Jesu to wihirire yahu site pahñore. Ā ti yahu sitechu tuhoina payu dohatiinare tiro cahapu na tare.

³⁶—Mu suhtiro duhtu caha dihtare säre ñaha ñu dutiga —ni sinire tina Jesure. Ā jia to suhtirore ñaha ñuinape tópeinata noaina wahare.

Masa ñaina wahachu yoaare yahuha Jesu

(Mr 7.1-23)

15 ¹Ā yoa Jerusalē macaina, fariseo curua macaina, marine judio masare buheina mehne Jesu cahapu wihia, ō sehe ni siniture tiore:

²—ĀDohse yoa mari ñuchusuma cjiripu ti yoa dutiriro sehetā yoaerajari mu buheina sehe? Tina ti chuhtu pano ti dutiriro sehetā wamo cosaerara —nire tina Jesure.

³Jesu ō sehe ni yuhtire tinare:

—ĀMusa sehe dohse yoana Cohamacu dutia sehere yoaerajari musa? ĀDohse yoana mari ñuchusuma cjiri panopu macaina ya dutia dihtare yoajari musa sehe? ⁴Ō sehe nina Cohamacu: “Musa pucsumare ño payoga”, nina. “Cūiro to pucsumare ñaare quiti dahreriro jiro ti buhiri paina ti wajāhtiro cjihto jirohca”, nina Cohamacu. ⁵To ā nipachuta ō sehe ni dutira musa sehe ti pucsumare yoadoho dutierana: Ti pucsumare ti waborire Cohamacu sehere wa dutira musa. Ā ni buhemana musa. ⁶Ā buhena ti pucsumare ño payochu yoaerara musa. Musa ā yoana Cohamacu dutiare yuhdurucana nina musa, mari ñuchusuma cjiri panopu macaina ya dutia dihtare yoana. ⁷Masa ti baharo buhusehei ñano yoa cohtaina jira musa. Cohamacu yare yahu muhtariro Isaia cjiro musare potocāta yahu joaa tiha panopure:

⁸“Ahrina masa yuhure noano durucupahta ti tuhotuare yuhure ne ño payoerara.

⁹ Ā jia yuhure ti ño payoa ne yaba cjihti jierara.

‘Cohamacu ya dutia jira ahri’, ni mahño buhera ti ya buhea sehere”, ni joaa tiha Isaia cjiro —nire Jesu fariseo curua macainare, mari coyea judio masare buheina cūhure.

¹⁰ Ā ni tuhsu to cahapu paina cūhure pjiroca, ō sehe nire:

¹¹ —Yuhure tuhona taga. Tuhsu, yu niare noano tuho ñahaga musa. Musa duserihi sāa sehe musa chua sehe masare buhiri tichu yoaerara. Musa ñaa durucua sehe musa duseri wijaa sehe masare buhiri tichu yoara —nire Jesu.

¹² To ā ni buheri baharo sā to buheina sehe tirore yahui:

—Mu ā nichu tuhoa fariseo curua macaina suaa nire —ni yahui sā tirore.

¹³ Tíre tuhoro, ō sehe ni yuhtire säre:

—Tina fariseo curua macaina toaa yucu yoaro sehe jira. Yu Pucu muanu macariro jipihtia toaa yucure to toaerari cjirire nuhcori mehneta cure, cohā-nohca. Āta yoarohca tinare. ¹⁴ Tinare ā ñunocahga musa. Tina capari ñueraina ti ñu masieraro seheta ne Cohamacu yare masierara. Ā jia pichacapu wahaahca. Ā masierapahta paina masierainare buhe duamana. Ā jia tina, ti buheina cūhu soro jia buheare cahmaahca, capari ñueraina painare tuā wahcā, jipihtina copapu ti borariro seheta —nire Jesu.

¹⁵ To ā nichu tuhoro Pedro ō sehe nire:

—Ahri quitire masa ti duseri wijaa quitire yahu namoga säre tjoa —nire tiro Jesure.

¹⁶ Jesu ō sehe ni yuhtire:

—¿Ne, tuhoerasinijari musa? ¹⁷ Masa ti chuare chuchu tí ti duseroi sāahna. Ā jia ti pjaropu sāa su, yuhdu wijaa wahara. Wiho waro jira. Mari chua marine buhiri tichu yoaerara, Cohamacu to ñuchu. ¿Ahrire masierajari musa? ¹⁸ Masa ti duseroi wijaa, ti durucua sehe ti tuhoutuapu tara. Ti durucua sehe ñaa jia masare buhiri tichu yoara. ¹⁹ Ñaa tuhutua, masare wajāa, paio namono mehne ñano yoaa, ñano yoaa numia mehne ñano yoaa, yacaa, mahñoa, masare ñano quití dahrea masa ti tuhoutuapu tara. ²⁰ Tí ñaa sehe masare buhiri tichu yoara. Wiho mejeta mari ñachusuma cjiri ti yoaa tiroro cjiro seheta masa wamo cosaerapahta ti chuchu tí masare buhiri tichu yoaerara —nire Jesu.

Judio masono jieraricoro Jesure wacū tuaha

(Mr 7.24-30)

²¹ Ā ni buhe tuhsu, säre suho wahare tjoa. Tiro wama tiri maca cahapu Sidō wama tiri maca cahapu sui sā. ²² Sā tōpu suchu Canaa yahpa macaricoro tói jiricoro Jesu cahapu wihiro, sañurucure:

—Puhtoro, Davi panamino masare yuhduchu yoahitiro, yuhure pja ñuga muhu. Yu macore yuhduchu yoabasaga muhu. Yu maco watīno to cohtotari-coro, ñabiaro yuhdura ticoro —ni sañurucure to pocoro.

²³ To ā nipachuta Jesu ticorore yuhtierare. To ā yoachu ñuna sā to buheina sehe tirore ō sehe nimai:

—Waha dutiga ticorore. Nu cariboro bisica —nimai sā.

²⁴ Sā ā nichu tuhoro Jesu ō sehe ni yuhtire ticorore:

—Israe masare Cohamacure masieraina dihtare yoadoho dutiro warocare yu Pucu yuhure —nire tiro.

²⁵To ã nipachuta Jesu dahpori cahai na tuhcuca caha sure ticoro tirore ño payoro.

—Puhtoro, yoadohoga yuhure —nire ticoro.

²⁶Jesu ò sehe ni yuhtire ticorore:

—Ò sehe jira ahri: Wahmanore wuhũ puro pohna ya chuare dieyacãre yũ wa muhtachu tó wahaerara. (Israe masa yare pa yahpa macainare yũ wa muhtachu tó wahaerara) —nire Jesu ticorore piti dahre yahuro.

²⁷—Ã tjira puhtoro. Ã jipachuta dieyacã cũhu wuhũ puro mesa docai ti chu site boroare chu cohtara tinacã cũhu. (Pa yahpa macaricoro yũ jipachuta yuhũ cũhure yoadoho masina muhũ) —ni yuhtire ticoro.

²⁸To ã nichũ tiro ò sehe ni yuhtire:

—Ne numino, muhũ yuhure tuaro wacũ tuara. Mu cahmano seheta ã waharohca —nire Jesu ticorore.

To ã nichuta dóihta noaricoro wahare to macono.

Payũ dohatiinare noaina wahachu yoaha Jesu

²⁹Ã ni tuhsũ sãre suho waha, Galilea wama tiri bucũpari ro duhtũ cahapũ suho sure tjoa. Sũ, mahaducã tũcure muja, tu buipũ dujire. ³⁰Tói to jichũ payũ masa tini masierainare, capari ñuerainare, cũ buhusehe ñano dahporo tiinare, durucu masierainare, payũ paina dohatiinare tiro cahapũ na wihire masa. Na wihi tuhsũ Jesu dahpori cahai duhu cũre tina. Ti ã duhu cũri baharo noaina wahachu yoare Jesu tinare. ³¹To ã yoachũ ñua masa ñũ cuaa wahare. Durucu masieraina ti durucuchũ ñua, cũ buhusehe ñano dahporo tiina noaina ti wahachu ñua, tini masieraina ti tinichũ ñua, capari ñueraina ti ñuchũ ñua, cuaa wahare tina. Æ jia ò sehe nire:

—Israe masa mari puhtoro, Cohamacũ tuariro, noariro jira —ni ño payore tina Cohamacure.

Cuatro mil masare chuare waha Jesu

(Mr 8.1-10)

³²To ã yoari baharo Jesu sãre to buheinare to cahapũ pjiroca, ò sehe nire:

—Ahrina masa yuhũ mehne tia dacho waro ji tuhsura. Æ yoa tinare ti puhĩ mariahna. Ti puhĩ mariachu ñucũ tinare pja ñũja. “Tinapũ juca baaina, mahai borari”, nicũ tinare chua marieno ti wuhusepũ waha duti duaeraja. Æ jicũ tinare puhĩ wa duaja —nire tiro.

³³To ã nichũ sã to buheina tirore sinĩtu ñui:

—¿Dohse yoa mari òre masa marienopure pãore boca wabocari mari? —nii sã tireore.

³⁴—¿Nohope curi pão curire cjuajari musa? —nire Jesu.

—Siete curi, wahi cũhure mahainacã cjuaja —ni yuhtii sã.

³⁵Sã ã nichũ tiro masare yahpai duji dutire. ³⁶Tuhsũ siete pão curire, wahicã cũhure na, Cohamacure “Noana”, nire. Æ ninota pão curire nuha, sãre to buheinare ware. Æ jina sã sehe tí chuare masare witii. ³⁷Æ jia masa tíre chu, yapi yuhdua wahare. Ti yapi wahyorire siete puhuse waro wahpo dapoi sã. ³⁸Tói churinare mua dihtare mari quihõchũ cuatro mil waro mua jire. Numia, macanacã cũhu jire. ³⁹Ti ã chu tuhsuchũ Jesu masare waha dutire. Æ ni tuhsũ dohoriapũ samu, Magadãn wama tiri yahpapũ sãre suho sure.

**Fariseo curua macaina, saduceo curua macaina cūhū Cohamacu tuua
mehne Jesu to yoa ñochū ñū duamaha**

(Mr 8.11-13; Lc 12.54-56)

16 ¹ Ñ yoa fariseo curua macaina, saduceo curua macaina mehne Jesu cahapū wihire. To ñano yoachū ñū duamare tirore yahusā duaa. Ñ jia tina tirore Cohamacu tuua mehne yoa ño dutimare to masierachū ñū duaa, “Cohamacu warocariro jierara”, nia taa. ² Ti ñ yoa dutichū Jesu ō sehe ni yūhtire tinare:

—Ñamichahapū sū sāachū to noano sohāchū ñūna “Noari ñami jirohca”, nina mūsa. ³ Tuhsū, bohrearo ñichuri dacho to jichū ñūna “Coro tarohca”, nina mūsa. Ñ noano masiina jipanahta Cohamacu tuua mehne musare yū yoa ñochū ñūpanahta ne tīre noano masierara mūsa. ⁴ Mipū macaina ña yūhduina Cohamacure cahmaeraina Cohamacu tuua mehne yū yoa ñochū ñū duamana. Yoa ñosi yūhū. Cohamacu yare yahu mūhtariro cjiro Jona cjiro to dohse waharirore masi tuhsure mūsa. Tí dihtare ñoihtja musare —ni yūhtire Jesu.

Ñ ni yahu tuhsū suho wahaa wahare tjoa.

**Fariseo curua macaina, saduceo curua macaina ti ñaa buheare yahuha
Jesu**

(Mr 8.14-21)

⁵ Bucuparirore sã pahāna, pãore bo pahā tari jihti sã. ⁶ Ñ jiro Jesu sãre ō sehe ni yahure:

—Noano yoanohbū. Fariseo curua macaina, saduceo curua macaina ti pão bucuareore ñūna noano yoaga. Cua nina tí —ni yahure.

⁷ To ñ nichū tuhona tuho wisia wahana, sã basi tīre ō sehe ni durucui:

—Mari pãore mari na taerachū ñūno ñ nipucu tiro —nimai sã, sã basi.

⁸ Sã ñ nirire masino, sãre ō sehe ni siniture:

—¿Dohse yoana pão sehere wacūjari mūsa? Mahanocā waro yūhure wacū tuara mūsa. ⁹ ¿Masierasiniari mūsa? ¿Cinco mil muare cinco pão curire yū nuha warire numia cūhure yū warire wacūerajari mūsa? ¿Ti yapi wahyorire doce puhuse waro mūsa wahpo daporire wacūerajari mūsa? ¹⁰ ¿Ñ jicu siete pão curire nuha, cuatro mil muare yū warire numia cūhure yū warire wacūerajari mūsa? ¿Nohope puhuse waro mūsa wahpo daporire wacūerajari mūsa? ¹¹ ¿Ñ jina pão bucuareore yū yahuchū dohse yoana noano tuhoerari mūsa? Ñ nicū pão warore nicū nieraja. Fariseo curua macaina, saduceo curua macaina ti pão bucuareore ñūna noano yoaga. Cua nina tí —ni yahure sãre tiro.

¹² To ñ ni yahuchupū sã masii. “Pão bucuaro” nino, pão warore nino nierare. Ñ nino fariseo curua macaina, saduceo curua macaina ti buheare nino niri jimare sãre. “Ti ya buheare tuhoena tjiga”, nino nire.

Jesu potocā Cristo to jiare Cohamacu warocariro to jiare yahuha Pedro

(Mr 8.27-30; Lc 9.18-21)

¹³ Ñ yoa Jesu mehne wahana, Cesarea Filipino wama tiri maca cahai jia macaripū sui sã. Tuhsū, macapū sã suri baharo Jesu sãre to buheinare siniture:

—¿Diro baro jicari yūhū masa yūhure ti tuhutuchū? —ni siniture tiro.

¹⁴—“João masare bautisariro jira”, nina muhure. Paina “Elia jira”, nina. Ñ yoa paina sehe tjoa, “Jeremía jiboca o paio Cohamacu yare yahu muhtariro cjiro jiboca”, nina —ni yuhtii sã tirore.

¹⁵—¿Musa sehe musa tuhotuchu diro baro jicari yuhu? —ni sinitu ñure tjoa.

¹⁶Simo Pedro ò sehe ni yuhtire:

—Muhu Cristo Cohamacu warocariro jira. Cohamacu catiriro waro macu-nota jira muhu —ni yuhtire Simo Pedro.

¹⁷To ã nichu tuhoru Jesu tirore ò sehe nire:

—Simo Jona macuno muhu wahcheriro jira. Ò sehe ni yuhure mu yuhtichu masa ti ni yahuri jierara. Yu Pucu muano macariro sehe tíre muhure masichu yoare. ¹⁸Muhure niita nija. Muhu Pedro wama tiroiro jira. (Pedro nino, “tãca”, nino nina.) Ahri tãa wapa bui pjiri wuhure yu yoaboriro seheta yu yaina sehene pjiri curua jichu yoaihca yuhu. Ñ jia watino to yaina mehne ne yu yainare yuhdurucasi. Ñ jia yu yaina ne pichacapu wahasi. ¹⁹Muano macariro mari puhtoro to suho jiro macari sawire muhure waittja. Ñ jicu ahri yahpare ñaare mu yoa dutierachu manopu cuhure yoa dutisi. Ahri yahpare noaare mu yoa dutichu manopu cuhure yoa dutia jiahca —nire Jesu.

²⁰To ã niri baharo sãre to buheinare ò sehe nire:

—Yuhure “Cristo jira tiro”, ni yahu sitesiniena tjiga painare —ni dutire sãre.

Jesu to yariahtore, to masa wijaahito cuhure yahuha

(Mr 8.31–9.1; Lc 9.22–27)

²¹Tí pjata Jesu sãre to buheinare noano yahu pahño ducare:

—Jerusalêpu yuhure waharo cahmana mipure. Tópu mari coyea judio masa bucuna, sacerdotea puhtoa, marine judio masare buheina cuhu yuhure ñano yoahca. Yuhure wajãahca. Ñta ñano yuhduro cahmana yuhure. Ñ jicu tia dacho wahaboroi masa wijaaihca —ni yahure sãre tiro. ²²To ã nichu tuhoru Pedro sehe pa sehe curerocã Jesure narucu su, tirore ò sehe nire:

—Puhtoro, mu nino sehe ã wahaero tjjaro. Muhure tina wajãea tjjaro —nimare tiro Jesure.

²³To ã nichu tuhoru Jesu majareruca, tirore ò sehe nire:

—Satana yoaro sehe durucui nina muhu. Ñ nii tjiga. Mu tuhotua masa ya jira. Cohamacu ya jierara. Ñ jicu yu yoahore ducata duara muhu —nire Jesu Pedore.

²⁴To ã niri baharo sãre yahure:

—Cũiro yu yairo ji duaro, to cahmano yoa duamarine duhunocanohca. Crusapu yu ñano yuhduhtiro seheta yu yairo to jiri buhiri ñano yuhduparota yuhure duhusi. Ñ jiro yu yare yoarucuriro jirohca. ²⁵Masuno yuhure wacuno marieno to mu suro to cahmano seheta yoiriro pichacapu waha-rohca. Tuhsu, masuno yu yare ã yoarucuriro jipihtia dachoripe yuhu mehne manopu jirucurohca tiro. ²⁶¿Cũiro masuno ahri yahpa macaare jipihtiare cjuariro Cohamacure cahmaeraro pichacapu waharo, yabare wapatajari tiro? Ñ jiro ne wapataerara. Pichacapu to wahachu ne dohse wapa wiohto basioerara. ²⁷Yuhu masuno Cohamacu warocariro yu yaina anjoa mehne ahri yahpapu tjua tacu yu Pucu to si sitea mehne tjua tacu jipihtina masare ti

ñaa yoari buhiri buhiri dahreihntja. Noaa sehere ti yoachũ noano yoihtja tinare. ²⁸Potocã musare yahuihtja. Cãina musa õpure jiina musa yariahto pano yuhure yu tachũ yu puhto sãachũ cũhure ñunahca —ni yahure Jesu.

Jesu to pjacure cohtotaha

(Mr 9.2-13; Lc 9.28-36)

17 ¹Ã yoa seis dachori baharo Jesu Pedroke, Santiagore to bahuro João cũhure muadu tũcupũ tina dihtare pji mujare. ²Muanopũ ti suri baharo ti ñurocaroi to pjacure cohtotaha. To wuhdua sũ dacho macariro yoaro sehe si siteha. Tuhsũ, to suhtiro buhriaro yoaro seheta yehsea tiha. ³To ã cohtotachũ Jesu Moise cjiro, Elia cjiro mehne ti suhuduchũ ñũha tina tiaro Jesu buheina. ⁴Ã jiro Pedro Jesure õ sehe nimaha:

—Puhtoro, mari õi jichũ noa duara. Mũ cahmachũ tia wuhucã yoihtja. Mũ ya wuhucã, Moise ya wuhucã, Elia ya wuhucã yoihtja —nimaha tiro.

⁵To ã nino watoi me curua noano si sitea me ti bui duji pja wihiha. To ã duji pja wihichuta, me curua watoi õ sehe nino coa taha:

—Ahriri yũ macũ yũ cahĩriro jira. Tiro mehne wahcheja. Tirore tũhoga —nino coa taha.

⁶Ã nino coa tachũ tũhoa to buheina cuua waha, yahpai doca caha suha.

⁷Ti ã wahari baharo Jesu tina cahapũ sũ, tinare bua carerota, õ sehe niha:

—Wahcãrucaga musa. Mipure musa ñurire, musa tũhori cũhure cuiena tjiga —niha tiro tinare.

⁸To ã nichũ tina ñuroca, Jesu dihtare ñũha. Ti ñurina cjiri sehe marieraha juna.

⁹Ã jia tũcupũ ti duji tachũ Jesu tinare tuaro mehne õ sehe niha:

—Michapucacã yũ ã waharire painare yahuena tjiga. Yũhũ masũno Cohamacũ warocariro yũ yaria masa wijaari baharo tíre painare yahuga musa —niha Jesu.

¹⁰To ã niri baharo Pedro cũhũ tirore õ sehe ni sinituha:

—“Cristo masare yũhdohtiro to tahto pano Eliare ta muhtano cahmana”, nina marine judio masa buheina. ¿Dohse jiro baro ã nijari tina? —ni sinituha tina tirore.

¹¹Jesu õ sehe ni yũhtiha:

—Potocã tjira. Eliare ta muhta dutire Cohamacũ, jipihtiare cahno muhtahtirore. ¹²Õ sehe nicũ musare nii nija. Elia wihi tuhsure. To ã wihipachuta tina tirore ne ñũ masierare. Æ jia ti dohse yoa duaro ñano yoari jire tirore. Åta yoaahca yũhũ cũhure. Yũhũ masũno Cohamacũ warocariro jija. Ti ã yoachũ ñano yũhdũihca yũhũ —niha Jesu.

¹³To ã ni yahuchũ tina noano tũhoha. “Elia” nino, João bautisarirore nino niha. Tíre masiha tina.

Jesu ñama yaria munare dohatirirore yũhdoha

(Mr 9.14-29; Lc 9.37-43)

¹⁴Ã yoa payũ masa cahapũ ti duji tachũ ñũno cãiro mũno Jesu cahapũ sũ, na tuhcuca caha sure.

¹⁵—Puhtoro, yũ macucãre pja ñũga. Tiro ñama yaria munare dohatiriro jira. Æ jiro tiro ñabiario yũhdũra. Payũ tahari pichacapũ bora sũ caha mujana

tiro. Cãa tahari diapu bora ñoja mujana. ¹⁶ Ñ jicu mu buheina cahapu tirore na sumahi. Tina tirore noariro wahachu yoa masierare —nire tiro Jesure.

¹⁷ Jesu ò sehe ni yuhtire:

—Mipu macaina, musa ñaa buhiri tiina jira. Yuhure ne wacu tuaerara. Yoabiari pja musare buhemaja yuhu. ¿Noho puro yoari pja yuhure musa caribobocari? Tirore na tahga yuhure —nire Jesu.

¹⁸ Ñ jiro watĩnore to tuhtichuta watĩno sehe masunocãre sãariro cjiro wahaa wahare. To ã wahari baharocãta noariro wahare tiro.

¹⁹ Baharo sã to buheina sã sahsero jina Jesure ò sehe ni sinitui:

—¿Dohse yoana sã sehe ahriro sehere watĩnore cohã masierari, mu tuhotuchũ? —ni sinitui sã.

²⁰ Jesu ò sehe ni yuhtire:

—Yuhure mahanocã wacu tuara musa. Potocã musare yahuita nija. Mostaza yapacã mahari yapacã jiparota duropu pjidu wahara. To ã wahariro sehetã Cohamacure wacu tuana ò sehe wahachu yoa masinahca musa. Ahdu tucure “Sohõpu wahaga”, musa nichu, waharohca. Cohamacure tó sehetã wacu tuana, jipihtiare yoa masina musa. ²¹ [Wiho mejeta ahriro baro watĩnore musa cohã duana Cohamacure tuaro sinino cahmana musare. Ñ yoa duana chu duhuro cahmana musare Cohamacure sinina tana] —nire Jesu sãre.

Pari turi Jesu to yariahtore, to masahtore yahuha

(Mr 9.30-32; Lc 9.43-45)

²² Ñ yoa Galilea yahpau sã tinichu, Jesu sãre ò sehe ni yahure:

—Yuhu masuno Cohamacu warocariro jija. Masa yuhure ñaha, painapure yuhure waahca. ²³ Ñ ti wari baharo yuhure wajãahca tina. Ñ ti wajãricu tia dacho wahaboroi masa wijaaahca —ni yahure tiro sãre.

To ã ni yahuchu tuhona tuaro cahyai sã.

Cohamacu wuhu macaa wapa cjihtire sinituha paina

²⁴ Ñ jina Capernaupu sã suchu, Cohamacu wuhu macaa cjihtire wapa na cohtaina Pedro cahapu su, tirore ò sehe ni sinitu ñure:

—¿Musare buheriro Cohamacu wuhu macaa wapa cjihtire wapajari tiro? —ni siniture tina.

²⁵ —Wapara tiro —ni yuhtire Pedro.

To ã niri baharo wuhapu to sãachu Jesu ò sehe ni sinitu muhtare Pedore:

—¿Simo, dohse ni tuhotujari muhu? ¿Ahri yahpa macaina puhtoã yabaina sehere wapa cahmajari, mu tuhotuchũ? ¿Tina mehne macainare wapa cahmajari? ¿O pa yahpa macaina sehere wapa cahmajari, mu tuhotuchũ? —ni siniture tiro Pedore.

²⁶ —Pa yahpa macaina sehere wapa cahmana —ni yuhtire Pedro.

To ã nichu Jesu ò sehe ni yahure:

—Ñ jiro puhtoro to ya yahpa macainare wapa cahmaerara. ²⁷ Ñ jipachuta wapa na cohtainare suachu yoa duaeraja mari. Ñ jina wapanaahca tinare. Bucupariropu wahaga. Tõpu su, yohgari canore doca ñoga. Ñ yoacu wahi muhure churirore tuãga. To duseropu niñeru ture bocaihcã muhu. Tí tu quihõno wapa tiri tu jirohca. Yuhure, muhu cũhure Cohamacu wuhu macaina

ti wapa cahmachu noano quihôno mu surohca tí tu. Tí ture bocacu mari wapamonore wapai wahaga —nire Jesu Pedrore.

Jesu buheina tina mehne macarirore puhtoro sô duaa nimaha

(Mr 9.33-37; Lc 9.46-48)

18 ¹Tí pjare sã to buheina Jesu cahapu su, ô sehe ni sinitui tirore: —¿Muano macariro puhtoro to suho jiropure sã mehne macariro diro baro sehe wahabocari puhtoro? —ni sinitui sã.

²Sã ã nichu Jesu nijinocãre pjiroca, tirocãre sã panoi duhu dapore. Duhu dapo tuhsu, sãre ô sehe nire:

³—Potocã musare yahu bahrañoihtja. Ahrina macanacã Cohamacure ti puhtoro waro tuhotura. ã jina musa cûhu pano musa tuhotumari cjirire coh-totaerana, tinacã yoaro sehe tuhotuerana muano macariro puhtoro to suho jiropure wahasi musa. ⁴ã jiro muano macariro puhtoro to suho jiropure niji siaroca yoariro painare yuhduruca duaerariro ahroro nijinocã yoaro sehe tuhoturirota paina bui puhtoro wahara. ⁵ã jina yu yare yoana tana ô sehe jiinacãre cahmana, yuhu cûhure cahmana musa —ni yahure Jesu.

Ñaare yoachu cua nina

(Mr 9.42-48; Lc 17.1-2)

⁶ã ni yahu tuhsu, tinare ô sehe ni yahu namore:

—Ahrorocã sehe jiriore ñaare yoa dutiro tiro ñabiario yuhdurohca. Cûirore to wamuare pjiria tâcare duhte yo, pjiri mapu tirore ti cohâchu ñano wahaboa tiro. ã jiro ahrorocã sehe jiriore ñaare yoa dutiriro tiro sehe pjiri mapu ti cohâriro yuhdoro ñano yuhdurohca. ⁷Masare ñaare yoachu yoa jira. Tíre yoa ahri yahpa macaina ñano yuhdura. Ñaare yoarucura masa. Tí ã yoachu tinare ñaare yoachu yoa sehe ñabiario yuhduahca.

⁸Mu wamomaca mehne ñano yocu tí wamomacare mu dute cohâboro seheta tí mu ñaa yoa sehere duhuga. Tíre duhueracu pichacapu wahaihca. Tópure ne pichaca yatierara. Mu wamomacare mu cohâchu tí si dihta butiboa. Tuhsu, muhu sehe ã si jipaihta baharo Cohamacu mehne jiihca. Pua wamomaca mehne pichacapu wahacu mu ã wahachu ñaa yuhduaboa muhure. ã jicu tí mu ñaa yoa sehere duhuga.

⁹Mu dahporo mehne ñano yocu tí dahporo cûhure mu dute cohâboro seheta tí mu ñaa yoa sehere duhuga. Tíre duhueracu pichacapu wahaihca. Tópure ne pichaca yatierara. Mu dahporore mu cohâchu tí si dihta butiboa. Tuhsu, ã si jipaihta baharo Cohamacu mehne jiihca. Pua dahporo mehne pichacapu wahacu mu ã wahachu ñaa yuhduaboa muhure. ã jicu tí mu ñaa yoa sehere duhuga.

⁹Mu capariaca mehne ñano yocu tiare orewe mu cohâboro seheta tí mu ñaa yoa sehere duhuga. Tíre duhueracu pichacapu wahaihca. Tópure ne pichaca yatierara. Tiare mu cohâchu tia dihta butiboa. Cû buhusehe capariaca mariapaihta baharo Cohamacu mehne jiihca. Pua capariaca mehne pichacapu wahacu mu ã wahachu ñaa yuhduaboa muhure. ã jicu tí mu ñaa yoa sehere duhuga —ni yahure Jesu.

Oveja butiriro quitire yahuha Jesu

(Lc 15.3-7)

¹⁰ã ni tuhsu, tinare ô sehe ni yahu namore:

—Ne, ahrinacāre macanacāre ñu yabiena tjiga. Musare niita nija yuhu. Tinacāre ñu wihboina anjoa muanopu jiina sehe yu Pucu cahapu ā jirucura. ¹¹ [Yuhu masuno Cohamacu warocariro ahri yahpapu pichacapu wahaborinare yuhduchu yoai tai nii yuhu] —ni yahure Jesu.

¹² Ā ni tuhsu to tuhutua mehne ō sehe ni quti dahre buhere sāre:

—Ovejare ñu wihboriro cien ovejare cjuariro cūiro oveja butia wahachu ō sehe yoarohca tinare ñu wihboriro sehe. Paina ovejare noventa y nueve ovejare ti churi campopu duhu dapo, butirirore macano waharohca. ¹³ Potocā niita nija musare. Tirore bocaro wahcherohca tiro. Paina noventa y nueve duhsaina mehne wahchera tiro. Tinare to wahcheriro yuhdoro butiriro sehere bocaro tuaro wahcherohca. ¹⁴ Tó seheta ñu wihboriro oveja to butichu cahmaeraro seheta musa Pucu muano macariro ahrina wiho jiina cūhure pichacapu ti wahachu cahmaerara —ni yahure Jesu.

Mu coyeiro muhure ñano to yoachu ō sehe yoa dutiha Jesu

(Lc 17.3)

¹⁵ Ā ni tuhsu ō sehe ni yahu namore:

—Mu coyeiro muhure ñano to yoachu tiro mehne suhudi wahaga. Musa sahsero tīre suhuduga. Mu ā yoachu tiro muhure tuhoboca. To tuhochu “Muhure ne pari turi ō sehe yoasi yuhu”, to nichu mu coyeirore pari turi piti tii nica muhu. ¹⁶ Muhure to tuho duaerachu pinihta cūiro mehne waha duacu o puaro mehne waha duacu tinare piti ti wahcā, pari turi tirore suhuduna wahaga. Musa ā yoachu musare puaro o tiarore to tuhoeraputiachu ñuna paina Jesu yainare tirore yahusāga, Cohamacu yare ti joari pū to niriro seheta. ¹⁷ Ā jina musa mehne macaina cūhure to tuho duaerachu jipihtina Jesu yaina cahmachuinare yahusāna wahaga. Ā jina Jesu yaina cahmachuinare to tuho duaerasinichu ñuna Cohamacure cahmaerarirore musa yoaboriro sehe yoaga tirore. Wapa na cohtarirore musa yoaboriro sehe yoaga tirore.

¹⁸ Potocā musare niita nija. Ahri yahpai musa Jesu yaina ñaare musa yoa dutierachu muanopu cūhure yoa dutisi. Ahri yahpai musa noaare yoa dutichu muanopu cūhure yoa dutia jahca.

¹⁹ Pari turi musare yahuihtja ahrire: Musa puaro Cohamacure sinichu, musa puaro musa sinirire cūno potori musa tuhutuchu yu Pucu muano macariro tīre yoarohca. ²⁰ Puaro o tiaro yu yaina yu yare yoahcina cjihti ti cahmachuchu yuhu tina mehne jija —ni yahure Jesu.

Cahamacuno paio to wapamonore to bo duaerari quitire yahuha Jesu

²¹ Baharo Pedro Jesu cahapu su, ō sehe ni siniture:

—¿Puhtoro, yu coyeiro mu yairo payu tahari yuhure ñano to yoachu ñucu nohope tahari tīre boihcari yuhu? ¿Siete tahari boihcari yuhu? —ni siniture Pedro.

²² Jesu ō sehe ni yuhtire:

—Siete tahari dihta muhure paio to ñano yarire mu bochu tó wahaerara. Payu tahari muhure ñano to yoachu cūhure boga.

²³ Muano macariro masa bui puhtoro to suho jiro ahri quti yoaro sehe jira. Jipihtina masa bui puhtoro jirore dahra cohtainare tirore wapamoinare

wapa pahño duti dutimaha. ²⁴Ti wapamori cjiro to quihō ducachū, tirore dahra cohtaina sehe pjíro wapamorirore tiro cahapū na taha. Wapamoriro pjibiaro wapamoha to puhtorore. ²⁵Ā jiro tiro to wapa masierachū ñuno to puhtoro tirore, to namonore, to pohnare cahamaca sō, tinare painare dua dutimaha. Ā yoa jipihtia to cjuaa cūhure dua duamaha, to wapamonore wapa dutiro. ²⁶To ā dua dutichū pjíro wapamoriro sehe na tuhcu caha su, to puhtorore tuaro siniha: “Puhtoro, yuhure pja ñucu cohtasiniga. Mūhure wapa pahñoihca”, niha tiro to puhtorore. ²⁷To ā nichū tuhorō, tirore pja ñuno to wapamorirore āta bonocaha.

²⁸To ā yoari baharo pjíro wapamoriro cjiro sehe waha, paio dahra cohtarirore tirore mahanocā wapamorirore boca suha. Ā boca sūro wamua ñahaha tirore. “Yuhure mu wapamonore wapa bahrañoga”, niha tiro tó mehne macarirore to yaro sehe dahra cohtarirore. ²⁹To ā nichū paio dahra cohtariro sehe na tuhcu caha su, tirore tuaro sinimaha. “Yuhure pja ñucu mahanocā cohtasiniga. Mūhure wapa pahñoihca”, nimaha paio dahra cohtariro tirore. ³⁰To ā ni sinipachuta tó mehne macariro tirore yuhtieraha. Tuhsu, tiro paio dahra cohtarirore peresu yoa dutiha. Pū to wapa pahñoichupū wiorohca tirore. ³¹Pjíro wapamoriro cjiro mahanocā wapamorirore to ñano yoachū ñū, susini, paina dahra cohtaina sehe ti puhtorore yahusā wahaha. ³²Ti ā ni yahusāchū tuhorō ti puhtoro ti yahusārirore pjiroca, ō sehe niha: “Mūhu ñabiaro jira. Mu yuhure tuaro sinichū mu wapamorirore bo pahñomahi yuhū. ³³Mūhure yū ā yoapachuta mūhu sehe mūhure wapamorirore boerayulti. Mu wapamoriro sehere yū boriro seheta tiro mūhure to wapamoriro cūhure mu bochū noabiaboa. ¿Dohseacu tirore pja ñuerari mūhu ā yoacu?” niha to puhtoro tirore. ³⁴Ā nino tuaro sua, peresu yoaha tirore dahra cohtarirore. Pū to wapa pahñoichupū wiorohca —ni yahure Jesu.

³⁵Ā ni tuhsu, ō sehe ni ahri quitire yahu batoare:

—Tó seheta yorohca yū Pūcu mūano macariro musare. Musa jipihtina musa coyea musare ti ñano yoirire noano musa bo pahñoerachū tiro musare buhiri dahrerohca —nire Jesu.

Ti namosānumiare cohāare yahuha Jesu

(Mr 10.1-12; Lc 16.18)

19 ¹Tíre to ā ni yahuri baharo tiro Galileai jiriro Judea yahpapū säre suho wahare. Jordāo pa buhusehe coapū sui sã. ²Tópū sã wahachu payū masa säre nūnu ti wahcāre. Tina mehne macainare dohatiinare noaina wahachū yoare firo.

³Ā yoa cāina fariseo curua macaina Jesure yahusā duaa, ñano to durucuchū tuho duaa, tirore ō sehe ni sinitu ñure:

—¿Mari cahmano seheta mari namore cohāchū noabocari? ¿Mari dutia sehe tó seheta yoa dutijari, mu tuhutuchū? —ni sinitu ñure tina.

⁴Jesu ō sehe ni yuhtire:

—¿Cohamacū yare ti joari pūi ne ahrire buherasiniri musa? Ō sehe ni joaa tiha: “Wahmanopure ahri yahpare bajuamehneriro mūno, numino cūhure yoaha”, ni joaha. ⁵Tuhsu ō sehe ni joa namoha: “Mūno to pūcusumare cohā wija, to namono mehne jirohca. Ā jia tina puaro jipahta cū pjacu yaro seheta jira”, ni joa namoa tiha. ⁶Ā jia tina puaro yaro sehe jierara. Cū pjacu yaro

sehe jia nina. Cohamacu to wamomaca duhte dutiina jira. Ñ jia tinare duhue-raro cahmana —nire Jesu tinare.

⁷To ã nichu fariseo curua macaina ò sehe ni siniture tjoa:

—Mu ã ni yahupachuta ò sehe ni joaa tiha Moise cjiro sehe: “Mu namore cohã duacu papera pui tíre joaga. Ñ joacu tí püre mu namore mu wari baharo ticorore cohã masina muhu”, ni joaa tiha Moise cjiro. ¿Mu nino sehe jipachuta Moise cjiro sehe dohsearo ò sehe ni joari? —ni sinitu namore tina tirore.

⁸Jesu ò sehe ni yuhtire tinare:

—Cohamacure musa ñuchusuma ti tuho duaerachu ñuno ti namosãnu-miare ti cohãchu, “Áta yoawahnojaro”, ninocaa tiha Moise. To ã nipachuta wahmanopüre ahri yahpare ã jierare. ⁹Musare niita nija. Masuno to namono to ñano yoerapachuta ticorore cohãno, pacorore namo tiro, tiro pacoro mehne ñano yoaro nina. [Tuhsu, ahriro to cohãricorore namo tiriro cãhu ticoro mehne ñano yoariro jira] —nire Jesu.

¹⁰To ã nichu tuhona, sã to buheina sehe tirore ò sehe nii:

—Tó sehe muno to namono mehne ti cahma cohãerachu mari sehere mari namo tierachu noaboca —nii sã.

¹¹Jesu ò sehe ni yuhtire:

—Musa nino seheta jira. Ñ jiro cãinare namo ti dutierara Cohamacu. ¹²Muare namo ti dutieraa cãa jira. Cãina mua numiare cahmaeraina masa bajuara. Paina mua masa ti wapãri tãhoca ti warina sehe namo ti masierara. Paina mua muano macariro ti puhtoro yare yoadoho duaa, namo tierara. Ñ jia ahrina namo ti duaeraina áta tuhutunocaina, tó seheta ti ji sohtori tichu noana —nire Jesu sãre.

Macanacã ya cjihtire Cohamacure sini payoha Jesu

(Mr 10.13-16; Lc 18.15-17)

¹³Ñ yoa masa macanacãre Jesu cahapu na wihire. Ñ na wihia, tina Jesure to wamomacare tinacã bui ña payo duti duamare. Ñ yoa tinacãre Cohamacure sini payo duti duamare Jesure. Ti ã yoachu ñuna sã to buheina tinare tuhtimahi. ¹⁴Sã ã tuhtichu ñuno, sãre Jesu ò sehe nire:

—Macanacã yu cahapu tajaro. “To cahai wahaena tjiga”, niena tjiga tinacãre. Tinacã Cohamacure ti puhtoro tuhutura. puhtoro Cohamacu to suho jiina ahrinacã yoaro sehe tuhutuina baro dihta jira —nire Jesu sãre.

¹⁵Ñ ninota to wamomacare tinacã bui ña payo tuhsu, wahaa wahare.

Pache puro Jesure sinitu ñuha

(Mr 10.17-31; Lc 18.18-30)

¹⁶To ã yoari baharo cãiro masuno Jesu cahapu wihi, siniture tirore:

—¿Ne, buheriro, jipihtia dachoripe Cohamacu mehne ã jirucu duacu, noaare yoa duacu di baro sehere yoabocari yuhu? —nire tiro.

¹⁷—¿Dohse jiro baro yuhure noaa barore ni sinitujari muhu? Cohamacu dihta noariro jira. Jipihtia dachoripe Cohamacu mehne ã jirucu duacu to dutiare yoaga —nire Jesu.

¹⁸—¿Di baro dutia sehere nii nijari? —ni sinitu namore tiro.

Jesu ò sehe ni yuhtire:

—Masare wajãecu tjiga. Namu tiriropu paye numia manu tia numia mehne jiecú tjiga. Yacaecu tjiga. Mahñoa mehne painare yahusãecu tjiga. ¹⁹Mu

pucsumare ño payoga. Mu basi mu cahño sehta mu cahai jiro cūhure cahña. Ahri dutiare yoihca muhū —nire Jesu.

²⁰—Ahri dutiare ne yuhduracaera tihi yūhū. ¿Dohse yoa namoihcari yūhū jipihtia dachoripe Cohamacu mehne jirucu duacu? —nire tiro Jesure.

²¹To ā nichū tuhorō Jesu ō sehe ni yahu namore:

—Muhū ñaa buhiri marieriro ji duacu mu ya jipihtiare duai wahaga. Ā duacu jipihtia mu wapatarī niñerure pjacuoinare waga. Mu ā yochū payu mu wapataa muanopu, Cohamacu cahapū jiyuahca. Mu ā yoiari baharo yūhū mehne macariro cjihto taga —ni yahure Jesu.

²²To ā nichū tuhorō tuaro cahyare. Tiro payu pache cjuariro jiro, tíre pjacuoinare wa duaeraro, cahya, wahaa wahare.

²³To ā wahari baharo Jesu sāre to buheinare ō sehe ni yahu namore:

—Potocā musare niita nija. Pache puro puhtoro Cohamacu to suho jiropure to waha duachu mijobiara. ²⁴Musare yahu namoihtja: Camello sehe awicā copapu to sāa nuhri wijaa duachu basioerara tirore. To ā jiro yuhdoro pache puro puhtoro Cohamacu to suho jihtopu to waha duachu mijobiara —nire tiro.

²⁵To ā nichū tuhona sā cuaa waha, sā basi ō sehe nii:

—Cue, to nino sehta jichū, ne cūiro masuno Cohamacu cahapū waha masieraboca —nii sā basi.

²⁶Sā ā nichū Jesu sāre ñuroca ō, ō sehe ni yahure:

—Masa ti basi ti mu suro yuhdu masierara. Wiho mejeta Cohamacu sehe masare pichacapu wahaborinare yuhdo masina. Tiro jipihtiare noano yoa masi pahñoriro jira —nire tiro sāre.

²⁷To ā nichū Pedro tirore ō sehe nire:

—Tuhosiniga. Sā sehe sā ya jipihtiare cūnoca tii muhū mehne wahana tana. ¿Sā ō sehe yoana, dohse jiare wapatanahcari sā? —nire tiro.

²⁸To ā nichū tuhorō ō sehe nire Jesu:

—Musare niita nija: Pihtiri dacho jichū jipihtia wahma dihta cohtotaahca. Tí pjapure yūhū masuno Cohamacu warocariro yūhū puhtoro yu dujiroi si siteroi dujiijca yūhū. Tói yu dujichū masa cūhū doce dujia pahtarihi puhtoa ti dujia pahtarihi dujinahca. Ā jina Israe masare doce curuari macainare besenahca masa noaina, ñainare. ²⁹Ā yoa yu yare yoana tana masa wuhusere, masa bahanare, masa pucsumare, masa pohnare, masa weserire cūnocarina jina, pjíro wapatanahca. Tuhsū, jipihtia dachoripe Cohamacu mehne jirucunahca. ³⁰Wiho mejeta mipure payu puhtoa jirina cjiri tí pjapure wiho jiina tjuanocaahca. Tuhsū, mipure payu wiho jiina jirina cjiri tí pjapure puhtoa cohtotaahca tjoa —ni yahure Jesu sāre to buheinare.

Se wesere dahraina quitire yahuha Jesu

20 ¹Ā yoa Jesu pari turi to tuhotua mehne piti dahre ō sehe ni yahu namore tjoa:

—Muano macariro masa bui puhtoro jira. Wese puro quti mehne puhtoro Cohamacu to suho jirore yahuihtja musare. Tiro wese puro bohrea paricaroi to wesere dahrahtinare pjiro wahaha. ²“Cū tu niñeru tu wapaihtja cū dachore”, niha tinare. “Jai”, niha dahrahtina. Ti ā nichū wesepu dahra dutiro warocaha tiro tinare.

³Ā yoa dachopu nueve hora jichū pache duaropu wahaha tiro. Tópu suro, paina

dahraerainare ñuha. ⁴ Ñũno tinare ò sehe niha: “Musa cùhu yu wesere dahrana wahaga. Noano wapaihjtja”, niha tiro tinare. ⁵ To ã nichu tuhoa, tina cùhu wesepu dahraa wahaha. Ñ yoa wese puro cohari pja jichu, ñamichahapu tres hora jichu cùhure painare dahra dutiha. ⁶ Ñ yoa ñamichahapu cinco hora jichu pache duaropu tiro wahaha tjoa. Tópũ su, paina dahraerainare ñũno, tinare ò sehe niha: “¿Ne yaba barore yoaerapanahta cù dacho ñurucu nahñoajari musa?” ni sinitu ñuha tinare. ⁷ “Ne, säre dahraa mariahna”, ni yuhtiha tina. “Musa cùhu yu wesere dahrana wahaga”, niha tinare. Ñ jia to niriro sehetã to wesere dahraa wahaha. ⁸ Ñ yoa ñamichahapu dahra duhuri pja jichu wese puro to yaina dahrainare cohtarirore ò sehe niha: “Dahrainare pjiga. Ti wihichu tinare wapaga. Ti baharopu yu dahra dutirinare wapa muhtaga. Tinare wapa tuhsu, paina cùhure wapa tuhsu, yu dahra duti muhtainare wapa batoaga juna”, niha tiro. ⁹ Ñ yoa cinco hora jichu dahra ducainare cù tu niñeru tu wapaha. ¹⁰ To ã wapachu ñua, “Säre bui curero waparohca”, ni tuhotumaha to duti muhtaina cjiri sehe. Tina cùhure cùno potori wapnocaha. ¹¹ Ñ jia niñerure to wapachu ti puhtoro mehne susinia ti basi ò sehe cahma niha: ¹² “Ahrina sã baharopu to dahra dutirina sehe cù horata dahrahre. Sã sehe cù dacho noano dahra nahñoamahi. Ñano sũ sihre säre. Sã ã yoari pja dahrapachuta sã baharopu dahra ducaina cùhure cùno potorita wapnocahre tiro”, ni suaha tina ti basi. ¹³ Cũiro tina mehne macariro to ã nichu tuhoro, wese puro yuhtiha tirore: “Ne coyero, ‘Cù tu niñeru ture wapaihjtja’, nimahicu musare. Yu ã nichu yuhtihre musa. Ñ jicu yu niriro sehetã musare wapahi yuhu. Quihõno wapahi musare. Ne yacaerahi musare. ¹⁴ Ñ jicu yu waparire na, mu wuhupu tjuahga. Ahriroro baharo yu dahra dutiriro cùhure musare yu wapariro purota wapaihjtja. ¹⁵ Yu ya niñeru jira ahri. Ñ jicu yu cahmano sehetã ahri mehne wapaihjtja. ¿Painare yu noano wapachu ñu tuhtijari muhu?” niha tiro wese puro —ni yahure tĩ quitire Jesu.

¹⁶ Ñ nino, ò sehe ni yahu namore tiro:

—Ahri quitĩ ti nino sehetã baharo macari curua wiho jiina yoaro sehe ya curua ji muhtari curua puhtoa ya curua jirohca muanopu. Ñ yoa ji muhtari curua puhtoa ya curua cjiro sehe ti baharopu macari curua wiho jiina ya curua tjuarohca muanopu —ni yahure Jesu.

Pari turi Jesu to yariahtore, to masa wijaahtore yahuha

(Mr 10.32-34; Lc 18.31-34)

¹⁷ Ñ yoa Jerusalēpu wahana cūnoihta waharucuma, säre doce to buheinare pjiroca tuhsu, pa sehepu sã dihtare naahre Jesu. Sã sahsero sã jichu säre ò sehe ni yahure:

¹⁸ —Tuhoga yuhure. Mipure Jerusalēpu wahana nija mari. Tópũ yuhure masunore Cohamacu warocariroro ñaha, painapure yuhure waahca. Sacerdotea puhtoare, mari coyera judio masare buheina cùhure yuhure waahca. Ñ jia yuhure wajã dutiahca tina. ¹⁹ Ñ wajã dutia, judio masa jieraina sehere yuhure waahca. Ti ã wari baharo tina sehe yuhure bujupe, tjana, crusapu cjã puhaahca yuhure. Ñ jii yu yariari baharo tia numu wahaboroi masa wijaiihca —ni yahure Jesu säre.

Santiago, João mehne ti pocoro tinare sinibasaha Jesure

(Mr 10.35-45)

²⁰ Ñ yoa Zebedeo namono puaro to pohna mehne Jesu cahapu su, na tuhcuã caha suha tirore sinino taro:

²¹—¿Dohse yu yoachu cahmajari muhu? —niha Jesu ticorore.

—Muhu puhtoro saacu yu pohmare dutiina soga. Ñ yoacu mu pju buhuseheri batoi dapoga tinare —ni siniha ticoro.

²²Jesu ñ sehe ni yuhtiha:

—Musa ñano yuhduhtore masierapanahta ñ sinina musa. ¿Mipure yu ñano yuhduhto seheta musa cūhu ñano yuhduna cūno pjabocari musa? —niha Jesu ticoro pohmare.

—Cūno pjanahca —ni yuhtiha Santiago, João mehne.

²³—Potocã tjira. Yu ñano yuhduhto seheta ñano yuhdunahca musa cūhu. Wiho mejeta yuhu mehne dutihtinare, yuhu mehne dujihtinare bese masieraja yuhu. Yu Pucu sehe cahno tuhsure tīre. Ñ jia to besehtina dihta yu potobuhusehei yu cō buhusehei dujahca —niha Jesu tinare.

²⁴Ñ jina sã paina diez to buheina sehe Santiago, João ahrina puaro mehne susinii sã. Jesure ti pocoro to sinibasarire tuhona susinii tina mehne. ²⁵Sã ñ susinichu ñño, Jesu sãre jipihtina to buheinare pji cahmachu, ñ sehe ni yahure sãre:

—Cohamacure masieraina puhtoa sehe ti masare dutia, purino mehne dutira. ²⁶Musa sehe ne ñ yoasi musa basi. Musa mehne macariro puhtoro ji duaro, jipihtina tiro mehne macaina cahamacuno jiro cahmana tirore. ²⁷Ñ yoa jipihtinare dutiriro ji duariro paina cahamacuno jiro cahmana tirore. ²⁸Tó seheta jiriro jija yuhu cūhu. Yuhu masuno Cohamacu warocariro ahri yahpapore masare yoadohocu tacu tai. Tuhsu, payu masa ya buhirire yariai tai nii. Ñ yoa masare pichacapu wahaborinare yuhduchu yoai tai nii —nire Jesu sãre.

Puaro capari bajuerainare ñuchu yoaha Jesu

(Mr 10.46-52; Lc 18.35-43)

²⁹Ñ yoa Jericópu jirina sã wahachu payu masa Jesure nunu tire. ³⁰Ti ñ nunu tichu Jesu to yuhduachu puaro capari ñueraina maha duhtu cahai dujiina tuhore. Ñ tuhoa, ñ sehe ni sañurucure:

—Sã puhtoro, Davi cjiro panamino masare yuhdohtiro, sãre pja ñuga —ni sañurucure.

³¹Ti ñ ni sañurucuchu masa sehe tinare tuhtire:

—Dihta mariaha —nire masa tinare.

Ti ñ tuhtichu tuhoa, ti pano sañurucuriro yuhdo curero sañurucu namore tjoa:

—Sã puhtoro, Davi cjiro panamino, sãre pja ñuga —ni sañurucure.

³²Ti ñ nichu tuhoro Jesu suruca, tinare pjiroca, ñ sehe ni sinitu ññre:

—¿Dohse masare yu yoachu cahmajari musa? —ni sinitu ññre.

³³—Sã puhtoro, sãre ñuchu yoaga —ni yuhtire tina.

³⁴Ti ñ nichu Jesu tinare pja ññre. Ñ pja ñño ti caparire ña payore. To ñ ña payochuta tina sehe ñua wahare. Ñ ñua, tirore nunu ti wahcãre.

Jerusalēpu suha Jesu

(Mr 11.1-11; Lc 19.28-40; Jn 12.12-19)

21 ¹Ñ yoa Jerusalēpu sã suhto pano Betfagé wama tiri macapu su muhtasinii sã Jesu mehne. Betfagé tūcu Olivo wama tidu cahai jire. Tōpu

suro, sã mehne macainare puaro to buheinare Jesu to pano waroca muhtare.
² Õ sehe ni yahure tinare:

—Sí macapu burroare nana wahaga. Tópu suna, dóihtu burrore to macunocã mehne ti duhte daporicorore boca sunahca. Tinare boca, yuta dare pjã, na tabasaga yuhure. ³ Musa pjãchu ñuno, cãiro dohse jiro, “¿Dohseana tana burroare pjãjari musa?” to nichu tuhona ò sehe ni yuhtiga: “Mari puhtoro burroare cahmarocasinire. Michapucacã tinare wiarohca tiro”, ni yuhtiga tirore —ni duti warocare Jesu to buheina puarore.

⁴ ã yoare Cohamacu yare yahu muhtariro cjiro to ni joariro seheta. Ò seheta ni joa tiha panopu:

⁵ “Jerusalẽ macainare ò sehe ni yahuga: ‘Ñuga musa.

Musa puhtoro musa cahapu tara.

Tiro masa noariro jira.

Burro macunocã bui pisariro tarohca’, ni yahuga Jerusalẽ macainare”, ni joa tiha panopu.

⁶ Jesu to dutirocaina puaro tí macapu su, to dutiro sehta yoaha tina.
⁷ Burrore, to macunocã cùhure na ta, ti bui sãa suhtire tjuwe na, burrocã bui pjupaha payore tina. Ti ã yoari baharo Jesu tirocã bui muja pjare waharo taro. ⁸ Muja pja tuhsu, tirocã bui Jerusalẽpu wahare. To tachu ñua masa payu ti bui maca suhtire tjuwe na, saño cù muhtare to wahahti mahai, Jesure ño payoa. Paina sehe pùri tia dupurire mahai duhu cù muhta wahcãre tirore ño payoa. ⁹ ã yoa to pano wahaina, to baharo nunu tiina mehne ò sehe ni sañurucure:

—Davi cjiro panaminore marine yuhdohtirore wahche payojihna. Ahriro Cohamacu to warocariro noano jijaro. Muano macarirore “Tuariro jira”, ni wahche payojihna —ni sañurucure masa.

¹⁰ ã jia Jerusalẽpu ti suchu tó macaina sehe ñu cuua wahare.

—¿Cue, diro baro jijari ahriro? —ni cahma siniture tina.

¹¹ Paina masa ò sehe ni yuhtire:

—Ahriro Cohamacu yare yahu muhtariro Nazare Galilea yahpai jiri maca macariro Jesu wama tiroiro jira —ni yahure tina masare.

Cohamacu wuhupu suha Jesu

(Mr 11.15-19; Lc 19.45-48; Jn 2.13-22)

¹² Baharo Cohamacu wuhupu sure Jesu. Tí wuhupu su, sãa wahare. Tí wuhupu duainare, nuchuina cùhure cohã wiore tiro. ã yoaro niñeru cohto-taa mesarire na majareroca doca cù mujare. Bujaare duaina ti duja pahtari cùhure ãta yoare. ¹³ ã yoaro tinare ò sehe nire:

—Cohamacu yare ti joari pui ò sehe nina: “Yũ wũhu Cohamacu mehne durucuri wũhu wama tirohca”, nimare to joari pui. Musa sehe ahri wũhui duana musa basi cahma yacara musa —nire tiro tinare.

¹⁴ To ã yoari baharo capari ñueraina, tini masieraina cùhu Cohamacu wuhupu tiro cahapu wihire. Ti ã wihichu tinare noaina wahachu yoare tiro.

¹⁵ ã noare to yochu ñua, sacerdotia puhtoa, marine judio masare buheina cùhu suare tiro mehne. ã yoa macanacã Jesure “Davi cjiro panamino masare yuhdohtiro, tuariro jira muhu”, ti ni ño payochu tuhoa tó cùhure tina suare.

¹⁶ ã suaa ò sehe nire Jesure:

—¿Ti ã nichu tuhoerajari muhu? Ñ niea tjjaro —ni tuhtire tina Jesure. Ti ã tuhtichu tuhoru Jesu tinare ò sehe ni yuhtire:

—Tina ti ã nichu tuhoja. ¿Cohamacu yare ti joari pui ahrire ne buherari musa?

“Macanacãre, wihãinacãre Cohamacure noano ño payochu yoare muhu”,

nina Cohamacu yare ti joari pui —nire Jesu (“Macanacã yuhure ti ño payochu noana”, nino).

¹⁷ Ñ ni tuhsu tinare cohã wahcã, Betania wama tiri macapu su, tí ñamine tói jire.

Jesu higueraçure yaria dutiha

(Mr 11.12-14, 20-26)

¹⁸ Pa dachoi bohrearopu Jerusalêpu tjuaaro, juca baare Jesu. ¹⁹ Ñ juca baaro, maha duhtu cahai jidu higueraçu wama tidure ñuno, tu dichare macano wahamare. Dicha mariahe tu sehe. Puri dihta jire. Tu ã jichu ñuno Jesu tare ò sehe nire:

—Ahdu ne pari turi dica tisi —nire tiro.

To ã nichuta dóihta tu sehe ñaia wahare. ²⁰ Tu ã wahachu ñuna sã to buheina ñu cua wahai.

—Cue, ¿dohsearo ahdu dóihta ñaia wahajari? —ni sinitui sã.

²¹ Jesu ò sehe ni yuhtire:

—Potocã nii nija musare. Cohamacure noano wacũ tuaga. “Potocã ã yoa-rohca tiro”, nina ahdure yu yoiaro seheta yoa masinahca musa cũhu. Tuhsu, ahdure yu yaria dutiuro yuhdoro yoa masinahca musa. Ahdu tãcure “Duha na, pjiri mapu cohãdu jijaro”, musa nichu duha cohãdu jirohca. ²² Cohamacure musa wacũ tuachu, “Yu siniri seheta ã waharohca”, musa ni wacũchu musa siniri seheta ã waharohca —nire Jesu sãre.

Jesure dutiurore sinituha paina

(Mr 11.27-33; Lc 20.1-8)

²³ Ñ yoa Cohamacu wuhupu tju su, buhere tiro. To ã buhechu sacerdotia puhto, mari coyea judio masa bucuna mehne tiro cahapu wihi, ò sehe ni siniture:

—¿Dohseacu canure ã yoiari muhu? ¿Noa muhure tíre ã yoa dutiri? —ni siniture tina.

²⁴ Ti ã nichu Jesu ò sehe ni yuhtire:

—Musa sehene sinitu muhtaihtja. Noano yuhure musa quihõno yuhtichu musare yahuihtja yuhu cũhu. ²⁵ ¿João masare to bautisachu diro baro sehe tirore bautisa dutia tiari, musa tuhotuchu? ¿O Cohamacu dutiera tiari? ¿O masa sehe dutia tiari, musa tuhotuchu? —ni siniture Jesu tinare.

To ã nichu tina sehe ti basi ò sehe nire:

—¿Dohse ni yuhtinahcari mari? “Cohamacu João dutia tiri jire”, mari nichu, “¿Dohseana Cohamacu João to dutipachuta tirore tuho duaerari musa?” niboca Jesu marine. Ñ jina “Cohamacu João dutia tiri jire”, ni yuhti masieraja mari. ²⁶ Ahrina masa sehe “Potocãta João Cohamacu yare yahu muhtariro jire”, ni tuhotura tina. Ñ ni tuhotua “João to bautisachu Cohamacu

sehe tirore dutierari jire”, mari nichu tuhoa masa suaboca mari mehne. Ñ jina tí cūhure yahu masieraja mari —nire tina ti basi.

²⁷Ti ã niri baharo Jesure ò sehe ni yuhtire tina:

—Joãore bautisa dutirirore sã masieraja —nire tina.

Ti ã nichu tuhora ò sehe nire Jesu:

—Tí pja pinihta yuhu cūhu masa sinitu muhtarire yahueraja musare. Yu yoirire dutirirore yahueraja musare —nire tiro tinare.

Puaro pucuro quitire yahuha Jesu

²⁸To ã niri baharo Jesu to tuhotua mehne paye quiti mehne piti dahre buhe namore tinare:

—¿Ne, dohse ni tuhotujari masa ahri quitire? Puaro pucuro jiha. Wahmino sehere ò sehe niha to pucuro: “Macu, wesepu dahrai wahaga”, niha. ²⁹“Wahaeraja”, ni yuhtimaha to macuno wahmanore. Ñ niparota baharopure wesepu waha duaro jiha tirore. Ñ jiro wahaha tiro. ³⁰Tuhsu, ti pucuro to macuno dūhsariro cahapu su, to wahminore to dutiriro seheta wesepu waha dutimaha. “Jai”, nimaha dūhsariro sehe. Ñ niparota wahaeraha tiro. ³¹¿Diro sehe to pucuro to dutiriro seheta yoari? —ni siniture Jesu.

—To wahmino sehe yoaha —ni yuhtire tina.

Ti ã nichu Jesu ò sehe ni yahure:

—Musare niita nija. Wapa na cohtaina, mua mehne ñano yoarucua numia ti buipu waro masa sehe ñabiaina jira. Ñ jia puhtoro Cohamacu to suho jipopure masa suborirore tina sehe musare mu cō su muhtaahca. ³²João bautisariro buhero musare “Noano yoaga”, ni yahumare. Ñ to yahuchu dūhsariro to pucurore to yuhtiariro seheta tirore tuhoerare masa. Ñ yoa tirore yuhtierare. Wapa na cohtaina sehe, mua mehne ñano yoarucua numia cūhu tirore tuhore. Ti ã tuhochu ñure masa. Masa ã ñupanahca tirore ne tuho duaerare masa. Tuhsu, tuhoerare masa —nire Jesu sacerdotia puhtoare, mari coyca judio masa bucuna cūhure.

Ñaina dahra cohtaina quitire yahuha Jesu

(Mr 12.1-12; Lc 20.9-19)

³³Ñ yoa Jesu pari turi to tuhotua mehne ò sehe ni piti dahre tinare buhe namore:

—Ahri quitire tuhoga masa. Yahpa puro jiha. Tiro to ya yahpai se dari cijh-tire toaha. Toa tuhsu, sahrinore dapo, sere ti tu mutohti copare saha, muari wuhucā dahreha.

Ñ jiro tí wesere painare cū buhusehe coa pahma cūha. Ñ pahma cūno tí wesere tinare ñu wihbo duti, pa yahpau wahaha tiro. ³⁴Ñ yoa se ñiri pja jichu wese puro tirore dahra cohtainare wesere ñu wihboina cahapu warocaha. Wese macaa to toaa dichare to ya coa macaa dichare na dutiro warocamaha. ³⁵To ã warocachu wesere ñu wihboina sehe tirore dahra cohtainare ñano yoaha. Cūirore tuaro cā, pairore wājā, pairore tāa mehne docaha. ³⁶Baharo wese puro pari turi tirore dahra cohtainare to waroca muhtarina bui curero puhtoia jiri curuare warocaha tjoa. To ã warocachu wesere ñu wihboina tina cūhure munanota yoaha tjoa.

³⁷Ñ yoa to waroca batoariro to macuno jiha. “Yu macu sehere ño payoahca”, nino tirore warocamaha. ³⁸To ã ni tuhotupachuta wesere ñu

wihboina to macuno to tachu ñua, ò sehe niha: “Wese puro macuno jira ahriro. Tiore wajājihna mari. Mari ã wajāchu ahri wese mari ya wese tjua-rohca”, nimaha tina ti basi. ³⁹ Ñ niata tiore ñaha, wese duhtu cahai na wahcā, wajāha tina tiore.

⁴⁰ ¿Ne, wese puro taro dohse yoarohcari tiro wesere ñu wihboinare, musa tuhotucha? —ni siniture Jesu sacerdote puhtoare, bucuna cūhare.

⁴¹ To ã nichu tina ò sehe ni yuhtire:

—Tiro painare wesere ñu wihbohtinare cohtotarohca ji muhtainare ñabai-nare wajāno taro. Tiore quihōno dichare tju wahtina sehere ñu wihbo duti-rohca —ni yuhtire tina.

⁴² Ti ã nichuta Jesu yahu namore tinare:

—¿Cohamacu yare ti joari pui ahrire yuhure to ni joari cjiire ne buherari musa?

“Ahriro Cristo tāca yoaro sehetā jira.

Tācare wuhu dahreina ti cohāno sehetā masa tiore cohāahca.

Ti ã yoapachuta mipure wuhu dahreina wuhure yoa ti cū muhtari tācare ti cūno sehetā Cohamacu tiore puhto sōre.

Cohamacu sehe ahrire yoare.

To ã yoachu ñuna, ‘Noa yuhduara’, ni tuhotuja mari”,

ni joa tiha panopu. ¿Tíre ne buherari musa? ⁴³ Musare niita nija yuhu. puhtoro Cohamacu to suho jiro musa jihto cjihto jiboa. To puhtoro jirore paina sehere musa jiborirore warohca Cohamacu. Paina masa sehe to dutiro sehetā yoaahca. ⁴⁴ [Jipihtina tia tāca bui bora pjainare payu dihicā peri yih-sorohca tia tāca. Tuhsu, tia tāca sehe masuno bui bora pjaro tahānocanohca tiore. To pjacu cjiore daa manaricā wahachu yoarohca. (Tó sehetā yuhure cahmaeraina yu buhiri dahrehtina ñano yuhduahca) —nire Jesu sacerdotea puhtoare, mari coyea judio masa bucuna cūhare.]

⁴⁵ Tí quitire to ã nichu tuhoa, “Sohō to yahu muhtari quti wesere ñu wih-boina quti mehne marine nino nica tiro”, ni tuhoture tina. ⁴⁶ Ñ ni tuhotua, tiore ñaha duamare. Masa sehe Jesure ño payo “Cohamacu yare yahu muh-tariro jira tiro”, niina jia tiha tina. Tíre masia, sacerdotea puhtoa, bucuna mehne masare cuia, Jesure ñahaerare.

Pjiri bose numu macaa quitire yahuha Jesu

22 ¹ Ñ yoa pari turi to tuhotua mehne paye quti mehne tinare buhe ducare Jesu:

² —Muano macariro puhtoro to suho jiro ahri quti yoaro sehe jira. Cū yahpa macaina bui puhtoro jiha. Ñ yoa to macuno ya numu bōse numu yoaha. To wamomaca duhteri bōse numu jiha. ³ Ñ yoa puhtoro tiore dahra cohtainare bōse numure ñua tahtinare pji dutiro warocamaha. Tina sehe ta duaeraha. ⁴ Ñ jiro painare pji dutiro warocamaha tjoa tiore dahra cohtainare. “Yu pjirocainare ò sehe ni yahuga. ‘Mari chuhtire dahre tuhsuhre. Wachuare, wachuacā dihi tiinacā cūhare wajā tuhsuhre. Ñ yoa jipihtiro bōse numu macaa cjihtire cahno tuhsuhre. Ñ jina bōse numu macaare chuna taga’, ni yahuga tinare”, ni warocamaha puhtoro tiore dahra cohtainare. ⁵ Dahra cohtaina ti ã yahuri baharo to pjirocarina cjiiri ã tuhotunocaha. Bōse numure ñua wahaeraha. Cūiro to wesepu wahaa wahaha. Pairo to dahraare ñuno

wahaha. ⁶Paina sehe tirore dahra cohtainare ñaha, tinare ñano yoa, wajāno-caha juna. ⁷Ti ā yoachū tuhorō, puhtoro sehe suaha. Sua, ti ā wajāri buhiri buhiri dahre dutiro to surarare warocaha. Ā jia surara tinare wajā pahño, ti ya macare jūnocaha. ⁸Ti ā yoari baharo, puhtoro tirore dahra cohtainare ō sehe niha: “Bose numū macaa cjihtire cahno tuhsūmahre. Wiho mejeta yū pjiroca muhtarina cjiri yū bōse numure ñuborina jierara. Ñaina jira tina. ⁹Ā jina macare jia maharipu dohse jiina musa boca suinare bōse numure ñuhtinare pjiga”, niha tirore dahra cohtainare. ¹⁰To ā nichū tirore dahra cohtaina maharipu waha, jipihtinare ti boca suinare, ñaina, noaina cūhure yahuha. Ti ā pjiri baharo to cahapū suha tina peri. Noano tí bōse numū ti yoari tahtiare masa wahpata yuhdua wahaha.

¹¹Tói ti dujichū puhtoro sehe cūiroke wamomaca duhteri numū macari suhtirore sāaerarirore ñuha. ¹²“¿Ne coyeiro, dohse yoacū wamomaca duhteri numū macari suhtirore sāaerapaihta sā tari muhū?” ni sinituha puhtoro. To ā sinituchū masuno sehe yuhtieraha. ¹³To ā yuhtierachū ñuno tirore dahra cohtainare ō sehe niha: “Ahrirore to wamomacarine duhtega. To dahpori cūhure duhtega. Duhte tuhsū na wijaa, sopacapū cohāga tirore nahitianopū. Tópū tiro tuaro tii, cahyaro mehne bahca dihorohca”, niha puhtoro —ni yahure Jesu.

¹⁴To ā niri baharo ō sehe ni batoare tiro:

—Ahri quití jiro seheta Cohamacū payū masa to pjirocarina ti jipachuta mahainacā tiro mehne tjuaahca —ni yahu batoare Jesu.

Puhtoa ya wapare paina sinituha Jesure

(Mr 12.13-17; Lc 20.20-26)

¹⁵To ā niri baharo fariseo curua macaina waha, Jesure ti yahusāhtore ti basi durucua tina. To ñano yuhtichū tuho dua nimaha tirore yahusā taa. ¹⁶Ā durucua tina mehne macainare, Herode ya curua macaina cūhure Jesure sinitu dutia warocaha. Tina sehe Jesu cahapū wihi, tirore mahño cū sinitu ñumare:

—Buheriro, potocā durucuriro mahñoa marieriro mū jichū masija sā. Cohamacū yare quihōno mū yahuchū cūhure sā masija. Ā jicu cūiro puhtoro waro to jipachuta tiro cūhure dórero marieno potota yahura muhū. ¹⁷Ā jicu sāre yahuga. ¿Roma macariro jipihtina bui puhtoro jiriroke gobierno macaare marine waparo cahmajari, mū tuhotuchū? ¿Mari dutia tirore wapa dutijari? —ni siniture tina Jesure.

¹⁸Ti ā nichū tuhorō tirore ti yahusā duaare masino ō sehe nire:

—Mahñopeina jira musa. ¿Dohseana yū ñano durucuchū tuho duajari musa? ¹⁹Mipure niñeru ture puhtoare wapahti ture na tahga. Tí ture ñujihna —nire tiro.

To ā nichū tuhoa niñeru ture na tare tina.

²⁰Ti ā na tachū ō sehe ni siniture tiro tinare:

—¿Diro baro masū wahājari ahri ture? ¿Diro baro wama wahājari? —ni siniture.

²¹—César, masa bui puhtoro masu, to wama cūhu wahāna —ni yuhtire tina.

Ti ā nichū tuhorō Jesu ō sehe ni yahure:

—Tí pja pini masa bui puhtoro yare tiro sehere waga. Cohamacu yare Cohamacu sehere waga —nire Jesu.

²²To ã nichu tuhoa, tuho cuaa waha, wahaa wahare Herode ya curua macaina.

Saduceo curua macaina Cohamacu to masoare sinituha Jesure

(Mr 12.18-27; Lc 20.27-40)

²³Ã yoa tí dachoihta caina saduceo curua macaina Jesu cahapu wihire. Saduceo curua macaina sehe “Cohamacu yariainare masosi”, ni tuhoutuina jire. ã jia õ sehe nire tirore tina:

²⁴—Buheriro, õ sehe ni buhea tiha Moise cjiro: “Cũiro to wahmino namo tiro pohna mariaparota to yariachu to bahurore to wahmino namono cjirore nuoano cahmana. ã yaro to wahmino munano to pohna tiboro seheta pohna tiro cahmana to bahurore. ã jia to pohna to wahmino munano pohna yaro sehe jahca”, ni joaa tiha Moise cjiro —nire tina saduceo curua macaina.

²⁵Tíre ã ni yahu tuhsu ahri quitire yahu namore tina Jesure:

—Cũiro masuno jiha. Seis to bahana jiha. Ti wahmino sehe namo ti, pohna marieriro yariaa wahaha. Tuhsu, paio to bahuro cũhu to wahmino namono cjirore nuoaha. ²⁶To ã nuoari baharo to wahmino yaro seheta pohna mariaparota yariaa wahaha tjao. ã yoa ahriro bahuro to wahmino munano yaro seheta pohna mariaparota yariaa wahaha. ã dihta wahaha cũiro pohna waro. Ne pohna mariapahta yaria pihtia wahaha tina. ²⁷Ti namono cjiro cũhu ti baharota yariaa wahaha juna. ²⁸¿Ne, Cohamacu jipihtinare yariaina cjirore to masochu diro baro namono jibocari ticoro? Tina jipihtina ticorore namo tirina cjiro jiha. ¿ã yoa diro namono sehe jibocari ticoro pototi? —ni siniture tina.

²⁹Jesu õ sehe ni yuhtire tinare:

—Cohamacu yare ti joari pũre, to masia cũhure ne masierara musa. ã yoa musa tuhoutu sehe ne potocã jierara. ³⁰Yariarina cjiro ti masa mujari baharo tina anjoa yaro sehe jira. Tina namo marieina, manu mariea numia jira tũpũre. ³¹Yariarina cjiro ti masa wijaahito sehere masare yahuihtja. ¿Cohamacu masare to niri cjirore ne buherari musa? Õ sehe niha tiro: ³²“Yũhu Abrahã, Isaa, Jacobo ti puhtoro tjija’, nina Cohamacu”, ni joaa tiha panopũre. Ti yariari baharo “Ti puhtoro tjija”, ni yahuha Cohamacu. ã niparota yariarina cjiro puhtoro jierara Cohamacu. “Ti puhtoro tjija”, to nia mehne catiina ti jichu masija mari. Tiro catiina puhtoro jira —ni yahure Jesu tinare.

³³To ã ni buhechu tuhoa payu masa tuho cuaa wahare.

Cãno noa yũhũaro to dutiare yahuha Jesu

(Mr 12.28-34)

³⁴Ã yoa saduceo curua macaina Jesure ti yuhti masierachu tuhoa, fariseo curua macaina sehe tiro cahapu cahmachure. ³⁵Cahmachu, tina mehne macariro marine judio masare buheriro sehe Jesu to ñano nichu tuho duaro mahũo cũ sinitu ñumare tirore.

³⁶—¿Buheriro Cohamacu ya dutia noa yũhũaro di baro sehe jijari, mu tuhoutu? —ni siniture tiro.

³⁷Jesu tirore õ sehe ni yuhtire:

—“Tuaro musa yajeripohna mehne, musa tuaa mehne, noano musa wacūa mehne Cohamacūre cahīga”, nina Cohamacū. ³⁸Ahri dutiata paye dutia yūhdoro noa yūhduara. ³⁹Ahri dutia baharo paye dutia noa yūhduara: “Mū basi mū cahīno seheta mū cahai jiina cūhure cahīga”, nina Cohamacū. ⁴⁰Ahri pūaro dutiare yoana, jipihtia paye dutiare yoa pahñona nija mari. Cohamacū yare yahu muhtaina cjiri panopu ti joari cūhure yoa pahñona nija mari —ni yahure Jesu.

¿Diro baro coyeiro jijari Cristo?

(Mr 12.35-37; Lc 20.41-44)

⁴¹Ā yoa fariseo curua macaina tói cahmachuina ti jichu ⁴²Jesu tinare ō sehe ni siniture:

—“Cristo, Mesia mari ni pisuriro Cohamacū to warocahtiro jira”, nina musa. ¿Diro baro jijari Cristo ñuchuno cjiro panopu macariro, musa tuhotuchu? —nire tiro.

—Cristo Davi cjiro panamino jirohca —ni yuhtire tina.

⁴³Jesu ō sehe ni yahure tinare:

—¿Cristo Davi cjiro panamino to jichu dohsearo Davi sehe puhtoro tiari Cristore? ¿Dohsearo ā puhtoro ti dutiri Espiritu Santo tirore? Ō sehe niha Davi cjiro:

⁴⁴“Cohamacū yu puhtorore ō sehe nire:

‘Ōi yu poto buhusehei dujiga.

Ā jicu mūhure ñu tuhtiinare mūhure yūhdurucabasaihca yūhu’, nire Cohamacū yu puhtorore”,

ni joaha Davi cjiro. ⁴⁵Ā ni joarota Davi cjiro puhtoro tiha Cristore. ¿Davi cjiro Cristo ñuchuno cjiro jiro dohsearo tiro puhtoro tiari Cristore? (Cristo Davi cjiro puhtoro tjira) —ni yahure Jesu.

⁴⁶To ā ni yahuchu tina tirore ne yuhti masierare. Ā jia tó purota sinitu duhunocare tina tirore. Tuhsu tirore cuia pari turi sinitu ñuerare tirore juna.

Judio masare buheina, fariseo curua macaina cūhu ti ñano yoaare yahuha Jesu

(Mr 12.38-40; Lc 11.37-54; 20.45-47)

23 ¹Ā yoa payu masare sā cūhure Jesu ō sehe ni yahure tjao:

²—Marine judio masare buheina fariseo curua macaina cūhu Cohamacū dutia Moise cjirore to cūri cjirire yahuina jira tina. ³Ti ā yahuina jichu musare ti yahuriro seheta tíre yoa pahñoga musa. Ā yoapanahata tinare ñu cūena tjiga musa. Ti buheriro seheta yoaerara tina. ⁴Masare payu dutira tina. Ā dutipahta ti dutiro sehe masa ti yoaerachu ñua tinare yoadohoerara. ⁵Masa ti ñurocaro dihta noano yoa ñomana tina. Cohamacū yare ti joari pūre ti duhu sāa caa pocacāre, buju curea caa pocacāre ti wūhdua poca bui duhte yohre tina masare ñu dutia. Ti yachuri cūhure duhte yohre. Ā yoa ti suhtipu ti duhu yoa bocari bujubia bocari jira. Cohamacūre ti ño payorire masa sehere yoa ñoa nimana tina. ⁶Tuhsu, bose numuri jichu puhtoa ti dujiapu duji duara. Judio masa mari buhea wuhusepu cūhure noaa dujia pahtari dihtare jicoara tina. ⁷Ā yoa mahapu ño payoa mehne paina tinare ti noano piti boca-sinichu cahmana tina. Tinare “Buheriro”, masa ti ni pisuchu cahmana.

⁸ 'Paina musare pisua "Buheriro", niea tjijaro. Musa jipihtina cūno potori jina nina. Ā yoa musare buheriro cūirota jija yuhū Cristo. ⁹ Ahri yahpa macainare "Mari pucu", nina tinare ño payona nica. Ne ā niena tjiga. Muano macariro dihta mari Pucu jira. Tiro dihtare ño payoro cahmana marine. ¹⁰ Ā yoa masunore "Puhtoro", niena tjiga. Musa puhtoro yuhū Cristo sehe cūirota jija. ¹¹ Cahamacuno yoaro sehe musare yoadohoriro tiro tjica musa puhtoro jihtiro. ¹² Cūiro puhtoro ji duaro tirore wiho jiriro yoaro sehe jiro cahmana. "Wiho jiriro jija yuhū", ni tuhoturiro painare yuhduruca duaerariro tiro sehe puhtoro jirohca —ni yahure Jesu.

**Judio masare buheina, fariseo curua macaina
mehne ti mahñopeare yahuha Jesu**

¹³ To ā niri baharo tinare ō sehe ni yahu namore:

—Musa judio masare buheina, fariseo curua macaina cūhū ñano yuhdunahca. Mahñopeina jira musa. Soro musa buhechu tuhoa musare tuhorina sehe puhtoro Cohamacu to suho jiropure wahasi. Musa cūhū tópure wahasi. Ā buhena tópure waha duainare ducatana nina musa.

¹⁴ ['Musa judio masare buheina, fariseo curua macaina cūhū ñano yuhdunahca. Mahñopeina jira musa. Wapewahya numia ya wuhusere manocahna musa tí numiare. Tuhsu, yoari pja masa ti ñurocaroi Cohamacure sini ñomana musa masare. Musa ā yoari buhiri paina bui curero Cohamacu pjíro buhiri dahrerohca musare.]

¹⁵ 'Musa judio masare buheina, fariseo curua macaina cūhū ñano yuhdunahca. Mahñopeina jira musa. Pjiri mapu pahā, yoaro macaa yahparipu wahara musa, musa dutiare yoah tirore macana tana. Musa dutiare yoah tirore boca, tirore buhera. Musa ā yochu tiro sehe musa yuhdoro pichacapu wahahtiro jirohca.

¹⁶ 'Musa ñano yuhdunahca. Capari ñueraina ti ñu masieraro seheta masieraina jira musa. Ā jipanahta painare buhemana musa. Ō sehe ni buhemana musa: " 'Cohamacu wuhū mehne yu nino seheta yoihtja', niriro to niriro sehe to yoaerapachuta noanohca", ni buhemana musa. " 'Cohamacu ya wuhū macaa uru mehne yu nino seheta yoihtja', niriro tiro sehere to niriro seheta yoa sohtori tiro cahmana" ni, tí cūhure buhemana musa. ¹⁷ Capari ñueraina ti ñu masieraro seheta masieraina jira musa. Tuho masieraina jira. ¿Di baro sehere ño payoro cahmajari? Urure ño payoeraro cahmana. Cohamacu sehe tí uru to wuhū jichu noaa jichu yoara tíre. Ā jina to wuhū sehere ño payoro cahmana musare. Ā jia musa buhea sehe tó wahaerara. ¹⁸ Ahri cūhure buhemana musa: " 'Cohamacu wuhū macari mesa mehne yu nino seheta yoihtja', niriro to niriro seheta to yoaerachu noanohca", ni buhemana musa. " 'Tí mesa bui jia mehne Cohamacure ño payoa ti wari mehne yu nino seheta yoihtja', niriro tiro sehere to niriro seheta yoa sohtori tiro cahmana", ni buhemana musa. ¹⁹ Capari ñueraina ti ñu masieraro seheta masieraina jira musa. ¿Di sehe tí waro jijari, musa tuhotuchū? Cohamacure masuno to ño payoro to wari cjiri tí waro jiera curera. Tí mesa bui Cohamacure to wachu, noaa wahara tí mesa bui jia. Ā jiro tí mesa sehe wiho jiri mesa jierara. Cohamacure ño payoa ti wari bui curero noari mesa jira. ²⁰ Ā jiro "Cohamacu wuhū macari mesa mehne yu nino seheta yoihtja", cūiro nino, tí mesa bui

macaa to wari mehne tiro ã nino nica. Æ jia musa buhea sehe tó wahaerara. ²¹ “Cohamacu wuhu mehne yu nino seheta yoihtja”, cūiro nino, potocāta Cohamacu mehneta ã ninota nica. Cohamacu tí wuhu macariro jira. ²² Æ jiro “Muano mehne yu nino seheta yoihtja”, cūiro nino, Cohamacu to jiropu mehneta ã nino nica. Æ jiro Cohamacu mehneta ã nino nica. Tiro sehe tó macariro jira. Æ jia musa buhea sehe tó wahaerara.

²³ ‘Musa judio masare buheina, fariseo curua macaina cūhu ñano yuh-dunahca. Mahñopeina jira musa. Moa yoaro sehe jiare chuare coachu yoare cjuana mahanocã wamana musa. Cohamacure ño payona tana sacerdoteare wamana musa. Mahanocã wamana musa. Menta, anis, comina wama tia coachu yoare wamana musa. Æ wapanahca noare yoerara musa. Tuhsu, masare pja ñuerara musa. Æ yoa Cohamacure wacū tuaerara musa. Toaa dichare musa narire mahanocã sacerdoteare musa wachu noa nina. Æ wana ò sehe yoa namoga: Noare yoaga. Æ yoa pja ñuga masare. Tuhsu, Cohamacure wacū tuaga. ²⁴ Capari ñueraina ti capari ñueraro seheta masieraina jira musa. Ò sehe yoara musa: Musa ya dutiare yoa dutina, wiho jia waro dutiare yoara musa. Æ yoapanahca Cohamacu to pototi to dutia warore yoerara musa.

²⁵ ‘Musa judio masare buheina, fariseo curua macaina cūhu ñano yuh-dunahca musa. Mahñopeina jira musa. Musa waparire, musa sihnia wahwarire bui musa cosaro seheta noare yoa ñomana musa buicã warohna. Æ yoapanahca Cohamacu yare quihõno yoerara musa. Paina yare maina, musa basi dihta bujuare na duaina jina, Æ dihta tuhutura musa. ²⁶ Capari ñueraina ti ñu masieraro seheta masieraina jira musa fariseo curua macaina. Ñaare musa tuhutuare cohtotaga. Musa Æ yoana masa ti ñurocaroi noaina jinahca musa.

²⁷ ‘Musa judio masare buheina, fariseo curua macaina cūhu ñano yuh-dunahca. Mahñopeina jira musa. Masa copa, yehsea mehne ti wisõri copa yoaro sehe jira musa. Masa tí copare ti ñuchu noari copa bajura. To Æ bajupachuta, puhicha macariro baarirore, to cohārīne, ñaare ñuerara tina. ²⁸ Tó seheta musa cūhu masa ti ñurocaroi noaina sehe bajumana musa. Æ noaina sehe bajuina musa jipachuta musa tuhutuapu ñaa, mahñoa ji yuhduara yariaina yoaro seheta —ni yahure Jesu.

**Judio masare buheina, fariseo curua macaina
cūhure to buhiri dahrehtore yahuha Jesu**

²⁹ Æ ni tuhsu ò sehe ni namore tinare:

—Musa judio masare buheina, fariseo curua macaina cūhu ñano yuh-dunahca. Mahñopeina jira musa. Cohamacu yare yahu muhtaina cjiri panopu macaina ti masa coparire noano cahnomana musa. Tuhsu, noano yoina cjiri ti masa coparire noano cahnomana musa. ³⁰ Æ yoana ò sehe nirucumana musa: “Panopure sã ñuchusuma cjiri ti yoiro sehe sã sehe yoeraboa. Tí pjavu jiinare Cohamacu yare yahu muhtaina cjirire sã wajæeraboa”, nirucumana musa. ³¹ Æ nina musa ñuchusuma cjiri Cohamacu yare yahu muhtainare wajārīna cjiri ti jiri cjirire bajuro wana nica. Tinare wajārīna cjiri panamana ji turaiina musa jia cūhure bajuro wana nica musa. ³² Musa ñuchusuma cjiri ti yoiro seheta yoa sohtori tiwahnoga.

³³ ‘Agã ñima tiina yoaro sehe ñabiaina jira musa. Musa ñaa tuhutumari cjirire cohtota duaerana Cohamacu musa ñaa buhirire pichacapu musare to

cohāhto pano duhti masierara musa. ³⁴ ã jii musare niita nija. Cohamacu yare yahu muhtainare, paina noano masiinare, paina musare buhehtinare musa cahai warocaihtja. Yu ã warocachu musa sehe cāina tinare wajānahca. Painare crusapu cǵā puhanahca. Painare musa buhea wuhusepu tjananahca. Æ yoana macaripepu tinare ñano yoa, muroca nenu tinahca musa. ³⁵ Musa ã yoana jipihtina ñaa marieinare musa wajāri buhiri buhiri tinahca. Noariro Abe cjirore Caī to wajāri buhiri jipihtina musa cūhu buhiri tinahca. Jipih-tina to baharo jiinare noainare ti wajāri buhiri cūhure buhiri tinahca musa cūhu. Æ yoa Cohamacu wuhu cahai wahiquire ti wari mesa cahai Zaca-riare wajāre tina. Tiro sehe Berequias macuno jire. Æ jina Zacaria cūhure ti wajāri buhiri buhiri tinahca musa cūhu. ³⁶ Potocā musare yahuita nija. Tina jipihtinare ti wajāri buhiri mipu macaina cūhu musa buhiri tinahca —ni yahure Jesu.

Jerusalē macainare tuaro cahīha Jesu

(Lc 13.34-35)

³⁷ Æ ni tuhsu ō sehe ni namore:

—Cue, Jerusalē macaina, Cohamacu yare yahu muhtaina cjiire wajārina jira musa. Musa coyea panopu macaina cjiri cūhu āta yoarina cjiri jiha. Æ yoa musa cahai to warocaina cjiire taa mehne doca wajārina jira musa. Caracacoro to pohnare to cǵā mua dupuri mehne to moha coāno sehetā payu tahari cahīrucumahi musare. Musare cahmamahi. Musa sehe yuhure ne cah-maerare. ³⁸ Mipure musa ya maca cohāri maca cjiro jirohca. ³⁹ Potocā musare niita nija. Baharopu taihtja yuhu. Æ yu tachu ñuna musa yuhure “Cohamacu tuaa mehne tariro noano tajaro”, ninahca. Yuhure musa tīre nihto pano yu tjua tahto pano pari turi yuhure ñusi musa —nire Jesu tinare.

“Cohamacu wuhu cohāri wuhu jirohca”, niha Jesu

(Mr 13.1-2; Lc 21.5-6)

24 ¹ Æ yoa Cohamacu wuhui jiri Jesu to wijaa wihichu sã to buheina tí wuhure tí wuhu cahai jia wuhuse cūhure ñuna:

—Ahri wuhuse jira. Ñuga muhu cūhu —nii sã tirore.

² Jesu ō sehe ni yuhtire:

—Ahri wuhusere mipure ñumana musa. Musare yahuita nija. Ahri wuhusere jipihtia musa ñuri cjiri ahri wuhuse macaa taa cūhu cohō pihitia wahaahca. Ne cūria tāca tjuasi —nire tiro säre.

Pihtiri dacho cjihtore yahuha Jesu

(Mr 13.3-23; Lc 21.7-24; 17.22-24)

³ Baharo Olivo wama tidu tūcupu su, tópu dujire Jesu. Tói to dujichu sã to buheina sã sahsero tiro cahapu su, ō sehe ni sinitu ñuhi:

—Yahuga säre. ¿Dohse jichu ã waharohcari mu niriro sehe waharo? ¿Pihtiri dacho panocāre to jichu cūhure, mu tjua tahto cūhure dohse to waha ducachu ñunahcari sã? —ni sinitu ñui sã.

⁴ Jesu ō sehe ni yuhtire:

—Noano yoaga musa. Musare paina ti mahñoare tuhoena tjiga. ⁵ Payu masa “Cristo jija yuhu”, ni mahñoina taahca. Ti ã mahñochu tuhoa payu

masa Cohamacu yare duhuahca. ⁶Musa cahacāi masa paina ti cahma wajāchu tuhonahca musa. Tuhsu, yoropu cūhure ti cahma wajāchu tuhorocanahca musa. Ā tuhopanahta ne tíre pjíro tuhotuena tjiga. Ā waharohca. Ti ā yochu pihtiri dacho cjihto duhsasininohca mini. ⁷Tí pjare cū yahpa macaina pa yahpa macaina mehne cahma wajāahca. Ā yoa cūiro puhtoro yaina paio puhtoro yaina mehne cahma wajāahca. Tuhsu, payu masa juca mehne yariaahca. Ā yoa dohatia payu jiahca. Tuhsu, pjaró yahpa űuhminohca. ⁸To ā wahachu ahri yahpa macainare ti űano yuhdu namohto duhsasinina mini. űano yuhdusinihca.

⁹Tí pjare paina musare űaha, űano yoa dutia waahcu musare paina puhtoapure. Ti ā wachu musare wajāahca. Yu yaina musa jiri buhiri jipih-tina musare űu tuhtiahca. ¹⁰Tí pjare payu yu yaina jimarina cjiro yuhure cohāahca. Ā jia tina mehne macainare tina űu tuhtiahca. Ā yoa tina mehne macaina ti jipachuta tinare űano yoahtinare waahca tina. ¹¹Tí pjare payu “Cohamacu yare yahu muhtaina jija”, ni mahñoina jiahca. Ā jia payu masa ti mahñoare tuhoahca. ¹²Tí pjare űabiario yoaahca masa. Ā yoa tina mehne macainare cahĩ namosi. ¹³Ā jina musa tuaina jina, ahri yahpai musa catisinino puro cūno pjarucuna, yuhdunahca musa. ¹⁴Tuhsu, ahri noaa buhea jipihtiropu ahri yahpape ti yahua buhea jiahca. Puhtoro Cohamacu to suho jiare yahuri buheare ti yahu siteri jiahca, jipihtina tí buheare ti masihto sehe. Ti ā yahuri baharo pihtiri dacho ducarohca.

¹⁵Cohamacu yare yahu muhtariro Daniel cjiro panopu macariro űabiarirore Cohamacu yare űano yoiroro yahua tiha panopure. Tí pjare tiro űariro sehe Cohamacu wuhupu to ducuchu űunahca musa. Ahri yu nirire noano masiga musa. ¹⁶Tói to ducuchu űua, Judea yahpau jiina sehe tūyucu cahapu muroca duhtijaro. ¹⁷Soaro mehne muroca duhtijaro. Tí pjare ti wuhuseri bui macaa waparipu jiina wuhu puhichapu jiare ti yare na wahaeta tjijaro ti waha bahrañohto sehe. ¹⁸Tuhsu, tí pjare paina ti weseripu jiina ti bui macaa suhti wuhupu jia suhtire na wahaeta tjijaro ti waha bahrañohto sehe. ¹⁹Tí pjare niji-pocosanumia, ti pohnare pūa numia cūhu pjacuoro wahaahca. ²⁰Ā jina Cohamacure ō sehe ni siniga: “Puhiro jichu judio masa sã soa numari jichu cūhure sã muroca duhtihti dacho jiero tjijaro”, ni siniga musa Cohamacure. ²¹Tí dachorire masa nu űano wahaahca. Ahri yahpare to bajuamehneri baharo masa űano ti yuhdua jisinia tiha. Ti ā jipachuta jipiehtia tí puria yuhdoro pihtiri dacho panocā űabiario yuhduahca masa. Ā űano ti yuhduri baharo pari turi tó sehe űabiario yuhdusi ahri yahpai juna. ²²Cohamacu tí dachorire mahaa dachoricā jisinchu yorohca. To ā yoerachu ne cūiro masuno yuhdueraboca. Ā jiro to beserina ti yuhduhti cjihtire mahaa dachoricā ā cūsini-nohca Cohamacu.

²³Tí pjare paina musare “űuga. Ōi jira Cristo”, ti nichu tinare tuhoena tjiga. “Tói jira Cristo”, ti nichu tinare tuhoena tjiga. ²⁴“Cristo jija”, ni mahñoina, “Cohamacu yare yahu muhtaina jija”, ni mahñoina jiahca tí pjare. Ā jia Cohamacu to beserinare mahñoa, tina bajuamehneare yoa ñoahca. Ti ā yoa ñochu űua, Cohamacu yaina caina tinare tuhoa “Potocā tjira” nia, Cohamacu yare pa tehe nia duhuboca. ²⁵Ahri jipiehtiare musare yahuyuja musare to ā wahahto pano. Ā jina tuhoga musa. ²⁶Paina masa musare “űuga. Masa marienopu jira Cristo”, ti nichu tópure űuna wahaena tjiga. Ā yoa tina

“Ōi ahri tahti pocai jira tiro”, ti nichu tinare tuhoena tjiga. ²⁷Yuhu masuno Cohamacu warocariro wacuenoca tjua taihtja. Oroca sitero muanore sū muja taropu, sū sānopu wacuenoca to oroca siterocarō seheta wacuenoca tjua taihtja yuhu. ²⁸Yucaare mari nuna, yariariro to pjacu cjiro jichu mari noano masinahca. (Tó seheta ahri musare yu yahuyurire musa nuna noano masinahca ahri yahpapu yu tjua tahto mahanocā to duhsachu cūhure) —ni yahure Jesu.

Cristo ahri yahpapu to tjua tahtore yahuha tiro

(Mr 13.24-37; Lc 21.25-33; 17.26-30, 34-36)

²⁹Ā yahu tuhsuro tinare ō sehe ni yahu namore:

—Tí dachori masa ti nāno yuhdua dachori baharo sū dacho macariro, nāmi macariro cūhu buhria duhua wahaahca. Ti ā wahachu nāhpichoha poca muanopu jia poca bora wahaahca. Tuhsu, muano macaa yahpari tuaro nūhmiahca. ³⁰Tí pjata yuhu masuno Cohamacu warocariro muanopu yu bajua-mehnenore yu nōchu nūahca masa. Ā nūa jipihtia curuari macaina tiaahca. Tuhsu, yu tuua mehne, yu si sitea mehne muano macaa me bui ahri yahpature yu tjua tachū nūahca tina. ³¹Corneta bisiro coa tarohca. To ā coa tachū yu yaina anjoare jipihitropu ahri yahpapu warocaihtja. Tuhsu, jipihitropu yu yaina yu beserinare tina naahca.

³²Mipure higuera cure tuhotuga musa. Tu qiti mehne musare piti dahre buheihtja. Tu yucucu pūri tichu nuna, cūhma mahanocā to duhsachu masina musa. ³³Tó seheta ahri jipihtia yu niri cjirire ti ā wahachu nuna, yu tjua tahto mahanocā to duhsachu masinahca musa. ³⁴Potocā niita nija musare. Tí pja macaina ti yariahto pano jipihtia yu niriro seheta ā waharohca. Muano, ahri yahpa cūhu pihtia wahaahca. ³⁵Muano cūhu ahri yahpa cūhu pihtia wahaahca. Yu durucua sehe ne cohtotasi. Jipihtia yu niriro seheta ā waha sohtori tiarohca.

³⁶Tí dachore yu tjua tahti dachore, tí ora cūhure masieraja yuhu. Anjoa cūhu tíre masierara. Masa cūhu masierara. Yu Pucu dihta tíre masina.

³⁷Noé to jiri pja macaina ti jiri sehta ahri yahpapu yu tjua tahto pano-cāre tó seheta jahca masa. ³⁸Yahpa to minihto pano masa chu, sihni, yoaha. Tuhsu, mua, numiare namo tiha. Noé cūhu ti dohoriapu ti samuhto pano ā yoaa timaha masa. ³⁹Dóihita tuaro coro ta, wacuenoca yahpa minia wahaha. Masa cūhu mini pihtia wahaha. Wacuenoca to miniriro seheta yuhu masuno Cohamacu warocariro ahri yahpature wacuenoca tjua taihtja. ⁴⁰Tí pjare wesepu puaro dahraina ti jichu cūiro yuhure cahmarirore naaihca. Ā yoa yuhure cahmaerario tói tjuarohca. ⁴¹Tí pjare puaro numia cūnoi ti yore arēa numia jichu cūcoro yuhure cahmaricorore naaihca. Ā yoa yuhure cahmaerario tóihta tjuarohca.

⁴²Noano wacū masi cohtaga. Yuhu musa puhtoro, yu tjua tahti dachore ne masierara musa. ⁴³Ahrire wacūga musa. Yacariro to wuhupu to sāa yacahto panore wuhu puro masino, tí namine tiro carieraboa, yacarirore cohtaro taro. Ā yoa yacarirore to wuhupu sāa dutieraboa. Yuhu yacariro to wacuenoca to tariro seheta wacuenoca taihtja. ⁴⁴Ā jina yu yare ā yoarucuna yuhure cohtaga. Yuhu masuno Cohamacu warocariro ahri yahpapu tjua tai wacuenoca taihtja —nire Jesu.

Dahra cohtariro to puhtoro ño payoriro, ño payoerariro cūhure yahuha

(Lc 12.41-48)

⁴⁵ Ñ yoa Jesu to tuhotua mehne ñ sehe ni piti dahre buhe namore tjoa:

—Dahra cohtariro to puhtoro ño payoriro tuho masiriro jira. To ñ jichu ñuno paina dahra cohtaina bui cūna tirore to puhtoro sehe waharo taro. Ñ tirore cū tuhsu wahaa wahara puhtoro. To ñ wahachu ñuno, churi pja jichu dahra cohtariro painare chuare witira. ⁴⁶ Baharo puhtoro to ya wuhui tju wihira. To tju wihichu ñuno dahra cohtariro sehe to puhtoro to dutiriro seheta yoa pahñoriro jiro, wahcheriro jirohca. ⁴⁷ Potocā musare niita nija. To ñ noano dahrachu ñuno to puhtoro jipihtia to yare ñu wihbohtiro cūnohca tirore. ⁴⁸⁻⁴⁹ Wiho mejeta ñariro dahra cohtariro sehe “Yū puhtoro so bajuerara” nino, paina dahra cohtainare cjāpe, pjíro chu, sihni, cahaina mehne caharohca. ⁵⁰ Baharo to puhtoro wacūenoca tjua tarohca. Tí dachore ne masierara dahra cohtariro. ⁵¹ Puhtoro sehe tjua taro ñariro to yoarire tuhorro, tirore tuaro buhiri dahrerohca. Ñ buhiri dahrero, masa ti baharo buhūsehei ñano yoa cohtaina ti waharopu cohānohca tirore. Tópure tiro tuaro tii, cahyaro mehne bahca dihorohca —ni yahure Jesu.

Diez nuhmia quiti mehne buheha Jesu

25 ¹ Ñ yoa Jesu pari turi to tuhotua mehne ñ sehe ni piti dahre buhe namore tjoa:

—Muano macariro masa bui puhtoro to suho jia ahri quiti yoaro sehe jira: Diez nuhmia jiha. Cū ñami tina ti sihāa poca mehne wamomaca duhtehtirore piti bocaa wahaha. ² Tina mehne macaa numia cinco numia tuho masiera numia jiha. Paye numia sehe cinco numia tuho masia numia jiha. ³ Tuho masiera numia sehe ti sihāa pocare, posa tia pocare naamaha. Paye pocare se posa tia pocare ti pihtichu ti pioborire naaeraha. ⁴ Tuho masia numia sehe ti sihāa poca se posa tia pocare naaha. Paye se poca cūhure naaha. ⁵ Ñ jia wamomaca duhtehtiro to bajuerachu tí numiare wujo purichu caria wahaha. ⁶ Ñ ti carini baharo ñami dacho macai sañurucuro coa taha: “Tuho. Wamomaca duhtehtiro taro coa tara. Tirore piti bocana taga”, ni sañurucuro coa taha. ⁷ To ñ nino coa tachu tuhoa tí numia wahcā, ti sihāa pocare cahnoha. ⁸ Ñ yoa tuho masiera numia sehe paye numia tuho masia numiare ñ sehe niha: “Sā sihāa poca yatia nina. Ñ jina mahanocā musa ya sere waga säre”, ni sinimaha tí numia. ⁹ Ti ñ sinipachuta tuho masia numia ñ sehe ni yuhtiha: “Sā ya se mari jipihtinare mu sueraboca. Ñ jina se cjuainare musa basi nuchūna wahaga”, ni yuhtiha tuho masia numia sehe. ¹⁰ Ti ñ nichu tuhoa, tuho masiera numia sere nuchua wahaha. Ti ñ wahari baharo wamomaca duhtehtiro wihia. Ñ to wihichu ñua ti yare cahno tuhsuri numia tuho masia numia tirore piti bocaha. Piti boca, to wamomaca duhteri bose numupu tiro mehne ñua wahaha. Tuhsu, bose numure ti yoari wuhupu paina mehne tí numia ti sāari baharo, sopacare bihanocaha. ¹¹ Baharopu tuho masiera numia sehe wihimaha. “Puhtoro, säre pjōohga”, nimaha tí numia.

¹² “Potocā musare niita nija. Musare masieraja yūhu”, niha tiro tí numiare.

¹³ Ñ jina tuho masia numia ti yare ti noano cahno tuhsu ti cohtariro seheta yu tahtore noano cohtaga musa cūhu. Yū tjua tahti dachore tí hora cūhure ne masierara musa —ni yahure Jesu.

Niñeru tūri uru tūri quitire yahuha Jesu

¹⁴ Ñ ni yahu tuhsu to tūhotua mehne ñ sehe ni piti dahre buhe namore tjoa:

—Tí pja yu tjuā tahti pja ahri quti yoaro sehe jirohca. Wuhu puro jiha. Tiro pa sehēpū tinino waharo taro, tirore dahra cohtainare pjirocacha. Ñ yoaro tinare to yare cohta dutiha.

¹⁵ Ñ cohta dutiro ti wihbo masino puro tinare niñeru tūrire waha. Cūirore cinco tūri wapa bujua tūri uru tūrire waha. Pairore pua tū waha. Pairore cū tū waha. Tinare wa tuhsu, wahaa wahaha. ¹⁶ Ñ yoa cinco tūri to wariro dóihta to wahari baharota tí tūri mehne paye barore nuchuha. To nuchūrire painare duaha. To duari wapa diez tūri waro wapataha tiro. Ñ jiro diez tūri cjuaha. ¹⁷ Ñ yoa pua tū to wariro dóihta to wahari baharota tí tūri mehne paye barore nuchuha. To nuchūrire painare duaha. To duari wapa pititia tūri waro wapataha tiro. Ñ jiro pititia tūri cjuaha. ¹⁸ Cū ture to wariro sehe copa saha, tí ture yaha, tí copapū nuono.

¹⁹ Yoari pja baharo ti puhtoro wihiha. Ñ wihiro to niñeru tūri mehne ti ñaha namorire quihōno taro tirore dahra cohtainare pjirocacha. ²⁰ Ñ to pirocachu cinco tūri to wariro cjiro to puhtoro cahapū su, diez tūri wiaha tirore. “Cinco tūri yuhure ware muhu. Ñujuta. Tí tūri mehne paye cinco tūrire ñaha namohi”, niha tirore. ²¹ “Noano yoari jire muhu. Muhu noariro, yu dutiriro seheta yoariro jira. Mahanocā mehne noano yoare muhu. Ñ jicu mipure muhure pjíro mu dahrahtore cūihtja. Ñ jicu yuhu mehne wahchega muhu”, niha to puhtoro. ²² Ñ yoa pua ture nariro cjiro to puhtoro cahapū su, yahuha tirore: “Pua tū yuhure ware muhu. Ñujuta. Tí tūri mehne paye tūri pua tū ñaha namohi”, niha tiro. ²³ “Noano yoari jire muhu. Muhu noariro, yu dutiriro sehe yoariro jira. Mahanocāre noano yoare muhu. Ñ jicu mipure pjíro mu dahrahtore cūihtja. Ñ jicu yuhu mehne wahchega muhu”, niha to puhtoro. ²⁴ Ñ yoa cū ture nariro cjiro to puhtoro cahapū su, yahuha tirore: “Puhtoro, muhu paina sehere tuaro dahra dutiriro jira. Ñ tuaro dahra dutiriro jicu toaa maerariro jipaihta tí dichare muhu nana. ²⁵ Mu ñ jiriro jichu muhure cuihi. Ñ cuicu copa saha, tí copapū mu niñeru ture nuohi. Ñujuta. Oi jira mu niñeru tū”, niha tiro. ²⁶ To puhtoro to ñ nichu tūhoro tirore ñ sehe niha: “Muhu ñariro, capa bujuriro jira. Yu toaa maerariro jipaihta tí dichare yu nariro jichu masina muhu. ²⁷ Yu ñ jiriro jichu ñucu ya ture niñeru wihbori wuhapū wihboboa muhu. Mu ñ wihbochu tina tí ture wiaapū paye niñeru wa namoboa tina”, niha puhtoro tirore. ²⁸ Ñ nino paina tirore dahra cohtainare dutiha tiro: “Niñeru ture maga tirore. Diez tūrire cjuariro sehere waga. ²⁹ Cjuainare wa namoihtja. Ñ jia pjíro cjuahca. Cjuaraina sehere mahanocā ti cjuapachuta tíre maihtja. ³⁰ Ahriro dahra cohtariro yaba cjihti jierara. Nahitianopū ñanopū cohānocahga tirore. Tópū tiro tuaro tii, cahyaro mehne bahca dihorohca”, niha puhtoro —ni yahure Jesu.

Buhiri dahrehtore yahuha Jesu

³¹ Ñ yoa Jesu ñ sehe ni yahu namore:

—Yuhu masuno Cohamacu warocariro jipihtina anjoa mehne puhtoro jicu tacu, yu puhtoro dujiropū yu si sitea mehne dujiilhca. ³² Ñ yu dujichu, ahri yahpa macaina jipihtina yu cahai cahmachuahca. Ti ñ cahmachuri baharo pua

curua tinare tju waihtja. Ovejare ñu wihboriro to ovejare, to cabra cūhure to tju wariro seheta masare tju wa dapointja. ³³ Æ tju wacu oveja yoaro sehe jiina noinare yu poto buhusehei bese dapointja. Æ yoa cabra yoaro sehe jiinare ñainare yu cō buhusehei bese dapointja. ³⁴ Yu ã yoiari baharo yuhū jipihtina bui puhtoro sehe yu poto buhusehei yu bese dapoinare ò sehe ni yahuihtja: “Yu Pucu musare noano yoare. Ahri yahpare bajuamehnenopu musa ya cjihtire puhtoro to suho jirore cahno basayu tuhsure Cohamacu. Æ jina mipure to cahnorropure jina taga. ³⁵ Yu juca baachu musa sehe yuhure chuare ware. Yu ñahma yapiochu yuhure musa sihöre. Musa cahai yu tinichu yuhure ñu masierapanahta yuhure noano piti bocare musa. ³⁶ Suhti maerariro yu jichu ñuna musa sehe yuhure suhti säare. Dohatiriro yu jichu musa yuhure ñuna tare. Peresui yu jichu cūhure yuhure ñuna tare musa”, nihtja noinare. ³⁷ Yu ã nichu tuhoa tina yuhure sinituahca: “¿Puhtoro dohse jichu mu juca baachu muhure chuare wari sã? ¿Dohse jichu mu ñahma yapiochu muhure sihöri sã? ³⁸ ¿Dohse jichu muhure ñu masierapanahta muhure noano piti bocari sã? ¿Dohse jichu suhti maerariro mu jichu muhure suhti säari sã? ³⁹ ¿Dohse jichu mu dohatichu o peresui mu jichu cūhure muhure ñuna sari sã?” niahca yuhure. ⁴⁰ Ti ã ni sinituchu tuhocu yuhū puhtoro tinare yahuihtja. “Potocã musare niita nija. Ahrina yu yaina mehne macariro wiho jiriro to jipachuta, tirore musa tó seheta yoare. Æ jirirore ã yoana, yuhure yoaro seheta yoana nire musa tinare”, ni yahuihtja.

⁴¹ Noinare yu ã ni yahuri baharo yu cō buhusehei ducuinare yuhū jipih-tina bui puhtoro ò sehe ni yahuihtja: “Cohamacu to buhiri dahrehtina jira musa. Yuhū mehne tjuaena tjiga. Pichacapu wahaga musa. Tí pichaca ne yatierara. Watino, to yaina anjoa cūhu ti jihtore tí pichacare yoare Cohamacu. ⁴² Yu juca baachu musa sehe yuhure chuare waerare. Yu ñahma yapiochu musa yuhure sihörare. ⁴³ Yuhure masierana musa yuhure piti bocaerare. Æ ñnocaboare. Suhti maerariro yu jipachuta, yuhure suhti säare rare musa. Dohatiriro yu jichu peresui yu jichu cūhure ã ñnocare musa yuhure”, ni yahuihtja tinare ñainare. ⁴⁴ Yu ã nichu tuhoa tina yuhure sinituahca: “¿Puhtoro, mu juca baachu, mu ñahma yapiochu, sã masierariro mu jichu, suhti maerariro mu jichu, dohatiriro mu jichu, peresupu mu jichu dohse jichu sã sehe muhure yoadohoerari?” ni sinituahca yuhure. ⁴⁵ Ti ã ni sinituchu yuhū tinare ò sehe ni yahuihtja: “Potocã musare niita nija. Ahrina yu yaina mehne macariro wiho jirirore musa ne yoadohoerare. Æ jirirore musa yoadohoerana, yuhureta ã yoana nire musa”, ni yahuihtja tinare. ⁴⁶ Æ jiro tinare ã buhiri dahrerucurohca Cohamacu. Tí buhiri dahrea ne pihtisi. Æ yoa, noaina sehe jipihtia dachoripe noano jirucuahca —ni yahure Jesu.

Sacerdotea puhtoa, judio masa bucuna mehne Jesure wajã duaha

(Mr 14.1-2; Lc 22.1-2; Jn 11.45-53)

26 ¹ Tí jipihtiare to buheri baharo Jesu säre to buheinare ò sehe ni yahure: ² —Pua dacho baharo pascua jirohca. Tíre musa masina. Tí pjare yuhū masunore Cohamacu warocarirore ñahaahca. Ñaha tuhsu, yuhure crusapu wajãhca —nire tiro säre.

³ Æ yoa sacerdotea puhtoa, judio masa bucuna cūhu cahmachuha. Caifa sacerdotea bui puhtoro ya wuhui cahmachuha tina. ⁴ Tói cahmachu, ti mahñoa mehne Jesure ñaha ti wajãhtore cahma sühudua niha:

⁵—Bose numu jichu tirore ñahaena tjijihna, “Masa suari”, nina —niha tina ti basi.

Numino me sitia se mehne Jesure pio payoha

(Mr 14.3-9; Jn 12.1-8)

⁶Tí pjare Simo cami bucu baariro cjiro ya wuhui jire Jesu. To jiri maca Betania wama tiri maca jire. ⁷Tí wuhui to churo watoi cūcoro numino me sitia na ta, Jesu dapu bui pio payore. Tí me sitia alabastro wama tiriai posa tire. Wapa bujua co jire. ⁸To ã pio payochu ñuna sã Jesu buheina suahi.

—¿Dohsearo ahricoro ahri me sitia co wapa bujuare ã yoa sitejari? ⁹Tí me sitiare duaboa. Æ duaro pjíro wapa naboia. Æ nano tí niñerure pjacoinare waboa ahricoro —nii sã to buheina.

¹⁰Sã ã ni suachu ñuno, Jesu ò sehe ni yahure sãre:

—Æ niena tjiga tiorore. Yuhure noano yoro nina. ¹¹Pjacuoina sehe musa mehne ã jirucuahca. Æ jina tina sehere musa wa masina. Yuhu sehe ahri yahpare musa mehne ã jirucusi. ¹²Yuhure ti yahto pano yu pjacure cahnoyuro, ticoro yuhure pio payore. ¹³Potocã musare niita nija. Jipihtiro ahri yahpapa noaa buheare ti yahuropu ahricoro mipure to yoarire yahuahca. Ti ã yahuchu tuhoa tiorore masa payu wacuahca —ni yahure Jesu sãre.

Juda Iscariote Jesure ñu tuhtiinare to ñohtore yahuha sacerdotia puhtoare

(Mr 14.10-11; Lc 22.3-6)

¹⁴Tí pjare cūiro sã mehne macariro Juda Iscariote sacerdotia puhtoia cahapu suha. ¹⁵Su, tinare ò sehe ni sinituha:

—¿Jesure musare yu ñochu noho puro wapanahcari musa? —ni sinituha tinare.

To ã nichu tina tirore treinta tūri plata tūrire waha. ¹⁶Ti ã wari baharo Juda sehe Jesure to ñohti ñamine cohtasiniha.

Jesu to buheina mehne to chu batoari numu jiha

(Mr 14.12-25; Lc 22.7-23; Jn 13.21-30; 1Co 11.23-26)

¹⁷Bucuaerari pāore ti chua numuri ducari numui sã to buheina sehe ò sehe ni sinitu ñuhi Jesure:

—¿Mari pascua macaa chuhtire noho baroi cahnoyu dutirocaijari muhu sãre? —ni sinitu ñuhi tirore.

¹⁸Sã ã nichu tiro ò sehe ni yahure sãre:

—Jerusalēpu wahaga. Tōi jiriore ò sehe ni yahuga: “Marine buheriro to ñano yuhduhti pja mahanocã duhsatjiāyuhti. Pascua jichu mu ya wuhui Jesu sãre to buheinare suho chuhto jiyuhti”, ni yahuga tí wuhu purore —ni warocare Jesu sãre.

¹⁹To ã ni warocachu sãre to dutiriro seheta yoana, pascua jichu sã chuhtore cahnoyui sã.

²⁰Æ yoa tí ñamine sã mehne doce to buheina mehne churo nire Jesu. ²¹Sã churo watoi tiro sãre ò sehe ni yahure:

—Potocã musare niita nija. Cūiro musa mehne macariro yuhure ñu tuhtiinare ñonohca yuhure —ni yahure tiro sãre.

²²To ā nichu tuhona tuaro cahyana, tirore sinitu ñu ducai sã cãina jipihtina:

—¿Puhtoro, yuhuta jijari mûhure ñohtiro? —ni sinitui.

²³Sã ā ni sinituchu tiro õ sehe ni yuhtire:

—Yu churi wapai yuhu mehne soha churirota jira yuhure ñu tuhtiinare ñohtiro. ²⁴Panopu yuhure ti joariro seheta yuhu masuno Cohamacu waro-cariro yariaihca. Ā jiro yuhure ñu tuhtiinare ñoriro ñano yuhdurohca. Tiro sehe to masa bajuerachu noa yuhduaboa. Ñano yuhdueraboa —nire Jesu.

²⁵To ā nichuta tirore ñohtiro Juda õ sehe ni siniture:

—Buheriro, ¿mûhure ñohtiro tjijari yuhu? —ni siniture tiro.

Jesu õ sehe ni yuhtire:

—Ûju. Mûhuta jira —nire.

²⁶Ā ni yahu tuhsu sã to buheina mehne churo taro nire. Ā yoa Jesu pãore na, Cohamacure “Noana”, nire. Ā ni tuhsu tîre nuha, sãre to buheinare witire.

—Ahrire na, chûga. Ahri yu pjacu jira —nire tiro.

²⁷Ā ni tuhsu tiro sihniri wahware na, Cohamacure “Noana” ni, sãre ware.

—Musa jipihtina ahrire sihniga. ²⁸Ahri yu di jira. Payu masa ti ñaa yoari buhirire cohâcu tacu yariaihca. Ā yariacu yu dire cohâihca. Cohamacu “Musare yuhdoihtja”, to ni cûriro mu suchu yu ā yu yariaro mehne to niriro sohtori tiilhca. ²⁹Musare niita nija. Yu Pucu puhtoro to suho jiropu muanopu musa mehne wahma co vinore sihnihtja. Mari ā sihnihto pano ahri co vinore sihni namosi yuhu —nire Jesu sãre.

³⁰Ā jina Cohamacure ño payo basana cûnore basa tuhsuna tûcu Olivo wama tidupu sui sã.

Pedro Jesure to cohãhtore yahuha Jesu

(Mr 14.26-31; Lc 22.31-34; Jn 13.36-38)

³¹Tópu sã suchu Jesu sehe sãre õ sehe ni yahure:

—Micha ñami yuhure cohã wahcãnahca musa. Õ seheta nina Cohamacu to yare ti joari pûi yuhure yahuro: “Ovejare ñu wihtoriro yoaro sehe jirirore yuhu Cohamacu cohãihtja. Yu ā cohâchu to yaina oveja yoaro sehe jiina duhti site wahcãa wahaahca”, nina Cohamacu to yare ti joari pûi. ³²Ā yoa Cohamacu yuhure to masori baharo musa pano Galileapu wahayuihca yuhu —nire tiro.

³³To ā nichu tuhoru õ sehe nimare Pedro:

—Yuhu mehne macaina jipihtina mûhure ti cohã wahcãpachuta yuhu sehe mûhure ne cohãsi —nimare Pedro tire.

³⁴Jesu õ sehe ni yuhtire:

—Potocã niita nija mûhure. Micha ñami caraca to duhto pano “Yuhu Jesure masieraja”, niilhca mûhu. Tia taha ā niilhca mûhu —nire tiro Pedrorre.

³⁵To ā nipachuta Pedro õ sehe ni yuhtire:

—Mûhu mehne yuhure ti wajã duapachuta “Jesure masieraja”, ne nisi yuhu —ni yuhtimare Pedro.

Ā jina sã cûhu paina to buheina Pedro to niriro seheta nimai sã Jesure.

Getsemaní wama tiropu Cohamacure siniha Jesu

(Mr 14.32-42; Lc 22.39-46)

³⁶Ā yoa Getsemaní wama tiropu Jesu sã to buheina mehne waha, tópu su, sãre õ sehe nire:

—Ōi dujiyusiniga. Musa ōi dujiro wato sohō cureropu Cohamacure sinii wahai nija —nire tiro säre.

³⁷Ā ni tuhsu, Pedrore, puaro Zebedeo pohnare tina tiarore pji wahcäre. Pji wahcä tuhsu, tiro tuaro cahya, ñano yajeripohna tiha. ³⁸Ā cahyaro tó mehne macainare to pji wahcärinare ō sehe niha:

—Tuaro ñano yajeripohna tija yuhu. Yuhure tuaro purino sehetu tuhotui nija michapucacä yu yariaboro sehetu. Sohō curero wahasinii nija. Ōi tjuasiniga. Ā yoa yu cāno potori catiga musa cūhu —niha tiro tinare.

³⁹Ā ni tuhsu mahanocā waha namo, yahpai na tuhcuca caha su, Cohamacure ō sehe niha:

—Mai, yu ñano yuhduhtire yoa duaeracu yoai tjia. Yu ā nipachuta yu cahmano sehe yoai tjia. Mūhu sehe masina. Mu cahmano sehetu yoaga yuhure —ni siniha tiro Cohamacure.

⁴⁰Ā ni tuhsu, tiaro to buheina cahapu wihimahno, carīinare boca wihiha tiro. Ā boca wihiro Pedrore ō sehe niha:

—¿Cū hora waro yu cāno potori cati masierari mūhu? ⁴¹Noano yoaga musa. Musa mu saro quihōno yoa duamana musa. Wiho mejeta musa basi tīre bihoe-rara. Ā jina Cohamacure siniga ñano musa yoaerahto sehe —ni yahuha Jesu.

⁴²Ā ni yahu tuhsu, pari turi waha, Cohamacure ō sehe ni siniha:

—Mai, yu ñano yuhduhtire yoa duacu yoaga yuhure. Mu cahmano sehetu yoaga —ni siniha tiro.

⁴³Ā ni tuhsu, to buheina tiaro buheina cahapu pari turi wihiha tjia. Ā wihiro carīinareta boca wihiha tjia. Wūjo caha yuhduaha tina. ⁴⁴Ā jiro tinare cūnoca, pari turi waha, Cohamacure siniha. Tó pano to niriro sehetu niha tjia. ⁴⁵Ā ni tuhsu to buheina cahapu wihi, tinare ō sehe niha:

—¿Carī, sosinina nijari musa? Tó purota carīga musa —niha tiro.

Ā ni tuhsu, ō sehe ni namoha Jesu:

—Tuhosiniga. Michapucacä yuhu masunore Cohamacu warocarirore ñainare waahca yuhure. ⁴⁶Wahcāga. Basa wahana. Ōga. Yuhure ñu tuhtiinare ñohtiro ōi tara —niha tiro.

Jesure ñu tuhtiina tirore peresu yoaha

(Mr 14.43-50; Lc 22.47-53; Jn 18.2-11)

⁴⁷To ā nino watoi sā mehne macariro cjiro Juda sehe wihire. Tiro mehne masa payu wihire. Tina sacerdoteta puhto, judio masa bucūna cūhu ti warocarina jire. Nosaa pjinine, yucu siri cūhure cjuare. ⁴⁸Wahmanore Jesure ñu tuhtiinare ñohtiro masare ō sehe ni yahu quihō tuhsu:

—Yu wahsupu wihmirirota jirohca musa ñahahtiro. Tirore yu wihmiri baharo ñahaga tirore —niha Juda tinare.

⁴⁹To ā ni tuhsuri baharo wihiro, Jesu cahapu dói waha bahrañore.

—Buheriro, ¿jimajari mūhu? —ni tirore wahsupu wihmire.

⁵⁰To ā wihmichu Jesu ō sehe nire:

—Coyeiro, ¿michapucacä mu yoa duarire yoaga? —nire tiro.

To ā ni tuhsuchu tina Jesure ñahare.

⁵¹Ti ā yoachū ñuno Jesu mehne macariro to ñosari pjine tuāwe na, sacerdoteta bui puhtoro cahamacunore to cahmonore dute pahrēnocare. ⁵²To ā yoachū ñuno Jesu tirore ō sehe ni yahure:

—Mu ñosari pjine wihboga. Painare mu ñosachu ti ñosa cahmachu yariaihca muhu. ⁵³Yu Pucure yuhure yu yoadoho dutichu tiro sehe payu anjoare doce curuarire yu cahai warocaboa tiro. ¿Tíre masierajari muhu? ⁵⁴Á yoadohoboriro to jipachuta tirore yuhure yoadoho dutisi yuhu. Yu á dutierachu Cohamacu yare ti joari pũ to niriro seheta á waharohca —nire tiro.

⁵⁵Á ni tuhsu masare õ sehe ni yahure tiro:

—¿Dohse jiro baro musa ñosaa pjini mehne, yucu tiri mehne yacarirore ti yoariro seheta musa yuhure ñahana tajari? Dachoripe Cohamacu wuhupu musare yu buhe dujichu, musa yuhure ne ñahaerare. ⁵⁶Á jipachuta ahri jipihitia á waharo cahmana Cohamacu yare yahu muhtaina cjiri ti ni joariro seheta —nire Jesu.

Tirore ti á ñahachu ñuna sã to buheina tirore cohã muroca wahcãa wahi sã.

Judio masa puhtoa Jesure sinituha

(Mr 14.53-65; Lc 22.54-55, 63-71; Jn 18.12-14, 19-24)

⁵⁷Á yoa tirore ñaharina cjiri sacerdotia bui puhtoro Caifa wama tiroiro ya wuhupu na suha tirore. Tí wuhuihta marine judio masare buheina, bucuna cūhu cahmachuha. ⁵⁸Tõpu Jesure ti naachu Pedro yoaropu tinare ñu nũni tiha. Á nũni tiro Caifa ya wuhure ducataru sahrĩnoro su, tí sahrĩno puhichapu sãa wahaha. Sãa su, tí wuhure cohtaina surara mehne dujiha. Jesure ti dohse yoachu ñũno taro niha.

⁵⁹Á jia sacerdotia puhtoa, mari coyea judio masa bucuna, paina puhtoa mehne Jesure wajã duti duaa, tiro to quihõno yoaerarire ti yahusãhtire wacũ macamaha. ⁶⁰Wiho mejeta tíre bocaeraha. To quihõno yoaerari maria-pachuta, payu masa tirore ti cahmano yahusãmacanocaha. Á jia puaro ti baharo macaina tirore ⁶¹õ sehe ni yahusãha tjõa:

—Ahrĩro õ sehe nire: “Cohamacu wuhure cohã masija. Á cohãcu tia nũmu wahaboroi tí wuhure pari turi yoihtja”, to nichu tuhohi sã —ni yahusãmacanocaha Jesure.

⁶²Ti á niri baharo sacerdotia bui puhtoro wahcãrucu su, Jesure õ sehe ni sinituha:

—¿Ahrina muhure ti yahusãpachuta tinare yuhti cahmaerajari muhu? ¿Muhure ti yahusãrĩre dohse ni yuhti cahmajari muhu? —niha puhtoro.

⁶³To á nichu tuhõparota Jesu áta tuhõtunocaha. To á yuhtierachu ñũno sacerdotia bui puhtoro pari turi sinituha tjõa:

—Cohamacu catĩro wama mehne potocã niga muhu. Mu á nierachu tiro muhure buhiri dahrerohca. Yahuga sãre. ¿Cristo Cohamacu macũnota jijari muhu? —ni sinituha tjõa.

⁶⁴To á nichuputa Jesu õ sehe ni yuhtiha:

—Tĩrota jija. Musare potocã yahuita nija. Baharo yuhu masũno Cohamacu warocarĩro yu Pucu jipihitina bui tuarĩro cahapu to poto buhusehepu yu dujichu ñunahca musa. Á yoa muano macaa me bui yu tachu cūhure ñunahca musa —ni yuhtiha Jesu.

⁶⁵To á nichu tuhoro sacerdotia bui puhtoro, to basi to sãari suhtĩrore tuhřenocaha painare “Sua yuhduara”, ni ñu masi dutĩro. Á tuhřenocahno õ sehe niha:

—Cohamacure pjíro ñano durucuro nina ahríro. Ñ jina to ñano durucure tuho tuhsuja mari. Ñ jia tó peinata yahusájaro ahrírore. Ñihta to ñano durucucha tuhoja mari. ⁶⁶¿Dohse yoanahcari mari mipure ahrírore? —ni sinituha tiro paina puhtoare.

—To ñari buhiri wajānocano cahmana tirore —ni yuhtiha tina.

⁶⁷Ti ñ niri baharo to wuhduare chahcho puti sihō muja, tirore cjāpe, dota mujaha tina. ⁶⁸Tirore cjāpe tuhsu, ñ sehe nipeha tirore:

—¿Diro sehe muhure cjājari? Cristo jicu ñuerapaihta yahuga säre —ni cjāpe dota mujaha tina.

“Tirore masieraja”, niha Pedro Jesure

(Mr 14.66-72; Lc 22.56-62; Jn 18.15-18, 25-27)

⁶⁹Ñ yoa tí wuhu cahai jiri wapai noari wapai Pedro sehe dujiha. To ñ dujichu ñuno sacerdotea bui puhtoro cahamacono tiro cahapu suro, ñ sehe niha:

—Muhu cūhu Jesu Galilea macariro mehne jire —niha ticoro.

⁷⁰To ñ nichu tuhoru, Pedro ñ sehe niha:

—¿Dohse nimacanocaco nijari muhu? Mu nirirore ne masieraja yuhu —niha Pedro ticorore jipihtina ti tuhorocaroi.

⁷¹To ñ niri baharo tí wapa macari sahríno sopaca cahapu wahaha Pedro. Tói to jichu pacoro cahamacono tirore ñuno, tói jinare ñ sehe niha:

—Jesu Nazare macariro mehne jire ahríro cūhu —niha ticoro Pedore tjoa.

⁷²To ñ nichu tuhoru Pedro ñ sehe ni yuhtiha:

—Cohamacu mehne potocā nii nija. Tiro mu nirirore ne masieraja yuhu —ni yuhtiha Pedro.

⁷³Ñ yoa mahanocā baharota tói ducuina Pedro cahapu waha, tirore ñ sehe niha tjoa:

—Potocā tjira. Jesu yaina mehne macariro jira muhu cūhu. Tina yoaro seheta durucura muhu —niha tina Pedore.

⁷⁴Ti ñ nichu Pedro ñ sehe ni yuhtiha:

—Potocā Cohamacu mehne nii nija musare. Yuhu potocā yu nierachu Cohamacu yuhure buhiri dahrejaro. Tirore musa nirirore ne masieraja yuhu —ni yuhtiha tiro tinare.

To ñ nichuta caraca duha. ⁷⁵To duchu tuhoru Jesu tirore to nirire wacūha. “Caraca to duhto pano ‘Jesure masieraja’, niihca muhu. Tia taha ñ niihca muhu”, Jesu to niri cjiire wacūha Pedro. Ñ wacūno, tí sahríno sopacare wijaa, tuaro tiha.

Pilato cahapu Jesure naaha

(Mr 15.1; Lc 23.1-2; Jn 18.28-32)

27 ¹Ñ yoa bohrearopu sacerdotea puhtoa, mari judio masa bucuna cūhu Jesure ti wajā dutihtore cahma suhūduha. ²Ti ñ yoari baharo tirore duhte, Pilato cahapu naa, tirore waha Pilatore. Pilato sehe tí yahpa macaina puhtoro jire.

Juda Iscariote yariaa wahaha

³Ñ yoa Jesure ti wajā dutichu ñuno Juda sehe Jesure ñoriro tirore to ñori cjiire tuaro wacū cahyaha. Ñ cahyaro treinta turi to ñahari niñeru turire wiario waharo, sacerdotea puhtoa cahapu, bucuna cahapu su, ñ sehe niha:

⁴—Jesu musare yu ñoriro ñaa marieriro to jipachuta tina wajã dutire tireore. Ñ jicu musare tireore ñocu ñano yoi nihti yuhu —ni yahuha Juda tinare.

To ã ni yahuri baharo tina õ sehe ni yuhtiha:

—Ña yoawahnojaro. Sãre yaba cjihti jierara tí mu ã nia. Muhu dihta ã ni tuhotura tíre —ni yuhtiha tina tireore.

⁵Ti ã ni yuhtiri baharo Cohamacu ya wuhui Juda to niñeru turire doca site cünocaha. Doca site cünoca, wahaa wahaha. Waha, yuta dare duhte yo, to basi wamuai tju suha, puroca yoja su, yariaa wahaha juna.

⁶Ñ jia sacerdotea puhtoa niñeru turire naa, õ sehe niha:

—Ahri niñerure Cohamacu wuhu macari caropu niñeru wihbori caropu mari cü masieraja. Ahri niñeru mehneta masunore wajã dutire. Ñ jia mari dutia marine tó sehe jia niñerure wihbo dutierara —niha tina ti basi.

⁷Ti ã niri baharo “Õ sehe yoajihna”, ti ni suhüduri baharo dihi biatorire yoiro ya yahpare nuchuha. Tí turi mehne nuchuha. Pa sehe macaina ti wihi ti yariachu ti yahti yahpa cjihtore tí yahpare nuchuha. ⁸Ñ jia tí yahpare “Di yahpa” wamoare masa. Mipu cühure ãta wama tira. ⁹Ahri jipihtia ã wahari jire Jeremía cjiro panopu “Ñ waharohca”, to ni joariro seheta. Tiro Cohamacu yare yahu muhtariro cjiro jiha. Õ sehe ni joaa tiha tiro: “Treinta niñeru turire plata turire ‘Tó purota wapanahca tireore sã ñahahtore’, niahca Israe masa. ¹⁰Ñ jia tí turi mehne dihi biatorire yoiro ya yahpare nuchuahca tina. Õ seheta yuhure yoa dutire Cohamacu”, ni joaa tiha Jeremía panopu.

Pilato Jesure sinituha

(Mr 15.2-5; Lc 23.3-5; Jn 18.33-38)

¹¹Ñ yoa Pilatore ti wari baharo tiro sehe Jesure õ sehe ni sinituha:

—¿Potocãta judio masa ti puhtorota jijari muhu? —ni sinituha Jesure.

—Mu nino seheta tiro tjija —ni yuhtiha Jesu.

¹²Ñ ni yuhtiparota, sacerdotea puhtoa, bucuna cühü ti yahusächu yuhtieraha tiro. ¹³To ã yuhtierachu ñño Pilato õ sehe ni sinituha:

—¿Ahri jipihtia muhure ti yahusãrire tuhoerajari muhu? —ni sinituha tiro Jesure.

¹⁴To ã ni sinitupachuta Jesu ne cü dusero yuhtieraha. To ã yuhtierachu ñño Pilato cuaa wahaha.

Jesure wajã dutiha

(Mr 15.6-20; Lc 23.13-25; Jn 18.38–19.16)

¹⁵Cuhmaripe pascuaripe masa yairo cjihtore cüiro peresupu jiriore Pilato ã wiobasa mujaa tiha. Masa ti wio dutiriore wiobasa mujaa tiha. ¹⁶Tí pjare Barrabá wama tiroiro peresupu jiha. Tireore masia tiha payu masa. ¹⁷Ñ yoa ti ã cahmachuchu Pilato sehe õ sehe ni sinituha tinare:

—¿Diro sehere musare wiobasabocari yuhu? ¿O Barrabá sehere o Jesure Cristo ti niriore wiobasabocari yuhu? —ni sinituha tiro.

¹⁸Jesure masa ti cahichu ñua judio masa mari puhtoa tireore ñu tuhtiha. Ñ ñu tuhtia tireore waha Pilatore. Ñ jiro masa ti cahiri buhiri judio masa mari puhtoa ti ñu tuhtirire masino Pilato Jesure wio duamaha.

¹⁹Ñ yoa Pilato masare soro sehe yoainare to beseri pahtai to dujichu to namono tireore quti warocaha: “Micha ñamine Jesure cahãco, tuaro ñano

yuhduhi. Ā jicu tirore ñaa marierirore ne jiape yoai tjiga muhu”, ni yahuro-caha to namono Pilatore.

²⁰ Ā jia wahmanopure sacerdotea puhtoa, bucuna cūhu masare ō sehe ni duti tuhsuha. “Barrabá sehere wio duti, Jesu sehere wajā dutiga”, ni dutiha masare. ²¹ Ā yoa Pilato masare ō sehe ni sinituha:

—¿Ahrina puarore diro sehere musare wiobasabocari yuhu? —ni sinituha.

—Barrabá sehere wiobasaga sāre —ni yuhtiha.

²² —¿Ahriro Jesu Cristo ti niriro sehere dohse yoaihcari yuhu musa ā ni sañurucuhu? —ni sinituha tiro.

—Crusapu cǵa puha wajāga tirore —ni yuhtiha masa jipihtina.

²³ —¿Yaba barore ñaare yoari ahriro musa ā nichu? —ni sinitu namoha tiro. To ā nichu tuhoa tina tuaro mehne sañurucuha:

—Crusapu cǵa puha wajāga tirore —ni sañurucuha masa tirore.

²⁴ Ti ā ni sañurucuhu tuhoru, tirore ti tuho duaerachu ñuno “Masa sua, cahmacheboca” nino, yuhtirota ō sehe yoaha Pilato. Masa ti ñurocaroi tiro wamo cosaha. Ā wamo cosaro ō sehe niha:

—Ahrirore ñaa marierirore wajāri buhiri ya buhiri jierara. Musa ya buhiri jira —nino wamo cosaha.

²⁵ To ā nichu tuhoa jipihtina masa ō sehe niha:

—Ahrirore wajāri buhiri sā, sā pohna cūhu sā ya buhiri jijaro —niha masa.

²⁶ Ti ā nichu tuhoru Pilato Barrabáre peresupu jirirore wio dutiha masa ti cahmarirore. Ā yoa tuhsu Jesu sehere yuta dari mehne tjana duti, tirore crusapu wajā dutiro wiaha surarare.

²⁷ To ā wiachu Pilato ya wuhupu to surara Jesure na suha. Ā yoaa tina surara jipihtina Jesu cahapu cahmachuha. ²⁸ Ā cahmachua to suhtire tjuwe na, puhtoro ya suhtiro sehe bajuri suhtirore tirore sāaha. ²⁹ Ā sāa tuhsu, pota sorore yoa tuhsu, to dapu bui duhu payoha. Ā duhu payo tuhsu, wujucure poto buhusehe sehe dahra suhaha. Dahra suha tuhsu, na tuhcuca caha su, bujupeha tirore:

—Noano tagā. Judio masa puhtoro noano tagā —ni bujupeha tirore.

³⁰ Ā niata tirore chahcho puti sihō muja, ti dahra suhadu cjirore tirore tuāwe na, to dapure cǵaha tu mehneta. ³¹ Ti ā bujuperi baharo ti sāari suhtirore tjuwe na, to ya suhti sehere sāaha tjoa. Sāa tuhsu, crusapu wajāa taa tirore na wijaaaha.

Tina Jesure crusapu cǵa puha, wajāha

(Mr 15.21-32; Lc 23.26-43; Jn 19.17-27)

³² Tirore na wahcā, Simo wama tirirore Cirene macarirore piti boca, tirore Jesu to wuuri crusare wua wahcā dutire.

³³ Wua wahcā, Gólgota wama tiropu sure. Gólgota nino, “Dapu cohā”, nino nina. ³⁴ Tuhsu, vinore suēa co ñimaca macaa co mehne ti morea core Jesure wamare tina. Tí core sihni ñu, sihnierare tiro.

³⁵ Ā yoa to suhtire ti tjuwe nari baharo tirore crusapu cǵa puhare tina. Ā cǵa puha tuhsua, to sāa suhti cjirore ti basi cahma witia taa, “¿Noa yaro jirohcari ō?” ni masia taa, docapea poca mehne docape mujaha tina. [Ā yoaa Cohamacu yare yahu muhtariro cjiro to ni joariro seheta yoaa nire tina. Ō sehe ni joaa tiha tiro: “Yu suhtire ti basi naa taa, ¿Noa yaro jirohcari ō?” ni, docapea poca mehne docape mujaha tina”, ni joaa tiha panopu.]

³⁶ Docape tuhsu tirore ñu dujirucure tina. ³⁷ Ñ yoa Jesure “¿Yaba buhiri mehne yariabocari tiro?” ti ni masihtō sehe, ò sehe ni ti joa òri pjine crusapu duhu òha tina. “Ahriro Jesu judio masa bui puhtoro jiro jira”, ni joa òre tina tí pjipu. ³⁸ Baharo puaro yaca bucuna cūhure Jesu cahai paye crusari pjīnipu cǵa puha dapore tina. Cūiro to poto buhusehei, paio to cō buhusehei cǵa puha dapore tina. ³⁹ Crusari cahai yuhdu wahcāina Jesure ñu, ti dapu pocare yureroca, tirore ñano durucure:

⁴⁰ —¿Cohamacu wuhure cohā, tia dacho wahaboroi pari turi tí wuhure dahrehtiro jijari muhu? Cohamacu macuno jicu mu basi dujia taga. Ñ yoa mu basi yoadohoga. Ñ jii yuhdu witiilha muhu —nire masa.

⁴¹ Ata ni bujupere tirore. Sacerdotea puhtoā cūhu, marine judio masare buheina cūhu bucuna cūhu tirore ñ ni bujupere:

⁴² —Tiro painare yuhdoro jiparota to basi yuhdo masierara. “Israe masa puhtoro jija”, nimana tiro. Ñ jina to basi to duji tachū ñuna tirore wacū tuahca. ⁴³ Tiro sehe Cohamacure wacū tuamana. Tuhsu, “Cohamacu macuno jija”, nimana tiro. To ñ jiro jichu Cohamacu sehe tirore yoadohojaro —ni bujupere tina.

⁴⁴ Yaca bucuna tiro cahai ti cǵa puharina cjiri cūhu tó sehetā tirore bujupe, ñano ni durucure tina cūhu.

Jesu yariaa wahaha

(Mr 15.33-41; Lc 23.44-49; Jn 19.28-30)

⁴⁵ Ñ yoa cohari pja jichu tia hora waro jipihtiropu nahitiano jire. ⁴⁶ To nahitia duhuchu waro Jesu tuaro sañurucure:

—Elí, Elí ¿lama sabactani? —nire tiro. Ñ nino ò sehe nino nire: “Yū Cohamacu, yū Cohamacu, ¿dohseacu yuhure cohāri muhu?” nino nire.

⁴⁷ To ñ nichu tuhoa cāina tói ducuina ò sehe nimare:

—Cohamacu yare yahu muhtariro Elia cjirore pjirocaro niboca —nimare tina.

⁴⁸ Ti ñ ni tuhsuchu cūiro tina mehne macariro wihmi nari suhtepu vino suēa core soha tuhsu, na muroca, yucucu sohtoai duhte ò, Jesure wihmi dutimare. ⁴⁹ To ñ yoachū ñua paina wihmi dutirirore ò sehe nimare:

—Depusinia. Elia wihi, ahrirore to na borocho ñusinijihna mari —nimare paina.

⁵⁰ Ti ñ niri baharo pari turi sañurucu, Jesu sehe yariaa wahare. ⁵¹ To ñ yariachuta Cohamacu wuhu macari suhtiro, ti ducatori suhtiro dacho macai bui sehe tuhnu bora ta, tuhnuroca yoja sua wahaha. Tuhsu, yahpa cūhu ñuhmire. To ñ ñuhmichu taa bujua poca wahtia wahare. ⁵² Ñ yoa masa coparire pjōochu, payu Cohamacu yaina cjiri panopu yariarina cjiri masa wijaaha. ⁵³ Masa wijaa, Jesu sehe to masa wijaari baharo tí coparire cohānoca, noari macapu Jerusalēpu wahare tina. Tópu ti wahachu payu masa ñua tiha tinare.

⁵⁴ Ñ jia yahpa to ñuhmichu ñua, payu paye ti ñ wahachu ñua surara puhtoro to surara mehne cūaa wahare. Tina Jesure crusapu jirore cohtaina jire. Cūaa waha, ò sehe nire:

—Potocā tjiri jimana. Ahriro Cohamacu macunota jiri jimana —nire tina.

⁵⁵ Ñ yoa Galileapu Jesu mehne tari numia cjiri tirore yoadohori numia cjiri yoropu tirore crusapu jirore ñurocarucua nire. ⁵⁶ Tí numia mehne María

Magdalena jire. Pacoro María wama tiricoro cūhu jire. Ticoro sehe Santiago, José cūhu pocoro jire. Pacoro Zebedeo namono jire.

Jesu pjacure masa copapū cūha José

(Mr 15.42-47; Lc 23.50-56; Jn 19.38-42)

⁵⁷Ā yoa ñamichahapū José Arimatea macariro pache puro tói sua tiha. Tiro Jesu buheriro jire. ⁵⁸Ā yoa Pilato cahapū sū, Jesu pjacure siniha. To ā sinichū tuhoro Jesu pjacure tirore wa dutiha Pilato. ⁵⁹To ā dutiri baharo José sehe Jesu pjacure na boro, noari suhtiro wete marieni suhtiro mehne to pjacure wahmaha. ⁶⁰Wahma tuhsū, José to ya masa copapū siō payoha to pjacure. Tí copa ti tācai sahari copa wahma copa jire. Tí copapū yo sāa duhu payo tuhsū, pjiria tācare tju turē wahcāha tia mehne biharo taro. Biha tuhsū, wahaa wahaha. ⁶¹Ā jia María Magdalena, pacoro María mehne tí copare ñu dujirucuha.

Jesure ti cūri copare surara cohtaha

⁶²Ā yoa pa dachoi, Pascua cjihtore ti cahnori dacho baharo, sabado jichū sacerdotēa puhtoā fariseo curua macaina cūhu Pilato cahai cahmachuha.

⁶³Cahmachu tuhsū ō sehe niha tina Pilatore:

—Puhtoro, tiro mahñoriro Jesu catisinino ō sehe niha tiro: “Tia dacho wahaboroi masa wijaaahca yūhū”, niha tiro. ⁶⁴To ā niriro jichū to buheina sehe to pjacure yacaboca. Ā yacaa masare ō sehe niboca: “Jesu masa wijaaare”, niboca tina. Tiro Jesu sehe masare mahñono nire. Wiho mejeta to buheina sehe “Tiro masa wijaaare” nia, mahñoina jiaha tina. Ā jiro Jesu to mahñoriro yuhdoro ti ya mahñoa sehe ñaa yuhduarohca. “Ā yacari” nicū, tia dacho waro to masa copare mu surarare cohta dutiga —niha tina Pilatore.

⁶⁵Pilato ō sehe ni yūhtiha:

—Jai. Yū yaina surara cohtajaro. Ā yoa mūsa cūhu mūsa bihoro puro tí copare noano cohtaga —niha tiro tinare.

⁶⁶To ā nichū tina waha, tí copapū bihari tāca mehneputa ñahachuputa wihtā ñahaha masa ti sāachū ñu masia taa. Ā yoa tuhsū, surarare tí copare cohta dutiha.

Jesu masa wijaaaha

(Mr 16.1-8; Lc 24.1-12; Jn 20.1-10)

28 ¹Ā yoa judio masa mari sori dacho sabado dacho sehe to yuhduri baharo domingo jichū ñami curero jichū María Magdalena, pacoro María mehne Jesu masa copare ñua wahaha. ²Tí pjare dóihta yahpa tuaro ñuhmi bahrañoha. To ā ñuhmichū mari puhtoro to yairo anjo muanopū jiro duji ta, masa copare bihari tācare tju turēroca, tia bui dujiha. ³Tiro anjo orocasitero yoaro sehe noano si siteriro, to suhti yaja pjao yoaro sehe noano yehsea suhti jiha. ⁴To ā bajuachū tí copare cohtaina surara cui yuhdua, tetere, bui warohna yaria yuhdua wahaha. ⁵Ā yoa tuhsū anjo sehe tí numiare ō sehe niha:

—Yuhure cuiena tjiga. Crusapū ti cǵa puhariro, Jesure mūsa macachū masija yūhū. ⁶Wiho mejeta tiro sehe mipure ōre mariahna. To niriro seheta tiro masa wijaa wahare. To pjacure ti duhu payoriro cjirore ñuna taga. ⁷Ā ñu

tuhsuna to buheina cahapũ ño duaro waha, õ sehe ni yahuna wahaga: “Jesu masa wijaa. Ñ jiro masa pano Galileapũ tiro wahayurohca. Tópũ tirore ñunahca masa”, ni yahuna wahaga masa. Ahri yũ nirire wacũga masa —niha anjo tí numiare.

⁸To ã niri baharo tí numia masa copapũ jia numia soaro mehne wijaa, tirore cuipahta wahche yuhdua mehne Jesu buheinare yahua wahaa, muro-caha. ⁹Ñ wahaa numiare Jesu piti boca, õ sehe niha:

—¿Noano jimajari masa? —niha tiro.

To ã niri baharo, tina sehe tiro cahapũ sũ, to dahporire ñaha, tirore ño payoha.

¹⁰—Cuiena tjiga masa. Yũ buheinare “Galileapũ wahaga”, ni yahuna wahaga. Tópũ yuhure ñuahca tina —niha Jesu tinare.

Masa copare cohtaina surara ti ñurire yahuha

¹¹To ã niri baharo tí numia ti waharo watoĩ cãina masa copare cohtaina mehne macaina surara, Jerusalẽpũ sacerdotea puhtoare yahu pahñoa wahaha. Jesu to masa copapũ wijaarire yahu pahñonocaha. ¹²Ti ã ni yahuchũ sacerdotea puhtoa, judio masa mari bucuna mehne cahmachuha. Cahmachu, suhuduha. Ñ jia surarare mahño dutia payũ niñerure wapaha.

¹³—Õ sehe niga masa masare: “Ñami sã carĩno watoĩ to buheina sehe masa copapũ wihi, to pjacure nanocari jire”, ni yahuga masare. ¹⁴Masa ã ni yahuchũ Pilato sehe masa carĩ yuhduarire tuhorocaboca. To ã tuhochũ, “Musare tuhtiri”, nina musare yahubasanahca sã tirore —niha tina surarare.

¹⁵Ti ã niri baharo surara sehe niñerure ñaha, tinare ti mahño dutiriro sehe masare yahua wahaha tina. Ñ jia tó sehe Jesu to masa copare wijaarire yahurucura judio masa. Mipũ cũhure ãta ni yahura tina.

Jesu buhe dutiro to cūrinare dutiha

(Mr 16.14-18; Lc 24.36-49; Jn 20.19-23)

¹⁶Ñ yoa sã Jesu buheina once buheina tũcupũ Galileai jidupũ Jesu to waha dutidupũ wahi sã. ¹⁷Tópũ sũ, Jesure ñuna, ño payoi tirore. Ñ ño payoina jipanahta, sã cãina “Ahriro Cohamacũ macuno jieraboca”, ni tuhutumai. ¹⁸Sã ã ño payochũ tiro sehe sã cahapũ wihi, õ sehe nire:

—Ahri yahpapure, muano cũhure Cohamacũ jipihtinare dutiriro waro jichũ yoare yuhure. ¹⁹To ã yoachũ õ sehe dutija musare: Jipihtiro macainare yũ yare buhena wahaga. Yũ yaina ti wahahto sehe buhena wahaga. Ñ yoana yũ Pucũ to wama mehne, yũ wama mehne, Espĩritu Santo to wama mehne tinare bautisaga. ²⁰Ñ jina musare yũ dutirire ti yoa pahñohti cjihtire buhega tinare masa. Ñ yoana ahrire yũ nihtire wacũga: Jipihtia dachoripe ahri yahpa to jiro puro masa mehne ã jirucuihca. Masa mehne yũ ã jirucuhtore wacũga masa —ni yahure sãre Jesu.

San Marcos

João masare bautisariro buhe ducaha

(Mt 3.1-12; Lc 3.1-9, 15-17; Jn 1.19-28)

1 ¹ Ahri tjui Jesucristo Cohamacu macuno to yoaare noaa buheare yahu ducaja.

² Cohamacu yare yahu muhtariro cjiro Isaia to joariro seheta ahri yahua jira. Ō sehe ni joaha tiro:

“Cohamacu to macunore ō sehe niha:

‘Mu pano muhure yahuyuhtirore warocai nija.

³ Ā jiro tiro masa marienopu waharohca.

Tirote tuhoinare yahuro sañurucurohca: “Mari puhtoro to tahto pano musa ñaa tuhotuare cohtota, cahno muhtaga musa”, ni sañurucurohca’, niha Cohamacu”,

ni joaa tiha Isaia cjiro João cjihtore.

⁴ João masare bautisariro masa marienopu masare buhea tiha:

—“Sā noaina jija”, ni musa tuhotumari cjirire duhu, musa ñaa buhirire cahya, Cohamacu sehere cahmaga musa. Ā jina bautisarina jiga. Musa ā yoachū ñuno Cohamacu musa ñaa buhirire borohca —ni buhea tiha tiro.

⁵ Ā yoa jipihtina Judea yahpa macari macaina, Jerusalē macaina mehne tiro cahapu ti suchū ñuno João sehe Jordão wama tiri mapu bautisaha tinare. Tinare to bautisahto pano tina sehe ti ñaa yoarire yahu yuhduha Cohamacure.

⁶ Tiro João sehe camello pjoari suhtirore sāariro wahiquiro cahsaroreta tuā dihoriro jiha. Poreroare, macaroca macaina miquina mi cūhure chua tiha. ⁷ Ā yoa ō sehe ni buhea tiha:

—Yū baharo yū yuhdoro tuariro tarohca. Noa yuhduariro jira tiro. Tiro yoaro sehe jieraja yuhū sehe. Ā jicu tirote tuhotucu, “Wiho jiro jija yuhū”, ni tuhotuja yuhū. ⁸ Musare bautisacu co mehne yoamahi. Tiro sehe yū yuhdoro yorohca. Espiritu Santore musa mehne jirucuchū yorohca —ni buhea tiha João.

João Jesure bautisaha

(Mt 3.13-17; Lc 3.21-22)

⁹ Ā yoa tí pjare Jesu Nazarepu Galilea yahpai jiri macapu jiro Jordão wama tiri mapu suha. Tópu to suchū João bautisaha tirote. ¹⁰ To ā bautisa tuhsuchū Jesu diapu ducuriro surucu suro muano to parī muua wahachū ñuha tiro. To parī muachuta Espiritu Santo buja yoaro sehe Jesu bui duji pja suha.

¹¹To ā duji pja suchu muanopu durucuro coa taha:

—Muhu yu macu yu cahiro jira. Muhu mehne tuaro wahcheja —nino coa taha muanopu.

Satana ñaare yoa dutimaha Jesure

(Mt 4.1-11; Lc 4.1-13)

¹²Tí pjare Jesure masa marienopu Espiritu Santo naaha. ¹³Tópure suro cuarenta dachori waro jiha. Watino sehe Jesu to ñaare yoachū ñu duaro, ñaare yoa dutimaha tirore. Tuhsu, Jesu wahiquina nucū macaina mehne jiha. Tói to jichu ñua anjoa sehe tirore yoadohoa, chuare waha.

Jesu Galilea yahpai buhe ducaha

(Mt 4.12-17; Lc 4.14-15)

¹⁴Ā yoa Joāore peresupu ti biha dapori baharo Jesu sehe Galilea yahpapu noaa buheare puhtoro Cohamacu to suho jiare yahuro wahaha. ¹⁵Ō sehe ni yahuha:

—Mipure ō sehe jira. Puhtoro Cohamacu musare to noano suho jihto mahanocā duhsara. Ā jina “Sā noaina jija”, musa ni tuhotumari cjirire duhuga. Musa ñaa buhirire cahya, Cohamacu sehere cahmaga. Ahri noa buheare “Quihōnota jira”, ni tuhoga musa —ni buhea tiha Jesu tinare.

Jesu pititiarore wahi wajāinare “Yuhu mehne macaina cjihti taga”, niha

(Mt 4.18-22; Lc 5.1-11)

¹⁶Tíre yahu tuhsu, Galilea wama tiri bucupariro duhtu cahapu sito wahcā-mahno ñuha Simore, to bahuro Andre mehne. Tina wahi wajāina jiha. Ā jia ti wañuyucurire bucupariropu doca ñoa niha. ¹⁷Ā yoa Jesu tinare ō sehe niha:

—Yuhu mehne macaina cjihti taga musa. Yuhu mehne musa tachū musa wahire ñaha cahmachuina musa jiro seheta, Cohamacu yaina cjihtire masare pji cahmachuina cjihtire musare wahachu yoaihtja. Yuhu mehne musa tachū ā yoachtina cjihtire cūihtja musare —niha Jesu tinare.

¹⁸To ā nichu tuhoa ti wañuyucurire cūnoca, tiro mehne wahaa wahaha.

¹⁹Ā yoa tina mahanocā yuhdu wahcā, Santiagore, to bahuro João mehne boca suha tjoa. Tina sehe Zebedeo pohna jiha. Ti yaria dohoriapu wañuyucurire cahnoa niha. ²⁰Ā yoa tiro to pjirocachū tina sehe ti pucurore, tiro mehne dahra cohtaina mehne dohoriapu cūnoca, Jesu mehne wahaa wahaha.

Watia ti cohtotariro Jesure piti bocaha

(Lc 4.31-37)

²¹Ā yoa tina Capernau wama tiri macapu suha. Tópu suro Sabado jichu judio masa sā buheri wuhupu buhero sāaha tiro. ²²Sā judio masare buheina yoaro sehe jieraha tiro. Noano masi pahñoriro ji, noano waro buheha. To ā buhechu tí maca macaina tuho cuaa wahaha. ²³Tí pjare cūiro tí wuhui jiriro watia ti cohtotariro jiha. Tói jiro ō sehe niha Jesure:

²⁴—Muhu Jesu Nazare macariro cariboi tjiga säre. ¿Dohse yoai tai nijari säre? ¿Muhu säre butichu yoai tai nijari? Cohamacu macuno buhiri tia marieriro mu jichu masija yuhu —ni sañurucuha tiro Jesure.

²⁵To ā nichu tuhoru Jesu tuhtiha watiare:

—Dihta mariahga. Wijaahga tirore —niha Jesu.

²⁶ Ñ jia watia tirore yahpawu doca caha su tunuchu yoa, to tuaro sañurucuro watoihita wijaaha tirore. ²⁷ Ñ jia jipihitina ti wuhui dujiina ñu cuua yuhdua wahaha.

—Cue, ¿wahma buhea jijari ahri? Tiro puhtoro yoaro sehetu dutira watia. To dutichu tina watia sehe yuhdurucaerara tirore —ni durucuha ti wuhui dujiina ti basi.

²⁸ Ñ jia mahaa dachoricā baharoihta dōihita jipihitina Galilea yahpa macaina tīre to yoarire tuho sahsea wahaha.

Jesu Simo Pedro marechonore noaricoro wahachu yoaha

(Mt 8.14-15; Lc 4.38-39)

²⁹ Ñ yoa Jesu cūhu judio masa mari buheri wuhupu jiina wijaaha. Ti ā wijaari baharo Jesu, Santiago, João, paina tina mehne macaina cūhure Simo to bahuro Andre mehne ti ya wuhupu suho sāa suha. ³⁰ Tī pjare Simo marechono juaro mehne to dohatichu cama bui to coāchu yahuha Jesure. ³¹ Ti ā yahuchu tuhoru tiro sehe ticoro cahapu sūro, to wamomacare ñaha, ticorore waja wahcō dapoha. To ā waja wahcō dapochuta ticorore juaro surua wahaha. To ā sururi baharo ticorota tinare chware payoha.

Jesu payu dohatiinare noaina wahachu yoaha

(Mt 8.16-17; Lc 4.40-41)

³² Ñ yoa sū sāari baharo nahi borachupu masa payu dohatiinare, watia ti cohtotarinare Jesu cahapu na suha. ³³ Ñ jia jipihitina ti maca macaina cahmachurucu suha ti wuhu sopacai. ³⁴ Ñ jiro Jesu payu dohatiinare, payu soro jia dohatia cjuainare noaina wahachu yoaha. Watia cūhure, masare sāamarinare payu cohā wioha. Ñ jiro watia Jesure ti masichu ñuno Jesu sehe tinare durucu dutieraha.

Jesu buhe tinino wahaha

(Lc 4.42-44)

³⁵ Ñ yoa ñami curerocā wahcā, nahitia curechuta masa marienopu Cohamacure sinino wahaha Jesu. ³⁶ To ā wahari baharo Simo cūhu tirore macaa wahaha. ³⁷ Tina tirore boca su, ō sehe niha:

—Masa jipihitina mūhure macaa nihre —niha tina.

³⁸ Ti ā nichu tuhoru ō sehe niha Jesu tinare:

—Tinare buhe tuhsuhi. Pa sehepu ō cahacā macaa macaripu wahajihna mari. Ahri yahpa macainare yahu site pahñoi tahi. Ñ jicu yuhu paye macari macaina cūhure buheihitja —niha Jesu.

³⁹ Ñ ni tuhsu, jipihitia Galileai jia macaripu judio masa mari buhea wuhusepu buhero, watia masare sāamarinare cohā wioha.

Jesu cami bariore noariro wahachu yoaha

(Mt 8.1-4; Lc 5.12-16)

⁴⁰ Ñ yoa paio dohatiriro cami bariro Jesure piti bocaro, na tuhcu caha su ō sehe ni siniha:

—Muhu yuhure noariro wahachu yoa duacu yoaga —niha cami bariro.

⁴¹To ã nichu tuhoro Jesu tirore pja ñuha. Ñ jiro to wamomacare siõroca, tirore ña payoha. Ñ ña payoro ò sehe niha:

—Tíre yoa duaja. Noariro jiga muhu —ni yahuha Jesu.

⁴²To ã nichuta dohatiriro to cami bari cjiro yati mûaa wahaha. Noariro wahaha tiro. ⁴³To ã wahachu ñuno Jesu tirore tuaro mehne ò sehe ni yahuha:

⁴⁴—Painare ahrire yahuecu tjiga. Ñ yahuerapaihta mu pjacure sacerdotere ñoga. Cohamacu dutia Moise cjirore to cûriro seheta yoaga. Ñ yocû mini-chahcare waga sacerdotere noariro mu waharire mu ñohti cjihtire —niha Jesu. Ñ ni tuhsu “Wahaga”, niha tirore.

⁴⁵To ã yahu dutierapachuta tiro waha, jipihitia macari macainare Jesu to yoirire yahuha. To ã yahuri baharo Jesu masa payu ti jiropure waha masieraha. Ñ jiro tiro mahainacã ti jiropu jiha. Tõpu to jichu payu macari macaina tiro cahapu suha.

Jesu pjacu buharirore ducuhu yoaha

(Mt 9.1-8; Lc 5.17-26)

2 ¹Mahaa dachori baharo Jesu Capernaupû tjuaa wahaha. Wuhu to jichu masa tuhoha. ²Ñ jia tõi masa payu cahmachu tí wuhure wahpata wijaa surucaha. Ñ jiro Jesu tinare noaa buheare yahuha. ³To ã yahuro wato, piti-tiario mua jipihitiri pjacu buharirore na wihiha. ⁴Ti masa payu jichu ñua Jesu cahapu sã masieraha. Ñ jia tina wuhu buipu Jesu bui waroi mahanocã muji pahmare nawe, pjacu buharirore to coãri cahsaro mehne duhu boroha Jesu cahai. “Jesu ahrirore to dohatiare yuhduchu yoarohca”, ni tuhoutuha tina. ⁵Ti ã ni tuhoutu chu masino Jesu sehe dohatirirore ò sehe ni yahuha:

—Macu, mu ñaa yoari buhiri tiare cohã tuhsuja —niha Jesu pjacu buharirore.

⁶To ã nichu tuhoa sã coyea judio masare buheina tõpûre dujiina ti basi ò sehe ni tuhutumaha: ⁷“Ahriro ã ni durucuro tjijaro. Cohamacure ñano durucuro nina tiro. Tiro masuno mari yaro seheta jiriro jira tiro cûhu. Ñ jiro to ñaa yoari buhiri tiare cohã masierara. Cohamacu dihta masa ti ñaa yoari buhiri tiare cohã masina”, ni tuhutumaha tina. ⁸Ti ã ni tuhoutu chu ñuno Jesu ti tuhoutuare masino ò sehe niha:

—¿Dohse yoana musa ã ni tuhoutuari? ⁹“Mu ñaa yoari buhiri tiare cohã tuhsuja”, yu nichu “Mahñoriro jira”, yuhure nina musa masierapanahita. “Wahcãruca, wahaga”, yu nichu to tinichu ñuna yu niri potocã jia jichu dõihita masinahca musa. ¹⁰Yuhu masuno Cohamacu warocariro ahri yah-papure masa ti ñaa yoari buhiri tiare cohã masija yuhu. Ahrire musa masihtu sehe ò seheta to wahachu yoihtja —niha Jesu judio masare buheinare.

Tinare ã ninota pjacu buharirore ò sehe niha:

¹¹—Muhure niita nija. Wahcãrucaga. Mu coãri cahsaro na wahcãga mu ya wuhupu —niha Jesu tirore.

¹²To ã nichuta pjacu buhariro cjiro wahcãrucu su to coãri cahsaro na, jipih-tina ti ñurocaroi wijaa wahaha. To ã yochu ñua tina jipihitina ñu cua wahaha. “Cohamacu tuariro jira” ni, “Ne, mari ò sehe yoaare ñuera tihi”, niha tina ti basi.

Jesu Levíre Mateo ti ni pisuriroro “Yuhu mehne macariro cjihto taga”, niha

(Mt 9.9-13; Lc 5.27-32)

¹³Ñ yoa pari turi Jesu bucûpariro duhtu cahapu wahaha tjoa. Tõpu sũro masa payu tiro cahai ti cahmachuchu ñuno tiro buheha tinare. ¹⁴Ñ yoa tuhsu

tópɔ jiriro wahamahno Levíre Alfeo macunore to dahrari tahtiapɔ boca suha. Paina mehne puhtoa ya cjihtire wapa na cohtaina jiha Leví cūhu. Tirore boca sɔro ō sehe niha:

—Yūhu mehne macariro cjihto taga mūhu —niha Jesu Levíre.

To ā nichuta Leví sehe wahcā sɔrɔca, Jesu mehne wahaa wahaha.

¹⁵ Ā yoa baharo Jesu sehe to buheina mehne Leví ya wuhupɔ chɔro niha. Jesu mehne wahaina sehe payɔ jiha. Cāina puhtoa ya cjihtire wapa na cohtaina, ā jichu paina masa “Naa dihtare yoara”, ti niina mehne payɔ mesa cahai duji, tina cūhu tiro mehne cūnoi suho chua niha. ¹⁶ Tópɔ ti dujiri baharo paina sā coyera judio masare buheina, fariseo masa ya curua macaina mehne Jesu to chu dujichu nūha tina. Ā nūa ō sehe ni sinituha:

—¿Dohsearo nāno yoaina, puhtoa ya cjihtire wapa na cohtaina mehne chujari Jesu? —ni sinituha judio masare buheina Jesu buheinare.

¹⁷ Ti ā nichu tuhoru piti dahre buhea mehne ō sehe ni yūhtiha Jesu:

—Dohatieraina duhturure macaerara. Dohatiina dihta duhturure macana. Nāno yoaina dohatiina yoaro sehe jira. Ā jicu nāno yoainare yahui tai nihi yūhu. Ti basi “Noaina jija sā”, ni tuhotuinare yahui tai nierahi yūhu —niha tiro tinare.

Chu duhuare Jesure sinituha paina

(Mt 9.14-17; Lc 5.33-39)

¹⁸ Tí pjare João buheina, fariseo curua macaina cūhu Cohamacure ño payoa taa, chɔera tiha. Ā jia masa Jesure ō sehe ni sinituha:

—João buheina, fariseo buheina cūhu Cohamacure ño payoa taa chɔerara. ¿Dohse yoa mɔ buheina sehe chu duhuerajari? —niha tina Jesure.

¹⁹ Jesu to tuhotua mehne quti dahre buhero tinare ō sehe ni yūhtiha:

—Ō sehe jira tí: Wamomaca duhteriro bose numui to jichu tiro mehne macaina cahyaro mehne jierara. Tuhsu, chɔeraina jierara. Tó seheta yɔ buheina cūhu yūhu mehne jia, chu duhu masierara. ²⁰ Yɔ Pɔcɔ Cohamacu yūhure to naari baharo pinihtare yɔ buheina mehne jisi yūhu. Ā jia tí pjarɔta yɔ buheina cūhu chu duhuahca —niha Jesu.

²¹ Panopɔ macaa buhea wahma buhea mehne ti buhe more duachɔ nūno ō sehe ni namoha Jesu tinare piti dahre buhero:

—Ne, wahma cahsaro suhtiro cahsaro mehne mɔnano suhtirore sere ōno cahmaerara. Mari ā yoachɔ wahma cahsaro mari cosari baharo mɔnano suhtirore waja cahmachu, pjibiaro tūhnuchɔ yoara. ²² Ā yoa ne se co bisia core wahiquiro cahsaro wajuru mehne muna wajuru mehne posaeraro cahmana. Mari ā yoachɔ se co bisia pahmoapɔ muna wajurure tuhrēnocahna. To tūhnuchɔ se co cūhu, wajuru cūhu cohōa wahara. Ā yoa se co wahma core wahma wajurupɔ posaro cahmana. Mari ā yoachɔ se co cohōera, wajuru cūhu cohōerara. (Tó seheta wahma buhea muna buhea mehne buhe moreraro cahmana) —ni buheha Jesu tinare.

Sabado jichu Jesu buheina trigo parorire pahaha

(Mt 12.1-8; Lc 6.1-5)

²³ Pa dacho Sabado jichu Jesu cūhu trigo wesepɔ wahaha. To buheina sehe trigo parorire paha yūhdɔ wahcāha. ²⁴ Ti ā yoachɔ nūa ō sehe ni tuhtiha fariseo curua macaina Jesure:

—Tuhosiniga säre. ¿Dohse yoa tina Sabado mari sori numu to jipachuta dahrajari? Marine dutiare yuhdurúcaa nina —niha tina Jesure.

²⁵⁻²⁶ Ti ã nichu tuhoro Jesu tinare yuhtiha. “Yu buheina yuhdurúcaa nierara”, nino taro õ sehe niha:

—Davi cjiro tiro mehne macaina mehne juca baaro, Cohamacu wuhupu saa, Cohamacu ya pãore chuha. Æ churo tiro mehne macaina cühure tí pãore waha. Tí pãore sacerdotia dihtare chu dutira. Cohamacu dutia ti joari tjuí painare tí pãore chu dutierara. Tí pjare Abiata wama tiro sacerdotia puhtoro jiha. ¿Davi cūhu tíre ti yoari cjiire Cohamacu yare ti joari tjuí buherari musa? (Tí pãore churo Cohamacure yuhdurúcaro nieraha. Michare ahri yaparire chua yu buheina cūhu Cohamacure yuhdurúcaa nierara) —niha Jesu tinare.

²⁷ Æ ni tuhsu õ sehe ni namoha:

—Æ yoa Cohamacu Sabado dachore ti sori numu cūno masa ya dacho cjihto cūno nire dahra wahyarinare so dutiro. Tí dachore ño payohtina cjihtire cūno nierare masare Cohamacu. ²⁸ Æ jicu yuhu masuno Cohamacu warocararo ahri dacho Sabado dachore masa ti yohtire yahurirota jicu puhtorota jija —niha Jesu tinare.

Wamomaca buhariro quti jira

(Mt 12.9-14; Lc 6.6-11)

3 ¹ Æ yoa Jesu sã judio masa buheri wuhupu sũro sãaha tjoa. Tí wuhui cūiro wamomaca buhariro dujiha. ² Sabado jichu Jesu wamomaca buharirore to noariro yoachu ñu duaha caina tí wuhui dujiina. To ã yoachu ñua tirore yahusã duamaha. “Mari sori numui Jesu dahraro nina”, ni yahusã duamaha tina. Æ jia Jesu to sãa tachu ñua, tirore yahusã duaina sehe tiro dihtare ñuroca õha. ³ Tirore ti ã ñuroca õpachuta Jesu sehe wamomaca buharirore õ sehe niha:

—Wahcã surucaga jipihtina ti ñurocaroi —niha.

⁴ Æ ni tuhsu tí wuhui dujiinare õ sehe ni yahuha:

—¿Sabado jichu noaare yoachu noerajari? ¿O ñaare yoachu sehere noajari, musa tuhotuchu? Sabado jichu masunore masochu noa nina. Masunore wajächu sehere noerara —ni yahuha Jesu tinare.

To ã nipachuta tina yuhtieraha. ⁵ Ti ã yuhtierachu ñuno Jesu tina mehne suaha. Ti tuho duaerachu ñuno Jesu cahyaha.

—Mu wamomacare siörocaga —niha tiro wamomaca buharirore.

To ã nichu tuhoro tiro to wamomacare siörocaga. To ã yoachuta noari wamomaca wahaha. ⁶ To ã noari wamomaca wahachu ñua, fariseo curua macaina wijaa wahaha. Wijaa, Herode mehne macaina mehne cahmachu, “¿Dohse yoa Jesure wajānahcari mari?” niha tina ti basi.

Masa payu bucupariro duhtu cahapu jiha

⁷⁻⁸ Æ yoa pari turi Jesu to buheina mehne bucupariro cahapu wahaha tjoa. Ti ã wahachu ñua Galilea macaina masa payu to baharo suha. Æ jia Judea yahpa macaina, Jerusalē macaina, Idumea yahpa macaina, Jordão wama tiri ma sie coa macaina, Tiro wama tiri maca macaina, tó cahai jiina, Sidō wama tiri maca macaina, tó cahai jiina mehne masa payu jipihtina to yoarire tuhoa,

tiro cahapũ suha. ⁹⁻¹⁰Tõpũ sua, payũ masa jiha. Payũ dohatiinare noaina to yoachũ tuhoa, paina dohatiina cũhũ Jesure piha dua, tju bihsarucũ suha. Ti ã tju bihsarucũ suchũ ñũno, Jesu busocare cahnopohobasa dutiha to buheinare. ¹¹Ã yoa paina watia ti cohtotarina sehe Jesure ñua tiro cahai na tuhcu caha suha.

—Mũhũ Cohamacũ macũno jira —ni sañurucua tina tirore.

¹²Ti ã sañurucuhũ tuhoro tinare Cohamacũ macũno to jiare tuaro mehne ni dutieraha Jesu.

Jesu to buheinare doce to warocahtinare bese dapoha

(Mt 10.1-4; Lc 6.12-16)

¹³Ã yoa Jesu tũcupũ muja, to cahmainare pjirocacha. To pjirocachũ tuhoa, tiro cahapũ muja suha tina. ¹⁴Ti muja suri baharo doce muare tiro mehne macaina cjihtire, paye macaripure to yare buhe duti to warocahtinare, bese dapoha Jesu. ¹⁵Ã yoa dohatiinare ti yũhdohti cjihtire, watĩare ti cohã wiohti cjihti cũhũre cũha tinare. ¹⁶⁻¹⁹Ahrinare doce muare Jesu bese dapoha: Simo, Santiago Zebedeo macũno, João to bahũro, Andre, Felipe, Bartolomé, Mateo, Toma, Santiago Alfeo macũno, Tadeo, Simo cananista ya curua macariro cjiro, Juda Iscariote, tina jiha to bese daporina. Jesu Simore Pedro ni wama pisuha. Santiagore, João mehne Boanerges ni wama pisuha. Boanerges “Wũpo yoa sehe jiina tuaro bisiina jira”, nino nina. Juda Iscariote Jesure ñũ tuhtiinare ñohtiro jiha. Tinare bese dapo tuhsũ, dujiaa, Jesu to buheina mehne wũhũpũ sãa wahaha.

“Jesu watĩno tuaare cjuara”, ni yahusãha masa

(Mt 12.22-32; Lc 11.14-23; 12.10)

²⁰Ã yoa tõi pari turi masa payũ cahmachua bihsa niha. Ti ã bihsachũ ñũno Jesu chũ masieraha. Tuhsũ, to buheina cũhũ chũ masieraha. ²¹Ã jia paina Jesu coyea tíre tuhoa, tiro cahapũ sua, tirore ñahamaha.

—Tiro tuho masierariro waharo nina —nimaha tina.

²²Paina õ sehe niha:

—Beelzebú tirore ã wahachũ yoa nica. Tiro watĩare cohãno Beelzebú watia puhtoro to tuaa mehne tinare cohãna —niha Jerusalẽpũ tarina sã judio masare buheina.

²³Ti ã nichũ tuhoro Jesu sehe tinare pjiroca, to tuhotua quiti mehne piti dahre yahuha tinare:

²⁴—Watĩno ya tuaa mehne watĩare cohãi nieraja. Watia ti basi cohã masierara. Cũ yahpa macaina ti basi cahma wajãa, tí yahpa macaina yaria pihtia wahaboa. ²⁵Cũ wũhũ macaina ti basi cahmachea tí wũhũ macaina waha pihtia wahaboa. ²⁶Tuhsũ, Satana watia puhtoro sehe watĩare cohãno ti basita cahmachea niboa. ã jia tina waha pihtia wahaboa.

²⁷Õ seheta jira mari piti dahre buhechũ. Tuariro ya wũhũpũ paio sãa su yaca masierara. Tuarirore duhteraro to ya wũhũpũ sãa su yaca masierara. Tuarirore to duhteri baharo sãa su yaca masina —ni yahuha Jesu. (Õ sehe ni yahuha watĩnore to yũhdũrucarire yahuro. Watĩno tuariro to jipachũta Jesu tirore yũhdũrucara watĩare cohãno.)

²⁸Ã ni tuhsũ õ sehe ni yahu namoha Jesu:

—Potocã niita nija musare. Jipihitia ñaare masa ti yoachũ ti durucuchũ cãhure Cohamacũ bo masina. ²⁹ Ñ boparota Espiritu Santore ti ñano durucuchũ tí pinine ne bosí. Ti ã niri buhiri ã buhiri tirucuina jiahca —niha Jesu tinare.

³⁰ Jesu Espiritu Santo to tuua mehne watĩare to cohãpachuta “Tiro watĩno to tuua mehne watĩare cohãno nina”, nimaha masa. Ti ã nichũ tuhoro tí quitire Espiritu Santo quitire yahuha Jesu tinare.

Jesu coyea tirore pjiha

(Mt 12.46-50; Lc 8.19-21)

³¹ Ñ yoa Jesu bahana to pocoro mehne wihiha. Ñ wihia sopacapũ jia, painare pji dutiha tirore. ³² Ñ jia masa tiro cahapũ dujiina yahuha tirore:

—Mũ poco, mũ bahana mehne sopacapũ pji nina mũhũre —niha tina.

³³ Ti ã nichũ tuhoro ò sehe niha Jesu tinare buhero taro:

—¿Noa jijari yũ poco, yũ bahana cũhũ, mũsa ñũchũ? —niha tiro tinare buhero taro.

³⁴ Ñ nino to cahai dujiinare ñũno ò sehe niha:

—Ahrina jira yũ poco yũ bahana yoaro sehe jiina. Cohamacũ cahmaare yoara ahrina. ³⁵ Tó seheta yoaina yũ bahũ, yũ baho, yũ poco yoaro seheta jira —ni buheha Jesu tinare.

Jesu wesere toari masuno quitire buheha

(Mt 13.1-9; Lc 8.4-8)

4 ¹ Ñ yoa pari turi bucũpariro duhtũ cahapũ Jesu masare buhe dũcaha tjoa. Ñ tũpure buhe dũcaro masa payũ tiro cahapũ ti cahmachuchũ ñũno Jesu sehe dohoriapũ samu wijaa, pahsaha. Ñ jia masa sehe bucũpariro duhtũ cahai dũcuha. ² Ñ jiro Jesu payũ to tuhoutua mehne quiti dahre yahuha tinare buhero taro:

³ —Ahri quitire tuhoga mũsa —niha tiro tinare.

—Toari masuno toaro, to toaa yaparire doca site cũno wahara. ⁴ To ã doca site cũ wahcãchũ paye yapari mahai bora caha sũha. Ñ bora caha suare tí yaparire minichahca duji ta, chunocaha. ⁵ Ñ yoa paye yapari sehe tãa wapa bui dihta se mininocã bui bora caha sũha. Tãa wapa buicã dihta mariea cureroi bora caha sũ, dói dumaha. ⁶ Ñ dói duri jipahta, nuhcori mariaa, sũ to tuaro sichũ, ñaia wahaha. ⁷ Paye yapari sehe tja watoi bora caha sũha. Tja sehe dia yuhdua waha, toaa sehere wajãnocaha. Ñ jia tja watoi jiare dica mariachũ yoaha. ⁸ Paye yapari sehe noari yahpai bora caha sũha. Noano du, noano dica tiha. Paye yucũ treinta yapari, paye yucũ sesenta yapari, paye yucũ cien yapari dica tiha. ⁹ Ahrire tuho duaina noano tuhoga mũsa —niha Jesu.

Jesu quiti mehne to buherire yahuha

(Mt 13.10-17; Lc 8.9-10)

¹⁰ Ñ yoa ti sahsero jia doce to buheina, paina Jesu mehne jiina cũhũ tí quitire masi duaa, Jesure sinitu ñũha. ¹¹ Ti ã sinitu ñũri baharo Jesu ò sehe ni yahuha:

—Cohamacũ masa bui puhtoro masare to noano sũho jiare, panopũ paina ti masierari cijirire musare masichũ yoara Cohamacũ. Paina sehere ã yoaerara

tiro. ¹¹ Ñ jicu tinare quitu mehne dihta buheihitja. ¹² Ñ jia tina ñupahta ñueraina cjiri yooaro sehe tjuara. Ñ jia tuhopahta tuho ñaha masisi. Tina tuho ñahaina jia, ti ñaa yoarire cahya, Cohamacure macaboa. Ti ñ macachu ñuno, tiro sehe ti ñaa yuari buhirire bonocaboa. Ñ jipachuta tina sehe ne tuho duaerara — niha Jesu.

Jesu wesere toari masuno quitire yahu pahñoa

(Mt 13.18-23; Lc 8.11-15)

¹³ To ñ niri baharo ñ sehe ni yahu namoha tinare:

—¿Ahri quitire tuhoerasinijari musa? ¿Musa ahri quitire tuhoerana, dohse paye quitire tuhonahcari musa? —niha Jesu tinare.

Ñ ni tuhsu tiro ñ sehe ni yahuha tinare:

¹⁴ —Toari masuno toaro, to doca site cúa yapari noaa buhea yooaro sehe jira.

¹⁵ Ñ yoa mahai boraa yapari noaa buhea yooaro sehe jira. Cäina noaa buheare ti tuhochu ñuno Satana sehe ta, tí buhea noaa buheare ti tuho ñahamarire bochu yoara tinare, minichahca tí yaparire ti churo seheta yooaro. ¹⁶ Ñ yoa tãa wapa bui dihta se mininocã bui boraa yapari noaa buhea yooaro sehe jira. Ñ jia paina noaa buheare tuho, wahchea mehne dóihtã tíre tuho nunu wahcãna. ¹⁷ Ñ tuho nunu wahcãpahta tãa wapa buicã jia yucu nuhcori mariea yucu yooaro sehe ahriina masa cūhu yuari pja cūno pjaerara. Ñ cūno pjaeraa, yu yare ti cahmari buhiri paina tinare ti ñano yoachu, ñano yuhdua, yu yare duhunocahna. Paina tinare ti ñano yoachu tíre cūno pjaeraa, yu yare duhunocahna. ¹⁸ Ñ yoa tja watoi boraa yapari noaa buhea yooaro sehe jira. ¹⁹ Ñ jia paina sehe noaa buheare tuhoa, ahri yahpa macaare wacū nunu yuhduara. Niñerure bujua cahma, paye baro cūhure payu cahma, tíre goa pja yuhduara tina. Ti ñ tuhtotuchu tí sehe noaa buheare ducatarã. Ti ñ ducatachu masa noaa sehere yoaerara. Dicha maria yucu yooaro seheta jira. ²⁰ Ñ yoa noari yahpai boraa yapari noaa buhea yooaro sehe jira. Ñ jia paina sehe noaa buheare tuhoa tíre cahmana. Tíre masiina jia, Cohamacu to cahmano seheta noaare yoara tina. Cäina mahanocã noaare yoara treinta yapari dicha tiro seheta. Paina bui curero noaare yoara sesenta yapari dicha tiro seheta. Paina pjíro noaare yoara cien yapari dicha tiro seheta —ni yahuha Jesu tinare.

Jesu sihãria quitire buheha

(Lc 8.16-18)

²¹ Ñ ni tuhsu ñ sehe ni yahu namoha Jesu:

—Ne, sihãriare ti sihãri baharo tiare dihi biato docapu cūerara. Ñ jia tiare coãri casario docapu cūerara. Muanopu duhu payora noano buhria dutia. ²² Jipihti ti masierari cjirire baharo masa masiahca. Sihãria to buhriachu mari ñu masino seheta panopure ti masierari cjirire masiahca masa. ²³ Ahrire noano tuhoga musa. ²⁴ Mahanocã masi duana mahanocã masinahca. Pjíro masi duana pjíro masinahca. Ñ jina musa tuhona noano tuho nunuga. ²⁵ Noano tuho nunuriro noano masinohca. Tuho nunuerariro “Mahanocã tuhoja”, to nipachuta tí sehe butia waharohca —niha Jesu tinare.

Jesu trigore toariro quitire buheha

²⁶ Ñ ni tuhsu ñ sehe ni yahu namoha:

—Cohamacu masa bui puhtoro to suho jia trigore toairo yoaro sehe jira. ²⁷Toa tuhsu bohrearo to toari duare ñuna tiro. “¿Dohse du wijaa ta bucuajari tí?” ni ñu masierara toairo to basi. ²⁸Tí toari ti basi dicha tira. Pari pūca ji muhtana. Baharo pari paro wijaa bucuara. ²⁹Tí parori bucu tuhsuchu ñuno pahara. Pahari pja jira. (To toaa ti bucuarire to masieraro seheta Cohamacu yaina masa ti wahachu cūhure yahu pahño masierara masa) —ni buheha Jesu.

Mostaza yapa quitire yahuha Jesu

(Mt 13.31-32; Lc 13.18-19)

³⁰ Ñ ni tuhsu ñ sehe ni buhe namoha Jesu piti dahre buhero:

—¿Ne Cohamacu masa bui puhtoro to suho jia yaba baro yoaro sehe jijari, musa tuhotuchu? ¿Dí quiti mehne tíre yahunahcari? ³¹Mostaza yapacā yoaro sehe jira puhtoro Cohamacu to suho jia. Tí yapacā to toachu mahabiari yapacā jira. ³² Ñ jiparota tí yapacā noano dura. Ñ jiro pji biadu wahara. Ñ jia tu dupuri bujua dupuri bucuachu ñua minichahca peri tu dupuripu suhti suhara. (Pji biadu to wahariro seheta mñano macarirore mari puhtoro masiina mahainacā ti ji muhtapachuta baharopu tina payu wahaahca) —niha Jesu.

Quiti mehne to buherire yahuha Jesu

(Mt 13.34-35)

³³ Ñ ni tuhsu, tí quiti ti niriro seheta payu quitire tuho ti cño pjaru puro noa buheare buheha tinare. ³⁴Quiti marieno yahueraha tinare. Tuhsu, ti sahsero jiinare Jesu noano yahu pahñoa to buheinare.

Jesu wihnonore yusu dutiha

(Mt 8.23-27; Lc 8.22-25)

³⁵ Ñ yoa tí dachoreta nahi borachupu Jesu to buheinare ñ sehe niha:

—Basa, sie coapu pahājihna —niha tinare.

³⁶ To ñ nichu tuhoa Jesu to jiriapu dohoriapu samu, masare yahpapu ducui-nare tóihita cū, to buheina dihta Jesure na pahāa wahaha. Ñ yoa paye buso mehne paina cūhu tinare piti ti pahāa wahaha. ³⁷ Ti ñ pahāchu wihnono tuaro taha. Ñ taro dohoriare pahcōri tuaro cāj sāaha. Mahanocā dūhsamaha ti miniboro. ³⁸ To ñ waharo watoi Jesu sehe dohoria otuopu suhti puti mehne to dapu ño tu tjiāhno carīno niha. Ñ jia tina tirore wahcōha.

—Buheriro, mari mini yariana tana nija. ¿Ñ jica niera putiajari muhu? —niha tina tirore.

³⁹ Ti ñ nichuta Jesu sehe wahcā, wihnonore:

—Tó purota wā duhuga —niha. Ñ ninota pahcōri cūhure:

—Yusua wahaga —niha bucuparirore.

To ñ nichuta wihnono yuhdua wahaha. Ñ jia pahcōri cūhu yusu boraa wahaha.

⁴⁰ —¿Dohse ni cuimacanocana nijari musa? ¿Musa yuhure wacū tuaerasi-nijari? —niha Jesu.

⁴¹ To ñ yoachu ñua tina cua yuhdua wahaha.

—Cue, ¿dohse jiri ro baro masuno jijari ahriro? Ahri wihnono, pahcōri cūhu to dutichu yuhduracaerara tirore —niha tina ti basi.

Watia ti cohtotarirore noariro wahachu yoaha Jesu

(Mt 8.28-34; Lc 8.26-39)

5 ¹⁻² Ñ yoa tina sie coapu Gerasa macaina ya yahpapu pahã suha. Pahã su, Jesu sehe dohoriapu sãariro maja surucaha. To ã maja surucari baha-rocãta, watia ti cohtotariro tãa copari, masa copari watoi jiri-ro wija ta, tiro cahapu taha. ³ Tiro watia ti cohtotariro masa copari watoi jiri-ro jia tiha. Tiro-re ne cãiro coma da pjiri da mehne ñaha duhte cũno bihoeraha. ⁴ Payu tahari masa tiro-re dahpori wupõa sorori mehne comaa dari mehne duhte-a timaha. To wamomacari cũhure duhte-a timaha. Wiho mejeta tiro sehe comaa darire nuha, dahpori wupõa sorori cũhure nuha site mujaha. Ñ jia tiro tuari-ro to jichu ñua masa sehe tiro-re cjuaa bihoeraa tiha. ⁵ Ñamine, dachore tũ yucuripu jia copari tãa copari watoi ã sañurucua tiha tiro. Ñ yoa tãa mehne to basi to pjacure cjãye mujaa tiha tiro. ⁶ Ñ yoa Jesu to maja surucachu yoaropu Jesure ñuroca, tiro cahapu muroca ta, na tuhcuca caha suha, tiro-re ño payoro taro.

⁷⁻⁸ —Watia wijaahga tiro-re —niha Jesu.

To ã nichu tuhoro watia ti cohtotariro õ sehe ni sañurucua:

—Jesu, Cohamacu Jipihina Bui Jiri-ro macuno, ¿yabare yoai tai nijari muhu yuhure? Cohamacu to ñurocaroi siniya yuhu muhure. Yuhure ñano yoai tjiga —ni sañurucua watia ti cohtotariro Jesure.

⁹ —¿Yabari-ro wama tijari muhu? —niha Jesu tiro-re.

—Sã payu jija. Ñ jina “Payu watia”, wama tjia. ¹⁰ Ahri dihtapu jiinare sãre pa yahpapu waha dutiecu tjiga —ni payu tahari siniha watia ti cohtotariro.

¹¹ Tí pjare ti cahacã tũcu dahpotoi yesea nuina payu chua niha. ¹² Tói ti churucuchu ñua õ sehe ni siniha watia:

—Sina yesea cahapu warocaga sãre ti pjacuripu sã sãahto sehe —ni siniha watia tiro-re.

¹³ Ti ã nichu tuhoro “Jai. Wahaga”, niha Jesu. To ã dutichu, watia masunopu jirina cjiri sehe wijaa, yesea pjacuripu sãaha. Tina yesea sehe payu waro jiha, dos mil. Ñ yoa tinare ti sãari baharo, yesea jipihina bucupari-ro duhtu cahapu pari cunupu muroca buha, tí taropu bora ñoja, mini yaria pihtia wahaha.

¹⁴ Ti ã mini yariachu ñua yeseare ñu wihboina sehe muroca wahcã, pjiri macapu cũhure, daa macaricãpu cũhure tíre yahu sitea wahaha. Ti ã yahuchu tuhoa, masa sehe payu ti ã waharire ñua wahaha. ¹⁵ Ñ jia Jesu cahapu wihia, payu watia ti cohtotariro cjiro to suhti tiri-ro, tuho masiri-ro to dujichu ñua, cui niha. ¹⁶ Watia ti cohtotariro cjiro-re, yesea cũhure ti ã waharire ñuina sehe paina masa ti cahai wihiinare noano yahu pahñoa. ¹⁷ Ti ã yahu pahñochu tuhoa, Jesure tuaro mehne pa sehepu waha dutha.

¹⁸ Ñ yoa dohoriapu Jesu to samuchu ñuno, “Muhu mehne waha duaja” ni, tuaro sinimaha watia ti cohtotariro cjiro sehe Jesure. ¹⁹ To ã nichuta Jesu tiro-re õ sehe ni yahuha:

—Yuhu mehne taecu tjiga. Mu ya wuhupu mu coyeyahapu yuhu mu puhtoro muhure yu yoarire yahui wahaga. Muhure yu pja ñurire yahuga tinare —niha tiro-re.

²⁰ To ã nichu watia ti sãanori-ro cjiro sehe Decapoli wama tiropu jia macaripu Jesu tiro-re to yoari cji-ririre yahu dũcaha. To ã ni yahuchu tuhoa jipihina masa cuaa wahaha.

Jairo maconore yuhdunchu yoa, cahã ñuricoro cühure yuhdunchu yoaha

Jesu

(Mt 9.18-26; Lc 8.40-56)

²¹ Ñ yoa pari turi Jesu to majare pahã suchu masa payu tiro cahapu bucu-pariro duhtu cahapu cahmachuha. ²² Ti ã cahmachuchu sã judio masa buheri wuhure ñu wihboriro Jairo wama tiroto wihi, Jesure ñu, to dahpori cahapu na tuhcuca caha suro, ²³ õ sehe niha:

—Yu macocã yariaro nihre. Ñ jicu ticorore mu wamomaca mehne ña payo, noaricoro yoai taga. Mu ã yoachu ticoro masanohca —niha tiro Jesure.

²⁴ To ã nichu Jesu cühü sehe tiro mehne wahaha. Mahai to wahachu payu masa tirore nunu ti wahcã bihsaro surucu suha tirore. ²⁵ To ã bihsaro wahachu numino doce cuhmari waro dachoripe cahã ñurucuricoro tói jiha. Tó pano payu duhturua ticorore ñano yuhdunchu yoaha. ²⁶ Ñ yoa duhturuare jipihitia to niñeru mehne wapamaha ticoro co tiro. Ti ã yoapachuta ticoro munanota jirucuha. Ñ jiro ticoro tó pano to jiriro yuhdoro ñano wahaha. ²⁷ To ã ñano yuhduricoro to jichu masia Jesu to yoarire tuhoa paina tíre yahuha ticorore. Ñ ti yahuchu tuhoru ticoro Jesu baharo masa payu watoi wihi, Jesu suhtirore ñaha ñuha. ²⁸ “Yuhu to suhtiro dihtare ñaha ñuco noaricoro waha-cohca”, ni tuhotuha. ²⁹ Ñ jiro ticoro to ñaha ñuri baharo to cahã ñuare duhuro to pjacure noari pjacu tuhotuha. ³⁰ Ñ jiro Jesu to tuua mehne dohatiare to cohãire masino, masa watoi majare ñuha.

—¿Noa yu suhtirore ñaha ñuri? —niha tiro.

³¹ To ã nichu tuhoa to buheina õ sehe niha:

—Bihsa nina. Ñ jia masa payu muhure pihanocahna. “¿Noa yuhure ñaha ñuri?” nicu, ¿dohseacu ñ nijari muhu? —niha tina sehe tirore.

³² Ñ jiro Jesu tirore ñaha ñuricorore macaha. ³³ To ã macano watoi ticoro sehe to pjacu noano wahachu tuhoturo cui, tetera na tuhcuca caha suha to panoi tirore ño payoro. ³⁴ Ñ jiro ticoro poto yahu pahñoa tirore. To ã ni yahuri baharo Jesu ticorore õ sehe ni yahuha:

—Maco, yuhure mu wacü tuua mehne noaricoro tjuara mipure. Wahchea mehne wahaga. Dohatia marienicoro jiga —niha Jesu ticorore.

³⁵ To ã ni durucuro watoi judio masare buheri wuhure ñu wihboriro ya wuhu macaina yahua wihiha:

—Mu maco yariaa wahahre. Ñ jicu buherirore pji tai tjiga —niha tina.

³⁶ Ti ã nipachuta ñ tuhotunocahno, Jesu ñu wihborirore õ sehe ni yahuha:

—Cahya tuhotui tjiga. Yuhure wacü tuaga. Tí dihtare yoaga —niha ñu wihborirore.

³⁷ Ñ ni tuhsu Santiago, to bahuro João, Pedro tina dihtare “Yuhu mehne taga”, niha Jesu. ³⁸ Ñ pji wahcãno sã judio masa buheri wuhure ñu wihboriro ya wuhupu suha tina. Tí wuhupu masa payu ñano bisi, ñahacaha tiia ti sañurucuchu ñuha Jesu.

³⁹ —Ñano ni, ñahacaha tiiena tjiga musa. Maharicorocã musa ñ ni tiichu variaerara. Carino nina —niha Jesu tinare.

⁴⁰ To ã nichu tuhoa “Ñ nimacanocano nina ahriri”, ni bujuha tina sehe tirore. Ti ã yoachu tiro tinare sopacapu wio pahñonocaha. Ñ wio tuhsuro maharicorocã pucsumare, tiro mehne macaina cühure ticorocã cahapu naaha Jesu.

⁴¹ Ñ naa tuhsuro Jesu tiorocäre to wamomacare ñaha:

—Talita cumi —niha tiro. (“Talita cumi” nino, “ ‘Maharicorocã wahcãga’, nija yũhũ”, nino nina.)

⁴² To ã nichũta tiorocã wahcãrũcu su, tiniha. Doce cũhmari cjuaricoro jiha ticoro. Tiorore to ã yoachũ ñua tina cua yũhdũa wahaha. ⁴³ Ti ã yoachũ ñuno, Jesu tuaro mehne tíre to yoirire yahu site dutieraha. Æ yoa tuhsũ tiorore chũa wa dutiha.

Nazare macaina Jesure cahmaeraha

(Mt 13.53-58; Lc 4.16-30)

6 ¹ Æ yoa tópu jiri ro waha, Jesu to buheina mehne to ya dihtapu tju suha. ² Æ tju suro Sabado jichũ sã judio masa buheri wuhũ buhe dũcaha Jesu. To ã buhechũ masa payũ tirore tuhoa, cuaa wahaha.

—Cue, ¿ahriro nohopũ tuhoari ahri buheare? ¿Dohsearo noano masi pah-ñonocajari ahriro? Cohamacũ tuua mehne yoa ñona tiro to basi. ³ Ahriro taboa dahrari masũno María macũno, Santiago, José, Juda, Simo ti wahmino jimanaro. Æ yoa to bahana numia mari ya macai jisininanabũ. Æ jiro tiro mari yaro sehe jiri ro tjira —niha tina Jesure tuhomarina.

Æ jia Jesure ñũ tuhtia, tirore cahmaeraha. ⁴ Ti ã cahmaerachũ ñũno õ sehe niha Jesu:

—Cohamacũ yare yahu muhtarirore paina ño payora. Ti ã ño payopachũta to ya maca macaina, to coyea, to ya wuhũ jiina ño payoerara tirore. Æ jina yũhũre ño payoerara musa õi yũ bucuariro jichũ —niha Jesu tinare.

⁵ Æ jiro tí macai jiro Jesu Cohamacũ tuua mehne yoa ño masieraha. Æ yoe-raparota cãina dohatiina bui to wamomacare duhu payo, noaina wahachũ yoaha tiro. ⁶ Æ jiro tó macaina Jesure ti quihõno tuhoerachũ ñũno cuaa wahaha tiro. Æ jiro Jesu tó cahai jia macaripu buhero wahaha.

Jesu doce buheinare buhe duti ro warocaha

(Mt 10.5-15; Lc 9.1-6)

⁷ Æ yoa Jesu doce to buheinare pjiroca, puaro dihta warocaha tinare macaripure buhe duti ro. Æ jiro to tuaare waha tinare watĩare ti cohã wiohto sehe. ⁸ Æ warocaro pãore, wajure, niñerure tiro naa dutieraha tinare. Ti tjuayucũ dihtare naa dutiha. ⁹ Æ ni tuhsũ, dahpori tu cãa cahsarire sãa dutiha tinare. Cũnota suh-tirore sãa dutiha tinare. Puaro sãa dutieraha. ¹⁰ Æ jiro õ sehe ni yahuha tinare:

—Jipihtia macaripu musare ti carĩno wachu tí wuhũhta tjuasiniga. Coã wahanapu wijaahga tí wuhũre. ¹¹ Æ jina pa maca macaina musare ti cahmaerachũ, ti tuho duerachũ tí macare yũhdũana dahpori macaa dihta pohcari mene wajã site cũga musa tinare ti ya buhirire masichũ yoana —ni yahuha Jesu tinare.

¹² Æ jia tina doce buheina masare ti ñaa tuhutumari cjirire tuhutu cohtota duti, Cohamacũre maca duti, buhea wahaha. ¹³ Æ wahaa payũ watĩare cohã wio, dohatiinare se mehne wisõa, noaina wahachũ yoaha.

João masare bautisarirore paina wajãha

(Mt 14.1-12; Lc 9.7-9)

¹⁴ Æ yoa Jesure masa payũ masiha. Æ jiro to yoirire puhtoro Herode tuhorocaha. Æ tuhorocaro õ sehe ni tuhutumaha tiro paina mehne:

—João masare bautisariro yariariro cjiro pari turi bajuaro nica. ã bajuariro jiro to tuua mehne tíre yoaro nica —ni durucumaha Herode paina mehne. (“Jesu Joãota jira”, ni tuhotumaha.) ¹⁵ Paina sehe ò sehe ni tuhotumaha:

—Elia jira —ni tuhotumaha.

Paina sehe:

—Cohamacu yare yahu muhtariro panopu macaina cjiri yoaro sehe jira tiro —ni tuhotumaha Jesure.

¹⁶ Ti ã ni tuhotupachuta Herode sehe Jesu to yoirire tuhorò ò sehe ni tuhotumaha:

—João dapure yu cã ta dutiriro cjiro bajuaro nica —ni tuhotumaha.

¹⁷⁻¹⁸ Joãore ti wajãhto pano Herode tirore ñaha duti, peresu yoa dutiha. Tó pano Herode to bahuro Felipe namonore Herodiare namo tiha.

—Mu bahu namonore namo ticu Cohamacu dutiare yuhdurucai nica muhu —ni yahumaha João Herodere.

To ã niri buhiri to namono Herodia Joãore peresu ti yochu cahmaha. ¹⁹ ã jiro ticoro sehe Joãore ñu tuhtiro, tirore wajã duti duamaha. ã yoa duaparota ticoro tirore wajã duti masieraha. ²⁰ Herode Joãore cuirò, “João noaare yoiriro, ñaa buhiri marieriro jira”, ni tuhotuha. ã jiro Herodere cariboro yoaha João sehe tirore yahuro. ã to caribopachuta tiro wahchea mehne tuhomaha Joãore. ²¹ To ã wahchea mehne tuhopachuta Herodia tirore to wajã dutihti dacho mu suha. Tí pjare Herode to masa bajuari dacho jichu tiro bose numu dahreha. ã jia to gobierno macaina, to surara puhto, Galilea macaina puhtoa cãhu to ya bose numure ñua wihiha. ²² Ti ã wihiri baharo Herodia macono bose numu ñuno wihiro ti ñurocaroi basa ñoha. To ã basa ñochu ñua Herode to pjiracaina mehne wahcheha. ã jiro ò sehe niha Herode ticorore:

—Mu cahmaare siniga yuhure. ã jicu waihtja muhure mu cahmaare.

²³ Cohamacu mehne potocã nii nija muhure. Mu sinino puro yu yare dacho macai waihtja muhure —niha tiro ticorore.

²⁴ To ã nichu tuhorò ticoro Herodia macono sehe to pocoro cahapu waha, ò sehe ni sinituha:

—¿Yabare sinicohcari yuhu? —ni sinituha ticoro to pocorore.

—João masare bautisariro dapure siniga —niha to pocoro.

²⁵ To ã nichuta ticoro Herodia macono ño duaro mehne puhtoro Herode cahapu waha, siniha:

—João masare bautisariro dapure waparo mehne waga yuhure —niha ticoro.

²⁶ To ã nichu tuhorò puhtoro Herode sehe tuaro cahyaha. Masa ti ñurocaroi “Waihtja muhure”, ni tuhsuha tiro. ã jiro buo tiro “Muhure waeraja”, ni masieraha ticorore. ²⁷ ã jiro dóihta surarare peresupu jijnare cohtarirore João dapure cã ta, na ta dutiha. ²⁸ To ã dutichu tuhorò surara sehe waha, to dapure cã ta, waparo mehne na taha. Na ta tuhsu, nuhminore Herodia maconore waha. To ã wachu ticoro to dapure ñaha, to pocorore yuhdoha.

²⁹ ã jia João buheina sehe tíre tuhoa tópure waha, to pjacu cjirore na wahcã, tãcapu ti sahari copapu na sãa duhu payoha.

Jesu cinco mil bui masare chua waha

(Mt 14.13-21; Lc 9.10-17; Jn 6.1-14)

³⁰ ã yoa Jesu to warocarina to cahapu tju sua, ti yoirire ti buherire yahuha tirore. ³¹ Tí pjare masa payu ã majarerucua, tinare churo waeraha. ã jiro ò sehe niha Jesu tinare:

—Masa marienopu mari sahsero sosinina wahajihna —niha tinare.

³² Ā jia tina ti sahsero dohoria mehne masa marienopu wahaha. ³³ Ti ā wahachu űua masa payu tinare masiha. Ā masia payu macari macaina mahapu waha, Jesu to suhtopu tina masa sehe muroca wahcā su muhtaha. ³⁴ Ti ā suchu Jesu wahā su, busocapu sāariro majano, tiro masa payu jiinare űuha. Oveja puā marieina yoaro sehe jiha tina masa, to űuchu. Ā jiro Jesu tinare pja űuno, payu noaare buhea tiha tinare. ³⁵ Namichahapu doce buheina Jesu cahapu su ō sehe niha:

—Ō masa marienopu jira. Namichahapu jira. ³⁶ Ō cahacāi jia macaripu daa macaricāpu, bujua macaripu ti chuhtire nuchu dutiga masare ti puhu tihti cjihtire —niha tina Jesure.

³⁷ —Chuare waga tinare —nimaha Jesu to buheinare.

To ā nichu ō sehe ni yuhtiha:

—¿Dos cientos dachori dahrari wapa niñeru mehne ti chuhti pāore nuchu-bocari sā? —niha tina Jesure.

³⁸ —¿Nohope curiri pāo curiri jijari? űuna wahaga —niha tiro.

To ā nichu tina sehe chuare boca ō sehe niha:

—Cū wamomaca pihtia curiri pāo curiri, puaro wahi jira —niha tina.

³⁹ Ti ā nichu tuhoru Jesu sehe pja curuari tja bui duji dutiha masare. ⁴⁰ To ā duji dutiri baharo tina pja curuari dujiha. Cāa curuari cincuenta masa jiha. Paye curuari sehe cien masa jiha. ⁴¹ Ti ā duji tuhsuchu űuno Jesu sehe cū wamomaca pihtia curiri pāo curirire, puaro wahi mehne na, muanopu űuha. Ā űuno Cohamacure “Noana”, niha. To ā niri baharo pāo curirire nuha, to buheinare masare witi dutiro waha. Ā yoa tuhsu, puaro wahire witi dutiha jipihtinare. ⁴² Ā jia jipih-tina chu, yapi yuhdua wahaha. ⁴³ Ti yapi wahyorire doce puhuse waro pāore, wahi cūhure na cahmachu wahpo dapoha tina. ⁴⁴ Ā yoa pāore chuina mua dihtare ti quihōchu cinco mil mua jiha. (Numia cūhu, macanacā cūhu tōi chuina jiha.)

Jesu co bui ducu wahcāha

(Mt 14.22-27; Jn 6.16-21)

⁴⁵ Tí pjata Jesu to buheinare dohoriapu samu duti, sie coapu Betsaidapu to pano pahāyu dutiha. Ā jiro ti pahāri baharo Jesu sehe masare coha sitiha. ⁴⁶ Coha siti tuhsu tūcupu Cohamacure sinino wahaha. ⁴⁷ Baharo űamipu dohoriāi bucupariro dacho macai ti pahārucuchu Jesu cūirota ti pahā tariropu jiha. ⁴⁸ Tōpu jiro, tina űano yuhdu ti wajachu ti panoi wihnono tachu űurocaha tiro. Ā jiro bohrea muja tahto pano tina cahapu waharo co bui ducu wahcāha. Tinare tiro yuhdu wahcā duamaha. ⁴⁹ To yuhdu wahcā duapachuta tirore co bui to tachu űua, “Yariariro cjiro jiboca”, ni tuhotumaha tina. Ā ni tuhotua tina sañurucuha. ⁵⁰ Jipih-tina tirore űua, űu cua waha, sañurucuha. Ti ā űu cuachu űuno Jesu tinare ō sehe ni yahuha:

—Ne, yuhure cuiena tjiga. Yuhuta jija —niha tinare.

⁵¹ Ā ni tuhsu tiro tina mehne dohoriapu samua wahaha. To samuri baharocāta wihnono yuhdua wahaha. To ā wahachu tina sehe cua yuhdua wahaha. ⁵² To pāo payu yoirire wacūeraha tina. Tua yuhduariro to jiare noano tuho űahaeraha.

Jesu Genesare macainare, dohatiinare noaina wahachu yoaha

(Mt 14.34-36)

⁵³ Ā yoa tina pahā su, Genesare dihtapu wahā su, tia dohoriare duhte poho, duhtu cahapu pahsaha. ⁵⁴ Ā yoa tina dohoriapu jiina ti majachuta masa sehe

Jesure ñu masiha. ⁵⁵ Ñ ñu masia jipihti ti ya yahpapu muroca maja, dohatinare ti coãa cahsari mehne yo wahcã, suha Jesu cahapu. “Jesu tópu jihre”, masa ti nichu tuhoa to cahapu suha tina. ⁵⁶ Ñ jia jipihitia macari to sua macaripu, bujua macaripu, daa macaricãpu, pache duaina cahapu, masa dohatinare ti cunopu Jesure to suhtiro duhtu cahare ñaha ñu dua tuaro siniha tina:

—Mu suhtiro duhtu caha dihtare sãre ñaha ñu dutiga —ni siniha.

Ñ jia to suhtirore ñaha ñuinape tópeinata noaina wahaa tiha.

Masa ñaina wahachu yoaare yahuha Jesu

(Mt 15.1-20)

7 ¹ Ñ yoa Jerusalëpu tarina sã coyea judio masare buheina, fariseo curua macaina cūhu Jesu cahapu cahmachuha. ²⁻⁴ Fariseo curua macaina jipihitina paina judio masa cūhu ti ñuchusuma cjihipu ti yoa dutiriro seheta wamo cosaro marieno chuera tiha. Ñ jia pache duaina cahapu waha, su, majare tju wihiina cūhu ti yoa dutiriro seheta wamo cosaro marieno chuera tiha. Payu paye dutia cūhure ti ñuchusuma cjihipu ti yoa dutiare yoa tiha. Tasa waparire cosaa, dihi biatorire cosaa, comaa biatorire cosaa, yoa tiha tina judio masa, “Cohamacu ã cahmana”, nia. Ñ jia sã coyea judio masare buheina, fariseo curua macaina cūhu Jesu cahapu cahmachua, Jesu buheina wamo cosaro marieno ti chuchu ñuha. ⁵ Ñ ñu tuhsua Jesure ò sehe ni sinituha:

—Mu buheina chua, mari ñuchusuma cjiri ti yoa dutiriro cjiro seheta ti wamomacarine wamo cosaerara. ¿Dohse yoa mari dutiare yoaerajari? —niha tina Jesure.

⁶ Ti ã nichu tuhoro Jesu ò sehe ni yahuha tinare:

—Masa ti baharo buhusehei ñano yoa cohtaina jira musa. Panopure Cohamacu yare yahu muhtariro cjiro Isaia potocãta yahuro niri jira musa yoa sehe tuhoerainare. Ò sehe ni yahu, joaa tiha tiro:

“Ahrina masa yuhure noano durucupahta ti tuhotuapu yuhure ne ño payoerara.

⁷ Ñ jia yuhure ti ño payoa yaba cjihti jierara. ‘Cohamacu ya dutia jira ahri’, ni mahño buhera ti ya buhea sehere”,

ni joaha Isaia cjiro. ⁸ Tí potocã tjira. Cohamacu ya dutia sehere duhu, masa ti yoa dutia sehere cohtota yoa yuhdurucu sua tira musa. ⁹ Cohamacu ya dutiare cohãna, musa coyea ya dutia sehere yoara musa. ¹⁰ Ò sehe yoana Cohamacu ya sehere yuhdurucana nina musa: Panopure ò sehe niha Cohamacu Moise cjiro to joariro seheta: “Musa pucsumare ño payoga. Cãiro to pucsumare ñano quiti dahreriro jiro tí buhiri ti wajãhtiro cjihto jirohca”, niha Cohamacu Moise cjirore to cūri dutiai. ¹¹ To ã nipachuta ò sehe yoa dutira musa ti pucsumare yoadoho dutierana: Ti pucsumare ti waborire Cohamacu sehere wa dutira musa. Ñ ni buhemana musa. ¹² Ñ buhena ti pucsumare ño payochu yoaerara musa tinare. ¹³ Ñ yoana Cohamacu dutiare yuhdurucana nina musa mari ñuchusuma cjiri ya dutia sehere yoana. Painare musa buhea dihtare tuho dutira musa. Payu tó sehe jiare yoara musa —niha Jesu tinare.

¹⁴ Ñ ni tuhsuro paina cūhure pjirocaha tiro. Ò sehe niha tinare:

—Musa jipihitina yuhure tuhona taga. Tuhsu yu niare noano tuho ñahaga musa. ¹⁵ Musa duserire sãa sehe musa chua sehe musare buhiri tichu

yoaerara. Ñaare m̃sa tuhotua sehe m̃sare ñaina jichu yoara. ¹⁶ [Yuhure noano tuhoga m̃sa] —niha Jesu.

¹⁷ Tinare ã ni yahu tuhsu Jesu masa cahapu jiriro cjiro waha, wuhupu sãa wahaha. ã to sãa suchu ñua to buheina sehe to buherire sinitu ñuha. Ti ã sinitu ñuchu tuhoru ò sehe niha tiro:

¹⁸ —¿Musa cūhu ne tuho ñahaerasinjari tíre? Musa duserire sãa sehe m̃sa chua sehe m̃sare ñaina jichu yoaerara, Cohamacu to ñuchu. ¹⁹ Tí m̃sa tuhotuapure sãaerara. Musa pjaropu sãa su, yuhdu wijaa wahara —niha Jesu.

Á nino “Jiphtia chua noaa jira”, nino niha. ²⁰ Á yoa ò sehe ni namoha tjoa:

—Musa ñaa durucua sehe m̃sa duseri wijaa sehe m̃sare ñaina jichu yoara, Cohamacu to ñuchu. ²¹⁻²² Ñano tuhotua, numia mehne ñano yoarucua, yacaa, masare wajãa, namo tiriropu jiparota pacorore manu tiricorore wuana tia, paio yare tuaro cjoa, ñano yoaa, mahñoa, buo tiro marieno ñaa yoaa, paina ti cjuaare ñu yabia, ñano quiti dahrea, “Painare yuhdurucaja”, ni tuhotua, tuho masieraina jia, tí jiphtia m̃sare m̃sa tuhotuapu tara. ²³ Jiphtia ahri ñaa m̃sa tuhotuapu taa, m̃sare ñaina jichu yoara, Cohamacu to ñuchu —niha Jesu.

Judio masono jieraricoro Jesure wacū tuaha

(Mt 15.21-28)

²⁴ ã ni tuhsuro Tiro wama tiri maca cahapu, Sidō wama tiri maca cahapu suro tó macari wuhupu sãa wahaha. ã sãahno painare to jiri wuhure yahu dutieraha. Á yahu dutieraparota tinare tiro duhti masieraha. ²⁵ Tí pjareta numino to macono watino to cohtotaricoro to cahai jiha. Á jia Jesu yoirire ñua paina to pocorore yahuha. Ti ã yahuri baharo to pocoro sehe waha, Jesu dahpori cahapu na tuhcu caha suha tirore ño payoro. ²⁶ Ticoro Sirofenicia wama tiri yahpa macaricoro jiha.

—Watĩnore cohã wiosiniga yu macore —ni siniha ticoro Jesure.

²⁷ To ã sinichu tuhoru ò sehe niha Jesu:

—Wahmanore wuhu puro pohna ya chuare dieyacãre yu wa muhtachu tó wahaerara. Israe masa yare pa yahpa macainare yu wa muhtachu tó wahaerara —niha Jesu ticorore piti dahre yahuro.

²⁸ —ã tjira puhtoro. Á jipachuta dieyacã cūhu mesa docai ti pohna ti chu site boroare chu cohtara tinacã cūhu. (Pa yahpa macaricoro yu jipachuta yuhu cūhure yoadoho masina muhu) —ni yuhtiha ticoro.

²⁹ —Mu ã ni yuhtichu mu macore watino wijaa tuhsuhre. Ñuco wahaga —niha Jesu ticorore.

³⁰ To ã nichu tuhoru majare tjuaa, to wuhupu tju suro, to maconore watino marienitorore camapu jiricorore ñuha.

Cahmono tuhoeraritore, durucu masieraritore

noariro wahachu yoaha Jesu

³¹ Tí pjare Jesu Tiro wama tiri maca cahapu jiriro waha, Sidō wama tiri macare su yuhdu wahcã, Decapoli wama tiropu jia macarine su yuhdu wahcã, Galilea wama tiri bucupariropu suha juna. ³² ã jia cahmono tuhoeraritore, noano durucu masieraritore Jesu cahapu na wihiha paina.

—Mu wamomaca mehne ña payoga tirore —ni siniha tina tirore.

³³Ti ā nichuta Jesu sehe tuhoerarirore na wahcā, masa marienopu suho suha. Ti sahsero jiha. Tuhsu, Jesu to wamo picari mehne tuhoerariro cahmo coparire be sōha. Ā yoa tuhsu, chahcho puti, to ñahmanore ña payoha.

³⁴Ā yoa tuhsu manopu ñu muo, yajeri na, ō sehe niha:

—Efata —niha Jesu. (“Efata” nino, “Pjōohga”, nino nina. Ā nino tirore tuho dutiro niha. Ā nino noano durucu dutiro niha.)

³⁵To ā nichuta tiro sehe tuho boca, to ñahmano bidaro wahachu tuhoturo noano durucuha. ³⁶Ā jiro Jesu tinare tíre painare yahu site dutieraha. To ā yahu site dutierachu tuhopahta tina sehe painare yahu site namoha. ³⁷Ā jia masa tuho cua yuhdua waha, ō sehe niha:

—Jipihtiare tiro noano yoara. Tuhoerainare noano tuhochu yoara. Durucu masieraina cūhure noano durucuchu yoara Jesu —niha masa.

Cuatro mil bui masare chuare waha Jesu

(Mt 15.32-39)

8 ¹Tí pjare pari turi masa payu ti cahmachuri baharo chua maeraina ti jichu ñuno Jesu to buheinare pjirocaha:

²—Ahrina masa tia dacho waro yuhu mehne ji tuhsura. Ā yoa tinare puhi mariaha. Ti puhi maerachu ñucu tinare pja ñuja yuhu. ³Paina tina mehne macaina yoraropu tahre. “Tinapu juca baaina mahai borari”, nicu tinare chua marieno ti wuhusepu waha duti duaeraja. Ā jicu tinare puhi wa duaja —niha Jesu to buheinare.

⁴—¿Dohse yoa mari ōre masa marienopure pāore boca wabocari mari? —niha to buheina sehe Jesure.

⁵—¿Nohope curiri pāo curirire cjuajari musa? —ni sinituha Jesu.

—Siete curiri jira —niha tina.

⁶Ti ā ni yuhtichu tuhoru, tiro masare yahpai duji duti, siete curirire pāo curirire na, Cohamacure “Noana”, niha. Ā ni tuhsu, tí curirire nuha, to buheinare wa, masare witi dutiha. To ā dutiri baharo to buheina sehe pāore masare witiha. ⁷Ā jia wahi cūhure mahainacā cjuaha tina. Ā jiro tinare Cohamacure “Noana” ni, wahi cūhure witi dutiha. ⁸Ti witi tuhsuchu tina chua, yapi yuhdua wahaha. Ti yapi wahyorire siete puhuse waro wahpo dapoha tina. Tina cuatro mil bui masa jiha. ⁹⁻¹⁰Ā yoa tuhsu Jesu masare coha sitiha. Coha siti tuhsu to buheina mehne dohoriapu samuha. Samu tuhsu Dalmanuta wama tiro cahapu wahaha.

Fariseo curua macaina Jesure Cohamacu tuaa mehne yoa ño dutiha

(Mt 16.1-4; Lc 12.54-56)

¹¹Ā yoa fariseo curua macaina wihi, Jesu mehne cahma sayoha. Tina Jesure Cohamacu tuaa mehne yoa ño dutia, to yoa ño masierachu ñu duamaha. ¹²Ti ā dutichu tuhoru Jesu cahyaro mehne yajeri sāano, ō sehe niha:

—¿Musa mipu macaina dohse yoana musa Cohamacu tuaa mehne yoa ñoare ñu duajari? Potocā niita nija musare. Mipu macainare musare Cohamacu tuaa mehne ne yoa ñosi yuhu —niha Jesu.

¹³Ā ni tuhsu waha, pari turi dohoriapu samu, sie coapu pahāa wahaha.

**Fariseo curua macaina, Herode mehne macaina cūhure ñaare ti buheare
yahuha Jesu
(Mt 16.5-12)**

¹⁴ Ñ wahaa, pāore boa waha, dohoriai cū curita pāore cjuaha tina. ¹⁵ Ñ yoa Jesu cuaro mehne yahuha tinare:

—Noano yoanohbū. Fariseo curua macaina, Herode mehne macaina cūhu ti pāo bucuarore ñuna noano yoaga. Cua nina tí —ni yahuha.

¹⁶ To ã nichu tuhoa tina to buheina sehe tíre ti basi ò sehe ni durucuha:

—Mari pāore mari na taerachū ñuno ã nino nica ahriro —nimaha tina ti basi.

¹⁷ Ti ã nirire masino tinare ò sehe ni sinituha Jesu:

—¿Dohse yoana musa pāo borire wacūjari musa? ¿Musa masierasiniari? ¿Tuho ñahaerasiniari? ¿Tuho duaerajari musa? ¹⁸ ¿Capari tiina jipanahta ñe-rajari musa? ¿Ñ jina cahmori tiina jipanahta tuhoerajari musa? ¿Musa ahrire wacūerajari? ¹⁹ ¿Yuhu cū wamomaca pihtia pāo curirire nuha, cinco mil bui masare yu warire wacūerajari musa? ¿Ti yapi wahyorire nohope puhusere pāo curirire wahpo daporí musa? —niha Jesu tinare.

—Doce puhuse —ni yuhtiha tina tirore.

²⁰ —¿Ñ yoa yuhu siete curirire pāo curirire cuatro mil bui masare yu wari baharo nohope puhusere pāo curiri wahpo daporí musa? —niha Jesu.

—Siete puhuse —ni yuhtiha tina tirore.

²¹ —¿Ñ ñupanahta noano tuho ñahaerasiniari musa? —niha Jesu tinare.

Jesu capari ñuerarirore ñuchū yoaha

²² Ñ yoa tina Betsaidapū ti suchu ñua, masa sehe capari ñuerarirore na wihia.

—Tirore ña payoga —ni, tuaro siniha tina Jesure.

²³ Ti ã sinichu tuhoro, Jesu capari ñuerariro wamomacare ñaha, tí maca duhtu cahapū tirore tuā wahcāha. Tópū na sū, to caparire chahcho puti, to wamomacari mehne tirore ña payoha.

—¿Mu ñuchū bajujari? —ni sinituha Jesu.

²⁴ To ã nichu tiro sehe ñuno, ò sehe niha:

—Muare ñuja. Yu ã ñupachuta tina yucuri tinia yucu yoaro sehe bajura —niha capari ñuerariro cjiro.

²⁵ To ã nichu tuhoro Jesu sehe to wamomacari mehne to caparire ña payoha tjoa. To ã ña payori baharo capari ñuerariro cjiro tuaro to ñuchū to capari noano bajuha. Ñ yoaro jipihtiare noano ñua tiro. ²⁶ To ã ñu masichū ñuno, Jesu tirore to wuhupū warocaha.

—Macapū pinihtare waihai tjiga —niha Jesu tirore.

“Jesu potocā Cristo, Cohamacu to warocariro jira”, ni yahuha Pedro

(Mt 16.13-20; Lc 9.18-21)

²⁷ Ñ yoa Jesu to buheina mehne Cesarea Filipino wama tiri maca cahai jia macaripū waha namoha. Tópū ti waharo wato, Jesu ò sehe ni sinitu ñua tiro buheinare:

—¿Diro baro jicari yuhu masa yuhure ti tuhotuchū? —ni sinitu ñua tiro tinare.

²⁸To ā sinitu ñuchũ tuhoa ō sehe ni yuhtiha tina:

—“João masare bautisariro cjiro jira”, nina paina. Paina “Elia jira”, nina. Paina “Cohamacũ yare yahu muhtaina cjiro mehne macariro jira”, nina muhure —ni yuhtiha to buheina tirore.

²⁹Ti ā ni yuhtiri baharo Jesu ō sehe ni sinitu namoha tinare:

—¿Musa sehe musa tuhotuchũ diro baro jicari yuhu? —ni sinitu ñuha tjoa.

—Muhũ Cristo Cohamacũ masare yuhdo duti to warocariro jira —ni yuhtiha Pedro.

³⁰To ā nichũ tuhoror Jesu ō sehe niha:

—Yuhure “Cristo jira tiro”, ni yahu sitesiniena tjiga painare —niha tinare.

Jesu to yariahtore, to masa wijaahto cūhure yahuha

(Mt 16.21-28; Lc 9.22-27)

³¹Tinare to ā ni sinitu ñuri baharo, ō sehe ni buhe ducaha tiro:

—Yuhũ masuno Cohamacũ warocariro jija. Ā jicu tuaro ñano yuhducuhca. Āta waharo cahmana yuhure. Mari coyea judio masa, bucuna, sacerdotia puhtoa, mari judio masare buheina yuhure cahmaeraa, yuhure wajā dutiahca. Ti ā wajāchu tia dacho wahaboroi masa wijaaahca —niha Jesu tinare.

³²Ā nino ne tuho wisiachũ yoaro marieno yahuro niha tinare. To ā nichũ tuhoror Pedro sehe pa sehe curerocā Jesure narucu su, tirore ā ni dutieraha.

³³To ā ni dutierachũ tuhoror Jesu to buheinare majare ñũ, tuhtiha Pedror:

—Satana yoaro sehe durucui nina muhũ. Ā nii tjiga. Mũ tuhotua masa ya jira. Cohamacũ ya jierara —niha tiro Pedror.

³⁴Ā ni tuhsũ masare to buheina mehne tiro cahapũ pjiroca, ō sehe niha:

—Cũiro yũ yairo ji duaro, to cahmano yoa duamarire duhunocanohca. Ā jiro crusapũ yũ ñano yuhduhtiro seheta tiro yũ yairo to jiri buhiri ñano yuhdparota yuhure duhusi. Ā jiro yũ yare yoarucuriro jirohca. ³⁵Masuno to mu suro to cahmano seheta yoiriro pichacapũ tiro waharohca. Ā yoa masuno yũ yare ā yoarucuro, noaa buheare ā yoarucuro, jipihtia dachoripe yuhũ mehne muanopũ jirucurohca. ³⁶¿Cũiro masuno ahri yahpa macaare jipihtiare cjuariro pichacapũ waharo yabare wapatajari tiro? Ā jiro ne wapataerara. ³⁷Pichacapũ to wahachũ ne dohse wapa wiohto basioerara. Masuno to jia tia wiho waro jierara. ³⁸Mipure ñaina, Cohamacure cahmaeraina ti mu suro ti yoiro dacho jiro nina. Cāina yũ wamare, yũ buheare ni dua buo tiboca. Ti ā yochũ ñucu yuhũ masuno Cohamacũ warocariro noaina anjoa mehne yũ Pucu to si sitero mehne tjua tacu yũ wamare ni duapahta buo tiinare buo tisāaihca yuhũ cūhũ —ni yahuha Jesu.

9 ¹Ā ni tuhsũ ō sehe ni namoha Jesu:

—Potocāta niita nija musare. Cāina musa ōpure jiina musa yariahtore pano puhtoro Cohamacũ to suho jiropure yũ sāachũ yuhure ñunahca —niha Jesu tinare.

Jesu to pjacure cohtotaha

(Mt 17.1-13; Lc 9.28-36)

²Ā yoa seis dachori baharo Jesu Pedror, Santiagore, ā yoa Santiago bahuro João cūhure muadu tūcupũ tina dihtare pji mujaha. Muanopũ ti mija

suri baharo ti ñurocaroi to pjacure cohtotaha. ³To suhtiro noano si sitero, noano yehseri suhtiro wahaha. Ahri yahpa macaa numia suhti cosaa numia ã yehsechu yoa masierara. ⁴Ã jia Elia cjiro, ã jichu Moise cjiro mehne Jesu mehne ti suhuduchu ñuha tina tiaro Jesu buheina. ⁵⁻⁶Ã jia tina tuaro cuiha. Æ curo dohse ni masieramahno ò sehe nimaha Pedro:

—Puhtoro, mari òi jichu noa duara. Tia wuhucã yoanahtja sã. Mu ya wuhucã, Moise ya wuhucã, Elia ya wuhucã yoanahtja —nimaha tiro Jesure.

⁷To ã niri baharocãta, me curua ti bui duji pja suha. To ã duji pja suchuta, me curua watoi ò sehe nino coa taha:

—Ahriro yu macu yu cahĩiro jira. Tuhoga tirore —nino coa taha.

⁸Ã nino coa tachuta Pedro cũhu ñurocamaha. Jesu dihtare ñuha. Ti ñurina cjiro sehe mariaha juna. ⁹Ã jiro tũcupu ti duji tachu Jesu tinare ò sehe ni yahuha:

—Michapucã yuhure ã waharire painare yahuena tjiga. Yuhu masuno Cohamacu warocariro yu yaria masa wijaari baharo tĩre painare yahuga musa —ni yahuha tiro.

¹⁰Ã jia to dutiriro seheta tina ti ñurire yahueraha painare. Æ jia tina ti basi ò sehe ni sinitu durucuha:

—“Yu yaria masa wijaari baharo” nino, ¿dohsearo ã niri tiro? —ni durucuha tina.

Æ jia Jesure ò sehe ni sinituha:

¹¹—“Cristo to tahto pano Eliare ta muhtano cahmana”, nina mari coyea judio masare buheina. ¿Dohse jiro baro ã nijari tina? —ni sinituha tina tirore.

¹²⁻¹³Jesu ò sehe ni yuhtuha:

—Potocã tjira. Eliare ta muhta dutire Cohamacu, jipihtiare cahno muhtahtiro cjihtore. Yuhu masuno Cohamacu warocariro payu tahari ñano yuhduihca. Paina yuhure cahmaeraa, ñano yoahca. ¿Tĩ cũhure masijari musa? Æ jicu ahrire nihtja musare: Elia wihi tuhsure. To ã wihipachuta tina ti cahmariro seheta tirore ñano yoaha. Æta ni joaha tirore —niha Jesu tinare.

Jesu wahma wamua tarirore noariro wahachu yoaha

(Mt 17.14-21; Lc 9.37-43)

¹⁴Ã yoa duji ta, paina buheina cahapu su, payu masare ñuha Jesu. To buheina sehe judio masare buheina mehne cahma sayoa niha. ¹⁵Ã jia Jesu cũhu ti duji tachu ñua, jipihitina masa cuaa waha, tiro cahapu murocaa wahaha. Tiro cahapu sua:

—¿Tamajari? —niha tirore.

¹⁶—Tamaja —ni tuhsu—, ¿dohse ni cahma sayona niri musa tina mehne? —ni sinituha Jesu to buheinare.

¹⁷To ã ni sinituchu tuhoro, masa watoi ducuriro ò sehe ni yahuha tirore:

—Buheriro, yu macure watĩno to cohtotarirore muhure na tamahi. Watĩno sehe tirore durucu dutierara. ¹⁸Yu macure to ñahachu yahpapu bora, bahca diho, buhaa wahaa tire tiro. Æ waharo sahpo tua tire. Æ jicu mu buheinare watĩnore cohã wio dutimahi. Yu ã dutipachuta tina sehe cohã wio masierare watĩnore —ni yahuha Jesure.

¹⁹To ã nichu tuhoro Jesu ò sehe niha tinare:

—Ne, yuhure wacũ tuaerara musa. Yoabiari pja musare buhemaja yuhu. ¿Noho puro yoari pja yuhure musa caribobocari? Tirore na tahga yuhure —niha Jesu.

²⁰To ā nichu tuhoa watīno to cohtotarirore Jesu cahai na taha. Ti na wihichu űno watīno sehe wahma wahmua tarirore yahpapu doca caha su, tunu teterechu yoaha. Ā yoa sahpo tua wahaha.

²¹—ĒNoho puro yoi pja watīno to cohtotariro jijari ahriro? —ni sinituha Jesu sehe to pucurore.

—Wihāroca jiroputa tiro watīno to cohtotariro jira. ²²Ā cohtotaro payu tahari watīno sehe tirore pichacapu, copu cūhure cohā wajāmaha. Ā jicu muhu yoa masicu sāre pja űu, yoadohoga —niha to pucuro Jesure.

²³To ā nichu tuhoŕo ō sehe niha Jesu:

—ĒDohsea jiro baro “Muhu yoa masicu”, nijari muhu yuhure? Yuhure mu wacu tuachu űno, Cohamacu jipihtiare yoa pahno masina muhure yoadohobasaro —niha Jesu.

²⁴To ā nichuta wahma wahmua tariro pucuro ō sehe ni saűurucuha:

—Muhure wacu tuaja. Yu wacu tuaerachu űucu yuhure yoadohoga muhure yu noano wacu tuahto sehe —niha tiro.

²⁵Ā jiro masa payu tina cahapu muroca ta, ti cahmachuchu űno, Jesu watīnore ō sehe ni tuhtiha:

—Muhu durucu dutierariro, tuho dutierariro ahrirore cohtotariro wijaahga. Ā wijaacu tirore pari turi cariboi tjiga —niha Jesu.

²⁶To ā nichu tuhoŕo watīno saűurucu, wahma wahmua tarirore yahpapu doca caha su tunu teterechu yoa, wijaaha. To ā wijaachu wahma wahmua tariro yariariro yoi sehe wahaha.

²⁷—Tiro yariaa wahara —nimaha masa payu.

Ti ā nipachuta Jesu sehe to wamomacare űaha, tirore wahcōha. To ā wahcōchu wahcāha tiro sehe. ²⁸Baharo Jesu cūhu wuhupu ti sāa suchu to buheina tirore ō sehe ni sinitu űuha:

—ĒDohseana sā sehe watīnore cohā wio masierari, mu tuhotuchu? —ni sinitu űuha tina.

²⁹—Ahriro baro watīnore cohā wio duana Cohamacure tuaro sinino cahmana musare. [Ā yoa duana chu duhuro cahmana musare Cohamacure sinina tana] —ni yuhtiha Jesu tinare.

Pari turi Jesu to yariahtore, to masa wijaahtore yahuha

(Mt 17.22-23; Lc 9.43-45)

³⁰Ā yoa tōpu jiina waha, Galilea yahpapu su, yuhduaha. Tōpu ti wahirire paina ti masichu cahmaeraha Jesu to buheinare buhe duaro. ³¹Tōpu suro to buheinare buhe tiha. Ō sehe ni buheha:

—Yuhu masuno Cohamacu warocariro jija. Masa yuhure űaha, painapure yuhure waahca. Ti ā wari baharo yuhure wajāahca tina. Ti ā wajāricu tia dacho wahaboroi masa wijaiihca —niha tinare.

³²To ā nichu tuhoa tina noano tuhoeraha. Ā jia cuia tirore tíre sinitu űu namoeraha.

Jesu buheina tina mehne macarirore puhtoro sō duaa nimaha

(Mt 18.1-5; Lc 9.46-48)

³³Ā yoa tina Capernaupu ti suri baharo wuhupu ti jichu Jesu sehe ō sehe ni sinituha tinare:

—¿Mahapure tana, dohse ni durucu tana niri musa? —ni sinituha tinare.

³⁴To ā nichu tina yuhtieraha. Mahapure taa, cahma ō sehe ni durucu taa niha:

—¿Mari mehne macarirore diro sehere mari puhtoro sōnahcari mari? —ni durucua niha mahai tarucua.

³⁵Ā jia ti ā nirire buo tia Jesure yuhtieraha. Ti ā yuhtierachu ñuno Jesu nuju su, to buheinare doce buheinare pjiroca ō sehe niha:

—Musa puhtoa ji duana jipihtina masa ti cahamaca jiro cahmana musare. Tuhsu, wiho jiina jipihtina docai jinahca musa —niha Jesu tinare.

³⁶Ā nino nijinocāre tina watoi duhu dapoha. Duhu dapo tuhsu tirocāre na wua, ō sehe ni yahuha:

³⁷—Yu yare yoa duana ahrirocāre musa cahmana, yuhu cūhure cahmana musa. Ā yoa yuhure cahmana, yuhure warocariro mari Pucu cūhure cahmana musa —niha Jesu tinare.

Marine ñu tuhtiro jieraro, mari mehne macariro jira

(Mt 10.42; Lc 9.49-50)

³⁸Baharo João ō sehe niha Jesure:

—Buheriro, mu wama mehne mu tuua mehne watīare cohā wiorirore sã ñuhi. Tiro mari mehne macariro to jierachu ñuna tīre tirore yoa dutiera tihi sã —niha tina.

³⁹Ti ā nichu tuhoru Jesu tinare ō sehe ni yahuha:

—Ā niena tjiga musa tirore. Cūiro yu wama mehne Cohamacu tuua mehne yoaro, baharo yuhure ñano ni durucu masierara. ⁴⁰Marine ñu tuhtiro jieraro, tiro mari mehne macariro jira. ⁴¹Musare potocāta nii nija. Yu yaina musa jichu ñua paina musare ti yoadohochu ñuno Cohamacu tinare noano yorohca. Core musare ti sihōchu mahanocā ti wapachuta tinare noano yorohca Cohamacu ti ā yoari wapa —niha Jesu tinare.

Ñaare yoachu cua nina

(Mt 18.6-9; Lc 17.1-2)

⁴²Ā yoa Jesu ō sehe ni yahu namoha:

—Ahrirocā sehe jirirore yuhure wacū tua ducarirore yahuihtja musare. Pairo ahrirocā sehe jirirore ñaare yoa dutiro tiro ñabiario yuhdurohca. Cūirore to wamapu pjiaria tācare dūhte yo, pjiri mapu tirore ti cohāchu ñano wahaboa tiro. Ā jiro ahrirocā sehe jirirore ñaare yoa dutiro tiro sehe pjiri mapu ti cohāriro yuhdoro ñano yuhdurohca.

⁴³⁻⁴⁴Mu wamomaca mehne ñano yocu tí wamomacare mu dute cohāboro seheta tí mu ñaa yoaa sehere duhuga. Tīre duhueracu pichacapu wahaihca. Tópure ne pichaca yatierara. [Ā yoa dachoa ne yarierara.] Mu wamomacare mu cohāchu tí si dihta butiboa. Tuhsu, muhu sehe ā si jipaihta baharo Cohamacu mehne jiihca. Pua wamomaca mehne pichacapu wahacu mu ā wahachu ñaa yuhduaboa muhure. Ā jicu tí mu ñaa yoaa sehere duhuga.

⁴⁵⁻⁴⁶Mu dahporo mehne ñano yocu tí dahporo cūhure mu dute cohāboro seheta tí mu ñaa yoaa sehere duhuga. Tīre duhueracu pichacapu wahaihca. [Tópure ne pichaca yatierara. Ā yoa dachoa ne yarierara.] Mu dahporore mu cohāchu tí si dihta butiboa. Tuhsu, ā si jipaihta baharo Cohamacu mehne

jiihca. Pua dahporo mehne pichacapu wahacu mu a wahachu ñaa yuhduaboa muhure. Ñ jicu tí mu ñaa yoaa sehere duhuga.

⁴⁷⁻⁴⁸ Mu capariaca mehne ñano yoacu tiare orewe mu cohaboro seheta tí mu ñaa yoaa sehere duhuga. Tíre duhueracu pichacapu wahaihca. Tópure ne pichaca yatierara. Ñ yoa dachoa ne yarierara. Tiare mu cohachu tia dihta butiboa. Cũ buhusehe capariaca mariapaihta baharo Cohamacu mehne jiihca. Pua capariaca mehne pichacapu wahacu mu a wahachu ñaa yuhduaboa muhure. Ñ jicu tí mu ñaa yoaa sehere duhuga.

⁴⁹ Ahri yahpai jina ñano yuhdunahca musa. Pichacapu mari jũchu marine purino seheta ñano yuhdunahca musa. ⁵⁰ Moa noano coara. Moa coerachũ, coa yoahito basioerara. Moa coareraro tí moa ne noaerara. Tí moare dohseahito basioerara. Moa noano to coaro seheta musa cũhu ji coaina jiga. Tuhsũ, paina mehne noano mehne jiga —ni yahuha Jesu tinare.

Ti namosãnumiare cohãare yahuha Jesu

(Mt 19.1-12; Lc 16.18)

10 ¹ Ñ yoa tiro tũpu jiriho waha, Judea yahpa cahapu sũ, Jordão wama tiri ma pa buhusehe coapu suha. Tũpu to suchu ñua masa payũ tiro cahapu cahmachuha tjoa. Ti a cahmachuchũ ñano tũ pano to buheriro seheta pari turi buheha tjoa. ² To a buhero watũ fariseo curua macaina wihiha. Jesure ñano to durucuchũ tuho duamaha tina tirore yahusã duaa. Ñ tuho duaa tina Jesure õ sehe ni sinitu ñuha:

—¿Mari namore cohachu noabocari? ¿Mari dutia sehe tũ seheta yoa duti-jari, mu tuhotuchũ? —ni sinitu ñuha tina.

³ —¿Dohse yoa dutiri Moise cjiro musare? —ni yũtiha Jesu.

⁴ —“Mu namore cohã duacu papera pũ tíre joaga. Ñ joacu tí pũre mu namore mu wari baharo ticorore cohã masina muhũ”, ni joaa tiha Moise cjiro —ni yũtiha fariseo curua macaina sehe.

⁵ Ti a nichũ tuhorõ õ sehe ni yahuha Jesu:

—Cohamacu dutiare musa yoa duaerachũ ñuno a ni joaa tiha Moise cjiro.

⁶ To a ni joariro jipachuta ahri yahpare bajuamehneriro muno, numino cũhure yoaha. ⁷ Ñ jiro muno to pũcũsumare cohã wijaa, to namono mehne jirohca. ⁸ Ñ jia tina puaro jipahta cũ pjacu yoaro sehe jira. Tina puaro yoaro seheta jierara. Cũ pjacu yoaro sehe jia nina. ⁹ Cohamacu to wamomaca duhte dutiina jira. Ñ jia tinare duhueraro cahmana —niha Jesu tinare.

¹⁰ Ñ ni tuhsũ tiro to buheina mehne wuhupũ sãa wahaha. Wuhupũ sãa sua, ti namosãnumiare cohãare to buheina sinitu ñuha tjoa tirore. ¹¹ Ti a sinitu ñũchu tiro õ sehe ni yũtiha:

—To namonore cohãriro pacorore namo tiro, pacoro mehne ñano yoariro jira. Ñ jiro to cohãricorore ñano wahachu yoaro nina. ¹² Ñ yoa numino sehe to manunore cohãno, pairore manũ tiro, tiro mehne ñano yoaricoro jira —niha Jesu tinare.

Macanacã ya cjihtire Cohamacure sini payoha Jesu

(Mt 19.13-15; Lc 18.15-17)

¹³ Ñ yoa macanacãre Jesure ña payo dutia taa tinacãre Jesu cahapu na taa tiha. Ti a na tachũ ñua to buheina sehe tinacãre na tainare tuhtiha. ¹⁴ Ti a tuhtichũ ñuno Jesu suaha tina mehne. Ñ suaro õ sehe niha tinare:

—Macanacã yu cahapu tajaro. “To cahai wahaena tjiga”, niena tjiga tinacãre. Tinacã Cohamacure ti puhtoro tuhotura. Puhtoro Cohamacu to suho jiina ahrinacã yoaro sehe tuhotuina baro dihta jira. ¹⁵Potocã niita nija musare. Ahrinacã Cohamacu ti puhtoro cjihtore cahmana. Ti yoaro seheta musa cûhu Cohamacu musa puhtoro cjihtore cahmaerana, puhtoro Cohamacu to suho jihtina ne jisi musa —niha Jesu.

¹⁶Ã ni tuhsu Jesu macanacãre na wua tjiãhno, tinacãre ña payoro, õ sehe niha:

—Ahrinacã noainacã wahajaro —ni sini payoha Cohamacure.

Pache puro Jesure sinitu ñuha

(Mt 19.16-30; Lc 18.18-30)

¹⁷Ã yoa Jesu mahai to waharucuchu paio sehe muroca wihi, to dahpori cahapu na tuhcuca caha suha tiore ño payoro.

—¿Ne, noariro buheriro, yuhu jipihtia dachoripe Cohamacu mehne ã jirucu duacu dohse yoacuhcari yuhu? —niha tiro Jesure.

¹⁸To ã nichu Jesu õ sehe ni yuhtiha:

—¿‘Noariro’ ni pisujari muhu yuhure? Noariro sehe Cohamacu dihta jira.

¹⁹Ahri Cohamacu dutiare masina muhu: Masare wajãena tjiga. Namo tiriropu paye numia mehne jiena tjiga. Yacaena tjiga. Mahñoa mehne paireore yahu-sãena tjiga. Paina yare mahño naena tjiga. Musa pucsumare ño payoga. Ahri dutiare yoaihca muhu —ni yahuha Jesu tiore.

²⁰—Buheriro, yuhu tí jipihtiare wahma wahmua tariro jiiputa yuhdu-rucaera tihi yuhu —niha tiro Jesure.

²¹To ã nichu tuho Jesu sehe tiore cahia mehne ñuroca õre. Ñuroca õno, õ sehe niha:

—Mahanocã duhsara muhure mu yoa pahñohto. Jipihtiare mu yare duai wahaga. Ñ yoacu jipihtia mu wapatari niñerure pjacuoinare waga. Mu ã yoachu payu mu ya noaa muanopu, Cohamacu cahapu jiyuahca. Mu ã yoari baharo yuhu mehne macariro cjihto taga —niha Jesu tiore.

²²To ã nichu tuho tiro sehe payu pache cjuariro jiro tíre pjacuoinare wa duaeraro, cahya, jicoaeraa, wahaa wahaha.

²³To ã cahyachu ñuno Jesu majarerucu suro, to buheinare ñuroca õ, õ sehe niha:

—Pache pua puhtoro Cohamacu to suho jiropure ti waha duachu mijobiara —niha tinare.

²⁴To ã nichu tuhoa tina sehe tíre tuho cuaa wahaha. Ñ ni tuhsu Jesu pari turi õ sehe ni yahu namoha tinare:

—Coyea, jipihtina [Cohamacure wacũno marieno “Mari mu suro mari cjuaa mehneta noano yuhdunahca”, ni tuhotuina pache pua] puhtoro Cohamacu to suho jiropure ti waha duachu mijobiara. ²⁵Camello sehe awicã copacãre to sãa nuhri wijaa duachu basioerara. To ã jiro yuhdoro pache puro puhtoro Cohamacu to suho jiropure to waha duachu nu mijobiara —ni yahuha Jesu tinare.

²⁶To ã nichu tuhoa tina sehe tuho cua yuhdua waha, ti basi õ sehe niha:

—Cue, to nino seheta potocã jichu ne cũiro masunore yuhdoeraboca Cohamacu —niha tina ti basi.

²⁷Ti ā nichu tuhoru Jesu tinare ñuroca ō, ō sehe niha:

—Masa ti basi ti mu suro yuhdu masierara. Wiho mejeta Cohamacu sehe masare pichacapu wahaborinare yuhdo masina. Tiro jipihtiare noano yoa masi pahñoriro jira —niha Jesu tinare.

²⁸To ā nichu Pedro tirore ō sehe niha:

—Tuhosiniga. Sā sehe jipihitia sā yare cūnoca tii muhu mehne tana —niha tiro Jesure.

²⁹To ā nichuta Jesu ō sehe niha:

—Potocā niita nija musare. Noaa buheare, yu yare yoana tana yuhure ño payona tana musa wuhusere, musa bahanare, musa pocusānumiare, musa pohinare, musa weserire cūnocarina jina, pjíro wapatanahca musa mipure. ³⁰Ā yoana musa wuhuserire, musa bahanare, musa pocusānumiare, musa pohinare, musa weserire, tó pano musa cjuariro yuhdoro mipure payu cjuanahca musa. Ā yoa paina musare ñano yoaahca. Ā jina baharopure pa turupu jipihitia dachoripe Cohamacu mehne jinahca. ³¹Mipure payu puhtoia jirina cjiri tí pjapure wiho jiina tjuanocaahca. Ā yoa mipure payu wiho jiina jirina cjiri tí pjapure puhtoia cohtotaahca tjoa —ni yahuha Jesu tinare.

Pari turi Jesu to yariahtore, to masa wijaahtore yahuha

(Mt 20.17-19; Lc 18.31-34)

³²Ā yoa tina mahapu maja, Jerusalēpu mujaa niha. Jesu ti panocā mu tāha. Ā to mu tāchu ñua to buheina ñu cuua wahaha. Ā yoa ti baharo nunu tiina sehe cuira mehne nunu tiha. Ā yoa Jesu doce to buheinare ti sahsero naaha tjoa. Ā naa tuhsu, masa tirore ti dohse yoahitire Jesu yahu dūcaha tinare:

³³—Tuhoga yuhure. Mipure Jerusalēpu wahana nija mari. Tópu masa yuhure masunore Cohamacu warocaritore ñaha, painapure yuhure waahca. Sacerdotea puhtoare, mari coyea judio masare buheina cūhure yuhure waahca. Ā jia yuhure wajā dutiaha tina. Ā wajā dutia judio masa jieraina sehere yuhure waahca. ³⁴Ti ā wari baharo tina sehe yuhure bujupe, chahcho puti sihō, tjana, wajāahca. Ā yoa yu yariari baharo tia numu wahaboroi masa wijaaahca —ni yahuha Jesu tinare.

Santiago João mehne Jesure siniha

(Mt 20.20-28)

³⁵Ā yoa Santiago, João mehne Jesu cahapu sua, siniha tirore. Tina Zebedeo pohna jiha. Ā jia ō sehe ni siniha:

—Buheriro, sā sinino sehta sāre yoaga muhu —niha tina Jesure.

³⁶—¿Dohse yu yoachu cahmajari musa? —niha Jesu tinare.

³⁷—Jipihitia bui puhtoro jicu sāre muhu mehne duji dutiga. Cūiro mu potu buhusehei paio mu cō buhusehei duji dutiga sāre, muhu mehne puhtoia sā jihto sehe —niha tina Jesure.

³⁸Ti ā nichu tuhoru ō sehe ni yahuha Jesu tinare:

—Musa ñano yuhduhtore masierapanahta ā sinina yuhure. ¿Mipure yu ñano yuhduhto sehta ñano yuhduna cūno pjabocari musa cūhu? —ni sini-tuha tinare.

³⁹To ā sinituchu tuhoa tina ō sehe ni yuhtiha:

—Cūno pjanahca —ni yuhtiha tina.

Ti ã nichu Jesu õ sehe ni yahuha:

—Yu ñano yuhduhto seheta ñano yuhdunahca masa cûhu. ⁴⁰Musa ã yuhduhtina masa jipachuta, yuhu mehne dutihtinare, yuhu mehne dujihtinare bese masieraja yuhu. Ahrire yu Pucu sehe cahno tuhsure. ã jia to besehtina dihta yu poto buhusehei yu cõ buhusehei dujiahca —niha Jesu tinare.

⁴¹ ã jia paina diez buheina Santiago, João ahrina puaro mehne susiniha ti ã sinirire tuhoa. ⁴² Ti ã susinichu ñano Jesu to buheinare pjiroca, õ sehe niha:

—Cohamacure masieraina puhtoa sehe ti masare dutia, purino mehne dutira. ⁴³ Musa sehe ne ã yoasi masa basi. Diro masa mehne macariro masa bui puhtoro ji duaro, jipihtina tiro mehne macaina cahamacuno yoaro sehe jia tiro cahmana tirore. ⁴⁴ ã yoa diro masa mehne macariro masare dutiroro ji duariro masa cahamacuno yoaro sehe jia tiro cahmana tirore. ⁴⁵ Tõ seheta jiroro jija yuhu cûhu. Yuhu masuno Cohamacu warocariro jipacuta ahri yahpapure yuhure masa yoadohotire masare sinii tai nierahi. Musa sehere yoadohoi tai nii. ã yoacu payu masa ya buhirire yaria, wapabasai tai nii. Yu ã yariaro mehne payu masare pichacapu wahaborinare yuhduchu yoai tai nii —niha Jesu tinare.

Bartimeore, capari ñuerarirore ñuchu yoaha Jesu

(Mt 20.29-34; Lc 18.35-43)

⁴⁶ ã yoa baharo tina Jericõpu suha. Jesu to buheina mehne, ã jichu paina masa payu mehne tí macai jiina ti wahachu tí macare ti yuhdu wahcâchu waro, Bartimeo sehe ti wahari maha duhtu cahai dujiha. Tiro Timeo macuno capari ñuerariro jiro, masare niñerucãre ã sinirucuriro jiha. ⁴⁷ Ti wahari maha duhtu cahai dujiro, “Jesu Nazare macariro tara”, ti nichu tuhora, Bartimeo sehe õ sehe ni sañurucuha:

—Jesu, Davi cjiro panamino masare yuhdohtiro, pja ñuga yuhure —ni sañurucuha Jesure.

⁴⁸ To ã nichu tuhoa masa payu Bartimeore “Dihta mariahga”, ni tuhtiha tina tirore. Ti ã ni tuhtichu tuhora Bartimeo tó pano to sañurucuriro yuhdo curero sañurucu namoha tjao:

—Jesu, Davi cjiro panamino masare yuhdohtiro, pja ñuga yuhure —ni sañurucuha tiro.

⁴⁹ To ã ni sañurucuchu tuhora Jesu sehe tjuaracu su, “Pjirocaga tirore”, niha. To ã nichu tuhoa tina sehe capari ñuerarirore õ sehe ni yahuha:

—Wahchega. Wahcârucaga. Tiro muhure pjira —niha tina Bartimeore.

⁵⁰ Ti ã nichu tuhora to bui macari suhtirore tjuwe cû, pu wahcâracu su, Jesu cahapu surucu suha. ⁵¹ ã jiro, Jesu sehe õ sehe ni sinituha tirore:

—¿Dohse yu yoachu cahmajari muhu? —niha Jesu tirore.

—Yu puhtoro, yuhure ñuchu yoaga —niha capari ñuerariro Jesure.

⁵² —Wahaga muhu. Muhu yuhure wacû tuacu noariro wahara —niha Jesu tirore.

To ã nichuta capari ñuerariro ñua wahaha. ã noariro waharo Jesu mehne mahapu wahaa wahaha.

Jerusalêpu suha Jesu

(Mt 21.1-11; Lc 19.28-40; Jn 12.12-19)

11 ¹ ã yoa tina Jerusalêpu ti suhto panocã tûcu Olivo wama tidu duhtu cahai jiri maca Betfagé wama tiri maca cahai, ã jichu Betania wama

tiri maca cahai su muhtaha. Tí macari pua maca cahai Jesu suro, to buheina pwarore warocaro taro, ò sehe ni yahu quihôha:

²—Sí macapu wahaga. Tópu suna dóihta burrocäre ti duhte daporirocäre boca sunahca. Tiro ne cüiro ti pisamahnoerarirocä jica. Tirocäre bocana, yuta dare pjä, na tabasaga yuhure. ³Musa tirocäre pjächu ñuno cüiro dohse jiro, “¿Dohse yoana tana burrocäre duhte daporí dare pjäjari musa?”, to nichu tuhona, ò sehe ni yuhtiga tirore: “Mari puhtoro burrocäre cahmarocasini. Michapucacäta wiarohca tiro”, ni yahuga tirore —ni yahu duti warocaha to buheina pwarore.

⁴To ä nichu waha, tí wuhu sopaca cahai burrocäre ti duhte daporirocäre bocaha. Boca, tirocäre pjäha. ⁵Tirocäre yuta dare ti pjächu ñua tói ducuina ò sehe ni sinituha tinare:

—¿Dohse yoana tana burrocäre duhte daporí dare pjäjari musa? —ni sinituha tina.

⁶Ti ä nichu tuhoa, tina sehe Jesu to niriro sehetu yahuha tói ducuinare. Ti ä ni yahuchu tuhoa tói ducuina sehe “Naahga”, niha tinare. ⁷Ä jia tina burrocäre Jesu cahapu na suha. Ti na suri baharo tirocä bui ti bui säa suhtire ti pjüpaha payo tuhsuchu ñuno, Jesu sehe tirocä bui muja pja, wahaha. ⁸Tirocä bui to wahachu ñua, masa payu ti bui säa suhtire tjuwe na, to wahahti mahai saño cü muhtaha, Jesure ño payoa. Paina sehe campopu püri tia dupurire yucu dupurire dute na ta, to wahahti mahai duhu cüha.

⁹Ä jia to pano wahaina, to baharo nunu tiina mehne ò sehe ni sañurucuha:

—Ahriore wahche payojihna. Ahriro Cohamacu to warocariro noano jijaro. ¹⁰Mari ñuchu Davi cjiro puhtoro to noano suho jiro sehetu, ahriro marine to suho jihto cühu noano jijaro. Muano macariro Cohamacu, muhu tuariro waro jira —ni sañurucuha tina.

¹¹Ti ä yoari baharo Jesu sehe Jerusalëpu suha. Su, Cohamacu ya wuhupu säa suro, tí wuhui jiare jipihtiare ñu pahñonocaha. Ñu tuhsu “Ñamichahapu waro jira marine” nia, Jesu to buheina doce buheina mehne Betaniapu wahaa wahaha.

Jesu higuera yaria dutiha

(Mt 21.18-19)

¹²Ä yoa pa dachoi tina Betaniapu jiina wahaa wahaha. Ä jiro Jesu sehe juca baa, yoropu higuera wama tidure noano püri tidure ñuno tu dichare macano wahamaha. ¹³Dicha mariaha. Dicha tiri pja jieraro püri dihta jiha. ¹⁴Ä jiro dicha mariachu ñuno ò sehe niha:

—Ahdü dichare masa ne pari turi chüea tjijaro. Ne dicha tiero tjijaro —niha Jesu.

To ä nichu to buheina sehe tuhoha.

Jesu Cohamacu wuhure Cohamacu mehne durucuri wuhure yoa dutiha

(Mt 21.12-17; Lc 19.45-48; Jn 2.13-22)

¹⁵To ä yoari baharo tina Jerusalëpu suha. Tópu suro, Jesu Cohamacu ya wuhupu säa suro pache duainare, nuchüina cühure cohä wioha. Ä yoro niñeru cohtotaa mesarire yo wahcô na majare cü mujaa tiha. Bujaare duaina ti dujia pahtari cühure äta yoaha. ¹⁶Ä yoro paye barore na säa dutieraha masare. ¹⁷Tó sehe yoa tuhsu, Jesu ò sehe ni buheha tinare:

—Ō sehe nina Cohamacu yare ti joari pui: “Yu wuhu Cohamacu mehne durucuri wuhu wama tirohca. Ā jiro jipihtiro macaina ya wuhu cjihto jirohca”, ni joa tiha Cohamacu yare ti joari pui. To ā nipachuta musa sehe ahri wuhui duana, musa basi cahma yacara musa —ni buheha tinare.

¹⁸To ā ni buhechu jipihtina masa sehe tuho cuaa wahaha. Ā jia sacer-dotea puhtoa, sā judio masare buheina mehne tirore cui niha. Ā jia tina tirore ti wajāhti cjihtire wacū macamaha. ¹⁹Ti ā yoachū űamichahapū Jesu to buheina mehne ti macapū jirina cjiri wahaa wahaha.

Higueracu űaia wahaha

(Mt 21.20-22)

²⁰Ā jia bohrearo mahapū maja taa, higueracure űuha. Tu nuhcoripū űai duca, űaia wahaha tu. ²¹Ture űūno Pedro sehe wacūno ō sehe niha:

—Buheriro, űuga. Higueracu mu yaria dutidu yaria wahari jira —niha Pedro.

²²To ā nichuta Jesu ō sehe ni yahuha tinare:

—Cohamacure wacū tuaga musa. ²³Potocā niita nija musare. Ahdu tūcure pjiri mapū musa cohā dutichū musa niriro seheta ā waharohca. Cohamacure noano musa wacū tuachū “Yu siniriro seheta ā waharohca”, musa ni tuhotuchū musa niriro seheta ā waharohca. ²⁴Ā jicu ahrire yahuihtja musare. Cohamacu mehne durucuna, tirore sinina, “Yu siniriro seheta warohca yuhure”, ni tuhotuga. Musa ā ni tuhotuchū űūno Cohamacu musa siniare warohca. ²⁵Ā yoana Cohamacu mehne musa durucuhto pano musare paina ti űano yoachū musa suari cjirire duhuga. Musa ā yoachū űūno Cohamacu muano macariro musa űaa buhirire tiro cūhu sua duhurohca. ²⁶[Musare űano yoainare musa sua duhuerachu mari Pucu cūhu muano macariro musa űaa buhiri sehere bosi tiro cūhu] —niha Jesu.

Sacerdotea puhtoa, judio masare buheina, bucuna mehne Jesu mehne cahma sayoha

(Mt 21.23-27; Lc 20.1-8)

²⁷To ā niri baharo tina Jerusalēpu wahaha tjoa. Ā jia Jesu Cohamacu wuhui to tinichū űua sacerdotea puhtoa, sā judio masare buheina, bucuna mehne tiro cahapū sua tirore ō sehe ni sinitu űuha:

²⁸—¿Dohseacu canure ā yoari muhu? ¿Noa muhure tīre ā yoa dutiri? —ni sinitu űuha tina Jasure.

²⁹Ti ā nichū Jesu ō sehe ni yuhtiha:

—Musa sehere sinitu muhtaihtja. Noano yuhure musa yuhtichū musare yahuihtja yuhū cūhu. ³⁰¿João masare to bautisachu diro baro sehe tirore bautisa dutia tiari, musa tuhotuchū? ¿O Cohamacu dutiera tiari? ¿O masa sehe tirore dutia tiari, musa tuhotuchū? —ni sinituha tinare.

³¹To ā nichū tina sehe ti basi ō sehe niha: “¿Dohse ni yuhtinahcari mari? ‘Cohamacu Joãoire dutia tiri jire’, mari nichū, ‘¿Dohseana Cohamacu Joãoire to dutipachuta tirore tuhoerari musa?’ niboca Jesu marine. ³²Ā yoa, ‘João to bautisachu Cohamacu sehe tirore dutierari jire’, mari nichū masa sehe suaahca mari mehne”, niha tina ti basi. “Potocāta João Cohamacu yare yahu muhtariro jira”,

ni tuhotua tiha masa sehe. Ti ā ni tuhotuchū masia, Joāore doca dahre duaeraha sacerdotea puhtoa cūhū, “Masa suari”, nia. ³³ Ā jia tina Jesure ō sehe ni yuhtiha:

—Joāore bautisa dutirirore sã masieraja —niha tina Jesure.

—Tí pja pinihta yuhū cūhū ahrire yu yoaare dutirirore yahueraja musare —niha Jesu tinare.

Ñaina dahra cohtaina quitire yahuha Jesu

(Mt 21.33-46; Lc 20.9-19)

12 ¹ Ā yoa Jesu to tuhotua mehne ō sehe ni piti dahre buhe dūcaha tinare: —Wese pūro se dari cjihtire toaha. Toa tuhsū, sahrīnore dapō, sere ti tū mūtohti copare saha, mūari wuhūcā dahreha tiro. Tuhsū, tí wesere painare cū buhusehe coa pahma cūno, tí wesere ñu wihbo dutiha. Ñu wihbo duti tuhsū, pa yahpāw wahaha tiro. ² Baharo se ñiri pja jichū wese pūro tirore dahra cohtarirore wese macaa to ya coa macaa dichare na dutiro warocamaha. ³ Ā jia tí wesere ñu wihboina sehe tirore dahra cohtarirore ñaha, cjāha. Ā yoa tuhsū tirore dahra cohtarirore se tōhorine waerapahta tjuaa dutiha tirore. ⁴ Ā jiro wese pūro paio tirore dahra cohtarirore warocamaha tjoa. Ā jia wesere ñu wihboina sehe tirore dahra cohtarirore dapure camī dahre, ñano yoaha tina tirore. ⁵ Tuhsū, paio sehere to warocachū ñu wihboina tirore wajāha. Payū paina cūhure ā dihta yoa mūjaha. Paina sehere cjā, paina sehere wajāha tina.

⁶ Ā jiro wese pūro macūno dihta dūhsaha. Tiro to cahīro jīha. Ā jiro to macūnore warocaha jūna, “Yū macū sehere ño payoahca”, nino. ⁷ To ā ni tuhotupachuta tina ñu wihboina ti basi ō sehe ni durucuha: “Wese pūro macūno baharo ahri wesere cjuahitiro jira ahriro. Tirore wajājihna mari. Ā jiro ahri wese mari ya wese tjuarohca”, nimaha tina ti basi. ⁸ Ā nia tirore ñaha, wajā, wese duhtu cahapū na wahcā, cohānocahna tina tirore.

⁹ Ā Ne wese pūro taro dohse yoarohcari tiro wesere ñu wihboinare? Ō sehe yoarohca tinare: Tiro tinare wajāno, paina sehere wesere ñu wihbo dutirohca.

¹⁰⁻¹¹ Ā Cohamacū yare ti joari pūre ahrire buherari mūsa? Ō sehe ni joaa tiha:

“Ahriro Cristo tāca yoaro seheta jira.

Tācare wuhū dahreina ti cohāno seheta masa tirore cohāahca.

Ti ā yoapachuta mipure wuhū dahreina wuhure yoaa ti cū mūhtari

tācare ti cūno seheta Cohamacū tirore puhto sōre.

Cohamacū sehe ahrire yoare.

To ā yoachū ñuna, ‘Noa yūhduara’, ni tuhotuja mari”,

ni joaa tiha panopū. Ā Tíre ne buherari mūsa? —niha Jesu tinare.

¹² To ā nichū tuhoa sacerdotea puhtoa, sã coyca judio masare buheina, bucūna mehne ō sehe ni tuhotuha: “Jesu wesere ñu wihboina qiti mehne marine tuhtiro nina”, ni tuhotuha. Ā ni tuhotua Jesure ñaha duamaha. Ā ñaha duapahta masare cui niha. Ā cuia tirore cohā wahcā wahaha.

Fariseo curua macaina, Herode ya curua macaina mehne gobierno macaa

wapare sinituha Jesure

(Mt 22.15-22; Lc 20.20-26)

¹³ Waha, tina fariseo curua macainare, Herode ya curua macaina cūhure Jesure sinitu dutia warocaha tjoa. Jesu ñano to yuhtichū yoa duamaha tina, tirore yahusāa taa. ¹⁴ Ā jia Jesu cahapū sua, tirore mahño cū sinitu ñumaha:

—Buheriro, potocã durucuriro, mahñoa marieriro mu jichu masija sã. Cohamacu yare quihõno mu yahuchu cũhure masija sã. ã yoa cũiro puhtoro waro to jipachuta tiro cũhure dõrero marieno potota yahura mũhu. ã jicu sãre yahuga. ¿Roma macariro jipihtina bui puhtoro jirirore gobierno macaare marine waparo cahmajari, mu tuhutuchu? ¿Mari dutia tirore wapa dutijari, mu tuhutuchu? —ni sinitumaha tina Jesure.

¹⁵ Ti ã sinituchu tuhoru ti yahasã duaare masino õ sehe ni sinituha tinare:

—¿Dohseana yu ñano durucuchu tuho duajari musa? Mipure niñeru ture na tahga. Tí ture ñujihna —niha Jesu tinare.

¹⁶ To ã nichu tuhoa tina sehe cũ ture na taha. Ti na wihichu Jesu õ sehe ni sinituha tinare:

—¿Diro baro masu wahājari ahri ture? ¿Diro baro wama wahājari? —ni sinituha tiro.

—César, masa bui puhtoro masu, to wama cũhu wahāna —ni yuhtiha tina.

¹⁷ Ti ã nichu Jesu õ sehe ni yahuha tinare:

—Tí pja pinihta masa bui puhtoro yare tiro sehere waga. Cohamacu yare Cohamacu sehere waga —ni yahuha Jesu.

To ã nichu tuhoa, tuho cuaa wahaha.

Saduceo curua macaina Cohamacu to masoare sinituha Jesure

(Mt 22.23-33; Lc 20.27-40)

¹⁸ ã yoa cãina Saduceo curua macaina Jesu cahapu wihiha. Saduceo curua macaina sehe “Cohamacu yariainare masosi”, ni tuhutuina jimaha. ¹⁹ ã jia tina õ sehe niha tirore:

—Buheriro, õ sehe ni buhea tiha Moise cjiro: “Cũiro to wahmino namo tiroro pohna mariaparota to yariachu ñuno to bahurore to wahmino namono cjirore nuano cahmana. A yoaro to wahmino munano to pohna tiboro seheta pohna tiro cahmana to bahurore. ã jia to pohna to wahmino munano pohna yoaro sehe jiahca”, ni joaa tiha Moise cjiro —niha tina Jesure.

²⁰ Tíre ni tuhsu, ahri quitireta yahu namoha Jesure:

—Cũiro masuno jiha. Seis to bahana jiha. Ti wahmino sehe namo ti, pohna mariaparota yariaa wahaha. ²¹ Tuhsu, paio to bahuro cũhu to wahmino namono cjirore cjuamaha. To ã nuuari baharo to wahmino yoaro seheta pohna mariaparota yariaa wahaha tjoa. ã jiro ahriro bahuro to wahmino munano yoaro seheta pohna mariaparota yariaa wahaha tjoa. ²² ã dihta wahaha cũiro pohna waro. Ne pohna mariapahta varia pihtia wahaha tina. Ti namono cjiro cũhu ti baharota yariaa wahaha. ²³ ¿Ne, Cohamacu jipih-tinare yariaina cjirore to masochu diro namono sehe jirohcari ticoro? Tina jipihtina ticorore namo tirina cjiri jiha. ¿ã jiro diro namono sehe jibocari ticoro pototi? —ni sinituha tina.

²⁴ Jesu õ sehe ni yuhtiha tinare:

—Cohamacu yare ti joari pũre, to masia cũhure ne masierara musa. ã jia musa tuhutua sehe ne quihõno jierara. ²⁵ Yariarina cjiri ti masa mujari baharo tina anjoa yoaro sehe jira. Tina mua namo tierara tópure. ²⁶ Yariarina cjiri ti masa wijaahto sehere musare yahuihtja: Tíre Moise cjiro noano yahu pahñoa. To mahaducã jũri quitire õ sehe ni yahuha tiro: “Yũhu Abrahã, Isaa, Jacobo ti puhtoro tjija”, ni yahure Cohamacu yuhure”, ni joaa tiha Moise

cjiro to joari tjui. ²⁷Ti yariari baharo “Ti puhtoro tjija”, ni yahuha Cohamacu. A niparota yariarina cjiro puhtoro jierara Cohamacu. “Ti puhtoro tjija”, to nia mehne catiina ti jichu masija mari. Tiro catiina puhtoro jira. A jina “Variaina masasi”, ni tuhutuna quihõno tuhutuerara musa —niha Jesu tinare.

Cũno noa yuhduro to dutiare yahuha Jesu

(Mt 22.34-40)

²⁸A yoa cũiro sã coyea judio masare buheina mehne macariro tina cahapũ wihi, ti cahma durucuchũ tuhoha. Jesu to noano yuhtiare tuhoro õ sehe ni sinituha tirore: —¿Cohamacu ya dutia noa yuhduaro di baro sehe jijari, mu tuhutuchũ? —ni sinituha tiro Jesure.

²⁹Jesu tirore õ sehe ni yahuha:

—Ahri dutiata paye dutia yuhdoro noa yuhduara: “Israe masa tuhoga. Cohamacu musa puhtoro yuhu cũirota jija. ³⁰Tuaro musa yajeripohnari mehne, noano musa wacũa mehne, musa tuaa mehne yuhure cahĩga”, nina Cohamacu. ³¹Ahri dutia baharo paye dutia noa yuhduara: “Mu basi mu cahĩno seheta mu cahai jiina cũhure cahĩga”, nina Cohamacu. Ahri puaro dutia jipihtia paye dutia yuhdoro jira —ni yahuha Jesu tirore.

³²To a nichu tuhoro judio masare buheriro õ sehe niha:

—A tjira. Buheriro, potocã nina muhu. Cohamacu cũirota jira. Pairo tiro yoaro sehe jiriro mariaha. Mu nia potocã tjira. ³³Cohamacure tuaro mari yajeripohnari mehne, mari wacũa mehne, mari tuaa mehne tirore cahĩno cahmana marine. Yu cahai jiinare yu basi yu cahĩno seheta tina cũhure cahĩno cahmana yuhure. Wahiquinare wajã jũ mo mari wari mehne mari ño payochu noa nimana. Ahri yuhdoro Cohamacure masa cũhure mari cahĩ noa yuhduara. Mu a nia potocã tjira —niha judio masare buheriro Jesure.

³⁴To a noano yuhtichu tuhoro Jesu õ sehe ni yahuha tirore:

—Mahanocã duhsara muhure Cohamacure mu noano masihtõ —niha tirore. To a nichu tuhoa paina cuia, ne sinitu ñueraha tirore.

¿Diro baro coyeiro jijari Cristo?

(Mt 22.41-46; Lc 20.41-44)

³⁵A yoa Cohamacu wuhui buhero õ sehe niha Jesu:

—“Cristo Davi cjiro panamino jira”, ni buhera mari coyea judio masare buheina. ¿Dohse yoa a ni buhejari tina? ³⁶Davi cjiro to basi Espĩritu Santo to dutirio seheta õ sehe ni yahuha tiha:

“Cohamacu yu puhtorore õ sehe nire: ‘Õi yu poto buhusehei dujiga.

A jicu muhure ñu tuhtiinare muhure yuhdurucabasaihca yuhu’, nire

Cohamacu yu puhtorore”,

ni joaa tiha Davi cjiro. ³⁷A ni joaro Davi cjiro puhtoro tia tiha Cristore. ¿Davi cjiro Cristo ñachũno cjiro jiparota dohsearo Davi sehe puhtoro tiari Cristore? Cristo Davi cjiro puhtoro jira —ni yahuha Jesu.

To a ni buhechu payu masa wahchea mehne tuhoha tirore.

Jesu judio masare buheina ti ñaare yahuha

(Mt 23.1-36; Lc 11.37-54; 20.45-47)

³⁸A yoa tiro buhe namono õ sehe niha:

—Mari coyea judio masare buheina ti ñaa yoaa noano ñuga. Ñ jina ti yoaro sehe yoaena tjiga. Tina yoaa suhti sãa, masa ti ñurocaroi majarea, pache duaropu paina puhtoare noano ño payo ti sinino sehe ti piti bocasinichu cahmana tina. ³⁹Ñ cahmaina jia, mari judio masa buhea wuhusei noaa dujia dihtare duji duara. Tuhsu, bose numu jichu tó cūhure noaa dujia dihtare cahmana tina. ⁴⁰Tina wapewahya numia ya wuhusere ti ya cūhure mana tí numiare. Á yoaina jia, tina masa ti ñurocaroi yoari pja Cohamacu mehne durucumana masare ñu dutia. Ti á yoari buhiri paina bui curero tinare Cohamacu pjiro buhiri dahrerohca —niha Jesu tinare.

Wapewahyoro to warire yahuha Jesu

(Lc 21.1-4)

⁴¹Ñ yoa Jesu niñeru wihbori caro cahapu dujiha. Tí caropu masa ti niñeru duhu sãachu ñu dujiro niha. (Tí niñeru Cohamacu wuhure ti cahnochū ti wapahti jiha.) Ñ jia pache pua tí caropu pjiro duhu sãaha. ⁴²Ñ yoa wapewahyoro pjacuricoro tí caropu ta, pua tucãre duhu sãaha. Pua tu cū centavo posa jira. ⁴³Tí turire to duhu sãachu ñuno to buheinare pjirocacha:

—Potocã niita nija musare. Ahricoro wapewahyoro pjacuricoro sehe niñeru wihbori caropu duhu sãano paina jipihtina ti wari yuhdoro wahre ticoro sehe. ⁴⁴Paina pache pua pjiro ti wapachuta ti ya pjiro duhsara. Ahricoro sehe pjacuricoro jiparota jipihtia to chuhtire to nuchubocãre wa pahñohre —ni yahuha Jesu.

“Cohamacu wuhu cohãri wuhu jirohca”, niha Jesu

(Mt 24.1-2; Lc 21.5-6)

13 ¹Ñ yoa Cohamacu wuhupure ti wijaachu cūiro buheina mehne macariro ñ sehe niha:

—Buheriro, ñuga. Ahri wuhuse noaa tãa mehne ti yoaa wuhuse noaca wuhuse jijari —niha tiro.

²To ã nichu Jesu ñ sehe ni yahuha tinare:

—Ahri jipihtia mari ñuri wuhuse cjiri, ahri tãa cūhu cohõ phtia wahaahca. Ne cūria tãca tjuasi —niha Jesu tinare.

Pihtiri dacho cjihtore yahuha Jesu

(Mt 24.3-28; Lc 21.7-24; 17.22-24)

³Ñ yoa Jesu Olivo wama tidu tūcupu Cohamacu wuhu potoi jidupu suha. Tu bui dujiha. Tói Pedro, Santiago, João, Andre mehne ti sahsero jia, tina tire ñ sehe ni sinituha:

⁴—Yahuga sãre. ¿Dohse jichu ã waharohcari mu niriro sehe waharo? ¿Pihtiri dacho panocã to jichu dohse to waha ducachu ñunahcari sã? —ni sinituha tina Jesure.

⁵Jesu ñ sehe ni yuhtiha:

—Noano yoaga musa. Tuhsu, paina ti mahñoare tuhoena tjiga musa. ⁶Payu masa “Cristo jija yuhu”, ni mahñoina taahca. Ti ã mahñochu tuhoa payu masa Cohamacu yare duhuaahca.

⁷Musa cahacãi masa paina ti cahma wajãchu tuhonahca musa. Tuhsu, yoaropu cūhure ti cahma wajãchu tuhorocanahca musa. Á tuhorocapanahca

ne tíre píjro tuhotuena tjiga. Ñ waharohca. Ti ã yoachũ pihtiri dacho cjihto duhsasinohca mini. ⁸Tí pjare cũ yahpa macaina pa yahpa macaina mehne cahma wajãahca. Ñ yoa cũiro puhtoro yaina paio puhtoro yaina mehne cahma wajãahca. Tuhsu, pjaró yahpa ñuhminohca. Ñ yoa payũ masa jũca mehne yariaahca. To ã wahachũ ahri yahpa macainare ti ñano yũhdu namohto duhsasinina mini. Ñano yũhdusinihca.

⁹To ã wahachũ ñuna musa basi noano yoaga. Paina musare ñaha, ñano yoa dutia waahca paina puhtoapure. Ñ yoa judio masa mari buhea wuhusei musare cjãahca. Ti ã yoachũ bujua macari macaina puhtoa, ti bui puhtoa cũhũ musare buhiri dahrea taa sinituahca musare. Yũ yaina musa jiri buhirire paina musare yahusãhca. Ñ jina yare yahunahca musa tinare. ¹⁰Ñ jia pihtiri dacho pano noaa buheare jipihtiro yahpari macainare yahua buhea jiahca. ¹¹Ñ jina musare buhiri dahre dutia, buhiri dahre dutiriro cahapũ ti naachũ tiore musa nihtire “Yahu masieraboca”, ni tuhotuena tjiga musa. Tí pjare musa nihtire musare Espiritu Santo yahurohca. To ã yahurire yahuga musa. Musa mu sũro durucusi musa. Espiritu Santo sehe musare durucubasarohca. ¹²Tí pjare cũiro to bahurire wajã dutiro warohca. Pairo sehe to wahminore wajã dutiro warohca. Ti pũcũro to pohñare wajã dutiro warohca. Ñ yoa ti pohña sehe ti pũcũsumare wajã dutia waahca. ¹³Yũ yaina musa jiri buhiri musare masa jipihitina ñu tuhtiahca. Ñ ñano yũhdũpanahta yũ yare musa ne cohãerachũ pihtiri dacho jichũ musare yũhdoihca.

¹⁴Ñ yoa ñabiarire Cohamacũ yare ñano yoarire ñunahca musa. Cohamacũ ya wuhũ to ducuchũ ñunahca. Tóti tiore jieraro cahmana. [Panopũ Cohamacũ yare yahu muhtariro Daniel cjiro tiore yahuro joaa tiha.] Tóti to ducuchũ ñua Judea yahpapũ jiina tũyucupũ duhti muroca mujaa wahajaro. Ahri yũ nirire noano masiga musa. ¹⁵Soaro mehne muroca duhtijaro. Tí pjare ti wuhũseri bui macaa waparipũ jiina wuhũ puhichapũ jiare ti yare na wahaea tjijaro ti waha bahrañohto sehe. ¹⁶Ñ jia tí pjare paina ti weseripũ jiina ti bui macaa suhtire wuhũpũ jia suhtire na wahaea tjijaro ti waha bahrañohto sehe. ¹⁷Tí pjare niji pocosanumia, ti pohñare pũa numia cũhũ pjacũoro wahaahca. ¹⁸Ñ jina õ sehe ni siniga Cohamacure: “Puhiro jichũ ã wahaero tjijaro”, ni siniga tiore. ¹⁹Tí dachorire masa nu ñano wahaahca. Ahri yahpare to bajuamehneri baharo masa ñano ti yũhdua jia tiha. Ti ã jipachũta jipihitia tí puria yũhgoro pihtiri dacho jichũ masa ñabiaro yũhduahca. Ñ ñano ti yũhduri baharo pari turi tó sehe ñabiaro yũhdusi ahri yahpai juna. ²⁰Ñ jiro Cohamacũ tí dachorire mahaa dachoricã ti jichũ yorohca. To ã yoerachũ ne cũiro masuno yũhdueraboa. Ñ jiro to beserina ti yũhduhti cjihtire mahaa dachoricã ã cũsininohca Cohamacũ.

²¹Tí pjare paina musare “Ñuga. Õi jira Cristo”. Õi jira Cristo”, ti nichũ tinare tuhoena tjiga. “Tóti jira Cristo”, ti nichũ cũhure tuhoena tjiga. ²²“Cristo jija”, ni mahñoina, “Cohamacũ yare yahu muhtaina jija”, ni mahñoina jiahca tí pjareta. Ñ jia Cohamacũ to beserinare mahñoa, tina bajuamehneare yoa ñoahca. Ti ã yoa ñochũ ñua, Cohamacũ yaina cãina tinare tuhoa “Potocã tjira” nia, Cohamacũ yare pa tehe nia duhuboca. ²³Ahrire yahuyuja musare to ã wahahto pano. Ñ jina noano yoaga musa —ni yahuha Jesu.

Jesu yahpapure to tjua tahtore yahuha

(Mt 24.29-35, 42-44; Lc 21.25-36)

²⁴Ñ ni tuhsũ õ sehe ni yahu namoha Jesu:

—Tí dachori ti ñano yuhduri baharo sũ dacho macariro, ñami macariro cũhu buhria duhua wahaahca. ²⁵Ti ã wahachuta ñahpichoha poca muanopu jia poca bora wahaahca. Ñ jia muanano macaa yahpari tuaro ñuhmiahca. ²⁶Tí pjata yuhu masuno Cohamacu warocariro taihtja. Yu ã tachu muanopu yu tuaa mehne yu si sitea mehne muanano macaa me bui ahri yahpapure yu tjua tachu ñuahca masa. ²⁷Ñ jicu yu yaina anjoare jipihtiropu ahri yahpapu waro-caihtja. Ñ jia jipihtiropu yu yaina yu beserinare tina naahca.

²⁸Mipure higueracure tuhotuga musa. Tu quti mehne musare piti dahre buheihtja. Tu yucucu pũri tichu ñuna, cũhma mahanocã duhsachu masina musa. ²⁹Tó seheta ahri jipihtia yu niri cjiire ti ã wahachu ñuna, yu tjua tahto mahanocã duhsachu masinahca musa. ³⁰Potocã niita nija musare. Tí pja macaina ti yariahto panore jipihtia yu niriro seheta ã waharohca. ³¹Muano, ahri yahpa cũhu pihtia wahaahca. Yu durucua sehe ne cohtotasi. Jipihtia yu niriro seheta ã waha sohtori tiarohca.

³²Tí dachore yu tjua tahti dachore, tí hora cũhure masieraja yuhu. Anjoa cũhu tíre masierara. Masa cũhu ne masierara. Yu Pucu dihta tíre masina.

³³Musa cũhu tí dachore masierara. Ñ jina noano yoaga. Noano cohtaga. (Cohamacure siniga musa.) ³⁴Õ sehe cohtaga musa. Ahri quti mehne musare piti dahre buheihtja. Wuhu puro yoropu to tinino seheta jira ahri. Tiro to wahahto pano to cahamacare wuhure cohta dutiha. Cãinare ti dahrahtire cũha. Ñ jiro wuhure ñu wihborirote tirore to tjua tahtore cohta dutiha. ³⁵Ñ jina musa cũhu noano wacũ masi cohtaga. Wuhu puro to tjua tahtore tina ti masieraro seheta yuhu musa puhtoro yu tjua tahti dachore masierara musa cũhu. Ñamichahapu, ñami dacho macapu, caraca to duri pja jichu, bohrea-ropu taboca. ³⁶Yu ã wacũenoca yu wihihore masina, yu yare ã yorucuina jiga musa. Ñ yoa yuhure noano cohtaga. ³⁷Ñ jicu musare yu nino seheta jipih-tinare ã nija musare: Noano wacũ masi cohtaga —niha Jesu tinare.

Sacerdotea puhtoa, judio masare buheina mehne Jesure wajã duaha

(Mt 26.1-5; Lc 22.1-2; Jn 11.45-53)

14 ¹Ñ yoa tí pjare pascua wama tiri bose numu cjihto bucuaerari pãore ti chuhti numuri cjihto pua dacho duhsasiniha. Tí pjare sacerdotea puhtoa, ã jichu sã coyera judio masare buheina mehne dohse yoa ti mahñoa mehne Jesure ñaha ti wajãhtore cahma suhũdua niha:

²—Mari bose numuri yuhdoro puro tirore ñahasiniena tjijihna, “Masa sua sañurucuri”, nina —niha tina ti basi.

Numino me sitia se mehne Jesure pio payoha

(Mt 26.6-13; Jn 12.1-8)

³Ñ yoa Jesu cũhu Betaniapu, Simo cami bucu baariro cjiro ya wuhupu jiha. Tõpu ti chũro watoi numino sehe alabastro mehne ti yoariare me sitia nardo wama tia sere posa tiriare na wihia. Tí se sehe wapa buju niha. Ñ na wihiro, ticoro tiare poharooca, Jesu dapu bui pio payoha. ⁴To ã yochu ñua paina suaa waha, ti basi õ sehe niha:

—¿Dohse yoaro ahricoro ahri me sitia co wapa bujuare ã yoa sitejari? ⁵Tíre ticoro duaboa. Tíre duaro tres cientos niñeru pũrine wapataboa. Ñ wapataro, tí niñerure pjacũinare waboa ticoro —ni cohtaha paina sehe ticoro to ã yochu ñua.

Ä jia tina ticatorore tuhtiha.

⁶Ti ä nichu tuhoro Jesu tinare ö sehe ni yahuha:

—Ä niena tjiga ticatorore. Yuhure ticoro noano yoaro nina. ⁷Pjacuoina sehe musa mehne ä jirucuahca. Ä jina musa cahmari pja tinare wa masina. Yuhu sehe ahri yahpare musa mehne ä jirucusi. ⁸To cjuaro puro mehne ticoro yuhure ä yoahre. Yuhure ti yahto pano yu pjacure cahnoyuro, me sitiare pio payohre ticoro. ⁹Ä jicu potocä niita nija musare. Jipihtiro ahri yahpapu noa buheare ti yahuropu ahricoro mipure to yoirire yahuahca. Ti ä yahuchu tuhoa ticatorore masa payu wacüahca —ni yahuha Jesu.

Juda Iscariote Jesure nü tuhtiinare to ñohtore yahuha sacerdotea puhtoare

(Mt 26.14-16; Lc 22.3-6)

¹⁰Ti pjareta Juda Iscariote wama tiro doce to buheina mehne macariro Jesure to ñohtire yahuro wahaha tirore nü tuhtiinare, sacerdotea puhtoare.

¹¹To ä ni yahuchu tuhoa, sacerdotea puhtoä tíre tuhoa wahcheha.

—Muhure niñerure wanahtja —niha tina Judare.

Ti ä nichu tuhoro, tiro Jesure nü tuhtiinare to dohse yoa ñohto cjihtore wacü macaha.

Jesu to buheina mehne to chu batoari numu jiha

(Mt 26.17-29; Lc 22.7-23; Jn 13.21-30; 1Co 11.23-26)

¹²Bucuaerari päore ti chuä numuri ducari numu sehe oveja pascua macaina cjihtire ti wajähti numu jiha. Ti numui to buheina sehe ö sehe ni sinitu nüha Jesure:

—¿Mari pascua macaa chuhtire noho baroi cahnoyu dutirocaijari muhu säre? —niha tina tirore.

¹³Ti ä nichuta Jesu sehe puaro to buheinare ö sehe ni yahu warocaha:

—Jerusalëpu wahaga. Töpu musa suchu co situ wuäriro musare piti boca-rohca. To piti bocachu tiro mehne wahaga. ¹⁴Ä wahana tiro to suho säari wuhupu suna, ti wuhu puore ö sehe niga: “¿Dí tahtiai yuhu yu buheina mehne pascua macaa chuare chunahcari?” ni sinitu dutirocahre buheriro”, niga ti wuhu puore. ¹⁵Musa ä nichu tuhoro, töpu muano macari tahtiare pjiri tahtiare, noano ti cahnoyuri tahtiapure musare ñonohca wuhu puore. Tói mari chuhti cjihtire dahrega musa —niha Jesu tinare.

¹⁶To ä nichu tuhoa tina to buheina tí macapu wahaha. Töpu ti suchu tinare to niriro seheta ä wahaha. Ä jia tina pascua macaa chuare dahreha.

¹⁷Ä yoa nahitia bora tachu Jesu doce to buheina mehne ti wuhupure suha.

¹⁸Ti wuhupu ti suri baharo, tina mehne mesapu churo Jesu tinare ö sehe ni yahuha:

—Potocä niita nija musare. Cüiro musa mehne macariro yuhu mehne churirota yuhure nü tuhtiinare ñonohca yuhure —ni yahuha Jesu tinare.

¹⁹To ä nichu tuhoa tina sehe cahyaha.

—¿Yuhuta jijari muhure ñohtiro? —ni sinitu phtiaha tina cäina jipihtina Jesure.

²⁰—Musa mehne macarirota jira tiro. Yu churi wapai yuhu mehne soha churiro tjira yuhure nü tuhtiinare ñohtiro. ²¹Panopu yuhure ti yahu joariro

seheta yuhũ masũno Cohamacũ warocariro yariaihca. Yuhũre ñũ tuhtiinare ñoriro pjacuoro yuhdurohca. Tiro to masa bajuerachũ noabo —niha Jesu tinare.

²² Ñ ni yahu tuhsũ, to buheinare suho chũro, Jesu pãore na, Cohamacũre “Noana”, niha. Ñ ninota, tí curire nuha, witiha tinare.

—Ahrire na chuga. Ahri yũ pjacu jira —niha tiro tinare.

²³ Ñ ni tuhsũ tiro sihnia posa tiri wahware na, Cohamacũre “Noana” ni tuhsũ, waha tinare. To wachũ tina jipihtina tíre sihni pihtiaha.

²⁴ —Ahri yũ di jira. Payũ masa ti ñaa yoari buhirire cohãcũ tacũ yariaihca. Ñ yariacu yũ dire cohãihca. Cohamacũ “Musare yuhdoihtja”, to ni cũriro mũ sũchũ yũ ã yariaro mehne to niriro sohtori tirohca. ²⁵ Potocã niita nija musare. Mipure ahri co, se core ne sihni namosi yuhũ. Pũ puhtoro Cohamacũ musare to suho jichũpũ ahrire coã pari turi sihniihca tjoa —niha Jesu tinare.

Pedro Jesure to cohãhtore yahuha Jesu

(Mt 26.30-35; Lc 22.31-34; Jn 13.36-38)

²⁶ To ã ni tuhsũchũ tina Cohamacũre ño payoa cũno basaare basaha. Ti basa pahñori baharo, tũcũ Olivo wama tidũpũ tina wahaa wahaha. ²⁷ Tõpũ suho sũro Jesu tinare õ sehe ni yahuha:

—Mipure musa jipihtina yuhũre cohãnahca. Ñ seheta nina Cohamacũ yare ti joari pũi yuhũre yahuro: “Ovejare ñũ wihboriro yoaro sehe jirirore Cohamacũ cohãnohca. Ñ to cohãchũ to yaina oveja yoaro sehe jiina duhti site wahcãa wahaahca”, nina Cohamacũ yare ti joari pũi. ²⁸ Ñ yoa Cohamacũ yuhũre to masori baharo musa pano Galileapũ wahayuihca yuhũ —niha Jesu tinare.

²⁹ To ã nichũ Pedro sehe õ sehe niha:

—Yuhũ mehne macaina jipihtina ti cohã wahcãpachũta yuhũ sehe mũhũre ne cohãsi —nimaha Pedro tirore.

³⁰ Jesu õ sehe ni yũhtiha:

—Potocã niita nija mũhũre. Micha ñami pinihtare caraca pua taha to duhto pano “Yuhũ Jesure masieraja”, niihca mũhũ. Tia taha ã niihca mũhũ —niha Jesu Pedore.

³¹ To ã nipachũta Pedro õ sehe ni tuaro bisiro yũhtiha:

—Mũhũ mehne yuhũre ti wajã duapachũta “Jesure masieraja”, ne nisi yuhũ —ni yũhtimaha tiro Jesure.

Pedro to ã nichũ tuhoa tiro mehne macaina cũhũ ã dihta ni yũhtiha.

Getsemaní wama tiropũ Jesu Cohamacũre siniha

(Mt 26.36-46; Lc 22.39-46)

³² Ñ yoa tina Getsemaní wama tiropũ wahaha. Tõpũ sũro, õ sehe niha Jesu: —Cohamacũre yũ sinino watoi õi dujiyusiniga musa —niha to buheinare.

³³ Ñ ni tuhsũ Pedore, Santiagore, Joãore tina tiarore pji wahcãha. Tinare ã pji wahcãno, pjíro tuhotu dũcaha tiro. Ñ yoa ñano yajeripohna tiha.

³⁴ Ñ cahyaro tó mehne macainare to pji wahcãinare õ sehe niha:

—Yuhũ ñano yajeripohna tii nija. Ñano purĩnore tuhotui nija. Tí mehne yariahto cua yuhduaro coa taca yuhũre. Ñi tjuaga. Yũ cũno potoriga catiga musa cũhũ —niha Jesu tinare.

³⁵⁻³⁶ Ā ni tuhsu tiro tópu mahanocā waha namo, yahpai caha sūro, Cohamacure ō sehe niha:

—Mai, muhu jipihtiare yoa masina. Ā jicu yu ñano yuhduhtire yoa duaeracu yoai tjia. Yu ā nipachuta yu cahmano sehe yoai tjia. Muhu sehe masina. Mu cahmano seheta yoaga yuhure —ni siniha tiro Cohamacure.

³⁷ Ā ni tuhsu, tiaro to buheina cahapu wihiro, carīinare boca wihiha tiro. Tinare ñano Pedrore ō sehe niha:

—Simo, ėcarīi nijari muhu? ėCū hora waro yu cūno potori cati masierari muhu? ³⁸ Noano yoaga musa. Musa mu sūro quihōno yoa duamana musa. Wiho mejeta musa basi tīre bihoerara. Ā jina Cohamacure siniga ñano musa yoaeraho sehe —niha Jesu Pedrore.

³⁹ Ā ni yahu tuhsu pari turi waha, Cohamacure siniha. Tó pano to siniriro seheta siniha tjoa. ⁴⁰ Ā sini tuhsuro pari turi tina cahapu wihiha tjoa. Ā wihiro carīinare boca wihiha tjoa. Wūjo caha yuhduaha tina. Ā jia tina Jesure dohse ni masieraha. ⁴¹ Ā yoa pari turi Cohamacu mehne to durucuro sūri baharo tina cahapu wihi, tinare ō sehe niha:

—ėCarī, sosinina nijari musa? Tó puro carīga musa. Michapucacā yuhure Cohamacu warocaritore ñano yoinare ti wahti pja mu su tuhsura.

⁴² Wahcāga. Basa wahana. Ņuga. Yuhure ñu tuhtiinare ñohtiro ōi tara —niha Jesu tinare.

Jesure ñu tuhtiina tirore peresu yoaha

(Mt 26.47-56; Lc 22.47-53; Jn 18.2-11)

⁴³ To ā nino watoihita Juda, doce buheina mehne macariro cjiro wihiha. Tiro mehne masa payu ñosaa pjini, yucu siri cjuaina cūhu wihiha. Sacerdotea puhto, sã judio masare buheina, ā jichu bucuna, ti warocarina jiha masa sehe. ⁴⁴ Wahmanore Jesure ñu tuhtiinare ñohtiro sehe tiro mehne tahtinare ō sehe ni yahu quihō tuhsuha:

—Yu wahsupu wihmiriro tirota jirohca musa ñahahtiro. Tirore yu wihmiri baharo ñahaga tirore. Ā yoana tirore noano ñahaga to duhtierahto sehe —ni yahu quihō tuhsuha Juda sehe.

⁴⁵ Ā yahu quihō tuhsuro wihirota Jesu cahapu dóihita waha bahrañoha.

—Yu puhtoro —ninota wahsupu wihmiha tirore.

⁴⁶ To ā yoachū ñua tina Jesure ñahaha.

⁴⁷ Ti ā yoachū ñano cūiro Jesu cahapu ducuina mehne macariro to ñosari pjine tuāwe naroca, sacerdotea bui puhtoro cahamacunore to cahmonore dute pahrēnocaha.

⁴⁸ To ā yoachū Jesu ō sehe niha:

—ėDohse jiro baro musa ñosaa pjini mehne, yucu tiri mehne tajari? ėYaca bucurore musa ñahano seheta yuhu cūhure ñahana tana nijari? ⁴⁹ Dachoripe Cohamacu wuhupu musare yu buhe dujichu, musa yuhure ne ñahaerare. Musa ā ñahachu ahri jipihitia ā waharo nina Cohamacu yare ti ni joariro seheta —niha Jesu masare.

⁵⁰ To ā ni tuhsuchū, Jesu buheina tirore cohā wahcā, jipihitina mūroca site wahcāa wahaha.

⁵¹ Ā yoa cūiro wahmunu suhti marieriro cūno coma yosaro dihta comariro Jesu baharo ñu ñunu timaha. To ā ñu ñunu tichu ñua tirore ñahamaha.

⁵² Tirore ti ñahachũ ñũno to coma yosarore cohãnocã, suhti marieriro mũrocaa wahaha.

Pũthoa cahapũ naaha Jesure

(Mt 26.57-68; Lc 22.54-55, 63-71; Jn 18.12-14, 19-24)

⁵³ Ñ yoa sacerdotea bui puhtoro cahapũ Jesure na wahcãha. Ti na suri baharo sacerdotea puhtoa, bucũna, sã coyea judio masare buheina cũhu jipihtina cahmachuha. ⁵⁴ Tiro Pedro sehe Jesu baharo yoaropũ nunũ tiha. Ñ nunũ tiro sacerdotea bui puhtoa ya wũhu cahapũ suha. Ñ sũro tiro tí wũhure cohtaina surara mehne pichaca duhtũ cahai sohma dujiha.

⁵⁵ Sacerdotea puhtoa, jipihtina paina puhtoa cũhu Jesure wajã dutia taa, Jesu to quihõno yoaerarire ti yahusãhtire wacũ macamaha. Wiho mejeta tíre boaceraha.

⁵⁶ Ñ wacũ bocaerapahta payũ masa tirore ã yahusãmacanocaha. Ti ã yahusãa potocã jieraha. Pairo soro ni, pairo soro niha. ⁵⁷ Ñ yoa paina wahcãrucũ sũ, Jesure õ sehe ni yahusãha tjoa:

⁵⁸ —Ahrĩro õ sehe nire: “Yũhu ahri wũhure Cohamacũ wũhure masa ti dahreri wũhure cohãihtja. Ñ cohãcu tia numũ wahaboroi tí wũhure pari turi yoihtja. Tí wũhu masa ti dahreri wũhu jisi”, to nichũ sã tuhohi —niha tirore yahusãina.

⁵⁹ Ti ã ni yahusãpachũta ti yahusãa cũhu potocã jieraha. Pairo soro ni, pairo soro niha tjoa.

⁶⁰ Ti ã nichũ tuhoro sacerdotea puhtoro ti watoi ducuriro wahcãrucũ sũ, Jesure õ sehe ni sinituha:

—¿Ahrina mũhure ti yahusãpachũta tinare yũhti cahmaerajari mũhu? ¿Mũhure ti yahusãire dohse ni yũhti cahmajari mũhu? —niha tiro Jesure.

⁶¹ To ã nichũ tuhparota Jesu ãta tuhhotunocaha. To ã yũhtierachũ ñũno sacerdotea bui puhtoro tirore sinituha tjoa:

—Cristo, ¿Cohamacũ warocarirota jijari mũhu? ¿Noariro Cohamacũ macuno warota jijari mũhu? —niha tiro Jesure.

⁶² —Tiro tjija. Ñ jina yũhure masũnore Cohamacũ warocarirore yũ Pucũ jipihtina bui Jiro to poto buhusehei yũ dujichũ ñũnahca mũsa. Ñ yoa mũano macaa me watoi yũ tachũ cũhure ñũnahca mũsa —niha Jesu tirore.

⁶³⁻⁶⁴ To ã nichũta sacerdotea bui puhtoro sehe to sãari suhtirore to basi tuhřenocaha painare “Sua yũhũara”, ni ñũ masi dutiro.

—Cohamacũre ñano durucuro nina ahrĩro. To ñano durucure tuhohu tuhsũja mari. Ñ jia tũpeinata yahusãjaro ahrĩrore. ¿Ñ jina dohse yohanacari mari mipũre ahrĩrore? —niha sacerdotea bui puhtoro paina puhtoare.

—Cohamacũre to ñano durucuri buhiri wajãnocano cahmana tirore —ni yũhtiha paina puhtoa.

⁶⁵ Ñ ni yũhti tuhsũ, cãaina tina mehne macaina Jesure chahcho puti sihõ mũja, to caparire duhte ducata, tirore cjã, dota mũjaha. Cjã tuhsũ õ sehe ni bujũpeha:

—¿Noa jijari mũhure dotaro? Ñũerapaihta yahuga sãre —ni bujũpeha tina.

Ti ã cjã dotari baharo puhtoro yaina surara sehe tirore na wahcã, tina cũhu tirore ti wamomacari mehne ñano cjã namoha.

“Tirore masieraja”, niha Pedro Jesure

(Mt 26.69-75; Lc 22.56-62; Jn 18.15-18, 25-29)

⁶⁶ Ñ yoa wuhũ cahai jiri wapai noari wapai Pedro to jichũ sacerdotea bui puhtoro cahamacono wihiha. ⁶⁷ Ticoro Pedro to sohmachũ ñũno tiro dihtare ñurucuha.

—Nazare macariro mehne, Jesu mehne muhũ cũhũ jihre —niha ticoro Pedrore.

⁶⁸ To ã nichũ tuhoro tiro õ sehe niha:

—¿Dohse nimacanocaco nijari muhũ? Mu nirirore ne masieraja yuhũ —niha Pedro ticorore.

To ã niri baharo Pedro sahrĩno sopaca macari mahapũ wahaha. Tói to ducuchũ caraca duha. ⁶⁹ Tói to jichũ ñũno cahamacono sehe ticoro cahapũ ducuinare yahurocaha tjoa.

—Ahrĩro cũhũ Jesu buheina mehne macariro jira —niha ticoro.

⁷⁰ To ã nichũ tuhoro Pedro pari turi õ sehe niha tjoa:

—Tirore masieraja yuhũ —niha tjoa.

Baharo curero tói ducuína Pedrore õ sehe niha:

—Potocã tjira. Muhũ Galilea macariro jira. Ñ jicu tina mehne macarirota jira muhũ —niha tina tirore.

⁷¹ Ti ã nichũ tuhoro tiro õ sehe ni yuhtihia:

—Potocãta Cohamacu mehne nii nija musare. Potocãta yu nierachũ Cohamacu yuhure buhiri dahrejaro. Tirore musa nirirore ne masieraja yuhũ —ni yuhtihia Pedro tinare.

⁷² To ã nichuta caraca duha tjoa. To ã duchũ tuhoro Jesu tirore to nirire wacũha: “Caraca pua taha to duhto pano muhũ yuhure ‘Jesure masieraja’, niihca muhũ. Tia taha ã niihca muhũ”, Jesu to nirire wacũha Pedro sehe. To ã nirire wacũno, tuaro tiirucuha Pedro.

Pilato Jesure sinituha

(Mt 27.1-2, 11-14; Lc 23.1-5; Jn 18.28-38)

15 ¹ Ñ yoa bohrearopũ sacerdotea puhtoa, bucuna, sã judio masare buheina, jipihtina paina puhtoa mehne cahmachu, durucuha Jesure ti yoahĩre masia taa. Tirore ti wajãhtore durucu cahno tuhsu, Jesure duhte, na wahcã, Pilatore waha tirore. ² Tirore ti na su wachũ ñũno Pilato tirore õ sehe ni sinituha Jesure:

—¿Potocãta judio masa ti puhtoro tjijari muhũ? —ni sinitu ñũha tiro Jesure.

—Ája. Mu nino sehta tirota jija —ni yuhtihia Jesu.

³ Ñ yoa sacerdotea puhtoa payu ni yahusãha tirore. ⁴ Ti ã ni yahusãchu tuhoro Pilato tirore õ sehe ni sinituha tjoa:

—Ahrina muhure payu yahusãa nina. ¿Ti ã yahusãpachuta dohse yoacu ne yuhtierajari muhũ tinare? —niha tiro.

⁵ To ã nipachuta Jesu ne pari turi yuhti namoeraha. Ñ jiro Pilato cuaa wahaha.

Jesure wajã dutiha

(Mt 27.15-31; Lc 23.13-25; Jn 18.38–19.16)

⁶ Cuhmaripe pascuaripe masa yairo cjihtore cũiro peresupũ jirirore, masa ti wio dutirirore Pilato ã wiobasa mujaa tiha. ⁷ Ti pjare Barrabá wama tirore

peresupũ jiha. Tiro puhtoare cohã duaina, masare wajãina mehne macariro jiha. ⁸ ã jia masa payũ Pilato cahapũ sua, tirore õ sehe ni siniha:

—Cũhmaripe sãre mũ yoarucuriro sehetã yoaga sãre. Cũiro peresupũ jiri-rore sãre wiobasaga —niha tina.

⁹ Ti ã nichuta Pilato tinare õ sehe ni sinitu ñũha:

—¿Ahriro Jesure mũa judio masa puhtoro yũ wiobasachũ cahmajari mũa? —ni sinitu ñũha masare Jesure wio duaro.

¹⁰ Jesure masa ti cahĩchũ ñũa sacerdotẽa puhtoã cũhu tirore ñũ tuhtiha. ã ñũ tuhtia tirore waha Pilatopũre. ã jiro masa ti cahĩri buhiri sacerdotẽa puhtoã ti ñũ tuhtirire ti peresu yoa dutichũ masino Jesure wio duamaha Pilato. ¹¹ To ã wio duapachuta sacerdotẽa puhtoã masare Jesu mehne suachũ yoaha. Õ sehe ni dutiha tinare: “Jesu wijaachũ cahmaeraja. Barrabã sehere wioã”, ni dutiha masare. ¹² ã jiro Pilato Barrabãre ti wio dutiri baharo Pilato sehe tinare õ sehe ni sinituha tjõa:

—¿Ahriro judio masa ti puhtoro mũa niriro sehere dohse yoaihcari yũhu mũa ã nichũ? —ni sinituha tiro.

¹³ —Crusapũ cã puha wajãga tirore —ni sañurucuha masa.

¹⁴ —¿Yaba barore ñaare yõari ahriro mũa ã ni sañurucuchũ? —ni sinitu namoha tinare.

To ã nichũ tuhoa tina sañurucu namoha tjõa:

—Crusapũ cã puha wajãga tirore —ni sañurucuha tina.

¹⁵ Ti ã ni sañurucuchũ tuhorõ Pilato sehe masare wahchechũ yoa duaro Barrabãre peresupũ jiri-rore wio dutiha masa ti wio dutiri-rore. Tirore to wio dutiri baharo, Jesu sehere ñãno tjanaye dutiha. Tirore ti tjanayeri baharo, tirore surarare wiaha, crusapũ cã puha wajã dutiro.

¹⁶ ã yoa surara Pilato ya wũhu puhichapũ pretorio wama tiri wũhu puhichapũ tirore na sãa suha. Na sãa sũ tuhsũ, tina mehne macaina surarare pjiroca, cũnoi cahmachu dutiha. ¹⁷ Cahmachu tuhsũ, tina puhtoro ya suhtiro yõaro sehe bajuri suhtirore Jesure sãa, potã sorore yoa, tĩ sorore to dapu bui duhu payoha. ¹⁸ ã yoa tuhsũ õ sehe ni bujupeha tina tirore:

—Noano tagã. Judio masa puhtoro noano tagã —ni bujupeha.

¹⁹ ã niata yucucu mehne to dapure cã mũa, tirore chahcho puti sihõ mũaha tina. Tuhsũ, cua pisaro yõaina yõaro sehetã tirore na tuhcuã caha sũ, ñõ payoro sehe yõaa, bujupeha tirore. ²⁰ ã yoa bujupe tuhsũ ti sãari suhtirore tjuwe naroca, to ya suhti sehere tirore sãa, tirore crusapũ cã puha wajãa waha, naa wahaha tina.

Tina Jesure crusapũ cã puha, wajãha

(Mt 27.32-44; Lc 23.26-43; Jn 19.17-27)

²¹ Jesure ti ã naano watoĩ, tõi wahariro Simo Cirene macariro campopũ suriro, tina cahapũ to wihichũ ñũa surara sehe tirore Jesu to wuuri crusare wua wahcã dutiha. Alejandro, Rufo puaro pũcũro jiha Simo sehe.

²² Baharo, Gólgota wama tiropũ Jesure na suha. Gólgota nino, “Dapu cohã”, nino nina. ²³ Tópũ tirore ti na suri baharo, se core, mirra wama tidũ co mehne ti morea core Jesure wamaha. Wiho mejeta tiro sehe tĩ core sihni duaeraha. ²⁴ Baharo tina Jesure crusapũ cã puha dapoha. Cã puha dapu tuhsũ, to sãa suhti cjirire ti basi cahma witia taa, “¿Noa yaro jirohcari õ?” ni masia taa, docapea poca mehne docape mũaha tina.

²⁵ Jesure crusapu ti cja puhachu tia hora waro dhasasiniha cohari pja to suhto. ²⁶ A yoa crusapu o sehe ni joari pjine duhu oha tina tirore ti yahusarire yahu duaa. “Ahriro judio masa bui puhtoro jiro jira”, ni joaha tina ti pjine. ²⁷ A yoa puaro yaca bucuna Jesu cahai paye pjnipu crusaripu ti cja puha daporina jiha tina. Cuiro to poto buhusehei, paio to co buhusehei cja puha dapoha tina cuhure. ²⁸ [Ti a yochu panopu Cohamacu yare ti yahu joariro sehetu a waharo niha. O sehe ni joa tiha: “Dutiare yuhdurucaina mehne macariro jira”, ni tuhoture masa tirore”, ni joa tiha panopu.]

²⁹ A yoa crusari cahai yuhu wahcina Jesure nu, ti dapu pocare yureruca, tirore nano ni durucuha:

—Noana. Noana. C Cohamacu wuhure cohā, tia dacho wahaboroi pari turi ti wuhure dahrehtiro jijari muhu? ³⁰ A jiro jicu, mu basi dujiaga. A jicu mu basi yoadohoga. A jii yuhu witiilha muhu —ni bujupaha tina.

³¹ Ti yoaro sehetu sacerdotia puhto cuhu sa judio masare buheina cuhu tirore a ni bujupaha. A ni bujupaha o sehe niha ti basi:

—Tiro painare yuhdoriro jiparota to basi yuhdo masierara: ³² “Cristo, Cohamacu warocariro Israe masa puhtoro jija”, nimana tiro. A jina to basi to duji tachu nuna tirore wacu tuanahca —ni bujupaha tina.

A yoa yaca bucuna tiro cahai ti cja puha orina cjiri cuhu to sehetu tirore nano ni bujupaha tina cuhu.

Jesu yariaa wahaha

(Mt 27.45-56; Lc 23.44-49; Jn 19.28-30)

³³ A yoa cohari pja jichu tia hora waro jipihtipupu nahitiano wahaha. ³⁴ To nahitia duhuchu waro Jesu tuaro sanurucuha:

—Eloi, Eloi, lama sabactani? —niha tiro.

A nino o sehe nino niha. “Yu Cohamacu, yu Cohamacu, cdohseacu wuhure cohari muhu?”, nino niha.

³⁵ To a nichu tuhoa caina toi ducuina o sehe nimaha:

—Tuhoga masa. Cohamacu yare yahu muhtaritore Elia cijirore pjirocaro nina —nimaha tina.

³⁶ A jiro cuiro tina mehne macariro wihmi nari suhtere vino suca core to sohari suhtere na muroca, yucucu sohtopu duhte o, Jesure wihmi dutiha. A wihmi dutiro, o sehe nimaha:

—Depusinia. Elia cijiro wihi ahrirore to na bororo tachu nusinihina mari —nimaha tiro painare.

³⁷ To a niri baharo Jesu sehe tuaro sanurucu, yariaa wahaha. ³⁸ To yariachuta Cohamacu wuhu macari suhtiro tore to jiri tahtia waropu ti ducitari suhtiro dacho macai bui sehe tuhnu bora ta, pu cahsaro tuhnuroca yoja sua wahaha.

³⁹ To a yariachu nuno surara puhtoro Jesu to wahano potoi ducuriro o sehe niha:

—Potoca tjiri jimana. Ahriro Cohamacu macunota jiri jira —niha tiro.

⁴⁰ A yoa yoropu ducua numia cuhu Jesure nuocarucua niha. Ti numia mehne Maria Magdalena jiha. Pacoro Maria wama tiricoro cuhu jiha. Ticoro sehe Jose, to bahuro Santiago ti pocoro jiha. Pacoro Salome jiha. ⁴¹ Ti numia Jesu yahuare quihono tuhoa numia jia, Galilea yahpai to jisinchu tirore piti ti, yoadohoa tiha. Ti numia mehne payu paye numia cuhu Jerusalapu Jesu to suho tarina numia jiha.

Jesu pjacure masa copapũ cũha*(Mt 27.57-61; Lc 23.50-56; Jn 19.38-42)*

⁴²⁻⁴³ ã yoa tí dacho to yariari dacho Sabado pano judio masa sã sori nũmu pano jiri dacho jiha. ã yoa Pascua macaa cjihtire ti cahnori dacho jiha. Tí ñamiihta José Arimatea macariro cuir marieno Pilato cahapũ suha Jesu pjacure sinino suro. José judio masa sã puhtoa mehne macariro, puhtoa ti cua pisaro ñũriro waro jiha. Tiro puhtoro Cohamacũ masare to suho jihtore cohtaro niha. ⁴⁴ ã yoa José Pilatore to ã sinichũ tuhoro, tuho cuua wahaha Pilato sehe. “¿Jesu yaria tuhsuari?” ni tuhoturo, cuua wahaha. ã jiro surara puhtore pjiroca õ sehe niha tiore:

—¿Potocãta Jesu yariaa wahari? —ni sinituha tiore.

⁴⁵ To ã nichũ surara puhtoro õ sehe ni yũhtiha:

—ãja. Yariaa wahahre —niha.

To ã nichũ tuhoro, Pilato Jesu pjacure wa dutiha Joséré. ⁴⁶ To ã wa dutiri baharo José noari suhtirore nuchũbasaha. Nuchũbasa tuhsũ, Jesu pjacũ cjirore na boro, suhtiro mehne wahma, masa copapũ tãcai ti sahari copapũ to pjacure siõ sãa payoha. Siõ sãa payo tuhsũ, tí copa cahai jiria tãcare pjiria tãcare tju turẽ wahcã, tí copare biha dapoha. ⁴⁷ María Magdalena, ã jichũ María José pocoro Jesure ti na sãa duhu payorirore ñuha.

Jesu masa wijaaha*(Mt 28.1-10; Lc 24.1-12; Jn 20.1-10)*

16 ¹ ã yoa Sabado dacho yũhduri baharo, sũ sãari baharo, María Magdalena, Salomé, ã jichũ María Santiago pocoro, tina tiaro numia wisõa me sitia core nuchũha Jesu pjacure wisõa taa. ² ã jia domingo bohrea mũja tachũ Jesure ti duhu payori copapũ ñua wahaha tina. ³ Tí copa cahapũ waharucua, õ sehe niha tina ti basi:

—¿Tí copare bihari tãcare noa marine pjõobasarohcari na? —niha tí numia ti basi.

⁴ Baharo tí copa cahapũ sua, tí copare bihari tãcare, pjiria tãcare ti nawe cũriare ñuha tina. ⁵ ã ñua tí copapũ sãa wahaha. Tõpu sua, cũiro wahmunore ti poto bũhusehei dujirirore, yehseri suhtiro sãarirore ñua, cuua wahaha tina. ⁶ Ti ã cuachũ ñũno, tiro sehe õ sehe niha tí numiare:

—Yũhure ñũ cuaena tjiga. Jesu Nazare macariro, crusapũ ti cjã puha wajãriro cjirore musa macana nimana. Wiho mejeta tiro sehe masa wijaa tuhsũhre. Ore mariahna. Tiore ti duhu payoro cjirore ñuga. ⁷ “Tiro musa pano Galileapũ wahayũto jiyuhti. Tói to niriro seheta musa tiore ñũhtina jiyuhti”, ni yahuna wahaga to buheinare, Pedro cũhure —ni yahu dutiha wahmunõ tí numiare.

⁸ To ã nichũ tuhoa tina cui, tetere, masa copa cahai jirina mũrocaa wahaha. ã cuia painare yahueraha.

Jesu María Magdalenare bajuaha*(Jn 20.11-18)*

⁹ [ã yoa Jesu sehe domingo ñamicunucã to masa wijaari baharo, María Magdalenare to siete watia to cohãnohricorore tiro bajua muhtaha. ¹⁰ Jesu

mehne macaina cjiri sehe to yariachũ ñua, tuaro cahya, tiia niha. Ñ ti tiiro watoi, María Magdalena sehe Jesure to ñurire tinare yahuro sumaha. ¹¹ “Jesu catihre. Ñuhi yũhũ”, ni yahumaha ticoro. To ñ ni yahupachũta, tina sehe tico-rore ne tuho duaeraha.

Jesu to buheinare bajuaha

(Lc 24.13-35)

¹² Baharo puaro tina mehne macaina masa marienopũ ti tinichũ Jesu soro bajuriro tina cũhũre bajuaha tjoa. ¹³ To ñ bajuachũ ñua tina tjua waha, paina Jesu yainare tíre yahuha. Ti ñ ni yahupachũta tina cũhũre tuho duaeraha.

Jesu to yare buhe dutiro warocaha to buheinare

(Mt 28.16-20; Lc 24.36-49; Jn 20.19-23)

¹⁴ Baharo to buheina oncere mesa cahapũ ti chũ dujiro wato, tinare bajuaha tjoa Jesu. Tiore ñurinare ti yahuchũ ti tuho duaerari buhiri, tiore ti noano wacũ tuaerari buhirire masino, tiro tuhtiha tinare. ¹⁵ Ñ tuhti tuhsũ, tinare õ sehe niha:

—Ahri yahpa jipihtiropũre ahri yũ ya quiti noaa buheare jipihtina ahri dacho macainare noano yahu site pahñona wahaga. ¹⁶ Yũhũre wacũ tuai-nare ti bautisarinare pichacapũ wahaborinare yũhdorohca Cohamacũ. Tuhsũ, yũhũre wacũ tuaeraina Cohamacũ to buhiri dahrehtina pichacapũ wahahtina jiahca. ¹⁷ Ñ jia yũhũre wacũ tuaina yũ tuaa mehne õ sehe yoaahca: Yũ tuaa mehne, yũ wama mehne watĩare cohã wioahca. Tuhsũ, wahmaa dũserire durucuahca. ¹⁸ Ñ yoa agãare ti ñahachũ, jipihtia ñima dohse jia ñimare ti sih-nichũ, tinare ne purĩsi. Ñ yoa dohatiina bui ti wamomacarine ti ña payochũ tina noaina wahaahca —ni yahuha Jesu to buheinare.

Jesu muanopũ mũjaa wahaha

(Lc 24.50-53)

¹⁹ Ñ ni yahu tuhsũ mari puhtoro Jesu muanopũ mũjaa wahaha. Tópũ suro Cohamacũ poto buhũseheĩ dujiha tiro mehne puhtoro jiro. ²⁰ Ñ jia tina jipih-tiropũ noaa buheare Cohamacũ masare to yũhũchũ yoahti buheare buhea wahaha. Ti ñ buhechũ mari puhtoro tinare yoadohoha. To tuaa mehne yoa ño masichũ yoha tinare, masare to ya buheare tuho dutiro. Tó puro tjira.]

San Lucas

1 ¹⁻³ Puhtoro Teófilo, ahrire mu buhehti cjihtire muhare joarocai nija. Jesu sā mehne jisninino to yoari cjirire payu paina joa dūca tuhsure. Wahmanopure Jesure nūina cjiri, to yare buheina cjiri ti ni yahuriro seheta paina tíre joa dūca tuhsure. Ā jicu ahri jipihtiare noano masi pahño duacu buhei. Ā jicu yuhu cūhu tíre noano joa duaia mu buhehti cjihtire yoacu tacu. ⁴ Jesu yare yahuina muhare buhe tuhsure. Tíre noano mu masi namohto sehe ahri tjure muhare joarocai nija.

João masare bautisahtiro to masa bajuahtire anjo yahuha

⁵ Herode Judea yahpa macaina puhtoro to jichu cūiro sacerdote Zacaria wama tiroto jia tiha. Ā jiro Zacaria to ya curua macaina sehe sacerdoteta curua Abías cjiro ya curua jiha. Zacaria namono cūhu sacerdote Aarō cjiro panamañono ji turiaricoropu jiha. Ticoro Elisabe wama tiricoro jiha. ⁶ Tina puaro Cohamacu dutiare noano yoa pahñoina ti jichu nūno, “Ahrina yu cahmano seheta ā jia tirucura”, ni nūha Cohamacu tinare. ⁷ Ticoro Elisabe ne pohna marienicozo jiha. Ā jia tina puaro ne pohna marieina ji, bucuna waro jiha.

⁸ Ā yoa sacerdoteta ti dahraare dahraa taa, ō sehe yoaa tiha: Dahra muhtari curua cjiro pa curua mehne cahma cohtota mujaa tiha. Ā jia Zacaria ya curua macaina dahrahti dachori jichu, tina dachoripe sacerdoteta ti dahraa tirucuro seheta Cohamacu ya wuhupu dahraa taa niha. ⁹ Sacerdoteta Cohamacure ti ño payori mesapu inciensore me sitia pohcare juhtiro cjihtore besea taa, docapea mehne besea tiha. Ā yoa ti quihōri dacho jichu Zacaria ya curua macaina me sitiare juhtirore besea taa docapeha. Ā docapea Zacariare beseha. Ā jiro tiro puhtoro Cohamacu ya wuhupu sāa wahaha me sitiare jūno waharo. ¹⁰ Tí wuhupu tíre to jūno watoi jipihtina masa sehe sopacapu Cohamacure sinia tiha. ¹¹ Tí pjare Cohamacu yairo anjo Cohamacure ño payori mesa poto buhusehei bajuarucu suha Zacariare. ¹² To ā bajuachu nūno Zacaria tirore ñu cua yuhdua wahaha. ¹³ To ā cuachu nūno anjo tirore ō sehe ni yahuha:

—Zacaria, cuui tjiga. Cohamacu mu sinirire tuhore. Ā jina mipure musa pohna tinahca. Musa macu cjihto masa bajuarohca. To bajuachu “João” ni wama pisuga tirocāre. ¹⁴⁻¹⁷ “Tiro yu tuua mehne payu noaare yoarucuro jira”, ni nūnohca Cohamacu mu macure. Tiro to masa bajuari baharo vinore, sihbiori cūhare sihnisi. Ā jiro tiro to masa bajuahto pano Espíritu Santo to niriro sehe yoiriro jirohca tiro. Espíritu Santo tiropure sārācu su tuhsu ā baju yoarucurohca tiro mehne. Ā yoa payu Israe masare Cohamacu mari

pũhtorore cahmaeraina cjirire noano cahmachũ yoarohca mũ macũ. Mari pũhtoro to tahto pano Elia cjiro Cohamacũ yare yahu mũhtariro to buheriro seheta Espĩritu Santo to yoadohoro mehne Cohamacũ to tuaa mehne mũ macũ cũhũ buherohca. ˆ Bũhero ti pũcusuma ti pohna mehne ñano jimarinare ti noano cahma cahĩ jichũ yoarohca. ˆ yoa Cohamacũre yũhdũrucaina cjiri cũhũre noano ño payoa mehne yũhtichũ yoarohca. ˆ buhero mari pũhtoro Cohamacũ yaina cjihtire yoarohca tiro. ˆ jicũ to masa bajuari baharo mũhũ wahcheihca. Payũ paina cũhũ wahcheahca —niha anjo Zacariare.

¹⁸To ˆ nichũ tũhoro Zacaria sehe ˆ sehe ni sinituha anjore:

—Sˆ bũcũna jija. ˆ jicũ mũ niri potocˆ jichũ dohse masicũhcari yũhũ? —niha tiro.

¹⁹To ˆ nichũ anjo sehe tirore ˆ sehe ni yahuha:

—Yũhũ Gabrie wama tiroiro jija. Cohamacũ cahamacũno to cahai ducuriro jija yũhũ. Cohamacũ ahri noaa quitire yahu dutiro, mũ cahai yũhũre warocare. ²⁰Yũ yahuriro seheta potocˆta waharohca. Yũ ˆ nipachũta yũhũre mũhũ potocˆ tũhoerare. ˆ jicũ mipũre mũhũ durucu masierariro wahaihca. Mũ macũ to bajuari baharo durucuihca tjoa —niha anjo Zacariare.

²¹Sopacapũ jiina masa Zacariare cohtaa niha. “ˆDohse jiro baro tiro Cohamacũ wũhũpũ jiro, so wijaa taerajari?” ni, cohtaa niha masa tirore. ²²Tuhsũ, tiro wũhũpũ jiriro wijaa wihi, tina mehne durucu masieraha. “Tiro Cohamacũ wũhũi bajuare ñũno niboca”, ni tũhotu masiha tina. ˆ jiro tiro durucu masierariro jiro to wamomacari mehne yoa cayoha masa ti masihtu sehe.

²³Cohamacũ wũhũi to dahraa pihtichũ, tiro to namono mehne tjuaa wahaha ti wũhũpũ. ²⁴Ti ˆ tju sũri baharo to namono Elisabe niji pocoro jiha. ˆ jiro ticoro cinco sũri waro masa cahai wahaeraha. ²⁵ˆ sehe ni tũhotuha ticoro: “Mipũre yũhũre Cohamacũ yoadohore jũna. Pohna marienicoro jico bũobiario yũhũduhi yũhũ. Cohamacũ to yoadohoro mehne mipũre nijinocˆre bocaia yũhũ”, ni tũhotuha ticoro.

Jesu to masa bajuahtore yahuha anjo

²⁶⁻²⁷Elisabe cinco sũri niji pocoro to ji wahcˆchũ waro Cohamacũ sehe anjore Gabrie wama tiroiro nuhmino, ne mua mehne jieraricoro cahapũ warocaha. Ticoro Marĩa wama tiricoro Nazarei Galilea yahpai jiri macai jia tiha. Josˆ wama tiroiro jiha to manũno cjihto. Tiro panopũ macariro Davi cjiro panamino ji turiariropũ jiha. ²⁸ˆ to warocachũ Marĩa cahapũ sũro, anjo ˆ sehe ni yahuha:

—Marĩa, ˆjimajari mũhũ? Cohamacũ mũhũre yoadohoro nina. Mũhũre noano yoro nina —niha anjo ticorore.

²⁹To ˆ nichũ tũhoro, ticoro tuaro wacũ tũhotuha. Anjo to yahurire tũhoturo “ˆDohse nino baro yũhũre ˆ nicari?” ni wacũha ticoro. ³⁰To ˆ ni tũhotuchũ masino anjo ˆ sehe ni yahu namoha ticorore:

—Marĩa, Cohamacũ mũhũre tuaro cahĩna. ˆ jico mũhũre yũ yahuhtire tũho cuaeco tjiga. ³¹Noano tũhoga. Cũiro nijinocˆre pohna ticohca mũhũ. Tirocˆ to masa bajuari baharo, “Jesu” ni wama pisucohca mũhũ tirocˆre. ³²⁻³³Tiro tua yũhũduariro jirohca. ˆ jia tirore “Cohamacũ Jipihtina Bui Jiriro macũnota jira”, ni masiahca masa. Mũ macũ ñũchũno mũnanopũ Davi cjiro Israe masa ti pũhtoro to jia tiroiro cjiro seheta mũ macũ cjihto cũhũre cũnohca

Cohamacu. Ñ jiro jipihtia dachoripe tiro Israe masare dutirohca. Puhtoro to jihto ne pihtisi —niha anjo.

³⁴To ñ nichu tuhoro María sehe ñ sehe ni sinituha:

—¿Dohse yuhu manu mariapacohta pohna tibocari yuhu? —niha ticoro.

³⁵To ñ nichu tuhoro anjo ñ sehe ni yuhtiha:

—Espíritu Santo to tuaa mehne muhure nijinocäre bocachu yoarohca.

Ñ jiro Cohamacu Jipihtina Bui Jiro to tuaa muhure to masuraca caharo seheta bajaeraparota tarohca muhure. Ñ jia “Cohamacu macuno, ñaa buhiri tia marieriro jira”, niahca masa mu macure. ³⁶⁻³⁷Cohamacu jipihtiare yoa masina. Ñ jiro mu coyeacoro Elisabe cühu bucuro waro jiparota mipure nihi pocoro jira ticoro. Ticoro pohna tirohca munocäre. Masa ticorore “Nijinocä boca masenicoro jira”, ti niricoro cjiro mipure nijinocäre to bocari baharo seis süri waro wahara —niha anjo Maríare.

³⁸To ñ nichu María ñ sehe ni yuhtiha:

—Yuhure tuhoga. Mari puhtoro to cahamacono jija yuhu. Mu niriro seheta yuhure ñ wahajaro —niha ticoro.

To ñ niri baharo anjo wahaa wahaha.

María Elisabere ñuno wahaha

³⁹To ñ niri baharo María tüyucuri jiri yahpapu Judea yahpai jiri macapu ño duaro wahaa wahaha. ⁴⁰Tópu suro, Zacaria ya wuhupu sãano, “¿Jimajari?”, niha ticoro Elisabere. ⁴¹To ñ nichu Elisabe to tuhochuta, to macuno sehe nihi suhtiropu jirocä ñuhmiha. Elisabe Espíritu Santo to dutiriro seheta yoa pahñoricoro jiro, to tuaare cjuaricoro jiha. ⁴²Ñ jiro tuaro wahchea mehne ticoro bisiro durucuha:

—Jipihtia numia yuhdoro muhure noano yoahre Cohamacu. Mu macu cühure noano yoahre Cohamacu. ⁴³Cue, yu puhtoro pocoro yu cahai mu tachu noano yoara yuhure Cohamacu. ⁴⁴Mu yuhure “¿Jimajari?” mu nichu yu macu sehe nihi suhtiropu jirocä wahchea mehne ñuhmihti yuhure. ⁴⁵Cohamacu to niriro seheta yoarohca. Ñ jico to yahurire tuhoricoro jico wahchericoro jira muhu —niha Elisabe Maríare.

⁴⁶To ñ nichu María ñ sehe ni yuhtiha:

“ ‘Cohamacu noariro, tuariro jira’, nija. Yuhu noano yajeripohna tija.

⁴⁷Cohamacu yuhure pichacapu wahaboricorore yoadohiro jira.

Ñ jiro mipure yuhure noano wahchea mehne jichu yoara.

⁴⁸⁻⁴⁹Tiro yuhure to cahamaconore wacüri jira. Cohamacu tua yuhduariro noaa dihtare yuhure yoadohohre.

Ñ jia mipure ‘Ticorore Cohamacu noano yoahre’, jipihtina masa ñ ni, durucuahca yuhure.

Cohamacu ñaa marieriro jira.

⁵⁰Jipihtia dachoripe jipihtina tirole ño payoinare tiro pja ñuriro jira.

⁵¹Cohamacu to tuaa mehne yoaha. ‘Painare yuhdurucaja’, niinare yuhdurucaha tiro.

⁵²Puhtoare cohäha tiro. Ñ jiro cahamaca sehere tiro puhtoa yoaro seheta cüha tinare.

⁵³Juca baaina cjiirire tiro noaa chüare waha. Tuhsu, payu cjuaina cjiirire paye baro cjuaraina yoaha tiro.

⁵⁴⁻⁵⁵ Mari ñuchusuma cjiire to yahu cūriro seheta yoa pahñoha Cohamacu. To cahamaca Israe masare tiro yoadohoha. Abrahã cjiore mari ñuchusuma cjiire jipihtina to coyea to baharo jiina cūhure Cohamacu jipihtia dachoripe ã pja ñurucuriro jia tiha. Tinare to yahu cūriro boeraha Cohamacu”, niha María.

⁵⁶ Tia sū waro Elisabe mehne jiha ticoro. Tó puro to jiri baharo to ya macapũ tjuaa wahaha María.

João masa bajuaha

⁵⁷ Elisabe to niji wahcōri baharo to macũno masa bajuaha. ⁵⁸ Ñ jia Cohamacu ticorore to ã noano yoachũ to ya maca macaina to coyea cūhũ ticoro mehne wahcheha. ⁵⁹ Ocho dachori to masa bajuari baharo, to pũcusuma tirocãre mahanocã to pjacu cahsarocãre yihso dutia taa niha. Ñ jia tina mehne macaina ti cahapũ suha ti yihsochũ ñua taa. Tina mehne macaina Zacaria to pũcũro wamare tirocãre wamoa duamaha. ⁶⁰ Ti ã wamoa duapachũta to pocoro õ sehe niha:

—To pũcũro wamare wamoeraja. João wamoanahca tirocãre —niha ticoro.

⁶¹ —Mũ coyea ne cūiro João wama tiro mariahna —niha tina ticorore.

⁶² Ñ jia ti wamomacari mehne yoa ño, Zacariare õ sehe ni sinitu ñuha tina: —¿Mũhũ waro dohse wamoa duajari mũ macũre? —ni sinitu ñuha tiore.

⁶³ Ti ã nichũ tiro sehe joahti pjĩne siniroca, ñaha, joaha: “Yũ macũ João wama tirohca”, ni joaha Zacaria. To ã ni joachũ tina sehe cūaa wahaha. ⁶⁴ To ã ni joari baharo tiore durucuchũ yoaha Cohamacu. Ñ jiro tiro durucua wahaha juna:

—Cohamacu tuariro, noariro jira —niha tiro.

⁶⁵ To ã ni durucuchũ tuhoa tó macaina cūaa wahaha. Ñ jia ahri jipihtiare Judea yahpa macainare tũyucũ watoi jiinare masa yahu siteha. Ñ jia masa tó macaina noano masi pihtia wahaha. ⁶⁶ Jipihtina tíre tuhoa wacũha. “Cohamacu tuaare ahrirocã cjuara. Ñ jiro wiho jiri jierara ahrirocã”, ni tuhotuha masa.

Zacaria Cohamacure ño payoha

⁶⁷ Ñ yoa to pũcũro Zacaria sehe Espíritu Santo to dutiuro seheta yoa pahñori jiro to tuaare cjuariro jiro Cohamacu yare õ sehe ni yahuha:

⁶⁸ “Mari Israe masa Cohamacure, mari puhtorore wahche payojihna mari. To yaina jija mari.

Ñ jiro tiro mari cahapũ wihiro, marine yoadoho, noano yũhdũchũ yoaro taro nina.

⁶⁹ Cohamacu marine, pichacapũ wahaborinare yũhdũchũ yoahitiore, tua yũhduariore warocara.

Ahriro marine yũhdũchũ yoahitiro cjihto sehe Cohamacure dahra cohtariro Davi cjiro panamino ji turiariro jira.

⁷⁰ Panopũre to yaina waro, to yare yahu mũhtaina cjiire ahri õ sehe wahahto cjihtore yahu cū mũhta tuhsua tiha.

⁷¹ ‘Mũsare ñũ tuhtiinare, jipihtina mũsare ñano yoinare dũcataihtja’, ni cūha Cohamacu marine.

⁷² Mari ñuchusuma cjiřipure ‘Musare pja ñui, yoadohoihtja.

Musare yu yahu cūřire wacūihtja’, niha Cohamacu.

Tí pjapure to ni cūřiro seheta mipure marine sohtori tiro taro nina.

⁷³⁻⁷⁵ Panopure ō sehe ni cūa tiha Cohamacu Abrahāre: ‘Potocā niita nija mūhure.

Mu coyea baharopu ji nūnūhtinare paina tinare ti ñu tuhtichu, yuhu sehe tinare ducataihtja.

Ā jia mu coyea sehe ne cuiro marieno yu dutiare yoa, yuhure ño payoahca.

Tina ti catiro puro yu ñurocaroi buhiri marieno, quihōno jia tiina jirucuahca’, ni yahu cūa tiha Cohamacu mari coyeiro Abrahā cjirore”,

niha Zacaria. Ā ni tuhsu tiro to macuno cūhure ō sehe niha tjao:

⁷⁶⁻⁷⁷ “Macu, mūhure ō sehe niahca masa: ‘Cohamacu Jipihtina Bui Jiriroware yahu muhtarirota jira’, ni masiahca mūhure.

Mūhu mari puhtoro Cristo to tahto panore masare yahuyui wahaihca.

Ā yahuyui wahacu, ō sehe ni yahuyuihca tinare: ‘Mari puhtoro tarohca.

Tiro musa ñaa yoari buhiri tiare cohā, pichacapu wahaborinare yuhdorohca musare’, ni yahuihca mūhu.

Ā ni yahucu, mari puhtoro to tahtore cahnoyu dutii niihca mūhu tinare.

⁷⁸ Cohamacu sehe marine tuaro pja ñuriro ji, marine noano yoariro jitjiāno, tiro marine pichacapu wahaborinare yuhduchu yoa duara.

Ā jiro tiro Cristore buhriaro yoaro sehe jiriore mari cahapu warocara.

⁷⁹ Tiro mari cahai wihiro marine pichacapu wahaborinare nahitiano waropu jimarinarare buhriaro marine to noano ñu bocachu yoaro seheta Cohamacu ya potocā ni yahuare masichu yoarohca tiro.

Ā yoa mari tiro mehne cūno mehne mari noano ji masihtto cjihto cūhure yahurohca marine”,

niha Zacaria.

⁸⁰ Ā yoa Zacaria macuno noano pjacu tiro bucuaha. Ā bucuaro, Cohamacure tuaro ño payoriro jiha. Tuhsu, yoari pja masa marienopu jia tiha. Israe masare buhe ducaro tōpūta to jiriroware cjiro jia tiha.

Jesu masa bajuaha

(Mt 1.18-25)

2 ¹Tí pjare jipihtia yahpari macaina bui puhtoro Augusto jia tiha. Ā jiro jipihtinare quihō dutiha. ²Ahrina masare ti coā quihō ducachu Siria yahpa macaina puhtoro Cirenio wama tiro jiha. ³Ā jia jipihtina ti ñuchusuma panopu macaina ya macaripu ti wamare joa ōa wahaha. ⁴José cūhu Nazarepu Galilea yahpai jiri macapu jiina waha, Judea yahpapu Belē wama tiri macapu suha. Puhtoro Davi cjiro panopu macariro to masa bajuariro jiha Belē. José Davi cjiro panamino ji turariro jiro puhtoa masare to quihō dutichu tuhoru Belēpu to wamare joa ō dutiro wahaha. ⁵Ā jiro tiro María to namono cjihto mehne tōpu to wamare joa ō dutiro suha. Ticoro sehe wihārirocāre cjuaro caharicoro jiha. ⁶Ā jiro Belēpu suro ticoro niji wahcōha. ⁷Tōpure masa ti cariri wūhu ne mu sueraha tinare. Ā jiro ticoro pohna ti tuhsu, tirocāre suhtiro mehne coma, wachua ti churi wahwai, tjā bui tirocāre duhu payoha. Tirocā wahma to pohna ti muhtarirocā jiha.

Anjoa ovejare ñu wihboinare bajuaha

⁸Tí ñamine campopu ovejare ñu wihboina ti yaina ovejare ñu wihboa niha. ⁹Tópu ti jichu Cohamacu warocariro anjo tinare bajuaha. To ã bajuachu Cohamacu to si sitea tinare buhriaaha. To ã si sitechu ñua, ovejare ñu wihboina cuia wahaha. ¹⁰Ti ã wahachu anjo tinare ò sehe ni yahuha:

—Noaa quitire musare yahui taja. Jipihtinare masare wahchechu yorohca ahri quti. Ñ jina yuhure cuiena tjiga musa. ¹¹Micha ñamine puhtoro cjiro Davi ya macapu musare pichacapu wahaborinare yuhdohtiro, Cristo Cohamacu warocariro mari puhtoro masa bajua tuhsuhre. ¹²Suhtiro mehne comariro wachua churi wahwa bui ti duhu payoriro musa ñuhtiro tiro tjirohca —ni yahuha anjo tinare.

¹³To ã nichuta payu muano macaina ji muhtariro anjo mehne Cohamacure wahche payoha. Ò sehe ni wahche payoha tina:

¹⁴“Cohamacure muano macarirore ño payojihna.

Ñ jia Cohamacu to cahina cuiro marieno cahmacheno marieno noano jijaro”,

ni wahche payoha anjoa peri.

¹⁵Ñ ni wahche payo tuhsu muanopu ti mujari baharo ovejare ñu wihboina sehe ti basi cahma durucuha:

—Ahrire Cohamacu marine to yahurire Belépu basa ñujihna —niha tina ti basi.

¹⁶Ñ nia ño duaro wahaa wahaha tina. Maríare, Josére boca su, wihārirocāre wachua churi wahwai ti duhu payorirocāre ñuha tina. ¹⁷Ovejare ñu wihboina tirocāre ñu tuhsu anjo wihārirocāre to yahurire yahu turiaha painare. ¹⁸Ti ã ni yahu turiachu jipihtina tinare tuho cuaa wahaha. ¹⁹Ahri jipihtiare María wacu tuhoturucuha. ²⁰Ñ yoa ovejare ñu wihboina sehe anjo to yahuriro seheta jichu ñua, “Cohamacu tuariro jira”, ni wahcheha. Ñ ni wahche, majare tjuaa wahaha.

Cohamacu wuhupu Jesu pucsuma tirocāre naaha

²¹Cū somana baharo wihārirocā to pjacure mahanocā cahsarocāre yihso na tuhsu tirocāre tina Jesu wamoaha. Jesure wahma to bocahto pano anjo sehe “Jesu’ ni wama pisuga tirocāre”, ni yahu tuhsuha. Ñ jia tirocāre “Jesu” ni wama pisuha.

²²Cohamacu dutia Moise to yahuriro seheta yoa taa José, María mehne Jerusalépu wahaha. Tópu wahaha María to pohna tiri baharo to noaricoro to wahari baharo to ã waharire ñono taro. Ñ wahaa, tina Jesucāre naa wahaha. Tirocāre Cohamacure “Ahrirocā mu yairo cjihto jira”, ni ñoa wahaha. ²³Ò sehe yoaha Cohamacu yare ti joari pui to yoa dutiriro seheta. “Jipihtina musa pohna wahma bajua muhtainacāre Cohamacure ñoga. ‘Ahrirocā mu yairo cjihto jira’, ni ñoga”, ni dutia tiha Cohamacu. ²⁴Ñ ño tuhsu Cohamacu to yoa dutiriro seheta tina minichahcare waa wahaha Cohamacure ño payoa. Ò sehe dutia tiha Cohamacu: “Bujaa puaro waga yuhure. O tina mariachu urítua wihāinacā puaro waga yuhure ño payona”, ni dutia tiha Cohamacu. To yoa dutiriro seheta yoaha tina ticoro pjacu noari pjacu to waharire ñoa taa.

²⁵Jerusalēi Simeo wama tiroiro jiha. Tiro quihōno yoiriro, Cohamacure ño payoriro jiro, Cohamacu Israe masare to yoadohohtire cohtariro jiha. Tiro

Espíritu Santo to nino sehe yoariro jiha. ²⁶ Ñ jiro tiro to variahto pano Cohamacu to warocahtirore Cristore to ñuhti cjihtire tó pano yahu tuhsuha Espíritu Santo tirore Simeore. ²⁷ Ñ jiro Espíritu Santo tirore to dutichu Cohamacu wuhupu sãa wahaha. To sãa suri baharo Jesu pucusuma ti macunocãre na sãaha. Cohamacu to dutiriro seheta yoaa niha. ²⁸ Simeo sehe tirocãre wua na, Cohamacure ño payo, “Noana” ni, tiro mehne durucuha.

Ó sehe niha tiro Cohamacure:

²⁹⁻³² “Mipu pinihtare puhtoro, mu niriro seheta jipihtina masare pichacapu wahaborinare yuhduchu yoahrtiro cjihtore warocahre muhu.

Tiro judio masa jierainare buhero muhare noano masichu yoarohca tinare.

Masare yuhdohtiro Israe masunore muhu cüha.

Sã coyeirore Israe masunore mu cüchu jipihtina masia, ‘Israe masare noano yoara Cohamacu’, niahca masa.

Ahrirocã sãre yuhduchu yoahrtiro jira.

Ñ jicu ahrirocãre ñu tuhsucu, mipure noano wahcheriro variiahca”, niha Simeo.

³³ Simeo tirocãre to ã nichu Jesu pucusuma sehe tuho cuua wahaha. ³⁴ Ñ jiro Simeo tinare “Noano jiga musa” nino, tiro María Jesu pocorore ò sehe ni yahuha:

—Cohamacu ahrirocãre beseha. To ã beseriro to jipachuta judio masa payu tirore yuhdurucaahca. Ñ yoaa tina pichacapu wahaahca. Judio masare payu yuhdohtirore Cohamacu beseha tirocãre. Tiro Cohamacu yare yahuriro to jipachuta masa payu tirore ñano ni yahu wajaahca. ³⁵ Ti ã yochu paina ti ñano wacüare masiahca. Ñ jico muhu tuaro cahyacohca —niha Simeo Maríare.

³⁶ Tói Cohamacu yare yahu muhtaricoro Ana wama tiricoro jiha. Ticoro Fanuel macono jiro, Aser cjiro ya curua macaricoro jiha. Bucoro waro jiha. Ticoro nuhmino jiro manu tiha. Ñ yoa siete cühmari to manu mehne jiha. Tó puro to jiri baharo to manu variaha. ³⁷ Ñ jiro ochenta y cuatro cühmari waro wapewahyoro jia tiha ticoro. Ñ jiro ticoro dachopu cühure ñamipu cühure Cohamacu yare yoaro taro chuaeraro, Cohamacu mehne durucu, Cohamacu wuhure ne wijaaera tiha. ³⁸ Simeo to durucuro watoi ticoro tina cahai wihiro, wahchero Cohamacure “Noana”, niha. Ñ jiro Jerusalē macainare pichacapu wahaborinare yuhdohtirore cohtainare ticoro Jesucãre yahuha tina jipihtinare.

José, María, Jesu mehne Nazarepu tjuaa wahaha tjoa

³⁹ Cohamacu to dutiriro seheta yoa tuhsua, tina ti ya macapu Nazarepu tjuaa wahaha. Galilea yahpai jiha tí maca Nazare. ⁴⁰ Jesu sehe noano bucuu, tuariro wahaha. Ñ jiro tiro noano tuho masiriro bucuaha. Cohamacu tirore noano yoaha.

**Jesu wahma wahuu tariro jiro, Cohamacu ya wuhui
judio masare buheina mehne suhuro niha**

⁴¹ Cühmaripe Jesu pucusuma Jerusalēpu pascua numurine bose numurine yuhdoa wahaa tiha. ⁴² Ñ jia Jesu doce cühmari to cjuachu waro ti

yoarucuriro seheta tina jipihtina Jerusalēpu bose numurine yuhdoa wahaha tjoa. ⁴³Tí macapu su, tí bose numurine yuhdo tuhsu tina ti ya macapu majare tjuaa wahaha tjoa. Wiho mejeta Jesu sehe ti ā majare tjuaapachuta, Jerusalēpu tjuanocaha. To pucsuma sehe tíre to tjuarire masieraha. ⁴⁴“Paina mari mehne macaina mehne taca mari macu”, ni tuhutumaha tina. Ā jia tina cū dacho waro noano Jesu marieno waharucumaha. Tí dacho pihtichu waro tina Jesure ti coyea watoi ā jichu ti ñu masiina watoi cūhure macamaha. ⁴⁵Wiho mejeta ne bocaeraha. Ā jia tina pari turi Jerusalēpu majare tjuaa wahaha tjoa, tirore macaa wahaa.

⁴⁶Tia dacho baharo Cohamacu wuhu wijaroi tirore boca suha. Tói Jesu judio masare buheina watopu duji, tinare tuho, tinare sinituro niha. ⁴⁷Tina jipihtina Jesure to quihōno yuhtichu tuhoa noano masiriocā to jichu ñua, tina cūaa wahaha. ⁴⁸Jesu pucsuma cūhu tirore ñua, tina cūhu cūaa wahaha. Ā jiro to pocoro tirore ō sehe niha:

—Macu, ¿dohseacu ā yoari muhu sāre? Sā mu pucsuma pjíro tuhutu, cahya, macana nihi muhure —niha ticoro to macunore.

⁴⁹To ā nichu tuhoro tiro to pucsumare ō sehe ni yuhtiha:

—¿Dohseana yuhure macari musa? Yu Pucu waro ya wuhui ji to dutiriro seheta yoai nija. ¿Tíre masierajari musa? —niha tiro tinare to pucsumare.

⁵⁰To ā ni yahupachuta tina to yahuare tuho ñahaeraha.

⁵¹Ā yoari baharo, Jesu to pucsuma mehne Nazarepu tjuaa wahaha. Tju su, to pucsumare ne yuhderucaerariro jia tiha tiro. Ahri jipihtia to yoirire ñño María noano tuhutu, wacurucua tiha. ⁵²Ā yoa Jesu bucua, noano tuho masiriro wahaha. Tó sehe jiri to ji bucuachu ñño, Cohamacu sehe tirore noano ñu ji coa, tuaro cahia tiha. Masa cūhu tirore tó seheta noano ñu ji coa, tuaro cahia tiha.

João masare bautisariro masare Cohamacu yare yahuha

(Mt 3.1-12; Mr 1.1-8; Jn 1.19-28)

3 ¹Tí pjare ti bui puhtoro jiri Tiberio wama tiro to puhtoro jiri baharo quince cūhmari wahaha. Tuhsu, Poncio Pilato wama tiro sehe Judea yahpa macaina puhtoro jiha. Ā yoa Herode wama tiro sehe Galilea yahpa macaina puhtoro jiha. To bahuro Felipe sehe Iturea yahpa macaina, Traconite yahpa macaina cūhu ti puhtoro jiha. Tuhsu, Lisania wama tiro Abilinia yahpa macaina puhtoro jiha. ²Tí pjare Ana, Caifa mehne jipihtina sacerdotia bui puhtoa jiha. Ahri jipihtina ti jiri pjare João Zacaria macuno masa marienopu jiriore Cohamacu sehe tirore to yare buhe dutiha. ³Ā jiro Jordão wama tiri ma duhtu cahai jiri yahpai jipihitropu João buhero wahaha:

—“Noaina jija sā”, ni musa tuhutumari cjirire tuhutu cohtota, Cohamacure cahmaga musa. Ā yoana tíre musa yoirire ñona tana, bautisaina jiga. Musa ā cohtotachu ñño Cohamacu musa ñaa buhirire borohca —ni buhea tiha tiro.

⁴Isaia cjiro panopu macariro Cohamacu yare yahu muhtariro to joariro seheta ahriro Joao yoaro niha. Ō sehe ni joaa tiha Isaia cjiro João to buhehtore:

“Masa marienopu durucu sañurucuriro ō sehe ni buherohca: ‘Mari puhtoro to tahto pano “Noaina jija sā”, ni musa tuhutumari cjirire tuhutu cohtota, Cohamacure cahmaga musa.

⁵ Pja wuhturi, pja buri cūhure noari wapa mari yoariro seheta, tuhcu maharine potoa mahari mari yoariro seheta, ñaa maharine noaa maharine mari yoariro seheta, wetere musa cosariro seheta musa ñaa tuhoutuare cohtota, cahno muhtaga musa.

⁶ Musa ã yoachu Cohamacu musare pichacapu wahaborinare to yuhdachu yoachu ñuahca jipihti ahri yahpa macaina', ninohca tiro sañurucu yahuriro sehe",

ni joaa tiha Isaia cjiro panopure.

⁷ Masa payu João cahai wihia tiro tinare bautisachu cahmaha tina. Ñ jiro tiro tinare ò sehe ni yahuha:

—Agãa ñima tiina yoaro seheta masare dojomehneina, cui duhti duaina jira musa. Musa ñaa yoarire musa cahya, duhu duerari buhiri Cohamacu to buhiri dahrehto pano duhti masierara musa. ⁸ Potocãta musa ñaa tuhoutmarine cohtotaina jina, Cohamacure cahmaina jina, tíre musa yoaa mehne ñoga. Ò sehe ni tuhoutu wisiena tjiga. “Panopu macariro Abrahã mari ñuchu cjiro jia tiha. Ñ jina to panamana jina mari Cohamacu yaina jija”, ni tuhoutu wisiena tjiga musa. Musare niita nija. Abrahã panamana musa jiina jimana musa. Musa ã jipachuta tí musa ã jia yaba cjihti jierara. Cohamacu sehe ahri tãa mehne Abrahã coyeare dahre masina. Ñ jiro Abrahã coyea musa jia wiho waro jira tãa ti wiho waro jiro seheta. ⁹ Ò sehe jira: Masa yucuri yoaro seheta jira. Cohamacu sehe coma mehne yucurire cã cohãriro yoaro sehe jira. Ñ jiro noaa dica maria yucure nuhcõri mehneputa cã cohãnohca tiro. Tíre to cã cohãri baharo, pichacapu jũ cohãnohca tiro. (Áta yoaro taro nina masa cūhure tiore cahmaerainare) —ni yahuha João masare.

¹⁰ To ã nichu tuhoa masa sehe tiore ò sehe ni sinitu ñuha:

—¿Dohse yoanahcari sã? —niha tina Joãore.

¹¹ —Pua suhtiro cjuariro suhti marierirore cūno waga. Ñ yoa musa chua cjuana paina cūhure waga —niha João.

¹² Mahainacã puhtoa ya cjihtire wapa na cohtaina cūhu tinare to bautisachu cahmaha. Ñ jia João cahai wihia, tiore ò sehe ni sinituha:

—¿Buheriro, sã sehe dohse yoanahcari sã? —niha tina tiore.

¹³ —Musa puhtoa ti wapa na dutiro purota masare wapa naga. Mahño na namoena tjiga —ni yahuha João tinare.

¹⁴ Paina surara tiore ò sehe ni sinituha tjoa:

—¿Sã sehe dohse yoanahcari? —niha tina tiore tjoa.

—Masa ti niñerure maena tjiga. Ñ yoana mahñoa mehne ti niñerure naena tjiga. Musare ti waparo purota wahcheha —ni yahuha João.

¹⁵ Masa Cristore Cohamacu to warocahtirore cohtaa niha. Ñ jia ò sehe ni tuhoutu ducaha tina Joãore. “Ahriro João sehe Cristo jiboca”, ni tuhoutumaha tina. ¹⁶ Ti ã nichu tuhoro João jipihitine ò sehe ni yahuha:

—Yu baharo yu yuhdoro tuariro tarohca. Noa yuhduariro jira tiro. Tiro yoaro sehe jieraja yuhu sehe. Ñ jicu tiore tuhoutu, “Wiho jiro jija yuhu”, ni tuhoutu yuhu. Yuhu sehe musare bautisacu co mehne yoamahi. Tiro sehe yu yuhdoro yoarohca. Espiritu Santore masa mehne ã jirucuchu yoarohca. Wiho mejeta paina sehere ti ñaare tuhoutumari cjiire tuhoutu cohtota duaraina sehere tiro pichaca mehne buhiri dahrerohca. ¹⁷ Yu baharo tariro cahsarire cohãriro yoaro sehe jira. Cahsarire cohãriro to batiro mehne jipihitia

to trigo yapari cahsarire putiwera. ã yoa tuhsu trigo sehere to wihbori wuhui cūnohca. Tó seheta yorohca ti tirore cahmainare yu baharo tariro. To putiwea cahsari sehere tiro jūnohca. Tí cahsarire to jūri pichaca ne yatisi. (Āta yorohca tiro yu baharo tariro tirore cahmaerainare) —ni yahuha João.

¹⁸Payu to ã ni yahua mehne masare noaa buheare yahuha João. ¹⁹Tuhsu, puhtoro Herode sehe to bahuro Felipe namonore to namo tiri buhiri, pjíro ñaare to yoari buhiri cūhure João tirore yahumaha. ²⁰To ã ni yahuri buhiri Herode sehe ñaare yoa namoha, Joãore peresu yoaro.

João Jesure bautisaha

(Mt 3.13-17; Mr 1.9-11)

²¹Joãore ti peresu yoahto pano paina masare João sehe bautisaro niha. Tinare bautisaro Jesu cūhure bautisaha. To ã bautisachu, Jesu diapu ducuriro Cohamacure to sinino watoi muano parí mua wahaha. ²²To parí muari baharo Espíritu Santo buja yoaro sehe Jesu buipu duji taha. To ã duji tachu muanopu durucuro coa taha:

—Muhu yu macu yu cahíriro jira. Muhu mehne wahcheja —nino coa taha muanopu.

Jesu coyea panopu macainare yahua jira ahri

(Mt 1.1-17)

²³Jesu to buhe ducari cūhmare treinta cūhmari cjuaha tiro. “Tiro José macuno jira”, ni tūhotumaha masa. José sehe Elí macuno jiha. ²⁴Elí Matat macuno jiha. Matat Leví macuno jiha. Leví Melqui macuno jiha. Melqui Jana macuno jiha. Jana José macuno jiha. ²⁵José Matatías macuno jiha. Matatías Amós macuno jiha. Amós Nahum macuno jiha. Nahum Esli macuno jiha. Esli Nagai macuno jiha. ²⁶Nagai Maat macuno jiha. Maat Matatías macuno jiha. Matatías Semei macuno jiha. Semei Josec macuno jiha. Josec Joiadá macuno jiha. ²⁷Joiadá Johanán macuno jiha. Johanán Resa macuno jiha. Resa Zorobabe macuno jiha. Zorobabe Salatie macuno jiha. Salatie Neri macuno jiha. ²⁸Neri Melqui macuno jiha. Melqui Adi macuno jiha. Adi Cosam macuno jiha. Cosam Elmodam macuno jiha. Elmodam Er macuno jiha. ²⁹Er Josué macuno jiha. Josué Eliezer macuno jiha. Eliezer Jorim macuno jiha. Jorim Matat macuno jiha. ³⁰Matat Leví macuno jiha. Leví Simeo macuno jiha. Simeo Juda macuno jiha. Juda José macuno jiha. José Jonan macuno jiha. Jonan Eliaquim macuno jiha. ³¹Eliaquim Melea macuno jiha. Melea Mená macuno jiha. Mená Matatá macuno jiha. Matatá Natán macuno jiha. ³²Natán Davi macuno jiha. Davi Jesé macuno jiha. Jesé Obed macuno jiha. Obed Booz macuno jiha. Booz Sélah macuno jiha. Sélah Nahasón macuno jiha. ³³Nahasón Aminadab macuno jiha. Aminadab Admín macuno jiha. Admín Arní macuno jiha. Arní Esrom macuno jiha. Esrom Fares macuno jiha. Fares Juda macuno jiha. ³⁴Juda Jacobo macuno jiha. Jacobo Isaa macuno jiha. Isaa Abrahā macuno jiha. Abrahā Taré macuno jiha. Taré Nahor macuno jiha. ³⁵Nahor Serug macuno jiha. Serug Ragau macuno jiha. Ragau Péleg macuno jiha. Péleg Éber macuno jiha. Éber Sélah macuno jiha. ³⁶Sélah Cainán macuno jiha. Cainán Arfaxad macuno jiha. Arfaxad Sē macuno jiha. Sē Noé macuno jiha. Noé Lame macuno jiha. ³⁷Lame Matusalē macuno jiha. Matusalē Enoco macuno jiha. Enoco Jared macuno jiha. Jared Mahalaleel

macuno jiha. Mahalaleel Caina macuno jiha. ³⁸ Caina Eno macuno jiha. Eno Sete macuno jiha. Sete Adão macuno jiha. Adão Cohamacu to yoiriro jiha.

Watino ñaare yoa dutimaha Jesure

(Mt 4.1-11; Mr 1.12-13)

4 ¹ Jesu Espiritu Santo to dutiriro seheta yoa pahñoriro jiro, tiro Jordão wama tiri mapu jiriro tjuaa wahaha. To ã tjuaa wahachu Espiritu Santo sehe tirore masa marienopu naaha. ² Tópu suro cuarenta dachori waro jiha. Tópu to jiro wato watino sehe Jesure ñaare yochu cahmamaha. Ñ jiro ñaare yoa dutimaha tirore. Tí dachorire Jesu chueraha. Ñ jiro tí dachori pihtichu waro tiro juca baaha.

³ To ã juca baachu ñuno watino ò sehe nimaha Jesure:

—Muhu Cohamacu macuno jicu, ahria tácare chua dojomehnega —nimaha Jesure.

⁴ Jesu ò sehe ni yuhtiha:

—Yoaeraja. Cohamacu yare ti joari pui ò sehe nina: “Masare chua mehne dihta catieraro cahmana. [Jiphtia Cohamacu ya yahua mehne jiro cahmana]”, nina Cohamacu —ni yuhtiha Jesu watinore.

⁵ To ã niri baharo watino sehe tirore tucu muadu buipu na muja surota jiphtia macari perire ño bahrañoa Jesure. ⁶ Ñ ñono Jesure ò sehe ni yahuha:

—Jiphtia ahri macari yuhure to wari cjiri jira. Ñ jicu yu cahmarirore wa masija. Ñ jicu ahri macarine, ti cjuaa mehne muhure waihtja. (Yu ã wachu ahri macari macainare muhu dutiilhca.) ⁷ Yuhure mu ño payochu ahri macari jiphtia macarine muhure waihtja —niha watino Jesure.

⁸ Jesu ò sehe ni yuhtiha tirore:

—Muhure ño payoeraja. Ò sehe nina Cohamacu yare ti joari pui: “Mu puhtoro Cohamacu dihtare ño payoga. To ya dutia dihtare yoaga”, ni joaa tiha Cohamacu yare —niha Jesu watinore.

⁹⁻¹¹ To ã niri baharo Jerusalēpu watino sehe tirore na wahcã, Cohamacu wuhu bui na suha tirore. Na su tuhsu tirore ò sehe nimaha:

—Cohamacu yare ti joari pui ò sehe nina:

“Cohamacu yaina anjoare muhure ñu wihbo dutirohca. Ñ jia tina sehe muhure ñu wihboahca, ‘Muhupu tácapu puha tu muari’ nia”, ni joaa tiha Cohamacu yare ti joari pui. To ã niri quihño jichu muhu Cohamacu macuno jicu, yahpapu pju bora ño ñujuta yuhure. Muhure yoadohochu ño ñujuta yuhure —niha watino Jesure.

¹² Jesu pju bora ño duaeraro ò sehe ni yuhtiha tirore:

—Cohamacu yare ti joari pui ò sehe nina: “Musa puhtoro Cohamacu to niri cjirire ‘¿Potocã tjijari?’ ni masi duana, Cohamacure yoa ño duti macaena tjiga”, nina Cohamacu yare ti joari pui —niha Jesu watinore.

¹³ Ñ jiro watino jiphtia ñaare Jesure yoa dutimaha. Ñ duti tuhsuro mahanocã duhu wahcāsiniha.

Galilea yahpai Jesu buhe ducaha

(Mt 4.12-17; Mr 1.14-15)

¹⁴ Baharo Jesu Galileapu tjuaa wahaha. Ñ jiro, tiro Espiritu Santo tuua mehne yoaha. Tói jiphtiropu masa tirore quiti tiha. ¹⁵ Judio masa buhea wuhusei tiro buhea tiha. Ñ jia jiphtina masa tirore noano durucuha.

Nazare macaina Jesure ne cahmaeraha

(Mt 13.53-58; Mr 6.1-6)

¹⁶⁻¹⁷ Baharo Nazarepu Jesu to bucuariroputa tju suha. Tópu tju suro, Sabado jichu to ã yoarucuriro seheta tiro judio masa ti buheri wuhupu saa suha. Tói tiro Cohamacu yare ti joari pure buhero taro ducuha. To ã ducuchu ñua tó macaina sehe Cohamacu yare yahu muhtararo Isaia cjiro to joari pure tirore waha. Tí pui Jesu ahri yahuare bocaro buheha:

¹⁸ “Cohamacu to Espiritu yuhu mehne jiro, yuhure dutira.

Tiro pjacuinare noaa buheare yahu dutiro warocare yuhure.

Ã yoa peresupu jiina cühure tinare to yuhdohtore yahu dutiro warocare yuhure.

Capari ñueraina ti noano ñuhto cjihtore, painare ti ñano ti yoapeinare wiohtiro cjihtore yuhure warocare.

¹⁹ Mari puhtoro Cohamacu to yainare pichacapu wahaborinare to yuhdohtore yuhure yahu dutiro warocare”,

ni buheha Jesu.

²⁰ Ã ni buhe tuhsu Jesu ti pure noari tia turënoca, wuhu macarirore wia tuhsu, dujiha. To dujichu ñua tói jiina jipihtina tiro dihtare ñuha. ²¹ Tí ã yoachu tiro tinare õ sehe ni yahu ducaha:

—Ahri michapucacã yu buheriro seheta Cohamacu to niriro mu suro nina —niha Jesu.

²² To ã nichu tuhoa “Ahriro noariro jira”, ni tuhoutuha tina. ã jia tina to noano buhechu tuhoa, cuaa wahaha. ã cuaa waha, õ sehe niha tina ti basi:

—Cuenah, ¿José macuno jierajari ahriro? —niha tina ti basi.

²³ Tí ã nichu masino Jesu õ sehe ni yahuha tinare:

—Yu buheare tuho duaerana, õ sehe ni tuhutura musa yuhure: “Duhturu dohatiroti to basi co ti masina duhturu waro to jiare ñono. Muhu cuhu duhturu to yoa ñono seheta mu niriro sehe jiro jicu Cohamacu tuua mehne yoa ñoga sare. Capernaupure Cohamacu tuua mehne yoa ñoyuhti muhu. Sã cühure ã yoa ñoga, mu buheare ‘Potocã tjira’, sã ni masihto sehe”, ni duara musa yuhure.

²⁴ Ahrire yahuihtja musare. Cohamacu yare yahu muhtarirore to ya maca macaina cahmaerara. ã jina yuhure cahmaerara musa õi yu bucuariro jichu. ²⁵ Yuhure tuhoga mipure. Panopu Elia to jiri pjapure tia cuhma noano pa cuhma dacho maca waroi ne coro taeraha. ã jiro jipihtiroputa ne chua mariaha. Tí pjare payu wapewahya Israe yahpau ti jipachuta Cohamacu Elia cijore tinare yoadoho dutiro warocaeraha. (Eliare, Cohamacu ya cühure ti cahmaerachu ñuno tinare yoadoho dutiro warocaeraha.) ²⁶ To ya macare ã yoa dutieraparota pa yahpai Sidõ cahai jiri macai Sarepta wama tiri maca macaricoro wapewahyore yoadoho dutiro Elia cijore warocaha Cohamacu.

²⁷ Baharo Cohamacu yare yahu muhtararo Eliseo cjiro to jiri pjapure Israe yahpau payu cami baina ti jipachuta cüiro Israe masunore ne noariro wahachu yoeraha Eliseo cjiro. To ya yahpa macainare yoeraparota Naaman wama tirirore Siria yahpa macariro dihtare noariro wahachu yoaha tiro. ã yoaro Israe masare yoadohoeraro, Israe masuno jierariro sehere yoadohoha Cohamacu —niha Jesu tinare.

²⁸To ā nichu tuhoa jipihtina tí wuhui jiina sua yuhdua wahaha. ²⁹Ā jia tina wahcāraca, Jesure na wijaa, tí maca duhtu cahai jiri cunupu tirore tjuroca boro duamaha. ³⁰Ti ā yoa duapachuta Jesu ti watoihta wahaa wahaha.

Watīno to cohtotariro Jesure piti bocaha

(Mr 1.21-28)

³¹Baharo Jesu Galilea yahpai jiri macapu Capernau wama tiri macapu su, Sabado jichu masare buheha. ³²Tiro noano masi pahñoriro to buhechu tuhoa masa tuho cuaa wahaha. ³³Tí wuhui watīno to cohtotariro jiro, ō sehe ni tuaro sañurucuha:

³⁴—Muhu Jesu Nazare macariro sāre cariboi tjia muhu. ¿Dohse yoi tai nijari sāre? ¿Muhu sāre butichu yoi tai nijari? Yuhu masija Cohamacu macuno, ñaa marieriro mu jiare —ni sañurucuha Jesure.

³⁵To ā nichu tuhorro Jesu tuhtiha watīnore:

—Dihta mariaha. Wijaahga tirore —niha Jesu.

To ā niri baharo masunore watīno sehe yahpapu doca caha su tunuchu yoaro, tirore wijaaha. To ā yoi baharo tiro sehe noariro tjuaha. ³⁶Tói jiina jipihtina to ā wahachu ñu cuaa wahaha. Ā jia ti basi ō sehe ni durucuha:

—¿Yaba baro buhea jijari ahri ā wahachu yoaa? Cuenah. Tuarro mehne puhtoro yoaro seheta ahriro watīare dutira. Ā jia to dutiro seheta tina masare wijaara —ni durucuha tina ti basi.

³⁷To ā yoachu ñua tí yahpapu jipihtiropu masa Jesu yoirire yahu siteha.

Jesu Simo Pedro marechonore noaricoro wahachu yoaha

(Mt 8.14-15; Mr 1.29-31)

³⁸Judio masa ti buheri wuhure wijaa, Simo ya wuhupu sāa suha Jesu. Tói Simo marechono dohati, tuaro juaro tiha. Ā jia tina ticoro to dohatichu yahuha Jesure. ³⁹Ti ā yahuri baharo tiro ticoro cahai su, juarore suru dutiha. To ā suru dutiri baharo ticorore juaro surua waha, dóihta noaricoro wahaha. Ticoro ā waharo wahcā nuju su, tinare chuare payoha.

Payu dohatiinare noaina wahachu yoaha Jesu

(Mt 8.16-17; Mr 1.32-34)

⁴⁰Sū sāari baharo jipihtina masa tó cahai jiina dohatiinare Jesu cahapu na suha. Dohatiina payu soro jia dohatiare cjuaha. Ā jiro Jesu to wamo-macari mehne tina bui ña payo, jipihtinare ti dohatiare noano yuhduchu yoaha. ⁴¹Watia cūhure Jesu to wijaa dutichu tina wijaa wahaa, ō sehe ni sañurucuha:

—Muhu potocāta Cohamacu macuno jira —niha tina Jesure.

Jesu Cohamacu warocariro to Cristo to jichu watia masiha. Ā jiro Jesu tinare durucu dutieraha, “ ‘Cristo jira’, ni yahu siteri”, nino.

Galilea yahpai buheha Jesu

(Mr 1.35-39)

⁴²Bohrea muja tachu Jesu tí macai jiro waha, masa marienopu suha. To ā suri baharo masa tirore maca, boca sua ō sehe niha:

—Sā ya macai tjuaga. Wahai tjiga —nimaha tina Jesure.

⁴³Ti ā nipachuta tiro sehe ō sehe ni yuhtiha:

—Cohamacu masare puhtoro to noano suho jiare noaa buheare paye macaripu cūhure buhero cahmana yuhure. Cohamacu yuhure warocare tīre yahuhtiore —niha Jesu tinare.

⁴⁴Ā ni tuhsuro judio masa ya yahpa macaa wuhusei, judio masa ti buhea wuhusei tiro buhe tiniha.

Jesu to buheinare payu wahire bocachu yoaha

(Mt 4.18-22; Mr 1.16-20)

5 ¹Pa numu Jesu Genesare wama tiri bucupariro duhtu cahapu suha. Tói to jichu űua payu masa Cohamacu yare tuho duaa tirore nunu ti suha. Noano wahpa tarucu suha masa peri. ²Puaria buso paduroi pahsaa busore Jesu űuha. Tí buso macaina wahi wajaina maja sūruca, ti wañuyucure rīre cosaa niha. ³Ā jiro Jesu Simo yariapu samua wahaha. Samu tuhsu tia dohoriare dia duhtu cahai coāriare siō buhu dutiha. Tuhsu, dohoriapu duji, masare buheha. ⁴Buhe tuhsu, Jesu Simore ō sehe niha:

—Dacho maca cureroi siō wioga. Ā jina muhu mehne macaina mehne musa wañuyucure doca űoga wahi űahana —niha Jesu.

⁵To ā nichu tuhero Simo Jesure ō sehe ni yuhtiha:

—Puhtoro, wahi maca bohreamahi sã micha űamine. Bohreapanahta ne cūirocã wajerahti sã. Ā wajeraapanahta mu dutiro seheta doca űo űunah-tja —ni yuhtiha Simo.

⁶Ā ni tuhsu tina doca űoha. Ā ti doca űochu ti wañuyucure payu wahi sãaha. Payu ti sãachu wañuyucu tuhnua wahamaha. ⁷Ā wahachu űua tina paria macainare tina mehne macainare pjirocaha:

—Musa cūhu yoadohona tagã sãre —ni pjirocaha Simo cūhu.

Tina ti ā yoadohori baharo puria buso noano minipahro bocaha wahire.

⁸Simo Pedro ā wahi payu ti sãachu űuno, Jesu panoi na tuhcuca caha su, tirore ō sehe ni yahuha:

—Yu puhtoro, muhu mehne jiboriro jieraja yuhu. űariro jija yuhu. Ā jicu mu cahai ji masieraja —niha Simo Pedro Jesure.

⁹Tiro, jipihtina tiro mehne macaina cūhu payu wahi sãachu űua, cuaa wahaha tina cūhu. ¹⁰Puaro Simo Pedro mehne macaina Zebedeo pohna Santiago to bahuro João mehne, tina cūhu űu cuaa wahaha. Ti ā cuachu űuno Jesu Pedore ō sehe ni yahuha:

—Cuaecu tjiġa. Mipure muhu wahire űaha cahmachuriro mu jiro seheta Cohamacu yaina cjihtire pji cahmachuriro jiihca muhu —niha Jesu Simo Pedore.

¹¹To ā niri baharo tina ti busore bucupariro duhtu cahapu waja mo cūnoca, ti ya jipihtiare tóihta cūnoca, Jesu mehne wahaa wahaha.

Jesu cami bariore noariro wahachu yoaha

(Mt 8.1-4; Mr 1.40-45)

¹²Ā yoa Jesu pa macai to jichu cami bariro tirore piti bocaha. Ā piti bocaro tiro Jesure űu, na tuhcuca caha su, ō sehe ni tuaro siniha:

—Puhtoro, muhu yoa duacu yuhure noariro yoa masina muhu —ni siniha.

¹³To ā niri baharo Jesu tirore űa payoro ō sehe niha:

—Tíre yoa duaja. Mipüre noariro jiga muhu —niha.

To ā nichuta to camí bari cjiri yati mua wahaha. ¹⁴Ā jiro Jesu tirore ō sehe ni dutiha:

—Ahri yu ō sehe yoarire painare yahui tjiga. Sacerdote cahai wahaga mipüre. Ā jicu mu pjacure noari pjacu to waharire ñoga tirore. Cohamacu dutia Moisere to cūri to niriro seheta yoaga. Ā yoacu sacerdotere puaro minichahcare waga noariro mu waharire sacerdoteari ñoi tai —niha camí bariro cjirore.

¹⁵“Yahui tjia”, to nipachuta jipihtiropu masa tirore yahu site namoha. Ti ā yahu sitechu tuhoa masa payu tiro cahapu suha. Dohatiina noaina waha duaa, tina cūhu tiro cahapu suha. ¹⁶Ti ā supachuta Jesu masa marienopu Cohamacure sinino wahaha.

Jesu pjacu buharirore noariro wahachu yoaha

(Mt 9.1-8; Mr 2.1-12)

¹⁷Pa dachoi Jesu to buhechu fariseo curua macaina, judio masare buheina cūhu tói dujiha. Tina jipihina Galilea yahpai jia macari macaina, Judea yahpai jia macari macaina, Jerusalē macaina jiha. Ti ā jichu ñuno Jesu Cohamacu tuua mehne dohatiinare noaina wahachu yoaha. ¹⁸Mahainacā mua pjacu buharirore to coāri cahsaro mehne yo wua wihiha. Ā jia tirore Jesu cahai cū duaa, wuhupu yo sāa duamaha tina tirore. ¹⁹Ā sāa duapahta masa payu jichu tina tirore yo sāa masieraha. Ā jia tirore wuhu buipu yo mujaha. Yo muja su, mahanocā muji pahmare nawe, tí copai pjacu buharirore to coāri cahsaro mehneta duhu boroha Jesu cahai jiina watoi. ²⁰“Jesu ahrirore to dohatiare yuhdachu yoarohca”, ni tuhoutuha tina. Ti ā ni tuhoutuha masino Jesu pjacu buharirore ō sehe ni yahuha:

—Coyeiro, mu ñaare yoari buhiri tiare yuhu cohā tuhsuja —niha Jesu tirore.

²¹To ā nichu tuhoa fariseo curua macaina, judio masare buheina cūhu ti basi ō sehe ni tuhutumaha: “Ahriro ā ni durucuero tjijaro. Tiro masuno mari yoaro sehe jiro, ñaare to yoari buhiri tiare cohā masierara. Cohamacu dihta masa ti ñaare yoari buhiri tiare cohā masina”, ni tuhutumaha tina.

²²Jesu ti ā ni tuhoutuare masino, ō sehe niha:

—¿Dohse yoana ā ni tuhoutuari musa? ²³“Mu ñaa yoari buhiri tiare yuhu cohā tuhsuja”, yu nichu, “Mahñoriro jira”, yuhure nina musa noano masierapanahta. “Wahcāruca wahaga”, yu nichu yu niri potocā jia jichu dóihta masinahca. ²⁴Yuhu masuno Cohamacu warocariro ahri yahpai ti ñaare yoari buhiri tiare cohā masija yuhu. Masa ti ñaare yoari buhiri tiare cohāhtiro cjihtore cūre Cohamacu yuhure. Yu ā cohārine musa masihtu sehe ō seheta yoa ñoihtja musa ñuhti cjihtire —niha Jesu.

Ā ni tuhsu pjacu buharirore ō sehe niha:

—Muhure niita nija. Wahcārucaga. Mu coāri cahsarore na wahcāga mu ya wuhupu —niha tirore.

²⁵To ā nichu tuhurota jipihina ti ñurocaroi wahcāruca, to coāri cahsarore na, to ya wuhupu tjuaa wahaha. Ā waharo tiro Cohamacure ño payoro, wahchea mehne noano durucuha. ²⁶To ā yochu ñua masa sehe jipihina cuua wahaha. Tina cuua waha, Cohamacure ño payoa, wahchea mehne noano durucuha:

—Michare soro jiare ñuhi sã —niha tina.

Jesu Levíre piha

(Mt 9.9-13; Mr 2.13-17)

²⁷ Ñ yoa tuhsu waha, Leví wama tiriore to dahrari tahtiapu jiriore boca suha Jesu. Leví sehe puhtoa ya cjihtire masare wapa na cohtariro jiha. Ñ boca saro tirore ò sehe niha:

—Yuhu mehne macariro cjihto taga muhu —niha tiro Levíre.

²⁸ To ñ nichu Leví sehe jipiehtia to dahraare duhunoca, Jesu mehne wahaa wahaha.

²⁹ Baharo Leví ya wuhui bose numu Jesure yoa payoro niha. Tói payu wapa na cohtaina, paina cūhu Leví mehne dujiha. ³⁰ Tina mehne Jesu cūhu ti dujichu ñua mahainacã fariseo curua macaina, judio masare buheina mehne sua, Jesu buheinare ò sehe ni sinitu ñuha:

—¿Dohseana ñano yoaina, wapa na cohtaina mehne chujari musa? —ni tuhtiha tina.

³¹ Ti ñ nichu tuhoru Jesu yuhtiha tinare. Ò sehe ni piti dahre buheha:

—Dohatieraina duhturure macaerara. Dohatiina dihta duhturure macana. Ñaare yoaina dohatiina yoaro sehe jira. ³² Ñ jicu ñaare yoinare yahui tai nihi yuhu Cohamacure cahma duticu. Ti basi “Noaina jija sã”, ni tuhoutuinare yahui tai nierahi yuhu —niha Jesu.

Chu duhuare Jesure sinituha paina

(Mt 9.14-17; Mr 2.18-22)

³³ Ñ yoa mahainacã masa Jesure ò sehe ni sinitu ñuha:

—João buheina payu tahari Cohamacure ño payoa taa chu duhura. Ñ yoa, tina payu tahari Cohamacure sinina. Fariseo buheina cūhu ti yoaro seheta yoara. Ti ñ yoapachuta mu buheina sehe Cohamacure ño payoa taa chu duhuerara. ¿Dohse yoa ñ yoerajari tina? —niha tina Jesure.

³⁴ Ti ñ nichu Jesu to tuhutua mehne quiti dahre buhero taro tinare ò sehe ni yuhtiha:

—Ñ sehe jira ti: Wamomaca duhteropu ti pjirocaina wamomaca duhteriro mehne jia, chu duhu masierara. Tó seheta yu buheina cūhu yuhu mehne jia, chu duhu masierara. Yuhu wamomaca duhteriro yoaro sehe jija. Wamomaca duhteriro bose numu to yoachu tiro mehne macaina chueraina jierara. ³⁵ Yu Pucu Cohamacu yuhure to naari baharo pinihtare yu buheina mehne jisi yuhu. Ñ jia tí pjaruta yu buheina cūhu chu duhuahca —niha Jesu.

³⁶ Panopu macaa buhea wahma buhea mehne ti buhe more duachu ñuno ò sehe ni namoha Jesu tinare piti dahre buhero:

—Ne wahma suhtirore mahari cahsarocã tuhrẽ na, munano suhtirore sere òno cahmaerara. Mari ñ sere òna wahma cahsarore tuhrẽ cohãna nija. Ñ yoa wahma cahsaro munano suhtiro mehne cūno potori bajuerara. (Tó seheta muna buhea wahma buhea mehne piti dahre buheraro cahmana.)

³⁷ Ñ yoa ne se co bisia core wahiquiro cahsaro wajuru mehne muna wajuru mehne posaeraro cahmana. Mari ñ yoachu se co bisia pahmoapu muna wajurure tuhrẽnocahna. To tuhnuachu se co cūhu, wajuru cūhu cohõa wahara. ³⁸ Ñ yoa se co wahma core wahma wajurupu posaro cahmana. Mari ñ yoachu

se co cohōera, wajuru cūhu cohōerara. (Tó sehetā wahma buhea muna buhea mehne buhe moreraro cahmana.) ³⁹Muna core masa ti sihniri baharo, wahma core cahmaerara tina. Ō sehe nia tire masa: “Muna co wahma co bui curero noaa jira”, nia tire masa —niha Jesu tinare.

Sabado jichu Jesu buheina trigo parorire paha yuhdu wahcāha

(Mt 12.1-8; Mr 2.23-28)

6 ¹Pa dacho Sabado jichu Jesu cūhu trigo wesepu suha. Tópu su, to buheina sehe trigo parorire paha, tí pohcarire sahca site boro, tí yaparire chu wahcāa niha. ²Ti ā yoachū űua mahainacā fariseo curua macaina tinare ō sehe ni sinituha:

—¿Dohse yoana musa Sabado mari sori numu to jipachuta dahrajari? Marine dutiare yuhdurucana nina musa —niha fariseo curua macaina Jesure.

³⁻⁴Ti ā nichu tuhoro Jesu tinare yuhtiha, (“Yu buheina yuhdurucāa nierara”), nino taro:

—Davi cjiro tiro mehne macaina mehne juca baaro, Cohamacu wuhupu sāa, Cohamacu ya pāore chuha. Ā churo tó mehne macaina cūhare tí pāore chu dutiro waha. Tí pāore sacerdotēa dihtare chu dutira. Cohamacu dutia tí pāore painare chu dutierara. ¿Davi cjiro tíre to yoari cjirire buherari musa? (Tí pāore churo Cohamacure yuhdurucaro nieraha. Michare ahri yaparire chua yu buheina cūhu Cohamacure yuhdurucāa nierara.) ⁵Yuhu masuno Cohamacu warocariro ahri dacho Sabado dachore masa ti yoachtire yahurirota jicu puhtorota jija —niha Jesu.

Wamomaca buhariro quiti jira

(Mt 12.9-14; Mr 3.1-6)

⁶Pa dacho Sabado jichu Jesu judio masa ti buheri wuhupu sāa saro, buheha masare. Tóí wamomaca poto buhusehe buhariro jiha. ⁷Mahainacā judio masare buheina, fariseo curua macaina cūhu Jesure yahusā duamaha. “Sabado dachoi masunore noariro wahachu yoaboca Jesu” ni, űu nūnu yahusā duamaha tina Jesure. ⁸Jesu ti tuhoutuare masino, buharirore ō sehe niha:

—Wahcā surucaga jipihtina ti űurocaroi —niha tireore.

To ā niri baharo buhariro sehe wahcārucu su, tóí ducuha. ⁹Ā jiro Jesu tinare ō sehe ni sinituha:

—Musare sinituihtja: ¿Sabado jichu yabare yoa dutijari Cohamacu dutia? ¿Noaare yoachū noaerajari? ¿O űaare yoachū sehere noajari, musa tuhoutuachū? Sabado jichu masunore masochū noa nina. Sabado jichu masunore wajächu sehere noaerara —niha Jesu tinare.

¹⁰Ā nino Jesu tinare űuroca ō pahño, buharirore ō sehe niha tjao:

—Mu wamomacare siōrocahga —niha tiro.

To ā nichuta buhariro sehe siōroca, noari wamomaca wahaha. ¹¹To ā yoachū űua tina Jesu mehne tuaro suaha. Ā suaa ō sehe niha:

—¿Dohse yoanahcari mari ahrirore? —niha tina ti basi.

Jesu to buheinare doce to warocahtinare bese dapoha

(Mt 10.1-4; Mr 3.13-19)

¹²Tí dachorire Jesu tūcupu Cohamacure sinino mujaah wahaha. Tópu jiro, űamine Cohamacu mehne durucu bohreaa. ¹³Bohrearopu to buheinare to

cahapu pjirocaha. Pjiroca tuhsu, tina mehne macainare doce waro to waro-cahtinare bese dapoha. ¹⁴⁻¹⁵Ahrina jiha Jesu to bese daporina: Simo jiha. Simore Pedro ni pisuha Jesu sehe. Simo bahuro Andre, Santiago, João, Felipe, Bartolomé, Mateo, Toma, Santiago jiha. Santiago sehe Alfeo macuno jiha. Ā jia Simo cananista ya curua macariro cjiro, ¹⁶Juda Santiago macuno, Juda Iscariote tina jiha to bese daporina. Juda Iscariote sehe Jesure nu tuhtiinare nohtiro jiha.

Jesu payu masare buheha

(Mt 4.23-25)

¹⁷Ā yoa Jesu to buheina mehne tucu buipu jirina duji taa, payu paina to buheina mehne duji wihiruca, noari wapai ducuha tina. Jipihtiro Judea yahpa macari macaina, Jerusalē macaina, Tiro wama tiri maca macaina, Sidō wama tiri maca macaina, pjiri ma duhtu cahai jia macari macaina masa payu tiro cahapu wihia. ¹⁸Tina Jesu buheare tuhoa taa, ti dohatiare cohachu cahmaha tina. Watia ti cohtotarina cuhu tiro cahapu wihi, noaina wahaha. ¹⁹Jesu to tuua mehne noaina wahachu yoaha tinare. Ā jia tina jipitina tirore dahra nuu taha.

Jesu wahcheare, cahyaa cūhure buheha

(Mt 5.1-12)

²⁰Baharo Jesu to buheinare nu, ō sehe ni yahuha:

—Musa pjacuoina, puhtoro Cohamacu to suho jiropu wahanahca musa. Ā jina musa wahchenahca.

²¹Mipure musa juca baaina yapiina jinahca. Ā jina wahchenahca.

Mipu tiina jina, baharo musa bujunahca. Ā yoa musa wahchenahca.

²²Yuhu masuno Cohamacu to warocararo jija. Ā jina yu yare yoaina musa jiri buhiri paina musare ti nu tuhtipachuta wahcheina jira musa. Musare ti cohāpachuta wahchenahca. Musare ti nano durucupachuta “Naina jira”, musare ti nipachuta musa sehe wahchenahca. ²³Musare ti ā yoachu nuu manopu musa suchu pjiro noano yorohca Cohamacu musare. Ā jina tuaro wahcheina jiga. Noano yajeripohna tiina jiga. Musare nu tuhtiina ti coyey panopu macaina tō seheta nano yoaha Cohamacu yare yahu muhtaina cjiri cūhure.

²⁴Ā yoa musa mipu payu cuaina ahri yahpau musa noano jinoca tuhsure. Ā jina nano yuhduina jinahca musa.

²⁵Mipu yapiina musa juca banahca. Musa ā jina nano yuhduinahca.

Mipure musa bujuina jina baharopu musa cahya, tiinahca. Ā jina musa nano yuhduinahca.

²⁶“Cohamacu yare yahu muhtaina jija”, ni mahnoinare “Noaina jira”, nimaha payu panopu macaina. Ā nimarina ti coyey mipu macaina cuhu āta “Noaina jira”, niboca caina musa mehne macainare. Ti ā nimarina musa jina nano yuhduinahca musa cuhu —ni buheha Jesu.

Musare nu tuhtiina ti jipachuta tina cūhure cahiga

(Mt 5.38-48; 7.12)

²⁷Ā yoa ō sehe ni buhe namoha Jesu:

—Yuhure tuho duinare, musareta nii nija. Musare ñu tuhtiina ti jipachuta tina cūhure cahīga. Musare ñu tuhtiinare noano yoaga. ²⁸ Musare “Ñano yuhdujaro”, niina ti jipachuta noa dutiga tinare. Musare ñano yoina ti jipachuta “Tina cūhu noano jijaro”, ni sini payoga Cohamacure. ²⁹ Cūiro musa wahsupure to cjāchu, pa buhusehe cūhure cjā dutiga tirore. Musa bui macari suhtirore to machu musa camisa cūhure ā wanocahga tirore. ³⁰ Musare siniriore to sinino purota waga tirore. Musa yare to nachu tirore sinituena tjia pari turi tīre. ³¹ Paina musare ti noano yoachu cahmana musa. Tinare musa noano yoachu cahmano sehetu musa cūhu noano yoaga tinare. Musare ti noano yoerapachuta musa sehe tinare noano yoaga.

³² Musare cahīina dihtare musa cahīchu tí ne yaba cjihti jierara paina sehere musa cahīerachu. Ñaina cūhu tinare cahīina dihtare cahīna. ³³ Ā jina musare noano yoina dihtare musa noano yoachu tí cūhu ne yaba cjihti jierara paina sehere musa noano yoerachu. Tīre ñaina cūhu yoaa tire. ³⁴ Ā yoa “Yuhure wiaa tire”, musa niina dihtare musa wasochu ne tí yaba cjihti jierara. Ñaina cūhu painare “Yuhure wiaa tire”, ti niinare wasoa tire. ³⁵ Ā jina musa sehe musare ñu tuhtiina cūhure cahīga. Ā yoa, tinare noano yoaga. Pairore wasona “Yuhure ne wiasi ahrīro”, ni tuhotuenata tirore wasoga. Cohamacu sehe tirore ji coeraina cūhure, ñaina cūhure noano yoara. To yoaro sehetu yoaga musa cūhu. Musa ā yoachu Cohamacu pjīro noano yorohca musare. Musa ā yoana Cohamacu tua yuhduariro muano macariro pohna jinahca. ³⁶ Mari Pucu muano macariro to pja ñuriro sehetu musa cūhu masare pja ñuga —ni yahuha Jesu.

Paina cūhure “Ñaina jira”, niena tjiga

(Mt 7.1-5)

³⁷ Ā yoa tinare ō sehe ni yahu namoha:

—Painare “Ñaina jira”, niena tjiga musa. Musa ā nierachu Cohamacu musa cūhure “Ñaina jira”, nisi. Paina musare ti ñano yoirere ti ñano niri cūhure boga musa. Musa ā bochu ñuno Cohamacu musa cūhure musa ñaa yoiri buhirere borohca. ³⁸ Paye barore cjuana painare waga. Musa ā wachu Cohamacu musare warohca. Ā waro noano quihōno musare pjīro warohca. Wahpa yuhduaro warohca. Painare musa wariro purota Cohamacu musa cūhure warohca —niha Jesu tinare.

³⁹ Ā ni tuhsu Jesu quiti mehne piti dahre buhero ō sehe ni yahu namoha:

—Capari ñueraina sahsero ti basi noano tuā wahcā masierara. Ā tuā wahcā, tina puaro doca wahā su bora sāa wahaahca copapū. (Tó sehetu Cohamacu yare masieraina painare buhe masierara. Ā jia tina jipihtina pichacapu wahaahca.) ⁴⁰ Buheina tinare buherirore masi yuhdurucaerara. Ā jipahta jipihtina buheina ti noano buhe pahñori baharo tinare buheriro yoaro sehetu jiahca —niha Jesu.

⁴¹ Ā ni tuhsu paye quiti mehne yahu namoha:

—Mari piti dahre buhechu ō sehe yoina jira musa: Musa coyeiro to capariacapū mahari pohcarocā to sāachu tí pohcarocāre noano ñuna musa. Musa ya capariacare pjiri pjī to jipachuta tí pjīne ne ñuerara musa. (Mahari pohcarocāre musa ñuno sehetu musa coyeiro to ñano yoaa sehere noano ñuna musa. Musa basi musa ñaare tuaro yoapanahta tīre masierara musa pjiri pjīne

musa ñueraro seheta.) ¿Dohse jiro baro ã jijari musa? ⁴²Õ sehe niina yoaro sehe jira musa: “Coyeiro, muhu ñaare yoai nica muhu. Ñ jicu tíre duhuga”, niina yoaro sehe jira musa. Ñ niina jipanahta pjíro ñaare yoara musa sehe. ¿Dohseana musa ñaare yoapanahta tíre masierajari musa? Masa ti baharo buhusehei ñano yoa cohtaina jira musa ã yoaina. Pjiri pjíne musa capariacai jiri pjíne musa na muhtaboriro seheta musa ñaa yoa sehere duhu muhtaga. Musa ã yoari baharo musa coyero to ñano yoaare duhuchu yoa masiboca mahari pohcarocäre musa naboro seheta —ni buheha Jesu.

Masa ti durucuare tuhona ti jia tiare masija mari

(Mt 7.17-20; 12.34-35)

⁴³Ñ yoa piti dahre buhero õ sehe ni yahu namoha tinare:

—Noadu yucucu ñaare dicha tierara. Ñ yoa ñadu noaare dicha tierara. ⁴⁴Yucucu dichare masina ture masina. Pota tidu higuera pocare dicha tierara. Ñ yoa agã potacu se tõhorine dicha tierara. ⁴⁵Tó seheta jira masa cūhu. Noariro to tuhoutuapu noaa jira. Ñ jiro tiro noaare yoara noadu to noano dicha tiro seheta. Ñariro to tuhoutuapu ñaa jira. Ñ jiro tiro ñaare yoara ñadu ñaare to dicha tiro seheta. Mari tuhoutuapu marine ti jiro seheta durucuja mari —ni yahuha Jesu.

Pua wuhu yoaina quitire yahuha Jesu

(Mt 7.24-27)

⁴⁶Ñ yoa tinare õ sehe ni yahu namoha:

—Musa yuhure “Puhtoro”, nina. Ñ nipanahta yu dutia sehere yoerara musa. ¿Dohse jiro baro ã yoajari? ⁴⁷Jipihina yuhure cahmaina yu yahuare tuhora. Ñ jia yu dutiare yuhdurucaerara. Õ seheta jira yuhure yuhdurucaeraina: ⁴⁸Wuhu dahreriro yoaro sehe jira tina. Tiro cuãa coparire tãa wapai to suchupu saha, wuhure noano dapo ducaha. Tí wuhu noano to yoari wuhu jiro dia to minichu tuaro to cotiãpachuta tí wuhu noano tjuaha. ⁴⁹Ñ jia yu dutiare tuhopahta yuhdurucaina sehe wuhure noano yoerariro yoaro sehe jira. Tí wuhure buicã dapo, noano dahre ducaraha. To ã cūri wuhu jiro dia minino to cotiãchu dóihta tí wuhu burua wahaha. Ñ jiro tí wuhu tuaro bora su cahaa wahaha —niha Jesu.

Surara puhtoro cahamacunore to dohatichu Jesu noariro wahachu yoaha

tiore

(Mt 8.5-13)

7 ¹Tí quitire masare yahu tuhsu Jesu cūhu Capernaupu suha. ²Tó jiriro cien surara puhtoro to cahamacunore tuaro cahīha. To cahamacuno sehe dohatiriro jiro, yariaro cahariro jimaha. ³Ñ jiro Jesu to yoaare tuhoro, judio masa bucunare Jesu cahapu warocaha puhtoro sehe.

—Dohatirirore noariro wahachu yoai taga —ni yahu dutiro warocaha puhtoro bucunare.

⁴Tina Jesu cahapu sua, õ sehe ni tuaro mehne yahuha tiore:

—Surara puhtoro sãre warocahre. To cahamacunore dohatirirore to yuhdachu cahmahre tiro. Tiro puhtoro sehe noariro jira. To ã jichu yoadohoga tiore. ⁵Mari ya maca macainare tiro cahīna. Ñ jiro tiro sã buheri wuhure ti yoari wapa wapare —niha bucuna Jesure.

⁶Ti ā ni yahuchū tūhoro Jesu sehe tina mehne wahaha. Surara puhtoro ya wuhū cahacāi to sūro cahachū puhtoro sehe tiro mehne macainare Jesure ō sehe ni yahu dutiro warocaha:

—Puhtoro, noanohca. Tai tjiga. Noariro jieraja yuhū. Ya wuhui mūhure sãa ta dutiboriro jieraja yuhū. ⁷Ā jicu mū cahai wahaeraja. Yū ā jipachūta mū masia mehne noariro wahachū yoaga mūhū tirore. Mū ā yoachū yū cahamacuno noariro waharohca. ⁸Yūhure yū bui jiina paina puhtoa dutira. Ā jicu yuhū cūhū surarare dutija. Cūirore “Wahaga”, yū nichū tiro wahara. Pairore “Taga”, yū nichū tiro tara. Yū cahamacunore “Ahrire yoaga”, yū nichū tíre tiro yoara. (Mūhū cūhū dutirirota jira. Ā jiro mū dutiriro seheta tiro dohati-ro yūhdūrohca) —ni yahu dutiha surara puhtoro.

⁹To ā nichū tuho cūaa waharo, payū masa tiro mehne jiinare majarerucū sū, ō sehe ni yahuha:

—Musare niita nija. Tiro surara puhtoro Israe masuno jierariro Cohamacure tuaro wacū tuara. To cahamacunore yū noariro wahachū yoachtire masi tuhsura. Israe masare ne ahriro yoaro sehe jiinare űuerasinija —niha Jesu.

¹⁰To ā niri baharo surara puhtoro Jesu cahai to warocarina sehe ti puhtoro ya wuhūpu tjuaa wahaha. Tju sū dohatiriro to noariro jichū űuha tina.

Jesu wapewahyoro macunore masoha

¹¹To ā yoi baharocā Nai wama tiri macapū Jesu to buheina mehne payū masa mehne wahaha. ¹²Tí macare sãari sopaca cahai to sūchū yariarirore masa na wijaa taa niha. Yariariro pocoro wapewahyoro jiha. Cūirota jiriro yariaha. Ā jia tó macaina masa payū ticoro mehne wahaha. ¹³To ā wahachū űuno Jesu ticorore pja űuha.

—Tiieco tjiga —niha Jesu ticorore.

¹⁴Ā nino yariariro to masa putihi űa payoha. To ā űa payochū űua tí putire wuaina sehe sūrucaha.

—Macū, yuhū mūhure ō sehe nija. Wahcā nuju sūga —niha Jesu.

¹⁵To ā niri baharo yariariro cjiro wahcā nuju sū, durucuha. Ā jiro Jesu tirore to pocorore waha. ¹⁶To ā yoachū űua tina jipihtina cuia wahaha. Ā jia tina Cohamacure űo payoa, ō sehe niha:

—Cohamacū yare yahu muhtariro masi yūhduariro mipu pinihtare mari watoi jira —niha tina.

—Cohamacū marine to yainare yoadohoro wihi tuhsuhre —niha paina.

¹⁷Ā jia jipihtina Judea yahpa macainare tó duhtū cahai jia macari macai-nare Jesu to yoiare masa yahu site pahűoha.

João masare bautisariro to buheinare Jesure sinitu dutiha

(Mt 11.2-19)

¹⁸⁻¹⁹Ā yoa Jesu to yoiare űua Joãoire yahuha to buheina. Ā ti yahuchū tūhoro puarore tiro cahai pjiroca, Jesure sinitu dutiro warocaha João. Ō sehe ni sinitu dutiha:

—¿João “Yū baharo paio tarohca”, to niriro tjijari mūhū? ¿To niriro mū jierachū paioire cohtanahcari sã? —ni sinitu dutiha João puaro to buheinare.

²⁰Ā yoa tina Jesu cahai sū, sinituha tirore:

—João masare bautisariri muhure sinitu dutiro warocahre säre. ¿João “Yu baharo paio tarohca”, to niriro tjijari muhü? ¿To niriro mu jierachu paire cohtanahcari sä? —ni sinituha tina Jesure.

²¹ Tí pjata payu dohatiinare, watia ti cohtotainare, capari ñuerainare noaina wahachu yoaha Jesu. ²² Ä jiro João warocainare Jesu õ sehe ni yuhtiha:

—Mipure musa ñurire musa tuhorire Joãore yahuna wahaga: Õ sehe niga: “Capari ñueraina ñuna. Tini masieraina tinina. Cami bucu baaina noaina wahara. Tuho bocaeraina tuhoa wahara. Yariaina masaa wahara. Tina jipihtinare noaina wahachu yoahi yuhu. Ä yoa pjacuoinare noaa buheare yahuja. ²³ Yuhure tuhoriro ‘Potocã tjira’, niriro tiro wahcheriro jira”, Joãore ni yahuna wahaga —niha Jesu.

²⁴ João buheina ti wahari baharo Jesu sehe João to jia tiare yahu ducaha payu masare:

—Masa marienopu suna tjare wihnono to wãroca cohtotachu yoariro sehetu to buheare cohtota mujarimore ñuna suerare musa. Ä yoariro jierare João. ²⁵ “Noa suhti tirimore ñuna wahajihna”, nierare musa masa marienopu wahana. Noaa suhti tiina wapa bujuare cjuaina puhtoa ya wuhusepu jira. Masa marienopu jierara. ²⁶ Masa marienopu suna Cohamacu yare yahu muhtarimore ñuna suhre musa. Potocã tjira. João Cohamacu yare yahu muhtariro jira. Paina Cohamacu yare yahu muhtaina yuhdoro jiro jira tiro. ²⁷ Panopu Cohamacu yare ti joari pui Joãore õ sehe ni yahu joaa tiha:

“Mari Pucu to macunore õ sehe niha: ‘Mu pano muhure yahuyuhtimore warocai nija’, niha Cohamacu”, ni yahu joaa tiha panopure Joãore. ²⁸ Musare potocã niita nija. Paina jipih-tina bui jira João. Ahri turupure to ä jipachuta muanopure Cohamacu masare puhtoro to noano suho jiropure jipih-tina docapu jiro pinihta João bui jira —niha Jesu masare.

²⁹ To ä nichu tuhoa jipih-tina masa, puhtoa ya cjihtire wapa na cohtaina mehne João to bautisarina jia õ sehe ni tuhotuha Cohamacure. “Cohamacu quihõno yoariro jira”, ni tuhotuha tina. ³⁰ Fariseo curua macaina sehe judio masare buheina cuhu João to bautisanohrina ji duaeraha. Ä jia tinare Cohamacu to yaina to yoa duachu cahmaeraha.

³¹ Ä yoa Jesu pari turi õ sehe ni yahuha:

—¿Mipu macaina masa yabaina yoaro sehe jijari tina, musa tuhotuchu? ³² Tina macanacã yoaro sehe jira. Paina ti cahmano sehe ti yoerachu to wahae-rara tinacäre. Pache duaropu pape dujia, õ sehe ni pisurucura tinacã ti basi: “Musa basahti cjihtire sä putipemahi. ¿Dohseana musa basaerari sä tře puti-pechu? Sä tuaro ñahacaha tiipe, sañurucumahi. ¿Musa sehe dohseana sä mehne tiiperari?” nirucuina yoaro sehetu jira mipu macaina cuhu. (Mipu macaina ti cahmano sehetu sä yoerachu ñua to wahaerara tina cuhure.) ³³ João bautisariri Cohamacure ño payoro taro ne chueraro, vinore sihnierare. To ä sihnierachu ñuna “Watino to cohtotariro jira”, nimahre musa tirore. ³⁴ Yuhu masuno Cohamacu warocariro jicu, yuhu chu sihnija. Yu ä yoachu ñuna õ sehe nina musa yuhu sehere. “Ñuga. Ahriro pjíro churiro, cahariro jira. Puhtoa ya cjihtire wapa na cohtaina, ñano yoaina cuhu ti piti tiro jira ahriro”, nina musa yuhure. Ä nina macanacã yoaro sehe durucuina jira musa. (Musa cahmano sehe sä

yoaerachũ tó wahaerara musare. Ne wahcherara musa.) ³⁵ Ñ masierapanahta sã yoa ñorire ñuna, Cohamacu yare sã masichũ masinahca musa —ni yahuha Jesu.

Simo wama tiroto fariseo curua macariro ya wũhũi jiha Jesu

³⁶ Fariseo curua macariro to wũhũpũ chũ dutiro pjiha Jesure. To ã pjiichũ Jesu to ya wũhũpũ sũ, ti churi mesa cahai nuju suha. ³⁷⁻³⁸ Tĩ macapure ñaare ñaare yoarucuricoro cjiro jiha. Jesu fariseo curua macariro ya wũhũpũ to dujichũ ticoro tũhoha. Ñ tũho tuhsũ alabastro mehne yoariare me sitia posa tiriare na ta, Jesu baharo bũhusehei wihi tarũca, tiha. Ñ tiiro Jesu dahporire to yahco co mehne wayo, to pjoari mehne pahã cohãha. To dahpori wũachũ ñũ ticoro to dahporire wihi, me sitia mehne pio payoha. ³⁹ To ã yoachũ ñũno fariseo curua macariro Jesure pjiro to basi ò sehe ni tuhotumaha: “Ahricoro tiore ñaha ñuricoro ñaare yoarucuricoro jira. Ahriro Jesu Cohamacu yare yahu muhtariro jiro tĩre masiboa”, ni tuhotumaha. ⁴⁰ To ã ni tuhotuare masino Jesu ò sehe ni yahuha tiore:

—Simo mipũ pinihtare mũhũre yahu duaja —niha Jesu.

—Buheriro, ¿yũhũre dohse ni yahu duajari mũhũ? —ni yũhtiha Simo.

⁴¹ To ã nichũ Jesu ò sehe ni piti dahre buhe yũhtiha:

—Puhtorore puaro wapamoina jiha. Cũiro wapamoro quinientos niñeru turire wapamoha. Pairo sehe cincuenta niñeru turire wapamoha. ⁴² Ñ jia tina ti wapamoare ti wapa bihoerachũ ñũno puhtoro ti wapamoare wapa dutieraha. ¿Mipũ pinihtare diro sehe wapamoro sehe to puhtorore cahĩ yũhdũrohcarĩ? —ni sinituha Jesu.

⁴³ Simo ò sehe ni yũhtiha:

—Bũah, pjiro wapamoro mahanocã wapamoro yũhdoro to puhtorore cahĩ yũhdũboca —niha Simo.

—Potocã ni yũhtihre mũhũ yũhũre —niha Jesu.

⁴⁴ Ñ ni tuhsũ tiore pio payoricoro majare ñũ, Jesu Simore ò sehe ni yahu namoha:

—Ahricoro ñũga mũhũ. Mũ ya wũhũpũ yũ sãa wihiri baharo yũ dahporire cosahti core yũhũre waerare mũhũ. Ahricoro sehe to yahco co mehne yũ dahporire wayo, to pjoari mehne pahã cohãhre yũhũre. ⁴⁵ Mũhũ sehe yũhũre piti boca wihmierare. Ahricoro sehe òi yũ dujiro puro yũ dahporire wihmihre. ⁴⁶ Mũhũ sehe yũ dapure se mehne pio payoerare. Ticoro sehe yũ dahporire me sitia mehne pio payohre. ⁴⁷ Ñ nicũ mũhũreta yahui nija. Ahricoro to ñaa yoari cjiro payũbia jira. Ñ jiricoro jiparota ticoro tuaro cahĩhre yũhũre. Ñ jicũ ñaare to yoari buhirire cohãhi. Ñ jia ñaare ti yoari buhirire mahanocã yũ cohãnohrina mahanocã cahĩna yũhũre —niha Jesu Simore.

⁴⁸ Ñ ni tuhsũ tiro ticoro ò sehe ni yahuha:

—Mipũ pinihtare ñaare mũ yoari buhirire boja —niha Jesu.

⁴⁹ To ã nichũ tũhoa Jesu mehne dujiina ti basi ò sehe ni durucuha:

—¿Dohse jiro baro jijari ahriro ñaa buhirire boriro? —niha tina ti basi.

⁵⁰ Ñ ni tuhsũ, Jesu numinore ò sehe ni yahuha:

—Yũhũre mũ wacũ tuachũ mũhũre pichacapũ wahaboricoro yũhdoja. Cuiro marieno mũ wũhũpũ tjuua wahaga —niha Jesu ticoro.

Numia Jesure yoadohoha

8 ¹ Baharo bũjua macaripũ daa macaricãpũ cũhũre sũ, Cohamacu masare puhtoro to noano suho jiare noaa buheare yahuha Jesu. Doce to

buheina sehe tiro mehne jiha. ² Ā yoa numia cūhu watīa ti cohtotari numia cjiri, dohatia numia cjiri Jesu noaa numia to yoari numia tiro mehne tiniha. “María”, ti nimaricorore “Magdalena”, ni pisua tiha ticorore. Ticorore siete watīare Jesu cohā wioha tó pano. Ā jiro ticoro cūhu Jesu mehne tiniha. ³ Cuza wama tiri Herodere dahra cohtaina puhtoro cjiro namono Juana cūhu Jesu mehne tiniha. Susana wama tiricoro cūhu paye numia mehne payu ti cjuaa mehne tirole yoadohoha.

Jesu wesere toari masuno quitire yahuha

(Mt 13.1-9; Mr 4.1-9)

⁴ Ā yoa payu macari macaina Jesu cahapu cahmachuha. Ti ā cahmachuri baharo Jesu to tuhotua mehne quti dahre tinare ō sehe ni yahuha buhero taro:

⁵ —Toari masuno toaro, to toaa yaparire doca site cūno wahaha. To ā doca site cū wahcāchu paye yapari mahai bora caha suha. Ti ā bora caha suchu paye yaparire masa tu diho cūha. Ā jia paye yaparire minichahca duji ta, chunocaha. ⁶ Ā yoa paye yapari sehe taa wapa bui dihta se mininocā bui bora caha suha. Tí yahpau co mariaha. Ā jia tí yapari du wija tarucuma űaia wahaha. ⁷ Paye yapari sehe tja watoi bora caha suha. Tja sehe tí toaa mehne duha. Tja sehe dia yuhdua waha, toaare wajānocaha. ⁸ Paye yapari noari yahpai bora caha suha. Noano dua jia noano dicha tiha. Ā jia payu dicha tiha —niha Jesu.

Ā ni tuhsu ō sehe tuaro ni namoha:

—Ahrir tuho duaina noano tuhoga musa —niha tiro.

Jesu quti mehne to buherire yahuha

(Mt 13.10-17; Mr 4.10-12)

⁹ Baharo to buheina tí quitire masi duaa, Jesure ō sehe ni sinituha:

—Āhri quti mehne dohse ni yahui nijari muhu? —ni sinituha tina.

¹⁰ Tí ā nichu Jesu ō sehe ni yuhtiha:

—Cohamacu masa bui puhtoro to noano suho jiare panopu paina ti masierari cjirire masare masichu yorohca Cohamacu. Paina sehere ā yoaerara tiro. Tinare quti mehneta buheihtja. Yu ā yoachū tina yu buheare tuhopahta masisi —niha Jesu to buheinare.

Jesu wesere toari masuno quitire yahu pahñoa

(Mt 13.18-23; Mr 4.13-20)

¹¹ Ā ni tuhsu tinare ō sehe ni yahu namoha:

—Ō sehe ni yahura ahri quti: Toaa yapari noaa buhea yoaro sehe jira. ¹² Ā yoa maha duhtu cahai boraa yapari sehe noaa buhea yoaro sehe jira. Cāina masa noaa buheare ti tuhochu űuno watīno sehe ta, tí buheare masi dutierara masare, minichahca tí yaparire ti chu cohāno seheta yoaro. To ā yoaerachu tina Cohamacu wacu tuaboa. Ti ā wacu tuachu űuno Cohamacu sehe tinare pichacapu wahaborinare yuhdoboa. ¹³ Ā yoa taa wapa bui dihta se mininocā bui boraa yapari noaa buhea yoaro sehe jira. Ā jia masa noaa buheare tuho, wahchea mehne tíre tuho nunu wahcāna. Ā tuho nunupahta taa wapa buicā jia yucu nuhcori mariea yucu yoaro seheta ahrina masa cūhu yoari pja

cũno pjaerara. Ā cũno pjaeraa yu yare ti cahmari buhiri paina tinare ti ñano yoachũ ñua yu yare duhunocahna. ¹⁴ Ā yoa tja watoi bora yaari noaa buhea yoaro sehe jira. Ā jia masa noaa buheare tuhopahta, ahri yahpa macaare wacũ nunu yuhduara. Niñerure bujua cahma, paye baro cũhure payu cahma, tíre goa pja yuhduara tina. Ti ā yoachũ tí sehe noaa buheare ducatarata. Ti ā ducatachũ masa noaa sehere yoaerara. Dicha maria yucũ yoaro seheta jira. ¹⁵ Ā yoa noari yahpai bora yaari noaa buhea yoaro sehe jira. Ā jia masa noaa buheare tuhoa, noano mehne tí buheare yuhdurucaerara. Ā jia yucũcũ dicha tiro seheta noaa buheare tuhoina sehe Cohamacũ to cahmano seheta noaare yoara —niha Jesu.

Jesu sihãria quitire buheha

(Mr 4.21-25)

¹⁶ Ā ni tuhsu paye quitu mehne piti dahre buheha tiro:

—Ne sihãriare ti sihãri baharo tiare dihi biato docai cũerara masa. Ā yoa tiare coãri casario docai cũerara. Muanopũ tiare duhu payora wuhũpu sãa taina ti noano ñu sãahto sehe. ¹⁷ Jipihti ti masierari cjiire baharo masa masiahca. Sihãria to buhriachu mari ñu masino seheta panopũ ti masierari cjiire masiahca masa.

¹⁸ Ā jina msa tuhona noano tuho nunuga. Noano tuho nunũriro, noano masinohca. Tuho nunũerariro “Mahanocã tuhoja”, to nipachuta tí sehere boa waharohca —niha Jesu.

Jesu coyera tirore pjiha

(Mt 12.46-50; Mr 3.31-35)

¹⁹ Baharo Jesu bahana ti pocoro mehne tiro cahapũ wahaa nimaha. Masa payu jichũ to cahapũ sũeraha. ²⁰ Ā jiro cũiro Jesure õ sehe ni yahuha:

—Mu poco mu bahana mehne sopacapũ ducuhre. Mũhure ñua taa niyuhti —niha tiro Jesure.

²¹ To ā nichũ Jesu õ sehe ni yahuha jipihtinare:

—Cohamacũ ya buheare tuhoina, tíre yuhdurucaeraina tinata yu poco yu bahana yoaro sehe jira —niha Jesu tinare.

Jesu wihnonore yusũ dutiha

(Mt 8.23-27; Mr 4.35-41)

²² Pa dachoi Jesu to buheina mehne dohoriapũ samu:

—Basa, pahãjihna —ni, tina jipihtina tia mehne bucũpariropũ pahãa wahaha.

²³ Ā pahãno carĩa wahaha Jesu. Ti ā pahãrucuchũ waro tuaro wihnono taha. Wihnono to tachũ bujua pahcõri wahcã, tinare mionocamaha. Ā to wahachũ minihto cua yuhduaha tinare. ²⁴ Ā wahachũ ñua Jesu cahai waha, tirore wahcõha.

—Buheriro, mari mini yariana tana nijã —niha tina.

Ti ā nichũ Jesu sehe wahcã, wihnonore “Tõ purota wã duhuga”, niha. Ā ninota pahcõri cũhure “Yusua wahaga”, niha. To ā nichũta wihnono yuhduu wahaha. Ā yoa pahcõri cũhũ yusũ bora wahaha. ²⁵ Ā wahari baharo Jesu tinare õ sehe niha:

—¿Musa yuhure wacū tuaerasinijari? —niha tiro.

To ā nichū tina sehe cui, cūaa waha, ti basi ō sehe ni durucuha:

—Cue, ¿dohse jiro baro masuno jijari ahriro? Ahri wihnono, pahcōri cūhu to dutichū yuhdurūcaerara tirore —niha tina ti basi.

Watia ti cohtotarirore noariro wahachū yoaha Jesu

(Mt 8.28-34; Mr 5.1-20)

²⁶ Ā yoa tina sie coapū Gerasa macaina ya yahpapū pahā sūha. Tí yahpa Galilea yahpa potoihta jiha. ²⁷ Tói Jesu to maja sūrucū sūchū waro tó macariro watia ti cohtotariro tiro cahapū taha. Tiro yoiari pja suhti marieriro jiro, to wuhupūre ne jieraha. Ā yoa masa copari taa copari watoi jia tiha tiro. ²⁸⁻²⁹ Ā jia payū tahari watia tirore nahaha. Ā jiro tiro peresui to jichū to wamomacarine dahporire comaa dari mehne duhteriro jiparota, tiro tí darire nuha mujaha. Ā yoa watia sehe tirore masa marienopū na wahcāa tiha. Ā yoa tiro Jesure űuroca ō tuaro sañurucu, Jesu panoi na tuhcuca caha sūha. To ā yoachū űuno Jesu sehe tirore ō sehe ni dutiha:

—Watia, duhuga ahrirore —niha Jesu.

To ā nichū tuhoro watia ti cohtotariro tuaro sañurucu, ō sehe ni sinituha Jesure:

—Jesu, ¿Cohamacū Jipihtina Bui Jiro macūno yabare yoi tai nijari mūhū yuhure? Yuhure, űano yoi tjiga —niha watia ti cohtotariro.

³⁰ To ā nichū Jesu sehe ō sehe ni sinituha tirore:

—¿Yabariro wama tijari mūhū? —niha.

Payū watia tiro mehne jiha. Ā jiro ō sehe niha watia ti cohtotariro:

—Watia payū wama tija sā —ni yuhtiha watia ti cohtotariro tiro.

³¹ —Cuāri copapū säre waha dutiecu tjiga —ni, tuaro siniha watia sehe.

³² Tí pjare tói tūcu dahpotoi yesea payū chua niha. Tí tói chūchū űua watia ō sehe ni siniha Jesure:

—Sina yesea cahapū warocaga säre ti pjacuripū sā sāahto sehe —ni siniha watia.

Ti ā sinichū tuhoro “Jai. Wahaga”, niha Jesu. ³³ To ā dutichū, watia masuno mehne jirina cjiri sehe waha, yesea pjacuripū sāa wahaha. Ā yoa tinare ti sāari baharo, yesea jipihtina bucupariro duhtū cahapū pari cunupū mūroca buha, tí taropū bora űoja, mini yaria pihtia wahaha.

³⁴ Yeseare űu wihboina yesea ti ā minichū űua, cui, mūrocaa wahaha. Ā mūroca wahcā pjiri macapū cūhure, daa macaricāpū cūhure tíre ti űurire yahu sitea wahaha. ³⁵ Ti ā yahuchū tuhoa, masa sehe payū ti ā waharire űua wahaha. Ā jia Jesu cahai sū, watia ti cohtotariro cjirore to suhti tiriro, tuho masiriro to dujichū űua tina. Tí jipihtiare űua, tina cui niha. ³⁶ Watia ti cohtotariro cjiro noariro to waharire űuina, ti űurire painare noano yahu pahñoha. ³⁷ Tí pjata Gerasa yahpa macaina payū Jesure tuaro cuia, tirore pa sehēpū waha dutiha. Ti ā waha dutichū Jesu dohoriapū samu, waharo taro niha. ³⁸ Watia ti cohtotariro cjiro Jesu to wahahto pano tuaro siniha tirore:

—Mūhū mehne waha duaja —ni sinimaha.

³⁹ To ā nichūta Jesu tirore ō sehe ni yuhtiha:

—Mū ya macapū wahaga. Ā wahacū Cohamacū mūhure to yoiarire yahuga painare —niha Jesu.

To ã niri baharo waha to ya macapũ suro watĩa ti cohtotariro cjiro sehe Jesu tirore to yoirire jipihtina to ya maca macainare yahuha.

**Jairo maconore yuhdũchu yoa,
cahã ñuricoro cũhũre yuhdũchu yoaha Jesu**

(Mt 9.18-26; Mr 5.21-43)

⁴⁰Pari turi Jesu tí bucũpariropũ pahãa wahaha tjõa. To pahã tariropũta masa payũ tirore cohtaa niha. ã cohtaa, tirore piti bocasiniha wahchea mehne. ⁴¹⁻⁴²Tõi judio masa buheri wũhũ pũhtoro Jairo wama tiroro Jesu cahai sũ, to dahpori cahai na tuhcuca caha sũha tirore ñõ payoro. To macono yariaro niha. Ticoro cũcorota jiricoro doce cũhmari cjuaricoro jiha. ã jiro tiro to ya wũhũpũ Jesure pji wahcãha. “Jai” ni, tiro mehne wahaha Jesu cũhũ.

Mahai ti ã wahachũ payũbia masa tirore nũnu ti wahcã, bihsaro sũrũcũ sũha tirore. ⁴³To ã bihsaro wahachũ numino doce cũhmari waro ã cahã ñurucuricoro tõi jiha. Tõ pano duhturuare jipihtia to niñeru mehne wapamaha ticoro co wa dutiro. Ti ã co wapachũta mũnanota jirucunocaha ticoro. ⁴⁴ã jiro ticoro Jesu baharo masa payũ watoi wihi, Jesu suhtirore to ñaha ñũchũta to cahã ñũa pihtia wahaha. ⁴⁵To ã ñaha ñũchũ tuhũturo Jesu õ sehe ni sinituha:

—¿Noa yũ suhtirore ñaha ñũri? —niha tiro.

Jipihtina “Yoaerahi”, niha. ã jia Pedro cũhũ õ sehe niha:

—Buheriro, bihsa nina. ã jia masa payũ mũhũre pihanocahna. ¿Dohseacũ ã ni sinitujari mũhũ? —niha tina Jesure.

⁴⁶Ti ã nichũ Jesu õ sehe ni yũtiha:

—Michapucacã yũhũ noaricoro wahachũ yoahi cũcorore. ã jicu yũhũre to ñaha ñũchũ masija —niha tiro.

⁴⁷To ã nichũ tuhoro ticoro duhti masieraro, teterericoro Jesu cahai na tuhcuca caha sũha tirore ñõ payoro. ã jiro jipihtina masa ti tuhoro to dohatiare, Jesure to ñaha ñũrire to noaricoro to waharire yahuha ticoro. ⁴⁸To ã ni yahu tuhsũchũ Jesu ticorore õ sehe ni yahuha:

—Maco, yũhũre mũ wacũ tuua mehne noaricoro tjuara mipũre. Wahchea mehne wahaga —niha ticorore.

⁴⁹To ã nino watoi Jairo ya wũhũ jiro yahuho wihiha:

—Mũ macocã yariaa wahahre. ã jicu buherirore pji tai tjiga —niha tiro.

⁵⁰To ã nichũ tuhoro, Jairore õ sehe ni yahuha Jesu:

—Cahya tuhũtui tjiga. Yũhũre wacũ tuaga. Tĩ dihtare yoaga. Mũ ã yoachũ ticorocã masaa waharohca —niha Jesu.

⁵¹ã ni tuhsũ to wũhũpũ sũ, Pedro, João, Santiago, dohatiricoro pũcũsuma tõeĩnata na sãha. Paina sehere Jesu sãa dutieraha. ⁵²Tõi jipihtina masa ti ñahacaha tiro watoi sãa sũha Jesu.

—Tiiena tjiga. Ticorocã yariaerare. Carĩno nica —niha tiro.

⁵³To ã nichũ tuhũa tina sehe ticoro yariaricoro to jichũ masia, Jesure bujuha. “ã nimacanocano nina”, ni bujuha. ⁵⁴ã yoa Jesu ticorocã wamomacare ñaha, õ sehe ni pisuha:

—Maharicorocã wahcãga —niha.

⁵⁵To ã nichũta yariaricoro masaa waha, tí pjata wahcãrũcũ sũha ticorocã. To wahcãri baharo Jesu ticorore chũare wa dutiha. ⁵⁶To ã masachũ ñũa to pũcũsuma ñũ cuua wahaha. ã jiro Jesu tíre painare yahu dutieraha.

Jesu doce to buheinare buhe dutiro warocaha

(Mt 10.5-15; Mr 6.7-13)

9 ¹ Ñ yoa Jesu doce to buheinare pjiroca, to tuaare waha tinare. Watĩare ti cohãhti cjihtire, dohatiinare noaina ti yoahti cjihtire to tuaare waha tinare. ² Ñ yoa tuhsu tinare Cohamacu masare puhtoro to noano suho jiare buhe dutiro, dohatiinare noaina wahachu yoa dutiro warocaha tinare. ³ Ñ sehe ni dutiha Jesu tinare:

—Musa wahana paye barore naaena tjiga. Tjuadure, wajure, chuare, niñerure naaena tjiga. Musa sãano dihtare sãa wahcãga. Paye suhtire naaena tjiga. ⁴ Jipih-tia macaripu masare ti carĩno wachu tí wuhũhta jinocasina. Coã wahanapu wijaahga tí wuhure. ⁵ Paye macari macaina masare ti cahmaerachu ñuna tí macarine yuhdu wahcãa wahaga. Ñ wahana musa dahpori macaa dihta pohcari mene wajã site cũga musa tinare ti ya buhirire masichu yoana —niha Jesu.

⁶ To ñ niri baharo to buheina sehe waha, jipih-tia macaripepu noaa buheare yahu tinia tiha. Ñ yoa dohatiinare noaina wahachu yoaa tiha.

Jesu to yoirire Herode tũhoha

(Mt 14.1-12; Mr 6.14-29)

⁷ Ñ yoa Herode Galilea yahpa macaina puhtoro Jesu yoirire tũhorocaha. “¿Diro baro jijari tiro Jesu?” niparota ne masieraha. Cãina ñ sehe nimaha Jesure: “João masare bautisariro cjiro pari turi bajuaro nica. Ñ jiro ‘Jesu’, ti niriro tiro tjira”, nimaha cãina. Ti ñ nichu tũhoro Herode Jesure dohse ni masieraha. ⁸ Paina “Tiro Elia cjiro mipu bajuaro nina”, nimaha. Paina sehe “Cohamacu yare yahu muhtaina panopu macaina mehne macariro cjiro mipu bajuaro nica”, nimaha Jesure. ⁹ Ti ñ ni durucupachuta ñ sehe ni tũhotuha Herode sehe: “João dapure dute ta duti tuhsuhi yuhu. ¿Mipure jiro masa ti yahuro diro baro jibocari tiro sehe?” ni tũhoturo tiro Jesure ñu duamaha.

Jesu cinco mil bui masare chũa waha

(Mt 14.13-21; Mr 6.30-44; Jn 6.1-14)

¹⁰ Ñ yoa Jesu to warocarina tiro cahapu tju sua, ti yoirire yahuha Jesure. Ti yahu tuhsuchu Jesu tina dihtare Betsaida wama tiri macapu suho wahamaha. ¹¹ Ti waharire masia, masa payu tinare nũnu ti wahcãha. Jesure ti mu suchu ñũno piti bocasiniha Jesu tinare. Ñ jiro tiro Cohamacu masare puhtoro to noano suho jiare tinare yahu, dohatiinare noaina wahachu yoaha.

¹² Ñamichapũ doce to buheina tiro cahapu su, Jesure ñ sehe ni yahuha:

—Ñ masa marienopu jira. Ñ majano macaa macaripu, daa macaricãpu cũhure ahrina masare warocaga. Carĩa ti chuhti cjihtire maca dutiga tinare —niha tina Jesure.

¹³⁻¹⁴ Ti ñ nichu Jesu ñ sehe ni yũhtiha tinare:

—Ñ nienata chuare waga tinare —niha.

To ñ nichu tũhoa tina ñ sehe ni yũhtiha:

—Cũ wamomaca pihtia pão curiri, puaro wahi tó purocãta cjuaja mari. ¿Ahrina payu masa ti chuhti cjihtire nuchubocari sã? —niha to buheina.

Payu masa ti jichu ñua ñ niha to buheina. Tõpure cinco mil mua jiha. (Numia, macanacã cũhu jiha.) Ñ jiro Jesu ñ sehe ni yahuha to buheinare:

—Cincuenta masare cū curuai duji dutiga. Paye curuari cūhure tópeinata duji dutiga —niha Jesu to buheinare.

¹⁵To ā nichu to buheina to dutiriro seheta yoa, jipihtina masare duji dutiha. ¹⁶Duji duti tuhsu Jesu cū wamomaca pihtia pāo curirire puaro wahi mehne na, muanopu űuha. Ā űuno Cohamacure “Noana”, niha. To ā niri baharo pāo curirire nuha, to buheinare masare witi dutiro waha. ¹⁷Ti ā witi tuhsuchu, tina jipihtina masa chu, yapi yuhdua wahaha. Ti yapi wahyorire doce puhuse waro wahpo dapoha to buheina.

Jesu potocā Cristo to jiare Cohamacu warocariro to jiare yahuha Pedro

(Mt 16.13-19; Mr 8.27-29)

¹⁸Cū dacho Jesu cūirota jiro, Cohamacure sinino niha. To ā sinino watoi to buheina tiro cahapu suha. Ā jiro Jesu ō sehe ni sinitu űuha tinare:

—¿Diro baro jicari yuhu masa yuhure ti tuhotuchu? —ni sinitu űuha.

¹⁹To ā sinituchu tuhoa to buheina ō sehe ni yuhtiha:

—“João masare bautisariro jira”, nina mūhure. Paina “Elia cjiro jira”, nina. Paina “Panopu macariro Cohamacu yare yahu muhtariro cjiro masa wijariro cjiro jira”, nina mūhure —ni yuhtiha to buheina sehe tireore.

²⁰Ti ā niri baharo Jesu tinare ō sehe ni sinitu űuha tjoa:

—¿Musa sehe musa tuhotuchu diro baro jicari yuhu? —ni sinitu űuha tjoa.

—Muhu Cristo Cohamacu warocariro jira —ni yuhtiha Pedro.

Jesu to yariahto cjihtore yahuha

(Mt 16.20-28; Mr 8.30-9.1)

²¹Ā yoa Pedro “Cristo jira mūhu”, to nirire painare Jesu yahu site dutieraha to buheinare. ²²Ā ni yahu site dutiera tuhsu ō sehe ni namoha:

—Yuhu masuno Cohamacu warocariro tuaro űano yuhduihca. Āta yuhduro cahmana yuhure. Ā jia mari coyey judio masare buheina, bucuna, sacerdoteya puhtoah mehne yuhure cahmaeraa, yuhure wajāahca. Ti ā wajāri baharo tia dacho wahaboroi masa mujaihca —niha Jesu tinare.

²³Baharo jipihtinare ō sehe ni yahuha Jesu:

—Cūiro yu yairo ji duaro, to cahmano yoa duamarine duhunocanohca. Ā yoa crusapu yu űano yuhduhtiuro seheta yu yairo to jiri buhiri űano yuhduparota yuhure duhusi. Ā jiro yu yare yoarucuriro jirohca. ²⁴Masuno yuhure wacūno marieno to mu suro to cahmano seheta yoiri pichacapu tiro waharohca. Ā jiro yu yare ā yoarucuriro jipihtia dachoripe yuhu mehne muanopu jirucurohca. ²⁵¿Cūiro masuno ahri yahpa macaare jipihtiare cjuariro Cohamacure cahmaeraro pichacapu waharo yabare wapatajari tiro? Ā jiriro ne wapataerara. ²⁶Cāina yuhure, yu buheare buo tiboca. Ti ā yoachu űucu yuhu cūhu yuhure ā yoinare buo tisāaihca. Yuhu masuno Cohamacu warocariro noaina anjia ti si sitea mehne, yu si sitea mehne, yu pucu to si sitea mehne tjua tacu tinare buo tisāaihca. ²⁷Potocā niita nija musare. Mipure cāina musa ōpure jiina musa yariahto pano Cohamacu jipihtina bui puhtoro noano to suho ji ducachu űunahca —niha Jesu tinare.

Jesu pjacu cohtotaha

(Mt 17.1-8; Mr 9.2-8)

²⁸Ā yoa ocho dachori tīre to yahuri baharo Jesu Pedore, Joāore, Santiagore tina dihtare pjiha. Ā yoa waha, Cohamacure sinia waha, tūcupu mujaa wahaha

tina. ²⁹Cohamacure to sinino watoi Jesu wuhdua cohtotaha. To ā cohtotachu to suhtiro minoari suhtiro noano yehseri suhtiro wahaha. ³⁰To ā waharo watoi puaro mua tiro mehne durucua niha. Durucuina sehe Elia cjiro, Moise cjiro jiha. ³¹Tina muano macaa si sitea mehne bajuaha. Jesu baharocāta Jerusalēpu to variahtore tina Jesu mehne durucua niha. ³²Pedro cūhu wujo caha yuhdua. Ā caripahta cua wahcā wihi Jesu to si siteare űua, puaro tiro mehne ducua cūhure űua. ³³Moise cjiro cūhu ti wahahto panocā Pedro Jesure ō sehe nimaha: —Puhtoro, mari ōre jichu noa duara. Tia wuhucā yoanahtja. Mu ya wuhucā, Moise ya wuhucā, Elia ya wuhucā yoanahtja —nimaha Pedro.

Ā niparota to nirire ne masieraha. ³⁴To ā ni durucuro watoi tinare me curua duji boro pja suha. To ā duji boro pja suchu űua tina cuia wahaha. ³⁵Tuhsu, me curua puhichapu ō sehe ni durucuro coa taha:

—Ahriri yu macu, yu beseriro jira. Noano tuhoga tiore —nino coa taha me curua puhichapu.

³⁶To ā nino coa tari baharo Jesu dihtare űua tina. Baharo ti űurire painare yahueraha. Ne cūiire yahueraha.

Jesu watino to cohtotarirocāre noariro wahachu yoaha

(Mt 17.14-21; Mr 9.14-29)

³⁷Pa dachoi tina tūcupu ti duji tachu payu masa Jesure piti bocaha. ³⁸Ā jiro tina mehne macariro Jesure ō sehe ni pisuha:

—Buheriro, mūhure tuaro ahrire sini duaja yuhu. Yu macu cūirota jira. Ā jicu tiore űubasaga mūhu. ³⁹Watino tiore űaha, sañurucuchu yoa, tunu teterechu yoa, sahpo tua wahachu yoaa tihre. Ā yoaro watino yu macure űano yuhdachu yoa, ne duhu duerara. ⁴⁰Mu buheinare watinore cohā wio duticu tuaro sinimahi. Yu ā sinipachuta tina sehe tiore cohā wio masierare —niha tiro Jesure.

⁴¹To ā nichu Jesu sehe ō sehe niha:

—Mipu macaina musa űaina jira. ĴYuhure ne wacū tuaeraputijari? Yoa-biari pja musare buhemaja yuhu. ĴNoho puro yoari pja yuhure musa caribobocari? —ni tuhtiha Jesu.

Ā ni tuhsu watino ti cohtotariro pūcure ō sehe niha:

—Mu macure na tahga —niha.

⁴²To ā niri baharo to macuno Jesu cahapu to taro watoi watino sehe tiore yahpapu doca caha su, tunu teterechu yoaha. To ā yoachu Jesu watinore wijaa dutiha. To ā wijaa dutichu watino sāarirocā noariro wahaha. Ā jiro Jesu sehe tirocāre wiha to pūcure. ⁴³Cohamacu tuua mehne noariro to wahachu űua, jipihtina masa cuua wahaha.

Pari turi Jesu to variahtore, to masihtore yahuha

(Mt 17.22-23; Mr 9.30-32)

Masa Jesu to yoarire ti űu, cuua wahachu Jesu sehe to buheinare ō sehe ni yahuha:

⁴⁴—Michapucacā yu yahuhtire boena tjiga musa. Yuhure Cohamacu to warocaritore pairo yuhure űaha dutiro warohca masare —niha Jesu.

⁴⁵To ā nipachuta tina sehe to yahuaire noano tuho űahaeraha. To yahurire tinare masihtore basioeraha. Tí pjata Cohamacu tinare tíre tuho űaha dutiera-siniha. Ā jia tina cuia, tíre tiore sinitu űueraha.

Jesu buheina tina mehne macarirore puhtoro sō duamaha

(Mt 18.1-5; Mr 9.33-37)

⁴⁶Baharo Jesu buheina durucu sayoa niha:

—¿Mari mehne macariro diro sehe puhtoro ti cohtotacari? —ni sayoa niha tina ti basi.

⁴⁷Ti ā nichu Jesu sehe ti tuhotuare masino, nijinocāre to cahai duhu dapo, to buheinare ō sehe ni yahuha:

⁴⁸—Yū yare yoana tana ahrirocāre cahmana yūhu cūhure cahmana mūsa. Ā yoa yūhure cahmana, yūhure warocariro cūhure cahmana mūsa. Mūsa mehne macariro mūsa cahamacūno jiro tiro cūhu puhtoro tjirohca —niha Jesu.

Marine űu tuhtiro jieraro, mari mehne macariro jira

(Mr 9.38-40)

⁴⁹Baharo João Jesure ō sehe ni yahuha:

—Buheriro, mū wama mehne watīare cohārirore sā űuhi. Tiro mari mehne macariro to jierachu űana tíre tirore yoa dutiera tihi sā —niha João Jesure.

⁵⁰To ā nichu Jesu Joāore paina buheina cūhure ō sehe ni yahuha:

—Ā niena tjiga mūsa tirore. Marine űu tuhtiro jieraro, tiro mari mehne macariro jira —niha Jesu to buheinare.

Jesu Santiago, João cūhure tuhtiha

⁵¹Tí pjare Jesu muanopu to wahahto panocā, “Jerusalēpu wahaihtja”, niha tiro. Ā nino tōpu waharo niha. ⁵²Ā jia Jesu to panoi warocaina waha, Samaria yahpa macari macapu su, tói Jesu to jiltore cahno duamaha. ⁵³Jesu Jerusalēpu waharo taro niha. Tōpu wahahtiro to jichu tuhoa, tó macaina tirore cahmaeraha. ⁵⁴Tíre tuhoa Santiago, João mehne ō sehe ni yahuha Jesure:

—Puhtoro, mū cahmachu muano macari pichaca mehne tinare wajā dutinahca —niha tina tirore.

⁵⁵Ti ā nichu Jesu majare űu, tuhtiha tina puarore.

[—Espíritu Santo yaina jira mūsa. Mipu mūsa tuhoturo seheta tiro sehe tuhotuerara. Yūhu masūno Cohamacu warocariro ahri yahpapu tacu pichacapu wahaborinare yoadohohtiro tai. Masare butichu yoacu tacu nierahi —ni yahuha Jesu.]

⁵⁶Ā tuhti tuhsu, pa macapu Jesu cūhu wahaa wahaha.

Paina Jesu mehne wamahaha

(Mt 8.19-22)

⁵⁷Tina mahai ti wahachu, masūno Jesure ō sehe ni yahuha:

—Mūhu mehne waha duaja nohoi mū waharoi —niha tiro.

⁵⁸To ā ni tuhsuchu Jesu ō sehe ni yuhtiha:

—Caina macaroca macaina wahiquina ti copari cjuara. Minichahca cūhu ti suhti cjuara. Yūhu masūno Cohamacu warocariro sehe yu carīri wūhu maeraja —niha Jesu.

⁵⁹Baharo pairore Jesu pjiha:

—Yuhũ mehne macariro cjihto taga —niha.

To ā nichũ tiro ō sehe ni yuhtiha Jesure:

—Puhtoro, yũ pũcũ to yariachũ yasinii wahaihtja. Ā ya tuhsucũ pinihta muhũ mehne wahaihtja —niha tiro.

⁶⁰To ā nichũ Jesu ō sehe ni yahuha:

—Yuhũre cahmaeraina yariaina yoaro seheta jira. Tina sehe yariainare yajaro. Ā jicu muhũ sehe Cohamacũ masare puhtoro to noano suho jiare noaa buheare buhei taga —niha Jesu tirore.

⁶¹Ā yoa paio Jesure ō sehe niha:

—Puhtoro, muhũ mehne wahaihtja. Wahmanore yũ coyeare coha sitisinii wahaihtja —niha tiro Jesure.

⁶²To ā nichũ Jesu ō sehe ni yahuha tirore:

—Wachũ sahari pjĩne tuā puriro mehne dahrariro noari dare saha duara. Ā dahrariro to baharo buhusehere majare ñuno, noano potori da saha masierara. (Tó seheta Cohamacũ yare yoaro taro, dahrariro tó pano to jia tiare tuaro wacũboca tíre duhu duaeraro, dahrariro to majare ñuno seheta.) Ā wacũriro Cohamacũ mari puhtoro yare dahraboriro jierara —niha Jesu.

Jesu setenta y dos buheinare buhe dutiro warocaha

10 ¹Baharo Jesu paina buheinare setenta y dos buheinare bese, macaripẽũ to wahahto pano warocayuha. Cãa macaripũre puaro dihta warocaha tiro. ²Ā warocarō ō sehe ni yahuha tinarẽ piti dahre buhero:

—Trigo payũ ti bucũa tuhsucũ payũ jichũ dahraa pjĩro jira. Wiho mejeta dahraina sehe mahainacã jira. Tó seheta noaa buheare tuhohtina payũ jichũ pjĩro jira mari dahraa. To ā jipachũta mahainacã dahrari masa yoaro seheta noaa buheare buhehtina cũhũ mahainacã jira. Ā jina noaa buheare buhehtinare painare to warocahtore siniga Cohamacũre musa. ³Wahaga musa. Musare yũ warocachũ musa oveja pohna yaya watoi ti jiro seheta musa cũhũ ñaina suaina watoi jinahca. ⁴Niñeru wajure, bujuawacũa waju cũhũre, dahpo suhtire naaena tjiga. Musa mahai tinina painare boca sũ durucuenta tjiga. Poto wahaga. ⁵Jipihtia musa sãa wuhũsepũ sãahna “Ahri wuhũ macaina noano jijaro”, ni muhtaga. ⁶Tí wuhũ macaina noano mehne jiina cahmachea marieina ti jichũ, tíre niga tinarẽ. Noano mehne ti jierachũ ñuna tí wuhũ macainare ā niena tjiga. ⁷Cũ wuhũ sãa sũrucana ti noaina jichũ tí wuhũihta tjuaga. Tói ti duhu payorire chũ, sihnituga. Dahrainare ti wapataare nano cahmana. Ā jina ti wapataare ti nano seheta ti duhu payorire naga musa cũhũ. Ā jina cũ wuhũihta musa suri wuhũihta jina, tí maca macaa wuhũsepũ ji tiniena tjiga. ⁸Macapure musa suna tó macaina sehe musare ti cahmaina jichũ ti chua ti duhu payorire chũga. ⁹Tó macaina dohatiinare noaina wahachũ yoaga. Ā jina ō sehe niga tinarẽ: “Cohamacũ mipure mari puhtoro noano to suho jihtore yahuna nija musare”, niga tinarẽ. ¹⁰Pa macapũ musa suchũ tina sehe musare cahmaeraboca. Ti ā cahmaerachũ ñuna tí maca dacho macapũ waha, ō sehe niga tinarẽ. ¹¹“Ahri maca macaa dihta pohcari mene wajã site cũna nija sãre musa cahmaerari buhiri ñona. Ā jina ahrire wacũga. Cohamacũ mari puhtoro mipure to noano suho jihtore yahuna nija musare”, niga tinarẽ. ¹²Musare potocã niita nija. Sodoma macaina ñabiaina jiha. Ti ā jipachũta pihtiri dacho jichũ Cohamacũ to buhiri dahreri dacho

jichu Sodoma macaina yuhdoro musare cahmaeraina sehere buhiri dahre-rohca —niha Jesu.

Paye macari macaina Cohamacure yuhdurucaina jira

(Mt 11.20-24)

¹³ Baharo Jesu o sehe niha macari macainare:

—Corazi macaina, musa nãno yuhdunahca. Betsaida macaina, musa cūhu nãno yuhdunahca. Musa ya macaripure Cohamacu tuaa mehne yoa nomahi. Tiro wama tiri macare, Sidō wama tiri maca cūhure to tuaa mehne yu yoa nochu nua tō macaina sehe ti nãare cahyaboa. A yoa “Noaina jija”, ni ti tūhotumari cjiire tūhotu cohtotaboa. Dōihta tina duji, cahyaa suhtire sãa, ti basi niti pohcare ti bui dahra site payoboa ti nãare cahyaare ñoa. ¹⁴ Cohamacu to buhiri dahrer dacho jichu Tiro macaina, Sidō macaina yuhdoro nãa buhiri tiina musa jiri buhiri musare nãno waro buhiri dahrerohca tiro. ¹⁵ Capernau macaina, musa mu suro muanopu waha duamana. Musa a waha duapachuta musa nãa buhiri tiina musa jiri buhiri musare Cohamacu pichacapu cohānohca —niha Jesu.

¹⁶ A ni tuhsu Jesu to buheinare o sehe ni yahuha:

—Musare tūhoina yuhu cūhure tūhora. Musare cahmaeraina, yuhu cūhure cahmaerara. A jia yuhure cahmaeraina, tina yuhure warocararo cūhure cahmaerara —niha Jesu tinare.

Setenta y dos buheina tju wihiha

¹⁷ Baharo setenta y dos buheina wahchea mehne tju wihiha:

—Puhtoro, mu wama mehne mu tuaa mehne watĩare sã dutichu tina sehe sãre yuhdurucaerare —niha tina Jesure.

¹⁸ Ti a nichu Jesu o sehe ni yuhtiha tinare:

—Muanopu to oroca site bora taro seheta, watĩno to bora tachu nūhi. ¹⁹ Noano tūhoga. Musare yu tuaare wahi yuhu. A jina agāare, pichōno soroare, watĩnore marine nū tuhtirirore musa yuhdurucahtire wahi yuhu. A jia tina musare nãno yoa masierara. ²⁰ Yu a wapachuta watia musare ti yuhdurucaerachu nuna tĩ dihtare wahchena tjiga. Ahri sehere wahchega. Muanopu Cohamacu yaina ti wamare to joa ōri tjui musa wamare to joa ōchu nuna, tĩ sehere wahchega musa —niha Jesu tinare.

Jesu wahcheha

(Mt 11.25-27; 13.16-17)

²¹ Tĩ pjare Espĩritu Santo Jesure tuaro wahchechu yoaha. A jiro Jesu o sehe niha:

—Mai, muhu muanopu cūhure yahpapu cūhure puhtoro jira. Masi yuhdurucu suinare mu yahuerari cjiire wiho jiina sehere yahure muhu. Mu a yoachu nucu “Noa yuhduara”, nija. A tjira, Mai. Mu yoa duararo seheta, mu cahmaro seheta tinare mu yare yahure —niha Jesu.

A ni tuhsu painare o sehe niha:

²² —Yu Pucu jipihtiare yuhure ware. Yu Pucu dihta yuhure masina. Yuhu cūhu tirore masija. Yu beserina cūhu tirore masina, yu masi dutiina jia. Tōpeinata yu Pucure masija sã —niha Jesu.

²³To ā niri baharo ti sahsero ti jichu Jesu to buheinare ō sehe niha:

—Ahri jipihtiare musa nuna wahcheina jira. ²⁴Potocā tjira. Payu Cohamacu yare yahu muhtaina cjiri, yahpari macaina puhtoā cūhu mipu musa nūrire nū duamaha tina cūhu. Ā jia musa tuhori cūhure tuho duamaha —niha Jesu.

Noariro Samaria macariro quitire yahuha Jesu

²⁵Tí pjata judio masare buheriro Jesu cahai wihi, Jesure nāno to durucuhu yoa duamaha tirore yahusā duaro:

—¿Buheriro, yuhu jipihtia dachoripe Cohamacu mehne ji duacu dohse yoihcari yuhu? —ni sinituha tiro Jesure.

²⁶To ā nichu Jesu ō sehe ni yuhtiha tirore:

—¿Dohse ni yahujari Cohamacu yare ti joari pui? ¿Cohamacu to ni joari cjirire dohse ni tuhutujarita muhu? —niha Jesu tirore.

²⁷To ā nichu tiro ō sehe ni yuhtiha:

—Ō sehe niha Cohamacu: “Tuaro musa yajeripohnari mehne, noano musa tuua mehne, musa wacūa mehne Cohamacure cahīga. Ā yoa mu basi mu cahīno seheta mu cahai jiina cūhure cahīga” —niha tiro Jesure.

²⁸To ā nichu Jesu ō sehe ni yahuha:

—Quihōno nire muhu. Tíre yoaga. Ā yoacu jipihtia dachoripe Cohamacu mehne jiihca muhu —niha tirore.

²⁹“Ahriro Cohamacu dutiare yoa pahñoriro jira”, masa tirore ti ni tuhutuchu cahmaha judio masare buheriro. Ā cahmano tiro Jesure ō sehe ni sinituha:

—¿Yabariro baro jicari yuhure mu cahī dutiriro? —niha tiro.

³⁰To ā nichu Jesu ō sehe ni piti dahre quti mehne yuhtiha:

—Cū dacho Jerusalēpu tariro Jericópu wahariro mahai to tinichu yacaina tirore nāhaha. Ā nāhaa, to suhtirore tjuwe na, tirore tuaro cjāha. Ā tuaro cjāa, mahano to yariaro cahachu waro duhuha tina tirore. ³¹Tí pjata sacerdote tí mahapu taha. Ā taro ti cjāriro cjirore nuparota maha pa buhusehe duhtu cahai do yuhdu wahcā, yuhdu wahaha. ³²Ā yoa Cohamacu wuhui dahrariro cūhu pjacuoriro cahai su, tirore nū, maha pa buhusehe coai do yuhdu wahcāa wahaha. ³³Ā yoa Samaria macariro sehe tói waha, yoa cureropu pjacuorirore nū, tirore pja nūha. ³⁴Ā pja nūno, tiro pjacuoriro cahai su, se, vino mehne morea core to camine pio sihōha. Pio sihō tuhsu suhtiro cahsaro mehne duhteha to camine. Tuhsu, pjacuorirore to burro bui duhu payo, carīni wuhupu na suha tirore. Tói jiro, Samaria macariro noano nū wihboha tirore. ³⁵Pa dachoi tiro carīni wuhu purore pua tu niñeru turire wa, ō sehe niha: “Ahrirore nū wihboga. Ahri mu suerachu pari turi tjua tacu wapa pahñoihtja”, niha Samaria macariro wuhu purore —niha Jesu.

³⁶Ā ni tuhsu judio masare buherirore ō sehe ni sinituha Jesu:

—¿Ahrina tiaro mua diro sehe jijari pjacuorirore cahīriro? —niha Jesu.

³⁷To ā nichu tuhoro buheriro sehe Jesure ō sehe ni yuhtiha:

—Pjacuorirore yoadohoriro jica tirore cahīriro —niha tiro Jesure.

—Wahaga. Muhu cūhu masare tó seheta yoi wahaga —niha Jesu buherirore.

Marta, María cūhu cahai Jesu tiniha

³⁸Ā yoa Jesu to buheina mehne ti wahachu, pa macapu ti tinichu, Marta wama tiricoro tinare to wuhui sāa ta dutiha. ³⁹To bahoro María to dahpori

cahai duji, to buheare tuhoha. ⁴⁰To ã yochu ñño Marta to dahraa pjíro jichu suaha. Ñ jiro ticoro Jesure ò sehe ni sinituha:

—Puhtoro, ¿yuhu cūcoro yu dahrachu yuhure yu baho to yoadohoerachu muhure noajari, mu ñuchu? Ticorore yuhure yoadoho dutiga —niha Marta Jesure.

⁴¹To ã nichu Jesu ò sehe ni yuhtiha:

—Marta, dahraa pjíro cjuaco pjíro tuhutura muhu. ⁴²Cohamacu to yare tuho dutira. Marfa noare yoaro taro tíre cahmahre. Ñ jicu yuhure to tuhochu “Dahradohoco wahaga”, nieraja ticorore —niha Jesu Martare.

Jesu Cohamacure siniare buheha

(Mt 6.9-15; 7.7-11)

11 ¹Cū dacho Jesu Cohamacure sinino niha. To sini tuhsuchu, cūiro to buheina mehne macariro tirore ò sehe niha:

—Puhtoro, João to buheinare to buheriro seheta Cohamacure siniare sã cūhure buhega muhu —niha tiro Jesure.

²To ã nichu tuhoro Jesu tinare ò sehe ni yahuha:

—Ò sehe ni Cohamacure siniga:

“Sã Pucu, muhu ñaa marieriro ã jirucura.

Mipure jiphtina bui puhtoro jiga.

³Ñ yoa dachoripe sã chuhtire warucuga sãre.

⁴Paina sãre ti ñano yoarire sã boja.

Ñ jicu muhu cūhu sã ñaa yoarire boga.

Tuhsu, sã ñaare yoa duana sã goa pjachu ñucu tíre sãre yoa duaerachu yoaga”,

ni siniga Cohamacure —niha Jesu tinare.

⁵Baharo Jesu quti mehne to buheinare ò sehe ni buheha:

—Cūiro ñami dacho macai to coyeiro ya wuhupu waha, tirore ò sehe ni siniha: “Coyeiro tia curi pão curi waga yuhure. ⁶Pairu yu coyeiro tinino tariro michapucacāta ya wuhui wihihre. Ñ yoa tirore yu chua waboa mariahna”, niha tiro to coyeirore. ⁷To ã nichu to coyeiro wuhu puhichapu jiro yuhtiha: “Yuhure cariboi tjiga. Sopa pahma bihariro jira. Yuhu yu pohna mehne carina nija. Wahcāno pjaeraca yuhure. Muhure chuare waboricu jieraja”, niha to coyeiro. ⁸¿Dohse waharohcari sinirirore? Potocā niita nija musare. To coyeiro jiparota, chua waboriro wahcā duaeraha. Wahcā duaeraparota chua siniriro sehe buo tiro marieno to yari pja sinirucuchu tuhoro jiphtia to siniriro seheta warohca. ⁹Ñ jicu ahrire musare ni yahui nija: Cohamacure siniga. Ñ sinina musa sinirire ñahanahca. Musa sinirire bocanahca. Tirore ã sinirucuga. Musa ã yochu tiro musare warohca. ¹⁰Jiphtina Cohamacure siniina ti sinirire naahca. Ñ yoa ti sinirire bocaahca. Ñ jiro jiphtina Cohamacure ã sinirucuinare tiro tinare warohca.

¹¹¿Musa pohna musare wahire ti sinichu agā sehere wabocari musa tinare?

¹²¿Musa pohna caraca diecare ti sinichu pichōno soro sehere wabocari musa tinare? Ne wasi. ¹³Musa ñaina jipanahta musa pohmare noare wa masina musa. Ñ yoa Cohamacu sehe musa wari yuhdoro noare wara musare. Tiro mari Pucu muano macariro to Espiritu Santore warohca tirore siniinare —niha Jesu to buheinare.

“Jesu watīno tuaare cjuara”, ni yahusāha masa

(Mt 12.22-30; Mr 3.19-27)

¹⁴Tí pjare Jesu watīnore cohā wioro niha. Watīno sehe durucu masierariro jichu yoaha masunore. Ā jiro watīno masunore to duhuri baharo masuno sehe durucu dūcaha. To durucuchū tuhoa masa payu cūaa wahaha. ¹⁵Ti ā cuapachuta paina sehe ō sehe niha:

—Ahrīro Jesu watīare to cohā wiochū Beelzebú wama tiriro watīa puhtoro sehe tirore yoadohora —niha paina.

¹⁶Paina “¿Jesu Cohamacu to warocariro jijari?” ni masi duaa tirore Cohamacu tuaa mehne yoa ño dutimaha. ¹⁷Ti ā dutichū tūhoro “Watīno tuaa mehne watīare cohā wiora”, ni ti tuhotuare masino, tinare ō sehe ni yahuha Jesu:

—Watīno ya tuaa mehne watīare cohā wioi nieraja. Cū maca macaina ti basi cahma wajāa, tí maca macaina yaria pihtia wahara. Ā jia cū wūhū macaina ti basi cahmachea, tí wūhū macaina waha pihtia wahara. ¹⁸Ā yoa watīno yaina watīa ti basi cahmachea, tina watīa cūhū waha pihtia wahaboa. Cū curua ji masieraboa. Mūsa yūhure ō sehe nina. “Tiro watīno tuaa mehne watīare cohā wiora”, mūsa yūhure nina nica. ¹⁹¿Yūhure mūsa niri potocā jichū mūsa mehne macaina watīare cohā wioa, watīno tuaa mehnetā cohā wiojari tina cūhū, mūsa ñūchū? Mūsa mehne macaina watīare cohā wioa, watīno tuaa mehne cohā wioa nierara. Ahrire masina watīno to tuaa mehne watīare yū cohā wioerachū masinahca mūsa. ²⁰Ā jicu yūhū sehe watīare cohā wiocu Cohamacu tuaa mehne cohā wioja. Ahrire masina, Cohamacu mūsa puhtoro to noano suho ji dūcaare masinahca mūsa.

²¹Tuarīro to wamoa mehne to wūhure to ñū wihbochū to yare paina na masierara. ²²To ā ñū wihbopachuta pairo tua yūhduriro tiro mehne cahmache, tirore yūhdurūca, to wamoare manoca, to yare manocahna. (Ō sehetā yoa yūhdurūcaro cahmana watīare.) ²³Cūiro yūhure cahmaeraro, yūhure ñū tuhtiriro jira. Cūiro yūhure yoadohoeraro yūhure ñano yoaro nina —ni buheha Jesu.

Watīno pari turi masunore to sāari quitire yahuha Jesu

(Mt 12.43-45)

²⁴Ā yoa to tuhotua mehne ō sehe ni piti dahre buheha tinare:

—Watīno masunore duhuro tiro co marieni yahpai tinino, to sohto cjih-tore macamaha. Bocaeraro, ō sehe ni tuhotuha: “Masuno yū duhuriro mehne pari turi jii wahaihtja”, ni tuhotuha tiro. ²⁵Ā nino tiro tjuā waha, masunore boca. Ā to bocachū masuno sehe noariro jimaha. ²⁶Tuhsu, watīno paina siete watīare tiro bui ñaa yūhdūinare nano wahaha. Na wihi, tina jipihtina watīa masuno mehne jiha. Ā jiro masuno sehe tó pano cūiro watīnore cjuaro, ñariro jimaha. Mipū sehere payu watīa ti cohtotariro jiro, tó pano to jiriro yūhdoro ña yūhduariro jiha —niha Jesu.

Jesu wahcheare yahuha

²⁷Tīre to ā nichū masa watoi jiricoro numino Jesure ō sehe ni yahuha:

—Mūhure pohna tiricoro, mūhure pūricoro wahchericoro jira —niha Jesure.

²⁸ To ā ni tuhsuchū tuhorō Jesu tiorore ō sehe ni yuhtiha:

—Cohamacū durucuare tuhoina to dutiare yoaina tina tjica wahcheina
—niha Jesu tiorore.

Masa naina Jesure Cohamacū tuaa mehne yoa ño dutiha

(Mt 12.38-42; Mr 8.12)

²⁹ Ā yoa payū masa Jesu cahai ti wihichū, tiro tinare ō sehe ni yahu namoha:

—Mipū macaina nu naina jira. Cohamacū tuaa mehne yū yoa ñochū ñū duamana. Ti ā ñū duapachūta Jona panopū macariro Cohamacū tuaa mehne to yoi dihtare ñonohca Cohamacū tinare. ³⁰ Jona Cohamacū yare yahu muhtariro jiro, tiro Nínive macainare Cohamacū yare to masichū yoiro sehta yūhu masuno Cohamacū warocariro masichū yojā mipū macainare. ³¹ Buhiri dahrehti dacho jichū puhtorocoro sur macaricoro panopū macaricoro ducu, mipū macainare “Naina jira”, ni yahusānohca ticoro. Ticoro Salomo panopū macariro to masiare tuho duaro yoropū ahri yahpa pa sehepū jiricoro Salomoro tuhorō taha. Ā yoro noano yoro niha mipū macaina yūhdoro. Ā jiro ticoro yahusānohca mipū macainare. Ā nicū musare potocā niita nija. Mipū musare yū buhea Salomo to buheri yūhdoro jira. ³² Buhiri dahrehti dacho jichū Nínive macaina cūhū ducu, mipū macainare “Naina jira”, ni yahusāahca tina. Jona tinare Cohamacū yare to yahuchū tuhoa, ti ñaare tuhotumarire tuhotu cohtota Cohamacūre cahmaha tina sehe. Ā cahmaa noano yoa niha mipū macaina yūhdoro. Ā jia tina cūhū mipū macainare “Naina jira”, ni yahusāahca. Musare potocā niita nija. Mipū musare yū buhea Jona to buheri yūhdoro jira —ni yahuha Jesu.

Masa ti tuhoturo sehta yoara

(Mt 5.15; 6.22-23)

³³ Ā ni yahu tuhsū, piti dahre buhero ō sehe ni yahu namoha tinare:

—Masa sihāiare sihāa nūoerara. Tiare sihāa dihi biato docapū duhu dapoerara. Tiare muanoi duhu payora wuhupū sāa taina ti noano ñū sāahto sehe. ³⁴ Sihāria to noano buhriachū mari noano ñū masino sehta noaare tuhotua mehne noaare yoa masinahca msa. Msa tuhoturo sehta yoara msa. Noaare tuhotuna noaare yoara msa. Noaare tuhotuerana ñaare yoara msa. ³⁵ Ā jina noano yoaga. Msa tuhotuapū ñaa jiero tjijaro. Ñaare goa pjaena tjiga. ³⁶ Tuhsū msa tuhotuapū noaa jichū, ñaa ne mariachū noaa dihtare tuhotunahca —ni buheha Jesu.

Fariseo curua macaina, judio masare buheina cūhure Jesu tuhtiha

(Mt 23.1-36; Mr 12.38-40; Lc 20.45-47)

³⁷ Jesu to buhe tuhsuchū ñū fariseo curua macariro tirore to ya wuhupū chū dutiro pjiha. Ā jiro Jesu tiro ya wuhupū sāa sū, ti chūroi tina mehne nuju suha. ³⁸ To ā nuju suchū fariseo curua macariro sehe Jesure ñū nūnūno judio masa ti wamo cosarucuro sehta to wamo cosaerachū ñūno ō sehe ni tuhotuha: “Cuenah. ¿Ahriri dohsearo wamo cosaerajari mari yoro sehe?” ni tuhotuha. ³⁹ To ā ni tuhotuchū masino Jesu tirore ō sehe ni yahuha:

—Msa fariseo curua macaina sihnia wahwarire, wapari cūhure bui sehe dihtare msa cosaro sehta noaare yoa ñona msa buicā warohna. Ā

yoapanahtha Cohamacu yare quihōno yoaerara. Paina yare maina jina, ñaa dihtare tuhotura musa. ⁴⁰Tuho masieraina jira musa. Cohamacu musa pjacurire yoiriro musa tuhotuhti cūhure yoaha. ¿Tíre masierajari musa? ⁴¹Á jina musa yare pjacuoinare waga musa. Musa ã yoana noaare tuhotuina jinahca.

⁴²Musa fariseo curua macaina ñano yuhdunahca. Moa yoaro sehe jiare chuare coachu yoare cjuana mahanocã wamana musa. Cohamacure ño payona tana sacerdoteare wamana musa. Á wapanahtha noaare yoaerara musa. Á jina masare pja ñuerara musa. Á yoa Cohamacure ño payoerara musa. Toaa dichacãre musa narire mahanocã Cohamacure musa wachu noa nina. Á wana õ sehe yoa namoga: Noaare yoaga. Á yoa pja ñuga musa masare. Tuhsu, Cohamacure ño payoga musa.

⁴³Musa fariseo curua macaina ñano yuhdunahca. Buheri wuhupu jina, noa dujia dihtare duji duara musa. Pache duaropu masa musare puhtoare noano ño payo ti sinino sehe ti piti bocasinichu cahmana musa.

⁴⁴Ñano yuhdunahca musa. Masa copa nuori copa yoaro sehetá jira musa. Tí copa cahai masa jia, puhicha macariro baarirore ñuerara tina. Tó sehetá masa musa cahai jia, musa tuhotuapu ñaa jiare masierara tina —niha Jesu tinare.

⁴⁵To ã nichu tuhoro judio masare buheina mehne macariro Jesure õ sehe ni yahuha:

—Buheriro, tíre nicu sã cūhure ñano nii nica muhu —niha tiro Jesure.

⁴⁶To ã nichu Jesu õ sehe ni yuhtiha:

—Potocã tjira. Judio masare buheina musa cūhu ñano yuhdunahca. Musa painare ti bihoeraare yoa dutira tinare. Á dutipanahta musa sehe tinare ne mahanocã yoadohoerara tí dutiare ti yoahto sehe.

⁴⁷Á jina musa ñano yuhdunahca. Cohamacu yare yahu muhtaina panopu macaina ti masa coparire noano cahnomana musa tinare ño payoro sehe yoana. Musa ã yoapachuta panopu macaina musa coyea sehe tinare wajāha.

⁴⁸Tina sehe Cohamacu yare yahu muhtaina cjirire ti wajāriro sehetá musa cūhu yoaboa. Á jina mipure ti masa coparire cahnomana musa. Á cahnona musa coyea tinare ti wajāri cjirire wacū bajuro wana nica musa. Á ti wajārire wacūna “Noa nina”, nina nica musa.

⁴⁹Cohamacu to masia mehne õ sehe ni yahuha: “Yu yare yahu muhtaina cūhure yu buhe duti cūrina cūhure warocaihtja tinare. Á jia tina yu warocainare painare wajā, painare ñano yoaahca”, niha Cohamacu. ⁵⁰⁻⁵¹Ahri yahpare Cohamacu to bajuamehneri baharo Caí sehe Aberé wajāha. Tuhsu, Cohamacu yare yahu muhtaina cjirire Abe baharo jiina cūhure ñaina wajāha. Baharo Zacariare Cohamacu wuhui Cohamacure ño payori mesa cahai musa coyeata wajāha. Jipihtina tinare ti wajāri buhiri mipu macainare Cohamacu buhiri dahrerohca. Á tjira. Musareta nii nija. Jipihtina tinare ti wajāri buhirire mipu macainare Cohamacu buhiri dahrerohca.

⁵²Musa judio masare buheina, ñano yuhdunahca. Cohamacu masiare ti joa pūrine cjuapanahtha painare yahuerara musa. Musa basi Cohamacu yare tuhoerara. Tuhsu, paina to yare ti tuho duapachuta tíre musa tinare tuho dutierara —niha Jesu tinare.

⁵³⁻⁵⁴To ã nichu tuhoa judio masare buheina fariseo curua macaina cūhu tiro mehne sua tirore ñano ni durucuha. Á jia Jesu to ñano ni yuhtichu tuho duaa, tina payu mahño cū sinitu ñumaha tirore, tirore yahusā duaa.

Fariseo curua macaina ti ã mahñorucurire Jesu yahuha

12 ¹ Ñ yoa Jesu cahai masa payu cahmachua, bihsa yuhduaha. Tói Jesu to buheinare ò sehe ni yahu ducaha:

—Noano wacū masiga musa. Fariseo curua macaina ti pāo bucuarore ñana noano wacū masiga. Ti mahñorucurire nii nija “Pāo bucuaro”, nicu. ² Jipihitia ñaare paina ti masierari cjirire baharo masiahca. ³ Ñ yoa ñamipure ti pjiroca durucuri cjirire buhriaroi to bajuro waro seheta masiahca jipihitina. Bihari tahtiapu pairore yaro ca ti nimari cjirire masa payu masiahca —ni yahuha Jesu.

Masa ti cuihtirore yahuha Jesu

(Mt 10.28-31)

⁴ Ñ ni tuhsu Jesu ò sehe ni yahu namoha tinare:

—Potocā niita nija musare. Masa wajaina wajā tuhsu pari turi ti wajarina cjirire ñano yoa namo masierara. Ñ jina musare wajā duainare cuiena tjiga. ⁵ Mipure musa cuihtirore musa ño payohtirore yahuihtja. Cohamacu sehere cui, ño payoga. Tiro musa yariari baharo pichacapu cohā masina musare. Ñ tjira. Potocā nii nija. Cohamacu sehere cui, ño payoga.

⁶ Cinco siripia wapa mariaha. Ti ñ wapa mariapachuta cūirocāre Cohamacu ne boerara. ⁷ Ñ yoa musa pjoarire ne cū pjoa da dūhsaro marieno masi pahñona Cohamacu. Tó seheta musa jia tia cūhure masi pahñona Cohamacu. Ñ masino musare ñu wihborucura. Siripiare to cahño yuhdoro musa sehere cahña Cohamacu. Ñ jina tirore ño payona cuiena tjiga musa —niha Jesu.

Jesu yaina musa jiare yahuga masare

(Mt 10.32-33; 12.32; 10.19-20)

⁸ Ñ yoa Jesu ò sehe ni yahu namoha:

—Musare niita nija. Cūiro “Jesu yairo jija”, masare to nichu ñucu, yuhu masuno Cohamacu warocariro “Tiro yu yairo jira”, ni yahuihtja Cohamacu yaina anjoare. ⁹ Cūiro “Jesu yairo jija”, masare nierariro sehere yuhu “Tiro yu yairo jierara”, ni yahuihtja Cohamacu yaina anjoare.

¹⁰ Cūiro yuhure ñano to ni durucuchu tí ñaa buhirire Cohamacu bo masina. Ñ boparota cūiro Espiritu Santo sehere to ñano ni durucuchu tí ñaa buhirire ne Cohamacu bosi.

¹¹ Mari judio masa buheri wuhupu puhtoa cahai paina musare na sãa yahusãahca. Ti ñ yahusãhu musa ni ducatahti cjihtire “Cue, masieraboca”, ni tuhoutuena tjiga. ¹² Tí pjaihta Espiritu Santo musa yahuhti cjihtire yahurohca —niha Jesu.

Pache puro quitire yahuha Jesu

¹³ Ñ yoa masa mehne macariro Jesure ò sehe ni yahuha:

—Buheriro, sã pucu to yariari baharo to ya cjiri sãre tjuara. Ñ jicu yu wahmine tře yuhu cūhure quihño tju wa dutiga —niha tiro Jesure.

¹⁴ To ñ nichu Jesu ò sehe ni yuhtia:

—Ne tí barore tju waboricu jieraja yuhu —niha Jesu tirore.

¹⁵ Ñ ni tuhsu Jesu jipihitinare ò sehe ni yahuha:

—Noano yoaga musa. Pachere, paye baro cūhure cahēna tjiga. Payu cjuapanahita tí mehneta wahche tuhsueraja mari —niha Jesu.

¹⁶ Ā ni tuhsu Jesu quiti mehne ō sehe ni yahuha tinare:

—Pache puro noari yahpare cjuaha. Ā jia tí yahpau to toaa noano dicha tiha. ¹⁷ Ā jiro tiro to basi ō sehe ni tuhotumaha: “Dicha wihboa wuhuse ne mu suerara. ¹⁸ Mipure ō sehe yoaihtja: Mipu yu wihboa wuhusere cohānoca, muna wuhuse cjiri yuhdoro wahma wuhuse yoaihtja. Tí wuhusei yu toaa dichare, jipihtiare yu yare wihboihtja. ¹⁹ Yu ā yoari baharo, ō sehe ni tuhotuihtja yu basi: ‘Yuhu jiape cjuariro jija. Noano soihtja. Ā jicu chu, sihni, wahcheihtja’, ni tuhotuihtja yu basi”, ni tuhotumaha tiro. ²⁰ To ā ni tuhotuchu Cohamacu tirore ō sehe ni yahuha: “Muhu ne tuho masierariro jira. Micha nāmiihta muhu yariaihca. Mu ā wahachu mu ya mu cahiri butia wahaahca”, niha Cohamacu tirore —niha Jesu masare.

²¹ Tíre nino, masare ō sehe ni yahuha Jesu:

—Āta wahaahca pache pua Cohamacure wacūeraina. Payu pachere, niñerure to ya cjihti dihtare wihboriro, Cohamacure wacūeraro tiro pjacuroro jirohca, Cohamacu to nūchu. Ā jiro Cohamacu tirore nū jicoaerara —niha Jesu.

Cohamacu to pohnare nū wihbora

(Mt 6.25-34)

²² Ā yoa Jesu to buheinare ō sehe ni yahuha:

—Ahrire musare nii nija: Musa chuhti cjihtire, musa suhti sāahtire pjíro cahya tuhotuena tjiga. ²³ Cohamacu musare bajuamehneno, chuhtina cjihti dihtare yoeraha musare. Tuhsu, suhti sāahtina cjihti dihtare yoeraha tiro musare. ²⁴ Minichahca perire Cohamacu to nū wihboare masiga. Tina weseri maeraina jira. Ā jia chuare ti wihboa wuhuse tinare mariahna. Tí ā jiina jichu nūno tinare Cohamacu ti chuhtire wara. Minichahca yuhdoro musa sehere cahina Cohamacu. ²⁵ Pjíro musa tuhotua mehne cū hora waro musare cati namochu yoa masierara musa. Ā jiro musa pjíro tuhotua yaba cjihti jierara. ²⁶ ¿Ā yoa pjíro musa tuhotua ti yaba cjihti jierapachuta dohse yoana musa chuhtire, musa sihnihtire, musa sāahtire pjíro cahya tuhotujari?

²⁷ Macaroca macaa cohore tuhotuga. Tí cohoi ti basi suhtire yoerara. Ā yoerapahta noaa suhti tiina yoaro sehe noaa bajura tí cohoi. Salomo cjiro noaa suhtire sāariro to jipachuta tí cohoi sehe tiro yuhdoro noabiaa cohoi waro jira. ²⁸ Cohore noaa cohoi yoara Cohamacu sehe. To ā yoapachuta cohoi sehe mahaa dachoricā jirucuma nai boraa wahara. Mahanocā ji, pa dachoi pichacapu jūa wahara. Tí ā jipachuta cohore noaa cohoi jichu yoara Cohamacu. Ā jiro Cohamacu cohore to noaa cohoi to yoariro yuhdoro musa cūhure noano yoarohca. Suhtire warohca. Mahanocā Cohamacure wacū tuara musa. ²⁹ Ā jina musa chuhtire, musa sihnihtire pjíro cahya tuhotuena tjiga. ³⁰ Cohamacure cahmaeraina sehe ahri yahpa macaina sehe tíre ā macarucua nina. Mari Pucu muano macariro jipihtia musa cahmaare masina. To ā masichu pjíro cahya tuhotuena tjiga. ³¹ Cohamacu musa puhtoro to jihto cjihtore cahma muhtaga. Jipihtia paye baro yuhdoro tirore cahmaga musa. Musa ā yoari baharo Cohamacu sehe musa cahmaa duhsachu warohca —ni yahu namoha Jesu.

Muanopu mari payu cju masija*(Mt 6.19-21)*

³² Æ ni tuhsu, tinare ò sehe ni yahu namoha:

—Yu cahīina, mahainacā jipanahta, cuiena tjiga musa. Cohamacu musa puhtoro to noano suho jiropure tiro mehne musa jichu cahmana tiro. ³³ Æ jina musa yare dua pahñoga. Tíre duanoca tí niñerure na, pjacuoinare waga. Tó sehe musa yoachu muano macaa musa wapataa ne pihtisi. Muanopu musa ya jia ne pihtierara. Tópure musa yare na masierara yacariro. Æ yoa machu cūhu tíre tua masierara. ³⁴ Muanopu musa ya jichu muano macaa dihtare tuhutunahca musa —niha Jesu.

Jesu to tjua tahtore cohta dutiha to yainare

³⁵⁻³⁶ Æ ni tuhsu tinare ò sehe ni yahu namoha:

—Musa yare cahnouy tuhsuina yoaro sehe yu yare ã yoarucuina jina cohtaga yuhure. Dahra cohtaina ti puhtoro wamomaca duhteri bose numupu to wahachu to tjua tahtore tina cohtara. Tina ti ã cohtariro seheta yu tjua tahtore cohtaga musa cūhu. Puhtoro to wuhupu wihi, sopacare to dotachu tuhoa tina dóihta pjōo sōhna tirore. ³⁷ Dahra cohtaina ti puhtoro to wihihu to cahmano seheta yoarucuina jia, wahcheina jiahca. Ti ã yoachu ñuno puhtoro sehe dahra cohtariro yoaro sehe cohtotarohca. Æ yoaro dahra cohtainare duji dutiro, tiro ti chuare duhu payorohca. ³⁸ Tiro to wihihti pja ñami dacho macapū, o bohrearopu to jipachuta dahra cohtaina sehe to wihihti pjare tirore noano cohtaina jia, wahcheina jiahca tina. ³⁹ Ahrire wacūga musa. Yacariro wuhupu to wihihto pano tí wuhu puro masierara. Wuhu puro yacariro to wihihtore masino, tiro yacarirore sãa dutieraboa. Æ jiro wacūenoca tara yacariro. ⁴⁰ Æ jina musa cūhu cohtaga. Yuhu masuno Cohamacu warocariro wacūenoca taihca. Æ jina yu yare ã yoarucuina jina cohtaga musa —niha Jesu tinare.

Dahra cohtariro to puhtoro ño payorirore, ño payoerariro cūhure yahuha*(Mt 24.45-51)*

⁴¹ To ã nichu Pedro sehe ò sehe ni sinituha Jesure:

—¿Ahri quitire yahucu sãre nii nijari? ¿O jipihtinare ã nii nijari? —niha Pedro.

⁴² To ã nichu Jesu to tuhutua mehne ò sehe ni piti dahre buheha tinare:

—Dahra cohtariro to puhtoro ño payoriro tuho masiriro ò seheta jira. Puhtoro tinino waharo, dahra cohtarirore to wuhure cūna. To cūriro sehe dutiriro jirohca. Æ jiro tiro churi pja jichu paina dahra cohtainare chuare witira. ⁴³ Baharo puhtoro to wihihu dahra cohtariro sehe to puhtoro to dutiriro seheta yoa pahñoriro jiro, tiro wahcheriro jirohca. ⁴⁴ Potocā niita nija musare. To ã yoachu to puhtoro jipihtia to yare ñu wihboriro cūnohca tirore. ⁴⁵ To ã cūpachuta dahra cohtariro “Yu puhtoro yoari pja bajuerara”, niboca. Æ nino paina dahra cohtainare muare, numia cūhure cjāpe, payu chu, sihni, cahaboca. ⁴⁶ To ã yoari baharo wacūenoca to puhtoro wihirohca. Æ wihiro tirore ñano buhiri dahrerohca. Æ jiro Cohamacure yuhdurucainare to cohāriropu tirore cohānohca.

⁴⁷ Ñ yoa dahra cohtariro to puhtoro cahmaare masiro jiparota tíre to yoaerachu, tiro to noano dahraerachu to puhtoro sehe tirore yuta da mehne tuaro tjananohca. ⁴⁸ Pairo sehe dahra cohtariro to puhtoro cahmaare masierariro jiro to noano yoaerachu ñuno to puhtoro sehe pjiroca dero tirore tjananohca. Cohamacu to cahmaare masichu yoara masare. Ñ jiro masiriore yuhtiro cahmana. Tuhsu, noano masiriore noano yuhtiro cahmana —niha Jesu.

Jesu masare cahma tju wachu yoara

(Mt 10.34-36)

⁴⁹ Ñ ni tuhsu Jesu tinare ò sehe ni yahuha tjoa:

—Pichaca to jawero seheta yuhu ahri yahpapore Cohamacu tirore cahmae-rainare to buhiri dahrehtore tinare masichu yoai tai nii. Mipu pinihta tíre ti masichu tuaro cahmaja yuhu. ⁵⁰ Yuhu ñano yuhduihca. Yu ñ ñano yuhduhtire cohtacu, ñano yajeripohna tija yuhu. ⁵¹ ¿Dohse ni tuhotujari musa yuhure? “Tiro masare to buheri baharo paina tinare ñu tuhtisi”, ¿ni tuhotujari musa yuhure? Ñ jierara. Masare yu buheri baharo cáina yu yare tuhoahca. Paina sehe tinare ñu tuhtiahca. Cúno potori waro jisi masa. Musare nii nija. Masa yu buheare tuhoa, pua curua cahma tju waahca. ⁵² Mipure cū wuhu macaina cinco masa yu buheare tuhoa, pua curua ti basi cahma tju waahca. Cū curua tiaro, pa curua puaro jiahca. ⁵³ To pucuro to macunore ñu tuhtirohca yu yairo to jiri buhiri. Tuhsu, paio macuno cūhu to pucurore ñu tuhtirohca to pucuro yu yairo to jiri buhiri. Ñ yoa to pocoro to maconore ñu tuhtirohca yu yacoro to jiri buhiri. Tuhsu, pacoro macono cūhu to pocoro ñu tuhtirohca to pocoro yu yacoro to jiri buhiri. Ñ yoa to marechono to macu namonore ñu tuhtirohca yu yacoro to jiri buhiri. Tuhsu, pacoro macu namono cūhu to marechonore ñu tuhtirohca yu yacoro to jiri buhiri. Ñta waharohca, yu buheare ti tuhochu —niha Jesu.

Noari dacho cjihtore, ñari dacho cjihtore masa ti masiare yahuha Jesu

(Mt 16.1-4; Mr 8.11-13)

⁵⁴ Ñ yoa Jesu masare ò sehe ni yahuha tjoa:

—Ahrie sehəpu coro siterire ñuna, dóihta “Coro tarohca”, nina musa. Musa ñ niri baharo coro tara. ⁵⁵ Ñ yoa surpu wiñnono tachu “Siri dacho jirohca”, nina musa ahri yahpai jiina. Musa ñ niri baharo dacho sira. ⁵⁶ Musa mahño-perucuina jira. Musa ahri yahpare muano cūhure ñuna, noari dacho cjihtore, ñari dacho cjihto cūhure masina musa. ¿Ñ jina mipu macaa dachorire masipanahta dohseana ahri yahpa macaina mipure musa dohse wahahtore masierajari musa? —niha Jesu.

Musare ñu tuhtiro mehe musa cahmacherire cahma pjāga

(Mt 5.25-26)

⁵⁷ Ñ ni tuhsu ò sehe ni yahu namoha:

—¿Muhu quihōno mu yoahire masierajari muhu mipu? ⁵⁸ Pairo muhure yahusāno waharo buhiri dahre dutiri wuhupū waha dutiboca. Tōpu wahana “Pari turi muhure ñ yoasi”, nicu cahma pjāga. Mu ñ cahma pjāerachu tiro buhiri dahre dutiro cahapu naaboca muhure. Tuhsu, buhiri dahre dutiro

sehe mūhure surarare to wachū, mūhure surara peresu yoaahca. ⁵⁹Mūhure nii nija. Tópū jisiniihca mūhū. Pū ti wapa dutirire mū wapa pahñoipū wijaaihca mūhū —niha Jesu.

“Noaina jija”, ni mūsa tūhotumarine tūhotu cohtota, Cohamacure cahmaga

13 ¹Tí pjare mahainacā masa Jesure ō sehe ni yahua tiha: —Galilea macaina wahiquirore wajā jū mūo Cohamacure ti ño payoro watoi Pilato sehe tinare wajāha. To ā wajāchū wahiquiro di mehne masa di moreha —ni yahua tina Jesure.

²Ti ā ni yahu tuhsuchū Jesu ō sehe ni yahua:

—¿Galilea macaina Pilato to wajārina cjirire dohse ni tūhotujari mūsa? ¿Ti ā yariachū paina Galilea macaina yūhdoro ñaina ti jiri buhiri ā yoa dutiri Cohamacu tinare, mūsa tūhotuchū? ³Jierara. Musare niita nija. Mūsa sehe “Noaina jija” ni, mūsa tūhotumari cjirire tūhotu cohtotaerana, Cohamacure cahmaerana, mūsa cūhū yariana pichacapū wahanahca. ⁴Ā yoa sohō jirina diez y ocho masa Siloé wama tiri wūhū mūari wūhū ti bui bora pja wajā pahñoa. ¿Ā waha yariaa, paina Jerusalē macaina yūhdoro ñaina jiri tina, mūsa tūhotuchū? ⁵Jierara. Musare niita nija. Mūsa ñaa tūhotumari cjirire tūhotu cohtotaerana, Cohamacure macaerana, mūsa cūhū yarianahca. Ā jina pichacapū wahanahca —niha Jesu tinare.

Higueracu dicha mariedu quitire yahua Jesu

⁶Ā ni tuhsu quti mehne piti dahre yahua tinare:

—Wese puro to wesepū higueracure cjuaha. Ā jiro tiro tu dichare macano wamahana. Bocaeraha. ⁷Bocaeraro tiro wese dahrarirore yahua. “Tūhoga yūhure. Tia cūhma waro higueracu dichare macamaja. Dicha mariahna. Tū dicha mariachū ture cjā cohānocahga. Tū yū wesei jichū padure yūhū toa masieraja. Yū wesei jiri yahpa macaare wiho waro nana tū”, niha wese puro tirore dahra cohtarirore. ⁸To ā nichū tūhoro dahra cohtariro ō sehe niha: “Pūhtoro, ahdu cū cūhma waro ducusinijaro. Tū dahpotoi yūhū sahahitja. Tuhsu, wahiquiro tū mehne tí copare yaihtja. ⁹Yū ā yoari baharo tū pa cūhmai dicha tiboca. Tū dicha tierachū mūhū cjā cohā dutiiahca”, niha dahra cohtariro wese pūrore —ni yahua Jesu.

Sabado dachoi Jesu dohatiricorore noaricoro wahachu yoaha

¹⁰Tí pjare Sabado dachoi Jesu judio masa buheri wūhū buhero niha. ¹¹Tói watīno to cohtotaricoro jiha. Watīno sehe diez y ocho cūhmari waro dohatichū yoaha ticorore. Ā jiro pari muti ducuricoro jiro, poto ducu masieraha.

¹²To ā jichū ñūno Jesu ticorore ñū, ō sehe ni pisuha:

—Numino, mū dohatia pihtia wahahre —ni pisuha Jesu.

¹³To ā pisuri baharo ticorore to ña payochū dóihta ticoro noano poto ducuricoro wahaha. Ā waharo “Cohamacu tuariro, noariro jira”, ni ño payoha ticoro.

¹⁴Jesu ticorore Sabado dachoi to noaricoro yoachū ñūno judio masa buheri wūhū pūhtoro sehe tiro mehne suaha. Ā suaro tiro masare ō sehe niha:

—Seis dachori jira mari dahraa dachori. Ā jina mūsa dohatiinare noaina wahachū yoa duana, tí dachorire tíre yoaga. Sabado dachore mari sori dachore tíre yoaena tjiaga —niha wūhū pūhtoro.

¹⁵To ã nichu Jesu õ sehe ni yuhtiha:

—Musa ã mahñorucuina jira. Musa wachure, burro cühure cjuana Sabado dachoi ti duhteri dare pjã, tinare na buha, sihni dutiboa. ¹⁶Mipu ahricorore Abrahã cjiro coyeacorore watino diez y ocho cühmari waro ticorore dohatichu yohare. ¿Sabado dachoi ticorore noaricoro wahachu yoa dutierajari musa? —niha Jesu.

¹⁷To ã nichu tuhoa, tina buoro wahaha. ã jia paina sehe jipihtina Jesu yoirire ñua, wahcheha.

Mostaza yapa quitire yahuha Jesu

(Mt 13.31-32; Mr 4.30-32)

¹⁸ã yoa Jesu quitu mehne piti dahre buheha masare:

—¿Ne Cohamacu masa bui puhtoro to noano suho jia yaba baro yoaro sehe jijari, musa tuhotuchu? Ahri quitu mehne tire puhtoro to suho jiare yahuihtja yuhu. ¹⁹Mostaza yapacã yoaro sehe jira. Tí yapacãre toari masuno to wesei toaha. To toari baharo tí yapacã duha. ã jia tu bucuachu minichahca peri tu dupuripu suhti suhaha. (Tó seheta muano macariorore mari puhtorore masiina mahainacã ti ji muhtapachuta baharopu tina payu wahaahca) —niha Jesu.

Pão bucuaro quitire yahuha Jesu

(Mt 13.33)

²⁰ã ni tuhsu, pari turi Jesu õ sehe ni piti dahre buheha:

—¿Ne Cohamacu masa bui puhtoro to noano suho jia yaba baro yoaro sehe jijari, musa tuhotuchu? ²¹Pão bucuaro yoaro sehe jira. Tíre numino cū wajuru trigore co mehne noano tíre dahra morena pão bucuahcore. To ã yoachu pão bucuaro sehe trigore noano sahserucu sura. (To sahserucu suro seheta muano macariorore mari puhtorore payu masa masiahca) —niha Jesu.

Mahari sopacacã quitire yahuha Jesu

(Mt 7.13-14, 21-23)

²²ã yoa Jesu bujua macaripu, daa macaricãpu cühure buhe wahcã, Jerusalẽpu suro taro niha. ²³To ã waharo watoi cūiro Jesure õ sehe ni sinituha:

—Puhtoro, ¿mahainacã masare pichacapu wahaborinare yuhdorohcari Cohamacu? —ni sinituha tiro Jesure.

To ã nichu Jesu piti dahre buhero õ sehe ni yahuha:

²⁴—Payu masa Cohamacu cahapu waha duaa, sãa duamana. Mahari sopacacãre masa sãa duachu mijo curera. Tó seheta Cohamacu cahapu masa waha duachu mijo nina. Masa ã sãa duapahta sãa masierara. ã jina musa sehe mahari sopacacãre musa tuaro sãa duaboro seheta Cohamacu sehere tuaro masiga. ²⁵Õ sehe yorohca Cohamacu payu masare. Tiro wuhu puro yoaro sehe jira. Wuhu puro wahcã, sopacacãre biharohca. To ã yoachu sopacacãpu ducuna, sopa pahmare dotanahca. ã dotana õ sehe ninahca: “Puhtoro, sopa pahmare pjõohga”, musa nichu wuhu puro sehe õ sehe ni yuhtirohca. “Masare ne masieraja yuhu. Nohoi musa tariro cühure masieraja”, ni yuhtirohca. ²⁶To ã nichu musa õ sehe ni yuhtinahca: “Muhu mehne sã chu, sihnihi. Sã ya macai buhere muhu”, ninahca musa. ²⁷Musa ã nichu tiro

sehe ō sehe ni yuhtirohca: “Musare ne masieraja. Nohoi musa tariro cūhure masieraja. Jipihtina musa űaa buhiri tiina yū cahai taena tjiga”, ninohca wūhū puro. ²⁸ Ā yoa Abrahā cjirore, Isaa cjirore, Jacobo cjirore, jipihtina Cohamacū yare yahu muhtaina cjiire Cohamacū masare puhtoro to noano suho jirore ti jichū űuna, musa sehe sopacapū cohārina jina tuaro tiinahca. Ā tiina jina, musa tuaro cahyaro mehne piri bahca dihonahca. ²⁹ Tí pjare jipih-tiro macaina puhtoro Cohamacū to noano suho jiropure sū, tiro mehne chu dujahca. ³⁰ Mipure wiho jiina jirina cjiri tí pjare puhtoa jiahca. Ā jia mipure puhtoa jirina cjiri tí pjare wiho jiina jiahca —niha Jesu.

Jerusalē macainare tuaro cahīha Jesu

(Mt 23.37-39)

³¹ Tí pjare mahainacā fariseo curua macaina Jesu cahapū sua, tirore ō sehe ni yahuha:

—Herode muhure wajā duara. Ā jicū pa sehepū wahaga muhū —niha tina tirore.

³² Tí ā nichū Jesu sehe ō sehe ni yuhtiha:

—Herode mahñoa payuriro jira tiro. Ō sehe ni yahuga tirore: “Jesu watīare cohā wioro nina. Tuhsū, dohatiinare noaina wahachū yoaro nina. Tīre michare, űamichaca cūhure yorohca. űamichaca bohrearo dahra batoarohca”, ni yahuga Herodere. ³³ Ā jicū michare waha, űamichaca cūhure waha, űamichaca bohrearo cūhure waha, Jerusalēpū suiha. Cohamacū yare yahu muhtarirore yuhure wajāahca masa. Cohamacū yare yahu muhtainare ti wajāchū Jerusalēpū jiro cahmana tinare. Ā jicū yuhū cūhure Jerusalēpū jiro cahmana.

³⁴ Cue Jerusalē macaina. Musa Cohamacū yare yahu muhtaina cjiire wajā, musa cahai to warocainare taa mehne doca wajāre musa. Musa coyea panopū macaina cūhū āta yoarina cjiri jiha. Caracacoro to pohnare to cājapū dupuri mehne to moha coāno seheta payū tahari musare cahīrucumahi. Musare cahma-mahi. Musa sehe yuhure ne cahmaerare. ³⁵ Mipure musa jiro cohāri maca jirohca. Potocā niita nija musare. Cohamacū mari puhtoro to tuaa mehne taihca yuhū. Yū ā tachū űuna musa yuhure “Cohamacū tuaa mehne tariro noajaro”, ninahca. Yuhure musa tīre nihto pano pari turi yuhure űusi musa —niha Jesu tinare.

Dohatirirore noariro wahachū yoaha Jesu

14 ¹ Pa dacho Sabado dacho jichū fariseo curua macaina puhtoa mehne macariro ya wuhupū Jesu churo wahaha. Tí wuhū jiina tiro dihtare űuroca ōha. ² Tí ā űuroca ōno watoi yachuri wipiri, űuchua wipiri tiro cahapū suha. ³ Ā jiro Jesu judio masare buheinare, fariseo curua macaina cūhure ō sehe ni sinituha:

—¿Sabado dachore dohatirirore noariro wahachū yoa dutijari Cohamacū yare ti joari pūi? —ni sinituha Jesu.

⁴ To ā ni sinitupachuta tina yuhtieraha. Ti yuhtierachū űuno Jesu dohati-rirore noariro wahachū yoa, “Wahaga”, niha tirore. ⁵ Ā yoa tuhsuro, tinare ō sehe ni sinituha tjoa:

—“¿Cūiro musa mehne macariro to macūno Sabado dachoi mari sori dachoi copapū to bora sāachū na wioerabocari?” musa ā nina. “¿To wachu cūhure na wioerabocari?” musa ā nina —niha Jesu.

⁶To ã nipachuta tina to sinituare yuhti masieraha tjoa.

Wamomaca duhteropu pjirocainare yahuha Jesu

⁷Fariseo curua macariro ya wuhui jiro tí wuhu macariro to pjirocaina noaa dujiare ti besechu ñuha Jesu. Æ ñu tuhsu õ sehe ni yahuha jipihtinare:

⁸—Wamomaca duhteri bese ñumui musare to pjirocachu, noaa dujiare bese dujiena tjiga. Musa yuhdoro cua pisainare pjirocaboca ahri wuhu puro. ⁹To ã yoachu musa noaa dujiai dujichu, “Ahrina cua pisainare musa dujiare waga”, niboca wuhu puro musare. To ã nichu musa sehe buo tina, ñaa dujiai dujiboca. ¹⁰Æ jina wuhu puro musare to pjirocachu, ñaa dujiai duji muhtaga. Musa ã yoachu wuhu puro musare “Noaa dujia sehere dujina taga”, ninohca musare tiro. Musa ã wahachu paina to pjirocaina sehe musare ño payoa mehne ñuahca. ¹¹Cüiro to basi “Puhtoro tjija”, ni tuhoturiro cahamacuno jirohca. Pairo “Cahamacuno jija”, ni tuhoturiro painare yuhduruca duaeriro tiro sehe puhtoro jirohca —niha Jesu tinare.

¹²Æ ni tuhsu Jesu wuhu purore õ sehe ni yahuha:

—Muhu bese ñumu dahrecu mu cahai jiinare, mu bahanare, mu coyeare, pache puare pjiecu tjiga. Mu tinare pjichu muhu cühure tina cühu pji cahmaahca tjoa. Æ pji cahmaa muhure ti wapamoare wapaahca. ¹³Muhu bese ñumu dahrecu pjacuoinare, tini masierainare, cü buhusehe dahporo dojori tiinare, capari ñuerainare pjirocaga. ¹⁴Mu ã yoachu ñuno Cohamacu muhure noano yorohca. Tina sehe muhure ti wapamoare wapa masierara. Æ jiro noaina yariaina ti masa mujari pja jichu Cohamacu sehe noaare mu yoari wapa muhure noano yorohca —niha Jesu wuhu purore.

Pjiri bese ñumu quitire yahuha Jesu

¹⁵To ã nichu tuhorro pairo churi mesa cahai dujiriro, Jesure õ sehe ni yahuha:

—Cohamacu masare puhtoro to noano suho jiroi to churi mesa cahai dujiina tuaro wahcheina jiahca —niha tiro Jesure.

¹⁶To ã nichu Jesu ahri quitire yahuha tirore:

—Pjiri bese ñumu dahreriro payu masare pjirocacha. ¹⁷To pjirocari baharo bese ñumu dachoi to cahamacunore to pjirocainare yahu dutiro warocaha. “Ma, jipihtiare bese ñumu macaa cjihtire cahno tuhsuhre. Æ jiro musare pjirocahre”, ni yahu dutiha to cahamacunore. ¹⁸To cahamacuno to ã ni yuhupachuta, to pjirocaina sehe “Waha masieraja”, niha tina. To pjiroca muhtariro õ sehe ni yahuha to cahamacunore: “Michapucacã yahpare nuchuhi. Æ jicu tí yahpare ñui wahi tai nija. Æ yoacu waha masieraja. Ño payo curea yuhure. Yuhure basioerahca”, niha to pjiroca muhtariro sehe to cahamacunore. ¹⁹Pairo sehe õ sehe niha: “Wachuare puu wamomaca pihtiinare michapucacãta nuchuhi. Æ jicu wachuare buhe cayo ñui wahi tai nija ti waja wahcãhtore. Æ yoai wahaeraja. Yuhure basioerahca”, niha tiro cühu. ²⁰Pairo sehe õ sehe niha: “Yuhu michapucacã wamomaca duhtehi. Æ jicu bese ñumupu waha masieraja”, niha tiro to cahamacunore. ²¹To ã nichu to cahamacuno sehe tjua waha, to puhtoropure ti niri cjirire yahu pahñoha. To ã ni yahuchu to puhtoro tuaro susini, õ sehe niha to cahamacunore. “Macari macaa maharipu pjacuoina ti ducua maharipu wahaga. Æ jicu pjacuoinare,

tini masierainare, capari ñuerainare, cū buhusehe dahporo dojori tiinare cjero na tahga tinare”, niha puhtoro. ²² Baharo curero to cahamacuno yahuha to puhtoro: “Puhtoro, mu dutiro sehetu yoahi. Yu ã yoapachuta paina cūhu mu suahca”, niha to cahamacuno. ²³ To ã nichu puhtoro tirore ò sehe ni dutiha: “Campopu wahaga. Tói bujua maharipu jiinare, daa maharicāpu jiina cūhure masare yu wuhupu ta dutiga, ya wuhu to noano wahpahto cjihto sehe. ²⁴ Potocā nii nija mūhure. Ahrina yu pjiroca muhtarina yu chūare ne mahanocā chusi”, niha puhtoro —ni yahuha Jesu.

Jesu mehne wahachu mijo nina

²⁵ Tí pjare payu masa Jesu mehne wahaha. Ā jiro Jesu tinare majare ñu, ò sehe ni yahuha:

²⁶ —Cūiro yu buheriro ji duaro painare to cahīiro yuhdoro yuhu sehere cahīno cahmana. To pucurore, to pocorore, to namonore, to pohinare, to bahanare, to pjacu cūhure to cahīiro yuhdoro yuhu sehere cahīno cahmana. Ā yoareraro yu buheriro ji masierara. ²⁷ Cūiro yu buheriro ji duaro yu yare ã yoarucuriro jirohca. Ā yoa crusapu yu ñano yuhduhtiro sehetu yu yairo to jiri buhiri ñano yuhdu duaeraro yu buheriro ji masierara. ²⁸ Ahrire masiyuro cahmana musare. Ē sehe jira tí: Wuhu dahreriro to muari wuhure yoahto pano wuhu wapa tihtire quihō cū muhtana. Ā yoaro to wuhure to pahñohtore masina tiro. ²⁹ Wapa tihtire quihōeraro to wuhure yoaro pahñoeraboa. Ā jia tirore ñuina bujupéboa. ³⁰ “Ahriro to wuhure yoaro bihoerare”, ni bujupéboa. ³¹ Puhtoro paio puhtoro yaina mehne ti cahma wajāhto pano, to yaina surarare to cahma wajā dutihto pano, to surarare quihōnohca. “¿Yuhu diez mil surara mehne paio veinte mil surara cjuariro mehne cahma wajācu bihobocari yuhu?” ni tuhuturo quihōnohca tiro. ³² Ā quihōno, to bihoeratore masinohca. Ā masino paio puhtoro to surara mehne cahma wajāno tariro yoaropu to jichuta, bihoerariro sehe “Cahma wajāena tjijihna”, ni dutiro warocaboa dahra cohtarirore. ³³ Ā jina yu buheina ji duana, musa yoahtire musare masino cahmana. Musa yoa duari sehere cohā duaerana, yu buheina ji masierara —ni yahuha Jesu.

Moa coaerarore yahuha Jesu

(Mt 5.13; Mr 9.50)

³⁴ Ā ni tuhsu tinare ò sehe ni yahu namoha:

—Moa noano coara. To coaerachu coa yoahto basioerara. ³⁵ Moa coaerachu tí moa ne noaerara. Tí moare dohseahito basioerara. Tí ã jichu tí moare cohāno cahmana. Ne yaba cjihti jierara ti cohōa. (Tí yaba cjihti jieraro sehetu jiena tjiga musa. Moa noano to coaro sehetu musa cūhu ji coaina jiga. Tuhsu, paina mehne noano mehne jiga.) Ahrire noano tuhoga musa —niha Jesu.

Oveja butiriro quitire yahuha Jesu

(Mt 18.10-14)

15 ¹ Ā yoa pa dachoi payu puhtoa yare wapa na cohtaina paina “Ñaare yoaina”, ti niina mehne Jesure tuhōa taha. ² Tí ã yochu ñua fariseo curua macaina, judio masare buheina cūhu Jesure ñu tuhtia, ò sehe niha ti basi:

—Ahriro ñainare piti tira. Ñ jiro jirota tina mehne chura —ni durucuha tina ti basi.

³Ti ñ ni durucucha Jesu to tuhutua mehne ñ sehe ni piti dahre buheha tinare:

⁴—¿Cien oveja puro cūiro oveja butichu ñño dohse yoarohcari tiro? Ñ sehe yoarohca. Tiro noventa y nueve ovejare ti churi campopu cū, butirirore macano waharohca. Ovejare bocaropu duhurohca. ⁵Tirore bocaro wahche-rohca. Ñ jiro to comapariaca buipu tirore cja payo, to wuhupu na tjuaa waharohca. ⁶Na tju su, to cahai jiinare, to coyeare pji cahmachunohca. “Yu oveja butirirore boca tuhsuhi. Ñ jina yuhu mehne wahchega”, ninohca tiro tinare. ⁷Potocā niita nija musare. Noventa y nueve oveja payu ti jiro sehetā, payu masa ñ sehe ni tuhutura: “Nano yoaeraja. Ñ jicu yu ñaare cahya, yu tuhutumari cjirire tuhutu cohtotasi yuhu”, ni tuhutura payu masa. Ti ñ ni tuhutumachu ñua muano macaina Cohamacu cahai jiina wahcherara. Pairo sehere wahchera. Butiriro oveja cūirota to butiriro sehetā to puro tirore to bocariro sehetā cūiro ñariro to ñaare cahyachu, “Ñ nano yoaeraja”, ni to tuhutumari cjirire tuhutu to cohtotachu, Cohamacure to cahmachu ñua, Cohamacu cahai jiina tuaro wahchera —niha Jesu.

Niñeru tu butiri quitire yahuha Jesu

⁸Ñ ni yahu tuhsu, paye quiti mehne piti dahre yahu namoha tjoa:

—¿Diez niñeru tui cjuaricoro cū tu butichu ñño dohse yoarohcari ticoro? Ñ sehe yoarohca ticoro. Sihāiare sihā, wuhure coha, noano maca pahñonohca. Tí ture bocaropu duhurohca. ⁹Tí ture boca tuhsu, to cahai jiinare, to coyeare pji cahmachunohca. “Niñeru tu ya tu yuhure butiri ture bocahi. Ñ jina yuhu mehne wahchega”, ninohca ticoro. ¹⁰Potocā niita nija musare. Tó sehetā cūiro ñariro to ñaare cahyachu, “Ñ nano yoaeraja”, ni to tuhutumari cjirire tuhutu to cohtotachu Cohamacure to cahmachu Cohamacu yaina anjia sehe tuaro wahcheahca —niha Jesu.

To macuno butiri quitire yahuha Jesu

¹¹Ñ ni yahu tuhsu Jesu paye quiti mehne piti dahre yahu namoha tjoa:

—Bucuro pohna puaro mua jiha. ¹²Duhsariro sehe ñ sehe niha to pucurore: “Mai, mu yariari baharo yuhure mu wahtire yuhure wa bahrañoga”, niha tiro to pucurore. To ñ nichu ti pucuro puaropureta to pohñare witira to cjuari cjirire. ¹³Mahaa dachoricā baharo duhsariro to yare jipihtiare na, yoaropu pa yahpapu wahaa wahaha. Tópu suro tuho masierariro sehetā yoa, to niñerure to yare yoa site pahñonocaha. ¹⁴To yoa site pahñori baharo tí yahpapure ne chua marieni pja ji ducaha. Ñ jiro tiro jua baaha. ¹⁵Ñ jiro tí yahpa macaa dahraare macaha. To bocachu to puhtoro yesea cohtariro sōha tirore. ¹⁶Ñ jiro tiro yeseare nu, ti chuare chu duamaha. To ñ chu duapachuta tí chuare tó macaina waeraha tirore. ¹⁷Ñ yoa tirore tó wacua taha juna. “Yu pucure dahra cohtaina sehe bujua chuare chuca. Ti chu duhaa cūhu bujua duhsaca. Ti ñ noano yuhduro watoí yuhu sehe ñi jicu, jua yariai nija. ¹⁸Mipure yu pucu cahapu tjuaihtja. Yu pucu cahapu sucu ñ sehe nihtja tirore: “Mai, Cohamacure ñ nano yoahi. Muhu cūhure ñ nano yoahiti. ¹⁹Ñariro jija. Mu macu jiboriro jieraja yuhu. Muhure dahra cohtaina sehetā yoaga

yuhure', niitja yu pucure", ni tuhoutuha tiro. ²⁰ Ñ ni tuhoutuha wahcāruca, to pucuro cahapu tjuaa wahaha. Tópu to suriro tjua tachu to pucuro sehe yaroputa to macunore ñuha.

²¹ To ñ wihichu ñuno to macunore pja ñuha. Ñ pja ñuno to cahai muroca wahcā tirore cjā suhsu mua, to wahsupui wihmiha to pucuro to macunore. ²² "Mai, Cohamacure ñano yoahi. Muhu cūhure ñano yoahiti. Ñariro jija yuhu. Mu macu jiboriro jieraja yuhu", niha tiro to pucurore. ²³ To ñ nichu tuhoro to pucuro sehe dahra cohtainare pjiha: "Cjero, noa yuhdari suhtirore na tahga. Ñ jina yu macure sāaga. Sāa tuhsu, to wamomaca sāari sorore sāa, to dahporire dahpo suhti cūhure sāaga. ²⁴ Sāa tuhsu, dihi tiriocā wachucāre wajāga. Bose numu yoajihna. ²⁵ Ahriro yu macu yariariro seheta wahare. Ñ wahaparoata mipure catira tiro. To butiboriro seheta jiriore mipure bocahi. Ñ jina bose numu yoajihna", niha to pucuro. To ñ niri baharo bose numu dahre ducaha tina.

²⁶ Tí pjare to wahmino sehe wesepu jiha. Wesepu jiri coha tjua taro wuhu cahai sūro, ti basaare tuhorochoha tiro. ²⁷ Ñ tuhorocho, cūiro dahra cohtariore pjiroca, tirore sinitu ñuha tiro: "¿Dohse yoa basaa niri?" ni sinitu ñuha tiro dahra cohtariore. ²⁸ "Mu bahu tju wihihre. Tiro noariro, catiriro to tju wihichu mu pucu dihi tiriro wachucāre wajā dutihre", ni yuhtiha dahra cohtariro. ²⁹ To ñ ni yahuchu to wahmino sehe tuaro suaro, wuhupu sāa taeraha. To sāa taerachu ñuno to pucuro sopacapu wijaa ta, "Sāa taga" ni, tuaro pjimaha to macunore. ³⁰ Tuhoga, Mai. Yoari pja muhure dahra cohtariro seheta muhure yoadohomahi. Ñ jicu mu dutiare ne cū taha yuhdurucaera tihi. Yu muhure dahra cohtapachuta yuhure ne waerare muhu. Ne cūiro wahiquirocāre ne waera tire muhu yuhure yu piti tiina mehne yu bose numu dahrehti cjihtire. ³¹ Wiho mejeta ahriro mu macu sehe ñaina numia mehne mu yare yoa site pahñoyuhti. Tíre yoa site pahño tuhsu, tiro wuhupu to tju wihichu dihi tiriocāre wachucāre wajā dutiyuhti muhu to chuhtiro cjihtore", niha to wahmino to pucurore. ³² "Macu, yuhu mehne jipihtia dachoripe mu jichu jipihtia ya mu ya cūhu jira. ³³ Mu bahu sehe yariariro seheta wahare marine. Ñ yoa mipure tiro catiriro jira. Tiro butiboriro seheta jire. To ñ wahari baharo mipure tirore bocahi. Ñ jina to tju wihichu mari bose numu yoa wahchechu noana", niha tiro to macunore —niha Jesu tinare.

Niñeru ñu wihbo cohtariro tuho masiriro quitire Jesu yahuha

16 ¹ Ñ yoa ahri quitire to buheinare ñ sehe ni yahuha Jesu: —Pache puro ya niñerure ñu wihbo cohtariro niñerure noano to ñu wihboerachu ñuno paio sehe yahusāha pache purore: "Tiro mu niñerure yoa sitero nina", ni yahusāha tirore. ² To yahusā tuhsuri baharo niñeru ñu wihbo cohtariore pjirocaha. Ñ pji tuhsu, to wihichu ñuno, tirore puhtoro ñ sehe niha: "Paio yu niñerure mu yoa siterire yuhure yahure. Ñ jicu mipure yu yare ñu wihboriro jisi muhu. Ñ jicu yu yare mu yoari cjirire yahu pahño joaga. Muhure cohāi nija", niha to puhtoro tirore. ³ To ñ niri baharo ñ sehe ni tuhoutuha ñu wihboriro to basi: "Yu puhtoro yuhure cohāno taro nica. Yuhu tuaeraja. Ñ jicu tuaro dahraare bihoeraja. Tuhsu, painare yuhu niñerure sinicu buobiario yuhduboca yuhu. ¿Dohse yoahcari yuhu? ⁴ Mipu pinih-tare yu yoahtire masija yuhu juna. Ñ sehe yu yoachu yu dahraa maerachu

yū puhtorore wapamoina yuhure cahīahca. Ā jia ti wuhusepū sāa dutiahca yuhure”, ni tuhoutuha tiro. ⁵Ā ni tuhoutu tiro jipihtina to puhtorore wapamoinare pjirocacha. Pjiroca tuhsu, cohtaha. Ā cohtaro wihi muhtariorore ō sehe ni sinituha tiro: “Yū puhtorore noho puro wapamojari muhū?” niha tiro. ⁶To ā nichū wapamoriro sehe ō sehe ni yuhtiha: “Cien tambores sere olivo dicha mehne ti yoari sere wapamoja tirore”, ni yuhtiha tiro. To ā ni yahuchū niñeru nū wihbori ro sehe ō sehe ni yahuha: “Ōi jira mū wapamonore joa ōri pū. Dujiga. Ā jicu mū wapamonore dacho macai na, dacho macai joa cahnoga”, niha nū wihbori ro wapamori rore. ⁷Ā ni tuhsu pai ro wapamori rore sinituha tiro: “ĒMuhū waro, noho puro wapamojari?” niha tjoa. “Cien waju trigo yapari wajure wapamoja yuhū”, niha wapamori ro niñerure nū wihbori rore. “Ōi jira mū wapamonore joa ōri pū. Mū wapamonore ochenta joa cahnoga”, niha nū wihbori ro. ⁸To ā noano mahño mihnichū ñuno “Ahriro mahñori ro noano masiri ro jica”, ni tuhoutuha to puhtoro niñerure nū wihbori rore. Ahri dacho macaina, Cohamacu cahmaeraina ti yare cahnori re ti niñeru ti nū wihbori re Cohamacu yaina yuhdoro masica tina —niha Jesu.

⁹Ā ni tuhsu Jesu ō sehe ni yahu namoha:

—Ahri quitire ā ni yahucu, musare ō sehe niita nija. Musa cjuaare, pjacuoinare musa wachu, tina sehe musare cahīahca. Musa ā yoachu musa cjuaa pihtiari baharo musa manopu suchu musare cahīahca tōpure.

¹⁰Wiho jiina ya dahraare quihōno yoana, puhtoa ya dahraa cūhure quihōno yoanahca. Wiho jiina ya dahraare quihōno yoerana, puhtoa ya dahraa cūhure quihōno yoasi musa. ¹¹Ā jina ahri yahpai musa cjuaa mehne musa noano yoerana Cohamacu musare to yoa dutia cūhure noano yoasi musa. ¹²Ā jiro pai ro yare musa noano yoabasaerachu ñuno musa ya cjihtire wasi musare.

¹³Cūi ro Cohamacu sehere wacūno, tuabiario niñeru sehere wacūerara. Niñeru sehere tuabiario wacūno Cohamacu sehere wacūerara. Niñeru dihtare cahmari ro jiro Cohamacu wahchechu yoerara. Cohamacu cūhure, niñeru cūhure puarore cahma yuhdurucahto basioerara musare. Niñerure cahma yuhduari ro Cohamacu noano ño payo masierara —niha Jesu.

¹⁴To ā nichū tuhoa fariseo curua macaina sehe tirore bujupheha. Tina sehe niñerure cahīha. Ā jia bujupheha. ¹⁵Ti bujuphechu tuhoro Jesu tinare ō sehe ni yahuha:

—Masa ti ñurocaroi musa noano yoamana. Musa ā yoachu “Noaina, quihōno yoaina jira”, nimana masa musare. Cohamacu sehe musa tuhoutuare masina. Masa “Noa yuhduara”, ti nirire Cohamacu sehe soro ni tuhoutu, tīre nū yabira —niha Jesu.

Cohamacu to dutiare, puhtoro to suho jiare yahuha Jesu

¹⁶Ā ni tuhsu ō sehe ni namoha Jesu:

—João masare bautisari ro to jihto pano Moiserere to cūri dutia mehne Cohamacu marine dutire. Cohamacu yare yahu muhtaina cjiri ti joari cjiri mehne cūhure marine dutire. Mipū sehere João to buhe ducari baharo noaa buheare, Cohamacu masare puhtoro to noano suho jia cūhure masi ducara masa. Ā masia masa ti mū suro ti tuua mehne Cohamacu masare puhtoro to noano suho jirore sāa duamana.

¹⁷Moisere to cūri dutiai Cohamacu to niriro seheta yoa pahñonohca tiro. Cohamacu yare yahu muhtaina cjiri ti joari cjiropu cūhure to niriro seheta yoa pahñonohca tiro. Muano cūhu ahri yahpa cūhu ti pihtia wahapachuta Cohamacu to niriro seheta yoa pahñonohca —niha Jesu.

Namonore cohāare yahuha Jesu

(Mt 19.1-12; Mr 10.1-12)

¹⁸Ā ni tuhsu ō sehe ni namoha Jesu:

—Masuno to namonore cohāno, pacorore namo tiro, tiro ticoro mehne űano yoaro nina. Tuhsu, masuno pairo to cohāricorore namo tiro, tiro cūhu ticoro mehne űano yoaro nina —niha Jesu.

Pache puro cūhure, Lázaro cūhure to yahuri quitire buheha Jesu

¹⁹Ā yoa paye qiti mehne piti dahre yahuha Jesu:

—Tí pjarure pache puro jiha. To suhti sehe wapa bujubiaha. Tuhsu, dachoripe tiro noaa dihtare churo, payu cjuaha tiro. ²⁰Ā yoa tí pjare pairo pja-cuoriro, Lázaro wama tiro tiha. Tiro to pjacu payu cami tiro jiha. To ā jiro jichu paina sehe tirore pache puro ya wuhupu na suha. ²¹Ā jiro pjacuoriro sehe pache puro to churi mesa docai yahpai dujiro to chu site boroare chumaha. “To chu site boroare chucu yapicuhca yuhu”, ni tuhotumaha tiro. Ā jia dieya to camine nehnea taa tiha. ²²Baharo pjacuoriro to yariaa wahachu, Abrahā caphu paraíso wama tiropu anjoa tirore naa mujaha. Pache puro cūhu to baharocāta yariaa wahaha. To yariachu tirore yaha. ²³Ā yoa pache purore tuaro pichaca jūha. To ā tuaro jūchu, pichacapu jiro muanopu jirirore Abrahāre űuha. Lázaro cūhure űuha. ²⁴Ŭu tuhsu, tiro Abrahāre pisurocaha: “Coyeiro Abrahā, pja űuga yuhure. Pichacapu yuhu űano yuhdui nica. Yu ā wahachu Lázarore yuhure warocaga. Tiro core to wamo picapu soha, yu űahmanore co mehne nehojaro. Tóre yusujaro tiro”, niha pache puro. ²⁵To ā nichu Abrahā tirore ō sehe ni yahuha: “Coyeiro, catiriro jicu jipihtiare muhu noare cjuahre. Lázaro sehe dachoripe űano yuhduhre. Mipu sehere muhu űano yuhduchu tiro sehe ōpure wahchea mehne jinocahno nina. ²⁶Ā yoa mari watoi cuāri copa jira. Ā jia ōre jiina tōpure waha masierara. Tuhsu tóre jiina ōpu ta duaina ta masierara”, niha Abrahā pache purore. ²⁷To ā nichu pache puro ō sehe ni namoha: “Coyeiro, tuaro sinija muhure. Lázarore yu pucu ya wuhupu warocaga. ²⁸Yuhu cū wamomaca pihtiina bahana tija. Lázaro tinare yahujaro. Tina ōre űano yuhduropure taea tjijaro”, niha tiro. ²⁹To ā nichu Abrahā sehe ō sehe ni yuhtiha: “Cohamacu dutiare Moise marine to cūri cjiire, Cohamacu yare yahu muhtaina ti joari cjiire cjuara mu bahana. Ā jia mu bahana tíreta tuhojaro”, niha Abrahā. ³⁰To ā nichu pache puro sehe yuhtiha: “Coyeiro Abrahā, tíre cjuapahta noano tuhosi. Lázaro yariariro masariro tina caphu to suchu űua tina sehe ti űaare cahya, noare cohtotaahca. Ā jia noare yoaahca yu bahana sehe”, niha pache puro cjiro. ³¹To ā nichu Abrahā sehe ō sehe ni yahuha: “Mu bahana Moise to cūri pū to yahuaire, Cohamacu yare yahu muhtaina cjiri ti yahuaire tuhoeraina jira. Ā jia Lázaro yariariro cjiro masariro to jipachuta tina Cohamacure tuho duasi”, niha Abrahā —ni yahuha Jesu.

Ñaare yoachũ cua nina

(Mt 18.6-7, 21-22; Mr 9.42)

17 ¹ Ñ yoa Jesu ò sehe ni yahuha to buheinare:
 —Masare ñano yoachũ yoa payu jira. Ñ jia masa ñaare yoara. Ti ã jipachuta masunore ñaare yoachũ yoiaro sehe ñabiario yuhdũrohca. ² Masunore to wamuai pjiria tãca duhte yo, pjiri mapu tirore ti cohãchũ ñano wahaboa tiro. Pairo sehe ahrinacã mehne macarirocãre ñaare yoachũ yoaro pjiri mapu ti cohãriro yuhdoro ñano yuhdũrohca. Tirore tuaro buhiri dahrero cahmana. ³ Noano yoaga musa. Musa coyeiro ñano to yoachũ ñuna “Yoi tjiga”, niga tirore. Ñ jina tiro to ñaare cahyachũ, noaare to cohtotachũ musa sehe to ñaa yoaare boga. ⁴ Ñ yoa musa coyeiro cũ dachoihta siete tahari musare ñano to yoachũ tópe tahari musare, “Yũ ñaare cahyaja. Pari turi ã yoasi”, to nichũ tópe taharita to ñaa yoaare boga —niha Jesu.

Cohamacure wacũ tuaare yahuha Jesu

⁵ Ñ yoa Jesu buhe duti to cũina tirore ò sehe niha:

—Cohamacure sãre noano wacũ tua namochũ yoaga —niha tina Jesure.

⁶ Ti ã nichũ Jesu ò sehe ni yuhtiha:

—Mostaza yapacã mahari yapacã jiparota duropu pjidu wahara. To ã wahariro seheta Cohamacure pjíro wacũ tuana, ò sehe wahachũ yoa masinahca musa. Ahdu sicómoro wama tidure ò sehe ni masina: “Mũhu yucucu mũ basi duhtu wahcã, pjiri mapu bora ñojaga”, ni masina musa. Musa ã nichũ tu yucucu sehe musa dutiro seheta waharohca —niha Jesu.

Dahra cohtariro to dahraare yahuha Jesu

⁷ Baharo ò sehe ni buheha Jesu:

—Musare dahra cohtariro jiro wesepu tjana, ovejare ñu wihbora. ¿Dahra cohtariro to tju wihichũ dohse nibocari musa tirore? “Cjero taga. Mũ chũa òi jira”, ¿nibocari musa? ⁸ Ñ nierara musa. Tirore ò sehe nina musa: “Yũ chũare doha cahnoga. Ñ jicu yũ chũ sihnichũ yuhũre cohtaga. Yũ baharo mũhu cũhu chũ sihniga”, nina musa dahra cohtarirore. ⁹ Dahra cohtariro musa dutiare to yoachũ tirore “Noana”, nierara musa. To dahraa dihtare yoaro nica tiro. ¹⁰ Musa cũhu tiro yoaro sehe tjira. Cohamacu to dutiriro seheta yoa pahñona ò sehe ni tuhotuga musa: “Sã cũhu dahra cohtaina dihta jija. Wiho jiina jija sã. Sã dahraa dihtare yoaja sã”, ni tuhotuga musa —niha Jesu to buheinare.

Diez cami baainare noaina wahachũ yoaha Jesu

¹¹ Pa dacho Jerusalẽpu Jesu waharo niha. Tópu waharo Samaria yahpa, Galilea yahpa dacho macai yuhdu wahcãha. ¹²⁻¹³ Pa macapu wahari mahapu to tinichũ diez cami baaina sehe tirore piti bocaha. Ñ jia tina yoa cureropu ducua pisuha:

—Jesu, puhtoro, sãre pja ñuga —niha tina.

¹⁴ Ti ã nichũ tinare ñu, ò sehe ni yahuha Jesu:

—Sacerdotere musa pjacurire noa pjacuri ti waharire ñona wahaga —niha tinare.

To ã niri baharo ti waharo watoi tina ti pjacuri noaina wahaha. ¹⁵ Ñ jiro cũiro tina mehne macariro noano to pjacu wahachũ ñuno, Jesu cahapu

majare tjuaha. Ñ tjuaro tuaro mehne Cohamacure ño payoha. “Cohamacu tuariro, noariro jira”, tuaro ni, ño payoha tiro. ¹⁶ Ñ nino tiro Jesu dahpori cahai na tuhcuca caha su, “Noana”, niha tiro. Tiro sehe Samaria macariro jiha.

¹⁷ To ñ yoari baharo Jesu ñ sehe ni yahuha:

—Diez jihre masa noaina wahaina. ¿Paina nueve duhsaina sehe nohopu jicari tina? ¹⁸ Ahriro pa yahpa macariro dihta Cohamacure “Noana”, nino taro tjua tahre. ¿Dohse yoa paina taerari? —niha Jesu.

¹⁹ Ñ ni tuhsu Jesu ñ sehe ni yahuha na tuhcuca caha surirote:

—Wahcārucaga. Wahaga. Mũhu Cohamacure wacũ tuacu, noariro wahahre mũhu —niha Jesu tirote.

Cohamacu masare puhtoro to noano suho jihtore yahuha Jesu

(Mt 24.23-28, 36-41)

²⁰ Tí pjare mahainacã fariseo curua macaina Jesure ñ sehe ni sinituha:

—¿Dohse jichu puhtoro Cohamacu masare suho ji ducarohcari? —niha tina.

Ti ñ nichu Jesu ñ sehe ni yuhtiha:

—Cohamacu masare puhtoro to noano suho ji ducachu masa ñu masierara. ²¹ “Cohamacu masare puhtoro to noano suho jia ñi jira”, ni masierara. “Sohõpu jira”, ni masierara. Cohamacu masare puhtoro to noano suho jia masa ti tuhoutuapu jira —niha Jesu fariseo curua macainare.

²² Ñ ni tuhsu Jesu to buheinare ñ sehe ni yahuha:

—Baharo yuhu masuno Cohamacu warocariro ahri yahpapu yu tjua tahtore tuaro cahmanahca musa. Cũ dachoihta yuhure ñu duapanahta yuhure ñusi musa. Musa yuhure ñ ñu duapachuta tí pjare tasi yuhu. ²³ Paina musare ñ sehe niahca: “Tirore ñuga. Tiro Cristo jira. Ahrirore ñuga. Ahriro Cristo jira”, niahca musare. Ti ñ nipachuta tinare tuhoena tjiga. ²⁴ Oroca sitero wacũenoca to oroca sitero seheta yuhu cũhu masuno Cohamacu warocariro wacũenoca tjua taihca. ²⁵ Ñ yu tjua tahto pano yuhu tuaro ñano yuhduihca. Ñ jia yuhure mipu macaina cahmasi. ²⁶ Noé to jiri pja macaina ti jiroro seheta yuhu masuno Cohamacu warocariro yu tjua tachu tó seheta jiahca masa. ²⁷ Noé to jiri pjare jipihtina masa ñ churucua tiha. Ñ yoa sihnirucua tiha. Ñ jia mua numiare namo tia tiha. Noé pjiria dohoriapu to samuhto pano Cohamacu tinare to miohto pano tí jipihtiare masa yoarucua tiha. Tó seheta jirohca pari turi yu tjua tachu cũhure. ²⁸ Lote to jia tiri pja macaina ti jiroro seheta yu tjua tachu jiahca masa. Lote to jia tiri pjare masa chu, sihni, nuchu, dua, weserire toaa, wuhuse yoaha. ²⁹ Ti ñ yoaro watoi Sodoma wama tiri macai jiroro Lote to wahari dachoi muano macaa pichaca, picha sohãa poca tãa peri cũhu coro taro seheta tina bui bora ta, tinare wajã pahñonocaa tiha. ³⁰ Yuhu masuno Cohamacu warocariro wacũenoca yu tjua tachu tina yoaro seheta yoina jiahca masa tí pjare.

³¹ Tí pjare cũiro to wuhu bui macari wapapu jiroro wuhu puhichapu to ya jichu tíre nano sãaeno tjijaro to waha bahrañohto sehe. Tuhsu, wesepu jiroro cũhu tí pjare to wuhupu piha taero tjijaro to waha bahrañohto sehe. ³² Lote namono to waharire wacũga musa. ³³ Masuno yuhure wacũno marieno to mu sũro to cahmano seheta yoaro pichacapu waharohca. Yu yare ñ yoarucuriro sehe jipihtia dachoripe yuhu mehne muanopu jirucurohca.

³⁴ 'Tí ñamine puaro cū casario bui carīnare cūiro yuhure cahmarirore naaihca. Tuhsu, yuhure cahmaerariro tói tjuarohca. ³⁵ Tí pjare puaro numia cūnoi ti trigore arēa numiare cūcoro yuhure cahmaricorore naaihca. Tuhsu, yuhure cahmaeraricoro tóihta tjuarohca. ³⁶ [Ā yoa wesepu puaro dahraina ti jichu cūirota naihca. Cūiro tói tjuarohca] —niha Jesu.

³⁷ To ā nichu to buheina sehe ō sehe ni sinituha tiore:

—¿Nohopu ā waharohcari? —ni sinituha tina.

Ti ā nichu Jesu ō sehe ni yuhtiha:

—Yucaare mari ñuna, yariariro to pjacu cjiro jichu mari noano masinahca. (Tó seheta ahri musare yu yahuyurire musa ñuna noano masinahca ahri yahpapu yu tjua tahto mahanocā to duhsachu cūhure) —niha Jesu.

Wapewahyoro to buhiri dahre dutia quitire yahuha Jesu

18 ¹ Ā yoa Jesu tinare Cohamacure siniare yahuro ō sehe niha:

—Musa Cohamacure sinina, cohtaga to yuhtihtore. Yoari pja cohtapanahca cahyaena tjiga. Tiore sinina duhuena tjiga —niha Jesu.

² To ā nirire buhero taro ahri quti mehne piti dahre yahuha tinare:

—Pa macapu ti buhiri dahre dutihiro jiha. Tiro Cohamacure ño payoeraha. Ā yoa masa cūhure ño payoeraha. ³ Wapewahyoro cūhu tōpu jiha. Ticoro tiro cahapu suroca majareno ō sehe niha: “Yuhure ñu tuhtiriore buhiri dahre dutiga muhu. Yuhure ni ducataga”, ni sinirucuha ticoro tiore. ⁴ To ā nichu payu tahari tiro “Yoasi yuhu”, nimaha ticorore. To ā nipachuta ticoro payu tahari ā sinirucuro tiore caribobiario yoaha. To ā caribochu, tiro ō sehe niha to basi: “Yuhu Cohamacure, masa cūhure ño payoeraja. ⁵ Yu ā ño payoerariro yu jipachuta ahricoro sehe yuhure caribobiara. Yuhure ā cariboro yuhure pomea wahachu yoarohca ticoro. To ā ni yahusārucucu ticorore ñu tuhtiriore buhiri dahre dutihtja”, niha buhiri dahre dutihiro —niha Jesu.

⁶ Ā nino Jesu tinare ō sehe ni yahu namoha:

—Ā niha tiro ñariro buhiri dahre dutihiro. To niri cjiire wacūga musa. ⁷ Tiro yuhdoro Cohamacu sehe to yainare to beseinare ñamipū cūhure, dachopu cūhure tiore sinirucuinare yuhti, yoadohorohca. ⁸ Musare niita nija. Cohamacure ti siniri sehta dóicāta tinare yoadohorohca. ¿To ā yuhti-riro to jipachuta yuhu masuno Cohamacu warocararo ahri yahpapu tjua tacu Cohamacure wacū tuainare bocabocari yuhu? —niha Jesu.

Puaro Cohamacure ti sinia quitire yahuha Jesu

⁹ Ā yoa pari turi piti dahre buhero ō sehe ni yahuha Jesu: “Sā sehe noaina jija. Paina sehe ñano yoaina jira”, ni tuhoutuina barore Jesu ō sehe ni yahuha:

¹⁰ —Cohamacu ya wuhupu puaro musa Cohamacure sinia wahaha. Cūiro fariseo curua macariro jiha. Pairu puhto yare wapa na cohtariro jiha. ¹¹ Ā yoa fariseo curua macariro sehe wahcārucu su, ō sehe ni yahuha Cohamacure: “Cohamacu, yuhu paina yare mahñoepa mehne nariro, ñano yoariro, paina namosānumia mehne wuana tiro ne jieraja. Paina yoaro sehe ñariro jieraja. Ahriro wapa na cohtariro yoaro sehe ñariro ne jieraja yuhu. Ā jicu muhure ‘Noana’, nija Cohamacu. ¹² Yuhu somanaripe pua dachore ne chueraja, mu yare yoacu tacu. Tuhsu jipihitia dohse jiape yu wapataa cūhure mahano (diezmo) wa mujaja yuhu muhure ño payocu”, niha fariseo curua macariro Cohamacure.

¹³ Ñ yoa wapa na cohtariro sehe yoa cureropu muhri yo ducu su, muanopure nu muoeraha. Ñ nu muoeraro, to pëbuhui cjäroca ô, ô sehe ni siniha Cohamacure: “Cohamacu, yuhu ñaare yoariro jija. Ñ jicu muhu pja ñuga yuhure”, niha tiro Cohamacure. ¹⁴ Musare niita nija. Ahriro wapa na cohtariro sehe Cohamacu to ñuchu buhiri marieriro to ya wuhupu tjuaa wahaha. Wiho mejeta paio fariseo curua macarirore “Mu ñaa buhirire cohâhi”, nieraha Cohamacu. “Yuhu noariro waro jija”, ni tuhoturirore Cohamacu buoro dahrerohca. Wiho mejeta “Yuhu ñaare yoariro jija. Ñ jicu tîre tuaro cahyaja” nirirore Cohamacu wahchechu yoarohca tiro sehere —niha Jesu.

Macanacä ya cjihtire Cohamacure sini payoha Jesu

(Mt 19.13-15; Mr 10.13-16)

¹⁵ Ñ yoa masa ti pohnare wihäinacäre Jesure ña payo dutia ta, to cahapu na wihimaha. Ti ä yoachu ñua Jesu buheina tinacäre na wihiinare tuhtiha. ¹⁶ Ti ä tuhtichu ñuno Jesu wihäinacäre pjirocaha to cahapu. Pjiroca tuhsu ô sehe niha tiro to buheinare:

—Macanacä yu cahapu tajaro. “To cahai wahaena tjiga”, niena tjiga tinacäre. Tinacä Cohamacure ti puhtoro tuhotura. Puhtoro Cohamacu to suho jiina ahrinacä yoro sehe tuhotuina baro dihta jira. ¹⁷ Potocä niita nija musare. Ahrinacä Cohamacu ti puhtoro cjihtore cahmana. Ti yoro seheta musa cühu Cohamacu musa puhtoro cjihtore cahmaerana, puhtoro Cohamacu to noano suho jihtina ne jisi musa —niha Jesu.

Pache puro Jesure sinitu ñuha

(Mt 19.16-30; Mr 10.17-31)

¹⁸ To ä niri baharo judio masa puhtoa mehne macariro Jesure ô sehe ni sinitu ñuha:

—¿Ne noariro, buheriro, jipihtia dachoripe Cohamacu mehne ji duacu, dohse yoaihcari yuhu? —niha tiro.

¹⁹ To ä nichu Jesu ô sehe ni yuhtiha:

—¿“Noariro”, ni pisujari muhu yuhure? Noariro sehe Cohamacu dihta jira.

²⁰ Ahri Cohamacu dutiare masina muhu. “Numia mehne ñano yoaecu tjiga. Masare wajäecu tjiga. Yacaecu tjiga. Mahñoa mehne paire yohusäecu tjiga. Mu pucsumare ño payoga”, ni dutira Cohamacu —niha Jesu.

²¹ To ä nichu tiro Jesure ô sehe ni yuhtiha:

—Tîre jipihtiare yu wahma wahmua tariro jiiputa yuhdurucaera tihi yuhu —niha tiro.

²² To ä nichu tuhoru, Jesu tirore ô sehe ni yahuha:

—Mahanocä duhsara muhure mu yoa pahñohto. Jipihtiare mu yare duai wahaga. Ñ yoacu jipihtia mu wapatai niñerure pjacuoinare waga. Mu ä yoachu pjíro mu wapataa muanopu, Cohamacu cahapu jiyuahca. Mu ä yoari baharo yuhu mehne macariro cjihto taga —niha Jesu tirore.

²³ To ä nichu tuhoru tiro sehe payu pache cjuariro jiro tîre pjacuoinare wa duaeraro, tuaro cahya, wahaa wahaha. ²⁴ To ä cahyachu ñuno Jesu ô sehe ni yahuha painare:

—Pache pua Cohamacu masare puhtoro to noano suho jiropure ti wahachu basioera curera. ²⁵ Camello sehe awicä copacäre to sāa nuhri wijaa duachu

basioerara. To ã jiro yuhdoro pache pũro puhtoro Cohamacu noano to suho jiropure to waha duachu nu mijobiara —niha Jesu.

²⁶To ã nichu tirole tuhoina õ sehe niha:

—Cue, mu nino sehetu potocã jichu, ne cũiro masũno Cohamacu cahapu waha masieraboca —niha tina Jesure.

²⁷Ti ã nichu Jesu õ sehe ni yuhtiha:

—Masa ti basi ti mu suro yuhdu masierara. Wiho mejeta Cohamacu sehe masare pichacapu wahaborinare yuhdo masina. Tiro jipihtiare noano yoa masi pahñoriro jira —niha Jesu tinare.

²⁸To ã nichu Pedro tirole õ sehe niha:

—Tuhosiniga. Sã sehe jipihtia sã yare cũnocaa tii muhu mehne wahana —niha tiro Jesure.

²⁹To ã nichu Jesu õ sehe niha:

—Potocã musare niita nija. Musa Cohamacu yare yoana tana musa wuhu-sere, musa namosãnumiare, musa bahanare, musa pũcũsumare, musa pohinare cũnocarina jina, pjĩro wapatanahca musa mipure. ³⁰Musa cũriro yuhdoro wapatanahca. Æ jina musa yariari baharo jipihtia dachoripe Cohamacu mehne jirucunahca musa —niha Jesu tinare.

Pari turi Jesu to yariahtore, to masa wijaahtore yahuha

(Mt 20.17-19; Mr 10.32-34)

³¹Æ yoa Jesu doce to buheinare ti sahsero naaha. Æ naano tinare õ sehe ni yahuha:

—Tuhoga yuhure. Mipure mari Jerusalẽpu wahana nija. Tõpu yuhure masũnore Cohamacu warocarirore Cohamacu yare yahu muhtaina cjiri panopũ ti yahuriro cjiro sehetu paina Æ yoaahca yuhure. ³²Tõpu masa yuhure ñahaa, judio masa jieraina sehere waahca yuhure. Yuhure ti wari baharo tina yuhure bujupe, ñano ni, yuhure chahcho puti sihõahca. ³³Tuhsu, yuta dari mehne tjana tuhsu wajãahca yuhure. Ti Æ wajãri baharo tia dacho wahaboroi masa wijaaahca yuhu —niha Jesu tinare.

³⁴To ã nichu to buheina to yahuaire noano tuho ñahaeraha. Cohamacu tĩre tinare noano tuho ñahachu yoaerasiniha.

Capari ñuerarirore ñuchu yoaha Jesu

(Mt 20.29-34; Mr 10.46-52)

³⁵Æ yoa Jesu cũhu Jericó wama tiri maca cahacãpu suha. Tõĩ capari ñuera-riro maha duhtu cahai duji, niñerure sinino niha. ³⁶Æ jiro masa payũ to cahai ti yuhduachu tuhoro tiro sinituha tinare:

—¿Dohse yoa payũ masa yuhdujari? —ni sinituha tiro.

³⁷—Jesu Nazare macariro waharo nina —ni yahuha paina tirole.

³⁸Ti Æ ni yahuchu tuhoro tiro õ sehe ni sañurucuha:

—Jesu, Davi cjiro panamino masare yuhdohtiro, yuhure pja ñuga —ni sañurucuha Jesure.

³⁹To ã nichu to pano waha muhtaina sehe, “Dihta mariahga”, ni tuhtiha tirole. Ti Æ ni tuhtipachuta tó pano to sañurucuriro yuhdo curero sañurucu namoha tjoa:

—Davi cjiro panamino masare yuhdohtiro, yuhure pja ñuga —ni sañurucuha tiro.

⁴⁰To ā ni sañurucuchū tuhorō, Jesu sehe tjuarucū sū, “Pjirocaga tirore”, niha. To ā nichū tina sehe capari ñuerarirore pji wahcāha. Ti ā pji wahcāchū tiro Jesu cahapū to suchū Jesu sehe tirore ō sehe ni sinituha:

⁴¹—¿Dohse yū yoachū cahmajari muhū? —niha Jesu tirore.

—Yū puhtoro, yuhure ñuchū yoaga —ni yuhtiha capari ñuerariro.

⁴²—Ñuga. Yuhure wacū tuacu, noariro wahara muhū —niha Jesu tirore.

⁴³To ā nichūta capari ñuerariro ñua wahaha. Ā noariro waharo, tiro Jesu mehne waha, “Cohamacū tuariro jira”, niha tiro. Ā jia masa payū capari ñuerariro to ñuchū ñua “Cohamacū noariro, tuariro jira”, niha tina cūhū.

Zaqueo Jesure piti bocaha

19 ¹Ā yoa Jesu Jericópū sū, tí macapū yuhdu wahcāno taro niha. ²Pache puro Zaqueo wama tiroro puhtoa ya cjihtire wapa na coh-taina puhtoro tói jiha. ³Ā jiro tiro Jesure “¿Diro baro jicari?” ni ñu masino taro Jesure ñu duamaha. Ā to ñu duapachuta yahparirocā to jichū masa payū tirocāre ducataha. ⁴Ā jiro tiro masare muroca yuhdua waha, sicómoro wama tidū yucucupū mujaha Jesure ñuno taro. Baharo curero tū cahai Jesu yuhduaro taro niha. Ā jiro Zaqueo tui cohtaro niha. ⁵To ā cohta pisaro watoi Jesu sehe tū dahpotoi suruca, Zaqueore ñuroca mūo, tirore ō sehe niha:

—Zaqueo mipure mū wuhui tjuasinihtja yuhū. Ā jicu cjero duji taga —niha Jesu tirore.

⁶To ā nichū Zaqueo sehe soaro mehne duji ta, tuaro wahchea mehne to wuhupū pji wahcāha Jesure. ⁷To ā ni piti bocachū ñua, jipihtina masa ti basi ō sehe ni durucuha:

—Ahriro Jesu ñaare yoiriro ya wuhupū tinino waha duara —ni durucuha jipihtina ti basi.

⁸Zaqueo sehe piti boca tuhsū tói ducu, Jesure ō sehe ni yahuha:

—Puhtoro tuhoga yuhure. Jipihtia yū yare dacho macai pjacuoinare waihtja. Ā jicu yuhū paireore cien niñeru turire mahño mariro jicu, cuatro cientos niñeru turire wapa bui payoihtja tirore —niha Zaqueo Jesure.

⁹To ā nichū Jesu sehe ō sehe ni yahuha tirore:

—Michare muhure mū wuhui jiina cūhure pichacapū wahaborinare Cohamacū yuhdo tuhsura. Muhū cūhū Abrahā cjiro coyeyro jira. ¹⁰Yuhū masuno Cohamacū warocariro pichacapū wahaborinare macai tai nii. Tópū wahaborinare noano yuhdoi tai nii —niha Jesu Zaqueore.

Niñeru turi uru turi quitire yahuha Jesu

(Mt 25.14-30)

¹¹Ā yoa tirore tuhoinare Jesu paye quiti mehne piti dahre yahuha. Mahanocā duhsaha Jerusalēpū to suhto. Ā jia tirore tuhoina ō sehe ni tuhoutuha: “Puhtoro Cohamacū mipure suho ji ducaro taro nina”, ni tuhoutuha tina. ¹²Ti ā ni tuhoutuha Jesu ō sehe ni yahuha tinare:

—Cūiro puhtoro sāhtiro to ya yahpa macaina bui puhtoro jiltiro yoropū waharo taro niha. Tópure to suchū ñuno ti bui puhtoro tirore puhtoro sōno taro niha. Puhtoro sāhtiro ya maca macaina bui puhtoro sōno taro niha tirore. Baharo to ya wuhupū tju wihiro taro niha. ¹³Wahmanore to wahahto pano puhtoro diez dahra cohtinare pjirocaha. Ā pjirocato, tiro tinare cāinare

típe turi niñeru turi wapa bujua turi uru turire waha. Wa tuhsu, ò sehe ni yahuha tinare: “Yuhu yu mariachu ahri niñeru mehne musa wapata namoh-tire macaga”, niha tiro dahra cohtainare. ¹⁴Puhtoro sãhtiro to jipachuta to ya maca macainata tirore cahmaeraha. Ñ cahmaeraa, ti warocahtinare tirore puhtoro sôhtirore yahu dutia warocaha. “Ahriro sã puhtoro jichu cahmaeraja sã”, niha tina ti yahu duti warocaina sehe. ¹⁵Ñ ti cahmaerapachuta baharo ti puhtoro sãaha tiro. Ñ puhtoro sãa tuhsuro tiro to wuhupu tjua taha. Ñ tju wihiro tiro dahra cohtainare to niñeru mehne ti wapata namoare masino taro, tinare pjirocacha. ¹⁶To pjirocari baharo, wihi muhtariro tirore yahuha: “Puhtoro mu niñeru tu, yuhure mu wari tu mehne diez turi wapata namohi yuhu”, niha dahra cohtariro to puhtoro. ¹⁷“Noano yoari jire muhu. Muhu noariro dahra cohtariro jira. Muhu mahanocã mehne yu dutiriro seheta yoa pahñoriro jicu mipu diez macari macaina ti puhtoro cjihto wahaiha muhu”, niha puhtoro dahra cohtarirore. ¹⁸To baharo wihiriro tiro mehne macariro ò sehe niha: “Puhtoro, mu niñeru tu, yuhure mu wari tu mehne cinco turi wapata namohi yuhu cûhu”, ni yahuha to puhtoro. ¹⁹“Cinco macari macaina puhtoro cjihto wahaiha muhu”, niha puhtoro tirore. ²⁰To ã niri baharo paio dahra cohtariro wihi, ò sehe ni yahuha: “Puhtoro, mu niñeru tu òi jira. Suhtiro cahsaro mehne coma, tí ture wihbohi. ²¹Muhu tuaro dahra dutiriro jira. Paina yare mana muhu. Tuhsu, tuaro dahra dutiriro jicu dahraerariro jipacuta muhu paina ya dahrari wapare nana. Ñ yoa toaerariro jipaihta dichare nariro jira muhu. Ñ jicu muhure cui nihi”, niha to puhtoro “Wapa-taerahi yuhu”, ni yahuro. ²²“Muhu ã nicu ñano yoariro jira muhu. Yuhure mu ã niri buhiri muhure buhiri dahrehtja yuhu. Yuhu muhure tuaro dahra dutiriro yu jichu masina muhu. Paina yare yu nachu toaerariro jipai dichare nariro yu jichu masina muhu. ²³Yu ã jiriro jichu ñupacuta ya ture niñeru wihbori wuhupu cûerare muhu. Tíre ti wasori wapa wapata namoboa muhu. ¿Dohseacu ã yoerari muhu? Tíre mu yoachu tju wihicu wapata namoboa yuhu”, niha ti puhtoro. ²⁴Ñ ni tuhsu tiro cahai ducuinare dutiha: “Niñeru ture maga tirore. Diez turire cjuarirore waga”, niha puhtoro. ²⁵To ã nichu tina sehe ò sehe ni yahuha tirore: “Puhtoro, diez turi cjuariro payu cjuu tuhsura”, niha tina. ²⁶Ti ã nichu puhtoro ò sehe ni yuhtiha: “Musare niita nija. Jipihtina cjuainare wa namoihtja. Cjuarariro sehere mahanocã to cjuapachuta tíre maihtja. ²⁷Mipu pinihta yuhure ñu tuhtiinare yuhure ti puhtoro ji dutierainare yu cahai na tahga. Ñ yoana yu ñurocaroi wajãga tinare”, niha puhtoro dahra cohtainare —ni buheha Jesu.

Jerusalēpu suha Jesu

(Mt 21.1-11; Mr 11.1-11; Jn 12.12-19)

²⁸Ñ ni tuhsu Jesu paina pano Jerusalēpu wahaha. ²⁹Ñ yoa tina Jerusalēpu ti suhto panocã tūcu Olivo wama tidu duhtu cahai jiri maca Betfagé wama tiri maca cahai, ã jichu Betania wama tiri maca cahai su muhtaha. Tí macari pua maca cahai Jesu suro, to buheina puarore warocaro taro, ò sehe ni yahu quihōha:

³⁰—Sí macapu burrocãre nana wahaga. Tópu suna, burrocãre ti duhte dapo-rirocãre boca sunahca. Tiro ne cūiro ti pisamahnoerarirocã jica. Tirocãre bocana, yuta dare pjã, na tabasaga yuhure. ³¹Tirocãre musa pjãchu ñuno, cūiro

dohse jiriro “¿Dohse yoana tana burrocäre duhte dapori dare pjäjari mäsä?” to nichu tuhona ò sehe ni yuhtiga tirore: “Mari puhtoro burrocäre cahmarocasinire”, ni yahuga tirore —ni yahu duti warocaha to buheina puarore.

³²To ä nichu tina puaro sehe to niriropu suha. Ti ä suchu jipihtia Jesu to niriro sehetä wahaha. ³³Ä jia tina tirocäre ti pjächu ñua tirocä pua tinare ò sehe ni sinituha:

—¿Dohse yoana tana burrocäre duhte dapori dare pjäjari mäsä? —ni sinituha tina.

³⁴—Mari puhtoro burrocäre cahmarocasinire —ni yuhtia tina.

³⁵Ä ni yahu tuhsu tirocäre Jesu cahapu na suha. Na su tuhsu ti bui sãa suhtire tirocä bui pjüpaha payo tuhsuchu ñu, Jesu sehe tirocä bui to muja pjachu yoadohoha tina. ³⁶Jesu tirocä bui to pisachu to wahahto pano masa ti bui sãa suhtire tjuwe na, to wahahti mahai saño cü muhtaha, Jesure ño payoa. ³⁷Tina Jerusalē cahacäpu su, Olivo wama tidui dujiari mahapu suha. Tõpu Jesu to buhechu tuhoina payu jipihtia Cohamacu tuua mehne to yoa ñorire, noaa to yoarire ti ñuri cjiire wacüa, Cohamacure “Noariro, tuariro jira”, ni sañurucuha. Ä yoa Cohamacure ño payoa, ò sehe ni sañurucuha:

³⁸—Ahriro Cohamacu to warocariro, mari puhtoro noano jijaro. Muano macaina noano jijaro. Muano macariro Cohamacu, muhu tuariro waro jira —ni ño payoha tina.

³⁹Ti ä nichu tuhoa fariseo curua macaina mahainacä ti watoi jiina Jesure ò sehe ni yahuha:

—Buheriro, mu buheinare dihta mariea dutiga —niha tina.

⁴⁰—Musare niita nija. Tina ti sañurucuerachu täa peri sehe sañurucuboa —niha Jesu fariseo curua macainare.

⁴¹Ä ni tuhsu Jesu Jerusalē cahacäpu su, tí macare ñurocaro, tiha. ⁴²Ö sehe niha tiro:

—Jerusalē macaina mipu pinihtare musare pichacapu wahaborinare Cohamacu to yuhdohtore mäsä masichu noa yuhduaboa. Ä jipachuta mipure mäsä tíre ne tuho duaerare. Ä jiro Cohamacu tíre musare masi dutierare. ⁴³Musare ñu tuhtiina mäsä jiri macare soroahca. Ä yoa musare tina wijaaro wasi. ⁴⁴Tí pjata tina mäsä ya macare cohã pahñoahca. Mäsä cühure wajäahca. Musare ñu tuhtiina noano cohã pahñoahca mäsä ya macare. Cohamacu pichacapu wahaborinare musare to yuhdohtore mäsä masi duaerare. Mäsä masi duaerari buhiri musare ñu tuhtiinare Cohamacu musare cohã dutirohca —niha Jesu Jerusalē macainare.

Cohamacu wuhupu Jesu suha

(Mt 21.12-17; Mr 11.15-19; Jn 2.13-22)

⁴⁵Ä yoa Jerusalēpu suro, Jesu Cohamacu wuhupu sãa wahaha. Ä yoaro pache duainare tí wuhupu jiinare boca suro, tinare cohã wionocaha. ⁴⁶Ö sehe niha tiro tinare:

—Ö sehe nina Cohamacu yare ti joari pui: “Yu wuhu Cohamacu mehne durucuri wuhu wama tirohca”, niha to yare ti joari pui. To ä nipachuta mäsä sehe ahri wuhui duana, mäsä basi cahma yacara mäsä —niha Jesu.

⁴⁷Ä yoa dachoripe Cohamacu wuhupu Jesu buheha. Ä jia sacerdotia puhto, judio masare buheina, masa puhto cühu tirore ti wajähti cjihtire

wacū macaha. ⁴⁸Masa jipihtina tirore ā tuhorucua, to buheare noano tuho nūnūina jiha. Ti ā noano tuho nūnūchū űua, Jesure wajā duaina sehe tirore ti wajāhtire bocaerasiniha.

Sacerdotea puhtoā, judio masare buheina, bucūna mehne Jesure sinitu űua

(Mt 21.23-27; Mr 11.27-33)

20 ¹Pa dachoi Cohamacū wuhui Jesu masare noaa buheare buhero niha. To ā buhechū sacerdotea puhtoā, judio masare buheina, bucūna mehne tiro cahapū wihia, tirore ō sehe ni sinitu űua:

²—Yahuga sāre. ĞDohseacū canure ā yoari muhū? ĞNoa muhure tīre ā yoa dutiri? —niha tina Jesure.

³Ti ā nichū Jesu ō sehe ni yuhtiha tinare:

—Musa sehere sinitu muhtaihtja. Yahuga yuhure. ⁴ĞJoāo masare to bautisachū diro baro sehe tirore bautisa dutia tiari, musa tuhotuchū? ĞO Cohamacū dutiera tiari? ĞO masa sehe dutia tiari, musa tuhotuchū? —ni sinituha Jesu tinare.

⁵To ā nichū tina sehe ti basi ō sehe niha:

—ĞDohse ni yuhtinahcari mari? “Cohamacū Joāore dutia tiri jire”, mari nichū, “ĞDohseana Cohamacū Joāore to dutipachuta tirore tuho duaerari musa?” niboca Jesu marine. Ğjina “Cohamacū Joāore dutia tiri jire”, ni yuhti masieraja mari. ⁶Ahrina masa sehe “Potocāta Joāo Cohamacū yare yahu muhtariro jira”, ni tuhotura tina. Ğni tuhotua “Joāo to bautisachū Cohamacū tirore dutierari jire”, mari nichū tuhoa marine taa mehne docaboca masa. Ğjina tí cūhure yahu masieraja mari —ni durucuha tina ti basi.

⁷Ğni durucu tuhsua tina Jesure ō sehe ni yuhtiha:

—Joāore bautisa dutiriore sã masieraja —niha tina.

⁸Ti ā nichū Jesu ō sehe ni yuhtiha:

—Tí pja pinihta yuhū cūhū musa sinitu muhtarire yahueraja musare. Ahrire yū yoarire dutiriore yahueraja musare —niha tiro tinare.

Ñaina dahra cohtaina quitire yahuha Jesu

(Mt 21.33-44; Mr 12.1-11)

⁹Ğ yoa Jesu to tuhotua mehne piti dahre ō sehe ni buhe ducaha masare:

—Wese puro se dari cjihtire toaha. Toa tuhsū, tí wesere painare cū buhū-sehe coa pahma cūha. Pahma cūno tí wesere tinare űu wihbo dutiha. Ğduti tuhsū pa yahpapū waha, yoari pja bajueraha. ¹⁰Tuhsū, se űiri pja jichū wese puro to cahamacūnore wesere űu wihboina cahapū warocaha. Wese macaa to toaa dichare to ya coa macaare na dutiro warocamaha. Ğjia űu wihboina sehe to cahamacūnore wiho piti boca cĵānocaha tirore. Ğcĵānocaa, tina tirore dichare waerapahta tĵuaa dutiha tirore. ¹¹Ğjiro wese puro pairo to cahamacūnore tí wese macaa toaa dichare na dutiro warocamaha tĵoa. Ğjia wesere űu wihboina tiro cūhure cĵā, űano yoaha. Ğ yoa tuhsū tirore tí dichare waerapahta tĵuaa dutiha tĵoa. ¹²Tirore ti ā yoari baharo wese puro pairo cahamacūnore warocamaha tĵoa. To ā warocachū űua, wesere űu wihboina sehe tiro cūhure cami dahre, tí wese duhtū cahai cohānocaha tirore.

¹³Ti ā yoari baharo wese puro ō sehe ni tuhotumaha: “ĞDohse yoihcari yuhū? Ō sehe yoihtja. Yuhū yū macure yū cahīriore warocaihtja. Tina

tirore ño payoboca”, ni tuhotumaha wese puro sehe. ¹⁴ Ñ jia to macunore to warocarirore to suchu ñua ñu wihboina sehe ti basi ò sehe ni durucuha: “Ahriro wese puro macuno jira. Baharo ahri wesere cjuahitiro jira. Tirore wajajihna. Mari ã yochu ahri wese mari ya wese tjuarohca”, nimaha tina ti basi. ¹⁵ Ñ ni tuhsua wese puro macunore wese duhtu cahai cohã, wajãnocaha tirore. ¿Ti ã yochu ñano dohse yoarohcari wese puro wesere ñu wihboinare? —niha Jesu.

¹⁶ —Tiro wesere ñu wihboinare wajãno taro, paina sehere wesere ñu wihbo dutirohca —ni yuhtiha Jesu to basi.

To ã nichu tuhoa masa sehe ò sehe niha:

—Marine ã wahaero tjijaro —niha tina.

¹⁷ Ti ã nichu Jesu sehe tinare ò sehe ni sinituha:

—¿Cohamacu yare ti joari püre ò sehe ni durucua, dohse nino nijari, masa tuhotuchu?:

“Ahriro Cristo tãca yoaro seheta jira.

Tãcare wuhu dahreina ti cohãno seheta masa tirore cohãahca.

Ti ã yoapachuta mipure wuhu dahreina wuhure yoa ti cū mūhtari

tãcare ti cūno seheta Cohamacu tirore puhto sōhre”,

ni joaha. ¹⁸ Jipihina tia tãca bui bora pjainare payu dihicã peri yihsorohca tia tãca. Tuhsu, tia tãca masuno bui bora pjaro, tahãnocanohca tirore. Ñ tahãno to pjacu cjirore daa manaricã wahachu yoarohca. (Tó seheta yuhure cahmaeraina, yu buhiri dahrehtina ñano yuhduahca) —niha Jesu.

Puhtoa ya wapare paina sinituha Jesure

(Mt 21.45-46; 22.15-22; Mr 12.13-17)

¹⁹ To ã nichu tuhoa judio masare buheina sacerdotea puhtoa cūhu, “Jesu wesere ñu wihboina quti mehe marine tuhtiro nina”, ni tuhotuha tina. Ñ ni tuhotua tina Jesure ñaha duamaha. Ñ ñaha duapahta tina masare cui niha. ²⁰ Ñ cuia, Jesure ti ñahahti pjare cohtasiniha tina. Ñ jia tina quihõno yoina yoaro sehe ji mahño dutiha painare. To ñano ni yuhtichu yoa duaa nimaha tirore yahusã duaa. Ñ jia Jesure sinitu dutia warocaha mahñoinare. Jesu ñano to ni durucuchu tuhoa tí yahpa macaina bui puhtoro peresu yoa dutia taa nimaha. ²¹ Ñ jia tina Jesure mahño cū ò sehe ni sinitu ñumaha:

—Buheriro, potocã durucuriro, mahñoa marieriro mu jichu sã masija. Ñ jicu wiho jainare, puhtoa cūhure cūno potori yoara mūhu. Mūhu Cohamacu yare potocã mu buhechu cūhure sã masija. ²² Yahuga sãre. ¿Ne, Roma macarirore jipihina bui puhtoro gobierno macaare marine waparo cahmajari, mu tuhotuchu? ¿Mari dutia wapa dutijari, mu tuhotuchu? —ni sinituha tina Jesure.

²³ Ti ã nichu tuho Jesu ti ñano yoa duaare masino, tinare ò sehe ni yuhtiha:

²⁴ —Mipure niñeru ture na tahga. Tí ture ñujihna —niha.

Tí ture ti na wihichu ñano ò sehe niha Jesu:

—¿Diro baro masu wahājari ahri ture? ¿Diro baro wama wahājari? —niha Jesu tinare.

—César, masa bui puhtoro jirore ya masu, to wama cūhu wahāna —ni yuhtiha tina.

²⁵Ti ã nichu Jesu õ sehe ni yahuha:

—Tí pja pinihta masa bui puhtoro yare tiro sehere waga. Cohamacu yare Cohamacu sehere waga —niha Jesu tinare.

²⁶Ã to noano yuhtichu, masa ti ñurocaroi Jesure ñano ni durucuchu yoa masieraha tina. Æ jia Jesu yuhtiare tuhoa, tina cuaa waha, dihta mariea wahaha.

Saduceo curua macaina Cohamacu to masoare sinituha Jesure

(Mt 22.23-33; Mr 12.18-27)

²⁷Ã yoa mahainacã saduceo curua macaina Jesu cahapu wihiha. “Cohamacu yariainare masosi”, ni tuhoutuina jiha saduceo curua macaina. Æ jia tina õ sehe niha tirore:

²⁸—Buheriro, õ sehe ni buhea tiha Moise cjiro: “Cũiro to wahmino namo tiro pohna mariaparota to yariachu ñuno to bahurore to wahmino namono cjirore nuano cahmana. Æ yoaro to wahmino munano to pohna tiboro seheta pohna tiro cahmana to bahurore. Æ jia to pohna to wahmino munano pohna yoaro sehe jahca”, ni joaa tiha Moise cjiro —niha tina.

²⁹Tíre ni tuhsu ahri quitire yahu namoha tjoa Jesure:

—Cũiro masuno jiha. Seis to bahana jiha. Ti wahmino sehe namo ti, pohna marieriro yariaa wahaha. ³⁰Ã jiro paio to bahuro cũhu to wahmino namono cjirore nuoa. To ã nuari baharo to wahmino yoaro seheta pohna mariaparota tiro cũhu yariaa wahaha. ³¹Ã jiro ahriro bahuro cũhu to wahmino munano yoaro seheta pohna mariaparota yariaa wahaa. Æ dihta wahaha cũiro pohna waro. Ne pohna mariapahta yaria pihtia wahaha. ³²Ti namono cjiro cũhu ti baharota yariaa wahaha. ³³¿Ne Cohamacu jipihtinare yariaina cjiirire to masochu diro namono sehe jibocari ticoro pototi? Tina jipihtina ticorore namo tirina cjiiri jiha. ¿Ã jiro diro baro namono jirohcari? —ni sinituha tina.

³⁴Ti ã nichu Jesu õ sehe ni yuhtiha:

—Mipu macaina wamomaca duhtera. ³⁵Ti ã duhtepachuta paina sehe pa turu macaina sehe ã jierara. Paina muare, numia cũhure to yainare Cohamacu ñaa marieina jichu yorohca. Tina ti yariari baharo masa mujaahca. Æ yoa tina tópu wamomaca duhterara. ³⁶Ã jia tina anjoa yoaro seheta ne yariasi. Tina Cohamacu to masorina jia, Cohamacu pohna jira. ³⁷Mipure yariarina cjiiri ti masa wijaahto sehere musare yahuihtja. Tíre Moise cjiro noano yahu pahñoa tiha. To mahaducã jũri quitire õ sehe ni yahua tiha tiro: “‘Yuhu Abrahã, Isaa, Jacobo ti puhtoro tjija’, ni yahure Cohamacu yuhure”, ni joaa tiha Moise cjiro. ³⁸Ti yariari baharo “Ti puhtoro tjija”, ni yahua tiha Cohamacu. Æ niparota yariarina cjiiri puhtoro jierara Cohamacu. “Ti puhtoro tjija”, to nia mehne catiina ti jichu masija mari. Tiro catiina puhtoro jira. Jipihtina masa catira Cohamacu to ñuchu —niha Jesu tinare.

³⁹⁻⁴⁰To ã nichu tina sehe pari turi Jesure sinitu duaeraha. Æ jia mahainacã judio masare buheina õ sehe niha:

—Buheriro, muhu noano yuhtihre —niha tina Jesure.

¿Diro baro coyeiro jijari Cristo?

(Mt 22.41-46; Mr 12.35-37)

⁴¹Baharo Jesu õ sehe ni yahuha tinare:

—“Cristo Davi cjiro panamino jirohca”, ni buhera paina. ¿Dohse yoa tina ã ni buhejari? ⁴² Davi cjiro to basi Salmopu to joari tjupu ò sehe ni joaa tiha:

“Cohamacu yu puhtorore ò sehe nire: ‘Õi yu poto buhusehei dujiga.

⁴³ ã jicu muhure ñu tuhtiinare muhure yuhdurucabasaihca yuhu’, nire Cohamacu yu puhtorore”,

ni joaa tiha Davi cjiro. ⁴⁴ ã ni joaro Davi cjiro puhtoro tiha Cristore. Davi cjiro Cristo ñuchuno cjiro jiparota Cristore puhtoro tiha. ¿Davi cjiro Cristo ñuchuno cjiro jiparota dohse jiro baro tiro puhtoro tiari Cristore? —ni yahuha Jesu. (Cristo sehe Davi cjiro puhtoro jira.)

Judio masare buheina ti ñaa yoaare yahuha Jesu

(Mt 23.1-36; Mr 12.38-40; Lc 11.37-54)

⁴⁵ Masa payu Jesure ti tuhoru watoi Jesu sehe to buheinare ò sehe ni yahuha:

⁴⁶ —Mari judio masare buheina ti ñaa yoaare ñña noano wacũ masiga. ã jina ti yoaro sehe yoaena tjiga. Tina yoa suhti sãa, masa ti ñurocaroi majarea, pache duaropu paina puhtoare noano ño payo ti sinino sehe ti piti bocasinichu cahmana tina. ã cahmaina jia, tina mari judio masa buhea wuhusei noaa dujia dihtare bese duji duara. Tuhsu, bese numu jichu tó cùhure noaa dujia dihtare cahmana. ⁴⁷ Tina wapewahya numia ya wuhusere ti ya cùhure mana tí numiare. ã yoaina jia, tina masa ti ñurocaroi yoari pja Cohamacure sinimana masare ñu dutia. Ti ã yoachu tinare Cohamacu pjíro buhiri dahrerohca —niha Jesu tinare.

Wapewahyoro Cohamacu wuhui to warire yahuha Jesu

(Mr 12.41-44)

21 ¹ ã ni yahu tuhsu niñeru wihbori caroi pache pua ti niñerure ti duhu sãachu ñu dujiro niha Jesu. Tí niñeru Cohamacu wuhure ti cahnochu ti wapahti jiha. ² ã ñuno wapewahyoro pjacuoricoro to pua tucãre to duhu sãachu cùhure ñña. ³ Tíre ñu tuhsu ò sehe ni yahuha:

—Potocã niita nija musare. Ahricoro wapewahyoro pjacuoricoro sehe niñeru wihbori caropu duhu sãano paina jipihtina ti wari yuhdoro wahre ticoro sehe. ⁴ Paina pache pua pjíro ti wapachuta ti ya pjíro duhsara. Ahricoro sehe pjacuoricoro jiparota jipihtia to chuhtire to nuchubocãre wa pah-ñohre —ni yahuha Jesu.

“Cohamacu wuhu cohãri wuhu jirohca”, niha Jesu

(Mt 24.1-2; Mr 13.1-2)

⁵ ã yoa paina Cohamacu wuhure ò sehe ni ñña niha:

—Noaa tãa mehne yoari wuhu, noacari wuhu jijari. Masa Cohamacu ya wuhu cjihtire ti wari cjiri cùhu tí wuhupure noaca cùri jira —ni durucua niha.

Ti ã nichu Jesu ò sehe ni yahuha tinare:

⁶ —Ahri jipihtia mari ñuri cjiri wuhuse, ahri tãa cùhu cohõ pihtia wahaahca. Ne cùria tãa tjuasi —niha Jesu tinare.

Pihtiri dacho cjihtore yahuha Jesu

(Mt 24.3-28; Mr 13.3-23)

⁷ To ã nichu tuhoa tina sehe ò sehe ni sinituha tire:

—Buheriro, ¿dohse jichu mu niriro sehe waharo ā waharohcari? ¿Pihtiri dacho panocā jichu dohse to waha ducachu ñunahcari sā? —ni sinituha tina Jesure.

⁸Jesu ō sehe ni yuhtiha tinare:

—Noano yoaga musa. Ā jina musare paina ti mahñoare tuhoena tjiga. Payu masa “Cristo jija yuhu”, niina taahca. Ā nia, “Mipure pihtiri dacho cjihto mahanocā duhsara”, niahca. Ti ā nichu tinare tuhoena tjiga. ⁹Ā yoa paina “Cahma wajāa nina”, musare niahca. “Mipure puhtoare masa cohāa nina”, niahca. Musa tíre tuhona cuiena tjiga. Pihtiri dacho pano ō sehe waha muhtanohca. To ā wahachu pihtiri dacho cjihto duhsasinohca mini —niha Jesu.

¹⁰Ā ni tuhsu ō sehe ni yahu namoha:

—Cū yahpa macaina pa yahpa macaina mehne cahma wajāahca. ¹¹Tuhsu, tuaro yahpa ñuhmi, masa payu juca mehne yaria, jipihtiromo macaina dohahca. Ā yoa muano macaa bajuamehneare masa ñua, ñu cuaa wahaahca.

¹²‘Ahri jipihitia ti ā wahahto pano, paina musare ñaha, ñano yoaahca. Tuhsu, mari judio masa buhea wuhusei tina musare yahusā, peresu yoaahca musare. Ti ā yoachu yahpari macaina puhtoa panoi, macari macaina puhtoa panoi ducunahca musa ti yahusāhtina. Yu yaina musa jiri buhiri ā yoaahca. ¹³Ti ā yahusāchu musa sehe noaa buheare tinare yahunahca. ¹⁴Tí pjare musare ti yahusāchu puhtoro musa yuhtihtore “Yahu masieraboca”, ni tuhotuena tjiga musa. ¹⁵Yuhu musare yahubasaihtja. Musare ā yoadohocu tuho masiare, noaa durucua cūhure musare yahuchu yoihtja. Musa ā yoachu musare ñu tuhtiina sehe musa durucua tuho, “Tí potocā jierara”, ni yuhti masisi. ¹⁶Tí pjare musa pucsuma, musa bahana, musa coyea, musa mehne macaina cūhu musare ñu tuhtiinare waahca musare yu yaina musa jiri buhiri. Ti ā yoachu musare ñu tuhtiina musa mehne macainare painare wajāahca. ¹⁷Ā yoa yu yaina musa jichu ñua, jipihitia musare ñu tuhtiahca. ¹⁸Musare ā ñu tuhtipahta ne mahanocā musare ñano yoasi. ¹⁹Ā jina Cohamacure wacū tuaina jiga musa. Musa ā yoana, Cohamacu mehne ā jirucunahca.

²⁰Ā yoa payu surara Jerusalēpu ti soroachu ñuna, Jerusalēne ti cohāhto to mahanocā duhsachu masinahca musa. ²¹Ti ā yoachu ñua Judea yahpai jiina tūyucu cahapu muroca duhtijaro. Ā yoa Jerusalēi jiina wahajaro. Ā yoa campoi jiina Jerusalēpu wahaeta tjijaro ti waha bahrañohto sehe. ²²Tí dachorihi buhiri dahrea dachorihi jipihitia Cohamacu yare ti joari pū to niriro cjiro seheta ā waharohca. ²³Jipihtiropu ahri yahpai ñano yuhduahca. To ā wahachu, niji wahcōa numia, ti pohnare pūina numia cūhu pjacuoro wahaahca. ²⁴Paina ahri maca Jerusalē macaina mehne cahma wajāahca. Ā cahma wajāa, paina ahri maca macainare jipihitia yahparipu na wahcā, peresu yoaahca. Ā jia judio masa jieraina Jerusalēne ñano yoa, tinare yuhduhucaahca. Judio masa jieraina ya dacho to pihtichupu Jerusalē macainare ñano yoa duhuahca —ni yahuha Jesu.

Jesu yahpau to tjua tahtore yahuha

(Mt 24.29-35, 42-44; Mr 13.24-37)

²⁵Ā ni yahu tuhsu, tinare ō sehe ni yahu namoha:

—Tí pjare sū dacho macariro, ñami macariro, ñahpichoha cūhu cohto-taahca. Jipihitia ahri yahpa macaina “Cue, yarianahca”, ni tuhotuina pjiri

ma macaa pahcōri cuaro choro ti bisiro coa tachu tuhoa tuaro cuiahca. ²⁶Tí pjare muano macaa yahpari, ñahpichoha cūhu tuaro ñuhmiahca. Ti ā wahachu ñua, masa sehe ahri yahpa to pihtihtore cohtaa, tuaro cuiahca. ²⁷Tí pjata yuhu masuno Cohamacu warocariro Cohamacu tuaa mehne to si sitea mehne yu tachu ñuahca masa. ²⁸Ahri ti ā waha ducachu ñuna, wacū tuaina jiga. Ā jina muanopu ñuga. Tí pjare Cohamacu masare pichacapu wahaborinare to yuhdohto mahanocā duhsarohca —niha Jesu.

²⁹Ā ni tuhsu ahri quti mehne piti dahre buheha Jesu:

—Higueracure, paye yucu cūhure tuhutuga musa. ³⁰Tí yucuri pūri tichu ñuna, cūhma cjihto to mahanocā duhsachu masina musa. ³¹Tó seheta ahri jipihtia yu niri cjiire ti ā wahachu ñuna, Cohamacu masare puhtoro to noano suho jihti pja mahanocā duhsachu masinahca musa.

³²Musare potocā niita nija. Tí pja macaina ti yariahto pano jipihtia yu niriro seheta ā waharohca. ³³Muano, ahri yahpa cūhu pihtia wahaahca. Yu durucua sehe ne cohtotasi. Jipihtia yu niriro seheta ā waha sohtori tiarohca.

³⁴Yu tjua tahti dachore ne masierara musa. Ā jina noano yoaga. Bose numurine bujua yoarucua tjiga. Ā jina cahaena tjiga. Ahri yahpa macaare pjiro tuhutuena tjiga. Musa yu niriro seheta yoana, wacūenoca ahri yahpau yu tachu musa ne cuasi. ³⁵Wahiquirore yurida wahiquirore wacūenoca to tuā suhoro seheta wacūenoca taihca yuhu. Jipihtina ahri yahpa macaina ti masieraro watoi tí dachoi wacūenoca ā waharohca. ³⁶Noano wacū masi cohtaga. Ā jina Cohamacure ahrire ā sinirucuga: “Ahri pihtiri dachore ā wahachu yuhure yoadohoga. Tuaare waga yuhure ahrire noano yu yuhduhti cjihtire. Tuhsu, Cristore mu warocarirore cuiro marieno yuhure piti bocachu yoaga”, ni siniga Cohamacure —niha Jesu.

³⁷Ā yoa tí dachorire Cohamacu wuhui Jesu buhea tiha. Naminipe buhe tuhsuro Olivo wama tidu tucupū waha, tópu ji bohrea tiha. ³⁸Bohrea taharipe jipihtina masa Cohamacu wuhupu tirore tuhoa wahaa tiha.

Sacerdotea puhtoa, judio masare buheina mehne wajā duaah Jesure

(Mt 26.1-5, 14-16; Mr 14.1-2, 10-11; Jn 11.45-53)

22 ¹Ā yoa tí pjare bucaerari pāore ti chuhti bose numuri mahanocā duhsaha. Tí bose numuri pascua wama tiha. ²Ā jia sacerdotea puhtoa, judio masare buheina mehne Jesure wajā duaah, ti wajāhtore wacū macaha. Jesure wajā duapahta, masa sehere cuiha, “Suari”, nia.

³Ā yoa watino Juda Iscariotere ñano to yoa dutichu Juda sehe yuhtiha tirore. Juda doce buheina mehne macariro jimaha. ⁴Ā yoa tiro sacerdotea puhtoare, Cohamacu wuhu macaina surara puhtoa mehne cūhure suhuro wahaha. Ti cahapu su, tinare Jesure to ñohtore suhuduha tina mehne. ⁵To ā nichu tuhoa, tina wahche, “Muhure niñerure wapanahaja”, niha tina Judare. ⁶Ti ā nichu Juda “Jai, tirore musare ñoihtja”, ni masa ti ñueraro watoi Jesure ñu tuhtiinare to ñohti ñamine cohtasiniha.

Jesu buheina mehne to chu batoari numu jiha

(Mt 26.17-29; Mr 14.12-25; Jn 13.21-30; 1Co 11.23-26)

⁷Bucaerari pāo bose numuri ti ji ducari dacho jiha. Ā jiro pascua macaina cjihtire ovejare ti chuhtinare ti wajāhti numu jiha. ⁸Tí pjata Pedrore, João cūhure Jesu ō sehe ni yahuha:

—Bose numui mari chuhtire cahnoyuna wahaga —niha Jesu tinare.

⁹—¿Mari pascua macaa chuhtire noho baroi cahnoyu dutirocaijari mũhu sãre? —ni sinituha tina tirore.

¹⁰Ti ã nichu Jesu õ sehe ni yuhtiha:

—Jerusalẽpu musa suchu co situ wuaro musare piti bocarohca. To piti bocachu tiro mehne wahaga. ¹¹Ã wahana tiro to suho sãari wuhupu suna tí wuhu purore õ sehe ni yahuga. “ ¿Dí tahtiai yuhũ yũ buheina mehne pascua macaa chuare chũnahcari?” ni sinitu dutirocahre buheriro”, niga tí wuhu purore. ¹²Musa ã nichu tuhoro, tópu muano macari tahtiare pjiri tahtiare, noano ti cahnoyuri tahtiapure musare ñonohca wuhu puro. Tói mari chuhti cjihtire dahrega musa —niha Jesu tinare.

¹³To ã nichu tina tí macapu wahaha. Tópu ti suchu tinare to niriro seheta wahaha. Æ jia tina pascua macaa chuare dahreha.

¹⁴Ti churi pja jichu Jesu doce to buheina mehne chu dujiha. ¹⁵⁻¹⁶Tópu ti churopu dujiro Jesu tinare õ sehe ni yahuha:

—Musare niita nija. Ahri pascua bese numurine mari dahreja Cohamacu to yainare to yuhdohtore wacũna. Baharo Cohamacu masare puhtoro to noano suho jiropu to yainare yuhdo tuhsurohca. To ã yuhdohto pano ahri numuri baro macaare pari turi chũeraja yuhũ. Æ jicu mipure ñano yuhdu, yũ yariahto pano ahri pascua macaa chuare musa mehne tuaro chu dua tihi —niha Jesu.

¹⁷⁻¹⁸Ã ninota Jesu sihniri wahware na, Cohamacure “Noana”, ni sini, tinare õ sehe ni yahuha:

—Musare niita nija. Cohamacu jipihtina bui puhtoro to noano suho jihto pano ahri vinore ne pari turi sihnisi yuhũ. Æ jina ahri vinore na, musa basi witi, sihniga —niha Jesu.

¹⁹Ã ni tuhsu pão curire na, Cohamacure “Noana”, niha. Æ ninota, tí curire nuha, witiha tinare. Tí curire witirota, tinare õ sehe ni yahuha:

—Ahri yũ pjacu jira. Yũ pjacu yuhure ñũ tuhtiinare ti wari pjacu jirohca. Musa ñaa yoari buhirire cohãcu tacu yariaihca yuhũ. Æ jina yuhure musa wacũhti cjihtire ahrire chuga —niha Jesu.

²⁰Ã chu tuhsu tó seheta tiro tinare sihniri wahwa cũhure waha. Æ waro, tinare õ sehe ni yahuha:

—Musa ñaa buhirire cohãcu tacu yariaihca. Æ yoacu yũ dire cohãihca. Cohamacu “Musare yuhdoihtja”, to niriro mu suchu ã yũ yariaro mehne to niriro sohtori tirohca.

²¹Mipure tuhoga musa. Yuhure ñũ tuhtiinare yuhure ñohtiro mipure yuhũ mehne õi dujira. ²²Cohamacu to dutiro sehta yuhũ masuno Cohamacu warocararo yariaihca. To ã yaria dutipachuta yuhure ñũ tuhtiinare ñoriro pinihta ñabiario yuhdurohca —niha Jesu tinare.

²³To ã nichu tina sehe ti basi õ sehe ni sinituha:

—¿Jesure ñũ tuhtiinare ñohtiro mari mehne macararo diro baro jicari na? —ni durucuha tina ti basi.

**“¿Mari mehne macararo diro sehe jicari na puhtoro?”
ni durucuha Jesu buheina ti basi**

²⁴Baharo Jesu buheina õ sehe ni durucuha:

—¿Mari mehne macariro diro sehe jicari na puhtoro? —ni durucuha ti basi.

²⁵ Ti ã ni durucucha tuhoro Jesu tinare õ sehe ni yahuha:

—Cohamacure cahmaeraina puhtoa sehe ti masare dutia, purĩno mehne dutira. Æ jia puhtoare “Tina masare yoadohoina jira”, nimana paina masa tinare. ²⁶ Musa sehe tó sehe yoasi musa basi. Musa mehne macariro musa wahmi sehere to bahuro yoaro sehe jiro cahmana. Musa mehne macariro puhtoro ji duaro cahamacuno yoaro sehe jiro cahmana tire. ²⁷ ¿Diro jijari puhtoro? ¿Chu dujiriro sehe puhtoro jijari? ¿O chũare duhu payoriro sehe puhtoro jijari? Chu dujirirota jica puhtoro. To ã jipachuta yũhu sehe cahamacuno yoaro seheta musare yoadohoi tai.

²⁸ ‘Masa yũhure ti ñano yoapachuta musa sehe yũhure duhuerare. ²⁹ Æ jicu yũ Pucu yũhure to puhtoro sõiro seheta musa cũhure puhtoa sõihtja yũhu. ³⁰ Yũhu puhtoro yũ jichu yũ churi mesai musa cũhu chu, sihninahca. Æ yoana musa puhtoa dujiare dujinahca. Musa tõi dujina Israe masare doce curuari macainare besenahca musa ñaina, noainare —niha Jesu to buheinare.

Pedro Jesure to cohãhtore yahuha Jesu

(Mt 26.31-35; Mr 14.27-31; Jn 13.36-38)

³¹ Æ ni tuhsu Pedore Jesu õ sehe ni yahuha:

—Simo Pedro yũhure tuhoga. Musare jipihtinare yũhure cohãchu yoa duara watĩno. Trigo wese puro to trigore to wã site cohãriro seheta musare jipihtinare watĩno ñano yoa duara “Ñaare yoajaro”, nino. Æ yoa duaro, Cohamacure sinihre. ³² To ã sinichu ñucu yũhu sehe Cohamacure sini payohi muhure. Yũhure mu wacũ tua duhuerahiti cjihtire sini payohi muhure. Æ jicu muhu yũhu mehne macariro pari turi jicu mu coyeare yũ yainare yoadohoga muhu —niha Jesu Pedore.

³³ To ã nichu Pedro õ sehe ni yũhtiha:

—Puhtoro, yũhure ti peresu yoapachuta, yũhure ti wajã duapachuta muhu mehne macariro jiihtja —nimaha Pedro.

³⁴ Jesu õ sehe ni yũhtiha:

—Pedro muhure niita nija. Micha ñami caraca to duhto pano “Jesure masieraja”, niihca muhu painare. Tia taha ã niihca muhu —niha Jesu Pedore.

Jesure ti ñano yoa dũcahto mahanocã dũhsaha

³⁵ Æ ni tuhsu Jesu to buheinare õ sehe ni yahuha:

—¿Sohõ jiri pja musa niñeru wajuru marieina, pjiri wajuru marieina, dahpo suhti marieina musare yũ warocachu paye baro dũhsari musare? —ni sinitu ñũha Jesu.

—Ne sãre yaba dũhsaerare —ni yũhtiha tina.

³⁶ —Tĩ pjare musare dũhsaerapachuta mipu sehere niñeru wajurure cjuana tĩre naga. Pjiri wajurure cjuana cũhu naga. Æ jina musare ñosari pjĩ mariachu musa suhtire duana tĩ pjine nuchuga. ³⁷ Ahrire musare nii nija. Cohamacu yare ti joari pũi ti niriro seheta yũhure ã waharo cahmana. Õ sehe niha tĩ pũi: “ ‘Tiro dutiare yũhdurucaina mehne macariro jira’, niahca masa”, ni joa tiha —niha Jesu.

³⁸—Ñuga puhtoro. Pua pjĩ ñosaa pjĩnine cjuaja sã —niha to buheina.
—Tó puro tjica —ni yuhtiha Jesu.

Getsemaní wama tiropu Jesu Cohamacure siniha

(Mt 26.36-46; Mr 14.32-42)

³⁹ Ñ yoa Jesu to ã yoarucuriro seheta Olivo wama tidu tũcupu wahaha. To ã wahachu to buheina tiro mehne wahaha. ⁴⁰ Tõpu suro tiro tinare õ sehe ni yahuha:
—Cohamacure siniga ñano musa yoerahto sehe —niha Jesu tinare.

⁴¹ Ñ ni tuhsu tiro to sahsero mahanocã waha namo, na tuhcuca caha su,
⁴² Cohamacure õ sehe ni siniha:

—Mai, yu ñano yuhdũhtire yoa duaeracu yoai tjia. Yu ã nipachuta yu cahmaa sehene yoai tjia. Mũhu sehe masina. Mũ cahmano seheta yoaga yuhure —ni siniha Jesu Cohamacure.

⁴³ [To ã sinichu muanopu duji tarihi anjo Jesure bajua, yoadohoha tirore.

⁴⁴ Tuhsu, Jesu ñano yajeripohna ti, tuaro mehne Cohamacure siniha. Ñ jia to so witia di yahpari yoaro sehe jia tirore wijaa, yahpapu bora caha suha.]

⁴⁵ Cohamacure sini batoa wahcãrucu su, tiro to buheina cahapu wihiha. Ñ to wihichu to buheina tuaro cahyaina jia, carĩa niha. ⁴⁶ Ñ jiro Jesu tinare õ sehe ni yahuha:

—¿Dohseana carĩa nijari musa? Wahcãga. Cohamacure siniga ñano musa yoerahto sehe —niha Jesu tinare.

Jesure ñu tuhtiina tirore peresu yoaha

(Mt 26.47-56; Mr 14.43-50; Jn 18.2-11)

⁴⁷ To ã ni durucuro watoi masa payu wihiha. Juda doce buheina mehne macariro cjiro masare mu tã tarihi jiha. Ñ jiro tiro Jesu cahai wihi, wahsupu wihmiha tirore. ⁴⁸ To ã wihmichu Jesu tirore õ sehe ni sinituha:

—Judá, ¿yuhu masunore Cohamacu warocarirore yuhure ñu tuhtiinare ñocu yuhure wahsupu wihmijari mũhu? —niha Jesu.

⁴⁹ To ã niri baharo Jesu buheina masa Jesure ti ñahahtire masia, tirore sinituha:

—Puhtoro, ¿sã ñosaa pjĩni mehne tina mehne cahmachema? —niha tina.

⁵⁰ Ti ã niri baharo cãiro Jesu buheina mehne macariro sehe sacerdotea bui puhtoro cahamacunore to ñosari pjĩ mehne to cahmonore poto buhusehei jiri cahmonore cã pahrẽnocaha. ⁵¹ To ã yoachu ñuno Jesu tirore õ sehe niha:

—Ñ yoai tjica —niha.

Ni, cahamacuno cahmono jiri cjiroi ña payoha. To ã ña payochuta cahmono munano seheta jiha tjoa. ⁵² Ñ yoa tuhsu sacerdotea puhtoare, Cohamacu wũhu macaina surara puhtoare, bucuna cũhure tirore ñaha tainare Jesu õ sehe ni sinituha:

—¿Dohse jiro baro musa ñosaa pjĩni, yucu tiri mehne yacarirore ti yoiri sehta musa yuhure ñahana tajari? ⁵³ Dachoripe Cohamacu wũhupu musa mehne yu jichu, musa yuhure ne ñahaerare. Ñ jipachuta mipure musa ya dacho yuhure musa ñano yohti dacho jira. Mipu watino to ñano yohti dacho cũhu jira —niha Jesu.

“Tirore masieraja”, niha Pedro Jesure

(Mt 26.57-58, 69-75; Mr 14.53-54, 66-72; Jn 18.12-18, 25-27)

⁵⁴ Tina Jesure ñaha tuhsu sacerdotea bui puhtoro ya wũhupu naaha tina tirore. Ti tõpu naachu Pedro yoropu tinare ñu nunu tiha. ⁵⁵ Puhtoro wũhupu

sū, tói wuhū cahai jiri wapai, noari wapa dacho macai pichaca wijāha paina. Ti ā wijāchū nūno Pedro pichaca cahai dujiina mehne dujiha. ⁵⁶To ā dujiri baharo cūcoro cahamacono tirore noano nū, painare ō sehe ni yahuha:

—Ahriro cūhū tiro mehne jihre —niha ticoro.

⁵⁷To ā nichū tuhorō Pedro ō sehe ni yuhtiha:

—Numino, tirore ne masieraja yuhū —nimaha tiro.

⁵⁸Ticoro to ā niri baharocāta paio Pedrorē nū, ō sehe niha tjoa:

—Muhū cūhū tina mehne macariro tjira —niha tiro.

—Ne jieraja —nimaha Pedro.

⁵⁹Cā hora baharo paio painare ō sehe ni yahuha:

—Potocā tjira. Ahriro Galilea macariro jira. Ā jiro potocāta Jesu mehne jihre ahriro cūhū —ni yahuha tiro painare.

⁶⁰To ā nichū Pedro ō sehe ni yuhtiha:

—Ne, mū niriore masieraja yuhū —ni yuhtiha Pedro.

To ā ni durucuro watoi caraca duha. ⁶¹To ā duchūta Jesu wuhū cahai jiriro Pedrorē majare nūrocāha. To ā yoachū Pedro sehe Jesu to yahurire wacūha. “Micha nāmi caraca to duhto pano, ‘Yuhū Jesure masieraja’, niihca mūhū. Tia taha ā niihca mūhū”, Jesu to niri cjiire wacūha Pedro. ⁶²Ā wacūno Pedro tōpu jiriro wijaa ta, tuaro tiirucuha.

Jesure bujupe, cājā tina

(Mt 26.67-68; Mr 14.65)

⁶³Ā jia Jesure cohtaina surara tirore bujupe, cājā mūjaha. ⁶⁴Ā cājā mūja, to caparire dūhte dūcata, tirore ō sehe ni sinituha:

—¿Diro mūhure cājari? Nuerapaihta yahuga sāre —ni sinitu, bujupeha tina.

⁶⁵Ā jia payū nāno ni durucuha tina tirore.

Jesure puhtoa sinituha

(Mt 26.59-66; Mr 14.55-64; Jn 18.19-24)

⁶⁶Bohrearoi judio masa bucūna, sacerdotē puhtoa, judio masare buheina cūhū cahmachuha. Ti ā cahmachunoi paina tina cahapū Jesure na taha.

⁶⁷—Yahuga sāre. ¿Cristota jijari mūhū? —ni sinituha tina Jesure.

Ti ā nichū Jesu ō sehe ni yuhtiha:

—Musare yū yahuchū, yuhure tuhosi musa. ⁶⁸Musare yū sinituchū yuhure yuhtisi musa. ⁶⁹Musa yuhtierapachūta baharo curero jipihtia dachoripe yuhū masuno Cohamacū warocariro Cohamacū tua yuhduariro to poto būhusehei dujihtja —niha Jesu.

⁷⁰To ā nichū tina jipihtina sinituha tjoa pari turi:

—¿Ā nicū Cohamacū macūnota jijari mūhū? —niha tina.

—Tirota jija musa nino seheta —ni yuhtiha Jesu tinare.

⁷¹To ā nichū tuhoa, tina ō sehe ni durucuha ti basi:

—Ahriro Cohamacūre pjiro to nāno durucuchū mari basi tuhohi. Ā yoa ahriore yahusāina tōpeina tjiaro. (Tōpeina mehne tirore mari wajā duti masija) —niha tina ti basi.

Pilato Jesure sinituha

(Mt 27.1-2, 11-14; Mr 15.1-5; Jn 18.28-38)

23 ¹Ā ni tuhsū tina jipihtina wahcārūca, Jesure Pilato cahapū naaha.

²To cahapū na sua, Jesure yahusā dūcāha:

—Ahriri mari ya yahpa macainare to ñano yoa dutichu sā tuhohi. Mari bui puhtorore ahriri wapa dutierara. Tuhsu, tiro “Puhtoro jija. Cristo masare yuhdohtiro jija yuhu”, ni durucure to basi —ni yahusāha tina Jesure.

³Ti ā ni yahusāri baharo Pilato Jesure ō sehe ni sinituha:

—¿Judio masa puhtorota jijari muhu? —niha tiro Jesure.

—Mu nino sehetā tiro tjija —ni yuhtiha Jesu.

⁴To ā nichu Pilato sacerdotea puhtoare, masa cūhure ō sehe ni yahuha:

—Ahriri yaba buhiri mariahna —niha tiro.

⁵To ā nipachuta tina tuaro yahusā namoha:

—Tiro to buhea mehne masare cahmachechu yoara. Galilea yahpai tiro tīre yoa ducare. Ā yoa dūca tuhsu jipihtiro Judea yahpapu tīre tiro yoare. Mipū ōpu cūhure tīre yoaro taro nina —ni yahusāha tina.

Herode Jesure sinituha

⁶Ti ā ni yahusāchu tuhoro Pilato sehe ō sehe ni sinituha:

—¿Ahriri Galilea macariri jijari? —niha tiro.

⁷—Tó macariri tjira —ni yuhtiha paina.

Ti ā ni yuhtichu tuhoro Pilato sehe Jesu to jiri yahpare masino puhtoro Herode ya yahpa macariri Jesu to jichu masiha. Tīre masino Jesure Herode cahai warocaha. Tí pjare Herode Jerusalēi jia tiha. ⁸Tó panopu Herode Jesure tuhoa tiha. To ā tuhori baharo yoiari pja baharo tirore ñu duaha. Jesu Cohamacu tuua mehne to yoa ñochu ñu duamaha tiro. Ā jiro tiro Jesure ñuno, wahcheha. ⁹Ā jiro payu tahari sinituha Jesure. To ā sinitupachuta Jesu ne yuhtieraha tirore. ¹⁰Sacerdotea puhtoa, judio masare buheina cūhu Herode cahai wahcāruca, tuaro Jesure yahusāha. ¹¹Ti yahusāri baharo, Herode to surara mehne bujupe, Jesure ñano yoaha. Ā bujupea, noari suhtirore puhtoro to sāari suhtiro yoaro sehe bajuri suhtirore sāaha tina Jesure. Ā bujupe tuhsu, tirore Pilato cahapu warocaha tjoa. ¹²Tí dachore Herode, Pilato mehne noano ti basi cahma yoina ji dūcaha. Tó panore ti basi cahma ñu tuhtiina jisnimaha.

Masa Jesure wajā dutiha

(Mt 27.15-26; Mr 15.6-15; Jn 18.39-19.16)

¹³Ā yoa Pilato sacerdotea puhtoare, paina puhtoare, masa cūhure to pjiro-cachu, cahmachuha. ¹⁴Ti cahmachu pihtichu ñuno ō sehe niha Pilato tinare:

—Ahrirore yuhure na tana, “Tiro masare ñano yoa dutira”, nimahre musa yuhure. Mipū musa ñurocaroi ahrirore noano sinitu pahñohi tjoa. Yu ā sinituri baharo musa tirore ā yahusārucuchu tirore ñaa buhiri ne mariahna, yu ñuchu.

¹⁵Herode cūhu tirore “Ne, ñaa buhiri mariahna”, nihre. Ā nino ahrirore pari turi sāre wa majare tjuhre tjoa. Ā jina ahrirore to ñaa buhiri mariachu tirore musa wajā duti masierara. ¹⁶Ā jicu tirore yuta dari mehne tjana dutiilhca yuhu. Ā ti tjanari baharo tirore woihtja —nimaha Pilato masare.

¹⁷[Cuhmaripe pascua bose numurine masa yairo cjihtore cūiro peresupu jirirore Pilato wiobasa mujaa tiha.] ¹⁸Ā jia Pilato “Jesure woihtja”, to nichu tuhoa jipihtina masa ō sehe ni sañurucuha:

—Tirore Jesure wajāga. Sā yairo cjihtore Barrabā sehere sāre wiobasaga —ni sañurucuha masa.

¹⁹Tí pjare Barrabá wama tiroiro Jerusalēpu puhtoare cohā duaina mehne macaripo, masunore wajāriro peresupu jiha. Ā jia tirore masa wio dutia niha. ²⁰Pilato Jesu sehere wio duamaha. Ā jiro tiro masare sinitu űuha tjoa. ²¹To ā wio duapachuta tina tirore ō sehe ni sañurucuha tjoa:

—Crusapu cjā puha wajāga tirore. Wajāga tirore —ni sañurucuha tina.

²²Ti ā nichu Pilato tia taha waharoi ō sehe nimaha tinare:

—¿Yabare űano yoari tiro masa ā ni sañurucuhu? Ne tirore űaa buhiri mariahna. Ā jicu tirore wajā duti masieraja. Tirore yuta da mehne tjana dutiuhca. Tó purota yoa dutiuhca. Ā yoacu wioihca tirore —niha Pilato.

²³To ā nipachuta tina tuaro mehne sañurucu namo, Jesure crusapu wajā dutiha. Ti ā ni sañurucuhu tuhoroi ti cahmaroi sehetā Pilato yoaha. ²⁴Tirore ti siniri sehetā Pilato Jesure wajā dutiha. ²⁵Ā dutiro tiro peresupu jiriore masare cahmachehu yoariore, masare wajāriore masa ti siniri sehetā Pilato Barrabá sehere wioha. Tuhsu, Pilato Jesure crusapu wajā dutiha.

Tina Jesure crusapu cjā puha, wajāha

(Mt 27.32-44; Mr 15.21-32; Jn 19.17-27)

²⁶To ā wajā dutichu tina Jesure wajāha waha, naaha. Tí pja ti ā yoaro watoi Simo wama tiroiro Cirene macaripo campopu suri wihia. Jerusalēpu to wihichu űua Jesure naaina tirore piti boca, űaha, Jesu to wuuri crusare tirore wua wahcā dutiha Jesu baharo.

²⁷Ā yoa masa payu Jesure űu nunu tiha. Ā jia masa watoi jia numia tirore ti ā yoachu űua tuaro tiha. ²⁸Ti ā tiichu tuhoroi, tí numiare Jesu majare űu, ō sehe niha:

—Jerusalē macaa numia, yuhure tiina tjiga. Masa basi, masa pohna masa űano yuhduhtire masina, tiibasaga. ²⁹Paye dachori jichu űabiaro yuhdunahca masa. Tí pjare masa ō sehe niahca: “Pohna mariea numia, pohna tierari numia, pūera numia mipu mari jichu noabiaboa”, niahca masa. ³⁰Tí pjare tūcure ō sehe ni durucuahca masa. “Muhu tūcu sā buipu bora pjaga. Sāre ducatahga”, niahca masa cuia. ³¹Masa buhiri marierore yuhure ō sehe ti yoachu, űaa buhiri cjuaina sehe űabiaro wahaahca —niha Jesu.

³²Paina puaro, dutiare yuhdurucaina ti jichu tina cūhure Jesu mehne ti wajāhtinare naaha tina. ³³Tinare naa, “Dapu cohā”, wama tiropu su, crusapu Jesure cjā puha ōha. Puaro yuhdurucaina cūhure pairore to poto buhusehei, pairore to cō buhusehei cjā puha ōha. ³⁴[Ti ā yoachu Jesu ō sehe niha:

—Mai, ahrina mipu ti űaa yoiri boga tinare. Tina ti dohse yoiri masierara. Ā jicu ti űaa yoiri buhirire boga —niha Jesu.]

Ā yoa Jesu suhtire cahma witia tina docapeha. To suhti cjirire “Noa yaro jirohcaroi ō”, ni cahma docapeha tina. ³⁵Tuhsu, masa tói ducaina ti űurucuro watoi judio masa puhto Jesure ō sehe ni bujupeha:

—Tiro paina masare yariaborinare yoadohoyumahtiro. Ā jiro tiro Cristo Cohamacu to beseriro jiro, mipu yariaboriro jiro, to basi yoadohojaro —ni bujupeha tina.

³⁶Surara cūhu tirore bujupeha. Jesu cahai sua, tina tirore űaa co vinore wamaha. ³⁷Tíre waa, ō sehe niha tina:

—Muhu judio masa ti puhtoro jicu mu basi yoadohoga. Ā jii yuhdu witiuhca muhu —ni bujupeha tina.

³⁸ Ñ yoa tiro bui ti cjā puha ōri pjīne ō sehe ni joaha: “Ahrīro judio masa bui puhtoro jīro jira”, ni joaha. (Griego ya mehne, Roma macaina ya mehne, judio masa ya mehne ñ ni joaha.)

³⁹ Pairo tiro mehne ti cjā puha daporiro yuhdurucarīro sehe ō sehe ni, ñano durucuha Jesure:

—¿Muhū Cristo masare yuhdorīro jierajari? Mu basi, sā cūhure yoadohoga —niha tiro Jesure.

⁴⁰ To ñ nichū tuhorō pairo yuhdurucarīro Jesu poto buhusehei ti cjā puha daporiro sehe tirore ō sehe niha:

—Mari cūhure cūno potori buhiri dahrera tina. ¿Dohseacu Cohamacure ne ño payoerajari muhū? ⁴¹ Marine ñaa buhirire yoaa, quihōno yoaa nina tina. Ñaare mari yoari buhiri marine buhiri dahrera tina. Ahrīro sehe ñaare yoae-rare —niha tiro pairo yuhdurucarīrore.

⁴² Ñ nino, tiro Jesure ō sehe niha:

—Jesu, muhū puhtoro jicu, tjua tacu, yuhure wacūga —niha tiro Jesure.

⁴³ To ñ nichū tuhorō, ō sehe niha Jesu:

—Muhure ahire nii nija. Michare paraíso wama tiropu muhū yuhū mehne jiihca —niha Jesu tirore.

Jesu yariaa wahaha

(Mt 27.45-56; Mr 15.33-41; Jn 19.28-30)

⁴⁴ Ñ yoa cohari pja jichū sū si duhua wahaha. Ñ jiro jipihtiro tí dihtapure tia hora waro noano nahitiano jiha. ⁴⁵ Nahitiano to jiro watōi, Cohamacu wuhū macari suhtiro, ducatarī suhtiro dacho maca waroi bui sehe tuhnu bora ta, pua cahsaro tuhnu-roca yoja sua wahaha. ⁴⁶ Ñ jiro Jesu ō sehe ni tuaro sañurucuha:

—Mai, yu catiare muhure wiaja mu ñu wihbohto cjihtore —ni sañurucuha Jesu.

Ñ ni tuhsu yariaa wahaha.

⁴⁷ To ñ yariachu ñuno, surara puhtoro sehe “Cohamacu tuarīro jira”, nino: “Ahrīro Jesu cjiro potocāta noarīro jiri jimana”, niha surara puhtoro.

⁴⁸ Ñ jia ti wajāchu ñua tarina Jesu to yariachu ñua, ti wuhusepu tjuaa wahaha. Tjuaa waha, ti ñaa yoarire cahyaa mehne ti pēbuhui cjā ō wahcāha.

⁴⁹ Jipihtina Jesu yaina tiro mehne macaina, Galileapu tiro mehne tari numia cūhu Jesure yoaropu ñurocarucua niha.

Jesu pjacure masa copapu na sāa duhu payoha

(Mt 27.57-61; Mr 15.42-47; Jn 19.38-42)

⁵⁰⁻⁵¹ Tí pjare José wama tiriro tōi jiha. Judea yahpai jiri maca Arimatea wama tiri maca macarīro jiha. Tiro noarīro, quihōno yoarīro jiro, Cohamacu to puhtoro ji dūcahtore cohtarīro jiha. Ñ jiro tiro judio masa puhtoa mehne macarīro jiparota Jesure ti wajā dutichū cahmaeramaha tiro. ⁵² Ñ jiro Pilato cahapu su, Jesu pjacure siniha. ⁵³ Sini tuhsu, Jesu pjacure na boro, noari suhtiro mehne to pjacure wahmaha. Ñ wahma tuhsu, masa copapu tācai ti sahari copapu na sāa duhu payoha to pjacure. Tí copare ne paina yariainare duhu payoerasiniha mini. ⁵⁴ Tí dacho Sabado dacho macaa cjihtire ti cah-noyuri dacho jiha. Sabado judio masa ti sori numu cjihto mahanocā dūhsaha.

⁵⁵ Æ jia Galileapü Jesu mehne tari numia masa copapü José mehne wahaha. Masa copapü sü, tí copare ñu, Jesu pjacure ti duhu payorire ñuha. ⁵⁶ Baharo ti wuhusepü tjuaa waha, me sitia mehne wisõa co mehne cahnoha tina. Tuhsu, Sabado jichu Cohamacu to dutiare Moise cjirore to cûri to dutiriro seheta tina soha.

Jesu masa wijaaaha

(Mt 28.1-10; Mr 16.1-8; Jn 20.1-10)

24 ¹ Domingo jichu bohrearopü tí numia ti me sitia ti cahnoymarire Jesu masa copapü na wahcãmaha. ² Tí copapü sua, tí copare bihari tâca pjõo ti duhu cûri tâcare ñuha. ³ Æ ñua tina tí copapü sãa wahaha. Jesu pjacure bocaeraha tina. ⁴ To pjacure bocaeraa, “¿Dohse wahapju?” ni tuhotuha tina. Ti ã ni tuhotu durucu coãno watoi puaro mua si sitea suhti tiina tina cahai ducuha. ⁵ Tói ti ducuchü ñu, numia cuia na tuhcuca caha suha. Tuhsu, mua sehe tí numiare õ sehe ni yahuha:

—¿Dohseana yariariro to jiriro cjirore tirore macajari musa? Mipure tiro catiriro jira. ⁶ Tiro õre mariaha. Masa wijaa tuhsuhre. ¿Sohõ jiri pjare Galileapü musa mehne jiro musare to niri cjirore wacũjari musa? ⁷ “Yuhure Cohamacu warocarirore paio warohca ñainare. To ã wari baharo yuhure crusapü cã puha wajãahca tina. Æ jicu yu yariari baharo tia dacho wahaboroi masa wijaaahca yuhu”, ¿musare to nirire wacũjari musa? —niha mua sehe.

⁸ Ti ã nichu tuhoa, numia sehe Jesu to nirire wacũha. ⁹ Ti ã niri baharo tina tjuaa waha, once buheinare paina cũhure tíre yahu pahñoa. ¹⁰ Tí numia sehe María Magdalena, Juana, María Santiago pocoro jiha. Tí numia mehne paye numia cũhu jiha Jesu buheinare yahua numia. ¹¹ Ti ã ni yahupachuta Jesu buheina sehe “Potocã nia nieraca. Mahñoepa nica ahri numia”, ni tuhotumaha. Æ jia tí numiare tuho duaeraha.

¹² Ti ã nichu tuhoru, Pedro sehe masa copapü muroca wahcã, ñuno wahaha. Tí copapü sü, tiro muhri caha, ñuroca sõha. Jesure ti wahmari suhtiro dihtare ñuha. “¿Dohse wahari na?” ni tuhotu, tiro wuhapü tjuaa wahaha.

Emau wama tiri macapü wahari mahapü Jesu bajuaha

(Mr 16.12-13)

¹³ Tí dachoihta puaro Jesu buheina mehne macaina Emau wama tiri macapü wahaa niha. Jerusalẽ once kilómetro yoaro jira Emaupü suhto. ¹⁴ Emaupü wahaa, jipihia Jerusalẽi tí pjare to ã waharire Jesure ti ñano yoirire durucu wahcãa niha. ¹⁵ Ti ã ni durucuro watoi Jesu sehe ti cahapü sü, tina mehne wahaha. ¹⁶ Tirore ñupahta tina tirore “Jesu jira”, ni ñu masieraha.

¹⁷ —¿Dohse ni cahya durucu wahcãa nijari musa? —ni sinituha Jesu.

¹⁸ To ã nichu tuhoa tina cahyaro mehne suruca, Cleofa wama tirore sehe Jesure õ sehe ni yuhtiha:

—¿Mipure Jerusalẽi tiniriro jipaihta muhu dihta ti yoari cjirore masierajari? —ni sinituha tiro.

¹⁹ —¿Dohse wahari Jerusalẽi? —niha Jesu.

To ã nichu tina õ sehe ni yuhtiha:

—Jesure Nazare macarirore ti yoirire nina nija. Tiro Cohamacu yare yahu muhtariro jimahre. Æ jia to durucurire tuhoa to yoari cũhure ñua, “Tuariro

jira”, ni tuhohure masa. Cohamacu cūhu āta ni tuhohuca. ²⁰Mari sacerdotea puhto, paina puhto mehne tirore wājā dutia, painare wahre. Ti ā wachu paina sehe tirore crusapu cja puha wājāhre. ²¹“Roma macainare cohāhtiro Israe masa puhtoro cjihto jira”, ni tuhohumahi sā tirore. Micha mehne tia dacho wahara tiro to yariari baharo. ²²⁻²³Mahainacā numia sā mehne macaa numia säre cuachu yoahre. Bohrearopu Jesu to masa copapu ti numia su, to pjacure bocaerayuhti. To pjacure bocaeraa, tina tju wihi yahuhre. “Säre anjoa bajuahre. Jesu catiyuhti”, ni yahuhre numia sehe. ²⁴Ti ā nichu paina sā mehne macaina ti copapu su, numia ti niriro seheta ñuyuhti. Tina cūhu Jesure ñuerayuhti —niha tina Jesure.

²⁵Ti ā niri baharo Jesu ō sehe ni yahuha tinare:

—Musa ne tuho masiera cureina jira. ¿Cohamacu yare yahu muhtaina cjiri ti nirire noano tuhoerari musa? ²⁶Cristore to puhtoro jihto pano muanopu to mahahto pano tirore ñano yuhduro cahmare. ¿Tire masierasiniari musa? —niha Jesu tinare.

²⁷Ā nino Cohamacu Cristore to ni yahu ti joari cjirire Jesu yahu pahñonocaha tinare. Moise cjiro to joari cjirire Jesu yahu dūcaha. Tuhsu, jipihtina Cohamacu yare yahu muhtaina cjiri Cristore ti joari cūhure yahu pahñonocaha tiro.

²⁸Tina ti wahari macapu ti sua cahachu, Jesu sehe tinare yuhdu wahcāno sehe yoaro nimaha. ²⁹To ā yoapachuta tina tirore waha dutieraha:

—Sā mehne tjuaga. Ñamichahapu jira. Nahinopu nina —niha tina tirore.

Ā jiro Jesu tina mehne wuhupu sāa wahaha. ³⁰Wuhupu sāa su, tiro tina mehne ti churi mesapu nuju su, pāore na, Cohamacure “Noana”, niha. Ā nino ti pāore nuha na, tinare waha. ³¹To ā yoachu ñua tina Jesure ñu masiha. Ti ñu masi muari baharo tiro buti mua wahaha. ³²To ā buti mua wahachu ñua tina ti basi ō sehe ni durucuha:

—Mahai tiro marine to durucuro watoi Cohamacu to joari cjirire to yahuro watoi tuaro mari wacu tuhohua mehne noano wahchea mehne tuhohuhi mari —niha tina ti basi.

³³Ā ni tuhsu tina dóicāta Jerusalēpu majare tjuaa wahaha tjoa. Tópu sua, once buheinare paina mehne cahmachuinare bocaha. ³⁴Ā ti suchu, once buheina ō sehe niha:

—Potocāta mari puhtoro masa wijaayuhti. Simo Pedro tirore ñuyuhti —niha once buheina.

³⁵Ti ā nichu puaro Emau macaina mahai Jesure ti ñurire yahuha:

—Jesu to pāore to nuhachu sā ñu masihi tirore —ni yahu pahñoha tina painare.

Jesu to buheinare bajuaha

(Mt 28.16-20; Mr 16.14-18; Jn 20.19-23)

³⁶Ti ā ni yahuro watoi ti cahai ji tuhsuha Jesu sehe.

—¿Jimajari musa? Noano jiga musa —niha tiro tinare.

³⁷To ā nichu tuhoa tina “Mari yariariro cjirire ñua nija”, ni tuhohua, tuaro cuiha. ³⁸Ti ā cuichu ñuno tiro tinare ō sehe ni yahuha:

—¿Dohseana cuijari musa? ¿Dohseana “Ahri potocā jierara”, nijari musa? ³⁹Yu wamomacarine, yu dahpori cūhure ñuga. Musa yuhure ñua,

ñu masinahca. Yuhure ñaha ñuga. Ñaha ñuna, masinahca musa. Yariariro cjiropu pjacu mariahna. Yuhu sehe pjacu tija —niha Jesu.

⁴⁰ Æ nino to wamomacari cūhure, to dahpori cūhure ñoha tinare. ⁴¹ To Æ ñopachuta tina tuaro wahche, cuaa waha, “Ahri potocā jieraca”, ni tuhotusi-nimaha. Ti Æ tuhotuchu masino Jesu tinare sinitu ñuha:

—¿Ōi chuā jijari? —niha tiro.

⁴² To Æ nichu tuhoa wahi doharirore mi cūhure waha tirore. ⁴³ Tíre na, ti ñurocaroi Jesu chuha. ⁴⁴ Chu tuhsu, Jesu yahuha tinare:

—Sohō jiri pja musa mehne jicu musare yu yahuriro seheta mipu yuhu Æ wahahi. Cohamacu dutia Moise cjiro marine to cūri cjiro to Æ ni joariro seheta yuhure Æ wahahre. Cohamacu yare yahu mūhtaina cjiri, Salmo joari tjure joaina cūhu panopu yuhure ti ni yahuriro seheta mipure yuhure Æ wahahre. Āta waharo cahmahre —niha Jesu.

⁴⁵ Æ ni tuhsu Cohamacu yare ti yahu joari cjirire to buheinare masichu yoaha Jesu:

⁴⁶ —Cohamacu yare ti joari cjiri ō sehe niha: “Cristore ñano yuhdūro cahmana. Ā jiro tia dacho wahaboroi to yariari baharo tiro masa wijaarohca. ⁴⁷ To masa wijaari baharo jipihtia yahparipu to yaina Cristo yare yahuahca. Masa ti ñaa yoirire ti cahyahti cjihtire, “Nano yoaeraja” ni, ti tuhotumarire ti cohtotahti cjihtire, Cohamacure ti cahmahti cjihtire, ti ñaa buhiri tiare to cohāhti cjihtire yahuahca to yaina. Ā yahua taa, Jerusalēpu yahu ducaahca”, niha Cohamacu yare ti joari pūi —niha Jesu.

⁴⁸ Æ ni tuhsu ō sehe ni yahu namoha:

—Musa sehe ahri jipihtiare ñurina jira. Ā jina painare yahunahca. ⁴⁹ Cohamacu “Tirore musare warocaihtja”, to niriore yuhu sehe musare warocaihtja. Ā jina Jerusalēpu ahri muano macaa tuua musare to wihiltore cohtaga musa —niha Jesu to buheinare.

Jesu muanopu mujaa wahaha

(Mr 16.19-20)

⁵⁰ Æ ni tuhsu Jesu tinare Jerusalēi jiinare Betania cahapu naaha. Tōpu su, Jesu to wamomacari mehne ñui muo, “Noano jiga”, niha tinare. ⁵¹ Æ ni tuhsu, tinare cū, muanopu mujaa wahaha. ⁵² To mujari baharo tina tirore ño payo, Jerusalēpu tuaro wahchea mehne tjuaa wahaha. ⁵³ Tōi jia, dachoripe tina Cohamacu wuhui Cohamacu mehne durucu, “Noana”, ni ño payoha tina tirore.

San Juan

Cohamacu ya duserore yahuriro masunota ji ducaha

1 ¹Dóiputa ahri yahpa to jihto panoputa Cohamacu ya duserore yahuriro Cristo masare yuhduchu yoahtiro dóihtu ji tuhsua tiha. Tiro Cohamacu mehne jiha. ²Á yoa tirota Cohamacuta jinocahno niha. ³Á yoa wahmanopure ne mariahri cjiirire bajuamehneha. Ahri yahpare, muanore, jipihtiare, jipihtina cūhure bajuamehne dutiha Cohamacu tirore. Á jiro ahrire bajuamehne pahñoha tiro. Ahrire mipure mari ñuare, mari ñuera cūhure to bajuamehnerachu ne maria-boa. ⁴Cristo catiare wariro jiro nina. Buhriaro marine to noano ñu masichu yoaro sehetu tiro to Pucuro muano macarirore noano masichu yoara. Á yoaro to Pucuro muano macarirore masichu yoara masare. ⁵Ahri yahpa macaina ñaare ti wacū ti goa pjaah nahitiano yoaro sehe jia nina. Cohamacu ya duserore yahuriro buhriaro noano marine to ñu masichu yoaro sehetu masare masichu yoara. Á yoa nahitiano buhriarore to yuhdurucaeraro sehetu Cristore ñaa ne yuhdurucaerara.

⁶⁻⁷Cohamacu João wama tiro sehere warocaha, Cristore buhriaro yoaro sehe jiriore masare yahu muhta dutiro. To ã warocachu João sehe masare yahuro tare to yahuriore Cristore jipihtina ti wacū tuahti cjihtire. ⁸João sehe Cristo jierare. Á jieraro tiro Cristo sehere masare yahu muhtano tare. ⁹Cristo buhriaro yoaro sehe jiro jipihtina masare Cohamacure masichu yoahtiro sehe ahri yahpapi tari jire. Potocā tjira ahri. Tiro buhriaro yoaro sehe jiro waro tjira.

¹⁰Cristo ahri yahpai jia timare. Ahri yahpare bajuamehneriro jiri jimare. To ã jipachuta ahri yahpa macaina sehe tirore ne masierare. ¹¹To ya yahpai tiro masa bajuari jimare. To ya yahpai masa bajuariro to jipachuta to ya yahpa macaina sehe ne tirore cahmaerare. ¹²Ti ã cahmaerapachuta, tirore cahmaina sehere, tirore wacū tuaina sehere Cohamacu to pohna jichu yoari jire. ¹³Tina Cohamacu pohna jia nina. Á jia masa ti masa bajuariro sehetu jierara, Cohamacu pohna ti wahachu. Tuhsu, masa ti cahmariro sehetu jierara, Cohamacu pohna ti wahachu.

¹⁴Á jiro Cristo masuno to ji ducari baharo mari mehneta jire tiro. To ã jichu ñuna masare cahñiro, potocā jiare yahuriro to jichu sã masii. Tiro dihta Cohamacu macuno jiro tuariro noariro jire. To ã jiro jichu sã masii. ¹⁵João Cristore yahu muhtano ò sehe ni sañurucure masare yahuro:

—Siro tara yu ò sehe ni yahuriro: “Tiro yu baharo tariro jira. Á jiparota tiro yu yuhdoro tuariro jira. Tiro yu masa bajuahito panoputa ji tuhsua. Á

jiro tiro yu yuhdoro tuariro jira”, masare yu ni yahuriro ahiro tjira —nire João Cristore masare yahuro.

¹⁶Tiro Cristo sehe noariro tuaro masare cahĩro jiro marine jipihtinare noano yoarucure. ¹⁷Cohamacu dutiare Moise cjiro sehe cūbasa muhtaa tiha marine. Jesucristo sehe Cohamacu masare to cahĩare buhero tare. Cohamacu to potocā durucua cūhure buhero tare tiro. ¹⁸Masa ne Cohamacure ñuerara. Tirore mari ñuerapachuta to macuno to tuaro cahĩro cūirota jiro sehe to Pucurore marine masichu yoare.

Paina João masare bautisarirore sinituha

(Mt 3.11-12; Mr 1.7-8; Lc 3.15-17)

¹⁹Sā coyea judio masa puhtoa Jerusalēi jiinare sacerdoteare, Cohamacu wuhui dahraina cūhure João cahapu warocari jire. “¿Diro baro jijari muhu?” ni sinitu dutia warocari jire tinare. Ti ā ni sinituchu ō sehe ni yahure João sehe. ²⁰Ne yaro marieno yahure. Potota yahure:

—Yuhu Cristo Cohamacu masare yuhdachu yoa dutiro to warocariro jieraja —nire tiro.

²¹To ā nichu tina sehe tirore pari turi siniture tjoa:

—¿Muhu Cristo jieracu, Elia sehe jijari muhu? —nire tina.

—Jieraja yuhu —nire tiro.

—¿Sā cohtariro Cohamacu yare yahu muhtariro sehe jijari muhu? —nire tina.

—Tiro jieraja yuhu —nire João sehe.

²²To ā nichu tina tirore pari turi ō sehe ni siniture tjoa:

—Sāre sinitu dutiinare sā noano yahuhto sehe poto sāre yahu bahrañoga. ¿Diro baro sehe jijari muhu? ¿Mu basi muhu sehe dohse jiro baro “Jija yuhu”, nijari muhu? —nire tina João.

²³Ti ā nichu ō sehe ni yuhtire tiro:

—Masa marienopu ō sehe ni sañurucuriro jija yuhu Cohamacu yare yahu muhtariro Isaia cjiro to ni yahuriro seheta: “Mari puhtoro to tahto pano masa ñaa tuhotuare cohtota, cahno muhtaga masa”, ni masare yahu sañurucuriro jija yuhu —nire João tinare.

²⁴João sinituina fariseo curua macaina ti warocarina jire. ²⁵Ā jia tina João ō sehe ni siniture tjoa:

—¿Muhu Cristo, Elia, Cohamacu yare yahu muhtariro sā cohtariro jierapacuta dohseacu masare bautisajari muhu? —nire tina.

²⁶Ti ā nichu tuhoru ō sehe ni yuhtire tiro:

—Yuhu co mehne masare bautisaja. Pairo sehe masa masierariro masa watoi ji tuhsura. ²⁷Tiro sehe yu baharo tariro yu yuhdoro tuariro jira. Noa yuhduariro jira. Tiro yaro sehe jieraja yuhu sehe. Ā jicu tirore tuhotucu, “Wiho jiro jija yuhu”, ni tuhotuja yuhu —nire João tinare.

²⁸Ā ni durucure tina, Betaniapu Jordão wama tiri ma pa buhusehe coapu, João masare to bautisariropu.

Jesu Cohamacu to warocariro to oveja yoaro sehe jiro jira

²⁹Pa dachoi Jesu João cahai cahacā curero to tachu João tirore ñuno ō sehe nire:

—Ñuga. Ahriro Cohamacu to warocariro to oveja yoaro sehe jiroiro jira. Ovejare mari wajāriro seheta masa ahriro cūhure wajāahca. Ā yariaro ahri yahpa macainare ti buhiri tiare cohānohca tiro. ³⁰Ahrirota jira yu ō sehe niriro: “Yu baharo tariro yu yūhdoro tuariro jira. Yu masa bajahto pano tiro ji tuhsu. Ā jiro tiro yu yūhdoro tuara”, yu niriro ahrirota jira. ³¹Yuhu sehe ahrirore noano waro masiera tihi. Ā masierapaihta co mehne bautisai tai nii yu coyea Israe masa ahrirore ti masihto sehe —nire João.

³²Ā ni tuhsu João to ñuri cjiire ō sehe ni yahu namore tjao:

—Espíritu Santo muanopu buja yoaro sehe duji ta, Cristo mehne to tjuachu ñuhi. ³³Cohamacu yūhure to yahuerachu tirore ne masieraboa yūhu. Wiho mejeta tiro yūhure masare co mehne diapū bautisa duti warocariro Cohamacu sehe ō sehe ni yahu muhta tuhsure yūhure: “Espíritu Santo duji ta to bui to tjuaracu suriro tirota jirohca. Tiro sehe Espíritu Santore to yaina mehne ā jirucuhu yoarohca”, nire Cohamacu yūhure. ³⁴Mipu pinihtare to ā ni yahurirore ñu tuhsuhi yūhu. Ā ñucu “Ahriro potocāta Cohamacu macuno jira”, ni yahuja yūhu musare —ni yahure João sāre.

Jesu buheina to pji muhtaina jira

³⁵⁻³⁶Pa dachoi João mehne sā puaro to buheina sā ducuchu, Jesu sā cahai yūhdu wahcāno nire. To ā yūhdu wahcāchu João tirore ñuno, pari turi ō sehe nire sāre:

—Ñuga. Ahriro Cohamacu to oveja yoaro sehe jiroiro jira —nire João.

³⁷To ā nichu sā puaro to buheina sehe tíre tuhona Jesu baharo wahahi.

³⁸Sā ā wahachu ñuno Jesu sāre majare ñu, ōsehe ni siniture:

—¿Nohopu wahajari musa? —nire tiro.

To ā nichu sā cūhu ō sehe ni sinitu ñui tirore:

—Rabi, ¿nohopu jijari muhu? —nihi sā tirore. (Rabi sā ya mehne nina “buheriro”, nina nija.)

³⁹—Yuhu mehne tatjiāhna ñuna taga —nire Jesu sāre.

To ā nichu sā sehe to jiropu ñuna wahai. Tí pjare ñamichahapu cuatro hora jire. Ā jina tí dachore tiro mehne tjuai sā.

⁴⁰Sā puaro Joāore tuhoina, Jesure nunu ti wahcāina yu piti Andre mehne jii. Andre sehe Simo bahuro jire. ⁴¹Ā jiro tiro dóihta to wahminore Simore maca, boca, tirore ō sehe ni yahuha:

—Mesiare Cohamacu marine yūhduchu yoa dutiro to warocarirore sā bocahi —niha Andre Simore. (Mesia sā ya mehne nina “Cristo”, nina nija.)

⁴²Ā ni tuhsu tiro Simore Jesu cahai naahre. To cahai ti suchu ñuno Jesu sehe Simore ō sehe nire:

—Muhu Simo wama tiro, Jona macuno jira. Mipure muhure Cefa ni wama pisuihtja —nire Jesu Simore. (Cefa sā judio masa ya mehne nina “Pedro”, nina nija.)

Felipere, Natanae cūhure pjiha Jesu

⁴³Pa dachoi Jesu Galilea yahpapu waha duare. Ā jiro to wahahto pano tiro Felipere piti boca, ō sehe nire:

—Yuhu mehne macariro cjihta taga —nire Jesu.

⁴⁴Felipe sehe Betsaida macariro jire. Tiro, Andre, Pedro mehne cū maca macaina jire tina. ⁴⁵Ā yoa Felipe Natanaene maca, tirore bocaro ō sehe ni yahure:

—Cohamacu dutiare Moise cjiro to joari pūpu to yahurirore paina Cohamacu yare yahu muhtaina cjiro cūhu ti yahurirore sā bocaḥi. Jesu Nazare macariro, José macuno tjira —nire tiro Natanaene.

⁴⁶—Nazarepure ne cūiro noariro mariahna —nire Natanae.

—Ñui taga muhu —nire Felipe.

⁴⁷Ā yoa Jesu cahai to suchu ñuno Jesu sehe ō sehe nire Natanaene:

—Ahriro mipu tariro potocāta noariro judio masuno waro jira. Tirore mahñoa ne mariahna —nire Jesu Natanae sehere.

⁴⁸To ā nichu tuhoru Natanae sehe tirore ō sehe ni siniture:

—¿Dohseacu yuhure noano masijari muhu? —nire.

—Felipe muhure to pjihto pano, higueraacu docai mu jichu ñuihi yuhu muhure —nire Jesu.

⁴⁹To ā nichu Natanae sehe tirore ō sehe nire tjoa:

—Buheriro, potocāta muhu Cohamacu macuno jira. Muhu Israe masa sā Puhtoro cjihto jira —nire Natanae.

⁵⁰To ā nichu tuhoru ō sehe ni yuhtire Jesu:

—Higueraacu docai muhure yu ñurire masicu yuhure “Cohamacu macuno jira”, ni wacū tuara muhu. ¿Títa muhure ā masichu yoajari? Ahri muhure yu ñuri yuhdoro Cohamacu tuaa mehne yoa ñoihca yuhu. Yu ā yoa ñochu ñuihca muhu —nire Jesu Natanaene.

⁵¹Ā ninota ō sehe ni yahu namore:

—Potocāta muhure niita nija. Yuhu masuno Cohamacu warocariro tjija. Muanoḡu parī muachu Cohamacu to yaina anjoa yu bui ti duji tachu, ti mujachu cūhure ñuihca muhu —nire Jesu tirore.

Caná wama tiri macapu ti wamomaca duhteropu Jesu wahaha

2 ¹Tia dacho baharo Canái Galilea yahpai jiri macai wamomaca duhteri bose numu jire. Ā jiro Jesu pocoro tí wuhupu jire. ²Jesu mehne sāre to buheina cūhure wamomaca duhteropu pjirocare tina. ³Ti bose numu macaa vino pihlichu Jesu pocoro tirore ō sehe ni yahure:

—Mipure vino pihlia wahare —nire ticoro Jesure.

⁴To ā nichu tuhoru Jesu ō sehe nire:

—Iñō, ¿dohseaco taco tíre yuhure yahujari muhu? Masa yuhure ti masihto duhsasinina mini —nire Jesu to pocore.

⁵To ā niri baharo to pocoro sehe ti cahamacare ō sehe ni dutire:

—Yu macu to dutiriho seheta yoaga —nire ticoro.

⁶Tí pjaḡure sā coyea judio masa Cohamacu yare yoaa taa masare ti pjacu-rire ā cosarucunoca dutia tire. Ā yoa tí wuhui seis situ parī taa mehne ti yoaa situ parī co posa tia situ parī jire. Tí situ parī Cohamacu yare yoaa taa ti cosaa co posa tia parī cjiro jire. Tí situ parire cincuenta a setenta litro posa mu sure. ⁷Tói ti jichu ñuno tí wuhu macaina cahamacare ō sehe ni dutire Jesu:

—Ahri situ parire co mehne pio sāa namoga wahpaa parī ti wahahto sehe —nire Jesu.

To ā nichu tina sehe noano wahpo dapo pahñonocare ti parire.

⁸Ti ā yoari baharo Jesu tinare ō sehe ni dutire tjoa:

—Mipure tí core wa na, wuhu macarirore waga —nire.

To ā nichu tuhoa tí core wa na, wuhu macarirore ware.

⁹Ti ā wachu tiro sehe tí core vino to wahachu yoaa core sihni ñure. Tí core nohoi to tarirore masierare tiro. To ā masierapachuta to cahamaca tí core waina sehe masire. Wuhu macariro ā masieraro wamomaca duhterirore pjiroca, ¹⁰ō sehe ni yahure:

—Paina masa noaa core vinore wā muhtana. Masa ti noano sihniri baharo ña curea core wara tina. Muhu sehe noaa core wihibo, baharo curero tí core ware säre —nire wuhu macariro wamomaca duhterirore.

¹¹Canái Galileai jiri macai Jesu core vino to wahachu yoari cjiri coã to bajuamehne ducari jire. Ā yoaro painare to tuaare ñore Jesu. To ā ñori baharo sã to buheina tirore wacū tuai.

¹²Baharo Jesu to pocorore, to bahanare, säre to buheina cūhure Capernaupū suho sure. Tópū suna, mahaa dachoricã tjuasinii sã.

Jesu Cohamacu wuhupure suha

(Mt 21.12-13; Mr 11.15-18; Lc 19.45-46)

¹³Pascua jichu judio masa sã bose numuri cjihti mahanocã duhsatjiähre. Ā jiro Jesu Jerusalēpu sure. ¹⁴Tópū suro tiro Cohamacu wuhupu sãa suro, wachuare, ovejare, bujaare duainare boca sure. Tuhsu, niñerure cohtotaina ti mesaripu ti dujichu tina cūhure boca sure. ¹⁵Ā boca suro yuta dari mehne tjanari da yoa, tinare jipihtinare sopacapu tjana nunu wionocare. Oveja, wachua cūhure tjana nunu wionocare tiro. Ā yoa niñeru cohtotaina ti mesarire na majareroca doca cūnocare. Ti niñeru turi cūhure doca sitenocare. ¹⁶Ā yoa tuhsu bujaare duainare ō sehe nire:

—Musa bujaare na wijaahga. Yu Pucu ya wuhure pache duari wuhu yoana tjiga —nire Jesu tinare.

¹⁷To ā yoachū ñuna sã to buheina sehe Cohamacu yare ti joari pui to niri cjirire wacui: “ ‘Cohamacu, mu wuhure tuaro cahija. Ā cahicu mu wuhure ñano ti yoachū ñucu tuaro cahyaja yuhu’, ni joaa tiha Cohamacu yare ti joari pui”, ni wacui sã Jesu buheina.

¹⁸Jesu to ā yoari baharo sã coyea judio masa puhto tirore ō sehe ni siniture:

—¿Dohseacu muhu ahrinare Cohamacu wuhupure jiinare cohā wiori? Cohamacu muhure tře yoa dutiro to jichu Cohamacu tuaa mehne yoa ñoga muhu sã ñuhti cjihtire —nire tina Jesure.

¹⁹Ti ā nichu Jesu ō sehe ni yuhtire:

—Ahri wuhure musa cohāchu tia dacho wahaboroi tuhsuihtja yuhu —nire Jesu tinare.

²⁰—Tia dacho mehne ahri wuhure tuhsusi muhu. Cuarenta y seis cuhmari waro ti yoari wuhu jira ahri wuhu —nire tina Jesure.

²¹To ā nichu tina tirore noano tuhoerare. Jesu “Ahri wuhure” nino, to pjacure nino niri jimare.

²²Ā yoa to yariari baharo, to masa wijaari baharo sã to buheina sehe to niri cjirire wacūna, Cohamacu yare ti joari pūre Jesu to yahuri cūhure “Tí potocã tjira”, ni wacui sã.

Jipihtina ti wacūare Jesu masina

²³Pascua bose numuri jichu Jesu Jerusalēpu jire. Tói to jichu masa payu Cohamacu tuaa mehne to yoa ñochu ñua tirore wacū tuare. ²⁴Ti ā wacū

tuapachuta Jesu masa ti wacüare noano masino, “Yuhure ã wacü tuaru-cuahca”, ni tuhotueraha. ²⁵Tiro masa ti tuhotuare noano masire. Ñ masino masa ti tuhotuare painare ne sinitu ñuerare.

Jesu Nicodemo yahuha

3 ¹Tí macai Nicodemo wama tiro, judio masa puhtoa mehne macariro jire. Tiro fariseo curua macariro jire. ²Cü ñami tiro Jesu cahai ta, tiro mehne ò sehe ni suhùduri jire:

—Buheriro, muhu Cohamacu to buhe dutiro to warocariro mu jichu sã masija. Muhu payu tahari Cohamacu tuua mehne yoa ñona. Cohamacu muhure to yoadohoerachu, muhu sehe to tuua mehne ne ã yoa ñoeraboa —niri jire Nicodemo Jesure.

³To ã nichu tuhoru Jesu sehe ò sehe ni yahuri jire:

—Potocã muhure niita nija. Pari turi masa bajuariro yoaro sehe wahariro dihta mari puhtoro Cohamacu mehne ji masina —niha Jesu.

⁴—Cuenah. ¿Bucuro sehe dohse yoa pari turi masa bajuabocari tiro? To pocoro niji suhtiropu majare sãa, pari turi bajua masieraboca tiro —niri jire Nicodemo.

To ã nichu tuhoru Jesu ò sehe ni yuhtiri jire tjoa:

⁵—Potocã niita nija muhure. Co mehne, Espiritu Santo to tuua mehne pari turi masa bajuariro dihta mari puhtoro Cohamacu mehne ji masina. ⁶Numia nijipocosanumia jia, macanacãre masa bajuachu yoara. Espiritu Santo sehe masare Cohamacu pohna jichu yoara. ⁷“Pari turi masa bajuariro yoaro sehe wahariro dihta mari puhtoro Cohamacu mehne ji masina”, yu nichu, tuho wisiecu tjiga. ⁸Espiritu Santo masare Cohamacu pohna to yoachu wihnono yoaro sehe jira. Wihnono to tariropu tara. To taro coa tachu mari tuhoja. Ñ tuhopanahta to tarirore, to waharirore ne masieraja. Tó sehetu yoara Espiritu Santo masare Cohamacu pohna jichu yoaro —niri jire Jesu Nicodemo.

⁹—Mu niare noano masieraja —niri jire Nicodemo.

¹⁰To ã nichu tuhoru ò sehe niri jire Jesu:

—Muhu judio masare buheriro jipaihta, ¿dohseacu yu niare tuhoerajari?

¹¹Potocã muhure niita nija. Sã masirire, sã ñurire sã yahuja. Sã ã yahu-pachuta ne musa sã coyea judio masa ne tuho duaerare. ¹²Ahri yahpa macaa mehne masa ti masa bajuari mehne muhure piti dahre yu buhe muhtarire “Potocã tjira”, nierara musa. Ñ nierana piti dahre buhero marieno Cohamacu yare yu yahuchu cùhure “Potocã tjira”, nisi musa.

¹³Ne cüro muanopu Cohamacu cahapu wahariro ne pari turi tjua tasi. Yuhu masuno Cohamacu warocariro yuhu dihta muanopu jiro ahri yahpapu tahi. (Ñ jicu yuhu dihta Cohamacu yare musare yahu masija.) ¹⁴Panopure masa marienopu Moise cjiro bronce wama tiri comaa mehne ti yoirirore agãre yucucu ti dapodu sohtoapu duhu ò dapoha. Yuhu cùhure masuno Cohamacu warocarirore tiro agãre to duhu ò daporiro sehetu yuhu cùhure duhu ò dapoahca. ¹⁵Yuhure ti ã yoiro baharo jipihtina yuhure wacü tuaina jipihtia dachoripe Cohamacu mehne ã jirucuahca —niri jire Jesu.

Cohamacu jipihtinare cahina

¹⁶Ñ ni tuhsu ò sehe ni namori jire Jesu:

—Cohamacu jipihtina ahri yahpa macainare tuaro cahina. Ñ jiro yuhure to macunore cūirota jiriore Cohamacu warocare jipihtina yuhure wacū tuaina pichacapū ti wahaerahto cjihtore. Ñ jia Cohamacu ya catia mehne ã catirucuahca tina. ¹⁷Cohamacu yuhure to macunore masare buhiri dahre dutiro warocaerare ahri yahpapure. Masare pichacapū wahaborinare yuhdūchū yoah tiro cjihto sehere yuhure warocare.

¹⁸Yuhure Cohamacu macunore wacū tuainare ne buhiri dahresi Cohamacu. Yuhure wacū tuaeraina pinihtare Cohamacu buhiri dahre duti tuhsure. Masa yuhure Cohamacu macunore cūirota jiriore ti wacū tuaerari buhiri buhiri dahrerohca tinare. ¹⁹Yuhū Cohamacu macuno ahri yahpapū tacū buhriaro to noano marine to ñū masichū yoaro sehta Cohamacu yare noano masichū yoaja. Yū ã masichū yoapachuta, yuhure wacū tuaeraina sehe yuhure cahmaerara. Ti ñaa yoaa sehere noano cahmana. Ti ã cahmari buhiri tinare buhiri dahre duti tuhsure. ²⁰Jipihtina ñaare ã yoarucina baro ti ñaa yoaa duhu duaerara. Ñ jia buhriaro to bajuro dahrero sehta ti ñaa yoirare “Bajuro dahreri” nia, yuhure cahmaerara tina. ²¹Quihōno yoina sehe yuhure, yū buhea cūhure cahmana. Cohamacu yoadohoro mehne to yare ti yoaa yū noano bajuro dahrechū buo tierara tina. Ñ jia yuhure buhriaro yoaro sehe jiriore cahmana —ni yahuri jire Jesu.

Pari turi João masare bautisariro Jesure yahuha

²²Baharo Jesu säre to buheinare Judea yahpapū suho wahare. Tópū sūro tó macaina mehne mahaa dachoricā tjua, tinare bautisare. ²³João cūhū masare bautisaro niha Enón wama tiri macai. Enón Salim wama tiri maca cahai jire. Tói dia jire. Tói dia jichū João bautisaro niha masare. ²⁴Ti rore ti peresu yoah to pano Enóni masare bautisaro niha João.

²⁵Tí pjare João buheina mehne macaina mahainacā judio masuno mehne bautisaa macaare durucua niha. ²⁶Ñ jia tina João cahapū sua, ti rore ñ sehe ni yahuha:

—Buheriro, Jordão sie coapū mūhū mehne jiri rore “Tiro tjica”, mū niriro sehe mipure masare bautisaro nina. To ã yochū jipihtina tiro cahapū dihta wahara —niha tina João.

²⁷Ti ã nichū tuhoro João ñ sehe ni yuhtiha:

—Tiro tuariro to jichū Cohamacu sehe ti rore ã jichū yoiriro jira. ²⁸“Cristo jieraja”, yū nichū tuhore mūsa. Ñ jierapaihta to pano to waroca mūhtariro jija yuhū. ²⁹Cristo mehne masa ti wahachū ñūcu tuaro wahcheja. Ñ sehe jira tí: Wamomaca dūhtericoro to manūno mehne jiro wahara. Wamomaca dūhtehtiro cohtariro sehe dūhtehtiro to namo tichū ñūno to durucuchū tuhoro tuaro wahchera. Ñ jicu yuhū wamomaca dūhtehtiro cohtariro to wahche-riro sehta Cristo mehne masa ti wahachū ñūcu tuaro wahcheja. ³⁰Cristo sehere wacū tuaro cahmana masare. Yuhū sehere wacū tuaeraro cahmana masare —ni yuhtiha João.

Cohamacu macuno muanopu tariro jira

³¹Ñ ni tuhsuro ñ sehe ni namoha João:

—Muanopu tariro jipihtina yuhdoro tuariro jira. Ahri yahpapū jiina jina ahri yahpa macaina jija mari. Ñ jina ahri yahpa macaare durucuja mari.

Muanopu tariro sehe jipihtina yuhdoro tuariro jira. ³²To ñuri cjiire, to tuhori cjiire tiro yahura. To ã yahupachuta to yahure masa sehe ne tuho duaerara. ³³Muanopu tariro to yahure masa tuhoa, tíre cahmaa, “Cohamacu potocã niriro jira”, nia nina tina. ³⁴Ahriro Cristore Cohamacu warocaritore Espiritu Santo ya tuaare cû pahñona Cohamacu. Æ jiro tiro Cohamacu ya durucuare yahura. ³⁵Cohamacu to macunore tuaro cahina. Æ jiro jipihtina bui ti puhtoro ji dutire to macunore. Jipihtia puro ji dutire tiore. ³⁶Cohamacu macunore wacû tuaina sehe Cohamacu catia mehne ã catirucuahca. To macunore cahmaeraina sehe Cohamacu catia mehne jisi. Æ jiro Cohamacu tinare tuaro buhiri dahrerohca —niha João.

Jesu Samaria macaricoro mehne durucuha

4 ¹Jesu João yuhdoro payu buheinare to cjuachu João yuhdoro masare to bautisachu fariseo curua macaina tuhrocacha. ²Ti ã tuhrocapachuta Jesu sehe to basi masare bautisaerare. Sã to buheina sehe masare bautisahi. ³Fariseo curua macaina ti ã masichu tuhoro Jesu sehe Judea yahpai jiriro Galilea yahpau sãre suho tjuaa wahare.

⁴Tõpu wahana Samaria yahpare su yuhdu wahcãna tana nihi sã. ⁵Æ yuhdu wahcãna Samaria yahpai jiri macapu Sica wama tiri macapu suhi. Tí maca cahai panopu macariro Jacobo cjiro to macuno José cjiore to wari yahpa jire. ⁶Tõi Jacobo cjiro co to naari copa jire. Æ yoa Jesu sehe yoropu tariro cjiro jiro, tiro wahya yuhduaro tí copa duhtu cahai nuju sure. Tí pja tõi to so nuju sari pja cohari pja waro jire. ⁷⁻⁸Sã to buheina sehe macapu chuare sã nuchuna wahari baharo cãirota tiro tõi tjua nuju sure. Æ so nuju saro Samaria macaricoro tí copapu co waro to wihichu Jesu ticorore core siniha: —Core waga yuhure —niha.

⁹—Muhu judio masuno jira. Yuhu sehe Samaria macaricoro jija. ¿Dohseacu yuhure core sinijari muhu? —niha ticoro Jesure. Judio masa Samaria macainare ñu tuhtiina jira. Æ jiro ticoro ã niha.

¹⁰To ã niri baharo Jesu ticorore õ sehe ni yahuha:

—Muhure Cohamacu to yoadoho duarire masico, muhure core sinirirore masico, muhu yuhu sehere siniboa. Mu ã sinichu paye co sehere waboa yuhu. Tí co sehe catichu yoara —niha Jesu ticorore.

¹¹To ã nichu tuhoro ticoro õ sehe ni yuhtihi tiore:

—Ne muhure situ mariahna. Wiho mejeta ahri copa cuãri copa jira. ¿Æ jicu ahri catichu yoaa core nohopu wabocari muhu? ¹²Mari ñuchu cjiro Jacobo panopu macariro ahri copare marine cúa tiha. Tiro, to pohna, to nuina cûhu ahri core sihnia tiha. “Paye core waboa yuhu” nicu, ¿Jacobu yuhdoro masiriro jijari muhu, ã ni tuhutucu? —niha ticoro.

¹³To ã nichu Jesu õ sehe ni yuhtihi:

—Jipihtina ahri core sihniina, pari turi ñahma yapioahca. ¹⁴Ya co sehere sihniina ne pari turi ñahma yapiosi. Æ jia ya core sihniina Cohamacu mehne ã jirucuahca. Ma pohtapu co to ã wijaarucuro seheta ya co ne pihtisi —niha Jesu.

¹⁵To ã nichu tuhoro numino sehe õ sehe niha:

—Ne pari turi yu ñahma yapioerahto sehe tí core waga yuhure. Æ jico pari turi ne õpure co wasi —niha ticoro.

¹⁶To ā nichu Jesu tiorore ō sehe ni yahuha:

—Tí pja pinihta mu manure pjico wahaga. Pji tuhsu ōpu taga tiro mehne —niha Jesu tiorore.

¹⁷⁻¹⁸—Manu marienicoro jija yuhu —niha ticoro.

—Potocāta nimana muhu. Muhu cinco tahari manu ti tuhsu mare. Tuhsu, mipure muhu mehne jiro mu manu jierara. Ā yoa “Manu marienicoro jija” nico, potocāta nimana muhu —niha Jesu tiorore.

¹⁹To ā nichu tuhorō ō sehe niha ticoro:

—Ne, Cohamacu yare yahu muhtariro jira muhu, yu tuhotuchu. ²⁰Sā űuchusuma cĵiri ahdu tucupu Cohamacure űo payoa tiha. Ā jina musa sehe judio masa “Jerusalēi Cohamacure űo payoro cahmana masare”, nia tire musa judio masa —niha ticoro.

To ā nichu Jesu ō sehe ni yuhtiha:

²¹—Numino yuhure tuhosiniga. Baharopu ahdu tucui, Jerusalēpu cūhure mari Pucure űo payosi musa. ²²Musa sehe musa űo payorirore masierara. Masare yuhduchu yoahtiro judio masunota jira. Ā jina sā judio masa sehe sā űo payorirore masija. ²³Mipure baharopu cūhure Cohamacure potocā űo payoina ti noano tuhotua mehne tirore űo payoahca. Tó sehe mari űo payochu cahmana Cohamacu. ²⁴Cohamacu pjacu marieriro to jichu masa tirore űuerara. Ā jia tirore űo payoa, ti noano tuhotua mehne tirore noano potocā űo payoro cahmana masare —niha Jesu.

²⁵To ā nichuta ticoro ō sehe ni yuhtiha:

—Mesia, “Cristo” ti niro sehe masare yuhduchu yoahtiro, to tahti cĵihtire masija yuhu. Tiro taro, marine jĵihtiare buhe pahñonohca —niha ticoro.

²⁶—Yuhuta jija Cristo —niha Jesu tiorore.

²⁷To ā ni yahuchu waro wihina sā to buheina sehe Jesu numino mehne to durucuchu űuna, cuaa wahi. Ā cuapanahca “ĴDohse cahmajari muhu? ĴDohse nii nijari muhu tiorore?” ni sinitu űuerahi. ²⁸Ā jiro numino to siture tói duhu daponoca, macapu waha, masare yahuro, ō sehe niha:

²⁹—Yu yoi cĵirire yahu pahñorirore űuna taga musa. Tiro potocāta Cristo jiboca pa tehe nino —niha ticoro.

³⁰To ā nichu tuhoa tí maca macaina sehe Jesure űua taa nire. ³¹Tí pjare sā Jesu buheina sehe tirore tuaro chu dutimai:

—Buheriro, chuĵa —nimai sā.

³²—Soro jia chuare cĵuaja yuhu. Tíre musa masierara —nire tiro.

³³To ā nichu tuhona sā basi ō sehe ni durucui:

—ĴPaina tirore chuare wa tuhsuari? —nii sā basi.

Sā ā nichu Jesu ō sehe ni yahure:

³⁴—Masa sehe chu ji coara. Yuhure warocariro to cahmaare yoacu ji coaja yuhu sehe to yoa dutiriro seheta yoa pahñocu tacu. ³⁵“Cuatro sūri duhsara dicha naahca”, wese puro to niro seheta musa sehe ni tuhotuena tĵiga. “Cohamacu yare sā yahuho duhsasinina”, ni tuhotuena tĵiga. Potocā niita nija musare. Mipu pinihtare masare űuga. Dicha tichu musa naari pja to jiro seheta, mipu pinihta masa yu buheare ti tuhohti pja jiro nina. ³⁶Toaa dichare naainare ti wapariro seheta yu yaina cĵihti naainare yu yare buheinare ti ā yoi wapa tinare noano yoihtja yuhu. Ti ā buhechu tuhoa yu buheare tuhoina yu yaina sehe Cohamacu mehne jĵihtia dachoripe jirucuahca. Ā

jia tinare buhe muhtaina, baharo yu yaina jichu yoina cuhu cuno potori wahcherucu ahca. ³⁷“Cũiro toa muhtariro jira. Pairo sehe toaa dichare nariro jira”, nia tiha panopu. Tí potocã tjira. Ti ã niriro seheta caina yu yare yahu muhtaina jira. Paina sehe yu yare buhea yu yaina jichu yoina jira. ³⁸Wese puro to yaina dahraina toaeraina ti jipachuta to toaa dichare tinare naa dutiro warocara. Tó seheta masare buhe muhtaeraina musa jipachuta yu yaina cjihti yoa duticu warocaja musare. Paina sehe tinare buhe muhta tuhsure. Ti buherinapure pari turi buhe namona, yu yaina jichu yoanahca musa sehe. ã jina buhe muhtaina sehe ti yoadohoro mehne painare yu yaina jichu yoanahca musa —nire Jesu.

³⁹Tí pjare Samaria macaricoro “Yu yoari cjiire tiro yahu pahñore”, to ã nichu tuhoa Samaria macaina payu Jesure wacu tua, tirore cahmaha. ⁴⁰ã jia Samaria macaina Jesu cahai sua, “Sã mehne tjuasiniga”, nire tirore. Ti ã nichu sã cuhu tiro mehne pua dacho tói tjuasinii. ⁴¹Paina cuhu payu Jesure tuhoa cahmare tirore. ⁴²Õ sehe nire masa numinore:

—Wahmanopure mu yahurire tuhona, Jesure cahmahi. Mipu pinihtare Jesu to durucuare tuhona tirore wacu tuana, tirore cahmaja. ã jina tiro sehere tuhona ahri yahpa macainare pichacapu wahaborinare yuhdachu yoariro potocã to jichu mipu sã masija —nire masa Samaria macaricorore.

Puhtoro macunore dohatirore noariro wahachu yoaha Jesu

⁴³Pua dacho baharo Jesu sare Galilea yahpau suho wahare. ⁴⁴Wahmanopure õ sehe nia tire tiro: “Cohamacu yare yahu muhtarirore to ya yahpa macaina tirore ño payoerara. ã jia yuhure ño payoerara õ macaina õi yu bucuariro jichu”, nia tire Jesu. ⁴⁵ã jia Galileapu to suchu tó macaina tirore noano piti bocare. Tó pano Jerusaléi bose numui Jesu Cohamacu tuua mehne to yoachu ñurina jire tina.

⁴⁶ã yoa Canápu Galileai jiri macapu core vino to wahachu yoari macapu wahaa wahai sã tiro mehne. Caná cahai jiri macai Capernau wama tiri macai jipihtina bui puhtoro docai jiriro puhtoro macuno dohatiro niha. ⁴⁷Tuhsu, Jesu Judeapu jiriro Galileapu to suchu puhtoro tuhoha. Tíre tuhoro Jesu cahapu wihire:

—Yu macu yariaro nihre. ã yoa tirore noariro wahachu yoai taga —ni tuaro mehne pjire tirore.

⁴⁸To ã nichu tuhoro Jesu õ sehe ni yuhtire:

—Cohamacu tuua mehne yu yoachu ñuerana, ne yuhure wacu tuaerara musa —nire Jesu tirore.

⁴⁹To ã nichu puhtoro sehe õ sehe nire:

—Puhtoro, yu macu to yariahto pano taga —nire tiro Jesure.

⁵⁰—Tjuuahga. Mu macu catica —nire Jesu.

To ã nichu tuhoro, “To niriro seheta catirohca yu macu” nino, puhtoro tjuua wahare. ⁵¹ã tjuaarucurirore to cahamaca tirore piti boca, õ sehe ni yahuha:

—Mu macu catihre —ni yahuha tina tirore.

⁵²—¿Noho waroi sũ jichu noariro wahari tiro? —ni sinituha tiro to cahamacare.

—Canure cohari pja baharocã juaro suruhre tirore —niha tina.

⁵³Ti ā nichu tuhorō ō sehe ni tuhotuha tiro: “Jesu yuhure to ā ni yahuri pjaihta juaro surua wahari jire”, ni tuhotuha puhtoro sehe. “Potocāta nino niri jira yuhure” nino, tiro jipihtina to coyea mehne Jesure wacū tuaha.

⁵⁴Jesu Judea yahpapu jiro Galilea yahpapu to suri baharo puhtoro macunore noariro to waharire mari quihōchu pua taha Cohamacu to tuaa mehne yoa ño tuhsure Jesu.

Tini masierarirore noariro wahachu yoaha Jesu

5 ¹Baharo judio masa Cohamacure sã ño payori bose numuri jichu Jesu Jerusalēpu sure tjoa. ²Tói oveja wama tiri sopaca cahai cuhsuri copa jihre. Sã judio masa ya mehne nia Betesda wama tiri copa jihre. Tí copa cahai cinco tihamahnoera tahti poca jihre. ³Tí tahti pocai payu dohatiina coäre. Capari ñueraina, cū buhusehe dahporo ñaina, pjacu buhaina tina tí copa cahai jia, [co ñuhmi mua mujanore cohtaa nire. ⁴Tópu buharo tí copa macaa core cã tahari ñuhmichu yoa mujare anjo. Tí copa macaa co ñuhmiri baharo ña mio muhtariro sehe dohse jiare dohatiare cjuariro noariro wahare.] ⁵Ā yoa tói treinta y ocho cuhmari waro dohatiriro jire. ⁶Tói to coāchu ñuno to ā yoari pja dohatiriro jichu masire Jesu tirore. Ā masino tirore ō sehe ni siniture:

—¿Pjacu dohatia marieriro ji duajari muhu? —nire Jesu.

⁷To ā nichuta dohatiriro ō sehe ni yuhtire:

—Tí co to ñuhmichu yuhure co jiri copapu naboriro mariahna. Tí copapu yu ña mio duapachuta paina sehe yu pano ā ña mio muhtarucura —nire tiro Jesure.

⁸—Wahcārucaga. Mu coāri cahsarore naa, wahaga —nire Jesu tirore.

⁹To ā nichuta dohatiriro sehe to coāri cahsarore naa, ducu ducare. Tí dacho Sabado judio masa sã sori numu jire. ¹⁰Tí dachoi Jesu to ā yoachu ñua judio masa sã puhtoa sehe dohatiriro cjirore ō sehe ni yahuha:

—Michare Sabado dacho mari sori numu jipachuta mu coāri cahsarore naahna muhu. Ā yoacu mari dutiare yuhduracai nina muhu —niha tina tirore.

¹¹—Yuhure yu dohatiare cohāriro sehe ō sehe nire yuhure: “Mu coāri cahsarore na, wahaga”, nire tiro yuhure —ni yuhtiha dohatiriro cjiro.

¹²—¿Tíre muhure ā niriro sehe diro baro jijari tiro? —ni sinituha tina.

¹³Tói masa payu ti jichu ñuno Jesu sehe waha tuhsuha. Ā jiro dohatiriro cjiro sehe tirore noariro wahachu yoarirore to wamare masieraha. ¹⁴Baharo Cohamacu wuhui Jesu tirore piti boca, ō sehe ni yahure:

—Tuhosiniga muhu yuhure. Mipure noano pjacu tira muhu. Ñaare yoa namoi tjiga. Piri turi ñaare yoa namocu mu dohatiriro yuhdoro wahaihca muhu —nire Jesu tirore.

¹⁵To ā niri baharo dohatiriro cjiro sehe sã judio masa puhtoa tirore sinituina cjiri cahapu suro, ō sehe ni yahuha tinare:

—Jesu wama tirore yuhure noariro wahachu yoahre —ni yahuha tiro.

¹⁶Ā yoa Sabado jichu Jesu dohatirirore to dohatiare to cohāchu masia judio masa sã puhtoa sehe tirore ñu tuhtia, yahusāa dua ducare.

¹⁷Ā tirore ti yahusāa duachu masino Jesu sehe ō sehe ni yahure tinare:

—Yu Pucu mipure dahrasinina. Yuhu cūhu dahrasinii nija —ni yahure tirore yahusāa duainare.

¹⁸To ã nichu judio masa sã puhtoa sehe tiro mehne tuaro suaa, tó pano ti niriro yuhdoro tirore wajã duare. Sabado dachore sã sori numure cüirore to noariro yoachu ñua tina suare. Ñ suaa tiro Cohamacure “Yu Pucu” to nichu tuhoa, tina sehe tó pano ti niriro yuhdoro sua namoha tjoa. “ ‘Yuhu Pucu’ nino, Jesu to basi ‘Cohamacu mehne cüno potori jija’, ni wacüca tiro”, ni tuhoture judio masa sã puhtoa.

Jesu Cohamacu to warocariro jira

¹⁹Ñ yoa Jesu tinare õ sehe ni yahure:

—Potocã musare niita nija. Yuhu, Cohamacu macuno, yu mu suro yoaeraja. Yu Pucu to yoarire ñacu, tíre yojã. ²⁰Yu Pucu yuhure, to macunore, cahña. Ñ jiro to yoarire yuhure ño pahña. Ahri mipu to tuaa mehne yu yoari yuhdoro tiro payere yoa dutirohca yuhure. To ã yoa dutichu to tuaa mehne yoa ñoihca yuhu. Ñ jina ñu cuanahca musa. ²¹Yu Pucu yariarinare to masoriro seheta yuhu cühu yu cahmainare masoihtja. ²²⁻²³Ne yu Pucu sehe masa ti ñaa buhirire buhiri dahreriro jierara. Yuhu sehere tíre ti ñaa buhirire buhiri dahrehtirore cüre yu Pucu. Jipihtina masa tirore ti ño payoriro seheta yuhu cühu ti ño payohti cjihtire buhiri dahrehtirore cüre yuhure. Yuhure to macunore ño payoerana yu Pucu cühu ño payoerara musa. Tiro jira yuhure warocariro —nire Jesu.

²⁴Ñ ni tuhsu õ sehe ni yahu namore:

—Potocãta musare nii nija. Yu durucuaire tuhoina yuhure warocarirore wacü tuaina jipihtia dachoripe manopu ã jirucuahca. Ñ jicu tinare buhiri dahresi yuhu. Ñ jia tina pichacapu wahaborina yuhduahca. ²⁵Potocã musare niita nija. Pichacapu wahahtina yuhure Cohamacu macunore ti tuhohti pja mipu jira. Baharopu cühu yuhure tina tuhoahca tjoa. Ñ tuhoa tuho nunuina sehe Cohamacu mehne ã jirucuahca. ²⁶Cohamacu yu Pucu sehe ã jirucuchu yoariro jira. Ñ jiro yuhure to macunore ã jirucuchu yoahtiro ji dutire tiro yuhure. ²⁷Ñ jicu yuhu masuno Cohamacu to warocariro yu jichu tiro masare buhiri dahrehtirore cüre yuhure. ²⁸Ahrire tuhona, tuho cuaena tjiga musa. Pa dachopure jipihtina yariaina masa coparipu jiina yu durucuchu tuhoahca. ²⁹Ñ tuhoa, noare yoina cjiri jipihtia dachoripe Cohamacu mehne jihtina cjihti masa mujaahca. Ñaare yoina cjiri sehe ñaare ti yoari buhiri pichacapu wahaahca —ni yahure Jesu.

³⁰Ñ ni tuhsu õ sehe ni yahu namore:

—Yuhu yu mu suro ne yoaeraja. Ne yu basi yu cahmano yoa duaeraja. Yuhure warocariro to dutiriro seheta yoa duaia. Ñ jicu to niriro seheta buhiri dahreja. Tuhsu yuhu masare buhiri dahrecu quihónota yojã. ³¹“Yuhu tuariro jija”, yu ni yahuchu “Mu yahua ne quihóno jierara”, ni masiboca musa. ³²Pairo jira yuhure yahuriro. Tiro João sehe masare yahure yuhure. Masare yuhure to yahuri cjiri quihóno tjira. Tíre yuhu noano masija. ³³Musa paina sehere Joãopure yuhure sinitu dutina warocare. Ñ jiro potocãta yahure tiro musare. ³⁴“Cohamacu macuno jira ahriro”, yuhure ni yahuhtinare macaeraja. Ñ macaerapacuta João masuno to jipachuta yuhure “Cohamacu macuno jira”, to ni yahurire yahui nija. Musa yuhure wacü tuahti cjihtire, musa pichacapu wahaborina musa yuhduhti cjihtire yuhure João to yahurire yahui nija. ³⁵Sihãria mahaa dachoricã to ñu masichu yoaro seheta João musare

buhe muhtano mahanocã to catiro puro musare masichu yoare. To ã buhechu tuhona mahaa dachoricã wahchere musa. ³⁶Yu jia tiare to ã buhepachuta Cohamacu sehe yu jiare noano yahura. To ã yahuchu João yu jiare to yahua yuhdoro jira Cohamacu ya yahua. Ñ jicu Cohamacu to tuua mehne yuhure to yoa dutiri cjiire mipu yoai nija. Ahrire yu yoachu ñuna potocãta Cohamacu to warocariro yu jiare masina musa. ³⁷Á yoa yu Pucu yuhure warocariro to basi “Tiro yu warocariro jira”, ni yahura musare. To ã ni yahupachuta to durucua ne tuhoerare musa. Á jina musa tiore ne masierare. ³⁸Yuhure Cohamacu warocarirore musa ne tuho duaerare. Á jina musa Cohamacu yare ne cahmaerare. ³⁹Cohamacu yare ti joari püre musa buhena, “Mari ahri püre buhena jipihtia dachoripe Cohamacu mehne ã jirucunahca”, nina musa. Tí püita yuhure yahura. ⁴⁰Tí pü yuhure to yahupachuta musa sehe yuhure cahmaerara. Jipihtia dachoripe Cohamacu mehne musa ã jirucuhti cjihtire yuhure sini duaerara musa —ni yahure Jesu.

⁴¹Á ni tuhsu ò sehe ni namore:

—Yuhure musa ño payoerachu ñucu suaeraja yuhu sehe. ⁴²Musa sehe Cohamacure musa cahierachu masija yuhu. ⁴³Cohamacu yu Pucu yuhure to dutiriro seheta yu tapachuta musa yuhure cahmaerare. Pairo sehere Cohamacu tiore warocaerario to jipachuta to mu suro to tapachuta tiro sehere cahmanahca musa. ⁴⁴Paina masa musare ti ño payochu cahmana musa. Cohamacu musa mehne to ji coachu cahmaerara musa. Tiro dihta Cohamacu waro jira. Á cahmaerana yuhure tuhoerara musa. Yuhure wacü tuaerara. ⁴⁵Musare yu Pucupure ne yahusãsi yuhu. Tíre masiga musa. Moise cjiro to joari pü sehe musare yahusãnohca. “Tí pü macaa dutiare mari yoa pahñona, Cohamacu cahai wahanahca”, musa niri pü sehe musare yahusãnohca. ⁴⁶Moise cjiro to joari püi yuhu sehere yahuha. Á jina tí püre “Potocã tjira” nina, yu yahua cühure “Potocã tjira”, niboia musa. ⁴⁷Moise cjiro to joari püre “Potocã tjira” nierana, yu ya durucua cühure “Potocã tjira”, nisi musa —nire Jesu tinare.

Cinco mil bui masare chua waha Jesu

(Mt 14.13-21; Mr 6.30-44; Lc 9.10-17)

6 ¹Á to buheri baharo yoa cureri pja baharo Galilea wama tiri bucupariro pa buhusehe coapu sã to buheinare Jesu suho pahãa wahare. Tí taro pjiri taro pa wama Tiberia wama tire. ²Tó pano Galilea yahpai Jesu Cohamacu tuua mehne yoa ño, dohatiinare ti dohatiare ti cohãchu masa ñua tire. Á jia Jesu to pahãchu ñua, masa payu tiore nunu ti pahãre. ³Á yoa baharo tí taro duhtu cahapu Jesu sãre suho pahã su, tucupu muja, tu buipu sãre suho dujire. ⁴Tí dachore Pascua wama tiri bose numu cjihto, sã judio masa ya bose numu suhti dacho cjihto mahaa dachoricã duhsare. ⁵⁻⁶Tópu dujiro, Jesu payu masa to cahapu ti tarucuchu ñure. Á ñuno Felipere ò sehe ni sinitu ñure:

—¿Ahrina masa ti chuhti cjihtire nohopu nuchunahcari mari? —nire Felipere.

Jesu to basi to yoahtire masiparota Felipere ã sinitu ñure “¿Dohse ni yuhti-rohcari?” nino. ⁷To ã sinitu ñuchu tuhoru Felipe sehe ò sehe ni yuhtire:

—Ocho sūri posa dahra wapataa niñeru mehne chware mari nuchupachuta masare cāinare daacã chware mari witipachuta ne mu susi —nire Felipe Jesure.

⁸ Ñ yoa paio, sã mehne macariro Andre, Simo Pedro bahuro sehe Jesure ò sehe ni yahure:

⁹ —Ahriro wahma wahmua tariro cinco pão curirire, ã jichu wahi puarocã cũhure cjuara. Wiho mejeta masa sehe payubia jira. Ñ jiro ahri mahanocã chua ne mu susi —nire Andre.

¹⁰ To ã niri baharo:

—Masare duji dutiga musa —nire Jesu sã to buheinare.

Tói daacã tja jiro jire. Sã duji dutichu masa nuju su pihtiare tja bui. Tina mua dihtare sã quihõchu cinco mil wahtaroi jire. ¹¹ Ti ã nuju suchu ñũno Jesu sehe pãore na, Cohamacure “Noana”, nire. Ñ ni tuhsurota sãre to buheinare witi dutire. To ã dutichu sã sehe tói dujiinare witi wahcã. Tuhsu, puaro wahi cũhure witihi tinare. Jipihtinare noano ti chu duaro puro chuare tinare witihi. ¹² Baharo masa sehe yapi yuhdua wahare. Ti ã yapi yuhduachu ñũno Jesu sãre ò sehe ni yahure:

—Ti chu duharire noano saa cahmachu pahñoga. Ñ yoana ti chu duhaare ne bosi —nire.

¹³ To ã nichu tuhona sã sehe cinco pão curiri duhsarire sã saa cahmachuchu doce puhuse waro wijare. ¹⁴ Ñ jia Jesu tíre to tuua mehne to yoa ñochu ñua, masa sehe ò sehe nire:

—Potocãta jira. Ahriro Cohamacu yare yahu muhtariro ahri yahpapu “Tarohca”, ti niriro mari cohtariro tjira —nire tina.

¹⁵ Ñ jia tina Jesure ti puhtoro jihtiro cjihtore ñaha sã duamare. Jesu ti ã ni tuhoutuare masino pari turi cũirota tũcupu wahaa wahare.

Jesu co bui ducu wahcãha

(Mt 14.22-27; Mr 6.45-52)

¹⁶ Ñamichapau sã to buheina bucupariropu buhai. ¹⁷ Tõpure buhu su, dohoriapu samu, Capernaum wama tiri macapu majare pahã. Tí pjare sã majare pahãri pjare ñamipu jire. Jesu sehe sã cahapu tju wihierasini mini. ¹⁸ Sã ã majare pahãno watoi wihnono tuaro sãre tachu, pahcõri bujua pahcõri wahcãre. ¹⁹ Sã cinco kilómetro suboro waroi sã suchu waro Jesu sãre mu sure. Co buipu to tachu ñui sã. Ñ sã cahai to tachu ñua, sã sehe cua yuhdua wahacuru. ²⁰ Sã ã cua yuhduachu ñũno tiro sãre ò sehe ni yahure:

—Cuiena tjiga. Yuhuta jija —nire Jesu.

²¹ To ã nichu tuhona sã wahchea mehne tirore piti boca samu dutihi. To samuri baharocãta wacũenoca sã wahari yahpapure pahã su tuhsuhi.

Masa sehe Jesure macaha

²² Ñ yoa tí ñamine masa bucupariro pa buhusehe coapu tjuaina sehe sã yaria busoca, sã pahãhtia curia to jichu ñure. Tia mehne sã sahsero sã pahã wahachu cũhure ñure tina. Tuhsu Jesu sã mehne to pahãerachu ñure tina. Ñ jia pa dachoi tirore tói cohtaa niri jimare tina. ²³ Ti ã cohtaro watoi, paye buso, Tiberia wama tiri macapu taa buso Jesu Cohamacure “Noana”, to niriro cahacã cureropu, masare to chua witiro cahacã cureropu wahã suri jire tí buso. ²⁴ Ñ yoa sãre Jesu to suho jimarirore to mariachu ñua, masa tí busopu samu, Capernaup sãre nunu ti pahã tari jire, Jesure maca taa.

Jesu catichu yoaa chua yoaro sehe jiriro jira

²⁵ Ti pahã wihiri baharo, Jesure boca wihi, tina masa ò sehe ni sinitu ñure tirore:

—Buheriro, ¿dohse jichu tari muhu õpure? —ni sinitu ñure tina.

²⁶Ti ã ni sinitu ñuchu, Jesu tinare õ sehe ni yahure:

—Potocã niita nija musare. Yuhu musare Cohamacu tuaa mehne yu yoa ñopachuta yuhure sehere wacũ tuaerara musa. Yuhure wacũ tuaerapanahta yuhure macana musa. Yuhu mehne bujua chu, musa yapirina cjiri jina yuhure maca tari jira musa. ²⁷Wiho mejeta chua ne ã jirucuerara. Baharopu pihtia wahara. Æ jina tíre ã macarucuenã tjiga musa. Paye baro chua soro jia chuare macaga musa. Tí soro jia chuare bocana jipihtia dachoripe Cohamacu mehne jirucunahca. Æ jia tí chua pinihta ne pihtisi. Tí chuare yuhu masuno Cohamacu warocariro musare waihtja. Cohamacu yu Pucu yuhure tí baro chuare wa dutiro jira. Tirota to warocariro yu jiare ño tuhsure musare —nire Jesu.

²⁸To ã nichu tuhoa tina õ sehe ni sinitu ñure tiore:

—¿Cohamacu to yoa dutiare yoana tana dohse yoanhcari sã? —ni sinitu ñure tina.

Jesu sehe ti ã nichu tuhoro, õ sehe ni yuhtire tinare:

²⁹—Cohamacu musare õ sehe dutira. To warocarirore musa noano tuho, wacũ tuachu cahmana tiro —ni yuhtire Jesu.

³⁰To ã nichu tuhoa tina õ sehe nire tjoa:

—Cohamacu warocariro jicu tiro to tuaa mehne yoa ñoga sãre muhure sã noano wacũ tuahto cjihtore. ¿Yaba barore yoa ñobocari muhu? ³¹Mari ñuchusuma cjiripu panopu macaina masa marienopu maná wama wama tiare chua tiha. Cohamacu yare ti joari pũpũ õ sehe ni yahura: “Tiro tinare muano macaa chuare waa tiha ti chuhti cjihtire”, ni joaa tiha Cohamacu yare ti joari pũpũ. ¿To ã yoariro sehta yoaihcari muhu cũhu? —nire tina.

³²Ti ã nichu tuhoro õ sehe ni yahure Jesu tinare:

—Potocã musare niita nija: Moise cjiro muano macaa chuare waera tire musare. Yu Pucu sehe muano macaa chuare potocã jia chuare musare wariro jira. ³³Cohamacu to chua muanopu duji ta, jipihtiro yahpa macainare catichu yoa masina —nire Jesu tinare.

³⁴—Puhtoro, dachoripe tí baro chuare ã warucuga sãre —nire tina.

³⁵Ti ã nichu tuhoro, Jesu sehe õ sehe ni yahure tinare tjoa:

—Yuhu sehe catichu yoaa chua yoaro sehe jiriro jija. Mari ya chuare mari churi baharocãta dóicãta juca baa wahaja mari tjoa. Sihnia cũhure mari sihniri baharocãta ñahma yapioa wahaja tjoa. Wiho mejeta diro yuhure cahmariro, yuhure wacũ tuariro, ne juca baaerariro yoaro sehta to wahchea sehe tiore ne pihtisi. ³⁶Musa sehe yuhure ñupanahta yuhure wacũ tuaerasinina mini. Tíreta musare yahumahi yuhu. ³⁷Jipihtina yu Pucu yu yaina cjihtire yuhure to cũrina sehe yuhure cahmaahca. Æ jii yuhure cahmainare ne cohãsi yuhu. ³⁸Muanopu tacu yu cahmano yoi tai nierahi. Yuhure warocariro to cahmariro sehta yoi tai nii yuhu. ³⁹Ahrita jira yuhure warocariro to cahmaa waro: Jipihtina yu yaina cjihti yuhure to warina cjirire yu boerachu cahmana yuhure warocariro pihtiri dachoi ti masa mujahto cjihtore. ⁴⁰Jipihtina yuhure Cohamacu macunore ñuina, yuhure wacũ tuaina jipihtia dachoripe tiro mehne ti jirucuchu cahmana yu Pucu. Æ jicu pihtiri dachoi tinare masoihtja —nire Jesu.

⁴¹“Yuhu muanopu taa chua yoaro sehe jiriro jija”, to nichu tuhoa judio masa sã puhtoa sehe tiro mehne sua, ⁴²ti basi Jesure ñano ni durucure:

—¿Ahriro Jesu José macuno jierajari? To pucuro, to pocoro cūhure mari masija. Tuhsu mari yoaro sehe pjacu tiriota jira. ¿Ā jiparota dohsearo “Muanopu tahi”, nijari tiro? —ni suare tina.

⁴³ Ti ā nichu tuhoro Jesu ō sehe ni yahure tinare:

—Musa yuhure nāno ni durucuena tjiga. ⁴⁴ Yu Pucu yuhure warocariro sehe masare yuhu sehere cahmachu yoara. To ā yoerachu masa sehe yu yaina ji masieraboa. Pihtiri dachoi yu yainare masoihca yuhu. ⁴⁵ Cohamacu yare yahu muhtaina cjiri sehe ō sehe ni joaa tiha: “Cohamacu tinare buhe-rohca”, ni joaa tiha Cohamacu yare yahu muhtaina cjiiripu. Jipihtina yu Pucu to buheare tuhoina, tirore yuhtiina yuhure cahmana. Ā jia yu yaina jira.

⁴⁶ Yu Pucure ne cūiro masuno nuerare. Yuhu Cohamacu warocariro dihta yu Pucure nūhi. ⁴⁷ Potocā niita nija msare. Yuhure wacū tuariro jipihtia dachoripe yu Pucu mehne ā jirucurohca. ⁴⁸ Yuhu catichu yoaa chua yoaro sehe jiro jija. ⁴⁹ Musa nuchusuma cjiri masa marienopu manāre chua tiha. Ā tīre chupahta yariaa wahaa tiha. ⁵⁰ Muanopu taa chuare yu nia chuare masuno churo, ne pichacapu wahasi. ⁵¹ Yuhu muanopu taa chua catichu yoaa chua yoaro sehe jiro jija. Ahri chuare churiro jipihtia dachoripe yu Pucu mehne ā jirucurohca. Ahri chua catichu yoaa chua yoaro sehe jia yu pjacuta jira. Jipihtiri yahpa macaina Cohamacu mehne ti ā jirucuhti cjihtire yu pjacure waihtja. Ā wacu yariaihca —nire Jesu.

⁵² To ā nichu tuhoa sā coyera judio masa sehe tīre ō sehe ni durucure ti basi:

—¿Ahriro dohse yoa to pjacure chuhti cjihtire warohcari? —nire tina ti basi.

⁵³ Ti ā nichu tuhoro Jesu ō sehe ni yahure:

—Potocā niita nija msare. Yuhu masuno Cohamacu warocariro jija. Yu pjacure chuerariro, yu dire sihnierariro Cohamacu ya catia mehne ā jirucusi. ⁵⁴ Yu pjacure churiro, yu dire sihniriro yu ya catia mehne ā jirucurohca. Ā jicu pihtiri dachoi tirore masoihtja. ⁵⁵ Yu pjacu potocāta chua waro yoaro sehe jira. Yu di potocāta sihnia waro yoaro sehe jira. ⁵⁶ Yu pjacure churiro yu dire sihniriro yuhu mehne wahchea mehne jirucura. Yuhu cūhu tiro mehne wahchea mehne jirucuja. ⁵⁷ Yu Pucu yuhure warocariro ā jirucura. Ā jirucuro, yuhu cūhure ā jirucuchu yoara. Ā jia yuhure ā jirucurire masa chua, Cohamacu mehne muanopu ā jirucuahca tina cūhu. ⁵⁸ Ahrita jira muanopu taa chua. Mari nuchusuma cjiri manā wama tia ti churi cjiri yoaro sehe jierara ahri chua. Tina sehe tī chuare chupahta yariaa wahaa tiha. Ahri chua sehere churiro muanopu ā jirucurohca —nire Jesu.

⁵⁹ Capernaup judio masa sā buheri wūhūi Jesu buhero, āta ni yahure.

Jesu buheare tuhona muanopu ā jirucunahca mari

⁶⁰ Payu Jesure cahmaina to ā ni buheare tuhoa, ō sehe ni durucure:

—Ahri buhea nucu mijona. Ā jina mari tuho duaera cureja —ni durucure tina ti basi.

⁶¹ Ti ā nichu Jesu sehe ti durucuare masire. Ā masino tiro ō sehe ni siniture tinare:

—¿Ahri buheare tuhona suajari musa? ⁶² ¿Yuhu masuno Cohamacu warocariro muanopu yu tjuaa wahachu nūna dohse ni tuhobocari musa?

⁶³ Espiritu Santo masunore catichu yoara. Masa sehe ti basi catichu yoerara.

Espíritu Santo masare to catichu yoariro seheta yu buhea sehe masare Cohamacu mehne â jirucuchu yoara. ⁶⁴Câina musa mehne macaina ne yuhure wacû tuaerara —nire Jesu.

Wahmanopure Jesu tirore wacû tuaerainare masire. Tirore ñu tuhtiinare ñohtiro cûhure masi tuhsure. Â tirore wacû tuaerainare masino “Câina musa mehne macaina yuhure wacû tuaerara”, nire Jesu.

⁶⁵Â ni tuhsu ô sehe ni namore:

—Ô sehe ni yahumahi masare: “Yu Pucu sehe masare yuhu sehere cahmachu yoara. To â yoerachu masa sehe yu yaina ji masieraboa”, masare nii nimahi —nire Jesu.

⁶⁶To â ni buhechu tuhoa payu Jesure cahmamarina cjiro tirore cohâ, tiro mehne pari turi wahaerare. ⁶⁷Ti â yochu ñuno Jesu sâre doce to buheinare ô sehe ni siniture:

—¿Musa cûhu yuhure cohânhacari? —ni siniture sâre.

⁶⁸To â nichu Simo Pedro ô sehe ni yuhtire tirore:

—Puhtoro, sâre paio buheriro mariahna. Mu ya buheare tuhona Cohamacu mehne â jirucunahca sâ. Mu ya buhea dihta tîre yahura sâre. ⁶⁹Â jina sâ muhure wacû tuaja. Â yoa muhu noariro, Cohamacu macuno to warocariro mu jichu sâ masija. Â jina muhure cohâsi sâ —nire Simo Pedro Jesure.

⁷⁰To â nichu tuhoru Jesu ô sehe ni yahure sâre:

—Yuhu sehe masare doce besehi. Wiho mejeta cûiro musa mehne macariro watîno yairo cjihto jira —nire sâre to buheinare.

⁷¹Â nino Judare Simo Iscariote macunore nino niri jire. Juda sehe doce buheina sâ mehne macariro Jesure ñu tuhtiinare ñohtiro jire.

Jesu bahana tirore “Cohamacu macuno jira”, ni masieraha

7 ¹Baharo Jesu Galilea yahpai tinino wahare. Judea yahpai judio masa tirore wajâ duare. Ti â wajâ duachu masino tiro tî yahpapi wahaerare.

²Judio masa daa wuhusecâ sâ yohti numuri bese numuri mahanocâ duhsa-tjiâhre. ³Â jia Jesu bahana tirore ô sehe ni yahure:

—Judeapu wahaga. Tôi mu yainare Cohamacu tuua mehne mu ñohtiro cjihto wahaga muhu. ⁴Masare yoa ño duacu yaeraro cahmana muhure. Yoa ñono cahmana. Potocâta Cohamacu tuua mehne yoariro jicu tîre masare ñoga —nimare tina.

⁵To bahana jipahta Jesure “Cohamacu macuno jira”, nierare. Â jia, â nire tina tirore. ⁶Ti â niri baharo Jesu ô sehe ni yahure tinare:

—Masa yuhure ti noano masihtî pja duhsasinina mini. Musa sehe ñu duana bese numuri jichu waha masina. ⁷Ahri yahpa macaina masare ñu tuhtierara. Yuhu ti ñaa buhirire yu yahuchu tina yuhu sehere ñu tuhtira. ⁸Bese numu jichu wahaga musa sahsero. Yuhure yu wahahto duhsasinina mini. Â jicu yuhu sehe bese numurine ñui wahaerasinija —nire Jesu tinare.

⁹Â nino tiro Galileai tjuare.

Jesu daa wuhusericâ ti yoari numuri bese numuri jichu wahaha

¹⁰Bese numuripu Jesu bahana ti ñua wahari baharo Jesu cûhu ti baharo wahare. Â waharo masa ti ñueraro watoi wahare. ¹¹Bese numurihi jiina judio masa sâ puhtoa tirore macare:

—¿Nohopu jicari tiro? —ni sinituha tina.

¹² Æ jia masa cūhu Jesure payu yahuwajaha. Paina “Tiro noariro jira”, niha. Paina sehe “Tiro ñariro jira. Masare mahñoriro jira”, ni yahuwajaha tina.

¹³ Æ nipahta judio masa sã puhtoare cuia, masa ti ñueraropu Jesure yahuwajaha.

¹⁴ Bose numuri dacho macai Cohamacu wuhupu Jesu sãa suro, buhere.

¹⁵ To ã buhechu sã coyea judio masa tuho cuaa waha, ò sehe nire:

—¿Ahriro buheropu buhemahnoerariro jiparota dohsearo noano masi pah-ñonocajari? —nire tina tirore.

¹⁶ Ti ã nichu Jesu ò sehe ni yahure tinare:

—Yu buheri cjiri yu ya durucua jierara. Yuhure warocariro ya durucua sehe jira ahri buhea. ¹⁷ Cohamacu cahmaare yoa duaina yu buhea sehere Cohamacu ya durucua ti jichu masiahca. Yu mu suro yu buherachu cūhure masiahca tina. ¹⁸ Cūiro to mu suro to masia mehne buheriro jiro “Yuhu dihtare ño payoga”, niriro jira tiro. Wiho mejeta yuhure warocariro sehere musa ño payochu cahmaja yuhu sehe. Yu ã nichu tuhona “Potocã durucuriro jira tiro. Ne mahñoerara”, ni masinahca musa.

¹⁹ Cohamacu dutiare Moise cjiro sehe cūa tiha musare. To ã cūpachuta musa jipihtina tí dutia sehere ne yuhtierare. ¿Dohseana yuhure wajã duajari musa? —nire Jesu sã coyea judio masare.

²⁰ —Muhu tuho masierariro, watino to cohtotariro jira. Muhure wajã duaina mariahna —ni yuhtire tina Jesure.

Ti ã nichu Jesu ò sehe ni yuhtire:

²¹ —Sori numu Sabado jichu cū tahata Cohamacu tuua mehne dohatiriro to dohatiare yu cohāchu musa ñu cuaa wahare. ²² Mari ñuchusuma cjiri panopu macaina sehe ti pjacure mahanocã cahsarocāre yihsoina ti yoariro seheta Moise cjiro yihso dutiha. To ã dutichu Sabado mari sori numu jipachuta masunore to pjacure mahanocã cahsarocāre yihsoina musa. ²³ Sabado jichu masunore to pjacure mahanocã cahsarocāre yihsoina musa, Moise cjiro dutiri cjirire yoana tana. ¿Musa cūhu Sabado dachoi tíre yoapanahta tí dachoi dohatirirore jipihtia to pjacure noariro yu yoachu ñuna dohseana yuhu mehne suari musa? ²⁴ Yu yoarire musa noano masierapanahta, yuhure ñano tuhoutuena tjiga. Musa noano masiri baharo yuhure musa tuhoutua potocã tjiahca —nire Jesu.

Jesu wahmanopu to tarirore yahuha

²⁵ To ã ni yahuri baharo mahainacã Jerusalē macaina tirore ò sehe ni yahuwajare:

—¿Ahriro judio masa puhtoa ti wajã duariro jierajari? ²⁶ Æ tirore ti wajã duapachuta jipihtina panoi masare buhero nina tiro. Wiho mejeta tirore wajã duaina jipahta ã ñunocahna. “Tiro potocãta Cristo jira”, ¿ni tuhutubocari puhtoa sehe? ²⁷ Wiho mejeta ahriro Jesu to tarirore sã masija. Cristo sehe masare yuhduchu yoahitiro to tachu to tariro sehere masimahnoerara. Æ jiro masare yuhduchu yoahitiro Cristo waro jierara Jesu —ni yahuwajare tina Jerusalē macaina.

²⁸ Ti ã niare masino, Jesu ò sehe ni tuaro sañurucu buhere Cohamacu wuhui:

—Yuhure õ sehe ni tuhotura masa: “Tirore masija. ã jina to tariro cühure masija”, ni tuhotumana masa. Masa ã ni tuhotupanahta yuhure warocarirore ne masierara masa. Yuhure warocariro potocã niriro, potocã yoariro jira. Tirore ne masierara masa. ²⁹Tirota yuhure warocare. ã jicu tiro cahaputa tahi. ã jicu yuhu sehe tirore masija —nire Jesu judio masare.

³⁰To ã nichu tuhoa tirore ñaha duamare. Ti ã ñaha duapachuta Jesu to ñano yuhduhti pja duhsasinire. ã jia tina tirore ñaha masierare. ³¹Paina masa sehe payu tirore wacũ tua, õ sehe nire:

—Ahriri Jesu sehe payu tahari Cohamacu to tuaa mehne yoa ño tuhsure. Jipihtina paina yuhdoro Cohamacu tuaa mehne yoa ñohna tiro. ã yoarota Cristo Cohamacu to warocariro tjira ahriri Jesu —nire Jesure wahma wacũ tua ducaina.

Fariseo curua macaina Jesure peresu yoa dutiha

³²Masa Jesure ti ã ni durucuchu tuhoa sacerdotea puhtoa, fariseo curua macaina mehne Jesure ñaha dutia warocaha surarare.

³³ã jiro Jesu judio masare õ sehe nire:

—Mahaa dachoricã masa mehne jisinihca. ã jicu baharocãta yuhure warocariro cahapũ wahaihca. ³⁴Yu jilhtopũ masa waha masierara. ã jina yuhure macapanahta ne bocasi masa —nire Jesu judio masare.

³⁵To ã nichu tuhoa tina ti basi õ sehe ni durucure:

—¿Ahriri ã nino nohopũ wahabocari, masa tuhotuchũ? ¿Griego masa chahi judio masa waha siteina ti jia macari cjiripũ griego masapũre buhero wahabocari ahriri? ³⁶“Yu jilhtopũ masa waha masierara. ã jina masa yuhure macapanahta ne bocasi”, to nichu ¿dohse nino baro ahriri ã nijari? —ni durucure judio masa ti basi.

Catichu yoaa márine yahuha Jesu

³⁷Bose numũri pihtiri dacho tí dacho waro jiro nire. Tí dachoi Jesu tói ducuro, tuaro mehne sañurucu õ sehe ni yahure:

—Ñahma yapioina core ti tuaro cahmano seheta jipihtia dachoripe Cohamacu mehne masa jiltire tuaro cahmaina yuhure siniga. Masa ã sinichu Cohamacu yaina musare ji dutihtja. ³⁸Yuhure wacũ tuainare õ sehe ni joaa tiha Cohamacu yare ti joari tjui: “Mári pohtaripũ catichu yoaa co to ã wijaarucuro seheta Cohamacu yaina mehne catichu yoariro ã jirucurohca”, ni joaa tiha Cohamacu yare ti joari tjui —ni yahure Jesu judio masare.

³⁹ã catichu yoarirore wama payo yahuro “Yuhure wacũ tuainare Espíritu Santo sãarucu su mua waharohca”, nino nire Jesu. Tiro muanopũ to mujae-rasinichu Espíritu Santo sehe wihierasiniha.

Judio masa pua curua tju waha

⁴⁰Jesu to ã nichu tuhoa, masa payu õ sehe ni durucure:

—Ahriri potocãta Cohamacu yare yahu muhtariro mari cohtariro jira —nire masa.

⁴¹Õ sehe nire paina sehe:

—Ahriri Cristo marine yuhduchu yoahitiro jira —nire.

Paina sehe õ sehe nire tjoa:

—Cristo taro, Galilea yahpa macariro jisi tiro. Ahriro Jesu sehe tó macariro tjira. ⁴² Cristo Davi cjiro panamino ji turiariro jirohca. Ñ jiro Davi ya maca cjiroi Belēi Cristo masa bajuaro hca. Õ sehetā ni yahura Cohamacu yare ti joari pūi. Ahriro Jesu sehe Belēi masa bajueraha. Ñ jiro tiro Cohamacu to warocariro Cristo waro jierara —nire tina.

⁴³ Ñ jia Jesure tuhomarina cjiri tju ware ti basi pua curua. ⁴⁴ Mahainacā masa sehe Jesure ñaha duamare. Ñ ñaha duapahta tirore ñahaerare.

Judio masa puhtoa Jesure ne wacū tuaeraha

⁴⁵ Ñ yoa surara sacerdotē puhtoa cahapu fariseo curua macaina cahapu tjuaa wahaha. Ti tju suchu ñua tina surarare sinituha:

—¿Dohseana Jesure ñahaerari musa? —ni sinituha tina sehe.

⁴⁶ —Tiro noaputiaro durucuriro jihre. Paina tiro yoaro sehe durucuina ne mariahna —ni yuhtiha surara tinare.

⁴⁷ Ti ñ nichu fariseo curua macaina sehe ñ sehe ni yahuha:

—¿Musare to mahñochu “Potocā nino nica”, niri musa cūhu? ⁴⁸ Mari puhtoa Jesure wacū tuaeraina jia ne tirore cahmaerare. Sā cūhu ñ jina tirore cahmaeraja. ⁴⁹ Ahriina masa sehe Cohamacu dutiare Moise cjirore to cūrire masierara. Ñ masieraina jia Jesure wacū tuaina jia tirore cahmana. Ti ñ cahmari buhiri tinare Cohamacu buhiri dahrerohca —niha fariseo curua macaina.

⁵⁰ Fariseo curua macariro Nicodemo Jesure suhūduro suriro cjiro tói jiha tina mehne. Ti ñ nichu tuhorō ñ sehe niha tiro cūhu tinare:

⁵¹ —Jesu to ñano yoirare masieraja mari. Ñ masierana tiro marine to yahuhto pano tirore buhiri dahre masieraja mari. Ñ masierapanahtha tirore buhiri dahrena, mari ya dutiare yuhdurucana nija mari —niha Nicodemo tinare.

⁵² To ñ nichu tuhoa ñ sehe ni yuhtiha tina:

—¿Mūhu cūhu tiro yoaro sehetā Galilea macariro tjijari? Cohamacu yare ti joari tjure buhe pahñoa. Ñ buhecū, “Cohamacu yare yahu muhtaina ne cūiro mariahna Galileare”, ni buhe masihca mūhu. Ñ jiro ñ nimacanocano nina Jesu —ni yuhtiha tina Nicodemore.

⁵³ [Ti ñ niri baharo ti ya wuhusepu tjuaa wahaha.

Muno mehne ñano yoirarore judio masa puhtoa wacūenoca su pja

8 ¹ Jesu tūcupu Olivo wama tidupu wahare. ² Ñ yoa pa dachoi bohrearo jichu Cohamacu wuhupu tiro sure tjoa. To ñ suchu ñua masa payu tiro cahai cahmachure. Ti ñ cahmachuchu ñuno tiro sehe dujitjiāhno tinare buhe dūcare. ³ To ñ buhero watoi sā coyē judio masa buheina, fariseo curua macaina mehne tí wuhupu nūminore na tare. Ticoro muno mehne to ñano yochu waro wacūenoca su pja suha tina ticorore. Ñ su pja sua ticorore Cohamacu wuhupu na sāare tina. Na sāa su tuhsu jipihtina panoi ticorore duhu dapo, ⁴ ñ sehe nire:

—Buheriro, ahricoro muno mehne ñano to yochu waro wacūenoca ticorore su pja suhi. ⁵ Cohamacu dutiare Moise cjiropu marine to cūri ñ sehe nina: “Muno mehne ñano yoirarore tāa mehne doca, wajāga”, nia tiha Cohamacu dutia. Mūhu waro, ¿dohse ni tuhotujari ahrire? —ni siniture tina Jesure.

⁶Jesu to ñano nichu tuho duaa nimare tina tirore yahusã duaa. Ti ã sinitu-pachuta Jesu sehe puhsa nuju su, yahpapu to wamo pica mehne joare. ⁷Ã jiro ã ti ni siniturucuchu Jesu sehe wahcãruca, tinare õ sehe ni yahure:

—Musa mehne macariro ñano yoarerariro sehe ticorore tãa mehne doca muhtajaro —nire Jesu.

⁸Ã ni tuhsu pari turi tiro puhsa nuju, yahpapu joare tjoa. ⁹Tíre tuhoa ti ñaa yoirire wacua, ti wahmisuma sehe wijaa muhtare. Ti baharo tina mehne macaina cuhu wijaa phtia wahare. Ã ti wijaa phtiaro baharo numino tói ducuricoro Jesu mehne tjuare. ¹⁰Ã jiro Jesu wahcã nuju su, ticorore õ sehe ni sinitu ñure:

—¿Nohopu wahari tina? ¿Muhure buhiri dahre duamarina mariajari mipure? —nire ticorore.

¹¹—Mariahna, puhtoro —ni yuhtire ticoro.

—Yuhu cuhu buhiri dahreraja muhure. Wahaga. Ã jico ñaare yoa namoeco tjiga —nire Jesu ticorore.]

**Buhriaro marine to ñu masichu yoaro seheta Jesu ahri
yahpa macainare Cohamacure masichu yoara**

¹²Pari turi Jesu tí wuhupu jiinare õ sehe ni yahure:

—Buhriaro marine to ñu masichu yoaro seheta yuhu ahri yahpa macainare Cohamacure masichu yoaja. Yuhure wacũ tuariro jipihtia dachoripe Cohamacu mehne ã jirucurohca. Ã jiro tiro noaare wacũnohca. Ã yoa tiro ñaare wacũ duasi —ni yahure Jesu.

¹³To ã nichu tirore fariseo curua macaina õ sehe nire:

—Muhu mu basi mu jia tiare ã ni durucui nina. Ã jia mu õ sehe ni, mu mu suro mu nimacanocachu tí yaba cjihti jierara —nire tina Jesure.

¹⁴Ti ã nichu Jesu õ sehe ni yuhtire:

—Yu tarirore masija yuhu. Yu wahahto cuhure masija yuhu. Musa sehe ne tíre masierara. Musa õ sehe nipachuta yu jia tiare musare yu yahuri potocã tjira. ¹⁵Musa mu suro musa ñuri dihtare masina musa. Ã jina noano masierara musa. Ã masierapanahata yuhure ñano ni durucura musa. Yuhu sehe yu mu suro masare ne ã nieraja. ¹⁶Ã jicu masa ti jia tiare ñu masicu yu mu suro ñu masieraja. Yuhu pini yu Pucu yuhure warocariro mehne ñu masija. Ã jicu masa ti jia tiare yu ñu masia tí potocã tjira. ¹⁷Musare dutia ti joari pui õ sehe ni yahura: “Puaru masa cãno potori ti yahuchu ti yahua potocã tjira”, ni yahu joari jira. ¹⁸Yuhure yahuriro mehne sã puaro tjija. Yuhu yu jia tiare yahuja. Tuhsu, yu Pucu cuhu yahura yuhu sehere. Tirota jira yuhure warocariro —nire Jesu.

¹⁹—¿Nohopu jicari mu Pucu? —ni siniture tina.

—Yuhure musa masierara. Yu Pucu cuhure masierara musa. Yuhure masina, yu Pucu cuhure masiboa musa —ni yuhtire Jesu tinare.

²⁰Jesu tinare buhero ã ni durucure Cohamacu wuhui ti niñeru duhu sãa caa poca cahai. To ñano yuhduhti pja duhsasinire. Ã jia tina mehne to jipachuta tina tirore ñahaerare.

“Yu wahahtopure musa sehe waha masisi”, niha Jesu

²¹Pari turi Jesu tinare õ sehe ni yahure tjoa:

—Yü tariopu wahaihca. Yü wahari baharo yuhure macanahca musa. Ä jina musa ñaa buhiri tiina yarianahca. Yü wahahtopure musa sehe waha masisi —ni yahure Jesu.

²² —“Yü wahahtopure musa sehe waha masisi”, ¿to nichu tuhoa ahriro to basi wajä yariarohcari ä nino? —nire sä coyca judio masa ti basi.

²³ Ti basi ti ä nichu masino ö sehe ni yahure Jesu tinare:

—Musa sehe ahri yahpa macaina jira. Yuhu sehe muano macariro jija. Ahri yahpai bajuarina jira musa sehe. Muano pu tariro jija yuhu sehe. ²⁴ Musa yu jia tiare yu nirire “Potocä jierara” nina, musa ñaa buhiri tiina yarianahca musa. Ä jicu “Musa ñaa buhiri tiina yarianahca musa”, nimahi musare —nire Jesu tinare.

²⁵ —¿Noa baro jijari muhu? —ni siniture tina.

—Wahmanopure yu nirucuriro seheta jija yuhu. ²⁶ Musare yu yahuhti pjíro duhsasinina. Tuhsu, musa ñano yoari buhirire musare yu yahuhto cjihto pjíro duhsasinina mini. Ä jicu yuhure warocariro to yahuri cjirire ahri yahpa macainare yahuja. To yahuri potocä tjira —nire Jesu tinare.

²⁷ “Yuhure warocariro”, to nichu tuhoa “Mari Pucu jica”, ni tuhotuerare tina. ²⁸ Ti ä ni tuhotuerachu ñano Jesu ö sehe ni yahure tinare:

—Yuhure masunore Cohamacu warocarirore musa yucucu taño mehne wahcö daponahca. Musa ä yoana, “Tiro Cohamacu warocariro tjira”, ni masinahca. Ä jina yu mu suro yu yoaerariro yu jia tiare masinahca musa. Ä jina yu Pucu yuhure to buheri dihtare yahuriro yu jia cühure masinahca musa. ²⁹ Yuhure warocariro sehe yuhu mehne jira. To cahmaare jipihtia dachoripe yorucuja. Ä jiro yuhure tiro ne cohäerara —nire Jesu tinare.

³⁰ To ä nichu tuhoa, tiore masa payu wacü tuare.

Cohamacu pohnare, ñaare yoaina cühure yahuha Jesu

³¹ Ä jia paina judio masa Jesure wacü tuare. Ä jiro Jesu tinare ö sehe ni yahure:

—Yü dutiare yoa pahñoina jina, potocäta yu buheina jira musa. ³² Ä jina potocä masinahca musa. Potocä jiare masina, ñaa yoaare duhu masinahca. Ä jina cahamaca yoaro sehe ji namosi musa —nire Jesu tinare.

³³ To ä nichu tuhoa tina ö sehe ni yuhtire:

—Sä sehe panopu macariro Abrahä cjiro panamana ji turiaina jija. Ä jina ne paina ti cahamaca jieraja sä. Ä jicu “Cahamaca yoaro sehe ji namosi” nicu, ¿dohse jiro baro säre ä nijari muhu? —ni siniture tina Jesure.

³⁴ Ti ä nichu tuho ö sehe nire tiro:

—Potocä musare niita nija. Jipihtina ñaare yoaina sehe ti ñaa yoaare duhu masierara. Ä jia tí ñaa sehe ti puhtoro yoaro sehe jira. Ä jiina jia cahamaca yoaro sehe jira tina. ³⁵ Cahamacuno sehe to puhtoro ya curua macariro jipih-tia dachoripe jirucuerara. Ä jiro painare dutiriro jierara. Tí wuhu macariro sehe to macuno sehe jipihtia dachoripe potocäta tí curua macariro jira tiro. (Yuhu sehe Cohamacu macuno jija. Ä jicu dutiriro jija. Musa ñaa yoaare duhu dutihtja.) ³⁶ Ä jina yuhu Cohamacu macuno ñaare yu duhuchu yoarina jina potocäta ñaare duhurina jira musa. (Ä jina tí ñaa cahamaca yoaro sehe ji namoerara musa.) ³⁷ Abrahä cjiro panamana ji turiaina musa jichu masija. Ä jipanahta yu yahua sehere tuho duaerara musa. Ä jina yuhure wajä duara

musa. ³⁸Yü Pucu yuhure to masichu yoari cjiire yahuja musare. Yü ä yahu-pachuta musa pucu watino musare to dutiare yoara musa cühu —nire Jesu tinare.

³⁹—Abrahä cjiro panopu macariro sä ñuchu cjiro jia tiha. Ä jiro watino sä pucu jierara —ni yuhtire tina.

Ti ä nichu Jesu ö sehe ni yuhtire:

—Abrahä panamana jina, to yoariro seheta yoaboa musa. ⁴⁰Cohamacu yuhure potocä to yahuare musare yu yahupachuta yuhure wajä duara musa. Abrahä cjiro sehe ne ä yoaera tiha. ⁴¹Musa pucu to yoariro seheta yoara musa —nire Jesu tinare.

To ä nichu tina ö sehe ni yuhtire:

—Wamomaca duhtemahnoeraina pohna jieraja sä. Cüirota jira sä Pucu. Tirota jira Cohamacu —nire tina.

⁴²Ti ä nichu Jesu ö sehe ni yuhtire:

—Cohamacu mehne macariro jicu, öpure tahi. Ä jina Cohamacu musa Pucu to jichu yuhure cahıboia musa. Yü mü suro taerahi yuhu pinihta. Cohamacu to warocachu tahi öpure. ⁴³¿Dohseana yu durucuare tuhoerajari musa? Yü yahuare tuhona bihoerara musa. Ä jina tuho duaerara musa. ⁴⁴Musa pucu sehe watino jira. Ä jina watino cahmaa sehene yoa duara musa. Ahri yahpa wahmanopu to ji ducachupu, mipu cühure tiro masare wajärucuriro jira. Tirore potocä durucua mariahna. Ä jiro tiro potocä ne durucuerara. Tiro wahmanopure mahño muhta ducariro jia tiha. Ä jiro tiro ä mahñorucuriro jiro, mahñoare yahura. ⁴⁵Yuhu sehe musare potocä yahuja. Ä yu yahuchu yuhure tuhoerara musa. ⁴⁶“Muhu ñano yoariro jira”, yuhure ni masierara musa. ¿Potocä musare yu yahupachuta dohseana tuhoerajari musa? ⁴⁷Cohamacu pohna sehe to durucuare tuhora. To pohna jierana, to durucuare tuho duaerara musa —nire Jesu tinare.

Abrahä cjiro to jihto pano Cristo sehe ji muhta tuhsua tiha

⁴⁸To ä nichu tuhoa judio masa tirore ö sehe nire:

—“Muhu Samaria macariro jira. Ä jicu tuho masierariro watino to cohtotariro jira muhu”, sä niri potocä tjira —nire tina Jesure.

⁴⁹Ti ä nichu tuho ö sehe ni yuhtire Jesu:

—Tuho masierariro, watino to cohtotariro jieraja yuhu. Yü Pucure ño payoja. Musa sehe yuhure ño payoerara. ⁵⁰Yuhure masa ti ño payohtire macaeraja yuhu. Yü Pucu sehe masare yuhure ño payo dutira. Tiro pinihta yu jia tiare noano ñu masino, äta ño payo dutira. Tuhsu, yuhure ti cahmaerari buhiri buhiri dahreriro jirohca tiro. ⁵¹Potocäta musare nii nija. Yü dutiare yoariro jipihtia dachoripe Cohamacu mehne ä jirucurohca —nire Jesu.

⁵²To ä nichu tuhoa ö sehe nire tina:

—Mipu pinihtare tuho masierariro, watino to cohtotariro mü jichu sä noano masija. Abrahä cjiro yariaa wahaha. Cohamacu yare yahu muhtaina cjiri cühu yaria pihtia wahaha. Ä jicu “Yü dutiare yoariro jipihtia dachoripe Cohamacu mehne ä jirucurohca” nicu, ¿dohse nicu ä nijari muhu? ⁵³¿Sä ñuchu cjiro Abrahä yuhdoro tuajari muhu? Tiro cjiro, Cohamacu yare yahu muhtaina cjiri cühu yariaa wahaha. ¿Muhu sehe diro baro jijari muhu ä ni durucucu? Muhu ä niboriro jierara —nire tina.

⁵⁴Ti ā nichu tuhoro Jesu ō sehe ni yahu namore:

—Yuhu yu basi “Tuariro jija yuhu” nicu, tuariro jieraboca yuhu. Yu Pucu sehe “Tiro tuariro jira”, nina yuhure. “Sā yairo Cohamacu”, musa niriro sehe yu Pucu tjira. ⁵⁵Musa sehe yu Pucure ne masierara. Yuhu sehe tirore masija. “Tirore masieraja” nicu, musa yoaro seheta mahñoa payuriro jiboa yuhu. Potocā tirore masija. Ā jicu to dutiare yoaja. ⁵⁶Ahri yahpapu yu tahtore mari nuchu cjiro Abrahā cjiro masia tiha. Ā masino tiro wahchea tiha —nire Jesu.

⁵⁷To ā nichu tina ō sehe ni yuhtire:

—Muhu cincuenta cūhmari cjuerasinica. Abrahā cjiro panopu macariro jira. ĴMipure tiro cjirore muhu dohsea masiboari? —nire judio masa Jesure.

⁵⁸—Potocā musare niita nija. Abrahā to jihto pano yuhu sehe ji muhta tuhsua tii —nire Jesu tinare.

⁵⁹To ā nichu tuhoa tina sehe tāare na, tirore doca duamare. Ti ā doca duapachuta Jesu sehe Cohamacu wuhui jiriho duhti wijaa wahare.

Capari nuerarirore nuchu yoaha Jesu

9 ¹Ā yoa Jesu sā to buheina mehne mahai wahana paire capari nuerarirore boca sui. Tiro wahma masa bajaroputa capari nuerariro jia tiha.

²Sā cūhu tirore nuna, ō sehe ni sinitu nūhi Jesure:

—ĴBuheriro, ahriro dohsearo capari nuerariro masa bajua tiari? ĴŊaare yoa tiari ā waharo? ĴO to pucūsuma sehe ŋaare yoa tiari to ā wahachu? —ni sinitu nūhi sā sehe Jesure.

³Sā ā nichu tuhoro ō sehe ni yuhtire tiro:

—Ahriro to ŋaare yoari buhiri capari nuerariro wahaerare. To pucūsuma cūhu ŋaare ti yoari buhiri capari nuerariro wahaerare. Cohamacu sehe tirore capari nuerachu yoare tirore nuchu yoaro taro masare to ŋohtire. ⁴Yuhure warocariro to cūrire mipure yoaro cahmana yuhure. Ŋamipu mari dahra masieraro seheta baharopu yuhure warocariro to cūrire yoa masieraja yuhu. ⁵Ahri yahpapu buhriaro marine to ŋu masichu yoariro seheta jiriho jicu ahri yahpa macainare Cohamacu yare masichu yoaja yuhu —nire Jesu.

⁶Ā ni tuhsurota yahpapu chahcho puti cūre. To ā chahcho puti cūrire dahra more, capari nuerarirore to caparire wisōre. ⁷Ā wisōno ō sehe nire Jesu:

—Siloé wama tiri copai cuhsuri copai mu caparire cosai wahaga —nire Jesu. (Siloé sā ya dusero mehne nia “Warocari copa”, nia nire.)

Jesu to caparire cosa dutiriho sehe waha, cosa, capari nuriropu tju wihire. ⁸To tju wihichu tiro cahai jiina tirore nure. Tó pano niñeru siniriho cjiro to jichu nūrina tirore ō sehe nire ti basi:

—ĴAhriro sohō jiriho niñeru siniriho cjiro jierajari? —nire tina.

⁹—Tirota jira wiho —nire paina sehe.

—Tiro jierara. Ā jieraparota tiro yoaro sehe bajuriho jira —nire paina.

Ti ā nichu tuhoro capari nuerariro cjiro sehe ō sehe nire:

—Tiro tjija yuhu —nire tinare.

¹⁰To ā nichu masa tirore ō sehe ni siniture:

—ĴCapari nuerariro cjiro jicu dohse waha nūri muhu? —ni siniture tina tirore.

¹¹ —Jesu wama tiro dihta sohāare dahra more, yu caparire wisōre. Yuhure wisō tuhsu “Siloé wama tiri copapu mu caparire cosai wahaga”, to nichu cosai suhi yuhu. Yu ā cosari baharo yu capari noano bajure yuhure —ni yahure tiro masare.

¹² —¿Muhure ā yoiro nohopu jicari tiro? —nire tina.

—Buah. Nohoi jiro jica —nire tiro.

Capari ñuerariro cjirore fariseo curua macaina sinituha

¹³ Ā ni durucu tuhsu tina capari ñuerariro cjirore fariseo curua macaina cahapu naahre. ¹⁴ Tí dacho Jesu dihta sohāare dahra more capari ñuerarirore noarito to yoiro dacho Sabado dacho jire. Tí dacho sā sori numu jire. ¹⁵ Ā jia fariseo curua macaina sehe tirore ō sehe ni sinituha tjoa:

—¿Dohse yoa muhu ñuri? —ni sinituha tina.

—Dihta sohāa mehne yu caparire wisōhre. Ā jicu yu caparire yu cosari baharo ñu dūchahi yuhu —ni yahuha tiro tinare.

¹⁶ —Tiro Sabado dacho mari sori numu mari dahra dutierari numu dahraahre. Ā jiro tiro Cohamacu yairo jierara —niha paina fariseo curua macaina sehe.

Paina sehe ō sehe niha:

—Ñaaare yoiro ō sehe noarito wahachu yoa masierara. Ā jiro tiro noarito jiboca —niha paina.

Ā jia tina puu curua ti basi tju waha. ¹⁷ Ā jia pari turi tina capari ñuerariro cjirore ō sehe ni sinituha tjoa:

—¿Muhure mu caparire noano yoirore muhu waro dohse ni tuhutujari Jesure? —niha tina tirore.

—Tiro potocāta Cohamacu yare yahu muhtarito jira —niha capari ñuerariro cjiro.

¹⁸ Wahmanopure judio masa ō sehe ni tuhutumaha: “Ahriro capari ñuerariro cjiro jierara”, ni tuhutumaha tina. Ā ni tuhutua capari ñuerariro cjiro pūcūsumare pjirocaha tina. ¹⁹ Pjiroca tuhsu, to pūcūsumare ō sehe ni sinituha fariseo curua macaina puhto:

—¿Ahriro potocāta musa macu jijari? ¿Dóihita tiro capari ñuerariro masa bajuari? ¿Potocāta capari ñuerariro cjiro jiparota dohsearo ñujari mipure? —ni sinituha tina to pūcūsumare.

²⁰ —Ahriro sā macuta jira. Ā yoa dóihita capari ñuerariro masa bajua tire tiro. ²¹ Tíre masipanahta to ñurire, tirore ñuchu yoiro cūhure masieraja sā. Sā macure sinituga. Bucuro jira tiro. Tiro to basi yahu masina —niha to pūcūsuma.

²² Judio masa sā puhtoah wahmanopure ō sehe nia tiha:

—“Jesuta Cristo Cohamacu warocaro jira”, niinare mari buhea wuhusepu sāa dutisi sā —nia tiha judio masa puhto.

Ti ā nichu tuhoa capari ñuerariro cjiro pūcūsuma sehe judio masa puhtoare cui niha. ²³ Ā cuia, “Bucuro jira tiro. Tiroreta sinituga”, niha tina judio masa puhtoare.

²⁴ Baharo judio masa sā puhtoah pari turi capari ñuerariro cjirore pjirocaha tjoa. Pjiroca tuhsu, ō sehe niha tirore:

—Cohamacu mehne poto yahuga muhu. Jesure mahñorito to ñaa yoiro jichu sā masija. Ā jicu poto yahuga sāre —niha judio masa capari ñuerariro cjirore.

²⁵ Ti ā nichu tuhorō ō sehe ni yuhtiha tiro:

—Jesure to űaa yoiaro to jichu masieraja yuhu. Cūnota masija yuhu. Panopure capari űuerararo jia ticuru yuhu. Mipu sehere űuja yuhu. Tí dihtare masija yuhu —ni yuhtiha capari űuerararo cjiro tinare.

²⁶ —ĴDohse yoiari muhure tiro? ĴMu capari űuhto cjihtore dohse yoiari tiro muhure? —ni sinituha tina tjoa.

²⁷ —Tíreta musare yahu tuhsumahicu yuhu. Yu ā ni yahupachuta musa ne tuho duaerare yuhure. ĴDohse yoa duana pari turi yu yahuchu tuho duajari musa? ĴMusa cūhu to buheina ji duajari? —niha tiro tinare.

²⁸ To ā nichu tuhoa tina tuhtiha tiore:

—Muhu Jesu buheriro jira. Sā sehe Moise cjiro buheina jija. ²⁹ Potocāta Cohamacu Moise cjiore durucua tiha. Jesu to tariore sā masieraja —niha tina capari űuerararo cjiore.

³⁰ Ti ā nichu ō sehe ni yuhtiha tiro:

—ĴTiro to tariore musa masierachu yuhure űuchu yoiaro jiro Cohamacu warocariro jierabocari tiro? ³¹ Cohamacu űaa yoiare ti siniare tuhoerara. Tí pinihtare mari masija. Tinare tuhoeraparota Cohamacure űo payoriore, to dutiare yoiariore to siniare tuhora Cohamacu. ³² Wahmanopure ahri yahpa to ji ducachupure ne coā masa bajuaropu capari űuerariore ne cūiro baro űuchu yoiaro mariea tiha. ³³ Ĵ jiro Jesu Cohamacu warocariro jieraro yuhure űuchu yoiaraboa tiro —niha tiro tinare.

³⁴ —Muhu dóihta űariro jia tiha. ĴĀ jipacuta sāre buhe duajari muhu? —niha judio masa sā puhtoa tiore.

Ā ni tuhsuata tina tiore cohā wionocaha.

**Jesu yare cahmaeraina capari űueraina ti űu
masieraro seheta Cohamacure masierara**

³⁵ Ā yoa capari űuerararo cjiore ti cohā wiorire Jesu tuhore. Ā tuhorō capari űuerararo cjiore boca sūro, tiore ō sehe ni siniture:

—ĴMasunore Cohamacu warocariore wacū tuajari muhu? —nire Jesu.

³⁶ —ĴPuhtoro, noa jijari tiro? Tiore masicu wacū tuaihtja tiore —nire capari űuerararo cjiro Jesure.

³⁷ —Tiore űu tuhsure muhu. Mipure muhu mehne durucuriro tiro tjija yuhu —nire Jesu capari űuerararo cjiore.

³⁸ —Puhtoro, muhure wacū tuaja —nire capari űuerararo cjiro.

Ā ninota tiro Jesu panoi na tuhcuca caha sū, tiore űo payore.

³⁹ To ā űo payochu űuno ō sehe nire Jesu:

—Noaina, űaina cūhu ti yoiare masichu yoi tai ahri yahpapure tahi. Capari űueraina ti űu masieraro seheta tina yaro sehe jiina yu Pucure masierara. Ā masierainare yu Pucure masichu yoi tai tahi yuhu. “Sā noano masija”, ni tuhotumarina noano ti masierarire masichu yoi tai tahi yuhu —nire Jesu.

⁴⁰ To ā nichu tuhoa mahainacā fariseo curua macaina tiore ō sehe nire:

—“Capari űueraina ti űu masieraro seheta noano masierara musa cūhu”, ĵnii nijari muhu sāre? —nire fariseo curua macaina Jesure.

⁴¹ Ti ā nichu Jesu ō sehe nire:

—Capari űueraina ti űu masieraro seheta potocā musa noano masierachu, musare buhiri mariaboa. “Sā noano masiina jija”, musa niri buhiri buhiri tiina jisinina musa mipure —nire Jesu tinare.

Ovejare ñu wihboriro quitire yahuha Jesu

10 ¹Baharo quti mehne piti dahre buhero taro ò sehe nire Jesu:
—Potocāta nii nija musare. Ovejare wihbori sahrīno sopacai sāae-rariro, sopaca marienopu sāariro sehe yaca bucuro jira. ²Sopacai sāariro sehe ovejare ñu wihboriro jira. ³Sopacare cohtariro sopacare pjōohna ovejare ñu wihboriro to sāahto sehe. Ovejare ñu wihboriro to durucuchu tuho tara to nuina oveja peri. Tinare pjirocaro, ti wama mehne pisurocarucura tiro. Ā yoaro tinare sahrīnopu jiinare pji wiorucura sopacapu. ⁴To yainare jipihti-nare pji wio tinare mu tārucura. Oveja sehe to durucuare masia, to baharo nūnu tirucura. ⁵Pairore ti masierarirore nūnu tierara tina. Ā jia paina ti durucuare tuhoa, cui murocaa wahara —nire Jesu tinare.

⁶Ahri quitire to ā yahupachuta to yahuaire tuho ñahaerare tina.

**Jesu ovejare noano ñu wihboriro yoaro seheta
to yainare noano ñu wihbora**

⁷Pari turi Jesu tinare ò sehe ni yahure tjoa:

—Potocāta musare nii nija. Ovejare wihbori sahrīno sāari sopaca yoaro sehe jija yuhu. ⁸Jipihtina yu pano tarina quihōno yu durucuare buheraina, ovejare ñu wihbo mahñoina yacaina yoaro sehe jira. Ti ā jipachuta yu yaina sehe oveja yoaro sehe jiina painare ne tuho wahcāerara. ⁹Yuhu ovejare wihbori sahrīno sāari sopaca yoaro sehe jija. Tí sopacai sāaina yoaro sehe tjira yuhure wacū tuaina. Ā jicu yuhu tinare pichacapu wahaborinare yuh-duchu yoaihtja. Oveja sehe tinare ñu wihboriro mehne ti cahmaare bocaro yoaro seheta yu yuhdachu yoaina cūhu yuhu mehne ti cahmaare bocaahca. Yuhu tinare noano ducata, noano ñu wihboihca —nire Jesu.

¹⁰Ā ni tuhsu ò sehe ni namore:

—Musare mahñoare buheina, ovejare ñu wihbo mahñoina sehe ovejare yacaina yoaro sehe jira. Yacaa taa, wajāa taa, dojomehnea taa tara tina. Wiho mejeta yuhu sehe yu yainare, oveja yoaro sehe jiinare, tuaro waro ti wahchea mehne ā catirucuchu yoai tahi. ¹¹Ovejare noano ñu wihboriro yoaro sehe jija yuhu. Ovejare noano ñu wihboriro tinare noano ducata, to yariahtore ne cuierara. Tó yoaro seheta yuhu cūhu yainare noano ducata, yariahca, tinare ne soro wahaerahto sehe. ¹²Oveja puro cahamacuno sehe potocā ovejare ñu wihboriro jierara. Ā jia oveja to yaina jierara. Ā jiro yairo ovejare to churo tachū ñuno to cahamacuno sehe ovejare cohā cūnoca, murocaa wahara. To ā cohā cūri baharo, yairo ovejare to ñahachu ñua oveja peri muroca site wahcāa wahara. ¹³To cahamacuno sehe to wapataa dihtare cahmana. Ā jiro tiro ovejare noano ñu wihbo ji coarara —nire Jesu.

¹⁴Ā ni tuhsu ò sehe ni namore:

—Ovejare noano ñu wihboriro yoaro sehe jija yuhu. Ā jicu yu yainare masija yuhu. Ā jia yu yaina sehe yuhure masina. ¹⁵Tó seheta yu Pucu cūhu yuhure masina. Ā jicu yuhu cūhu yu Pucure masija. Oveja yoaro sehe jiina yu yaina Cohamacu mehne ti ā jirucuhti cjihtire yariaihca yuhu. ¹⁶Paina oveja pa sahrīno macaina yoaro sehe jiina paina masa cūhu yu yaina jiahca. Tina cūhure naaihca. Ā jia yu durucuchu tuho wahcāahca tina cūhu. Ā jia yu yaina jipih-tina cū curuata jiahca. Ā jicu yuhu dihta yu yainare ñu wihboihca —nire Jesu.

¹⁷ Ñ ni tuhsu ò sehe ni namore:

—Yu yaina Cohamacu mehne ti ã jirucuhti cjihtire yariaihca. Yu yariari baharo masa mujaihca. Yu ã yoachtiro jichu yu Pucu yuhure cahina. ¹⁸ Yu wajã dutierachu yuhure wajã masieraboa tina. Yu cahmano seheta yuhure wajãahca. Ñ jicu yu yaina Cohamacu mehne ti ã jirucuhti cjihtire yariaihca. Yaria masija yuhu. Ñ yoa masa muja masija. Yu Pucu yuhure tîreta yoa dutire —nire Jesu.

¹⁹ To ã nichu tuhoa judio masa pua curua tju ware. Paina soro tuhutu, paina cûhu soro tuhutire:

²⁰ —Tiro watino to cohtotariro jira. Ñ jiro tuho masierariro jira. ¿Dohseana tire pare turi tuhojari musa? —nire paina payu judio masa.

²¹ Paina sehe ò sehe nire:

—Watino to cohtotariro jiro ã ni durucueraboa. Capari ñuerarirore ñachu yoa masierara watino to cohtotariro. Ñ jiriro jiro tiro watino to cohtotariro jierara —nire paina judio masa.

Judio masa Jesure cahmaeraha

²² Pa dachoi sã coyea judio masa Jerusalêi bose numuri yoa nire pari turi. Cohamacu wuhure panopu tireto ti wari cjiire ti wacûhti dachori jire. Tí pjare puhuro jire. ²³ Tí dachoi Salomo wama tiri tahtiapu Cohamacu wuhui jiri tahtiapu Jesu ñu tinino nire. ²⁴ Tí tahtiapu to jichu ñua sã coyea judio masa tiro cahapu cahmachu, tireto ò sehe ni siniture:

—Yoaputiari pja sãre noano yahueraca muhu. Poto sãre noano yahu bahra-ñoga muhu. ¿Cristo Cohamacu to warocariro tjijari muhu? —nire tina Jesure.

²⁵ Ti ã nichu tuhoro ò sehe ni yuhtire Jesu:

—Musare yahu tuhsumajacu yuhu. Yu ã yahupachuta yuhure tuho duae-rare musa. Yu Pucu yuhure to dutiriro seheta to tuua mehne yoa ñoja. Ñ yoacu yu Cristo jareta musare ñoi nija. ²⁶ Yu ã ñopachuta yuhure tuho duae-rara musa. Musa sehe yu yaina jierara. Ñ jina paio yaina oveja yoaro sehe jiina jina, yuhu sehere tuhoerara musa. ²⁷ Ovejare ñu wihborirore to yaina ti tuhoriro seheta yuhu cûhure yu yaina tuhora. Ñ jicu yu yainare masija yuhu. Ñ jia tina yuhu mehne wahara. ²⁸ Ñ jicu jipihtia dachoripe Cohamacu mehne ã catirucuchu yoaja tinare. Ñ jia tina sehe pichacapu ne wahasi. Ñ jia yu yainare yu ñu wihbochu paina sehe ne cûirore yuhure ma masierara tinare. ²⁹ Ñ yoa yu Pucu yu yainare yuhure wariro jipihtina yuhdoro tuariro jira. Ñ jiro yu Pucu sehe yu yainare to ñu wihbochu, ne cûiro tiro cûhure ma masie-rara tinare. ³⁰ Yuhu yu Pucu mehne cûirota jija —nire Jesu judio masare.

³¹ To ã nichu tuhoa judio masa sehe tireto ti doca wajãhti tãare pari turi namare tjoa. ³² Ti ã yoachû ñuno Jesu ò sehe ni siniture tinare:

—Yu Pucu ya tuua mehne payu tahari yoa ñomahi musare. ¿Di baro sehere yu yoari buhiri yuhure tãa mehne doca wajã duajari musa? —ni siniture Jesu.

³³ To ã nichu tuhoa ò sehe nire tina:

—Cohamacu tuua mehne mu yoa ñori buhiri muhure tãa mehne doca wajã duaeraja sã. Cohamacure mu ñano durucuri buhiri muhure tãa mehne doca wajã duaja sã. Masuno jipaihta “Cohamacu jija yuhu”, mu nia buhiri mehne muhure tãa mehne doca wajã duaja sã —ni yuhtire tina.

³⁴Ti ā ni yuhtichu tuhoru Jesu tinare ō sehe ni yahure:

—Musa cūhure “Cohamana”, ni pisure Cohamacu. Āta ni joaa tiha to dutiare ti joari pūi. ³⁵Cohamacu yare ti joari pū quihōno to jichu mari masija. “Mahñoa jira”, tí pūre ni masieraja mari. Ā jiro to yare masiinare potocāta tiro “Cohamana”, ni pisura. ³⁶Cohamacu yuhure besetjiāhno, ahri yahpapure warocare. Ā jicu yuhu “Cohamacu macuno jija”, yu niri buhiri “Cohamacure ñano durucuro nina Jesu”, nina musa yuhure. ¿Dohseana yuhure ā nijari musa? ³⁷Yu Pucu to cahmariro seheta to tuaa mehne yu yoa ñoerachu pinihtare yu buherire “Potocā tjira”, nieraboca musa. ³⁸Yu Pucu to tuaa mehne yu yoa ñopachuta yuhu sehere tuho duaeraboca musa. Ā tuho duaerapanahta to tuaa mehne yu yoa ñochu ñña yu yoarire “Potocā tjira”, niga musa. Musa ā nina, yu Pucu mehne sā cūno potori sā jichu masinahca musa. Ā jina yuhu yu Pucu mehne cūno potori yu jichu masinahca musa. Ā jina tuho ñahanahca musa —nire Jesu tinare.

³⁹To ā nichu tina pari turi tirore ñaha duamare. Ti ā ñaha duachu ñño tiro duhti wijaa wahare.

⁴⁰Ā wijaariroputa João masare to bautisa muhtariropu Jordão sie sehēpu pari turi wahare tjoa. Tōpu suro tjuanocare tiro. ⁴¹Ā jia masa payu tirore ñua sure. Ō sehe nire tina ti basi:

—João sehe Cohamacu tuaa mehne yoa ñoerare. Ā to yoa ñoerapachuta jiphtia Jesure to yahuri cjiri sehe potocāta jira —nire masa ti basi.

⁴²Ā jia tōpure masa payu wacū tua ducare Jesure.

Lázaro wama tiro yariaa wahaha

11 ¹Ā yoa cūiro Lázaro wama tiro to wahmiosānumia María, Marta cūhu mehne Betania wama tiri macai jia tire. Tiro cū numu dohatia wahari jire. ²Tiro wahmiono María sehe baharo Jesu to dahporire me sitia wisō, to pjoari mehne tirore pahā cohāhticoro jiri jire. ³Ā yoa to dohatia wahachu ñua, to wahmiosānumia sehe painare Jesure yahu dutirotari jire:

—Puhtoro, mu cahīro dohatiro nina —ni yahu dutirotari jire Lázaro wahmiosānumia.

⁴Tí quitire tuhoru ō sehe nire Jesu:

—Mipure Lázaro to dohatia to yariahti cjihti jierara. Cohamacu tuaare masare ñohti cjihtire mipure tiro dohatira. Ā jia yuhu to macuno tuariro yu jia cūhure ñuahca masa —nire Jesu.

⁵Jesu Martare, to bahoro cūhure, Lázaro cūhure tuaro cahīa tire. ⁶Ā nino Lázaro dohatiro to jichu tuhoparota tōi Jesu sehe pua dacho tjuasinire. ⁷Pua dacho baharo Jesu ō sehe nire sāre to buheinare:

—Pari turi Judea yahpapu tjuaa wahajihna tjoa —nire sāre.

⁸—Buheriro, canupucāta judio masa tó macaina muhure tãa mehne doca wajā duamare. ¿Dohseacu tōpu pari turi tjuaa waha duajari muhu? —nihi sā to buheina.

⁹Sā ā nichu tuhoru, tirore ti wajā masierasininore yahuro, piti dahre buhero sāre ō sehe nire:

—Pjīro tuhoutuena tjiga. Cū dachore doce horari waro jira. Sū dacho macariro to jisnichu, noano ñuja mari. Ā jina dachore tinina ne puha tu mua boraeraja mari. ¹⁰Wiho mejeta nahitianoi tiniina sehe puha tu mua boraa

wahara. Sū dacho macariro mariachū noano ñuerara tina —nire Jesu. (Ã nino ò sehe nino niri jimare: “Mipure yu Pucu yare yu yahu pahñohto ñuhsasinina. Ñ jia yuhure wajã masierasinina”, nino niri jimare.)

¹¹ Ñ nino sãre ò sehe ni yahu namore tjoa:

—Mari mehne macariro Lázaro, carĩno nica. To ã carĩpachuta yuhū tirore wahcōi wahaihtja —nire sãre.

¹² —Puhtoro, Lázaro carĩriro jiro, yuhdurohca —nimahi sã.

¹³ Sã ã nipachuta Jesu “Carĩno nica” nino, “Yariaa wahaca”, nino niri jimare. To ã nichū tũhona “Lázaro soro nica”, ni tũhotumai sã sehe. ¹⁴ Sã ã ni tũhotuchū masino Jesu poto yahure sãre:

—Lázaro yariaa wahaca. ¹⁵ Yu marieno to yariachū, noa nina. Ñ jina msa yuhure wacū tua namonahca. Musa yu jia tiare masi namo, msa yuhure wacū tua namohti cjihti jiahca ahri. Ñ yoana basata. Mari ñuna wahajihna to cahapū —nire Jesu.

¹⁶ Toma sũhũduariro wama tiroiro ò sehe nire sãre:

—Mari cũhū Jesu mehne wahajihna. Tirore wajãa, mari cũhure wajãjaro —nire Toma.

Jesu ã jirucuchū yoiro masare masoiro jira

¹⁷ Ñ yoa sã tũpure sã suna cahachū waro tó macaina ò sehe ni yahure Jesure:

—Pititia dachori wahara Lázaro cjirore masa copapū ti siō sãari baharo —ni yahuha tirore.

¹⁸ Betania wama tiri maca sehe Jerusalē cahacã tía kilómetro yoiro jire.

¹⁹ Ñ jia Lázaro to yariari baharo, payu Jerualē macaina sã coyera judio masa Martare, María cũhure ñahacaha tiia taa tari jire. ²⁰ Tũpure sã suna cahachū tũhoro, Marta sehe sãre piti bocaro wihire. Wiho mejeta to bahoro María sehe to ya wũhũpū tjuari jire. ²¹ Marta sehe Jesure piti boca wihi, ò sehe nire tirore:

—Puhtoro, yu bahū to yariahto pano mũ òi jichū, tiro yariaeraboa. ²² Mipū cũhure Cohamacure mũ sini payochū, tiro mũ sinino sehta yoirohca —nire Marta Jesure.

²³ —Mũ bahū masa wijaarohca —nire Jesu ticorore.

²⁴ —Ñja. Ahri yahpa to pihtiri dachoi yariarina cjiro ti masa wijaahiti dachoi to masa wijaahitore masija yuhū —nire ticoro sehe.

²⁵ To ã nichū Jesu ò sehe ni yahure tjoa:

—Yuhū masa wijaachū yoiro jija. Yuhū ã jirucuchū yoiro jija. Yuhure wacū tuariro yariaparota ã catirucurohca. ²⁶ Ñ jia jipihtina Cohamacu mehne ã catirucuina, yuhure wacū tuaina pichacapū ne wahasi. ¿Ahrire masijari mũhũ? —nire Jesu ticorore.

²⁷ —Puhtoro, masija yuhū. Cristo Cohamacu macuno, masare yuhduchū yoiro “Ahri yahpapū tarohca”, ti niro mũ jichū masija yuhū —nire Marta Jesure.

Lázaro to masa copa cahai Jesu tiha

²⁸ Marta ã ni tuhsū to bahoro Maríare pjiro wahare:

—Marine buheriro mari ya macai taro nina. Mũhure pjihre —ni yaro ca yahuri jire Maríare.

²⁹To ā nichu tuhoro María ño duaro wahcāruca, sã cahapu tari jire Jesure ñuno taro. ³⁰Ti ya macapu suerasinihi sã. Marta sãre to piti bocaroihita jisi-nihi sã. ³¹Judio masa tí wuhui Mariare ñahacaha tiia niha. Ā jia ticoro to wahachu ñua, tina ticorore nunu ti tari jire. “To wahmino cjirore ti siō sãari copapu tiiro waharo nina ticoro”, ni tuhoturi jimare tina. Ā ni tuhotua ticorore nunu ti tari jire.

³²Ā yoa María sã cahapu wihiro, Jesure ñu, to dahpori cahai na tuhcuca caha sure.

—Puhtoro, yu bahu to yariahto pano mu ōi jichu tiro yariaeraboa —nire ticoro Jesure.

³³Ā jiro ticoro judio masa ticoro mehne tarina cūhu ti tiichu ñuno Jesu sehe tuaro cahya ñano yajeripohna tire.

³⁴—¿Lázaro cjirore nohopu siō sãari msa? —ni siniture Jesu.

—Ñui taga —ni pji wahcāre tina.

³⁵Ti ā nichu tuhoro Jesu tiia wahare.

³⁶—Lázaro cjirore Jesu tuaro cahīri jira —nire judio masa ti basi.

³⁷Wiho mejeta paina tina mehne macaina sehe ō sehe nire:

—Capari ñuerarirore ñuchu yoariro jira ahriro Jesu. ¿Ā jiro Lázaro cūhure to yariaborore yuhduchu yoeraboari ahriro? —nire tina ti basi.

Lázaro masa wijaaaha

³⁸Ā jiro pari turi Jesu tuaro cahya namore. Ā jina sã jipihtina to masa copapu suhi. Tí copa tãcapu ti sahari copa jire. Tí copapu to pjacu cjirore siō sãa, tãca pjiria mehne tju biha cūri jire tina.

³⁹—Tãcare na pjōhga —nire Jesu.

To ā nichu tuhoro Marta yariariro cjiro wahmiono ō sehe nire:

—Puhtoro mipu pititia dachori waha tuhsura to yariari baharo. Ā jiro to pjacu cjiro urībiahca —nire Jesure.

⁴⁰—“Yuhure wacū tuaco Cohamacu tuaare ñucohca”, muhure nimahi —nire Jesu Martare.

⁴¹To ā niri baharo tina tãcare na pjōhre. Ā ti na pjōori baharo Jesu sehe muanopu ñu, Cohamacure ō sehe nire:

—Mai, yuhure muhu tuho tuhsuhre. Tíre mu yoachu masicu wahcheja muhure. ⁴²Ā yoa yuhure muhu dachoripe ā tuhorucura. Tíre masija. Ā masipaihta yuhu mu warocariro yu jiare ōre ducuina ti masihtu cjihtire muhure ā nii nija. Tíre “Potocā tjira”, ti nihti cjihti cūhure ā nii nija —nire Jesu to Pucurore.

⁴³Ā ni tuhsu Jesu tuaro sañurucure:

—Lázaro, wijaa tagá —ni sañurucure tiro.

⁴⁴To ā nichu yariariro cjiro to wamomacarine to dahpori cūhure suhti cahsari mehne ti wahmariro cjiro, to dapure suhtiro mehne ti wahmariro cjiro, masa copapu wijaa tare juna.

—Ti wahmari cjirore pjāga —nire Jesu.

Judio masa puhtoa sehe Jesure ñaha duamaha

(Mt 26.1-5; Mr 14.1-2; Lc 22.1-2)

⁴⁵To ā masochu ñua, payu judio masa Mariare ñua tarina mehne macaina Jesure wacū tuare. ⁴⁶Wiho mejeta paina sehe, tina mehne macaina sehe

fariseo curua macaina cahapũ waha, su, Jesu to yoirire yahuri jire tinare. ⁴⁷⁻⁴⁸ ã jia sacerdotia puhto, fariseo curua macaina puhto cũhũ cahmachu, ti basi õ sehe ni durucuha:

—Jesu payũ tahari Cohamacũ tuua mehne yoa ño mujana. To ã yoa ñoare mari tirore ã ñunoca mari ducataerachũ, jipihtina masa tirore wacũ tua, tiro mehne waha pihtiaboca. ã yoa tiro Jesure ti puhtoro cjihto ti sõchu ñua, Roma macaina puhto sehe “Marine cohãa nina”, ni sua, ñano yoaahca marine. Tuhsu, Cohamacũ wuhũre cohã duti warocaahca ti yaina surarare. Mari ya dihta cũhũre maahca tina. ¿Ã jina dohse yonahcari mipure? —ni durucuha tina ti basi.

⁴⁹ Ti ã nipachuta paio Caifa wama tiro, tí cũhmare sacerdotia bui puhtoro jiro tinare õ sehe ni yahuha:

—Musa sehe ne masierara. ⁵⁰ Judio masa jipihtina mari ya cjihtire cũiro masuno to yariachũ noana. To yariaerachũ mari jipihtina judio masare cohã pahñonocabo. Tíre musa masierara —niha Caifa tinare.

⁵¹ ã nino to mu suro ã nino nieraha. Sacerdotia bui puhtoro to jichũ judio masa ya cjihtire Jesu to yariahtore Cohamacũ sehe Caifare ã ni yahu dutiha.

⁵² Jesu yariaro judio masa dihtare yuhduchũ yoaro taro nierare. ã yariaro jipihtina Cohamacũ pohna ahri yahpapũ ji siteina cũhũ cũ curuata ti jihti cjihtire yariahtiro jire Jesu. ⁵³ ã jia tí dachoihta tina “¿Jesure dohse yoa wajã-nahcari mari?” ni durucua, tirore wajã taa nimaha.

⁵⁴ Tirore ti ã wajã duachũ masino Jesu payũ judio masa watoi pari turi tinino wahaerare. ã jiro masa marieno cahacã Efraĩ wama tiri macapũ sãre suho wahare. Sãre tí macai suho tjuasinire Jesu.

⁵⁵ Tí pjare pascua bosc numũri sã judio masa sã bosc numũri cjihto mahano cã duhsatjãhre. ã jia bosc numũri panocã masa payũ paye macari macaina Jerusalẽpũ cahmachure. Pascua macaare ti chũto pano Cohamacũ yare yoa taa ti ñaa buhiri cosaa taa nire. ⁵⁶ Tí pjare tina Jesure macaa niri jire. ã jia Cohamacũ wuhũpũ jiina õ sehe ni durucuha:

—¿Bosc numũrine ñano taerabocari Jesu, musa tuhutuchũ? —ni durucuha tina ti basi.

⁵⁷ ã jia sacerdotia puhto, fariseo curua macaina cũhũ õ sehe ni yahu dutiha masare:

—Jesu to jirore musa masina, yahuga sãre. Tirore ñahana tana nija —niha puhto masare.

María Jesu dahporire me sitia mehne pio payore

(Mt 26.6-13; Mr 14.3-9)

12 ¹ Jesu sã to buheina mehne Betaniapũ sã suri baharo pascua dachori seis dachori waro duhsasinire. Lázaro Jesu to masoriro cjiro tí maca macariro jire. ² Sã suri baharo Jesu cũhũ ya chua cjihtire yoare paina. ã yoa Lázaro, Jesu, sã mehne mesai nuju suhi. Sã ã nuju suri baharo Marta chuare payore sãre. ³ Tuhsu, María me sitia sere nardo wama tidũ macaa sere cũ kilo dacho macai na ta, Jesu dahporire pio payore. Pio payo tuhsu to pjoari mehne tju cosare. To ã pio payori baharo tí wuhũ noano me siti sahsea wahare. ⁴ Sã mehne macariro, Jesure ñu tuhtiinare ñohti Judã Iscariote sehe õ sehe nire:

⁵—¿Dohse yoaro ahricoro ã yoa sitejari? Tíre ticoro duaboa. Ñ duaro tres cientos dachori posa dahrari wapa wapataboa. Ñ jiro ticoro tí niñerure pja-cuoinare waboa —nire tiro.

⁶Juda sehe pjacuoinare yoadoho duaerare. Tiro sã niñerure wihbobasariro jiparota yacariro jire. Tuhsu, tiro sã niñerure cãa tahari na mujare. Ñ jiro “Tí niñerure naihtja” nino, ã nire Maríare tiro.

⁷To ã nichu tuhoro ò sehe nire Jesu:

—Ñ niecu tjiga ticorore. To me sitiare yuhure to duharire yuhure pio payore, yuhure masa copapũ ti siõ sãahto pano yũ pjacure cahnoyuro. Pjacuoina sehe musa mehne ã jirucuahca. Ñ jina tinare wa masina musa. ⁸Yuhu sehe ahri yahpapure musa mehne ã jirucusi —nire Jesu.

Sacerdotea puhtoa Lázaro waja duaha

⁹Ñ yoa Jesu Betaniapũ to jichu tuhoa sã coyera judio masa payũ tirore ñua tare. Tiro dihtare ñua taa nierare. Lázaro yariariro cjirore Jesu to masorirore tiro cũhure ñua taa nire. ¹⁰Ti ñua surire masia sacerdotea puhtoa Lázaro cũhure waja duare. ¹¹Lázaro yariariro cjiro Jesu to masoriro jichu ñua payũ masa Jesure wacũ tuare. To ã masochu ñua payũ judio masa ti sacerdotea ya buhea sehere duhunocari jire. Ñ ti duhuchu ñua sacerdotea puhtoa sehe sua yuhdua Lázaro waja duare.

Jerusalēpu suha Jesu

(Mt 21.1-11; Mr 11.1-11; Lc 19.28-40)

¹²Pascua bose numurine ti yochu payũ masa Jerusalēpu ñua wahari jire. Pa dachoi Jerusalēpu Jesu to tahto cjihtore masa tuhori jire. ¹³Ñ jia pja pũ sahna-rine na wahcã, tirore piti bocaã wahare. Ñ piti bocaã ò sehe ni sañurucure tina:

—Ahrirore wahche payojihna. Ahriro Cohamacu to warocariro noano yuh-dujaro. Ahriro Israe yahpa macaina mari puhtoro tjira —ni sañurucure tina.

¹⁴Jesu burrocã to bocariro bui pisare. “Õ sehetã yoarohca”, ni joaã tiha Cohamacu yare ti joari tjui:

¹⁵“Jerusalē wama tiri maca macaina, cuiena tjiga musa.

Ñuga. Musa puhtoro burrocã bui pisa tara”,
ni yahuha Cohamacu yare ti joari tjui.

¹⁶“To ã ni joari Jesure nino nica” ni, sã to buheina noano masierasinihi. Ñ masierasiniapanahã manopũ Jesu to mujari baharo sã ti joari cjirore wacũ boca tuho ñaha masihi. Õ sehe ni tuhotuhi: “Cohamacu yare ti joari tju sehe Jesure yahuro nimaha. Ñ jia Cohamacu yare ti joari tju to niriro sehetã yoare masa Jesure”, ni tuhotu, sã masihi.

¹⁷Lázaro ti siõ sãari copapũ jirore Jesu to pisachu tirore to masochu ñurina cjiro yahure masare. ¹⁸Ñ jia Lázaro Jesu masorire ti tuhori baharo masa payũ Jesure ñua tare. ¹⁹Ti ã tachu ñua fariseo curua macaina ti basi ò sehe niri jire:

—Jipihina Jesu yaina dihta wahaa nina mipure. Ñ jina mari dohse yoa masieraja tinare —niri jire fariseo curua macaina ti basi.

Mahainacã griego masa Jesure maca taha

²⁰Ñ yoa bose numuri Cohamacure ño payoa taina mehne macaina mahainacã griego masa jire. ²¹Ñ jia tina Felipe cahapũ wihiri jire. Felipe sehe

Betsaida wama tiri maca Galilea yahpai jiri maca macariro jire. Ñ jia tiro cahapu wihirina ò sehe niri jire tirore:

—Jesure ñu duaaja sã —niri jire tina.

²² Ti ã nichu tuhoru Felipe Andrepure tíre yahuro wahari jire. Ñ jia tina puaro Jesure yahure. ²³ Ti ã yahuri baharo Jesu tinare ò sehe ni yahure:

—Yuhu masuno Cohamacu warocariro jija. Yuhure jipihtina ti ño payohti pja mipure jirota nina. Mipure yu variahti pja jirota nina. ²⁴ Potocãta musare yahui nija. Toari yapare yahpapu mari yaerachu, tí yapare mari toerachu cū yapata tjuarohca. Á jiro tí yapare mari yari baharo dīcha tirohca. (Tó seheta yu yariari baharo yuhure masa copapu ti siō sãari baharo payu masare Cohamacu mehne ã jirucuhtina jichu yoaihca yuhu.) ²⁵ Ahri yahpai musa jiare pjro tuhotuboca musa. Á tuhotuna Cohamacure wacūerana, pīchacapu wahanahca musa. Ahri yahpai musa jiare ã tuhotunocahna, Cohamacu mehne ã jirucunahca. ²⁶ Yu yare yoa duana, yu buheare noano tuhoga musa. Musa ã yoana musa cūhu yu jhtopure jinahca. Yu yare yoarirore yu Pucū sehe wahchea mehne ñunohca —nire Jesu.

Jesu to variahtore yahuha

²⁷ Ñ ni tuhsu ò sehe ni namore:

—Mipure yuhu ñano yajeripohna tija. ¿Yu Pucure dohse niicari yuhu? “Mai, yu ñano yuhduhtore yoi tija yuhure”, ¿nibocari yuhu? Tíre nieraja yuhu. Ñano yuhduhtiro cjihtota ahri yahpapore tahi. Á yoa yu ñano yuhduhti pja mipure jiro nina —ni yahure Jesu sãre to buheinare.

²⁸ Á yoa ò sehe nire to Pucure:

—Mai, mu tuariro jiare mipure ñoga masare —nire Jesu to Pucure.

To ã nichu muanopu durucuro coa tare:

—Tuariro yu jiare masare ño tuhsuhi. Mipure ã jicu pari turi ñoihca masare —nino coa tare.

²⁹ To ã nino coa tachu tuhoa tói ducuina masa payu ò sehe nire:

—Wupo jica ã coa taro —nire masa.

—Anjo Jesure yahuro nire —nire paina masa.

³⁰ Ò sehe nire Jesu sehe:

—Muanopu yuhure tuho dutiro ã nino coa taerare. Musa sehere tuho dutiro ã nino coa tare. ³¹ Mipure ahri yahpa macaina ti ñano yoari buhirire buhiri dahrerohca tinare. Ahri yahpa macaina ti puhtorore watĩnore cohānohca Cohamacu. ³² Á jicu yuhure crusapu ti wahcō dapocho payu masare yuhu mehne macaina ti wahachu yoaihca yuhu —nire Jesu.

³³ Ñ nino “Crusapu to variahtore”, yahuro nire Jesu masare. ³⁴ To ã nichu tuhoa masa sehe tirore ò sehe nire:

—Cohamacu yare ti joari tjuí ò sehe nina: “Cristo jipihtia dachoripe jirohca”, ni joa tiha. ¿To ã ni joachu muhure masunore Cohamacu warocarirore dohse jiro baro muhure crusapu wahcō dapoahcari masa? ¿Masuno Cohamacu warocariro noa jijari tiro? —ni siniture tina.

³⁵ Ti ã nichu ò sehe ni yuhtire Jesu:

—Buhriaro to ñu masichu yoaro seheta jicu masare Cohamacu yare noano masichu yoaja yuhu. Baharo curerocā musa mehne jisi yuhu. Musare yu buhechu mipure tuhoga ñaare musa yoerahti cjihtire Cohamacu mehne

musa ā jirucuhti cjihtire. Yū buheare tuhoeraina nahitianoi tiniina yoaro seheta ti wahahtore masierara. ³⁶Yūhu buhriaro yoaro sehe jiriho tjiia. Ā jicu musare buhecu Cohamacu yare noano masichu yoaja musare. Mipure yū wahahto pano yūhure wacū tuaga. Ā wacū tuana yū yaina jinahca musa —nire Jesu.

Ā ni yahu tuhsu duhti wahcāa wahare.

Judio masa Jesure cahmaeraha

³⁷Payu tahari Cohamacu tuua mehne tinare Jesu to yoa ñopachuta judio masa payu tirore ne tuho duaerare. ³⁸Cohamacu yare ti joari tjui Isaia cjiro to joariro seheta ā yoaa nire tina. Ō sehe ni joaa tiha Isaia cjiro:

“Cohamacu, mu buheare sā yahuchū masa tuho duaerare.

Mu tuaare tinare mu yoa ñopachuta, tīre ‘Potocā jierara’, nire tina”, ni joaa tiha Isaia cjiro.

³⁹Ti ā tuho duaerachū ñūno Cohamacu tinare masierachū yoare. Tí cūhure Isaia cjiro ō sehe ni joaa tiha tjoa:

⁴⁰“Capari ñueraina yoaro sehe jiina jichū yoaa tiha Cohamacu tinare.

Ā yoa to yare masierachū yoaa tiha tinare.

Ā jia to tuaare ñupahta tina ti ñurire tuho ñahaerara.

Ā jia to buheare tuhopahta tīre tuho ñahaerara tina.

Cohamacu ya buheare masia, ti ñaa yoari buhirire cohā dutiboa.

Ā jiro tinare yūhduchū yoaboa tiro”,

ni joaa tiha Isaia cjiro Cohamacu yare ti joari tjui. ⁴¹Ā ni joaro Isaia cjiro Cristo tuaare masino to niriro seheta Cristore yahu joaa tiha tjoa.

⁴²Paina Jesure ti cahmaerapachuta judio masa, sā puhto mehne macaina cūhu payu Jesure wacū tuua, tirore cahmare. Ā cahmapahta tina fariseo curua macainare cuia painare “Jesu mehne sāahi”, ni yahu duaerare. Tīre ti yahuchū tuhoa Jesure ti cahmari buhiri judio masa sā buheri wūhupū tinare sāa dutieraboa fariseo curua macaina sehe. ⁴³Cohamacure wahchechū yoa duapahta tí yūhdoro fariseo curua macaina sehere wahchechū yoa duare Jesure cahma ducaina. Ā jia tina “Jesu yaina wahahi”, ni painare yahu duaerare.

Jesu yahuare ti tuho duaerari buhiri masa buhiri tiahca

⁴⁴Ā yoa Jesu tuaro sañurucu, ō sehe ni yahure:

—Yūhure wacū tuariro, yūhu dihtare wacū tuaerara. Yūhure warocariro cūhure wacū tuara tiro. ⁴⁵Tuhsu, yūhure masiina yūhure warocariro cūhure masina. ⁴⁶Buhriaro to ñū masichū yoaro seheta ahri yahpapū Cohamacu yare masichū yoai tai nihi yūhu. Ā jicu Cohamacu yare masare masichū yoaja. Nahitianoi wahariro yoaro sehe jiriho ñaare yoarucura. Yūhure wacū tuariro tiro yoaro sehe yoasi. Yūhure wacū tuariro quihōno tuhorohca. ⁴⁷Paina yū yahuare tuhopahta yū niriro seheta yoaerara. Ti ā yoaerapachuta yū yahuare ti yoaerari buhirire buhiri dahresi yūhu sehe tinare. Ahri yahpapūre buhiri dahrei tai nierahi yūhu. Ahri yahpa macainare pichacapū wahaborinare yūhduchū yoahtiro cjihto tai nihi yūhu. ⁴⁸Yūhure cahmaerainare, yū yahua cūhure cahmaerainare buhiri dahrea jiahca. Tina yū yahuare ti tuhoerari buhiri ahri yahpa pihtiri dachoi buhiri tiahca. ⁴⁹Yūhu yū mu sūro yahueraja.

Yü Pucü yuhure warocariro sehe yuhure yahu dutire. ã jia yu yahua sehe to ya durucua jira. ⁵⁰To ya durucua "Quihõno jira" nina, Cohamacü mehne ã jirucunahca musa. A jicu yu Pucü to yahu dutiro sehetu yahuja musare —nire Jesu.

Jesu to buheina dahporire cosaha

13 ¹Ã yoa pascua bose numuri panocã ahri yahpare to cohã wahcãhto cjihtore to Pucuro cahapü to wahahto cjihtore masire Jesu. Tuhsü, ahri yahpa macainare to yainare tiro tuaro cahire tina mehne to jiro puro. ã cahirucura to yainare.

²Tí ñamine Jesu sã to buheina mehne sã chuchü Juda Iscariotere Simo macunore Jesure ñu tuhtiinare ño duti tuhsuri jire watino sehe. ³Tuhsü, to Pucuro Cohamacü Jesure jipihitina bui to puhtoro sörire masire Jesu. ã yoa Cohamacü cahapü to tari cjirire, baharo manopu to mujahiti cühure masire. ⁴Ã masino wahcãrũca, to suhtiro bui macunore tjuwe na, tóre cü tuhsü, suhtiro cahsaro mehne to pjaro yujui dũhtere. ⁵Dũhte tuhsü, waparoi core pio sãa, sã to buheinare sã dahporire cosa dũcare. Sãre cosa tuhsü to dũhteri cahsaro mehne pahã cohãre sã dahporire.

⁶Paina buheinare cosa wahcã, Simo Pedropũre sure. To dahporire to cosahto pano Pedro sehe tirore õ sehe nire:

—Puhtoro, çyu dahporire cosai tai nijari muhu? —nire Jesure Pedro.

⁷—Michapucacã muhure yu yoahtire masierara muhu. ã masierapacuta baharo masihca muhu —nire Jesu.

⁸—Yu dahporire ne cosasi muhu —nire Pedro.

—Muhure yu cosaerachu yu yairo jisi muhu —nire Jesu.

⁹—Puhtoro, yu dahpori dihtare cosai tjiga. Yu dahporire, yu wamomacarine, yu dapu cühure cosaga —nire Pedro.

¹⁰To ã nichu Jesu piti dahre buhero õ sehe nire:

—Cãiro masũno cuhsũro to pjacũre noano tju cosa pahũona. ã jiro pari turi tirore tju cosaro cahmaerara. To dahpori dihtare cosaro cahmana. Jipihitina musa ñaa yoari buhirire cosarina cjiri musa jipachuta cãiro musa mehne macariro to ñaa yoari buhirire cosamahnoerariro jira —nire Jesu.

¹¹Jesu tirore ñu tuhtiinare ñohtirore masire. ã masino "Cãiro musa mehne macariro to ñaa yoari buhirire cosamahnoerariro jira", nire.

¹²Sã dahporire cosa tuhsü, to suhtirore sãa tuhsü, nuju sure to dujiriroihtu.

—¿Michapucacã musare yu yoarire tuho ñahajari musa? ¹³Musa yuhure "Buheriro", ni pisuna, "Puhtoro", ni pisuna potocãta nina nica yuhure. Musare buheriro, musa puhtoro potocãta jija yuhu. ¹⁴Ã jina yuhu musare buheriro, musa puhtoro jipaihta musa dahporire cosariro yu jichu ñuna musa cũhu musa mehne macaina dahporire cosaga. ¹⁵Michapucacã musare cosacu, baharo musa yoahti cjihtire musare ñoi nija. Musa mehne macainare musa yoadohohtire ñoi nija. Musare yu yoiro sehetu musa cũhu yoaga. ¹⁶Potocã musare niita nija. Musu yu cahamaca yoiro sehe jiina yu bui jierara. Musare buhe duti yu warocarina jira musa. ã jina yu bui jierara musa. ã jicuta "Yu yoiro sehetu yoaga", nihi musare. ¹⁷Ahrire masina, yu dutiare yoana, wahcheina jinahca musa.

¹⁸Musare jipihitinare ã nieraja. Yu beserinare masija yuhu. Cohamacü to yare ti joari tjui to ni joariro sehetu ã waharohca. "Yuhu mehne churirota yuhure wajã

duare”, ni joaa tiha Cohamacu yare ti joari tjui. ¹⁹To ã yoahto pano ahrire yahuyui nija musare. Yuhure to ã yoari baharo “Jesuta Cristo Cohamacu warocarirota jira”, musa nihti cjihtire ahrire musare yahuyui nija yuhu. ²⁰Potocã musare niita nija. Yu warocainare cahmariro yuhu cùhure cahmana tiro. Tuhsu, yuhure cahmariro yuhure warocariro cùhure cahmana tiro —nire Jesu sãre to buheinare.

Juda Jesure ñu tuhtiinare to ñohtore yahuha Jesu

(Mt 26.20-25; Mr 14.17-21; Lc 22.21-23)

²¹Ã ni yahu tuhsu Jesu tuaro cahyare. Ñ cahyaro õ sehe ni yahure tiro sãre: —Potocãta musare nii nija. Cũiro musa mehne macariro yuhure ñu tuhtiinare yuhure ñonohca —nire Jesu.

²²To ã nichu tuhona Jesure ñohtirore masierana, sã basi cahma ñuroca õi. ²³Cũiro Jesu to buheina mehne macariro yuhu, Jesu to cahĩro sehe to pari wahpa dujihi. ²⁴Yu ã dujichu ñũno Simo Pedro yuhure to wamomaca mehne yoa ño, siniture:

—¿Jesure ñohtirore diro sehere nino nibocari Jesu? Yahuga sãre —ni to wamomaca mehne yoa ño, sinitu ñure Pedro.

²⁵To ã nichu yuhu sehe Jesu cahacã dujiriro jicu sinitu ñuhi tirore:

—Puhtoro, ¿dirore nii nijari muhu? —ni sinitu ñuhi yuhu.

²⁶—Ahri pãore dahra waha na, soha yu wahtiro sehe tirota jira yuhure ñohtiro —nire Jesu.

Ã ni tuhsu ti pão to dahra waha narirore soha tuhsu tíre Judare Simo Iscariote macunore ware. ²⁷Ã yoa pãore to ñahari baharo watĩno sehe Judare ñano yoa dutiri jire. Ñ jiro Jesu tirore õ sehe nire:

—Mu yoahto cjihtore cjero yoa bahrañağa muhu —nire Jesu Judare.

²⁸To ã nichu tuhona sã mesapu dujiina, Jesu Judare to nirire noano tuho ñahaerahi. ²⁹Cãina õ sehe ni tuhutumahi: “Judá sã niñerure wihboriro jira. Ñ jiro bose numui sã chuhti cjihtire nuchu dutiro warocare Jesu Judare. O pja-cuoinare niñerure wa dutiro niboca Jesu”, ni tuhutumahi sã cãina. ³⁰Ã yoa Juda tí pãore ñaha tuhsu, wijaa wahare. To wijaaari pja ñami jire.

Wahma dutiare yahuha Jesu

³¹To ã wijaaari baharo õ sehe nire Jesu:

—Mipu pinihtare yuhu masuno Cohamacu warocariro yu tuariro yu jia tiare ñonohca Cohamacu masare. Ñ jicu Cohamacu to tuariro to jiare ñoihca yuhu sehe. ³²Ã jiro Cohamacu to tuaare yu ñochu tiro sehe yu ya tuaa cùhure mipu pinihtare ñono taro nina. ³³Yu pohna yu cahĩina, yuhure tuhoga. Mahaa dachoricã musa mehne jisiniihca. Yu wahari baharo yuhure macanahca musa. Ñ jicu mari coyea judio masare yu niriro seheta musa cùhure nija. “Yu wahahtore musa sehe waha masierara”, tinare yu niriro seheta musa cùhure ã ni yahuja. ³⁴Wahma dutiare musare yahuihtja. Musa mehne macainare cahĩga musa. Musare yu cahĩro seheta, musa mehne macainare cahĩga. ³⁵Ã jina musa mehne macainare musa cahĩchu ñua yu yaina musa jiare masiahca paina —nire Jesu sãre.

“Jesure masieraja”, Pedro to nihto cjihtore yahuha Jesu

(Mt 26.31-35; Mr 14.27-31; Lc 22.31-34)

³⁶To ã nichu Simo Pedro Jesure õ sehe ni sinitu ñure:

—Puhtoro, ¿nohopu wahaihcari muhu? —nire Pedro.

—Yu wahahtopure mipure yuhu mehne waha masierara muhu. Mipure waha masierapaihta baharo yu cahai wahacuhca —nire Jesu Pedroro.

³⁷—Puhtoro, ¿dohseacu mipure muhu mehne waha masierabocari yuhu? Yuhure ti wajā duapachuta muhure ne duhusi yuhu —nire Pedro Jesure.

³⁸—¿Ā tjjari? ¿Muhure ti wajā duapachuta, muhu yuhure duhueraihcari? Potocāta muhure nii nija. Caraca to duhto pano “Jesure masieraja”, niihca muhu painare. Tia taha ā niihca muhu —nire Jesu Pedroro.

Jesu Cohamacu cahapu wahari maha yoaro sehe jira

14 ¹Baharo Jesu sāre ō sehe ni yahure:

—Ne cahya pjīro tuhotuena tjiga. Cohamacure wacū tuaga. Ā jina yuhu cūhure wacū tuaga. “Cohamacu mehne yuhdunahca”, ni tuhotuga tirore. Yuhu cūhure āta ni tuhotuga musa. ²Yu Pucu to jiropure payu wuhuse jira. Musa jihto cjihtore cahnoyui wahai nija. Tí potocā tjira. Ā jicu musare tíre yahuja. ³Ā jicu musa jihto cjihtore cahno tuhsu, ōputa pari turi majare tjua taihtja yuhu. Ā jina tói yu jiroita musa cūhu jinahca tjoa. ⁴Mipure yu suhtopure wahari mahare masi tuhsura musa —nire Jesu sāre to buheinare.

⁵—Puhtoro, mu suhtore masieraja sā. ¿Ā jina dohse yoa mu wahari mahare masinahcari sā? —ni sinitu űure Toma Jesure.

⁶To ā ni sinituchu tuhororo Jesu sehe ō sehe ni yuhtire:

—Yuhu Cohamacu cahapu wahari maha yoaro sehe jiriro jija. Cohamacu cahapu wahachu yoariro, potocā yahuriro, ā catirucuchu yoariro jinocaita nija yuhu. Ā jia yu yaina dihta yu Pucu cahapu wahaahca. ⁷Panopu yuhure masina, yu Pucu cūhure masiboa musa. Mipure tirore űure musa. Ā jina tirore masi tuhsura musa —nire Jesu sāre.

⁸To ā nichu Felipe sehe ō sehe nire:

—Puhtoro, mari Pucure űoga sāre. Tó purota űu duaja sā —nire tiro.

⁹To ā nichu Jesu ō sehe ni yahure:

—Felipe, ¿yoari pja yuhu mehne jipaihta, muhu masierasinihari yuhure? Yuhure űuriro yu Pucu cūhure űu tuhsure. Ā jicu “Mari Pucure űoga sāre” nicu, ¿dohseacu ā nijari muhu yuhure? ¹⁰Yuhu yu Pucu mehne puaro jipanahta cūirota jija. ¿Tíre “Potocā jierara”, niimeje nijari muhu? Musare yahucu yu mu sūro yahui nieraja. Yu Pucure yahubasai nija. Ā jiro tiro yuhu mehne jiriro to tuaa mehne yoa űona. ¹¹Yuhu yu Pucu mehne puaro jipanahta cūirota jija. Tíre “Potocā tjira”, ni wacūga musa. Tíre “Potocā tjira” nierana, Cohamacu tuaa mehne yu yoa űoare wacūna, yu Pucu mehne yu cūirota jiare “Potocā tjira”, ni wacūga musa. ¹²Potocāta musare nii nija. Yuhure wacū tuariro yu yoariro seheta yoarohca. Ā yoa tiro yu yuhdoro yoarohca. Yu Pucu cahapu tjuaai tai nija mipure. Ā jiro yuhure wacū tuariro yu yuhdoro Cohamacu tuaa mehne yoa űonohca. ¹³Ā jicu yuhure wacū tuaina ti sinino purota yoaihca. Ā yoacu yu Pucu to tuariro jiare űoihca. ¹⁴Yuhure wacū tuaina musa jichu musa sinino purota yoaihtja —nire Jesu.

“Espíritu Santore musare warocaihtja”, ni yahuha Jesu

¹⁵Ā ni tuhsu ō sehe ni namore:

—Yuhure musa cahīna, yu dutiare noano yoanahca. ¹⁶Yu Pucure sini-basaihtja. Yu ā sinibasachu yu Pucu sehe pairore musare yoadohohtirore

musare warocarohca. Ñ jiro tiro musare yoadohohtiro sehe jipihtia dachoripe musa mehne ã jirucurohca. ¹⁷Tiro potocãta yahuriro Espiritu Santo tjira. Ahri yahpa macaina yuhure cahmaeraina sehe tirore masierara. Ñ jia tirore cjua masierara. Tirota musa mehne ã jirucurohca. Ñ jina tirore masina musa.

¹⁸Musare cohãsi yuhũ. Musa mehne jihtiro cjihto tjua taihca yuhũ tjoa. ¹⁹Wiho mejeta mahanocã duhsara yu wahahto cjihto. Yu wahari baharo ahri yahpa macaina yuhure wacũ tuaeraina yuhure pari turi ñusi. Musa sehe yuhure ñunahca. Yu catiriro jichu musa cũhu jipihtia dachoripe Cohamacu mehne catirucunahca. ²⁰Tĩ dachoi yu tjua tahti dachoi yuhũ yu Pucu mehne cũirota sã jichu masinahca musa. Ñ jina yuhũ mehne macaina musa jichu musa mehne macariro yu jichu cũhure masinahca musa. ²¹Yu dutiare yoariro yuhure cahĩirota jira. Ñ jiro yuhure cahĩirore yu Pucu sehe cahĩnohca. Ñ jicu yuhũ cũhu yu dutiare yoarirore cahĩihca. Ñ yoa yu jia tiare noano masichu yoaihca tirore —nire Jesu sãre to buheinare.

²²Sã mehne macariro paio Juda wama tiroro jire. Juda Iscariote Jesure ñu tuhtiinare ñohtiro jierare tiro. Pairo Juda jire. Ñ jiro tiro Jesure õ sehe ni siniture: —Puhtoro, ¿dohse yoaijari muhũ tinare ã nicu? ¿Ahri yahpa macainare muhure masichu yoeracu, dohse yoacu sã dihtare muhure masichu yoaih-cari muhũ? —ni siniture Juda.

²³To ã nichu tuhoro Jesu tirore õ sehe ni yahure:

—Yuhure cahĩina, yu dutiare noano yoaã nina. Ti ã yoachũ yu Pucu sehe tinare cahĩnohca. Ñ jina tina mehne jina tanahca sã. ²⁴Yuhure cahĩerariro yu dutiare yoerara. Tuhsu, yu yahua musa tuhori cjiri sehe yu ya yahua jierara. Yuhure warocariro ya yahua sehe jira. Tiro yu Pucu tjira.

²⁵Musa mehne jisinicu ahrire musare yahusinii nija. ²⁶Baharo yu sinibasachu yu Pucu Espiritu Santore warocarohca musare. Tiro Espiritu Santo sehe musare yoadohohtiro jiro, musare buhe pahĩnohca tiro. Ñ yoa musare yu yahuri cjiire musare wacũchu yoarohca tiro.

²⁷Musare noano jichu yoaihca yuhũ. Yuhũ yu noano jiro sehetã noano jichu yoaihca musare. Ahri yahpa macaina ti mahĩoperiro sehetã yoasi yuhũ musare. Yuhũ pinihta potocãta noano jichu yoaihca musare. Cahya pjĩro wacũena tjiga musa. Ñ jina cuiena tjiga musa. ²⁸“Yuhũ wahaihca. Ñ jicu musa mehne jihtiro cjihto tjua taihtja tjoa”, musare yu ã ni yahuchũ tuho tuhsure musa. Tĩre tuhona, wahcheboa musa. Yuhure musa potocã cahĩrina jina, wahcheboa musa. Yu Pucu sehe yu yuhdoro tuara. Ñ jina tiro cahapũ yu wahahto cjihtore musa masiri baharo yuhure cahĩna, wahcheboa musa. ²⁹Yuhure musa wacũ tuhti cjihtire yu wahahtore yahuyui nija musare.

³⁰Ahri yahpa macaina puhtoro watĩno sehe tara mipure. To ã tachũ yuhũ musa mehne yu durucu batoahti pja mahanocã duhsara. Tiro sehe yuhure yuhderuca masierara. ³¹Wiho mejeta yuhure yu Pucu to dutiriro sehetã yoaja yuhũ. Æta yoaja yuhũ yu Pucure yu cahĩare ahri yahpa macaina ti masihti cjihtire. Wahcãrucaga. Basa wahana —nire Jesu sãre to buheinare.

Jesu secu yoaro sehe jiro jira

15 ¹Baharo piti dahre buhero sãre õ sehe nire Jesu:

—Yuhũ potocãta secu yoaro sehe jiro jija. Yu Pucu sehe secure ñu wihboriro yoaro sehe jiro jira. ²Yu yaina secu dupuri yoaro sehe jiina yuhũ

mehne macainata jira. Dicha mariea dúpuri secure ñu wihboriro to paha cohãiro seheta yu Pucu to cahmaare yoerainare cohãna. Dicha tia dúpuri secure ñu wihboriro to cahnoriro seheta yu Pucu to cahmaare yoinare yoadohorohca tiro “Yu cahmaare yoa namojaro”, nino. ³Yu yahuaire tuhona, “Potocã tjira”, nire musa. Æ jiro yu Pucu musa ñaa yoari buhirire cohã tuhsare. ⁴Yuhu mehne macaina jiga musa. Æ jii musa mehne jiihca. Secu dúpuri secu mehne wahã suera dúpuri jia, tí dúpuri sehe dicha mariahna. Tó seheta yuhu mehne macaina jierana yu Pucu cahmaare yoa masierara musa.

⁵Yuhu secu yoaro sehe jiriro jija. Musa sehe tu dúpuri yoaro sehe jiina jira. Yuhu mehne macariro mehne yu jichu dicha tia dúpuri yoaro sehe tiro yu Pucu cahmaare yoara. Yuhu mehne macaina jierana yu Pucu cahmaare yoa masierara musa. ⁶Ñaa dúpuri to cohãboriro seheta yuhu mehne macaina jierainare yu Pucu cohãnohca. Tí dúpuri ñaia wahachu secure ñu wihboriro tí dúpuri na cahmachu pichacapu jü cohãnohca. Æta yorohca Cohamacu yuhu mehne macaina jierainare.

⁷Yuhu mehne macaina jina, yu buheare boeraboca musa. Æ boerana, musa cahmano purota siniga. Æ jicu musa sinino purota yoabasaihtja. ⁸Yu Pucu cahmaare yoina musa jichu ñua “Jesu yaina jira ahrina”, ni masiahca masa. Æ jia musare ñua yu Pucure ño payoahca. ⁹Yu Pucu yuhure to cahĩiro seheta musare yuhu cūhu cahĩa tihi. Yu cahĩina jirucuga musa. ¹⁰Yu cahĩina jirucuina yu dutiare yoara. Yu Pucu to dutiare yoaja yuhu. Æ yoacu to cahĩiro jirucuja yuhu. Tó seheta musa cūhu yu dutiare yoana yu cahĩina jirucunahca musa.

¹¹Ahrire musare yahuhi yuhu mehne musa noano wahchehto cjihtore. Æ jina tuaro wahchenahca musa. ¹²Õ sehe dutija musare: Musare yu cahĩiro seheta musa mehne macaina cūhure cahĩa. ¹³Cũiro masuno tiro mehne macariro yaro jiborirore yariaro tiro mehne macarirore tuaro cahĩna, paina ti cahĩiro yuhdoro. ¹⁴Æ jina yu dutiare yoana yuhu mehne macaina jira musa. ¹⁵Potocãta yuhu mehne macaina waro jira musa. Musa Æ jiina jichu jipihtia yu yoirire yahuja musare. Cahamacuno to puhtoro yoirire masierara tiro. Æ jicu “Yu cahamaca wiho jiina jira musa”, musare nieraja. Yu Pucu yuhure to yahurire musare yahu pahñohi. Æ yahucu “Yuhu mehne macaina jira musa”, musare nija mipure. ¹⁶Musa sehe yuhure ne beserare. Yuhu sehe musare besei yu Pucu cahmaare musa yoachtina cjihtire. Musa Æ yoachu musa yoaa ne wiho waro jisi. Æ jia musa yoaa Æ jirucuahca. Musa Æ yoachu yuhure musa wacũ tuachu yu Pucure musa sinino purota tiro musare warohca. ¹⁷Ahrire musare dutija yuhu: Musa mehne macainare cahĩa musa —ni yahure Jesu.

Jesure to yaina cūhure ahri yahpa macaina ñu tuhtira

¹⁸Æ yoa tiro õ sehe ni yahu namore:

—Ahri yahpa macaina musare ti ñu tuhtichu ñua ahrire wacũga musa: Musare ti ñu tuhtihto pano yuhu sehere ñu tuhti ducare tina. ¹⁹Cohamacure cahmaeraina musa jisnichu, tina mehne macainare ti cahĩiro seheta musa cūhure cahĩboa tina. Ahri yahpa macaina musa jisnichu musare besei. Æ jina mipure ahri yahpa macaina waro jierara musa. Musa Æ jierachu ñua ahri yahpa macaina musare ñu tuhtira. ²⁰“Yu yaina jina musa yu bui jierara”, musare yu niri cjiirire wacũga musa. Æ yu docai jiina jina yu ñano yuhdũiro

seheta ñano yuhdunahca musa cūhu. Yuhure ñano yoarinata musa cūhure ñano yoaahca. Yū buhechu yuhtirinata musa buhechu cūhure yuhtiahca tina. ²¹Ahri yahpa macaina yuhure warocaritore masierara. Ā jia yuhure wacū tuaina musa jichu ñua tina ñano yoaahca musa cūhure.

²²Tinare yū buhei taerachu yuhure ti cahmaerari buhiri buhiri mariaboa. Mipure tinare yū buheri baharo “Ñaa buhiri mariahna säre”, ni masierara tina. ²³Yuhure ñu tuhtiro yū Pucu cūhure ñu tuhtira. ²⁴Cohamacu to tuaa mehne paina ti ne yoaerare yoa ñohi. Ā yoa tinare tīre yū yoa ñoerachu tinare ñaa buhiri mariaboa. Cohamacu tuaa mehne yū yoa ñoare ti ñuri baharo yuhure yū Pucu cūhure ñu tuhtira tina. ²⁵Ā ñu tuhtia Cohamacu yare ti joari tjuī dóiputa to ni joariro seheta yoa nire tina. Ō sehe ni joa tiha: “Tinare yū ñano yoaerapachuta yuhure ñu tuhtire tina”, ni joa tiha dóiputa Cohamacu yare ti joari tjuī.

²⁶Yū baharopu musare yoadohohtiro, yū Pucu mehne jiro musare yū warocahtiro Espiritu Santo tjira. Tiro potocāta yahuriro jira. Ā jiro tiro taro yū jia tiare yahurohca musare. ²⁷Masare yū buhe ducachuputa musa cūhu dachoripe yūhu mehne ā jirucure. Ā jina musa cūhu yū jia tiare yahunahca painare —ni yahure Jesu.

16 ¹Ā ni tuhsu säre ō sehe ni yahu namore: —Baharo yū buheare yūhu cūhure musa cohærahti cjihtire ahrire jipihtiare yahui musare. ²Judio masa mari buhea wuhusepu musa sãa duachu sãa dutisi musare yū yaina musa jiri buhiri. Ā jia pa tehepu musare wajãa, “Cohamacu cahmaare yoana nija”, ni tuhutuahca paina. ³Yū Pucure, yūhu cūhure tina masierara. Ā masieraa musare ñano yoaahca tina. ⁴Ā jina musare ñano ti yoachu ñuna, “Ti ō sehe yoahto panota Jesu yahu tuhsure säre”, ni wacūnahca musa. Musa ā ni wacūhti cjihtire mipure ahrire yahu muhtai nija musare —ni yahure Jesu.

Espiritu Santo to yoahtire yahuha Jesu

Ā ni tuhsu ō sehe ni yahu namore Jesu:

—Wahmanopure musa mehne jicu ahrire musare yahuerahi. ⁵Mipu sehene yuhure warocariro cahapu wahaihca wahai tai nija. “¿Nohopu wahaihcari muhu?” yuhure ni, ne cūiro barota sinitu ñuerara musa. ⁶Ā sinitu ñuerapanahta yū wahahtore musare yū yahu mujachu musa ñano yajeripohna tira. ⁷Musare potocāta yahui nija. Yū wahari baharo musare noanocanohca. Yū manopu wahaerachu musare yoadohohtiro sehe taeraboa. Wahacu musare tirore warocaihtja yūhu. ⁸Yū ā warocachu tiro tarohca. Ā wihiro ahri yahpa macaina ñaa yoina ti ñaa buhiri tiare tinare masichu yorohca tiro. Noano jia tia cūhure buherohca tiro masare. Tuhsu, Cohamacu masare to buhiri dahrehto cūhure masichu yorohca masare yoadohohtiro sehe. ⁹Yuhure wacū tuaeraina jira ahri yahpa macaina. Ā jiro yoadohohtiro sehe masa ñaa yoina ti ñaa buhiri tiare tinare masichu yorohca. ¹⁰Yū Pucu cahapu wahaihca. Yū ā wahari baharo musa yuhure ne ñusinisi. Ā jiro noano jia tia cūhure masichu yorohca yoadohohtiro sehe. ¹¹Ahri yahpa macaina puhtoro watīnore Cohamacu buhiri dahre duti tuhsure. Ā jiro Cohamacu masare, watīno mehne macainare to buhiri dahrehti cūhure masichu yorohca yoadohohtiro sehe.

¹² Pjïro jira musare yu yahuhti cjihti. Wiho mejeta musa sehe yu yahu pahñochu, tuho ñaha pahñoeraboa. ¹³ Ñ jiro potocã jiare yahuriro Espiritu Santo sehe musare quihõno jiare yahu pahño no tarohca. Tiro to mu suro musare yahusi. Yu Pucu tirore to yahu dutirire tiro yahurohca musare. Ñ yoa “Baharopu ñ sehe waharohca”, ni yahuyurohca tiro sehe musare. ¹⁴ Ñ yoa yu yare musare tiro yahurohca. Ñ yahuro yuhure ño payochu yoarohca musare. ¹⁵ Jipihtia yu Pucu ya yu ya cûhu jira. Ñ jicu “Espiritu Santo sehe yu yare yahurohca musare”, nihi musare —ni yahure Jesu.

“Cahyaina jipanahta baharo wahchenahca musa”, ni yahuha Jesu

¹⁶ Ñ ni tuhsu ñ sehe ni yahu namore:

—Mahanocã baharo yuhure ñusi musa. Ñ jina baharocãta musa yuhure ñunahca tjoa —nire Jesu sãre to buheinare.

¹⁷ To ñ nichu tuhona, sã sehe mahainacã ñ sehe ni durucui sã basi:

—“Mahanocã baharo yuhure ñusi musa. Ñ jina baharocãta musa yuhure ñunahca tjoa” nino, ¿dohse nino ñ niri marine? Ñ yoa “Yu Pucu cahapu wahaihca” nino, ¿dohse jiro baro marine ñ niri tiro? ¹⁸ “Mahanocã” nino, ¿dohse nino ñ niri tiro? To yahurire noano tuho ñahaeraja mari —ni durucui sã basi.

¹⁹ Sã ñ ni durucuchu Jesu tirore sã sinitu duarire masino, sãre ñ sehe ni yahure:

—“Mahanocã baharo yuhure ñusi musa. Ñ jina baharocãta yuhure ñunahca tjoa”, ¿yu niri cjiire sinitu duajari musa? ¿Tíre yu nirire tuho ñahaerajari musa? ²⁰ Potocãta musare nii nija. Yu yariachu ñuna musa tiinahca. Tuhsu, tuaro cahyanahca. Ñ jia yuhure ño payoeraina sehe wahcheahca. Musa sehe cahyaina cjiiri jipanahta, baharo wahchenahca musa. ²¹ Ñ sehe jira tí: Numino niji wahcõno, to ñano yuhduhto pano jira. Ñ jiro ticoro tuaro cahyara. Ñ cahyaparota to pohna tiri baharo ticorore purĩre wacũerara ticoro. Wihã-rirocã ahri yahpapu to masa bajuachu ticoro wahchera. Ñ jiro ticorore purĩre wacũerara ticoro. ²² Tó seheta musa mipure cahyanahca. Baharo musare ñuihca tjoa. Yuhure ñ ñuna musa tuaro wahchenahca. Musa ñ wahchechu paina musare cahyachu yoa masisi.

²³ Tí dachoi yuhure musa ñuri dachoi yuhure sinitu ñusi musa. Masi tuhsurinapu jinahca. Potocãta musare nii nija. Yuhure musa wacũ tuachu ñuno yu Pucure musa siniare tiro musare warohca. ²⁴ Yuhure wacũ tuaina jina, Cohamacure sini masina musa. Ahri dacho panoi tirore ñ sinierasinire musa. Yuhure wacũ tuatjiãhna Cohamacure siniga. Musa ñ sinichu musa sinirire musare warohca, musa wahche pahñohti cjihtire —nire Jesu sãre.

Ñainare Jesu yuhdurucaha

²⁵ Ñ ni tuhsu ñ sehe ni namore:

—Quiti mehne musare yahua tihi. Ñ yahupaihta baharo musare quiti mehne yahusi yuhu. Ñ yahueracu yu Pucu sehere noano poto yahuihtja musare. ²⁶ Tí dachore musa ya cjihtire yu Pucure sini payosi yuhu. Yuhure wacũ tuana, musa basi tirore sininahca. ²⁷ Musa yuhure cahina. Ñ jina yu Pucu cahapu yu tarihi jichu “Potocã tjira”, nina musa. Ñ niina musa jichu ñuno, yuhure cahina musa jichu ñuno yu Pucu sehe musare cahina. To ñ

cahichu tirore musa sininahca. ²⁸Yu Pucu cahai jiro jicu ahri yahpape tai yuhu. A jicu mipure ahri yahpape jiro jisinicu yu Pucu cahapu wahaihca —nire Jesu.

²⁹To a nichu sa to buheina o sehe nii:

—Mipu pinihta quit marieno durucui noano poto yahui nina muhu sare.

³⁰Muhu noano masi pahñoriro mu jichu mipu pinihtare sa masija. A jia paina mihure buhe masierara. Tire mipure sa noano masija. Sa noano masiina jina, Cohamacu cahapu tariro mu jichu “Potocã tjira”, nija sa —nii sa Jesure.

³¹Sa a nichu Jesu o sehe ni yuhtire sare:

—¿Mipure “Potocã tjira”, nijari musa juna? ³²Baharo curero jipihtina musa wuhusepu waha siteina jina, yuhure cohānahca musa. Musa a cohāpachuta yu Pucu sehe yuhu mehne jira. A jicu yuhu cūirota jieraja. ³³Ahrire musare yahu muhtahi, yuhure musa wacū tuaa mehne musa noano jihto sehe. Cohamacure cahmaeraina cahapu musa jichu ñano yoahca musare tina. Ti a yoapachuta wahchega musa. Ahri yahpa macaina ñaa buhiri tiinare, ti puhtoro watino cūhure yuhdurucariro jija yuhu. A jina yuhure wacū tuana wahchega musa —nire Jesu sare to buheinare.

Jesu to buheina ya cjihtire Cohamacure sini payoha

17 ¹A ni yahu tuhsu Jesu manopu ñuroca mo, Cohamacure o sehe ni durucure:

—Mai, mipure mu yahu quihōriro seheta yuhure ñano ti yoahiti pja mu sūrota nina. Yuhure mu macure masare ño payochu yoaga. Mu a yoachu mihure masare ño payochu yoaihca yuhu cūhu. ²Jipihtina bui puhtoro yuhure cūre muhu. A jicu yuhure mu warinare muhu mehne a jirucuchu yoaihca yuhu. Tuhsu, mihure masare ño payochu yoaihca yuhu. ³Muhu dihta Cohamacu waro jira. Yuhu Jesucristo mu warocariro jija. A jia jipihtina mihure masiina, yuhu cūhure masiina manopu mari mehne a jirucuahca —nire Jesu.

⁴A ninota o sehe ni namore Cohamacure:

—Ahri yahpape mu yoa dutiri cjirire yoa pahñoja yuhu. A yoacu mihure masare ño payochu yoaja yuhu. ⁵Ahri yahpa to jihto pano muhu mehne yu jichu jipihtina yuhure ti ño payo muhtariro seheta mipure yuhure ti ño payochu yoaga tjoa.

⁶Ahri yahpai jiinare yuhure mu warinare mihure masichu yoahi. Mu warina mu yaina jira. A jicu tinare ware muhu yuhure. A jia mu dutiare yoare tina. ⁷⁻⁸Yuhure mu yahurire tinare buhehi. Yu a buhechu tuhoa yu buheare cahmare tina. A jia potocãta mu cahai tariro yu jichu masina tina. Tuhsu, mu warocariro yu jichu “Potocã tjira”, ni tuhotura tina. A yoa jipihtia yu ya mu ya ti jichu masina tina.

⁹Ti ya cjihtire mihure sini payoi nija. Paina ya cjihti sehere sini payoi nieraja yuhu. Yuhure mu warina mu yaina jira. A jicu ti ya cjihtire sini payoi nija mihure. ¹⁰Tina jipihtina mu yaina jira. A jia mu yaina sehe yu yaina jira. Yuhure wacū tuaa yu tuariro jiare masichu yoara tina masare.

¹¹Mipure ahri yahpape tjuali yuhu. Mu cahapu wahi tai nija. Yu a wahapachuta mipure yuhure mu warina ahri yahpare tjuaahca. Mai, muhu noariro jira. Yuhure mu warinare mu tuaa mehne ñu wihbobasaga. Mu a ñu

wihbochu mari cūirota mari jiro seheta tina cūhu cū curuata jiahca. ¹²Tina mehne jicu mu tuaa mehne tinare noano ñu wihbohi. Cūiro pinihta pichacapu waharohca mu yare ti joari tjui to yahuriro seheta.

¹³Mipure mu cahai wakai tai nija. Ñ jicu ahri yahpai ahri jipihtiare yu yainare yahuja yuhu mehne ti noano wahchehto cjihtore. ¹⁴Mu yare yahuhi tinare. Tina yu yoaro seheta ahri yahpai ji dojahtina jierara. Ñ jia ahri yahpa macaina sehe tinare ñu tuhtira. ¹⁵“Ahri yahpai jiinare, yu yainare naaga”, nieraja. Ñ nierapaihta tinare noano ñu wihboga “Watino ñaare yoa dutiri”, tinare nicu. ¹⁶Ahri yahpa macariro jieraja. Tina cūhu yu yoaro seheta ahri yahpai ji dojahtina jierara. ¹⁷Yu yainare mu buhea mehne noaina wahachu yoaga tinare. Mu yahua sehe potocā tjira. ¹⁸Ahri yahpapure yuhure mu warocariro seheta yuhu sehe yu yaina cūhure mu yare buhe duticu warocahi. ¹⁹Mu cahmaare yoahtiro cjihtore yariahtiro jicu yu pjacure waja. Ñ waja yuhu yu yaina cūhu mu cahmaare potocā ti noano yoahti cjihtire.

²⁰⁻²¹“Yu yaina mipure jiina dihtare yoadohoga”, ni sini payoeraja yuhu. Yu yaina painare yu yare ti buheri baharo paina cūhu yuhure wacu tuaahca. Tina cūhure yoadohoga, yu yaina jipihtina cū curuai ti jihto cjihto sehe. Yuhu muhu mehne mari puaro jipanahta cūiro tjija. Mari cūirota mari jiro seheta tina cūhu mari mehne cū curuaihta jijaro. Cū curuaita jijaro mu warocariro yu jiare jipihtina masa “Potocā tjira” ti nihto sehe. ²²Yuhure mu masichu yoiriro seheta yu yainare yu jia tiare masichu yoi. Tinare yu ñ masichu yochu cūirota mari jiro seheta tina cūhu cū curuaita jiahca. ²³Yuhu tina mehne jija. Tuhsu, muhu yuhu mehne jira. Mari ñ jiina jichu yu yaina potocāta cū curuaita noano jiahca. Cū curuaita ti jichu ñua mu warocariro yu jiare ahri yahpa macaina masiahca. Tuhsu, yuhure mu cahiroro seheta yu yaina cūhure mu cahiare masiahca masa.

²⁴Mai, ahri yahpa to ji ducachto pano yuhure cahia tire muhu. Ñ cahicu yu masi pahñoriro, si siteriro yu jichu ñore muhu. Ñ jicu yuhure mu warina yuhu mehne ti jichu cahmaja masi pahñoriro, si siteriro yu jichu ti masihti cjihtire. ²⁵Mai, muhu noariro jira. Ahri yahpa macaina ñaina muhure masierara. Yuhu sehe muhure masija. Ñ jia mu warocariro yu jichu masina yu yaina. ²⁶Muhure tinare masichu yoi. Baharopu cūhure muhure tinare masichu yoihtja yuhure mu cahiroro seheta painare ti cahihtti cjihtire. Ñ jicu yu yaina mehne jiihca —nire Jesu Cohamacure.

Jesure peresu yoaha

(Mt 26.47-56; Mr 14.43-50; Lc 22.47-53)

18 ¹To ñ niri baharo Jesu sã cūhu to buheina Cedrõ wama tiri mare pahã, olivo wama tia yucuri ti toari wesepu sui. ²Payu tahari tí wesei, tí yucu docai sã Jesu mehne cahmachua tii. Ñ jiro Juda Jesure ñu tuhtiinare ñohtiro tí wesere masire. ³Ñ masino puã curua surarare mu tã tare tí wesepu Jesure ñono taro. Cū curua surara waro jire. Pa curua surara Cohamacu wuhure cohtaina jire. Tina sacerdotea puhtoa, fariseo curua macaina ti warocaina jire surara, Cohamacu wuhure cohtaina mehne. Ñ taa sihãa pocare, sihãa yucuri cūhure sihãa tare. Ti wamoa cūhure cjuare tina. ⁴Tí wesepu ti wihiri baharo Jesu to ñano wahahtore masino, tinare piti boca, õ sehe ni siniture:

—¿Noare macana nijari musa? —nire Jesu.

⁵—Jesu Nazare macarirore macaja sã —ni yuhtire tina.

—Tiro tjija yuhũ —nire Jesu.

Juda sehe, Jesure ñaha dutiro ñoriro tina mehne jire. ⁶Ã jia “Tiro tjija yuhũ”, Jesu to nichuta tina sehe cuua waha, yahpapũ du siti mua bora caha sure. ⁷Ti ã wahachũ ñũno tinare pari turi õ sehe ni siniture Jesu:

—¿Noare macana nijari musa? —nire.

—Jesu Nazare macarirore macana nija sã —ni yuhtire tina tjoa.

⁸—“Tiro tjija”, ni tuhsumahicu yuhũ musare. Ã jina yuhure ñahana, ahri-nare yuhũ mehne macainare peresu yoarena tjiga musa —nire Jesu.

⁹Ã sãre cahĩno ne cãirore butichũ yoerare. Ã yoaro tó pano Cohamacure to niriro seheta yoaro nire tiro. “Yuhure mu warinare ne cãirore boerahi”, to niriro seheta yoaro nire Jesu. ¹⁰Ã yoa Simo Pedro ñosari pjĩne cjuaro, tí pjĩne tuã we naroca, sacerdotea bui puhtoro cahamacũno Malco wama tiroiro cahmonore cjã pahrẽnocare. To poto buhusehe macari cahmonore cjã pahrẽnocare. ¹¹Ã to cjã pahrẽchũ ñũno Jesu tirore õ sehe nire:

—Mu ñosari pjĩne wihboga. Yu Pucũ yuhure to ñano yuhdu dutiriro seheta ñano yuhduihtja yuhũ —nire Jesu Pedore.

Sacerdotea bui puhtoro cahapũ Jesure naaha tina

(Mt 26.57-58; Mr 14.53-54; Lc 22.54)

¹²To ã ni tuhsuchuta surara, ti puhtoro mehne, Cohamacu wuhure cohtaina surara cũhũ Jesure ñaha, tirore duhtere. ¹³Duhte tuhsũ Ana cahapũ naa muhtare tina. Ana sehe Caifa marechũno jire. Caifa sehe tí cuhmare sacerdotea bui puhtoro jire. ¹⁴“Judio masa ya cjihtire cũiro masũno yariachũ noana”, niriro cjiro jire Caifa sehe.

“Jesure masieraja”, niha Pedro

(Mt 26.69-70; Mr 14.66-68; Lc 22.55-57)

¹⁵Ã jina yuhũ Simo Pedro mehne Jesure yoa cureropũ ñũ nũnũ tii. Yuhũ sehe sacerdotea bui puhtoro to ñũ masiriro jicu Jesu baharo puhtoro wuhui jiri sahrĩnopũ sãa wahi. ¹⁶Yu ã sãachũ Pedro sehe sahrĩno sopacai tjuarucũ sure. Ã jicu majare wijaa ta, sopacare cohtaricorore sinitu ñũi “Ahrĩro Pedro sãa ta masijari”, nicu. Yu ã sinitu tuhsuchũ ticoro Pedore sãa ta dutire. To sãa ta dutiri baharo yuhũ Pedore na sãa wahi. ¹⁷Yu ã na sãachũ ñũno sopacare cohtaricoro sehe Pedore õ sehe ni siniture:

—¿Jesu buheina mehne macariro jierajari muhũ? —nire ticoro Pedore.

—Jieraja yuhũ —ni yuhtire Pedro sehe.

¹⁸Sã suhto pano tó macaina cahamaca, surara mehne ti sohmahti pichacare wijã tuhsũri jire. Yusua nire. Ã jia tina tí pichaca duhtũ cahai ducua, sohmaa nire. Ti ã sohmachũ ñũno, Pedro cũhũ waha, sohmare.

Sacerdotea puhtoro Jesure sinituha

(Mt 26.59-66; Mr 14.55-64; Lc 22.66-71)

¹⁹Ã yoa sacerdotea bui puhtoro Jesu buherire, sãre to buheina cũhure sinitu ñũri jire Jesure. ²⁰To ã sinituchũ Jesu sehe õ sehe ni yuhtiri jire tirore:

—Jipihtinare buhecũ ti panoi ducuhi. Ã buhecũ judio masa mari buhea wuhusei Cohamacu wuhũ cũhure ã buherucuhi. Musa ñũenoi buherahi yuhũ.

²¹ ¿Dohseacu yuhure sinitujari muhu? Sinitu duacu ya buheinare sinitu ñuga. Yu buherire tina masina —ni yuhtiri jire Jesu.

²² To ã nichu tuhoro tói ducuriro surara sehe to wamomaca mehne Jesure cjári jire.

—Á nii tjiga sacerdotea bui puhtorore —niri jire surara sehe Jesure.

²³ To ã nichuta Jesu ò sehe niri jire:

—Ñano ya ni durucurire yahuga yuhure. ¿Potocāta musare ya yahu-pachuta, dohseacu yuhure cjári muhu? —niri jire Jesu surarare.

²⁴ Baharo Ana Jesure paina ti duhterirore Caifa sacerdotea bui puhtoro cahapu warocari jire.

“Jesure masieraja”, pari turi niha Pedro

(Mt 26.71-75; Mr 14.69-72; Lc 22.58-62)

²⁵ Ñ yoa Simo Pedro pichaca duhtu cahai ducuro, sohmano nire. Ñ to sohmrucuchu ñua, tó macaina tirore ò sehe ni siniture:

—¿Muhu cūhu Jesu buheina mehne macariro jierajari muhu? —nire tina Pedore.

—Jieraja yuhu —ni yuhtire Pedro.

²⁶ Tuhsu, sacerdotea bui puhtoro cahamaca mehne macariro, Pedro to cahmono cjá pahrēriro coyeiro sehe Pedore ò sehe ni siniture:

—¿Jesure ti ñahari wesei ya jichu muhu cūhu tiro mehne jierapahte? —ni siniture tiro Pedore.

²⁷ —Yuhu tiro mehne jierahi —nire Pedro. To ã nichuta caraca dure.

Jesure Pilato sinituha

(Mt 27.1-2, 11-14; Mr 15.1-5; Lc 23.1-5)

²⁸ Ñamiwacūnu jichu Caifa ya wuhupū jirina Jesure naa wijaa, tí maca macaina puhtoro Pilato ya wuhupū naa wahare tina. Ñ wahapahta to ya wuhupū sāaerare. Pascua dachori jichu tina tí bose numuri macaare chūhtina jia ò sehe nire: “Judio masuno jierara Pilato. To ã jiro jichu to ya wuhure sāana, mari dutiare yuhdurucana niboca. Á jina mari sāachū marine bose numuri macaa chuare chu dutierahca”, nire tina. Ñ nia puhtoro Pilato ya wuhure sāaerare Jesure naahrina sehe. ²⁹ Ti ã sāa taerachū ñuno Pilato tina cahapu, wuhu sopacapu surucu suro, tinare ò sehe ni siniture:

—¿Yaba buhirire ahrirore yahusā duajari musa? —nire Pilato tinare.

³⁰ —Ahriro to noariro jichu muhure sā waeraboa. Ñariro jira tiro —ni yuhtire tina.

³¹ Ti ã nichu Pilato ò sehe nire:

—Musa sehe tirore naahga. Ñ jina musa ya dutia ti niriro seheta tirore buhiri dahrega —nire Pilato tinare.

—Musa Roma macaina ya dutia sehe sāre masunore wajā dutierara —nire tina Pilatore.

³² Á nia Jesure judio masa ti wajā duarire masichu yoa nire. Jesu sehe crusapu to yariahtore tó pano to yahuriro seheta ã waharo nire. ³³ Ti ã ni durucuri baharo Pilato sehe wuhupū majare sāa, Jesure pjirocari jire. Pjiroca tuhsu, tirore ò sehe ni sinituri jire:

—¿Judio masa ti puhtoro tjijari muhu? —ni sinituri jire Pilato.

³⁴—¿Mu mu sūrota ā sinitui nijari muhu yuhure? ¿O paina sehe yuhure ti yahusāri baharo tīre sinitu űjari muhu? —niri jire Jesu Pilatore.

³⁵—Judio masuno jieraja yuhu. Mu ya yahpa macaina, sacerdotea puhtoā cūhu muhure ware sāre. ¿Yabare űnano yoari muhu ti ā buhiri dahre duachu? —niri jire Pilato.

³⁶—Ahri yahpa macariro puhtoro jieraja yuhu. Ahri yahpa macariro puhtoro yu jichu yu buheina yuhure yoadohoboa. Judio masare yuhure űaha dutieraboa. Yu puhtoro jia ahri yahpa macaa jierara —niri jire Jesu Pilatore.

³⁷—¿Ā jicu puhtoro jĳari muhu ā nicu? —niri jire Pilato.

—Mu nino sehetā puhtoro tjĳa. Masa ti puhtoro jihtiro cĳihtō masa bajuai yuhu. Ā jicu ahri yahpapu tai ti puhtoro jicu tacu, potocā ĳiare yahucu tacu. Jĳihtina potocā ĳiare tuho duaina, yu yahuare tuhora —niri jire Jesu.

³⁸—¿Yaba baro jĳari potocā ĳia? Potocā ĳiare masihtō basioerara —niri jire Pilato.

Judio masa Jesure wajā dutiĳa

(Mt 27.15-31; Mr 15.6-20; Lc 23.13-25)

Ā ni tuhsu Pilato judio masa cahai majare tjua waha, tinare ō sehe ni yahure: —Ahriro Jesure yaba buhiri mariahna. ³⁹Cuhmaripe pascua jichu cūiro peresui jĳirore musa wio dutirucura. ¿Ā jicu ahriro Jesureta musa puhtoro cĳihtō musare wiobasabocari yuhu? —nire Pilato judio masare.

⁴⁰To ā nichu tuhoa judio masa ō sehe ni sañurucure:

—Tĳore wioi tjĳa. Barrabā sehere sāre wiobasaga —ni sañurucure judio masa Pilatore.

Barraba sehe yaca bucuro jire.

19 ¹Ti ā ni sañurucuri baharo Pilato Jesure tjana dutiri jire. To ā dutichu to mua sehe tĳore tjanari jire. ²Tjana tuhsu tina pota soro dahre tuhsu, Jesu dapu bui duhu payori jire. Duhu payo tuhsu, puhtoā ya suhti barore tĳore sāa, payu tahari tiro cahacāi sūruca, ō sehe ni bujuperi jire tina:

³—Noano tagā. Judio masa puhtoro noano tagā —ni bujupere, Jesu wuh-duahi cĳā wĳari jire.

⁴Ā yoa pari turi Pilato judio masa cĳapū waha, tinare ō sehe ni yahure:

—Tuhoga musa. Ahrirore űaa buhiri mariahna. Ā jicu tīre musa masihtō cĳihtire musa cahai tĳore na tai tai nihi —nire tiro.

⁵To ā ni tuhsuchuta Jesu pota soro pisariro, puhtoā ya suhti barore sāariro, wuhui jĳiro wĳaa tare. To ā wĳaa tachu Pilato tinare ō sehe nire:

—űuga. Ahriro tjira tiro —nire Pilato.

⁶To ā ni tuhsuchu tuhoa, sacerdotea puhtoā, Cohamacu wuhu cohtaina surara cūhu Jesure űua, sañurucure:

—Crusapu cĳā puĳa wajāga tĳore. Crusapu cĳā puĳa wajāga tĳore —ni sañurucure tina.

—Tĳore ne űaa buhiri mariahna. Ā jina musa basita tĳore naaga. Ā jina musata tĳore crusapu cĳā puĳa wajāga —nire Pilato tinare.

⁷—Tiro to basi “Cohamacu macuno jĳa”, nia tĳire. Tĳire to ā nichu sā dutia sehe tĳore wajā dutira —nire tina Pilatore.

⁸Ti ā nichu tuĳoro tō pano to cuiriro yuhdoro cuia wahare Pilato sehe.

⁹Ā jiro pari turi to wuhupure majare sāa, Jesure ō sehe ni sinituri jire tjōa:

—¿Noho macariro jijari muhu? —niri jire Pilato Jesure.

To ã ni sinitupachuta Jesu tirore yuhtierari jire.

¹⁰To ã yuhtierachu ñano Pilato tirore ò sehe ni sinitu namori jire:

—¿Yuhure yuhtierajari muhu? Yuhu muhure peresui jirirore wio masija. Ñ yoa muhure crusapu cã puha wajã duti masija yuhu. ¿Tíre masierajari muhu? —niri jire Pilato Jesure.

¹¹—Cohamacu muhure to dutierachu yuhure ñano yoaape dutieraboa muhu. Yuhure ñu tuhtiinare ñoriro sehe mu yuhdoro ñano buhiri tira —niri jire Jesu Pilatore.

¹²To ã nichu tuhoro Pilato sehe tirore wio duari jimare. To ã wio duapachuta pari turi judio masa ò sehe ni sañurucure:

—Jesu “Puhtoro jija” nino, mari jipihtina bui puhtoro jirirore Roma macariroro ñu tuhtiriro jira tiro. Ñ jicu tirore wocu muhu cùhu mari bui puhtoro jirirore ñu tuhtiriro jiihca —ni sañurucure judio masa Pilatore.

¹³Ti ã nichu tuhoro Jesure wuhui jirirore na wijaa ta, buhiri dahre dutiro taro to dujiri pahtai nuju sure Pilato sehe. Tói to buhiri dahre dutiri wapa, tãa mehne ti yoari wapa judio masa sã ya mehne Gabatã wama tire. ¹⁴Tí dacho pascua dacho bose numu sã chuhti cjihtire sã cañnoriro dacho jire. Tí pjare cohari pja waro jire. Nuju su tuhsu Pilato masare ò sehe ni yahure:

—Ahriro tjira musa puhtoro —nire tiro.

¹⁵To ã nichu tuhoa judio masa ò sehe ni sañurucure:

—Yariajaro tiro. Yariajaro tiro. Crusapu cã puha wajãga tirore —ni sañurucure tina.

—¿Musa puhtoro to jipachuta tirore crusapu cã puha wajã dutijari musa? —nire Pilato.

To ã nichu tuhoa ò sehe ni yuhtire sacerdotia puhtoa:

—Mari jipihtina bui puhtoro Roma macarirota sã puhtoro jira. Pairo puhtoro sãre mariaha —ni yuhtire sacerdotia puhtoa.

¹⁶Ti ã ni durucuri baharo Pilato Jesure crusapu cã puha wajã dutiro, tirore ware tinare, tirore wajãhtinare.

Jesure cã puha wajãha tina

(Mt 27.32-44; Mr 15.21-32; Lc 23.26-43)

¹⁷Ñ jia tina Jesure naa wijaaare. Ti naa wijaaachu Jesu sehe to crusare to basi wua naa, dapu cohã wama tiropu sure. Sã judio masa ya mehne dapu cohã Gólgota wama tire. ¹⁸Tópua sua tina Jesure cã puha òre. Tuhsu, paina puarore cüiro to poto buhusehei, paio to cõ buhusehei cã puha dapore tina. Ñ jiro Jesu ti dacho macai jire. ¹⁹Ti cã puha tuhsuchu, Pilato taboa pjine joa, Jesure ti cã puha òri crusai cã puha ò dutire tí pjine. Ò sehe ni joare tiro: “Ahriro Jesu Nazare macariro, judio masa bui puhtoro jira”, ni joare Pilato tí pjine. ²⁰Tí pjine joaro judio masa ya dusero mehne, Roma macaina ya dusero mehne, griego masa ya dusero mehne joare tiro. Ñ yoa Jesure crusapu ti cã puha daporiro maca cahacã jire. Tó cahacã jiina payu judio masa Pilato joarire ñu, buhere. ²¹Ñ buhe tuhsu judio masa sã sacerdotia puhtoa ò sehe nire Pilatore:

—“Ahriro judio masa puhtoro jira”, ni joai tjiga. Sã puhtoro jierara ahriro. Ñ jicu ò sehe ni joa cañnoga muhu. “Ahriro ‘Judio masa puhtoro jija’, ni

cüirota to basita ā ni tūhoturiro jira”, ni joa cahnoga —nire sacerdotea puhtoa.

²²—Yū joa muhtariro seheta jirohca —nire Pilato tinare.

²³Jesure ti cǵa puhari baharo pititiaro surara sehe Jesu suhtire ti basi witire. Ti ā witi duapachuta cū suhtirota yoari suhtiro dohori marieni suhtiro jire. Tí suhtiro suhari suhtiro jire. ²⁴Tí suhtiro to ā jichū ō sehe nire tina ti basi:

—Ahri suhtirore tūhrēna tjijihna. Ahri suhtirore nahtiro cjihtore masi duana, docapejihna mari —nire tina ti basi.

Ā docapea, Cohamacu yare ti joari tjui ti ni joariro seheta yoaa nire tina. “Yū suhtire tina ti basi witire. Ā jia yū suhtire nahtiro cjihtore masi duaa, docapere tina”, ni joa tiha Cohamacu yare ti joari tjui. To ā ni joariro seheta ā yoaa nire tina.

²⁵Surara ti ā yoachū Jesu pocoro, Jesu muono, María Cleofa namono, María Magdalena mehne Jesu crusa cahacāi nūrucure tina. ²⁶Ā jiro to pocoro yūhū to cahīriro cūhū to cahacāi sā ducuchū nūno to pocorore ō sehe ni yahure Jesu:

—Mipure ahriro mu macu cjihto jira —nire Jesu to pocorore.

²⁷Ā ni tuhsū, yūhure ō sehe ni yahure tiro:

—Mipure ahricoro mu poco cjihto jira —nire Jesu yūhure.

To ā niri baharo Jesu pocorore yū ya wūhupū ji dutii.

Jesu yariaa wahaha

(Mt 27.45-56; Mr 15.33-41; Lc 23.44-49)

²⁸To ā ni yahuri baharo ō sehe ni tūhotu masiri jire Jesu: “Jipihtia Cohamacu yūhure dahra dutiro to cūrire yoa pahñohi”, ni tūhotu masiri jire Jesu. Ā masino Cohamacu yare ti joari tjui to ni yahuriro seheta ō sehe nire Jesu:

—Ñahma yapioca yūhure —nire Jesu.

²⁹Ā yoa tói vino suēa core posa tiri situ dujire. Ā jiro tói jiriro wiłmi nari suhtere suēa co mehne ti sohari suhtere yucucu hisopo wama tidu sohtoai duhte ōre. Duhte ō tuhsū, Jesu duseroi siō mao, siō ōre. ³⁰Tí core Jesu wiłmi tuhsū ō sehe nire:

—Tó puro tjica —ninota to dapure muhriraca, joja sū, yariaa wahare.

Surara Jesu patipahma batoī ñosaha ñosadu mehne

³¹Tí dacho pascua bose numū pano jire. Tí bose numū macaare sā chuhti cjihtire sā cahnori numū jire. Ā jia pa dacho Sabado jichū tí bose numū jichū crusaripu ti wajārinare cū duaerare judio masa. Tí dacho Cohamacure ti ño payori dacho bose numū jire. Ā jia tí dachoi ti cǵa puharina cjiire crusapu ti jichū cahmaerare tina. Ā jia ti cǵa puharina cjiire ti ñuchua cohārine cǵa nuha dutia taa judio masa siniha Pilatore, ti yaria murocahto cjihto sehe. Ti ā yoari baharo ti pjacuri cjiire na boro bahrañoa taa nire. ³²Ti ā dutichū surara sehe crusari cahapu sū, cūiro yacariro cjiro ñuchua cohārine cǵa nuhare. Pairo cūhure āta yoare tina. ³³Ā jia Jesu ñuchua cohārine cǵa nuha tamaa, to yariariro jichū ñua, cǵa nuhaerare.

³⁴Ā cǵa nuhaeraa cūiro surara to patipahma batoī ñosadu mehne ñosare. To ā ñosachu dóihta to di, co mehne wijaa. ³⁵To ā wahachu ñui yūhū. Yūhū

ahri tjure joariro musare potocã yahuja. Potocã yu yahua jichu masija yuhu. Musare yahuja musa cûhu Jesure musa wacû tuahto sehe. ³⁶Cohamacu yare ti joari tju to niriro seheta ã wahare: “To cohârine ne cû cohâre cã nuhaerare”, to ni joariro seheta Jesu ñuchua cohârine ne cû cohâre cã nuhaerare. ³⁷Å yoa pa tju Cohamacu yare ti joari tjui õ sehe nina: “Tirore ti ñosariro cjirore ñuahca tina”, ni joaa tiha Cohamacu yare ti joari tjui.

Jesu pjacure masa copapu cûha

(Mt 27.57-61; Mr 15.42-47; Lc 23.50-56)

³⁸To yariari baharo José Arimatea macariro Jesu pjacu cjirore na bororo taro, Pilatore siniri jire. José sehe paina judio masare cuirio, Jesure wacû tuariro to jiare yahu duaerari jire. To pjacu cjirore to siniri baharo Pilato sehe to pjacure naa dutiri jire. To ã na dutichu José crusa cahai su, Jesu pjacu cjirore naa wahari jire. ³⁹Nicodemo cûhu me sitiare yucucu di pohca, mirra wama tia me sitia yucucu pohca mehne dahra moreare na tari jire. Jesu pjacu cjirore masa copapu ti siõ sãahto pano ti cahnohti jiri jire tí me sitia. Ti na tari cjiri treinta kilo nûcûri jire. Nicodemo sohõ jiri pja Jesu mehne to coã durucuri pja ñamipu Jesu cahai suriro jiri jire. ⁴⁰Å jia tina puaro Jesu pjacu cjirore naa, judio masa sã yariainare sã yoarucuriro seheta to pjacu cjirore me sitia mehne suhtiro cahsaro mehne wahmari jire. ⁴¹Crusapu Jesure ti wajãno cahai wese jire. Tí wesepe masa copa tãcapu wahma ti sahari copa jire. Tí copai ne yariariro cjirore siõ sãaerasinire. ⁴²Pascua dacho bose numui judio masa sã bose numui sã chuhti cjihtire sã cahnorio dacho jire. To ã jiri dacho jichu tí copa cahacã to crusa jichu, tói siõ sãari jire tina Jesu pjacu cjirore.

Jesu masa wijaaha

(Mt 28.1-10; Mr 16.1-8; Lc 24.1-12)

20 ¹Domingo ñami curero jichu, bohreahto panocã María Magdalena Jesu masa copapu suri jire. Tópu suro tí copare ti tju bihari tãcare ti pjõo cûria tãcare ñuri jire ticoro. ²Å ñuricoro jiro sã cahapu mûrocaa tare ticoro. Simo Pedro mehne yuhu sã puaro jii. Wihi, õ sehe ni yahure sãre ticoro:

—Mari puhtoro pjacu cjirore naanocari jihre. Å jina tiro cjirore ti cûrire mari masieraja —nire ticoro sãre.

³To ã nichu tuhona, Pedro mehne masa copapu ñuna wahai sã. ⁴Å ñuna wahana sã puaro mûroca wahcã. Å mûrocana, yuhu Pedre mûroca yuhdu wahcãcû masa copapu su muhtai. ⁵Tópu sucû muhri caha ñuroca sõi tí copapure. Muhri caha ñuroca sôcu tirore ti wahmari suhtiro cjiro dihtare ñui. Å jii tí copare sãaerahi. ⁶Yu ã ñuri baharopu Simo Pedro yu baharo wihire. Wihi, masa copapu sãa, to pjacu cjirore ti wahmari suhtiro cjirore ñure tiro. ⁷Jesu dapure ti wahmari cahsaro cûhure ñure tjoa. Tí cahsaro soro coãno to turêri cahsaro jire. ⁸Å jicu yuhu cûhu masa copapu su muhtariro tí copapu sãai. Jesure to ã mariachu ñucu “Potocãta Jesu masa wijaari jira”, ni tuhotui yuhu. ⁹Tí copapu sã wahahto pano Cohamacu yare ti joari tjui Cristo to yariahtore yahurire, to masa wijaahatore yahuri cûhure sã noano tuho ñahaerasinimai. Tí copare yu ñuri baharo, “Potocãta Jesu masa wijaari jira”, ni tuhotui yuhu. ¹⁰Å ñu tuhsuna sã wuhusepu tjuaa wahai.

Jesu María Magdalenare bajuaha

(Mr 16.9-11)

¹¹ Ñ yoa masa copapũ María majare tjua ta tí copa sopacapũ wihi, ducuro, tiiro niri jire. Ñ tiiparota ticoro muhri caha ñuroca sōri jire masa copapũre. ¹² Ñ ñuroca sōno puaro anjoare, yehsea suhti tiinare Jesu cjiro to coãriro cjiropũ ti dujichũ ñuri jire ticoro. Cũiro to dapu coãriro cjiroi dujiri jire. Pairo to dahpori coãriro cjiroi dujiri jire. ¹³ Tinare to ñuchũ tina sehe ticorore ò sehe ni sinituri jire:

—Numino, ¿dohse jiro baro tiico nijari muhũ? —niri jire tina.

—Yũ puhtoro pjacũ cjirore naanocari jihre. Ñ jico to pjacũ cjirore ti cūrire masieraja yuhũ —niri jire ticoro.

¹⁴ Ñ ni tuhsũ, majarerucũ sumahno Jesure tói ducurirore ñuri jire ticoro. Ñ ñuparota Jesure ñu masierari jire ticoro.

¹⁵ —Numino, ¿dohse jiro baro tiico nijari muhũ? ¿Noare macaco nijari? —niri jire Jesu ticorore.

“Ahriro ahri wesere ñu wihboriro jira”, ni tuhotumari jire ticoro Jesure. Ñ ni tuhoturo, ò sehe niri jire ticoro:

—Muhuta to pjacũ cjirore naariro jicu to pjacure mu cūrirore yahuga yuhure. Mu yahuri baharo to pjacũ cjirore naaco wahacohtja —niri jire ticoro tirore.

¹⁶ To ñ niri baharo Jesu ò sehe niri jire:

—María —niri jire.

To ñ ni pisuchũ tuhoru majare ñuroca, ticoro hebreo ya mehne sã judio masa ya mehne ò sehe niri jire:

—Raboni —niri jire ticoro Jesure. (Raboni nino “Buheriro”, nino nina.)

¹⁷ —Yũ Pucũ cahapũ mujaerasinija yuhũ. Yũ ñ mujaerasinichũ yuhure ñahaeco tjiga. Tuhsũ, paina yũ yaina cahapũ wahaga. Ti cahapũ suco ò sehe ni yahuga tinare: “ ‘Yũ Pucũ cahapũ wahai tai nija. Musa Pucũ cūhũ jira tiro. Yũ yairo Cohamacũ cahapũ wahai tai nija. Musa yairo Cohamacũ cūhũ jira tiro’, nihre Jesu”, ni yahuga tinare —niri jire Jesu Mariare.

¹⁸ To ñ niri baharo María Magdalena sã Jesu buheina cahapũ wihi, yahure sãre:

—Mari puhtorore ñuhi yuhũ —ni, Jesu ticorore to yahu dutirire yahure sãre ticoro.

Jesu to buheinare bajuaha

(Mt 28.16-20; Mr 16.14-18; Lc 24.36-49)

¹⁹ Tí dacho domingoi ñamichahai sã Jesu buheina sã coyea judio masare cuina, wuhupũ biha sãa, dujii sã. Sã ñ dujichũ Jesu sã watoi bajuarucũ suro, sãre ò sehe nire:

—¿Jimajari musa? Noano jiga musa —nire.

²⁰ Ñ ni tuhsũ, to wamomacarine, to patipahma bato cūhure sãre ñore. Ñ jina sã tirore sã puhtorore ñuna, wahchei. ²¹ Pari turi Jesu sãre ò sehe nire:

—Noano jiga musa. Yũ Pucũ yuhure to warocariro seheta, musa cūhure yũ ya buheare buhehtinare warocaja —nire Jesu sãre.

²² Ñ ni tuhsũ tiro sãre puti sãare. Ñ puti sãano Espíritu Santo sãre to sãarucũ su mua wahahtore ñono nire sãre. Ño tuhsũ ò sehe nire:

—Mipɔ Espíritu Santore ñahaga mɔsa, mɔsa mehne jihtirore. ²³Paina ti ñaa yoirire mɔsa boerachu, áta jiahca. Á jia paina ti ñaa yoirire mɔsa boerachu tí bori jisi —nire Jesu säre to buheinare.

Jesure masa wijaarirore Toma ñuħa

²⁴Jesu sã watoi to bajuachu Toma suhduariro ti ni pisuriro sã mehne mariaħre.

²⁵To ā mariachu sã mehne macaina tirore yahumare:

—Mari puhtorore sã ñuħi —ni yahumai sã Tomare.

Sã ā ni yahupachuta ō seħe nire Toma:

—To wamomacarine ti cã puħaa coparire ñuħeracu tí coparire yu wamo pica mehne be ñuħeracu, “Potocãta masa wijaari jira”, nisi yuħu. Á yoa to patipahma batoi jiri copare yu wamomaca mehne siō sōeracu, “Potocãta masa wijaari jira”, nisi yuħu tirore —nire Toma.

²⁶Ocho dachori baharo pari turi sã to buheina sã wuħupu jii. Tí pjare Toma sã mehne jire juna. Tí wuħu bihari wuħu jire. Bihari wuħu to jipachuta Jesu wuħupu sãa taro, sã watoi bajuaru cu sũro ō seħe nire:

—¿Jimajari mɔsa? Noano jiga —nire.

²⁷Á ni tuhsu, tiro Tomare ō seħe ni yuħure:

—Ñuħa yu wamomacarine. Á yoa mu wamo pica mehne yu wamomacarine ti cã puħaa coparire be ñuħa. Tuhsu, mu wamomaca mehne yu patipahma batoi jiri copare siō sō ñuħa. “Potocã jierara”, nii tjiga. “Potocã tjira”, niga muħu, —nire Jesu Tomare.

²⁸To ā niri baharo Toma ō seħe ni yuħtire:

—Muħu yu puhtoro jira. Muħu yu yairo Cohamacu jira —nire Toma Jesure juna.

²⁹—Yuħure mu ñuħi baharo yuħure wacũ tuara muħu. Paina seħe yuħure ñuħerapahta yuħure wacũ tuaahca. Á jia tina mu yuħdoro wahcheahca —nire Jesu Tomare.

Jesure masa ti masihtĩ cjihtire aħri tjure joaha João

³⁰Á yoa payu paye cũħure Cohamacu to tuua mehne yoa ñore Jesu sã mehne jiro. Tíre to yoirire aħri tjui joa pahñoerati yuħu. ³¹Á joa pahñoerapaita aħri tjui yu yuħare joahi “Jesuta Cristo Cohamacu to warocariro jira. Tiro potocãta Cohamacu macũno jira”, mɔsa ni masihtĩ cjihtire. Á jina mɔsa tirore wacũ tuaina Cohamacu mehne mɔsa ā jirucuhti cjihtire joahi aħri tjure.

Jesu siete to buheinare bajuaha

21 ¹Baharo Tiberia wama tiri bucupariro duħtu cahai säre to buheinare Jesu pari turi bajuare tjoa. Säre bajuaro ō seħe yoare tiro tjoa. ²Simo Pedro, Toma suhduariro ti niri, Natanae Galilea yahpai jiri maca Caná wama tiri maca macariro, Zebedeo pohna sã puaro, paina puaro buheina sã ōpeinata cahmachui.

³Sã ā cahmachuri baharo Simo Pedro säre ō seħe nire:

—Wahi wajāi wahai nija —nire tiro.

—Sã cũħu muħu mehne wanahtja —nii sã tirore.

Ā ni tuhsu buhaa wahai. Ā jina dohoria mehne wahai. Wiho mejeta tí ñamine sã noano maca bohreapanahta ne cüiro wahi wajäerahi. ⁴Bohrea parĩ cahachu Jesu paduroi to ducuchu tirore ñumai sã. Ā ñupanahta tirore “Jesu jira”, ni ñu masierahi sã. ⁵Ā jiro sãre tiro ò sehe ni siniture:

—¿Ne, wahi wajäri musa? —nire Jesu.

—Ne wajäeraputiati sã —ni yuhtii sã.

⁶—Dohoria poto buhusehe sehe doca ñoga. Tie sehe doca ñona wahi wajä-nahca musa —nire sãre.

To ā nichu tuhona sã to niroihta doca ñoi. Sã doca ño tuhsuchu payu wahi sãare. Payu wahi sãachu wañunore dohoriapu waja sãana bihoerahi sã.

⁷Ā jicu yuhu Jesu cahĩro Pedore ò sehe ni yahui:

—Mari puhtorota jira siro paduroi ducuriro —nii Pedore.

Yu ā nichu tuhoro Jesuta to jichu masino, Simo Pedro to suhtirore sãare. Wahi wajäno taro to suhtirore tjuweriro jisinare. To suhtirore sãa tuhsu, diapũ pjuroca ñojare. ⁸Sã paina buheina dohoriari jina, cien metro yoaro diapure pahsa sã. Ā jina wañunore wahi payu sãadure dohoria mehne waja nujai sã. ⁹Duhtu cahai wahã suna pichaca niti dihta si coãri pichaca bui Jesu to puhõ cürirore wahire ñui sã. Pão cühure ñui sã.

¹⁰Sã ā ñuchu ñuno Jesu sãre ò sehe nire:

—Michapucacã musa wajärinare mahainacã na tahga —nire sãre.

¹¹To ā nichu Simo Pedro sehe Jesu mehne jiriro dohoriapu samu, wañunore, bujuina wahi ciento cincuenta y tres wahi sãadure waja majare. Payu wahi sãapahta wañunore tuhrẽrare.

¹²—Chusinina taga —nire Jesu sãre.

“¿Noa baro jijari muhu?” ni sinitu ñuerahi sã tirore. Sã puhtoro to jichu masii sã. ¹³Ā yoa Jesu pichaca cahapu suro, pãore na, sãre witire. Wahi cühure witire.

¹⁴Ā jiro Jesu to masa wijaari baharo paduroi bajuaro tia taha sãre to buheinare bajuaro nire.

Jesu Simo Pedro mehne suhuduha

¹⁵Sã churi baharo Jesu Simo Pedrore ò sehe ni siniture:

—Simo Jona macuno, çahrinare mu cahĩro yuhdoro yuhure cahijari muhu? —nire Simo Pedrore.

—Puhtoro, muhure cahija yuhu. Muhure yu cahĩchu masina muhu —ni yuhtire Simo Pedro.

—Ā jicu ovejacãre ti nuriro seheta yu yainare buhega muhu —nire Jesu.

¹⁶Ā ni tuhsu pari turi tiro Simo Pedrore ò sehe ni siniture:

—Simo Jona macuno, çyuhure cahijari muhu? —nire Jesu.

—Puhtoro, muhure cahija yuhu. Muhure yu cahĩchu masina muhu —ni yuhtire Simo Pedro.

—Ovejare ñu wihboriro ovejare to noano ñu wihboriro seheta, yu yainare noano buhe ñu wihboga —nire Jesu Pedrore.

¹⁷Ā ni tuhsu pari turi tiro Simo Pedrore ò sehe ni siniture:

—Simo Jona macuno, çpotocãta yuhure cahijari muhu? —nire Jesu tjao.

Tia taha ā ni to sinituchu tuhoro Simo Pedro tuaro cahyare.

—Puhtoro, muhu masi pahñaona. Muhure yu cahĩchu masina muhu —ni yuhtire Simo Pedro.

—Ovejare ti nuriro seheta yu yainare buhega muhu. ¹⁸ Potocā muhare niita nija. Mihu wahmuno jicu mu suhtire sāa, mu cahmariropu tinia tiri jire muhu. Ā jiricu mu jipachuta baharo mu bucuro jichu, mu wamomacarine mu siōrocachu paio muhare suhtire sāanohca. Tuhsu, mu waha duaeraropu muhare naanohca —nire Jesu Simo Pedore.

¹⁹ Ā nino Simo Pedore dohse waha to variahtore yahuro nire. Ā jiro Simo Pedro yariaro Cohamacure “Noariro, masi pahñoriro jira”, masa ti nichu to yoahore yahuro nire Jesu. Ā Pedro mehne suhadu tuhsuro ō sehe ni namore Jesu tirore:

—Quihōno yu buheriro seheta yoaga muhu —nire Jesu Pedore.

Jesu to cahīriro buheriro ahri tjure joariro jira

²⁰ To ā nichuta Pedro sehe majare nuroca, yuhare Joāore Jesu to cahīriro buherirore tinare yu nuna tichu nuno Pedro Jesure siniture. Yuhu sehe to nūriro tó pano ō sehe niriro jii: “Puhtoro, μmuhare nū tuhtiinare ñohtiro sehe diro baro jicari tiro?” ni, Jesure sinitu nūriro jii yuhu. Tí pjare Jesu to pari wahpa chu dujii yuhu sehe. ²¹ Ā jiro yuhare nuno Pedro Jesure ō sehe ni siniture:

—Puhtoro, ¿ahriro sehe dohse waharohcari? —ni siniture.

²² —Tíre muhare yahueraja. Ahri yahpapu yu tjua tahto pano ahrirore jirucuchu yu yoachu tíre masierara muhu. Ā jicu muhare yahueraja. Quihōno yu buheriro seheta yoaga muhu —nire Jesu Pedore.

²³ Tíre to yahurire jipihtina Jesu yaina ti basi yahu sitemare. Tíre yahu sitea ō sehe nimare tina sehe: “Jesu to cahīriro buheriro yariasi”, ni yahu sitemare yuhare Jesu yaina ti basi. Ti ā nipachuta “Tiro yariasi”, nino nierari jimare Jesu. “Ahri yahpapu yu tjua tahto pano ahrirore jirucuchu yu yoachu tíre masierara muhu. Ā jicu muhare yahueraja”, nire Jesu Pedore.

²⁴ Jesu buheriro ahrire yahuriro, ahri tjure joariro jira yuhu. Ā jina ahri yu yahua quihōno jichu masija mari.

²⁵ Payu paye cūhare Jesu yoare. To yoarire mari joa pahñochu tí tjuri joaa tjuri payubia wahaboa. Ā jia tí tjurire mari wihbochu mu sueraboa ahri yahpa. Wahpaa yuhdua wahaboa, yu tuhutuchu. Tó puro tjira.

Hechos

“Espíritu Santo tarohca”, niha ahri tjure joariro

1 ¹⁻² Teofilo, ahri quitire muhare joarocai nija. Pano yu joa muhtari püre Jesu to yoaare, to buheare muhare yahu tuhsui. Pu manopu to mujarire yahu batoai. To mujahito pano Jesu Espíritu Santo mehne dutiha to bese cūrinare. ³ Ñ yoa Jesu crusapu to yariari baharo payu tahari pjacu tiroto bajua mujaha to cūrinare, tina “Potocāta tiro catira”, ti ni masihto sehe. Cuarenta dachori waro tiro bajua mujaha tinare. Ñ bajuaro tiro to basi to catiriro jiare ñono niha tinare. Ñ bajuaro puhtoro Cohamacu to suho jiare yahuha tinare.

⁴ Jesu to cūrina mehne jisiningo tinare ñ sehe ni yahuha:

—Jerusalēita jisininga mipure. “Espíritu Santore musare warocaihtja”, yu Pucu to nirirore cohtasiniga. Tíre to nirire musare yahui yuhu. ⁵ João musare bautisaro co mehne yoamare. Yuhu sehe tí yuhdoro yoihtja musare. Maha dachoricā baharo yuhu sehe Espíritu Santore musa mehne jirucucha yoihtja musare —niha Jesu.

Jesu manopu mujaa wahaha

⁶ Ñ yoa tina tūcu Olivo wama tidupu Jesu mehne cahmachuina sehe ñ sehe ni sinitu ñuha tirore:

—Puhtoro, ¿mipure säre Israe yahpare pari turi cū, mari coyea warore puhto sōihcari muhu? —ni sinitu ñuha to yaina.

⁷ Ti ñ nichu tuhoro Jesu ñ sehe niha:

—Musa puhto sāahti pjare yahu quihōriro, ñ wahachu yoariro yu Pucu dihta jira. Musa sehere tíre ne masihto basioerara. ⁸ Wiho mejeta musare Espíritu Santo to wihichu Cohamacu ya masiare cjuanahca musa. Tí masiare musa cjuana Jerusalē macainare, jipihtina Judea yahpa macainare, Samaria yahpa macainare, ñ yoa jipihtina ahri dacho mu sūro macainare noaa buheare buhenahca musa. Yu yariarire, yu masa mujarire tinare buhenahca musa —ni yahuha Jesu tinare.

⁹ To ñ ni tuhsuri baharota, Cohamacu Jesure manopu mujachu yoaha juna. Tina tirore ti ñu ñunu muochuta me curua watopu sāa, buti mujaa wahaha. ¹⁰ To ñ buti mujari baharota tina Jesu to mujarirore ti ñu muono watoi puaro anjoa yehsea suhti tiina Jesu to cūrina watoi bajuaru suha.

¹¹ Ñ bajuaru su, tinare ñ sehe niha:

—Musa Galilea macaina, ¿dohse jiro baro ñu muorucuna nijari musa? Ahriro Jesu, musa mehne jiriro cjirota, Cohamacu manopu to mujachu

yoarirota, mipure to mujachu musa ñariro seheta, pari turi duji tarohca tjoa —ni yahuha anjoa tinare.

Jesu to cūrina Juda cjirore cohtotahtirore beseha

¹² Ñ yoa Jesu yaina tūcu Olivo wama tidupū jiina duji taa, Jerusalēpu tju suha. Tu tūcu cū kilómetro bui curero yoaro jira Jerusalē duhtu cahapure.

¹³ Tju su, tina muanopu ti jiri tahtiapu mujaa wahaha. Ahrina jiha: Pedro, João, Santiago, Andre, Felipe, Toma, Bartolomé, Mateo, Santiago, Simo, Juda jiha. Santiago sehe Alfeo macuno jiha. Simo sehe cananista wama tiri curua macariro jimaha. Juda sehe Santiago macuno jiha. ¹⁴ Payu tahari ahrina jipih-tina, to cūrina, ã jichu numia, María Jesu pocoro, ã yoa Jesu bahana mehne cūhu noano cahmachu, Cohamacure ã sinirucua tiha.

¹⁵ Ñ yoa tí dachorire masa payu cahmachuha. Ciento y veinte jia jiboa. Ñ jiro Pedro sehe tiro mehne macaina Cristo yaina watoi ducu, ñ sehe ni yahuha tinare:

¹⁶ —Yu coyea, Cohamacu panopu to niriro seheta ã waharo nihre. Tíre Espíritu Santo Davi cjirore yahu dutiha Juda cjirore. Juda cjiro Jesure ñahah-tinare ñoriro jihre. ¹⁷ Ñ yoahtiro jiparota mari mehne Jesu yare yoariro jimahre. Ñ jiro sã mehne macarirota jimahre —niha Pedro.

¹⁸ Juda cjiro sehe Jesure ño dutia ti waparire to wiari baharo to basita wajã yariaha. Ñ yoaro bora waha, to tu misida tuhnuu waha, yariaa wahaha. To wiari cjiri mehne paina mahanocã yahpare nuchuha. ¹⁹ Jipihtina Jerusalē macaina masi pihtinocari jire Juda cjiro to ñano yoarire. Ñ masia ti ya dusero mehne to ññeru mehne ti nuchuri yahpa cjirore Acéldama wamoari jire. Acéldama nia, “Di yahpa”, nia nina. ²⁰ Baharo ñ sehe ni namoha Pedro:

—Panopu to joariro seheta ã wahahre Juda cjiro. Salmo to joari tjuí ñ sehe ni joaa tiha:

“Tiro to jiri wuhu masa marieni wuhu tjuarohca.

Ne noa jisi tí wuhure”,

ni joaa tiha. Ñ cūhure ñ sehe ni joaa tiha:

“Pairo to dahraa cjirore cohtotariro jirohca”,

ni joaa tiha Salmopu.

²¹⁻²² Ñ jina mari cūiro besejihna. João masare bautisariro cjiro masare to buhero watoi caina Jesu yaina mari mehne wahare. Tina mehne macarirore cūiro bese nano cahmana mari mehne macariro cjihto. Jesu mehne mari jichu mari mehne ã jirucurirore besero cahmana. Ñ mari beseri baharo Jesu to masa mujarire mari mehne buherohca —ni yahuha Pedro to coyeare Cristo yainare.

²³ To ã nichu tuhoa puarore bese dapoha tina. Cūiro José Justo wama tiriore beseha. Tiro Barsaba ti ni pisuriro jiha. Bese tuhsu, pairore Matia wama tiriore beseha. ²⁴⁻²⁵ Tinare bese dapo tuhsu, tina Cohamacure ñ sehe ni siniha:

—Muhu sã puhtoro jipihtina masa ti tuhoutuare masina. Ahrina puaro sã beseina jira. Juda cjirore cohtotahtirore diro mu cahmarirore besega. Jesure cohâtjiähno Juda cjiro sehe pichacapu wahaha. Tirore cohtotahtiro Jesu to cūiro jirohca. Ñ jiro sã mehne noaa buheare buherohca —ni siniha tina Cohamacure.

²⁶ Ñ niata tãa mehne doca mujaha besea taa. Matia yaro to noano quihõno wijachu, tiro sehe Jesu to cûrina once cûrina mehne macariro tjuaha.

Espíritu Santo Jesu yaina mehne ji ducaha

2 ¹ Ñ yoa Pentecoste wama tiri dacho jichu tina jipihtina cû wuhui cahmachuha. ² Tí pjareta wihnono to tuaro taro seheta muanopu bisiro coa taha. To ã bisiro coa tachu tuhoha jipihtina tí wuhupu jiina. ³ Ñ yoa picha pohna yoaro sehe jia tina jipihtina dapu poca bui bajuaha. Tí picha pohnaricã ñahmanoricã yoaro sehe bajuha. ⁴ Ñ yoa Espíritu Santo tinapure sãarucu sua wahaha. Tinapure to sãarucu sua wahachu, paina ya durucuaire to durucuchu yoaa mehne tina sehe paina ya durucuaire noano durucuha.

⁵ Tí dachorire Jerusalëpu payu judio masa, cû curua macaina masa jipahta, paró paye yahpari macaina jiha. Cohamacure ño payoina jiha. ⁶ Ñ yoa muanopu coa tachu tuhoa tina Jesu buheina cahapu payu cahmachu wahcãha. Cahmachuina masape ya durucuaire Jesu buheina ti durucu pahñochu tuhoa, tina tuho cuaa wahaha.

⁷⁻⁸ —Cuenah. ¿Dohse yoaa ahrina Galilea macaina jipahta mari ya durucuaire noano durucujari? Tina mari ya yahpapu taina yoaro seheta durucua nina —niha tina sehe.

⁹⁻¹⁰ —Jipihtina mari durucuaire mipure durucua nina: Ñpe yahpari macaina mari õre cahmachuina jija: Partia macaina, Media macaina, Elam macaina, Mesopotamia macaina, Judea macaina, Capadocia macaina, Ponto macaina, Asia macaina, Frigia macaina, Panfilia macaina, Egipto macaina, Libia yahpai Cirene cahapu jiina, Romapu taina jija mari. Cãina judio masa waro jija mari. Paina judio masa dojoina jija mari. ¹¹ Creta macaina cûhu, Arabia macaina cûhu jira mari mehne. Mari payu paró macaina soro durucua tiina mari jipanata ahrina sehe mari masape curuari macaina durucuaire ti durucuchu tuhoja mari. Tina mari ya durucua mehne Cohamacu tuaa mehne to yoirire yahua nina —ni durucuha masa ti basi.

¹² Ñ niata tina cuaa waha, ti ñuri cûhure ti tuhori cûhure noano tuho ñahaeraha.

—¿Ahrina dohse jiro baro paina ya mehne Cohamacu yare ã noano durucujari, musa tuhotuchu? —ni cahma sinitu ñuha tina ti basi.

¹³ Wiho mejeta paina Jesu yaina ti durucuchu tuhoina mehne macaina sehe tinare õ sehe ni bujupeha:

—¿Dohse ahrina sihbiõri sihni cahaa nijari? —ni bujupeha paina tinare Jesu yainare.

Pedro masare yahuha

¹⁴ Ñ jiro Pedro once Jesu to cûrina mehne wahcãrucu su, tuaro durucutjiãhno masare õ sehe ni yahuha:

—Musa Judea yahpa macaina, jipihtina Jerusalëpu jiina, ahrire masiga musa. Yu yahuchu tuhoga musa. ¹⁵ Musa tuhotua quihõno jierara. Nueve hora jira miputa. Mari chu sihnini hora jierasínica. Ñ jia ahrina cahaina jierara. ¹⁶ Ahrina Cohamacu panopu to niriro seheta yoaa nina. Tí pjapure Joere Cohamacu yare yahu muhtariro cjiõre, ahrire yahu dutia tiha Cohamacu sehe:

17 “Sohtori tia dachori jichu õ sehe jirohca: ‘Yu yairo Espiriture masare jipihitinare warocaihtja.

Ã jia masa pohnapu yu yare yahuahca.

Ã yoa masa mehne macaina wahma yapia bajuamehneare ñuahca.

Ã jia masa mehne macaina bucuna cahānopu cahāahca.

18 Å jicu yu cahamacare, muare, numia cūhure yu yairo Espiriture warocaihtja.

Ã jia tina yu yare yahuahca.

19 Tuhsu, yu tuaa mehne bajuamehneare yoa ñoihca muanopu.

Yahpapu cūhure yu bajuamehneare ñoihca: Dire, pichacare, mene ñoihca.

20 Tuhsu, sū dacho macariro nahitianore cohtotarohca.

Ñami macariro di yoaro sehe sohāriro cohtotarohca.

Õ sehe waharohca Cristo masa puhtoro to tahti dacho, yu niri dacho panoi.

Tí dachoi ñu cuaa wahaahca masa.

Ã jiro wiho jiri dacho jisi.

Tí dacho noari dacho jirohca.

21 Å jiro õ sehe jirohca.

Jipihitina masa Cristore ti ñaa buhirire cohā duti siniinare tiro tinare pichacapu wahaborinare yūhdorohca’, nina Cohamacu”,

ni joaha Joe.

22 ‘Musa Israe masa yu yahuchu tuhoga: Jesu Nazare macariro sehe Cohamacu to warocariro jihre. Jesure to warocarire masa ti masihtō sehe Jesu to Pucuro ya tuaa mehne yoa ñohre musare. Musa tíre masina. 23 Jesure wajā dutina judio masa jierainare wahre masa. Cohamacu panopu to cahmariro seheta, “Å waharohca”, to niriro seheta ã yohare. Å jina masa Jesure crusapu wajā dutihre Cohamacu dutiare cjuerainare. 24 Musa ã yoapachuta Cohamacu sehe Jesure yariariro cjirore masohre. Pari turi ne yariasi tiro. Tiro yaria dojaerara. Å catirucuhtiro jira. 25 Õ sehe nia tiha Davi cjiro panopu macariro Cristo to ni durucuboriro seheta:

“Yu puhtoro yuhu mehne jira muhu.

Jipihitia dachoripe Cohamacu yu puhtoro yu cahai mu jichu ñua tihi yu cuierahto sehe.

26-27 Muhu Cohamacu yuhure yariaina ti jiropure ne cohāsi.

Yuhure mu cahīrirore ñanopu cohāsi muhu.

Yuhu mu cahamacuno muhure ño payoriro jija.

Yu pjacure baa dutisi muhu.

Ã jicu tuaro wahcheja.

Wahchea mehne durucuja.

Å jicu muhure Cohamacure noano wacū tuariro jicu ñaa buhiri marieriro jicu cuiro marieno noano jinocaja.

28 Yuhure pari turi catichu yoaihca muhu.

Yuhu mehne mu jichu tuaro wahcheja”,

ni joaa tiha Davi cjiro Cristo to ni durucuboriro seheta.

29 ‘Coyea, õ sehe noano yahuihtja musare Davi cjirore mari coyeiro, panopu macarirore. Tiro yariaa wahaha. Å jiro tiro to masa copa mipure jisinina.

(Ã jiro “Yũ pjacũre baa dutisi muhũ”, ni joaro to basi wama payo yahuro nieraha.) ³⁰⁻³¹ Panopũ Cohamacũ Davi cjirore õ sehe niha: “Potocã nii nija. Mũ panamana ji turiaina mehne macariro mũ yoaro sehetã ahri yahpa macaina bui puhtoro jirohca”, nia tiha Cohamacũ Davi cjirore. Davi Cohamacũ yare yahu muhtariro cjiro jiha. Ã jiro Cristore Cohamacũ to puhto sõhtore masino, Cristo to masa mujahtore yahu muhta tuhsuha Davi sehe. Õ sehe niha: “Tiro yariaina ti jiropũre ji dojoasi. To pjacu tõi baasi”, nia tiha Davi cjiro. ³² Ahriro Jesureta Cohamacũ masohre. Sã jipihtina tirore ñũhi. ³³ Mipũre Cohamacũ poto buhusehepũ jira dutiriro jiro. Tõ panopũ to Pucũro “Espĩritu Santore mũ yainare warocaihtja”, to ni cũriro sehetã wari jire Jesure. Ã jiro Jesu sehe ahrinare Espĩritu Santore warocari jira. Ã jina mipũre Espĩritu to yoare musa ñũ, tuhona nina. ³⁴ Davi cjiro sehe Jesu to mujãro sehetã muanopũ mujaeraa tiha. Ã jiro tiro to basi õ sehe nia tiha:

“Cohamacũ õ sehe nire yũ puhtorore: ‘Yũ poto buhusehei dujiga muhũ.

³⁵ Muhũre ñũ tuhtiinare muhũre cũihtja mũ cahamaca yoaro sehe jihtinare’, nire Cohamacũ yũ puhtorore”,

nia tiha Davi cjiro.

³⁶ Ã jina jipihtina Israe masa ahrire noano masiga musa: Ahriro Jesure musa crusapũ wajãro cjirore musa puhtoro sõhre Cohamacũ sehe. Tirore musare yuhdohtirore Cristore cũre Cohamacũ —ni yahuha masare Pedro.

³⁷ To ã nichũ tuhoa tuaro cahya, pjĩro tuhotua, masa sehe Pedro cũhũre õ sehe ni sinitu ñũha:

—¿Sã coyea, dohse yoanahcari sã? —ni sinitu ñũha tina.

³⁸ Ti ã ni sinitu ñũchu õ sehe ni yuhtiha Pedro:

—Musa ñaa yoari buhirire cahyaga. Musa ñaa tuhotumari cjirire tuhotu cohtota, “Ã tjiri jira” ni, Cohamacũreta maca, tuhoga. Ã yoa Jesu yaina jina, bautisarina jiga musa jipihtina. Jesure musa wacũ tuachũ ñũno, musa ñaa yoari buhirire borohca Cohamacũ. Tõ sehe musa yoachũ Espĩritu Santore warohca musare. ³⁹ Musare, musa pohnare, musa panamana ji turiainare, yoaro macainare, ã yoa jipihtina Cohamacũ mari puhtoro to beserinare, “Potocãta yuhdoihtja musare”, ni cũha Cohamacũ —niha Pedro.

⁴⁰ Tuhsũ, tuaro mehne õ sehe ni yahu quihõha tinare:

—Ahri yahpa macaina, Cohamacũre ji coaerainare buhiri dahrerohca Cohamacũ. Wiho mejeta musa sehe, tina watoi jiina, Cohamacũ yahurire, “Ã tjira”, ni bahrañoga musa yuhduhto sehe —yahu quihõha Pedro masare.

⁴¹ To ã nichũ tuhoa tina payũ to yahuare noano tuhoha. Ã jiro tinare tiro bautisa dutiha. Tĩ dachore Cohamacũ yaina mehne macaina tres mil masa waha namoha. ⁴² Ã yoa tina masa Cristo to cũrina mehne dachoripe cahmachu, tĩ buheare tuho nunũ, tĩre yuhti mujaa tiha. Tina pãore nuha, cahma witi, Cohamacũre sini, Cristo to cũrina mehne noano jinocaa tiha.

Jesu yaina wahma ji ducaina ti jia tiare yahuha

⁴³ Ã yoa Cohamacũ to tuua mehne yoa ño mujaha to cũrina. Ti ã yoachũ ñũa masa jipihtina ñũ cuua wahaa tiha. ⁴⁴ Jipihtina Jesure wacũ tuaina cahmachu, noano jinocaa tiha. Ã jia ti yare cahma witi tiha. ⁴⁵ Ti yare dua, jipihtinare paye baro maerainare cãina ti cahmaare waa tiha tina. ⁴⁶ Ã jia dachoripe tina Cohamacũ wuhũ wijaaroi cahmachua tiha. Ã yoa cãa wuhuse,

ti ya wuhusepu cūhure nohopeina cahmachu, pāore nuha, wahchea mehne tina cūnoi chūa tiha. ⁴⁷Ti ā cahmachuno watoi “Cohamacu noariro jira”, ni ño payoa tiha. Paina masa tinare ji coa yūhdua tiha. Ā yoaro dachoripe Cohamacu painare to yaina to yūhdohtina wahachu yoaa tiha.

Tini masieraritore noariro wahachu yoaha Cohamacu

3 ¹Cū numu ñamichahapu tres jichu Cohamacu mehne durucuri pja jichu Pedro, João mehne Cohamacu wuhupu wahaa niha. ²Dachoripe tí wuhure ti sahrī sāari sahrīno taa mehne ti yoari sahrīno macari sopaca cahai paina cūiro masunore na ta duhu dapoa tiha. Tí sopaca noari sopaca wama tiha. Tiro masuno sehe wahma masa bajaroputa dojori wahiho jiro tini masierariro jiha. Ā jiro tiro tí sopaca cahai niñerure sini dujia tiha tí sopacai sāainare. ³Ā yoa Pedro, João mehne tí sopacare ti sāa cahachu tini masierariro sehe tinare ñu, niñerure siniha. ⁴Ā jia tina puaroputa tirore ñu, Pedro sehe ō sehe niha:

—Sāre ñuga muhu —niha Pedro tirore.

⁵To ā nichu tuhoro “Ahrina mahanocā yuhure niñerure waahca”, ni tuhoturo ñuroca ō tuhoha tinare. ⁶To ā ni tuhotupachuta Pedro tirore ō sehe ni yahuha:

—Niñerure cjueraja yuhu. Cjueraapaihta, ahrire yoaihtja muhure. Jesucristo Nazare macariro to tuua mehne wahcārūca, tiniga muhu —niha Pedro tini masieraritore.

⁷Ā ninota to wamomacare poto buhusehe macari wamomacare ñaha, tirore waja wahcō dapoha. To ā yoachuta tini masieraritore to ñuchua tuua wahaha. ⁸To ā wahachuta tiro wahcārūca purucu su, tini ducaha. Ā tini ducaro tiro waha, pu tini “Cohamacu noariro jira”, to ni wahcheriro mehne tina mehne Cohamacu wuhu macari sahrīno puhichapu sāa wahaha. ⁹To ā tinichu “Cohamacu noariro jira”, to nichu masa jipihtina tirore ñuha. ¹⁰Ā jia masa tirore ñu masiha. Tiro Cohamacu wuhu macari sahrīno taa mehne to yoari sahrīno macari sopaca noari sopaca cahai niñerure to sini dujirire masiha masa. Ā jia tiro to tinichu ñua, ñu cūaa wahaha.

Cohamacu wuhui Pedro masare buheha

¹¹Ā yoa tini masierariro cjiro Pedro cūhure to siō suha mujano watoi, masa jipihtina ñu cūaa waha, noari wapapu Salomo wama tiri wapapu muroca wahcā, cahmachuha. ¹²Ti ā cahmachurucu suchu ñuno, Pedro sehe ō sehe ni yahuha tinare:

—Musa Israe masa, ¿dohseana ahriroro ñu cuajari? ¿Dohseana sāre musa ñu nunujari? Sā sehe sā ya tuua mehne noaina sā jia tia mehne sā mu suro ahriroro tinichu yoerahi sā. Jesu sehe tíre yoahre. ¹³Abrahā, Isaa, Jacobo mari ñuchusuma, panopu macaina ti yairo Cohamacu sehe to cahamacuno Jesure Jipihtina Bui Jiriro cūhre. Wiho mejeta musa sehe tó sehe jirirore tirore ñu tuhtiinare wahre. Baharo puhtoro Pilato tirore to wio duapachuta, musa sehe tirore to wiochu cahmaerare. ¹⁴Pilato tirore wio duamahre. Wiho mejeta musa Jesure ñaa buhiri marierirore, quihōno yoirirore cahmaerana, pairoro masa wajāriro sehere wio dutihre musa. ¹⁵Ā yoana Jesure marine catichu yoirirore wajāchu yoare musa sā coyea judio masa. To yariachu

Cohamacu tirore masohre. Tíre sã ñuhi. ¹⁶ Ñ jina Jesu pjiriro to jia tiare wacü tuaina jija. Tirore sã ñ wacü tuachu ñuno ahriroro musa mipu ñuriroro musa ñu masiriroro Jesu sehe to tuaa mehne tinichu yoahre.

¹⁷ Yu coyea, musa puhtoa mehne Jesure noano masierapanahta tirore wajachu yoare musa. Tíre masija yuhu. ¹⁸ Wiho mejeta panopu macaina Cohamacu yare yahu muhtaina cjiri Cohamacu tinare to yahu dutiriro sehetu, yahua tiha tina. “Cristo ñano yuhdu, yariarohca”, ni yahua tiha tina. Ti ñ ni yahuriro sehetu ñ wahahre mipure. ¹⁹ Ñ jina musa ñaare yoari buhirire cahyaga. Musu tuhutumari cjirire tuhutu cohtota, ñaare musa goa pjarire duhu, Cohamacureta majareruca, to ya sehere quihõno tuhoga. Musu tirore majareruca, quihõno tuhochu ñuno, Cohamacu musa ñaare yoari buhirire borohca. Ñ boro, musare wahchehti dachorire cü, musare noano yajeri säachu yorohca tiro. ²⁰ Ñ yoa tiro musa puhtoro cjihtore to beseriro Cristore musare warocarohca tjoa. Tiro Cristo sehe Jesuta jira. ²¹ Cohamacu cahapu jisininohca Jesu, pu Cohamacu ahri yahpau jipihitiare wahma to cohtota pahñoochupu. To ñ cohtota pahñohtore Cohamacu yare yahu muhtaina cjiri, to yaina waro panopu yahu quihõ tuhsua tiha. ²² Moise cjiro tíre yahuro ñ sehe ni muhtaha: “Cüiro mari mehne macariroro mari coyeiroreta Cohamacu yare yahu muhtahtiro cjihtore Cohamacu mari puhtoro warocarohca musare. Yuhure to warocariro sehetu warocarohca tiro cühure. Ñ jina musare to yahuchu tuhona, ‘Jai’, ni yuhti pihitocaga musa. ²³ Ñ sehe jirohca. Jipihitina tirore yuhtieraina to cohähtina jiahca. Cohamacu yaina mehne macaina jisi tina”, ni muhtaa tiha Moise cjiro.

²⁴ Jipihitina Cohamacu yare yahu muhtainape Samue, ñ yoa to baharo jiina cühu mipu jia dachori cjihtire yahu muhtaa tiha. ²⁵ Mari ñuchusuma cjirire, Cohamacu yare yahu muhtaina cjiri cühure panopu macainare yahua tiha Cohamacu. Mari cühure ñ ni yahuro nia tiha. Abrahäre to niriro sehetu mari cühure ni yahuro nia tiha. Ñ sehe ni yahua tiha Cohamacu Abrahäre: “Jipihitiro ahri yahpa macainare noano yoihtja. Ñ sehe tíre yoihtja: Mu coyeiro baharo jiriro sehe masare noano yoabasarahca yuhure”, nia tiha Cohamacu Abrahäre. ²⁶ Cohamacu to macunore masa wijachu yoaro mari cahapu waroca muhtare mari ñaa yoare duhuchu yoahtiroro. Ñ yoaro marine tiro noano yoare —niha Pedro tinare.

Pedro, João mehne puhtoa mehne suhuduha

4 ¹⁻³ Pedro, João cühu masa mehne ti durucuro watoi sacerdotea, Cohamacu wuhure cohtaina surara puhtoro, saduceo curua macaina cühu tinare tuhoha. Ñ sehe ni buheha Pedro João mehne masare:

—Jesu to yariari baharo masa mujaa wahahre. To ñ masa mujarire ñuna mari cühu baharo to yaina mari masa mujahtore masija mari —ni yahuha Pedro cühu.

Ti ñ nichu tuhoa puhtoa sehe tina mehne suaha. Ñ suaa nahi cahachu ñua tina Pedrore, João cühure ñaha, peresu yoaha. ⁴ Ñ tinare peresu ti yoa-pachuta payu ti yahua tuhoina sehe “Potocäta jira”, ni tuhoutuha. Ñ jia Jesu yaina payu waha, tí dachoi wahma to yaina ji ducaina, ñ yoa tó panopu Jesure wacü tua tuhsurina mehne mua sahserore mari quihöchu, cinco mil masa suro cahai jiha.

⁵ Ñ yoa pa dachoi tí maca macaina puhtoá, bucuna, ã yoa judio masa buheina cūhu Jerusalēpu cahmachuha. ⁶ Ti ã cahmachunoi sacerdotea bui puhtoro, Ana wama tiroiro cūhu tói jiha. Ñ yoa to coyea cūhu jiha. Caifa, João, Alejandro, paina mehne Ana coyea cūhu jiha. To coyea to dahraare dahraina jiha tina cūhu. ⁷ Ñ jia tina Pedro cūhure ti cahmarocachu, surara sehe puhtoá watopu tinare naa wihi dapoha. Ti ã na wihi dapochu, tina puhtoá ò sehe ni sinitu ñuha Pedro cūhure:

—¿Noa ya tuaa mehne musa tirore noariro yoari? ¿Noa jijari musare tíre yoa dutiro? —ni sinitu ñuha tina.

⁸ Ti ã nichu tuhoro Espíritu Santo to yoa dutiroro sehetá to tuaa mehne yahuha Pedro tinare:

⁹ —Musa puhtoá, ¿musa bucuna, sã dohse yoa ahiro tini masierarirore sã tinichu yoarire masi duana, sãre sinitu ñuna nijari musa? ¹⁰ Tí pja pini ahrire masiga musa jipihtina, Israe masa. Jesucristo Nazare macariro, musa crusapu wajãriro, Cohamacu to masoriro tiro sehe ahiro tini masierarirore noariro wahachu yoahre. Ñ jina ahirore mipure musa ñurocaroi to tinichu ñuna musa. Ò sehe nina Cohamacu yare ti joari pui Jesu cjihtore yahuro: ¹¹ “Ahiro táca yoaro sehe jiro jira. Tácare wuhu dahreina wiho jiriare ti cohãriro sehetá musa judio masa tirore cohãre. Musa ã yoapachuta mipure wuhu dahreina wuhure yoaa ti cū muhtari tácare ti cūriro sehetá Cohamacu tirore puhtoro sōhre. Tiro Cristo mariachu Cohamacu yaina wahaeraboa masa. (To ã wiho jiro jierapachuta musa mari puhtoá mehne tirore cahmaerare. Musa ã cahmaerapachuta Cohamacu sehe tirore mari puhtoro sōhre)”, ni joaha panopu. ¹² Ne, paio masare pichacapu wahaborinare yuhdoriro ne mariahna. Ahri yahpapure Jesu dihta masare yuhdoriro jira. Ne paina tiro yoaro sehe jiina mariahna —ni yahuha Pedro tinare.

¹³ To ã ni yahuri baharo Pedro, João mehne buhemahnoeraina jipahta cuiri marieno ti buhechu ñua, puhtoá, bucuna, judio masa buheina mehne ñu cuaa wahaha. Ñ jia Jesu yoaro sehe ti buhechu ñua, ò sehe masiha tina: “Potocã Jesu mehne macaina tjira ahrina”, ni masiha tina. ¹⁴ Ñ yoa tini masierariro cjiro Pedro cūhu mehne jiha. Tiro to noariro jichu ñuha puhtoá, bucuna, judio masa buheina mehne. Ñ jia tina Pedro cūhure “Ñano yoaa nina”, ni yahusã masieraha. ¹⁵ Ñ yahusã masieraa puhtoá ti cahmachuri tah-tiapu jiinare Pedro cūhure wijaa dutiha. ¹⁶ Ti wijaari baharo puhtoá sehe ti basi ò sehe ni suhūduha:

—¿Ahrinare dohse yoanahcari mari? —ni durucuha tina ti basi.

Ò sehe ni durucu namoha:

—Pedro, João Cohamacu tuaa mehne tini masierarirore tinichu yoari jire. Ñ jia Jerusalē macaina jipihtina ti ã yoarire masica. Ñ jina mari sehe “Ñ yoarere tina” ni masieraja mari. ¹⁷ Ñ jina Jesu to buheri cjiirire painare buhe dutiena tjijihna tinare, “Paina tí buheare cahmari”, nina —ni durucuha tina ti basi.

¹⁸ Ñ ni durucu tuhsua Pedro cūhure pjiroca, ò sehe niha:

—Jesu to buheri cjiirire ne buhena tjiga painare. Tíre ne durucu namoena tjiga —ni yahumaha tinare.

¹⁹ Ti ã ni yahuchu tuhoa tina Pedro João mehne ò sehe ni yuhtiha tinare:

—Musa ò sehe ni dutichu musare yuhtina, Cohamacu sehere yuhdurucana niboca sã. ¿Diro ya sehere sã yoachu quihōno jijari Cohamacu to ñurocarore?

¿Musa ya sehere sã yoachũ quihõno jijari? ¿Cohamacũ ya sehere sã yoachũ quihõno jierajari, musa tuhotuchũ? ²⁰Sã sehere sã ñurire, sã tuhorire sãre yahto basioerara —ni yũtiha Pedro, João mehne.

²¹Ti ã nichũ tuhoa puhtoã sehe pari turi dutimaha tjoa tinare:

—Jesu to buherire musa buheri buhiri ñano yũhdũnahca musa —niri jimare puhtoã tinare.

“João, Pedro mehne ñano yoaa nina”, ni masierari jire tina. Ñ jia masa sehe tini masierariro to noariro wahachũ ñua, “Cohamacũ potocãta noariro jira”, niha masa. Ti ã nichũ tuhoa puhtoã sehe Pedro cũhure ti dohse yoa buhiri dahreboare bocaeraa, tinare wioha. ²²Tini masierariro, noariro ti yoiri cuarenta cũhari bui cjuariro jiha.

Jesu yaina ti cuierahto cjihtore siniha Cohamacure

²³Ñ yoa, Pedro João mehne ti wiori baharo tina mehne macaina cahapũ su, sacerdotia puhtoã, bucũna jipihtia tinare ti niri cjiirire yahuha. ²⁴Ti ã ni yahuchũ tuhoa tina jipihtina cũno potori Cohamacure siniha:

—Sã puhtoro muhũ muanore, yahpare, mări cũhure yoiri jipihtina catiinare bajuamehneriro jira muhũ. ²⁵Mũ Espiritu Santo sã ñuchũ cjirore Davire mũ cahamacunore ahrire yahu dutia tiha mũ niriro sehta:

“¿Dohse yoa Israe masa jieraina suajari?

¿Dohse yoa Cohamacure ti yũhdũrucahtire wiho waro durucujari tina?

²⁶Payũ yahpari macaina puhtoã cahmachu, mari puhtoro Cohamacure, to puhtoro soriro Cristo cũhure ñũ tuhti, ñano yoa duara tinare”, ni yahua tiha Davi cjiro mũ ni dutiriro sehta.

²⁷Ñ jira. Ahri macai Herode, Poncio Pilato, judio masa jieraina, ã yoa judio masa cũhũ cahmachuhre, mũ beserirore Jesure noariro mũ cahamacunore wajãa taa. ²⁸Ti pja mũ cahmariro sehta “Ñ waharohca”, mũ niriro sehta yoahre tina. Mũ masia mehne ã ni yahuha muhũ. ²⁹Ñ jicu mipure sã puhtoro, tina sãre purĩno mehne mũ jia tiare ti yahu namo dutierachũ wacũ payoga muhũ. Sãre mũ cahamacare cuiri marieno mũ buheare yahuchũ yoaga sãre. ³⁰Muhũ mũ tuua mehne dohatiinare noaina yoaga. Ñ jicu mũ buheare cuiri marieno yahu dutiga sãre. Ñ yoa Jesu noariro mũ cahamacuno to tuua mehne yoa ño masichũ yoaga sãre. Ñ jicu dohatiinare noaina sã waha dutichũ to tuua mehne yoadohoga sãre —ni siniha tina Cohamacure.

³¹Ti ã ni siniri baharo, ti cahmachuri wuhũ ñuhmi muua wahaha. To ã ñuhmichuta Espiritu Santo to tuua mehne wacũ tua namoina wahachũ yoaha tinare. Tinare ã wahachũ Espiritu Santo to dutiriro sehta yoaa, cuiri marieno Cohamacũ yare yahu namoha tjoa tina.

Jesu yaina ti yare tju waa tiha

³²⁻³³Ñ jia Cohamacũ to tuua mehne tina Jesu to cũrina õ sehe ni yahua tiha masare: “Jesu yariariro to masarire sã ñuhi”, ni yahua tiha tina masare. Ñ jiro tinare jipihtinare Cohamacũ noano yoadohorucua tiha. Ñ yoa Jesure wacũ tuaina payũ jia, tina cũno potori tuhotuina jia tiha. Ñ jia tina ti yare ti cjuare “Yũ ya dihta jira”, ne niera tiha. Tina jipihtina ti yare paye baro mairinare tina mehne macainare tju waa tiha. ³⁴Ñ jia tina mehne macaina pjuacoina mariea tiha. Tina mehne macaina yahpari cjuaina, wuhuse cjuaina ti

yare dua tiha. ³⁵ Ñ dua ti wapa narire tina na ta, Jesu to cūrinare waa tiha. Ñ jia tina sehe tīre tina mehne macainare tju waa tiha. Jipihtina cjuarainare tju waa tiha. ³⁶ Tí pjare cūiro tina mehne macariro José wama tiro tiha. Jesu to cūrina José Bernabé ni wama pisuha. To wama Bernabé “Masare wahchechu yoiriro jira”, nia nina. Tiro Leví ya curua macariro Chipre nūco macariro tiha. ³⁷ Ñ jiro tiro yahpare cjuariro jiro tīre duaha. Ñ duaro to wapa narire Jesu to cūrinare waha tiro painare witi dutiro.

Anania to namono Safira mehne mahñooha

5 ¹ Paina cūhu Bernabé yaro sehe yoaa timaha. Tina Anania wama tiro, to namono Safira wama tiricoro tiha. Ti ya yahpare duaha tiro. ² Ñ dua-parota tiro to wapatarire to basi naha. To namono cūhu to ñ yoirire masiha. Ñ jiro ti wapataa ti duharire na ta, Jesu to cūrinare waha Anania sehe. Ñ waro “Wa pahñoi nija”, nimaha tiro. ³ To ñ yoachu ñuno Pedro tireore ñ sehe ni yahuha:

—Anania, watīno mūhure mahño dutiri jire Espiritu Santore. Ñ jicu mū ya yahpare dua, mū wapatarire mū basi nari jire mūhū. ⁴ Mū duahto pano mū ya yahpa jihre. Ñ jiro mū duari baharo mū ya wapataa jihre. ¿Ñ yoacu dohse jiro baro ñ mahñori mūhū? Mūhū sã dihtare mahñoerare. Cohamacu cūhure mahñohre mūhū —niha Pedro tireore.

⁵ To ñ nichu tuhorota, Anania sehe doca caha sū, yariaa wahaha. Ñ jia jipihtina tiro to ñ wahachu masia, tuaro cuiha. ⁶ To yariari baharo wahma yapia ta, to pjacure suhtiro cahsaro mehne wahma, sopacapu na wijaa, masa copapu cohānocaha tireore.

⁷ Ñ yoa tia hora baharo Anania munano namono, to yariarire masieraro Pedro cahapu sãaha. ⁸ Ñ jiro Pedro ticoreore ñ sehe niha:

—¿Musa ya yahpare duatjiāhna noho puro wapatarī musa? —niha tiro.

Ñ jiro ticoro to manūno munano to niriro purota, “Tó purota wapatahi sã”, ni yuhtimaha ticoro.

⁹ To ñ ni yuhtichu tuhoro Pedro ñ sehe ni yahuha ticoreore:

—¿Dohse yoana musa cūno potori Cohamacu Espiriture mahño duajari? “¿Potocāta marine buhiri dahrebocari?” nina. Tuhoga mipure. Mū manū cjirore yarina tara. Mūhū cūhure mū pjacure naa taa nina —niha Pedro.

¹⁰ To ñ ni yahuchuta ticoro doca caha sū, yariaa wahaha. Ñ jia wahma yapia tí wūhure sãa wihi, ticoro pjacure na wijaa wahaha. Na wijaa, to manūno munano pari wahpa ticoro pjacure masa copapu cohāha. ¹¹ Ñ jia Jesu yaina jipihtina paina tīre tuhoa cui yuhdua wahaha.

Jesu to cūrina Cohamacu tuaa mehne yoa ñoha

¹² Ñ yoa masa watoi Jesu to cūrina payu tahari Cohamacu tuaa mehne yoa ñoha tiha. Ñ yoa tina Salomo wama tiri tahtiapu tihamahnoeni tahtiapu cahmachua tiha. ¹³ Ñ jia paina Jesu yaina jieraina sehe cui curea, tina cahapu wahaera tiha. Ñ cuipahta tinare Jesu yaina warore “Noaina jira ahrina”, nia tiha masa. ¹⁴ Ñ jia mua, numia payu Jesure wacu tua ducaa tiha. ¹⁵ Ñ jia tina dohatiinare na ta, coma yosaa mehne pjūpaha duhu cūa tiha mahapu tinare. Ñ yoaa Pedro tinare to ña payochu cahmaha tinare na taina sehe dohatiina ti noaina wahachu cahmaa. Tinare to ña payoerachu Pedro ti bui masuraca

cūchu cahmaha tina. Tí dihtare cahmaa tiha ti noaina wahahto sehe. ¹⁶ Ā jia Jerusalē cahai jia macari macaina cūhu dohatiinare, watia ti saina cūhure na taa tiha. Ti ā na tachū tina jipihtina ti pjacuri noaina wahaha.

Jesu to cūrinare paina nāno yoaa tiha

¹⁷ Ti ā yoachu nua sacerdotea bui puhtoro, tiro mehne macaina mehne Pedro cūhure nū tuhtiha. Sacerdotea puhtoro mehne macaina saduceo curua macaina jiha. ¹⁸ Ā nū tuhtia tina sua yūhdūa Jesu to cūrinare nāha, peresu yoaha. ¹⁹ Ā jiro nānipu Cohamacu yairo anjo pjōoha tinare peresui dujiinare. Ā yoa tinare wijaa ta dutiro ō sehe ni yahuha anjo:

²⁰ —Cohamacu wuhupu wahaga. Tí wuhupu jina Cohamacu to masorire ahri noaa buheare yahuga masare —niha anjo tinare.

²¹ To ā nichu tuhoa, nāmiwacūnu jichu Cohamacu wuhupu sāa, masare buhea tiha tina. Tí dachoihta sacerdotea puhtoro, tiro mehne macaina, Israe masa puhtoa mehne cahmachu, Jesu to cūrinare peresupu jiinare na ta duti-maha surara puhtoare. ²² Wiho mejeta surara puhtoa peresu ti yoari wuhupu waha, nūmaha. Tinare bocaeraha. Bocaeraa tjuua wahaha. Tju su ō sehe ni yahuha ti puhtoare:

²³ —Peresupu jia pahmari bihaa pahmari jihre. Ā jia tí pahmari cahai ti peresu yoinare cohtaina ti ducuchū nūhi sā. Wiho mejeta pjōo sāa, sā nūchu, ti peresu yoina mariahe —ni yahuha tina.

²⁴ Ti ā nichu tuhoa, surara Cohamacu wuhure cohtaina puhtoro, sacerdotē puhtoa mehne tíre tuho, cuaa waha, “¿Dohse waha sohtori tiahu tina ā yoaa?” ni tuhotuha tina. ²⁵ Ā jiro tina cahapu pairo su, tinare ō sehe ni yahuha:

—Musa peresu yoina Cohamacu wuhupu jihre. Nūna wahaa wiho. Tí wuhupu masare buhea nihre tina —ni yahuha.

²⁶ To ā nichu tuhora, surara puhtoro, to surara mehne waha, Jesu to cūrinare pari turi nāha taha tjoa. Wiho mejeta tinare surara tuhtieraha. Ā jia tinare cjāborina jipahta, masare cuia cjāeraha tinare. “Ahrinare mari cjāchu paina masa sehe taa mehne docaahca marine”, ni tuhotuha tina surara sehe. ²⁷ Ā jia tinare na ta, puhtoa panoi duhu dapoha tina. Ti ā na wihi dapochu sacerdotea puhtoro tinare ō sehe ni tuhtiha:

²⁸ —Musare sā tuaro dutimahi. “Jesu yare buhena tjiga”, nimahi sā musare. Sā ā nipachuta musa sehe jipihtina Jerusalē macainare buhehe musa. Jesu to yariari buhiri, säre buhiri tichu yoa duana nica musa —niha puhtoro sehe.

²⁹ To ā nichu tuhora Pedro sehe paina Jesu to cūrina mehne ō sehe ni yuhtiha:

—Cohamacu to dutiri sehere yoa muhtanahtja. Ā jina baharo Cohamacu cahmachu masa ti dutiare yoanahtja. ³⁰ Cohamacu, mari coyea panopu macaina puhtoro, Jesure masori jire. Tirota jira musa crusapu cjā puha wajā dutihiro. ³¹ Jesure “Noariro jira” ni, to poto buhusehei duji dutihre Jesure Cohamacu sehe. Ā jiro Jesu masa puhtoro, masare masoriro jiro, Israe masare ti nāa yoirire cahyaina ji dutiro, ti nāa yoari buhirire cohā duara Jesu. ³² Ā jina sā sehe Jesu to yoirire nūrina jina tíre yahuja sā. Espiritu Santo tíre nūriro jiro yahura tiro cūhu. Tiore Espiritu Santore Cohamacu warocahre. Jipihtina Cohamacu dutiare yoinare tiro Espiritu Santore wahre —ni yahuha tinare.

³³To ā nichu tuhoa puhto sehe sua yuhduaha. Ā suaa, tina Jesu to cūrinare wajā duamaha. ³⁴Wiho mejeta Gamalie, fariseo curua macariro tói jiro tinare wajā dutiro taro nieraha. Tiro puhto mehne macariro, dutiare buheriro to jichu, masa tirore ño payoa tiha. Tiro Jesu to cūrinare mahanocā cohta dutiro pa sehepu tinare naa wahcā dutiha surarare. ³⁵Ti ā naari baharo tiro ō sehe ni yahuha masare:

—Musa Israe masa, ahrinare musa yoahdire noano tuhotuga “Musapu wajāri”, nina. ³⁶Wacūga Teuda cjirore. Tiro to basi “Masare yuhdurucariro jija yuhu”, nire masare. To ā yoachū ñua, masa payu cuatro cientos masa tiro mehne macaina tjuare. Baharo paina sehe tirore wajāri jire. To buheare buherina cjiri sehe waha sitea wahari jire. Ā jia tina cjiri mipure mariahna. ³⁷Baharo masare ti quihōri pja jichu Galilea macariro Juda wama tiroro cjiri masare to buhechu tiro mehne masa payu tjuare. Tiro cūhu yariaa wahari jire. Ā yoa to yaina jipihtina waha sitea wahari jire. ³⁸Ā nicu musare mipu ahrire nii nija. Ā ñunocahga ahrinare Jesu yare yahuinare. Ā yoa ahri buhea, ahri na ti ya buhea Cohamacu ya buhea jieraa, pihtia wahaahca Teuda cūhu ti ya buhea ti pihtiro sehetā. ³⁹Wiho mejeta ahri Cohamacu ya buhea jia, ne pihtisi. Ahri buhea Cohamacu ya jichu ne ahrire butichu yoa masierara musa. Musa ahrire butichu yoa duana Cohamacu mehne cahmachena niboca musa —niha Gamalie tinare.

⁴⁰To ā ni yahuchu tuhoa, “Potocā tjira”, ni tuhotuha masa. Ā jia tina Jesu to cūrinare pjiroca, ti wihichu ñua, tinare tjanaha. “Jesu yare buhe namoena tjiga musa”, ni tuhsu, tinare waha dutiha. ⁴¹Ti ā waha dutichu tuhoa tina puhto cahapu jirina cjiri waha wahaha. Jesu yare ti yoari buhiri ñano yuhdu tuaro wahcheha Jesu to cūrina. ⁴²Ā jia dachoripe Cohamacu wuhu cahai jia waparihi, ti ya wuhusei Cristo yare buhea, yahua tiha tina.

Siete yoadohoinare beseha Jesu yaina

6 ¹Ti dachorire Jesu yaina payu wahaha. Wiho mejeta ti ā waharo wato, cū curua macaina judio masa jipahta, pa sehepu masa bajuaina griego ya durucuina jiha. Ā jia tina tóita masa bajuaina hebreo ya durucuinare ō sehe ni tuhotu, nureha: “Dachoripe masare yoadohoare ti witichu, mari griego ya durucuina wapewahya numia sehere daacā waro wara”, ni tuhotu, nure cohtaha. ²Ti ā nurechu masia, Jesu cūrina, doce jiina sehe jipihtina Jesu yainare ti cahapu pjiroca, ō sehe ni yahuha tinare:

—Sā Cohamacu yare buheina jija. Tíre duhu, masare yoadohoare witiborina sā jirucuhu tó wahaerara. ³Musa sā coyea, siete muare, paina noaina ti niinare Espiritu Santo to dutirire yoinare, noano tuho masiinare macaga. Tinare ahri dahraare cūga musa. ⁴Wiho mejeta sā sehe dachoripe Cohamacu sini muja, Cohamacu yare painare buhenahca —ni yahuha tina Jesu to cūrina.

⁵Ti ā nichu tuhoa, “Jai. Āta yoajihna”, niha tina jipihtina Jesu yaina. Baharo Estebāre Cristore wacū tuarirore, Espiritu Santo to dutiare yoarirore beseha tina. Ā jichu Felipere, Prócorore, Nicanore, Timore, Parmenare, Nicola cūhure Jesu yainare yoadohohtinare beseha tina. Nicola sehe Antioquía macariro, judio masuno jierariro, judio masa ya buheare cahmano, tina mehne sāariro jiha. ⁶Tinare bese tuhsu, ti beserinare Jesu cūrina cahai na

wihiha tina. Ti ā na wihichū ñua, tina Jesu cūrina sehe tinare Cohamacure sini payo tuhsu, ti dapu poca bui ti wamomacarine duhu payoha.

⁷Ā yoa Jesu yaina painapure Cohamacu yare yahu site pahñoa wahaha. Ā jia Jerusalēpu jiina paina Jesu yaina payu waha namoha. Sacerdotea cūhu payu Jesu yaina wahaha.

Paina Estebāre ñahaha

⁸Ā yoa cūiro masare yoadohoare witi cohtariro Estebā sehe Cohamacu to noano yoiriro ji, Cohamacu tuaare cjuariro jiha. Ā jiro tiro Cohamacu tuaa mehne yoa ño mājaha masa ti ñurocaroi. ⁹Wiho mejeta judio masa buheri wūhu macaina tirore ñu tuhti, to yahuchū, tirore soro ni cohtaha. Tina soro ni cohtaina “Cahamaca ji, wijarina cjiri”, wama tiri curua macaina sehe jiha. Ā jia Cirene macaina, Alejandría macaina, Cilicia macaina, ā jichū Asia macaina cūhu jiha tina. ¹⁰Tirore soro ni cohtapahta, Espiritu Santo to masia mehne Estebā to durucu mihnichū, tina to buheare ti dohse soro ni yūhti-boare wacū bocaeraha. ¹¹Ti soro ni yūhti-boare wacū bocaeraa, tina painare mahño dutia, wapaha tinare. Ti ā mahño dutichū ō sehe ni yahusāmaha tina:

—Ahriro Cohamacure, ā jichū Moise cjirore Cohamacu to cūri dutia cūhure to ñano durucuchū sā tuhohi —ni yahusāmaha tina mahñoina Estebāre.

¹²Ti ā nichū tuhoa masa, judio masa buheina, bucuna cūhu tiro mehne suaha. Ā jia tina Estebāre ñaha, ti puhtoah cahapu naaha tirore. ¹³⁻¹⁴Ā yoa tina painare mahño dutiha:

—Ahriro dachoripe Cohamacu wūhure, to dutia cūhure ñano durucuriro jira. Tuhohi sā tirore to ō sehe nichū: “Jesu Nazare macariro Cohamacu wūhure cohā, ā yoa Moise dutiri cjiri, marine to yahu cūri cjirire cohtatorohca”, nihre Estebā sā tuhochu —ni mahño yahusāmaha tina.

¹⁵Ā jia jipihtina tói dujiina Estebāre noano ñuroca ō, to wūhduare ñuha tina. Anjo yoaro sehe bajuha to wūhdua.

Estebā Jesu yare yahuha

7 ¹Ā yoa sacerdotea bui puhtoro ō sehe ni sinitu ñuha Estebāre:

—¿Ahrina ti nia potocā tjijari? —ni sinitu ñuha tiro Estebāre.

²To ā nichū tuhoro, Estebā sehe tinare ō sehe ni yūhtiha:

—Coyea, bucuna sā pucusuma tuhoga. Abrahā mari ñuchū cjiro panopu macariro Mesopotamiapu to jisnichū, Harāpu to jihto pano, Cohamacu tuariro si siteriro sehe tirore Abrahāre bajuah tiha. ³Ā bajuaro, Cohamacu ō sehe ni yahua tiha tirore: “Mu ya yahpare, ā jichū mu coyea poto cūhure duhunoca, wahaga. Pa yahpa, yu muhure ñohti yahpapure wahaga”, nia tiha Cohamacu Abrahāre. ⁴To ā nichū tuhoro Abrahā cūhu Caldea yahpai jiina wijaa, Harāpu su, jisinia tiha. Abrahā pucuro to yariari baharo, tiro cūhu tí macai wijaa, ahri yahpa, mipu musa jiri yahpapu Cohamacu yoadohoro mehne taa tiha. ⁵Cohamacu Abrahāre ōpu suho na taparota, tirore dói “Ahri yahpa puro jiga”, ni cūerasinia tiha. Ne mahanocā ahri yahpare, “Pu tiga muhu”, ni dutierasinia tiha tiro. Wiho mejeta Abrahā pohna marieriro to jipachuta, Cohamacu sehe tirore ō sehe ni yahu muhtaa tiha. “Muhure ā jichū mu panamana, pa tjuru macainapu cūhure ahri yahpare waihtja”, nia tiha Cohamacu Abrahāre. ⁶Ā ninota ō sehe ni yahu namoa tiha Cohamacu.

“Mu panamana pa tjuru macaina pa yahpapu waha, tópu paina cahapu jia, ti cahamaca jiahca tina. Tuhsu, cuatro cientos cūhmari waro tó macaina ñano yoaapeahca mu panamanare. ⁷ Ña jicu tó macainare ti ña yoari buhiri buhiri dah-reihtja yuhu. Yu ña yoari baharo mu panamana ji turaina ahri yahpapu wihi, yuhure ño payohtina jiahca tina”, nia tiha Cohamacu Abrahäre. ⁸ To ña ni yahu cūare ti noano wacūrucuhto sehe, ñ sehe yoa turia wahcā dutiha tirore. Muno pjacure mahanocā cahsarocāre yihso na dutia tiha tirore. Ña jiro ocho dachori to macuno Isaare to pohna tiri baharo, mahanocā cahsarocāre yihso naa tiha tiro Isaa pjacure. Baharo Isaa Jacobore pohna ti, to pjacu cūhure mahanocā cahsarocāre yihso naa tiha. Baharo Jacobo cūhu doce to pohmare ñ dihta yoa tiha ti pjacurire. Tina doce mua sehe tópe curuari, mari masa curuari dahpoto macaina cjihti jia tiha.

⁹ Ña yoa baharo, tina Jacobo pohna, mari ñuchusuma cjiri, ti bahuro Josére pahsu tia, paina ti cahamacuno cjihtore duanocaa tiha Egiptopu wahainare. Ti ña yoapachuta, Cohamacu Josére yoadohoa tiha. ¹⁰ Jipihti tí to ñano yuhduare Cohamacu tirore noano yuhduchu yoa tiha. Cohamacu tirore noano tuho masichu yoa tiha. Ña yoa faraō Egipto macaina puhtoro sehere Josére ñu ji coachu yoa tiha. Ña jiro faraō sehe Josére puhto sōa tiha, tiro mehne masare dutihtiro cjihtore. Tirore faraō ya wuhu cūhure puhtoro cūa tiha.

¹¹ Ña yoa tí pjapure Egiptopu, Canapu cūhure paró ne coro taeraa, yahpa sehe wuaa sãa wahaa tiha. To ña wua sãa wahachu, masa ti toamari cūhu ñai pihtia wahaa tiha. Ña jia mari ñuchusuma cjiri ñano yuhdua, ti chuboare ne bocaeraa tiha. ¹² Wiho mejeta Egiptopu “Trigo jiyuhca”, ti nichu tuhoro, Jacobo sehe to pohmare, mari ñuchusuma cjirire tópu coā warocaa tiha. ¹³ Baharo pari turi to warocarina cjiri Egiptopu ti suchu tjoa, José to wahmisumare “Musa bahuta jija yuhu”, ni yahu, tinare masichu yoa tiha. Tí pja puhtoro faraō sehe José coyeare coā ñuno nia tiha. ¹⁴ Baharo José to wahmisumare, ti pucuro Jacobore, ña jichu jipihtina ti coyea cūhure cahmarocaa tiha. To coyea setenta y cinco masa jia tiha. ¹⁵ To macuno to pjirocachu tuhoro Jacobo cjiro wahaa tiha Egiptopu to macuno cahapu. To macuno cahapu jiro, tiro yariaa wahaa tiha. Ña yoa to pohna, mari ñuchusuma cjiri cūhu tópu yaria pihtia wahaa tiha. ¹⁶ Tina ti yariari baharo, ti coyea ti pjacuri cjirire Siquē wama tiropu naa tiha. Tópu na su, tãa coparipu Abrahã Hamor pohmare niñeru mehne to nuchuri yahpapu tina ti pjacuri cjirire cūa tiha.

¹⁷ Ña yoa Cohamacu Abrahäre “Canaa yahpare waihtja mūhure”, to ni cūriro cjiro mu suro cahachu, Abrahã panamana, Israe masa, Egiptoí jisinia payu wahaa tiha. ¹⁸ Tí ña payu wahari baharo, paio faraō, Egipto masa puhtoro José cjirore masierariro sãa tiha. ¹⁹ Tiro mari coyeare mahño, ñano yoa, ti pohmare mua pohmare wajã dua, cohānoca dutia tiha tinacāre. Wahma bajuainacāre cohā dutia tiha “Tinacā yariajaro”, nino. ²⁰ To ña yoaro watoi Moise cjihto sehe masa bajuua tiha. Tirocā noariro, Cohamacu to noano ñu jicoariro jia tiha. Tia sū waro to pucusuma tirocāre noano ñu wihboa tiha. ²¹ Ña jiro Moiserere nūo namo masieraa, diapu tirocāre puhuroi comape mehne ti bihari puhuroi poho buroha. Ti ña yoachu faraō macono tirocāre ñu boca, na maja, to macunore yoaro seheta cjuua tiha tirocāre. ²² Ña jia tina Egipto macaina, noano masiina ya jipihtiare Moiserere buhe bucua tiha. Baharo, ne cuiro marieno durucuriro, puhtoa jia tia cūhure mihni yuhdurucu suriro wahaa tiha Moise.

²³ Ñ yoa tiro cuarenta cūhmari cjuaro to coyea Israe masare ñu duaro ti cahapū ñuno wahaa tiha. ²⁴ Tópū ñuno suro, Egipto macariro cūiro Moise coyeirore to ñano yoachū ñua tiha. Tiro to ñano yoaborirore ducata duaro, Egipto macariro sehere wajā cohānoca tiha. ²⁵ Ñ wajā cohāno, Moise ō sehe ni tuhotua timaha. “Yū coyea ti coyeirore yū yoadohochū ñua ‘Cohamacū marine noano yūhdūchu yoa dutiro warocare ahrirore’, ni tuhotuahca yū coyea”, ni tuhotua timaha Moise. Wiho mejeta tina sehe ne ā ni tuhotueraa tiha. ²⁶ Pa dachoi Moise to coyeare puaro ti basi cahmacheinare boca sua tiha. Ñ boca suro, tinare yahu duaro tinare ō sehe ni yahua timaha: “¿Musa basi jipanahta cahmachejari musa?” ni yahua timaha Moise tinare. ²⁷ To ā ni yahuchū tuhorō, cūiro to coyeirore ñano yoariro sehe Moisere tjurocaa tiha. “Mūhū sā puhtoro jierara. Sāre yahuboriro jierara mūhū. ²⁸ ¿Canure Egipto macarirore mū wajāriro seheta yūhū cūhure wajā duacu nijari mūhū?” nia tiha tiro Moisere. ²⁹ To ā nichū Moise tuho cuaa waha, murocaa duhti wahcā, Madiā yahpapu wahaa wahaa tiha. Tópure pa sehe macariro jiparota, numino boca, puaro pohna tia tiha.

³⁰ Ñ yoa Moise cuarenta cūhmari waro tōi to jiri baharo, Sinaí wama tidū tūcu cahai masa marienopū to jichū anjo tirore bajuaa tiha. Anjo sehe mahadūcā jūri picha pohnai bajuaa tiha. ³¹ Tū yucūcūcāpū to jūrucuchū ñuno, Moise ñu cuaa wahaa tiha. Tí pichacare cahacā noano to ñu wahcāchū waroi Cohamacū to durucuchū tuhoa tiha. ³² “Cohamacū jija yūhū. Mū ñūchūsuma cjiri, Abrahā cjiro, Isaa cjiro, Jacobo cjiro ti ño payoriro jija”, nia tiha Cohamacū Moisere. To ā nichū tuhorō Moise sehe tetere, ne ñu wahcōeraa tiha. ³³ Cohamacū ō sehe ni durucu namoa tiha tirore. “Yūhū ñaa marieriro yū ōi jiro wato, mū ducuri yahpa sehe wiho jiri yahpa jierara. Ā jicu mū dahpo suhtire tjuwe cūga. ³⁴ Ñ yoa yū yaina masa Egiptopū ti ñano yūhdūchu ñūja. Ti tiichū tuhoja. Ā jicu ōpure wihija yūhū, tinare yūhdū witichū yoai tai. Ti ā wahachū, ñūcu wahaga mūhū cūhū. Egiptopū mūhure warocaihtja. Tinare na wioi wahaga”, nia tiha Cohamacū Moisere.

³⁵ Tó panopū tina sehe mari coyea, Israe masa Moisere cahmaeraa tiha. “Mūhū sā puhtoro jierara. Mūhū sāre yoadohoboriro jierara”, ni tuhtia tiha tina tirore. Wiho mejeta baharo, Cohamacū ti ā niriro cjirore Egiptopū warocaa tiha, mari coyea Israe masare yūhdū witichū yoahitiro, ā jichū ti puhtoro jihtiro cjihtore. Ñ yoa anjo, tirore jūdūpū bajuariro sehe to ā yoahitire yahua tiha tirore. ³⁶ Moise jia tiha mari coyea, Israe masare Egiptopū jiinare na wioro. Tinare na wioro, Egiptopū Cohamacū tuua mehne tiro sehe yoa ño ducaa tiha tōpū jiinare. Pjiri ma sohāri mapū āta yoa ñoa tiha tjoa. Baharopū masa marienopū cūhure cuarenta cūhmari waro Cohamacū tuua mehne yoa ño mūjaa tiha tiro to masare. ³⁷ Ñ yoa Moise cjiro jia tiha mari coyea, Israe masare ō sehe ni yahuriro: “Cohamacū cūiro musa coyeiro, to yare yahu mūhtahtiro, yū yoaro sehe jiriore warocarohca masare”, nia tiha Moise tinare. ³⁸ Moise masa marienopū mari coyea Israe masa mehne jia tiha. Tuhsū, Sinaí wama tidū tūcupū ti cahmachuchū tirore yahuriro anjo mehne jia tiha. Ñ yoa mari ñūchūsuma panopū macaina cjiri mehne jia tiha tiro. Cohamacū to dutiare cūiro jia tiha Moise.

³⁹⁻⁴⁰ Ñ jia tí dutiare tūcūi Moisere to cūno watoi mari ñūchūsuma cjiri Egiptopū tjua duaa Moisere yūhdūrucaa tiha. Tina tirore cahmaeraa tiha.

Ã cahmaeraa tina Moise cjiro wahminore Aarõ wama tiroiro cjirore õ sehe nia tiha: “Paina cohamanare yoaga mari yaina cjihti. Tina mari wahahti mahare marine suho naahca. ¿Wiho mejeta marine Egiptopu jiinare na tariro Moise dohse wahari tiro? Masieraja sã”, nia tiha tina. ⁴¹ Ã jia tí dachorire tina wachu masure uru mehne yoaa tiha. Ã yoa tuhsu, tina wahiquinare wajã, ti yoiriro cjiro cahai na ta, ño payoa tiha tirore. Ã jia tina ti yoiriro cjirore wachure ñu, wahche, bose numu yoaa tiha. ⁴² Wachure ti ño payochu ñuno, Cohamacu tinare cohã wahcãa wahaa timaha. “Yuhure cohã, muanopu bajuaa, sũ dacho macariro, sũ ñami macariro, ã yoa ñahpichoha poca cũhure ño payowahnojaro”, nino cohã wahcãa wahaa timaha. Cohamacu yare yahu muhtaina cjiro ã ni joaa tiha:

“Musa Israe masa, yuhure nu ñano yoare.

Masa marienopu cuarenta cuhmari waro jina wahiquinare musa wajãinare musa wajã, jũ wa muopanahta, yuhure musa ño payoboriro seheta yoamare musa.

Wiho mejeta yuhu sehere musa ño payoerare.

⁴³ Ã jina musa Molo wama tiri masure ño payoina jiina, tí masure ño payori wuhure cjuare musa.

Ã yoa paio cohamacu ñahpichohaca Refã wama tiria to masure musa yoiare musa cjuare tjoa.

Tí masurine musa yoirire musa ño payore.

Musa ã yoiari buhiri musare Babilonia sie sehenu cohãrocaihtja yuhu”, ni yahu joaa tiha Cohamacu yare yahu muhtaina cjiro.

⁴⁴ Ã jia masa marienopu Cohamacu masa mehne to jiri wuhure wahiquina cahsari mehne ti yoiari wuhure cjuaa tiha mari ñuchusuma cjiro panopu macaina. Tí wuhu Cohamacu masa mehne to durucuri wuhu jia tiha. Tí wuhupu Cohamacu dutia to joaa pjini tãa pjini jia tiha. Tí wuhure Cohamacu Moisereto ñoriro seheta, “Õ sehe yoaga”, to ni yoa dutiriro seheta yoaa, tí wuhure cjuaa tiha tina. ⁴⁵ Ã yoa ti panamanapu cũhu cjuaa turia nunu tia tiha tí wuhure, wahiquina cahsari mehne ti yoiari wuhure. Baharo mari ñuchusuma cjiro Josué mehne Cohamacu mari coyea Israe masare to cũhti yahpapure, ahri yahpapure pu tia taha. Ti pu tia tachu ahri yahpai ji muhtaina cjiro Cohamacu cohãnocaa tiha. Tí pjare Cohamacure ti ño payori wuhure na taa, cjuaa tiha tina ahri yahpapu, mipure mari jiri yahpapu. Pu Davi cjiro to jiri tjurupu cjuaa batoa tiha tí wuhure. ⁴⁶ Tiro Davi cjiro sehe Cohamacure wahchechu yoiriro jia tiha. Cohamacu ya wuhu cjihtore pa wuhu tiro yoa duaro, sinia timaha Cohamacure. ⁴⁷ To ã sinipachuta Salomopu Cohamacu ya wuhu sehere yoaa tiha. ⁴⁸ To ã yoapachuta Cohamacu Jipihtina Bui Jiriro sehe masa ti yoiari wuhupure jierara. Õ sehe nia tiha Cohamacu yare yahu muhtariro cjiro:

⁴⁹ “ ‘Muano yu dujiro jira.

Tói dujicu dutija yuhu.

Ã jiro yahpa sehe yu dahporire duhu payoro yoaro sehe jira.

Yuhu tua yuhduariro jija.

Yu ya wuhu cjihtore yoa masierara musa.

Cohamacu yu jichu yu jihti wuhure musa yoa masierara.

⁵⁰ Yu basi ahri yahpare jipihtiro yoahi yuhu”, ni durucua tiha Cohamacu”,

ni joaa tiha Cohamacu yare yahu muhtariro cjiro.

⁵¹ Musa Cohamacu yare tuhopenahta, tireore yuhti duaerara. Cohamacure masieraina yoaro sehe tuhoutuina baro jira musa. Espiritu Santore yuhduruca yuhduara musa. Musa nuhusuma cjiri ti yoariro cjiro seheta yoara musa cuhu. ⁵² Musa nuhusuma cjiri jipihtina Cohamacu yare yahu muhtaina cjirire nãno yoaa tiha. Tina Cohamacu yare yahu muhtaina cjiri “Baharo cuïro ñaa buhiri Marieriro tarohca”, ti ni yahu quihõ muhtachu tuhoa, musa nuhusuma cjiri sehe tinare wajãa tiha. Ñ yoa mipu cühure tiro “Ñaa buhiri Marieriro”, tó panopu ti niyuriro sehe õpu to wihichu, “Muhu mehne macaina jija”, ni ji mahño, tireore wajähre. ⁵³ Cohamacu dutiare anjoa sehe yahu turia timaha musare. Ti ã yahu turiachu musa tí dutiare cjuamaha. Wiho mejeta tí dutiare yuhdurucara musa —niha Estebã.

Tina Estebãre tãa poca mehne doca wajãha

⁵⁴ To ã nichu tuhoa tina sehe tuaro suaha. Ñ tuaro suaa, cuaina wahaha. ⁵⁵ Ti ã suapachuta Estebã sehe Espiritu Santo mehne waçu tuariro to tuua mehne muanopu ñuroca muo, Cohamacu si siteare ñuha. Ñ yoaro Cohamacu poto buhusehei Jesu to ducuchu cühure ñuha tiro. ⁵⁶ Ñ ñuroca muono, õ sehe niha:

—Ñu muoga musa. Muanopu mahanocã to tjuwe muachu, Jesu Cohamacu to warocariro Cohamacu poto buhusehei to ducuchu ñuja yuhu —niha Estebã tinare.

⁵⁷ To ã nichu tuhoata tina tuaro sañurucu, ti cahmo coparire bihanoca, cño potori tiro cahapu muroca wahcã, tireore ñahaha. ⁵⁸ Naha tuhsu, tireore na wahcã, tí maca duhtu cahapu cohãha tireore. Ñ jia tãa poca mehne doca wajãha tireore. Ti ã wajãhto pano tireore yahusãrina tireore tãa poca mehne docahtina ti bui sãa suhtire tjuwe na, wahmunore Saulo wama tirirore ti suhtire cjuabasa dutiha. ⁵⁹ Estebãre ti tãa docaro watoi, sinino sehe õ sehe niha tiro:

—Jesu, yu puhtoro yu catiare naga —niha tiro.

⁶⁰ Ni tuhsu, tiro na tuhcuca caha su, õ sehe ni tuaro sañurucuha:

—Puhtoro Jesu, ahrina mipu yuhure ti wajãri buhiri tinare buhiri dahrei tjia —ni sañurucuha Estebã.

Ñ ni sañurucu batoarota, yariaa wahaha tiro.

Saulo Jesu yainare ñano yoaha

8 ¹ Estebã to ã yariachu ñuno, “Noana”, niha Saulo sehe.

Tí dachoreta Jesu yainare Jerusalẽ macainare ñano yoa ducaha Saulo mehne macaina sehe. Ti ã yoa ducachu Jesu yaina Judea yahpapu, Samaria yahpapu yoaropu duhti site wahcãa wahaha. Ti puhtoa, Jesu to cürina dihta wahaeraha. ² Ñ yoa paina Cohamacure ño payoina Estebã pjacu cjirore tãca copapu, duhu sãa, tiro cjirore tuaro tii payoha tiro cjirore tina. ³ Wiho mejeta Saulo sehe Jesu yainare ñabiaro yoaa timaha. Tiro ti wuhusepu sãa, muare, numiare ñaha wahcã, peresupu biha dapoa tiha.

Samariai Jesu yare buheha Felipe

⁴ Ñ yoa yoaropu waha siteina cjiri nohoi ti waharoi Jesu yare buheha tiha.

⁵ Cuïro tina mehne macariro Felipe cū maca, Samaria wama tiri yahpai jiri

macapu su, Cristo masare yuhdoriro ya quitire buheha tí maca macainare. ⁶To á buhechu, tó macaina sehe tirore tuho cahmachu, Cohamacu to tuua mehne to yoa ñochu ñuha tina. Á jia tina jipihitina cño potori to yahuare noano tuho nunua tiha. ⁷Payu masa watia sãanohrina tiro cahai ti wihichu ñuno, watia sehere tiro wijaa dutia tiha masapu jirinare. To wijaa dutichu, tina watia sehe tuaro sañurucu, wijaa wahaha. Tuhsu payu pjacu buhainare, pari yuri tiniina cñhure pjacu noaina wahachu yoa tiha.

⁸To á yoa ñochu ñua tí maca macaina payu masa wahchea tiha.

⁹Tí pjare Simo wama tiroiro tí maca macariro yairo jiha. Á jiro yaya ti yoirire yoa ñoa tiha Samaria macainare. To á yoa ñochu ñua, tó macaina ñu cuaa waha, tirore cua pisaro ñuina jiha.

—Yuhu masi pahñoriro jija —nimaha Simo sehe tinare.

¹⁰To á yoachu ñua masa sehe ò sehe nia timaha:

—Ahrir Cohamacu ya tuaare cjuariro jira. Cohamacu yoaro sehe tuariro jira —nia timaha tirore masa, puhto mehne. Tina jipihitina noano tuho nunua tirore.

¹¹Tiro yaya ti yoa mehne yoi pja yoa ñoa tiha tinare. To á yoa ñochu ñua tina cuaa wahaha. Á cuaa waha, tina tirore ño payoa tiha. ¹²Wiho mejeta ti á ño payopachuta Felipe sehe puhtoro Cohamacu to suho jiare, Jesucristo yare noaa buheare yahuha. To á yahuchu tina tirore noano tuhoaha. Ti á noano tuhochu ñuno muare, numia cñhure bautisaha Felipe. ¹³Á jiro Simo cñhu Felipere noano tuhoa tiha. Á jiro tiro cñhure bautisaha. To á yoi baharo Felipe mehne tjuaa tiha tiro. Felipe sehe Cohamacu tuua mehne to yoa ñochu ñuno Simo ñu cuaa wahaa tiha.

¹⁴Á yoa Samaria yahpa macaina Cohamacu yare ti tuaro cahmachu tuhoa Jerusalēpu jiina tuhorocaa tiha tinare. Á ti cahmachu tuhoa Pedrorre, João cñhure warocaa tiha Samaria yahpapu. ¹⁵Tópu sua Pedro cñhu Cohamacure siniha: “Ahrina Samaria yahpa macaina muhure ño payoinare mu Espíritu Santo sãajaro”, ni sini payoha tina Cohamacure. ¹⁶Tina Samaria yahpa macaina Jesucristo yaina jia to bautisarina jiha. Tí dihtare masiha tina. Á jiro Espíritu Santo tinare sãaerasiniha. ¹⁷Á jia Pedro, João mehne Samaria yahpa macainare ti wamomacarine ti dapupoca bui ti duhu payori baharo Espíritu Santo tinare sãari jire.

¹⁸Á yoa Pedro cñhu ti wamomacari mehne ti duhu payochu ñuha Simo. Espíritu Santo tinare to sãachu cñhure ñuha tiro. Á ñuriro jiro, tí tuaare cahmano niñeru mehne wapa duamaha. ¹⁹Ò sehe nimaha Simo:

—Yuhu cñhure waga ahri tuaare. Yuhu cñhu yu wamomacari mehne masa dapupoca bui duhu payoi tai nija Espíritu Santo tinare to sãahto sehe. Á jicu ahri yu yoahiti wapare wapa duaja —nimaha Simo tinare.

²⁰To á nichu tuhoro Pedro ò sehe niha:

—Muhu niñeru mehne Cohamacu ya tuaare mu nuchu duari buhiri mu niñeru mehneta pichacapu wahaga muhu. Cohamacu mu tuhotuare masina. Muhu ñariro jisina. ²¹Á jicu ahrire sã yoaare yoa masierara muhu. Ahri mu yoa baro jierara. ²²⁻²³Paina ti cjuare ñucu suariro jira muhu. Á jicu ñaa yoaare ne duhu masierara muhu. Á jicu ahrire mu ñaa yoirire cahyaga muhu. Cohamacure mu ñaa tuhotuare to bohto sehe siniga muhu. Mu á yoachu ñuno tiro mu ñaa buhirire boboca, pa tehe nino —ni yahuha Pedro tirore.

²⁴To ā nichu tuhoro Simo ō sehe ni yuhtiha tirore:

—Yuhure sini payoga musa Cohamacure mu niriro sehe yu wahaerahto sehe. Tí buhiri pichacapu waha duaeraja yuhu —niha Simo tirore.

²⁵Baharo Pedro João mehne Cohamacu yare yahuha: “Jesu to masa mujachu ñuhi sã”, ni payu Samaria yahpai jia macari macainare noaa buheare buheha. Tinare Cohamacu yare buhe tuhsu, Jerusalēpu tjuaa wahaha.

Felipe Etiopía yahpa macarirore buheha

²⁶Ā yoa Cohamacu yairo anjo Felipere ō sehe ni yahuha:

—Mipure sur sehēpu wahaga. Jerusalē cahai jiri mahapu Gazapu wahari mahapu, masa marienopu jiri mahapu wahaga —ni yahuha anjo Felipere.

²⁷To ā nichu tuhoro tiro sehe tí mahapu wahaa tiha. Baharo tí mahapu cūiro masunore piti bocaro taro niha. To piti bocahtiro jiha Etiopía yahpa macariro puhtoro. Tiro numiare cahmaerariro eunuco masuno jiha. Ā jiro Candace wama tiricoro Etiopía macaricoro puhtorocoro yare niñerure jipihitiare ñu wihboriro jiha. Wiho jiriro jieraha. Tiro Jerusalēpu Cohamacure ño payoro waha tuhsu. ²⁸To ya macapu tunuria mehne tjua taro tiapu waha-parota buhero niha. Cohamacu yare yahu muhtariro Isaia cjiro to joari pūre buhero niha. ²⁹Ā jiro Espiritu sehe Felipere ō sehe ni yahua tiha:

—Siro tunuriapu wahariro cahapu wahaga —niha Espiritu tirore.

³⁰To ā nichu tuhoro Felipe sehe tunuria cahapu muroca wahcā, Isaia cjiro to joarire Etiopía macariro to buhechu tuhoha. Ā tuhoro Felipe ō sehe ni sinituha tirore:

—¿Mu buheare tuho ñahajari muhu? —niha tiro.

³¹To ā nichu tuhoro Etiopía macariro ō sehe ni yuhtiha:

—Pairo yuhure yahu yuhdoriro mariachu noano masieraja yuhu. Ōi yuhure yahu dujii taga yu pari wahpa —ni yuhtiha tiro Felipere.

—Jai —ni nuju suha to cahai.

³²Ā yoa Cohamacu yare Etiopía macariro to buheri pū ō sehe niha:

“Ovejare ti ñaha wajāriro seheta tiro cūhure ñaha wajāahca masa.

Ā jiro ovejacā to pjoare ti sachu to sañurucueraro seheta tiro masuno cūhu dihta marieriro jirohca.

³³Tirore tina bujupeahca.

Ā jia tiro to ñano yoerapachuta tina sehe ñano yoaahca tirore.

Tiro ahri yahpapu to jichu tina tirore wajāahca.

Ā jiro tiro pohna marieriro yariaa waharohca”,

ni joaha tí pūpure.

³⁴Tí pū to ā ni yahuchu ñuno, Etiopía macariro ō sehe ni sinituha:

—Yahuga yuhure. ¿Ō sehe Isaia cjiro to niriro diro baro jicari ahriro? ¿Isaia cjiro to basi yahuro nicari? ¿O pairore yahuro nicari? —ni sinituha Etiopía macariro.

³⁵To ā ni sinitu ñachu tuhoro Felipe sehe tí pūre ñu, Jesu yare yahuha Etiopía macarirore. ³⁶Ā yoa tina tia mehne waha, macapu suha.

—Ñuga, ōi máca jira. Ahri macapu yuhure bautisaga —niha Etiopía macariro.

³⁷[—Jesure mu noano wacū tuachu ñucu muhure bautisaihtja —niha Felipe tirore.

—Jesure wacū tuaja yuhū. Tiro Cristo Cohamacu macuno jira. Tíre noano masija yuhū —niha Etiopía macariro.]

³⁸ Æ ninota tiro tunuria uturitore yusuo dutiha. Tia to yusu caha sūri baharo wijaaha tina. Wijaa, tí macapū sū, ñumurucu sūha tina. Tói ñumurucu sū, Felipe sehe tirore bautisaha. ³⁹ Bautisa tuhsu ti maja surucu suchu Cohamacu to Espíritu Felipere naa wahaha. To Æ wahari baharo Etiopía macariro noano wahcheriro to ya yahpapū tjuaa wahaha. To Æ yoari bato tichu ne pari turi Felipere ñueraha. ⁴⁰ Æ yoa tuhsu Azotopū sūha Felipe sehe. Tuhsu, payu macarine noaa buheare buheha masare. Pū Cesarepū buhe batoa tiha.

Saulo Jesucristore ñūno tirore wacū tua dūcaha

(Hch 22.6-16; 26.12-18)

9 ¹ Wiho mejeta tí pjare Saulo Jesu yainare Æ ñu tuhtirucusinino, “Tinare wajāihtja” nino, tiro sacerdotēa puhtoro cahapū wahaha. ² Tópū sūro tiro joaa pūrīne ō sehe ni siniha sacerdotēa puhtoro:

—Joaa pūrīne waga yuhure yū tuahti pūri cjihtire. Tí pūripū mū wama mū joa payochū, yuhū sehe tí pūri mehne, mū dutiro mehne Damascopū wahaihtja. Tópū sū, judio masa mari buhea wuhusepū Jesu yaina mūa, numia cūhure boca sūcu, tinare ñaha dūhte, ōpū Jerusalēpū na majare tjuaa taihtja —ni siniha Saulo sacerdotēa puhtoare.

³ Tí pūrīne na tuhsu, tiro waha, Damasco cahai to sūro cahachū waro muanopū wacūenoca si siteroca boroha tirore. ⁴ Wacūenoca to Æ si siteroca borochūta tiro yahpapū bora caha sūro, ō sehe ni durucuchū tuhoha:

—Saulo, Saulo, ¿dohseacu mūhū yuhure ñano yoajari? Mūhū yuhū mehne suacu yuhure yuhtieracu, mū basita ñano yuhdura —nino coa taha.

⁵ —Puhtoro, ¿dīro baro jijari mūhū? —ni sinitu ñūha Saulo sehe.
—Yuhūta jija Jesu, mū ñano yoarucuriro —niha Jesu Saulore. ⁶ [To Æ nichū ō sehe ni sinituha Saulo:

—Puhtoro, ¿dohse yū yoachū cahmajari mūhū? —niha Saulo.]

—Wahcārucaga mūhū. Macapū wahaga. Tí macapū mū suchū tó macariro mū yoahitire yahurohca mūhure —niha Jesu Saulore.

⁷ To Æ nichū Saulo mehne macaina sehe to durucua dihtare tuhoha. Wiho mejeta Jesu sehere ñueraha. To Æ wahachū ñūa, cuia, tina durucu masieraha.

⁸ Æ jiro Saulo yahpapū coāriro wahcārūca, to ñuchū to capari bajueraha. Æ jia tina to wamomacare ñaha, Damascopū tuā wahcāa wahaha tirore. ⁹ Tópū sūro, tiro tia dacho waro ne ñuera, chuera, ne sihniera tiha.

¹⁰ Æ yoa cūiro Jesu to buheriro Anania wama tiroto Damascoi jiha. Æ jiro Jesu bajua tiha Ananiare. Æ bajuaro ō sehe ni pisuha tirore:

—Anania, ¿jimajari mūhū? —niha Jesu.

—Jimajā —ni yuhtiha Anania tirore.

¹¹ To Æ nichū Jesu sehe ō sehe ni yahuha tirore:

—Potori Maha wama tiri mahapū wahaga. Æ wahacu Juda ya wuhupū cūiro Tarso macariro Saulo wama tiriore macaga. Tiro Cohamacure sinino nica. ¹² Tiro cahānopure tirore mū yoahitire ño tuhsuhi yuhū. Ō sehe jiare ñūhre tiro: Mūhū mū wamomacarine tiro bui duhu payo, to capari noaa wahachū ñūhre tiro to cahānopure —niha Jesu Ananiare.

¹³ To Æ nichū tuhoro Anania sehe ō sehe ni yuhtiha:

—Puhtoro, tiro mu yainare, noainare Jerusalē macainare nu ñano yoa mujayuhti. Payu masa yuhure ā ni yahure. ¹⁴Ā yoa ō cūhure tiro jipihtina muhure cahmainare peresu yoaro taro niyuhti. Sacerdotea puhtoa tirore ā yoa dutiyuhti —ni yuhtiha Anania Jesure.

¹⁵To ā nichu Jesu sehe ō sehe ni yahuha tirore:

—Tiro Saulo sehe yu beseriro jira. Tiro yu ya buheare judio masa jierainare, ti puhtoare, ā jichu Israe masa cūhure buherohca. Ā jicu wahaga muhu. ¹⁶Payu tahari yu yare yoaro tiro ñano yuhdurohca. Tíre tirore masichu yoaihtja —niha Jesu Ananiare.

¹⁷To ā niri baharo Anania sehe waha, su, Saulo to jiri wuhupu sāaha. Sāa su, to wamomacarine Saulo bui duhu payo, ō sehe ni yahuha tirore:

—Coyeiro Saulo, mu capari mu ñuhto sehe, Espiritu Santo muhu mehne to jihto sehe, to dutiriro seheta mu yoahto sehe, mari puhtoro Jesu sehe mahapu muhure bajuariro yuhure warocahre —ni yahuha Anania Saulore.

¹⁸To ā nichuta to caparire wahi nuturi yoaro sehe bajua to caparipu wahāa pahna borachu ñuha Saulo. To ā ñu tuhsuri baharo to wahcārucu suchu pairo sehe tirore bautisaha. ¹⁹Tirore to bautisa tuhsuchu, tiro sehe chu, tuariro wahaha.

Saulo Damasoi Jesu yare buhe ducaha

Ā yoa Saulo mahaa dachoricā Damasco macaina Jesu yaina mehne jiha.

²⁰Dói tí dachorita tiro judio masa buhea wuhusepu su, Jesu Cohamacu macuno to jiare yahu ducaha masare. ²¹To ā yahuchu ñua jipihtina tirore tuhoina cuaa wahaha.

—Cho, ahriro Jerusalēpure Cohamacu yainare Jesure cahmainare ñano yoariro cjiro jira. Ā yoa tirota jimana ō macaina Jesure cahmaina cūhure ñaha, duhte, sacerdotea puhtoare wiaboriro. Ā yoa duaro ōpure tari jimahre tiro —niha masa tirore tuhoina.

²²Wiho mejeta Saulo sehe cui tuhuturo marieno buhe mihni wahcāa tiha. “Ahriro Jesu potocāta Cristo, marine yuhdohtiro jira”, to ni yahu mihnichu, tó macaina judio masa ti ni yuhti yuhdurucaborirore bocaeraha.

²³Ā jia payu dachori baharo judio masa tirore wajā duaa, ti basi durucua tiha. ²⁴Wiho mejeta Saulo tirore ti wajā duachu masiha to basi. Tina tí macare sahrīno tāa mehne ti yoari sahrīno macaa sopacarire dachopure ñamipu cūhure cohtaa tiha tirore wajā duaa. ²⁵Ti ā wajā duachu ñua ñamipu Saulo buheina tirore puhuro pjiri puhī na sāa, tí maca macari sahrīno baharo buhusehei duhu boroha tirore. Tó sehe ti yoachu yuhduha tiro.

Saulo Jerusalēi jiha

²⁶Ā yoa Saulo Jerusalēpu suro, tópu Jesu yaina mehne tiro ji duamaha. Wiho mejeta tina tirore “Jesu buheriro jierara ahriro” nia, tirore cui niha. ²⁷Ti ā cuipachuta Bernabé sehe tirore na wahcāha Jesu to cūrina cahapu. Ā jiro Saulo mahai Jesure to ñarire, Jesu Saulore to durucurire, ā jichu Damasopu cuirio marieno Jesu yare to buhe ducarire yahuha Bernabé sehe. ²⁸To ā ni yahuri baharo Saulo sehe tina mehne sāano, Jerusalēpu tina mehne jia tiha. ²⁹Tiro cuirio marieno judio masare Jesu yare yahu yuhdurucaro niha. Tina judio masa griego masa yare durucuina jiha. Ā yoa Saulo to ā yahu

yuhdurucachu, tina tirore wajā duamaha. ³⁰Ti ā wajā duachu ñua, Saulo mehne macaina Jesu yaina sehe tirore Cesareapu na duhti wahcāa wahaha. Tópu tirore suho jirucuma Tarsopu warocaha tirore.

³¹Ā yoa jipihtiropu, Judea yahpapu, Galilea yahpapu, Samaria yahpapu cūhure Cohamacu yaina noano jia tiha. Tí pjare ne masa ñano yoaera tiha tinare. Ā jia noano buheha tina. Tina Cohamacu yare buhe, tirore masi namo, noano yuhtia tiha. Ā yoa Cohamacure cua pisaro ñua tiha. Espiritu Santo tinare to yoadohochu tina sehe payu wahaa tiha.

Pedro Eneare noariro wahachu yoaha

³²Ā yoa Pedro jipihtia macaripu waharo, Jesu yaina Lida macaina cahapu cūhure suha tiro. ³³Tópu suro Enea wama tirirore boca suha. Enea pjacu buhariro jiro, ocho cūhmari waro ti pūpaha cūiro coāa tiha. ³⁴Ā jiro Pedro sehe tirore ō sehe niha:

—Enea, Jesucristo mūhure noariro wahachu yoara. Wahcārucaga. Mu pūpaha coāri cahsarore cahnoga —niha Pedro tirore.

To ā nichūta tiro wahcārucaha. ³⁵Ā jia jipihtina Lida macaina, Sarón macaina tirore ñua, tina ti ñaa yoaare duhu, Jesure wacū tuaa tiha.

Dorca wama tiricorore masoha Pedro Jesu to tuaa mehne

³⁶Ā yoa Jope wama tiri macai Jesure ño payoricoro Tabita wama tiri-coro jiha. To wama Tabita griego ya dūsero mehne Dorca jira. Ticoro noaare yoaro payu waa tiha pjacuoinare. ³⁷Ā jiro tí pjare ticoro dohati wahcō, yariaa wahaa tiha. To yariachu ñua, tina ticorore noano cosa, muano macari tahtiapu cūa tiha ticorore. ³⁸Lida wama tiri maca Jope cahai jire. To ā jichu Jesu buheina Jope macaina Pedro Lidapu to jichu tuhorocaa tiha. Ā tuhorocaa, puaro warocaha Pedro cahapu. Tiro cahapu sua Pedrore ō sehe ni yahuha tina:

—Soaro mehne sā jiropu wahaga —ni yahuha tina.

³⁹Ti ā nichu tuhoro tina mehne wahaa wahaha tiro. Tópu tirore ti na suri baharo muano macari tahtiapu na mujaa wahaha tirore. Ā jia jipihtina wape-wahya tiro cahai suruca, tiia tiha. Tabita tina mehne jisininopu payu suhtire yoaa tiha. Ā jia tina to yoari suhti cjirire ñoha Pedrore. ⁴⁰Wiho mejeta Pedro tinare tí tahtiapu jiinare wijaa dutiha. Ti wijaari baharo tiro na tuhcuca caha su, Cohamacure ticorore sini payoha. Ā jiro to pjacu cjirore majare ñu:

—Tabita wahcāga —niha tiro.

To ā nichūta ticoro sehe ñu wahcō, Pedrore ñu, wahcā nuju suha. ⁴¹To wahcā nuju suchu ñu, tiro to wamomacare ñaha, tuā wahcō dapoha ticorore. Ā jiro tiro tó macainare Jesu yainare, wapewahyare pjiroca, ticorore catiricorore wiaha tinare. ⁴²To ā yoari baharo jipihtina Jope macaina tíre masia, payu masa Jesure wacū tua dūcaa tiha. ⁴³Baharo Jopepu Simo wahiquina cahsarire cahnoriro mehne payu dachori Pedro tiro mehne jia tiha.

Pedro Corneliore Jesu yare yahu ducaha

10 ¹Ti pjare Cesareapu cūiro Cornelio wama tiroro jiha. Tiro cien surara puhtoro jiha. Tina surara sehe ti ya curua Italiano wama tiha. ²Cornelio to ya wūhu macaina mehne judio masa jieraina jipahta, Cohamacure ño

payoina, cua pisaro ñuina jiha. Tiro judio masa pjacuoinare yoadohoro payu waha. Ñ yoa dachoripe tiro Cohamacure siniha. ³Cũ numu ñamichahapu tres jichu Cohamacu yairo anjo tiore bajuaha. Ñ bajuaro Cornelio cahapu sãaha.

—Cornelio —niha anjo tiore.

⁴To ã nichu tuhoru Cornelio tiore ñu, cuiro õ sehe niha:

—Puhtoro, ¿yabare cahmajari muhu? —niha tiro.

—Masa pjacuoinare mu warire, Cohamacure mu sinirire Cohamacu noano ñuno nina. ⁵Ñ jicu Jopepu mu muare warocaga. Tõpu Simo Pedro wama tiro jira. Tiore na ta dutiga mu muare. ⁶Tiro paio Simo wahiquina cahsari cahnoriro cahai, pjiri ma duhtu cahai jiri wuhui jira —niha anjo Cornelio.

⁷Anjo ã ni tuhsu, wijaa wahaha. To wijaari baharo Cornelio puaro tiore dahra cohtainare, ã yoa cõuro to surara mehne macarirore pjirocaha. Surara sehe Cohamacure ño payoriro jiro, dachoripe Cornelio yoadohoa tiha. ⁸Ñ jiro Cornelio tinare anjo to yahuri cjirire yahu pahño, Jopepu warocaha tinare.

⁹Ñ yoa pa dachoi Jopepu ti waharo watoi cohari pja jichu Pedro sehe wuhu buipu Cohamacure sinino wahaha. ¹⁰To muja suri baharocã tiore juca purichu chu duaha. Wiho mejeta paina to chware ti dahrero watoi, tiro sehe õ sehe bajuachu ñuha. ¹¹Muanore parĩ muachu, pjiri cahsaro pititia sohtoarire duhteri cahsaro to duji tachu ñuha. ¹²Tĩ cahsaro puhichapure payu wahi-quina bua tiniina, chihchõina, wuina peri cõhu jiha. ¹³Tĩre to ñuri baharo, Pedro durucuro coa tachu tuhoha:

—Pedro, wahcãrucaga. Ahrinare wajã chuga —nino coa taha tiore.

¹⁴To ã nipachuta Pedro õ sehe niha:

—Puhtoro, ne tina barore chueraja yuhu. Ñainare, Cohamacu to chu dutie-rainare ne chuera tihi yuhu —niha Pedro.

¹⁵To ã niri baharo Pedro pari turi durucuro coa tachu tuhoha:

—Cohamacu “Noaina jira”, to nirinare “Ñaina jira”, nii tjia muhu tinare —nino coa taha Pedore.

¹⁶Ñ yoa tia taha ti ã ni durucuri baharo tĩ cahsaro muanopu mujaa wahaha tjoa. ¹⁷To ã mujaa wahari baharo, Pedro tuaro wacũ “¿Dohse ni duaro nijari ã bajuaro?” ni tuhoutuha tiro to basi. To ã ni tuhoutu watoi Cornelio mua to warocaina sehe Simo ya wuhupu suha. “¿Simo ya wuhu nohopu jijari?” ni, ti sinituri baharo to ya wuhupu suha tina. ¹⁸Su, tina sinitu ñu bahrañoha. “¿Simo Pedro wama tiro ahri wuhui jijari?” ni sinitu ñuha tina. ¹⁹Ñ jiro Pedro to tuhoutu watoi Espĩritu Santo tiore õ sehe ni yahuha:

—Ñuga. Tiaro mua muhare macaa nina. ²⁰Wahcãrucaga. Dujiaga. Tina mehne wahaga. Jiape ni tuhotueta wahaga noano mehne. Yuhu sehe tinare õpure warocahi —niha Espĩritu Santo Pedore.

²¹To ã nichu tuhoru Pedro ti cahapu duja wahaha.

—Ñuga. Õi jija yuhu musa maca tariro. ¿Dohse yoana tana niri musa yu cahai? —niha Pedro tinare.

²²To ã nichuta tina sehe õ sehe niha:

—Cornelio cien surara puhtoro, noare yoiriro, Cohamacure cua pisaro ñuriro, jipihtina judio masa “Noariro”, ti niriro muhare pji ta dutiro warocahre sãre. Cohamacu yairo anjo Cornelio muhare pji dutyuhti. Õ sehe niyuhti: “Pedrore mu wuhupu na ta dutiga mu muare. Ñ yoa tiro muhare to

yahuchu, noano tuhoga tirore”, ni pji dutiyuhti anjo Corneliore —ni yahuha Cornelio Pedrore to pji dutirina sehe.

²³ Ti ā nichu Pedro sehe tinare sā ta duti, chuwa, to jiri wuhupu cari dutiha tinare. Pa dachoi Pedro wahcā, tina mehne wahaa wahaha. Ā yoa paina Cristo yaina Joep macaina Pedrore piti ti wahcāha.

²⁴ Pa dachoi tina Cesareapu suha. Ti suhto panocā Cornelio sehe to coyeare, tiro mehne macaina cūhure pji cahmachu, Pedrore cohtaa niha.

²⁵ Ā jiro Pedro Cornelio ya wuhu cahapu to tachu űuno Cornelio sehe tirore piti boca wijaa, to dahpori cahai caha suha. ²⁶ Wiho mejeta Pedro tirore na wahcō ō sehe niha:

—Ducuga muhu. Yuhu cūhu mu yoaro seheta jiro jira —niha Pedro tirore.

²⁷ To ā ni tuhsuri baharo Cornelio tirore na sāa wahaha to ya wuhupu. Tōpu sāa sūro masa peri tí wuhupu cahmachu tirore cohtainare űuha Pedro. ²⁸ Tinare űuno ō sehe ni yahuha tinare:

—Judio masuno jipaihta pa curua macaina masa mehne jicu, masa wuhusepu sāacu, judio masa sā dutiare yuhdurūcai nija yuhu. Tíre noano masina masa. Wiho mejeta pa curua macainare “űaina jira”, yuhure ni dutierare Cohamacu. Tíre ni yahuhre yuhure tiro. ²⁹ To ā nichu tuhocu ōpure masa cahapure tahi. Masa yuhure pjirocachu “Ne wahaeraja”, nierahi. ¿Dohse jiro baro yu ōpu tachu cahmari masa? —niha Pedro tinare.

³⁰ To ā nichu tuhoro Cornelio sehe ō sehe niha:

—Pititia dachori wahara, Cohamacu yairo anjo yuhure to bajuari baharo. Tí dachore tres jichu, ahri hora waroihta Cohamacure yu sinino watoi anjo minoa suhti tiriyo yu cahai ducuhre. ³¹ Ā ducuro tiro yuhure ō sehe nihre: “Cornelio, muhu Cohamacure mu sinichu tiro tuhohre. Ā yoa pjacuoinare ti cahmaare mu wachu noano masino, Cohamacu muhure yoadohorohca. ³² Ā jicu Joepu mu muare warocaga, Simore, Pedro wama tirirore mu cahapu ti na tahto sehe. Tiro pairo Simo wahiquina cahsari cahnoriro ya wuhui, pjiri ma duhtu cahai jiri wuhui jira tiro. Mu cahapu wihiro muhure yahurohca”, ni yahuhre yuhure tiro. ³³ To ā nichu tuhocu dóicāta yu muare muhure na ta duticu warocahi yuhu. Ā jicu noano yocu tari jira muhu sā cahapure. Ā jina sā jipihtina ōre Cohamacu to űurocaroi jina nija sā. Jipihtiare Cohamacu muhure to yahu dutirore tuho duana, cohtahi sā —niha Cornelio Pedrore.

Pedro Jesu yare yahuha

³⁴ To ā nichu tuhoro, Pedro ō sehe ni yahuha:

—Mipu masija. Potocā tjira. Cohamacu cūno potori noano yoara marine. ³⁵ Ā jiro jipihtia macari macaina Cohamacure cua pisaro ti űuchu, noare ti yochu Cohamacu sehe tinare űu wahchera. ³⁶ Cohamacu sā judio masa cahai Jesucristore noaa buheare yahuhtirore warocare. Masa Cohamacu mehne noano ji masica Jesu to yaria masa mujano mehne. Tí buheare masa masina. Jesucristo sehe jipihtina masa puhtoro jira. ³⁷ João bautisariro masare, “Masa űaa yoari buhiri tiare masiga”, ni yahu, to bautisari baharo, Galileapu noaa buheare Jesu sehe yahu ducare. Baharo Judea yahpapu cūhure tí buheare yahu pahñore. ³⁸ Ahriro Jesu Nazare macarirore Cohamacu sehe to tuaare Espíritu Santo mehne to yoa masihtire ware Jesure. Ā jiro Jesu noano yoaro wahare. Ā waharo watia sāanohrinare, űano yuhduinare jipihtinare noaina

wahachu yoare. Cohamacu Jesu mehne jiri jire. ³⁹ Judea yahpai, Jerusalē cūhure jipihtia to yoirire sã ñuhi. Baharo tina crusapũ cã puha wajähre tirore. ⁴⁰ Wiho mejeta tia dacho wahaboroi Cohamacu tirore masori jire. Maso, Jesure sãre bajuachu yoari jire Cohamacu. ⁴¹ Tí pjare Jesure jipihtina ñuerare. Sã dihtare bajuahre tiro. Cohamacu to cahmainare, Jesure ñu, painapure yahuhtinare panopũ sãre beseha. Sã sehe Jesu to masari baharo tiro mehne chu, sihnihi. ⁴² Ä jiro tiro sãre õ sehe ni dutihre. “Masare õ sehe ni yahuga. Yuhu Jesu jipihtina catinare, yariaina cjiri cūhure ti ñaa yoari buhiri tiare yahuhtiro buhiri dahrehtiro yũ jichu yoare yūhure Cohamacu. Ä jina tíre masare yahuga”, ni dutihre Jesu sãre. ⁴³ Dohse jiina baro Jesure ti wacũ tuachũ ñũno Cohamacu ti ñaa yoari buhiri tiare borohca. Tíre jipihtina Cohamacu yare yahu muhtaina cjiri panopũ macaina yahuyuha —ni yahuha Pedro.

Judio masa jierainapũ cūhure Espiritu Santo sãarucu sua wahaha

⁴⁴ Tí jipihtiare to ä ni yahuro watoi, jipihtina tíre tuhoinapure Espiritu Santo sãarucu sua wahaha. ⁴⁵⁻⁴⁶ Tinapure to sãarucu sua wahachu, tuho mahnoeraa duseri mehne wahchea mehne durucu ducaha tina. Tí duseri mehne Cohamacure “Tuariro, noariro jira muhu”, nia niha. Ti ä nichu tuhoha Pedro mehne tarina judio masa, Jesu yaina. Ä tuhoa Espiritu Santo judio masa jierainapũ cūhure to sãarucu su yoadohochu ñua, judio masa sehe cuaa wahaha. Ä jiro Pedro õ sehe ni yahuha judio masare:

⁴⁷ —Mari yoaro seheta Espiritu Santore cjuara ahrina cūhu. Ä jina tina bautisa duaa ti sinichu, tinare, ducataena tjijihna —niha Pedro tinare.

⁴⁸ Ä ni tuhsu judio masa jierainare Jesu yaina ti jiare ñohto sehe bautisa dutiha Pedro. Ti ä yoari baharo “Sã mehne mahaa dachoricã tjuasiniga”, niha tina Pedro cūhure.

Pedro Jerusalē macainare Jesu yainare yahuha

11 ¹ Ä yoa judio masa jieraina cūhu Cohamacu yare ti noano cahmachu Jesu to cūrina sehe ti coyea Judeapũ jiina mehne tuhorocaha. ² Ä jia Pedro Jerusalēpũ to tju suchu ñua judio masa Jesu yaina mahainacã tirore õ sehe ni tuhtiha:

³ —¿Judio masa jierainare dohse jiro baro ñui suri muhu? ¿Dohse jiro baro tina mehne churi muhu? —ni tuhtiha Pedore tina.

⁴ Ti ä nichu tuhoro Pedro to yoari cjirire yahu pahñoha tinare. Õ sehe ni yahuha:

⁵ —Yuhu Jopepũ jicu Cohamacure sinii nihi. Ä jiro yūhure õ sehe bajuahre. Pjiri cahsaro pititia sohtoarire duhteri cahsaro muanopũ yũ cahai to duji tachũ ñuhi. ⁶ Ä jicu tí cahsarore noano ñuhi “¿Yaba baro tí cahsaropure jijari?” nicu. Ä jicu ñuhi tí cahsaropure jiinare: Tí cahsaro puhichapure payũ wahiquina, bua tiniina, chihchõina, waina peri cūhu jire. ⁷ Ä jicu yūhure to durucuchũ tuhohi. “Pedro, wahcãrucaga. Wajã chũga ahrinare”, nino coa tahre yūhure. ⁸ To ä nichu tuhocu õ sehe nihi yuhu: “Puhtoro, ne tina barore chueraja yuhu. Ñainare, Cohamacu to chu dutierainare ne chuera tihi yuhu”, nihi yuhu. ⁹ Wiho mejeta muanopũ pari turi yūhure durucuro coa tahre tjoa. “Cohamacu ‘Noaina jira’ to niinare, ‘Ñaina jira’, nii tjia muhu”, nino coa

tahre yuhure. ¹⁰ Æ jiro tia taha sã ã ni durucuri baharo tí cahsaro muanopu mujahre tjoa. ¹¹ Yu ã ñuno watoi tiaro mua sã jiri wuhupu suri jihre. Tina Cesarea macariro to warocarina jiri jihre. ¹² Æ jiro Espiritu Santo sehe yuhure tina mehne waha dutiro, “ ‘Tina ñaina jira’ nii tjia tinare”, ni yahuhre yuhure tiro. Æ jia ahrina seis mehne yu coyea Jesu yaina mehne Cesarea macariro ya wuhupu sãahi sã. ¹³ Æ jiro tiro sãre ò sehe ni yahuhre: “Anjo yu wuhui ducuchu ñuhi yuhu. Ò sehe ni yahuhre yuhure: ‘Jopepu Simore Pedro wama tiriore na ta dutiga. ¹⁴ Tiro muhure mu coyea mehne musare jipihtinare pichacapu wahaborina musa yuhduhtore yahurohca’, nihre anjo yuhure”, ni yahuhre Cesarea macariro yuhure. ¹⁵ Æ yoa yu durucuro watoi Espiritu Santo sehe tinapure sãarucu suahre, marine to yoa muhtariro seheta. ¹⁶ Æ jicu Jesu to yahurire wacūhi yuhu. Ò sehe ni yahuhre tiro: “João musare bautisaro, copu yoamahre. Yuhu sehe tí yuhdoro yoaihtja musare”, ni yahuha. ¹⁷ Æ jiro Jesucristo mari puhtoro mari wacū tuachu ñuno Cohamacu to Espiritu Santore wahre marine. Æ jiro Cohamacu marine to Espiritu Santore to wariro seheta judio masa jieraina cūhure tiro wahre. Cohamacu to ã yoachu ñucu tiore yuhduruca masieraja yuhu —niha Pedro tinare, judio masare Jesu yainare.

¹⁸ To ã nichu tuhoa, tina tiore ne ni namoeraha. Æ ni namoeraa, Cohamacure wahche payo, tina ò sehe niha:

—Tí pja pini judio masa jieraina cūhure Cohamacu cahīri jira. Ti ñaa yoari buhiri tiare masi, Cohamacure cahma, tina cūhu Cohamacu mehne ã catirucuahca —niha tina.

Antioquíai paina Jesu yaina jiha

¹⁹ Æ yoa Estebãre ti wajãri baharo masa Jesu yainare ñano yoaha. Ti ã yoachu ñua Jesu yaina duhti sitea wahaha. Æ jia tina Feniciapu, Chiprepu, Antioquíapu cūhure waha site, tópure judio masa dihtare Cohamacu yare yahua timaha tina. ²⁰ Wiho mejeta paina Jesu yaina mehne macaina Chipre macaina, Cirene macaina, Antioquíapu su, judio masa jierainare Jesu yare buheha Cohamacu tinare to yuhdohto sehe. ²¹ Ti ã buhechu, Cohamacu tinare yoadohoha. Æ jia masa payu Cohamacure cahma dūca, mari puhtoro Jesure wacū tuaha.

²² Æ yoa “Antioquía macainapu Jesure cahmaca”, ni tuhorocaha Jerusalē macaina Jesu yaina. Ti ã tuhorocari baharo Jerusalē macaina Bernabé wama tiriore Antioquíapu warocaha. ²³ Tópu suro, Cohamacu yoadohoha mehne judio masa jieraina to yaina ti wahachu ñuno, tuaro wahcheha. Tuaro wahche, tiro tó macainare ò sehe ni yahuha:

—Jesure ã wacū tuarucuga. To yare ne duhuena tjiga —ni yahuha tiro jipihtina tinare.

²⁴ Bernabé noariro jiro, Espiritu Santo dutiare yoariro Jesure noano wacū tuaha tiro. Æ jia to buheri baharo Jesure wacū tuaina payu waha namoha tjoa.

²⁵ Baharo tiro Tarso wama tiri macapu Saulore macano wahaha. ²⁶ Tópu tiore boca suha. To boca suri baharo Antioquíapu na majare tjuaaha Saulore. Tópu ti suri baharo cū cūhma waro tina Cohamacu yaina mehne cahmachu, payu masare buheha tina. Æ jia Antioquíapu Cristo yaina Cristiano wama ti dūcaha.

²⁷Tí pjare Cohamacu yare yahu muhtaina Jerusalēpu jiina cjiri waha, Antioquíapu suha. ²⁸Ā ti suri baharo tina mehne macariro Agabo wama tiro Jesu yaina watoi ducuro, Espiritu Santo to tuaa mehne yahuha tinare. “Jipihtiro yahpapure tuaro jucaro waharohca”, ni yahuyuha tiro. Tí pjare chuua marieni pja jichu jipihtina bui puhtoro Claudio jiha. ²⁹Ā jia Cristo buheina, jipihtina ti cjuaro puro ti coyeare wa duaa ti basi cahma durucuha. “Judea yahpa macaina Jesu yainare niñerure warocajihna”, niha tina ti basi. ³⁰Ti ā niri baharo Bernabé Saulo mehne tí niñerure na wahcābasaha. Tópu sua Judea yahpa macainare Jesu yaina puhtoare waha tí niñerure pja cuoi-nare tju wa dutia.

Pedrore peresu yoaha

12 ¹Tí pjare puhtoro Herode cāinare Jesu yainare ñano yoa ducaha. ²Tiro João wahminore Santiago sehere yoari pji mehne to wajā dutichu paio sehe tirore wajāha. ³Santiagore to wajāchu judio masa wahcheha. Ti wahcheare Herode masino, “Ā dihta cahmana tina”, nino Pedro cūhure peresu yoaha. Tí dachorire bucuaerari pāore ti chuhti bose numuri pascua jiha.

⁴Ā jiro Herode Pedrore ñaha, peresu yoaha. Peresu yoa diez y seis surarare cohta dutiha tirore. Pititiaro surara cohtaha tirore. Baharo pititiaro ti cohtotaina tirore cohta mujaa tiha. Āta yoaha tina diez y seis surara. Herode sehe pascua baharo Pedrore peresupu jiriore masa panoi duhu dapo duamaha tirore wajā dutiro taro. ⁵Ā jiro Pedro peresupu jiha. Tópu to jichu Jesu yaina sehe Cohamacure tuaro sini payorucua niha tirore.

Cohamacu peresupu jiriore Pedrore wioha

⁶Ā yoa ñamine Pedro puaro surara mehne comaa dari mehne ti duhteriro jiha. Ā ti duhteriro jiro, ti watoi carīno niha. Ā yoa paina surara sopacai cohtarucua niha tirore. Tí ñami bohrearo Herode Pedrore judio masa panoi duhu dapo duamaha tirore wajā dutiro taro. ⁷Wacūenoca Cohamacu yairo anjo Pedro cahai to ducuchu to peresu jiri tahtia buhria phtia wahaha. Ā jiro anjo Pedro cahai ducuro Pedro patipahmai be careha, tirore wahcōno.

—Cjero wahcārucaga —niha tiro Pedrore.

To ā nichuta to wamomacarine ti duhtea dari comaa dari parī site boraa wahaha. ⁸Ā yoa anjo tirore ō sehe ni yahuha:

—Tuā dihoga mu tuā dihori dare. Mu dahpo suhti cūhure sāaga —niha tiro.

To ā nichu Pedro sehe to niriro seheta yoaha.

—Mu bui macari suhtirore sāa, yuhu mehne wahaga —niha anjo.

⁹To ā nichu tí tahtiapu jiro wijaa, anjo baharo wahaa wahaha tiro. Ā wahaparota ō sehe ni tuhotumaha tiro. “¿Ahri potocā jieracari? ¿Cahāi nicari yuhu?” ni tuhotumaha tiro. ¹⁰Ā yoa tina to jiri tahtia sopacai ducuiua surare yuhdu wahcā, paina yoawacūno ducuiua cūhure yuhdu wahcā, pjiri sopacapu suha. Tí sopa pahma, comaa pahma macapu wahari mahare ducari pahma jiha. Tí sopa pahma to mu suro parīchu tina wijaa wahaha. Wijaa waha, tina mahapu mahano wahachuta, anjo sehe buti mua wahaha. Ā jiro Pedro cūirota tjuaha. ¹¹Ā tirore anjo to wahari baharo to yoirire Pedro

masiha. Õ sehe ni tuhotuha tiro. “Potocã tjira. Anjo Cohamacu to warocariro peresupu jirirore yuhure wioro wihihre. Mipu tîre masija to â yoirire. Judio masa sehe yuhure ti ñano yoaborire Cohamacu sehe tinare yoa dutierare. Æ jiro yuhure, Herode to peresu yoirirore wiohre”, ni tuhotuha Pedro.

¹²To â ni tuhoturi baharo Maria João pocoro ya wuhupu suha Pedro. João sehe pa wama Marco wama tira. Tí wuhupu masa payu cahmachu, Cohamacure sinia niha. ¹³Tí wuhupu suro, Pedro sopa pahmare dotaha. Cûcoro ti cahamacono Rode wama tiricoro to dotachu tuhoro, ñuno suha ticoro. ¹⁴Æ yoa Pedro ticorore to pisuchu tuhoro to durucua tuho masi, tuaro wahche, sopa pahmare pjôboricoro pjôeraha. Pedro tói to ducuchuta ticoro majareruca mûroca sâa wahaha painare yahuro waharo.

—Pedro sopacapu wihihre —ni yahuro sâaha.

¹⁵To â nichu tuhoa, tí wuhui jiina sehe:

—Æ ninocaco nica muhu —niha tina ticorore.

—Potocã tjira. Potocã nicota nija —niha ticoro.

To â nichu tuhoa:

—Tiro jieraca. To yairo anjo wihiro nica —nimaha tina sehe.

¹⁶Ti â nino watoi Pedro sopa pahmare âta dotarucuro niha. To â yoachu tuhoa, tina sopacare pjôo, tirore ñu, cuaa wahaha. ¹⁷Æ jiro tiro Pedro to wamomaca mehne “Dihta mariaha” ni, Cohamacu peresupu tirore to wiorire yahuha tinare:

—Ahrire yahuga musa puhtoro Santiagore, paina Jesu yaina cûhure —niha tiro.

Æ ni yahu tuhsu tiro pa sehupu yuhdu wahcâa wahaha.

¹⁸Æ yoa bohrea bora tachu surara Pedro to dohse yoa wijaarire ne masieraha. Æ masieraa cuaa wahaha. ¹⁹Æ jiro Herode Pedrore maca dutimaha. Æ dutiro tiro surarare peresu cohtainare to sinituri baharo tinare wajâ dutiha Herode sehe. Æ jiro Herode Judeapu jiro waha, Cesareapu jiro wahaha.

Herode yariaa wahaha

²⁰Æ yoa Tiro wama tiri maca macaina mehne, Sidô macaina mehne Herode sehe suaha. To â suachu ñua tí macari macaina sehe Herode tina mehne to suarire cahnoa waha, tiro mehne durucua wahaha. Æ jia to docai jiro puhtorore Blasto wama tirirore piti tiha. Æ jia tina Blasto to yoadohoro mehne Herode cahapu suha. Tiro cahapu sua, ò sehe niha:

—Mari noano jijihna. Mari basi ñu tuhtiena tjijihna —ni siniha tina Herodere.

Tina ya yahpa macaina Herode ya yahpai chuare boca tiha. Æ jia Herode tinare ñu tuhtichu cahmaeraha tina. ²¹Æ yoa Herode to quihôri dachoi, puhtoro to sâa suhti noaa suhtire sâa tiha tiro. Æ sâano tiro to dujiroi duji-tjiâhno, masare durucu ñoa tiha. ²²To â durucu ñochu tuhoa masa sehe ò sehe ni sañurucuha:

—Ahriri durucuriro masuno jierara. Cohamacu jira —ni sañurucu payomaha tina Herodere.

²³Ti â nichuta Cohamacu yairo anjo Herodere dohatichu yoaha. Cohamacure ño payoeraro, “Cohamacu jieraja yuhu”, ne nieraha Herode. To â nierari buhiri anjo tirore dohatichu yoaha. To â dohatichu tirore dachoa chu wajânocaha.

²⁴ Ñ yoa Jesu yaina payu masare Jesu ya buheare buhea tiha.

²⁵ Ñ jia Bernabé, Saulo mehne buhe tuhsu, Jerusalēpu tjuua wahaha. Ñ jia João Marco wama tirirore tina na wahcāha tina mehne.

Jesu yaina Bernabére Saulo cūhure Cohamacu yare buhe dutia warocaha

13 ¹ Tí pjare Antioquípu Cohamacu yaina mehne macaina Cohamacu durucuare yahu turiaina jiha. Ñ yoa Cohamacu to joa na dutiri cjirire, Jesu yaina ti yoaa tiare yahuina cūhu jiha. Bernabé, Simo Negro wama tiro, Lucio Cirene macariro, Menahem, Saulo mehne tina jiha. Menahem sehe puhtoro Herode cjiro mehne tina puaro cūno potori bucuaina jimaha. ² Cū numu tina Jesu yaina chu duhu, Cohamacu yare ti buhero watoi Espiritu Santo o sehe ni yahuha tinare:

—Bernabé, Saulo mehne cūga yu cahmano sehe yoahinare. Tíre yoahinare bese cūi nija tinare —niha Espiritu Santo.

³ To ñ nichu tina sehe chu duhu namo, Cohamacure sini, Bernabé dapu bui Saulo dapu bui ti wamomacarine duhu payoha. Ñ duhu payoa tinare buhe dutia warocaha.

Chiprepu Jesu to cūrina buheha

⁴ Ñ jia tina Espiritu Santo to warocaina jia, Seleuciapu su, tí macare dohopiapu samu, Chipre wama tiri nucopu pahāha tina. ⁵ Ñ pahāa, Salamina wama tiri pitamahapu wahā suha. Tí macai judio masa buhea wuhusepu, Cohamacu yare yahu ducaha tina. Ñ yoa João Marco cūhu tina mehne jiro, tinare yoadohoha. ⁶ Tuhsu, tina tí nucu sohtoai maja, tí nucu topai jiri macapu Pafu wama tiri macapu sua, yairore boca suha tina. Tiro judio masuno, Barjesu wama tiro jiha. Barjesu griego ya mehne nia Elima ti ni pisuriro jiha. “Cohamacu yare yahu muhtariro jiha yuhu” ni, masare mahñoperucuriro jiha tiro. ⁷ Ñ yoa tiro Sergio Paulo wama tiro mehne macariro jiha. Sergio Paulo sehe tí nucu macaina puhtoro masi pahñoriro jiha. Ñ jiro Cohamacu yare tuho duaro tinare Bernabé, Paulo mehne pjirocaha tiro. ⁸ Wiho mejeta Elima yairo sehe tinare buhe dutieraha. Tiro Sergio Paulo Jesu yare to ño payochu cahmasāaeraha yairo sehe. Ñ jiro Sergio Paulore Cohamacu yare cohā dutiro nimaha. ⁹⁻¹⁰ To ñ dutipachuta Saulo, Paulo ti niriro Espiritu Santo dutiare yoiro jiro yairore noano ñu diho cū tirore o sehe ni yahuha:

—Muhu mahñoa payuriro, ñariro, watino to dutiare yoiro, noaare ñu yabiriro jira muhu. ¿Dohseacu Cohamacu yare “Ñaa jira. Mahñoa jira”, ñ nirucujari muhu? ¹¹ Muhu ñ yoiro jicu Cohamacu muhure to pihachu capari bajuerariro jiiha muhu. Ñ jicu mahaa dachoricā muhu ahri dachore ñusini —niha Paulo.

To ñ nichuta tiro yairo sehe me yoiro sehe jiare ñu muhtano, baharo nahitiano dihtare ñuha. Ñ jiro tirore tuāhtirore macaha tiro. ¹² To ñ wahachu ñuno, Sergio Paulo sehe Jesu yare “Potocā tjira”, ni masiha. Mari puhtoro yare tiro tuho, cuua waha, Jesure wacū tua ducaha.

Paulo Bernabé mehne Antioquíai Pisidia yahpai jiri macai jiha

¹³ Ñ yoa Paulo cūhu Pafopu jiina dohoria mehne pahā turia waha namo, Pergepu suha. Perge Panfilia yahpau jira. Tópu su, João Marco tinare cohā

wahcā, Jerusalēpu majare tjuaa wahaha. ¹⁴To ā wahapachuta tina sehe Pergepu jiina waha namo, Antioquāpu suha. Antioquā Pisidia yahpapu jira. Tōpu sua, Sabado dacho jichu tina judio masa buheri wuhupu sāa su, tōpu dujiha. ¹⁵Tí wuhu macaina puhtoa Cohamacu dutiare, Moise cjiro masare to cūrire, ā yoa Cohamacu yare yahu muhtaina cjiri ti joari cjirire ti buhe ñori baharo tina pjirocaha Paulo cūhure:

—Coyea, ¿masare wahchechu yoahti cjihti musa yahu duaa jijari? Tíre yahu duana, yahuga michapucacā —niha tí wuhu macaina puhtoa.

¹⁶Ti ā nichu tuhoru, Paulo wahcārucu su, “Durucena tjiga”, nino to wamomaca mehne cjā tuha. Ti dihta mariachu ñu, tiro ō sehe niha:

—Israe masa, ā yoa musa Israe masa jieraina, Cohamacure ño payoina, tuhoga musa. ¹⁷Mari ñuchusuma cjiri Cohamacure ño payoa tiha. Tina cjirire Cohamacu besea tiha. Á jia mari ñuchusuma cjiri yoari pja Egiptopu jia tiha paina jipahta. Tōpu ti jichu Cohamacu noano yoaa tiha tinare. Á jia payu masaputia tiha tina. Ō sehe yoaa tiha tinare. Tinare Egiptopu jia inare to tuua mehne wioa tiha Cohamacu. ¹⁸To ā wiori baharo tina cuarenta cūhmari waro masa marienopu tinia tiha. Tōpu tirore ti yuhdūrucachu Cohamacu āta tuhotunocaa tiha. ¹⁹Tuhsu, Canaa wama tiri yahpature siete curuari macainare cohā tuhsu, Cohamacu tí yahpare waa tiha Israe masa sehere. ²⁰Israe masa Egiptoi ti ji ducachu, pu Cohamacu ahri yahpare to wachupu cuatrocientos cincuenta cūhmari waro yuhdua tiha. Baharo Israe masare dutihtinare cūa tiha Cohamacu tinare. Pu, Cohamacu to cūrina Samue to jichupu ji batoa tiha. Samue sehe Cohamacu yare yahu muhtariro cjiro jia tiha.

²¹‘Baharo Israe masa sehe ti puhtoro cjihtore macaa tiha. Á jia Cohamacure sinia tiha. Ti ā sinichu ñuno Cohamacu Saulo cjirore cūa tiha tinare. Saulo cjiro Cis macuno jiro, Benjami ya curua macariro jia tiha. Á yoa cuarenta cūhmari waro ti puhtoro jihtiro cjihtore cūa tiha Cohamacu tiro cjirore. ²²Cohamacu Saulo cjirore to cohāri baharo Davi cjirore cūa tiha tiro. Ō sehe nia tiha Cohamacu Davi cjirore: “Davi Jesé macunore bocahi yuhu. Tiro mehne wahcheja yuhu. Tiro yu cahmaare yorohca”, nia tiha Cohamacu. ²³Ahriro Davi cjiro to panamino ji turiariro jira Jesu. Cohamacu Jesure cūri jire Israe masare yuhdohtiro cjihto. “Masare noano yoaihca”, niha Cohamacu. To niriro seheta yoare tiro. ²⁴To ā yoahto pano Jesu to tahto pano João cjiro ō sehe ni buheri jire: “Musa ñaa tuhotumari cjirire tuhotu cohtota, Cohamacure macaga. Á yoana bautisarina jiga”, ni buheri jire João cjiro jipihtina Israe masare. ²⁵João cjiro to buhe batoahto pano, to yariahto pano ō sehe ni yahua tiri jire: “¿Diro baro jijari yuhu, musa tuhotucha? Cristo jieraja yuhu. Pairo jija. Á jipachuta tuhoga yuhure. Yu baharo yu yuhdoro tuariro tarohca. Tiro noa yuhduariro jira. Tiro yoaro sehe jieraja yuhu”, ni yahuha João cjiro masare.

²⁶‘Coyea, Abrahā panamana, jipihtina Cohamacure cua pisaro ñuina marine ahri to yuhdohtore yahua buheare warocari jire Cohamacu. ²⁷Jerusalē macaina ti puhtoa mehne Sabado dachori jichu Cohamacu yare yahu muhtaina cjiri ti joarire buhepahta noano tuho ñahaerari jire. Á tuho ñahaera, Jesu tinare yuhdohtiro to jichu cūhure masierari jire. Tina ā masierapahta Jesure wajā dutiha. Á yoaa Cohamacu yare yahu muhtaina cjiri ti joariro seheta yoaa niha. ²⁸Tirore ti wajāhto pano tina Jesure yahusāmaha.

Wiho mejeta to ñaa yoaerapachuta tina Pilatore Jesure wajã dutia taa, siniha. ²⁹ Ñ yoa, panopu ti joariro seheta Jesure yoa tuhsu, tirore crusapu jirirore na boro, masa copapu tâcai ti sahari copapu na sãa, duhu payoha tirore. ³⁰ Tirore ti ã wajãpachuta tiro to yariari baharo Cohamacu masori jire tirore. ³¹ Ñ jia Galileapu taina Jerusalêpu tiro mehne suina payu dachori tirore yaria masa bajuarirore ñua tiri jire. Ñ jia mipure tirore ti ñurire masare yahuhre tina.

³²⁻³³ Ñ jina noaa buheare yahuja sã musare. Cohamacu mari ñuchusuma cjirire “Masare noano yoaihca”, panopu to niriro seheta mipure marine tinare ji nunu ti turiainare yoahre. Tíre to yahuri cjirire ò sehe yoahre tiro. Cohamacu Jesure masori jire. Ñ jina Jesure to masorire yahuja musare. Salmo capítulo dosre panopu to joariro seheta ã wahari jire: “ ‘Muñu yu macu jira. Michare muhure yuhu mu Pucu jiare masichu yoahi’, nina Cohamacu to macunore”, ni joaa tiha panopu. ³⁴ Ñ jiro Cohamacu Jesure to masohtire pari turi to yariaerahtore yahuyuro ò sehe ni yahu joaa tiha Salmo joariro. “ ‘Davire yu pja ñuriro seheta tirore yu niriro seheta potocãta noano yoaihtja musa cûhure’, nire Cohamacu”, ni joaa tiha. ³⁵ Tuhsu, pa Salmo cûhure ò seheta ni yahua tiha: “Cohamacu mu yairo ñaa buhiri marieriro to pjacure baa dutierara muñu”, ni joaa tiha. ³⁶ Ñ jiro Davi Cohamacu to cahmariro seheta to jisiniri pja macainare yoadohoha. Baharo tiro yariaa wahaha. To yariari baharo to pucusumare ti joariro seheta masa copapu siõ sãaha tiro cûhure. Ñ jiro tiro baa wahaha. ³⁷ To ã baapachuta ahriro, Cohamacu to masoriro sehe ne baaerare. ³⁸ Ñ jina musa yu coyera ahrire masiga: Jesu to yariaro mehne Cohamacu mari ñaa yoi buhiri tiare to cohãhtore musare yahuja sã. ³⁹ Ñ jiro Jesure wacû tuainare Cohamacu ti ñaa ñano yoa, buhiri tiare bonocanohca. Wiho mejeta Moise cjiro to cûri dutiare musa yoi mehne musa ñaa yoi buhiri tiare ne cohãsi Cohamacu. ⁴⁰ Ñ jina noano yoaga. Musa noano yoaerachu Cohamacu yare yahu muhtaina cjiri ti joariro seheta musare wahaboca. Ò sehe ni joaa tiha:

⁴¹ “Tuhoga musa.

Cayoa payuina, yuhure ñu tuhtiina jira musa.

Yu ò sehe yoachu cuiga musa.

Ñ jina pichacapu wahaga.

Musa jia dachorire musare yoa ñoihtja.

Yu ã yoa ñochu ñupanahca ‘Potocã tjira’, nisi musa.

Pairi tíre musare to noano yahupachuta ‘Potocã tjira’, nisi musa”,

ni joaa tiha Cohamacu yare yahu muhtariro cjiro —ni yahuha Paulo tinare.

⁴² To ã ni yahuri baharo judio masa buheri wuhupu ti wijaaari baharo, masa sehe tinare ò sehe ni siniha:

—Pa somanapu Sabado jichu sãre ahrire buhega tjoa —ni siniha tina Paulore.

⁴³ Ñ yoa tí wuhupu jirina wijaa, judio masa payu, judio masa jieraina cûhu Paulo cûhu mehne wahaha. Judio masa jieraina sehe judio masa yare Cohamacu warore ti ño payoa tiare buheina jiha. Ti ã wahachu Paulo, Bernabé mehne noano yahuha tinare: “Cohamacu musare cahina. Ñ jina tirore ño payoina, wacû tuaina ã jirucuga musa”, ni buheha tina.

⁴⁴ Ñ yoa pa somanare Sabado jichu jipihtina Jesu yare tuho duaina cahmachuha. ⁴⁵ Wiho mejeta judio masa sehe payu masare Jesu yare tuho duainare

ñua pahu tia wahaha. Ñ pahu tia tina soro ni durucu, Paulore ñano quitu dojomehneha. “Musare to buhea potocã jierara”, niha tina. ⁴⁶Ti ã nichu tuhoa, Paulo, Bernabé mehne tinare quitu dojomehnerinare cuirio marieno ò sehe ni yahuha:

—Cohamacu to dutiriro sehetu musare buhe muhtamahi sã. Wiho mejeta musa sehe tíre cahmaera tuhsuhre. Cohamacu catia mehne ã catirucua cùhure cahmaera tuhsuhre musa. Ñ jina sã sehe judio masa jieraina sehere buhe ducanahca. ⁴⁷To joa dutiri cãiri mehne ò sehetu dutiha Cohamacu sãre:

“Musa judio masa jierainare buhena tinare yu yare noano masichu yoanahca musa.

Ñ jicu ahri yahpa mu sũro macainare musa buhechu, noano yuhure wacũ tuaina sehere pichacapu wahaborinare yuhdoiha yuhu”, ni yahu dutiha sãre Cohamacu —ni yahuha Paulo, Bernabé mehne.

⁴⁸Ti ã nichu tuhoa judio masa jieraina sehe wahcheha. “Cohamacu ya sehe noaa jira”, niha tina. Tõpeina Cohamacu to cahmaina, to catia mehne ã catirucua to wa duarina Jesure wacũ tua ducaha. ⁴⁹Ñ jia mari puhtoro Cristo yare tí yahpape yahu site pahñoa. ⁵⁰Ti ã yahu site pahñochu ñua judio masa ji coaeraha. Ñ jia tina Paulo cùhure ñano durucuha. Tõpu Cohamacu ño payoa numia, masa ti cua pisaro ñua numia jiha. Ñ jia judio masa Paulo cùhure ñano durucuha. Ti ã ni durucuchu tuhoa tí numia Paulo mehne, Bernabé mehne cùhure suaha. Ñ yoa tí maca macaina puhtoa cùhu tina mehne suaha. Ñ suaa tó macaina ñano yoaha Paulo cùhure. Ti ã yoari baharo Paulo cùhure ti ya yahpai jinare cohã wioha. ⁵¹Ti ã yoachu ñua Paulo, Bernabé mehne ti dahpori macaa dihta pohcarire cã site boro cùha tí maca macaina ti ñaa yoari buhiri tiare ñoa. Ñ yoa tuhsu tina Iconiõpu wahaa wahaha. ⁵²Ñ yoa tina Jesu yaina pãiro wahchea, Espiritu Santo dutiare yoina jiha.

Paulo, Bernabé mehne Iconioi jiha

14 ¹Ñ yoa Iconiõpu su, Paulo Bernabé mehne judio masa buheri wuhupu sã, Jesu yare noano durucu mihnia mehne yahuha. Ñ jia payu masa Jesure wacũ tua ducaha, judio masa cùhu, judio masa jieraina cùhu. ²Wiho mejeta judio masa Jesure cahmaeraina cùhu tina mehne jiha. Tina judio masa jierainare Jesu yaina mehne ti suachu yoaha tjoa. Ti ã yoachu judio masa jieraina ñano tuhotuha Jesu yainare. ³Ti ã tuhotuchu ñua Paulo, Bernabé mehne tõpu yoari pja jia, cuirio marieno mari puhtoro Jesu yare noano buheha. Cohamacu masare to cahãre buheha. Ñ buhea Cohamacu to tuua mehne yoa ñoha tina, “Ahri buhea potocã tjira”, nia. ⁴Wiho mejeta tí maca macaina dacho macai judio masa ya buheare cahmaina tjuaha. Dacho macaihta Jesu ya buheare cahmaina cùhu tjuaha. Tina pua curua tjuaha. ⁵Ñ jia judio masa jieraina, judio masa ti puhtoa mehne Jesu to cõrinare ñano yoa duama, tãa mehne doca wajã duamaha tinare. ⁶Ti ã yoa duarire masia, Paulo Bernabé mehne Licaonia yahpape duhti wahcãa wahaha. Tí yahpai jia macaripu Listra, ã yoa Derbepe suha. ⁷Tõpu sua, noaa buheare buheha tjoa tí macari macainare, tó cahai jiina cùhure.

Listrai Paulore tãa mehne docaha

⁸Ñ yoa Listrai tini masierariro jiha. Tiro wahma masa bajoarõputa tini masierariro jiro ne tinieraa tiha. ⁹⁻¹⁰Ñ jiro tiro Paulo to buhechu tuhoha. To tuhoro watoi Paulo sehe tiro dihtare ñua.

—Ahrri Jesure wacū tuara. Ā jiro tiro noariro waha duara —ni tuhoutuha. Ā ni tuhoutuaro tuaro mehne durucutjiāhno ō sehe niha Paulo tirore:

—Wahcārucaga —niha Paulo tirore.

To ā nichu tuhoroa tini masierariro sehe pu sūrucu sū, wahaa wahaha.

¹¹ Paulo to ā yoachū űua masa ti ya mehne, Licaonia ya mehne ō sehe ni sañurucuha:

—Ahrina cohamana, mua yoaro sehe bajuina muanopu jiina mari cahapu duji tari jira —ni sañurucuha tina.

¹² Ā jia tina cohamanare ti ni pisua wamari mehne tinare ni wama pisuha. Tina Bernabé “Zeus”, ni pisuha. Ā yoa Paulo buhe mātariro to jichū űua, “Hermes”, ni pisuha tina tirore. ¹³ Ā jiro Zeusre űo payoina ya wūhū tí maca duhtu cahai jiha. Ā jiro Zeus yaina ti sacerdote sehe wachuare cohoi mehne macapu sāa tari sopaca cahapu na taha. Zeusre űo payo duaro to wachuare jū muono, Paulore, Bernabé wa duamaha tiro, to masa mehne. ¹⁴ Ti ā yoachū űua Paulo, Bernabé mehne ti basi ti ya suhtire tuhrērocaha ti cahyaare masare űoa. Tuhrēroca tuhsu masa watoi mūrocaa, ō sehe ni sañurucu wahcāha tina:

¹⁵ —Musa ō sehe yoaena tjiga. Sā cūhu musa yoaro sehetā masa jija. Ō sehe musa yoa ne yaba cjihti jierara. Ā jina musare buhena tahi musa ō sehe yoaare duhu dutina tana. Ahri cohamana musa niare, musa yoa, wiho jia masuri jira. Tí masurine cohāga. Ā jina Cohamacure catiriro sehere űo payoga. Cohamacu sehe muanore, yahpare, pjiri mare, jipihtiare yoiriro jira. ¹⁶ Panopure tiro jipihtia macari macaina ti yoirire ā űunocaha. ¹⁷ Wiho mejeta tiro to jia tiare űona masare. Tiro masare noaare yoa, coro tachū yoa, dichare wa, masare chuare ā warucura. To ā wachu masa wahchera. Tó sehetā tiro to jia tiare űona masare —niha Paulo, Bernabé mehne.

¹⁸ Wiho mejeta ti ā nichu tuhopahta masa wachuare wajā jū muo tinare űo payo duamaha. Tó sehe ti űo payo duachu űua tinare ā yoa dutieraha Paulo cūhū. Ti ā yoaare duhu duaerapahta duhuha tó macaina sehe.

¹⁹ Ā yoa paina judio masa Antioquía macaina, Iconio macaina cūhū Listrapu suha. Tópu sua, Paulore űano durucuha tjoa judio masa. Ti ā ni durucuchū tuhoa masa tiro mehne suaha. Ā sua tāa mehne docaha tirore. Tāa mehne tirore doca tuhsu “Ahrri yariaa wahara” nia, tí maca duhtu cahapu tirore waja sū cūnoca, wahaa wahaha. ²⁰ Ti ā yoiari baharo Jesu yaina Paulore űua wahaha. Tiro cahai ti cahmachurucu suchū waro Paulo wahcārūca, tina mehne macapu wahaa wahaha. Ā yoa pa dachoi tiro Bernabé mehne Derbepu wahaha.

²¹ Tópu sū, tina noaa buheare tó macainare ti yahuri baharo, payu masa Jesure wacū tuaina ji dūcaha. Ā yoa baharo tina ti sua macaripe Listra, Iconio, Antioquíapu majare tjuaa wahaha. ²² Tí macaripu sua tí macari macainare Jesu yainare noaa buheare yahua, tinare noano yajeripohna tichū yoaha. Ā Jesure wacū tuarucu dutia ō sehe ni yahuha tinare:

—Cohamacu to jiropure mari suhto pano, tuaro marine űano yūhduro cahmana —ni yahuha.

²³ Ā jia macaripe macainare Jesu yainare ti puhto cjihtire cūha Paulo Bernabé mehne. Cū tuhsu, ti chu duhuri baharo Cohamacure ō sehe ni sini payoha:

—Puhtoro, ahrina mu yainare nu wihboga —ni sini payoha tina Cohamacure ti wacu tuaritore.

Paulo Bernabé mehne Antioquíapu ti ji muhtari macapu tjuaa wahaha

²⁴Ti a yoiari baharo tina Pisidia yahpapu jirina cjiri wahaa wahaha Panfilia yahpapu. ²⁵Tópu su, Pergepure tina buhe tuhsu Atalia wama tiri macapu wahaa wahaha. ²⁶Tí macapu su, Antioquíapu tjuaa, dohoria mehne pahaa wahaha. Tí macaihta panopu ti jisinchu Jesu yaina Cohamacu yare buhe dutia Paulo cühure warocaha. A warocaa:

—Cohamacu mu cahia mehne ahrinare nu wihboga —ni warocaha tina.

A tju sua tinare ti buhe dutirire buhe tuhsuha Paulo, Bernabé mehne. ²⁷Antioquíapu ti tju suri baharo Jesu yaina mehne cahmachu, Cohamacu to tuua mehne ti yoirire yahu pahnoha tina. Judio masa jieraina cuhu Cohamacu yaina ti waharire yahuha tina. ²⁸A jia Paulo cuhu topure Jesu yaina mehne yoiari pja jiha.

Jerusalépu Jesu yaina cahmachuha

15 ¹A yoa Judea yahpa macaina mahainaca Antioquíapu sua, Jesu yainare o sehe ni buhe ducaha tina:

—Cohamacu to dutiare Moise cjirore cino o sehe ni cüha. Jipihtina ti pjacure mahari cahsarocäre ti yihsohtore yahu cüha Moise cjirore. Musa täre yoaerachu Cohamacu musare yuhdosi —ni buheha tina to macainare.

²Ti a ni buhechu tuhoa Judea yahpa macaina sehe cahma sayoha Paulo cühure Bernabé mehne. Ti a cahma sayori baharo Jesu yaina sehe Paulore, Bernabére paina to macaina cühure Jerusalépu warocaha. Judea yahpa macaina ti buherire Jesu to cürinare Jesu yaina puhtoa cühure sinitu nu dutia warocaha Paulo cühure.

³A jia Jesu yaina tinare ti warocachu waha, Fenicia yahpare su, yuhdu wahcä, Samaria yahpapu suha. Tí macaripu sua, judio masa jieraina Cohamacu yare ti cahma ducarire yahuha tina to macainare. Ti a yahuchu tuhoa to macaina Jesu yaina tuaro wahcheha.

⁴A yoa tina Jerusalépu ti suchu nua to macaina Jesu yaina, Jesu to cürina, to yaina puhtoa mehne wahchea mehne noano piti bocaha tinare. Ti a piti bocachu Paulo, Bernabé mehne Cohamacu to tuua mehne ti yoirire yahuha tina Jerusalé macainare. ⁵Wiho mejeta topu fariseo curua macaina Jesu yaina mahainaca jiha. A jia tina topure wahcäruca, o sehe ni yahuha:

—Tinare judio masa jierainare ti pjacure mahari cahsarocäre yihsooro cahmana. “Cohamacu Moise cjirore to dutirire yoaga musa cuhu”, nino cahmana tinare —niha tina fariseo curua macaina cuhu.

⁶Ti a nichu tuhoa Jesu to cürina, to yaina puhtoa mehne ti a nirire cahnoa taa, cahmachuha. ⁷A cahmachua tina payu ti durucuri baharo Pedro wahcäruca, o sehe ni yahuha tinare:

—Coyea, panopu yuhure musa mehne jirirore Cohamacu o sehe yoa dutiro yuhure cüre. Tiro yuhure noaa buheare judio masa jierainare yahu dutiro cüre. Tinare Jesure wacu tua dutiro yuhure tinare buhe dutire. ⁸Cohamacu masa ti tuhoutuare masina. A jiro tiro judio masa jierainare to yaina to yoirire nono taro tiro Espiritu Santore ware tinare, marine to yoiaro seheta. ⁹A

waro tiro marine tina cūhure cūno potori noano yoare. Tina tirore ti wačū tuachū ti ñaa buhirire bore tiro. ¹⁰ Mari sehe Cohamacū Moise cjirore to cūri dutiare cūno pjaeraja. Mari ñuchusuma cjiri cūhū cūno pjaeraha. ¿Ā mari cūno pjaerapachuta dohse yoana Jesu yainare judio masa jierainare tīre yoa duti duajari musa? Ā yoa dutina Cohamacū tinare to yoarire “Quihōno wahaerara”, nina nica musa. ¹¹ Wiho mejeta ō sehe sā tuhotuja. Mipure judio masa jieraina yoaro seheta mari cūhure mari puhtoro Jesu cahia mehne Cohamacū yuhdorohca. Dutiare mari yoa mehne marine yuhdosi —niha Pedro tinare.

¹² To ā nichū tuhoa jipihtina dihta mariea wahaha. Ti ā dihta mariachū Paulo, Bernabé mehne judio masa jieraina watoi Cohamacū tuaa mehne ti yoa ñorire yahuha tinare. ¹³ Ā ti yahu tuhsuri baharo Santiago ō sehe ni yahuha:

—Coyea, tuhoga yuhure. ¹⁴ Cohamacū judio masa jierainare to yaina cjihtire to coā yoarire yahu tuhsuhre Pedro. ¹⁵ Panopū macaina Cohamacū yare yahu muhtaina cjiri ti yahuriro seheta ā wahahre judio masa jierainare. Ō sehe ni Cohamacū yare joaa tiha tina:

¹⁶ “Panopū Davi cjiro ya curua macaina ti puhtoa jiri cjiri pihtia wahare.

Baharo tjua taihca yuhū.

Ā jicu pari turi to ya curua macarirore puhtoro sōihca.

¹⁷ Yū ā yoiari baharo jipihtina paina judio masa jieraina yuhure puhtoro tiaha tina.

‘Yū yaina jiga’, yū ni pjirocarina sehe yuhure cahmaahca.

¹⁸ Āta nina mari puhtoro.

Panopū tiro ahrire masare yahua tiri jire”, ni joaa tiha Cohamacū yare yahu muhtaina cjiri.

¹⁹ Ā jicu ō sehe ni tuhotuja yuhū. Judio masa jierainare Cohamacū yare wahma cahma ducainare payū yoa dutiena tjijihna mari. ²⁰ Wiho mejeta tinare joa, warocajihna mari. Ō sehe ni joarocajihna: “Ñaa chuare, ‘Cohamacū jira’, ti nia masurine ti waa chuare chuena tjiga. Tuhsū, numia mehne ñano yoaena tjiga. Numia cūhū mua mehne ñano yoaena tjiga. Ā yoa wamūa ti ñaha wajāinare wahiquinare chuena tjiga. Dire sihniena tjiga”, ni yahu joarocajihna. ²¹ Yoari pja judio masa buhea wuhusepū Sabado jichū Cohamacū Moise cjirore to cūri dutiare buhea tire masa. Ā yoa jipihtia macaripū Moise cjiro to yahua buhea tire. (Ā jina yū niriro seheta judio masa jierainare Jesu yainare joarocajihna, judio masa sehe tina mehne “Suari”, nina) —niha Santiago.

²² Tí pjare Jesu to cūrina, Jesu yaina puhtoa, jipihtina Jesu yaina mehne puaro tina mehne macainare beseha ti warocahtinare. Antioquíapū Paulo, Bernabé mehne ti wahachū wahahtinare tinare bese warocaha. Ā jia tina Judare, Sila mehne warocaha. Juda sehe Barsaba puaro wama wama tiha. Ti coyea Jesu yaina tinare ño payoha. ²³ Tinare ti beseri baharo Jesu yaina joarocari pūre warocaha tina mehne. Ō sehe ni joaha tina:

“Jesu to cūrina, to yaina puhtoa, musa coyea Jesu yaina mehne sā noa dutija musare. Jipihtina judio masa jierainare Antioquíapū, Siriapū, Ciliciapū jiiinare musare Jesu yainare noa dutija sā. ²⁴ Sā mehne macaina musa cahapū sua, musare payū dutiare yoa dutiyuhti. Ā yoa musare cariboyuhti. Tina

Cohamacu dutiare Moise cjirore to cūri cjiropure, mahari cahsarocāre yihsoa cūhure yoa dutiyuhti. Wiho mejeta sã sehe tinare tīre buhe dutina warocaerahi. ²⁵⁻²⁶ Ā jina sã jipihtina cūno potori mūsa cahapū warocahtinare sã besehi. Mari cahīinare Paulo, Bernabé mehne Cristo Jesu mari puhtoro yare cuirio marieno ti buhechū payū tahari paina tinare wajāmoñoha. Ti ā wajāmoñochū mahanocā mehne yuhduha tina. Tina mehne sã beserinare mipure warocaja. ²⁷ Ā jina Judare, Sila mehne mūsa cahapū warocaja. Sã joarocare tina sehe musare yahuahca. ²⁸ Espiritu Santo to wacūno sehetā sã cūhū tuhutuja. Ō sehe jira tī: Paye dutiapure cūeraja musare. Ahri dutia dihtare cūnahca musare: ²⁹ Naa chuare, ‘Cohamacu jira’, ti nia masurine ño payo ti duhu payoa chuare chuena tjiga. Dire sihniena tjiga. Wamūare ti ñaha wajāinare wahiquinare chuena tjiga. Ā jina numia mehne ñano yoaena tjiga. Numia cūhū mūa mehne ñano yoaena tjiga. Ahri yū yoa dutierare yoaerana noare yoana nica mūsa. Tó puro tjira musare sã yahu duaa”, ni joarocaha Jesu yaina Jerusalēpu jiina.

³⁰ Tí pūre joa tuhsu, waha Antioquíapu wahainare. Ti wari baharo waha, Antioquíapu sūha. Ti tópu sūri baharo payū masare cahmachu duti, ti joari pūre wiaha tinare. ³¹ Tí pūre ti buheri baharo tina yajeri sãa, noano wahcheha. ³² Ā jia Juda, Sila mehne Cohamacu yare yahu muhtaina jia, yoari pja Jesu yainare Cohamacu yare yahuha. Ti ā yahuchū tuhoa, Jesu yaina sehe wahche, noano tuhoutuha. ³³ Ā jia Juda, Sila mehne tópu mahaa dachoricā ti jiri baharo Jerusalēpu ti tjuaa wahachū tó macainare ti coha sitichu, “Noano wahaga mūsa”, niha Antioquía macaina. Ā jia Juda cūhure warocarinare noa dutirocaha. Ti ā niri baharo Juda sehe tjuaa wahaha. ³⁴ [Wiho mejeta Sila sehe tóputa tjuanocaha Antioquíaputa.] ³⁵ Ā jia Paulo Bernabé cūhū mahaa dachoricā tjuasiniha tī macai tjoa. Tóti tina paina payū mehne Jesu yare buheha.

Pari turi Paulo noaa buheare buhe tinino wahaha

³⁶ Ā yoa mahaa dachoricā baharo Paulo ō sehe ni yahuha Bernabére:

—Jipihtinare mari buhe ducarinare “¿Dohse jijari tina?” ni, ñuna waha-jihna tjoa —niha Paulo cūhū ti basi.

³⁷ Ā ni tuhsu, Bernabé sehe João Marcore tina mehne naa duamaha. ³⁸ To ā naa duapachuta tó pano tiro tina mehne Panfiliapu suro tina mehne tjuaeraha. Ti yoaare cūno pjaeraro tjuaa wahaha. Ā jiro Paulo pari turi tirore naa duaeraha. ³⁹ To naa duaerachu ñuno Bernabé Paulo mehne puaro ti basi cahma durucu cahno masieraa, soro dihta wahaa wahaha. Bernabé sehe Chipre wama tiri nucopu Marcore na pahāa wahaha. ⁴⁰ Paulo sehe Silare piti ti wahcāa wahaha. Ti buheha wahahto pano Jesu yaina tinare waroca, “Cohamacu musare noano ñū wihbojaro”, niha. Ti ā niri baharo Paulo Sila mehne wahaa wahaha. ⁴¹ Ā wahaa, Siria yahpapū, Cilicia yahpapū cūhure sua, tópu Jesu yainare noano yajeripohna ti, Jesure wacū tua namochū yoaha tinare.

Timoteo Paulo mehne wahaha

16 ¹ Ti ā yoari baharo Paulo cūhū Derbepū, Listrapū sua, Timoteore boca sūha. Timoteo Jesu yairo jiro, judio masono macūno jiha tiro. To pocoro cūhū Jesu yacorota jiha. To pucuro sehe griego masuno jiha. ² Ā

jia Listra macaina, Iconio macaina Jesu yaina, “Timoteo masa noariro jira”, ni yahua tiha. ³ Ñ jiro Paulo Timoteore naa duaaha. Wiho mejeta tí yahpa macaina judio masa sehe Timoteo pucuro griego masuno to jichu masiha. Ñ jiro Paulo judio masare “Suari” nino, Timoteo pjacure mahari cahsarocã yihso naha. Judio masa ti dutia ti niriro seheta yoaha. ⁴ To ã yoari baharo tina ti sua macari macainare ti joarocari pũ macaare yahuha. Tí pũ Jesu to cūrina, to yaina puhtoa mehne Jerusalēpu jiina ti joarocari pũ jiha. Ñ jia tí dutiare noano yahu turiaha tó macainare Jesu yainare. ⁵ Tí ã yahuchu tuhoa Jesu yaina sehe Jesure wacũ tua namoha. Ñ yoa Jesure wahma wacũ tua ducaina dachoripe payu waha namoha.

Paulo cahānopu Macedonia macarirore ñuha

⁶⁻⁷ Ñ yoa Asia yahpapu sehere noaa buheare buhe dutieraha Espiritu Santo tinare. Ñ jia tina Frigia yahpare yuhdua Galacia yahpare yuhdua, Misia yahpa duhtu cahai suha. Tópũ su, Bitinia yahpa sehe waha duamaha tina. Wiho mejeta Espiritu Santo sehe tinare tópure waha dutieraha. ⁸ To ã niri baharo tina sehe Misia yahpare yuhdua, Tróadepu buhtu wihire. ⁹ Tópũ ti buhtu wihiri baharo, tí ñamine õ sehe cahāri jire Paulo. Macedonia yahpa macariro to cahai ducuchũ ñuri jire tiro. “Sāre Macedonia yahpa macainare yoadohoi taga” ni, pjiri jire tiro Paulore. ¹⁰ To cahāri baharo wahcã wihi, sã yare cahno tuhsu, Macedoniapũ wahaa wahi sã. “Cohamacu tí yahpature noaa buheare buhe dutiro nina marine”, ni tuhutui sã.

Paulo, Sila mehne Filipopu jiha

¹¹ Ñ jina sã Tróadepu jiina dohoria mehne Somatracia wama tiri nucopũ pahã sui sã. Ñ yoa pa dachoi Neapolipũ pahãa wahi sã. ¹² Tí macare yuhduana, Filipopũ Roma macaina ya macapu sui sã. Tí maca Macedonia yahpai jiri maca jire. Wiho jiri maca jierare. Tópure mahaa dachoricã sã jii. ¹³ Tópũ jina Sabado jichu sã tí maca duhtu cahapu, dia duhtu cahapu sui. Tói Cohamacu mehne ti durucuro jire. Tói dujina tói cahmachua numia mehne suhudi sã. ¹⁴ Cūcoro sãre tuhoricoro Tiatira wama tiri maca macaricoro Lidia wama tiricoro jire. Ticoro noaa suhti wapa tia suhtire duaricoro, Cohamacure ño payoricoro jire. Ñ jiro Paulo to yahua noano tuhochu yoare Cohamacu ticorore. ¹⁵ To quihōno tuhochu ñuno ticorore to wuhũ macaina mehne bautisare Paulo. To ã bautisari baharo õ sehe nire ticoro:

—“Jesu yacoro tjira muhũ cūhu”, nina musa yuhure. Ñ jina ya wuhui sãa tasinia musa. Yuhũ mehne tjuasinia —nire ticoro sãre.

To ã nichu tuhona to wuhui tjuasinii sã.

¹⁶ Pa dacho Cohamacu mehne ti durucuropu sã wahachu watĩno to cohtotaricoro piti bocare sãre. Ticoro paina cahamacono jire. Ticoro watĩno yoadohoro mehne masare “Õ sehe waharohca musare”, ni yahuyuricoro jire. Ñ yahuro pjĩro wapatabasare to puhtoare. ¹⁷ Ñ jiro Paulo mehne sã wahachu, sãre nunũ ti, sañurucure ticoro:

—Ahrina Cohamacu Jipihtina Bui Jiri to yoadohoina jira. Cohamacu marine to noano yuhdohtire yahura tina —ni sañurucure ticoro.

¹⁸ Payu dachori ã ni cariborucure Paulore. To ã ni sañurucuchũ Paulo majare ñũ, õ sehe nire watĩnore:

—Jesucristo tuaa mehne dutija mūhure. Ticorore wijaahga. Waharisa mūhū —nire Paulo.

To ā nichūta watīno sehe wahaa wahare.

¹⁹To ā wahari baharo ticoro puhtoā sehe niñeru to wapataeraricoro to wahachū ñua, tina Paulore, Sila cūhure ñahare. Ñaha tuhsū, tinare naahre tí maca dacho macapū jiina puhtoā cahapū. ²⁰Ā naa wahcā, buhiri tiare cahnoina cahapū tinare cūre tina.

—Ahrina judio masa mari ya macare cariboa nina. ²¹Tina mari dutiare cohā dutia, paye buheare buhea nina. Mari ya dutiare yūhdurucachū yoa duaa nina. Mari Roma macaina jina ahrina ti yahua sehere yoa masieraja mari. Ā jina ti buheare mari cahmaeraja —nire ticoro puhtoā buhiri tiare cahnoinare.

²²Ti ā nichū tuhoa masa payū Paulo cūhū mehne sua yūhdūa wahare. Ā jia buhiri tiare cahnoina sehe Paulo cūhū suhtire ti tuhrē cohāri baharo, yucūri wasōri mehne tjana dutire tinare. ²³Tuaro tjana tuhsū peresu yoare tinare. Ti ā peresu yoiari baharo peresure cohtaritore noano ñū wihbo dutiha tina. ²⁴Ti ā dutiri baharo tinare cohtariro sehe tí wūhū puhicha macari tahtiapū tinare cū, taboa pahtari mehne ti dahporire biha dapoha.

²⁵Ñami dacho macai Paulo, Sila mehne Cohamacūre sini, tirore basa payoha. Ti ā basachū tuhoha paina peresupū jiina. ²⁶Ti ā ni basachūta tí wūhū tuaro ñuhmiha. To ā ñuhmichū cūno potori jipihtia sopa pahmari parī mua, peresupū jiinare ti dūhtea dari comaa dari nuhnu site boraa wahaha. ²⁷To ā wahachū tí wūhure cohtariro sehe wahcā wihi, “Peresu jiina duhti tuhsūri jire”, ni tuhotumaha. Ā ni tuhoturo to ñosari pjīne naroca, to basi ñosamaha. ²⁸To ā yoachū ñuno Paulo tirore tuaro sañurucu ō sehe niha:

—Mū basi ñano yoiā tjiga. Jipihtina ōre jija sā —niha tiro tinare cohtaritore.

²⁹To ā nichū tuhoro tinare cohtariro sehe sihā buhria duti, tina cahapū mūroca wahcā Paulo, Sila ti dahpori cahapū tetere, caha sūha tiro. ³⁰Tuhsū, tiro tinare tí tahtiapū jiinare na wijaa, sinituha tinare:

—¿Dohse yoiacari yūhū Cohamacū yairo ji duacu, to yūhdohtiro ji duacu? —ni sinituha tiro.

³¹—Jesucristore wacū tuaga mūhū. Mū coyea cūhū tirore wacū tuajaro. Mūsa ā yoachū musare pichacapū wahaborinare Cohamacū yūhdorohca —ni yahuha tina.

³²⁻³³Ti ā niri hora ñami dacho maca baharocā jiha. Ti ā niri baharo tinare cohtariro to ya wūhupū naaha tinare. To ya wūhupū na sū ti camine cosaha tiro. To ā cosa tuhsūri baharo to coyea mehne Cohamacū yare buheha Paulo cūhū. Ti buheri baharo bautisaha tinare. ³⁴Ti bautisa tuhsūri baharo tinare cohtariro cjiro Paulo cūhure chuare payoha. Ā jia tiro to coyea mehne noaa buheare ti tuhori baharo tuaro wahcheha, Cohamacūre masi dūcaa.

³⁵Bohrea parī cahachū ñua puhtoā sehe surarare peresupū warocaha Paulo cūhure wio dutia. ³⁶Ti ā wio dutiri baharo tí wūhure cohtariro Paulo cūhure yahuha:

—Puhtoā musare wio dutire. Ā jina cuienata wijaahga —niha tiro Paulo cūhure.

³⁷Ti ā wio duapachūta Paulo ō sehe ni yahuha surarare:

—Sā ñano yoaerahi. Ā jina sā ne buhiri cjueraja. Wiho warota tina puhtoa sehe masa ti ñurocaroi yucuri wasōri mehne tjanahre säre, Roma macaina sā jipachuta. Tjana tuhsu peresu yoahe säre. Ā jia mipu masa ti ñueraroi wio duara säre, säre ñano ti yoarire “Buoro yuhduri”, nia. Puhtoa ti basita ta, wioa tajaro säre —niha Paulo surarare.

³⁸To ā nichu tuhoa surara sehe puhtoare yahua wahaha. Ti ā ni yahuri baharo Paulo, Sila mehne Roma macaina ti jichu masia puhtoa sehe cui niha. ³⁹Ā jia tina Paulo cūhu cahai su, ō sehe niha:

—Ñano yoahti sā musare. Ne pari turi ā yoasi —niha puhtoa Paulo cūhure.

Ā ni tuhsu puhtoa tinare peresupu jiinare wio, tinare pa sehupu waha dutiha. ⁴⁰Ti ā niri baharo Paulo, Sila mehne peresupu jiina wijaa, Lidia wama tiricoro ya wuhupu wahaha. Ti wuhupu ti suri baharo Jesu yainare piti boca. Ā jia tina Jesu yainare noano buhea, noano yajeripohna tichu yoaha tinare. Ti ā yoari baharo Paulo, Sila mehne wahaa wahaha.

Tesalónica macaina suaha Jesu yaina mehne

17 ¹Ā yoa tina Anfipolipu su, yuhdua, Apoloniapu su, yuhdua, Tesalónicapu suha tina. Tói judio masa buheri wuhu jiha. ²Somanaripe to yoiro sehta Paulo buheri wuhupu wahaa tiha. Tōpu su, tia somana waro sabado dachoripe tiro panopu macaa ti joari cjiire Cohamacu yare masare buhe, tīre tina mehne suhdua tiha Paulo. ³Ā yoro tiro Cohamacu yare ō sehe ni yahuha:

—Judio masa, musa puhtoro musa cohtariro Cristo tari jire ñano yuhduhti. Cohamacu to ni cūriro cjiro sehta tiro yariaa wahaha masa mujano taro. Ā jiro ahiro Jesu, yu yahuriro, tiro Cristo warota jira marine yuhdohi. Tirota jira musa cohtariro. Ō sehta nina Cohamacu yare ti joari pū —ni yahuha Paulo.

⁴To ā nichu tuhoa, cāina tói jiina “Potocā tjira”, niha. Ā jia tina Paulo cūhu mehne wahaha. Ā jia paina cūhu griego masa payu Cohamacure ño payoina sehe Paulore quihōno tuhoa, ā yoa tina mehne macaa numia cūhu payu puhtoa numia masa ti cua pisaro ñua numia cūhu tirore quihōno tuhoa Jesu yaina tjuaha. Ā jia tina cūhu Paulo cūhu mehne wahaha. ⁵Wiho mejeta judio masa sehe ti ā wahachu ñua, pahsu tiha. Ā jia tina ñaina dahraerainare payu pji cahmachu ō sehe ni dutiha: “Ahrina ñano yoa nina”, ni sañurucu dutiha tinare. Ā sañurucu jipihtina ti maca macainare suachu yoaha Paulo cūhu mehne. Ā jia judio masa Jasō ya wuhupu sāa, Paulo cūhure macamaha, tinare masapure waa taa. ⁶Wiho mejeta tinare bocaeraha. Ā jia Jasōre, paina Jesu yaina cūhure ñaha, waja wijaa wahaha tinare. Puhtoa cahapu na su ō sehe ni yahusāha tina:

—Paulo cūhu masare jipihtiropure caribobiara. Ā jia mipure tina mari ya macare wihi tuhsuhre. ⁷Ā jiro ahiro Jasō tinare to ya wuhupu sāa ta dutihre. Tina jipihtina mari bui puhtoro Roma macariro to dutiare yuhdurucara. “Pairo musa puhtoro jira. Jesu tirota jira” nia, mari puhtoro dutiare yuhdurucara tina —ni yahusāha judio masa sehe puhtoare.

⁸Ti ā ni yahusāchu tuhoa, jipihtina masa, puhtoa cūhu sua, tuaro sañurucu. ⁹Wiho mejeta puhtoa Jasōre, tiro mehne macaina cūhure, niñerure wapa duti, wioha.

Paulo Sila mehne Bereapɔ suha

¹⁰ Tí pjata ñamipɔ Paulo cūhure Jesu yaina nɔo warocaha Bereapɔ. Tópu sua tina judio masa buheri wuhupɔ sãa wahaha. ¹¹ Berea macaina sehe Tesalónica macaina yuhdoro Jesu yare noano tuhoina jiha. Á jia tina Jesu yare ti tuhori baharo “¿Potocã tjiari?” ni masi duaa, dachoripe Cohamacu yare ti joari püre á buherucua tiha tina. ¹² Á jia tina payu Jesure wacū tua ducaha. Griego masa cūhu, mua, puhtoa numia mehne Jesure wacū tuaina jiha. ¹³ Wiho mejeta Paulo Bereapɔ Cohamacu yare to buhechɔ cūhure tuhorocea Tesalónica macaina judio masa tópu suha. Tópu sua, Berea macainare quiti dojomehnea, Paulo cūhu mehne suachɔ yoaha tina. ¹⁴ Ti á yoachɔ ñua Jesu yaina Paulore soaro mehne pijiri ma duhtu cahapɔ warocaha. Wiho mejeta Sila, Timoteo mehne Bereapɔ tjuaha. ¹⁵ Paina sehe Paulore Atenapɔ na wahcã soha. Tiore so tuhsu majare tjuaa wahaha Bereapɔ tjoa.

—Soaro mehne waha, piti tina wahaga Paulore —ni yahuha Silare, Timoteo cūhure.

Á ni yahu dutiha Paulo tinare.

Paulo Atenai jiha

¹⁶ Á jiro Paulo Atenapɔ cohtaro niha Sila, Timoteo cūhure. Tinare cohtaro Atena macaina ti “Cohamana jira”, ti nia masurine payu ti cjuachɔ ñuno Paulo tuaro cahyaha tina mehne. ¹⁷ Á cahyaro, judio masa buheri wuhupɔ judio masa mehne, á yoa judio masa jieraina mehne cūhure durucuha tiro. Judio masa jieraina sehe Cohamacure ño payoina jiha. Á yoa Paulo tí maca dacho macai dachoripe tiro cahapɔ á tini majare sãaina mehne durucuha. ¹⁸ Paina Epicureo yare buheina, Estoico yare buheina cūhu Paulo mehne durucuha:

—¿Ahriro durucua pihtierariro dohse ni durucuro nijari tiro? —niha tina.

Paulo Jesu yare, to masa mujarire to yahuchɔ tuhoa ô sehe ni tuhutumaha masa: “Tiro paina cohamanare yahuro nica”, ni tuhutumaha tina. ¹⁹ Ti tuhori baharo tina Areópago wama tiropɔ Paulore naaha.

—Ahri buhea, wahma buheare mu mipɔ yahurire masi duaja sã. ²⁰ Mu buhea soro sehe jira. Á jina sã tíre masi duaja —niha tina Paulore.

²¹ Jipihtina Atena macaina, á yoa paye yahpari macaina cūhu Atenapɔ jiina dachoripe wahma buheare durucurucu duaha. Á jia Paulo to yahuare tuho duaha tina.

²² Á jiro Paulo Areópago wama tiroi wahcãrɔca ô sehe ni yahuha:

—Atena macaina, payu musa cohamanare musa tuaro ño payoina musa jichu masija yuhu. ²³ Ahri maca musa ya macare cohamanare musa ño payoa altarire ñu tinihi yuhu. Á ñu tinicu yuhu cū altarpɔ, cohamanare ño payona musa waare musa cūnoi ahrire buhehi. “Cohamacu, mari masimahnoerariro ya altar jira”, ni joari jire musa tíre musa cūnoi. Musa tiore masierapanahta tiore ño payori jire musa. Tioreta musa masierarirore yahu potoi nija yuhu masare.

²⁴ Cohamacu jipihtiri yahpare, jipihtiare bajuamehneriro jira. Tiro muanore, yahpapure puhtoro jiro, tiro masa ti yoa wuhusei jierara. ²⁵ Á jiro tiro mari jiare, mari yajeri naare, jipihtia marine paye barore wariro jiro, mari yoadohoare cahmaerara. Tiro pjacuoriro jierara.

²⁶Tiro cūiro mūnore yoa dūcaha. Tiro mehneta jipihtia yahpari macaina cjihtire masare yoha. Ā masare yaro jipihtiro yahpapure marine cūha tiro. “Ō puro yoari pja ōpure jiahca”, nino quihō cūha marine. ²⁷“Tina yūhure maca, bocaboca”, ni tuhoutuha Cohamacu. Wiho mejeta Cohamacu yoraropu jierara. Mari mehneta jira. Ō sehe ni joaa tiha paina: ²⁸“Marine jichu yoara tiro. Mari masapere catiina, űuhmiina jichu yoara tiro”, ni joaa tiha. Musa mehne macaina panopu macaina basaare noano joaina quti yahuina cjiri ti joariro seheta nii nija. “Mari cūhu Cohamacu pohna jija”, ni joaa tiha tina. ²⁹Ā jina mari to pohna jina ō sehe ni tuhoutuena tjiga musa. Masurine, uru, plata, taa mehne musa mu sūro musa yoari masurine “Cohamana jira”, ni tuhoutuena tjiga musa. ³⁰Panopu masa ti masieraina jisinichu ti űaare yoa-pachuta Cohamacu ā űunocasiniha. Wiho mejeta mipure jipihtiri yahpa macainare ti űaa yoari buhiri tiare masi, cahya dutira Cohamacu. ³¹Baharo Cohamacu to quihōri dachoi jipihtiri yahpa macainare potocā beserohca noaina, űainare. Tiro to bese duti to cūiro Jesu sehe beserohca. Jesure yaria-rirore masoha tiro. Ā masono “Ahriro yu cūiro jira” ni, űono niha Cohamacu masare —ni yahuha Paulo Atena macainare.

³²To ā nichu masa mujarire to durucuchu tuhoa paina tirore bujupēha. Wiho mejeta paina sehe ō sehe niha:

—Pari turi ahrire mu yahuchu sā tuho duaja —niha tina Paulore.

³³Ti ā niri baharo Paulo wahaa wahaha. ³⁴To ā wahachu, caina tiro mehne waha, Jesure wacū tua dūcaha. Dionisio Areópago macariro puhtoa mehne macariro Jesure wacū tua dūcaha. Ā yoa Damari wama tiricoro cūhu, paina mehne Jesure āta wacū tua dūcaha.

Paulo Corinto wama tiri macai jiha

18 ¹Ā yoa, Paulo Atenapu jiro waha, Corinto wama tiri macapu suha. ²Tōpu sūro, judio masuno Aquila wama tirore boca suha tiro. Jipihina bui puhtoro Claudio wama tiro judio masare Romapu jiinare to cohāchu Aquila sehe to namono Priscila mehne waha, Corintopu suha. Aquila sehe Ponto wama tiri yhapai masa bajuariro jiha. Ā jia tina Corinto ti jichu, Paulo tina cahapu suha. ³Aquila cūhu suhti wuhusere yoina jiha. Paulo cūhu suhti wuhusere yoiarirota jiha. Ā jiro tiro tina mehne dahra, tōi tjuaha. ⁴Ā jiro Paulo sabado jichu somanaripe judio masa ti buheri wuhupu judio masare, judio masa jieraina cūhure Cohamacu yare yahuha. To ā ni yahuchu tuhoa, “Potocā tjira”, niha tina caina.

⁵Ā yoa Sila, Timoteo mehne Macedoniapu jiina, Paulo cahapu suha. Tōpu ti sūri baharo Paulo sehe jipihtia dachoripe judio masare noano buhea tiha.

—Jesu, Cristo masare yūhdohtiro mari cohtariro jira —ni yahua tiha.

⁶To ā ni buhepachuta, judio masa sehe tirore tuho duaeraha. Ā jia tina űano ni quti dojomehneha tirore. Ti ā yochu Paulo tinare to tuhtiboriro seheta, to suhti macaa mene cjā siteroca cūha.

—Musa ya buhiri pichacapu wahanahca. Cohamacu to dutiro sehetā musare buhemahi yahu. Wiho mejeta musa yūhure tuho duaerare. Mipure judio masa jieraina sehere buhei wahaihtja —niha Paulo judio masare.

⁷To ā niri baharo tiro tōpu jiro waha, Ticio Justo wama tiro ya wuhupu suha. Justo Cohamacu űo payoriro jiha. To ya wuhu sehe judio masa buheri

wuhũ cahai jiha. ⁸ Ñ jia Crispo wama tiro buheri wuhũ puhtoro, to namono, ti pohna cũhũ Jesure wacũ tuaina jiha. Ñ yoa paina Corinto macaina payũ Cohamacũ yare tuhoa, Jesure wacũ tuaha. Ti ñ wacũ tuaina jichũ tinare bautisaha. ⁹⁻¹⁰ Cũ ñami Cohamacũ cahãnopũ ò sehe ni yahuha Paulore:

—Muhũ mehne jija. Ahri maca macaina yũ yaina masa payũ jira. Ñ jia paina masa muhure ñano yoa masierara. Ñ jicũ cuiecu tjiga muhũ. Wiho mejeta yũ yare tuaro yahu namoga muhũ. Yahu duhuecu tjiga —ni yahuha Cohamacũ Paulore.

¹¹ Ñ yoa cũ cũhma noano, pa cũhma dacho maca waroi Paulo Corintopũ ji, tó macainare Cohamacũ yare buhea tiha.

¹² To ñ buhero watoi Galiõ wama tiro Acaya yahpa macaina puhtoro to jichũ, judio masa jipihtina cũno potori Paulore yahusãa taa, tirore buhiri tiare cahnoina cahapũ naaha tina.

¹³ —Ahriro Paulo masare Cohamacũre ño payo dutiro ahri yahpa macaa dutia sehere cohã dutiro nina —ni yahusãha judio masa buhiri tiare cahnoinare.

¹⁴ Ti ñ ni yahusãchũ tuhoro Paulo sehe tinare yahu duamaha. Wiho mejeta Galiõ sehe judio masare ò sehe ni yahuha:

—Ahriro sã Roma macaina ya dutiare yũhdũrũcariro to jichũ, masare yũhtiboa yuhũ. ¹⁵ Wiho mejeta musa judio masa ya dutia sehere ahriro yũhdũrũcariro to jichũ musa basi ahrire cahnoga. Ahrire masieraja yuhũ musa mehne —ni yahuha tiro judio masare.

¹⁶ Ñ ninota tinare judio masa Paulore yahusãmarina cjirire to ya tahtiapũ jiinare cohã wioha tiro. ¹⁷ To ñ cohã wiori baharo jipihtina tí wuhũ jiina Sostenere judio masa buheri wuhũ puhtoro Jesu yairore ñaha, buhiri tiare cahnoina cahapũ cjãha tirore. Ti ñ cjãchũ ñuno Galiõ ñ ñunocaha.

Paulo Antioquíapũ tjuaa wahaha

¹⁸ Ñ yoa Paulo Corintoi yoari pja jiro cjiro “Wahai nija”, ni coha sitiha tiro Jesu yainare. To ñ niri baharo tiro Priscila, Aquila mehne Siria yahpau pahãa taa niha. Ti pahãhto pano Cencrea wama tiri macapũ sũ, tópu jisninino Paulo Cohamacũre “Ò sehe muhure yoabasaihtja”, to nirire yoa tuhsuriropũ jiha. Ñ jiro tó sehe yoina judio masa ti yoarucuriro sehta to pjoarire wuha pahão dutiha. ¹⁹ Tíre to yoari baharo tina Efeso wama tiri macapũ pahã sũ, Priscilare, Aquila cũhũre cũ, judio masa ti buheri wuhũpũ wahaha Paulo. Tí wuhũpũ sũ, Cohamacũ yare yahuha. Ñ yahuro judio masa mehne suhũduha. ²⁰ To ñ suhũduri baharo tirore tina mehne tjua dutimaha.

—Tjuaeraja musa mehne. ²¹ Wiho mejeta Cohamacũ cahmachũ, pari turi tjuaa taihtja —niha tinare Paulo.

Ñ ni tuhsũ, Efesopũ jiro cjiro pahãa wahaha tiro.

²² Pahãa, Cesareapũ pahã sũ, yũhdũ wahcã, Jerusalẽpũ sũha. Tópu sũ, tó macaina Jesu yainare “¿Ne jimajari musa?” ni, tinare ñũ yũhdũa Antioquíapũ sũha. ²³ Tói mahaa dachoricã jiha. Tói jiro cjiro yũhdũha. Galacia yahpai jia macaripũ, Frigia yahpai jia macaripũ pari turi sũ, tí macari macainare Jesu yainare buhero, Jesure wacũ tua namo wahchechũ yoaha tiro.

Apolo wama tiro Efesoi buheha

²⁴ Tí pjare, judio masũno Apolo wama tiro, Alejandría macariro Efesopũ sũha. Tiro noano yahu mihniriro jiha. Ñ jiro tiro Cohamacũ to joari cjirire

noano masiha. ²⁵Païro tirole Cohamacu yare yahu tuhsua tiha. ã jiro tiro João masare bautisariro to buhea dihtare masiha. ã jiparota tiro tuaro wahchea mehne Cohamacu yare noano buheha. ²⁶ã jiro judio masa ti buheri wuhupu tiro cuiro marieno tinare buhe ducaha. To ã buhechu ti tuhori baharo Priscila, Aquila mehne tirole tina mehne naaha. Cohamacu yare to quihôno yahu pahñoerachu ñua quihôno yahu pahñoa tina tirole. ²⁷⁻²⁸ã jia tiro Apolo sehe Acaya yahpapu to waha duachu Jesu yaina tirole “Noano wahaga”, ni joaa pürine waha tirole. Tí püri Acayapu jiina Jesu yainare Apolore noano piti boca dutia püri jiha. ã jiro Apolo tópu suro, tó macainare noano yoadohoha. Tó macaina Cohamacu cahia mehne Jesure wacü tuaina jiha. Judio masare tí macai jiinare ô sehe ni yahuha:

—Cohamacu to warocariro musa cohtariro jira Jesu. Cristo waro jira tiro —ni yahuha Apolo judio masare paina masa ti ñurocaroi.

Cohamacu yare ti joari cjiri mehne to noano quihôno yahuchu tuhoa tina “Potocã jierara”, ni masieraha.

Paulo Efesopu wahaha

19 ¹Corintopu Apolo to jiro watoi, Paulo sehe täyucupu muja yuhdua, Efesopu suha. Tópu suro caina Jesu yainare bocaha. ²Tinare boca suro tiro tinare ô sehe ni sinitu ñuha:

—¿Musa Jesure wacü tuari baharo musa sehe Espiritu Santore cjua ducari? —ni sinitu ñuha Paulo.

To ã nichu tuhoa tirole ô sehe ni yahuha tina:

—“Espiritu Santo jira”, ni yahuerare säre —ni yahuha tina.

³Ti ã ni yahuri baharo Paulo tinare ô sehe ni sinitu ñuha tjoa:

—¿Noa ya buheare musa tuhori baharo bautisari musare? —niha tiro tjoa.

—João ya buheare sã tuhori baharo bautisahre säre —ni yahuha tina.

⁴Ti ã nichu tuhoro ô sehe niha Paulo:

—Masa ti ñaa yoarire cahya, tíre ti duhuchu ñuno bautisaha João. ã jiro to bautisari cjiri sehe ti ñaa yoarire ti duhurire masare ti ñohti cjihti jira. Wiho mejeta paye baro cühure yahu namoha João. “Yu baharo tariro sehere wacü tuaga musa”, ni yahuha tiro. ã nino Jesure yahuro niha —ni yahuha Paulo tinare.

⁵To ã nichu ti tuhori baharo, Jesu wama mehne to tuaa mehne bautisaha tinare. ⁶ã to bautisachu, Paulo tina caina bui to wamomaca to duhu payochu, Espiritu Santo sehe wihiha tinapure. To ã wihiri baharo tina sehe tuhomahnoera duseri mehne durucu, Cohamacu yare yahuha. ⁷Tina jipihtina doce mua jia jiboa.

⁸Baharo Paulo judio masa ti buheri wuhupu sãa, tia sũ waro cuiro marieno puhtoro Cohamacu to suho jiare yahu, durucuha tina mehne. Tirole ti ã tuhori baharo “Ahri potocã jira”, niha tina. ⁹Wiho mejeta paina sehe tuho duaeraha. ã jia tina masa ti tuhoro noaa buheare ñano ni ñoha. Ti ã nichu tuhoro Paulo sehe Jesu yainare pji wijaa, pa sehepu wahaha. Waha, Tirano wama tiriro to buheri wuhupu dachoripe masare Cohamacu yare yahuha Paulo. ¹⁰Pua cühma waro buhea tiha tinare. To ã buhechu jipihtina Asia yahpa macaina judio masa, judio masa jieraina mehne mari puhtoro Jesu yare tuhoha. ¹¹ã yoa Cohamacu tuaa mehne Paulo masare ñu cua yuhduachu

yoaa barore yoa ñoha. ¹²Masa sehe suhti cahsari Paulo to pjacure pihaa cahsari cjirire, ã yoa tirore pihaa suhti cùhure naa, dohatiinare pihoha masa. Tí suhtire dohatiinare ti pihochu noaa wahaha. Ì jichu watia tinapure jirina cjiri wijaa wahaha, tí suhtire ti pihori baharo.

¹³Wiho mejeta paina judio masa, ã tinirucuina, watiare cohaina jiha. Ì yoa puhtoro Jesu wama pisuro mehne watiare cohã duamaha. Ì jia watiare ò sehe ni dutimaha tina:

—Paulo to yahuriro Jesu to wama mehne dutija masare. Wijaahga. Ahriro mehne pari turi jiena tjiga —nimaha tina watiare warocaa.

¹⁴Esceva wama tiroro siete to pohna sehe ãta yoamaha. Esceva sehe judio masuno sacerdotia puhtoro jiha. ¹⁵To pohna watĩnore ti wijaa dutiri baharo, watĩno sehe ò sehe niha tinare:

—Jesure masija. Paulo cùhure masija. Ì masipacuta musa sehere masieraja —niha watĩno tinare.

¹⁶To ã nichuta watĩno to cohtotariro sehe tuaro mehne tinare ñaha muua wahaha. Tinare ñaha, ñabiario yoa, yuhdurucanocaha. To ã yoachu Esceva pohna sehe suhti marieina, cami tiina muroca wijaa wahaha tina tí wùhure. ¹⁷Ti ã yoari baharo jipihtina Efeso macaina, judio masa, judio masa jieraina mehne tíre tuhoa, cui yuhduaha tina. Ì jia puhtoro Jesu yare bujupero marieno durucuha masa sehe.

¹⁸Ì yoa masa payu Jesure wacu tuaina ti ñano yoari buhirire yahu yuhduu taha. ¹⁹Tina mehne macaina payu yaya puti siteina jiha. Ì jia tina ti joaa tjurire yaya ti yoare yahua tjurire tópu na ta, masa ti ñurocaroi tí tjurire jũ cohānocaha tina. Tí tjuri ti wapa tirire tina ti quihōchu, jipihtia tjuri cincuenta mil turi plata mehne ti yoaa turi posa waro wapa timaha tí tjuri. ²⁰Ì jia Cohamacu yare cahmaina payu wahaha. Cohamacu tuua mehne to yaina wahaha.

²¹Ti ã wahari baharo Paulo ò sehe ni tuhotuha: “Macedonia yahpapu su muhta, tí yahpare yuhduu Acaya yahpare suihtja. Tí yahpare yu suri baharo Jerusalēpu wahaihtja. Tí macare yu suri baharo Romapu wahaihtja”, ni tuhotuha Paulo. ²²Puaro tirore yoadohinare to pano waroca muhtaha Macedonia yahpapu. Timoteo, Erasto cùhu jiha tina. Ì jiro Paulo sehe cūirota tjua nunu tisiniha Asia yahpapu.

Efesoí masa sua, sañurucuha

²³Tí pjare Efesoí Jesu yare paina cahmaeraa, Paulo cùhure payu masa tuhti, sañurucuha. ²⁴Cūiro platata dahrariro Demetrio wama tiroro plata mehne cohamacu Artemisa wama tiricoro ya wuhu masuri yoariro jiha. Ì jiro tiro paina plata dahraina mehne tí masurine dua, pjíro wapataha tina. ²⁵Ì jiro Demetrio paina plata dahrainare pji cahmachu ò sehe ni yahuha tinare:

—Tuhoga musa. Ahri dahraa mehne pjíro mari wapatarire masina musa.

²⁶Ahriro Paulo to yoirire to buheri cùhure masina musa. Ò sehe ni buhera tiro: “Cohamana masuri masa ti yoari catiina jierara”, ni yahua tire tiro. To ã nichu tuhoa payu Efeso macaina, jipihtiroi paina Asia yahpa macaina cùhu tí buheare “Potocã tjira”, nia tire. ²⁷Ì nia mari dahraare masa ñano durucuhto cua yuhduara. Ì yoa masa mari cohamacu Artemisa ya wùhure “Wiho jiri

wuhu jira”, ni cohāboca. Ti ā cohāchu ticoro jipihtina Asia yahpa macaina, jipihitiri yahpa macaina ti ño payoricoro to jipachuta to tuua butiarohca. Ā jia masa baharopu jiina ticorore masieraboca —niha Demetrio tinare.

²⁸To ā nichu tuhoa tina sehe tuaro sua, sañurucuha:

—Artemisa Efeso macaina mari yacoro cohamaco tuaricoro jira —ni sañurucuha tina.

²⁹Ā jia Efeso macaina jipihtina sañurucu yuhdua, tuho masia pihtia wahaha. Ā wahaa, Gayore, Aristarco cūhure ñaha, masa ti cahmachunopu tinare waja wahcāha. Gayo, Aristarco mehne Macedonia macaina jia, Paulo mehne tiniina jia tiha. ³⁰Ā jia Paulore masa cahai to waha duachu, Jesu yaina sehe tirore waha dutieraha. ³¹Ā jia paina tí yahpa macaina puhto, Paulo mehne macaina jia, ti cahamacare yahu dutiha Paulore:

—Masa ti cahmachunopu wahai tjiga —ni yahu dutiha puhto Paulore.

³²Ā jia tói cahmachuina mehne macaina sehe payu “¿Dohseana tana mari cahmachuna nijari?” ni masieraha. Ā jia tina sañurucu namoha. Ahrie sehepu jiina soro ni, sañurucuha. Paina cūhu soro ni sañurucuha. ³³Ā jia judio masa sehe Alejandro wama tirirore masare yahu dutimaha. Ā jiro Alejandro “Dihta mariahga”, nino to wamomaca mehne cjātuha. “Ahrina säre judio masare tuhtia nina”, ni tuhoturo judio masare ducata duaro, durucumaha. ³⁴Wiho mejeta tiro judio masuno to jichu ñua masa jipihtina cūno potori pua hora waro sañurucuha:

—Artemisa, Efeso macaina mari yacoro cohamaco tuaricoro jira —ni sañurucuha tina.

³⁵Ti ā ni sañurucuchu ñuno, Efeso macaina puhtoare yoadohoriro masare, “Dihta mariahga”, ni yahuha tinare.

—Musa Efeso macaina tuhoga. Efeso macaina tuaricoro cohamaco Artemisa ya wuhu cohtaina mari jichu jipihitia yahpari macaina masina. Ā jia muanopu bora tari masure ñu wihboina mari jichu cūhure masina masa. ³⁶Ā jia paina “Ahri potocā jierara”, ni masierara. Ā jina suaena tjiga musa. Noano tuhotuga musa. ³⁷Ahrina musa ñaha taina mari cohamacore ñano ni durucuerare. Ā yoa tina cohamana wuhusepure sãa, yacaerare. Ā jina noano yoaga musa. ³⁸Ā jia Demetrio, plata dahraina mehne ahrinare musa ñahainare yahusã duaa, buhiri tiare cahnoina sehere yahusãjaro tina. ³⁹Pari turi cahmachuna noano mehne cahmachuga. Musa yoiriro sehe yoena tjiga. ⁴⁰Michare musa sua, sañurucurire mari puhto tuhoa, “Marine cohã nica”, ni tuhotuahca tina. Ā jina musa ni sañurucurire tinare noano poto yahu masieraja mari —niha puhtoare yoadohoriro masare.

⁴¹Ā ni yahu tuhsu, “Tó puro tjira. Wahaga”, niha tiro masare.

Macedonia yahpapu cūhure, Grecia yahpapu cūhure Paulo suha

20 ¹Ti ā wahari baharo, Paulo sehe Jesu yainare pji cahmachu yahu quihōha. Yahu quihō tuhsu, tinare wahchechu yoa, tinare coha sitiha. Coha siti tuhsu, Macedonia yahpapu wahaa wahaha. ²Tōpu su buhe, tí yahpai jia macari macainare Jesu yainare wahchechu yoaha tiro. Tinare buhe tuhsu, Grecia yahpapu suha tiro. ³Tói tiro tia sũ waro jiha. Tói jirucuma, Siria yahpapu pahãa waha duamaha. Wiho mejeta judio masa cohatahaha tirore ñaha duaa. Ā jiro Paulo pa mahapu, Macedoniapu wahari mahapu munanoputa majare tjuaa wahaha tjao.

⁴ Ñ waharo Asiaputa suha. Tói Berea macariro Sópatro wama tiroiro Pirro macano Paulore piti ti wahcâha. Ñ yoa Tesalónica macaina Aristarco, Segundo cûhu tirore piti ti wahcâha. Tuhsu, Derbe macariro Gayo wama tiroiro Timoteo cûhu tiro mehne wahaha. Asia macaina Tíquico, Trófimo cûhu Asiapû tirore piti ti wahcâha. ⁵ Tiro mehne macaina to pano waha, Tróade wama tiri macapû tirore cohtari jire. ⁶ Ti ñ cohtachu bucuaerari pãore ti chua bose numuri baharo sã sehe Filipoi jiina dohoria mehne waha, cinco dachori pahã, Tróadeput sã tinare mu sui. Siete dachori waro jii tópure.

Tróadeput Paulo tinino wahaha

⁷ Domingo jichu Jesu yaina cahmachu pãore duhu payore Santa Cena yoaa taa. Ti ñ yoahto pano Paulo tinare buhere. Ñ yaro Paulo pa dachoi wahah-tiro jiro yoari pja tiro buhere. Ñami dacho macapû buhe duhuro taro nimare. ⁸ Ñ jina muano macari tahtiai payû poca sihãa poca jiri tahtiai cahmachui sã. ⁹ Paulore to tuhoro watoi, cûiro wahmuno Eutico wama tiroiro mahari sopaca cahai muja pja dujire. Duji, Paulo tinare yoari pja to buhe namochu wahmunore wujo tare. Wujo ta, tiro carí mua, tia casario buipû dujiriro majare boraah wahare. Boraah waha, yaria yuhdua wahare. To yariari baharo tina tirore yariariro cjiropure na wahcô dapore. ¹⁰ Ti ñ yoachû ñuno Paulo dujia, wahmunore cjã suhsure. To ñ yoari baharo Jesu yainare õ sehe ni yahure tiro:

—Yajeripohna ñaena tjiga. Yarierara ahriri. Catira —nire Paulo sehe.

¹¹⁻¹² To ñ nichu wahmuno yariariro cjiro masaa wahare. To ñ masachu ñua tina wahche yuhduare. Ñ wahchea muano macari tahtiapû muja, pãore duhu payore Santa Cena yoaa taa. Ti ñ yoari baharo yoari pja Paulo tinare buhe namore tjoa. Pû bohreahto panocâpu tinare buhe duhure. To buhe tuhsachu wahaa wahai sã.

Paulo Tróadeput jiriro waha, Miletopû suha

¹³ Paulo pano dohoria mehne Asôpu sã sehe su muhtai. Paulo sehe mahapû waha duare. Paulo to niriro seheta Asôpu tirore sã piti bocai. ¹⁴ Tirore sã piti bocachu, sã mehne tiro samure dohoriapû. Tia mehne waha, Mitileneput sã sui. ¹⁵ Tópure su yuhdua pa dachoi Quío wama tiri nucore yuhduai sã. Pa dachoi Samopû sui sã. Pa numu sehere Miletopû sui sã. ¹⁶ Paulo Pentecoste dacho waroi Jerusalêput su duare. Ñ jiro Asia yahpapû yoari pja ji duaerare. Ñ jiro Efesore poto yuhdua, Miletopû wahã sui sã.

Paulo Efeso macainare Jesu yainare puhtoare yahuha

¹⁷ Ñ jiro Paulo Miletopû jiro, Efeso macainare Jesu yaina puhtoare pjiro-care tiro. ¹⁸ Ñ to pjirocari baharo tina Paulo cahapû wihire. Ti wihichû ñuno tinare Paulo õ sehe ni yahure:

—Asiapû coã wihicu musa mehne yu yoarire masina musa. ¹⁹ Musa mehne jicu ne soro nino marieno Jesu, mari puhtoro yare yoaa tii yuhû. Ñ yoacu musare pja ñui. “Musare yuhdurucaja”, nierahi yuhû. Judio masa yuhure ñano ti yoapachuta Cohamacu yare yoaa tii yuhû. ²⁰ Musa noano wahah-tore cahmacu musare buhe pahñonocai yuhû. Masa ti ñurocaroi, ñ yoa musa wuhusepû cûhure buhei yuhû. ²¹ Ñ yoa judio masare, judio masa jieraina

cūhure cūno potori buhei yūhū. “Musa nāa yoari buhiri tiare masi, Cohamacū mehne tjuaahga. Ā yoa Jesu mari puhtorore wacū tuaga”, ni yahui yūhū. ²² Ā yoa mipure Espiritu Santo to dutiriro seheta Jerusalēpu wahi nija. Yūhū tōpu wahacu yū dohse wahahtore masieraja yūhū. ²³ Espiritu Santo to yahuri dihtare masija. Ō sehe nihre Espiritu Santo yūhure: “Nohoi mū sua macaripepu muhū nāno yūhduihca. Ā jia muhure peresu yoaahca”, nihre Espiritu Santo yūhure. ²⁴ To ā nipachuta noaa buheare, Cohamacū masare to cahīa buheare yahuhtiro cjihto jija. Jesu mari puhtoro to yoa dutirire yoa pahño duaja. Ahrire yoariro jicu, yū variahtore cuieraja yūhū.

²⁵ Musa mehne jicu puhtoro Cohamacū to suho jiare yahua tii yūhū musare. Mipure ne musare pari turi nūsi yūhū. Ahrire masija yūhū. ²⁶⁻²⁷ Ā masicu michare ahrire yahuja musare. Jipihtia Cohamacū yare yahui yūhū musare. Ā jiro jipihtina musa mehne macaina Cohamacū yare cahmaeraina ti jichū ya buhiri jierara. ²⁸⁻²⁹ Musa basi noano yoaga. Ā jina Jesu yainare Espiritu Santo musare to nū wihbo dutiinare nū wihboga. Ovejare nū wihboina ovejare ti nū wihboro seheta Jesu yaina cūhure nū wihboga musa. Cohamacū macūno to yariaro to di cohāno mehne Cohamacū tinare to yaina cjihti yoare. Yū ōre wahari baharo paina naina sehe yairo ovejare to chū cohāno seheta Jesu yare musa yoaborire dojomehneahca. Ā jina Jesu yainare noano nū wihboga. ³⁰ Baharopure paina musa mehne macaina sehe Jesu yainare mahño, paye buheare tuho dutiahca. Ti ā dutichū tina tuhohto cua yūhduara. ³¹ Ā jina noano yoaga musa. Tia cūhma waro dachoripe, naminipe pja nūa mehne buhei yūhū musa jipihtinare. Tíre noano wacūga musa.

³² Mipure yū wahari baharo, Cohamacū musare nū wihborohca. Masare to cahīa buheare musa basi cahma buhena, noano jinahca musa. Cohamacū to buhea mehne musare wacū tua namochū yorohca. Baharopure to yainare “Noano yoahtja”, to niriro seheta musa cūhure noano yorohca. ³³ Musa niñerure, musa suhti cūhure “Yūhure waga”, nierahi musare. ³⁴ Yū basi dahra wapatai yū ya cjihtire. Ā yoa yū cahmaare, yūhū mehne macaina ti cahmaa cūhure yū dahraa wapatai mehne nahi. Yū ā yoirire masina musa. ³⁵ Mari ō sehe tuaro dahrana paye baro cjaerainare yoadohoro cahmana marine. Ahrire musare yoa nioi yūhū. Jesu mari puhtoro to niri cjiirire wacūga musa. “To wachū nāhariro yūhdoro wariro sehe wahchera”, niri jire Jesu to basi —ni yahure Paulo Jesu yainare.

³⁶ Ā ni batoa Paulo tina mehne na tuhcuca caha sū, Cohamacūre sinire.

³⁷ To ā sini batoachū tina jipihtina Paulore cja suhsu, wahsupu wihmi, tihtre.

³⁸ “Musare pari turi nūsi yūhū”, pano to nichū tuhoa tuaro cahyare tina. Ā jia tirore tju nūnū ti buhare pu pitamahapu. Tōpu säre nū nūnū tire sā wahachu.

Paulo Jerusalēpu pari turi wahaha

21 ¹ Jesu yainare “Wahana nija” ni, dohoria mehne Cos wama tiri nūcopū poto waha, pahā sui sā. Pa dachopū Roda wama tiri nūcopū pahā sū, yūhduā, Pátara wama tiri macapū sui sā. ² Pátarai jina, Feniciapū wahahtiare, dohoriare bocai sā. Ā jina tia mehne wahi sā. ³ Ā wahana Chipre wama tiri nūcore poto nū yūhduai sā. Cō buhusehe sehe jire tí nūco. Tí nūcore yūhduā, Siria wama tiri yahpapū sui sā. Ā jina dohoria macaa pachere dohoria macariro Tiro wama tiri macai to dure mochū, tói pahsasini. ⁴ Tói

Jesu yainare ñuna, siete dachori waro tjuasinii sã tí macai. Ñ jia tó macaina Jesu yainare Espíritu Santo to yahuriro seheta tina Paulore Jerusalēpu waha dutieramare. ⁵Ti ñ nipachuta tí macare siete dachori sã jiri baharo, wahai sã. Sã wahahto panocã jipihtina Jesu yaina, ti namosãnumia mehne, ti pohna mehne, tí maca duhtu cahai sãre ñu tjuaa wahare. Ñ jina jipihtina sã paduroi su, na tuhcuca caha su Cohamacure sinii. ⁶Sã ñ siniri baharo, “Wahana nija” ni, tinare cã suhsu batoa, wahai sã. Sã wahachu ñu ñunu ti, tina sehe majare majaa wahare ti ya wuhusepu.

⁷Tiro wama tiri macai jiina wahana Tolemaidapu wahã sui sã. Tóihita pjiri mare waha batoai sã. Tí macai su, Jesu yainare “Coyea, ¿jimajari?” ni, cū dacho sã tina mehne jisinii. ⁸Ñ yoa pa dachoi tjoa Cesarea wama tiri macapu sui sã. Tópu su, noaa buheare yahuriro Felipe wama tiroto ya wuhupu sui. Ñ jina tiro mehne tjuai sã. Felipe Jesu yaina ti siete beseina mehne macariro jire. ⁹Tuhsu, tiro pititiaro numia pucuro jire. Tí numia sehe Cohamacu yare yahua numia jire. Nuhmia jire. ¹⁰Tópu sã mahaa dachoricã sã jiri baharo, Agabo wama tiroto Cohamacu yare yahu turariro Judeapu jiri sãre ñuno wihire. ¹¹Ñ wihiro tiro Paulo ya dare tuã dihiri dare na, to basi to dahporire, to wamomacarine duhte cayo ñ sehe ni yahure:

—Ñ sehe nire Espíritu Santo: “Ahri dare cjuariro Jerusalēpu to suchu, judio masa ãta duhteahca tireore. Duhte tuhsu, judio masa jierainare waahca tina tireore”, nire Espíritu Santo —ni yahure Agabo.

¹²To ñ nichu tuhona, sã Cesarea macaina mehne Paulore tuaro cahii sã. Tireore Jerusalēpu waha dutieramai. ¹³Sã ñ nichu Paulo sehe ñ sehe ni yuhtire:

—¿Dohse ni tiina nijari musa? Yuhu sehere cahyachu yoaca musa. Tina yuhure peresu ti yoachu noanohca. Yuhu Jerusalēpu Jesu mari puhtoro yare yu yoari buhiri yu yariachu noanohca —nire Paulo sãre.

¹⁴“Wahaeraja”, to nichu tuho duana nimai sã. To “Wahaihtja” to nichu, ñ tuhhotunocahi sã. Ñ sehe nii:

—Mari puhtoro to cahmano seheta yoajaro —nii sã.

¹⁵Tíre suhudu batoa, sã yare cahno, wahaa wahai sã Jerusalēpu wahana. ¹⁶Tópu sã wahachu mahainacã Cesarea macaina Jesu yaina sehe sã mehne wahare. Ñ yoa tina mehne macariro Chipre macariro Mnasō wama tiroto ya wuhupu sui sã. Tiro yoari pja Jesu buheriro jire. Ñ jiro to ya wuhu sã carihiti wuhu jire. Tí wuhui sã carini baharo, Jerusalēpu sui sã.

Paulo Santiagore ñuno wahaha

¹⁷Jerusalēpu sã suchu, tó macaina Jesu yaina sehe “¿Wihimajari?” ni, wahchea mehne piti bocare sãre. ¹⁸Pa ñumui Paulo sã mehne Santiagore ñuno sure. Sã tópu suchu tó jipihtina Jesu yaina puhtoa jire. ¹⁹Tóti ti jichu ñuno Paulo tinare to wamomaca ñahari baharo judio masa jierainare to buherire yahu pahñore Jesu yainare. Cohamacu to yoadohoa mehne to yoirare yahu pahñore. ²⁰To ñ ni yahuchu tuhoa, “Cohamacu noariro, tuariro jira”, ni ño payore tina sehe. Ñ ni tuhsu tina Paulore ñ sehe ni yahure:

—Coyeiro, mipure payu judio masa Jesure wacū tuaina jira. Tíre masina muhu. Ñ jia tina ñ sehe ni tuhutura: “Cohamacu to dutiare, Moise cjiropu marine to cūrire marine yoa pahñono cahmana”, nia nina. ²¹Ñ sehe ni

namona tina. “Pa sehepu jiiinare judio masa jieraina watoi jiiinare judio masare Cohamacu Moise cjirore to cūri cjirire cohā dutiha Paulo”, nimare ō macaina judio masa mūhure. “Paulo judio masa pohnare mahari cahsarocāre yihso na dutierara”, nimare mūhure tina. “Judio masa ti yoaa tiare Paulo duhu dutira”, ni ahri cūhure ni yahuwajara mūhure. ²² Ā jia mū ōre wihichu tuhoa tina cahmachuahca mūhure tuhtia taa. Ā jichu ō sehe yoaro cahmana mūhure. ²³ Mūhure sã dutiro seheta yoaga. Mipure ōre pititiaro mua Cohamacure wacūina “Ō sehe yoanahtja”, niina jira. ²⁴ Tina mehne wahaga. Ā jia Cohamacu Moise cjirore to dutihiro seheta ti basi Cohamacu yare yoaa taa ti dutiare yūhdurūcaare cosaa nina. Mūhu cūhu āta yoaga. Ā yoacu ti ā yoahiti wapare wapaga mūhu sehe. Mū ā wapari baharo ti pjoarire waha duti masina tina. Mū ā yoachū űna masa mūhure ti nia mahñori jichu masiahca jipihitina. Cohamacu Moise cjirore to cūri dutiare yoariro mū jichu masiahca tina. ²⁵ Wiho mejeta judio masa jieraina Jesu yaina sehere sã joari pūre waroca tuhsui. Ō sehe ni, joai sã. “Cohamacu jira’, ti nia masurine ño payo ti duhu payoa chuare, dire, wamua ti ñaha wajāinare wahiquinare chuena tjiga musa. Ā jina numia mehne ñano yoaena tjiga. Numia cūhu mua mehne ñano yoaena tjiga”, ni yahu joahi sã joari pūpure —nire tina Paulore.

Cohamacu wūhupu judio masa Paulore ñahaha

²⁶ Ti ā ni durucuri baharo pa dacho Paulo sehe pititiaro mua mehne ti basi Cohamacu yare yoaa taa ti dutiare yūhdurūcaare cosaa taa, Cohamacu wūhupu sãa wahaha. Tí wūhupu sãa sūro, tinare yahuha Paulo: “Ōpe dachori duhsara musa cosahto”, ni yahuha tiro pititiarore. Ā jia ti cosa batoari dachoi tina cāina Cohamacure wahiquinare ti wahti dacho jire.

²⁷ Ā yoa ti cosa pahñoboriro mahanocā duhsachu waro Cohamacu wūhupu Paulo to jichu Asia yahpa macaina judio masa sehe űna tirore. Ā űna Paulore quiti dojomehne, tí wūhupu jiina jipihtinare tiro mehne suachu yoaha tina. Ā suaa judio masa Paulore ñaha, ²⁸ ō sehe ni sañurucuha:

—Musa sã coyera Israe masa sãre yoadohona taga. Ahriro jira marine dojomehneriro. Ahriro Cohamacu Moise cjirore to cūri dutiare ahri wūhu cūhure “Wiho jia jira”, ni buhe sito tara jipihtinare. Ā yoa tiro Cohamacu wūhupure judio masa jieraina cūhure na sãare. Ā yoaro ahri wūhure ñaa marieni wūhure tiro dojomehnere —ni sañurucuha judio masa Asia yahpa macaina tó macainare.

²⁹ Tó pano Jerusalēi Paulo Tróximo wama tiro mehe to jichu judio masa űna tiha. Tróximo sehe Efeso macariro judio masano jierariro jire. To ā jichu masia ō sehe ni tuhotuha tina: “Paulo Tróximo Cohamacu wūhure na sãano nica”, ni tuhotumaha judio masa.

³⁰ Masare ā ni yahu ti sañurucuri baharo tí maca macaina payu tuaro suaha. Payu mūroca ta, Cohamacu wūhui jirirore Paulore ñaha waja wijaa wahaha. Ā wijaa tuhsu, tí wūhu sopacarire bihaha tina. ³¹ Ā yoaa tina tirore wajāa taa nimaha. Ti ā yoachu űna paina sehe “Jipihtina Jerusalē macaina sua, sañurucua nire”, ni yahua wahaha surara puhtorore. ³² Ti ā nichu tuhoro surara puhtoro sehe to surarare, ti dutiina cūhure cahmachuroca, tina mehne Paulore wajā duaina cahapu mūroca wahcā, suha. Surara ti suchu űna Paulore cjāmaina cjā duhunocaha. ³³ Ā jiro surara puhtoro Paulo cahapu su,

tirore ñaha, pua da comaa dari mehne tirore duhte dutiha. Ti duhte tuhsachu ñu, surara puhtoro Paulore cjamainare sinitu ñuha:

—¿Diro baro jijari ahriro? ¿Yaba buhiri tirore ñ yoari masa? —ni sinitu ñuha tiro tinare.

³⁴To ñ sinituchu tuhoa masa sehe “Õ sehe yoare tiro” ni, paina cûhu soro ni sañurucu, yahuha surara puhtoro. Ñ ni ti sañurucuchu surara puhtoro noano tuhoeraha. Ñ jiro tiro surara ya wuhupu Paulore naa dutiha. ³⁵Tí wuhupu su, Paulo mujari escadai to mujano cahachu masa sehe tirore cja duaa nimaha. Ti ñ yoachu surara sehe tirore na wua, na mujaa wahaha.

³⁶Masa tinare payu nunu ti, sañu nunu tihaa:

—Tirore wajānocahga —ni sañurucuha tina Paulore.

Paulo “Ne masare ñano yoaeraja yuhu”, ni yahuha

³⁷Ñ yoa Paulore tí wuhupu ti peresu yoahto pano, Paulo sehe surara puhtoro ñ sehe ni siniha:

—Yuhu muhu mehne suhudu duaja —ni siniha Paulo.

—¿Muhu griego masa yare durucujari? ³⁸¿Sohō jiri, Egipto macariro jierajari muhu? Tiro masare ti puhtoare cohā dutiro, cuatro mil puhtoare cohā duaina sehere masa marienopu naari jire. ¿Tiro jierajari muhu? —niha surara puhtoro Paulore.

³⁹To ñ nichu tuhora Paulo ñ sehe ni yuhtiha:

—Tiro jieraja yuhu. Judio masuno jija. Tarsoi Cilicia yahpai jiri macai masa bajuai yuhu. Wiho jiri maca macariro jieraja yuhu. Yuhu ahrina masa mehne durucu duaja yuhu —niha Paulo tirore.

⁴⁰To ñ nichu tuhora surara puhtoro sehe tirore durucu dutiha masa mehne. Ñ jiro Paulo mujari escadai ducuro to wamomacari mehne “Dihta mariahga”, niha masare. To ñ yoachu ñua, dihta mariea pihtia wahaha. Ti dihta marieachu ñu, Paulo judio masa ya mehne yahuha tinare.

22 ¹—Yu coyea, yu yoarire yahuihtja masare. Yu yahuchu tuhoga masa —niha Paulo.

²To ñ nichu Paulo judio masa ya mehne to durucuchu tuhoa masa sehe dihta marieina tjuaha. Ñ jiro Paulo tinare ñ sehe ni yahuha:

³—Yuhu judio masunota jija. Tarso wama tiri macai, Cilicia yahpai jiri macai masa bajuai yuhu. Wiho mejeta ahri maca Jerusalēihta bucui yuhu. Tuhsu, yuhure Gamalie wama tiro buhea tire. Ñ jicu yuhu mari ñuchusuma cjiri dutiare noano buhei. Mipure Cohamacure masa yoaro seheta yuhu cûhu ño payoa timai. ⁴Ñ jicu Jesu yainare ñano yoa ticuru yuhu. Caina tinare wajāa ticuru yuhu. Muare, numia cûhure ñaha, peresu yoa tii yuhu. ⁵Sacerdotea bui puhtoro, judio masa bucuna mehne yu tuahti pûri cjihtire Jesu yainare ñaha dutia pûrine yuhure joabasare. Mari coyeare Damasco macainare tí pûrine ñoi tai nimai Jesu yainare ñahai tai. Tinare ñaha, na ta peresu yoi tai nimai. Jerusalēpu tinare na ta duamai buhiri dahrei tai. Õ sehe yu nichu sacerdotea bui puhtoro, judio masa bucuna cûhu noano masina —ni yahuha Paulo.

Paulo Jesu yairo to waha ducarire yahuha

(Hch 9.1-19; 26.12-18)

⁶Ñ ni tuhsu ñ sehe ni yahu namoha:

—Ā yoa cohari pja jichu, Damascopu yu sui cahachu waro muanopu wacuēnoca si siteroca boroa tire yuhure. ⁷To ā si siteroca borochuta yuhu yahpapu bora caha suai yuhu. Yu bora caha sari baharo durucuro coa tare yuhure. “Saulo, Saulo ¿dohseacu yuhure nāno yoajari?” ni durucuro coa tare yuhure. ⁸“Puhtoro, ¿diro baro jijari muhu?” ni sinitui yuhu. “Yuhu Jesu Nazare macariro, mu nāno yoariro jija yuhu”, ni yuhtire yuhure tiro. ⁹Yu ā wahachu yuhu mehne macaina buhriarore nure. Wiho mejeta yuhu mehne to durucuchu tuhoerare tina. ¹⁰“Puhtoro, ¿dohse yoaihcari yuhu?” ni sinitui Jesure. “Wahcārucaga. Damascopu wahaga. Tói mu wahachu, muhure jipih-tia yu yoa dutihtire paio yahurohca muhure”, nire tiro yuhure. ¹¹Tuaro to minoa siterocachu, yu capari wapoahare yuhure. Ā jia, yuhu mehne macaina yu wamomacare naha, Damascopu tuā wahcāre yuhure.

¹²“Tói Anania wama tiro, Cohamacure ño payoriro, marine Cohamacu dutiare yoa pahñoriro jire. Tó macaina judio masa jipih-tina ti ño payoriro jire. ¹³Ā jiro tiro yu cahai wihi taruca yuhure yahure. “Coyeiro Saulo, ñuga pari turi tjoa”, nire tiro. To ā niri baharo pari turi ñui yuhu. Ā ñu ducacu tirore ñui yuhu. ¹⁴Yu ā ñuchu tiro Anania yuhure yahure: “Cohamacu to cahmaare noano masihtirore panopu bese tuhsuyhti muhure. Ā jiro ‘Yu macu noarirore ñu, tuhohca’, ni yahuyhti muhure Cohamacu panopu. Tiro jira mari ñuchusuma muna ti ño payoriro. ¹⁵Ā jicu muhu mu ñurire, mu tuhore yahuilhca muhu jipih-tinare. ¹⁶Ā jina mipure yoari pja jiena tjijihna. Wahcārucaga. Ā jicu bautisariro jiga. Jesure mu sinichu mu ñaare yoari buhirire cohānohca”, nire yuhure tiro —niha Paulo.

Paulo judio masa jierainare to buherire yahuha

¹⁷Ā ni tuhsu Paulo ō sehe ni yahu namoha:

—Ā yoa tuhsu yuhu Jerusalēpu tjua ta, Cohamacu wuhupu Cohamacure sinii sui. ¹⁸Yu tói jichu Jesu yuhure bajua tire. Ā bajuaro yuhure yahure. “Jerusalē macaina yu yare mu yahuchu tuho duaerara. Ā jicu cjero pa sehepu wahaga”, nire Jesu yuhure. ¹⁹To ā nichu tuhocu yahui tirore: “Puhtoro, mu yainare judio masa buhea wuhusei jianare yu naha, cjāri cjirire masina Jerusalē macaina. ²⁰Ā jicu muhure yahurirore Estebā sehere ti wajāchu ñucu ‘Noano yoa wajāna’, nimai. Tirore ti wajāchu ti suhtire cjuabasai yuhu. Tí cūhure masina ahri maca macaina. Ā jia yu yahuchu tuhoboca yuhure”, ni yahui yuhu Jesure. ²¹Yu ā nichu tuhoro Jesu yuhure ō sehe ni yahure: “Yoaropu judio masa jierainare buhehtirore warocaihtja muhure. Ā jicu wahaga muhu”, nire yuhure yu puhtoro —niha Paulo masare.

Surara puhtoro Paulo mehne durucuha

²²To yahu muhtari dihtare noano tuhomaha masa. Wiho mejeta judio masa jieraina cahai Jesu Paulore to warocahtire to yahuchu tuhoa tina sañurucu ducaha tjoa:

—Ahriro mipu pinihtare yariawahnojaro —ni sañurucuha tina.

²³Ā jia tina sañurucu namo, sua mehne ti suhtire wahba siteruca, dihta mehne docaha. ²⁴Surara puhtoro surara ya wuhupu Paulore na sãa dutiha to surarare. Ā jiro surara puhtoro “¿Dohse yoa Paulo mehne sua ā naca sañurucuha nijari masa?” ni sinitu duamaha. Paulore tíre sinituro taro, yuta dari

mehne tjana dutimaha tirore. ²⁵Wiho mejeta tirore ti dūhteri baharo, tiro cahai jirirore surara puhtoroře ō sehe ni yahuha Paulo:

—Yūhū Roma macariro jija. Ā jina “Ñano yoiaro jira ahriro”, yūhūre ni yahusā masierara mūsa. Ā yahusā masierana yuta dari mehne yūhūre tjana masierara mūsa —niha Paulo tirore.

²⁶To ā nichū tuhooro surara puhtoro, to bui puhtoroře ō sehe ni yahuro wahaha:

—Ahriro Roma macariro jira. Ā jicu noano yoaga tirore —ni yahuha tiro to puhtoroře.

²⁷To ā niri baharo surara bui puhtoro sehe Paulore sinituro wahaha:

—¿Potocāta mūhū Roma macariro jijari? Yahuga yūhūre tíre —niha tiro.

—Tiro tjia yūhū —ni yuhtiha Paulo.

²⁸To ā nichū tuhooro surara bui puhtoro sehe tirore ō sehe ni yahuha:

—Yūhū Roma macariro ji duacu niñeru pjíro wapai —niha tiro.

—Yūhū Roma yahpa macari macapū masa bajuai. Ā jicu Roma macariro jija —niha Paulo.

²⁹To ā nichū tuhoa tirore tjanaborina wahaa wahaha.

Ā jiro Paulo Roma macariro to jiro jichū masino, tirore comaa dari mehne ti dūhteri cjirire wacūno, cui niha surara puhtoro sehe.

Paulo judio masa puhtoroře yahuha

³⁰Ā yoa surara puhtoro judio masa Paulore ti yahusārire noano masi duaha. Ā masi duaro pa dachopū comaa darire tirore to pjā dutiri baharo, sacerdotea puhtoare, judio masa bucūna mehne cahmachu dutiha surara puhtoro. To ā cahmachu dutiri baharo tiro tōpū Paulore na wahcā, ti pano duhu dapoha tirore.

23 ¹Ā jiro Paulo judio masa bucūnare ñū piti boca, ō sehe ni yahuha:

—Coyea, Cohamacū to ñurocaroi jipihtia dachoripe noano yoiarucuja yūhū —niha Paulo.

²To ā nichū tuhooro jipihtina sacerdotea bui puhtoro jiro Anania sehe Paulo duserore cjā dutiha. ³To cahai ducuinare cjā dutiha. Tirore ti cjāri baharo Paulo Ananiare tuhtiha:

—Masa ti ñurocaro dihtare noano yoiaro jira mūhū. Masa ti baharo būhū-sehei ñano yoa cohtariro jira mūhū. “Cohamacū dutiare yūhdurūcai nina”, yūhūre nipaihta yūhūre cjā dutira mūhū. Ā cjā duticu mūhū sehe dutiare yūhdurūcai nica —niha Paulo tirore.

⁴To ā nichū tuhoa Paulo cahai ducuína ō sehe niha tirore:

—Cohamacū to beseriro sacerdotea bui puhtoroře ñano durucui tjiga mūhū —niha tina Paulore.

⁵Ti ā nichū tuhooro Paulo ō sehe ni namoha tjao:

—Coyea, tiro to sacerdotea bui puhtoro to jiare masierahi yūhū. Ā jii ā nimacanocati yūhū. Cohamacū yare ti joari cjiri ō sehe ni yahura tirore: “Mū ya maca macaina puhtoroře ñano ni, durucui tjiga”, ni joaa tiha —niha Paulo tinare pjāno.

⁶Ā yoa tói pūa curua macaina jiha. Cū curua saduceo curua macaina jiha. Pa curua sehe fariseo curua macaina jiha. Pūa curua ti jichū masino, Paulo judio masa bucūnare tuaro sañurucu ō sehe ni yahuha:

—Coyea, yuhũ fariseo curua macariro jija. Fariseo curua macariro macũno tjija yuhũ cũhu. “Yariaina masa mũaahca”, yũ ã niri buhiri yuhũre ñano yoa duara musa —niha Paulo.

⁷To ã nichũ tuhoa fariseo curua macaina, saduceo curua macaina ti basi cahma tuhtiha. ã jia ti basi pua curua tju waha. ⁸Saduceo curua macaina õ sehe niina jija: “Yariaina masa mũaasi. Espiritua, anjoa cũhu ne mariaha”, niina jija. Wiho mejeta fariseo curua macaina sehe tina yoaro sehe nieraha. ã jia Paulo “Yariaina masa mũaahca” to nichũ tina ti basi cahma tuhtiha. ⁹ã cahma tuhtia, tuaro saũurucuha. ã yoa fariseo curua mehne macaina judio masa buheina wahcãruca, tuhti, õ sehe ni yahuha:

—Ahrĩro Paulo ñano yoaerare. ã jiro espĩritu o anjo, potocã tiro mehne durucuriro jiboca. [ã jina ahrĩrore buhiri dahrena, Cohamacure ñũ tuhtiina jiboca mari. ã yoaia jiena tjiga musa] —niha tina.

¹⁰Ti ã niri baharo, tina jipihtina cahma tuhti, tuaro suaha. “Ti basi cahma sua sayo, tirore wajãboca”, ni cuisãaha surara puhtoro sehe. ã jiro Paulore, masa watoi ducurirore na wio, to ya wuhũpu na ta dutiro warocaha to surarare.

¹¹Pa ñamihi puhtoro Jesu Paulo cahai ducuro, õ sehe ni yahuha tirore:

—Wacũ tuaga. Mĩpure õre Jerusalẽi yũ ya buheare yahure mũhu. Tõ sehetã Romapu cũhure yahui wahaiha mũhu —niha puhtoro Jesu Paulore.

Judio masa Paulore wajã duamaha

¹²⁻¹³Pa dacho bohrearoi judio masa cahmachu, ti basi õ sehe ni cahma durucuha:

—Õ sehe yoajihna. Paulore wajãjihna. Cohamacure õ sehe ni yahu cũjihna. Ne mari sihnisi. Ne chusi, pu tirore mari wajãri baharopũ. Tirore mari wajãerachũ, mari sehere Cohamacu buhiri dahrejaro —niha tina ti basi.

Tina cuarenta bui curero judio masa jija. ¹⁴Ti ã niri baharo tina sacerdotẽa puhtoare, bucũna cũhure yahua wahaha:

—Paulore sã wajãhto pano chuare sã chueraja. “Tirore sã wajãerachũ Cohamacu sã sehere buhiri dahrejaro”, nihi sã. ¹⁵ã jina musa, bucũna mehne õ sehe ni pjirocaga. “Paulore pari turi sinitu duaja”, niga surara bui puhtoro. Musa ã niri baharo surara bui puhtoro na ta dutiga Paulore. Wiho mejeta Paulo to õre to wihiro cahachũ waro tirore wajãnahca sã —niha tina sacerdotẽa puhtoare.

¹⁶Wiho mejeta Paulo pjacamacũno ti ã ni durucuchũ tuhoaha. Ti ã nichũ tuho waha, surara ya wuhũpu Paulore yahuro sãaha. ¹⁷To ã yahuri baharo Paulo sehe cũiro surarare pjiroca, õ sehe ni yahuha tirore:

—Ahrĩro wahmũnore puhtoro cahapu naahga. Ahrĩro mu puhtoro yahu duaro nina —niha Paulo.

¹⁸To ã nichũ tuho surara sehe Paulo pjacamacũnore to puhtoro cahapu na sũ, õ sehe ni yahuha:

—Peresupũ jiriro Paulo sehe yuhũre pjiroca, ahrĩro wahmũnore mu cahapu naa dutihre. Ahrĩro mũhure yahuro taro nihre —niha surara to puhtoro.

¹⁹To ã nichũ tuho puhtoro sehe wahmũno to wamomacare ñaha tuã wahcã, masa marienopũ tirore sinitu ñũha:

—¿Dohse nii tai niri mũhu yuhũre? —niha tiro Paulo pjacamacũnore.

²⁰To ā sinituchū tuhorō ō sehe ni yahuha:

—Judio masa cūno potori, “Ō sehe yoajihna” ni, ñamichacapū judio masa bucūna cahapū muhure Paulore naa dutiahca. “Bucūna Paulore pari turi sinitu duara”, ni mahñoahca. ²¹Wiho mejeta cuarenta bui curero mua tirore wajā duaina bucūa caha duara. Tina tirore ti wajāhto pano chuare chūsi. Ā yoa sihnisi. “Tirore mari wajāerachū, Cohamacū mari sehere buhiri dahre-jaro”, nire tina ti basi. Ā jia mipū muhure Paulore na ta dutia tina sehe duhti cohta tuhsuhre, Paulore wajāa taa. Ā jicu ti yahua wihichū tinare yuhtii tjiga muhū —ni yahuha wahmūno surara puhtorore.

²²To ā nichū tuhorō surara puhtoro ō sehe niha:

—Yuhure mū yahurire painare yahui tjiga —ni yahuha wahmūnore.

Ā ni tuhsu wahmūnore “Wahaga”, niha tiro.

Paulore puhtoro Feli wama tiroiro cahapū warocaha

²³Ā ni tuhsu, surara puhtoro puaro to surarare pji wahcā, tinare ō sehe ni dutiha:

—Dos cientos surarare, setenta cawaloa bui pisainare, dos cientos doca yucu cjuaina mehne ti yare cahno dutina wahaga. Micha ñami nueve jichū Cesareapū wahanahca masa. ²⁴Paulore cawaloare to pisahtinare cahnobasaga. Cesareapū puhtoro Feli cahapū, noano ñu nūnū sogā tirore —niha surara puhtoro.

²⁵Ā ni tuhsu papera joaro, ō sehe ni joaha tiro:

²⁶“Yuhū Claudio Lisia muhure tuariro puhtoro Felire noa dutija. ²⁷Judio masa ahriro Paulore ñaha, wajāmāre. Ā jicu tiro Roma macariro to jichū masicu, yū surara mehne tirore yoadohoi suhi. ²⁸Ā jicu tirore ti yahusārire masi duacu judio masa bucūna cahai nahi tirore. ²⁹Ā jicu tiro judio masa ya dutia dihtare to yuhdurucachū mari ya dutiare to yuhdurucaerachū ñucu, tirore peresupū cū duaerahi. Yaba buhiri yariaro mariahna tirore. ³⁰Ā jiro judio masa tirore wajā dua, ti bucūa cahachū tuhorō paio yahure yuhure. To ā yahuri baharo Paulore mipure mū cahapū warocai nija. Ā jicu tirore yahusā-rinare to ñaa yoirire muhure yahu duti tuhsuhi yuhū”, ni joaha surara puhtoro.

³¹Ā yoa surara ti puhtoro to dutiriro seheta yoaha. Tí ñamine Antipatri wama tiri macapū Paulore na suha. ³²Pa dachoi paina surara cawaloa bui pisaeraina tí macai tjua taha ti ya macapū. Paina surara cawaloa bui pisaina dihta tirore na yuhdu wahcāha. ³³Pū Cesareapū na suha Paulore. Ā jia surara puhtoro to warocari pūre puhtoro Felire waha. Ā jia Paulore na suha puhtoro cahapū. ³⁴Ti ā wari baharo puhtoro tí pūre to ñuri baharo tiro painare sinitu ñuha:

—¿Di yahpa macariro jijari ahriro Paulo? —ni sinitu ñuha tiro.

—Cilicia yahpa macariro jira —ni yahuha tirore.

³⁵Tinare sinitu tuhsu, Feli Paulore ō sehe ni yahuha:

—Muhure yahusārina ōre ti wihichū mū yahuchū tuhoihtja —niha Feli Paulore.

To ā niri baharo Herode ya wuhupū tirore cūha. Ā jiro to muare tirore cohta dutiha puhtoro.

Paulo “Ñano yoerahi yuhū”, ni yahuha Felire

24 ¹Cinco dachori baharo, Anania sacerdotēa bui puhtoro, paina judio masa bucūna, dutiare mihniro Tértulo wama tiroiro mehne

Cesareapũ suha. ̃ Jia tina Paulore yahusã dua, puhtoro Feli cahapũ suha. 2 ̃ Jiro Paulore tũpure ti na suri baharo Tũrtulo tirore yahusã dũcaha. ̃ Yahusã dũcaro ũ sehe ni yahusãha Felire:

—Mũhũ noano masiro, sã puhtoro mũ noano dutichũ sã ahri yahpa macaina noano jinocaja sã cahmacheno marieno. Mũ dutia mehne noaa sehere cohtotaro nina ahri yahpa. 3 ̃ Jina sã noano jinocahna wahcheja. ̃ Jina mũhũ mehne noano wahcheja. 4 Mipũre mahanocã mũhũre cariboihtja yũhũ. Mahanocã mũhũ mehne suhũdu duaja. Sãre tuhõrocasinia mũhũ. 5 Ahriro sãre caribobiara. Jipihitia yahpari macainare judio masare ti sua saũurucuchũ yoara ahriro. ̃ Jiro masa ti basi cahma tuhtichũ yoara ahriro. ̃ Jiro nazareno wama tiri curua puhtoro jira. 6 ̃ Jina Cohamacũ wũhũre ñano to yoa duachu ñuna sã ñahahi ahrirore. [Sã ñahahi baharo sã ya dutiare to yuhdũrucariro jichũ tirore buhiri dahre duamahi sã. 7 Wiho mejeta surara puhtoro Lisia wama tirore tirore sãre tuaro mehne manocahre. 8 Baharo tirore yahusãrinare mũ cahapũ waha dutihre Lisia. To ã nichũ tuhona tahi sã.] Mũhũ pinihta ahrirore sinitucũ, jipihitiare to ya buhirire masicũhca mũhũ —niha Tũrtulo Felire.

9 To ã niri baharo paina judio masa “Tũrtulo to niriro seheta potocã tjira”, niha tina cũhũ. 10 Ti ã ni yahusãri baharo puhtoro Feli Paulore yahu dutiha. ̃ Sehe ni yahuha Paulo:

—Payũ cũhmari ahri yahpa macainare mũ dutirire masija yũhũ. ̃ Jicũ yũ yõarire mũhũre yahucũ wahcheja. 11 Doce dachõrita wahara Jerusalẽpũ Cohamacũre yũ ño payori baharo. Mũhũ ahri potocã ti jichũ masi duacũ painare sinitu ñũga. 12 Judio masa yũhũre Cohamacũ wũhũpũre boca ti ñahachũ masare ñano ni saũurucui nierahi. ̃ Yoa masare sua saũurucuchũ yoai nierahi. ̃ Yoacũ judio masa buhea wũhũsere, ti ya maca cũhũre ne ti nino sehe ñano yõaerahi. 13 ̃ Jia yũhũre yahusãrina sehe ti yahusãri cjiirire “̃ Sehe yõare ahriro”, ni yahu masierara mũhũre. 14 Mipũ yũ yõarire yahuihtja mũhũre. Dõihita sã ñũchũsuma ti ño payorirore Cohamacũre ño payoja yũhũ cũhũ. ̃ Jicũ to yare yõaja Jesu ya noaa buhea ti nino seheta. Ahrina “Jesu ya mahũõpea jira”, ni durucura ahrina judio masa. Wiho mejeta Cohamacũ dutia, Moise cjiropũre to cũri cjiirire tí cũhũre ño payoja yũhũ. Cohamacũ yare yahu mũhtaina cjiiri ti joari cũhũre ño payoja yũhũ. 15 Ahrina paina judio masa ti tuhõturo seheta Cohamacũ jipihitina masare yariainare noaina, ñaina mehne ti masa mũjachũ yõarõhca. Yũhũ cũhũ ãta ni tuhõtuja. 16 ̃ Jicũ buhiri mariaja yũhũ. Cohamacũ yũhũre tíre masina. ̃ Yoa masa cũhũ tíre masina. ̃ Jii potocãta yahuja yũhũ mũhũre. ̃ Jicũ noano tuhõtunocaja.

17-18 17 Paye cũhmarine pa sehẽpũ tiniriro jicũ Jerusalẽne tju wihi, yũ coyẽare judio masa pjacũõinare niñẽrure wai tai nihi. Tju wihi Cohamacũre ño payoi tai to ya wũhũpũ sumahi. ̃ Jicũ Cohamacũ to cosa dutiriro seheta yũ basi yũ yuhdũrucarire yũ cosari baharo wahiquirore wa duamahi tirore ño payoi tai. Tõpũ yũ jichũ ahrina judio masa yũhũre bocahre. Ti bocachũ paina yũhũ mehne mariahre. Sua, saũurucuina mariahre. 19 Wiho mejeta paina judio masa Asia yahpa macaina tõi jihre. Tina yũ ñano yõachũ ñũrina jia yahusãa tajaro. 20 Ahrina õpũ jiina sehe judio masa bucũna mehne yũ jichũ ñũina yũ ñano yõarire masia, tina cũhũ yahusãjaro. 21 Cũnocã pinihtare yũhũre tina

yahusā masina: Pano tina mehne jicu ò sehe ni tuaro sañurucuhi yuhū: “Yariaina masa mjaahca”, yū niri buhiri, buhiri dahrera masa”, nihi tinare —ni yahuha Paulo Felire.

²² To ā ni yahuri baharo Feli ò sehe ni yahuha Paulore:

—Mipū tó puro tjira. Surara puhtoro Lisia to wihiri baharo mūhure yū yoahtore masiihca yuhū —niha Feli Paulore.

Feli sehe Jesu yaina ti yoarire noano masi pahñoriro jiha.

²³ Ā ni tuhsu, Paulore cohtariro surarare Feli noano ñū nūnū dutiha “Pere-supū jiro duhtiri”, nino. Wiho mejeta mahanocā ware to tinihtore. Paulo mehne macainare tirore peresupū jirore yoadoho dutiro ā dutiha Feli.

²⁴ Mahaa dachoricā baharo Feli to namono Drusila wama tiricoro mehne ta, Paulore pjiha. Feli namono sehe judio masono jiha. Paulore ti pjiri baharo, Jesucristore to wacū tuare Paulo sehe yahuha tinare. ²⁵ Ā yahuro quihōno yoaare, ñaare yoa duaparota yoaeraare, pihtiri dacho jichū Cohamacu masare to buhiri dahrehtore yahuha Paulo. To ā ni yahuchū tuhorō Feli cuirō, Paulore ò sehe ni yahuha:

—Mipūre wahaarisā. Baharo yuhūre dahraa mariachū mūhure pjihtja tjōa —niha Paulore.

²⁶ Ā nino Paulo to niñeru wachū cahmamaha Feli. Ā jiro tiro niñerure cahmano, payū tahari Paulore pji, tiro mehne durucua timaha Feli. ²⁷ Pua cūhma baharo Porcio Festo wama tirore puhtoro Felire cohtotariro jiha. Wiho mejeta Feli sehe judio masare tiro mehne wahchechū yoa duaha. Ā jiro puhtoro Feli to puhtoro wijaahto pano, tiro Paulore peresui ji dutisiniha.

Paulo Festore to yoarire yahuha

25 ¹ Ā yoa Festo tí yahpapū tia dacho to jiri baharo, Cesareapū jirore waha, Jerusalēpū suha. ² Tóti to jichū sacerdotēa puhtoa, judio masa puhtoa mehne Paulore ti yahusārire yahuha Festore. ³ Paulo to mahapū wahachū tirore bucua caha, wajā duaa nimaha tina. Ā jia tina Festore tuaro sinimaha:

—Paulore Jerusalēpū warocaga —ni sinimaha tina Festore.

⁴ Ti ā nichū tuhorō, Festo ò sehe ni yahuha tinare:

—Mipūre Paulo Cesareapū peresu jira. Yuhū tōpū waha tai nija. ⁵ Paulo to ñano yoiriro jichū, masa puhtoa Cesareapū yuhū mehne waha, tirore yahusāga —niha Festo.

⁶ Ā jiro Festo ocho o diez dachori tina mehne to jiri baharo Cesareapū tjuaa wahaha. Pa dachoi tiro buhiri tiare cahnori wuhū dujiro, Paulore na ta dutiha. ⁷ Ā jia Paulo Festo cahapū to wihichū, judio masa Jerusalēpū tarina sehe Paulo caha ducu, tirore tuaro mehne yahusā dūcaha. Ā yahusāpahta “Ahriro to ñano yochū ñūhi”, ni yahu masieraha. ⁸ Ti ā ni yahusāri baharo Paulo to yoarire yahuha:

—Judio masa ti dutiare, Cohamacu wuhū macaa dutiare, Roma puhtoro to dutiare yuhdurūcaerahi —niha Paulo.

⁹ Festo sehe judio masare wahchechū yoa duaro, Paulore ò sehe ni sinituha:

—¿Jerusalēpū waha duajari mūhū? Mū yoarire yuhūre tōpū yahuihca mūhū —niha Festo Paulore.

¹⁰ To ā nichū tuhorō Paulo ò sehe ni yahuha:

—Jipihtina bui puhtoro César to ya wuhui buhiri tiare cahnori wuhui jija mipure. Ahri wuhu baroi yu yoarire tuhoga. Judio masare yu ñano yoerare noano masina muhu. ¹¹ Dutiare yuhdurucaripo yu jichu, yuhure wajachu noaboa. Wiho mejeta ahrina ti yahusāri sehe mahñoa ti jichu yuhure yahu-sārinare yuhure wiho waro wia masierara muhu. Yu yoarire jipihtina bui puhtoro Césare yahu duaja. Tiro sehe yu buhiri tiare to cahnochū cahmaja —niha Paulo.

¹² To ã nichu tuhoror Festo sehe noano masi yahuinare sinitu tuhsu, ò sehe ni yahuha Paulore:

—Muhu jipihtina bui puhtoro mu yoarire mu yahu duachu, tiro cahapu warocanahtja sã mure —niha Festo Paulore.

Paulo puhtoro Agripare to yoarire yahuha

¹³ Baharopu puhtoro Agripa, Berenice wama tiricoro mehne Cesareapu Festore ñua suha.

—¿Ne, wihimari muhu cūhu? —niha tina Festore piti bocasinia.

¹⁴ Tói payu dachori ti jiri baharo Festo ò sehe ni yahuha Agripare Paulore:

—Öre Feli to peresu yoiaro jira. ¹⁵ Æ jia Jerusalēpu yu wahachu judio masa ti sacerdotē puhto, ti bucuna mehne ahriror yahusāhre. “To ya buhirire wajāga tirore”, ni sinihre tina yuhure. ¹⁶ Ti ã nichu tuhocu yuhu tinare ò sehe ni yahuhi: “Roma macaina sehe peresu ti yoinare masare waerara. Æ jicu tirore waeraja masare. Sã ñahariror tirore yahusārinare to ñuhto pano tirore buhiri dahre masieraja sã. To basi to yoarire to yahuerasinichu tirore buhiri dahre masieraja sã”, nihi tinare. ¹⁷ Æ jicu tina öre ti wihichu ñucu yoiari pja yoerahi yuhu. Wiho mejeta pa dachoi buhiri tiare cahnori wuhui dujicu, ti yahusāriror pjirocahi. ¹⁸ Æ jia tí wuhui to wihichu ñua tirore ñu tuhtiina wahcārucare. Ti ã wahcārucachu ñucu “Ñabiaro ni yahusāhca”, ni tuhutumahi yuhu tinare. Tirore yahusā duapahta yahusā masierare tina. ¹⁹ Wiho mejeta ahriror Cohamacu yare to yahuri buhiri judio masa tirore tuhtihre. Jesu wama tiroro yariaror cjiro to masa mejarire to yahuri buhiri yahusāhre ahriror. Ahri dihtare yahusāhre. ²⁰ Ahrire masieracu tirore noano sinitu ñuhi. “¿Jerusalēpu waha duajari yuhu mehne? Tópu yahuga mu yoarire yuhure”, nimahi tirore. ²¹ Wiho mejeta tiro waha duaerare. “Yu yoarire jipih-tina bui puhtoro Césare yahu duaja”, nire tiro yuhure. To ã niri baharo öihta tirore cohta dutihi jipihtina bui puhtoro cahai tirore yu warocahto pano —niha Festo Agripare.

²² —Yu basi tuho duaja tirore —niha Agripa Festore.

—Ñamichacapu tirore tuhoga muhu —ni yuhtiha Festo.

²³ Pa dachoi Agripa, Berenice mehne ti buhiri tiare cahnori wuhupu su, “Puhto jija sã”, nia cua pisaro yoa ñoha tina, surara puhto, tí maca macaina puhto mehne. Tó sehe yoa sãa tiha tí wuhupu sãa. Ti sãa suri baharo Paulore pjirocacha Festo. ²⁴ Æ jiro Festo ò sehe ni yahuha:

—Puhtoro Agripa, masa jipihtina ahri wuhure cahmachuina tuhoga. Öre ahriror payu judio masa ti yahusāriro jira. Jerusalēpu, Cesareapu cūhure tina tirore yahusāhre. “Tirore wajāga”, ã nirucua nina tina. ²⁵ Ti ã nipachuta ò sehe tuhoutuja yuhu. Ahriro ne ñano yoiaro jierara. ¿Yaba buhiri wajābocari mari tirore? Æ jicu jipihtina bui puhtoro César Augustore ahriror to yoarire

to yahu duachu jipihtina bui puhtoro cahapu warocaihtja tireore. ²⁶⁻²⁷ Ñ jicu ahriro to yoarire noano masierasinija yuhu. Ñ masierasinicu mari puhtorore yahu joa masieraja. Ñ jicu masare to yahuchu tuho dutii nija mipure. Puhtoro Agripa mipu pinihtare ahriro jira mu sinitu ñuhti. Mu sinitu ñu tuhsuchu mari masiri baharo ahrirore ti yahusarire noano yahu joaihtja. Ahriro to ñano yoarire yu masierapachuta mari puhtoro cahapu tireore yu warocachu noaerara. Ñ jicu mipure ti yahusarire noano masi duai nija —niha Festo tinare.

Paulo Agripare to yoarire yahuha

26 ¹ To ñ niri baharo Agripa Paulore ñ sehe ni yahuha:
—Mu basita yahuga —niha tiro Paulore.

To ñ niri baharo Paulo sehe, “Dihta mariaha”, nino to wamomacarine wahcârûca, to yoarire yahuha:

² —Puhtoro Agripa, yuhure judio masa ti yahusarire, yu yoarire muhure yahucu, mipure noano yajeripohna tija. ³ Muhu judio masa sã yoaa tiare, sã buhea cûhure mu noano masichu pinine wahcheja yuhu. Ñ jicu muhu yuhure noano tuhoga —ni ducaha Paulo.

Paulo Jesu yairo to jihto pano to jia tirire yahuha

⁴ Ñ ni tuhsuro ñ sehe ni namoha tiro:

—Wahmuno yu jia tia cjirire jipihtina judio masa masina. Jipihtia dachoripe yu masa bajuari baharo yu ya dihtapure, Jerusalêpu cûhure yu jiri cjirire masina tina. ⁵ Fariseo curua macaina paina yuhdoro sã dutiare yuhdûrûca dutieraina jira. Wahmanopure fariseo curua macariro jimai. Ñ jicu fariseo curua macaina ti dutiare, ti yoaa barore yoa pahñoriro yu jichu tina masina. Tina muhure yahu duaa, tîre yahu masina tina. ⁶ Ahri buhirita yuhure yahusã mujana. Sã ñuchusuma cjirire “Yariainare masoihtja”, Cohamacu to ni cûrîre “Potocã tjira”, yu niri buhiri ahrina yuhure yahusã mujana. ⁷ Yu coyea judio masa jipihtina doce curuari macaina Cohamacu masare to masohtore wahche cohtarucura. Ñ yoa Cohamacure ño payorucura. Ñ cohtarucuina jia sã yoaro sehetâ yoara tina. Puhtoro Agripa, ñ cûno potori yoina sã jipachuta tina sehe to masohtore yu cohtari buhiri yuhure yahusã mujana judio masa. ⁸ ¿Dohse yoana Cohamacu to masorire sã yahuchu tuho duaerajari musa judio masa? —ni yahuha Paulo.

Paulo Jesu yainare to ñano yoi cjirire yahuha

⁹ Ñ ni tuhsu ñ sehe ni yahu namoha:

—Jesure Nazare macarirore ñuerasinicu, ñaa dihtare yoa duamai to yainare. ¹⁰ Ñ jicu Jerusalêpu ñ yoaa timai yuhu. Sacerdotea puhtoa yuhure ti dutiri baharo payu Jesu yainare peresu yoaa tii. Ñ jicu puhtoa tinare ti wajã dutichu, wajã dutii yuhu cûhu. ¹¹ Payu tahari jipihtia judio masa buhea wuhusei Jesu yainare ñano yoa dutia tii. Ñ yoacu Jesu yaina Jesure ti cohâchu yoa duai nimai. Tina mehne tuaro suai yuhu. Ñ jicu paina masa ya macaripu cûhure tinare ñano yoi sua tihî yuhu —ni yahuha Paulo.

Paulo Jesu yairo to waharire yahuha

¹² Ñ ni tuhsu ñ sehe ni yahu namoha:

—Damascopu Jesu yainare ñano yoa duacu sumai. Tinare ñano yu yoa duachu ñua sacerdotea puhto yuhure waha dutire. ¹³ Õ sehe jire puhtoro Agripa: Cohari pja jichu waroi mahai yu wahachu muano macaa si sitea, sã dacho macariro yuhdoro, yuhure yuhu mehne wahaina cũhure si sitere. ¹⁴ Sã jipihtina yahpau bora caha su, judio masa ya mehne yuhure to durucuchu tuhoi. “Saulo, Saulo, ¿dohseacu muhu yuhure ñano yoajari? Muhu yuhu mehne suacu yuhure yuhtieracu, mu basi ñano yuhdura”, nire yuhure. ¹⁵ “Puhtoro, ¿diro baro jijari muhu?” ni sinitui. “Yuhu Jesu, mu ñano yoariro jija. ¹⁶ Wahcãrucaga muhu. Muhure yu cahamacuno cjihto yoai tai mipu bajuaja yuhu. Michare yuhure mu ñurire, baharo muhure yu ñohti cũhure painare yahuihca muhu. ¹⁷ Judio masare judio masa jieraina cũhure muhure buhe duticu, warocaihtja. Ti cahai mu jichu, muhure ti ñu tuhtichu muhure yoadohoihtja. ¹⁸ Yu yare tinare masichu yoaga muhu. Á jicu nahitia-nopu tiniina yoaro sehe jiinare ti ñaare duhuchu yoaga. Buhriaropu tiniina yoaro sehe noaa sehere cohtotachu yoaga tinare. Watĩnore cahmaerachu yoaga muhu. Á yoacu Cohamacu ya sehere yuhtichu yoaga muhu tinare. Mu á yoachu tina yuhure wacũ tuaahca. Ti á wacũ tuachu ñacu ti ñaa yoari buhirire boihca. Á jia tina Cohamacu to beserina mehne macaina jiahca. To wahtire cjuahitina jiahca tina”, nire Jesu yuhure —ni yahuha Paulo.

Paulo to yoarire to dahraare yahuha

¹⁹ Á ni tuhsu õ sehe ni yahu namoha:

—Puhtoro Agripa, muano macaa yu tuhoare yuhdurucaerahi. ²⁰ Damas-coi buhe muhtai. Baharo Jerusalẽi buhei tjoa. Baharo Judea yahpai, judio masa jieraina cahapu cũhure masare “Ñaano yoeraja sã”, ni ti tuhotumari cjirire tuhotu cohtota duti, Cohamacu yare cahma dutii. “Noaare musa yoachu ñua ‘Noaina jija sã’ ni, musa tuhotumari cjirire musa tuhotu cohtotarire paina masiahca” nicu, tinare noaare yoa duticu buhei. ²¹ Cohamacu ya wuhui yu jichu yu á ni yahuri buhiri judio masa yuhure ñaha, wajã duamare. ²² Wiho mejeta dachoripe Cohamacu to yoadohoro mehne á buherucuja. Á jicu mipure musa jipihtina puhtoare wiho jiina cũhure to yare yahui nija. Panopu macaina Cohamacu yare yahu muhtaina cjiri, Moise cjiro mehne ti yahu muhtariro seheta yahuja yuhu cũhu. Õ sehe ni yahu muhtaa tiha tina: ²³ “Cristo Cohamacu warocariro sehe ñano yuhdurohca. Á jiro yariaro masa muja muhtariro waharohca tiro. Á jiro masare to yuhdohtore judio masare, judio masa jieraina cũhure masichu yorohca”, ni yahu muhta joaa tiha panopu macaina cjiri. Yuhu cũhu ti yoaro seheta yahuja —ni yahuha Paulo Agripare.

Paulo Agripare Jesu yairo cjihto yoa duamaha

²⁴ To á ni yahuri baharo Festo tirore tuaro sañurucu õ sehe ni durucuha:

—Paulo, muhu tuho masierariro jira. Muhu payu buhecu tuho masierariro wahara —ni sañurucuha tiro Paulore.

²⁵ To á nichu tuhoru Paulo õ sehe ni yuhtiha Festore:

—Puhtoro tuho masierariro jieraja yuhu. Yu yahua potocã tjira. Á jicu yuhu ahrire cua pisaro mehne nija. ²⁶ Puhtoro Agripa sehe, ahri yu yahurire noano masina. Á jicu yuhu tirore cuuro marieno yahuja. Ahri yahuare

jipihtina masa masina. ¹Ā jicu jipihtia ahrire yu nirire puhtoro Agripa to masichu masija yuhu —niha Paulo Festore.

Ā ni tuhsu ō sehe niha Agripare:

²⁷—Puhtoro Agripa, Cohamacu yare yahu muhtaina cјiri ti yahuri cјirire tuhora muhu. Ti yahuare mu tuhochu masija yuhu —niha Paulo Agripare.

²⁸—Ā Ahrire yuhure yahucu mahanocā mu yahua mehne Jesu yairo yu wahachu yoa duai nijari muhu? —niha Agripa Paulore.

To ā nichu Paulo ō sehe ni yuhtiha:

²⁹—Mahanocā durucucu o yoari pja durucucu musa, jipihtinare “Yu jiro seheta Jesu yaina jįaro”, ni sini payoja Cohamacure. Wiho mejeta yu yoaro sehe peresupu musa jichu cahmaeraja yuhu —niha Paulo Agripare.

³⁰⁻³¹ To ā niri baharo Agripa, Festo, Berenice jipihtina paina mehne wahcā-ruca, wijaa, ti basi ō sehe ni durucuha:

—Ahriro to yoari buhiri ne peresu yoa masieraja mari. Ā jina mari yaba buhiri tirore wajābocari? —ni durucuha tina ti basi.

³²—Ahriro “Jipihtina bui puhtoro Césarē yu yoirire yahu duaja”, to nierachu mari wioboa tirore peresupu jiriore —niha Agripa Festore.

Paulo tirore ti yahusārire Romapu yahuro wahaha

27 ¹Paulore Italiapu dohoria mehne warocaa taa, tirore paina mehne ti peresu yoarina mehne Julio wama tirirore cūre tina. Julio cien surara puhtoro jiro, to ya curua “César yaina surara”, wama tire. ²Ā jina Adramitio wama tiro macaria dohoriai samui sā. Tia Asiapu wahahtia jire. Samu tuhsu, tia mehne wahi. Aristarco Tesalónica wama tiri maca macariro sā mehne wahare. Tesalónica Macedonia yahpai jira. ³Pa dachoi sā Sidōpu sui. Tōpu sūro Julio Paulore noano yoare. Ā yoaro Paulore tō mehne macaina cahapu űno waha dutire. Ā jiro Paulo mehne macaina tirore to cahmaare ti wachu “Noanohca”, nire Julio. ⁴Dohoria mehne sā pahāchu tuaro wiwnono sāre pa sehēpu wāroca pjohōre. Ā jina Chipre wama tiri nūco ducataroi potō buhusehei wahi sā. ⁵Pu Ciliciare yuhdua, Panfilia cūhure yuhdua, Mira wama tiri macapu Licia yahpai jiri macapu wahā sui.

⁶Tōpu suna, Alejandrīapu tariare, Italiapu wahahtiare dohoriare bocai. Ā jiro sāre tiapu surara puhtoro naare. ⁷Payu dachori pjiro dero waha, “Nu wapuoca” ni, waha, Gnido wama tiri maca potoi sui sā. Tōpu su yuhdua, wiwnono tuaro wā, sā waha duariro sāre wārocaerare. Ā jina sā cō buhusehepu majare paa wahi. Ā jina Creta wama tiri nūco ducatarī pahre sehe sā pahā waha, Salmo wama tiri űoacare yuhduai sā. ⁸Tōpu yuhdu, tí nūco duhtu chahi waha, “Nu wapuoca” ni, waha, Noari Pitamaha wama tiropu wahā sui. Pitamaha Lasea wama tiri maca cahapu jira.

⁹Tōpu yoari pja sā jiri baharo, sā wahahto sehe cuabiare. Ā jiro ti chu duhuri dacho bose numu yuhduri baharo, Paulo tinare ō sehe ni yahure:

¹⁰—Tuhoga musa. Chu duhuri dacho bose numu baharo mari wahachu marine minihto cuabiara. Ahria dohoria, dohoria macaa, musa pache cūhu mari mehne macaina cūhu mari butiboca wahana —nire Paulo.

¹¹Wiho mejeta surara puhtoro dohoria puore tuhoro, oturiro cūhure tuhoro, Paulo to yahua sehere tuho duaerare waha duaro. ¹²Ti pahsari pitamaha noari pitamaha puhiro jichu ti pahsari pitamaha jierare. To ā jiri

pitamaha jichu dohoria macaina payu waha dua, Fenicepu yoja duamare. Fenice Creta wama tiri nucu macari pitamaha jiro, wihnono to tariropu su muja taro sehepu co buhusehepu, poto buhusehepu cuhure nuroca, wihnono tachu noano ducadari maca jire. To a jiri pitamaha jichu masia tina topu cu puhiro ji duamare.

Pjiri mapu wihnono, coro pjiro taha

¹³ A yoa sur sehe pjiroca wihnono ta ducare. “Michare noari dacho mari wahahti dacho jira”, ni tuhutumaha tina. A ni tuhutua tina comaa tañore tua wahco, Creta nucu duhtu caha cahai yojai sa. ¹⁴ Wiho mejeta baharo curero wihnono noreste wama tiri wihnono tuaro ware. ¹⁵ A jiro dohoriare wihnono tuaro waha wihire. Wihnono to warucarore waha masierana, majare paha, wihnono mehne wahi sa. ¹⁶ Cauda wama tiri nucoca cahapu sur sehepu waha, ti nucoca sare mahanoca ducatare. “Marine nu wapuoro wahara”, nina tore pjiria dohoria macaria mahariaca busocare noano waja payo duhte sa. ¹⁷ Tiare dohori ai sa waja payo duhteri baharo pjiria dohoriapu pjiri da mehne tina wahma naha payore. Sirte wama tiri padure “Dohoria doca waha suri”, nia cui nire tina. A jia tina co turre ti duhu miori baharo dohoria dihtare wihnono warocare. ¹⁸ Wihnono, coro mehne tuaro tare. Pa dacho cuhure wihnono munanota tjoa to tachu nua tina ti pachere diapu dureroca no tuhsu pahaa wahi sa. ¹⁹ Pa dacho dohoria macaare diapu cohare tina ti basi. ²⁰ Payu dachori nichua dachori jichu, su dacho macariro nahpichoha poca cuhu ne bajuerare. A jiro tuaro wihnono tare. A jina “Minia wahaja mari. A jina yariaa wahanahca”, ni tuhutumai sa.

²¹ A jia tina yoari pja ti chu duhuri baharo Paulo ti pano ducu, o sehe ni yahure tinare:

—Pano musare yu yahuchu tuhoerare musa. “Cretapu jiina mari wahachu cua nica”, yu nichu tuhoerare musa. Yuhure tuhona, ahria macaa jipihtiare boeraboa musa. ²² Wiho mejeta mipu musare yahuja. Cuiena tjiga. Jipitina mari yuhdunahca. Ahria dohoria dihta marine wahtiabasarahca. ²³ Micha namine Cohamacu yairo anjo yuhure bajuahre. Cohamacu yairo jija yuhu. A jicu tirore dahra cohtariro jija yuhu. Anjo sehe yu cahai taro, o sehe ni yahuhre: ²⁴ “Paulo, cuiecu tjiga. Jipitina bui puhtorore mu yoari cjirire muhure yahuro cahmana. Cohamacu noariro jira. A jiro tirore mu siniriro seheta mipure muhu mehne macaina cuhure yoadohorohca”, nihre yuhure anjo. ²⁵ A jina cuiena tjiga musa. Anjo yuhure to niriro seheta waharohca. Cohamacure wacu tuaja yuhu. A jicu to yahuriro seheta “Potoca tjira”, ni tuhutuja yuhu. ²⁶ Wiho mejeta marine nucopu wihnono waroca, cohanoahca —ni yahure Paulo tinare.

²⁷ Cu nami pua somana baharo pjiri ma Adriatico wama tiri mai wihnono sare tuaro ware. Ti pjare nami dacho macai dohoria macaina mua sehe “Duhtu cahapu jija mari”, ni tuhutua tina. ²⁸ A ni tuhutua nucuri taño comaa tañore yuta da mehne duhte, duhuroca mio, quihore. Treinta y seis metro waro cuare. Mahanoca waha, quihore tjoa. Ti pjare veintisiete metro waro cuare. ²⁹ A jia taare “Doca waha suri”, nia dohoria otuopu pititia tañori comaa tañorine yuta dari mehne duhte, duhuroca miore diapu. A jia “Cjero bohreajaro” ni, tuaro sinire tina. ³⁰ Dohoria macaina mua sehe duhtimare.

Tina mahariacäre dohoria macariare diap̄ waja boro, dohoria quenoī comaa tañorine ti boroboriro seheta yoare tina mahariacäre “Marine ñuri”, nia.

³¹ Wiho mejeta Paulo surara puhtoro, to surara mehne yahure:

—Ahrina mua mahariacä busocai ti wahachu mua yarianahca —nire Paulo.

³² To ä nichu tuhoa surara sehe mahariacäre duhtea darire yihso ta, tiare cohäre.

³³ Bohreachto panocä Paulo tinare tuaro chu dutire.

—Pua somana waro ne chuerare mua. ³⁴ Ä jina mipure chuna taga. Tuaro musare chu dutija. Musa cati duana chuga. Jipihtina mua yuhdunahca —nire Paulo tinare.

³⁵ To ä niri baharo Paulo päore na, jipihtina ti pano Cohamacure “Noana” ni, duhu payo, türe chu ducare tiro. ³⁶ To ä chachu ñua tina cuiro marieina waha, jipihtina tina cühu chure. ³⁷ Sä jipihtina doscientos setenta y seis masa dohoriapu jii sä. ³⁸ Tina jipihtina yapia waha “Ahria dohoria nucü nica” ni, payu trigo chuare diap̄ cohäre.

Dohoria paduropu doca pja suha

³⁹ Bohreachu dohoria macaina mua nūcore ñua, “Ö sehe wama tiri nūco jira ahri nūco”, ni ñu masierare. Wiho mejeta tina pari tucüi paduro jichu ñua, “Mari tí tucüp̄ wahana, töp̄ure doca pja suboca paduroi”, nire tina.

⁴⁰ Ä nia, comaa tañorine duhtea darire yihso taroca mioha. Oturi pj̄i duhtea dari cūhure yihso tanocare tina. Ti ä yoari baharo dohoria queno macari suhtirore wahcō dapore poto wihnono wārocachu cahmaa. ⁴¹ Wiho mejeta dohoria queno sehe pa paduropu caha su, nūja masierare. Ä jiro oturore tuaro pahcōri cjä wahcōchu tia oturo wahtia wahare. ⁴² To ä wahachu ñua ö sehe nire surara:

—Ahria minichu mari peresu yoaina duhtu cahapu ba wahä su duhtino-caahca. Ä jina tinare wajä pahñonocajihna —nire surara.

⁴³ Wiho mejeta surara puhtoro sehe Paulore wajä duaeraro, jipihtina peresu jiinare wajä dutierare. Ä jiro jipihtina ba masiinare surara puhtoro poto duhtu cahapu ba wahä su dutire. ⁴⁴ Ä jia paina dohoria macaa pj̄ini wahti sitea pj̄ini mehne bora ñoja, tí pj̄ini bui pisa ba nūjare. Sä tó sehe yoana sä jipihtina duhtu cahai wahä sui.

Paulo Malta wama tiri nūcoi jiha

28 ¹ Ä yoa tí nūcopu sä jipihtina maja surucu suna tí nūco wamare masii. Malta wama tiri nūco jire. ² Tí nūco macaina masa säre noano yoare. Ä jina sä coro waari baharo yusua yuhduare säre. Ä jia tó macaina sehe pichaca wijä tuhsu, säre sohma dutire. ³ Paulo pichare na ta, na tiäre. To na tiäri baharo tí picha puhichapu säariro agä tuaro sichu tuhoturo wijaa taro, Paulo wamomacai bahca wāha sure yahawero marieno. ⁴ To bahca wahä suchu ñua tí nūco macaina ti basi ö sehe ni durucure:

—Ahriro masa wajäriro jiboca. Ä yoaro tuaricoro buhiri dahrericoro muano macaricoro tirore buhiri dahrero, cati dutierara. Tiro pj̄iri mapu minino yuhdu tuhsuri jimare. Mipure ticoro sehe tirore cati dutierara —nimare tina ti basi.

⁵Wiho mejeta Paulo agāre pichacapu waja siterocare. Tirore agā purierare. ⁶“Wipirohca” nia, cohtamare tina. Ne wipierare tirore. “Tiro yariaa waha-rohca” nia, tina cohtamare. Tirore purierare. Yoari pja baharo to wipierachu ñua, to purierachu ñua, soro tuhature tina. “Ahriri cohamana mehne macariro jiboca”, nimare tina.

⁷Ti ba wahā suriro cahacāi Publio wama tiroro ya weseri jire. Tiro tí nūco macariro puhtoro jire. Ā jina tiro säre to noano yoachu, tia dacho waro to ya wuhui jii sã. ⁸Publio pucuro yojaro ti, juaro tiroro jire. Ā jiro tiro camai coäre. Ā jiro Paulo dohatiroro ya tahtiapu sãa, Cohamacure sini, to wamomacarine tiro bui duhu payo, noariro wahachu yoare tirore. ⁹To noariro wahachu ñua jipihitina paina tí nūco macaina dohatiinare Paulo cahapu na tare. Ti ā na tachu ñuno Paulo noaina wahachu yoare tina cūhure. ¹⁰Baharo tina payu säre wapa marieno ware. Sã wahahto panocā jipihitia sã cahmaare, sã wahana sã chuhtire dohoriapu dure säre tina.

Paulo Romapu suha

¹¹Tia sū tí nūcopu sã jiri baharo dohoria mehne wahi sã. Tia dohoria quenoī puaro cohamana Cástor, Pólux wama tiina ti masu ducure. Alejandriapu taria jire tia. Puhiro puro tí nūcopu tia dohoria pahsare. ¹²Waha, Siracusa wama tiri macapu suna, tia dacho waro tí macare jii sã. ¹³Tí macare wijaa, waha, Regio wama tiri macapu sã sui. Pa dachoi surpu wihnono ta, säre wārocare. Pua dacho baharo Puteoli wama tiri macapu sui. ¹⁴Tópu Jesu yaina mahainacā säre piti bocare.

—Cū somana waro sã mehne tjuaga —nire tina säre.

Ti ā nichu tuhona cū somana waro tina mehne tjuasinii. Baharo mahai maja, Romapu sui sã. ¹⁵Tó macaina Jesu yaina sehe Romapu sã suhtire tuhoa, Apio wama tiropu pache duaropu säre piti bocare. Paina Jesu yaina Tia Wuhu wama tiropu säre piti bocare. Ti ā piti bocachu ñuno Paulo wahchea mehne Cohamacure “Noana” ni, noano yajeri sãa wahare. ¹⁶Romapu sã suri baharo ti peresu ti yoinare tó macarirore peresu cohtaina puhtoro yahure. Wiho mejeta Paulo sehere cūirota cūre tó macaina puhtoa. Ā jiro tirore cūirota surara cohtare.

Paulo Romai buheha

¹⁷Tia dacho baharo Paulo judio masa puhtoa mehne cahmachuno taro, tinare pjire. Ti cahmachuri baharo tiro tinare ō sehe ni yahure:

—Coyea, mari coyeare soro yoerahi yuhu. Ā yoa mari ñuchusuma cjiri ti yoa tirire, marine ti buheri cūhure yuhdurucuaerahi yuhu. Ā yu yuhdurucaerapachuta Jerusalēpu yuhure ñahahre judio masa. Ti ñahari baharo Roma macainare yuhure peresu yoa dutihre tina. ¹⁸Ti ā yoachu Roma macaina yuhure sinitu, yu ñano yoerariro yu jichu yuhure “Buhiri tiroro jira”, ni masierare. “¿Ne yaba buhiri wajābocari mari tirore?” nihre yuhure tina. Ā jia yuhure sinituina sehe yuhure wio duamahre. ¹⁹Wiho mejeta judio masa sehe yuhure wiochu cahmaerare. Yu coyeare judio masare yuhure ti yoirire yahusā duaeraja. Wiho mejeta yuhure ti wio duaerachu ñucu, “Jipihitina bui puhtoro Césare yu yoirire poto yahu duaja yuhu”, ni sinihi. ²⁰Ā jicu musare ahrire yahu duacu pjihii. Cristo marine yuhdohtiro judio masa mari

cohtariro to yare yu yahuri buhiri yuhu peresupu jija. Ā jicu tíre musare yahui tai pjihi —nire Paulo judio masa puhtoare.

²¹ To ā nichu tuhoa tina sehe tirore ō sehe ni yahure:

—Judea yahpa macaina Judio masa muhure quti yahua pūrine säre ne warocaerare. Ā yoa tōpu tarina cūhu mari coyea säre mu ā waharire yahuera tire. Tina “Tiro nāno yoiro jira” ni, muhure yahuera tire. ²² Wiho mejeta Jesu yare mu yahuri curua macainare jipihtiropu masa nāno ti durucuhu sā masija. Ā masina mu buheare mu yahuchu tuho duaja sā —nire tina tirore.

²³ Ā ni tuhsu, “Pa dachopu jijihna”, nire tina. Pa dachopu Paulo mehne cahmachu muhtaina yuhdoro masa payu to jiropu wihire. Nami curerocā puhtoro Cohamacu to suho jiare noaa buheare tiro buhe dāca, pu, nānipu Moise cjirore Cohamacu to cūri dutiare, ā yoa Cohamacu yare yahu muhtaina cjiri ti joari cjiri cūhure buhere. Ā buhero, tinare Jesure “Tiro tjica mari cohtariro”, ni masichu yoa duaro nimare Paulo. ²⁴ Cāina to buherire noano mehne tuhore. Wiho mejeta paina sehe tuho duaerare. ²⁵ Ā jia tina ti basi pua curua tju wa, wahaa taa nire. Ti wahahto pano Paulo Isaia cjiro to durucuri cjirire tinare yahure. Ō sehe nire tinare:

—Isaia Cohamacu yare yahu muhtariro cjiro to yahuri potocāta jira. Mari nuchusuma cjirire yahuro taro Espiritu Santo Isaia cjirore ō sehe ni yahu joa dutiha:

²⁶⁻²⁷ “Ahrire ahrinare yahui wahaga:

‘Dapu butiina jira musa.

Yu yare tuho duaerara musa.

Cahmo copari susueraina yoaro seheta tuho duaerara musa.

Ā jina yu yare tuhopenahta tuho nāhasi musa.

Musa ā jieraina jina, noano tuho nāhaboa musa.

Ā jina yuhure cahmaboa musa.

Ā jicu musare pichacapu wahaborinare yuhdoboia yuhu, niha

Cohamacu Isaia cjiro to joari tjupu”

—nire Paulo tinare. ²⁸ Ā ni tuhsu, Paulo ō sehe ni yahu namore:

—Ahrire masiga musa. Cohamacu ya buheare masare to noano yuhdoare judio masa jierainare buhenahca sā. Tina sehe tuhoahca —nire Paulo judio masare.

²⁹ [To ā nichu tuhoa judio masa tíre ti basi tuaro cahma sayo, wijaare.]

³⁰ Pua cūhma waro Paulo to ā waparucuri wuhupu jire. Tói jiro, jipihtina to wuhupu wihiinare wahchea mehne piti bocare tiro. ³¹ Ā jiro tiro cuiro marieno puhtoro Cohamacu to suho jiare, puhtoro Jesucristo ya cūhure buhea tire. To ā buhechu ne paina tirore “Buhei tjiga”, nierare.

Romanos

Paulo Roma macainare Jesu yainare joarocaha

1 ¹Yuhu Paulo musare Roma macainare joarocaja. Yuhu jija Jesucristo cahamacuno. Tiro yuhure beseri jire. To ya noaa buheare buhe duti warocahtiro cjihtore yuhure cūri jire tiro.

²Tí buheare noaa buheare panopu Cohamacu “Yahui tai nija”, nia tiha. To ã ni yahuriro seheta to yare yahu muhtaina cjiri panopu macainare to yahuhtire to ya pui joa dutiha. ³Tí buheata to macunore yahua jira. Tiro masuno waro jiro taro, Davi cjiro panamino ji turiariro jiha tiro. ⁴Jesucristo mari puhtoro Cohamacu macuno ñaa buhiri marieriro to jiare õ sehe ñori jire Cohamacu. To yariari baharo Cohamacu to tuaa mehne tirore masa wijaachu yoari jire. Ñ yoaro Jesucristo potocāta Cohamacu macuno to jiare ñori jire Cohamacu masare. ⁵Tirota sare pja ñuno sare to yare buhe dutiro warocare jipihtina Jesucristore wacu tua ti ño payohti cjihtire. ⁶Ñ jiro musa cūhure Jesucristo yaina cjihtire beseha tiro.

⁷Musare, Cohamacu to cahiinare, Roma macainare, to yaina cjihti yoare musare tiro. Musare jipihtinare ahri pure joarocaja. Ñ jicu Cohamacu mari Pacu, mari puhtoro Jesucristo mehne musare noa dutija. Tina ti yoadohoa mehne noano jiga musa.

Paulo Romapure ñuno waha duaro nimaha

⁸Ahrire yahu muhtaihtja musare: Jipihtia macari macaina Jesucristore musa wacu tuarire masa yahuhre yuhure. Ti ã ni yahuchu tuhocu “Noana”, nija Cohamacure. Jesucristo to yoadohoro mehne ã nija tirore. Cohamacure sini payocu musa ya cjihti cūhure ã sini payorucuja. ⁹Tiro yuhure to dutichu to macuno ya buheare noaa buheare tuaro buhecū to cahamacunota jija yuhu. Ñ jiro musa ya cjihtire Cohamacure yu ã sini payorucuchū tiro masina. ¹⁰Ñ sini payocu Cohamacu cahmachu mipu pinihtare musa cahapu yu ñui wahahto cjihto cūhure sinija. Yoari pja musare ñu duacu yu wahahtore cohtai yoanocamaja yuhu. ¹¹Espíritu Santo yuhure to buheri cjirire musare buhe turia duaja Jesure musa wacu tua namohto cjihto sehe. Ñ jicu musare tuaro ñu duaja yuhu. ¹²Jesure wacu tuaja mari. Ñ jicu musare ñu duaja Jesure mari wacu tuaa mehne pu buhuseheri mari cahma wahchechu yoahito cjihto sehe.

¹³Yu coyea, ahrire musa masichu cahmaja. Noaa buheare yu buheri baharo paye macari macaina musa coyea judio masa jieraina cūhu Jesure wacu tuare. Ñ jicu payu tahari musa cahapu waha duamahi tina, Jesure ti wacu tuariro seheta musa mehne macaina cūhu ti wacu tuahto cjihto sehe. Ñ waha

duapaihta waha masiera tihi yuhũ. ¹⁴Jipihtinare noaa buheare buhero jiro nina yuhũre. Buheinare, buhemahnoeraina cũhure, masiinare, masieraina cũhure buhehtiro cjihto jii nija yuhũ. ¹⁵Ã jiriro jicu musare Roma macainare noaa buheare tuaro buhe duaja.

Noa buheare masa tuhoa Jesure wacũ tua ducara

¹⁶Noaa buheare tuhoa Jesure wacũ tua ducara masa. Ã jiro jipihtinare Jesure wacũ tuainare Cohamacũ to tuaa mehne pichacapũ wahaborinare yuhdora. Ti ã yuhdũchũ masichũ ahri buheare noaa buheare buo tiro marieno yahuja. Ahri buheare judio masa tuho muhtari jire. Ti baharo, judio masa jieraina cũhũ tuho turiari jire. ¹⁷Ahri buhea õ sehe ni yahura: Jesure wacũ tuainare “Naa buhiri marieina, noaina jira”, ni ñũna Cohamacũ. Tirore wacũ tuaina dihtare ã ni ñũna Cohamacũ. Ahri panopũ ti ni joariro seheta jira: “Noaina jira”, to ni ñũna Cohamacure wacũ tuaina dihta jira. Ã wacũ tuaa, to ya catia mehne ã catirucuahca tina”, ni joaa tiha.

Masa ti ñaa yoari buhirere yahuha Paulo

¹⁸Cohamacũ muanopũ jirirore masa ti yuhdurucarire, ti ñaa yoari cũhure ñũno, ti ã yoari buhiri tina mehne suara. Tõ sehe jiina barore to buhiri dah-rehtore masichũ yoara tiro. Masa ti ñaa yoaa mehne painare noaa buheare tuhoerachũ yoara tina sehe. ¹⁹Cohamacũ to basi to jia tiare masichũ yoaha. To ã yoachũ Cohamacure masichũ mijoerara masare. ²⁰Cohamacure mari ñuerapachũta muano macariro to jia tiare, tuariro to jia cũhure to basi masichũ yoara tiro. Ahri yahpare to bajuamehneri baharo jipihtia to bajua-mehnerire ñua “Cohamacũ to yoari cjiri jira ahri” nia, Cohamacũ to jia tiare masina masa. Ã jia masa Cohamacure masipahta ã ñaare yoarucua, buhiri tira. “Muhure masierahi. Ã jicu ñaare yoahi”, ni masisi Cohamacure. ²¹Ã jia Cohamacũ to jia tiare masipahta tina tirore ño payoerara. Ã jia tiro tinare to noano yoapachũta tina sehe “Noana”, nierara tirore. Ã tuho masieraina jia, wiho jia macaare, ñaa dihtare tuhoturucuina baro jira tina. ²²“Tuho masiina jija”, nipahta tuho masieraina wahara tina. ²³Ã wahaa Cohamacure ã jirurucirore tina ño payoerara. Ã ño payoeraa, ti ño payoboriro sehere cohtota, wiho jia masuri sehere “Cohamacũ jira”, ti nia masuri sehere ño payora. Wiho jia masuri sehere yariahtina masa masurine, ã yoa minichahca masurine, chihchõina masurine, wahiquina masuri cũhure “Cohamacũ jira”, ni ño payora tina.

²⁴Ti ã yoachũ ñũno “Ti mu sũro ñaare goa pja, yoawahnojarõ”, nino Cohamacũ cohãnocare tinare. To ã cohãri baharo tina ñabiario, pjĩro buoro wahachũ yoaare cahma yoarucura ti basi. ²⁵Ã jia Cohamacũ ya sehere cahmaeraa, mahñoa sehere noano tuhora tina. Cohamacũ ya sehere mahñoa yoaro sehe jichũ yoara tina. Potocãta Cohamacũ warore jipihtiare bajuamehnerirore jipihtia dachoripe noano ño payoro cahmana. Wiho mejeta tina sehe tirore ño payoerara. Ã tirore ño payoeraa, Cohamacũ to bajuamehneri cjiri, wiho jia sehere ño payora tina.

²⁶Ti ã ño payochũ ñũno “Ti mu sũro goa pja, yoawahnojarõ”, nino Cohamacũ cohãnocare tinare. Ã jia tina numia mua mehne manũ tiboina cohtota, ti basi numia dihta ñano yoara ti pjacuri mehne. ²⁷Ti yoaro seheta jiina mua

cũhu numia mehne namo tiboina jipahta, tíre cohtota, mua ti basita ti pjacuri mehne ñabiaro yoara. Ñ yoaa, ti basita ti ñano yoari buhiri ti pjacuri sehe ñano yũhdura.

²⁸ Ñ Cohamacure ti cahmaerari buhiri Cohamacu tinare cohãre. To ã cohãchu tina sehe ñano wacũrucu, ñano yoarucura. ²⁹ Ñ jia tina tuaro ñano yoarucura. Numia mehne ñano yoarucuina, mua mehne ñano yoarucua numia, ñaare goa pjarucuina, paina yare tuaro cahmaina, painare ñano yoarucuina, paina paye baro ti cjuachu ñua goa pjaina, masare wajãina, cahma sayoina, mahñoina, masare ñu tuhtiina, ñaa quiti dahreina, ³⁰ paina ti yoae-rapachuta ñano ni yahuwajaina, Cohamacure ñu tuhtiina, painare purĩno yũhtiina, “Sã sehe masi yũhdurucu suja”, ni tuhoutuina, painare ã ni yahuina, paye ñaare yoa ducaina, ti pucusumare yũhtieraina, ³¹ tuho masieraina, ti nino sehetã yoaeraina, masare ne cahieraina, ti basi cahma susini duheraina, ne pja ñueraina jira tina. ³² Ñ ñano yoarucuinare Cohamacu pichacapu cohãnohca. To ã cohãhtire masipahta tina tí ñaare ã yoarucura. Ñ jia paina tinare ñu cũ ti yoaro sehetã ñano ti yochu ñua, “Mari yoaro sehetã ñano yoara”, ni wahchera tina.

Masare buhiri dahre dutiro tíre quihõno yorohca Cohamacu

2 ¹ “Tina ñabiaina jira”, ni yahuwajaena tjiga painare. Musa cũhu ti yoaro sehetã yoara. “Naare yoaeraja sã. Ñ jina buhiri maeraja”, ni masierara musa. Musa yahu wajaina yoaro sehetã ñaare yoana, musa cũhu musa basita buhiri dahre dutina nica. ² Tó sehe yoainare Cohamacu to buhiri dahrechũ potocãta quihõno to buhiri dahrechũ masija mari. ³ Painare “Buhiri tiaha”, ni yahu waja ti yoaro sehetã musa yochu, musa cũhure buhiri dahrerohca. Ñ jina “Sãre buhiri dahresi”, ni tuhutuboca musa. Jierara. Musa cũhure buhiri dahrerohca tiro. ⁴ Musa ñano yoapachuta Cohamacu musare pja ñuno, dói waro buhiri dahrerara. Ñ jina “Cohamacu yũhu mehne suasi”, ni tuhutuboca musa. Jierara. Cohamacu musare pja ñuno, dói waro buhiri dahrerara musa ñaa buhiri tiare cahyachu ñu duaro, tirore musa yũhtichũ cahmano. ⁵ Ñ buhiri dahre duaeraparota, musa Cohamacure yũhti duaerachu, musa ñaa buhiri tiare musa cahyaerachu, buhiri dahrerohca musare. Tó pano musare to buhiri dahreboriro yũhdoro tí to buhiri dahrehti dacho waropure ñano, tuaro waro musare buhiri dahrerohca Cohamacu. Quihõno buhiri dahrerohca. ⁶ Cãinare ti yoa wapataro sehetã yorohca Cohamacu. ⁷ Cãina noaare yoarucuina jira. Tina Cohamacure noano wahchechu yoa duaina, jipihtia dachoripe Cohamacu mehne ji duaina jira. Tina pinihtare dachoripe tiro mehne jirucuchũ yorohca Cohamacu. ⁸ Wiho mejeta paina sehe tina yoaro sehe jierara. Tina ti mu suro jia ti, ñaare goa pja yoarucuina baro jira. Cohamacu ya warore cahmaerara. Tina mehne Cohamacu tuaro sua, buhiri dahrerohca. ⁹ Jipihtina ñano yoaina ñano yũhduahca. Judio masare ãta waha muhtanohca. Tuhsu, judio masa jieraina cũhure ãta waharohca. ¹⁰ Jipihtina noaare yoaina sehere Cohamacu “Noana”, ninohca. Ñ jia masa tinare ño payoahca. Ñ jiro tinare noano jichũ yorohca Cohamacu. Judio masare ãta waha muhtanohca. Tuhsu, judio masa jieraina cũhure ãta waharohca.

¹¹ Cohamacu judio masare, ã jichũ judio masa jieraina cũhure jipihtinare cũno sehe ñuna. Mari yoirire ñuno, quihõno besera jipihtinare, ñaina, noaina

cũhure. ¹² Paina Cohamacu Moise cjirore to dutia cjirore masieraina sehe buhiri tiare ti yoachu, to dutiare ti masierapachuta tinare buhiri dahrerohca Cohamacu. Ñ yoa tí dutiare masiina cũhure buhiri tiare ti yoachu, tí dutiare ti yũhdurucari buhiri buhiri dahrerohca Cohamacu. ¹³ Cohamacu dutiare tũhopahta yũhtierainare “Buhiri marieina, noaina jira ahrina”, ni ñuerara Cohamacu. To dutiare yoaina sehere “Noaina jira”, ni ñuna tinare Cohamacu. ¹⁴ Judio masa jieraina Cohamacu Moise cjirore to cũi dutia maerapahta, ti mu sũro noaare yoaa, Cohamacu dutiare yoaa nina. Ñ yoaa Moise cjirore to dutiare joari pũre cjueraapahta tina ti mu sũro to dutiare masina. ¹⁵ Ñ jia to dutiare ti tũhotuapu potocãta cjuara tina. Ñ cjuaa ñaare yoaa dóicãta ti ñaa yoirire masina tina. Ñ jiro ñaare yoiriro “¿Dohse jiro baro ñaare yoiri yũhũ?” ni tũhotura tiro. Ñ jiro noaare to basi to yoiri cũhure masina tiro. ¹⁶ Ñ jiro Cohamacu Jesucristore to warocahti dachoi masa ti yoirire ti yahu duaerare Jesucristo masi pahũono, tiro tinare beserohca noaina, ñaina cũhure. Tó sehe yorohca tiro noaa buhea to nino sehetã. Ahrita jira masare yũ buhea.

Cohamacu Moise cjirore to dutirire yahuha Paulo

¹⁷ Musa sehe judio masa jina, Cohamacu Moise cjirore to dutiare ño payoina jina, “Cohamacu to yaina jija”, ni tũhotumana musa. ¹⁸ Ñ jina Cohamacu dutiare masiina jina, to cahmaare masina musa. Ñ masiina jina, “Noaare sã yoahtore bese masija sã”, ni tũhotumana musa. ¹⁹ Ñ ni tũhotuna õ sehe ni tũhotu namona musa: “Painare ne masierainare noano masichũ yoaaja sã. Tinare sã buherachũ ne Cohamacure masieraboa tina. Ñ jia ñaare duhuera-bœa”, ni tũhotumana musa. ²⁰ Ñ jina “Tũho masierainare noaare yoa dutiina, macanacã cũhure buheina jija sã”, ni tũhotumana musa. Ñ jina “Cohamacu dutiare cjuana, potocã jiare masi pahũoja sã”, ni tũhotumana musa. ²¹ Ñ jina painare buheina jipanahta, dohse yoana musa sehe musa buheriro sehe yoaerajari? ¿Painare yaca dutieraina jipanahta dohseana musa sehe yacajari? ²² ¿Pairo namono mehne ñano yoa dutieraina jipanahta dohseana musa sehe pairo namono mehne ñano yojari? “Cohamacu jira”, ti nia masurine ñũ yabiina jira musa. ¿Ñ ñũ yabiina jipanahta dohseana tí masurine ti ño payoa wũhusepũ sãa yacajari musa? ²³ “Cohamacu Moise cjirore to dutiare cjuaja sã”, niina jipanahta to dutiare yũhdurucara musa. Ñ yũhdurucana Cohamacure ño payoerachũ yoana nica musa painare. ²⁴ Ñta nina Cohamacu yare ti joari pũ: “Cohamacu dutiare musa yũhdurucari buhiri judio masa jieraina sehere Cohamacure ti ñano durucuchũ yoara musa judio masa”, ni joaa tiha Cohamacu yare ti joari pũ.

²⁵ “Cohamacu yaina jija”, ni tũhotura cãina judio masa mahanocã cahsarocãre yihsoina. Cohamacu yare ti yoachu judio masa ti jichũ noa nina. To yare ti yoaerachũ judio masa ti jia tia yaba cjihti jierara. Yihsoina ti jia tia cũhu yaba cjihti jierara. ²⁶ Ñ jiro judio masa jieraina mahanocã cahsarocãre yihsoeraina ti jipachuta, Cohamacu dutiare ti yoachu ñũno “Yũ yaina masata jira”, ni ñuna Cohamacu tinare. Judio masa sehere to ñ ni ñũboriro sehetã judio masa jieraina sehere ñ ni ñuna. ²⁷ Payũ judio masa Cohamacu Moise cjirore to dutiare cjuapahta tíre yoaerara tina. Ñ jia paina judio masa jieraina sehe mahanocã cahsarocãre yihsoeraina jipahta to dutiare yoara. Ñ yoaina

jia judio masa ti ñano yoarire masichu yoaa nina. ²⁸ Mipure judio masuno waro to jiare yahuihtja masare. To pjacure mahanocã cahsarocãre yihso-riro jiparota Cohamacure ño payoeraro potocãta judio masuno waro jierara. ²⁹ Cohamacu yairo Espiriture cjuariro tirore yuhtiriro tiro tjira judio masuno waro. Ñ yoa to pjacure mahanocã cahsarocãre to yihso cohãriro seheta to ñaa yoaare duhura tiro. To mu saro dutiare yoiriro jieraparota Espiritu Santo to yoadohoa mehne to ñaa yoaare duhura. Tó sehe yoirirore “Noariro jira”, ni ñuna Cohamacu sehe. Masa sehe tirore ti ã nierapachuta, ã nina Cohamacu sehe.

3 ¹ ¿Yu ã nichu judio masa ti jia tia wiho waro jijari, masa tuhotuchu? Ne wiho waro jia nierara. ¿Cohamacu judio masare to dutiriro seheta ti pjacurire mahanocã cahsarocãre ti yihso cohãa wiho waro jijari, masa tuhotuchu? Ne wiho waro jia nierara. ² Judio masa ti jia tia wiho waro jierara. Cohamacu yare ti joari püre judio masare cü muhtaha. Ñ jia judio masa ti jichu noa nina tinare. ³ Ñ jia cãina judio masa Cohamacure ti tuhoerapachuta to niri cjiri potocãta jira. Ñ jiro to ni cüriro seheta yoarohca tiro. ⁴ Ñta jira. Jipihitina masa mahñoina ti jipachuta Cohamacu sehe ne mahñoerara. Panopu to yare yahu muhtariro cjiro to ni joariro seheta ne mahñoerara Cohamacu. Ñ sehe ni joaa tiha:

“Potocã niriro jira muhu Cohamacu.

Muhure ã jia masa ‘Cohamacu quihõno yoaerara’, ni masierara muhure”,

ni joaa tiha panopu.

⁵ Ñ sehe ni tuhotuboca masa: “Mari ñaare yoana Cohamacu noaare to yoiriro jichu masichu yoaja. Ñ jiro ñaare mari yochu noa nina. ¿To ã noaa jipachuta dohsearo tiro mari ñaare yoiri buhiri dahremacanocajari?” ni tuhotuboca masa. Masa ti tuhotuboriro seheta ã nii nija. ⁶ Tó jierara ti ã ni tuhotuchu. Mari ñaa yoiri sehe noaa jichu Cohamacu mari ñaare yoiri buhiri buhiri dahre masieraboa.

⁷ Masa sehe mahñoina jira. Cohamacu sehe ne mahñoerara. Ñ jina masa ti mahñochu ñuna Cohamacu sehe ne mahñoerariro to jichu noano ñu masija mari. Ñ jia masa mahñoa, Cohamacu to mahñoerariro to jiare ñoa niboca tina. Ñta ni tuhotumana cãina. Ñ ni tuhotua ñ sehe ni tuhotu namomana tina: “Sã mahñoa mehne Cohamacu to mahñoerariro jiare ñona nija. Ñ ñona noano yoana nija. Ñ jia sã mahñoa noa nina. ¿Sã mahñoa noaa nichu dohse jiro baro sã mahñori buhiri sãre buhiri dahremacanocabocari Cohamacu?” ni tuhotumana cãina masa. ⁸ Ñ jia ñ sehe ni mahñoa cãina sãre: “ ‘Ñano yoana Cohamacu to noariro jichu ñona nica. Ñ jina ñano yojihna’, nihre Paulo cãhu”, ni mahño yahusãna sãre cãina. Ti ã niri buhiri tinare Cohamacu buhiri dahrerohca. Ñta yaro cahmana tinare.

Jipihitina buhiri tiina jija mari

⁹ Ñ yoa dohse ni tuhotujari masa? ¿Mari judio masa paina yuhdoro noaina jijari mari? Jieraja mari. Judio masa, judio masa jieraina cãhu ñaa buhiri tia cjuaina dihta jija mari. Ñ jina jipihitina buhiri tiina jija mari. Ñta jira. Jipihitinare yu buheriro seheta jira. ¹⁰ Panopu to ni joariro seheta jira ahri: Ñ sehe ni joaa tiha:

“Ne cūiro masuno noariro mariaha, Cohamacu to ñuchũ.

¹¹ Jipihitina masa tuho ñahaeraina dihta jira.

Tuhsũ, jipihitina masa ne Cohamacure macaeraina jia, tirore wacũ payoerara.

¹² Tina Cohamacu yare cohãa jipihitina ñaare yoaina wahare.

Ne cūiro noare yoariro pinihta mariaha.

¹³ Ti duseri masa copari ti pjõo dapori yoaro sehe jira.

Ti durucuchũ, masa copari urĩa wijaaro sehe mahñoa dihta ti duserire wijaara.

Ã durucua agã duseroi to ñima purĩa wijaaro seheta purĩno ti durucua wijaara ti duserire.

¹⁴ Tina painare ñano durucuina, purĩno durucuina jira.

¹⁵ Ã jia sua ñaina dóicãta masare wajãina jira.

¹⁶ Nohoi ti waharoi tina masare ñano yoa, ñano yuhdũchu yoara tinare.

¹⁷ Tó sehe jia paina masa mehne tina noano jierara.

¹⁸ Ã yoa Cohamacure ne ño payoerara”,

ni joaa tiha panopure.

¹⁹⁻²⁰ Cohamacu jipihitiare to joa na dutiri cjirore sãre judio masare cũha. Ã jiro tó sehe to ni joariro cjiro mari cũhure dutisinina. “Buhiri mariaha sãre”, ni masieraja mari. Ã jina mari jipihitiro macaina judio masa, ã jichũ judio masa jieraina cũhũ to buhiri dahrehtina mari jia tiare masija mari. Ã jina buhiri tiina mari jiare masina, “Noaina jia sã”, ni masieraja Cohamacure. Cohamacu to yoa dutia sehere ne mari yoaeraja. Ã jiro to dutia sehe buhiri tiina mari jia tiare masichũ yoara marine. Ã masina, õ sehe ni masieraja mari: “Cohamacu dutiare yoa pahñoi. Ã jiro Cohamacu marine ‘Noaina jira’, ni ñuna”, ne ni masieraja mari jipihitiro macaina.

Cohamacure noano mari wacũ tuana to yaina wahaja mari

²¹ Wiho mejeta mipure Moise cjirore to dutiri cjirore yoa pahñoono marieno masare ti ñaa buhirire to cohãre masichũ yoara marine Cohamacu. Moise cjiro to joari cjiri mehne, Cohamacu yare yahu muhtaina cjiri ti joari cjiri mehne yahu cũ muhta tuhsuha ahrire. ²² Jipihitina Jesucristore wacũ tuainare, tirore tuhoinare “Noaina jira”, ni ñuna Cohamacu. Tó sehe cũno potori ñuna tiro jipihitina dohse jiina Jesucristore wacũ tuainare. ²³ Mari jipihitina ñaare yoaina buhiri tiina dihta jia. Ã jina Cohamacu to cahmano sehe mari jiboriro duhsa yuhduara. ²⁴ Mari ã jiina jipachuta Cohamacu marine pja ñuna. Ã jiro Jesucristo sehe mari ñaa buhirire wapabasari jire. To ã wapabasaro mehne “Buhiri marieina noaina jira”, ni ñuna Cohamacu marine. ²⁵ Panopũ macaina cjiri buhiri tiina ti jipachuta Cohamacu dóicãta buhiri dahreraha tinare. Ã buhiri dahreraro ti buhiri tiare wiho waro ã tuhutunocano nieraha. Baharo tiro Jesucristore warocari jire mari ñaa buhiri yariahtiro cjihtore, to di mehne mari ñaa yoarire wapabasahtiro cjihtore. Jesucristore mari wacũ tuachũ Cohamacu sehe mari ñaa yoari buhirire borohca. Ahrire yoaro, quihõno yoariro to jia tiare masichũ yoaro niha. ²⁶ Ã yoa mipũ cũhure quihõno yoariro to jia tiare masa ti masichũ cahmana tiro. Quihõno yoariro jira tiro. Ã jiro Jesure warocari jire masa ti ñaa buhiri yariahtiro cjihtore. Ã jiro Jesure wacũ tuainare, “Buhiri marieina, noaina jira”, ni ñuno, quihõno yoaro nica.

²⁷¿Mipure “Noaina jija mari”, ni masicari mari musa tuhutuchu? Tíre ne ni masieraja mari. ¿Dohseana á ni masieracari mari? ¿Cohamacu to dutiare yoana, “Noaina jija”, ni masibocari mari? Jierara. Tí cūhure ni masieraja mari. Mari á ni masierapachuta Jesure mari wacū tuachu “Noaina jira”, ni ñunohca marine Cohamacu. ²⁸Ō sehe masija mari: Jesure mari wacū tuachu ñuno marine ñu jicoara Cohamacu. Á jiro marine “Buhiri marieina, noaina jira”, ni ñuna tiro. To dutiare mari yoari wapa á ni ñuerara. Tirore mari wacū tuachu á ni ñuna.

²⁹Tuhsu, Cohamacu judio masa puhtoro dihta jierara. Judio masa jieraina puhtoro cūhu jira tiro. ³⁰Á jiro Cohamacu cūirota jiro jiro, jipihtina bui puhtoro jira. Á jiro jiro judio masare, á jichu judio masa jieraina cūhure Jesure ti wacū tuachu, tinare cūno potori “Buhiri marieina, noaina jira”, ni ñunohca Cohamacu. ³¹¿Á jina Jesure wacū tuana Cohamacu Moise cjirore to dutiare cohāna nibocari mari? Cohāeraja mari tíre. Jesure wacū tuaina jina, Cohamacu dutiare yoa pahñona nija mari.

Abrahā Cohamacure to wacū tuarire yahuha Paulo

4 ¹Mari ñuchu cjiro panopu macariro Abrahā cjirore Cohamacu ō sehe yoaha: ²Abrahā cjiro noaare to yoapachuta “Noariro jira”, ni ñueraha Cohamacu tirore. Á jiro noaare yoaparota ñariro jisnino “Yuhu pini noariro jija”, ni masieraha Abrahā, Cohamacu to ñuchu. ³Cohamacu yare ti joari pū ō sehe nina: “Abrahā Cohamacu to nirire to quihōno tuho ñaha, tirore to wacū tuachu ñuno Cohamacu tirore ‘Potocāta noariro jira’, ni ñuha”, ni yahura Cohamacu yare ti joari pūi. ⁴Puhtoro dahrainare waparo, wiho waro to pja ñua mehne waparo nierara. Ti dahrari wapa tinare waparo nina. ⁵Wiho mejeta Cohamacure wacū tuainare dahrainare ti waparo sehe yoerara Cohamacu. Cohamacure wacū tuarirore “Noariro jira”, ni ñuna Cohamacu. To á ni ñuchu tí noaa to yoari wapa jierara. Cohamacu sehe tirore cahmaeraina cjirore tirore ti cahmachu ñuno buhiri marieina, noaina wahachu yoara. Á jiro masuno Cohamacure to wacū tuachu ñuno “Noariro jira”, ni ñuna Cohamacu tirore. ⁶Áta niha panopu macariro Davi cjiro. Masuno noaare to yoapachuta Cohamacu tirore “Noariro jira”, ni ñueraca. Tirore to wacū tuachu ñuno pini Cohamacu tirore “Noariro jira”, ni ñuna. Cohamacu to á ni ñuriro wahcheare yahuha Davi cjiro. Ō sehe niha:

⁷“Cohamacu ti ñaa yoirire to cohāchu masiina sehe tuaro wahchera.

⁸‘Noaina jira. Musa buhiri tiare wacūsi yuhu’, to nichu tuhoina tuaro wahchera”,

niha Davi cjiro.

⁹¿Judio masa ti pjacure mahanocā cahsarocāre yihsorina dihtare ti ñaa yoirire boari Cohamacu? Jierara. Judio masa jieraina yihsoraina cūhure ti ñaa yoirire bora tiro. Pari turi Abrahāre wacūga musa. Tiro Cohamacure to wacū tuachu ñuno “Noariro jira”, ni ñuha Cohamacu. ¹⁰¿Dohse jichu á yoari Abrahā, musa tuhutuchu? To pjacure mahanocā cahsarocāre to yihsorto panoputa tirore “Noariro jira”, ni ñuha Cohamacu. Á jiro yihsoro, to ñaa yoirire cohā tuhsuriropu yihsaha. ¹¹Á jiro dóihta Cohamacure wacū tua muhtaha Abrahā. To á wacū tuachu ñuno “Noariro jira”, ni ñuha Cohamacu tirore. Á to wacū tuaare, to yairo to ñohto cjihtore Cohamacu tirore

to pjacure mahanocã cahsarocãre yihso dutiha. Â jiro Abrahã to yihsohto pano Cohamacu sehe “Noariro jira”, ni ñu tuhsuha tirore. Tiro to yihsohto pano to ã ni ñuriro seheta jipihtina Cohamacure wacũ tuinare judio masa jieraina yihsoerainare “Noaina jira”, ni ñuna Cohamacu. To ã ni ñuna ti jichu Abrahã ti ñuchuno cjiro waro yoaro sehe wahara. ¹²Tí yoaro seheta masa, yihsoina Cohamacure ti wacũ tuachu ti ñuchuno cjiro waro jia tiha Abrahã. Tiro to yihsohto pano Cohamacure wacũ tuaha. Â jia tiro yoaro seheta wacũ tuaina judio masa Abrahã panamana ji turiaina jira.

Cohamacu Abrahãre to ni cûrire “Potocã tjira”, niha Abrahã

¹³Panopũ õ sehe niha Cohamacu Abrahãre: “Ahri yahpare mûhure, mû panamana ji turiaipapũ cûhure waihtja”, ni yahu cûha Cohamacu Abrahãre. To dutiare to noano yoari wapa ã nieraha Cohamacu tirore. Abrahã Cohamacure to wacũ tuari wapa sehere ã niha Cohamacu tirore, “Noariro jira”, tirore to ni ñuri baharo. ¹⁴“Cohamacu Moise cjirore to cûri dutia dihtare yoaro cahmana”, nina judio masa. Tó sehe niina Cohamacure wacũ tuaro marieno ahri yahpa jipihti-rore na duara. Wacũ tuaro marieno ti nachu mari sehe Cohamacure mari wacũ tuaa yaba cjihti jieraboa. Â jiro Cohamacu marine to ni cûri cjiro yaba cjihti jieraboa. ¹⁵Moise cjirore to cûri dutia sehere yoaerara masa. Â jiro to dutiare ti yûhdurucari buhiri masare buhiri dahrerohca Cohamacu. Wiho mejeta to dutia mariachu to dutiare yûhdurucaro cûhu mariaboa.

¹⁶Â yoa Cohamacure wacũ tuaina dihta to wahtore naahca. Abrahã cjiro Cohamacure wacũ tuaha. Â jiro jipihtina tiro yoaro sehe Cohamacure wacũ tuaina ti ñuchuno waro yoaro sehe tjuaa Abrahã cjiro. Â jiro “Ahrire musare waihtja”, Cohamacu nino jipihtinare tirore wacũ tuaina pinihtare nino niha. Â jia Cohamacu Moise cjirore to dutiri cjirore yoina Cohamacure wacũ tuaina Cohamacu to wahtore naahca. Tina dihta nasi. Jipihtina Abrahã cjiro yoaro sehe Cohamacure wacũ tuaina cûhu tinare to wahtore naahca. ¹⁷Tíre Abrahã cjirore to niriro seheta joaa tiha panopure: “ ‘Payu macari macaina ti ñuchuno cjihto cûhi mûhure’, ni cûa tiha Cohamacu Abrahã cjirore”, ni joaa tiha panopũ. Â jiro tiro Cohamacure wacũ tuaa tiha. Â to wacũ tuachu mari ñuchu cjiro yoa tiha Cohamacu tiro cjirore. Cohamacu sehe yariainare masoriro, jipihtinare, jipiehtia cûhure bajuamehneriro jira.

¹⁸“Payu yahpari macaina mû panamana ji turiaina jiahca”, Cohamacu to ã ni cûchu Abrahã cjiro sehe pohna marieriro jiparota, “Potocãta jira”, ni tuhutua tiha. Â ni tuhuturo payu yahpari macaina mari ñuchu cjiro yoaro sehe wahaha tiro Cohamacu tirore to ni cûriro seheta.

¹⁹Â jiro cien cûhmari cjuariro jiparota “Bucuro waro jija”, ni tuhutupa-rota, Sara to namono ne pohna marienicoro to jipachuta “Pohna ti masieraaja sã”, ni tuhutueraa tiha Abrahã cjiro. Â jiro Cohamacu to ni cûrire “Potocãta jira”, nia tiha Abrahã cjiro. ²⁰“To niriro seheta yoaeraboca”, ne ni tuhutueraa tiha Abrahã cjiro. Â jiro tiro Cohamacu to ni cûrire noano tuhua tiha. To ã niare tuhutjiãhno “Cohamacu tuariro jira”, ni ño payoro nia tiha. Â jiro Cohamacure wacũ tua namoa tiha tiro. ²¹“Cohamacu to niriro seheta noano bihorohca”, ni tuhutu noano masia tiha Abrahã cjiro. ²²To ã masichu Cohamacure to wacũ tuachu Cohamacu sehe “Noariro jira”, ni ñua tiha Abrahã cjirore. Âta ni joaa tiha Cohamacu yare ti joari pûi.

²³ Ñ yoa Abrahā cjiro dihtare ā ni joaeraa tiha. ²⁴ Tíre mari masihtí cjihtire mari cūhure ā ni joaa tiha. Ñ jiro Cohamacure mari wacū tuachū “Noaina jira”, ni ñnohca mari cūhure Cohamacu. Tiro pini mari puhtoro Jesu to yariachū masori jire tirore. ²⁵ Jesu sehe mari ñaa buhiri yariari jire. To yariari baharo masa wijaari jire tiro Cohamacu marine “Noaina jira”, to ni ñuhto cjihtore.

“Noaina jira”, Cohamacu to ni ñuchū ō sehe waharohca marine

5 ¹ Jesucristore mari wacū tuachū ñuno “Buhiri marieina, noina jira”, ni ñuna marine Cohamacu. To ā ni ñuchū Cohamacu mehne macaina marine jichū yoara mari puhtoro Jesucristo. ² Ñ jina mari tirore wacū tuachū ñuno Cohamacu marine cahīno, pichacapū wahaborinare yūhdore tiro mehne mari jihto sehe. Cohamacu pinihta noa yūhduariro jira. Ñ jiro tiro yoaro seheta jiina wahachū yoarohca marine tiro. To ā yoahti cjihtire noano masi, wahcheja. ³ Ñ yoa ñano yūhduna cūhū wahcheja mari. Ñano yūhduna, tíre cūno pja masija mari. Ñ cūno pjana, ñano yūhdupanahta noano Cohamacure wacū tuaina waha namoja mari. Ñ jina Cohamacu yare duhueraja mari. ⁴ Mari ā yoachū ñuno “Noana”, ni ñnohca Cohamacu marine. Ñ jina marine to yūhdohtore noano masi, wacū cohtana nija mari. ⁵ Ne wiho waro wacū cohtana nieraja. Cohamacu marine to Espíritu Santore warocare mari mehne jihtirore. Ñ jiro Espíritu Santo sehe mari mehne jiro Cohamacu marine to ā cahírucuaire masichū yoara. To ā masichū yoachū marine to yūhdohto noano waro jiro nina. Potocāta yūhdunahca mari.

⁶ Tó pano mari ñaa yoarire mari basi mari yūhdu masierachū ñuno, to quihōiro mū suchū, Cohamacure cahmaeraina mari jipachūta, Cristo sehe mari ñaa buhirire yariabasaha. ⁷ Cūiro masuno noariro jiparota yariah-tiro to jichū paio sehe to yariaborirore cohtota, to yariabasa duachū mijo yūhduara. Noaa dihtare yoariro yaro jiborirore paio yariabasaboca pa tehe nino. ⁸ Wiho mejeta Cohamacu sehe ō sehe yoara. Buhiri tiina mari jisinpachūta mari yaro jiborirore Cristo yariaha. To ā yoachū Cohamacu marine to tuaro cahiare masija mari. ⁹ Mari yaro jiborirore to ñano di wijaa, yariachū Cohamacu sehe marine “Buhiri marieina, noaina jira”, ni ñuna. To ā ni ñuri baharo mipū pinihtare marine pichacapū wahaborinare yūhdorohca Jesu. Marine to yaina wahachū to yari baharo marine buhiri dahresi pichacapū Cohamacu. ¹⁰ Cohamacure ñu tuhtiina mari jipachūta, to macūno sehe yariaro, mari ñaa buhiri tiare cohāno, Cohamacure mari ñu tuhtirire duhuchū yoare. To ā yoaro mehne Cohamacu mari buhiri tiare bora. Tuhsu marine to yaina wahachū yoara. Mipū pinihtare tí yūhdo curero yoarohca marine. To yaina mari jichū Jesu to masa mujari mehne marine pichacapū wahaborinare noano yūhdorohca tiro. ¹¹ Ñ jina baharopū mari yūhduhtore masina wahcheja mari. Mipure ahri cūhure wahcheja. Mari puhtoro Jesucristo mari ñaa yari buhirire to yariari baharo Cohamacu yaina jija mari. Ñ jina wahcheja.

Adāore, Cristore yahuha Paulo Roma macainare

¹² Adāo cjiro Cohamacure to yūhduwacari baharo ahri yahpare ñaa buhiri tia ji dūcaha. Ñaa buhiri tia ji dūcaro mehne masa yaria dūcaha. Jipihtina

mari ñaare buhiri tiare yoaja. Ñ jina jipihtina ñaina mari jiri buhiri yariaja. ¹³Cohamacu to dutiare Moise cjirore to cūhto pano potocāta ahri yahpa macaina ñaa buhiri tiare yoaa tiha. Ti ã yoapachuta to dutia mariachu to dutiare ti yuhdurucari buhiri buhiri dahre masieraha. ¹⁴To ã buhiri dahre masierapachuta Adão cjiro cūhu to baharo jiina cūhu tí dutia mariasini-pachuta yariaa tiha. Moise cjiro to jihto pano tí dutia mariasinipachuta masa yariaa tiha. Paina ñano yoaa Adão cjiro ñano to yoiaro sehe waro yoaera timaha. Ñ jipahta tina cūhu yariaa tiha. Ñ jiro Adão cjiro ñaare to yoa ducari seheta yoiari pja baharopu ahri yahpapu tariro noaare yoa ducari jire.

¹⁵Adão cjiro to yuhdurucari Cohamacu masare to pja ñua yoaro sehe jierara. Cohamacu to pja ñua sehe noa yuhduara. Adão cjiro cūirota jiparota ñaare to yoa ducari buhiri payu masa yariaa tiha. Cohamacu sehe marine pja ñuno, Jesucristore warocari jire. To ã warocachu tiro cūirota jiroto pichacapu wahaborinare masare payu yuhdora. ¹⁶Ñ jiro Cohamacu masare to pja ñua Adão cjiro to yuhdurucari yoaro seheta jierara. Adão cjiro sehe cūirota jiroto ñaare to yoiari buhiri jipihtina masa ñaa buhiri tiina jira. Ñ ti buhiri tiina jipachuta masa pjiro ti ñaare yoapachuta mipure masare pja ñuno Cohamacu ti ñaare bora. Ñ boro “Noaina jira”, ni ñuna tiro tinare. ¹⁷Adão cjiro cūirota jiroto ñaare to yoa ducachu jipihtina masa yariarucura. Tí potocā tjira. To ã jipachuta ahri sehere wahchenahca mari. Mipure Cohamacu masare pja ñuno Jesucristo cūirota jiroto to yariaro mehne ti ñaare boro, tinare “Noaina jira”, ni ñuna. Ñ jia jipihtina to ã ni ñuna muanopu Cristo mehne puhtoa jahca.

¹⁸Adão cjiro cūirota to jipachuta to yuhdurucari buhiri jipihtinapu buhiri tiina waha ducaha. Ñ jia Cohamacu to buhiri dahrehtinapu tjuaha tina. Tó yoaro seheta Jesu cūhu cūirota jiparota noano yoaro jipihtina ti buhiri tiare cohā masina. Ti buhiri tiare to cohāchu, “Buhiri marieina, noaina jira”, ni ñuna tinare Cohamacu. Ñ jia to ya catiare cjuaa, ã catirucuahca tina.

¹⁹Adão cjiro cūirota Cohamacure yuhdurucaha. To ã yuhdurucachu, payu masa ñaa buhiri tiina wahaha. Tó yoaro seheta Jesu cūhu cūirota Cohamacure yuhtiha. Ñ yuhti, payu masa ti buhiri tiare cohā masina tiro. To ã cohāchu “Ñaare ti yoiari buhiri tia mariena, noaina jira”, ni ñuna Cohamacu tinare.

²⁰Cohamacu to dutiare Moise cjirore cūa tiha tí mehne jipihtina masa ti ñaa buhiri tiare ti noano masihtu cjihtore. Ñ jia masa ti ñaa buhiri tiare masia tí yuhdoro Cohamacu tinare tuaro to cahīa tia cūhure masiahca. Tiro marine cahī yuhduara. ²¹Buhiri tiina ti jiri buhiri masa yariahtina jira. Ti yariari baharo, pichacapu wahaahca. Wiho mejeta Cohamacu masare cahī yuhduara. Ñ tuaro cahīno, mari puhtoro Jesucristo masare to yariabasaro mehne masare “Buhiri marieina, noaina jira”, ni ñuna. To ã ni ñuna sehe to ya catia mehne ã catirucuahca.

**Yariaina cjiri ti ñaare yoaeraro seheta Cristo
yaina cūhu ñaare yoarucuerara**

6 ¹¿Dohse yonahcari mari mipure, masa tūhotuchū? Cāina ō sehe niboca: Ñaare mari yochū ñuno Cohamacu mari ñaa buhirire borohca. ¿Cohamacu marire to cahī namochū ñu duana ñaare yoa namobocari mari? ²Jierara. Ñaare yoena tjijihna mari. Yariaina cjiri ñaare ti yoaeraro seheta

Cristo yaina jina mari cūhu ñaare yoarucu masieraja mari. ³ Jesu yaina mari jia tiare masa ti ñu masihtu cjihtore copu bautisare marine paina. Ñ jina mari puhtoro Jesucristo to yariachu, mari cūhu tiro mehne yariaina seheta wahahi. ¿Tíre masierajari musa? ⁴ Ñ bautisarina wahana Cristo pjacure masa copapu ti siō sãa payo cohãiro seheta pano mari ñaa yoarire duhuja. Ñ jina Cohamacu to tuaa mehne Cristo to masa mujariro seheta mari cūhu to tuaa mehne mari jia tia cūhure, mari tuhutua cūhure cohtotaja. Ñ cohtotana to yare wahma yoarucaina wahaja mari.

⁵ Cristo yaina jina, tiro mari puhtoro mehne yariaina seheta jina, to masa mujariro seheta mari cūhu masa mujanahca. Tí potocãta jira. ⁶ Cristo yaina ji ducana crusapu tiro mehne yariaina seheta wahai pari turi mari ñaare yoarucuerahito sehe. Ñ waharina jina ñaare yoarucuina ji namo duasi mari. Tíre mari masija. ⁷ Yariariro cjiropure ñaare goa pjaa mariahna. Ñ jiro tiro cjiro ñaare to yoa duhuriro seheta tí ñaa sehe tirore to dutipe namoeraboro seheta tí ñaare duhura tiro. ⁸ Cristo mehne yariaina yaro sehe jina, to masa mujariro seheta mari cūhu masa mujanahca. “Tí potocã tjira”, ni tuhutuja mari. Ñ jina tíre mari masa mujahitire wacū cohtaja mari. ⁹ Cristo to yaria masa mujari baharo ne pari turi yariasi. Ñ catirucuriro jira tiro. Tíre mari masija. ¹⁰ Ñ jiro Cristo cū tahata yariaro, masa ti ñaa yoi buhirire cohãno taro yariaha. To masa mujari baharo Cohamacu to cahmano seheta yoarucuhitiro jira tiro. ¹¹ Tiro yaro seheta musa cūhu ñaare ni tuhutuga: “Yariaina cjiri ti yoaeraro seheta mari cūhu ñaare yoa duaeraja. Jesu yaina jina Cohamacu to cahmano seheta yoahtina cjihtita jina nija mari cūhu”, ni tuhutuga musa.

¹² Ñ jina musa yariahtina jina ñaare yoarucuina jiena tjiga. Ñ jina musa ñaa yoaare goa pjapanahta tíre ña tuhutunocahga. ¹³ Ñaare yoina jiena tjiga. Musare pichacapu wahaborinare Jesu to yuhdorina jira musa. To ñ yoina jina Cohamacu cahmaa dihtare yoina jiga musa. Ñ jina noaare yoina jiga musa. ¹⁴ Mipure Cohamacu Moise cjirore to dutia mehne marine dutierara. Cohamacu marine cahño tiro sehe marine dutira. Ñ jina to yoadohoro mehne ñaare yoa duasi mari.

Musa ñaare yoarucuhu tí ñaa musa puhtoro yaro sehe jira

¹⁵ ¿Yu ñ nichu dohse ni tuhutujari musa? ¿Cohamacu sehere yuhtihtina jina Moise cjirore to dutiare yuhtihtina jierana, ñaare yoarucubocari mari? Jierara. ¹⁶ ¿Ahrire masierajari musa? Musa noano yuhtiriro musa puhtoro jira. Ñ jina to cahamaca jira musa. Musa ñ yuhti musa puhtoro tiroro seheta ñaare yoarucuina musa jichu tí ñaa yoa musa puhtoro yaro sehe jira. Ñ jina ñaare duhu masierara musa. Ñ jiina jina pichacapu wahahtina jira musa. Cohamacure noano ño payoina jina pinihta, to cahamaca jira musa. Ñ jina to yaina noaina jira musa. ¿Tíre masierajari musa? ¹⁷ Panopu ñaare yoarucuina musa jichu tí ñaa yoa musa puhtoro yaro sehe jimare. Mipu sehere noaa buheare tuhona Jesure wacū tuana Cohamacure noano ño payoina wahare musa. Musa ñ wahachu ñna Cohamacure “Noana”, nija. ¹⁸ Ñ wahana mipure ñaa ti dutiriro cjiro seheta yoaerara musa. Ñ jina Cohamacu cahamaca jina noaa sehere yora musa. ¹⁹ Cahamaca ti puhtoare ti noano ño payoare masi pahñona musa. Ñ jicu tí musa masiri mehne tí mehne piti dahre buhehi musare ahri buheare noano masieraina musa jichu ñuch. Panopu ñaare

yoarucuina jimare musa. Musa ã yoarucuriro seheta mipu sehere noaare yoarucuina jiga musa. Ñ jina Cohamacu cahmaa dihtare yoanahca musa.

²⁰Panopu ñaa dihtare yoaina jina, noaa sehere yoaera tire musa. ²¹¿Tí pjapure ñaa dihtare yoana dohse jirore wapatarí musa? Tí musa ñaa yoarire wacuna mipure buo tica musa. Tí ñaa musa yoari buhiri pichacapu wahaboa musa. Ñ jina ñaaare yoana ne wapataerara. ²²Mipu sehere musa ñaa yoarire duhuna Cohamacu cahamaca wahare musa. Ñ jina Cohamacu cahmaa dihtare yoaina jinahca. Ñ jina jipihtia dachoripe Cohamacu mehne jirucunahca. ²³Ñaaare mari yoari buhiri pichacapu wahahtina jija jipihtina mari. Mari ã jipachuta mari puhtoro Jesucristore mari wacu tuachu ñuno, jipihtia dachoripe tiro mehne marine jirucuchu yoarohca. Mari ã jirucuhtore ã wanocanohca.

Cohamacu Moise cjirore to dutiare yahu namoha Paulo tjoa

7 ¹Yu coyea, Cohamacu Moise cjirore to dutirire noano masina musa. Masuno to catisinichu tí dutiare yuhduruca dutierara. To yariari baharo pinihtare tí dutiare yoaro mariahna. Tí cühure masina musa. ²Õ sehe jira: Numinore to manuno to catiro puro tiro mehne dihta ji dutira Cohamacu Moise cjirore to dutiri sehe. To ã dutipachuta to manuno to yariari baharo ticoro sehe paire manú ti masina. Ticoro tí dutia mehne ji namoerara. ³Ñ jiro to manuno to jipachuta ticoro paire manú tiro, ñano yoaricoro jira. Wiho mejeta to manuno to yariari baharopu paire manú tiro, Cohamacu dutiare yuhdurucaerara ticoro ã yoaricoro. Ñ yoaro ñano yoaricoro jierara ticoro.

⁴Musa cuhu yu coyea Jesu yaina wahana, Jesu to yariachu, musa cuhu tiro mehne yariaina seheta wahare. Ñ jina yariaina cjirore dutia ti marieno seheta Moise cjirore to dutia to cüri cjiro musa cühure mariahna. Tí dutia musare dutierara. To manuno to yariari baharo, paire manú tiricoro yoaro seheta musa cuhu panopu musare dutimarire duhu, Cristo mehne jira, ticoro paio mehne to jiro seheta. Ñ jina mipure to yaina jira musa. Tiro sehe to yariari baharo masa mujari jire Cohamacu cahmaare mari yoahto cjihtore. ⁵Panopu ñaaare mari mu suro yoaa timai. Ñ jina Cohamacu Moise cjirore to dutirire mari masiri baharo tí dutiare yuhduruca duamai. Tí dutia mariachu yuhduruca duaeraboa. Ñ jina tí dutiare mari masiri baharo ñaaare tuaro yomai mari. Ñ mari ñaaare yoana mari pichacapu wahahtinata jia timai. ⁶Ñ waha-borina jipanahta Cristo yaina jina mipure tí dutia mehne jieraja mari. Ñ jiro Espíritu Santo mari mehne jiro marine noaa sehere cohtotachu yoara. To ã yochu panopu macaa dutia muna dutia to joari cjiro tí mehne jieraja mari mipure.

To ñaa yoari cjirore yahuha Paulo

⁷¿Ñ jina Cohamacu Moise cjirore to dutirire dohse nibocari mari? ¿Tí to dutia ñaa jicari, musa tuhutuchu? Jierara. Tí yuhure to dutiri mehne ñaaare masii. Ñ jicu to dutia mariachu ñaaare masieraboa yuhu. To dutia õ sehe jira. “Paina yapure tuaro cahmaena tjiga”, niha to dutia. Ti ã nierachu paina yapure tuaro ti cahmari ti ñaa jichu masieraboa yuhu. ⁸Ñ jicu tí dutiare yu masiri baharo paina yapure tuaro cahmaa tii yuhu. Tí dutiare masierasinicu

paina yapure tuaro yu cahmari ti ñaa jichu masieraboa yuhu. ⁹To dutiare yu noano masihtu pano ã tuhutunocai. To dutiare yu masiri baharo pinihta tuaro ñaare yoa duamai. Ñ jicu pichacapu yu wahahtore masia tii. ¹⁰Ñ jia Cohamacu dutiare yuhdurucaeraa masa tiro mehne noano jirucuboa. Ñ jia tí dutia sehe noano jirucuchu yoabori dutia jipahta yu yuhdurucari buhiri yuhure pichacapu waha dutimare. ¹¹Ñ jicu ñaare yoacu Cohamacu Moise cjirore to dutiare yuhduruca duamai. Ñaare goa pjariro jicu noaare masierahi. Tí ñaa yuhure dojomehnere. Ñ jicu noano masierahi. Ñ masieracu Cohamacu dutiare yuhdurucacai. Ñ jicu to dutiare yu masiri baharo yu ñaa buhirire pichacapu yu wahaborirore masii. To dutia mehne ã masii.

¹²Ñ jia Moise cjirore Cohamacu to cūri dutia noaata jira. Ñ jia quihōno jiata nina tí dutia. ¹³Ñ jipahta marine tí noaa dutia sehe pichacapu wahachu yoajari? Jierara. Tópū wahachu yoerara. Mari ñaa yoaa sehe marine pichacapu wahachu yoara. To dutiare mari masiri baharo tí dutiare yuhdurucana ñaare yoana masija mari. Ñ jina mari ñaina mari jiare masina mari pichacapu wahahto cūhure masija mari. Ñ jina to dutiare masina mari yuhdurucarire ti ñaa yuhdua jichu masija mari.

¹⁴Cohamacu to dutiare Moise cjirore cūha. Tí to cūa noaa ti jichu masija mari. Wiho mejeta yuhu sehe paina yoaro seheta ñariro jija. Ñ jicuta ñaare yoarucuca yuhu. ¹⁵¿Dohse waharo nijari yuhure? Ne noano masieraja yu yoaa. Yu yoa duaa sehere ne yoaera, yu tuaro yoa duaeraa sehere yoaja yuhu. ¹⁶Ñaare yoa duaerapaihta ñaare yoaja yuhu. Tíre yoacu Cohamacu dutia noaa dutia ti jichu masija yuhu. ¹⁷Ñ jicu mipure yuhu waro tí ñaare yoeramaja. Wiho mejeta yu tuhoutuapu jia ñaa tí sehe yuhure ñaare yoachū yoara. ¹⁸Noaare tuaro yoa duapaihta ne bihoeraja. Ahri yahpa macariro jicu yu tuhoutuapu ñaa dihta jira. Ne noaa mariaputia. Ñ jicu noaare tuaro yoa duapaihta ne bihoeraja. Ñaa sehe yuhure dojomehne mujana. ¹⁹Noaa yu yoa duaa sehere yoeraja yuhu. Ñaare yu yoa duaeraa sehere yoaja. ²⁰Yu yoa duaeraare yoacu mipure yuhu waro tíre yoeramaja. Yu tuhoutuapu jia ñaa tí sehe yuhure ñaare yoachū yoara.

²¹Ñ jiro yuhure ò sehe wahara: Noaare yu yoa duapachuta yu tuhoutuapu ñaa jira. Ñ jicu noaa sehere ne yoa masieraca. ²²Cohamacu Moise cjirore to dutirire yu tuhutua mehne tuaro cahma, quihōno yoa duamaja. ²³Ñ jicu yuhu ahrire yu basi masija: Yu tuhutua mehne noaare Cohamacu dutiare yoa duaja. Ñ yoa duapaihta yu basi ñaare tuaro yoa duaca. Yu mu sūro ñaare duhu masieraja yuhu.

²⁴Ñ ñaare duhu masieracu pjacuoriro jija yuhu. Ñaare yoacu pichacapu wahaiha yuhu. Cuenah. ¿Yuhure pichacapu waha dutia ñaare noa yuhure yuhdobasabocari? ²⁵Jesucristore yu wacū tuachu tiro sehe ñaa yu yoari buhirire yuhdobasarohca. To ã yoachū Cohamacure “Noana”, nija yuhu. Ñ jicu mipure yuhu yu basi yu tuhutua mehne Cohamacu dutiare quihōno yoa duamaja. Ñ yoa duariro jipacuta yu pjacu mehne yu mu sūro ñaare duhu masieraja.

Espíritu Santore cjuaina ti jia tiare yahuha Paulo

8 ¹Mipure Jesucristo yainare ti buhiri tiboro mariaha. ²Ñ jiro Jesucristo yairo yu jichu Espiritu Santo ã catirucuchū yoariro ñaare yuhdurucachu

yoara yuhure. Ñaare yuhure yuhdurucachu yoaro yuhure pichacapu waha-borirore yuhdore tiro. ³Cohamacu Moise cjirore to dutiare mari mu suro ne yoa pahnosi. Ñ yoa pahñoerana yuhdurucaina jija mari. Ñ jina tí dutia yoaa mehne ne yuhdusi mari. Mari ñ jiina jipachuta ñ sehe Cohamacu marine yuhdorohca. To macunore mari yoaro seheta pjacu tihtirote warocaha, mari buhiri tiare buhiri tihtiro cjihtore, marine yariabasahtiro cjihtore. Ñ jiro mari tuhotuapu jia ñaare tiro duhuchu yoari jire. ⁴Áta yoare Cohamacu dutiare to tuaa mehne mari bihohto cjihtore. To dutiare bihoina jina mari mu suro jieraja. Espiritu Santo to yoadohoa mehne to dutiro seheta yoaja mari.

⁵Ñaare yoa duaina, tí dihtare goa pjara. Espiritu Santo to dutiro seheta yorucuina sehe tí to dutia dihtare wacū nunu, yoa duara tina. ⁶Ñaa dihtare goa pjaa, wacū nunuina pichacapu wahaahca. Espiritu Santo to cahmano seheta tuaro yoa duaina sehe jipihtia dachoripe Cohamacu mehne ñ catirucuahca. Ñ jia tina Cohamacu mehne noano jinocahca. ⁷Ñaa dihtare goa pja, wacū nunuina Cohamacure ñu tuhtira. Tina Cohamacu dutiare ne yuhtierara. To dutiare yuhti duaerara. Yuhtia cūhu bihoeraboa tina. ⁸Ñ jia ti mu suro yoaia Cohamacure wahchechu yoa masierara.

⁹Wiho mejeta musa sehe musa tuhotuapu jia ñaare yoaerara. Espiritu Santo musa mehne to jichu to cahmano seheta yoara musa. Ñ jia Espiritu Santore cjuaraina sehe Cristo yaina jierara. ¹⁰Musa sehe to yaina jira. Musa ñaa buhirita musa pjacuri yariara. Ñ musa pjacuri yariahtina jipanahta Cristo musa mehne to jichu tiro mehne to ya catia mehne ñ catirucunahca musa. Cohamacu musare “Buhiri marieina, noaina jira”, to ñi ñuchu musa tiro mehne ñ jirucunahca. ¹¹Cohamacuta Jesure masori jire. Ñ masoriro jiro Espiritu Santo mari mehne to jirucuchu mari yariari baharo Cohamacu mari cūhure masonohca. Ñ masono wahmaa pjacuri wahachu yorohca marine. Jesure to masoriro seheta masonohca mari cūhure.

¹²Yu coyea, to ñ yochu ñuna ñaa mari goa pjarire yoaena tjijihna. ¹³Mari ñaare yoaia jina, pichacapu wahahtinata jinocanata nija. Espiritu Santo to yoadohoa mehne ñaa yoare duhuna, jipihtia dachoripe Cohamacu mehne jirucunahca.

¹⁴Jiphtina Espiritu Santore yuhtiina Cohamacu pohna jira. ¹⁵Espiritu Santo mari mehne to ji ducachuta Cohamacu pohna ji ducai. Wiho mejeta tiro marine dutipe, dahrachu yoahrtiro jierara. Ñ jina panopu mari cuiriro sehe mipu sehere mari cuieraja. To pohna jina, Espiritu Santo to yoadohoa mehne mipure “Yu Pucu”, nija mari Cohamacure. ¹⁶Ñ jiro Espiritu Santo mari wacūapu marine ñ sehe ñi masichu yoara: “Potocāta Cohamacu pohna jija mari”, ñi masichu yoara. ¹⁷Ñ jina to pohna jina, Cohamacu jipihtiare to pohnare “Waihtja”, to nirire mari sehe cjuanahca. Jesucristo cūhu cjuā, mari cūhu cjuanahca tíre. Cristo yare mari yoari buhiri ñano yuhduina jina mari tiro mehne muanopu noano wahchea mehne jinocanahca. Ñ jina Cohamacu to pohnare to “Waihtja”, to nirire cjuanahca mari Cristo mehne.

¹⁸Mipure ahri yahpai ñano yuhdusiniya mari. Baharopure mari muanopu noano jinocanahca. Ñ jina mipure ñano yuhduna, pjiro cahya tuhotuena tjijihna. Ahri mari ñano yuhduu wiho waro jira. Baharo noano jinocanahca Cohamacu mehne. Ñ jina tuaro wahchenahca. Ahri pini wiho waro jierara. ¹⁹Cū nūmu Cohamacu to pohnare cohtotarohca. Buhiri marieina,

variaerahtina, noaina waro jichu yorohca marine. Mari ã wahachu jipihitia Cohamacu to bajuamehneri cjiri cûhu wahma dihta cohtota pihitia wahaahca. ²⁰ Jipihitiropure to bajuamehneri noaa ti jiborire dojomehneha masuno ñano yoa ducaro. Ti mu suro ã wahaeraha. Masuno Cohamacure to yuhdurucaro mehne to bajuamehneri ã wahaha. Æ jiro Cohamacu to bajuamehneri cjirire ãta ñano ji dutisiniha. Baharo to bajuamehneri cjirire noaa wahachu yorohca tjoa tiro. ²¹ Æ jiro Cohamacu to bajuamehneri cjirire baa pihitborire noaa wahachu yorohca tjoa. Cohamacu pohnare noaina to wahachu yorairo seheta, tinare noano to yuhdoriro seheta noaa wahachu yorohca Cohamacu to bajuamehneri cjirire cûhure. ²² Jipihitia Cohamacu to bajuamehneri cjiri ñano ti ji ducari baharo ñano yuhduu tiha. Numino niji wahcõno to ñano yuhduro seheta to bajuamehneri cûhu dachoripe ñano yuhdurucura. Tíre mari masija. ²³ Æ yoa mari cûhu to bajuamehneri cjiri yoro seheta ñano yuhduja. To yaina mari wahachu, Cohamacu to yairo Espíritu Santore dóihita ware marine. Æ jina “ ‘Waihtja’, to niriro seheta sohtori tirohca”, ni masija mari. Æ jina noaa sehere marine to cohtotahtore tuaro waro cohtaja. Æ yoa to pohna mari tiro mehne mari noano jihto cûhure tuaro cohtaja mari. Tuhsu, wahma pjacure marine to wahto cûhure tuaro cohtaja. ²⁴ Mari ã cohtaina jichu, tirota marine pichacapu wahaborinare yuhdore. Tiro cahapu jirina jina tiro cahapure mari wahahtore cohtaeraboa mari. Marine to yuhdo tuhsuri baharo tíre cohta namoeraboa. ²⁵ Æ jina to wahtire ñuerapanahca Cohamacu marine to yuhdohtore cohtana, noano mehne ã cohtarucuja.

²⁶ Æ yoa Cohamacure wacû tuaera cureina to cahmaare noano masieraina jija mari Æ jina tiore quihõno siniina cûhu jieraja mari. Wiho mejeta mari Æ jiina jipachuta, Espíritu Santo sehe marine yoadohora. Marine tuaro pja ñano mari ya cjihtire durucuro marieno to tuhota mehne tiro Cohamacure tuaro sini payobasara. ²⁷ Cohamacu to cahmano seheta mari Jesu yaina ya cjihtire sini payobasara tiro Espíritu Santo. To ã sini payobasachu Cohamacu mari tuhotaure masi pahñoriro jiro, Espíritu Santo to sini payobasaare masina.

Cristo to tuaa mehne ñaa yoaare yuhdurucanahca mari

²⁸ Ahrire yu yahuhtire masija mari: Jipihitia Jesure cahíina mari jichu to cahmaare yoahtinare besere marine tiro. Æ jiina mari jichu ñuno Cohamacu ã yoadohorucura marine. Æ jina mari ñano yuhdurapanahca ñano yuhdurucu dojaeraja. Æ jina Cohamacu yoadohoro mehne noano jinahca mari. ²⁹ Cohamacu marine to yaina cjihtire dóiputa masi, bese tuhsuha. Æ besero to macûno Jesu to yoro seheta jihtina cjihtire marine cûha, payu masa to macûnore mari wahmi tihto cjihtore. ³⁰ Panopu to yaina to ji dutirina mari jichu, to pohna mari jihtina cjihti cûhure beseha marine. Æ jiro marine to beserinare tiro “Buhiri marieina, noaina jira”, ni ñure. Marine to ã niinare tiro yoro sehe jihtina cjihtire tiro mehne muanopu noano jichu yorohca Cohamacu.

³¹ Tíre masina õ sehe tuhota mari: Cohamacu marine to cahíinare ne paina ñu tuhtia bihosi. ³² Cohamacu mari ya buhirire yariahtiore to macûnore warocaha. “Yu macure cahíja. Æ jicu tiore warocaeraja”, nieraha tiro. Marine ã tuaro yoadohoriro jiro, jipihitia marine duhsarire wa pahñonohca. ³³ Cohamacu to beseina mari jichu, tiro marine “Ñaa buhiri marieina, noaina

jira”, ni ñure. Mari ã jiina jichu paina marine “Ñaina jira”, ne ni yahusã masierara. ³⁴ Cristo mari ya buhirire yaria masa mujaha. Mipure Cohamacu poto buhusehe sehei jira puhtoro jiro. ã jiro tiro mari ya cjihtire potocãta sini payoro nina Cohamacure. ã jia paina sehe marine ne buhiri dahre duti masierara Cohamacure. ³⁵ Cristo marine to tuaro cahichu paina tirore “Cahii tjia”, ne ni masierara. Cahĩ duhusi tiro. Mari ñano yuhdupachuta, mari cui-pachuta, paina marine ti ñano yoapachuta, mari juca baapachuta, suhti marieina mari jipachuta, nu cuaroi mari jipachuta, marine ti wajapachuta Cristo marine ã cahĩrucurohca. ³⁶ Cohamacu yare ti joari pui mari ñano yuhduhtore yahuro, õ sehe nina:

“Mu yaina sã jichu masa ñu jicoaeraa, ti wajãhtina ã jirucunata nija.

Oveja ti wajãhtina ti jiroi seheta sã cũhure ã wahara”,

ni joa tiha Cohamacu yare ti joari pui.

³⁷ ã jina mari ñano yuhdupanahta Cristo marine cahĩro to yoadohoro mehne ti jipihtiare yuhdu witinahca. ã yuhduna to yare ne duhusi mari. ³⁸⁻³⁹ Jesucristo yaina mari jichu ñano Cohamacu sehe marine tuaro cahina. ã jiro tiro marine ne cahĩ duhusi. Mari yariachu cũhure, mari catichu cũhure, mipure, baharopu cũhure, tiro marine cahĩ duhusi. ã yoa anjoa, watia puhtoa, ahri yahpa macaina puhtoa, muano macaina, ahri yahpa macaina cũhu marine Cohamacure “Mu yainare cahii tjia”, nia bihosi tina. Cohamacu to bajuamehneri cjiiripure tirore marine ne cahĩ duhuchu yoaa mariahna. Marine ne tiro cahĩ duhusi.

Israe masa Cohamacu to beserina jira

9 ¹⁻² Yu coyea Israe masare wacũcu tuaro cahyaja. Cristore cahmaerara tina. ã jicu ñano cahya yajeripohna tija yuhu. Ti yu ã ni yahua potocãta jira. Yuhu Cristo yairo tjia. ã jicu musare “Cahyaja”, yu nia sehe potocãta jira. Musare ã nicu mahñoi nieraja. Espĩritu Santo yu ã mahñoerachu masino, yuhure “Quihõno mu cahyarire yahure muhu” ni, yuhure masichu yoare. ³ Israe masa yu coyea yu ya yahpa macaina pichacapu wahaahca. Cohamacure tinare yuhdo duti duacu õ sehe ni duamaca yuhu sehe: “Ti ya buhirire yuhu sehe pichacapu wahahtja. ã jiro ti yaro jiborirore yuhu sehere buhiri dahrejaro Cristo”, ni duamaca yuhu. ⁴ Tina yu coyea Israe cjiro panamana ji turiaina jira. Tinare to pohna cjihtire cũha Cohamacu. Tuhsu, to si sitea mehne ti watoi jia tiha. Tinare jipihtinare to noano wahachu yoaa cũhure yahu cũ muhtaa tiha. Tuhsu, Moise cjirore to dutiri cũhure doĩputa tinare Israe masareta cũ muhtaa tiha. Tirore ti ño payohti macaa cũhure tinareta cũ muhtaa tiha. Tuhsu, masare to yuhdohto cũhure yahu cũ tiha tinare Cohamacu. ⁵ Sã ya curuari waro doce curuari waro jira. Sã ñuchusuma ji muhtarina cjiiripu ti panamana jia tiha. Ti panamana ji turiainapu jia sã Israe masa. ã jiro mari yoaro sehe pjacu tiroro taro, sã coyeiro Israe masuno waro jire Cristo. Tiro Cohamacuta jira. ã jiro tiro jipihtina bui puhtoro jira. Jipihtia dachoripe tirore noano ño payojihna mari. ã ño payorucujihna.

⁶ Paina Israe cjiro panamana ji turiaina jipahta Cohamacu yaina waro jierara. ã jina tina to yaina ti jierachu ñuna õ sehe ni tuhotuboca musa: “‘Israe masare yu yaina jichu yoaihtja’, niparota cãinare Cohamacu to niriro seheta yoerara”, ni tuhotuboca musa. ã ni tuhotuena tjiga. ⁷ Õ sehe jira:

Paina Abrahā panamana ji turiaina ti jipachuta “Abrahā panamana ji turiaina waro jira”, ni ñuerara Cohamacu tinare. Ñ jiro ò sehe nia tiha Cohamacu: “Mu macu Isaa panamana ji turiaina tina pinihta potocāta mu panamana ji turiaina waro jiahca”, ni yahu cūa tiha Cohamacu Abrahāre. ⁸To ã ni yahu cūchu ahrire masinahca mari: Abrahā cjiro panamana jipihtina waro Cohamacu pohna jieraca. Cohamacu to ni cūrire noano tuhoina tirore wacū tuaina sehe tinata jica Cohamacu pohna. Ñ jia tinata jira Abrahā cjiro panamana ji turiaina waro.

⁹Õ sehe niha Cohamacu Abrahā cjirore: “Pa cūhma ahri pja baroihta yu tjua tachū mu namo Sara wihārirocāre cjuarohca mu macure”, nia tiha Cohamacu Abrahā cjirore. Ñ nino Cohamacu Abrahā cjiro macuno to masa bajuah-tore yahu cūyuro nia tiha.

¹⁰Baharo Isaa cjiro namono Rebeca wama tiricoro puaro pohna tia tiha. Ti pucuro Isaa sã ñuchū cjiro jia tiha. ¹¹⁻¹²Ñ jia ti pohna ti masa bajuera-sinipachuta, noaare, ñaa cūhure ti yoaerasinipachuta Cohamacu ti pocoro cjihtore ò sehe nia tiha: “To bahuro sehe to wahminore dutirohca. Ñ jiro to puhtoro jirohca”, nia tiha tiorore. Cohamacu to cahmano seheta besera tiro. Ñ jiro jiro cūirocāre besero ticorore āta ni yahua tiha. Ñ jiro masa ti yoaare ñueraparota to cahmano seheta tiro to yaina cjihtire besera. ¹³Āta ni joaa tiha to yare ti joari pui: “Jacobó sehere cahia tihi. Esaú sehere cahiera tihi”, niha Cohamacu”, ni joaa tiha panopu.

¹⁴¿Tíre wacūna dohse ni tuhutubocari mari? ¿Ti yoahtire ñueraparota cūiroke ã besero Cohamacu quihōno yoaro nierabocari, musa tuhutuchū? Jierara. ¹⁵Õ sehe nia tiha Cohamacu Moise cjirore: “Diro yu pja ñu duari-rore pja ñuhtja”, nia tiha tiro Moise cjirore. Ñ jiro cūiroke ã besero quihōno yoaro niha Cohamacu. ¹⁶Ñ jina mari mu suro mari cahmano sehe Cohamacure marine pja ñuchū yoaeraja mari. Tuhsu, ne mari noaare mari yoari wapa cūhure marine pja ñuerara tiro. To mu suro to pja ñu duaina sehere pja ñuna. ¹⁷Egipto macaina puhtoro faraō cūhure to cahmano seheta yoa tiha tiro. Ò sehe nia tiha Cohamacu faraōre: “Egipto macaina puhtoro cjihtore cūi nii muhure yu tuare jipihinare yu ñohto cjihtore. Tuhsu, jipihia yahpari macaina yuhure ti masihto cjihtore puhtoro sōi nii yuhu muhure”, nia tiha Cohamacu faraōre. Tó seheta nina Cohamacu yare ti joari pui. ¹⁸Ñ jiro to pja ñu duinare to mu suro pja ñuna tiro. Tuhsu, paina sehere to mu suro yuhtie-rachu yoara tiro. To cahmano seheta yoara tiro.

¹⁹To ã yoiri jichū ñuna yuhu sehere ò sehe niboca musa: “Cohamacu marine to cahmano seheta to yochū mari sehe tirore yuhdurucana bihosi. ¿Mari ã yuhdurucana bihoerapachuta dohse jiro baro marine buhiri dahre duajari tiro?” ni susini sinituboca musa yuhure. ²⁰Tíre ò sehe ni yuhtija musare: ¿Masa wiho jiina jipanahta Cohamacure tuhtijari musa? Dihi biato dahrerirore “¿Dohseacu yuhure ò sehe jiri biato yoari muhū?” tí biato to ni sinituboriro seheta nina nica musa Cohamacure. Tó sehe ni masierara musa. ²¹Dihi biato dahreriro dihi mehne to yoa duaro seheta yoara. Ñ yoaro cūria dihica mehne noaare cūhti biatore yoa masina tiro. Tia dihica mehneta wiho jiare cūhti biato cūhure yoa masina tiro. Tiro yoaro seheta Cohamacu cūhū to yoa duaro seheta yoara.

²²Ñ jiro Cohamacu pichacapu to cohāhtinare ti ñaa yoiri to ñu yabiare, to tuaa cūhure ñono taro, tinare dói buhiri dahre duamaha. Ñ dói buhiri

dahre duaparota, yoari pja ti ñaa yoaare ã ñunocasiniha. Ñ jiro tinare buhiri dahrerasiniha. ²³ Æta yoaha Cohamacu noabiaro to jiare, to tuaa cūhure mari masihtu cjihtore. Panopu marine to pja ñuina cjihtire tiro beseri jire jipihtia to tuaare to noaa cūhure mari cjuahito cjihto sehe. ²⁴ Æ jina mari sehe to beserina jinata nija. Æ jia to beserina sehe cāina judio masa dihta jierara. Cāina judio masa jieraina cūhu jira to beserina. ²⁵ Æta nina judio masa jierainare Cohamacu yare Osea cjiro to joariro seheta:

“Pano yu yaina jieraina cjiri cūhure baharopu tinare ‘Yu yaina jira’, nihtja.

Æ yoa pano yu cahieraina cjiri cūhure baharopu tinare ‘Yu cahina jira musa’, nihtja”, nia tiha Cohamacu.

²⁶ “ ‘Yu yaina jierara musa’, Cohamacu to nia yahpari macaina tina Cohamacu catiro pohnata jahca”,

ni joaa tiha Osea cjiro panopure. ²⁷ Tuhsu, panopu macariro Isaia cjiro cūhu Israe masare ò sehe ni yahua tiha: “Pjiri ma macaa padu yaparicāre mari quihōna bihoeraja. Israe masa tí yaparicā peri payu ti jiro sehe jiina ti jipachuta mahainacā Cohamacu yuhdorohca tinare. ²⁸ Cohamacu ahri yahpa macainare payu masare to nino seheta cjero mehne potocāta buhiri dahre bahrañonohca”, nia tiha Isaia cjiro. ²⁹ Æ yoa pari turita Isaia cjiro ò sehe ni joaa tiha tjoo:

“Mari puhtoro jipihtina bui puhtoro mahainacā mari mehne macainare yuhdoeraro, marine judio masare jipihtinare butichu yoaboa tiro.

Sodoma macainare, Gomorra macaina cūhure to butichu joariro seheta mari cūhure butichu yoaboa tiro”,

ni joaa tiha Isaia cjiro yu coyee Israe masare.

Judio masa noaa buheare cahmaeraha

³⁰ Æ tjira. Æ jina ahrire masi namoga musa: Judio masa jieraina Cohamacu macerapahta tirore bocare. Jesucristore ti wacū tuachu ñuno, “Buhiri marieina, noaina jira”, ni ñure tinare Cohamacu. ³¹ Wiho mejeta judio masa sehe “Cohamacu dutiare mari yochu tiro marine yuhdorohca”, nia Cohamacu Moise cjirore to dutiare yoapahta, bihoerare. Ti ã bihoerachu ñuno, Cohamacu “Noaina jira”, ni ñuerare tinare. Æ jia noaina ji duapahta bihoerare. ³² Ò sehe yoa, tina bihoerare: Tina Cohamacu wacū tuaro marieno ti mu suro Moise cjirore to dutire yoa duamare, to yaina ji duaa. Mari piti dahre buhechu Cristo tāca yoaro sehe jiro jira. Ti mu suro yoainare Cristo puha tu borachu yoari tāca yoaro sehe jiro jira. Muroca wahcāriro sehe tācapu puha tu, bora su caharo to wacū wahcānopure ne suerara. (Puha tu borariro yoaro seheta tina Cristore tāca yoaro sehe jirore cahmaeraina Cohamacu cahapu ne susi.) ³³ Æta ni joaa tiha Cohamacu yare ti joari pui:

“Jerusalē wama tiri macai puha tu borachu yoari tāca yoaro sehe jirore cūja.

Mari piti dahre buhechu ò sehe jira: Muroca wahcāriro tācapu doca wahā su bora su caharo to wacū wahcānore suerara.

Tāca yoaro sehe jirore cahmaeraina sehe tiare puha tu bora, ti wacū wahcānopure ti sueraro seheta Cohamacu cahapu susi.

Wiho mejeta tirore wacū tuaina sehe tiro mehne ā wahcherucuahca”, ni joaa tiha.

10 ¹Yū coyea, Israe masare pichacapū wahaborinare Cohamacū to yūh-dohtore, tuaro yū yajeripohna mehne cahmasāmaja yūhū. ²Ā jicu Cohamacū tinare to yūhdohto cjihtore sini payoja yūhū. ³Tuhsū, tinare Cohamacū to noaina wahachū yoaborire tina tuho űahaerare. ⁴Ā tuho űahaeraa, ti mū sūro noaare yoa duapahta bihoerare. Ti ā yoachū tinare Cohamacū to wacū tua dutiro sehetā ti yoerachū űūno, tiro sehe tinare “Noaina jira”, ni űuerare. ⁵Wiho mejeta Cristore wacū tuaina sehere “Noaina jira”, ni űūna Cohamacū. ⁶Ā jina dutia yoa mehne yūhdueraja mari. Cristo mehne yūhduja.

⁵Moise cjiro panopū macariro ō sehe ni joaa tiha: “Cohamacū to dutirire ne cūno duhsaro marieno mari yoa pahñochū Cohamacū yūhdorohca marine”, ni joaa tiha tiro. ⁶⁻⁷To ā ni joapachūta mipure masa Cristore ti wacū tuachū űūno Cohamacū tinare “Noaina jira”, ni űūna. Tí buhea noaina ti wahachū yoari buhea ō sehe ni yahura: Cristo to basi ahri yahpapū wihi tuhsuri jire. Tuhsū, masa mūja tuhsuri jire. ⁸Ā jina ō sehe ni tuhotuena tjiga mūsa: “¿Diro sehe mūanopū Cristore na tabasaro wahabocari marine to yūhdohto sehe? ¿Diro sehe yariaina cahapū Cristore masobasa na tabocari? Tirore na tabo-riro mariahna”, ni tuhotuena tjiga mūsa. ⁹Ō sehe ni yahura Cohamacū yare ti joari pūi: “Cohamacū ya buheare mari macachū to buhea ōi jira. To buheare masi tuhsura mūsa. ¹⁰Ā yoa to buheareta durucua tire mūsa”, ni joaa tiha. Tí buheare Cristore wacū tuaa buheare masare yahuja sā. ¹¹Tí buhea ō sehe ni yahura: “Jesu mari puhtoro jira”, ni mari yahuchū, “Cohamacū Jesure yariariro cjirore potocāta masore”, ni mari wacū tuachū, Cohamacū marine pichacapū wahaborinare yūhdorohca. ¹²Jesure mari wacū tuachū Cohamacū sehe marine “Noaina jira”, ni űūnohca. Jesure mari wacū tuare painare mari yahuchū tiro marine pichacapū wahaborinare yūhdorohca.

¹¹Ō sehe nina Cohamacū yare ti joari pūi: “Cohamacure wacū tuaina tirore ti wacū tuaa mehne ne cahyasi”, niha Cohamacū yare ti joari pūi. ¹²Judio masare, judio masa jieraina cūhure Cohamacū cūno pitorita yoadohora. Mari puhtoro jipihtina bui puhtoro jira tiro. ¹³Ā jiro tirore to yoadohoare sinii-nare jipihtinare noano waro yoadohorohca tiro tinare. ¹⁴Ō sehe ni joaa tiha panopure: “ ‘Yū buhiri tiare cohābasa, yūhure yūhdoga’, ni mari puhtore masa ti sinichū tinare pichacapū wahaborinare mari puhtoro yūhdorohca”, ni joaa tiha Cohamacū yare. ¹⁵Wiho mejeta masa sehe Cristore wacū tueraa, tirore ā ni sini masierara tina. Tuhsū, to buhea cūhure tuhoeraa, tirore wacū tua masierara. ¹⁶Ā yoa to buheare yahuriro mariachū cūhure tīre tina masisi. ¹⁷Tuhsū, to buheare yahuhtinare Cohamacū sehe to warocaerachū to buheare yahu masierara. ¹⁸Ā ni joaa tiha Cohamacū yare ti joari pūi: “Noa buheare yahuhtina ti tachū noano wahcheja mari”, ni joaa tiha panopure.

¹⁶Tí ā ni joari jipachūta masa payū noaa buheare tuho duaerara. ¹⁷Āta ni joaa tiha Isaia cjiro: “Yū puhtoro, tinare mari yahurire tina ne tuho duaerare”, ni yahua tiha Isaia cjiro Cohamacure. ¹⁸Ā jia masa noaa buheare tuhoa Cristore wacū tuare. Ti tuhoa sehe noaa buhea sehe Cristo ya buhea waro jira.

¹⁸ Ñ jicu ahrire ò sehe ni sinitu ñu duaja masare: ¿Israe masa Cohamacu yare tuhoerari, musa tuhotuchu? Potocâta tina tuhoa waro tuhomare. Ña nina Cohamacu yare ti joari pũ cûhu:

“Cohamacu noa putiariro to jia tiare yahuina jipihtiropu yahu sitea wahare.

Ñ jia jipihtiropu macainapu to yare tuho sahseare”, ni joa tiha panopure. ¹⁹ Pari turi masare ò sehe ni sinitu ñu duaja tjoa: ¿Israe masa tuhopahta noano masierari tina, musa tuhotuchu? Masia timaha tina. Ahrire yahu namocu Moise cjiro to nirire yahu muhtaihtja. Ò sehe ni joa tiha tiro:

“Ò sehe ni yahura Cohamacu Israe masare: ‘Tuho masieraina, ñaina jira’, ni musa ñuina sehere yu yaina cjihti wahachu yoaihtja.

Yu ã yoachu musa sehe tina mehne sua, tinare ñu tuhtinahca.

Ñ yoacu musare suachu yoaihtja yuhu’, ni yahure Cohamacu Israe masare Israe masa jierainare to yaina jichu yoaro taro”, ni joa tiha Moise cjiro. ²⁰ Tuhsu, Isaia cjiro cûhu cuiro marieno ò sehe nia tiha:

“Ò sehe nina Cohamacu: ‘Yuhure macaeraina sehe yuhure bocahre.

Ñ jicu yuhure cahmaerainare tinare yuhure masichu yoahi yuhu’, nire Cohamacu”,

ni joa tiha Isaia cjiro judio masa jierainare. ²¹ Tuhsu, Israe masa sehere ò sehe ni joa tiha Isaia cjiro: “Ò sehe nina Cohamacu: ‘Tina yuhure yuhdurucaina, yuhure cahmaeraina jira. Ñ jicu tinare ti ñaare cahya duticu “Yu yaina wahaga”, ã nirucumai tinare. Wiho mejeta tina sehe yuhure ne yuhti duaerare’, nire Cohamacu”, ni joa tiha Isaia cjiro.

Mahainacã Israe masare pichacapu wahaborinare yuhdorohca Cohamacu

11 ¹ Ñ jiro Israe masare Cohamacu to beseina cjirire cohãno niri tiro, musa tuhotuchu? Jierara. Tinare cohãerare tiro. Yuhu cûhu Israe masuno, Abrahã panamino ji turiaropu jija. Benjami ya curua macariro jija yuhu. ² Panopure Israe masare to ya curua macaina cjihtire Cohamacu besea tiha. To ã beserinare cohãerare. Cohamacu yare ti joari pũ Elia cjiro ya quitire yahura. ¿Elia cjiro Cohamacure sinino, Israe masare to yahusãrire masierajari musa? Ò sehe ni yahusãha tiro: ³ “Yu puhtoro Cohamacu, tina Israe masa mu yare yahu muhtainare wajãre. Tuhsu, tinata paina muhure ño payoa taa, wahiquinare wajã jũ muoa tuhuri cûhure cohãre. Ñ jicu yuhu dihta mu yairo duhsaja mipure. Yu ã jichu tuhoa yuhu cûhure wajã duara tjoa, mipure”, niha Elia cjiro Cohamacure. ⁴ To ã nichu tuhoro Cohamacu sehe ò sehe ni yuhtiha Elia cjirore: “Siete mil waro mua yu yaina jira mipure. Tinare wihboi yuhu. Tina yu yaina sehe Baal wama tiri masure ne ño payoera tire tina. Ñ jicu cuii tjiga muhu”, nia tiha Cohamacu Elia cjirore panopure. ⁵ Tí pjare Elia cjiro to jia tiri pjapure to yaina masare to beseriro sehetã mipu cûhure mahainacã Israe masare to yaina cjihtire besere Cohamacu. Cohamacu tinare cahmano tinare pja ñuno besere. ⁶ Noaare ti yoari wapa tinare besero nierare. Tinare ã cahmano, pja ñuno besere. “Noaare musa yoari wapa musare beseihtja” nino, tiro tinare potocãta pja ñuno nieraboa.

⁷ Ñ yoa ò sehe jira: Israe masa Cohamacu tinare “Noaina jira”, to ni ñuchu yoa duapahta tina cûno pjaerare. Wiho mejeta Cohamacu to basi to beserina

sehe noaina to yaina wahare. Tirore cūno pjaeraina sehe to yare tuho duaere. ⁸ Āta nia tiha Cohamacu yare ti joari pui:

“Cohamacu tirore cahmaerainare to yare tuho ñahaerachu yoare.

Ā jiro potocā jiare ti tuhupachuta tinare ne noano tuho ñahaerachu yoare Cohamacu.

Āta jirucura tina mipu cūhure”,

ni joaa tiha panopure. ⁹ Ā yoa panopu macariro Davi cjiro Israe masa Cohamacure ti cahmaerari buhiri ō sehe nia tiha Cohamacure:

“Tina Israe masa ti bose numuri, ti wahchea numuri ti yuhdoro wato, yurica ñahñoriro to ñano yuhduro seheta tina cūhure ñano yuhduchu yoaga.

Tó sehe yoainare tinare ñano buhiri dahrega muhu.

¹⁰ Tuhsu, mu yahuare tinare ne tuho ñahaerachu yoaga muhu.

Ā buhiri tirucuina ji, ā cahyarucuina jijaro tina”,

nia tiha Davi cjiro Cohamacure.

Judio masa jierainare pichacapu wahaborinare yuhdorohca Cohamacu

¹¹ Ĵudio masa Cristore ti cahmaerachu ñuno, Cohamacu tinare cohāno warota nibocari, masa tuhotuchū? Cohāsi tinare. Ā cohāeraparota tina Cristore ti cahmaerachu mipure judio masa jieraina sehere Cohamacu yuhdorohca. Mipure tinare to yaina jichu yoare Cohamacu. To ā yoachū ñua cāina judio masa sehe tina mehne sua sayo, Cohamacu yainata ji duaahca.

¹² Judio masa ti yuhdurucachu ti noano yoaerachu paina sehere ahri yahpa macainare cāinare Cohamacu yuhdore. To ā yuhdochū tina sehere noano wahare. To ā yoariro yuhdoro, baharo judio masa sehe Cristore ti noano wacū tua ducachu pinihtare ahri yahpa macainare jipihtiropure noaputiaro waharohca.

¹³ Mipure musare judio masa jierainare yahui tai nija. Cristo cūre yuhure judio masa jierainare buhehtiro cjihtore. Ā jia yu dahraa sehe wiho jia jierara.

¹⁴ To cūriro seheta yuhu musare buheja, yu coyea judio masa sehere musare ti ñu cūchu yoa duacu. Cohamacu yuhdorina masa jichū ñua tina cūhu Cristore cahmaa, to yuhdoina wahaboca. ¹⁵ Judio masare cohābo curero, judio masa jieraina sehere noaa buheare Cohamacu yahu dutire. Tí buheare ti tuhori baharo Jesure ti wacū tuari baharo cāina judio masa jieraina, jipihtiro ahri dacho macaina Cohamacu yaina wahare. Ā jiro judio masare to cohābo curechu noano wahare paye yahpari macaina sehere. To ā yoariro yuhdoro judio masa to cohābo cureina cjirire pari turi to yaina cjihti to yoachū pinihtare jipihtinapure ahri yahpa macainare noaputiaro waharohca. To yaina cjihti pari turi ti wahachu, jipihtinapu to yaina yariaina cjiiri sehe pari turi ti masaboro seheta jirohca.

¹⁶ Ō sehe jira: Trigo yubu mehne wahma pāoca ti yoraria Cohamacu yaria cjihto Cohamacure ti wachu, tiare ti yoa duhari yubu cūhu to yariata jira. Tuhsu, yucucu nuhcori cūhu Cohamacu ya nuhcori cjihti jia, tu dupuri cūhu Cohamacu yata jira. Ō sehe mari ni piti dahre buhechu Abrahā sā ñachu cjiro Cohamacu yairo to jiroro seheta to panamana ji turiaianapu cūhu Cohamacu yaina jahca Cristore wacū tuaina jia. Yoa duhari yubu cūhu to yariata jica. Tuhsu yucucu nuhcori cūhu Cohamacu ya nuhcori cjihti jia, tu dupuri cūhu

Cohamacu yata jica. Õ sehe mari ni piti dahre buhechu, Abrahā sā ñachu cjiro Cohamacu yairo to jiroi sehetā to panamana ji turiainaḡ cūhu Cohamacu yaina jira, Cristore wacū tuaina jia.

¹⁷Ti ā jihitina jipachuta cāinare ti coyea sehere judio masare Cohamacu cohāre. Olivo wama tidu ḡḡḡḡre cāa ḡḡḡḡre to ḡḡḡ cohāboro sehetā cāina judio masa sehere Cohamacu cohāre. Ā yucucu ḡḡḡḡre cohāno to cohāri ḡḡḡḡ jiroi cjiroi paye ḡḡḡḡre nucu macadu olivocu ḡḡḡḡre cohtota duhu ōhre. Tō yoaro sehetā Cohamacu ḡḡḡ judio masa jierainare Abrahā panamana ji turiaina cohtotare ḡḡḡ, ḡḡḡ cūhure yūhdoro taro. ¹⁸ḡḡḡ to ā cūchu “Judio masa yūhdoro noaina jija sā”, ni tuhotuena tjiga. Ahrire yu yahutire wacūga ḡḡḡ: Judio masa sehere bese ḡḡḡḡḡ Cohamacu. Ā besero ti coyeiro cjihtore cūha Cristore, ḡḡḡ yūhdoro taro. Ā jina “Judio masa yūhdoro noaina jija”, ni tuhotuena tjiga ḡḡḡ.

¹⁹ḡḡḡ judio masa jieraina sehe ō sehe niboca: “Cāa ḡḡḡ ḡḡḡḡre to cohāboro sehetā Cohamacu cāina judio masare cohāre. Paye ḡḡḡḡre cohtota to ōno sehetā to yaina marine cūno taro ā cohāre tinare”, niboca ḡḡḡ judio masare yūhdurucu duana. ²⁰Ti ḡḡḡ nia potocāta jira. To ā jipachuta tina Jesure ti wacū tuaerari buhiri Cohamacu cohāre tinare. Ā jiro ḡḡḡ cūhure Jesure ḡḡḡ wacū tuaerachu to yaina cjihti ḡḡḡ cūeraboā. Ā jina “Judio masa yūhdoro noaina jija sā”, niena tjiga ḡḡḡ. Ā nieranata “Cohamacu cua pisariro jira”, ni tuhotuga ḡḡḡ. ²¹Olivocu ji ḡḡḡḡ ḡḡḡḡ waro yoaro sehe judio masa sehe Cohamacu yaina ji ḡḡḡḡḡ. To cohtotaa ḡḡḡḡre to ōboro sehetā Cohamacu to yaina ḡḡḡ sehere cohtota cūha. Wiho mejeta to yaina ji ḡḡḡḡḡ judio masa tirore ti wacū tuaerachu, cāinare cohāre. Tinare to cohāriro sehetā ḡḡḡ cūhure cohānohca, tirore ḡḡḡ wacū tuaerachu. ²²Cohamacu ḡḡḡ noano yoiriro to jichu masiga ḡḡḡ. Tuhsu, cua pisaro mehne buhiri dahreriro to jichu cūhure masiga ḡḡḡ. Tirore ño payoerainare tiro buhiri dahrerohca. Ā jiro tirore ḡḡḡ ño payoerachu olivocu ḡḡḡḡ warore to cohāriro cjiro sehetā ḡḡḡ cūhure cohānohca Cohamacu. ²³Ā yoa judio masa to cohābo curerina cjiro Cristore ti wacū tua ḡḡḡḡ ḡḡḡ, olivocu ḡḡḡḡ warore pari turi to duhu ōno sehetā Cohamacu to yaina cjihti yorohca tinare. Cohamacu to ā yoa masihti cjihtireta tuaare cjuara tiro. Ā jiro tiro tinare cāinare to yaina cjihti yorohca. ²⁴ḡḡḡ judio masa jieraina jina, nucu macadu olivocu ḡḡḡḡ yoaro sehe jira ḡḡḡ. Ā jiina ḡḡḡ jipachu olivocu toadui nucu macaa ḡḡḡḡre to na ta ōboro sehetā, Cohamacu ḡḡḡ to yaina cjihti yoahre. To ā yoachu, ne mijoerare tirore. Judio masa Cohamacu to bese ḡḡḡḡḡḡ jira. Olivocu toadu ḡḡḡḡ waro yoaro sehe jira tina. Ā jiro ti jidu waro cjiropure pari turi to duhu ōboro sehetā to yaina cjihti pari turi judio masare to yoachu, ne mijoerara tirore.

Baharo judio masare pichacapu wahaborinare yūhdorohca Cohamacu

²⁵Yu coyea, ahrire masa ti masieraare ḡḡḡ yahuhtja. “ḡḡḡ sā dihtare besere Cohamacu. Cohamacu sā masi yūhdurucu suchu ḡḡḡ, tiro sāre besere”, ḡḡḡ ni tuhotuerahito sehe ahrire yahuhtja ḡḡḡ. Õ sehe jira: ḡḡḡ payu judio masa Cohacure tuho duasi. Wiho mejeta payu judio masa jierainare Cohamacu to quihōriro puro to yaina to yoiro baharo judio masa cūhu tirore cahma ḡḡḡḡḡ. ²⁶Ti ā cahmachu judio masa payu warore

pichacapu wahaborinare Cohamacu yuhdorohca. Cohamacu yare ti joari pui ata ni yahu joaa tiha:

“ ‘Jerusalē wama tiri macai judio masa ya macai tinare yuhdohtiro tarohca.

Jacobo panamana ji turiainare ti ñaa yoari buhirire tiro cohānohca.

²⁷ Tinare yuhdocu panopu tinare yu ni cūriro seheta yoai nija’, nire Cohamacu”,

ni joaa tiha Cohamacu yare ti joari pui.

²⁸ Mipure tina judio masa Cristo yare ño payoeraina Cohamacure ñu tuhtira. Ti ã yoachu mipure musa sehe judio masa jieraina Cristore wacū tua dūcare. Judio masa sehere Cohamacu bese mūhtari jire. Judio masa ñuchū-sūma cjiro to beserina ti jichu mipu jiina judio masa cūhure tiro cahīna.

²⁹ Cohamacu to ni cūriro seheta tinare to beseriro seheta quihōno yorohca tiro. To nirire ne bosī tiro. ³⁰ Panopure musa cūhu Cohamacure yuhdurucari jire. Mipure judio masa Cohamacure ti yuhdurucachu ñuno tiro musa sehere pja ñuno yuhdore. ³¹ Mipure judio masa tirore yuhdurucare. Ti ã yoapachuta Cohamacu musare to pja ñūriro seheta tina cūhure baharopure pja ñunohca. ³² Ō sehe jira: Jipihtina masare “Yuhure yuhdurucaina jira”, nina Cohamacu. ã jiro jipihtina tirore yuhdurucaina ti jichu ñuno jipihtinare pja ñu masina tiro.

³³ Cohamacu tua yuhdurucu suriro jira. Noano masi pahñoriro jira tiro. ã jiro to tuhotuare, to yoirire marine noano masihto basioerara. ³⁴ Ō sehe ni joaa tiha Cohamacu yare: “Cohamacu mari puhtoro to tuhotuare ne masa noano masierara. ã jia masa tirore ‘Ō sehe yoaga’, ni masierara. ³⁵ ã jia masa Cohamacure paye barore ti wari baharo ‘Tiro marine wapamona’, ni masierara masa”, ni joaa tiha panopure. ³⁶ Cohamacu jipihtiare yoaa tiha. Tuhsu, to tuua mehne jipihtiare jisinchu yoara tiro. ã jia jipihitia to ya jira. To ã jiriro jichu jipihitia dachoripe tirore ño payojihna mari. ãta yorarucujihna.

Cohamacu cahmaare marine yorarucu dutiha Paulo

12 ¹ Cohamacu marine tuaro pja ñure. To ã pja ñūriro to jichu ñuna, yu coyēa, musa sehe oveja noarirore ti jū wa mūoriro seheta Cohamacure ti ño payoriro seheta musa cūhu tirore ño payorucuga, to yare musa noano yorarucuhto sehe. Musa ã yoachu, tiro wahcherohca. ãta yaro cahmana marine, Cohamacure quihōno ño payona tana. ã jicu musare tīre tuaro yoa dutija. ² Ahri yahpa macaina ñaare yoaina yaro sehe yoaena tjiga musa. ã yoa musa tuhotuapure Cohamacu noaa tuhotua sehere to cohtota, cūchu, yuhtiga musa. ã yuhtina, noaa sehere tuho cohtotarina jinahca musa. ã yoana noaare, Cohamacu cahmaare, ñaa mariare, potocā jiare masinahca musa.

³ Cohamacu yuhure to yare yoa masichu yoiriro buhe dutiro beseri jire yuhure. ã jicu jipihtina musare ō sehe ni tuhotu dutieraja yuhu. “Noabiaina ji yuhdurucaja sã”, ni tuhotuena tjiga. ã tuhotunocahga. Jesure musa wacū tuari baharo, Cohamacu musa cāinare noaare yoa masihtire to cūchu, “To yoadohoro mehne ahri noaare yoaja”, ni tuhotuina jiga musa.

⁴ Ō sehe ni yahu namoihtja yuhu musare. Mari wamomacari, mari dahpori, mari capari jipihtiro mari pjacui jia payu jira. Mari pjacui jia cū pjacu

jiparota soro jia dahraa cjuara. ⁵Tí jiro sehta soro sehe jia dahraare cūna Cohamacu marine. Ā jina payu masa jipanahta Cristore wacū tuaina jina, to pjacu cū pjacu yaro sehta cū curuata jija mari.

⁶Cohamacu marine to yoadohoro purota to tuaa mehne yoa dutira. Ā yaro marine cāinare soro jia mari yoahtire cūna tiro. To ā yoachu marine to cūrire mari sehe noano yojihna. Ā jia Jesu yaina ō sehe yojaro. Cāinare Cohamacu to yare yahuhtinare cūna. Ā jia tina Cristore ti wacū tuaro puro to yare noano yahujaro. ⁷Cāinare Cohamacu musare yoadohohtinare cūna. Ā jia tina musare noano mehne yoadohojaro. Cāinare Cohamacu musare buhehtinare cūna. Ā jia tina musare noano buhejaro. ⁸Ā yoa paina cūhu musare suho wahchechu yoahtina jia, musare noano suho wahchechu yojaro. Tuhsu, paye barore wahtina jia, ti wahtire noano mehne yajeripohna ti, wajaro. Ā yoa paina cūhu musare suho ji muhtahtina jia, noano mehne suho jijaro. Ā yoa pjacuoinare yoadohohtina jia, wahchea mehne yoadohojaro.

Jesu yaina jina ō sehe yoina jiga

⁹“Sā basi cahma cahīja”, ni mahñono marieno musa basi cahma cahīga. Ā yoana ñaare ñu yabiina jiga musa. Tuhsu, noaa sehere ā cahmarucuga. ¹⁰Tuhsu musa bahana warore musa cahīno sehta Jesu yainare musa mehne macainare cahīga. Ā yoana musa basi noano cahma ño payoga musa.

¹¹Cohamacu cahmaare yoana, ne caparo marieno yoaga. Ā yoana mari puhtoro to dutiro sehta noano wahchea mehne yoaga.

¹²Cohamacu musare pichacapu wahaborinare to yuhdorinapu jira musa. Ā jiro musa wahahto noaputiaro jira. Tíre masina wahchega musa. Ā yoa ñano yuhduna, cūno pjaga “Cristo yare duhuri”, nina. Tuhsu, Cohamacure ā sinirucuga.

¹³Paye baro Jesu yainare duhsachu waga tinare. Ā yoa musa ya wuhusepu cūhure masa ti suchu noano yajeripohna tiro mehne tinare piti bocaga.

¹⁴Musare ñano yoinare “Noano wahajaro tinare”, ni sini payoga. Tinare ā sini payona, “Tina ñano yuhduwahnojaro”, niena tjiga.

¹⁵Ā yoa paina wahcheina mehne jina, musa cūhu tina mehne wahchega. Tuhsu paina ñano cahyaro mehne tiina mehne jina, musa cūhu cahya, tiidohoga tinare.

¹⁶Musa mehne macaina mehne noano jiga musa. Ā jina “Paina yuhdoro noaina jija”, ni tuhotuena tjiga. Ō sehe ni tuhotuga: “Wiho jiina jija”, ni tuhotuga. Ā jina “Masi yuhdurucaina jija sā”, ni tuhotuena tjiga.

¹⁷Paina musare ti ñano yoapachuta, tinare ñano yoa cahmaena tjiga. Noaa sehere yoaga, noaina musa jia tiare jipihtina masa ti masiht cjihtire. ¹⁸Musa bihoro puro jipihtina mehne noano jinocahga musa. ¹⁹Musa yu cahīina, yu coyea paina musare ti ñano yoapachuta tina yaro sehe ñano yoa cahmaena tjiga. Cohamacu sehe musare ti ñano yoari buhiri buhiri dahrejaro tinare. Cohamacu yare ti joari pūi āta ni joaa tiha: “ ‘Yuhu sehe musare ti ñano yoari buhiri buhiri dahreriro jija. Ā jicu potocāta buhiri dahrehtja’, nina mari puhtoro”, ni joaa tiha panopure. ²⁰Ā jina ō sehe yoaga musa: Musare ñu tuhtiro to juca baachu ñuna nuga tirore. To ñahma yapiochu cūhure ñuna tirore sihōga. Musa ā yoachu ñuno musare to ñano yoari buhiri buo tirohca. ²¹Ā jina paina musare ti ñano yoapachuta musa sehe tinare ñano

yoa cahmaena tjiga. Tinare noaa sehere yoaga musa. Ñ yoana ñaa sehere cahmaerana nica musa.

13 ¹Jipihtina musa bui puhtoa cjihtire Cohamacu dihta bese cūna. Ne cūiro puhtoro Cohamacu to bese cūerariro mariahna. To ã cūrina ti jichu ñuna jipihtina musa tinare noano yuhtiga. ²Mari puhtoare noano yuhtierana Cohamacu to bese cūrinare yuhdurucana nija mari. Æ yuhdurucainare Cohamacu sehe buhiri dahrerohca. ³Noainare cuichu yoachtina jierara puhtoa. Ñaare yoaina sehere cuichu yoachtina jira tina. Noaare yoaga musa puhtoare musa cuierahto cjihto sehe. Æ yoana cuisi musa. Noaare musa yoachu puhtoro sehe “Noaare yoare musa”, musare ni ñunohca. ⁴Musa puhtoa Cohamacu to cūno seheta musare yoadohohtinata jira musa noano jinocahto cjihto sehe. Wiho mejeta musa ñaare yoana pini tinare cuiga. Tina musare buhiri dahrehtina cjihtita jira. Jipihtina ñaare yoainare buhiri dahre dutiro Cohamacu tinare besere. ⁵Ti ã buhiri dahrehtina ti jichu ñaare yoana musa puhtoare cuiga. Æ jina ño payoa mehne “Noaare yoaro cahmana yuhure”, ni tuhuturo mehne noano yuhtijihna. ⁶Musa puhtoa ti dahrahti cjihtire Cohamacu cūre. Æ jina ti dahraare ti yoachu ñuna musa puhtoare wapa nabasainare wapara musa.

⁷Jipihtinare musa puhtoare noano yuhtiga. Tuhsu, puhtoare wapa nabasaina cūhure wapaga musa. Æ yoa puhtoa sehe payere ti wapa dutichu cūhure wapaga. Æ jina jipihtina puhtoare noano ño payoga. ⁸Tuhsu, paina masare wapamoena tjiga. Tinare cahīno cahmana. To cahai jiinare cahīro Cohamacu dutiare yoa pahño tuhsuriro jira. Æ jina musa cahai jiina cūhure cahīga. ⁹Õ sehe nina Cohamacu dutia: “Pairo namonore wuana tiena tjiga. Numia cūhu pacoro manunore wuana tiena tjiga. Masare wajæna tjiga. Yacaena tjiga. Paina yare goa pjaena tjiga”, ni yahura to dutia. Paye dutia cūhu jira. Ti Æ jipachuta cūno dutiare musare yahui tai nija. Tí dutia cūno dutia to jipachuta tí dutiare yoana Cohamacu dutiare yoa pahñona nija mari. Tí dutia õ sehe nina: “Mu basi mu cahīno seheta mu cahai jiina cūhure cahīga”, nina. Tí dutiare yoana Cohamacu dutiare yoa pahñoina jina nina. ¹⁰Musa cahai jiinare cahīna, tinare ñano yoasi. Æ jina tinare cahīna, Cohamacu dutiare yoa pahñoinata jira musa.

¹¹Æ jina carīina yoaro sehe jiena tjiga musa. Noano wacū masiga. Jesure noano wacū cohtaga. Jesu marine to tjua ta naahto mahanocā duhsatjiāna. Tiore mari coā wacū tua ducachu Jesu marine to yuhdoro tahto mahanocā duhsamare. Mipu pinihtare cahacā waro jira to tahto. Ahri yu nirire masina musa. ¹²Mipure ñaina ya dacho jira. To tahto mahanocā duhsara. Tíre masina, buhiri tichu yoare, nahitian yoaro sehe jiare duhu pahñojihna mari. Æ jina Cohamacu cahmaa sehere yoajihna mari. Æ Cohamacu yare yoana, ñaare duhu pahñonahca mari. Ahri dachore payu ñaa baro jichu, ñami yoaro sehe jira. Wiho mejeta Cristo to tachu, ñami yoaro sehe jiro pihtia waha, pa dacho, buhria muja taro yoaro sehe waharohca. Surara coma suhtiro to sãa ducataro seheta Cohamacu ñaare to ducataare noano cjuu pahñojihna mari. Æ tíre cjuana ñaare duhu, Cohamacu cahmaa sehere mari yoajihna. ¹³Æ jina Jesu to tahtore wacū cohtaina jina, noaa sehere yoajihna. Bose numurine yoana ñano yoaena tjijihna. Tuhsu, cahaena tjijihna. Æ jina numia mehne ñano yoaina, paina mehne ñano yoaina, cahma sayoina jiena tjijihna.

Musa numia cūhū mua mehne ñano yoaena tjiga. ¹⁴Wiho mejeta Jesucristore puhtoro tina, tirore yuhtiga musa. Ñ yahtina to jiro seheta jiga musa. Ñ jina ñaare musa goa pjaa sehere yoaena tjiga.

Musa coyeare Jesu yainare “Ñano yoa nina”, ni yahuwajaena tjiga

14 ¹Jesure wacū tuarirore to noano wacū tuaro duhsasinichū ñuna tirore ji coaro mehne cahmaga. To ã jirore jichū ñuna “Ne masierara muhū” ni, tiro mehne cahmasayoena tjiga. ²“Jipihtiare chū masija yuhū”, ni tuhotura paina. Paina sehe Jesu yare noano masierasinia wahiquinare chue-raina, toaa dicta dihtare chura. ³Jipihtiare chuina sehe toaa dicta dihtare chuinare ñu tuhtiea tjiaro. Ñ yoa toaa dicta dihtare chuina cūhū jipihtiare chuinare “Ñano yoa nina”, ni cahma yahuwajaea tjiaro. Jipihtiare chuina sehe Jesure wacū tuaina ti jichū Cohamacure tinare to yaina yoa tuhsure. To yaina ti jichū ñua wahiquinare chueraina sehe tinare yahuwajaea tjiaro. ⁴Jesure wacū tuaina Cohamacure dahra cohtaina dihta jira. Ti ã jichū ñuna musa tinare yahuwaja masierara. Jesure wacū tuaina to cahmano sehe ti quihōno yoaerachū ñuno tiro dihta ti puhtoro jiro, tīre yahu poto masina. To cahmaare quihōno ti yochū cūhure tīre yahu masina tiro. Ñ jiro tiro sehe to yainare “Ñano yoa muhū”, ni yahuhtiro jirohca. Ñ jiro tirore dahra cohtainare noa dihtare yorarucu masichū yoiaro jira Cohamacu.

⁵Cāina cāa dachori cua pisaro mehne Cohamacure ti ño payohti dachori cjihtire cjuara. Paina sehe, “Dohse jiri dachore Cohamacure ño payochū, noana”, ni tuhotu, ño payoia jira. Tina cūno potori ã yoaeraina jipahta jipih-tina ò sehe ni tuhotujaro: “Jesu to cahmano seheta noano yoana nija”, ni tuhotu masijaro. ⁶Cūiro cāa dachori cua pisaro mehne Cohamacure ti ño payoa dachorihī Cohamacure ño payoro, tiro cūhū quihōno ño payoro nina. Tuhsū jipihtiare churiro churota, Cohamacure “Noana”, ni wahche payora tiro. Ñ jiro tiro cūhū Cohamacure ño payorota nina. Ñ yoa paiore sehe cāa chūare chuerara, Cohamacure ño payoro. Tiro cūhū Cohamacure “Noana”, ni wahche payora.

⁷Tuhsū, mari cahmaa dihtare yoina ne ji masieraja mari. Cristo jira mari puhtoro. Ñ jiro mari catichū mari yariachū cūhure mari puhtorota jira. ⁸Mipure mari catisinino puro Cristo yare yoahtina jija mari. To yaina jija. Mari yariari baharopū cūhure to yainata jinahca. Ñ jiro mari catichū mari yariachū cūhure Cristo mari puhtoro jira. ⁹Ata jira. Cristo yaria masa mujaha catiinare, ã jichū yariaina cūhure ti puhtoro jiro taro.

¹⁰¿Dohseana tana musa coyeirore Jesu yairore “Ñano yoa nina”, ni yahuwaja duajari musa? ¿Dohseana tana musa coyeirore tu diho cū duajari musa? Mari jipih-tina Cristo panoi mari ducuchū tiro sehe mari yoiare masi pahñonoriro jiro, marine beserohca noainare, ñainare. To ã besehtiro to jichū musa coyeirore “Ñariro jira”, ni yahuwajaena tjiga. ¹¹Cohamacu yare ti joari pūi ò sehe ni joa tiha:

“Ò sehe nire mari puhtoro: ‘Yuhū catiriro jija.

Ñ jicu ò sehe ni quihōno warota yahuja musare.

Jipih-tina yu panoi na tuhcu caha suahca.

Ñ na tuhcu caha su, “Noariro, tuariro jira muhū” ni, yuhure ño payoahca, nire mari puhtoro”,

ni joaa tiha. ¹² Ñ jiro jipihtina mari yoarire Cohamacu siniturohca marine. “¿Dohse yoana ñ yoari?” ni siniturohca. To ñ sinituchu yuhtiro jica marine.

Musa coyeirore ñano yoachu yoena tjiga musa

¹³ Ñ jina mari mehne macainare “Ñaina jira musa”, ni cahma yahuwajaena tjijihna. Ñ yoana mari coyeirore Jesu yairore dojomehnena tjijihna “Jesure wacū tua duhuri”, nina. ¹⁴ Yuhu Jesucristo yairo jicu, ahri yu nihtire noano masija yuhu. Yuhu sehe jipihtia chuare yu chuchu yu churi buhiri, buhiri mariaha. Wiho mejeta paio sehe “Ahri chuare chucu buhiri tii nica yuhu”, ni tuhoturiro sehe churo, potocāta buhiri tiriro jira. ¹⁵ Tí potocā tjira. Paina ti sio, chuera barore musa chuchu ñuno, musa coyeiro ñu cū churo, “Cue, ñano yoai nica yuhu”, ni pjíro tuhotuboca tiro. Tire ñ ñu cū chuchu yoana, tirere cahina nieraca musa. To sio, chuera barore musa chuchu, tiro cūhu ñu cū chuboca. Ñ churo “Ñano yoai nija”, ni tuhoturo Cristore duhuboca. Musa coyeiro yaro jiboriro cūhure yariari jire Cristo. Ñ jina “Cristore duhuri”, nina tire ñu cū chuchu yoena tjiga. ¹⁶ Ñ jia “Ahri sā yoari noa nica”, musa ni tuhotuchu paina musare yahuwajaboca. Ti ñ yahuwajachu ñuna musa ñ yoarire yoa namoena tjiga, “Yahuwaja namori”, nina. ¹⁷ Cohamacu sehe mari puhtoro jira. To ñ jichu mari chua, mari sihnica cūhu ñ jinocaa nina. Wiho warota jira. Ñ jia mari puhtoro to dutiare, noaa cūhure mari yoachu tí waro jia nina. Paina mehne mari noano jinocachu cūhure noaa waro jia nina. Tuhsu, Espíritu Santo yoadohoa mehne mari wahchechu noaa waro jia nina. ¹⁸ Tó seheta Cristo yare yoiroro ñua Cohamacu, masa cūhu “Noano yoare muhu”, niaha.

¹⁹ Tó seheta yoajihna mari pinihta noano mari jinocahto cjihtore, mari basi mari cahma yoadohohto cjihtore. Ñ yoana Jesure wacū tua namonahca. ²⁰ Pairo Jesu yairo to chu dutierari cjiirire musa chuchu ñuno tiro sehe ñu ji coareraro Cohamacu yare cohāboca. Ñ jina tíre chuena tjiga. Potocāta jipihtia chua noaa chuata jira. Tí ñ jipachuta paye barore mari chuchu paio “Ñaa chua jica ahri”, niriro jiparota ñu cū chuboca. Ñ churo ñano yoaro nica tiro. Ñ jina marine to ñu cū chuchu, mari cūhu ñano yoana nija. ²¹ Wahiquina dihire musa chuchu ñuno, vinore musa sihnichu ñuno, paio Jesu yairo “Tíre chucu ñano yoai nica yuhu”, ni tuhoturiro jiparota tiro cūhu ñu cū, chu sihniboca. Ñ ni tuhoturiro pinihta chu sihnino ñano yoaro nina. Ñ jina tiro to ñano yoerahto sehe Jesure to wacū tua duhuerahito sehe wahiquina dihire, vino cūhure musa sehe musa duhuchu noa nina. ²² “Jipihtiare chu masija”, ni tuhotuna, tíre Cohamacu dihtare yahuga. Naare yoareriro, “Noano yoai nica yuhu”, ni tuhoturiro wahcheriro jira. ²³ Pairo sehe “Ahri chuare chucu ñano yoai niboca yuhu”, ni tuhoturiro jiparota tí chuare churo, buhiri tiriro jira tiro. “Ahrirre chucu potocāta noaare yoai nija”, ni tuhotuerara tiro. Ñ ni tuhotueraro tíre churo, to churi buhiri buhiri tira tiro. “Noaare yoai nija”, ni tuhotueraro tíre yoaro, buhiri tira tiro.

Mari cahai jiinare noano yoajihna

15 ¹ Mari Cohamacure noano wacū tuaina sehe wacū tuaera cureinare yoadohojihna. Ñ yoana mari ya cjihti dihtare yoena tjijihna. ² Ñ jina mari cahai jiinare Jesu yainare noano yoajihna ti noano jinocahto cjihtore,

Cohamacure ti noano wacū tua namohto cjihtore. ³Cristo sehe to ya dihtare yoeraha. Āta nina Cohamacu yare ti joari pūi. Ō sehe ni joaa tiha: “Cristo ō sehe nire Cohamacure: ‘Muhū sehere nāno durucuborina yūhū sehere nāno durucure’, nire Cristo Cohamacure”, ni joaa tiha panopure. Ā nāno ti durucuriro jiro Cristo to Pucuro ya sehere yoaro niha. ⁴Panopu Cohamacu yare ti joari pūi tina joaa tiha mari noano buhehto cjihtore. Ā jina tī pūre buhena wahcheja. Ā buhena mari nāno yūhdūna cūno pjana, noano mari yūhduhtore cohtanahca. ⁵Cohamacu musare tuachu yoariro wahchechu yoariro musare jipihinare cūno potori noano jichu yoajaro, Cristo to cahmano seheta. ⁶Āta yoajaro tiro musa jipihitina cūno potori Cohamacure mari puhtoro Jesucristo Pucurore “Noariro, tuariro jira”, ni musa nō payohto cjihtore.

Judio masa jierainare noaa buheare yahu dūcaha

⁷Cristo marine to yoariro seheta musa mehne macainare noano cahma piti bocaga. Musa ā yoachū nūa “Potocāta Cohamacu noariro jira”, ni nūahca masa sehe. ⁸Musare ahrire niita nija: Judio masare yoadohohtiro cjihto taha Cristo. Cohamacu tirore warocaro judio masa sā nūchusuma cjihipure to ni yahuriro cjiro seheta yoaro niha. Tīre to yoari cjihipure masare masichu yoahitiro cjihto taha Cristo. ⁹Masare Cristo to yoadohochu Cohamacu pja nūno nire tinare. To ā pja nūchu judio masa jieraina cūhu Cohamacure “Noariro, tuariro jira” ni, nō payora mipure. Tina cūhure to yaina jichu yoaro taha Cristo. Cohamacu yare ti joari pūi āta ni joaa tiha:

“Cristo ō sehe niha Cohamacure: ‘Judio masa jieraina cahai mūhure
“Cohamacu noariro, tuariro jira”, ni nō payoihtja.

Ā jicu tina cahai basacu mū ya cjihtire basaihtja’, niha Cristo
Cohamacure”,

ni joaa tiha panopure. ¹⁰Tuhsu, ō sehe ni joaa tiha tjoa:

“Cohamacu to beserina judio masa mehne cahma wahcheha musa cūhu
judio masa jieraina”,

ni joaa tiha panopure. ¹¹Tuhsu, ō sehe ni joaa tiha tjoa:

“Judio masa jieraina jipihitina Cohamacure nō payojaro.

Ā jia jipihitiro macaina tirore ‘Noariro, tuariro jira’, ni nō payojaro”,

ni joaa tiha. ¹²Ā yoa Isaia cjiro cūhu ō sehe ni joaa tiha:

“Jesé panamino ji turiariro tarohca.

Ā taro judio masa jieraina bui puhtoro jirohca tiro.

Ā jia tina sehe tirore wacū tuaa, tinare pichacapu wahaborinare to
yūhdohtore masiahca tina”,

ni joaa tiha panopure.

¹³Cohamacu marine baharopu to yūhdohtore wacū cohtachu yoariro noano musare wahchechu yoajaro. Tuhsu, musare Jesure wacū tuainare noano jinochachu yoajaro tiro. Musare to ā yoachū musare to yūhdohtore Espiritu Santo to tuaa mehne wahchea mehne wacū cohta namochu yoajaro.

¹⁴Ahrire musare yu yahuhtire noano masija. Musa sehe noaina jira. Tuhsu, Jesu yare noano masina musa. Ā masina musa basi noano cahma yahu, buhe masina musa. ¹⁵Musa ā masiina musa jipachuta cāa tahari ahri pūpure musare cuirō marieno noano yahu pahñō joahi tīre musa boerahto sehe. Cohamacu yūhure cahñō musare buhe dutiro cūre yūhure. Ā jicu to cūriro

seheta yoaja, msa tíre boerahto sehe. ¹⁶Yuhure to ā cūchu, sacerdote to yoaro sehe yoaja yuhu. Ā yoacu, Jesucristo yare noaa buheare judio masa jierainare buheja yuhu. Yu ā buhechu tuhoa, tina Jesure wacū tuara. Tina Jesure wacū tuainare yuhu sehe sacerdote wahiquinare wajā jū mso Cohamacure yu waboriro seheta, tinare “Mu yaina jira”, nija Cohamacure. Yu ā niinare Espíritu Santo sehe tinare Cohamacu yaina cjihti jichu yoara. Ti ā jiina jichu ñuno, Cohamacu sehe ji coaro mehne tinare ñahanohca.

¹⁷Cohamacu to buhe duti cūriro jicu Jesucristo to yoadohoa mehne yu yoari cjirire wahchea mehne yahuja msare. ¹⁸⁻¹⁹Tuhsu, ahri pinihtare msare pototi yahu duahi. Yu yahua yu mu sūro yu yahua ne jierara. Paina judio masa jierainare Cristo to yoadohoa mehne tinare yu buhechu tuhoa, yu yoarire ñua, ā jia Jesu tuaa mehne yu yoa ñorire ñua, Espíritu Santo to tuaa mehne tina Cristore wacū tuare. Jerusalēpu wahma yu buhe ducari baharo jipihtia macaripepu buhe wahcāhi. Pu Ilirico yahpau cūhure Cristo ya buhea noaa buheare buhei sui. ²⁰Cristo yare masieraina dihtare noaa buheare tuaro buhe duahi, yuhu mehne macaina ti buherinapure buhe duaeracu. ²¹Āta ni joaa tiha Cohamacu yare ti joari pūi:

“Panopu tirore ne tuhoeraina cjiri tirore masiahca.

Ā yoa tirore ne tuhoeraina cjiri to yare noano tuhoahca”,
ni joaa tiha Cohamacu yare ti joari pūi.

Paulo Romapu to wahahtore yahuha

²²Ā jicu jipihtiro macainare buheriro jicu payu tahari msa cahai waha duapaihta waha masiera tihi. ²³Mipu pinihtare ahri yahparipure yu dahraa pihitia wahahre. Ā jicu payu cūhmari msa cahapu waha duariro jicu msa cahapu wahihtja. ²⁴Españapu wahacu, msare tói ñu yuhduaihtja. Ā yoacu msa mehne wahcheihtja. Tuhsu, msa mehne mahanocā yu jiri baharo yuhure msa yoadohoa mehne Españapu yuhdu wahcāihtja. ²⁵Mipure Jerusalēpu wahasinii tai nija. Tó macainare Jesu yainare yu coyeare niñerure naasinii wahi nija. ²⁶Macedonia yahpa macaina, Acaya yahpa macaina cūhu noano mehne Jesu yainare Jerusalēpu jiinare pjacuoinare niñerure waro- cahre tinare yoadohoa. Ā jicu tinare tíre wai wahi nija. ²⁷Tí niñerure waa, noano mehne wahre tina. Ti ā yoachu noa nina, yu tuhutuchu. Tinare judio masa jierainare judio masa sehe Cohamacu yare buhe muhtare. Ā jia tinare to yuhdohto cūhure buhe muhtare judio masa. Ti ā buhechu ñucu Macedonia macaina Acaya macaina mehne judio masare ti yoadohochu noa nina yuhure. Tinare ti buheri wapa yoaro sehe jira tí, yu tuhutuchu. ²⁸Ā jicu Jerusalē macainare tí niñerure wa tuhsucu Españapu wahihtja. Tópu wahacu msare ñu yuhduaihtja. ²⁹Ā yoa msa cahapu yu wahachu Cristo yare msare yu buhechu tiro msare noano yajeripohna tichu yorohca.

³⁰Yu coyea, mari puhtoro Jesucristore wacū tuara msa. Ā yoa Espíritu Santo to tuaa mehne painare cahina msa. Ā jiina jina yuhu cūhure tuaro sini payoga Cohamacure. ³¹Ō sehe ni sini payoga: Judea yahpa macaina Jesure ño payoeraina yuhure ti ñano yoa duachu Cohamacu yuhure to ñu wihbohto sehe sini payoga. Tuhsu, Jerusalē macaina Jesu yainare niñerure yu wabasachu tina tíre wahchea mehne ti ñahahto sehe sini payoga. ³²Msa ā sinichu Cohamacu cahmachu wahchea mehne msa cahapu wahihtja. Ā

jicu mŕsa mehne jicu wahchea mehne soihtja. ³³ Cohamacu marine noano jinocachu yoiaro mŕsa mehne jirucujaro.

Paulo noa dutiha

16 ¹ Mari coyeacoro Febe wama tiricoro mŕsa cahapu waharo taro nina. Ticoro Cencrea wama tiri macai Jesu yainare cahmachuinare yoadohoricoro jira. ² Ā jiro payure yoadohoricoro yuhu cūhure yoadohoricoro jihre ticoro. Tuhsu, mari puhtoro Jesu yacoro jira. Ā jina ticorore noano mehne mŕsa mehne ji dutiga. Tó sehetā yoaro cahmana marine Jesu yainare. Ā yoana ticorore paye baro to maerachu űuna ticorore waga mŕsa.

³ Aquila, to namono Priscila cūhu noajaro. Jesucristo yare yu buhechu tina cūhu yuhu mehne dahrare. ⁴ Tinare mahano wajāmoñore paina yuhure ti wajā duachu ti yoadohori buhiri. Ā jicu tina mehne wahcheja yuhu. Tuhsu, judio masa jieraina Jesu yaina jipihtina tina cūhu tina mehne wahchera. ⁵ Aquila ya wuhui cahmachuina cūhu Jesu yaina noajaro. Yu cahīriro Epeneto cūhu noajaro. Tiro Asia yahpa macariro tói jiro Cristore wacū tua muhtariro jire. ⁶ María cūhu noajaro. Ticoro mŕsa mehne tuaro dahrahe. ⁷ Yu coyea Andrónico, Junia cūhu noajaro. Peresui yu jichu tinata yuhure piti tiina jihre. Ā jia yu pano Cristore wacū tua muhtare tina sehe. Paina Jesu to cūrina sehe tinare “Potocāta noaina jira”, ni durucura.

⁸ Ampliato cūhu yu cahīriro Jesu yairo jira. Tiro noajaro. ⁹ Urbano cūhu noajaro. Tiro cūhu mari mehne Cristo yare dahrahe. Ā yoa yu cahīriro Estaqui noajaro. ¹⁰ Apele cūhu noajaro. Tiro potocāta noano Jesure wacū tuara. To yoirire űuna tīre masija mari. Tuhsu, Aristóbulo ya wuhu macaina jipihtina to namono to pohna cūhu noajaro. ¹¹ Yu coyeiro Herodiō noajaro. Ā yoa Narciso ya wuhu macaina Jesu yaina noa pihtinocajaro. ¹² Ā yoa Trifena, Trifosa cūhu noajaro. Tí numia mari puhtoro Jesu ya dahraare yoara. Mari cahīricoro Pérside cūhu noajaro. Ticoro mari puhtoro yare tuaro yoara. ¹³ Rufo mari puhtoro Jesure noano wacū tuariro, to yare noano yoiaro noajaro. To pocoro cūhu noajaro. Ticoro yu poco yoaro sehe jiricoro jira. ¹⁴ Asíncrito, Flegonte, Herme, Patroba, Herma, paina Jesu yaina tina mehne macaina cūhu noajaro. ¹⁵ Tuhsu, Filólogo, Julia, Nereo, to bahoro cūhu, Olimpa, paina tina mehne macaina cūhu Jesu yaina noajaro.

¹⁶ Ā yoa mŕsa mehne macainare piti bocana, noano mehne piti bocaga. Jipihtina Jesu yaina jipihtiro macaina musare noa dutira.

¹⁷ Yu coyea, mŕsa mehne macaina caina musare cahma űu tuhti, cahma tju wachu yoina jira. Ā jia musare Jesu ya buheare dojomehnena. Ā jina tó sehe yoinare űuna noano yonohbu, “Dojomehneri”, nina. Ā yoinare piti tienā tjiga. ¹⁸ Tó sehe yoina mari puhtoro Jesucristo yare yoerara. űaare ti goa pjaa dihtare yoara. Tuhsu, noano tuho ji coaro dero mahño buhera noano masierainare. Ti ā mahñochu tinare noano tuhora. Ā jina ā yoinare piti tienā tjiga mŕsa. ¹⁹ Musa sehe Jesure noano yuhtiina jira. Tīre jipihtina masina. Ā noano yuhtiina mŕsa jichu wahcheja yuhu. Ā jicu noano mŕsa yoahore mŕsa masichu cahmaja yuhu. Ā yoa ne űaare yoeraina mŕsa jichu cūhure cahmaja yuhu. ²⁰ Ā jiro Cohamacu marine noano jinocachu yoiaro mahanocā baharo watīno Satanare yuhdurucachu yorohca musare. Ā yoa mari puhtoro Jesucristo musare noano wahachu yojaro.

²¹Timoteo yu piti musare noa dutira. Yu coyea judio masa cūhu, Lucio, Jasō, Sosípatro musare noa dutira.

²²Yuhu Tercio ahri pūre Paulore joabasariro jija. Yuhu Jesu yairo jicu musare Jesu yainare noa dutija.

²³Gayo ya wuhui jinocai nija yuhu Paulo. To ya wuhui Jesu yaina cahmachuna. Tiro cūhu musare noa dutira. Ā yoa Erasto ahri maca macaina puh-toare niñerure ñu wihbobasariro musare noa dutira. Mari coyeiro Jesu yairo Cuarto cūhu musare noa dutira.

²⁴[Yu coyea mari puhtoro Jesucristo musare jipihtinare to cahia mehne noano yoajaro. Āta yoajaro.]

Paulo Cohamacure ño payoro joa batoara

²⁵⁻²⁷Mari puhtoro Jesucristo ya buhea mehne noaa buhea mehne Cohamacu musare tirore wacū tua namochu yoa masina. Panopure tí buhea noaa buhea ne masare yahuerari buhea jimaha. Mipure Cohamacu yare yahu muhtaina cjiri ti joari cjiri mehne tí buheare yahua jira. Yuhu cūhu tíreta buheja. Tí buheare Cohamacu ā jirucuriro to yahu site dutiro seheta jipihtiro macainapū mipure masina. Tí buheare tirota yahu dutiha masa tirore yuhti, ti wacū tuahto cjihto sehe. Ā jina tirore “Potocāta noariro, tuariro jira muhu”, ni wahche payojihna. Tiro cūirota Cohamacu dihta noano masi pahñoriro jira. Jesucristo to yoadohoa mehne Cohamacure ā ño payorucujihna mari. Āta yoarucujihna.

1 Corintios

Paulo Cohamacu yainare Corinto macainare joarocaha

1 ¹⁻² Yuhu Paulo, Jesucristo yare buhe duti to cūriro jija. Cohamacu to cahmano seheta Jesu to cūhtiro cjihtore beseri jire yuhure tiro. Sostene wama tiro mehne musare Cohamacu yainare Corinto macainare joarocaja sã. Ahriro cūhu mari coyeiro Jesu yairo jira. Jesucristo mehne macaina musa jichu Cohamacu yaina cjihti beseri jire Jesu musare. ã yoa jipihitina paina mari puhtoro Jesucristore siniina jia, tina cūhu Cohamacu yainata jira. Ti ã jichu Jesucristo sehe mari jipihitina puhtoro jira. ã jina musare jipihitinare joarocaja sã. ³ ã yoa Cohamacu mari Pucu mehne, mari puhtoro Jesucristo mehne musare noa dutija. Cohamacu to yoadohoa mehne noano jiga musa.

Jesucristo sehe musare noano yoabasaha Cohamacure

⁴ Jesucristo yaina musa jiri baharo tiro sehe musare noano yoabasari jire Cohamacure. To ã yoabasachu ñucu, Cohamacure “Noana”, nirucuja yuhu dachoripe. ⁵ Cristo yaina musa jichu ñuno Cohamacu sehe musare noano jichu yoari jire. Tuhsu, to yare musare painare noano yahuhtina cjihtire yoari jire tiro. ã jiro tiro to yare noano masichu yoari jire musare. ⁶ Cristo yare musare sã buheriro seheta ã yoari jire musare, Cristo yaina musa wahachu. ⁷ ã yoa Cohamacu musare noano yoadoho pahñonocanohca. Mari puhtoro Jesucristo ahri yahpapa to tjua tahtore musa cohtaro watoi Cohamacu musare ã yoadohorucurohca. ⁸ Cohamacu musare yoadohorohca to yare musa ne duhuerahito sehe. To ã yoachu musa sehe dachoripe, ahri dacho pihitichupu cūhure ñaa buhiri marieina jirucunahca, Cohamacu to ñuchu. ã jina Jesucristo mari puhtoro to tjua tachupure ñaa buhiri marieina jinahca musa. ⁹ Tíre Cohamacu to niriro seheta tiro yoara. Tiro to macuno mari puhtoro Jesucristo yaina cjihtire marine beseri jire. To ã beserinare Jesu yaina jichu yoare marine.

Jesu yaina Corinto macaina cahmachua cahma sayoha ti basi

¹⁰ Yu coyea, mari puhtoro Jesucristo to dutiro mehne musare tuaro mehne yahui tai nija ahrire: Musa basi cahma sayoena tjiga. ã yoa musa basi cahma tju wa dapo jiena tjiga. Cū curuaihta jiga musa. ã jina jiape ni durucuena tjiga musa basi. ã yoana musa yoahto cjihtore tuhotuna, cūno poterita yoaga musa. ¹¹ Yu coyea, musa basi cahma sayona niyuhca musa. ã ni yahure caina Cloé ya wuhu macaina yuhure.

¹² Caina musa mehne macaina õ sehe ni cahma sayoyuhca: “Paulo ya curua macaina jija sã”, ni cahma sayoyuhca caina musa. ã yoa paina “Apolo ya

curua macaina jija sã”, niyuhca tina cûhu. Paina sehe tjoa “Pedro ya curua macaina jija sã”, niyuhca tina cûhu. Paina sehe tjoa “Cristo ya curua macaina jija sã”, niyuhca tina cûhu. ¹³Musa ã nipachuta Cristo yaina cû curuaihta jija mari. Mari basi cahma tju wa dapo masieraja mari. Cû curuaihta jija mari. Yûhu Cristo jieraja. Tiro yoaro sehe musa ya buhirire crusapû yariariro cjiro jieraja. Tuaa maeraja. Æ jicu wiho jiro jija. Æ yoa musare paio bautisaro, Cristo yaina musa jichû musare bautisari jire. Yû yaina musa jichû sehere musare bautisaerari jire. (Æ jina yûhu sehere ñu wahâena tjiga musa.)

¹⁴Musare, musa mehne macaina cûhure bautisaerahi yûhu. Crispore, Gayo cûhure tina dihtare bautisahi. Paina sehere bautisaerariro yû jichû noana, yû tuhutuchû. ¹⁵Payû masare bautisariro yû jichû “Paul yaina sã jichû bautisare sãre”, ni ñu wahâboa musa yûhure. Æ jicu tíre musa yoachû cahmaeraja. ¹⁶Estéfana ya wûhu macaina cûhure bautisahi yûhu. Tópei-nata bautisahi yûhu. Yû bautisarinare painare wacûeraja yûhu. ¹⁷Cristo yûhure warocaro, masare bautisahtirore cûerare yûhure tiro. Noaa buheare buhehtiro sehere yûhure cûre. Cristo crusapû to yariarire mari buhechû tí buhea marine noaina wahachû yoara. To ã yoapachuta noaa buheare yû mû suro yû buhechû yûhu sehere ñu wahâboa musa. Musa ã ñu wahâna noaa buhea sehere ño payoeraboa musa. Tuhsu noaina wahaeraboa. Æ jicu Jesu ya buheare buhecû yû mû suro yû masia mehne buheraja yûhu.

Cohamacû to tuaa cûhure to masia cûhure cjuariro jira Cristo

¹⁸Pichacapû butihtina sehe Cristo crusapû to yariarire mari yahuri buheare “Tûho masieraina ya buhea jira tí”, nimana butihtina sehe. Mari sehe Cristo to yûhdûchû yohtina cjihti jina ò sehe nija: “Crusapû to yariarire mari yahuri buhea tí waro jia nina. Tí buhea Cohamacû to tuare yahura marine”, nija mari. ¹⁹Cohamacû sehe to yare ti joari pûi ò sehe nina:

“Ahri yahpa macainare ‘Noano masiina jira’, ti niinare ti masia yaba cjihti jierachû yoaihca yûhu”,
nia tiha Cohamacû to yare ti joari pûi.

²⁰Æ jia ahri yahpa macaina noano masiina ti masia yaba cjihti jierara. Sã coyea judio masare buheina cûhu ti masia yaba cjihti jierara. Mipure ahri yahpa macaare durucu sayo mihniina cûhu ti masia yaba cjihti jierara. Ahri yahpa macaina noano masiina ti jipachuta quihõno masieraina ti jirire masichû yoare Cohamacû. ²¹Cohamacû pinihta noano masiro jira. To ã jichû ahri yahpa macaina ti ya masia mehne Cohamacure ne masierara tina. Cohamacû to masi dutieraro seheta ã wahare tinare. Cohamacure cahmaeraina sehe ò sehe nina noaa buhea warore: “Tûho masieraina ya buhea jira”, nimana. Æ jia noaa buheare “Tûho masieraa buhea”, ti nia buheare tûhoa Cristore masi ducara masa. Ti ã masi ducachû Cristore ti wacû tuachû ñuno tinare pichacapû wahaborinare yûhdûchû yoara Cohamacû.

²²Judio masa Cohamacû to tuaa mehne to yoa ñorire ñu duaa nina. Æ yoa griego masa judio masa jieraina sehe noano ti masihtî cjihtire macaa nina. ²³Mari sehe Cristo crusapû to yariarire yahuri buheare buheja mari. Tí buheare judio masa sehe ñu yabira. Æ yoa tí buheare judio masa jieraina sehe “Tûho masieraina ya buhea jira”, ni tuhutura. ²⁴Tí ã ni tuhutupachuta Cohamacû to yaina cjihti to beserina sehe tí buheare ò sehe nina. “Cristo ya

buhea Cohamacu to tuaare, to noano masiare masichu yoara marine”, nina tina ahri buheare. Tina judio masa, judio masa jieraina jipahtha, ã nina Jesu yaina. ²⁵ Cohamacu masi pahñoriro jira. “Tiro tuho masierariro jira”, masa ti ni tuhotupachuta ahri yahpa macaina yuhdoro noano masi pahñoriro jira tiro. Tuhsu Cohamacure “Tuaerariro jira”, masa ti ni tuhotupachuta ti bui tua yuhdurucu suriro jira tiro.

²⁶ Yu coyea, Cohamacu musare to yaina yoachu musa payu wiho jiina musa jirire wacuga musa. Ahri yahpa macainare “Noano masiina”, ti niinare mahainacã Jesu yaina cjihtire beseri jire Cohamacu. Tuhsu puhtoã cûhure mahainacã Jesu yaina cjihtire beseri jire tiro. ã yoa puhtoã pohna cûhure pache pua pohna cûhure mahainacã Jesu yaina cjihtire beseri jire tiro. ²⁷ “Tuho masieraina jira”, ti niinare Cohamacu beseri jire “Noano masiina jira”, ti niina ti buoro wahahto cjihto sehe. Tuhsu “Yaba cjihti jierara”, ti niinare Cohamacu beseri jire, “Wiho jiina jierara”, ti niina ti buoro wahahto cjihto sehe. ²⁸ Masa ti nu yabiinare “Yaba cjihti jierara”, nina masa. Ti ã niri-nare Cohamacu to yaina cjihtire beseri jire tinare. ã besero “Puhtoã waro jira”, ti niinare wiho jiina ti jiare masichu yoari jire Cohamacu tinare. ²⁹ To ã yoachu nua ahri yahpa macaina ne cûiro “Tuariro, noano masiriro jija”, ne ni yuhduruca masierara, Cohamacu to nuhu.

³⁰ Cohamacu sehe marine Jesu yaina jichu yoare. To yaina jina marine to yuhduchu yoari baharo jiphtia dachoripe Cohamacu mehne jirucunahca mari. Jesucristo sehe Cohamacu yare noano masichu yoara marine. Tuhsu mari naa buhirire cohãna. ã yoaro mari naa yoari buhirire cosaro, marine “Noaina jira”, to ni nuhu yoara Cristo Cohamacure. ã yoaro marine pichacpu wahaborinare yuhduchu yoara. ³¹ To ã yoachu Cohamacu yare ti joari pui to ni joariro seheta ã wahara: “Yu mu suro masi pahñoriro jija”, niriro tîre nieno tjijaro. Õ sehe nijaro: ‘Mari puhtoro Cristo sehe marine yuhduchu yoariro jira’, nijaro tiro”, nina Cohamacu yare ti joari pui.

Cristo crusapu to yariarire sã yahuri buhea jira ahri

2 ¹ Yu coyea, musa cahapu sucu “Noano masi pahñoja”, musare ni buhe-rahi. Cohamacu yare musare buhecu, tó sehe ni buhecu nierahi. ² “Õ sehe ni buhehtja”, nicu musa mehne jicu Jesucristo ya dihtare crusapu to yariari dihtare wacucu, tí buheare buhei yuhu. ³ Tuhsu, musa mehne jicu wiho jiriro yoaro sehe jii yuhu. ã jicu Cohamacu yare quihõno buhe duariro jicu cuiriro tetereriro yoaro sehe jii yuhu. ⁴ ã jicu Cohamacu yare buhecu, “Masi pahñoja”, ni buherahi. Mijoa durucua mehne yu mu suro buherahi. To yare yu buhechu Espiritu Santo to tuaa mehne yu buhechu ñure musa. ⁵ Õ seheta ni buhei yuhu musare masa ti mu suro ti buhea sehere musa cahmae-rahto sehe. Cohamacu sehere musa wacû tuahtore ã ni buhei yuhu.

Espiritu Santo sehe Cohamacu to jia tiare buhera marine

⁶ ã jina Cohamacu ya buheare musare Jesure noano masiinare yahuja sã. Masa ti mu suro ti buhea yoaro sehe jierara ahri musare sã buhea. Ti puhtoã ya buhea cûhu jierara. Tina sehe pihtia wahaahca. ⁷ Paina ti masierari cjirire Cohamacu ya durucua cjirire yahuja sã sehe. Panopure ahri buheare Cohamacu yaina cjiri noano masi pahñoerari jire. Ahri yahpa to jihto pano ahri

buhea ti niriro seheta “Āta wahajaro”, ni tuhsua tiri jire Cohamacu. Marine pichacapu wahaborinare to yuhduchu yoahito cjihtore, tiro mehne mari jirucuhto cjihtore, tiro yoaro seheta mari wahahto cjihto cūhure. “Āta wahajaro”, nia tiri jire tiro. ⁸To ā nichu Cohamacure cahmaeraina puhto ne to buheare tuho duaeraa, masierari jire. Tíre noano masia, mari puhtoro Cohamacu masuno warore crusapu cja puha wajäeraboa tina. ⁹Cohamacu yare ti joari tjuí ō sehe nina:

“Jipihitina Cohamacure cahīina ya cjihtire Cohamacu noano cahnobasa tuhsuha.

Noa yuhduara tí to cahnobasari.

Tí to cahnobasarire mari ne ñuerana, tuhoerahi.

Ā jina ‘Ō sehe yoarohca Cohamacu’ ni, dohse masiyu pahñohto basioerara marine”,

nina Cohamacu yare ti joari pui. ¹⁰To ā nipachuta Espiritu Santo Cohamacu yare masichu yoare marine. Jipihitia Cohamacu yare Espiritu Santo masi pahñoa. Ā masino tiro marine tíre masichu yoara.

¹¹Ne paina sehe masuno to masiare masierara. Wiho mejeta masuno sehe to basi to wacūapu to tuhotuare masina. Tó seheta paina Cohamacu to masiare ne masierara. Cohamacu to Espiritu Santo dihta to masiare masina, masuno to basi to tuhotuare to masino seheta. ¹²Ā yoa mari sehe Jesu yaina jina masa ti mu suro ti buheare cjuaraja. Cohamacu to Espiriture ware marine masichu yoaro taro. Tiro marine to noano yoahito masichu yoara Espiritu Santo sehe. ¹³Cohamacu yare musare buhena, masa ya masia mehne sā mu suro buheraja sā. Espiritu Santo to buhea sehere musare buheja. Ā buhena Espiritu Santore cjuainare Cohamacu yare noano buheja sā.

¹⁴Espiritu Santore cjuaraina sehe Espiritu Santo yare ne cahmaerara. “To ya wiho warota jira”, nimana tina. Espiritu Santo to yoadohoro marieno ne to yare masihto basioerara masare. Ā jia tina to yare ne masierara. ¹⁵Espiritu Santore cjuaina sehe Cohamacu yare noano masina. Ā jia jipihitiare noano bese masina. Paina sehe tinare “Noaina jira. Naina jira”, ni bese masierara Espiritu Santore cjuainare. ¹⁶Ō sehe nina Cohamacu yare ti joari pui: “Mari puhtoro Cristo to tuhotuare masiina ne mariaha. Ā yoa tirore masa ne ‘Ō sehe yoaga’, ni masierara”, nina to yare ti joari pui. Mari sehe Cristo yaina jina, Cristo yoaro seheta masija mari.

Jesu yaina cūno potori Cohamacure dahra cohtaina jira

3 ¹⁻²Yu coyea, musare buhecu Espiritu Santore noano yuhtiinare yu buhe-riro seheta buhe masierahi musa sehere. Cristo yaina jipanahta, wihānacā ti wahiquiro dihirore ti chu masierariro seheta Cohamacu yare noano masierare musa. Mipu cūhure noano masierasiniyuhca musa. Ā jina wihānacā pēchore ti pūno seheta mijoera curea buhea dihtare tuhoyuhca musa. Ā jicu tó sehe jia buhea dihtare buhei musare. Cristo yaina jipanahta wihānacā ti chu masierariro seheta Cristo yare noano masierayuhca musa. ³Musa sehe musa mehne macainare ti noano wahachu ñuna ñu tuhtina, cahmachena, musa basi cāa curuari tju waracu suna, Espiritu Santore cjuaraina yoaro sehe yoana niyuhca musa. Ā yoana ahri yahpa macaina Cristore cahmaeraina yoaro sehe yoayuhca musa. ⁴Ō sehe niyuhca musa: “Paulo mehne macaina

jija sã”, niyuhca cãina musa. ã jia paina musa mehne macaina sehe “Apolo mehne macaina jija sã”, niyuhca. Musa ã ni durucuna Espiritu Santore cjuæ-raina yoaro sehe ni durucuna nica musa.

⁵ ¿Yuhũ Paulo, Apolo mehne dohse yoahtina cjihti jijari sã, musa tuho-tuchũ? Õ sehe yoahtina jina nija sã: Cohamacũ to dutiriro seheta tirore dahra cohtaina wiho jiina jija sã. ã jina musare sã buhechũ tuhona Jesucristore wacũ tua ducare musa. ⁶Noaa buheare buheina wesepũ dahraina yoaro sehe jira mari piti dahre buhechũ. Wese puro to toa muhtariro seheta yuhũ cũhu musare buhe muhtahi. Tuhsũ, paio wesere to cure nunũ tiroro seheta Apolo sehe yũ baharo musare buhe namo nunũ tire. Sã ã buhepachuta wese macaa toaare bucua namochũ to yoariro seheta Cohamacũ sehe musare to yare masi namochũ yohare. ⁷ã jicu yuhũ buhe muhtariro jipaihta wiho jiriro jija. ã jiro Apolo yũ baharo buhe nunũ tiroro cũhu wiho jirirota jira. Cohamacũ pinihta toaare to bucua namochũ yoariro seheta to yainare tirore masi namochũ yoara. ã jiro Cohamacũ sehe wiho jiriro jierara. ⁸Toa muhtariro, baharo cure nunũ tiroro cũno potori dahra cohtaina wiho jiinata jimana tina. ã jia ti dahrariro purota wapatarã tina. Tó seheta jija sã, Apolo mehne. ⁹ã jina sã Cohamacũ yare dahra cohtaina jija. ã yoa Apolo yũ piti jira. Sã ã jichũ musa sehe Cohamacũ ya wese yoaro seheta jira. Musa ã jichũ Cohamacũ wese macaa toaare to bucua namochũ yoariro seheta musare to yare masi namochũ yoarohca tiro.

ã yoa Cohamacũ musare to yainare noari curua yoaro nina. ã jina tãa mehne ti yoari wuhũ yoaro sehe jira musa to ya curua macaina mari piti dahre buhechũ. ¹⁰Musa ã jichũ Cohamacũ yuhure to dutiriro seheta yuhũ sehe wuhũ dahre mihñiriro tãare to cũ muhtariro seheta Jesucristo yare musare buhe muhtai. ã jiro tí tãa bui paio to yoa namo mujariro seheta paio yũ baharo buhe namo nunũ tiro nina. ã buhe namono noano yoaro cahmana. Ne papero marieno noano buhejaro tiro. Cristo ya dihtare buhejaro tiro. ¹¹Wuhure ti dahre dũca ti cũ muhtari tãa yoaro sehe Cristo jira. ã jina tí tãare sã noano cũ muhtariro seheta Cristo yare buhe tuhsui. Pairo ya buhea sehere mari buhechũ tó wahaerara. ¹²⁻¹⁵Uru mehne, plata mehne, wapa bujua tãa mehne mari yoari wuhure mari jũ ñuchũ jüerara. Tó seheta Jesucristo yare mari noano yoari baharo pihtiri dacho jichũ Cohamacũ mari yoirire to jũ ñũno seheta yoirahca mari yoirire masino taro. Tó sehe to yochũ noari wuhũ to jüerariro seheta mari yoirire ti noaa jichũ masinohca. ã yoaro mari noano yoirina mari jichũ masichũ yoirahca tiro. Noare mari yoiri wapa noano yoirahca marine. Yucuri mehne, tja mehne, ñaia pũri mehne mari yoiri wuhure mari jũ ñuchũ jüa waharohca. Tó seheta Jesucristo yare mari noano yoaerari baharo pihtiri dacho jichũ, Cohamacũ mari yoirire jũ ñũno sehe yoirahca mari yoirire masino taro. Tó sehe to yochũ ñari wuhũ to jüa wahariro seheta mari yoirire ñaa ti jichũ tiro masinohca. ã yoaro mari noano yoaeraina mari jichũ marine masichũ yoirahca tiro. Noano yoaeraina mari jichũ ñũno noare mari yomari wapare noano yoasi. Tó sehe jiinare Cohamacũ yuhdũchũ yoirahca. To ã yuhdũchũ yopachuta tó sehe noano yoaeraina mahanocã cohõbo cure yuhdũahca.

¹⁶Musa sehe Jesu yaina Cohamacũ ya wuhũ yoaro sehe jira. Musa ã jichũ ñũno tí wuhũ to jiboro seheta Espiritu Santo sehe musa mehne jira. ¿Tíre

masierajari musa? ¹⁷Cohamacu ya wuhu ñaa marieni wuhu jira. Ñ jina musa cūhu tí wuhu yoaro sehe jina to yaina warota jira. Ñ jiro to yainare cūiro to dojomehnechu Cohamacu pichacapu cohānohca tiro sehere.

¹⁸Mahñoare tuhotuena tjiga musa. “Mipu macaina ya masiare noano masija”, ni tuhoturiro musa mehne macariro jiro Jesu ya sehere noano masijaro. To ã masichu ñua paina tirore “Tuho masierariro jira”, niahca. Ñ jiro Jesu yare masino, potocāta noano masiriro waharohca. ¹⁹Masa ti mu suro ti basi ti masiare “Wiho warota jira”, ni tuhotura Cohamacu. Ñta nina Cohamacu yare ti joari pūi: “Ti mu suro masiina ti masia yaba cjihti jierara Cohamacu to ñuchu. Ñ jiro ti yoa duaare ducatarata tinare”, nina Cohamacu yare ti joari pūi. ²⁰Ñ yoa pa pūpu ò sehe nina: “Masa ti mu suro masi pahñoina ti tuhotua yaba cjihti ti jierachu masina mari puhtoro Cohamacu sehe”, nina Cohamacu yare ti joari pūi. ²¹⁻²²Ñ jina “Sã mu suro yoahi”, ni masieraja mari masa jina. Ñ jina yuhu Paulo, Apolo, Pedro mehne sã jipihtina Cohamacu musare to yoadoho dutiina jina, musare dahra cohtaina jija sã. Jipihtia musa ya jira. Cohamacu to bajuamehnerire, catia cūhure ware musare. Tuhsu, pichacapu wahaerachu yoarohca musare. Mipu jiare baharopu jihti cūhure musare warohca. Ñ jia jipihtia musa ya jira. ²³Ñ yoa musa sehe Cristo yaina jira. Cristo sehe Cohamacu yairo jira.

Cristo to yare buhe duti to cūrina ti dahraare yahuha Paulo

4 ¹Ñ sehe ni tuhotuga musa yuhure Apolo cūhure: “Tina sehe Cristore dahra cohtaina jira. Ñ jia masa ti masierari cjirire Cohamacu yare buheina jira”, ni tuhotuga musa sãre. ²Dahra cohtaina ti puhtoro to dutiro seheta yoa cohtara. ³Wiho mejeta yuhure musa yahuwajapachuta ã tuhotunocaja yuhu. Paina puhtoa yuhure ti yahuwajachu cūhure ã tuhotunocaja yuhu. Yu yoaare ñua “Ahri noaa jira. Ahri ñaa jira”, ni masierara musa. Yuhu cūhu masunota jija. Ñ jicu yu yoaare noano masi pahñoeraja yuhu cūhu. ⁴“Cristo yare yu yuhdurucari yuhure mariahna”, ni tuhotumaja yuhu. Yu ò sehe ni tuhotupachuta buhiri tia jisiboca yuhure. Mari puhtoro Cristo dihta yu yoaare ñua, noano masina. ⁵Ñ jina mari puhtoro to tjua tahto pano masare ñua ni yahuwajaena tjiga musa. Tiro tjua taro masa ti yoirire, panopu paina ti masierari cjirire Cristo masichu yoarohca. Ñ jiro mari yoa duarire, mari tuhotuare tiro masichu yoarohca. Ñ yoaro to yare yoinare Cohamacu “Noano yoare musa”, ninohca.

⁶Yu coyea, yuhu Apolo mehne sã buheri cjirire yahuhi yuhu musare buhecū tacū, sãre musa ñu cūhto sehe. Ñ yahuhi yuhu Cohamacu to yare ti joari pūi to niriro seheta quihōno musa yorucuhto sehe. Ñ yoana musa mehne macainare cūno potori ño payoga. Cūiroreta ño payoena tjiga. ⁷Musa sehe paina yuhdoro noaina jierara. Masi yuhdurucaina jierara musa. Cohamacu musare to wari cjiri dihtare cjuara musa. Ñ cjuana musare to yahuri cjiri dihtare masina musa. ¿Musa mu suro cjuaina, musa mu suro masiina jierapanahca, dohse yoana “Masi pahñoina jija”, nijari musa? Ñ nina “Sã mu suro masija sã”, niborina seheta yoara musa.

⁸Musa sehe “Cohamacu yare masi pahñoja sã. Sãre yaba waro dūhsae-rara”, nimana musa. Tuhsu, musa cahai sã jierachu musa ò sehe ni tuhotu-mana: “Puhtoa yoaro sehe masiina jija sã”, ni tuhotumana musa. Potocāta

Cohamacure masi pahñoina puhtoa yoaro sehe masiina musa jichu musare noabiaboa. Musa ã jichu musa mehne sã cûhu puhtoa yoaro sehe masiina jiboa.

⁹ Õ sehe ni tuhotuja yuhu pinihta: Sãre Jesu to yare buhe dutiro cûno, masape doca macari curua cûre sãre. Paina ti wajãhtina yoaro sehe ñuna masa sãre. Ahri yahpa macaina masa, anjoa cûhu wapanañoina yoaro sehe ñuna sãre. ¹⁰ Cristo yare sã buhechu ñua “Tuho masieraina jira”, ni ñuna masa sãre. ã jia Cristo yare sã yoachû ñua, sãre ñu tuhtira. Musa sehere ñua, “Noano masiina jira”, ni tuhutumana masa. “Cohamacure wacû tuae-raina jira”, ni tuhutumana masa sãre. Musa sehere ñua, “Noano wacû tuaina jira”, ni tuhutumana tina. Musa sehere masa ño payora. Sã sehere tina ne ño payoerara. ¹¹ Sã sehe mipure ñano yuhduina, juca baaina, ñahma yapioina, ñano suhti maeraina, wuhuse maeraina jija. Tuhsu, paina sãre ño payoeraa, sãre ñano yoara. ¹² Æ yoa sã tuaro dahraja. Tuhsu, paina sãre ñano ni ti durucupachuta sã sehe tinare “Noano jiga”, nija sã. Æ yoana paina sãre ñano ti yoapachuta ã tuhutonocaja sã. ¹³ “Nano yoaina jira”, sãre ti nipachuta sã sehe noano mehne tinare yoaja. Panopu, mipu cûhure ñaa wete tiina yoaro sehe masape curuari doca macari curua yoaro sehe ñuna masa sãre.

¹⁴⁻¹⁵ Musare noaa buheare buhe muhtacu musa pucu yoaro sehetã wahai yuhu. Payu musare Cristo yare buheina ti jipachuta musare buhe muhtariro cûirota jija yuhu. Æ jiro jicu musare buo tichu yoai tai ahrire joai nieraja yuhu. Yu pohna warore, yu cahîinare yu dutiboriro sehetã musare noano mehne duticu tacu ahrire joaja yuhu. ¹⁶ Æ jicu ahrire musare tuaro mehne dutii tai nija yuhu. Yuhure ñu cûga musa.

¹⁷ Ahrire yoa duticu tacu musa cahai Timoteore warocahi. Tiro yu cahî-riro mari puhtoro Jesu yairo jira. Æ jiro Cristo yare yoarucura tiro. Cristo yare mari yoahtire jipihtina Jesu yaina cahapu buhei yuhu. Timoteo tíre musare wacûrucuchu yorarohca. Æ jicu Cristo yare yu yoiro sehetã musa ñu cûhto sehe Timoteore warocahi yuhu. ¹⁸ Timoteore yu warocachu cãina musa mehne macaina puhtoa ji duaina õ sehe nimana: “Paulo marine cuíro, mari cahapu tasi”, ni tuhutumana tina. ¹⁹ Cohamacu cahmachu musa cahapu michapucacãta suihca. Æ sucu puhtoa ji duinare musa mehne macainare ti durucua quihõno jichu masihtja yuhu. Æ yoa Cohamacu tuaare potocãta ti cjuachu cûhure masihtja yuhu. ²⁰ “Cohamacu sã puhtoro jira”, mari ni yahupachuta to yare mari yoaerachu tí mari ã nimari cjiri yaba cjihti jierara. Cohamacu to tuaa mehne to cahmano sehe yoa masija. Tí pinihta wiho waro jierara. ²¹ ¿Musa cahapu musare buhiri dahrehtiro musare tuhtihtiro yu wahachu cahmajari musa yuhure? ¿O musare cahiro musare wahchehtiro yu wahachu cahmajari musa yuhure? ¿Dohse jiro yu wahachu cahmajari musa?

Corinto macaina ti wuana tirire yahuha Paulo

5 ¹ Potocãta õ sehe quiti tira sãre paina: Cûiro musa mehne macariro to pucuro namonore wuana tiyuhca. Æta ni yahura masa sãre. Paina Cohamacure cahmaeraina jipahta tina sehe tó sehe yoaina jierara. ² Musa mehne macariro to ã yoapachuta musa sehe “Quihõno yoana nija sã”, ni tuhutu-mana. ¿Dohse yoana to ñaa yoirire masipanahta cahyaerajari musa? Æ jina

ã ñano yoiriروه musa mehne Jesu yaina mehne jiriروه cohã wioboa musa. ³Yũhũ musa mehne jierapaihta yũ wacũapũ musa mehneta jija yũhũ. ã jicu musa mehne jicu yũ niboriro seheta ñano yoiriروه to ã ñano yoiri buhiri buhiri dahre duti tuhsũja yũhũ. ⁴Jesu to dutiro mehneta ã yoa dutija. ã jina musa cahmachuna yũ wacũa mehnepũ musa mehne yũ jichũ to pũcũro namono mehne ñano yoiriروه cohã wiona, mari puhtoro Jesu to tuaa mehne õ sehe niga ñano yoiriروه: ⁵“Watĩno to cahmano seheta muhure yoawahno-jaro”, niga tiروه. ãta niga tiروه ñaare to goa pjari cjirire to duhuhto sehe. Musa ã cohãchũ tiro ñano yũhdurohca. Mari puhtoro Jesu to tjua tari dachoi ñano yoiriروه cjiro Jesu mehne to noano yũhduhto sehe mipũre tiروه ã niga.

⁶“Quihõno yoana nija sã”, nipanahta ñano yoana nica musa. Ñano yoiriروه musa ã ñunocahna, tí ñaare musa jipihtina piha pihtia wahanahca. Pão bucuaro trigore to noano sãarũcu suriro seheta tí ñaa musare piha, noano sãarũcu sua waharohca. ¿Tĩre masierajari musa? ⁷Yũ coyea judio masa pascua jichũ ovejare wajã, jũ muo, Cohamacure ño payora. Tó seheta oveja to yariariroh seheta Cristo mari ñaa buhirire yariari jire. To ã waharire masina, musa sehe ñano yoiriروه musa mehne macariروه cohã wioga tí ñaa musare to pihaerahto sehe. Musa ñaa yoiri buhirire cohã tuhsũre Cristo. ã jina ñano yoiriروه cohã wioga “Tĩ ñaare pihari”, nina. ⁸Pão bucuaro trigore to sãarũcu suriro seheta panopũ ñaare ñũ cũ yoa pihtina jimai mari. ã jina pascua bose numũrihi pão bucuaro marieno pãore ti chũriroh seheta mari cũhũ ñaare goa pjaro marieno ñano yoiriروه marieno jijihna. Panopũ mari ñaare mari yoa tiriro sehe yoaena tjijihna. ã yoana potocã noano tuhotua mehne, noano yoina jijihna.

⁹Musare yũ joarocari pũpũre Jesu yairo jiparota ã wuana tirucuriروه ne piti ti dutieramahi. ¹⁰ã nicu numia mehne ñano yoinare, mua mehne ñano yoa numiare, paina yare goa pjainare, yacainare, “Cohamacu jira”, ti nia masurine ño payoinare Jesu yaina ti jierachũ “Tina mehne jiena tjiga”, nieraja. Ahri yahpai tó sehe jiina marieno Jesure cahmaeraina marieno mari dihta ji masieraja. Jipihtiropũ jira tina sehe. ¹¹ã jicu musare joarocacũ õ sehe yoa dutimahĩ: Musa mehne macariroh “Jesu yairo”, ti niriro to jipachuta numino mehne ñano yoiriروه, paye barore goa pjariroh, “Cohamacu jira”, ti nia masurine ño payoriro, ñano quti dahrerucuriroh, cahariroh, yacariroh to jichũ tiروه piti tiena tjiga. ã jina tó sehe yoiriroh mehne pinihtare chuena tjiga. ¹²Jesu yaina jierainare ti ñaa yoiri buhirire ne buhiri dahre dutiro jieraja yũhũ. Tó sehe buhiri dahre dutiro jira Cohamacu sehe. Yũ ã nipachuta musa mehne cahmachuina Jesu yaina musa basi musa yoiriروه ñũna masino cahmana musa sehere. ã tuhotunocaeraro cahmana. ã jina musa sehe tina ti ñano yochũ ñũna buhiri dahrega tinare. ¹³Jesu yaina jieraina sehere Cohamacu sehe buhiri dahrerohca. ã jina musa sehe musa mehne macariروه ñano yoiriروه cohã wioga.

Jesu yainare ti basi ti yahusaĩrire yahuha Paulo

6 ¹¿Musa basi cahma ñũ tuhti yahusã duana dohse jiro baro Jesu yaina jieraina cahapũ musa coyeare Jesu yainare yahusãna wahajari? Jesu yainare musa mehne macainare yahusã duana paina Jesu yaina sehere tĩre yahuro cahmana musare. ã jia Jesu yainapũ besejaro. ²Pihtiri dacho jichũ

mari Jesu yaina sehe masa jipihitina ti yoarire ñuna “Ahri ñaa jira. Ahri noaa jira”, besenahca mari tinare. ¿Tíre masierajari musa? Ñ jina pihtiri dacho jichu masa jipihitinare besehtina jina, mipu cūhure bese masija mari. Ñ jina mipure wiho jiacā buhiri cūhure bese masija mari. ³ Anjoa ti yoarire ñuna tina cūhure besenahca mari. ¿Tíre masierajari musa? Mari ñ besehtina jina potocāta tí yuhdoro mipu cūhure Jesu yaina ti yoarire ñuna bese masija mari. ⁴ ¿Ñ jina dohse yoana musa mehne macainare yahusā duana mari mehne jieraina cahapu Jesu yainare yahusāna wahajari musa? ⁵ Ahrire nii nija musa quihōno yoarerire musa cahyahto cjihtore. ¿Musa mehne macainare musa cahma sayochu musare yahuhtiro musa mehne macariro noano masiro mariajari? Jira. ⁶ To ñ jipachuta musa mehne macariro Jesu yairo paio Jesu yairore yahusā duaro Jesure cahmaerainare yahusāno wahara.

⁷ Masare beseina puhtoare musa mehne macainare yahusāna Jesu yaina jipanahta quihōno yoerara musa. Pairo musa mehne macariro musare ñano to yochu ñ ñnocaboa musa. Jesure cahmaerainare musa yahusāhto pano musa coyeirore musa ñ ñnocachu noabiaboa. Jesu yairo musare to yacachu tirore musa yahusāhto pano tiro to yacarire musa ñ ñnocachu noabiaboa. ⁸ Ñ yoaborina jipanahta paina musa mehne macaina Jesu yaina ti jipachuta tinare ñano yoina, yacaina jira musa.

⁹⁻¹⁰ Tó sehe yoina puhtoro Cohamacu to suho jiropure muanopure waha masierara. ¿Tíre masierajari musa? Mahñoare tuhoutuena tjiga musa: Wuana tiina, “Cohamacu jira”, ti nia masurine ño payoina, numia mehne ñano yoina, mua mehne ñano yoaa numia, mua sahsero ti pjacuri mehne ñano yoina, numia sahsero ti pjacuri mehne ñano yoaa numia, yacaina, paina yare goa pjaina, cahaina, masare ñano tuhtipeina, masa ti cjuaare maina baro ne Puhtoro Cohamacu to suho jiropure muanopure waha masierara. ¹¹ Panopure musa cūhu tó sehe yoina tjimahre. Ñ yoamarina musa jipachuta mipure musa ñano yoi buhirire cosa tuhsuri jire Jesucristo sehe. Ñ to cosarina musa jichu to yaina cjihtire yoare Cohamacu musare. Ñ youro “Noaina jira”, ni ñuna musare tiro. Ata yoare musare mari puhtoro Jesucristo, Espíritu Santo cūhu ti tuaa mehne.

Mari pjacuri Cristo ya pjacuri jia nina

¹² “Yu cahmano sehe yoa masija yuhu”, niyuhca cāina musa. Tí potocā to jipachuta tíre yoacu noano jieraboca yuhu. Yu cahmano sehe yoa masija. Ñ yoa masipaihta cāa tahari ñ yoiro jicu tíre duhu masieraboca yuhu. Ñ jicu tíre pari turi yoasi yuhu, “Tíre duhu masieraboca”, nicu. ¹³ Ñ sehe nina musa: “Jipihitia chua mari pjaro macaa cjihti jira. Tuhsu mari pjaro chua posa tihti pjaro jira”, nina musa. Tí potocā tjira. Ñ jiparota baharo Cohamacu sehe mari chuare mari pjaro cūhure ti pihtia wahachu yoarohca. Ñ jia mari chua wiho warota jia nina. Chua mari pjaro macaa cjihti jira. Ñ jiparota mari pjacuri numino mehne ñano yoahti pjacuri jierara. Mari pjacuri sehe mari puhtoro Cristo ya pjacuri cjihti jia nina. Ñ jiro mari puhtoro sehe mari pjacurire noano yoahti tiro jira. ¹⁴ Cohamacu to tuaa mehne mari puhtoro Cristore masori jire. Ñ to yoiro seheta mari cūhure masonohca tiro.

¹⁵ ¿Ñ jina musa pjacuri Cristo ya pjacuri ti jichu masierajari musa? ¿Ti ñ jichu Cristo ya pjacu mehne ñano yoiarico mehne mari ñano yochu noajari,

musa tuhotuchu? Noaerara. ¹⁶Ñano yoaricorore ñahariro to pjacu sehe ticoro ya pjacu mehne jiro, cū pjacu yoaro seheta jira. ¿Tíre masierajari musa? Áta ni joaa tiri jire Cohamacu yare ti joari tjui: “Tina puaro jipahta cū pjacu yoaro sehe wahara”, ni joaa tiri jire. ¹⁷Mari puhtoro to yaina mehne jira. Á jiro Jesu yairo Jesu mehne puaro jipahta cūno potori tuhotuina cūirota ti jiboro seheta jira.

¹⁸Á jina numia mehne ñano yoaare, mua mehne ñano yoaare goa pjaena tjiga. Tíre musa yabiro seheta tíre yoaena tjiga. Paye ñaare mari yoana mari pjacure dojomehneraja. Numino mehne ñano yaro sehe to pjacure ñano dojomehnena. ¹⁹Espíritu Santore marine ware Cohamacu. Á jiro mari mehne jiro nina Espíritu Santo sehe. ¿Tíre masierajari musa? Á jia musa pjacuri musa catia cūhu musa ya cjihti waro jierara. Cohamacu yaina cjihti waro jira musa. ²⁰Musa ñaa buhirire buhiri dahre tuhsure Cristore. Á jina to yaina cjihti waro jira musa. To yaina jina musa pjacuri mehne Cohamacu to cahmano sehe yoaga. Á yoana Cohamacure ño payona nina musa.

Namo tiare yahuha Paulo

7 ¹Mipure yuhure musa sinitu musa joarocari cjirire yuhu cūhu yuhti cahmai tai nija: Masūno namo tierachu cūhure, noanocahna, yu tuhotuchu. ²Tí á jipachuta mua sehe namo tijaro paina numia mehne ti ñano yoaerahto sehe. Á jia numia cūhu manu tijaro paina mua mehne ti ñano yoaerahto sehe. ³⁻⁴Manu tiricoro to pjacu to ya pjacu dihta jierara. To manu ya pjacu cūhu jira. To manu cūhu to pjacu to ya pjacu dihta jierara. To namono ya pjacu cūhu jira. Á jina musa mua sehe musa namo-sānumiare noano cjuaga. Á yoa musa numia cūhu musa manusumare “Yu pjacure pihaecu tjiga”, niena tjiga. ⁵Wiho mejeta Cohamacure puaro musa sini duana “Mahaa dachoricā mari basi jiena tjiijhna. Cohamacure sinijihna”, cūno potori á nina, musa basi wahā duhu masina musa. Musa á duhuri baharo musa jiriro seheta jirucuga tjoa, Satana ñano musare to yoa dutie-rahto sehe. “Paina mehne ñano yoaboca” nina, musa basi piti ti duhuena tjiga. Musa jiriro seheta jirucuga tjoa.

⁶Ahrire musare mipu yu niri cjirire yahucu musare dutia waro mehne nieraaja. Á yahuta nija musa yoahtore musa masihtore sehe. ⁷Jipihtina musa yu yoaro seheta namo tieraina musa jichu noaboa yuhure. Á ji duapanahata mari jipihtina cūno potori jieraaja. Cāinare marine namo ti dutira Cohamacu. Cāinare namo ti dutierara.

⁸Á yoa namo marieinare, manu marieinare, wapewahya cūhure ó sehe nija: Namu marieina, manu marieina ji masina, áta jinocahga musa yu yoaro seheta. ⁹Á ji masierana tuaro ñaare goa pjana, potota namo tiga. Á yoa numia cūhu manu tiga. Ñaare musa goa pjachu noaeraputia musare. Musa á goa pjana musa namo tichu pinihta noa nina. Á yoa musa manu tichu cūhure noana.

¹⁰Musa namo tiinare, manu tia numiare ó sehe dutija. Yu á nipachuta ya dutia waro jierara ahri. Mari puhtoro Cristo ahrire dutira: Musa numia sehe musa manusumare cohāena tjiga. ¹¹Musa manusumare cohāna, manu mariea numia sehe tjuaga. Á tjuarana pari turi tjoa musa manusuma mehne noano jiga tjoa. Á yoa musa cūhu mua musa namosānumiare cohāena tjiga.

¹² Æ yoa musa cūhure painare ò sehe nija yūhū. Mari puhtoro to dutia jierara ahri. Yūhū sehe ò sehe nija musare: Cāina musa mehne macaina Jesu yaina sehe Jesure cahmaeraa numiare namo tiina jira. Æ jina musa namosā-numia musa mehne ti tjua duachu tí numiare cohāena tjiga musa. ¹³ Æ yoa cāina musa mehne macaa numia Jesu yaina numia Jesure cahmaerainare manū tia numia jira. Æ jina musa manūsuma musa mehne ti tjua duachu tinare cohāena tjiga. ¹⁴ Musa manūsuma Jesure cahmaeraina jipahta Jesu yaina numiare ti namo tichū, Cohamacu noaina yoaro sehe ñūna tinare. Æ yoa musa mua sehe Jesu yaina musa jichū musa namosānumia Jesure cahmaera numia jiboca. Ti ã jipachuta musa mehne tí numia manū tichū Cohamacu noaa numia yoaro sehe ñūna tí numia cūhure. To ã ñuerachu musa pohna Jesure cahmaeraina pohna yoaro sehe ñūboa Cohamacu. Wiho mejeta ti pohna cūhure noaina yoaro sehe ñūna Cohamacu. ¹⁵ Æ yoa musa mua sehere musa namosānumia Jesure cahmaeraa numia musare cohā duaa, āta yoajaro. Musa manūsuma cūhū ã cohā duaa, āta yoajaro. Noano mari jichū cahmana Cohamacu. Æ jiro tí numia musare ti cohā duachu “Tí numia mehne jisiniga”, ni dutierara Cohamacu. ¹⁶ Ti namosānumia Jesu yaina numia sehe noano ti yoachu ñua baharopu ti manūsuma sehe Jesure cahmaboca. Æ ti cahmachū Cohamacu tinare pichacapū wahaborinare yūhduchu yoarohca. Æ yoa ti manūsuma Jesu yaina sehe noano ti yoachu ñua baharopu ti namosānumia Jesure cahmaboca. Ti ã cahmachū Cohamacu tí numiare pichacapū wahabori numiare yūhduchu yoarohca. Æ Jesure cahmaborina ti jipachuta potota Jesure ti cahmahtore masiyuhto basioerara musare.

¹⁷ Æ jina jipihtina musa mari puhtoro Cristo musare to ji dutiriro seheta yoaga. Æ yoana Cohamacu musare to cūri cjirire yoaga musa. Tíre jipihtina Jesu yainare ã yoa dutirucuja yūhū. ¹⁸ Jesu yaina musa jihto pano circuncisiōre yoarina cjiri jina, āta jirucuga. Tuhsu, Jesu yaina musa jihto pano circuncisiōre yoaeraina cjiri jina mipu cūhure āta jirucuga. ¹⁹ Mipure circuncisiōre yoarina musa jichū yaba cjihti jierara. Tíre yoaeraina musa jichū cūhure yaba cjihti jierara. Wiho mejeta Cohamacu dutiare mari yoachu tí pini wiho waro jierara. ²⁰ Æ yoana Cohamacu Jesu yaina musare to cūri pja musa jiro sehta tjuga. ²¹ Jesu yairo mu ji dūcahto pano masunore dahra cohtariro mu jichū noanohca. Āta tjuasiniga. Mu puhtoro mūhure to wio duachu sehere wijaga mūhū. Mu wijachu noanohca mūhure. ²² Mari puhtoro Jesu yairo cūiro jiro masunore dahra cohtariro jiparota Jesu to yūhduchu yoiriro jira. Āta paio mari puhtoro Jesu yairo jiro, masunore dahra cohtariro jieraparota Jesure dahra cohtariro jira tiro cūhū. ²³ Mari ñaa buhirire buhiri ti tuhsuri jire Cristo. Æ jina tiro dihtare “Yū puhtoro waro jira”, ni tūhotuga musa. Paina musare tíre ti ã ni tūhotu dutierachu tinare tūhoena tjiga. ²⁴ Æ jina yū coyea, Jesu yaina cjihti Cohamacu musare to cūri pja musa jiro sehta tjuga. Æ tjuana Cohamacu mehne macaina jiga.

²⁵ Mipure namo marieinare, manū maria numia cūhure yahu duaja musare. Mari puhtoro ahrire “Ō sehe niga”, nierare yūhure. Yūhure to pja ñūchu yūhure to yoadohochū to cahmano seheta yoarucuriro jija yūhū. Æ jiro jicu ahrire noano yahuihtja musare. ²⁶ Mipure musa ñano yūhdūna nica. Æ jiro-mahchu musa namo marieina cūhū manū maria numia cūhū musa tjuachu noanohca, yū tūhotuchū. ²⁷ Namu tiina, manū tia numia musa jina āta tjuga.

Ã yoa namo marieina, manũ maria numia musa jina äta tjuaga. ²⁸ Namo tina ñano yoaerara musa. Ã yoa musa nuhmia manũ tina ñano yoaerara musa cũhũ. Wiho mejeta namo tiina, manũ tia numia musare wapũoro tjuarohca ahri yahpahi masa ti ñano yũhdũro seheta musa ñano yũhdũchũ. Ã jicu musare “Ã wapũ tiri” nicũ, “Namo marieina, manũ maria numia tjuaga”, nihi yũhũ.

²⁹ Yũ coyea, ahrire musare yahui nija. Cristo ahri yahpapũ to tjuatahto mahacõ duhsara. Ã jia mipure namo marieina Cohamacũ to cahmano sehe ti noano yoa masino seheta noano yoaro cahmana namo tiina cũhũre. Ã yoa manũ tia numia cũhũre äta Cohamacũ to cahmano sehe noano yoaro cahmana. ³⁰⁻³¹ Ahri yahpa to mipũ jiro seheta baharocãta pihtia waharohca. Ã pihtihti yahpa to jichũ mipure mari ñahacaha tiia, mari wahchea, mari cjuaa pihtia wahaahca. Ã jia tí wiho waro jira. Cohamacũ yare yoa sehe wiho waro jierara. Ã jia ahri yahpa macaare cjuaina, cjuaraina yoaro sehe jijaro. Ahri yahpa macaare pjĩro tũhotuea tjijaro. Ahri yahpa to mipũ jiro seheta baharocãta pihtia waharohca.

³² Musa ñano yũhdũerachũ cahmaja yũhũ. Pjĩro musa tũhotuerachũ cũhũre cahmaja. Namo marieriro Jesu yairo jiro Jesu yare wacũrucura. Ã wacũrucuro Jesu cahmaare tuaro yoa duara. ³³ Namo tiro sehe to namono cahmaa sehere tuaro yoa duara. Ã jiro ahri yahpa macaare pjĩro tũhotura. ³⁴ Ã jiro tiro puaro macaare yoa duara. Jesu cahmaa cũhũre, to namono cahmaa cũhũre tiro yoa duara. Ã yoa bucuro manũ marienicoro jiro, ticoro mari puhtoro Jesu cahmaare tuaro yoa duara. Nuhmio cũhũ äta yoa duara. Ã yoa duaro to pjacu mehne, to wacũa mehne cũhũre ticoro tuaro Cohamacũ yacoro ji duara. Manũ tiricoro sehe ahri yahpa macaã sehere to manũno cahmaa sehere tuaro yoa duara. Ã jiro ahri yahpa macaare pjĩro tũhotura.

³⁵ Ahrire musare nii nija musare yoadohocu tacũ. Wapũoa dutiare musare cũ duaeraja. Ã cũ duaerapaihta noano musa yoachũ cahmaja. Jesu mari puhtoro yare musa tuaro yoa duachũ cahmaja yũhũ.

³⁶ Musa mehne macariro to sũhũduricoro to bucuro curero to wahachũ ñũno namo tijaro tiro ticorore. “Äta yoaro cahmana ticorore”, ni tũhoturo to niriro seheta yoajaro tiro ticorore. Ticorore namo ti masina. Å yoaro tiro ñano yoaerara. ³⁷ Pairo sehe to sũhũduricorore namo ti duaeraro, to cahmano seheta yoajaro tiro ticorore. “Ticorore namo tieraja yũhũ”, ni tũhoturo to cahmano seheta yoa duaro, tó seheta yoajaro. Å yoiro noano yoara. ³⁸ Å yoa to sũhũduricorore namo tiro cũhũ noano yoara. Tuhsũ, to sũhũduricorore mipure namo tierariro sehe pairo yũhdoro noano yoaro nina.

³⁹ Manũ tiricoro to manũno cohä dutierara Cohamacũ. To ã cohã dutierapachũta to manũno to yariari baharo ticoro pairo mehne to cahmariro mehne manũ ti masina. Ticoro to manũ tirirore Jesu yairo jiro cahmana tirore. ⁴⁰ Ticoro manũ marienicoro tjuaro, manũ tiricoro yũhdoro noano wahchericoro jirohca ticoro. Äta ni tũhotuja yũhũ sehe. Cohamacũ to Espĩritu Santore cjuariro jija. (Yũ ã jiriro jichũ masina ahri yũ yahurire masiga musa.)

**“Cohamacũ jira”, ti nia masurine ño payo ti
duhu payoa chuare yahuha Paulo**

8 ¹ Mipure “Cohamacũ jira”, ti nia masurine ño payo ti duhu payoa chuare yahu duaja. Jipihtina musa tí barore “Masija”, ni tũhotura musa. Å ni

tuhotuna “Painare masi yuhdurucaja”, ni tuhotumana caina. Ñ ni tuhotua painare yoadohoerara tina. Painare cahia tinare yoadohora. Ñ yoa masia yuhdoro painare cahia sehe wiho waro jierara. ²“Masi pahñonocaja”, ti mu suro niina jia, Cohamacu noaare to masi dutiare masierasínica tina. ³Wiho mejeta Cohamacure ti cahichu tinare masina tiro. (Ñ jia to yaina jira tina.)

⁴Ñ yoa “Cohamacu jira”, ti nia masurine ño payo ti duhu payoa chuare ahrireta yahuihtja: Tí masuri ne yaba cjihti jierara. Potocata tí masuri yajepipohna mariahna. Cohamacu sehe cüirota jira. Paina cohamana mariahna. Ahrire mari masija. ⁵⁻⁶“Payu cohamana jira. Tina mari puhtoa jira”, ni tuhotumana masa. Ñ yoa muanopu, ahri yahpapu cühure “Cohamana”, ti niina jipachuta mari sehere cüirota jira Cohamacu. Tiro mari Pucu jipihtiare bajua-mehneriro jira. Ñ yoaro to yaina cjihti yoari jire tiro marine. Ñ jiro mari puhtoro Jesucristo cüirota jira. Tiro jipihtiare mari Pucure yoabasariro jira. To yaina cjihtire yoari jire tiro marine. Ñ jina tiro mehne ñ jirucunahca mari.

⁷Yu niriro sehe ñ jipachuta paina Jesu yaina tíre masierara. Panopu tina “Cohamacu jira”, ti nia masurine “Catiina jira”, ni tuhoturucumaha. Tí pjapure ñ yoarina jia mipu cühure tí masurine ño payo ti duhu payoa chuare “Cohamana ya chua jira”, ni tuhotumana. Ñ yoa tí chuare chua, “Mari ñano yoana nija cohamana ya chuare chuna”, ni tuhotumana. Tíre ti yoirire noano masieraa, ñ ni tuhotumana. Ñ jia tina ñano yoa nina, ti tuhotuchu. ⁸Tí chuare mari chuchu mari chuerachu cühure Cohamacu marine “Noaina jira”, ni ñuerara. Ñ yoa tí chuare mari chuchu wiho warota jinocahno nina tí chua. Mari tíre chuna ñano yoaeraja. Tí chuare mari chuerachu cühure wiho warota jinocahno nina. Ti duhu payoa chuare mari chuerana paina yuhdoro noaina jieraja mari cühu. ⁹⁻¹⁰Wiho mejeta noano yoaga musa. Tí chuare churina cjiri musa jichu paina musare, “Masija” niinare, ñu cü chuboca. Ñ ñu cü chua ti yoirire noano masieraa, “Ñano yoana nija mari”, ni tuhotuahca tina cühu. Ti ñ ni tuhotuchu tina sehere ñano yochu yoana nica musa. Ñ jina noano yoaga musa. ¹¹“Mari tí chuare mari chuchu noanohca marine”, musa ni tuhotuina jina paina noano masieraina cjirire ñano yochu yoaboca musa, musare ti ñu cüchu. Tina ya cjihti cühure yariari jire Cristo. Ñ yoana Cristo yainare musa coyeare ñano yochu yoana niboca musa. ¹²Noano masierainare Cristo yainare musa ñano yochu yoana, Cristo cühure ñano yoana nica musa. ¹³Ñ jicu tí masurine ño payo ti duhu payoa chuare yuhu chucu Cristo yainare ñano yochu yoi niboca yuhu. Cristo yaina ti ñano yochu cahmaeraja. Ñ jicu “Yuhu tinare ñano yochu yoari” nicu, tí chuare ne pari turi chusi yuhu.

Paulo Jesu to cüiro to jia tiare yahuha

9 ¹Jesu to yare buhe dutiro to cüiro jija. Ñ jicu paina to cürina ti yoaro sehetá yoa masija yuhu cühu. Mari puhtoro Jesure ñuriro tjija yuhu cühu. Ñ jina Jesu yare yu buhechu musa sehe tíre noano tuhorina jina to yaina wahare musa. Ñ to yaina waharina jina Jesu to cüiro yu jichu masi tuhsura musa. ²Paina yuhure yahuwajaa “Tiro Jesu to cüiro jierara”, niboca. Ti ñ nipachuta musare yu buheri baharo Jesu yaina wahana, “Jesu to cüiro jira” ni, yuhure masi tuhsura musa. Ñ jina paina ti yahuwajapachuta musa sehe to cüiro yu jia tiare masina.

³Yuhure yahuwajainare ò sehetā ni yuhtihtja: ⁴Musare yu buheri baharo yu chuhtire yu sihihti cūhure yuhure waboa musa yu buheri wapa. ⁵Ā jicu namo tiroto jicu yu namo Jesu yacoro to jichu ticoro mehne tini masiboa yuhū. Paina Jesu to cūrina, Jesu bahana, Pedro cūhu ti namosānumia mehne ti tiniri sehetā yuhū cūhu tini masiboa. ⁶Yuhū Bernabé mehne musare noa buheare sā buhepachuta sāre ne paye barocā waerare musa. Ā jina sā basita sā chuhti cjihtire dahra wapatai sā. ¿Sā dihtare wapataro marieno buhero cahmajari, musa tuhotuchū? ⁷Ahrina yu yahuhtina sehe ti dahrari wapa wapatarā. Cūiro surara to dahrachū to puhtoa tirore wapara. To basi wapaerara. Chuare toariro cūhu to toari dicha tichu tíreta chū masina. Ā yoa ovejare űu wihboriro to nuina pēchore sihi masina tiro. ⁸“Ti dahrari wapare waparo cahamana”, nicu masa ti dutia dihtare musare yahueraja. Cohamacu to dutiapu to niri cjiri cūhure musare yahui nija. ⁹Moise cjirore to cūri dutiare to yare ti joari pūi ò sehe ni yahura: “Wachu trigo yaparire to dahpori mehne suhtiwerirore to chū duachu to duserore ducataena tjiga”, nia tiri jire Cohamacu dutia. ¹⁰Ā dutiro wachuare nino nierari jire. Ā dutiro marine nino niri jire marine buhero taro. Wesere sahariro cūhu tí dichare narina cūhu ti dahrari baharo dicha tiri pja jichu ti wapatahtore cohtara tina. (Ā jina dahrainare ti dahrari wapare waro cahmana marine.)

¹¹Musare Cohamacu yare noa buheare buhei sā. ¿Sā ā buhechū musa sehe sāre chuare waeraro cahmajari, musa tuhotuchū? Waro cahmana. Musa wachu noaboa sāre. ¹²Ā waerarina jipanahta paina chuare musare ti sinichū musa tina sehere wara. Tina musare ti chuare sinichū sā sehe tina yuhdoro musare chuare siniborina jimaja.

Ā wa dutiborina jipanahta sā sehe “Sāre waga”, ne nierahi. “Cristo ya buheare musapu cahmaeraboca” nina, sāre chua mariapachuta musare ne sinierahi. ¹³Cohamacu wuhui dahraina tí wuhuihta ti chuare nana. Ā yoa Cohamacure ti ño payori mesai cohtaina wahiquirore ti jūrirore mahanocā na chura tina cūhu. ¿Tíre masierari musa? ¹⁴Tó sehetā ti yoariro sehetā noa buheare buheinare ti buheri wapare ti chuhtire tinare waro cahmana musare. Āta yoa dutire mari puhtoro Jesu. ¹⁵Ā jicu musare siniboriro jipaihta yuhū ne paye barore sinierahi musare. Ā jicu ahrire mipure joacu paye barore wapa cahmai tai joai nieraja. Musare ne wapa cahma duaeraja. Yariahtiro jipaihta ne wapa cahmasi yuhū musare. Wapa marieno buhecu ji coa yuhduaja. Ā jicu musare yu buheri wapa ne wapata chusi.

¹⁶Noa buheare buhe dutiro yuhure cūre Cohamacu. Tíre buheri masuno jinocaihta nija yuhū. Noa buheare buheracu pjacuoriro jiboa yuhū. Ā jicu tí buheare buhecu “Painare masi yuhdurucaja”, niboriro jieraja yuhū. ¹⁷Noa buheare yu mu suro buhecu yu buheri wapa wapaa naboa yuhū. Cohamacu yuhure to yare buhe dutiro cūre yuhure. Ā jicu yu mu suro buheraja. ¹⁸¿To yare ā buhecu yaba barore wapatajari yuhū? Ò sehe jira yu wapataa: Noa buheare buhecu musare ne paye barore sinieracu wapa marieno tí buheare buheja musare. Yū ā nirire masicu wahcheja. Yū wahcheata jira yu wapataa.

¹⁹Ne masare dahra cohtariro jierapaihta jipihtinare dahra cohtariro yoaro sehe jija yuhū payu paina masa Jesu yaina ti wahahto sehe. ²⁰Ā jicu yu coyey judio masa mehne jicu, ti yoaro sehetā yoaja yuhū Jesu yaina ti wahahto sehe. Cohamacu to dutia cjirire Moise cjirore to cūri cjirire ño payoriro

jierapaihta, tí dutia dihtare ño payoina mehne jicu tí dutiare ño payoriro baro yoaro seheta jija yuhu. Áta yoaja yuhu tina Jesu yaina ti wahahto sehe. ²¹ Á jicu Cristo yairo jicu Cohamacu dutiare Moise cjirore to cūri cjirore yuhduruca duaeraja. Tí dutiare yuhduruca duaerapaihta tí dutia marieina mehne jicu tí dutia marieriro yoaro seheta jija. Áta yoaja yuhu tina cūhu Jesu yaina ti wahahto sehe. ²² Jesure noano masieraina mehne jicu ti yoaro seheta jija. “Masi pahñoriro jija”, nieraja yuhu. Áta yoaja yuhu tina cūhu Jesu yaina ti wahahto sehe. Á jicu jipihtina masa ti jiro sehta jija yuhu caina tina Jesu yaina to yuhdūchu yoaina ti wahahto sehe. ²³ Ahrire yoaja noaa buheare jipihtina ti tuhohto cjihtore. Yu ā yoachu ñuno Jesu to buheriro seheta tiro yuhu cūhure noano yoara. (Á jicu masa ti jia tiro seheta jija.)

²⁴ Ō seheta jira mari piti dahre buhechu. Murocapeina murocaa tina jipih-tina murocara. Ti ā muroca pihtipachuta muroca yuhdurucariro su muhtana. Á su muhtariro wapata. Á jina ti murocariro seheta masa cūhu Cohamacu cahmaare yoaga masa wapatahto sehe. ²⁵ Jipihtina murocaina ti pjacure dojomehneare duhunoca noano murocapora ti muroca tuahto sehe. Tuhsu, ti noano murocahto cjihtore quihōno chua, quihōno carīa, noano yoara tina. Áta yoara tina muroca su, ti wapatahto sehe. Á jia ti ā yoa wapataa pūri mehne ti yoari soro jira. Tí soro ñaco baaerara. Mari sehe Cohamacu yare noano buheja to yare mari wapatahto sehe. Tí wapataa pinihta ne baaerara. ²⁶ Á jicu yuhu pa sehe murocariro yoaro sehe yoaeraja. Potori da murocariro yoaro sehe yoaja yuhu. Tuhsu, cahmacheperiro pa sehe dota moñoroca mujariro yoaro sehe yoaeraja. Á yoa duaeracu Cristo yare quihōno yoa duaja. ²⁷ Á jicu murocapeina, cahmachepeina cūhu ti pjacurire ti buheriro seheta ti noano quihōno ti yoariro seheta yuhu cūhu yu pjacu mehne noaa dihtare yoapoja. Á yoeracu painare buheriro jipaihta yaba cjihti jieraboa yuhu sehe.

“Cohamacu jira”, ti nia masurine ño payo dutieraha Paulo

10 ¹ Á yoa yu coyea, ahrire masiga masa. Sā Israe masa ñuchusuma cjiri panopu macaina jipihtina Cohamacu to me curuare ñu ñunu ti wahcāa, wahaa tiri jire. Á wahaa sohāri mare co watoi jiri mahai wua cahari mahai pahā tinia wahari jire. ² Á wahaa tina jipihtina me curua mehne sohāri ma macaa co mehne bautisarina yoaro sehe wahari jire. Bautisarina wahana Cristo yaina mari jiare ñona nija. Tó seheta tina sohāri mare bautisarina yoaro sehe wahaa, Moise cjiro yaina ti jiare ñoa nia tiri jire. ³ Á yoa tina jipihtina muano macaa chuare chua tiri jire Cohamacu to waare. ⁴ Á chua tina jipihtina Cohamacu to waa co cūhure sihnia tiri jire. Tí pjapure tí core Cohamacu to cūri tācai wijaa core sihnia tiri jire tina. Tia tāca yoaro sehe jiro, tinare co wariro Cristo jiri jire. ⁵ Tina ā wahirina ti jipachuta paina tina mehne macaina ñano ti yoachu ñuno Cohamacu sehe payu tina mehne macainare ñu ji coareri jire. Á jiro tinare masa marienopu yariachu yoari jire Cohamacu. Á yoaro masa marienopu ti pjacurire cohā sitea wahari jire.

⁶ Áta yoari jire Cohamacu tinare marine buhero taro. Á jiro tinare ñu cū ñaare mari goa pjaerahto cjihtore Cohamacu ā yoari jire tinare. ⁷ Á jina “Cohamacu jira”, ti nia masurine ti ño payoriro seheta yoarena tjiga masa sehe. Tí masurine ti ño payorire Cohamacu yare ti joari pūi yahuro ō sehe nina: “Tina chu duji sihni tuhsu, wahcārucu su, bōse numu yoa ducari jire wachu masure

ño payoa taa”, ni joaa tiri jire panopure. ⁸Baharo paina sehe Israe masa numia mehne ñano yoari jire. Ti yoariro seheta yoeraro cahmana marine. Tina ti ñano yoari baharo cū dachoihta tina veintitrés mil masa yariaa wahari jire. ⁹Ti ā wahari baharo pari turi paina Israe masa sehe Cohamacure tina mehne suachu yoari jire. “Marine buhiri dahresi”, nia ñaa warore yoari jire. Ā yoaa tirore suachu yoari jire. Ti ā yoari buhiri Cohamacu agāa mehne bahca wajāri jire tinare tjoa. Ā jina tina yoaro sehe Cristore yoarena tjiga musa “Marine buhiri dahresi”, nina. ¹⁰Pa tehe tjoa paina ñaa quitu dahre ti tuhtichu anjo masare wajāriro tinare wajāri jire. Ā jina tina yoaro sehe yoarena tjiga.

¹¹Ā wajā dutiri jire tinare Cohamacu marine buhero taro. Mari sehe pihtiri dacho panocā jiina jija. Mari ā jiina jichu panopu macaina ti ā waharire Cohamacu joa dutiri jire marine noano buhero taro. ¹²Ā jina “Noaina jija sā, Cohamacu to ñuchu”, ni tuhoutuina jina, noano yoaga musa “Ñaaare yoari”, nina. ¹³Mari jipihtina cūiro duhsaro marieno cāa tahari ñaaare wacūja. Ā wacūna tí ñaaare yoa duaja. Mari ā yoa duapachuta Cohamacu marine yoadohorucuriro jira. Ā jiro tí ñaa wacūare musa bo masierachu tiro sehe musare yoadohorohca. Ā jiro tí ñaaare musa yoa duachu ñuno Cohamacu tí ñaaare musare yoa duaerachu yoarohca. To ā yoachu tí ñaaare yoa duasi musa.

¹⁴Ā jina yu cahīina yuhure tuhoga. “Cohamacu jira”, ti nia masurine ne ño payoena tjiga. ¹⁵Musa noano masiina jichu musare yahuja. Ā jina yu nihti cjihtire quihōno ti jichu masiga musa basi. ¹⁶Cristore ti ñahari ñamine vinore to sihnihto pano Cohamacure “Noana”, niri jire. To niriro seheta mari cūhu tí core sihnina Cohamacure “Noana” nina, mari ya buhiri Cristo to yariarire masichu yoana nija. To di wijaarire masichu yoana nija. Tuhsu, to yaina mari jia tia cūhure masichu yoana nija mari. Ā yoa pāore mari Cristo yaina nuha, chuna, mari ya cjihtire to pjacu crusapu to yariarire masichu yoana nija. Tuhsu, to yaina mari jia tia cūhure masichu yoana nija. ¹⁷Ā jina payu masa jipanahta cū curi pāo curire chuna jipihtina mari Cristo yaina cū curuata jija.

¹⁸Israe masa ti yoarire wacūga musa: Tina wahiquirore wajāa, jū muo waa, Cohamacure ño payora. Ā ti wari baharo cū curuaihta ti wariro cjirore chura. Ā chua Cohamacure ti ño payoare masichu yoara tina. ¹⁹Cohamacure ti waa chware yahucu “ ‘Cohamana jira’, ti nia masurine ti waa chua sehe tí waro jira”, nii nieraja. Tí chua pinihta wiho waro jia nina. Tí masuri cūhu wiho waro jia nina. ²⁰Tí chua ti yaba cjihti jierapachuta tí chware chue-raro cahmana. Ō sehe jira tí. Cohamacure cahmaeraina wahiquirore wajā, jū muoa, Cohamacure ño payoa nierara. Ā yoaa watia sehere ño payora tina. Ti ā ño payoina jichu tina mehne chuna watino yaina yoaro sehe yoana nica musa cūhu. Musa ā yoachu pinihtare ne cahmaeraja. ²¹Santa Cenare mari yoari dachoi mari puhtoro Jesure wacūna tana sihnija. Mari ā sihniina jina, watia sehere ño payo masieraja mari. Ā yoa Jesure wacūna tana pāore chuja. Mari ā chuina jina, watia sehere ño payo masieraja mari. ²²¿Jesure musa mehne suachu yoa duajari musa, puarore musa ño payona? ¿Tiro yuhdoro tuaina jijari musa? Jierara. (Ā jina noano yoaga musa.)

Cohamacu to cahmaa dihtare yoaga

²³Ō sehe nina cāina: “Sā cahmano seheta yoa masija sā”, nina. Musa yoari cjiri ñaa ti jierapachuta tíre yoana painare yoadohoeraboca musa. Tuhsu, tíre

yoana Jesure wacū tua namochu yoaeraboca musa painare. ²⁴ Musa cahmaa dihtare yoena tjiga. Paina sehere noano yoadohoga musa.

²⁵⁻²⁶ Chua duaropure chware nuchuna “¿Ahri chua masurine ti duhu payoa chua jijari?” ni sinitu ñuena tjiga. “Ñaaare yoari” nina, sinitu ñuboca musa. Ñ ni sinitu ñuena tjiga. Ahri yahpa, ahri yahpai jia cūhu Cohamacu ya jira. Ñ jina tí chware “¿Ñaa chua jijari?” niena tjiga.

²⁷ Jesure cahmaerariro musare chu dutiro to pjirocachu waha duana wahaga. Ñ wahana musare to duhu payoare chuga. “¿Ahri chua masurine ti duhu payoa chua jijari?” ni sinitu ñuena tjiga. ²⁸ Ñ jina pairo Jesu yairo “Ahri chua masurine ti duhu payoa chua jira”, musare to ni yahuchu tí chua pinih-tare chuena tjiga. Musare ñ ni yahuriro “Ñaa chware chura ahrina”, musare to ni tuhoturiento sehe chuena tjiga musa. Musa cūhu ñ ni tuhutori nina tí chware chuena tjiga. ²⁹ Ñ chu dutieracu musa ya cjihtire ñ nierahi. Musare ahrire yahuriro ya cjihti sehere tí chware chu dutieraja. Tiropu musare “Ñaa chware chura ahrina”, niboca. “Ñ niri” nina, tí chware chuena tjiga.

“Chuena tjiga”, yu nichu ñ sehe ni sinitu yuhtiboca musa yuhure: “¿Dohse jiro baro pairore ‘Soro tuhutori’ nina, chuerabocari sã? ³⁰ ¿Cohamacure ‘Noana’, sã niri baharo sã chuchu dohsearo tíre sã churi buhiri pairo sãre yahuwajabocari?” ni sinitu yuhtiboca musa yuhure. ³¹ Ahri jipihtiare yahucu ñ sehe nii nija musare: Dachoripe Cohamacu to dutiriro seheta wahchea mehne chu, sihnija, Cohamacure masa ti ño payohto sehe. Ñ jina jipihtiare noano yoarucuga Cohamacure masa ti ño payohto sehe. ³² Ne judio masare, judio masa jierainare, Cohamacu yaina cūhure ñano yoachu yoena tjiga musa tinare. ³³ Ñ seheta yoaja yuhu sehe. Masa jipichtinare yoadoho duaja. Ñ yoacu ya cjihti waro sehere pjiro tuhoturaja. Yu ñano yuhdachu noanohca. Payu masa sehere yoadohoja tinare pichacapu wahaborinare Cohamacu to yuhdachu yoahito sehe.

11 ¹ Ñ jina Cristore yu ñu cūrire yu yoachu musa cūhu yuhure ñu cūga.

Corinto macaina ti cahmachunoi numia ti yoahitore yahuha

² Musare yu buhe turiari cjirire yu yoari cūhure wacū pahñoyuhca musa. Ñ wacūna musare yu yoa dutiriro seheta yoayuhca musa. Ñ yoana noano yoara musa. ³ Ñ yoina musa jipachuta ahri cūhure musa masichu cahmaja: Jipih-tina mua ti puhtoro, Cristo jira. Tuhsu, to namono puhtoro to manuno jira. Ñ jichu, Cristo puhtoro to Pucuro jira. ⁴ Cohamacure siniriro to dapure mohar-riro sinino, to puhtoro Cristore ño payoeraro seheta yoaro nina. Cohamacu yare yahuriro cūhu to dapure mohano āta yoaro nina tiro cūhu. ⁵ Tuhsu, to dapure moharicoro Cohamacure sinino, to manunore ño payoeraro seheta yoaro nina. Cohamacu yare yahuricoro cūhu to dapure moharero āta yoaro nina ticoro cūhu. Ñ yoaro to pjoarire wuha pahñoricoro yoaro seheta yoara ticoro. ⁶ To dapure moha duaeraro ticoro to pjoarire saa pahño dutijaro. To ñ yoari baharo to dapure buo tiro, ticoro mohajaro to dapure. ⁷ Mua sehe Cohamacu noariro, tuariro to jia tiare ñona tina sehe. Ñ jia ti dapupure mohae-raro cahmana tinare. Numia sehe mua ti puhtoa jia tiare ñona. Ñ jia tina numia sehe ti dapupure mohajaro. ⁸ Cohamacu munore yoaro, numino ya pjacu macano mehne munore yoaerari jire. Numino sehere yoaro, muno ya pjacu macano mehne ticorore yoari jire. ⁹ Tuhsu, munore yoaro, numino yairo

cjihtore yoaerari jire. Numino sehere yoaro muno yacoro cjihtore yoari jire Cohamacu tiorore. ¹⁰ Ñ jia numia ti dapupure mohajaro anjoa cūhu mua ti puhtoia ti jirire ti masihtō sehe. ¹¹⁻¹² Cohamacu numinore yoaro, muno pjacu macano mehne yoari jire. Ñta mipure muno masa bajuaro, numino pjacu masa bajuara. Tuhsu, jipihtinare Cohamacu sehe yoari jire. Ñ jiro muno to ji muhtaerachu numino mariaboa. Ñ yoa numino to mariachu muno cūhu mariaboa.

¹³ ¿Musa basi dohse tuhotujari? ¿Numino to dapu mohaeraricoro, Cohamacu to sinichu noajari, musa tuhotuchu? Noaeraputara. ¹⁴ Tuhsu, muno pjoa nahmo mūriro to jichu ñaa nica. Jipihtina masa ti mu suro tīre masina. ¹⁵ Ñ yoa numino to pjoa nahmo to dapure mohari cahsaro yoaro sehe jira. Ticoro pjoa nahmo mūricoro jiro noaricoro bajura ticoro. Tī cūhure jipihtina masina. ¹⁶ Musa mehne macariro ahrire yu yahurire to tuho duaerachu, ò sehe ni yahuihtja tire: “Yu ni yahuriro seheta mari yoa tia jira. Paina Jesu yaina cūhu ñta yoarucura tina cūhu. Sã ñ yoarina jichu ñacu yu ni yahuriro seheta yoaga muhu cūhu”, ni yahuihtja yu yahurire tuho duaerariore.

Santa Cenare ti churo watōi dojomehneha Corinto macaina

¹⁷ Mipure musare ahrire yahui tai, “Noano yoina jira”, nieraja yuhu musare. Musa cahmachuna noano yoaerara. Nano yoara musa. ¹⁸ Ò sehe ni yahu muhtaihtja musare: Musa cahmachunopu cahma sayona musa basi cãa curuari tju wayuhca musa. Paina tīre yuhure ti yahuchu “Potocã t̃jica”, ni tuhotu cureja yuhu. ¹⁹ Ñta yoayuhca musa. Musa ñ tju warina musa jichu ñna baharo Jesu yaina waro jiina sehere masinahca mari. ²⁰ Musa basi ñ tuhtiina jina musa cūnoi cahmachu chuchu tó wahaerara. Potocãta Santa Cena waro yoana nierayuhca. ²¹ Musa cahmachuna caina musa sahsero chu muhcona, paina sehere juca baachu yoana niyuhca musa. Tuhsu, sihni muhtaina sehe cahaa wahayuhca. ²² ¿Musare musa wuhuse mariajari? Musa wuhuseputa chu, sihniga. Mipure Cohamacu yaina ti cahmachunore dojomehnena niyuhca musa to yaba cjihti jieraboro seheta. Tuhsu, paina Jesu yaina pjacuinare chua maeraina sehere musa sehe buoro yuhduchu yoayuhca. ¿Dohse ni yahuihcari yuhu musare? “Noano yoana nina musa”, nieraja yuhu.

Santa Cenare yoa taa, ti churire yahuha Paulo

(Mt 26.26-29; Mr 14.22-25; Lc 22.14-20)

²³ Mari puhtoro Jesu to chu batoarire yahure yuhure. Ñ to yahuri baharo yuhu sehe musare tīre yahu turiahi. Tī ò sehe jira: Tirero ñ tuhtiinare Juda to ñohti ñamihi mari puhtoro Jesucristo pãore na, Cohamacu “Noana”, niyuhti. ²⁴ To ñ niri baharo tī pãore nuha, to buheinare witiyuhti. Ñ witiro ò sehe niyuhti: “Ahrire chuga. Ahri yu pjacu jira. Musa yaro jiborirore yariaihca. Yuhure musa wacūhti cjihtire ahrire chuga”, niyuhti Jesu mari puhtoro. ²⁵ Ñ ti churi baharo tiro sihniri wahware na wahcãno ò sehe niyuhti: “Musa ñaa yoari buhirire cohacu tacu yariaihca. Ñ yocacu yu dire cohaihca. Cohamacu ‘Musare yuhduchu yoihtja’, to niriro mu suchu yu yariaro mehne to niriro sohtori tiarohca. Ahri wahwai posa tiare sihnina, yu di cohãrire wacūnahca. Ahrire sihnina, yuhure musa wacūhti cjihtire sihniga”, niyuhti

Jesu. ²⁶ Ñ yoa Santa Cena macaa pãore musa chuna, sihniare sihnina, Jesu mari puhtoro mari ya buhirire to yariarire ñona nina musa. Ñ ñorucunahca musa pu ahri yahpapu to tjua tachupu.

“Santa Cenare chu sihnina ñ sehe yoağa”, ni yahuha Paulo

²⁷ Santa Cenare chu, sihnina, Jesure ño payoro marieno yoana, cua pisaro yoaerana, to pjacure to di cohãri cühure bujupero sehe yoana nija mari. Ñ yoana Jesure bujupena nija mari. Tó sehe yoaına buhiri tiına jira. ²⁸ Ñ jina mari yoarire, mari jia tiare noano wacũjihna. Ñ wacũna Santa Cenare chu, sihni masija mari. ²⁹ Mari puhtoro mari ya cjihtire to pjacu to yariarire wacũno marieno Santa Cenare chu, sihnina mari buhiri tinahca. ³⁰ Ñ sehe dihta yoayuhca payu musa mehne macaina. Ñ yoa tina cãina tuae-raina, dohatiina wahayuhti. Tuhsu, paina ti ñ yoi buhiri yariaa wahayuhti. ³¹ Wiho mejeta Santa Cenare mari chu, sihnina, mari yoiarire, mari jia tiare noano wacũna, mari ñaa yoiarire duhuna tí buhirire buhiri tisi mari. ³² Mari puhtoro sehe marine tuhtira, tí buhirire marine buhiri ti dutieraro. Paina ñaina Jesure ño payoeraina buhiri tihtina dihta jira. Tina yoaro sehe marine buhiri tichu cahmasãerara mari puhtoro.

³³ Ñ jina yu coyea, Santa Cenare chuna tana cahmachuna, cohtasiniga musa coyeare. ³⁴ Tuhsu, musa mehne macaina juca baa, ti ya wuhusepu chusini-jaro. Ñ yoana Santa Cenare chuna tana cahmachuna, cua pisaro yoaeraina ya buhiri buhiri tisi musa. Paye barore yahu duamahi musare. Baharo yu basi suipu musare yahuihtja tĩre.

**Cohamacu yare mari yoahtore cũno marine
yoa masichu yoara Espĩritu Santo**

12 ¹ Yu coyea, ahrire yahu duaja musare. Cohamacu yare mari yoahtore cũno marine jipihtinare yoa masichu yoara Espĩritu Santo. Ñ jicu tĩre musa noano masichu cahmaja.

² Jesu yaina jierasinina soro jia buheare tuho nunuina jina, musa sehe “Cohamacu jira”, ti nia masurine, durucuera masurine ño payosinimare. Tĩre masina musa. ³ Ñ jiina musa jirina cjiri jichu mipure ñ sehe ni yahuihtja musare: “Jesu ñano wahajaro”, niina Cohamacu yairo Espĩritu to tuaa mehne ñ nia nierara. Espĩritu Santo warore cjuacerara tina. Tuhsu, “Jesu mari puhtoro jira”, niina Espĩritu Santo to tuaa mehne ñ niina jira tina.

⁴ Cohamacu yare yoa masia payu jira. Ti ñ jipachuta marine yoa masichu yoiaro sehe cũirota jira. Tiro Espĩritu Santo jira. ⁵ Ñ yoa Cohamacu yare yoahtina payu jina, to yare soro sehe mari yoahti cũhu payu jira. Tí ñ jipachuta mari puhtoro Jesu sehe cũirota jira. ⁶ Ñ yoa Cohamacu yare yoa cũhu payu jira. Ti ñ jipachuta Cohamacu marine yoa masichu yoiaro sehe cũirota jira. ⁷ Marine Jesu yainare Espĩritu Santo yoadohoro Cohamacu tuaare ñono nina. Ñ sehetu yoadohora tiro Jesu yainare jipihtinare mari noano yoadohohto sehe. ⁸ Cãinare noano masi, yahuchu yoara Espĩritu Santo. Tuhsu, painare Cohamacu yare noano buhe masichu yoara tiro Espĩritu Santo pinihta. ⁹ Ñ yoa painare Cohamacu noano wacũ tuachu yoara tiro. Ñ yoaro painare Cohamacu tuaare wara tiro. Tí tuaa mehne tina sehe dohatiinare noaina wahachu yoara. Espĩritu Santo cũirota jiro ti tuaare wara. ¹⁰ Tuhsu,

tiro painare Cohamacu tuua mehne yoa masichu yoara tiro. ã yoaro painare Cohamacu yare noano yahu masichu yoara tiro tinare. ã yoaro paina Jesu yainare buheare noano bese masichu yoara tiro. ã masia watino ya buhea ti jichu masina tina. Espiritu Santo waro ya buhea cùhure ti jichu masina tina. Tuhsu, painare tuhomañoeraa duserire ti durucu masichu yoara tiro. ã yoa tuhomañoeraa duserire durucuina ti nino sehta yahu yuhdo masichu yoara tiro painare. ¹¹ Espiritu Santo cùirota jiro to cahmano sehta marine cainare ahri jiphihare yu yahuriro sehta yoa masichu yoara. Cainare soro yoa masichu yoara. Paina cùhure soro yoa masichu yoara.

Cristo yaina jina cù curuata jija mari

¹² Õ sehe jira ahri mehne mari piti dahre yahuchu: Mari pjacu cù pjacu to jipachuta wamomacari, capari, dahpori, cahmori tí pinihta payu jira mari pjacui jia. ãta jija mari Cristo yaina cùhu. Cristo yaina to pjacu yoaro sehe cù curuata jira. ¹³ ã jina Cristo yaina jina, to pjacu yoaro sehe cù curuata jija mari. Judio masa, judio masa jieraina, dahra cohtaina, dahra cohtaina jieraina, payu curuari jipanahta cùirota jiro to pjacu yoaro sehe cù curuata jija mari. Espiritu Santo cùirota jiro to tuua mehne bautisarina jija mari. ã jina cùiroreta Espiritu Santore cjuaja mari, Cristo ya curua macaina jina.

¹⁴ Mari pjacu cù pjacu to jipachuta wamomacari, capari, dahpori, cahmori tí mari pjacui jia payu jira. ¹⁵ Mu dahporo durucuri dahporo jiro, ò sehe niboa mùhure soro ni duaro: “Wamomaca jieraja yuhu. ã jicu pjacu macariro jieraja yuhu”, niboa. Mu dahporo ã niparota pjacu macano jirota nina. ¹⁶ Mu cahmono durucuri cahmono jiro ò sehe niboa mùhure soro ni duaro: “Capariaca jieraja yuhu. ã jicu pjacu macariro jieraja yuhu”, niboa. Mu cahmono ã niparota pjacu macano jirota nina. ¹⁷ ¿Mari pjacu capariaca dihta jichu dohse tuhobocari mari? Basioeraboa. ¿ã jina mari pjacu cahmono dihta jichu dohse wijí tuhobocari mari? Basioeraboa. ¹⁸ Tó sehe jierara mari pjacu. Ò sehe jira. Mari pjacui jiare Cohamacu to cahmano sehta cùri jire mari pjacure. ¹⁹ ¿Mari pjacui jia mariachu dohse wahaboari mari pjacu? ²⁰ Mari pjacu ò sehta jira: Cù pjacu to jipachuta mari pjacui jia payu jira.

²¹ “Mu yoadohochu cahmaeraja”, mu capariaca ni masierara mu wamomacare. ã jichu, mu dapu mu dahporire “Mu yoadohochu cahmaeraja”, ni masierara. ²² Paye mari pjacui jiare “Wiho jia curea jira”, mari nia sehere pototi cahmaja mari paye mari pjacui jia yuhdoro. ²³ Paye mari pjacui jiare “Soro jira”, mari ni tuhutupanahta tíre mari pjacui jiare noano yoaja. Tuhsu, paye mari pjacui jiare mari buo tiare suhti mehne nuoja mari. ²⁴ Paye mari pjacui jiare nuoeraja mari. Tí pinine ñona, buo tieraja. Ò sehe ji dutiri jire Cohamacu mari pjacure. Mari ñoeraare mari pjacui jiare mari noano ño payoa mehne cjuaja. ãta yoa dutiri jire Cohamacu. ²⁵ ã jia mari pjacui jia ti basi cahma yoadohora, cù pjacuta to noano jihto sehe. ²⁶ ã jia mari capari ñano yuhduchu paye mari pjacui jia cùhu ñano yuhdura. Tuhsu, mari capari noaa wahachu mari pjacui jia cùhu wahcheina masa yoaro sehta noano tuhutura.

²⁷ ã jicu ò sehe nii nija musare: Musa sehe Cristo to pjacu yoaro sehe cù curuata jira. ã jina jiphihta musa to pjacui jia yoaro sehe to yaina jira. ²⁸ ã jiro Jesu yainare mari yoadohohti cjihtire cùri jire Cohamacu marine. Ò sehe cùri jire tiro marine. Cainare marine buhe dutiro to cù mùhtainare cùri

jire tiro. Painare to yare yahuhtinare cūri jire. Painare masare buhehtinare, painare Cohamacu tuaa mehne yoahhtinare, painare dohatiinare ti yuhduchu yoahhtinare, painare masare yoadohohtinare, painare masa puhtoia jihtinare, painare tuhomahnoeraa duserire durucuhtinare cūri jire Cohamacu marine.
²⁹ Ā to cūchu jipihtina cūno potori to cūrina jieraja mari. Paina Cohamacu yare yahuhtina jierara. Paina Cohamacu buhe dutiro to cūrina jierara. Tuhsu, paina masare buheina jierara. Paina Cohamacu tuaa mehne yoaina jierara.
³⁰ Tuhsu, paina dohatiinare yuhduchu yoaina jierara. Paina sehe tuhoma-noeraa duserire durucuina jierara. Tuhsu, paina tuhomahnoeraa duseri durucuare yahu yuhdoina jierara. Ā jiro cāinare mari yoahhtire cūri jire tiro.
³¹ Wiho mejeta Cohamacu yare yoa masi duana noa yuhdua sehere tuaro cahmaga musa. Jipiehtia ahri yu niri yuhdoro musa cahmahti cjihtire mipure yahuihtja musare yuhu.

Painare noano ti cahihtire yahuha Paulo

13 ¹ Masa ya duserire durucu masipanahta, anjoa ya duserire durucu masipanahta, painare cahierana yaba cjihti jieraja mari. Mari durucua cūhu yaba cjihti jierara. Painare cahierana mari durucuna, wiho waro durucuna nija. ² Cohamacu yare noano yahu masipanahta, masa ti masierari cjirire Cohamacu yare ti buheri cjiri cūhure masi pahñopanahta, painare cahierana yaba cjihti jieraja mari. “Ahdu tūcu pa sehēpu wahajaro”, mari nichu, “Potocāta mari siniriro sehetā Cohamacu yorohca”, ni mari tuhotuchū āta yorohca. Cohamacure ā ni tuhoutuina jipanahta painare cahierana, yaba cjihti jieraja mari. ³ Jipiehtia mari yare pjacuoinare wapanaha painare mari cahierachu ti mari wari yaba cjihti jierara. Tuhsu, Cohamacu yare yoana tana mari pjacure mari jū dutipachuta, painare mari cahierachu marine yaba cjihti jierara.

⁴ Suaeraja painare cahīna. Tinare cahīna noano yoaja tinare. Tuhsu, painare cahīna tinare pahsu tieraja. Mari cahīro mehne jina “Mū yuhdoro jiro jija”, niina jieraja mari. Painare cahīna “Musare masi yuhdurucaja”, ni tuhotueraja mari tinare. ⁵ Ā yoa painare cahīna tinare ño payoro mehne yoaja mari. Painare cahīna “Sā cahmano sehe yoaja. Musa cahmano sehe yoaeraja”, nieraja mari. Tuhsu, tinare cahīna suaeraja mari tina mehne. Painare cahīna marine ñano ti yoachu cūhure tina mehne ā suarucueraja mari. ⁶ Painare cahīna ñaare ti yoachu ñuna wahcheraja mari. Noaa sehere quihōno ti yoachu ñuna tuaro wahcheja. ⁷ Painare cahīna ti ya buhiri ñano yuhdūpanahta tinare ā cahīrucu ja mari. Painare cahīna paina sehe tinare ti yahuwajachu tuhopanahta tīre tuho duaeraja mari. Painare cahīna “Tina ñaare yoasi”, ni tuhoutuja mari tinare. Painare cahīna ñano yuhdūpanahta tinare cahī duhusi mari.

⁸ Painare cahma cahīa ne pihtisi. Cohamacu yare masa mari yahua sehe baharo pihtia wahaahca. Tuhomahnoeraa duserire durucua cūhu baharo pihtia wahaahca. Cohamacu yare masa ti buheri cjiri cūhu baharo pihtia wahaahca. Painare cahma cahīa sehe ne pihtisi. ⁹ Mipure Cohamacu yare mari masi pahño masieraja. Ā jina to yare yahuna mari yahu pahño masieraja. Mari masi pahñohto duhsasinina mini. ¹⁰ Ā jina Cristo ñaa marieriro to tjua tari baharo mari masi pahñonahca. “Masieraja”, ni namosi.

¹¹ Mari masi pahñohto õ sehe jira: Nijinocã jicu nijinocã yoaro sehe durucumai yuhu. Nijinocã to yoaro sehe tuhoturucumai. Bũcuro wahaipu nijinocã to yoariro seheta duhunocai. (Tó seheta mari mipure “Masi pahñoeraja”, nipanahta baharopure masi pahñonahca.) ¹² Nõno to noano masu bajueraro seheta mipure noano masi pahñoerasinija mari. Baharo pairore noano mari ñu masino seheta mari masi pahñonahca. Mipure mari masi pahñohto marine duhsasinina mini. Cohamacu marine to noano masi pahñoriro seheta baharo mari cūhu noano masi pahñonahca. ¹³ ã yoana tiarore mari yoa masija mipure. Cohamacure wacū tua masija. ã yoa marine to yuhdũchu yoahtore masina, mari noano cohta masija. ã yoa painare cahma cahĩ masija. Ahri tiaro jira pototi mari yoahti. Tuhsũ, painare cahma cahĩna, ahri puaro yuhdoro yoana nija. Wacū tuaa, to yuhdũchu yoahtore cohtaa yuhdoro jira cahma cahĩna sehe.

Tũhomahnoeraa dũseri durucure yahuha Paulo

14 ¹ ã jina painare cahma cahĩina jiga musa. ã yoa Cohamacu yare musa noano yoa masihtore cahmaga musa. Cohamacu yare musa yahuhti pinihtare tuaro cahmaga musa. ² Tũhomahnoerari dũserore durucuriro Cohamacu mehne dihta durucura. ã ni durucuro masa mehne durucuro nierara tiro. To ã ni durucuchũ tuhoa masa sehe ne tuho ñahaerara tirore. Masa ti masierare Espĩritu Santo to tuaa mehne durucuro nina tiro. ³ Cohamacu yare yahuriro sehe masa sehere yahura. ã yahuro tiro masare yoadohoro nina. Tinare buhero nina tiro. Tuhsũ, ti ñano yuhdũchu tiro tinare wahchechũ yoara. ⁴ Tũhomahnoerari dũserore durucuriro cũirota buhera. Painare buhera. Cohamacu yare yahuriro sehe painare Jesu yainare buhero, yoadohora tiro.

⁵ Tũhomahnoeraa dũserire jipihtina musa durucuchũ noaboa, yũ tũho-tuchũ. Wiho mejeta Cohamacu yare musa yahuchũ pinihtare tuaro cahmaja. Cohamacu yare yahuriro pinihta tũhomahnoerari dũserore durucuriro yuhdoro painare yoadohora. ã jipachuta tũhomahnoerari dũserore durucuriro to durucure paio to yahu yuhdochũ tĩ sehe pototi painare yoadohora. To durucure yahu yuhdoriro jiro tiro sehe painare Jesu yainare buhero nina. ⁶ Tũhomahnoerari dũserore musa mehne durucucu paio musare to yahu yuhdoerachũ musare yoadohoeraboca yuhu. ã jicu Cohamacu yuhure to yahurire yahucũ, to yare yũ masiare yahucũ, payere to yare yahucũ musare yoadohoi nija. Tĩre musa tuhohto sehe musare buhecũ musare noano yoadohoi nija yuhu.

⁷ Tũhomahnoerari dũserore durucuriro to durucua ti putipea ti buaputẽa yoaro sehe jira. Carisure putina, arpare buaputẽna tĩre mari quihõno yoaerachũ tĩ basaare painare masihtõ basioerara. ⁸ ã yoa cornetare putiriro surara jiro ti cahma wajãhto panore quihõno to putierachũ paina surara sehe ti cahma wajãhtore masisi. ã jia ti cahma wajãhto pano ti wajãhtire wamoare cahnoyueraina jiahca tina. ⁹ Tó seheta musa cũhure tũhomahnoerari dũserore musa durucuchũ tuhoa, yahu yuhdoriro mariachũ paina tĩre ne masisi. Ti ã masierachũ musa durucua yaba cjihti jierara. ¹⁰ Ahri yahpai payũ dũseri durucua jica. ã jia tĩ dũserire durucuina ti basi ti ã durucure noano tũhora. ¹¹ To ya dũserore yũ tũhoerachũ ñũno tĩre durucuriro sehe “Pa dihta macariro jira”,

ni tuhuturohca yuhure. ¹² Ñ jicu yuhu cūhu āta ni tuhutuihca tirore. ¹³ Ñta jire musa cūhu tuhomahnoerari duserore durucuna. Espiritu Santo to tuaa mehne tuaro yoa duamana musa. To tuaa mehne ñ yoa duana paina Jesu yainare musa buhehti sehere tinare musa yoadohohti sehere tuaro cahmaga musa.

¹⁴ Ñ jiro tuhomahnoerari duserore durucuro to durucure to noano yahu yuhdohto cjihtore Cohamacure sinijaro tiro. ¹⁵ Tuhomahnoerari dusero mehne Cohamacure sinicu Espiritu Santo mehne sinii nija. Ñ sinicu yu tuhoutuare masi namochu yoeraja. ¹⁶ Ahrire masina, ñ sehe yoanahca mari: Espiritu Santo to tuaa mehne tuhomahnoerari dusero mehne Cohamacure sininahca. Tuhsu, pa tehe noano masi tuhutu paina ti noano tuhohto sehe ti ya durucua mehne Cohamacure sinina, tí cūhure sininahca tjoa. Espiritu Santo to tuaa mehne tuhomahnoerari dusero mehne Cohamacu yare basanahca. Tuhsu, pa tehe noano masi tuhutu paina ti noano tuhohto sehe ti ya durucua mehne Cohamacu yare basana, tí cūhure basanahca tjoa. ¹⁷ Mari ñ yoerachū tuhomahnoera duseri mehne Espiritu Santo tuaa mehne Cohamacure “Noariro, tuariro jira”, mari nipachuta paina ne tuhoerara. Ñ tuhoeraa “Tóihla jira”, ni masierara. ¹⁸ Tuhomahnoera duseri mehne Cohamacure “Noana”, ni masija mari. Mari ñ nia noaa jipachuta tíre yahu yuhdoerana painare buheraja mari. Ñ jina tinare yoadohoeraja mari. ¹⁹ Jipihtina musa yuhdoro yuhu sehe tuhomahnoeraa duserire durucuja. Ñ jicu Cohamacu yuhure ñ durucu masichu to yochu tirore “Noana”, nija yuhu. ²⁰ Ñ durucuro yu jipachuta Jesu yaina cahmachuina watoi yu jichu, tuhomahnoerari dusero mehne payu duserire yu nipachuta yaba cjihti jierara. Tí yuhdoro masa ti noano tuhohto sehe mahaa dusericā yu yahupachuta noa nina, yu tuhutuchū.

²¹ Yu coyea, macanacā tuho masieraina ti jiro sehe jiena tjiga musa. Wahma masa bajuaina ñaa yoare ti masieraro seheta jiga musa cūhu. Tuhsu, bucuna tuho masiina ti jiro sehe jiga musa. ²² Cohamacu yare ti joari pūi ñ sehe nina: “Tuhomahnoeraa duserire durucuinare ahrina masare yu yare yahu dutiiltjtja. Ñ yoa pa dihta macaina ya durucua mehne yu yare yahu dutiiltjtja ahrina masare. Tinare ti ñ yahupachuta ahrina yu yahuare tuhosi, nina Cohamacu mari pūhtoro”, nina Cohamacu yare ti joari pūi. ²³ Tuhomahnoeraa duserire durucua Jesu yainare Cohamacu tuaare masichu yoahiti cjihti jierara. Tí durucua Jesure cahmaeraina sehere Cohamacu tuaare masichu yoahiti cjihti jira. Ñ yoa Cohamacu yare yahua Jesure cahmaerainare Cohamacu tuaare masichu yoahiti cjihti jierara. Cohamacu yare yahua Jesu yaina sehere Cohamacu tuaare masichu yoahiti cjihti jira. ²⁴ Ñ yoa jipihtina musa Jesu yaina cahmachuchu tuhomahnoeraa duserire musa durucuchū tíre masieraina, paina Jesure cahmaeraina cūhu sāa ta tuhoboca. Ñ tuhoa “Tina tuho masieraina jira”, niboca musare tina. ²⁵ Jipihtina musa Cohamacu yare musa yahuchū pinihta tíre masierariro, Jesure cahmaerariro sāa ta tuhoru, to ñaa yoari buhirire masiboca tiro. Ñ masino to ñaa yoirire cahyaboca tiro. ²⁶ Ñ jiro potocā to jia tiare to tuhutua cūhure masiboca tiro. Ñ yaro Cohamacu panoi na tuhcuca caha suro, tirore ño payorohca. Tuhsu, “Cohamacu potocāta musa mehne jira”, ninohca tiro musare.

Musa cahmachuna noano yoaga dojomehneno marieno

²⁶ Ñ jicu yu coyea, musare ahrire nii nija: Musa Jesu yaina cahmachuna cāina musa mehne macaina Cohamacu yare basa duara. Ñ yoa paina musa

buhe duara. Tuhsu, paina musa Cohamacu musare to buheri cjirire yahu duara. Paina musa tuhomahnoerari duserore durucu duara. Tuhsu, paina musa tí duseri durucuare yahu yuhdo duara. Tí jipihtiare ã yoana musare tuhoina ti noano masihtu sehe tíre yoaga. ²⁷ Ñ jina tuhomahnoerari duserore musa durucuna puaro, tiaro tópeinata durucuga musa. Ñ yoana cãinata durucuga. Musa ã durucuchu, cãiro musa mehne macariro musa durucuare painare yahu yuhdojaro. ²⁸ Musa durucuare yahu yuhdoriro mariachu musa cahmachuna jipihtina musa tuhomahnoeraa duserire durucu duaina durucuen tjiã. Ñ jina masa marienoi Cohamacu mehne durucuga musa. ²⁹ Ñ yoa Cohamacu yare yahu duana puaro, tiaro tópeinata yahuga musa. Musa ã yahuchu paina musare tuhoina musa yahurire Cohamacu ya to jichu noano masijaro. Cohamacu ya to jierachu cãhure noano masijaro. ³⁰ Ñ yoa Espíritu Santo Cohamacu yare paireto tói dujirirore to yahu ducachu tiro cãhu Jesu yainare yahu duara. Ñ jiro Cohamacu yare yahu muhtariro sehe dihta marijaro. ³¹ Ñ jina jipihtina musa Cohamacu yare yahuna, cãinata yahuga musa jipihtina paina ti noano tuhohto sehe, ti noano wahchehto sehe. ³² Ñ jina Cohamacu yare yahuina jina, noano tuho masi, noano tuhotu dapo, durucuina jiga. ³³ Cohamacu to yaina ti cahmachunopu ti cahma wisiachu cahmaerara tiro. Dojomehnenno marieno ti noano jichu cahmana tiro.

Jipihtiropu Jesu yaina cahmachua, ñ sehe yoara tina: ³⁴ Ti cahmachunoi numiare masa panoi yahu dutierara. Tí numiare mari sehe durucu dutieraja. Cohamacu to joari pũ to niriro seheta numiare muare noano yuhtia numia jiro cahmana. Ñ jia cahmachunoi numia durucuea tjijaro. ³⁵ Jesu yaina ti cahmachunoi numia ti durucuchu ñaa nina. Ñ jiro paye barore masi duaro numino to ya wuhuputa to manunore sinitujaro.

³⁶ Ahri yu yahuhtire noano masiga musa. Cohamacu durucuare yahu ducaina jierara musa. Tuhsu, to yare tuhorina musa dihta jierara. Paina cãhu to ya buheare cjuara. ³⁷ Musa mehne macariro “Yuhu Cohamacu yare yuhuriri jija”, ni tuhoturiro jiro ahri musare yu joari cjiri Cohamacu to dutia jichu masijaro tiro. Tuhsu, paio “Espíritu Santo to tuua mehne yoa masija”, ni tuhoturiro jiro tiro cãhu ahri yu joari cjiri Cohamacu to dutia jichu masijaro tiro. ³⁸ Tíre to masi duaerachu yu joari cjirire “Potocã jierara”, to nichu tirore duhunocahga. Tuhoena tjiga tirore.

³⁹ Ñ jina yu coyey, Cohamacu yare yahuina musa jihtore tuaro cahmaga musa. Tuhsu, musa mehne macaina musa cahmachunoi tuhomahnoeraa duserire ti durucu duachu ã durucu dutiga tinare. ⁴⁰ Ñ cahmachuna noano, cahma dojomehnenno marieno yoaga musa.

Cristo to masa mujarine yahuha Paulo

15 ¹ Mipure yu coyey, noaa buheare musare yu yahurire musare wacũchu yoa duaja. Tí buheare noano cahmare musa. Ñ cahmana tí buheare ã yuhtirucure musa. ² Musa ã cahmachu tíre musa ã yuhtirucuchu Cristo musare pichacapu wahaborinare yuhduchu yoa tuhsure. Musa ã tuhori baharo Cristo yare musa duhunocachu tí musa tuhori cjiri yaba cjihti jierara.

³ Ñ sehe ni yahu muhtaihtja musare. Ahri wiho waro jierara. Musare buhecu yuhure Cristo to yahuri cjirire musare ñ sehe ni yahui: Cohamacu yare ti joariro seheta mari ñaa buhirire Cristo yariari jire. ⁴ Ñ yoa Cohamacu

yare ti joariro seheta Cristo to yariari baharo paina to pjacu cjirore copapure ti duhu payori baharo tia dacho jiboroi tiro masa wijaari jire. ⁵Tiro to ã masa wijaari baharo Pedrore bajuari jire. To ã bajuari baharo to buheinare bajuari jire tjoa. ⁶To ã bajuari baharo cã tahata quiniento bui jiinare to yainare tiro bajuari jire tjoa. Cãina tirore ñurina cjiri mipure yariarina cjiri jira. Ti ã jipachuta payu tina mehne macaina cjiri mipure jisina. ⁷Baharo Cristo Santiagore bajuari jire tjoa. Æ to bajuari baharo jipihtina to buhe duti to cãri-nare bajuari jire tjoa.

⁸Jipihtina painare to bajuari baharo yuhu cãhure bajuare tjoa. Wihãirocã to quihõri dachoi masa bajuerarirocã to masa bajua nãnu tiro sehta yuhu cãhu Jesure wacũ tua nãnu tiro jija. Yu ã jiriro jichũ ti baharopũ bajuare Jesu yuhu cãhure tjoa. Yuhureta tiro bajua batoare juna. ⁹Panopure Jesu yainare ñano yoamai. Æ yoiro cjiro jicu paina Jesu to cãrina jipihtina ti docapu waro jija yuhu. Æ jicu mipu cãhure Jesu buhe duti to cãboriro jieramaja yuhu, yu tuhotuchũ. ¹⁰Æ jipaihta Cohamacu yuhure to cahĩchũ mipure Jesu to cãriro jija yuhu. Æ jicu tiro yuhure to cahĩchũ mipure to cahmaare yoa pahñoja. Æ jicu yuhure to cahĩchũ to yairo ã jinocai nieraia. Jipihtina paina to cãrina yuhdoro yuhu sehe tuaro buhei. Æ buhecu yu mũ suro buhe-rahĩ. Cohamacu yuhure cahĩno yuhure yoadohore. ¹¹Yuhu sehe ahri buheare yu buhechũ tuhorina jiboca musa. O paina sehere tuhorina jiboca musa. Æ jipachuta yuhu, yuhu mehne macaina cãhu cãno potori ahri buheare buheja sã jipihtina Jesu to cãrina. Æ sã buhechũ tuhona musa sehe ahri buheare noano tuhore.

Yariarina cjiri ti masa mujarine yahuha Paulo

¹²Cristo to yariari baharo to masa mujarine sã buhepachuta “Yariarina cjiri ne masa mujaerara”, nina musa mehne macaina cãina. ¿Dohse jiro baro ã nijari tina tĩre? ¹³Æ jiro yariarina cjiri ti masa mujaerachũ Cristo cãhu ne masa mujaeraboa. ¹⁴Æ yoa Cristo to masa mujaerachũ noaa buheare sã yahuri cjiri ne yaba cjihti jieraboa. To masa mujaerachũ tirore musa wacũ tuaa cãhu yaba cjihti jieraboa. ¹⁵Masa mujano mariachũ sã sehe Cohamacu yare mahõna niboia. Yariarina cjiri ti masa mujaerachũ Cohamacu sehe Cristore masa mujachũ yoaeraboa. To ã yoaerachũ “Cohamacu Cristore masa mujachũ yoiari jire”, sã nina mahõnoina jiboa sã. ¹⁶Yariarina cjirire Cohamacu masoe-raro, Cristo cãhure tiro masoeraboa. ¹⁷Æ jiro Cristo to masa mujaerachũ tirore musa wacũ tuaa yaba cjihti jieraboa. Æ yoa musa ñaa yoiari buhiri buhiri tiina jisiniõboa musa. ¹⁸Masa mujano mariachũ Cristo yaina cjiri yaria muhtaina cjiri pichacapu waha tuhsuõboa. ¹⁹Cristore mari wacũ tuari baharo mari yariana masa muja masierana jipihtina paina masa yuhdoro pjacuõina jiboa mari sehe.

²⁰Potocãta Cohamacu Cristore masa mujachũ yoiari jire. Cristo to masa mujari baharo mari cãhu yarianapu masa mujahtina tjija. Tiro ã masa mujano, marine suho masa muja muhtariro jira. ²¹Õ sehta jira ahri: Adão mehne masa yaria dũcaha. Tó sehe Jesu mehne yariarina cjiri masa mujaahca. ²²Adão yaina ji nũnu tiinapu mari jipihtina yarianahca. Tó sehta Cristo yaina mari jichũ mari yariari baharo marine masa mujachũ yoarohca Cohamacu. ²³Cãa curuari Cohamacu to quihõriro mũ suchũ masa mujaahca.

Cristo marine suho ji muhtariro masa muja muhtari jire. Baharo tiro ahri yahpapu to tjua tachu mari to yaina cuhu masa mujanahca. ²⁴Ti pjata pihtiri dacho jirohca. A jiro jipihtina naina puhtoare, dutiinare, tuainare cohano Cristo yuhdurucarohca. To a yoari baharo jipihtina bui to puhtoro to jirire Cristo wiarohca Cohamacu to Pucurore. ²⁵To wiahto pano to Pucuro Cristore nu tuhtiinare to yuhduruca pahnohto pano Cristo pinihta jipihtina bui puhtoro jirohca. A jirota jiro cahmare tiore. ²⁶Tiore nu tuhtiinare to yuhdurucari baharo, yariaro cuhure cohatoarohca tiro. Yariaro pihtia waharohca. Pari turi yariasi masa. ²⁷Jipihtina bui dutihtiro cjihtore curi jire Cohamacu Cristore. Jiphtia puro cuhure curi jire tiore. Ata nina Cohamacu yare ti joari pui. Cohamacu sehe tiore curo jira. A jiro "Jipihtina bui dutihtiro cjihtore curi jire tiore" nino, "Cohamacu bui dutiro jira tiro", nino nierari jire to yare ti joari pui. ²⁸Jipihtina bui dutiroto Cristo Cohamacu macuno to jichu Cohamacu tiore curo sehe to macuno bui dutiroto jirohca. A jiro Cohamacu sehe jipihtina bui puhtoro waro jira. Jiphtia puro cuhu jira.

²⁹¿Masa mujano mariapachuta dohse yoa paina masa yariarina cjiro ya cjihtire ti bautisarina jiji? Yariarina cjiro masa mujaerachu ti ya cjihtire paina bautisarina ti jichu ti yaba cjihti jieraboa.

³⁰Sa sehere sa buheri buhiri dachoripe paina sare ti nana yoa duachu cua nina sa cuhure. Sare a cuapachuta masa mujano to jichu masina a buherucua sa. ³¹Yu coyea, mari puhtoro Jesucristo yaina masa jichu tiore wacu tua namoina masa wahachu yuhu sehe tuaro wahche tuhoutuja musare. Ti potocata jira. A yoa, "Dohse jiro nemi yuhure yariahto cua nina", yu nichu ti cuhu potocata jira. ³²Efeso macaina suaina noaa buheare yu buheri buhiri yuhure tuhti, cahre. Masa mujano mariachu Jesu yairo yu jierachu, yu a nana yuhduri yaba cjihti jieraboa. Wiho waro nana yuhdui nibo yuhu. Yariarina cjiro ti masa mujaerachu o sehe nibo mari: "Baharo curero yarianahca. Dohse wahasi mari. A jina chu sihnijihna. Mari mu suro yojihna", nibo mari.

³³Mahnoare tuhoutuena tjiga masa. "Nainare piti tina, noaa masa yoa tiare duhunahca masa", nina masa. Ti potocata jira. ³⁴Noare tuhoutuena tjiga masa. Tuhsu, noare yoina tjiga tjoa. A yoa naare yoa namoena tjiga tjoa. Caina masa mehne macaina sehe ne Cohamacu masierara. Masa buo tilto sehe musare a nija.

Yariarina cjiro masa mujaina ti pjacuri cjihtire yahu namoha Paulo

³⁵A yoa masa mehne macariro o sehe ni sinituboca yuhure: "¿Dohse yoa yariarina cjiro masa mujaahcari? ¿Dohse jia pjacuri masa mujaahcari?" ni sinituboca. ³⁶A siniturito tuho masierarito sehetu bisiro coa tara. Toari yapare mari toari baharo ti yapa baro cahachu waro dura. To sehe wahararo ne dusi. Tire masina masa. ³⁷Bucu yucupure toeraja mari. Pja yapari dihtare toaja mari. Ti yapari trigo yapari jia ji, o paye yapari baro jia jiboca. ³⁸Ti yaparite mari toari baharo Cohamacu to cahmarito sehetu ti yaparite bucu mujachu yoara. A yoaro mostaza yaparite mostaza yucu wahachu yoara tiro. Trigo yaparite trigo yucu wahachu yoara. Ata du dutira Cohamacu. ³⁹Jipihtina pjacuri cuno poto bajuerara. Masa pjacuri sehe cuno sehe jira. Wahiquina pjacuri cuhu soro sehe bajura. Minichahca pjacuri cuhu soro sehe bajura. Wahi cuhu soro sehe pjacuri tira.

⁴⁰ Æ yoa muano macaa poca cūhu soro sehe bajura. Tuhsu, ahri yahpa macaina cūhu pjacu tira. Æ yoa muano macaina pjacuri soro sehe bajura. Æ jia ahri yahpa macaa muano macaa yoaro sehe jierara. ⁴¹ Õ sehetä jira. Sū dacho macariro si sitera. Æ yoa ñami macariro cūhu soro jira. Potota buhriara. Tuhsu, ñahpichoha poca cūhu soro sehe bajua si sitea cjuara. Ñahpichoha poca peri cūhure mari ñachu cāa poca pjiroca sia poca bajura. Æ yoa paye poca tuaro sia poca bajura. ⁴² Tó sehetä jira yariarina cjiri ti masa mujachu. Masuno to pjacure mari yari baharo to pjacu baa waharohca. Baharo pa pjacu soro jiri pjacu jipihtia dachoripe catihtti pjacu masa mujanohca. ⁴³ To pjacure mari yachu yariariro cjiro pjacu nina. Cohamacu tirore to masochu to pjacu noa yuhduari pjacu jira. Tuhsu, to pjacu mari yari pjacu wiho jiri pjacu jira. Cohamacu tirore to masochu pinihtare to pjacu wiho jiri pjacu jieraro, tua yuhduara. ⁴⁴ Ahri yahpa macari pjacure mari yachu tiro yariariro cjiro to masa mujachu to pjacu muano macari pjacu jirohca. Ahri yahpa macari pjacure mari cjuana, muano macari pjacu cūhure cjuanahca, masa mujana.

⁴⁵ Õ sehe ni yahura Cohamacu yare ti joari pui: “Ahri yahpai ji muhtariro Adão wama tiroiro catiriro wahaa tiha”, ni joaa tiha. To ã jipachuta Adão yoaro sehe jiri bato tiroiro Cristo sehe catiare waro tari jire. ⁴⁶ Ahri yahpa macari pjacu ji muhtari pjacu jira. Baharopu muano macari pjacu jirohca. ⁴⁷ Õ sehetä jira: Ji muhtariro Adão sehe ahri yahpa macariro dihta mehne to yoari pjacure pjacu tiri jire. To baharo tariro, Cristo sehe muanopu tari jire. ⁴⁸ Dihta mehne ti yoari pjacu ti muhtariro to jiri sehetä jipihtina paina dihta mehne to yoari pjacu tiina jija mari. Æ yoa muanopu tariro yoaro sehetä to yaina jipihtina to yoaro sehe pjacu tiina jinahca mari. ⁴⁹ Dihta mehne to yoari pjacu tiroiro Adão yoaro sehe bajuja mari. Baharo muano macariro Cristo yoaro sehe bajunahca mari.

⁵⁰ Yu coyea, musare ahrire yahu duaja: Ahri yahpa macari pjacu di mehne, dihi mehne jiri pjacu puhtoro Cohamacu to suho jiropure muanopure ne wahasi. Mari pjacuri baahti pjacuri jira. Æ jia muanopu jipihtia dachoripe mari jihtopure ahri pjacuri wahasi. ⁵¹ Panopure masa ti masierari cjirire mipure musare yahu duaja: Mari mehne macaina cāina yariasi. Æ jina dóicāta, mari pjacurire cohtotaina jinahca. ⁵² Corneta to puti batoari dachoi āta waharohca marine. Dóicāta, mari capari wihmitjiā mari ñu pjōorocaro sehe ò sehe waharohca. Corneta to bisiri baharo yariarina cjirire Cohamacu masonohca jipihtia dachoripe mari jihtina cjihtire. Tuhsu, mari pjacurire cohtotaina jinahca mari cūhu. ⁵³ Mari pjacurire to cohtotachu tó pano mari baahti pjacuri ti jipachuta mari cohtotari baharo ne baasi. Æ yoa mari pjacuri ti cohtotachu tó pano mari yariahti pjacuri ti jipachuta ne yariasi. ⁵⁴ Mari bahti pjacuri ne baerahti pjacurire cohtotarohca. Æ yoa mari yariahti pjacuri ã jirucuhti pjacurire cohtotarohca. Marine to ã cohtotachu panopu to joariro sehetä ã waharohca: “Ñaina mari jiri buhiri tiare Cristo to cohā pahñori baharo, Cohamacu yariarore cohānocari jire. ⁵⁵ Ne pari turi mari yariasi. Æ jina yariaro mehne pari turi ñano yuhdusi mari”, ni joaa tiri jire panopure. ⁵⁶ Mari ñaa buhiri jichu pinihta yariaropu ñano yuhdunahca. Æ yoa Cohamacu dutia Moise cjirore to cūri cjirire mari masiri baharo, buhiri tija mari. Æ jiro marine pichacapu waha dutira Cohamacu dutia. ⁵⁷ To ã dutipachuta

mari puhtoro Jesucristo sehe marine pichacapu wahaerachu yoara. To a yoariro jichu masina Cohamacu mehne wahche "Noana", nija mari.

⁵⁸ A jina yu coyea, yu cahina, Cristore wacu tua duhuena tjiga. A yoana paina musare noaa buheare ti cohã dutichu, ne cohãena tjiga tîre. A yoa dachoripe mari puhtoro Jesucristo to yoa dutirire noano yoarucuga musa. Mari puhtoro Jesucristo yare mari yoachu, ahri wiho waro jierara. Ahrire masina to yoa dutirire noano yoarucuga musa.

Painare Jesu yainare Corinto macaina niñeru ti wahtire yahuha Paulo

16 ¹ Mipure painare Jesu yainare musa niñeru wahtire yahu duaja musare. Galacia yahpa macainare Jesu yainare yu dutiro sehetu musa cûhu yoaga. ² Somanaripe domingo jichu jipihtina musa Jesu yainare wahti cjihti niñerure mahanocã waga. Mahanocã cjuana mahanocã waga. A yoa pji curero cjuana pji curero waga. Somanaripe musa a yoachu musa cahapu yu suchu musa warocahti cjihti niñeru ji tuhsurohca. ³ Musa wahtire, musa warocah-tina cûhure yahuri pûre joaihtja. A jicu musa cahapu sucu tí pûre Jerusalêpu wahahtinare musa beserinare wahtja. A wa tuhsucu Jesu yainare musa waro-cari niñerure nahtina cjihtire tinare warocaihtja Jerusalêpu. ⁴ Tí macapure yu yohti jichu yuhu cûhu wahahtja. Yu a wahachu yuhu mehneta tina wahahtja.

To tinihto cjihtore yahuha Paulo

⁵ Macedonia yahpa macainare masa boca yuhduihca yuhu tinare. Yuhdu wahcã, musa cahai Corintopu suihca. ⁶ Tópû sucu musa mehne mahaa dachor-icã jiboca yuhu pa tehe nicu. Yoa cureri pja puhiro puro musa mehne jiboca yuhu. A jina pa sehêpu yu wahachu musa cûhu yuhure yoadohoroca masina. ⁷ Mahaa numuricã ji duaeraja yuhu musa mehne. A jicu Cohamacu cahmachu yoa cureri pja musa mehne jiihtja yuhu. ⁸ A ji duapaihta Pentecoste bose numuri jichupu Efesoi jisiniihca yuhu. ⁹ Oi Efesoi mipure mari puhtoro Jesu yare tuho duaina payu jira. Ti a tuho duachu tinare yahuja. Yu a yahuchu yuhure nu yabiina payu jira.

¹⁰ Timoteo yu yoaro sehetu mari puhtoro yare yoara. To a yoariro jichu musa cahapu to suchu noano mehne tirore piti boca, tiro mehne noano wahchea mehne jiga musa. ¹¹ A yoana tirore nu yabiro marieno noano mehne piti bocaga musa. Tuhsu, to coha sitichu noano mehne tirore yoadohorocaga yu cahapu to tjua tachu. Tiro paina Jesu yaina mehne ti tahtore cohtana nija sã. A jina noano mehne yoadohorocaga tinare.

¹² Apolo mari coyeiro Jesu yairo musare to ñuno wahachu tuaro cahma-mahi. A jicu tirore waha dutimahi paina Jesu yaina mehne to wahahto cjihtore. Yu a waha dutipachuta mipure tiro waha duaerare. A jiro baharo tirore yoaa mariachu musa cahapu waharohca tiro.

Paulo noa duti batoaha

¹³ Noano wacu masiga musa. Cristore wacu tua duhuena tjiga musa. Ne cuieraina jirucuga musa. A yoa Cohamacu tuua mehne wacu tuaina jirucuga musa. ¹⁴ Dohse jiare musa yoana, painare cahia mehne tîre yoaga musa.

¹⁵ Mipure yu coyea musare ahrire yahu duaja: Estéfana ya wuhu macaina Acaya yahpa macaina noaa buheare tuho muhtaina, ti ya yahpai Cristore

wacū tua muhtaina jire tina sehe. Tuhsu, painare mari coyeare Jesu yainare noano yoadohorucure tina. Tíre musa masina. ¹⁶Tina yoaro sehe jiinare, paina Cristo yare yoadohoinare musa noano yuhtichu cahmaja yuhu. ¹⁷Estéfana, Fortunato, Acaico cūhu yu cahapu wihi tuhsuhre. Ōi ti jichu pjíro mehne wahcheja yuhu. Musa mariachu musare tuaro wacūi nimahi yuhu. Ā jicu tina ti wihichu wahcheja yuhu. ¹⁸Tina mehne jicu noano yajeripohna tiroiro wahahi yuhu musa cūhu tina mehne musa wahcheriro seheta. Tinare noano ño payoa mehne tuhoga musa. Ā yoa paina tina yoaro sehe jiina cūhure ño payoa mehne tuhoga.

¹⁹Asia yahpa macaina Jesu yaina musare noa dutira. Ā yoa Aquila, Priscila, ti ya wuhui cahmachuina mehne Cristo to cahña mehne musare pjíro noa dutira. ²⁰Ō macaina Jesu yaina jipihina musare noa dutira. Musa mehne macainare noano mehne piti bocasinia.

²¹Yuhu, Paulo yu basi ahri dihtare joaja. Musare noa dutija.

²²Mari puhtoro Jesucristore paio to cahñerachu, Cohamacu tirore buhiri dahrejaro. Mari puhtoro cjero tjua tajaro.

²³Yu coyea mari puhtoro Jesucristo musare jipihinare to cahña mehne noano yoajaro. ²⁴Yuhu Jesucristo yairo jicu, to yaina musa cūhu musa jichu musare tuaro cahña.

2 Corintios

Õ sehe ni joarocaha Paulo Corinto macainare

1 ¹Yuhũ Paulo Jesucristo buhe dutiro to cūriro jija. Cohamacu to cahma-riro seheta cūre yuhũre Jesu. Yuhũ, mari coyeiro Jesu yairo Timoteo mehne musare Cohamacu yainare, Corinto macainare joarocaja tjoa. Jipih-tina Cohamacu yainare Acaya macainare musa cūhũre joarocaja. ²Ã jina Cohamacu mari Pucu, mari puhtoro Jesucristo mehne musare noa dutija. Cohamacu to cahĩa mehne to yoadohoa mehne noano jiga musa.

Paulo to ñano yuhdũrire õ sehe ni yahuha

³Mari puhtoro Jesucristo Pucuro Cohamacu marine pja ñuna. Ã jiro tiro marine ã yoadohorucura. “Noa yuhduariro jira tiro”, nijihna mari. ⁴Mari ñano yuhdũchu ñano jipihinare marine to yainare yoadohora tiro painare mari yoadohohto sehe. Cohamacu marine to yoadohoa mehne mari cūhũ paina cūhũre yoadohonahca. ⁵Cristo yaina mari jiri buhiri mari ñano yuhdũchu tiro tuaro yoadohorohca marine. ⁶Sã sehe musare yoadohona ñano yuhdũja. Cristo mehne musa yuhduhto sehe musare sã yahuri buhiri ñano yuhdũja. Ã yoa Cristo sãre to yoadohochũ sã sehe musa cūhũre yoadoho masija. Ã jina sã ñano yuhdũriro seheta musa cūhũ ñano yuhdũna, noano mehne cūno pjanahca musa. ⁷Noano mehne musa cūno pjahtore sã masija. Sã ñano yuhdũriro seheta ñano yuhdũre musa cūhũ. Ã jina Cohamacu to yoadohoa mehne wahche, sã cūno pjariro seheta musa cūhũ wahchena, cūno pjanahca.

⁸Sã coyea, mipure ahri yu yahuhtire musa noano masichũ sã cahmaja. Asia yahpai ñabiario yuhdũĩ sã. Õ sehe ni tuhutumai sã: “Ne bihosi mari. Ne cūno pjasi. Ã jina mari yarianahca”, ni tuhutumai sã. ⁹“Marine wajānocaahca”, ni tuhutumai sã. Ã ñano yuhdũna Cohamacu dihtare tuaro sã wacũ tua namoi. Sãre ti ñano yoachũ cahmaha Cohamacu tirore sã wacũ tua namohto sehe. Tiro sehe yariainare masoriro jira. Ã tirore wacũ tuana sã mu sũro sã cūno pjaerarire masija. Cohamacu sehe marine yoadohora. ¹⁰⁻¹¹Sãre cuabiaro jipachuta to yoadohoro mehne sã yuhdũĩ. Baharopũ cūhũre pari turi sãre yuhdorohca. Sãre Cohamacure musa sini payochũ tiro sãre yoadohorohca. Sãre to yoadohohtore masija sã. Ã jina sãre to yoadohochũ ñuna, tirore “Noana”, ninahca musa. Payũ musa sini payorire to yuhhtichũ ñuna wahche, “Noana”, ninahca musa Cohamacure. Payũ paina cūhũ āta niahca.

Paulo Corintopũ to waha duamarire yahuha

¹²Musa mehne sã jirire wacũna wahchea mehne õ sehe tuhoutuja sã: Ahri yahpai Cohamacu to yoadohoa mehne mahñono marieno noano mehne

masare piti ti buhehi. Musa pinihtare noano piti ti buhei. Õ sehe yoana sã mu sũro sã masia mehne yoerahi. Cohamacu cahia mehne to tuaa mehne ã yoahi. ¹³⁻¹⁴ ã yoana noano yahu joarocahi musare, noano musa masihtõ sehe. Mipũ sãre musa masi pahñohto duhsasinina mini. Sã jia tiare musa noano masichũ tuaro cahmaja sã. ã sãre noano masina, mari puhtoro Jesu to tjua tachũ sã mehne wahchenahca musa. Musa mehne sã wahcheriro seheta musa cũhũ sã mehne wahchenahca.

¹⁵⁻¹⁶ Õ sehe nicu Macedonia yahpapũ waha duamaja yuhũ. ã wahacu musare ñũ yuhdu wahcã duamaja yuhũ. ã jicu tópure suricu tjua tacu pari turi musa mehne mahaa numuricã jiboca yuhũ. ã jina pua taha musa mehne yũ jichũ ñũna pjíro yuhũ mehne musa wahcheboca. Baharo musa cahapũ jiricu Judea yahpapũ yũ wahachu ñũna yuhure yoadohoboca musa. ¹⁷ “Wahaihtja”, yũ nichũ tuhõrina jina musa cahapũ yũ suerachũ ñũna “Paulo mahñoño niri jira”, ¿ni tuhõtjari musa? “Wahaihtja”, nicu yũ mu sũro ã nicu nieraja yuhũ. “To niriro seheta yoerara”, ¿yuhũre ni tuhõtjari musa? ¹⁸ Õ sehe ni mahñoriro jieramaja yuhũ. ã jicu “Yoaihtja”, nicu yũ niriro seheta yoaja yuhũ. Tíre masina Cohamacu. ¹⁹ Yuhũ, Sila, Timoteo mehne Jesucristo Cohamacu macũno yare musare yahui sã. Cristo sehe “Yoaihtja” nino, quihõno yoiriro jiro nina. Cohamacu to niriro seheta Cristo yoara. ²⁰ Jipih-tiare Cohamacu to yahurire Cristo yoa pahñohta. To ã yoiriro jichũ ñũna Jesu yoadohoro mehne to yare sã painare “ã tjira”, ni yahuja Cohamacure ti ño payohto sehe. ²¹ Cristo yaina marine jirucuchũ yoiriro Cohamacuta jira. ã jiro to yare yahuhtinare sãre besere tiro. ²² ã yoa to yaina mari jiare ñũno tíre marine masichũ yoara tiro. ã yoaro, Espíritu Santore mari mehne ji dutire tiro. Mari mehne jiro tirota marine Cohamacu to yuhdohtore masichũ yoara.

²³ Mipũre poto yahuihtja musare. Poto yũ yahuerachũ Cohamacu sehe musare poto yahujaro. Tirota yũ tuhõtjare masina. Musare tuhti duaeracu musa cahapũ wahaerahi. “Musare cahyachũ yoari”, nicu musa cahapũre Corintopũ wahaerahi. ²⁴ ã jina “Musare wacũ tua dutiina jija sã”, nina nieraja. Cristore noano wacũ tua tuhsure musa. ã jina “Õ sehe Cristore wacũ tuaro cahmana musare”, nina nieraja sã. Musare yoadoho duaja sã musa noano wahchehto sehe.

2 ¹ ã jicu õ sehe ni tuhõtuhi: “Pari turi tinare cahyachũ yoa duaeraja. ã jicu mipũre wahaeraja”, ni tuhõtuhi. ² Musare cahyachũ yoa duaeraja. Musa cahyachũ ñũcu yuhũ sehe musare wahcheraboa. ã jina yuhure wahchechũ yoachtina jieraboa musa sehe. ³ ã jicu musa cahapũ wahaerahi. Wiho mejeta musare wiho joaroca bahrañohti. Musa yuhure wahchechũ yoachtina jipanahta yuhure cahyachũ yoaboa musa, musa cahapũ yũ suchũ. Musa mehne yũ wahchechũ, musa cũhũ wahchenahca. Tíre masija yuhũ. ã jicu mipũre musa mehne cahya duaeracu wahaerahi musa cahapũ. ⁴ Pjíro tuhõtucũ, ñãno yajeripohna ticũ, tuaro yahco mehne musare joarocapacuta musare cahyachũ yoa duaerahi. Musare tuaro yũ cahĩrire musare masichũ yoa duacu musare joarocahi.

Tina mehne macariro to ñãno yoirire bo dutiha Paulo Jesu yainare

⁵ Cũiro musa mehne macariro yuhure cahyachũ yoiriro jire. Wiho mejeta musare to tuaro cahyachũ yoiriro seheta yuhũ sehere pjíro cahyachũ

yoerare tiro. Ñ ñano yoiaro cáina musa sehere tua curero cahyachu yoa-yuhti. “Tua curero”, nija yuhdo curero yahu duaeracu. ⁶Payu musa mehne macaina tirore buhiri dahre tuhsuyuhti. Tó purota buhiri dahre duhuro cahmana tirore. ⁷Tirore musa buhiri dahrerucuchu tuaro cahyaboca tiro. Ñ jiro Cristo yare duhuboca. Ñ jina to ñaa yoiare boga musa. Tirore yoadohoga to wahchehto sehe. ⁸Tuhsu, tirore noano yoaga musa tirore musa cahĩre to masihtu sehe. Musa ã yochu tuaro cahmaja yuhu. ⁹Tó pano musare joarocacu “¿Potocāta yuhure yuhtiahcari?” nicu ã ni yahu joarocahi musare. Yuhure musa yuhtichu ñu duacu musare ã ni joarocahi. ¹⁰Mipure to ñaa yoiare musa bochu ñacu yuhu cūhu tíre boihtja. Yuhure ñano yoiarari jire tiro. Musa sehere ñano yoayuhti. To ã jiro jipachuta to ñaa yoiare boja yuhu cūhu. Musare noano yoadoho duacu Cristo to ñurocaroi to ñaa yoiare boja. ¹¹Tíre boja Satana marine to yuhduracaeraho sehe. Tiro marine ñaare yochu cahmana. Tíre noano masija mari. Ñ jina Jesu yaina ti ñaa yoiare wacūrucueraja mari, “Tinapu Satana yare cahmari”, nina.

Tróade wama tiri macai jiro Titore bocaeraro pjíro cahya tuhoutuha Paulo

¹² Ñ yoa Tróade wama tiri macapu sui Cristo yare buhe duacu. Tópu yu jichu payu masa noaa buheare tuho duaina jire. Mari puhtoro to yoadohoa mehne to yare yu buhehtina payu masa jire. ¹³ Ñ jipachuta mari coyeyore Titore bocaeracu pjíro cahya tuhoutu. Ñ jicu tó macainare coha siti tuhsucu Macedonia yahpapu wahai.

Cristo to yoadohoa mehne ñaare yoiarucueraja mari

¹⁴ Ñ yoa Cohamacu Satanare to yuhdurucari baharo mari cūhure tirore yuhdurucachu yoiara, Cristo mehne ñaa yoaare marine duhuchu yoiaro. Surara mahapu pari pohna wahaga ti yuhdurucarire ti yoa ñono sehetu mari cūhu Cohamacu mehne Satanare mari yuhdurucarire yoa ñona nija Cohamacu mehne. Ñ jina “Noana”, nija tirore. Ñ jina Cohamacu marine to dutichu masina jipihtiropu Cristore masare masichu yoaja mari. Ñ tirore masia tina noano wahchera me sitiare ti wahcheriro sehetu. ¹⁵ Cristo yaina jina, Cohamacu sehere wahchechu yoaja mari, me sitiare mari wahcheriro sehetu. Ñ jia Cristo yaina mari jia tiare ñu masina paina Cohamacu to yuhdohtina. Paina ti ñaa buhiri pichacapu wahahtina cūhu Cristo yaina mari jia tiare ñu masina. ¹⁶ Cristo yaina mari jichu ñua, ti ñaa buhiri pichacapu wahahtina sehe pichacapu ti wahahtore masina. Cohamacu to yuhdohtina sehe marine Jesu yainare ñua jipiehtia dachoripe tiro mehne ti jihtore masina. Ñ jia Cristo ya wiho jia buhea jierara. Ñ jiro ahrire Cristo yare to mu suro buhe sohtori tiro ne mariahna. ¹⁷ Payu paina Cohamacu yare buhemana niñerure wapata duaa. Sã sehe tina yoiaro sehe yoiaraja. Mahñono marieno Cristo to tuua mehne to yare buheja sã. Cohamacu sãre to cūchu to ñurocaroi noano buheja sã.

3 ¹ Pari turi sã jia tiare musare yahuna nijari sã, musa tuhoutu? Paina musare ti buhehto pano ti jia tiare masi duana ti joari pūre cahma muhtare musa. Sãre masi tuhsura musa. ¿Sãre masipanahta tí pū barore cahmajari musa? ¿O paina cahapu sã buhena wahana tí pū barore sãre nano cahmajari, musa tuhoutu? ² Tí pū barore cahmaeraja sã. Musa sehere jipiehtina

paina ñua musare sã noano buherire masiahca. Musare sã buhechu Cristo yaina ji ducare musa. ³ ã jina tí pũ baro yoaro sehe jira musa sehe. Cristo painare to joarocari pũ yoaro sehe jira musa. Tí pũre tiro to joarocaboro sehetã, Espiritu Santo tuua mehne musa jia tiare noano cohtotachu yoari jire Cristo, painare to tuaare ñono taro. Potota tinta mehne to joarocari pũ yoaro sehe jierara musa. Cohamacu catiriro waro to Espiritu Santo mehne musare cohtotachu yoaro, joarocari pũ painare to joaroca ñono sehetã, musa sehe Cristo yaina wahana, to yare musare sã quihõno buherire noano ñona painare. ⁴ Ahrire jipihtiare michapucacã yũ ni joarire tuhoutuja sã Cohamacure noano wacũ tuana. Cristo to yoadohoa mehne ã wacũ tuarucuja sã. ⁵ “Sã mũ suro ahri dahraare yoaja sã”, ni masieraja sã. Cohamacu to yoadohoa mehne bihoja sã.

⁶ Mipũre to yahuare noaa buheare Cohamacu sehe noano sãre buhe masichu yoara. Ahri buhea panopũ to dutia to joari cjiri yoaro sehe jierara. Noaa buhea sehere buheja sã. Panopũ to dutirire mari mũ suro ne bihoeraja. ã mari bihoerari buhiri pichacapu wahaboa mari. Noaa buhea sehere tuhona Espiritu Santo to yoadohoa mehne Cristore wacũ tuaja. ã wacũ tuana jipihtia dachoripe Cohamacu mehne jirucunahca mari.

⁷ Cohamacu to dutiare cũno tãa pjĩnipũ joa õ tuhsũ, Moise cjirore cũri jire. To ã cũri baharo to si sitea bajuari jire. Moise cjiro wũhduã si siteri jire. Minoa yũhduari jire. Baharo tí si sitea pihtia wahari jire. Baharo to si sitea to pihtia wahahto to jipachuta wahmanore to wũhduare masa ne ñuroca õa bihoerari jire. Tí dutiare masa ti yoa pahñoerari buhiri pichacapu wahahtina jia tiri jire. ã jia tí dutia masare pichacapu waha dutipahta, tuaro si sitea mehne ji ducari jire tí dutia. ⁸ Tí dutia yũhdoro noaa buhea sehe noa yũhduara. Ahri buheare painare mari buhechu ti noano tuhochu Espiritu Santo tina mehne jirohca. ã jia panopũ macaa dutia yũhdoro Cristo ya sehe noa yũhduara. ⁹ Cohamacu dutia panopũ macaa masare pichacapu waha dutiri jire. ã dutipahta Cohamacu tuua mehne to si sitea mehne ji ducari jire. Tí yũhdoro noaa buhea sehe Cohamacu to tuua mehne jira. Tí buhea mehne noaina wahara masa Cohamacu to ñuchũ. ¹⁰ Panopũ Cohamacu to dutiri cjiri sehe wiho jia dutia yoaro sehe tjuanocahna mipũre noaa buhea mehne mari ñũ piti bocachu. Noaa buhea sehe noa yũhduara. ¹¹ Panopũre to dutia yoa cureri pja si sitea jirucuma, pihtia wahaha. Tí dutia yũhdoro noaa buhea sehe noa yũhduara. Tí buheare noano tuhona, Cohamacu mehne ã jirucunahca.

¹²⁻¹³ Mari ã jirucuhtore masina, cuiro marieno noaa buheare noano yahu pahñonocaja sã. Moise cjiro sehe sã yoaro sehe yoaerari jire. “ ‘Cohamacu to si sitea pihtiro nina’, Israe masa ni ñuri”, nino to wũhduare ducatarari jire Moise cjiro. Sã sehe tiro yoaro sehe yoaeraja. Cuiro marieno, ducataro marieno to yare noaa buheare buheja sã. ¹⁴ Tí pjapũ macaina Israe masa sehe ne masiera tiri jire. Mipũ cũhure Cohamacu yare panopũ to joaa pũrine tina buhea, ne masierara. Moise cjiro to wũhduare to ducatachu Cohamacu to si siteare ti ñuroca òerariro sehetã tina noaa buheare noano masierara. Cristore cahmaeraa, masisi tina. Tiore noano wacũ tuua, tí pja pinihta to yare masiahca. ¹⁵ Mipũ cũhure Israe masa Cohamacu dutia Moise cjirore to cũrire buhea, tinare ducataro sehetã noaa buheare ti tuhoborore ducatarã. ¹⁶ Mari sehe mari puhtorore mari cahmachu tirota marine masichu yoara. Moise

cjiro to wuhdua ducatarore to nanocaboriro seheta mari puhtoro marine to yare noano masichu yoara. ¹⁷“Mari puhtoro” nica, Espiritu Santore nii nija. Cohamacu to Espiritu Santo mari mehne to jichu pichacapu wahaborinare to yuhdoina jija. Á jina “Panopu macaa dutia mehne mari yuhdunahca”, nieraja mari. Á jina tí dutiare duhuna, Espiritu Santo to cahmano seheta yoaja mari. ¹⁸ Á jina Jesu yaina jina, Cohamacu yahuare masija mari. Ti wuhdua pocare ducataro marieina yoaro seheta Cristo to tuaare ñona nija mari. Á jiro mari puhtoro Espiritu Santo marine noaa sehere cohtotachu yoaro nina. To á yoachu Cristo noa yuhduariro to jiro seheta wahana nija mari.

4 ¹ Á yoa Cohamacu sare pja ñño, noaa buheare yahuhtinare cüre sare. To á cürina sä jiare masina, to yare buhena pomerana, bujua witi tuho-tueraja. ² To yare buhena mahño cure buheraja. Tuhsu, sä tíre cohtotaeraja. Soro curero buhena buoro yuhduboa. Á jina tó sehe yoare cahmaeraja sä. Cohamacu to ñurocaroi jija sä. Á jina noaa buheare noano quihõno buheja sä. Sä á buhechu ñua tíre noano masina sare tuhoina. ³ Sä ya buheare noaa buheare buheja sä. Sä tíre buhepachuta paina ne noano tuhoerara tíre tinare ducataro seheta. Á tuhoeraina pichacapu wahahtina jira. ⁴ Satana ñariro ahri yahpa macaina bui puhtoro tinare masierachu yoara. Capari ñueraina ti ñu masieraro seheta masierachu yoara tinare. Noaa buheare Cristo tua yuhdurucu suriro ya buheare ti masierachu yoara tiro. Cristo sehe Cohamacu to jia tiare marine masichu yoara. Tiro Cristo Cohamacu waro jira. ⁵ Sä buhena “Sä sehere ño payoga”, ni buheraja. Ó sehe ni buheja sä: “Jesucristo sehe jira mari puhtoro”, ni buheja sä. Sä sehe Jesure yuhtiina jina, musare dahra cohtaina yoaro sehe jina, to yare musare buheja sä. ⁶ Panopu ó sehe niha Cohamacu: “Nahitianopure buhriaro jiga”, ni dutiha tiro. Mipure tirota jira marine to tuaare masichu yoariro. Buhriarocaró marine to noano bajuchu yoaro seheta, tiro to tuaare marine masichu yoara. Cristo Cohamacu tuaare, to jia tia cühure marine masichu yoara.

Cristo to tuaa mehne mari jija

⁷ Á masiina jina, to tuaare, noa buhea cühure painare masichu yoaja. Á yoaina jipanahta wiho jiina jija sä. Dihi biato dóihta to waktiro yoaro seheta sä cühü wiho jiina jija. Á jipanahta Cohamacu to tuaare, noa buhea cühure painare buheja sä. Sä á buhechu ñua, wiho jiina sä jichu ñua, sare tuhoina ó sehe ni, masiahca. “Ti mu suro ahri buheare masierara. Cohamacu sehe tua yuhduariro tinare masichu yoara”, ni masiahca paina sare. ⁸ Jipihtina paina sare ñano yoapahta Cohamacu sare to yoadohochu tina sare yuhdurucaerara. Á jina “Ñano yuhduna nija”, ni tuhotupanahta, Cohamacu yare ne duhueraja. ⁹ Säre ti ñano yoarucupachuta Cohamacu sare á yoadohorucura. Säre ti cjäroca cü mujapachuta to yoadohoa mehne yarieraja sä. ¹⁰ Ti wajähtina jinocanata nija sä, Cristo ahri yahpai to ñano yuhduariro seheta. Á ti wajähtina jinata nija sä Cristo catiare wariro to jiare masa ti masihtó sehe. Sä á ñano yuhduchu ñua tíre masiahca masa. ¹¹ Á yoa dachoripe sare paina nu wajähtó cuara Cristo yaina sä jiri buhiri. Ó seheta ñano yuhduja sä Cristo to catiare wariro to jiare paina ti masihtó sehe. Sä pjacuri baharo yariaa wahaahca. Sä á wahahtina jipanahta Cristore catiare warirore masichu yoaja sä painare. ¹² Á jia musare sä buheri buhiri sä sehere paina nu wajähtó cuara.

Sā buheare m̄sa t̄hori baharo jipihtia dachoripe Cohamacu mehne jirucuh-tina jira m̄sa.

¹³Cohamacu yare ti joari p̄i ō sehe nina: “Cohamacure wacū tuacu, to yare yahuhi”, ni joa tiha panopu macariro. Sā cūhu tó seheta yoaja. Cohamacure wacū tuana, to yare yahuja. ¹⁴Ā buheja sā ahri yu nihtire noano masina: Cristo to yariari baharo Cohamacu tirore masori jire. Ā jiro Cristo yaina mari jichu n̄uno tiro mari cūhure masonohca. To ā masori baharo to cahapu naanohca marine. ¹⁵Ā jina m̄sare yoadohona, n̄ano yuhduja sā. Ā jina Cristo yaina m̄sa payu wahana, payu m̄sa Cohamacure wahchea mehne n̄o payonahca. Tirore “Noana”, ninahca.

¹⁶M̄sa ā wahachu n̄una, sā n̄ano yuhdūpanahta cahyaeraja. Ā jina Cristo yare buhe duheraja. Dachoripe wahyarucuna nija sā. Sā ā wahyarucupanahta dachoripe wahcheina jirucuja sā. ¹⁷Mipure n̄ano yuhdūpanahta n̄ano yuhdu dojoeraja. Tí mari n̄ano yuhdua pihtia wahaahca. Ā jina marine mahanocā n̄ano yuhduro cahmana. Ā mari n̄ano yuhdurina cjiri jina, baha-ro-pure pjíro wahchea mehne jirucunahca Cohamacu mehne. Ā jina mari n̄ano yuhduri yuhdoro pjíro wahchea mehne jirucunahca. ¹⁸Mari n̄uri cjiri baa pihtia wahaahca. Mari n̄uerari sehe ā jirucuahca. Ā jina mari n̄ueraare Cohamacu yare ā wacūrucuja mari. Ā wacūrucuna baharopu mari noano jihtore wahcheja.

5 ¹Wuhure to cohāboriro seheta baharo mari pjacuri sehe butia wahaahca. Ā jiro wahma wuhure to yoaboro seheta Cohamacu wahmaa pjacurire yoarohca. Ā yoaro tí pjacurire marine warohca. Tí pjacuri masa ti yoa pjacuri jierara. Ā jina muanopu ā jirucunahca tí pjacuri mehne. Tíre mari masija. ²Ā jina tí pjacurire muano macaa pjacurire tuaro cahmana, mari ā cohtarucuna nija. ³Tí pjacurire tuaro cahmaja, mari yariari baharo suhti marieina mari jiboro seheta pjacuri marieina ji duaerana. ⁴Mipure ahri pjacurire cohā duaerapanahta wahmaa pjacuri sehere tuaro cohtaja mari. Mipure mari pjacurire cohā duaerapanahta jipihtia dachoripe Cohamacu mehne mari jihtore tuaro cahmaja mari. Ā jina ahri mari pjacuri yariahti pjacuri ti jichu masina, wahmaa pjacuri mehne Cohamacu mehne ā jirucu duaja mari. ⁵Mari ā jirucuhore cahnore Cohamacu sehe. Ā cahnono Espiritu Santore ware marine. Ā jiro Espiritu Santo mari mehne jiro, marine Cohamacu to yoahore “Potocā tjira” nino, marine masichu yoara tiro.

⁶Ā jina Cohamacure wacū tuarucuja mari. Cuiro marieno jija mari. Ahri mari ji muhtari pjacui jina, mari puhtoro mehne jierasinija. ⁷Muano macaare Cohamacu cūhure mari n̄uerapanahta “Tí potocāta jira”, ni tuhoutuja mari. Ā jina tirore wacū tuaja mari. ⁸Ā jina mari cuieraja. Mari pjacurire ahri yahpai cohāna mari puhtoro mehne muanopu jirucunahca mari. Ā yoa mari yariachu noa nina marine. ⁹⁻¹⁰Ā jina Cristore wahchechu yoa duaja mari. Ahri yahpa macari pjacu mehne jisina tirore wahchechu yoa duaja. Muanopu cūhure tirore wahchechu yoa duaja.

Jipihtina Cristo cahapu mari wahachu n̄uno tiro mari yoirire n̄uno marine beserohca. N̄ano mari yoirire masinohca tiro. Ā masino wapa marieno to waborire marine wasi tiro. Noaare mari yoiari cūhure masinohca. Ā masino wahchero marine noano yoarohca. To ā masiriro jichu n̄una tirore wahchechu yoa duaja mari.

Cohamacu marine to ñu tuhtichu ñuno Cristo marine yahura

¹¹ Ñ jina cua pisaro mehne Cristore ño payoro cahmana marine. Ahrire masina, Cristo yare masichu yoaja sã masare. Tinare cuisãana, tirore wacũ tuachu yoa duaja sã tinare. Noano mehne sã tíre sã buherire Cohamacu noano masina. Sã ã buherire musa cũhure noano musa masichu cahmaja yũhũ. ¹² Pari turi noaina sã jia tiare musare yahuna nieraja. “Painare yũhdurucaja”, niinare musa yahuhto sehe noano mehne sã buherire yahuna nija sã musare. Tina sehe ti tuhotuapũ ñaina jipahta masa ti ñurocaro dihta noaina yoaro sehe yoa ñomana. Ñ jina sã mehne musa wahchehto sehe ahri jipihtiare musare yahu joana nija. “Paulo cũhũ sãre noano mehne buhere”, sãre painare musa ni ducatahto sehe ahri jipihtiare musare yahu joana nija. ¹³ ¿Sã õ sehe ni yahuna tuho masieraina jijari sã, musa tuhotuchũ? Masa sãre ñua, tuho masieraina yoaro sehe ñuna sãre. Cohamacu yare sã yoachu ñua ã ni ñuboca sãre. Ti ã ñuborina jipanahta ã jiina jieraja sã musare yoadoho namona tana. ¹⁴ Cristo marine to cahĩchu ñuna musare ã yoadohoja. To ã cahĩchu ñuna to yare ã yahurucuja sã. Cũirota Cristo jipihtina mari ñaa buhirire yariari jire. To ã yariari baharo mari sehe jipihtina mari ñaa buhirire yariarina yoaro sehe jina, ñaare yoa namo duaeraja. ¹⁵ Jipihtina mari ñaa buhiri yariari jire tiro Cohamacu ya dihtare mari yoalto sehe. Mari mu suro yoa dutieraro, to cahmaa sehere marine yoa dutiro yariari jire tiro. Tiro sehe mari yaro jiborirore yariaro, masa mujari jire. ¹⁶ Ñ jina mipure sã mu suro masare “Noaina jira. Ñaina jira”, ni ñueraja sã. Panopũ sã mu suro yoaa timai. Ñ jina Cristore masierahi. ¹⁷ Ñ jina Cristo yaina wahana wahma masa bajuaina yoaro sehe wahaja mari. Panopure mari mu suro mari tuhotumarire, mari yoamarire duhunocaja mari. Mipure wahma masa bajuaina yoaro sehe jina, noaa sehere cohtotana, Cohamacu ya dihtare yoa duaja mari.

¹⁸ Cohamacu sehe marine noaa sehere cohtotachu yoare. Cohamacure ñu tuhtiina mari jichũ ñuno Cristo sehe mari ñaa buhiri tiare cohãre. Ñ cohãno mari ñu tuhtirire duhuchũ yoare tiro. Ñ yoachu yoare Cohamacu Cristore. Ñ yoaro sãre to yare buhe dutiro cũre. Ñ buhena, painare Cohamacu mehne ti ñu tuhtirire duhuchũ yoaja sã cũhũ. ¹⁹ Ñ sehe masare yahu dutire Cohamacu sãre: “Cristore mari wacũ tuachu ñuno mari ñaa buhirire buhiri dahrerara Cohamacu marine. Ñ yoaro marine ñu tuhtiriro cjiro jiparota tiro marine to yaina jichũ yoara”, ni yahu dutire Cohamacu sãre. ²⁰ Ñ jina Cristo yare buhehtina to cũrina jija sã. Cohamacu musare to yahuboriro seheta sã sehe õ sehe ni musare yahuja: Cristore yahubasana nija. Ñ jina musare bosaja. Cohamacure musa ñu tuhtiare tó purota duhuga. ²¹ Cristo ñaare to yoerapachuta Cohamacu sehe tirore mari ñaa buhirire yaria dutiri jire. Ñ yoaro mari ñaa buhirire buhiri dahreri jire Cohamacu tirore. Ñ jiro Cristo yaina mari wahachu Cohamacu yoaro sehe noaina jichũ yoare tiro marine.

6 ¹ Cohamacu yare buhedohoina jija sã. Ñ jina ahrire tuaro musare yoa dutija sã. Cohamacu yare noaa buheare musa tuhoriro seheta yoaga musa. Musa tuhoriro sehe musa yoerachu tí musa tuhori yaba cjihti jierara.

² Ñ sehe nina Cohamacu:

“Yu quihõri pjare, musare yu noano yoalti pjare musa siniare tuho, yuhtihi.

Ã yoaçu musare yu yuhdohti dachore musare yoadohohi”, nina tiro. Tuhoga musa. Mipure Cohamacu musare to noano yoahti pja jira. Mipure Cohamacu musare to yuhdohti dacho jira.

³Ne mahanocã painare ñano yoaeraja sã. Painare ne ñano ni durucue-
raja, “Noaa buheare musare sã buheare cahmaerari”, nina. ⁴Ã jina Coham-
macure dahra cohtaina sã jiare musare masichu yoa duaja. Ô sehe jija sã:
Ñano yuhduna, paina ti ñano yoarina jina cûhu ã tuhutonocaja. Sãre ti ñano
yoapachuta suaro marieno jija. ⁵Ô seheta ñano yuhdui sã: Masa sãre cjächu,
peresu ti yoaçu, payu masa sãre wajã dua ti sañurucuchu, ñano yuhdui
sã. Sã tuaro dahra wahyana, wujo puripachuta carierana, juca baana ñano
yuhdui. ⁶Numiare ã ñunocai. Å jina ne ñano yoaerahi. Å yoa Cohamacu
yare noano masi buhei musare. Tuhsu, ne suaerahi sã. Å yoa noano niji siaro
mehne yoi sã musare. Å yoana Cohamacure dahra cohtaina sã jiare masichu
yoana nii sã musare. Espiritu Santo to yoadohoa mehne Cohamacure dahra
cohtaina sã jiare masichu yoana nii musare. Potocã musare sã cahichu ñuna,
tirore dahra cohtaina sã jiare masina musa. ⁷Å jina noaa buheare musare
quihõno sã buhechu ñuna, Cohamacu tuua mehne sã yoaçu ñuna tirore
dahra cohtaina sã jiare masina musa. Noaa sehe jipihtia sã yoiari cjiri sã
wamoa yoa sehe jira noano sã ducatahto sehe. Tí noaare yoana watĩnore
sã ducatahana nija. Å yoana tí noaare sã yoiari mehne tirore sã yuhdurucaja.
⁸Paina sãre ño payora. Paina sehe sãre ño payoerara. Paina noano ni duru-
cura sãre. Quihõno sã buhepachuta “Mahñoina jira”, ni yahusãna paina sehe
sãre. ⁹Paina sãre ñu masiina jipahta sãre ñu masieraina yoa sehe yoara.
Sãre ti wajã duapachuta catisinija sã. Ñuga sãre. Potocã tjira. Sãre buhiri
dahre ti cjächu, yarierasinija sã. ¹⁰Sã cãa tahari cahyaina jipanahta, ã wah-
cherucuja. Pjacuoina jipanahta painare noaa buheare buhena tinare pjíro
pachere sã waboro seheta yoana nija tinare. Paye baro cjueraina jipanahta,
potocãta Cohamacu yare cjuu pahñonocaja sã.

¹¹Ne Corinto macaina yu coyea musare noano mehne yahu pahño joahi
sã musare. Musare tuaro cahĩna, ã yahuhi musare. ¹²Sã sehe musare cahĩ
duhueraja. Musa sehe sãre cahĩera curera. ¹³Å yoa pohna ticu yu pohnare yu
yahuboro seheta musare yahuihtja: Musare sã tuhoturiro seheta musa cûhu
ãta noano tuhotuga sãre. Å jina sãre cahĩga musa cûhu.

Cristore cahmaerainare piti ti dutieraha Paulo

¹⁴Å yoana Cristore cahmaeraina mehne ã piti tirucuenta tjiga. Tina mehne
macaina jiena tjiga. Cũno potori jierara musa. Noaare yoiario ñaare yoiario
mehne noano ji masierara. Cohamacure cahmaina Cohamacure cahmaeraina
mehne noano cahma piti ti masierara, buhriaro nahitiano mehne to ji masie-
raro seheta. ¹⁵Å jia Cristo watĩno mehne cũno potori tuhoturera. Å yoa
Cristo yairo, Cristore cahmaerario mehne noano cahma piti ti masierara.
¹⁶Cohamacu wuhui “Cohamacu jira”, ti nia masurine mari cjuachu ñaa nina.
To ya wuhui tí masurine mari cûchu tó wahaerara. Tó seheta Cristo yaina
Cristore cahmaeraina mehne mari piti tirucuchu cûhure ñaa nina. Tina puu
curua cũno mehne ji masierara. Cohamacu catiriro to wuhu yoa sehe jija
mari. To wuhui to jiro seheta mari mehne jira tiro. Ô seheta nina Cohamacu:
“Tina mehne jiihtja yuhu.

Ti watoi ā jirucuihtja.

Yuhū Cohamacū ti puhtoro jiihtja.

Ā jia tina sehe yū yaina masa jiahca”,

nina tiro.

¹⁷ Ā yoa ō sehe ni namona tiro mari puhtoro:

“Naina mehne tjuaena tjiga.

Tinare piti tiena tjiga.

Cristore cahmaeraina ti űaa yoaare űū cūena tjiga.

Musa ā yuhure yuhtichū űūcu, yuhū sehe musare piti tiihtja.

¹⁸ Ā jicu musa Pucu jiihtja.

Musa sehe yū pohna jinahca”,

nina Cohamacū mari puhtoro tua yuhduariro.

7 ¹ Yū coyea, yū cahīina, ahri jipihtiare Cohamacū to ā ni yahuchū tuhona jipihtiare űaa yoaare duhujihna mari. űaa wacūa cūhure duhujihna mari. Cohamacure noano űo payoa mehne űaa buhiri tia marieno jijihna mari.

Paulo wahchea mehne yahuha Corinto macainare

² Noano mehne jiga musa sā mehne. Ne mahanocā mehne űano yoaerahi sā musare. Ā yoa tuhsu, musare buhena, ne musare dojomehnerahi. Ne cūiro musa mehne macarirore mahűoa mehne wapa cahmaerahi. ³ Ā nicū musare tuhtii nieraja. Musare yahu tuhsūhi. Sā yajeripohnari mehne tuaro cahīja sā musare. Catisinina musare ā cahīrucunahca. Mari yariari baharopū cūhure musare ā cahīrucunahca. ⁴ Yū niriro seheta musa yoarire, musa yoahti cūhure masīja yuhū. Ā jicu musare wacūrocacū wahcheja. Sā űano yuhduro watoi musa sehe yuhure pjīro wahchechū yora.

⁵ Ā yoa Macedonia yahpapū sā suri baharo tōpū jina, ne soerahi sā. Tōpūre űano yuhduhi sā. Paina sā mehne cahma sayo yuhdurucahre. Ā jina “Cristo yare duhuri”, nina Cristo yaina sehere cuisāahi sā. ⁶ Sā ā űano yuhdupachūta Cohamacū säre wahchechū yohare. Tiro cahyainare wahchechū yoariro jira. Ā jiro Tito sā cahapū to wihiro mehne säre wahchechū yohare Cohamacū. ⁷ Tito to wihičū űūna wahchehi. Tiore musa wahchechū yoarire säre to yahuchū wahchehi. Ahri cūhure wahchehi. Musare to quiti yahuchū cūhure tuaro wahchehi sā. Yuhure musa űū duarire yahuhre säre. Yuhure musa cahya musa pjīro tuhaturi cūhure yahuhre tiro. To ā ni yahuchū tuhocū pjīro wahchehi yuhū.

⁸ Tō pano yū joarocari pū mehne musare cahyachū yoamahi. Ā yoaricu jipaihta cahyaeraja yuhū sehe. Tī pūre musa buheri baharo cahyayuhti musa. Tuhsu, mahanocāta cahya duhuyuhti musa. Ā jicu wahma joaroca muhtacū cahyapaihta mipūre cahyaeraja. ⁹ Mipū pinihtare wahcheja yuhū. Musa cahyachū tuhocū wahcheraja. Wiho mejeta ā cahyana, musa űaare tuhotumarire cohtotayuhti musa. Ā musa cahyachū űūno, Cohamacū sehe to cahmano seheta musa űaare tuhotumarire cohtotachū yoari jira. Ā jina musare cahyachū yoana, űano yoa dojomehnena nierahi sā musare. ¹⁰ Ā jina Cohamacū to cahmano seheta cahyana, mari űaare tuhotumarire cahyanahca. Cohamacū to cahmano seheta cohtotannahca. Tō sehe mari cahyachū űūno marine pichacapū wahaborinare yuhdora Cohamacū. Mari ā cahyachū noa nina

marine. Cristore cahmaeraina sehe ti ñaare tuhotumarire cahyaerapahta, ã cahyamacanocaa, pichacapu wahahtina jisinina. ¹¹ Musa sehe Cohamacu to cahmano seheta cahyayuhti. Musa ã cahyana õ sehe yoayuhti musa: Mipure ñaare yoinare ã ñunocaerayuhti musa. Tinare duhu dutiyuhti musa. ã jina ti ñaa yoaare cuiyuhti musa “Tina yoaaro sehe sã yoiari”, nina. ã yoana yuhure ñu duayuhti musa. Tuhsu, ñaare yoiarore buhiri dahre duayuhti musa. Tí jipihtiare musa yoana mipure quihõno yoina musa jirire masichu yoahre musa sãre. ¹² Panopu ñano yoiarore musare yahu joarocapaihta tirore yoadohocu tacu ã ni yahu joarocaerahi. To ñano yoa payoriro cùhure yoadohocu tacu ã ni joarocaerahi. Musa sehere yoadohocu tacu tí püre joarocahi. Sãre noano ño payora musa Cohamacu to ñurocaroi. Tíre musa ño payorire noano musa masihto sehe tí püre joarocahi musare. Cohamacu tíre musare masichu cahmare. ¹³ ã jina Tito musa yoiare to qiti yahuchu tuhona tuaro wahchehi sã.

Tito cùhu tuaro wahchere. Tirore musa noano mehne musa piti bocachu tuhona, musa mehne to wahcherire tuhona sã cùhu noano wahchehi. ¹⁴ Wahmanopu musa cahapu to wahahto pano musa mehne yu wahcherire, noaina musa jirire yahui tirore. Yu ã yahuchu yu niriro seheta noano yoayuhti musa tirore. ã jicu tirore yu nirire buo tieraja. Musare quihõno ã yahurucuja sã. Tó seheta Tito cùhure quihõno sã yahui musare to ñuriro seheta. ¹⁵ Musa cahapu to suchu ño payoa mehne tirore piti bocayuhti musa. Musa ã piti bocachu, noano yuhtiina, yuhdurucaro marieina musa jichu ñuyuhti tiro. ã jiro musare cahĩ namono nina tiro. ¹⁶ Mipure noano yuhtiina, Cohamacu to cahmano seheta musa noano yoa pahñoina musa jichu noano masija yuhu. ã masicu tuaro wahcheja.

Cristo yaina jina, painare ã wanocano cahmana marine

8 ¹ Sã coyey, ahri yu yahuhtire musare masichu cahmaja sã. Cristo yaina Macedonia yahpa macaina Cohamacu cahĩa mehne to pja ñua mehne ti yoiare musare yahuihtja. ² Tina ñano yuhdupahta, niñeru maeraina jipahta niñerure cahĩno marieno ã wanocahre pjacuoinare Jesu yainare. Cristo mehne tuaro wahcheina jia, tina Judea yahpa macainare noano mehne ti cjuare ã wanocahre. ³ Musare niita nija. Tina ti cjuaro puro wahre. Jierara. Bui curero wahre. Sã sinibasaerapachuta pjacuoinare wahre tina. ⁴ Cohamacu yainare pjacuoinare tuaro yoadoho dua, “Macedonia macainare tuaro wa duaja sã”, nire tina sãre. ⁵ “Õ puro waahca”, tinare sã ni tuhoturiro bui curero wahre tina. Õ sehe yoahre tina: Wahmanore niñerure ti wahto pano mari puhtoro Cristo to cahmano seheta yoa pahñori jihre tina. ã yoa tuhsu, Cohamacu to cahmano seheta sã cùhure ño payoa mehne yuhtiri jihre. ã yoina jia tina niñerure wahre. ⁶ Ti ã wa tuhsuchu ñuna Titore sã sehe õ sehe nihi: “Corinto macainare mu buhe ducariro seheta noano mehne pjacuoinare ti wahtore buhe pahñoga”, nihi sã tirore. Musa cùhu painare pja ñuna, musa yoadohohto sehe ã nihi tirore. ⁷ Musa sehe jipihtiare noano yoina ji tuhsura: Cristore potocãta noano wacũ tuara musa. ã jina to yare noano yahura musa. ã yoa Cohamacu yare noano masina musa. ã masina, Cohamacu to cahmano seheta tuaro yoa duara musa. ã yoa sãre cahĩna musa. Õ seheta noano yoina ji tuhsura musa. Musa ã noaina jipachuta mahanocã

duhsasinina mini musare. Pjacuoina pinihtare musa pja ñuchu cahmaja sã. Ñ jina jiape nino marieno tinare noano mehne musa pjíro wachu cahmaja sã.

⁸ Ñ nicu musare dutii waro nieraja. Ñ ni yahuita nija musare. Paina pja-cuoinare ti tuaro yoadohorire musare yahui nija. “¿Potocãta pja ñuina jijari musa?” ni masi duai nija. ⁹ Mari puhtoro Jesucristo sehe marine to pja ñurire masina musa. Tí to pja ñuri potocã tjira. Tiro muanopu pjíro cjuariro jiparota ahri yahpapu taro pjacuoriro wahari jire. Á yaro mari yaro jiborirore yariaro pjacuoriro wahari jire. Ñ sehe wahari jire tiro mari sehe to yare pjíro mari mari cjuahito sehe, tiro mehne mari ñ jirucuhto sehe.

¹⁰ Musare ñ yahuita nija noaare musa masihtu sehe. Ñ sehe ni tuhoutuja yuhu sehe pja cuoinare musa wahtire: Cũ cũma wahara pja cuoinare musa wahtire musa wihbori baharo. Tí yuhdoro noano yoayuhti musa. Paina ti wa duahto pano musa sehe pjacuoinare wa dua muhtayuhti. ¹¹ Ñ jina musa wa dua muhtariro seheta mipure noano waga tinare. Á yoana pjíro cjuaina jina, pjíro waga. Mahanocã cjuaina jina, mahanocã waga. ¹² Tuaru musa wa duachu tíre musa warire Cohamacu wahcherohca. Ñ jina noho musa wa duaro puro waga. Musu wariro purota musa wachu wahcherohca Cohamacu. “Pjacuoinare wa yuhdoga”, musare nino nierara tiro.

¹³ “Pjacuoinare waga”, nicu tinare pjíro cjuu duticu nieraja. Ñ jicu musa sehene pjacuoina jichu yoa duaeraja.

Musare cūno potori cjuu duticu ñ nii nija. ¹⁴ Mipure musa sehe pjíro cjuara. Ñ cjuana paye baro maerainare wa masina musa. Baharo musare paye baro maerachu tina cūhu wa masina musare. Musu ñ cahma wana cūno potori cjuannahca jipihtina Cristo yaina. ¹⁵ Ñ sehe nina Cohamacu yare ti joari pui: “Pjíro nariro cūhu paina bui curero cjuareare. Mahanocã nariro cūhure ne mahanocã duhsaerare”, nina Cohamacu yare ti joari pui.

Tito tó mehne macaina mehne Corintopu wahaha

¹⁶ Ñ yoa musare yu yoadohoriro seheta Tito cūhu musare yoadoho duara. Cohamacu sehe musare to yoadoho duachu yoahre tirore. To ñ yoachu ñucu “Noana”, nija Cohamacure. ¹⁷ Titore musa cahapu sã waha dutichu tiro noano mehne yuhtihre. Tirore sã waha dutihtu panoputa to basita musa cahapu tuaro waha dua tuhsuriro jire.

¹⁸ Tirore paio Jesu yairo mehne piti dahrerocahi sã tirore. Tito pitire jipihtina paina Jesu yaina noano ño payora. Noaa buheare to noano yahuriro jichu ñua tirore noano ño payora. ¹⁹ Ñ jia Jesu yaina tirore cahmahre sã mehne to tinino wahahto sehe. Tí ñiñerure pjacuoina cahapu sã naachu sã mehne wahahtirore cahmahre tirore. Ñ jia tí ñiñerure sã wabasachu ñua “Marire yoadohoriro jira”, niahca masa Cohamacure. Sã ñ wabasana tinare tuaro mari yoadoho duarire masichu yoannahca tinare. ²⁰ Ñ jina ahri ñiñerure, pjíro Jesu yaina ti warire naabasana, noano ñu wihbonahca ti warocarire, “Sãre yahusãri”, nina. ²¹ Mari puhtoro to ñurocaroi quihõno, noano yoa duaja sã. Masa ti ñurocaro cūhure quihõno yoa duaja.

²² Ñ yoana tana pairore mari coyeirore warocannahca Tito cūhu mehne. Sã piti dahrerocarirore payu tahari painare to noano yoadohochu ñuhi sã. Ñ jiro mipure musa sehe painare musa yoadoho duachu ñuno tiro tó pano to yoiro yuhdoro noano musare yoadoho duara. ²³ Tito sehene musare

yahuhtja. Tiro yu piti jira. Musare yu yoadohochu tiro yuhu mehne dahra-riro jira. Paina tiro mehne wahhtina Jesu yaina ti beserina ti warocarina jira. Tina Cristo yare yoara paina tirore ti ño payohto sehe. ²⁴ Ñ jina cahña mehne noano mehne tinare piti bocaga musa. Musa ã yoachu ñua paina Jesu yaina sehe musa cahñare masiahca. “Noano piti bocaahca Corinto macaina”, ni yahu tuhsuhi painare. Musa ã noano piti bocachu ñua tí sã yahuri cjiri quihõno ti jichu masiahca paina Jesu yaina.

Jesu yainare pjacuoinare ti wahtore yahuha Paulo

9 ¹ Ñ yoana Cohamacu yainare musa yoadohohtore musa wahtore masi tuhsura musa. ² Painare musa yoadoho duaare masija yuhu. Ñ masicu Macedonia yahpa macainare õ sehe ni yahuhi: “Corinto macaina, ti ya yahpa Acaya yahpa macaina cõhu Jesu yaina sehe painare yoadoho dua tuhsuhre. Cũ cõhuma yuhdura ti yoadoho duariro”, ni yahu tuhsuhi tinare musare. Musa ã yoadoho duachu tuhoa payu tina cõhu pjacuoinare yoadoho duahre. ³ Musare ã ni yahuriro jicu mipure ahrinare mari coyeare musa cahapu warocai tai nija, Macedonia yahpa macainare yu yahuriro seheta musa yoahito sehe. Ñ jicu pjacuoinare musa wahtore musa cahmachu musa cjuayuhito sehe ahrinare warocai nija. ⁴ Tinare warocaeracu Macedonia yahpa macaina mehne musa cahapu sucu, musa wahtire musa cjuacerachu ñucu buo tisãboa yuhu musare. “Pjacuoinare waahca”, musare yu ni tuhoturi baharo musa waerachu ñucu buo tisãboa yuhu. Musa cõhu buoro yuhduboa. ⁵ Ñ jicu musa cahapure yu suhto pano tinare mari coyeare waroca muhtai nija. “Pjacuoinare wanahca”, pano musa nirire musa cjuayuhito sehe tinare waroca muhtai nija. Musa wahtire musa cahmachuchu tina sehe musare yahu quihõahca. Musa wahtire musa cjuayu tuhsuchu wahchea mehne musa wa duarire masiahca jipihitina. Musare sã wa dutiri jisi tí. Musa mu suro musa wari jahca.

⁶ Ñ jina ahrire wacũga musa: Mahaa yaparicã toariro mahaa pocacã nanohca. Payu yapari toariro payu poca nanohca. (Tó sehe jira pjacuoinare mari wachu. Mahanocã mari wachu, Cohamacu mahanocã warohca marine. Pjiro mari wachu, pjiro marine warohca.) ⁷ Ñ jina caina musa “Õ puro wanahtja”, ni waga. Niñerure cahño marieno waga. “Marine wa dutire”, nino marieno waga. Wahchea mehne wainare cahña Cohamacu. ⁸ Tiro sehe musa cahmano yuhdoro musare warohca. Ñ jina jipihitia musa cahmarire duhsaro marieno cjuã pahñonahca. Ñ jia painare musa wachu cõhure noano mu suahca musa cjuaa. ⁹ Õ sehe nina Cohamacu yare ti joari pui:

“Pjacuoinare pjiro wara Cohamacu.

Noano mehne masare ã yoarucura tiro”, nina to yare ti joari pui. ¹⁰ Ñ jiro toaa dicha tiri baharo toariro to toahti capare wara Cohamacu. Baharo to toarire dicha tichu yoara to chuhtire. Pjacuoinare musa pjiro wachu toarirore to wariro seheta musa cõhure pjiro warohca Cohamacu. Tó sehe dihta musare warohca pjacuoinare musa wa namohto sehe. ¹¹ Ñ tjira. Pjiro warohca musare painare pjiro musa ã warucuhto sehe. Ñ jia musa warocari niñerure pjacuoinare sã wachu payu tina sehe Cohamacure wahchea mehne “Noana”, niahca. ¹² Ñ yoana pjacuoinare Cohamacu yainare wana, tinare yoadohora musa. Ñ yoadohona wahchea

mehne Cohamacure “Noana”, ti nichu yoanahca masa. ¹³ ã painare masa yoadohochu ñua, Cohamacure ño payoa mehne durucuahca masa. Tinare paina cãhure pjïro masa wachu ñua Cohamacure “Noa yuhduariro jira”, niahca masa. Õ sehetã niahca Cristo ya buhea noaa buhea ti niriro sehetã masa yoachũ ñua tinare masa wachu ñua. ¹⁴ ã jia Cohamacu musare tinare to wa dutichu masa sehe tinare masa pja ñuchu tina sehe musare cahã mehne sini payoahca Cohamacure. ¹⁵ Cohamacu marine noa yuhduaro yoara. To ã yoarire masina “Noa yuhduaro yoara”, nijihna mari tireore.

Jesu buhe duti to cûriro to jiare yahuha Paulo

10 ¹ Mipure yuhu Paulo, musare yahuihtja. Cãina masa mehne macaina ò sehe nina yuhure: “Mari mehne jiro painare yuhduruca duaerariro, wiho jiriro yoaro sehe jira. ã jiparota pa shepu jiro marine cuiro marieno tuhtirocara”, nina masa cãina yuhure. Cristo sehe ne suaerariro, masare noano yoariro jira. Tiro yoaro sehetã yuhu cãhu ji duaia. ² ã jicu musare ahrire tuaro mehne yahuihtja: Musa cahapu yu suchu noano yoaga masa “Paulo sãre tuhtiri”, nina. Cãina yuhure ò sehe nina: “Tiro to mu suro, Cohamacu to dutiro marieno yoara”, nina yuhure cãina. Tó sehe niina pinihtare tuhtiboca yuhu. ³ Sã cãhu ahri yahpa macainata jina nija. ã jipanahta ahri yahpa macaina ti mu suro ti yoaro sehe yoaeraja sã, Cohamacu dutiare yoana. ⁴ Surara cahma wajã ti yuhdurucariro sehetã sã sehe ñaare yuhduruca duaia. Tí ñaare yoa duaeraja. Sã ã yoachũ sã wamoa ahri yahpa macaina ti wamoa yoaro sehe jierara. Surara ti wamoa ti cjuaro sehetã sã sehe Cohamacu to tuaare cjuaja. Tí tuaa mehne Cohamacure cahma dutierainare cohãja sã. Masa ti mu suro ti masiare ti yaba cjihti jierachu masichu yoaja sã tí tuaa mehne. ⁵ Tuhsu, jipihtina yuhduruca duainare, ti mu suro tuhotuinare, Cohamacure masi dutieraina sehere duhuchũ yoaja sã. ã yoa tí tuaa mehne Cohamacure cahmaerainare Cristore noano yuhtiina ti jichũ yoaja sã. Cristo to cahmano sehetã tinare tuhotuchũ yoaja sã. ⁶ ã yoa, paina masa mehne macaina Cristore ti yuhdurucachu ñuna tinare buhiri dahrenahca sã. Musa sehe masa noano yuhtiri baharo Cristore yuhdurucainare ã buhiri dahrehtinata jinahca sã.

⁷ Yu pjacu dihtare masina masa. Yu jia tia sehere ne masierara masa. “Cristo yaina jija”, niina jina, ò sehe masiga masa: Sã cãhu masa yoaro sehe Cristo yaina tjija. ⁸ “Mari puhtoro ya buheare noaa buheare buhe dutiro, cûre sãre”, nicu payu tahari musare ã ni yahupaihta buo tieraja yuhu. Sãre ã buhe dutiro musare yoadohohtinare cûre sãre. Musare dojomehnehtinare cûno nierare sãre. ⁹ Õ sehetã poto ni yahuja musare “Cuiiri”, nicu. Ahri yu joarocari pûre ñuna masa ñu cuachũ cahmaeraja. ¹⁰ Cãina masa mehne macaina ò sehe nina: “Paulo joarocarõ tuhtiriro yoaro sehetã joaroca mujana marine. ã jiriro jiparota mari mehne jiro ne ã jica nierariro jira. Pjacuoriro yoaro sehe jira. ã jia, marine to durucua yaba cjihti jierara”, nina cãina. ¹¹ Tó sehe niinare ò sehe ni yahuihtja: “Õ sehetã yoanahca”, sã ni joarocariro sehetã tó sehetã yoanahca sã, masa cahai jina.

¹² Cãina masa mehne macaina “Noano masi pahñoina jija”, ni durucura ti basi. Cuenah, noacaro masiina jijari tina ã ni durucua. Sã sehe ti yoaro sehe ne ã ni durucusi. Ti basi cahma ñu piti boca “Mari sehe noa yuhdurucaina

jija”, nina tina ti basi. Tuho masieraina jira tina. ¹³Sā sehe tina yoaro sehe yoasi. Cohamacu sāre buhe dutiro to cūri dihtare yahuja sā sehe musare. Paina ya dahraare “Yoahi”, nina nieraja. Tiro musare buhe dutiro sāre cūre. ¹⁴Ō sehe nina, mahñona nieraja sā. Noaa buheare Cristo yare musare buhe muhtana suhi sā. Ā jina Cohamacu sāre buhe dutiro to cūri dihtare buhena nija musare. ¹⁵Ā jina paina ya dahraare “Sā sehe tíre yoahi”, ne nieraja sā. Wiho mejeta Cristore musa wacū tua namochu cahmaja sā. Ā cahmana musare buhe namo duaja sā. Ā buhena Cohamacu to dutiriro purota buhe duaja musare. ¹⁶Ā yoa musa ya yahpa yuhdūropu noaa buheare yahuna wahanahca. Ā wahana paina ti buheri baharo suna, “Sā buhehi”, nisi sā.

¹⁷Mari yoaare “Sāta yoaja”, nieraro cahmana. Mari puhtoro Jesu to yoa sehere ñuna wahcheru cahmana. Tí sehere painare yahuro cahmana. ¹⁸Masa ti basi “Sā sehe yoahi”, ti nichu ji coarera Cohamacu. Mari puhtoro Cristo “Ahrina noano yoare”, to niina sehere ji coara Cohamacu.

“Jesu to cūrina jija sā”, ni mahñoinare yahuha Paulo

11 ¹Yu jia tiare yahucu tuho masierariro yoaro sehe yahui nija. Ā yahuriro yu jipachuta yuhure tuhosiniga musa mipure. ²Cohamacu musare to cahño sehetu tuaro cahija yuhu cūhu musare. Cristo yare musare yu buhechu tuhona tirore wacū tua ducare musa. Ā jicu ahrire nija musare: Manu tihticoro to manuno cjihto dihtare to cahño sehetu, Cristo sehere tuaro cahiga painare musa cahiro yuhdoro. Tó sehe yoaina ñaa buhiri tia marieina musa jichu musare Cristore wa duaja to yaina cjihtire. Tó sehe jiinare, “Tinare muhare waihtja”, nihi Cristore. ³Paina ñaina musare mahñoa, soro jia buheare cahmachu yoaboca musare. Agā Evare mahñoño to masia mehne tiorore Cohamacu to yuhdūrucachu yoari jire panopure. To ā yoiriro sehetu mipure ñaina musare mahñoa, Cristore musare noano ño payoerachu yoaboca. Ā jicu musare cuisāja. ⁴Tina “Ō sehe jiriro jira Jesu”, ti mu sūro soro ni ti mahño buhepachuta tuhoyuhca musa. Musare sā buheriro sehe jierapachuta musare mahño buheinare tuhoyuhca musa. Tuhsu, “Ō sehe jiriro jira Espíritu Santo”, ti mu sūro soro ni ti mahño buhepachuta tuhoyuhca musa. Musare sā buheriro Espíritu Santo waro jira. Tiro sehere quihño ti yahuerapachuta musare mahño buheinare tuhoyuhca musa. Tina soro jia buheare ti mahño buhechu noaa buheare ti buherapachuta tíre tuhoyuhca musa. ⁵Musa mehne macaina “Jesu to cūrina jija”, nimarina yuhure masi yuhdūrucaerara. Tinare docarucaeraja yuhu. ⁶Noano yahu mih-niriro jieraboca yuhu. Noano yahu mihnierapaihta Cohamacu yare noano masija. Yu ā masiare payu tahari musare noano masichu yoahi.

⁷Noaa buheare Cohamacu yare musare buhechu ne wapa cahmaerahi. Musare yoadoho duacu wapa cahmaerahi. Wiho jiriro yoaro sehe jii yuhu. ¿Yu ā wapa cahmaerachu noerajari, musa tuhutuchu? ⁸Musare yu buhechu paye macari macaina Jesu yaina yuhure niñerure ware. Ti ā wachu tí niñerure ñahai sinino marieno musare buhei tai. Musa sehe yuhure musa waborirore tina sehe yuhure ware. ⁹Musa mehne jicu paye baro yuhure duhsapachuta musare niñerure ne sinierahi. Mari coyea Macedonia yahpa macaina Jesu yaina jipiehtia yu cahmarire na wihire yuhure. Panopure musare ne cariboerahi yuhu. Baharopu cūhure musare ne caribosi. ¹⁰Cristo potocāta

to yahuriro seheta yuhu cūhu mipure musare potocāta yahui nija. Jipih-tiro Acaya yahpai jiinare ahri musare yu sinierari cjirire ā yahurucuihtja. ¹¹¿Musare yu sinierari cjirire painare yu ā yahurucuhu tuhona, dohse ni tuhutujari musa? “Paulo ā ni yahuro sāre cahīeraro nina”, ¿ni tuhutujari musa? Jierara. Musare cahija. Musare yu cahiare Cohamacu masina.

¹²Wapa cahmano marieno musare yu buhe ducariro seheta sohtori tihtja. Yu buheri wapa yu wapa nachu űua tina “Jesu to cūrina jija”, ni mahñoina ō sehe niboca: “Paulo noaa buheare buhero, wapa nana. Ā jina sā cūhu to yoaro seheta yoaja”, niboca tina “Paulo yoaro sehe yoaja sā”, ni duaa. “Ā niri” nicu, wapa cahmano marieno buheihtja musare. ¹³Tina potocāta Jesu to cūrina waro jierara. Tinare ne cūerare tiro. “Jesu to cūrina jija”, ni mahñoa, sā yoaro seheta jimana. ¹⁴Ti ā mahñoina jichu masi tuhsuja yuhu. Satana cūhu noariro yoaro sehe cohtota mujana. Tiro anjo si siteriro yoaro sehe ji duaro cohtotamana. ¹⁵To ā yoariro jichu masicu Satana yaina “Jesu to cūrina jija”, ni mahñoina Cohamacure yoadohoina yoaro sehe ti mahñoina jichu űucu, mahñoina ti jiare masi tuhsuja yuhu. Ā mahñoina ti jichu űuno, pihitiri dacho jichu jipihitia ti űano yoari buhirire buhiri dahrerohca Cohamacu tinare.

To űano yuhdurire yahuha Paulo

¹⁶Pari turi ahrire musare yahuihtja. Ne “Tuho masierariro jira”, yuhure niena tjiga. Yu ā ni dutierapachuta yuhure musa ā ni tuhutuchu noanohca yuhure. “Tuho masierariro jira”, yuhure ni tuhutupanahta tuhosinga musa yuhure. Mahanocā yu jia tiare yu yahuchu tuhoga musa. ¹⁷Musare ā yahucu tuho masierariro yoaro sehe yoai nija. Mari puhtoro Jesu yuhure “Mu basi mu jia tiare yahuga”, nierare yuhure. ¹⁸To ā nierapachuta ahrire yahuihtja musare. Ti mu suro “Noaina jija”, niina payu paina ti jichu űucu yuhu cūhu yu jia tiare musare yahuihtja. ¹⁹Musa sehe tuho masierainare tuhona wahchea mehne űuyuhca musa tinare. Noacaro masiina jijari musa sehe ā tuhona. ²⁰Musare cahamaca ti dahrechū, musare ti wapa cahmachu, musa yare ti machu, ā űunocahna musa. Ā yoa musare ti doca dahrechū, musa wahsupurire ti cjāchu, ā tuhutunocahna musa. ²¹Noacaro yoajari musare tina. Cue, masare yuhdurucaina jijari tina. Sā sehe tina yoaro sehe yuhdurucaina jieraja.

Ā jina tina yoaro sehe yoeraja. Tina yoaro sehe jierapaihta tina “Ō sehe jiina jija”, ti nichu tuhocu yuhu cūhu āta ni yahuboca. Pari turi tuho masierariro yoaro sehe yoacu, ō sehe ni yahuihtja musare tjoa. ²²Tina “Hebreo masa jija”, nina painare yuhduruca duaa. Hebreo masunota jimaja yuhu cūhu. “Israe masa Cohamacu to beserina jija”, nina tina tjoa. Ti yoaro seheta to beserirota jimaja yuhu cūhu. “Abrahā cjiro panamana ji turiaina jija”, nina tina tjoa painare yuhduruca duaa. Ti yoaro seheta Abrahā panaminota jimaja yuhu cūhu. ²³“Cristo cahamaca jija”, nina tina tjoa. Yuhu cūhu Cristo cahamacunota jija. Tina yuhdoro Cristo yare noano yoaja yuhu. Cuenah, ā nicu tuho masierariro yoaro sehe durucui nija. Tina yuhdoro tuaro mehne dahrai yuhu Cristo yare yoacu. Payu tahari tina yuhdoro Cristo yairo yu jiri buhiri peresu yoare paina yuhure. Tina yuhdoro payu tahari tjanare yuhure masa. Tina yuhdoro Cristo yairo yu jiri buhiri payu tahari masa yuhure wajā

duamare. Ti ã waja duachu mahanocã yuhdui yuhu ti wajaBORIRO. ²⁴ Cinco tahari judio masa yuhure ñahare. Yuhure ti ñahape tahari treinta y nueve tahari yuhure tjanare. ²⁵ Tia taha paina yuhure ñahare. Ñ ñahaa tina pinihta yuhure ñano yucuri mehne cãre. Pa tehe yuhure paina tãa mehne docare. Tia taha dohoría mehne tãcapu doca wahã su, minii. Ñ jicu cã dacho, cã ñami pjiri ma dacho macapure ba pahsai. ²⁶ Payu tahari macaripure buhe tinii sui. Yu ã buhe tinichu cua yuhduare yuhure. Yuhure nu minihto cua nire. Yuhure yacahito cua nire. Yu ya dihta macaina judio masa, judio masa jieraina cãhu yuhure ñano yoahto cua nire. Macaripu, masa marienopu, pjiri mapu cãhure yuhure nu yariahto cua nire. “Muhu mehne macaina jija”, ni mahñoína cãhu yuhure ñano yoahto cua nire. ²⁷ Cristo yare yocu tuaro dahraa tii. Ñ dahracu ñano wahyaa tii. Payu tahari yuhure wujo ñano puripachuta ã dahrarucua tii. Ñano juca baa tii. Ñ yoa ñahma yapioro jia tire yuhure. Payu tahari chua bocaeraa tii. Yu suhti sãboa cãhu ne mariea tire yuhure. Ñ yoa yuhure yusua yuhdua tire.

²⁸ Ñ sehe ñano yuhdupaihta dachoripe jipihtina paina Cristo yainare, masa cãhure pjíro wacũ tuhoutuja. ²⁹ Ñ jicu cãiro Cristo yairo to ã jinocaríro to jichu ñucu cahyaja. Paina Cristo yairore ñano yoa dutiboca. Ti ã yochu ñucu Cristo yairore cuisãacu, tina ñaina mehne suaja. ³⁰ Yahu duaerapaihta yu jia tiare yahui tacu, yu mu suro wiho jiriro yu jia tiare musare wahchea mehne yahuija. ³¹ Cohamacu mari puhtoro Jesu pucuro dachoripe mari ño payohtirotiro ta musare yu mahñoerachu masina. Ahrire musare quihõno yahuihtja. ³² Damasco wama tiri macapu yu jichu ñuno, cãiro puhtoro yuhure ñaha duamare. Jipihtina masa bui puhtoro Areta wama tiriro to docai jiriro puhtoro pinihta yuhure ñaha duamare. Ñ ñaha duaro tí maca macari sahríno, tãa mehne ti yoi sahríno macaa sopacaripe surarare cohta dutiri jire. ³³ Ti ã cohtaro watoihta yuhu mehne macaina pjiri puhuropu yuhure duhu sãa, tí sahríno macari sopacacãpu yuhure duhu borore. Tí sahríno baharo buhu-sehepu yuhure duhu borore. Ti ã duhu borori baharo duhti wahcãa wahai.

Cristo Paulore to ñorire yahuha Paulo

12 ¹ Yu jia tiare wahchea mehne yu yahuchu yaba cjihti jierara. To ã jipachuta yu jia tiare yahu namoihtja musare. Mari puhtoro Jesu yuhure to ñorire to masichu yoiare yahuihtja musare. ² Ñ sehe ño ducare tiro yuhure: Catorce cahmari waro wahara yuhure Cristo yairore muanopu to naa mujari baharo. Muanopu ñahpichoha buipu yuhure naa mujare. Yu tuhoutuia dihtare to naachu masieraja yuhu. O yu pjacu cãhure to naachu ne masieraja. Cohamacu dihta tíre masina. ³⁻⁴ Ñ jiro paraíso wama tiropu naa mujare yuhure. Yu tuhoutuia dihtare to naachu masieraja yuhu. O yu pjacu cãhure to naachu masieraja. Cohamacu dihta tíre masina. To ã naa mujachu sucu tópu to yahuaire tuhoi. Tí yu tuhore masine ne masierara. Tí to yahure marine yahu dutierara. ⁵ Tó sehe yuhure to ñorine musare yahucu, “Yuhu cãirota painare yuhdurucariro jija”, niboia yuhu. Ñ nieraja yuhu. Yu mu suro masierariro yu jiare ñano yuhduríro, wiho jiriro yu jiare wahchecu musare yahuihtja. Tí dihtare wahchecu musare yahuihtja. ⁶ “Painare yuhdurucaja”, musare ni yu yahu duachu yu niri cjiri potocã tjiboa. Tó sehe ni yahucu tuho masierariro jieraboa yuhu. Wiho mejeta “Ñ sehe painare yuhdurucaja”,

ni yahusi yuhū musare, “Cua pisaro choro yuhure nūri”, nicū. Yuhure nū masina ño payora musa. Musa ā ño payopachuta tí yuhdoro yuhure musa ño payochū cahmaeraja. Yū yoarire ñana, yū nirire tuhona quihōno musa ño payoriro yuhdoro yuhure musa ño payochū cahmasāaeraja musare.

⁷Cristo noa yuhduare muanore yuhure to ñochū ñūriro jicu, “Painare yuhdurucaja”, niboca yuhū sehe. Ā yū nierahto sehe Satana yū pjacure to duti dahrechū ñano “Noanohca”, niri jire Cohamacū. Yuhure duti dahreri jire Satana yuhure ñano wahachū yoaro. Ahri dohatiro potaca sāano to purīno sehetā yuhure purīna. ⁸Ō yū dohatirore yuhure yuhdo duticū sinia timai Cristore mari puhtorore. Tia taha sinia timai. ⁹Ō sehe ni yuhtia tire yuhure tiro: “Ō mū dohatiro pinihtare mūhure yuhdūchū yoasi yuhū. Ā mūhure yuhdoe-rapaihta mūhure cahīja. Yū cahīa mehne noano jiihca mūhū. Dohaticū ñano yuhdūriro, wiho jiro jicu yū tuaare noano masichū yoihca mūhū. Tuaina yuhdoro mūhū sehe yū tuaare masare masichū yoihca mūhū. Ni yuhtia tire tiro yuhure. To ā nichū tuhocu ñano yuhdūriro, wiho jiro yū jiri cjiire masicū wahcheja. Ā jicu ñano yuhdūriro, wiho jiro yū jiare musare wahchea mehne yahuihca. Ō sehetā ni yahuihca Cristo to tuaa mehne yū noano jiare musa noano ñū masihtō sehe. ¹⁰Ā jicu Cristo yairo yū jiri buhiri yuhure purichū wahcheja. Paina ñano yuhure ti ni durucuchū, ñabiaro yuhducū wahcheja. Yuhure ti ñano yoarucuchū, ñano yuhducū Cristo tuaa mehne cūno pjaja tirore wacū tuacū. Ā jicu wahcheja.

Corinto macainare Cristo yainare pjíro cahya tuhoutuha Paulo

¹¹Yū jia tiare yahucū tuho masierariro yoaro sehe yoahi yuhū. Yū ā yahupachuta tí musa ya buhiri jira. Musa sehe yū jia tiare painare noano yahuboa. Yuhū yū mū suro jicu yaba cjihti jieraboa yuhū. Ā jiboriro jipaihta “Jesu to cūrina, masi pahñoina jija”, ni mahñoinare docarucaeraja yuhū. ¹²Potocāta ñano yuhdūriro jipaihta Cohamacū tuaa mehne yoa ñomai musare. Ā ñocu Jesu to cūriro yū jiare ñoi nimai musare. ¹³Ō sehetā yoamai. Paye macari macainare Jesu yainare musa cūhure cūno potori yoaa timai yuhū. Wiho mejeta musa dihtare cariboerahi. Musa dihtare paye barore sinierahi. ¿Yū ā sinierachū ñaa nijari, musa tuhutchū? Tí ñaa jichū tí ñaare boga musa yuhure.

¹⁴Pua taha musa cahapū yū suri baharo pari turi waha duaja tjoa. Tópu sūcū musare caribosi yuhū. Paye barore sinisi yuhū musare. Musa yare cahmaeraja. Cristo ya sehere musa yuhtiina jichū cahmasāja yuhū. Masa pohna sehe ti pūcusumare ti cahmaare waerara. Ti pūcusuma sehe ti pohna cahmaa sehere wara. (Tó sehetā musa yū pohna yoaro sehe jiina yū cahmaa sehere wasi musa.) ¹⁵Ā jicu yuhū pinihta yū cjuaa sehere wa duaja musare yoadohocu tacū. Musa cahamacūno yoaro sehe ji duaja musare yoadohocu tacū. Musa sehere yū ā tuaro cahīpachuta yuhure musa sehe pjiroca cahīna, yū tuhutchū.

¹⁶Ā jicu musa mehne jicu musare cariboerahi. ¿Potocā tjjarita, musa tuhutchū? Wiho mejeta caina musa mehne macaina ō sehe niboca: “Paulo paye baro marine na duaro mahñore marine”, niboca. ¹⁷¿Musa ā niriro sehetā yoiro jicu, dohse tíre yoiro yuhū, musa ñuchū? ¿Musa cahapū yū warocarina yaba barore yuhure mahño mabasari tina musare, musa ñuchū? Mahño

maerari jire tina. ¹⁸Sohō jiri pjaṗu musa caḥaṗu Titore waha duti tuhsuḥi tirore. Ā jicu paiore Cristo yaiore tiro mehne piti dahre warocahi. ¿Tito paye barore musare mahño mari, musa ñuchū? Mahño maerari jire. Tiro yu yoaro seheta Cohamacu to caḥmano seheta yoariro jira. ¿Ā jiro yu yoaro sehe yoaerari tiro, musa ñuchū? Yu yoaro seheta yoari jire.

¹⁹“Nano yoaeraja sā”, ni ducatanā nieraḥa sā. Cristo yaina jija. Ā jina Cohamacu to ñurocaroi musare yahuna nija. Yu coyē, yu caḥiina, musare yahuhi musa sehere yoadoho duana. Musare yahuna, sā sehere musare caḥmachu yoana nieraḥi. ²⁰Tóṗu yu suchu yu caḥmano sehe yoaina jieraboca musa. Ā jicu musare tuaro cuisāja. Ā yoa musa caḥmano sehe yoariro jieraboca yuhū cūhu, tóṗu sucu. Soro musa yoachū ñucu yahuiḥca musare. Tóṗu yu suchu musa sehe caḥma sayoina, painare pahsu tiina, ñaco suaeraina, musa mu sūro painare yuhduruca duaina, painare ñano durucuina, ñaa qūiti dahreina, “Painare yuhdurucaja” niina, musa caḥmachunore dojomehneina jiboca musa. Ā jina musa jirore dojomehnena niboca musa. “Tíre yoari” nicu, cuisāja yuhū musare. ²¹Tóṗu yu suchu musare yuhure buo tisāchu yoaboca Cohamacu. Jipihtinare panopu ñano yoinare, ti ñaare caḥyaerainare ñucu tuaro caḥyaihca yuhū. Numia mehne ñano yoinare, mua mehne ñano yoa numiare, wuana tiinare, ñaare goa pjainare ñucu caḥyaihca yuhū.

Paulo yahu batoaha

13 ¹Mipure musa caḥaṗu wahacu tia taha suihca tóṗure. Pua taha tóṗure su tuhsui. Ō sehe nina Cohamacu yare ti joari pui: “Cūiore mari buhiri dahrehto pano tiaro tirore yahusāno caḥmana. Tiaro mariachu puaro tirore yahusāno caḥmana. Ti ā yahusāri baharo buhiri dahrehtia mari”, nina Cohamacu yare ti joari pui. ²Panopure ñano yoina cjiṛi musa jichu musare, jipihtina paina cūhure ahrire cuaro mehne yahui. Cū taha musa caḥa pari turi sucu musare ahrire yahui. Mipure musa mehne jieracu pari turi musare ahrire yahurocaihṭja tjoa: Mipure musa caḥapure sucu, panopu ñano yoinare paina cūhure potocāta buhiri dahreihṭja yuhū. ³Yu ā yoachū ñuna, Cristo to cūriro yu jia tiare to tuaa mehne yu buherire masinahca musa, musa masi duariro seheta. Cristo sehe musare dutiṛiro tua yuhdurucu sūriro jira. Ā jiro to tuaare ñona musare. ⁴Mari yoaro sehe pjacu tiro, to tuaare ñoaeraro tiro wiho jiriṛo yoaro sehe crusapu yariari jire. Ā yariaparota Cohamacu to tuaa mehne catiriṛo jira tiro mipure. Tiro crusapu jiro wiho jiriṛo to jiriṛo seheta sā cūhu wiho jiina jija. Ā jipanahta Cohamacu tuaa mehne jinahca musare yoadohona tana.

⁵Ā yoa musa sehe cāina musa basi ō sehe ni tuhotuga: “¿Potocāta Cristore wacū tuajari yuhū?” ni tuhotuga musa cāina. “¿Potocāta Cristo to caḥmano seheta jijari yuhū?” ni tuhotuga musa cāina. Musa ā jierana to yaina waro jierara musa. To yaina waro musa jichu Cristo musa mehne jiro nina. ¿Tíre masierajari musa? ⁶Sā sehe “Jesu yaina, to yare yahu duti to cūrina jija”, ni mahñoina jieraja. To yaina, to cūrina waro jija sā. Tíre musa masichu caḥmaja yuhū. ⁷Ā jicu musa ñano yoaeraho sehe Cohamacure sini payoja musare. Āta sini payoja sā noaare, Cristo yare musa yoahto sehe. Musa ā yoachū ñuna sā ō sehe niboca: “Corinto macainare buhena, quihōno buhei sā”, niboca sā painare sāre ño payo dutina. Ā ño payo dutieraja sā. Tí yaba cjiḥti jierara.

Ä jina Cohamacure sini payona, musa ya cjihtire sini payona nija. Paina säre “Mahñoina jira”, ti nipachuta noaare, Cristo yare quihõno musa yoachu pinihtare cahma yuhduaja sä. ⁸Õ sehe dihta musa noaare yoachu cahmasäja sä. Cristo yare, potocä jiare soro ni yahu masieraja sä. ⁹“Cristo cahmaare yoerara musa”, ni musare yahasä masierana, wiho jiina yoaro sehe jiboca sä, musa ñuchü. Noanohca. Noaare, Cristo yare yoana musa sehe wiho jiina jierara. Musa ä jichü ñuna wiho jiina yoaro sehe sä jipanahta wahcheja. Ä jina Cristore wacü tuaina, noano yuhtiina musa wahahtore Cohamacure sini payona nija sä musare. ¹⁰Ä jicu musa mehne jieracu musare ahri tjure joarocayui nija. Musa cahapu sucü, ñano yoaina musa jichü ñucü musare buhiri dahreihtja. Cristo yuhure to dutiriho sehta musare buhiri dahreihtja. Yu ä buhiri dahrehtaht sehta ahri tjure musare joarocayui nija. Cristo yuhure to dutiriho sehta musare yoadohohtirota jija. Musare dojomehnehtiro jieraja.

¹¹Mipure yu coyea, ahrire yahu batoihtja musare. Noano wahcheina jirucuga musa. Cristore wacü tua namoga. Ä yoana noaina, tirore yuhtiina jiga. Musa mehne macaina mehne cüno mehne jiga. Musa basi noano mehne jiga. Musa ä jichü ñuno musa mehne Cohamacu jirohca. Tiro marine cahma cahichü yoariro, marine noano mehne jichü yoariro jira. ¹²Ä yoana musa mehne macainare noano mehne piti bocasiniga. ¹³Jipihitina õ macaina Cohamacu yaina musare noa dutira.

¹⁴Mari puhtoro Jesucristo musare to cahña mehne, Cohamacu cühü musare to cahña mehne Espíritu Santo musa mehne jirucuriho to yoadohoa mehne noano jiga musa.

Gálatas

Galacia wama tiri yahpa macainare Jesu yainare joarocaha Paulo

1 ¹Yuhu Paulo, Cristo yare buhe dutiro to cūriro jija. Masa ti cūriro jieraja yuhu. Á yoa masa sehe yuhure Cristo buhe dutiro to cūhtore yuhure yahuerare. Cohamacu Jesu Pucuro sehe Jesure yariarore masoriro yuhure cūre to yare buhehtirore. Jesucristo cūhu yuhure cūre. Ti ā cūriro jicu ahrire joarocaja musare. ²Yuhu musare Jesu yainare Galacia yahpa macainare noa dutija. Yuhu mehne macaina Jesu yaina cūhu musare noa dutira. ³Cohamacu mari Pucu, mari puhtoro Jesucristo mehne musare noa dutija. Cohamacu to yoadohoa mehne noano jiga musa. ⁴Tiro Jesucristo sehe mari ñaare yoari buhirire yariari jire. Mipure masa ti ñaare yoari dacho jira. Á jiro ahri dacho baroihta tiro yariari jire Cohamacu mari Pucu to cahmariro seheta marine yuhduchu yoaro taro. Á to yuhduchu yoachu ñaare mipure ti yoariro seheta yoa duasi mari. ⁵Á yoa jipihitia dachoripe tirore mari Pucure ño payojihna. Ata yoajihna.

**Cohamacu masare to yuhduchu yoahiti buhea
cūnota jira. Paye buheapu mariahna**

⁶Cristo musare cahño to yaina cjihtire musare cūre. Á jicu musare cūriro yare cohāna, soro jia buhea sehere dói musa cahmachu ñu cuaa wahaja yuhu. ⁷Paye buhea noaa buhea yoaro sehe jia buhea waro jierara. Ti ā jie-rapachuta cāina musa cahai jiina musare cariboa, soro jia buheare buhea, noaa buheare ni dojomehne duara. ⁸Á yoa musare sā buhe muhtari cjirire mari cohāchu soro jia buhea sehere mari buhechu Cohamacu marine buhiri dahrejaro. Tuhsu, anjo muano macariro ā to buhechu tiro cūhure buhiri dahrejaro Cohamacu. ⁹Pano sā niriro seheta mipure pari turi nihtja tjoa: Cūiro musare sā buherire cohāno, soro jia buheare to buhechu Cohamacu tirore buhiri dahrejaro.

¹⁰Á nicu “Tiro dihta noano buheriro jira”, yuhure ni dutii nieraja. Cohamacu sehe yuhure “Noano buhere muhu”, to nichu cahmaja. Masare wahchechu yoacu tacu soro jia buheare buheboa yuhu. Á buhecu ne Cristo cahamacuno jieraboa yuhu.

Paulo Cristo to buhe duti to cūriro to ji ducarire yahuha

¹¹Yu coyea, ahrire musa masichu cahmaja yuhu: Noaa buheare yu buheri cjiri masa ya buhea jierara. ¹²Tí buhea masunore yu tuhori jierara. Á jia paina masa yuhure tí buheare yahuerare. Jesucristo sehe yuhure tí buheare masichu yoare.

¹³Panopure yu coyea judio masa ti yoaa tiro sehe yu yoariro jichu masina musa. Õ sehe yoaa tii yuhu: Jesu yainare tuaro ñano yoacu tinare noano wajã pahñonoca duamai. ¹⁴Sã ñuchusuma ti buherire tuabiaro yoa duacu yu coyea yu cño potori bucuarina yuhdoro yoa muhtariro jia timai yuhu. ¹⁵Yu ã jiro jipachuta yu masa bajahto pano Cohamacu yuhure bese tuhsuri jire. Æ jiro yuhure cahño tiro to yairo cjihto, to cahamacuno cjihto cüre yuhure. ¹⁶Æ yoa to cahmano sehetã to macunore yuhure masichu yoare to yare noaa buheare judio masa jierainare yu buhehti cjihtire. To ã yoachu “¿Dohse ni buhero cahmacari yuhure?” ni masare sinitu ñuerahi yuhu. ¹⁷Æ yoa Cristo to cürina yu pano jirina cahapure Jerusalëpure sinitu ñui wahaerahi. Arabia yahpapu wahi yuhu. Æ jicu Damascopu majare wihii tjoa.

¹⁸Tia cñhma baharo Pedrore ñucu wahi yuhu Jerusalëpu. Tõpure pu somana waro jii. ¹⁹Æ yoacu painare Cristo to cürinare ñuerahi. Santiago dihtare mari puhtoro bahore ñui. ²⁰Õ sehe ni joarocacu Cohamacu mehne ne mahñope joaeraja.

²¹Baharo Siria yahpapu, Cilicia yahpapu cñhure wahi. ²²Tõpure yu suchu tí pjare Judea yahpapu jiina Jesu yaina yuhure ne ñu masierasinire. ²³Æ jia ahri dihtare yuhure masi ducare tina: “Panopure marine ñano yoariro mipure noaa buheare to cohã duari buheare buhero nina”, ni masi ducare tina. ²⁴Yuhure ã masia Cohamacure “Noa yuhduariro jira”, nire tina.

Paina Cristo to cürina Paulore piti boca dóihta cahmana

2 ¹Catorce cñhmari baharo pari turi Jerusalëpu wahacu Bernabé mehne wahi. Tito cñhu wahare yuhu mehne. ²Cohamacu yuhure to waha dutichu tõpure wahi. Jerusalëi jicu Jesu yaina puhtoa ti sahsero ti cahmachuchu ñucu noaa buheare judio masa jierainare yu buherire yahui tinare. “¿Judio masa jierainare noaa buheare yu buhechu noajari, musa tuhutuchu?” nicu, ã ni yahui tinare. Æ ni yahui tinare panopu yu buherire mipure yu buheri cñhure ti noano masihtu cjihtore, tíre “Noana”, ti nihto cjihtore. Ti ã nierachu yu buheri cjiri yaba cjihti jieraboa. ³Yuhu mehne macariro Tito judio masuno jierariro jiro, circuncisiõre yoareriro jira. To ã yoamahnoeriro to jipachuta Jesu yaina puhtoa “Muhu cñhu circuncisiõre yoaga”, nierare tiore. ⁴Ti ã nierapachuta caina “Jesu yaina jija”, ni mahñoina wacñenoca sã mehne sãa, tiore circuncisiõre ti yoachu cahmamare tina. Jesu yaina mari jina “Panopu macaare ti dutiro sehe yoana tí mehne yuhdusi”, ni tuhutuja mari. Mari ã ni tuhutuina jichu mari yoare ñu dua tina sehe sã mehne mahño sãare. Æ yoaa sã ñuchusuma ya dutiare yoa duti dua, tí dutiare ño payorucuina jichu yoa duamare sãre tina. ⁵Ti ã yoa duapachuta noaa buheare quihõno musa noano masihtu cjihtore ne mahanocã mehne tuho duaerahi sã tinare.

⁶Æ yoa Jesu yaina puhtoa noaa buheare yu buherire ti tuhori baharo “Õ sehe ni yahu namoga judio masa jierainare”, ni yahu quihõerare tina yuhure. Jesu yaina puhtoare wiho jiina yoaro sehetã tuhutuja tinare. Cohamacu sehe jipihtinare cño potori tuhutura. Æ jicu ãta tuhutuja yuhu cñhu. Tina sehe yu buheriro sohtoare buhedoho masierare. ⁷Æ jia judio masa jierainare yu buhehtire Cohamacu yuhure to cürire tuhoa, “Tóihita jira”, nire tina. Judio masare buheare Cohamacu Pedrore to cüiro sehetã tó sehetã yuhu cñhure

cûre judio masa jierainare yu buhehtiro cjihtore. ⁸ Judio masare Pedrore buhe dutirirota yuhu cûhure tirota buhe dutire judio masa jierainare.

⁹ ã jia Santiago, Pedro, João mehne “Jesu yaina pûhtoa”, ti niina noaa buheare buherire Cohamacu yuhure to cûrire tuhoa “Tóihita jira”, nire tina. Æ niata yuhure Bernabé mehne noano wahchea mehne wamomaca ñahare sâre piti tia. Æ jina judio masa jierainare buheina jija sã. Santiago cûhu sehe judio masare buheina jira. “Åta wahajaro”, nii sã sã basi. ¹⁰ Æ nipahta tina judio masare pjacuoinare yoadoho dutire sãre. Pjacuoinare yoadohohtiro jiita nija yuhu.

Antioquíai Paulo Pedrore tuhtiha

¹¹ Æ yoa Pedrore Antioquíapu to suri baharo quihôno to yoaerari buhiri tuhtii tire. ¹² Õ sehe yoare tiro: Santiago to warocaina Antioquíapu ti suhto panocã, Pedro sehe judio masa jieraina mehne churo nire. Santiago warocaina judio masa jierainare “Circuncisiöre yoaga” niina, judio masa panopu macaina ya dutiare yoa dutiina jire. To ã churo watoi tina sure. Æ chûriro jiparota tina to cahapu ti suchu ñuno, tinare cuir, Pedro judio masa jierainare duhunoca, pari turi tina mehne churo wahaerare. “Mipure wihiina yuhure tuhtiri” nino, judio masa jieraina mehne chu namoerare. ¹³ To ã mahño cureriro seheta to yoachu ñua, paina judio masa cûhu tirore ñu cû, tina cûhu tó seheta yoare. Æ jiro Bernabé masa noariro jiparota tina yoaro seheta yoare tiro cûhu. ¹⁴ Æ jicu judio masa jierainare ti duhuri buhiri noaa buhea ti niriro seheta tina ti yoaerachu ñucû, jipihtina Jesu yaina panoi Pedrore yahui: “Judio masa ya dutiare yoa dutiina ti ñurocaroi judio masa jieraina mehne mu chu duaerachu ñua õ sehe ni tuhotuboca tina judio masa jieraina: “Jesu yaina dihta jina judio masa yoaro sehe yoajihna mari cûhu”, ni tuhotuboca. Æ ni tuhotuchu yoara muhu tinare. ¿Dohseacu tinare judio masare ñu cûchu yoa duajari muhu ã piti ti duhucu? Judio masuno jipaihta judio masa jieraina yoaro sehe yoamare muhu. Æ yoacu judio masa yoaro sehe yoaerare muhu. ¿Å yoariro cjiro jipaihta dohseacu judio masa jierainare judio masare ñu cûchu yoa duajari muhu?” nii tire.

Judio masare paina masa yoaro seheta Jesure wacû tua dutiha Cohamacu

¹⁵ Sã sehe judio masa masa bajuana, paina ñano yoina judio masa jieraina yoaro sehe jieraja sã. ¹⁶ Æ jiina sã jipachuta Cohamacu dutiare Moise cjirore to cûrire yorina sã jichu “Noaina jira”, ni ñueraboa Cohamacu sãre. Tíre mari masija. Æ yoa Jesucristore mari wacû tuachu Cohamacu marine “Noaina jira”, ni ñunohca. Tíre masina, sã cûhu Jesucristore wacû tuaja tirore sã wacû tuari mehne sãre “Noaina jira”, Cohamacu to ni ñuhto cjihtore. To dutia cjiirire sã yorina jichu “Noaina jira”, ni ñueraboa Cohamacu sãre. Ne tí dutia yoaa mehne noaina jierara masa, Cohamacu to ñuchu.

¹⁷ Wiho mejeta Cristore mari wacû tuaa mehne noaina Cohamacu yaina mari waha duachu, ñaina mari jiare masichu yorohca Cristo. ¿Cristo mari ñaare marine masichu yoaro ñaina marine jichu yoajari tiro, musa tuhotuchu? Ne mahanocã mehne yoaerara. ¹⁸ Sã dutia yoaa mehne yuhdu duamarina cjiiri jipanahta tí buheare cohã. Æ cohãpanahta pari turi tí buheare yoana tí dutiare sã yoa pahñoerari buhiri potocãta buhiri tinahca sã.

¹⁹Cohamacu dutiare Moise cjirore to cūrire cūno pjaeraja mari. Ā jia, tí dutia marine dūti namoerara. Cohamacu to tuaa mehne to yaina jija mari. Cristo mehne crusai yariaina yoaro sehe jija mari. ²⁰Ā jina yariariro to mu sūro to yoareriro seheta mari mu sūro yoeraja mari. Cristo ya tuaa mehne yoaja. Ā yoa mipure Cohamacu macunore wacū tuaa mehne jirucuja mari. Tiro Cohamacu macuno marine cahīre. Ā jiro mari ya buhirire yariare. ²¹To dutia yoa mehne noaina Cohamacu yaina mari wahachu Cristo to yariari sehe ne yaba cjihti jieraboā. Cohamacu marine to cahīre, Cristo to yariarire wiho jia yoaro sehe jichu yoa duaeraja yuhu sehe. Ā jicu “Dutia mehne yuhduihca”, ne nieraja yuhu.

Cohamacu dutia Moise cjirore to cūrire, wacū tuaa cūhure yahuha Paulo

3 ¹Yu coyea, musa Galacia macaina tuho masieraina ji wama tira musa. Jesucristo crusai to yariari buheare jipihtina ti űurocaroi musare yahui. Ā jina mipure to yare musa yuhdurucahtore paina musare ti dojomehnechu dohse yoana tinare yuhtiri musa? ²Ahrireta yahu duaja musare: Dutiare musa yoa mehne Espīritu Santore cjuarara musa. Noaa buhea sehere tuhona Cristore musa wacū tuaa mehne Espīritu Santore cjuara musa. ³Espīritu Santo mehne musa Cristo yaina ji ducana mipure musa mu sūro musa yoa mehne Cohamacu cahapu musa waha duachu űa nina. Tuho masieraina jira musa, ā yoana. ⁴Ā Noaa buheare musa yoari buhiri payu tahari musa űano yuhduna wiho warota űano yuhducocana niri musa, ā wahana? Wiho waro jierara musa ā wahari. ⁵Ā Dohse musa yoari wapa Espīritu Santore musare wari Cohamacu, musa tuhutchu? To dutiare musa yoari wapa waerare tiro. To buheare noano musa tuhochu űuno tirore musa wacū tuari baharopu Espīritu Santore ware tiro. Ā Cohamacu musa watōi to tuaa mehne yoa űono dohse jiro baro ā yoa űojari tiro, musa tuhutchu? To dutiare musa yoari wapa ā yoa űoerare tiro. To buheare noano musa tuhochu űuno tirore musa wacū tuari baharopu ā yoa űore tiro.

⁶Abrahā cjiro Cohamacure wacū tuaa tiri jire. To ā yoachu tirore Cohamacu “Noariro jira”, ni űua tiha. ⁷Ā jina ahri yu nihtire masiga musa: Cohamacure wacū tuainata potocāta Abrahā cjiro panamana ji turiaina waro pa turu macaina yoaro sehe jira. ⁸Panopu Cohamacu yare ti joari pūi ō sehe ni yahua tiha: Judio masa jieraina Cohamacure ti wacū tuachu űuno “Noaina jira”, ni űuna Cohamacu. To ā ni űuhtore Cohamacu pano masiyuro, tiro noaa buheare Abrahāre pano yahu muhta tuhsua tiha. “Muha mehne ahri yahpa macainare jipihtinare noano yoihtja”, nia tiha Cohamacu Abrahāre. ⁹Ā jiro Abrahā cjiro Cohamacure noano tuho wacū tuaa tiha. To ā wacū tuachu űuno Cohamacu tirore noano yoa tiha. Ā yoa paina masa Cohamacure ti wacū tuachu, tina cūhure noano yorohca Cohamacu, Abrahā cjirore to yariari seheta.

¹⁰“Moise cjirore to cūri dutia mehne Cohamacu yaina wahanahca”, ni tuhoutuina buhiri tiina jira. To joari pūi āta nina: “Cohamacu dutiare to ya tjuī ti joarire yoa pahnoeraina buhiri tiina jira tina jipihtina”, ni joaa tiha. ¹¹Cohamacu yare ti joari pūi ō sehe nina: “Cohamacure wacū tuainare ‘Noaina jira’, ni űuna Cohamacu. Ā wacū tuaa jipihtia dachoripe Cohamacu mehne ā jirucuahca”, nina Cohamacu yare ti joari pūi. To ā nichu ahri yu

nihtire mari noano masija: To dutiare ti yoaa mehne masa noaina wahae-rara, Cohamacu to ñuchu. ¹²Dutia yoaa mehne Cohamacu cahapu waha duaina Cohamacure wacu tuaerara. Ō sehe nina Cohamacu yare ti joari pui: “Dutiaré yoaa mehne noaina waha duainare tí dutiare yoa pahñoño cahmana tinare, duhsaro marieno”, nina Cohamacu yare ti joari pui. Wiho mejeta to dutiare yoa pahñoeraina jira masa. Á jia Cohamacu ñurocaroi noaina waha masierara.

¹³Á jia tí dutia marine buhiri tichu yoara. Mari á buhiri tichu ñuno Cristo sehe to basi mari yaro jiborirore buhiri tiro waharo, mari buhiri tiborirore tiro sehe cohābasare marine. Cristo to buhiri tihtore yahuro ō seheta ni joa tiha panopure: “Jipihtina yucucapu ti duhu ñina buhiri tiina jira”, ni joa tiha panopure. ¹⁴To á ni yahu joariro seheta á yoari jire Cristore. Cohamacu Abrahā cjirore “Áhri yahpa macainare noano yoihtja”, to niriro seheta yoaro niri jire masare. Á yoari jire Cristo mehne. Tiro yariari jire Cohamacu judio masa jierainare noano to yoahto cjihtore. Á yoaro Jesucristo mehne Cohamacu Abrahāre to niriro seheta tuhsuri jire. Á yoari jire tiro tirore mari wacu tuari baharo Espiritu Santore mari cjuahito cjihtore.

To buherire quti mehne yahu namoha Paulo

¹⁵Yu coyea, masa ya quti mehne tí yu nirire yahuihtja musare: Cūiro paio mehne “Ō sehe yojihna mari”, ni cūno mehne ti joa cūpachuta paio tí pūre soro ni dojomehne joa namo masierara. Á yoa tuhsu, tí pūre “Quihño jierara”, ni masierara tiro. ¹⁶Tí pūre cūno potori ti joa cūriro seheta “Musare noano yoihtja”, Cohamacu nino, Abrahāre to panamino ji turiariro cūhure ni yahu cūno nia tiha. Á ni yahu cūno paina to panamana ji turiaiapure ni yahu cūno niera tiha. Cūioretā to panamino ji turiariro dihtare ni yahu cūno nia tiha Cohamacu. Tiro Abrahā panamino Cristo jira. ¹⁷Mipure noano yahuihtja musare: Abrahā cūhure Cohamacu “Musare noano yoihtja”, to ni cūri baharo cuatrocientos treinta cūhmari yūhduri baharo to dutiare Moise cjirore cūa tiha. Á cūno Abrahā cūhure Cohamacu “Musare noano yoihtja”, to yahu cūri cjirore boro taro niera tiha. ¹⁸Cohamacu marine yūhdachu yoaro, dutiare mari yoaa mehne marine yūhdachu yoaerara. Dutiaré yoaa mehne mari yūhdachu Cohamacu “Musare noano yoihtja”, to ni yahu cūri sehe yaba cjihti jieraboa. Wiho mejeta to dutia mariasinichupu Abrahāre á ni cū mūhtaa tiha.

¹⁹¿Á jiro dohse jiro baro to dutiare cūri Cohamacu? To dutiare cūha tí dutiare mari yūhduracire mari noano masihtō sehe. Á jiro panopure Cohamacu “Mū panamī mehne masare noano yoihtja”, Abrahāre to niriro to wihihito pano Cohamacu to dutiare cjuaa timaha masa. Cohamacu to dutiare to cūchu to anjoa sehe tíre duti turiaa tiha. Á yoa Moise cjirore ti cūchu, tiro sehe masare cū turiaa tiha tjōa. ²⁰To dutiare Moise cjiro to cū turiachu Cohamacu to basita masare cūera tiha. Á cūeraparota Cohamacu “Muhure noano yoihtja”, Abrahā sehere ni yahu cūno, to basita á ni yahu cūa tiha.

²¹Cohamacu Moise cjirore to dutiare cūno, tō pano Abrahāre to ni yahu cūrire “Yu niriro sehe yoasi yūhu”, nino niera tiha tiro. Abrahāre to niriro seheta yoaro taro nia tiha. To dutia yoaa mehne Cohamacu yaina wahana tí pja pinihta dutiare mari yoaa mehne noaina wahaboa mari. ²²Wiho mejeta

Cohamacu to yare ti joari pū sehe jipihtina ñaa buhiri tiina, ñaare duhu masieraina ti jirire yahua tiha. Ñ ni yahua tiha Cohamacu “Musare noano yoihtja”, pano to niriro seheta to yoahto cjihtore. Ñ yaro Jesucristore wacū tuainare noano yora tiro pano to niriro seheta.

²³ Jesucristo ya buheare mari tūhohto pano, tirore mari wacū tuahto pano Cohamacu Moise cjirore to cūri dutia dihtare masimahi mari. Ñ masimarina jina ñaa buhiri tiina, peresupū jiina yaro sehe tí ñaare duhu masieraina jina, dutia dihtare masiina jimahi mari. ²⁴ Ñ jia Cristo to wihito pano Cohamacu dutia sehe marine yahure dahra cohtariro to puhtoro pohnare to yahuriro seheta. Ñ yahure marine baharo Cristore mari wacū tuaa mehne Cohamacu “Noaina jira”, marine to ni ñuhto cjihtore. ²⁵ Mipū pinihtare Cristore mari wacū tuari pja jira. To ñ jichu dahra cohtariro yaro sehe to dutia sehe marine yahu namoerara. Marine dutirucu namoerara. ²⁶ Ñ jina Cristo Jesure wacū tuaina jina Cohamacu pohna jira musa. ²⁷ Jipihtina musa co mehne bautisarina jira Cristo yaina musa jiare ñona tana. Ñ yoana to yaina jina, Cristo yaro sehe jiina wahana nina musa. ²⁸ Mipūre pua curua jierara musa. Judio masa jieraina, judio masa mehne pua curua jierara musa. Dahra cohtaina, dahra cohtaina jieraina mehne pua curua jierara musa. Mua, numia mehne pua curua jierara musa. Jipihtina musa Cristo yaina jina, cū curuata jira musa. ²⁹ Cristo yaina jina, Abrahā Cohamacure to wacū tuariro seheta yoina jina, Abrahā panamana waro jira musa. Musa ñ jiina jichu Cohamacu Abrahāre “Musare noano yoihtja”, to ni yahu cūriro seheta musa cūhure noano yorohca tiro. Cristo yaina musa jichu ñuno musare noano yorohca.

4 ¹ Ñ sehe jira ahri quitī mehne yu yahu namochu: To pucuro baharo to yare nahtiro wahma bucuariro jiropu jipitia to ya jipachuta dahra cohtariro yaro seheta ne paye baro maerariro yaro seheta jira tiro. ² Ñ jia tiro wahma bucuariro to jichu tirore ñu wihboina to yare ñu wihbora. Ñ yoa to pucuro to quihōri pja mu suchupu to pucuro yare cjuarohca to macuno. ³ Ñ seheta wahma bucuariro yaro seheta jimai mari cūhu. Ñ jiina mari jisinchu dahra cohtainare ti dutiriro seheta Moise cjirore to cūri dutia, mari ñuchusuma panopu macaina ti cūri dutia cūhu marine dutisinimare. ⁴ Mari ñ jiina jipachuta to quihōri pja mu suchu Cohamacu to macunore warocari jire. Ñ to warocachu to macuno cūcoro numino mehne masa bajuari jire. Ñ jiro tiro judio masuno masa bajuaro Cohamacu dutia Moise cjirore to cūri cjiire yorucuriro jiri jimare. ⁵ Mari cūhure tí dutiata dutisiniri jimare. Ñ jiro marine yuhduchu yoahtiro cjihtore warocari jire Cohamacu to macunore, to pohna waro mari wahahto cjihtore.

⁶ Ñ jiro to pohna musa jichu ñuno, Cohamacu macuno to yairo Espiritu Santore musa mehne jihtirore warocari jire Cohamacu. To yairo Espiritu sehe Cohamacure “Mai”, niriro jira. ⁷ Ñ jina musa Cohamacu to yoadohoa mehne dahra cohtaina jierara musa mipūre. To pohna jira musa. Ñ jina to pohna jina, Cohamacu to wahtire cjuanahca musa.

Paulo Galacia macainare Jesu yainare cuisāha

⁸ Panopu Cohamacure musa masierasiniina jina “Cohamacu jira”, musa nia masurine ño payona tí masurine dahra cohtaina jiri jimare musa. Musa ñ ño payoina potocāta cohamana waro jierari jire. ⁹ Ñ jirina cjiri jipanahta mipūre

Cohamacu warore masina musa. Jierara. Tiro pinihta musa sehere masina. ¿To ã masipachuta dohse yoana ahri yahpa macaina ya buhea sehere cahmajari musa tjoa? Ti ya buhea mehne noano yuhdu duapanahata ne yuhdusi musa. Ñ yoa baharo Cohamacu jipihtia dachoripe musare to wahtire cjuasi musa. Ñ yoana tí buhea mehne yuhdu duana, pari turi ti ya dutiare dahra cohtaina yoaro sehe wahana nica musa. ¹⁰ Cãa dachorire, cãa sũrine, cãa puhibacure, cãa cuhmarine bose numurine dahre dutira musa. “Mari ã yoaa mehne dutia mehne yuhdunahca”, ni tuhotumana musa. ¹¹ Musa ã ni tuhotuchu musare tuaro yu buheri cjiri yaba cjihti jieraboca, yu tuhotuchu.

¹² Yu coyea ahrire tuaro dutiiltja musare: Cristore yu tuhoturiro seheta musa cũhu tirore tuhotuga. Panopu dutia yoaa mehne yuhdu duaina jierari jimare musa judio masa jieraina jina. Mipu sehere yuhu cũhu musa yoaro seheta wahaí dutia yoaa mehne yuhdu duaracu. Ñ jina Cristore yu tuhoturiro seheta musa cũhu ãta tirore tuhotuga. Musa mehne yu jichu ne ñano yoaerare musa yuhure. ¹³ Ahrire masina musa. Tõpu dohatiriro jicu, pa sehẽpu waha masieracu noaa buheare musare buhe ducai. ¹⁴ Yu ã dohatiriro jipachuta, yuhure pumeborina musa jipanahta, yuhure yabierare musa. Ñ jina yuhure “Waharisa”, nierare musa. Ñ jina Cohamacu yairo anjore, Jesucristo cũhure musa piti bocaboriro seheta yuhure noano piti bocare musa. ¹⁵ ¿Mipure dohse wahari yuhu mehne musa wahchea? Musare ahrire niitja: Cãno pjana musa caparire orewe na yuhure waboa musa. ¹⁶ ¿Yuhu mehne macaina jipanahta mipure quihõno musare yu yahuchu ñu tuhtijari musa yuhure?

¹⁷ Sohõ jiina soro ni buheina musare tuaro cahmasãana. Ti tuhotua soro jira. Noaa jierara. Tina musare yuhure yuhdurucachu cahmana, tina sehere musa cahmahto sehe. ¹⁸ Noano mehne musa noano wahahto sehe musare ti cahmasãachu noa niboa. Ñ yoa tõpure yu mariachu cũhure ti ã cahmasãachu noa niboa. ¹⁹ Yu pohna, niji wahcõricoro to ñano yuhduro seheta musare ñano wacũ tuhotuja yuhu. Pu Cristo yoaro sehe musa jichupu musare wacũ duhuihca. ²⁰ Michapucacã musa mehne jicu tuhtiro marieno wahchea mehne musa mehne yu suhuduchu noaboa yuhure. Musare pjíro tuhotui nija yuhu.

Agar Sara mehne ti jiri cjirire yahuha Paulo

²¹ Tuhoga musa yuhure. Cohamacu to dutiare yoaa mehne yuhdu duaina jipanahta to dutia sehere noano masierara musa. ²² Õ sehe nia tiha Cohamacu yare ti joari pui: Abrahã puaro pucuro jia tiha. Tiore dahra cohtaricoro Agar wama tiricoro mehne cũro pohna tia tiha. Ñ yoa to namono poto Sara wama tiricoro mehne cũro pohna tia tiha. ²³ Wiho mejeta tiore dahra cohtaricoro macuno masa mari yoaro seheta masa bajuaa tiha tiro. To namono poto macuno sehe Cohamacu “Cũirocã pohna tinahca musa”, to niriro seheta masa bajuaa tiha tiro sehe. ²⁴ Ahri quiti marine noano piti dahre yahura: Cohamacu pua taha masare “Musare yoadohoihtja”, to nia yoaro seheta jira ahri numia puaro numia. Cũcoro Sinaí wama tidupu to dutiare wari yoaro sehe jira. Ticoro Agar jira. Ticoro mehne mari piti dahre buhechu judio masa cũhu dutiare yorarucia mehneta yuhdu duaina ticoro yoaro sehe jira. Tina dahra cohtaina yoaro sehe jira. ²⁵ Ticoro Sinaí wama tidu Arabiapu jidu yoaro sehe jiricoro jira. Mipure Jerusalẽ macaina judio masa dutia yoaa mehne

yuhdu duaina dutiare dahra cohtaina yoaro sehe jira. Ā jia mari piti dahre buhechu tina ticoro yoaro sehe jira dahra cohtaricoro to jia tiriro sehe. Tina Cohamacu pohna jierara. ²⁶ Pacoro sehe Abrahā namono poto muanopu jiri maca Jerusalē wama tiri maca yoaro sehe jira, mari piti dahre buhechu. Ticoro dahra cohtaricoro jieraro, to macuno cūhu dahra cohtariro jierari jire. (Ā yoa Jesucristore wacū tuaina mari jina, Sara macuno yoaro sehe jija. Mari cūhu Cohamacu Moise cjirore to cūri dutia mehne yuhdu duaina jieraina jina, dahra cohtaina yoaro sehe jieraja.) ²⁷ Cohamacu yare ti joari pūi ō sehe ni joaa tiha Cohamacu pohna warore, Sara yoaro sehe jiricorore yahuro:

“Pohna marienicoro, wahchega.

Ā yoa wahchea mehne sañurucuga, niji wahcōno purīnore masieraricoro jico.

Muhu sehe manu tiricoro yuhdoro payu pohna ticohca.

Ā jico wahchega”,

ni joaa tiha panopure to pohna tihto pano Sara yoaro sehe jiricorore yahuro.

²⁸ Yu coyea, Cohamacu to niriro seheta Isaa masa bajuua tiha. Mari cūhu tiro yoaro sehe Cohamacu to niriro seheta to pohna jija mari. ²⁹ Wiho mejeta tí pjapure masa yoaro sehe masa bajuariro ñano yoa tiha paire Espíritu Santo to niriro seheta masa bajuarirore. Mipu cūhure āta jira to jiriro seheta. ³⁰ Wiho mejeta ō sehe nina Cohamacu yare ti joari pūi: “Dahra cohtaricoro macuno to pucuro yare cjuā masierara. To namono poto macuno sehe to pucuro yare cjuā masina. Ā yoa ticorore dahra cohtaricoro cjirore to macuno mehneta cohānocahga”, ni joaa tiha. ³¹ Yu coyea, ne dahra cohtaricoro pohna yoaro sehe jieraja mari. Wiho mejeta to namono poto pohna yoaro sehe jija mari.

Jesucristo yare noano tuho ñahana, tíre duhuena tjiga

5 ¹ Dutia yoa mehne yuhdu duaina tí dutiare dahra cohtaina ti dutipeina yoaro sehe jira. Cristo yaina wahana ti dutipeina mari jiare wijaana, Cristo mehne yuhduja mari. Ā to yuhduchu yoarina jina, to yare ā yorucuga, “Tí dutia yoa mehne yuhdunahca”, ni tuhoturo marieno.

² Mipure yuhu Paulo ahrire yahuihtja musare: “Circuncisiōre mari yoari mehne yuhdunahca”, musa ni tuhotuna, Cristo musare to yoadohore yaba cjihti jierachu yoana nina musa. ³ Jipihina circuncisiōre musa yoari mehne yuhdu duainare pari turi ō sehe ni yahuihtja yuhu: Circuncisiōre musa yoari mehne yuhdu duana, paye Cohamacu dutiare yoa pahñoerana, yuhdusi musa. ⁴ Dutia yoa mehne yuhdu duaina jina Cristo sehere cohāre musa. Ā yoa jina, Cohamacu musare to cahīre, musare to yuhduchu yoa duarire cahmaerara musa. ⁵ Wiho mejeta mari sehe Espíritu Santo to tuua mehne Cohamacure wacū tuaja. Mari ā wacū tuachu “Noaina, ñaa buhiri marieina jira”, ni ñūna Cohamacu marine. To ā ni ñuchū marine to yuhduchu yoahtore masija mari. ⁶ Cristo Jesu yaina jina circuncisiōre mari yoaachu ne yaba cjihti jierara. Circuncisiōre mari yoaerachu cūhure ne yaba cjihti jierara. Wiho mejeta Cristo pinire wacū tuana painare cahīnahca mari. Tí wacū tuua sehe wiho waro jia nierara. Tí waro jia nina.

⁷ Musa Cristore noano wacū tuasinimare. ¿Diina baro noaa buheare yuhdu-ruca dutiari musare? ⁸ Ti ya buhea Cohamacu musare to pohnare cūriro to ya

buhea jierara. ⁹ Ahri yu nihtire wacūga musa: Mahanocā pāo bucuaro trigo yubure noano sahserucu sura. (To ā sahserucu suriro seheta yu coyea judio masa ya buhea sehere musa cahmarucuchu ñua payu masa musa mehne macaina cūhu tí buheare cahmaboca tina cūhu.) ¹⁰ Mari puhtoro Cristore wacū tuaja mari. Ā jicu ahri yu nihtire masija yuhu. Cristo to yoadohoa mehne paye buheare baharopure cahmasi musa. Tíre masija yuhu. Musare dojomehne cohtaina dohse jiina jica. Tinare Cohamacupu buhiri dahrerohca.

¹¹ Yu coyea, “Dutia yoaa mehne yuhdunahca”, ti nia buheare yu buheriro jichu judio masa yuhure ñano yoaeraboa. Cristo crusai to yariari buheare yu buheri buhiri tina ñano yoara yuhure. Cristo ya buhea mehne judio masa ya buheare yu buhe morechu yuhure ñano yoaeraboa tina. ¹² Musare dojomehne cohtaina musare mahanocā musa pjacu macari cahsarocāre yihso dutiina ti basi dihta yihsojaro.

¹³ Yu coyea, “Dutia mehne yuhdunahca”, ni tuhotu dutierara Cohamacu musare. Wiho mejeta “Dutia mehne yuhdunahca”, ni tuhotuina jierapanahta “To dutiare yuhdurucajihna”, ni wacūena tjiga. Ā yoa musa mehne macainare cahma cahina, tinare dahra cohtaina yoaro seheta yoadohoga tinare. ¹⁴ Cūnota dutiare noano yoana, Cohamacu dutiare yoa pahñona nija mari. Ō sehe jira tí dutia: “Mu basi mu cahino seheta mu cahai jiina cūhure cahiga”, ni dutia tiha. ¹⁵ Ā jina wahiquina suaina yoaro sehe musa basi cahma sayoena tjiga. Tuhsu, cahmachena tjiga. Musa mehne macaina jipihtinare “Dojomehneri”, nina noano yoaga musa.

Masa ñaare ti goa pjaare, Espíritu Santo to cahmaa cūhure yahuha Paulo

¹⁶ Espíritu Santo to cahmariro seheta jirucuga musa. Ā jina musa ñaare musa goa pjaare yoena tjiga. ¹⁷ Ñaare musa goa pjachu tíre musa yoachu, Espíritu Santo ñu yabira. To ā ñu yabichu tí ñaare duhunahca musa. Ā jina ñaare musa goa pjana, tíre yoana, Espíritu Santore ñu tuhtira musa. Ā ñu tuhtina to cahmano sehe yoaerara musa. Ā jina musa goa pjaare musa yoa duaro seheta yoa masierara musa. ¹⁸ Ā yoa Espíritu Santo to cahmaare yoaina jina “Dutia mehne mari yuhdunahca”, ni tuhotuerara musa.

¹⁹ Masa ñaare ti yoaare mari noano masi tuhsuja. Ō sehe jira tí: Numino mehne ñano yoaa, muno mehne ñano yoaa, wuana tia, tó sehe jia ñaare buo tiro marieno yoaa, ²⁰⁻²¹ “Cohamacu jira” ti nia masurine ño payoa, puti sitea, paye yaya ti yoaa, ñu tuhtia, cahma sayoa, doaa, suaa, to basi dihta cjuu duaa, ñu tuhti cahma tju waa, cū curua macaina pa curuare ñu tuhtia, paina yare tuaro cahmaa, cahaa, cahaa bese numurine dahrea, tó sehe jia jira ñaare yoaa. Panopu musare cuaro mehne yu niriro seheta mipu cūhure nihtija: Tí barore yoaina puhtoro Cohamacu to suho jiropure muanopure ne susi.

²²⁻²³ Espíritu Santo sehe marine ō sehe yoaina jichu yoara: Masare cahina, wahcheina, cuiro marieina, so suaeraina, painare noano yoaina, noaina, duhuro marieno Cohamacu cahmaare yoaina, painare yuhduruca duaeraina, noano mehne yoaina, ti ñaa goa pjaare yoaeraina jichu yoara marine tiro. Tó sehe yoainare “Ā yoena tjiga”, ne cūiro nierara. ²⁴ Cristo Jesu yaina jina mari ñaa goa pjaare yoa namoeraja. ²⁵ Espíritu Santo marine Cohamacu mehne ā jirucuchu yoarohca. Ā jina to cahmano seheta yoarucuina jijihna mari.

²⁶“Painare masi yuhdurúcaja sã”, ni tuhoutuina jiena tjijihna mari. ã jina mari mehne suachu yoarena tjijihna painare. ã yoana mari mehne macaina noano ti wahachu ñuna tinare sua tuhoutuena tjijihna.

Musa mehne macainare yoadohoga

6 ¹Yu coyea, cūiro musa mehne macariro to ñaare yoachu ñuna, Cristore noano wacū tuaina jina niji siaroca dero tirore yoadohoga noaare pari turi to yoahto cjihto sehe. ã yoana musa cūhu “Ñaaare goa pjari”, nina noano yoaga. ²Musa mehne macaina ti ñano yuhduchu cūhure yoadohoga tinare. Musa ã yoana Cristo to dutiro seheta yoana nina musa.

³Cūiro wiho jiriro jiparota “Painare yuhdurúcaja”, ni tuhuturo, to basi mahñoa dihtare tuhoturiro jira. ⁴Cāina musa sahsero musa yoarire “Ahri noaa jira. Ahri ñaa jira”, ni masiga. ã masina musa yoi noaa jichu musa basi wahchenahca. ã jina “Painare yuhdurúcaja”, nisi musa. ã nierana painare musa yuhdurucari mehne wahchesi musa. ⁵ã jiro Jesu yairo to musuro Cohamacu yare yoara. Pairo masuno tirore tíre yoadoho masierara.

⁶ã jina noaa buheare buherirore paye baro musa cjuare tirore waga musa to yahuare tuhoina.

⁷Toari masuno ñaa yaparire toaro ñaa dichare cjuarohca. Noaa yaparire toaro noaa dichare cjuarohca. (Tó seheta mari cūhu ñaare yoana ñaare cjuanahca. ã jiro mari ñari buhiri buhiri dahrerohca. Noaare yoana noaare cjuanahca. ã jina noano jinahca.) ã jina “Sã ñaare yoachu Cohamacu sãre buhiri dahresi”, ni tuhoutuena tjiga. Ñaare yoina Cohamacure bujupeina jira. Cohamacure bujupeinare buhiri dahrerohca tiro. ⁸Mari ñaare goa pjana, tíre yoana, tí mehneta yarianahca. ã jina pichacapu wahanahca. Espiritu Santo sehe to cahmaare mari yoachu tiro marine jipihtia dachoripe manopu jirucuchu yoarohca. ⁹ã jina noaare yoana tíre pumena tjijihna mari. Cohamacu to quihōri pja jichu noaare cjuanahca mari pumerana. ¹⁰ã jina jipihtinare mari ñuinape noano yojihna mari. Mari coyea Jesu yaina pinihtare paina yuhdoro noano yojihna.

Paulo yahu batoaro, noa duti batoaha

¹¹Bujua letrari mehne yu wamomaca waro mehne musare yu joarocaire ñuga musa. ¹²Musare circuncisiōre yoa dutiina masa tinare ño payochu cahmana. Cristo crusai to yariari buheare mari buheri buhiri masa ñano yoara marine. Ti ã yoachu ñua ahrina musare circuncisiōre yoa dutira “Judío masa ya buhea sehere yojaja”, nia. ã ti yoa dutichu judío masa tinare ñano yoeraboca. ã jia circuncisiōre yoa dutira. ¹³Musare circuncisiōre yoa dutiina sehe Cohamacu to dutiri cjiirire yoa pahñoerara. ã jia circuncisiōre musare ti yoa dutiri baharo musa yuhtichu ñua, judío masa tinare musare dutiinare ño payoboca. Ti ã ño payohti cjihtire musare circuncisiōre yoa dutira tina. ¹⁴Mari puhtoro Jesucristo crusai yariariro ya buhea dihtare jipihtinare wahchea mehne yahu duaja. Ne paye buheare ã ni yahu duaeraja. ã crusai to yariachu ahri yahpa macaa ñaare watino yuhure yoa dutiro bihoerara. ã yariaro tí ñaare yuhure cahmaerachu yoare tiro. ¹⁵To ã yoachu Cristo Jesu yaina mari jichu circuncisiōre mari yoachu ne yaba cjihti jierara. Circuncisiōre mari yoerachu cūhure ne yaba cjihti jierara marine. Wiho mejeta pari

turi masa bajuaina yoaro sehe, Cohamacu cahmano seheta yoaina, marine to cohtotachu pinihta wiho waro jierara. ¹⁶Jipiltina ahri yu buherire yoaina, Cohamacu yaina waro jina, cuiro marieno noano jiga musa. Ñ jina Cohamacu to pja ñua mehne jiga musa.

¹⁷Mari puhtoro Jesure dahra cohtariro yu jiri buhiri yu pjacure cami tija yuhu. Yu ã jiro jichu mipure paina yuhure cariboea tijaro.

¹⁸Yu coyea mari puhtoro Jesucristo musare jipiltinare to cahia mehne noano yoajaro. Ñta yoajaro.

Efesios

Efeso macainare joarocaha Paulo

1 ¹Yuhũ Paulo musare Efeso macainare joarocaja. Yuhũ Jesucristo yare buhe dutiro to cūriro jija. Cohamacu to cahmano seheta Jesu yuhure to yare buhehtirore cūre. Ā jicu musare Cohamacu yainare Jesucristore ā wacū tuarucuinare joarocaja yuhũ. ²Ā joarocacu yuhũ musare noa dutija. Cohamacu mari Pucu, ā yoa mari puhtoro Jesucristo cūhũ musare noano yoa, noano jichũ yojaro.

Cristo yaina mari jichũ ñũno Cohamacu noano yoara marine

³Cohamacu, mari puhtoro Jesucristo Pucuro marine noano yoarucura Cristo yaina mari jichũ ñũno. Jipihtia to ya muano macaa noaa mehne tiro marine noano yoarucura. Espiritu Santo mehne marine ā noano yoarucura. To ā yoiriro jichũ ñũna noano ño payoa mehne tirore noano wahche payojihna. ⁴Ō sehe yoa tiri jire tiro marine to yainare: Ahri yahpare to bajuamehnehto pano mipure to yaina jihtinare beseyu tuhsua tiri jire tiro marine. Ā besea tiri jire marine ñaa buhiri marieina mari jihto sehe. Ā yoana ñaa buhiri marieina jija mari, Cohamacu to ñuchũ. Ā jiro marine “Ñaa buhiri tiina jira”, nisi tiro. ⁵Panopu ō sehe nia tiri jire tiro marine: “Yu macu Cristo tinare to yoabasari mehne tina yu pohna jiahca”, ni cūa tiri jire marine panopu. To ji coariro seheta to cahmariro seheta ā wahachu yoa tiri jire tiro marine. ⁶Wiho jiina mari jipachuta marine to ā noano yochũ ñũna ño payoa mehne tirore noano durucujihna. To macuno to cahīriro yaina mari jichũ ñũno noano marine yoara tiro. Ā jina tirore noano durucujihna. ⁷⁻⁸Cristota jira marine pichacapu waha-borinare yuhduchu yoiriro. Cristo mari ñaa buhirire yariabasaro, to dire cohā, mari ñaa yoari buhirire cohāri jire. Mari ñaa yoari buhirire to cohāchu ñũno, Cohamacu sehe mari ñaa buhirire bonocahna. Marine ñaa dihtare yoaborinare ā cahmano marine noaputiaro yoari jire Cohamacu. Ā yoa marine to ā yoinare noano waro tuho masiina wahachu yoari jire. ⁹⁻¹⁰Tuho masiina wahachu yoa, baharopu to yoahtore marine masichũ yoare. Panopu painare tíre masichũ yoaerari jire tiro. Ō sehe jira baharopu to yoahto: Tiro to cahmariro seheta to tuhoturiro seheta jipihtinare cū curuata Cristo yaina jichũ yorohca. Ā jiro jipihtiare to ya jichũ yorohca. To quihōri pja mu suchũ muano macainare, ahri yahpa macaina cūhure, cū curuata to yaina jichũ yorohca tiro. Ā yoa muano macaare, ahri yahpa macaa cūhure to ya jichũ yorohca. Ā jiro Cristo sehe jipihtina bui puhtoro jirohca. Ā yoa jipihtia puro jirohca. Ā jihti to ji dutia tiha Cohamacu tirore.

¹¹ Ñ yoaro Cristo yaina mari jihtore masino panopu Cohamacu marine bese tuhsua tiha to yaina mari jihtinare. Ahri jipihtiare to yoirire, baharopu to yoahto cūhure, “Ñ waharohca”, ni cūyua tiha tiro to tuhoturiro seheta, to cah-mariro seheta yoaro taro. Ñ yoa tiha tiro to yare sā yoahto cjihtore. ¹² Sā sehe judio masa Cristore cahma muhtaina jina sāre to yuhduchu yoahtore cohta muhtaina jija. Cohamacu sāre besea tiha to yare sā yoahto cjihtore. Cohamacu yare sā ã yochu ñua, paina tirore ño payo, “Tuariro jira”, ti nihto sehe Cohamacu sāre besea tiha. ¹³ Musa cūhu quihōno durucualeta noa buheare tuhore. Tí buhea “Cohamacu cahapu musa waha duachu, ñ sehe jira”, ni yahura marine. Tíre tuhona tirore wacu tua, noano tuhona to yaina wahare musa. To yainare ñ sehe niri jire Cristo: “Musare Espiritu Santore warocaihtja”, ni yahu cūri jire. ¹⁴ Ñ jiro tirore musa wacu tua, noano tuhochu ñuno to yairo Espiritu Santore ware musare. Ñ jiro Espiritu Santo mari mehne jiro Cohamacu yaina mari jia tiare masichu yoara tiro sehe. Ñ yoa Espiritu Santo parore masichu yoara. Cohamacu mari ñaa buhirire bore marine yuhduchu yoaro. Ñ jiro baharo to cahapu naanohca marine to yainare. Marine to naahto pano Espiritu Santo sehe Cohamacu cahapu mari suri baharo to yare mari cjuahore masichu yoara marine. Cohamacu marine ã yoara tirore ño payoa mehne “Noariro jira”, mari nihto cjihtore.

Paulo Cohamacure sini payoha Jesu yainare

¹⁵⁻¹⁶ Cristore wacu tuaina musa jichu tuhorocacu Cohamacure ã sini payorucuja musare. Mari puhtoro Jesucristore musa wacu tuarire, jipihtina to yainare musa cahirire tuhorocacu Cohamacure “Noana”, nija. ¹⁷ Ñ sehet tirore sini payoja musare: Cohamacu muano macariro mari puhtoro Jesucristo Pucuro, noa yuhduariro to yare musa noano masihto sehe sini payoja. Ñ yoaro tirore musa noano masihto sehe sini payoja musare. ¹⁸ Ñ jicu paye ya nihti cūhure musa noano masihto sehe musare sini payoja Cohamacure. Tiro musare yuhduchu yoaro, to yaina cjihtire yoare. To ã yochu noa yuhduara marine. Tíre musa masihto sehe sini payoja musare Cohamacure. Ñ yoa marine to wahtire noa yuhdua tí waro ti jichu cūhure musa masiyuhto sehe sini payoja musare Cohamacure. ¹⁹ Ñ sehe cūhure musa masihto sehe sini payoja musare Cohamacure. Cohamacure wacu tuaina mari jichu ñuno to tuaa mehne marine yoadohora tiro. Tiro sehe paina bui tua yuhduariro jira. Tí cūhure musa masihto sehe sini payoja Cohamacure. ²⁰ Tí to masia mehne, to tuaa mehne tiro Cristo yariarirore masori jire. Ñ maso tuhsuro, muanopu to poto buhusehei Cristore dujichu yoari jire Cohamacu, jipihtinare dutihtiro to jihto sehe. ²¹ Tói dujiro jipihtina muano macaina puhtoa bui, ã yoa jipihtina ahri yahpa macaina dutiina bui jiro jira Cristo. Mipure jipihtina ahri dacho macaina bui puhtoro jira. Baharopu jipihtina pa tjuru macaina cūhure ti bui puhtoro jihtiro cjihtota jira tiro. ²² Ñ yoa jipihtina bui cūri jire Cohamacu Cristore. Ñ yoaro jipihtiare pu tichu yoari jire tirore. Ñ jiro Cristo yaina cū curua jiina bui puhtoro sōri jire tirore. Ti dapu jira tiro sehe. ²³ Cristo yaina cū curuata jina, to pjacu yoaro sehe jija mari. Cristo jipihtiropu ã jirucura. Ñ jina mari to yaina mehne to jirucuchu, to jiro seheta wahana nija. Ñ wahana to jia tiare ñona nija.

Cohamacu marine cahino, pja ñuno yuhduchu yoaha marine

2 ¹ Cohamacu yuhdurucaina, ñaa buhiri tiina yariaina cjiri yoaro sehe jiri jimare musa, Cohamacu to ñuchu. ² Panopure ahri yahpa macaina

Cohamacure yuhdurucaina yoaro sehe yorarucuri jimare musa cūhu. Ā yoana watino to dutiro sehetā yorarucuri jimare musa. Tiro watino ahri yahpai dutiriro Cohamacure yuhdurucaina puhtoro jira. Watia puhtoro cūhu jira tiro. ³Panopure jipihtina mari ā dihta yoarina jimai. Mari nāa dihtare goa pjamai. Mari mu suro, mari tuhotu, mari cahmano sehetā yoamai. Ā yoaina jina jipihtina paina yoaro sehetā, mari cūhu nāa buhiri tiina jirucumai. Mari ā jiina jiri buhiri, Cohamacu to buhiri dahreborina jimai. ⁴Mari ā jiina jipachuta, Cohamacu marine tuaro pja nūno, noano cahiri jire marine. ⁵Ā cahī yuhduro, Cohamacure yuhdurucaina, yariaina yoaro sehetā mari jipachuta Cristo mehne marine catichu yoari jire. ⁶Ā jiro Cristo yaina mari wahachu, Cohamacu Cristo mehne marine maso, ā yoa muanopu Cristo mehne dujihtinare marine sō daporī jire, tiro mehne dutihtina cjihti mari jihto sehe. Cristo yaina jina, āta wahaina baro jija mari, Cohamacu to nūchu. ⁷Ō sehetā noano yoara tiro marine to pja nūrire, to tuaro cahire baha-ro-pu jihtinare masichu yoaro taro. Cristo yaina mari jichu nūno ā yuhduchu yoara tiro marine. ⁸Cristore wacū tua, mari noano tuhochu nūno Cohamacu marine pichacapu wahaborinare yuhduchu yoara. Marine pja nūno, marine cahino marine yuhduchu yoara. Mari mu suro mari noano yoa mehne Cohamacu chapu waha masieraja mari. Cohamacu sehe marine yuhduchu yoara. Ā jiro tiro mehne mari ā jirucutore cūna marine. ⁹To ā cūchu mari mu suro noaare mari yoari wapa jierara tī.

“Sā mu suro yuhduhi, niboca”, nino ō sehe dutiri jire tiro: Mari mu suro yuhdu dutierara marine. ¹⁰Cristo yaina jichu yoare marine Cohamacu sehe noa dihtare yoahitina mari jihto sehe. Panopu noaare mari yoahitire cū tuhsua tiri jire tiro marine.

Cristore cjuana mari noano jija

¹¹Ā jina panopu musa jia tirire mipu cūhure wacūga musa. Cristo yaina jierasina judio masa jieraina jina musa coyēa yoaro sehe yoarina jiri jimare musa. Circuncisiōre yoaeraina jire musa mipu musa jiro sehetā. Musa ā yoaeraina jichu nūna sā judio masa sehe circuncisiō yoaina sehe musare ō sehe nia tii. “Circuncisiōre yoaeraina jia, Cohamacu yaina jierara”, nia tii musare. Circuncisiōre yoaina mua pjacurire mahanocā cahsarocāre yihso narina jira. ¹²Panopu Cristo yaina jierari jimare musa. Sā judio masa sehe Cohamacu to beseina jia tii. Sā ā jichu “Musare yuhduchu yoihtja”, ni cūa tiha Cohamacu sāre. Musa sehe to ā ni cūrina jierari jimare. Ā yoa Cohamacu to beserinare nū tuhtiina jisniri jimare musa. Musa nāa buhirire pichacapu wahahtina jiri jimare musa. Cohamacu maeraina jina pichacapu butiborina jia tiri jimare musa. ¹³Mipu sehere Cristo Jesu yaina jira musa. Panopu Cohamacure nū tuhtiina jipanahta, mipure to yaina jira musa. Cristo musa nāa buhiri crusapu to di cohāri mehne Cohamacu yaina jichu yoare musare. ¹⁴Sā judio masare cahma nū tuhtiina musa jichu nūno Cristo marine “Musa basi cahma nū tuhtiena tjiga”, ni yahure. Masare noano yahuriro jira tiro. Sā judio masa, judio masa jieraina mehne pua curua mari jichu nūno, tiro cū curuata yoare marine. Ducatari sahrinore ti tju site cohāno yoaro sehe mari cahma nū tuhtirire duhuchu yoare tiro. ¹⁵⁻¹⁶Ō sehe tīre yoare tiro: Mari nāa buhirire crusapu yariaro marine pichacapu wahaborinare yuhduchu yoare.

Ã yuhduchu yoaro to yaina jichu yoare marine. Ã yoaro pua curua mari jimaritore cû curuata wahma curua jichu yoare marine. Ã yoaro panopu mari cahma ñu tuhtiina mari jimaritore marine cûnoi noano jichu yoare. Ã yoaro judio masa sã dutia cjiire cohãre tiro. Tí dutia marine pua curua ji dutiri jimare. Mipure cû curuata jija mari. Cristo Cohamacu yaina jichu yoare marine.

¹⁷Ã yoa Cristo noaa buheare marine yahuro tari jire. Musa judio masa jieraina Cohamacu yare cjuaraina jiri jimare. Musa ã jichu ñuno musare yahuro tari jire tiro. Sã judio masa sehe Cohamacu yare cjuai. Sã cûhure yahuro tari jire. Ã yahuro taro jiphtina marine cû curuata noano mehne ji dutiro tari jire tiro. ¹⁸Mipure jiphtina mari judio masa, judio masa jieraina cûhu Cohamacu mari Pucu mehne noano ji masija mari. Espiritu Santo to yoadohoa mehne mari Pucu mehne noano ji masija mari. Cristo sehe marine ã noano jichu yoari jire. ¹⁹Ã jina mipure pa dihta macaina yoaro sehe jierara musa. Mipure Cohamacu yainare ñu tuhtiina jierara musa. Cohamacu yaina mehne macaina jira musa. To ya curua macaina jira musa. ²⁰Cohamacu ya durucuare yahu turiaina, sã cûhu to yare buhe dutiro to cûrina jina to ya durucuare musare yahu ducai sã, wahma wuhure Cohamacu ya wuhure ti dahre ducariro sehetã. Tí wuhui ti cû muhtari tãca yoaro sehe jiroto Cristo sehe marine yuhduchu yoariro mariachu mari ne yuhdueraboa. ²¹Ã jiro to tuua mehne marine to yainare cû curuata jichu yoare tiro, Cohamacu wuhure ñaa marieni wuhure ti dahreboriro sehetã. To ã yochu to tuua mehne noaina wahaja mari, Cohamacu to ñuchu. Mari ã jichu ñuno, tirota mari mehne jirucura. ²²Ã jina Cristo yaina jina jiphtina paina to yaina mehne cû curua wahare musa cûhu. Musa ã wahachu Cohamacu to Espiritu Santo musa mehne jiro nina, Cohamacu ya wuhui to jiboro sehetã.

Judio masa jierainare noaa buheare yahuriro jiha Paulo

3 ¹Ã to ya curua macaina musa jichu ñucu yuhu Paulo musare sini payoja Cohamacure. Cristo Jesu yare musare jiphtina judio masa jierainare yu yahuri buhiri peresupu jija yuhu. ²Cohamacu wiho jiina mari jipachuta, marine cahino, noaa buheare musare judio masa jierainare yuhure yahu dutiro cûre. Tíre masi tuhsure musa. ³Panopu masare to yahuerari cjiire Cohamacu baharopure yuhure masichu yoare. Ahrire mahanocã yahu musare joaroca tuhsuhi. ⁴Yu ã joarocarire buhena Cristo to yare yuhure to masichu yoarire masinahca musa. ⁵Tí to yahuri cjiire panopu macainare tiro yahuera tiha. Mipu sehere sãre Jesu to cûrinare Cohamacu yare yahu muhtaina cûhure sã jiphtina tirore dahra cohtainare to yahuri cjiire masichu yoare Cohamacu. To yairo Espiritu Santo sehe sãre masichu yoabasare Cohamacure. ⁶Õ sehe jira to yahuri cjiire: Sã judio masa dihtare Cohamacu yuhduchu yoaerara. Judio masa jieraina cûhure yuhduchu yoaerohca tiro. Ã jina sã judio masa, musa judio masa jieraina mehne Cristo yaina jina, cû pjacu yoaro sehe cû curuata jija mari. Ã jina mari jiphtina Cristo Jesu yaina jina cûno potori Cohamacu “Musare yuhduchu yoihtja”, ni to yuhduchu yoina jija mari.

⁷Cohamacu yuhure pja ñuno, yuhure cahino ahri noaa buheare yahuhtirore yuhure cûre. To tuua mehne ã cûre yuhure tiro. ⁸Jiphtina Jesu yaina

ti doca macariro waro jija yuhu. Yu ā jipachuta judio masa jierainare noaa buheare yahuhtiore cūre Cohamacu yuhure. Tí buhea Cristo noa yuhduariro to jiare, noa yuhdua to cjuare to wahtire yahura marine. ⁹Yuhure ā cūno Cohamacu “Ō sehe yuhduchu yoaihtja masare”, nino to yuhduchu yoah-tore noano yahu pahñohtiore cūre yuhure tiro. Ā jiro panopu macainare tí buheare ne yahu pahñoerasinia tiha Cohamacu. Jipihtiare bajuamehne-riro jira tiro. ¹⁰Mipure noaa buheare yahu dutiro cūre marine to yainare tiro to noano masi pahñoare masichu yoaro taro. Masi pahñoriro to jia tiare muano macaina puhtoare masichu yoa duari jire. Ā yoaro taro noaa buheare buhe dutire marine Jesu yainare. ¹¹Ahri yahpa to jihto panoputa “Masare pichacapu wahaborinare yuhduchu yoaihtja”, nia tiha Cohamacu. Ā niriro jiro mipure mari puhtoro Cristo Jesu yaria to masa mujano mehne to niriro seheta marine yuhduchu yoara Cohamacu. ¹²To ā yuhduchu yochu mipure Cristore wacū tuana to yaina wahaja mari. To yaina jina wacū tuaa mehne, cuiro marieno Cohamacu mehne durucu masija mari. ¹³Noaa buheare musare yu buheri buhiri mipure peresupu jicu yu ñano yuhduchu ñana cahyaena tjiga. Noaa buheare yu yahuchu tuhona Cohamacu yaina wahare musa. Yu ā yoari buhiri peresui jija. Ā jicu musare yu yoadohori buhiri ñano yuhdui nija. Musa noano yuhduhto sehe ā wahaja yuhu. Tíre masina wahchega musa. Tíre tuaro wahche dutija musare.

Cristo masare tuaro cahina

¹⁴Ā jicu ahri jipihtia Cohamacu mari Pucu to yarire wacūcu tiro pano na tuhcu caha sūcu sini payoja musare. ¹⁵Tiro jipihtia curuari macaina manopu jiina, ahri yahpai jiina cūhu ti Pucuro jira. Jipihinare bajuamehneriro jira tiro. ¹⁶Tirore ō sehe ni sini payoja musare: Tiro masi pahñoriro jira. Tua yuhduariro jira. Ā jicu to tuaa mehne musare noano to wacū tuachu yoahto sehe sini payoja. Espíritu Santo to yoadohoa mehne ā yorarohca. ¹⁷Ā sini payocu Cristore musa wacū tua namohto sehe tiro musa mehne to noano jihto sehe sini payoja musare. Ā jicu painare noano cahina musa jihto sehe sini payoja musare. ¹⁸⁻¹⁹Jipihina paina Cohamacu yaina cūhu musa mehne Cristo masare to tuaro cahiare musa masihto sehe sini payoja. Tiro jipihina masare cahī yuhduariro jira. To ā cahī yuhduarire noano masi pahñohto basioerara. Ā jipachuta to ā cahīriro to jia tiare musa noano masihto sehe sini payoja musare. Ā yoa to cahiare musa masichu cahmaja Cohamacu musa mehne to noano jihto sehe. Noa yuhduariro, ñaa marieriro to jiro seheta musa wahahto sehe to cahiare musa masichu cahmaja. Ā jicu to cahiare musa masihto sehe sini payoja musare Cohamacure.

²⁰⁻²¹Ā yoa Cohamacure pjíro ño payoa mehne “Tiro tuariro jira”, nijihna. To tuaa mehne noaa sehere cohtota masina marine tiro. Marine noaina jichu yoa masina. Mari siniri yuhdoro yoa masina tiro. Mari cahmaare mari tuho-turi yuhdoro yoa masina tiro. Cristo Jesu yaina to ya curua macaina jina jipihtia dachoripe jipihina Cohamacure ño payojihna. Āta yojihna.

Cristo yaina jina cū curuata jija mari

4 ¹Ā jicu yuhu, mari puhtoro Cristo to cahmaare yu yoari buhiri peresupu jiriro jicu, musare ō sehe ni tuaro dutija: Cohamacu to yaina

cjihtire musare besea tiri jire. ²“Sã pinihta masi yuhdurucaina jija”, ni tuhoutuina jiena tjiga. Painare noano mehne yoaga suaro marieno. Musa mehne macaina musare ti ñano yoapachuta tinare cahña mehne noano yoaga. ³Ã jina Espiritu Santo to yoadohoa mehne noano mehne cño mehne jirucuga musa. A yoana cahmachea marieno jinahca musa. ⁴Cũ pjacu yoaro seheta cũ curuaihta jija mari. A yoa Espiritu Santo cũirota jira. Cohamacu to yaina cjihti musare besea tiha musare yuhdachu yoaro taro. A jina to yuhdachu yoahcore cohtasinina musa. Cñota jira musa cohtaro. ⁵Mari puhtoro Cristo cũirota jira. To yahua, mari wacũ tuaa cñhu cñota jira. To yainare bautisarire yahua cñhu cñota jira. ⁶Ã jiro Cohamacu cũirota jira. Tiro jipihtina Pucuro jira. A jiro jipihtina mari puhtoro jira. Jipihtinare marine to cahmano seheta yoachu yoa masina tiro. Jipihtina mari mehne jira. A yoa jipihtiropu jira tiro.

⁷Cũ curua mari jipachuta jipihtina marine cainare mari yoa masihtire cüre marine Cristo. Tiro to cũiro seheta yoa masija mari. Tiro marine ã cño paye barore to ã wanocaboriro seheta yoaro nire tiro. ⁸Ãta nina Cohamacu yare ti joari pũpũ:

“Cohamacure ñu tuhtiinare to yuhdurucari baharo tiro tinare naa mujaa wahare.

Ã naa mujano tiro payu ã wanocare ahri yahpa macaina sehere”, ni joaa tiha panopũre.

⁹“Tiro mujaa wahare”, to nichu wahmanore muanopu jiriho ahri yahpapũre to tari cñhure mari masija. Ahri yahpapũre to duji tarire mari masija. ¹⁰Ã jiro opũre duji tariho tirota jira mujaa wahariho. Jipihitiro bui mujaa wahari jire tiro, jipihitiropu jiro taro. ¹¹Tiro jira “Ahri yahpa macainare payu ã wanocariro”, ti niriro. Masare to ã wanocano seheta tiro payu ti yoa masihtire cũri jire masare. O sehe cũri jire tiro: Cainare Cristo to yare yahu duti to warocahtinare cũri jire. Painare Cohamacu ya durucua yahu turiahtinare cũri jire. Noaa buheare buhe tinihtinare painare cũri jire. Cristo yaina cahmachuinare ñu wihbaina cjihtire, noano buhehtina cjihtire cũri jire painare. ¹²Tó sehe yoa, dahrahtina cjihtire cũri jire marine painare to yainare mari yoadohohto sehe Cohamacure mari masi noano namohto sehe. A cũri jire marine to yainare tirore mari wacũ tua namohto sehe. ¹³Ã jina mari jipihtina noano mehne cño mehne jinahca. Ata jiro cahmana marine Cristore wacũ tuaina jina. A jina mari jipihtina Cohamacu macunore noano masinahca. A yoana Cristo tuariho, noano masiriro to jiriho seheta mari cñhu noano masina, Cohamacure noano wacũ tuaina wahanahca.

¹⁴Mari ã wahana macanacã yoaro sehe jisi mari. Macanacã noano tuho masierasínica. Paina ti buhechu “Ahri potocã jira”, ni ti mahño mihnia mehne ti mahñochu tinacã yoaro sehe jiina soro jia buheare cahmana. A yoa paina ti soro buhechu tí buhea sehere cahmana tjoa. Pjiri ma macaa pahcõri ti ã cohtotarucuro seheta tó sehe ã cohtotarucuina jira tinacã yoaro sehe jiina. Tina yoaro sehe jisi mari. ¹⁵O seheta yoanahca mari: Mari mehne macainare cahma cahña, potocã noaa buheare cahma yahunahca mari basi. A yoana macanacã bucua tuho masiina ti wahariho seheta mari cñhu tuaina, Cohamacu yare noano masiina wahanahca. Cristo to jiro sehe wahanahca. Tiro jira mari dapu. ¹⁶To yaina jina to pjacu yoaro sehe cũ curuaihta jija

mari. Ñ jina mari capari, mari cahmori, mari dahpori cū pjacui ti noano jiro sehetā mari cūhu payu jipanahta cūno potori noano jija. Mari ã cūno potori mari jihto sehe Cristo yoadohora. Ñ jina mari wamomaca mari pjacure to noano yoadohoriro sehetā mari noano yoadohoja paina Cristo yainare. Mari mehne macainare Cristo yainare noano cahīna, tinare noano yoadohona, tuaina Cristore wacū tua namoina wahanahca mari.

Cristo yaina wahana mari ñaa yoaare duhu, noaa sehere cohtotaja mari

¹⁷ Ñ yoa mari puhtoro Cristo to dutiro mehne ñ sehe niihtja musare: Cohamacure cahmaeraina waro yoaro sehe yoaena tjiga musa. Tina ti tuhotua sehe ñaa dihta jira. Ñ jia ti tuhotua yaba cjihti jierara. ¹⁸ Ñ jia nahitianoi ti ñu masieraro sehetā tina Cohamacu yare ne masieraputiara. To yare ne tuhoe-raputiara. Tuho duaerara tina. Ñ jia Cohamacu to noano ji dutiriro sehetā jierara tina. ¹⁹ Ñ jia tina ñaare yoa ne buo tieraputiara. Ñ yoa ne cahyaerara. Ñaare ti goa pjaa dihtare yoarucura. Jipiehtia ti ñaare yoaare duhu duaerara. ²⁰ Musa sehe ã yoaerare, Jesure masi ducana. ²¹ Potocā to yare tuhoina musa jichu, Jesu yare noano masiina musa jichu musa sehere tina yoaro sehe yoa dutierara tiro. ²² Ñ jina ñano wete tia suhtire musa tjuwe cohāno sehetā panopu musa yoari cjirire duhunocahga. Tí pjare ñaare yoarucuina musa jichu tí ñaa sehe musare dojomehneno niri jimare. “Ñaare yoana, noano wahchenahca”, ni tuhotuina jipanahta ne potocā wahcherare musa. ²³ Ñ yoa musa tuhotuare noaa sehere Cohamacu to cahmano sehetā cohtotaro cahmana musare. ²⁴ Ñ jina noaa sehere cohtotaina jiga musa. Tó sehe jiina Cohamacu yoaro sehetā jira. Musa ã jiina jina, noaare yoarucunahca. Ñ yoana ñaare ñu yabinahca.

²⁵ Ñ jina mahño namoena tjiga musa. Musa mehne macainare quihōno yahuga, mahñono marieno. Mari cū pjacu yoaro sehe cū curua macainata jina nija. Ñ jina musa mehne macainare mahñoena tjiga.

²⁶ Paina mehne suana, ñaano yoaena tjiga. Ñ jina suana, cū dacho waro noano suarucuena tjiga. ²⁷ Yoari pja suana, watīno to cahmano sehe yoana nica. Ñ yoaena tjiga watīno musare “Dojomehneri”, nina.

²⁸ Musa mehne macaina Jesu yaina musa jihto pano yacaina jirina cjiri pari turi yacaena tjiga. Ñ yoana mipu sehere noano dahraga musa wapataa mehne pjacuinare musa yoadohohto sehe.

²⁹ Ne ñano durucuena tjiga “Painare dojomehneri”, nina. Noaare durucuna painare yoadohora Cohamacu cahmaare musa masi namohto sehe. Ñ jina noaa dihtare durucuga. ³⁰ Ñaare yoana Espiritu Santore cahyachu yoana nica musa. Ñ yoaena tjiga. Mipure pihitiri dacho pano Cristo marine to naahto pano Cohamacu to Espiritu Santo marine ñu wihbora ñaare mari yoaerahto sehe. Ñ jiro Cohamacu yaina mari jiare masichu yoara tiro marine. Ñ jina tirore cahyachu yoaena tjiga.

³¹ Ñ jina ne painare ñano yoa namoena tjiga. Cahma sayo namoena tjiga. Painare sua, ñano ni sañurucu namoena tjiga. Painare ñano quiti dahre namoena tjiga. Ne painare ñano ni tuhotu namoena tjiga. ³² Ñ yoa musa mehne macainare noano mehne noano yoaga. Cristo yaina musa jichu ñu no musa ñaa buhirire bonocahre Cohamacu. Tó sehetā musa cūhu paina musare ti ñano yochu ñuna ti ñaa yoirire bonocahga.

“Cohamacu pohnare ò sehe jiro cahmana”, ni yahuha Paulo

5 ¹ Ì yoa Cohamacu pohna to cahĩina jina Cohamacu to jiro sehe jiga musa. ² Ì jina painare ã cahĩrucuga. Cristo marine cahĩno, mari ñaa buhiri yariari jire. Ì yariaro Cohamacure ji coachu yoari jire tiro. Ì jina marine to cahĩiro seheta musa cũhu painare cahĩga.

³ Ì jina Cohamacu yaina jina ne numia mehne ñano yoaena tjiga. Numia cũhu mua mehne ñano yoaena tjiga. Paye ñaare tó sehe jia ñaare yoaena tjiga. Paye barore cahma yuhdurucaena tjiga. Ne ã yoeraro cahmana musare, Cohamacu yaina jina. ⁴ Ì yoana buoro durucueraro cahmana musare. Tũho masieraina yoaro sehe durucueraro cahmana musare. Ì jina ñano ni bujuparero cahmana musare. Ahri sehene yoaro cahmana musare. Cohamacu mehne durucuga musa. Ì durucuna tirore “Noano yohre muhu sãre”, nino cahmana. ⁵ Paye barore goa pjana, tíre tuaro cahmana, “Cohamacu jira”, ti nia masurine ti ño payoro seheta yoana nija mari tíre. Ì yoa numia mehne ñano yoina, ñaa dihtare tuhutuina, paye barore goa pjaina Cohamacu Cristo mehne puhtoro ti suho jiropu ne wahasi tina. Tíre noano masija mari. ⁶ Ò sehe yoina ti yoari buhiri buhiri dahrerohca Cohamacu tirore yuhdurucainare. Ì jina paina musare “Ahri ñaa jierara”, ti ni mahñochu tuhoena tjiga. ⁷ Ì jina tó sehe yoa yuhdurucainare ne piti tiena tjiga.

⁸ Cristo yaina musa jihto pano ã jirina cjirita jire musa cũhu nahitianoi jiina yoaro seheta. Mipu sehene to yaina jina buhriaroi jiina ti ñu masino seheta, Cohamacure noano masina musa. Cohamacu yaina noaare yoara. Ì jina tó seheta yoaga musa cũhu. ⁹ Ì jina Cristo yaina jina buhriaroi jiina yoaro seheta noaare, Cohamacu cahmaare, mahñoño marieno yorucunahca musa. ¹⁰ Noaare mari yochu ñuno mari puhtoro Cristo wahchera. Tó sehe jiare, mari puhtore wahchechu yoa sehere masi wahcãga musa. Ì masina tíre yoaga. ¹¹ Cristore cahmaeraina nahitianoi jiina yoaro seheta ñaa ti yoa, ñaa waro jira. Ì jina tina yoaro seheta musa sehe yoaena tjiga. Noa buheare Cristo yare yahuga tinare. Ì yoa ti ñaa yoaare tinare masichu yoaga buhriaroi mari ñu masino seheta. ¹² Masa ti ñuenoi tina ñano yoa cohtara. Ti ã yoirere durucuna mari buo tibo. Ì yoa ñaputiaro yoara tina. ¹³ Ì jina tinare noa buheare mari yahuna ñaputiina ti jia tiare masichu yoana nija mari tinare buhriaroi mari ñu masino seheta. ¹⁴ Tó seheta noa buheare tinare yahuna, ñaina ti jia tiare masi pahñochu yoana nija tinare. Ì jia ò sehe ni yahura paina:

“Ne, carĩina ti tuhoeraro seheta yuhure tuho duaeraina, tuhoga musa carĩina ti wahcãno seheta.

Ì yoana yariaina tuhoeraina ti jiro seheta Cohamacu yare tuhoeraina ji namoena tjiga.

Musa ã yochu ñuno, Cristo buhriaro yoaro sehe jiriro musare noano masichu yorohca”,

ni yahura.

¹⁵ Ì jina dachoripe noano yoaga musa. Tũho masieraina yoaro sehe jiena tjiga. Tũho masiina jiga. ¹⁶ Mipu macaina masa ñabiaro yorucura. Ì jina musa sehe noaare, Cristo yare musa yoa masino seheta ã yorucuga musa. ¹⁷ Ì yoana tuho masieraina jiena tjiga. Cohamacu to cahmaa sehene noano

masiga. Ñ masina tíre yoaga. ¹⁸ Ñ yoa cahaena tjiga. Cahainare ñano wahahto cua yuhduara. Ñ jina pahmoa core pjíro cahmaena tjiga. Espíritu Santo sehere pjíro cahmaga musa mehne to noano jihto sehe. Tirore noano yuhtiina jiga. ¹⁹ Musa basi Cohamacu ño payoa basaare cahma durucuga. Ñ yoa Salmore Cohamacu yare basaare, paye tirore ño payoa basaa cūhure tirore basa payoga musa. Noano wacū ño payoa mehne basa payoga. Ñ yoana mari puhtoro Cristore wahche payoga. ²⁰ Cohamacu mari Pucu jipihtiare musare to warire, to yoari cūhure wahchena, “Noana”, ñ nirucuga musa tirore. Mari puhtoro Jesucristo yaina jina mari Pucure “Noana”, ñ nirucuga musa.

“Musa cūhu wūhu macaina Jesu yaina jina, ñ sehe yoaga”, ni yahuha Paulo

²¹ Ñ yoa musa mehne macainare noano ño payoa mehne cahma yuhtiina jiga Cristore noano ño payoina jina.

²² Musa namosānumiare yahuihtja mipure. Mari puhtoro Cristore mari yuhtiriro seheta musa manūsumare noano mehne yuhtia numia jiga. ²³ Jesucristo marine yuhduchu yoare to pjacu yoaro sehe jiina to ya curua macaina mari jihto sehe. Ñ yoa mari to ya curua macaina mari puhtoro to jiro seheta musa manūsuma musa namosānumia bui puhtoa jira. ²⁴ Cristo yaina jina tirore ñ yuhtirucuja mari. Tó seheta musa manū tia numia musa manūsumare noano yuhtirucua numia jiga.

²⁵ Musa manūsumare yahuihtja tjoa mipure. Cristo marine to yaina jichu yoaro taro, marine cahīno, mari yaro jiborirore yariari jire. Ñ jina marine to cahīro seheta musa cūhu musa namosānumiare noano cahīrucuga. ²⁶ Cristo ya buheare tuhona Cohamacu yaina wahahi mari. Ñ jina to ya buheare “Quihōno jira”, ni mari tuhoturi baharo, mari ñaa buhirire cosawere tí buhea mehne. Co mehne marine ti bautisachu cūhure mari ñaa buhirire Cristo to cosawerire ñona nija mari. ²⁷ Ñ cosawere tiro marine to yaina cjihti yoaro taro. To ñ cosawechu ne ñaa buhiri marieina jinahca, Cohamacu to ñuchu. ²⁸ Musa namosānumiare cahīna, musa basi musa pjacurire musa cahīno seheta tí numiare cahīga. Mari namore cahīina jina mari pjacure cahīina jija. ²⁹⁻³⁰ Ne mari pjacurire ñano wahachu cahmaeraja. Mari chuare chuna noano yoana nija mari pjacurire. Cristo yaina jina to pjacu yoaro sehe to ya curua macaina jija mari. Ñ jiro marine noano yoara tiro. Cristo marine to noano yoariro seheta mari cūhu mari pjacure noano yoaja. (Ñ jina mari namosānumia cūhure āta noano yoaro cahmana marine.) ³¹ Āta nina Cohamacu yare ti joari pūi: “Ñ yoa muno to pucūsumare wijaaro to namono mehne jirohca. Ñ jia tina puaro jipahta cūiro yoaro sehe jiahca”, ni joaa tiri jire panopure. ³² Ahri to joari cjirire paina noano tuhoerari jire. Tíre ñ sehe ni yahuihtja musare. Ñ sehe ni yahuro nica: “Cristo to yaina mehne cū pjacu yoaro seheta cū curuata jira”, ni yahuro nica. ³³ Ñ jicu musare ñ sehe ni yahu namoihtja tjoa: Musa pjacurire musa cahīno seheta musa namosānumiare cahīga. Ñ yoa musa manūsumare noano ño payoga musa.

6 ¹ Mipure musa pohnare yahuihtja. Mari puhtoro Cristo yaina jina musa pucūsumare noano yuhtiina jiga. Musa ñ yoana, quihōno yoana nina. ²⁻³ Ñ sehe nia tiri jire Cohamacu dutia: “Musa pucūsumare noano ño payoga”, ni dutia tiri jire tiro. Ahri dutia mehne Cohamacu yahu namoa tiri jire. Ñ sehe nia tiri jire: “Musa pucūsumare ño payona, ahri yahpapu yoari pja

wahchea mehne jinahca musa”, ni yahua tiri jire. Ñ ni yahuro ahri dutiare mari yuhtichu mari noano wahahtore coã cūno nia tiri jire. Ñ jina to niriro seheta musa pucsumare ño payoga.

⁴Mipure ti pucsumare yahuihtja: Musa pohnare ã tuhtirucuenta tjiga, “Suachu yoari”, nina. Mari puhtoro Cristo to cahia mehne to yoadohoa mehne tinare noano bucuga. Ñ yoa quihōno ti yoerachu ñuna tinare noano yahuga.

⁵Mipure dahra cohtainare yahuihtja: Cua pisaro mehne, ño payoa mehne ahri yahpa macainare musa puhtoare, musare dahra dutiinare noano yuhtiina jiga. Mahñono marieno noano yuhtiina jiga. Cristore musa yuhtiro seheta tinare yuhtiga musa.

⁶Ti ñurocaro dihtare yuhtiina jiena tjiga. Tó sehe yoaina masa dihtare tinare ñu jicoachu cahmana. Musa sehe Cristore dahra cohtaina musa jiro seheta musa puhtoa cūhure ã yuhtirucuga. Cohamacu to cahmano seheta noano wahchea mehne yuhtiina jiga. ⁷Ñ jina Cristore yuhtiina musa jiro seheta wahchea mehne yuhtiga musa puhtoa cūhure. Masa dihtare yuhtiina jierara musa. ⁸Ñ yoana ahrire wacūga musa: Mari jipihtina noare mari yoachu ñano mari puhtoro Cristo noano yoarohca marine. Dahra cohtainare, dahra cohtaina jieraina cūhure noano yoarohca.

⁹Mipure puhtoare dahra dutiinare yahuihtja: Musare dahra cohtainare noano yoaga. Tinare noano yu yoa dutiro seheta yoaga musa cūhu tinare. Tinare noano mehne dutiga, tuhtiro marieno. Muano macariro Cohamacu potocāta ti puhtoro jira. Musa yairo puhtoro jira tiro cūhu. Ñ jina jipihtina musa tiore dahra cohtaina dihta jira. Ñ jiro tiro cūno potori ñuna musare jipihtinare. Ñ jina musare dahra cohtainare noano mehne dutiga, tuhtiro marieno.

Cristo yaina watīnore ti ducataare yahuha Paulo

¹⁰Ahrire yahu batoihtja musare: Cristore noano wacū tuaina jiga musa. Mari puhtoro Cristo musa mehne jira. Ñ jina tua yuhduro to jia mehne wacū tuaina jiga. ¹¹Watīno marine mahñono, ñano yoa dutira marine. Cohamacu marine ducatarā ñaare mari yoerahto sehe. Marine to ducataa surara to ducatarī suhtiro, comaa suhtiro yoaro sehe jira. Ñ jina tí suhtirore musa sāano seheta Cohamacu to ducataare noano cjuā pahñoga. ¹²Jesu yaina mari jichu, marine ñu tuhtiina masa waro jierara. Muano macaina ñaina, tuaina, tina sehe jira marine ñu tuhtiina. Watīa ahri yahpa macaina puhtoa jira. Ñ jia tina cūhu jira marine Jesu yainare ñu tuhtiina. ¹³Ñ jina mipure ducatarī suhtirore musa sāano seheta Cohamacu musare to ducatahto sehe to yare noano cjuā pahñoga. Ñ yoana watīno musare to ñano yoa dutichu, musare to ñano yoa duachu, tiore ducatanahca. Ñ yoa tiore yuhdurucanahca. ¹⁴Ñ yoana tuaina jiga. Cohamacu musare to ducatahto cjihtore ñ sehe yoaga musa: Surara to comaa suhtirore to tuā dihiri dare sari dare noano tuā diho to ducatarī seheta, Cohamacu yare potoca yahuare noano wacūga musa, watīnore musa ducatahto sehe. Ñ yoa, surara to comaa suhtiro mehne to yajeripohnare to ducatarī seheta Cristo to yoadohoa mehne quihōno yoaina jiga musa, watīnore musa noano ducatahto sehe. ¹⁵Surara to dahpo suhti mehne to dahporire to noano ducatarī seheta noa buheare noano

masiga musa, watĩnore musa ducatahto sehe. Tí buhea marine noano jichu yoara. ¹⁶Surara to ducatarĩ tu mehne to ducatarĩro seheta Cristore noano wacũ tuarucuga musa, watĩnore musa ducatahto sehe. Buea yucu mehne musare to bueboro seheta watĩno musare ñano yoachu yoa duara. ã jina Cristore noano wacũ tuana, watĩnore ducatanahca musa. ¹⁷Surara to comaa chapea mehne to dapure to ducatarĩro seheta musare pichacapũ wahaborĩnare Cristo to yuhduchu yoarĩna jiga musa, watĩnore musa ducatahto sehe. Surara to ñosari pjĩ mehne to ducatarĩro seheta Cohamacu ya buheare noano masiga musa, noano musa ducatahto sehe. ã jina painare noano yahuga to yare. Tí Cohamacu ya buheare Espĩritu Santo marine yahura. ¹⁸ã watĩnore musa ducataha Cohamacure dachoripe ã sinirucuga. Espĩritu Santo to yoadohoa mehne ã sinirucuga. ã yoana noano wacũ masiga. ã sinina, pumena tjiga. Jipĩhtina Cohamacu yainare ã sinĩ payorucuga. ¹⁹ã yoana yuhu cũhure sinĩ payoga Cohamacure. Õ sehe nĩ sinĩ payoga: Noaa buheare, panopũ ti masierarĩ cĩirire noano yũ yahuhto sehe sinĩ payoga yuhure. ã jina cuiro marieno yũ yahuhto sehe sinĩ payoga yuhure. ²⁰Cristo to yare yahu dutiro yuhure warocare. Yũ ã yahuri buhiri peresupũ jija mipure. Õi jipacũta cuiro marieno to yare yũ yahuhto sehe sinĩ payoga yuhure. To yare yahuhtiro jiĩta nija yuhũ.

Paulo noa duti batoaha

²¹Mipure Tĩquico musa cahapũ suro yũ jia tiare musare yahu pahñonohca. Tiro mari coyeiro mari cahĩriro jira. ã jiro mari puhtoro Cristore dahra cohtariro ã jirucura. ²²Sã jia tiare musare yahu duticu tirore warocai nija musa noano wahchehto sehe.

²³Cohamacu mari Pucu mari puhtoro Jesucristo cũhu musare Jesu yainare tirore wacũ tuainare noano jichu yoajaro. ã jiro musare noano cahma cahĩchu yoajaro. ²⁴Jipĩhtina mari puhtoro Jesucristore cohtotaro marieno cahrucuĩnare musare noano jichu yoajaro.

Filipenses

Peresupu jiriro ahri tjure joarocaha Paulo

1 ¹Yuhu Paulo, Timoteo mehne Jesucristore dahra cohtaina jija sã. Ã jina jipihtinare musare Jesucristo to noaina wahachu yoainare Filipo macainare joarocaja sã. Musa puhto cûhure, musare yoadohoina cûhure joarocaja. ²Cohamacu mari Pucu, mari puhtoro Jesucristo mehne musare noa dutija. Cohamacu to yoadohoa mehne noano jiga musa.

Paulo Jesu yainare Cohamacure sini payoha

³⁻⁶ Cohamacu musare noaa sehere cohtotachu yoaro nina. Ã jiro musare to ã yoa ducariro seheta sohtori dahrerohca tiro. Ã jina Jesucristo ahri yahpapure to wihichupure ñaa marieina jinahca musa. Wahmanopure Jesu yaina musa jiri baharo, mipu cûhure yoadohora musa yuhure noaa buheare yu buhechu. Musa ã yoaina jichuta Cohamacure “Noana”, nija yuhu. Musare wacûcu õ sehe dihta nija yuhu. Musare Cohamacure sini payocu, wahchea mehne sini payoja. ⁷Musare yu ã tuhotuchu noa nina. Noaa buheare “Potocã tjira”, puhtoare yu ni tua yuhdurucachu musa yuhure yoadohore. Tí buheare potocã ti jiare tinare yu yahuchu yoadohore musa. Peresui yu jichu cûhure musa yuhure yoadohore. Cohamacu marine noano yoaro, to yare cûre marine. Musa yuhure yoadohore. Ã jina to cûrire mari cûno potori yoana nija. Ã jicu yu yajeripohna mehne tuaro wacûja yuhu musare. ⁸Jesucristo to cahia mehne tuaro musare wacûja yuhu. Yu ã wacûchu Cohamacu tíre masina. ⁹Musare õ sehe ni sini payoja yuhu Cohamacure: Cohamacu yare noano masia mehne, tuho masi pahña mehne painare musa cahĩ namohto cjihtore sini payoja yuhu musare Cohamacure. ¹⁰Noa yuhduare musa masichu cûhure sini payoja musare. Musa ã masina Cristo ahri yahpapu to tjua tachu noaare yoaina, ñaa buhiri marieina jinahca musa. ¹¹Ã jiina jina noaare, Cohamacu cahmaare yoanahca musa. Musare ã yoachu yorohca Jesucristo sehe. Cohamacu noabiaro tuariro to jiare ñono taro, jipihtina tirore ti ño payohto cjihtore to cahmaare musare yoachu yorohca.

Paulo Cristo yairo to jia tiare yahuha

¹²Yu coyea, ahrire musa noano masichu cahmaja yuhu. Mipure peresui jiriro yu jiro watoi noaa buhea sehe ã mu târucuro nina. Paina masa tí buheare cahmaina waha namoa nina. ¹³Ã yoa Cristo yairo yu jiri buhiri peresui yu jirire masi pihtira puhtoro ya wuhu macaina surara. Jipihtina paina cûhu õi jiina tíre masina. ¹⁴Ã jia peresui yu jichu ñua, payu mari coyea

Jesu yaina mari puhtoro Jesure wacū tua namoa nina. Ā wacū tuaa, cuiro marieno noaa buheare painare buhera tina.

¹⁵ Cāina Cristo yare buheraborina jipahta yuhure ñu tuhtia, Cristo yare buhera paina tina sehere ñu wahāchu cahmaa. Paina sehe noano mehne Cristo yare buhera. ¹⁶ Noaa buheare yu ni tua dūcatahti cjihtire Cohamacu yuhure to cūrire noano masina ahrina sehe. Ā masia tina cahīa mehne Cristo yare buhera. ¹⁷ Paina sehe yuhure ñu tuhtia, masa tina sehere ti ñu wahāchu cahmaa, Cristo yare buhera. Ā yoaa peresui yu jichu tina yuhure ñano yuhdūchu yoa duara. ¹⁸ Noanohca. Cristo yareta buhea nina. Tina Cristore potocā cahīrapahta Cristo yareta buhera. Paina sehe noano mehne buhera. Jipih-tina tina to yare ti buhechu wahcheja. Ā jicu wahche namoihca yuhu.

¹⁹ Cohamacure masa sini payori mehne Jesucristo Espiritu to yoadohoa mehne Cohamacu to wiorio jiihca yuhu peresupu jiriro. Tīre masija. Ā jicu ā wahcherucuihca yuhu. ²⁰ Ō seheta yoaihca yuhu. Dachoripe yu yoariro seheta mipu cūhure cuiro marieno Cristo yare buheja masa tirore noano ti ño payohto sehe. Ō seheta yoa duaja yu yoarire yu buheri cūhure yu buoro yuhdūrahto sehe. Catisinicu waro ō seheta yoa duaja. Tina yuhure ti wajā duapachuta ō seheta yoa duaja. ²¹ Catisinicu Cristo yare yoasiniihca. Yariacupu pinihta tí yuhdoro noano tjuaihca yuhu. ²² Ā nipacuta catisinicu Cristo yare yu yoa namohto sehe cati namosini duaja. Ā nipaihta yariaa cūhure cahmaja. ¿Di baro sehere yuhu cahmabocari? Masieraja yuhu. ²³ Yu ō sehe ni durucuchū mijo nina yuhure. Cristo mehne tuaro ji duaja. Ā jicu mipure tiro cahapu waha duaja. Catia yuhdoro ahri sehe noa yuhdūrucara. ²⁴ To ā jipachuta musare yu yoadohohto cjihto sehe catisinino cahmana yuhure. ²⁵ Tīre masicu ōi masa mehne yu jisinihtore masija yuhu. Ā jisiniihca masa Cristore wacū tua namohto cjihtore tí wacū tuaa mehne masa wahchehto cjihtore. ²⁶ Ahri yahpai jisinicu masa cahapu pari turi yu wahachu masa wahchenahca. Cristo Jesu yuhure to yoadohochu masina, “Tuariro jira tiro”, ni ño payonahca masa tirore.

²⁷ Mipure ahri dihtare yahuihtja musare. Cristo ya buhea ti niriro seheta jirucuga masa. Wacū tuaina jiga. Ā yoa cahma tju waro marieno noaa buheare ni tuaga. Ō seheta yu mariachu cūhure yu jichu cūhure masa yochu cahmaja. Ā jiina masa jichu tuhoroca duaja yuhu. ²⁸ Musare ñu tuhtiinare cuena tjiga. Musa ā cuierachu ñua Cohamacu yaina masa jichu masiahca tina. Ā masia tina pichacapu ti wahahto cūhure masiahca. Cohamacu musare to yuhdūchu yoahito cūhure masiahca. Ō seheta masichu yoara Cohamacu masare. ²⁹ Cristore masa wacū tuahtore Cohamacu cūha musare. Ahri cūhure cūha tiro. Cristo yare masa yoiri buhiri masa ñano yuhduhto cjihto cūhure cūha Cohamacu. ³⁰ Ō sehe jira tí. Cristo yaina masa jiri buhiri paina musare ñano yoara. Musare ti yoariro seheta yuhu cūhure ñano yoara tina. Musa mehne yu jichu yuhure ti ā yochu ñure masa. Mipu cūhure yuhure ti ā yochu tuhorocayuhti masa. Ā jina mari cūno potori ñano yuhduja.

Cristo wiho jiriro to sāari baharo, jipihtina bui puhtoro cjihto wahaha

2 ¹⁻² Cristo musare noano yajeripohna tichu to yochu Cristo to cahīa mehne masa wahchena, yuhure noano wahchechu yoaga masa. Ā yoa Espiritu Santo jipihtina masa mehne to jichu painare cahīina, pja ñuina jina,

yuhure noano wahchechu yoaga musa. Ahri yu nihtire musa yoachu wahcheihca: Cũno potori noano yajeripohna tiga musa. Tuhsu, cũno potori tuhotuina ji, musa basi cahma cahĩga. ˆ yoa cũno mehne noano jiga. ³Musa ya dihtare tuhotuina, painare yuhduruca duaina jiena tjiga. ˆ tuhotunocaina jiga musa. ˆ jina painare noano ño payo, ˆ sehe ni tuhotuga: “Tina sehe yu yuhdoro noaina jira”, ni tuhotuga. ⁴Cũiro painare yoadoho duaeraboca. To ya cjihti dihtare tuhoturiro jiboca. Tiro yoaro sehe yoaena tjiga. Paina cũhure yoadohoga.

⁵Cristo Jesu painare yuhduruca duaerariro to jiriro seheta musa cũhu painare yuhduruca duaeraina jiga. ⁶Tiro sehe Cohamacu waro jiparota “Cohamacu mehne cũno potori yu jiare ne wijaasi yuhũ”, ni tuhotuerari jire tiro. ⁷ˆ ni tuhotueraro tiro Cohamacu mehne cũno potori to jiare wijaa, ˆpu taro, masunota masa bajoaro, tiro dahra cohtariro yoaro sehe ji ducari jire. ⁸ˆ jiro tiro masuno cũno potori pjacu tiro jiro, wiho jiriro waro sãari jire. ˆ sãano “Crusapu wajãga tirore”, ti nichu tiro yuhdurucaerari jire. Crusaputa variahtiro jiparota tiro yuhdurucaerari jire. ⁹ˆ jiro Cohamacu jipihtina ti ño payohtiore cũri jire Jesure. ˆ jiro jipihtina bui puhtoro sõri jire Cohamacu tirore, ¹⁰jipihtina muano macaina, ahri yahpa macaina, yariaina cjiri yahpa puhichapu jiina cũhu Jesu wamare tuhoina ti na tuhcuca caha su ti ño payohto sehe. ¹¹ˆ puhtoro sõri jire tirore Cohamacu jipihtina “Jesucristo mari puhtoro jira”, ti nihtiro cjihtore. ˆ nia Cohamacure mari Pucure ño payoa nina.

Cristo yaina buhriaro yoaro sehe jia, noaare masare yahu, masichu yoara

¹²ˆ jina yu cahĩina yu coyey Jesu yaina musa mehne yu jichu musa yuhtirururiro seheta, mipu yu yoaropu jichu cũhure pano musa yuhtiriro yuhdoro yuhtiga yuhure. ˆ jina pichacapu wahaborina to yuhduchu yoarina jina, Cristo yoaro sehe wahana tana, Cristo to yoadohoro mehne ñaa marieina jiga. ˆ jina ño payoa mehne papero marieno Cohamacu yare yoaga. ¹³Cohamacu noaa sehere musare cahmachu yoaro nina to cahmano seheta musa yoahto sehe. ˆ jiro tíre musa yoahtore yoadohoro nina Cohamacu. (To ˆ yoachu tí yu niriro seheta Cohamacu yare yoaga musa.)

¹⁴Jipihtiare yoana nureno marieno, musa basi jiape ni durucuro marieno yoaga. ¹⁵Cohamacu pohna jira musa. ˆ jina nureno marieno jipihtiare yoaga musa ñaa buhiri marieina, ñaare yoeraina musa jihto cjihto sehe. ˆ yoaga musa masa mahñoina, ñaina watoi dojomehneno marieno musa jihto cjihto sehe. Tina ñaina watoi jina buhriaro to ñu masichu yoaro seheta noaa buheare buhena masichu yoara musa ahri yahpa macainare. ¹⁶Tí buheare musa tuho ñahari baharo Cohamacu mehne ˆ jirucuhtina wahare musa. Tí buheare ahri yahpa macainare musa ˆ buhechu ñucũ musa mehne wahcheihca. ˆ jicu musare yu buherire “Wiho waro buherari jica yuhũ”, niĩhca yuhũ. ˆ jicu Cristo ahri yahpau to tjua tachũ musa mehne wahcheihca. ˆ jicu buoro yuhdusi yuhũ. ¹⁷⁻¹⁸Cristore musa wacũ tuachu Cohamacu musare ñu jicoarohca. To ˆ ñu jicoachu masicu musare Cristo yare yu buheri buhiri yuhure ti wajã duapachuta wahcheihtja. ˆ jina mari jipihtina cũno potori wahchenahca. Tó seheta musa cũhure cahyaro marieno wahchero cahmana yuhũ mehne, yu yariari baharo.

Timoteore, Epafrodito cūhure yahuha Paulo

¹⁹Mari puhtoro Jesu to cahmachu soaro mehne Timoteore musa cahapu waroca duaja yuhu musa jia tiare masicu tacu. ã masiiputa wahcheihca. ²⁰Tiro Timoteo yu yoaro seheta musa noano jihto cjihtore potocāta pjíro tuhutura musare. Pairo to yoaro sehe jiriho mariahna yuhu mehne. ²¹Paina sehe jipihtina ti cahmaa dihtare yoa duaa, Cristo Jesu to cahmaa sehere yoa duaerara. ²²Timoteo sehe noano yoiariro to jiare masina musa. Yu macu yoaro seheta tiro yuhu mehne noaa buheare yahua tihre. ²³ã jicu puhtoa yuhure ti dohse yoahore masicuta, Timoteore musa cahapu waroca duaja. ²⁴ã yoacu mari puhtoro Jesu to yoadohoa mehne soaro mehne yuhu cūhu musa cahapu wahaihtja.

²⁵⁻²⁶Yuhure yoadoho dutina musa Epafrodite warocari jire yu cahapu. Tiro yu coyeiro Jesu yairo yuhu mehne dahrariro, yu piti, Cohamacu yare buhe tuariro jira. Tiro musare tuaro wacūrocara. ã jiro to dohatirire musa tuhochu masino tiro sehe pjíro cahya tuhutihre. ã pjíro to tuhotuchu ñacu “Tirore musa cahapu waroca tjuro cahmana yuhure”, ni tuhoutuja yuhu mipure. ²⁷Potocāta tiro tuaro dohatihre. Mahano yariabiho yuhdure. To ã tuaro dohatipachuta Cohamacu tirore pja ñuno, yuhduchu yoahre. Tiro to yariachu yuhu sehe pano yu cahyariro yuhdoro tuaro cahyabo. ã jiro Cohamacu yuhu cūhure pja ñuhre tirore yuhduchu yoaro. ²⁸ã jicu mipu pinihtare soaro mehne tirore musa cahapu waroca duaja pari turi musa tirore ñu, musa yajeri sāahto sehe. Musa ã wahchechu ñacu yuhu cūhu wahcheihtja. ²⁹ã jina tirore Epafrodite mari puhtoro yaiore mari coyeirore noano wahchea mehne piti bocaga. ã yoana painare tiro yoaro sehe jiinare ño payoa mehne ñuga. ³⁰Tiro Cristo yare yoadohomahno mahano yariabiho yuhdure. Musa sehe yuhure yoadoho masierachu tiro sehe yuhure yoadohomahre. ã yoaro yariamahre tiro.

Noano yoaa warore yahuha Paulo

3 ¹Mipu pinihtare ahrire yahu batoihtja. Mari puhtoro yaina musa jina wahcheha. Ahri buheare pano yu yahurire pari turi musare yahu joarocacu ji coaja yuhu. ã jicu musare ahrire yahucu yoadohoi nija musare. ²Noano yoaga musa. Ñaare yoiarucina, dieya yoaro sehe jiina ñaina circuncisiōre yoa dutia, musa pjacurire yihso duara. Noano yoaga musa ã yoa dutiina sehe “Soro ni buheri”, nina. ³Tina circuncisiōre yopahta Cohamacu dutiare noano yoiarara. Mari sehe potocāta Cohamacu dutiare noano yoiina jija mari. Espiritu Santo to yoadohoa mehne Cohamacure ño payoja mari. ã jina Jesu yaina mari jiare wahchea mehne painare mari yahuja. “Sā mu soro Cohamacu dutiare bihoja”, ne ni tuhotueraja. ⁴ã ni tuhotuerairo jipaihta “Tinare doca dahrenocaja”, ti yoaro sehe niriro jicu ã tjiboa yuhu cūhu. Pairo “Tinare doca dahrenocaja”, ni yuhduruca duara. Yuhu sehe tiro yuhdoro ã niboa yuhu. ⁵ō sehe yoiariro jimai yuhu: Ocho dachori yu masa bajuari baharo circuncisiōre yoiari jire yuhure. Israe masuno jicu Benjami ya curua macariro jija yuhu. Yu pucusuma hebreo masa ti jichu potocāta hebreo masuno warota masa bajuai. Cohamacu dutiare quihōno pahño duacu fariseo curua mehne sāamai yuhu. ⁶“Cohamacu ya jipucu”, nicu noano yoiamai. ã yoacu Jesu yaina sehere ñano yoaa timai yuhu. Potocāta Cohamacu dutiare yoacu tīre yuhdurucaro marieno yoa pahñoi. ⁷Panopure

“Tí noaa jipəcu”, ni tuhotumai. “Tí yu ā ni tuhoturi cjiiri panopu yu jia tiri yaba cjihti jierari jira”, ni tuhotuja mipure. Ō seheta ni tuhotu dūcai yuhu Cristore wacū tuacu tacu. ⁸Cristo Jesu yu puhtorore yu masichu pinihta noa yuhduara. Ā jicu paye sehere masa “Noaa jira”, ti nirire “Tí jipihtia yaba cjihti jierari jira”, ni tuhotuja yuhu. Tí jipihtiare duhunocai Cristo ya sehere yoai tai. Ā jicu tíre yu duhurire “Wiho jia waro jiri jira”, ni tuhotui Cristore noano masicu tacu tiro mehne macariro jicu tacu. ⁹Ā jiro yu mu suro noano yu yoari wapa “Noariro jira”, ni ñuerara Cohamacu yuhure. Ā jiro Cohamacu dutia Moise cjirore to cūrire yu yoari wapa cūhure “Noariro jira”, ni ñuerara. Cristore yu wacū tuari baharo “Noariro jira”, ni ñūna tiro yuhure. Cohamacu sehe marine buhiri marieina jichu yoara, tirore mari wacū tuachu. ¹⁰Ā jicu pano yu ni tuhotu muhtamari cjiire duhunocaja Cristore noano masicu tacu. Cohamacu tuaa mehne Cristo masa mujari jire. Tí tuaa mehne ji duaja. Ā yoa tí tuaa mehne noaare yoa duaja. Cristo crusapu yariari jire mari ñaa yoari buhirire cohāno taro. Ā jicu to yare yu yoari buhiri tiro yoaro seheta ñano yuhdu duaja yuhu cūhu. ¹¹Ā jicu Cristo to masa mujariro seheta masa mujahitiro jiihca yuhu cūhu. Cristore yuhure to ā masa mujachu yoahitore wacū cohtaja yuhu.

¹²Ahri jipihtiare ā nicu, “Cristo yare yoa pahñonocaja yuhu”, ni tuhotueraja. Yu ā ni tuhotuerapachuta Cristo sehe to yairo yoa tuhsure yuhure. Ā jicu to yare tiro cūhure noano masi namo duacu tuaro mehne to yare yoaja yuhu. Ā yoahitiro cjihtore besere tiro yuhure. ¹³Yu coyea, “Cristo yare noano yoa pahñonocaja”, ni tuhotueraja. Ā tuhotuerapaihta ahri pinihtare yoaja: Pano yu yoari cjiire ā ñūnocaja. Tíre pjíro tuhotueraja. Ā yoacu Cristo yare noano yoa pahñonoca duacu, tíre tuaro yoaja mipure. ¹⁴Murocaperiro to wapata duariro seheta Cristo yare tuaro yoaja yuhu yu wapatahtore yuhure waro taro muanopu pjiracara yuhure to catia mehne yu catirucuhto sehe.

¹⁵Ō sehe yu tuhoturiro seheta tuhotuga musa cūhu Cristore noano masiina jina. Wiho mejeta, ahri musare yu yahurire musa tuho duaerachu, soro musa tuhotuchu Cohamacu musare noano masichu yoarohca. ¹⁶Ā jina to yare mari masirire noano yoa sohtori tijihna.

¹⁷Yu coyea, musa jipihtina yuhure ñu cūga. Ā jina paina sā yoaro sehe yoai-nare noano ñuga musa tinare musa ñu cūhto sehe. ¹⁸Payu tahari painare yahui yuhu musare. Mipu cūhure tuaro cahyacu tinareta yahuja musare. Payu tina Cristo crusai to yariari buheare ñu yabiina jira. ¹⁹Tina pichacapu wahahtina jira. Ti ñaa goa pjaa sehere tuaro cahmana tina. Tuhsu, ti buo tiboare yoa, tíre “Noaa jira”, nina tina. Ahri yahpa macaa dihtare noano tuhotura tina. ²⁰Mari sehere mari ya maca muanopu jira. Ā jiro tóputa marine yuhduchu yoahitiro, mari puhtoro Jesucristo tarohca. Ā jina to tahtore cohtana nija mari. ²¹Tiro taro mari pjacurire wiho jia pjacurire soro sehe jia pjacuri dihta cohtotarohca tiro. Ā yoaro to ya pjacu yoaro sehe noa yuhduari pjacure si siteri pjacure warohca marine to tuaa mehne. Jipihtina bui puhtoro sāari jire tiro tí to tuaa mehne. Ā jiro jipihtia puro jira tiro tí tuaa mehne.

Dachoripe mari puhtoro mehne wahchega

4 ¹Ā jina yu coyea, yu cahíina, tuaro yu wacúina, yuhure wahchechu yoaina, pano musa wacū tuariro seheta mipure musare yu yahu joariro seheta mari puhtoro Jesure tuaro wacū tuana, to yare ne duhuena tjiga musa.

²Ahrire yahuihtja musare Evodiare, Síntique cūhure: Jesu yaina numia jira musa. Ā jina cahma sayoro marieno noano mehne jirucuga musa. ³Mūhū sehe potocāta yū piti warota jira. Mūhū cūhure yahuihtja: Tí numia yūhū mehne, Clemente mehne, paina yū piti tiina mehne dahrare noaa buheare sā buhechū. Cohamacū tina jipihtina wamare joa ōha to ya tjuī. Jipihtia dachoripe catiare to warina wamare to joa ōri tjuī joa ōha. Ā jicu tí numiare “Cūno mehne noano jiga”, ni yahuga mūhū.

⁴Dachoripe mari puhtoro mehne wahchega. Pari turita yahuihtja tjoa: Wahchega. ⁵Noano yoaga jipihtinare masa yoaro seheta. Mari puhtoro Cristo to tahto mahanocā dūhsara.

⁶Ne cahya pjíro tuhotuena tjiga. Cohamacūre noano yahu pahñoga. Ā yoana tirore siniga. Ā sinina, “Noana”, niga tirore. ⁷Musa ā yoachū noano jichū yoarohca musare Cohamacū. To ā yoachū noa yūhduara. Ahri mari noano jia noa yūhduara. Masa jina, marine to ā noano jichū yoarire noano tuho ñaha masieraja mari. Cristo Jesu yaina mari jichū marine noano jichū yoaro, Cohamacū marine noano yajeripohna tichū yoarohca. Ā yoaro cahya tuhotuerachū yoarohca marine.

Noaare tuhotuga

⁸Ahrire yahu batoi tai nija musare, yū coyeyā. Quihōno jiare, masa ti ño payoare, noano yoaare, ñaa mariare, ji coaare, masa “Noaa jira”, ti niare tuhotuga musa. Noa yūhduā ti jichū tíreta tuhotuga. Masa noaare ñua ti wahchea sehere musa cūhū wahche tuhotuga.

⁹Musare yū buheriro seheta ā yoarucuga musa. Ā yoana, yūhure ñū cūga musa. Musa ā yoachū Cohamacū musare noano jichū yoariro musa mehne jirohca.

Filipo macaina Paulore ti wari cjirire yahuha tiro

¹⁰Mipū pinihta yoari pja baharo musa pari turi yūhure wacūna musa yoadohore wahcheja. Ā wahchecu mari puhtoro Cristore “Noana”, nija. “Yūhure boaa wahare musa”, nieraja yūhū. Panopure yūhure yoadoho duapanahta yoadoho masierare musa. ¹¹Yūhure musa yoadohore yahucu yūhure dūhsarire musare yahui tai nieraja. Musare paye barore cahmacū ā nii nieraja. Yū cjuāa mehne ji masija yūhū. ¹²Paye baro cjuaceracū cūhū noano ji masija yūhū. Ā yoa pjíro cjuacū cūhū noano ji masija. Dachoripe jūca baacū cūhū jipoaja. Yapiriro jicu cūhū jipoaja. Pjíro cjuacū cūhū jipoaja. Yūhure paye baro mariachū cūhure jipoaja. ¹³Cristo yūhure tuachū yoariro mehne jipihitiare Cohamacū to cahmaare yoa masi pahñoja yūhū. ¹⁴Yū ā jipoariro yū jipachūta yū ñano yūhduchū musa yoadohona yūhure noano yoare musa.

¹⁵Noaa buheare yū buhe dūcachu Macedonia yahpai jiro cjiro yū wahachu musa dihta yūhure yoadohore. Tíre masina musa. ¹⁶Ā yoa Tsalónicai yū jisnichū ñuna yūhure yoadohona cāa tahari warocari jire musa. ¹⁷Paye barore sinicu ā nicū nieraja. Painare musa yoadohochū Cohamacū musare noano yoarohca. Musa ā yoadohori wapa Cohamacū musare to noano yoachū cahmaja yūhū. ¹⁸Mipure yūhure noano wa pahñohre musa. Yū cahmari yūhdoro wahre musa yūhure. Yūhure Epafrodito mehne musa warocari baharo paye baro ne dūhsaerara yūhure. Cohamacū wūhupū

inciensore jũ m̃uo Cohamacure ti noano ji coachũ yoariro seheta yũhũre musa wari cũhũ Cohamacure noano ji coachũ yoara. ¹⁹Cristo yaina jira musa. ã jiro jipihitiare musare duhsarire warohca Cohamacũ musare, noa yũhdũa to cjuare. ²⁰Jipihitia dachoripe mari Pũcure Cohamacure ño payojihna. ãta yoajihna.

Paulo noa dutiha

²¹Jipihitina Cohamacũ yaina, tópu jiina, Jesucristo yaina noajaro. Mari coyea cũhũ Jesu yaina yũhũ mehne macaina musare noa dutira. ²²Jipihitina Cohamacũ yaina, õ macaina, Jesu yaina noa dutira. Roma macaina bui puhtoro ya wũhũ macaina pinihta tuaro noa dutira.

²³Mari puhtoro Jesucristo musare to cahĩa mehne noano yoajaro.

Colosenses

Colosa macainare joarocaha Paulo cūhu

1 ¹⁻²Yūhu Paulo mari coyeyro Timoteo mehne musare Colosa macainare joarocaja sã. Yūhu Jesucristo to yare buhe dutiro to cūiro jija. Cohamacu to cahmano seheta Jesu yūhure to yare buhehtirore cūre. Ā jina musare sã coyey Cristore wacū tuarucuinare joarocaja. Ā jina Cohamacu mari Pucu mehne musare noa dutija. Ā jina tiro mehne noano jiga musa.

Jesu yainare Paulo sini payoha Cohamacure

³Musa ya cjihtire Cohamacure sini payona “Noana”, ā nirucuja sã. Tiro sehe mari puhtoro Jesucristo Pucuro jira. ⁴⁻⁵Tiroke “Noana”, nirucuja sã musa jia tiare tuhorocana. To ya buhea potocã jia buheare musa tuhoriro seheta jipihtia dachoripe muanopu musare jichu yoarohca Cristo sehe. To ā yoah tiro jichu tīre musa ā cohtarucu wama tira. Ā jina Cristo Jesure wacū tua wama tira musa. Tuhsu, to yainare cahī wama tira musa. Musa ā jiina jichu Cohamacu mehne wahche tiroke “Noana”, nija sã. ⁶Jipihtiropure Jesu yaina potocã jia buheare noaa buheare ti yahuchu tuhoa masa Cohamacu yare cahmaa, noaa sehere cohtota namoa nina. Musa cūhu noaa buheare Cohamacu musare to cahīare quihōno musa tuho ducari baharo tina yoaro sehe Cohamacu yare cahmana, noaa sehere cohtota wama tira musa. ⁷Ahri-reta musa cūhure Epafra noaa buheare yahuri jire. Tiro sã tuaro cahīro sã mehne Cristore dahra cohtariro, Cristo yare ne duhuerariro jira. Musare sã buhe masierachu tiro sehe sãre cohtotariro jiro, musare buheri jire. ⁸Tiro jira musa jia tiare sãre yahuriro. Espiritu Santo to yoadohoa mehne Jesu yainare musa cahīre yahure sãre.

⁹Ā jina musare tuhorocana musare sã tuhorocari dachoihta dōihta ā sini payorucuja sã Cohamacure. Cohamacu to cahmaare musa masi pahñohto sehe tiroke sini payoja sã. Espiritu Santo yoadohoro mehne Cohamacu yare noano masiina musa jihto sehe sini payoja sã. ¹⁰Ō seheta sini payoja sã mari puhtoro Cristo to cahmano seheta noano musa yoah tiro cjihtire. Musa ā yoachu ñano tiro wahcherohca. Ā jina jipihtia noaare musa yoah tiro sehe sini payoja. Cohamacure musa masi namohto sehe sini payoja. ¹¹Ahri yu yahuhti cūhure sini payoja sã. Cohamacu ya tuua noa yuhduara. Cohamacu tī tuua mehne musa tuahtore musare sini payoja. Ō seheta sini payoja musa ñano yuhdūpa-nahta wahchea mehne musa cūno pjahto sehe. ¹²Cohamacu to yaina cjihtire marine jichu yoari jire. Ā yoaro to waare cjuah tina cūhure yoari jire marine tiro. To jiropu buhriaropu mari cjuah tite warohca tiro. To ā yoachu ñana

tirore musa “Noana”, nihto cjihtore sini payoja sã musare. ¹³Tirota marine pichacapũ wahaborinare yuhdũchu yoari jire. Tõ panore ñaare yoa duhu masieramai mari. Ñariro sehe nahitianoi jiro marine dutiriro jisniri jimare. Cohamacũ sehe to macunore to cahĩrirore puhtoro sõno muanopũ marine jichũ yoari jire. Ñ jina to macuno mehne jinahca. ¹⁴To macuno mehne marine yuhdora Cohamacũ. To macuno to yariaro mehne mari ñaa yoari buhirire bori jire Cohamacũ.

**Masa Cohamacũ mehne ti cahma ti pu buhuseheri
ti ñũ tuhtichũ ñũno Cristo bosaha**

¹⁵Jesu Pucũrore ñũmahnoerara. To macuno sehe to Pucũro to dohse jia tiare ñona masare. Tiro to macuno jipihitina pano jipihitia pano ji tuhsuri jire. Ñ jiro jipihitia puro, jipihitina bui puhtoro jira tiro. ¹⁶Cohamacũ to dutichũ to macuno sehe to Pucũro mehne jipihitinare, jipihitiare bajuamehneri jire. Muanoopũ jiare ahri yahpapũ jia cũhure bajuamehneri jire. Mari ñũrire mari ñũerari cũhure bajuamehneri jire. Muano macaina ñũmahnoerainare puh-toare, dutiinare, jipihitinare bajuamehneri jire. Ñ jia jipihitina to yaina cjihti jimari jire. Jipihitia cũhu to ya cjihti jimari jire. ¹⁷Jipihitina pano jipihitia pano Cristo ji tuhsuri jire. Ñ yoa to tuaa mehne jipihitia cũhu jipihitina cũhu mipure jia nina. ¹⁸Mari to yaina jipihitina to pjacũ yoaro seheta to ya curua macaina jija. Ñ jiro tiro mari dapu mari puhtoro jira. Tiro yariaro masa muja muhtariro jira jipihitina bui puhtoro, jipihitia puro jiro taro. ¹⁹Cristo to Pucũro mehne cũno potori to jiro seheta jira. To ã jichũta cahmana Cohamacũ sehe. ²⁰Jipihitina to Pucũrore cahma ñũ tuhtia tiri jire. Ñ ti cahma ñũ tuhtichũ ñũno Cristo tinare “Ñũ tuhtiena tjiga”, ni yahuri jire. Muano macainare ahri yahpa macaina cũhure to Pucũrore “Ñũ tuhtiena tjiga”, ni yahuri jire Cristo. Ñ yoa muano macaa ahri yahpa macaa cũhu noano ti jichũ cahmari jire tiro. Ñ mari ñũ tuhtirire duhuchũ yoa duari jire tiro crusapũ yariaro to di cohãno. To Pucũro to cahmariro seheta ã yoari jire Cristo.

²¹Musa cũhure ãta yoari jire tiro. To Pucũrore ñũ tuhtiina tiro mehne jie-raina jimari jire musa cũhu. Ñaare yoari jimare musa. ²²Ñ jimarina musa jipachũta tiro to yariaro mehne to Pucũrore musare ñũ tuhtierachũ yoari jire tiro. Ñ yoari jire tiro noaina ñaa buhiri marieina musare to yoahto cjihtore. Musa ã jichũ tiro musare tõ sehe jiinapure to Pucũrore warohca. ²³Ñta warohca tiro musa tirore wacũ tuarucuchũ. Ñta yorohca tiro noaa buheare musa tuhore musa boerachũ tí buheare musa ã yuhtirucuchũ. Tí buheare noaa buheare jipihitina ahri yahpapure jiina tuhori jire. Ñ jicu yuhũ cũhu Paulo Cristore dahra cohtariro jicu, tí buheareta yahuriro jija.

Jesu yainare tina mehne macainare yoadohohtinare cũha Paulo

²⁴Cristo mari ñano yoari buhirire ñano yuhduri jire. Ñ jicu yuhũ cũhu musare yu buheri buhiri ñano yuhducũ wahcheja. Ñ ñano yuhducũ Cristo marine to cũrire yoa sohtori tii nija. Ñ jicu wahcheja. Cristo yare mari yoari buhiri mari ñano yuhdũ namohto duhsasinina mini. Ñ jicu tirore musa wacũ tuahtore ñano yuhducũ, wahcheja yuhũ. To pjacũ yoaro sehe jiina to ya curua macaina jira musa. ²⁵Jesu yainare yoadohohtirore cũre Cohamacũ yuhure. Musa ya cjihtire yoahtirore yuhure cũre tiro. To yare jipihitiropure

yahu pahñohtirore cüre yuhure. ²⁶Tí to yare panopure payu tjururi macainare yahu pahñoera tiri jire Cohamacu. Mipure ahri tjuru macainare to yainare tíre noano yahu pahñonocare juna. ²⁷“Judio masa jieraina ya cjihtire yu ya buhea noa yuhduara”, ni to yainare tíre yahuri jire. Pano to yahuerari cjihtire yahuri jire. Ō sehe jira to ya: Cristo to yaina mehne jira. To ā jichu to yaina muanopu Cohamacu cahapu noa yuhduaropu jiahca. Tí jira panopu ti masierari cjiri Cohamacu ya.

²⁸Cristoreta yahuja. Jipihtinare cuisāana tinare buheja sā. Noano masia mehne buheja sā noano Cristore masare masichu yoana tana. Ā buheja sā to yare noano yoaina ñaa buhiri marieina tinare jichu yoana tana. ²⁹Ahri jira yu dahraa. Cohamacu to ya tuaa mehne yuhure to wari tuaa mehne tuaro dahraja yuhu, to yare buhecu.

2 ¹Ahrire masa masichu cahmaja yuhu. Musa ya cjihtire, Laodicea macaina ya cjihtire, jipihtina paina ya cjihti cūhure tuaro dahraja yuhu. Jipihtina masa yuhure ñueraina ya cjihti cūhure tuaro dahracu musare tuaro yoadohoja yuhu. ²Ō sehetā musare yoadohoja yuhu masa noano yaje-ripohna tihto cjihtore. Musa mehne macainare masa cahma cahīhto cjihto cūhure ā musare yoadohoja yuhu. Cohamacu ya panopu to yahuerari cjiri Cristore masichu yoaa jira. To yare masa masichu noa yuhduara. Cristore masa noano masihtō cjihtore, tiro mehne masa noano jihto cjihto cūhure tuaro yoadohoja musare. ³Paina ti masierari cjihtire, noa yuhduare Cohamacu to masiare Cristo dihta noano masichu yoara marine. ⁴Ahrire nija musare “Paina musare tuho wisiachu yoaa durucua mehne mahñori”, nicu. ⁵Yuhu masa watōi jierapacuta yu wacūno mehne masa watōi jiriyo yoaro sehetā tuhotuja. Ā jicu Cristore masa noano wacū tuarucurire, quihōno masa yoari cūhure masicu wahcheja yuhu.

⁶Ā jina Cristore masa wacū tua ducariro sehetā āta tirore wacū tuaa mehne dachoripe noano jirucuga. ⁷Tirore noano masiina jiga masa. Ā yoa dachoripe tirore masi namoga pano musare paina ti buheriro sehetā. Ā yoa Cristore wahche, “Noana”, nirucuina jiga masa.

Cristo yaina jina noaa sehere cahmaja mari

⁸⁻¹⁰Noano yoaga masa. Masa ti mu suro ti mahño buheare tuhoena tjiga masa. Tina panopu macaina ti mu suro ti niare buhera. Ti ā nia yaba cjihti jierara. Ahri yahpa macaina ti mu suro ti tuhotuare buhe, Cristo ya sehere buherara. Cristo Cohamacu to jiro sehetā jiriyo jiro, ahri yahpapu pjacu tiro, Cohamacu warota jirota nina. To yaina jina Cohamacu mehne noano jija mari. Tirota jira jipihtina anjoa puhtoa bui paina bajueraina bui puhtoro jiriyo. Tíre masina mahñoare buheinare tuhoena tjiga. ¹¹Circuncisiōre ti yoiro sehetā mahanocā pjacu cahsarocāre ti yihso cohāriro sehetā Cristo ñaa buhiri tiina masa jia tiare cohā, duhuchu yoari jire. Ahri circuncisiō masa ti pjacurire mahanocā cahsarocāre ti cohāri jierara. Ahri circuncisiō yoaro sehe yoaro, Cohamacu sehe ñaa buhiri tiina mari jia tiare cohāna Cristore mari wacū tuachu ñuno. ¹²To yaina jina bautisarina wahari jire masa. To bautisarina wahana ō sehe ñona niri jire masa: Panopu macaa masa ñaa yoirore masa duhurire ñona niri jire masa. Tí masa ñaa yoiro buhirire masa ya cūboro sehetā tíre duhuri jire masa. Cristo masa mujano noanopu wahari

jire. To ã waharo seheta Cohamacure wacũ tuana “Tiro tuariro jira”, niina jina noaa sehere cohtotari jire musa. Tiro Cohamacu sehe Cristore masoriro jira. To bautisarina wahana noaa sehere musa cohtotarire ñona nina musa. ¹³Panopure ñaa buhiri cjuarina musa jiri buhiri pichacapũ wahaborina jimari jire musa. Æ wahaborina jimari jire musa Cohamacu yaina jierasina. To dutiare cjuaraina jimari jire musa. Mipure Cohamacu marine tiro mehne ã jirucuhtinare yoari jire. Cristo to yariaro mehne ã yoari jire tiro marine. Æ yoaro jipihtina mari ñaa yoari buhirire bonocari jire tiro. ¹⁴Cohamacu to dutiare ti joari cjirire yuhdurucaina mari jipachuta Cristore mari wacũ tuachũ ñuno tiro marine buhiri ti dutiare. Cristo crusapũ to yariaro mehne Cohamacu sehe mari ñaa buhirire cohānocahna panopũ to dutiare, marine buhiri ti dutiare to cohānocaboriro seheta. Crusapũ yariaro tí tañopũ panopũ macaa dutiare ti joari pũre to cã puha õboro seheta tí dutiare cohānocahna. ¹⁵Masa ti ñurocaroi watia puhtoare Cohamacu yuhdurucari jire. Wiho jiina, tuaeraina tjuanocari jire tina sehe. Æ yoaro tinare buoro wahachũ yoari jire, surara ti yuhdurucainare masare ti naa ño ti buoro wahachũ yoaro seheta. Crusapũ yariaro Cristo watia yuhdurucari jire.

Muano macaare Cohamacu yare cahmaga

¹⁶Æ yoa paina musa chware musa sihnia cũhure ñua musare “Buhiri tiina jira”, ni ñuboca. Ti ã ni ñuchũ ã ñunocahga tinare. Sũripe jia dachorire, somanaripe jia dachorire, bose numuri musa yuhdoerachũ ñua musare “Buhiri tiina jira”, ni ñuboca tina. Ti ã ni ñuchũ ã ñunocahga tinare. ¹⁷Panopũ tí chũa dutiare, bose numurine yuhdo dutiare, paye dutia cũhure cũri jire Cohamacu marine buhero taro. Tí dutia mehne baharopũ to dohse yoahtore Cohamacu yoa ñono niri jire. Cristo to jia tia cjihtire yoa ño curero niri jire masare. “Tiro õ sehe waharohca”, nino ã yoa ñono niri jire. Æ yoa ñohti cjihti jiri jimare tí dutia. ¹⁸Õ sehe nimana tí dutiare yoa dutiina. “Soro jiare bajuachũ ñũhi sã” nia, tina Cohamacure ti ño payoboro sehe anjoare ño payomana. Æ jiina jia “Masí pahñonocaja sã”, ni tuhotumana tina masa ti mu suro ti tuhoturiro seheta. Æ jia tina painare yuhdurucaeraina, noaina yoaro sehe yoa ñomana musare. Æ yoa “Quihõno yoaerara musa”, ni yahusãna musare. Ti ã ni yahusãchũ, tinare ã ñunocahga. ¹⁹Tó sehe yoapahta musare yahusãina Cristo to dutiro sehe yoaa nierara. Cristo sehe to yaina dapu ti puhtoro jira. To yaina sehe to pjacu yoaro sehe jiina to ya curua macaina jira. Mari cohãri dohsaa mari wa dari cũhu mari pjacure cũ pjacu jichũ yoara. Tó seheta Cristo sehe to yainare cũnoi noano mehne jichũ yoara. Æ yoa marine yoadohora Cohamacu cahmaare mari noano yoahto sehe.

²⁰Æ yoa Cristo yaina jina tiro mehne yariarina yoaro sehe jira musa, Cohamacu to ñuchũ. Æ jina ñaare musa yoirire duhurina jira musa. Æ jina ahri yahpa macaa ñaa buheare, masa ti mu suro ti buheare cahmaeraborina jira musa. ¿Æ jiborina jipanahta dohse yoana masa ti mu suro ti dutiare yuhtijari musa? ²¹Õ sehe ni dutira ti mu suro dutiina: Ahri barore chuena tjiga. Ahri barore ne chũ ñuena tjiga. Ahri barore pihaena tjiga. Tó sehe ni dutira tina. ²²Mari paye barore chuchũ dói pihtia wahara. Tó sehe jia barore pihtia barore tuhotua nina ã dutiina. Ti ã dutichũ ahri yahpa macaa dutia dihta jira tí dutia. Masa ti mu suro ti buhea dihta jira ahri buhea. Æ jia yaba cjihti

jierara. ²³Tí dutiare yoaina Cohamacure ño payoina yoaro sehe jimana. Ñ yoa painare yuhdurucacarina yoaro sehe yoa ñomana. Ti pjacurire ñano yoa Cohamacure ño payoina sehetá yoa ñomana tina. Ti ã yoachũ ti ya dutia sehe masi pahñoina ya dutia yoaro sehe jimana. Ñ jierara. Tí dutiare yoapahta ti ñaare goa pjaare duhuerara. Ñ jia tí dutia sehe yaba cjihti jierara.

3 ¹Ñ yoa Cristo yaina jira musa. Ñ jina Cohamacu tuaa mehne Cristo to masa mujariro sehetá tí tuaa mehne pano musa ñaa yoarire duhu, noaa sehere cohtotare musa. Ñ cohtotaina jina muano macaare Cristo yare cahmaga musa. Tópure muanopũ Cohamacu poto buhusehei dujira tiro. ²Muano macaa Cohamacu yare noano tuhotuga musa. Ahri yahpa macaare ne wacũ nunuena tjiga musa. ³Cristo yaina jina tiro mehne yariaborina sehetá musa wahana ahri yahpa macaare pjíro tuhotuena tjiga. Ñ jiro Cristo mehne musa jirucuhtore cahno tuhsuri jire Cohamacu. ⁴Ñ yoa Cristo muanopũ marine ã jirucuhtinare yoariro si sitea mehne to tachũ tiro mehne wahanahca mari. Ñ wahana tiro mehne muanopũ Cohamacu yare cjuanhca.

Cristo yaina jierasina ñaare yoamai mari

⁵Ñ yoa ahri yahpa macaa ñaa musa yoaare duhunocahga musa: Numino mehne ñano yoaare, muno mehne ñano yoaare, ñaa yuhduaro yoaare, paio namonore goa pjaare, pacoro manunore goa pjaare, ñaa goa pjaare duhunocahga musa. Paye barore tuaro cahmana jiena tjiga. Paye barore cjona, tíre tuaro cahmana “Cohamacu jira”, ti nia masurine ti ño payoro sehetá yoana nija mari tíre. ⁶Tí ñaare yoaina Cohamacure yuhdurucaina jira. Ti ã yoa yuhdurucachũ ñuno tinare buhiri dahrerohca. ⁷Panopure musa sehe tí ñaare yoarina jina tina mehne macaina jiri jimare musa. ⁸Wiho mejeta mipure ahri ñaare duhu pihtinocahga musa: Suaare, sua yuhduare, painare ñano ni tuhotuare, painare ñano quti dahreare, ñano durucuare tí jipihtiare duhunocahga. ⁹⁻¹⁰Musa sehe Jesu yaina wahana tí ñaa yoaare duhu tuhsuri jire. Ñ jina musa tuhotuare cohtotaina jira musa. Musare noaa sehere cahmachũ yoaro nina Cohamacu to yoaro sehe musa jihto sehe. Ñ sehetá yoara tiro noano tirore musa masi namohto sehe. Ñ jiina jina musa mehne macainare mahñoena tjiga. ¹¹Cristo yaina jina judio masa, judio masa jieraina cũhu cũno potoriga jira musa, Cohamacu to ñuchũ. Circuncisiõre yoaina, yoaeraina cũhu Cristo yaina jia cũno potoriga jira, Cohamacu to ñuchũ. Pa yahpa macaina, masieraina, musa ya yahpa macaina cũhu Cristo yaina jia cũno potoriga jira, Cohamacu to ñuchũ. Dahra cohtaina, dahra cohtaina jieraina cũhu Cristo yaina jia cũno potoriga jira, Cohamacu to ñuchũ. Jesu jipihtina to yaina mehne jira. Wiho jiriro jierara tiro, to yaina ti ñuchũ.

¹²Ñ yoa Cohamacu to beserina, noaina, to cahĩina jina õ sehe jiga musa: Painare pja ñuina, painare noano yoaina, painare yuhduruca duaeraina, painare niji siaro dero yoaina, musare ti ñano yoapachuta ã tuhotunocaina jiga musa. ¹³Musa mehne macaina mehne suana, dóihta musa basi musa suaire pjāga. Mari puhtoro musa ñaa yoari buhirire bohre. Ñ to boriro sehetá musa cũhu musa mehne macaina musare ti ñaa yoarire boga. ¹⁴Ahri dutia mehne õ sehe ni dutija musare: Painare cahĩga. Musa ã yoana noano jipihtina mehne cũno mehne jinahca. ¹⁵Cristo marine noano jichũ yoara jiape ni durucueraina mari jihto sehe. To ã yoachũ noano jiga musa, musa basi.

Õ seheta jihtina cjihtire to yaina cjihtire bese cūri jire Cohamacu musare. Æ jina to pjacu yoaro seheta cū curuata jira musa. Æ yoa Cohamacure “Noana”, ni wahcheina jiga musa Cohamacu mehne.

¹⁶ Cristo ya buheare noano wacūrucuga musa. Noano masi buhega to yare. Cua pisaro mehne tíre yahuga. Æ yoa tuhsu, Salmore, Cohamacu yare basaare, paye tirore ño payoa basaare tirore basa payoga. Noano wacū ño payoa mehne basa payoga. Æ basana to yare noano wacūga musa. Æ yoana Cohamacure “Noana”, ni wahcheina jiga musa Cohamacu mehne. ¹⁷ Jipihtia dohse jia musa yoare noano yajeripohna ti yoaga mari puhtoro Jesu to wahchehto sehe. Cristore ño payora musa. Æ yoa tirore ño payoa mehne noaa dihtare durucuga. Æ yoana Cristo to yoadohoa mehne Cohamacu mari Pucure “Noana”, ni wahche payo siniga tirore.

Jesu yainare noano mehne ti jihti dutia õ sehe jira

¹⁸ Musa manū tia numia, musa manusumare noano yuhtiga musa. Æta yoaro cahmana mari puhtoro Cristo ya numia jina. ¹⁹ Musa namo tiina sehe, musa namosānumiare cahīga. Æ yoa tí numiare ne tuhtiena tjiga. ²⁰ Musa ti pohna cūhu, musa pucūsumare yuhdarucaeraina jiga. Musa Æ yoachū ñño mari puhtoro noano ji coara. ²¹ Musa ti pucūsuma cūhu musa pohnare suachu yoaena tjiga “Cahyachu yoari”, nina. ²² Musa tinare dahra cohtaina, musa puhtoare ahri yahpa macainare noano yuhtirucuga. Ti ñurocaro dihtare yuhtiina jiena tjiga. Ti mariachu cūhure yuhtiina jiga. Mari puhtoro Cristore cua pisaro musa ñuriro seheta noano mehne yuhtiga musa puhtoa cūhure. ²³ Potocāta Cristo yaina jina noano yuhtira musa tirore. Æ jina musa puhtoare ahri yahpa macainare yuhtina, tina dihtare yuhtina nierara. Cristo cūhure musa yuhtiboro sehe yuhtinata nina musa. Æ yoana musa puhtoa ti dutiro seheta tuaro mehne dahraga, Cristo ya dutia ti jiboriro seheta. ²⁴ Musa Æ yoachū Cristo musare noano yorohca. “Musare waihtja”, to niare musare warohca mari puhtoro. Tíre masina musa. Mari puhtoro Cristore dahra cohtaina jira musa. Æ jiro tiro sehe musa puhtoro waro jira. ²⁵ Ñaare yoinare buhiri dahrerohca mari puhtoro. Æ yoinare cūiro duhsaro marieno cūno potori buhiri dahrerohca tiro.

4 ¹ Musa puhtoa sehe, musare dahra cohtainare potocāta noano yoaga tinare. Musa cūhu puhtoro cjuara. Musa puhtoro musa cjuariro sehe muano macariro jira.

² Dachoripe Cohamacure siniga musa. Noano wacū tuhotu siniga. Æ yoana “Noana”, niga Cohamacure. ³ Sā ya cjihti cūhure sini payoga tjoa. Cristo yare paina pano ti masierari cjiire buhena nija sā. Tinare sā noano masichū yoahto sehe sini payoga Cohamacure. Cristo yare yu buheri buhiri yuhū mipure pere-supū jija. ⁴ Æ jicu musa Æ sini payochū cahmaja to yare yu noano yahuhto cjihto sehe. Cristo to dutiriro seheta yu yahuhto cjihto sehe sini payoga.

⁵ Jesu yaina jieraina mehne jina noano yoaga musa. Cristo yare yahuga tinare. Tina mehne musa jiro puro āta noano yoaga. ⁶ Paina mehne suhāduna noano ji coaro mehne suhāduga. Noaa dihtare durucuga. Paina musare ti sinituchū noano masi yuhtiga tinare.

Noa duti batoaha Paulo

⁷ Tíquico mari coyeiro Jesu yairo jira. Tiro mari cahīriro, Cristo yare buhero, sā mehne dahrariro jira. Æ jiro Cristo yare ne duhuerara tiro. Tiro

yū jia tiare musare yahurohca. ⁸Musa cahapū tirore warocai nija yūhū sā jia tiare musa masihtō sehe, musare wahchechū yoahrtiro cjihtore. ⁹Onésimo mari coyeiro mari cahīriro mehne piti dahre warocai nija. Tiro cūhū Cristo yare ne duhuerara. Musa mehne macariro jira. Tina puaro sā ōre dohse sā yūhdurire yahuahca musare.

¹⁰Aristarco peresupū jiriro yūhū mehne macariro musare noa dutira. Marco cūhū noa dutira. Tiro Bernabé tañano jira. Tirore yahuroca tuhsui musare. Musa cahapū to suchū ñuna noano mehne tirore piti bocaga. ¹¹Jesu “Justo” ti ni pisuriro cūhū noa dutira musare. Ahrina tiarota yūhū mehne dahraina judio masa waro jira. Judio masa waro tina dihta Cohamacū yare yūhū mehne buhera. Ō sehe buheja sā Cohamacū yaina masa ti wahahto sehe, Cohamacū ti puhtoro to jihto sehe. Tina yūhure noano yoadohoina jira. ¹²Epafrā musa mehne jiriro cjiro musare noa dutira. Tiro Cristore dahra cohtariro jira. Cohamacure sinino, musa ya cjihtire tuaro sini payorucura tiro. Cohamacure noano wacū tuarucuhtina, to cahmano sehe yoahrtina musa jihto sehe ā sini payorucura tiro Cohamacure. ¹³Tiro musa ya cjihtire tuaro sini payore musare pjíro tuhoturo. Laodicea macaina ya cjihtire, Hierapoli macaina ya cjihti cūhure tiro tuaro sini payore. To ā yoiriro jichū ñucū musare yahurocai nija. ¹⁴Duhturu Luca mari cahīriro musare noa dutira. Dema cūhū noa dutira.

¹⁵Noajaro mari coyea Jesu yaina Laodicea macaina. Ninfa cūhū noajaro. Jesu yaina ticoro ya wūhū cahmachuina cūhū noajaro. ¹⁶Ahri pūre yū joarocari pūre musa mehne macainare musa buhe tuhsuri baharo Laodicea macaina cūhure warocaga. Ā yoa tinare Laodicea macainare yū joarocari pūre musa cūhū buhega. ¹⁷Ā yoa ō sehe niga Arquipore: “Mari puhtoro Jesu yairo mū jichū to yare buhehtiro cūre mūhure. To ā cūchū noano buhe sohtori tiga mūhū”, niga tirore.

¹⁸Yūhū Paulo, yū wamomaca mehne ahrire joaja. Musare noa dutija yūhū. Peresui yū jiare wacū, sini payoga musa Cohamacure. Noano jiga musa. Cohamacū to cahīa mehne musare noano yojaro. Āta yojaro.

1 Tesalonicenses

Paulo cūhu joarocaha Jesu yainare Tesalónica macainare

1 ¹Yuhū Paulo, Silvano, Timoteo sã tiaro ahri pū mehne musare noa dutija. Musa sehe Tesalónica macaina mari Pucu Cohamacu yaina jira. Mari puhtoro Jesucristo yaina cūhu jira musa. Ā jina Cohamacu mari Pucu, mari puhtoro Jesucristo ti cahīa mehne musare noa dutija. Cohamacu yoado-hoa mehne noano jiga musa.

Jesu yaina Tesalónica macaina sehe Jesure noano wacū tuaha

²Cohamacure sinina, jipihtina Jesure musa wacū tuaare wacūna “Noabiara sãre”, nirucuja sã musare. Cohamacure sinina, musa ya cjihtire ā sini payorucuna nija sã. ³Musa sehe Jesucristore noano wacū tuayuhca. Ā wacū tuana, Jesu yare yoayuhca musa. Jesucristore, paina cūhure cahīyuhca musa. Ā cahīna, Jesu yare tuaro yoana niyuhca musa. Jesucristore mari puhtore wacū tuarucuyuhca musa. Ā wacū tuarucuna musare to yuhdohtore masina, tíre cohtana niyuhca musa. Ā yoa tirore wacū tua duhuerayuhca musa ñano yuhdupanahta. Cohamacu mari Pucure sinina, tíre musa ā yoarire wacūja sã. ⁴⁻⁵Sã coyea, Cohamacu to cahīina jira musa. Musare to beserire masija sã. Sohō jiri pja musare noaa buheare buhena ā yahunocana nierahi musare. Espíritu Santo to tuaa mehne noaa buheare buhena nii musare. Ā buhena tí buhea quihōno jichu noano masii sã. Ā jina musa watoi sã jina, sã yoarire masina musa. Musare yoadohona ā yoi sã. Musare buheina jina Cohamacu to beserina musa jichu masija sã.

⁶Sohō jiri pjapure musa ñano yuhduina jina, noaa buheare cahmare musa. Musa ā cahmachu, Espíritu Santo sehe musare noano wahchechu yoare. To ā yoachu musa sehe sãre ñu cū, sã yoiaro seheta yoare. Ā yoana Jesu cūhure ñu cūre musa. ⁷Ā jia Jesu yaina Macedonia yahpa macaina, Acaya yahpa macaina cūhu Jesu yare musa yoarire masire. Ā masia tina cūhu musare ñu cū, musa yoiaro seheta yoara. ⁸Macedonia yahpa macaina Acaya yahpa macaina cūhu mari puhtoro yare musa buhechu tuhhorocare. Cohamacure musa wacū tuarire tuhhorina sehe tina dihta jierare. Jipihtiro macaina musa wacū tuarire tuhoyuhti. Ā jia sã tinare yahuerapachuta tíre masi tuhsure tina. ⁹Ā jia musa cahai sã tinirire, sãre musa noano piti bocarire yahure tina jipihtiro macainare. Ā yoa Cohamacu sehere wacū tuana, “Cohamacu jira”, musa nia masurine musa cohānocarire, Cohamacu ya sehere musa yoarire yahure tina jipihtiro macainare. Tiro Cohamacu sehe catihiro, Cohamacu waro jira. ¹⁰Ā yoaa “Cohamacu macunore muanopu tahtirore Tesalónica

macaina cohtaa nina”, ni yahura masa musare. To macunore yariariro cjirore Cohamacu masori jire. To a masochu to macuno Jesu sehe marine nabiario to buhiri dahreborinare yuhdori jire.

Tesalónica wama tiri macapu to dahrarire yahuha Paulo

2 ¹Musa cahai jina sa a jinocana niera tii. Musare noano yoadohoina jia tii sa. Tire noano masina musa, sa coyea. ²A yoa Filipoi jina nano sa yuhdurire, sare nano ti yoirire potocata masina musa. Sare ti a yoapachuta Cohamacu to yoadohoa mehne cuirio marieno Cohamacu yare noaa buheare buhei sa musa cuhure. Sare masa payu ti nu tuhtipachuta noaa buheare buhei sa musare. ³Musare buhena noano sa masirire buhei sa musare. A buhena musare dojomehne duana nierahi. A yoa mahnoerahi. ⁴Cohamacu to cahmano sehta buheja sa. Noa buheare buhehtina cjihtire Cohamacu besere sare. To a beserina sa jichu to ya buheare sa buhechu noa nina, Cohamacu to nu chu. A jina o sehta buheja sa. Masa ti tuho ji coahtire buhena nieraja sa. Cohamacu sehe sare to nu ji coahto cjihtore to yare buheja sa. Tiro sehe mari tuhoutuare, dohse mari yoa duaare noano masina. ⁵Noa buheare buhena tuho ji coaa duseri mehne buhena nierahi. Ahrire masina musa. A yoa sa buhena, musare paye barore wapa cahmana nierahi sa. Ahrire Cohamacu masina. Potoca nii nija. ⁶A buhena masa sare ti nu wahhti cjihtire yoana nierahi sa. Musare paina cuhure sare nu wah dutina tana nierahi. ⁷A nu wah dutiera-panahta Cristo to curina jija. A jina musare wapa cahmaboa sa. A yoa puhtoa yoaro sehe musare dutiina jiboa sa. Wiho mejeta numino wiharirocare to noano bucuoriro sehta noano niji siaroca dero yoi sa musare. ⁸A jina musare noano cahmana, Cohamacu yare noaa buheare buhei sa musare. A yoana ti dihtare yoerai musare. Musare noano yoadohoi sa catisinina waro. Sa cahina musa jichu musare a yoadohoi sa. ⁹A musare cahina tuaro yoadohoi sa musare. Tire wacuna musa, sa coyea. Cohamacu yare noaa buheare buhena musa cjuare sini cariboerai musare. A jina dachopu, namipu cuhure dahrai sa.

¹⁰Noano, musare nano papero marieno, mahono marieno musare Jesu yainare sa yoirire masina musa. Cohamacu chu tire masina. ¹¹A jina ti pucuro to pohnare to noano yahu to wahchechu yoiro sehta musa cuhure yahuna wahchechu yoi musare. Tire masina musa. ¹²Puhtoro Cohamacu to suho jiropu, noa yuhduaropu musare pjirocare. A jina to yaina musa jichu Cohamacu to cahmariro sehta musare ji duti sa.

¹³Cohamacu yare musare sa yahuri cjiire musa tuhona, o sehe ni tuhuture musa: “Masa ti mu suro ti buhea jierara. Cohamacu ya buheata jira”, ni tuhuture musa. Tire musa tuhutuchu masina wahcheja sa. A jina Cohamacure sinina “Noana”, nirucuja sa tirore. Toihta jira. Musare sa buhea Cohamacu durucua potoca jiata nina. A jiro Cohamacu musa Jesure wacu tuaina jichu to ya buhea mehne musare noaa sehere cohtotachu yoaro nina. ¹⁴Jesucristore wacu tuainare Judea yahpa macainare ti yoiro sehta musa cuhure yoare paina. Judea yahpa macainare Jesu yaina sehere judio masa nano yuhduchu yoare. Musa cuhure musa ya dihta macaina ata nano yuhduchu yoare. ¹⁵⁻¹⁶Judio masa sehe Cohamacu yare yahu muhtaina cjiire panopu macainare waja tiri jire. A jia mari puhtoro Jesu cuhure waji jire tina. Tuhsu, tina sare cohare. Cohamacure

tina cahyachu yoahre. ã yoaia jia, payu masare ñu tuhtira tina. Judio masa jierainare Cohamacu yare sã yahu duamai tina cûhure pichacapu wahaborinare “Cohamacu yuhdojaro”, nina. Sã ã yahu duapachuta judio masa sehe sãre ne Cohamacu yare painare yahu dutierare. ã yahu dutieraa pjíro buhiri ti namoa nina tina. Mipure tinare tuaro Cohamacu buhiri dahrerohca juna.

Paulo Tesalónica macaina cahapu pari turi tini duamaha

¹⁷Sã coyea, mipure mahanocã musa mehne jierana musare wacûna nija. ã jina musare tuaro ñu duana, musa cahai waha duamai. ¹⁸⁻¹⁹Cãa tahari yuhu Paulo musare ñui waha duamai. Yu ã waha duapachuta Satana sehe sã waha-borirore ducatare. ã jina wahaerahi sã. Sãre wahchechu yoaina musa jichu musare ñu duamai. Mari puhtoro Jesu ahri yahpapu to tjua tachu musa sehe sãre wahchechu yoanahca. ã jina wahchea mehne musa mehne Jesu panoi ducunahca. ²⁰Ãta jira. Musare ñuno Jesu sehe “Noano buheri jira musa”, ninohca sãre. ã jina noano wahcheja sã.

3 ¹⁻² ã yoa musare yoari pja ñuerana musare tuaro tuho duana tíre wacûna, Timoteore musa cahapu warocai. Tiro mari coyeiro Jesu yairo Cohamacure dahra cohtariro jiro, sã mehne noaa buheare buheriro jira. ã jina tirore warocai Jesucristore noano musa wacû tuahti cjihtire, musa wahchehti cjihti cûhure. Tirore warocana sã sahsero Atena wama tiri macai tjui. ³Musa ñano yuhdupanahta Jesu yare musa cohãerahto cjihtore warocai sã Timoteore. Jesu yaina jina ñano yuhdunahca mari. Tíre masina musa. ⁴Musa mehne tó panopure jisnina mari ñano yuhdũtoreta yahu tuhsu musare. ã jina sã niriro seheta mari ñano yuhdũi. Tíre musa noano masina. ⁵Ã jicu musare yoari pja ñueracu musare tuaro tuho duai. ã jicu Jesure musa wacû tuarire masii tai Timoteore warocai yuhu. “Watino musare ñano yoa dutiri” nicu, “Musare sã buheri cjirire musapu duhuri” nicu, tirore warocai yuhu.

⁶ ã yoa mipure Timoteo musa cahapu jiriro sã cahapu tju wihihre. ã tju wihiro noaa quitire sãre yahure tiro. Jesure musa noano wacû tuaare, painare musa cahã cûhure tiro yahure sãre. ã ni tuhsu sãre musa noano wacûrire, musare sã ñu duariro seheta musa cûhu tuaro sãre musa ñu duarire yahure sãre tiro. ⁷ ã jina sã coyea, mipure sã ñano yuhdupanahta musa Jesure noano wacû tuachu tuhona sã wahcheja. ⁸ Jesure musa noano wacû tuarire to yare musa cohãerarire tuhona noano yajeri sãaja sã. ⁹ Musare ã ni tuhotuna, Cohamacu to ñurocaroi sã tuaro wahcheja. ã wahchena Cohamacure “Noana”, nija sã. ¹⁰ Dacho cûhure, ñamipu cûhure Cohamacure sinija sã musare sã ñuhti cjihtire. Jesu yare musa noano masi pahñochu yoa duaja sã noano musa tirore wacû tua namohto sehe.

¹¹ Cohamacu mari Pucu to basi, mari puhtoro Jesu cûhu sãre ti yoadohochu cahmaja sã musa cahapu sã wahahto sehe. ¹² ã yoa mari puhtoro Jesu jipih-tina musa mehne macainare, jipih-tina paina cûhure cahĩ namochu yoajaro musare. Musare sã cahĩro seheta tuaro cahĩ namochu yoajaro musare. ¹³ Musare noano to yoadohochu, buhiri marieina, ñaa marieina jinahca musa, Cohamacu mari Pucu to ñuchu. Mari puhtoro Jesu jipih-tina to yaina buhiri marieina mehne ahri yahpapu tjua taro ã jiina jichu yoajaro musare.

“Cohamacure ji coachu yoa duana õ sehe yoaga”, ni yahuha Paulo

4 ¹ Mipure Jesu mari puhtoro to dutiro mehne musare õ sehe ni yahu batoaja: “Cohamacure ji coachu yoa duana õ sehe yoaga”, ni buhei

sã musare. Sã ã buheri baharo sã buheriro seheta yoayuhti musa. Musa ã yoiro seheta yoa namoga. Tíre tuaro yoa dutija musare.

² Jesu mari puhtoro to buhe dutiro mehne musare sã buherire noano masina musa. ³ Ahrire musare yahu namoihtja: Musa õ sehe jichu cahmana Cohamacu: Ñaare yoaeraina, Cohamacu yare yoina jiga. Æ jina numia mehne ñano yoaena tjiga. Musa cûhu numia mua mehne ñano yoaena tjiga. ⁴ Ñano yoapero marieno, ño payoro mehne musa namosãnumiare cjuaga. Cohamacu musa tíre masichu cahmana. ⁵ Cohamacure cahmaeraina Cohamacure masieraina ñaare goa pjaa, numia mehne ñano ti yoiro seheta yoaena tjiga musa cûhu. ⁶ Musa ã yochu cahmaerara Cohamacu to yairore musa coyeirore musa ñano yoaerahto sehe. Musa ã ñano yoana musa coyeirore yuhdurucana nica. Mari puhtoro Cohamacu tí ñaare ti yochu ñano buhiri dahrehtiro jinocanota nina. Æ jina tíre yahu tuhsui musare “Tí buhirire buhiri tiri”, nina. ⁷ Ñaare yoahtina cjihtire beserari jire marine Cohamacu. Ñaare yoaeraina cjihtire beseri jire marine. ⁸ Æ jina jipihtina musa ahri sã buherire yuhdurucana, masa ya buhea sehere yuhdurucana nierara musa. Cohamacu ya sehere yuhdurucana nina. Tiro musare Espíritu Santore wariro jira.

⁹⁻¹⁰ Musa coyeare Jesu yainare musa cahĩhtire Cohamacu musare buhe tuhsui jire. To ã buhechu potocãta Jesu yainare Macedonia macainare jipih-tinare noano cahĩna musa. Musa ã cahĩchu ñuna “Musa coyeare cahĩga”, ni buheraja musare. Tinare cahĩ tuhsura musa. Æ ni buhe namoerapanahta ahri sehere musare dutija. Mipure painare musa cahĩno seheta cahĩ namoga musa. ¹¹ Æ yoa musa basi cahma ñu tuhtiro marieno jiga musa. Painare soro ni durucena tjiga. Æ ñunocahga tinare. Æ jina musa ya dahraa sehere noano dahraga. Panoputa musare ã yoa dutii. ¹² Æta yoaga musa, paina musare ti ño payohto sehe, paina yare musa cariboerahto sehe.

Ahri yahpapure Jesu to tjua tahtore yahuha Paulo

¹³ Coyea, mipure yariarina cjirire yahuihtja musare: Jesure cahmaeraina Cohamacu cahapu wahasi. Æ jia tina mehne macaina ti yariachu ñua tuaro cahyara. Yariarina cjiri ti wahahtore quihõno noano musa masichu cahmaja sã, paina ti cahyariro seheta musa cahyaerahto sehe. ¹⁴ Jesu to yariari baharo masa mujari jire. “Ti potocãta jira”, nija mari. Æ niina jina ahri cûhure “Potocãta jira”, nija mari. Cohamacu sehe to yaina cjirire yariarina cjirire masa mujachu yoaro, baharopu Jesu mehne na tarohca. Tí cûhure “Potocãta jira”, nija mari.

¹⁵ Jesu to tjua tachu to yaina yariarina cjiri catiina pano masa muja muhtaahca. Mari puhtoro Cohamacu ya yahua tjira ahri. ¹⁶ Õ sehe jirohca Jesu to tjua tachu: Mari puhtoro to basi tuaro sañurucu muhtanohca. Æ jiro to anjoa puhtoro tuaro pisurohca. Æ to pisuchu Cohamacu to corneta bisiro coa tarohca. Ti ã yochu Jesu yaina yariarina cjiri masa muja muhtaahca. ¹⁷ Baharo catiinare, yariarina cjiri mehne Cohamacu manopu me yehsea cururipu mujachu yorohca. To ã yochu mari puhtoro Jesure piti bocanahca mari. Æ piti bocana jipihtia dachoripe mari puhtoro Jesu mehne jirucunahca mari. ¹⁸ Ahri yu yahurire musa mehne macainare yahuga. Æ ni yahuna wahchenahca musa jipihtina.

5 ¹Yü coyea, Jesu to tjua tahti dachore “Ahri dachoi tjua tarohca” ni, musare yahu joarocaró cahmaerara. ²Mipü müsa masino seheta to tjua tahti dachore marine masihtó basioerara. Yacaríro ñamipü wacüenoca to yacaró taró seheta ahri yahpapüre mari puhtoro wacüenoca tjua tarohca. Ahrire müsa basita noano masina. ³“Mipüre mari noano jinocaja. Cuaro mariahna marine”, masa ti ni wacüchü dóicāta ñano waharohca tinare. To ã wahachü tina duhti masisi. Niji wahcōricoro wacüenoca to puríno tuhoturo seheta wacüenoca ã waharohca masare. ⁴Yü coyea, müsa sehere ã wahasi. Yacaríro wuhü puróre to cuoríro seheta müsa sehere ã wahasi. Jesu taró musare cuosi. Nahitianoi jiina ti ñu masieraro seheta paina Jesure ne masierara. Müsa sehe tina yoaro sehe jierara. ⁵Müsa jipihtina Jesu yaina jira. Æ jina buhriaroi ti ñu masino seheta Jesu to tahtore masina müsa. Paina nahitianoi jiina seheta tirore masieraina yoaro sehe jieraja mari. ⁶Æ jina caríina yoaro sehe Cohamacure tuho nunueraina jiena tjijihna mari. Paina āta yoara. Tina yoaro sehe yoaena tjijihna mari. Caríeraina yoaro sehe quihōno yoina, noano wacü masiina jijihna mari. ⁷Caríina ñamipü caríina. Æ jia cahaina ñamipü cahara. ⁸Mari sehe buhriaroi jiina yoaro sehe Jesure masiina jina, noano wacü masiina jijihna. Æ yoa surara comaa suhtiro mehne to cutirore to sāa ducataríro seheta Cohamacure wacü tuaga müsa, watínore to ducatahto sehe. Æ yoana Cohamacure, paina cūhure cahíga. Müsa ã yoachuta Cohamacü musare ñu wihborohca. Æ jina musare pichacapu wahaborinare Jesu to yuhdohtore “Potocā tjira”, niga müsa. Müsa ã niina jichü surara to dapure comaa chapea mehne to pisa ducataríro seheta watíno musare to ñano yoa duachü Cohamacü tirore ducatarohca. ⁹To buhiri dahrehtinare marine beserari jire Cohamacü. Jesucristo mari puhtoro pichacapu wahaborinare to yuhdohtina cjihtire marine beseri jire tiro. ¹⁰Jesu mari ya cjihtireta yariari jire tiro mehne mari jihto sehe. Catiina, yariaina cūhü tiro mehnetā jiahca. Æ jina jipihtina tiro mehne jinahca mari to yaina jina. ¹¹Æ jina müsa mehne macainare mipü müsa wahchechü yoiaro seheta müsa basita wahchechü yoaga tjoa. Æ yoana müsa basita Cohamacure wacü tua namochü yoaga müsa mehne macainare.

Jesu yainare Paulo yahu batoaha

¹²Musare buheinare, Cohamacü dutiare musare yahuhtinare mari puhtoro buhe dutiro taró beseri jire. To ã ni beserinare noano ño payoga müsa. Müsa ã ño payochü cahmacü tuaro dutija musare. ¹³Ti dahraare ti yoachü tinare cahíā mehne noano ño payoga. Æ yoa müsa mehne macaina mehne cahmacheno marieno jiga.

¹⁴Musare sā coyeare, ahrire tuaro dutija: Dahra duaerainare dahra dutiga müsa. Cahyainare wahchechü yoaga müsa. Jesure wacü tuaera cureinare yoadohoga. Tina jipihtina mehne noano suaro marieno ji coaro jiga müsa.

¹⁵Cüiro musare to ñano yoachü ñuna tirore ñano yoa cahmaena tjiga. Æ jina müsa mehne macainare, jipihtina paina cūhure noano yoaga.

¹⁶Æ yoana dachoripe ã wahcherucuga müsa. ¹⁷Æ jina Cohamacure ã sinirucuga dachoripe. ¹⁸Müsa ñano yuhdupanahta Cohamacure wahche, “Noana”, niga. Müsa noano yuhduri pja cūhure “Noana”, niga tirore. Æ nina Cohamacü to cahmano seheta yoana nica müsa. Cristo Jesu yaina müsa jichü ñuno müsa ã nichü cahmana tiro.

¹⁹ Espíritu Santore yuhti duaeraina jiena tjiga. ²⁰ Espíritu Santo to masia mehne paina sehe musare buhera. Ti ä buhechu tí buheare cahmaeraina jiena tjiga. ²¹ Paina musare soro ti ni buhechu tí Cohamacu ya jierachu masiga musa. Ä jina Cohamacu ya buhea ti jichu cühure masiga musa. Ä masina noaa buhea dihtare cahmaga. ²² Ä yoana jipihtia ñaare cahmaena tjiga musa.

²³ Cohamacu marine noano jichu yoariro jira. Tiro to basi musare to yainare noaina ñaa marieina jichu yoa namojaro musare. Musa pjacuri cühure musa catia cühure noano ñu wihbojaro. Mari puhtoro Jesucristo ahri yahpapure to tjua tahto pano musare Cohamacu noano ñu wihbojaro ñaare musa yoerahto sehe. To ä yoachu Cristo to tachu ñaa marieina jinahca musa. ²⁴ Äta jichu yoarohca Cohamacu. Tiro musare beseriro to niriro seheta yoara.

Paulo cühü noa dutirocaha

²⁵ Sã ya cjihtire Cohamacure sini payoga musa, sã coyeyä.

²⁶ Musa mehne macainare noano mehne piti bocasiniga.

²⁷ Jipihtina Jesu yainare ahri tjure buhega musa. Jesu mari puhtoro to dutia mehne ahrire musare dutija yuhü.

²⁸ Jesucristo mari puhtoro to cahia mehne musare noano yoajaro.

2 Tesalonicenses

Paulo cūhu joarocaha Jesu yainare Tesalónica macainare

1 ¹Yuhu Paulo, Silvano, Timoteo cūhu ahrire musare joarocaja tjoa. Musa sehe Tesalónica macaina mari Pucu Cohamacu yaina jira. Mari puhtoro Jesucristo yaina cūhu jira musa. ²Ā jina Cohamacu mari Pucu, mari puhtoro Jesucristo mehne musare noa dutija. Cohamacu yoadohoa mehne noano jiga musa.

Ahri yahpapure Cristo tjua taro buhiri dahrerohca

³Cohamacure sinina Jesure musa wacū tuaare wacūna “Noabiara säre”, nirucuja sã Cohamacure. Sã ā nichu noa nina. Dachoripe Cohamacure musa noano wacū tua namona niyuhca. Ā yoana dachoripe musa mehne macainare cahĩ namona niyuhca musa. Ā jichu Cohamacure “Noabiara säre”, sã nichu noa nina. ⁴Paina musare ñano ti yoapachuta Jesure wacū tuarucuyuhca musa mipu cūhare. Ā yoa tirore wacū duhuerayuhca. Musa ā yochu ñana tíre musa yoirire paina Cohamacu yainare wahchea mehne yahuja sã. ⁵Ā wacū tuarucuna Cohamacu mari puhtoro yaina musa jiri buhiri ñano yuhduna niyuhca musa. Ā jiro puhtoro Cohamacu to suho jiropure waha dutira musare. To ā dutichu to quihõno yoiriro jichu masija mari.

⁶Ā yoa Cohamacu quihõno yoiriro jira. Ā jiro musare ñano yuhdachu yoina sehere ñano yuhdachu yorohca tiro. ⁷Ā yoro musa ñano yuhdurina cjiri jichu tiro musare noano jichu yorohca. Sã cūhare noano jichu yorohca. Mari puhtoro Jesu to yaina anjoa tuaina mehne, picha pohna mehne manopu bajuaro noano jichu yorohca marine, ñano yuhdurina cjirire. ⁸Ā yoa Cohamacure masierainare, mari puhtoro Jesu to buheare noaa buheare yuhdurucarinare Cohamacu buhiri dahrerohca. ⁹Cohamacu tinare õ sehe buhiri dahrerohca: Pichacapu tina ñano yuhdurucuahca. Ā jia tina tuariro mari puhtoro Jesu cahai ne ji masierara. Ā jia tua yuhduariro to jiare ñusi tina. ¹⁰Āta waharohca tí dachoi Jesu to tjua tahti dachoi. Tí dachoihta tiro tarohca noaina tirore wacū tuaina “Noariro, tuariro jira Jesu”, ni wahchea mehne ti ño payohto cjihtore. Musare sã buherire musa noano tuhore. (Ā jina musa cūhu tiro mehne jinahca.)

¹¹Ā jina Cohamacure ā sini payorucuja sã musa ya cjihtire. Ō sehe ni Cohamacure sini payoja sã: To cahmano seheta yoahtinare musare to cūriro seheta musa jihtina cjihtire sini payorucuja sã musare. Musa noaina ji duanata niyuhca. Ā jina Cohamacu to tuaa mehne noaina musa ji duariro seheta musa jihti cjihtire sini payorucuja sã. Musa Cohamacure wacū tuayuhca. Ā

wacū tuana to yare yoayuhca msa. Tíre msa noano yoa namohti cjihtire Cohamacure sini payorucuja sã msare. ¹²Ã yoana mari puhtoro Jesucristore painare ño payochu yoanahca msa. Msa ã yoachu Jesucristo yaina msa jichu ñua paina ño payoahca msare. Cohamacu to cahia mehne, mari puhtoro Jesucristo cūhu to cahia mehne ã waharohca.

Ñano yorucurirore yahuha Paulo

2 ¹Mipure mari puhtoro Jesucristo ahri yahpapure to tjua tahtore, tirore mari cahmachu mari piti bocahtore yahu namo duaja yuhu. Õ sehta tuaro yahu duaja msare, sã coyea: ²Paina msare ò sehe niboca: “Mari puhtoro to tjua tahti dacho, pihtiri dacho jiropu nina”, niboca msare. Ti ã nichu tuhona, tuho cuaena tjiga. Å yoa tuho wisiena tjiga. “Cohamacu yuhure ata niri jire”, niboca msare paio. Pairo cūhu msare buhero ata niboca. Pairo cūhu ata ni joarocaboca, “Yuhu Paulo tjija”, ni mahño joarocar. ³Paina msare ti ã mahñochu tuhoena tjiga msa. Tí dachoi ahri yahpa to pihtiho panocã payu masa Cohamacure duhuahca. Å jiro tí dachoi ñano yorucuriro pichacapu wahahtiro bajuarohca jipihtina ti ñuhtiro cjihtore. ⁴Tiro Cohamacu warore, paina bajueraina masa ti ño payoina cūhure jipih-tina masare ño payo dutisi ñano yorucuriro. Tiro ò sehe ni tuhuturohca. “Ahrina jipihtina bui puhtoro jija yuhu”, ni tuhuturohca. Å jiro Cohamacu wuhui dujiro “Yuhu sehe Cohamacu jija”, ninohca.

⁵Msa mehne jisinicu tíreta yahui. ¿Tíre wacūerajari msa? ⁶Mipure paio sehe ñano yorucurirore ne ji dutierasinina. Å yoa tirore ji dutierarirore masina msa. Tiro sehe to dutichu to quihōri dacho jichu ñano yorucuriro bajuarohca. ⁷Mipure masa ti ñuenoi tiro yoaro sehta paina ñaare yoa tuhsura. Ti ã yoa-pachuta ñaare yoa dutierariro to wahahto pano tiro ñano yorucuriro sehe jisi. ⁸To wahari baharo pinihtare ñano yorucurirota bajuarohca. Baharo mari puhtoro Jesucristo tirore yuhdurucarohca. Ahri yahpapu to si sitea mehne tjua taro, to dusero mehne putirocaro, tirore wajã boarohca. ⁹Ñano yorucuriro sehe watino tuaa mehne taro, payu bajuamehnerire, mahñoa bajuamehnerire yoa ñonohca. ¹⁰Payu ñaa to yoa ñoa mehne to ã mahñochu pichacapu wahah-tina sehe tirore tuhoahca. Tina sehe noaa buheare cahmaerare. Ti ã cahmae-rachu Cohamacu tinare pichacapu wahahtinare yuhdosi. Tina pinihta ñano yorucuriro mahñoriro to yoirare “Potocã tjira”, niahca. ¹¹Å jiro noaa buheare ti cahmaerari buhiri Cohamacu tinare wisiamehnenohca. Å wisiaa mahñoare cahmaahca tina. ¹²Å jiro jipihtina noaa buheare tuho duaerainare, ñaa dihtare yoa ji coinare tirota buhiri dahrerohca.

“Cohamacu msare beseha to yaina jichu yoaro taro”, ni yahuha Paulo

¹³Msa sã coyea, mari puhtoro Jesu to cahina jira msa. Dóiputa wah-manopureta msare pichacapu wahaborinare to yuhdohtina cjihtire Cohamacu beseri jire msare. Msare beseri jire Espiritu Santo to tuaa mehne to yaina ñaa marieina msare jichu yoaro taro. Å jiro noaa buheare “Potocã tjira”, nihtina msa jichu ñuno msare beseri jire. To ã beserina msa jichu ñuna Cohamacure wahche, “Noana”, nirucuja sã. ¹⁴Noa buheare msare sã buhechu Cohamacu msare beseri jire mari puhtoro Jesucristo to masa muja-riro sehta msa cūhu msa masa mujahto cjihtore.

¹⁵ Æ jina yu coyea, noano wacū tuaina jiga musa. Æ jina sā durucua mehne sā joarocaa pūri mehne musare sā buherire noano wacūga musa. Æ yoa tī buheare yuhdurucaena tjiga. ¹⁶ Mari puhtoro Jesucristo to basi, Cohamacu mari Pucu cūhu marine cahīa, jipihtia dachoripe marine wahchechu yoare. Marine cahīa marine pichacapū wahaborinare yuhdoahca. Æ jina Cohamacu to yuhdohtore noano masina wahcheja mari. ¹⁷ Jesucristo, mari Pucu mehne musare noano yoajaro pjīro musa wahchehto sehe. Æ yoa jipihtia noaare musa yoahto sehe, musa noano durucuhto sehe Cohamacure musare sini payoja.

“Sā ya cjihtire Cohamacure sini payoga”, ni joaha Paulo cūhu

3 ¹ Mipu sā coyea, sā ya cjihtire Cohamacure sini payoga mari puhtoro Jesu to buhea payu masare sā buhehto sehe. To buheare musa noano cah-mariro seheta paina cūhu tī buheare nō payoa mehne ti cahmahto sehe sini payoga musa Cohamacure. ² Cāinata Jesure wacū tuara. Paina sehe to yare tuho duaeraa, Jesure wacū tuarara. Æ jina naina masa sāre ti nāno yoa duachu Cohamacure sini payoga musa sāre to yoadohohto sehe. ³ Mari puhtoro Jesu to niriro seheta yoiriro jira. Æ jiro musare tirore wacū tuachu yoarohca. Æ yoa tuhsu, watino musare to nāno yoa dutichu tiro musare yoadohorohca. ⁴ Cohamacu musare to yoadohore masija sā. Æ jina musare sā dutiriro seheta musa yochu cūhure masija sā. Æ yoa āta yoarucunahca musa. Tī cūhure masija sā. ⁵ Cohamacu musare to cahīare musare masichu yoajaro. Æ jina Cristo yoaro sehe nāno yuhdūpanahta cūno pjaina jichu yoajaro musare mari puhtoro.

Marine tuaro dahraro cahmana

⁶ Jesucristo mari puhtoro to dutiro mehne ō sehe ni dutija musare: Jesu yainare dahra duaerainare, musare sā buheriro seheta yoaerainare, tinare piti tiena tjiga. Æ nūnocahga tinare. ⁷ Sohō jiri pja musa mehne sā jichu tuaro sā dahrachu nūre musa. Æ jina sā yoiriro seheta musa cūhure dahraro cahmana. Tīre noano masina musa. ⁸ Æ jina musa chuare wapa marieno chuerahi sā. Æ yoa dachopure, nāmipu cūhure tuaro dahrai sā “Musa chuare sā siniri”, nina. ⁹ Sā buheri wapa musare wapa cahmaboa sā. Æ wapa cahmaborina jipanahta wapa cahmaerana tuaro dahrai sā, musa sehe sāre musa nū cūhto sehe. ¹⁰ Musa mehne jina, ō sehe ni buhei musare: “Dahraeraina chuea tjijaro”, ni buhei sā musare. ¹¹ Cāina musa mehne macaina ne dahra duaerayuhca. Æ dahra duaeraa, painare ā yahu wajamacanoca, caribobiaro yoayuhca tina. ¹² Mari puhtoro Jesucristo to dutiro mehne ā dahra duaerainare ō sehe nija: Noano wahchea mehne dahrajaro tina ti noano jihto sehe, ti ya chuare ti chuhto sehe.

¹³ Sā coyea, musa sehe noare yoarucuna pumena tjiga. ¹⁴ Cāina tō macaina ahrire sā joarocarire yuhdurucaboca. Ti ā yochu ti yoirire noano nūga. Æ nūna tinare piti tiena tjiga ti buoro wahahto sehe. ¹⁵ Æ piti ti duhupanahta tinare nū tuhtiena tjiga. Tina musa coyea, Jesu yaina tjira. Ti ā jichu ti yuhdurucarire yahuga tinare tīre ti yoaerahto sehe.

Paulo tinare noa duti batoaha

¹⁶ Mari puhtoro Jesu marine noano jichu yoiriro mehne dachoripe noano jirucuga musa. Æ jicu “Mari puhtoro musa jipihtina mehne jirucujaro”, nicu musare noa dutija.

¹⁷Yuhũ Paulo, yũ wamomaca mehneta mipũre yũ basita joa batoai nija: Ñ joacũ musare noa dutija. Jipihĩa yũ joarocaa pũrine õ sehe dihta yũ wamomaca mehne joa batoaja yuhũ. Yũ õ sehe dihta yũ joa batoachũ ñũna yũ joarocari pũ to jichũ masinahca musa. ¹⁸Mari pũhtoro Jesucristo to cahĩa mehne noano yoajaro musare jipihĩtare.

1 Timoteo

Paulo Timoteore joarocaha

1 ¹⁻² Yuhu Paulo ahrire muhure Timoteore joarocaja. Cohamacu marine pichacapu wahaborinare yuhdoro jira. Jesucristo yare buhe dutiro to cūro jija yuhu. To Pucuro, to Macuno Jesu mehne ti dutiro seheta ti cūro jija yuhu. Jesuta marine yuhdora. Ā jina marine to yuhdohtore masina, tíre cohtaja mari. Muhure Timoteore Jesu yare buhei. Yu ā ni buhechu tuhocu Jesure wacū tua ducare muhu. Ā jicu muhu potocāta yu macu yoaro sehe jicuta nina. Cohamacu mari Pucu mehne, mari puhtoro Jesucristo mehne muhure noa dutija. Ā yoa muhure cahia, pja űua ti yoadohoa mehne noano jiga muhu.

Paulo mahñoa buheare buhe dutieraha

³ Sohō jiri pjare Macedonia yahpapu wahacu muhure Efesoi cū yuhdu wahcāi. Tói cāina ti ya buheare mahñoa buheare buheina jire. Tí buheare mu buhe dutierahiro cjihtore cūi yuhu muhure. ⁴ Tina ti mu suro ā buhe-macanocahna. Ā yoa ti coyca panopu macaina cjiri ti mu suro ti buherire ā buherucura. Tí buhea mehne paina mehne cahma sayorucura. Cohamacu marine to dutirire noano yochu yoerara tina ā buhea. Cohamacu ya sehere yoana tirore wacū tuaja. Ā jicu ti mu suro ti buherire buhe dutierahiro cjihtore cūi muhure.

⁵ Ā cūi muhure Jesu yaina painare ti cahihtu cjihtire. űaa buhiri mariea mehne, noaa wacūa mehne, potocā Cohamacure wacū tuaa mehne painare ti cahihtu cjihtire ā cūi muhure. ⁶ Cāina ahri noaa buheare cohā tuhsu paye buhea sehere cahmana tjoa. Ā ti cahmachu, tí buhea sehere ti cahma sayochu tó wahaerara. Tí buheare ti cahma sayoa yaba cjihti jierara. ⁷ Tina Cohamacu dutiare buheina ji duamana. Ā buhe duapahta tí buheare tina ti basi noano masierara. Tí buheare masiina yoaro sehe buhepahta tí buheare ne masierara tina.

⁸ Cohamacu dutiare Moise cjiro marine to cūri cjiirire quihōno mari buhechu noaa dutia jira. Tíre mari noano masija. ⁹⁻¹⁰ Tí dutiare buhena ahrire masino cahmana: Tí dutia noaare yoainare ti buhehti cjihti jierara. Ahriina sehere ti buhehti cjihti jira. Puhtoare cohā duainare, dutiare yuhdurucainare, űaa dihtare yoainare, űano buhiri tiinare, Cohamacure űo payoerainare, Cohamacu yare cahmaerainare, ti pucūsumare wajāinare, ti pocosānumia cūhure wajāinare, paina masare wajāinare, numia mehne űano yoainare, muu mehne űano yoaa numiare, cahma numia mehne ti űano yoariro seheta

mua sahsero o numia sahsero jipahta ti pjacuri mehne ñano yoinare, masa pohinare paina cūhure duhti yacainare, mahñoinare, painare mahñoa mehne yahusāinare Cohamacu dutia Moise cjiro marine to cūri cjiro sehe tinare buhehti cjihti jira. Ñ yoa paina jipihtinare noaa buheare yuhdurucainare buhehti cjihti jira Cohamacu to dutia. ¹¹Tí buhea noaa buhea sehe noariro Cohamacu to ya buheata jira. Tí buhea sehere yuhure Cohamacu buhe dutire.

Cohamacu Paulore to pja ñuare yahuha tiro

¹²Ñ yu buhechu Jesucristo mari puhtoro yuhure tuaare waro yuhure yoadohora. “Paulo noano buherohca yu yare”, ni tuhuture Jesu yuhure. Ñ jiro yuhure besero tirore yoadohohtiro cjihtore cūre yuhure. To ñ yoachū “Noana”, nija yuhu tirore. ¹³Tó panopure Cristore yu ñano durucupachuta, to yainare ñano yu yoapachuta, tiro yuhure beseri jire. Tirore masierasinicu tirore ñano yocu “Ñano yoi nica yuhu”, ni tuhoturacuru. Yu ñ masierasinicu ñuno tiro pja ñure yuhure. ¹⁴Ñ pja ñuno, Cohamacu mari puhtoro yuhure tuaro cahño, noano yoare yuhure. Ñ yoa Cristo Jesure wacū tuachu yoare yuhure tiro. Ñ yoaro painare cahichu yoare yuhure Cohamacu.

¹⁵Yuhu sehe paina yuhdoro ñaa yuhduariro jimai. Naina mari jipachuta Jesucristo ahri yahpapi tari jire ñainare pichacapi wahaborinare yuhdoh-tiro cjihto. Tí potocā tjira. To ñ jiriro jichu jipihtina tíre masijaro. ¹⁶Ñaa yuhduariro yu jipachuta tiro yuhure pja ñure. Ñ pja ñuno Jesucristo suaro marieno yuhure to noano yoirere masichu yoaro nire painare baharo tirore wacū tuahtinare masichu yoaro taro. Ñ wacū tuahtina manopu ñ jirucuahca. ¹⁷Cohamacu jipihtia dachoripe masa bui puhtoro jira. Tiro ne yariaerara. Mari mehne to jipachuta tirore ñueraja mari. Tiro dihta Cohamacu waro jira. “Potocāta noariro, tuariro jira tiro”, nijihna tirore. Jipihtia dachoripe tirore ño payojihna. Ñta yoajihna.

¹⁸Timoteo, yu macu yoaro sehe jira muhu. Ñ jicu mipure ahrire muhure dutija: Mari coyea Jesu yaina Cohamacu yare yahu muhtaina baharo mu yoahdire ti ni muhtariro sehetu muhure dutija. Cristo yare noano yahurucuga. Ñ yoa ñano yuhdupaihta tirore wacū tua duhui tjiga muhu. Tuhsu, to yare quihōno buherainare poto yahuga duhuro marieno. ¹⁹Jesure ñ wacū tuarucuga. Ñaa buhiri marieriro jiga. Noaa dihtare yoaga. Cāina tíre yoeraa Jesu yare cohāna. Ñ cohāa tirore wacū tua duhure. ²⁰Ñta yoare Himeneo, Alejandro mehne. “Watino to cahmano sehetu yoawahnojaro musare”, ni cūi tinare, ñano Cohamacure ti durucu namoerahto sehe.

Cohamacure sini payoare yahuha Paulo

2 ¹Mipure ñ sehe ni dutija musare. Ahri wiho waro jierara: Jipihtina ya cjihtire Cohamacure sini payoga. Ñ sini payona “Noana. Wahcheja”, niga Cohamacure. ²Puhtoa, paina masa bui dutiina cūhu ti ya cjihti cūhure Cohamacure sini payoga, cahmacheno marieno Cohamacure ño payoina mari noano jihto cjihtore. Ñ sini payona mari Cohamacu cahmaare, quihōno yoina noano ji masija. ³⁻⁴Tó sehe paina ya cjihtire mari sini payochu noa nina. Tíre mari yoachū ñuno Cohamacu marine yuhdoh-tiro sehe marine noano ñu jicoara. Jipihtina pichacapi wahaborinare to yuhdoina jichu cahmana Cohamacu. Ñ yoa noaa buheare ti masichu cahmana tiro. Ñ jiro

paina ya cjihtire mari sini payochu wahchera tiro. ⁵Cüirota jira Cohamacu. Á yoa Cohamacure mari ñu tuhtichu Cohamacu cühu marine to ñu tuhtichu bosariro cüirota jira. Tiro masunota jiro, Jesucristota jira. ⁶Wapamonore waparo seheta jipihtina ti ñaa yoari buhirire yariari jire tiro. Cohamacu to quihöri pjai tíre masare masichu yoari jire. ⁷Tíre yahuhtiro cjihtore, Jesu to cühtiro cjihtore tiro yuhure beseri jire. Judio masa jierainare Jesure wacü tuaare, noaa buheare buhehtiro cjihtore beseri jire yuhure. Potocáta masare yahui nija yuhu. Mahñoeraja.

⁸Cohamacu yare noano yoina jipihtiro macaina sehe Cohamacure ti sinichu cahmaja. Á yoa tina suaro marieno, cahma sayoro marieno tiro mehne ti durucuchu cahmaja. ⁹Á yoa, numia sehere carera numia yoaro seheta ti suhti tiina jichu cahmaja. Á jia soro bajua pjoari ti pjoarire yoaea tjijaro. Uru dari busaa darire perla yapari dari cühure busaea tjijaro tí numia painare “Goa pjachu yoari”, nia. Á yoa wapa bajua suhtire sáaea tjijaro tina Jesu ya numia. Painare goa pjachu yoaa numia jiea tjijaro. ¹⁰Á yoa tí numia noaa sehere yojaro. Áta yoaro cahmana “Cohamacu ya numia jija”, nia numiare. ¹¹Dihta marieno ño payoa mehne buheare tuhojaro tí numia. ¹²⁻¹⁴Á jia numia muare buhea tjijaro. Á yoa muare dutiea tjijaro. Tí numia sehe dihta mariea numia jijaro. Adãore Cohamacu bajuamehne muhtari jire. To baharo Evare bajuamehneri jire. Á yoa watíno to mahñochu tuhoriro Adão jierari jire. To mahñochu tuhoricoro sehe Eva jiri jire. Á to mahñochu tuhoro, Cohamacure yuhdurucaricoro wahari jire ticoro. Á jia numia sehe muare dutiea tjijaro. ¹⁵Numino ji muhtaricoro to yuhdurucapachuta numia ti pohna tichu ñuno tinare Cohamacu yoadohorohca. Tí numia pohna tia numia sehe Cohamacure ti wacü tuarucuchu tiro yoadohorohca tinare. Á yoa masare, Cohamacu cühure ti cahirucuchu, noaa numia ti jirucuchu, quihõno yoaa numia ti jichu Cohamacu tinare yoadohorohca.

Jesu yaina puhtoa ti yoahtire yahuha Paulo

3 ¹Masa Jesu yaina puhtoa ji duaa, noare yoa duaa nica tina. Tí poto-cáta jira. ²Jesu yaina puhtoare besecu õ sehe jiinare besega: Buhiri marieinare besega “Paina tinare ñano ni yahusári”, nicu. Á yoa cáa numiata namo tiinare, noano tuho masiinare, quihõno yoinare, paina ti ño payoina, masare wahchea mehne ti wuhure sãa ta dutiinare, painare noano buhe mihniinare besega muhu. ³Á besecu cahaerainare, cahmacherainare, masare noano yoinare, cahma sayoerainare, niñerure cahierainare besega muhu. ⁴Á yoa mu beseina ti ya wuhu macainare noano yahuina, ti pohrare noano ño payoa mehne yuhtichu yoina, noano yahuina jijaro. ⁵Tinare yuhtichu yoa masieraa, noano yahu masieraa, Jesu yaina cühure noano yahu, yuhtichu yoa masieraboca tina. ⁶Jesu yaina puhtoa ji duaina Jesu yaina wahma sãaina jia, tina puhtoa ji masierara. Wahma sãainare Jesu yaina puhtoa masa cüchu tina “Noa yuhduaina jija”, ni tuhotuboca. Ti ã ni tuhotuchu Cohamacu tinare buhiri dahre dutirohca watínore to yoiri sehta. Watíno cühu áta ni tuhotua timaha Cohamacure yuhduruca duaro. ⁷Á yoa puhtoa ji duaina Jesu yaina jieraina ti ño payoina jiro cahmana tinare. Noano yoina ti jichu ñaa paina ño payoahca tinare. Á jia masa tinare ñano quiti dahresi. Á jiro watíno tinare dojomehne masisi.

Jesu yainare yoadohoina ti yoahhire yahuha Paulo

⁸ Ñ yoa Jesu yainare yoadohohtina sehere besecu ñ sehe jiinare besega: Tina masa ti ño payoinare, noano potocāta durucuinare, cahaerainare, niñe-rure cahierainare, mahñoa mehne wapata duaerainare, ⁹ Cohamacu to yahuri buhea to nino sehetā yoainare, ñaa buhiri marieinare besega muhu. ¹⁰ Tinare mu besehto pano Jesu yainare yoadohoina ji duainare ti yohire ñuga muhu. Tinare mu ñ ñuri baharo tina sehe ñaa buhiri marieina, ñaare yoeraina jia, Jesu yainare yoadohoina sājaro tina. ¹¹ Ñ yoa ti namosānumia ñ sehe ti jichu cahmaja mari. Masa ti ño payoa numia, masa noaa numia, ñano quitī dahrera numia, tuho masia numia, jipihtiare noaare yoharucua numia ti jichu cahmaja mari. ¹² Jesu yainare yoadohohtinare besecu cāa numiata namo tiinare, ti pohinare paina ti wuhu macaina cūhure noano yuhtichu yoainare besega. ¹³ Ñ jia mu beseina Jesu yainare ti yoadohochu paina tinare noano ñu ji coahca. Ñ jia tina yoadohoina sehe noaa buheare, Jesucristore ti wacū tuaa cūhure cuiro marieno buheahca tina.

Cohamacu ya buheare yahuha Paulo

¹⁴⁻¹⁵ Mipure mu cahapu waha duai nimaja. Ñ waha duapaihta mipure wahaerasinicu ahri pūi yahu, muhure joarocai nija. Jesu yaina cahmachuina watoi musa dohse yoahhire muhure yahu joarocai nija, “Michapucaca yuhu wahaerasiniboca”, nicu. Jesu yaina Cohamacu catiriyo yaina jira. To yaina potocā jia buheare Cohamacu ya buheare cjuara. Ñ cjuaa, tíre buherucura. ¹⁶ Ahri potocā tjira. Marine Cohamacu to buheri cjiri, panopu mari noano masierari cjiri noa yuhdua buhea jira. Ahri buhea ñ sehe jira:

Tiro Cristo mari pjacu sehetā pjacu tiriyo masa bajuari jire.

Noariyo, ñaa marieriro to jichu ñore Espíritu Santo sehe.

Anjoa cūhu tirore ñuri jire.

Ñ yoa buhe duti to cūrīna paye yahpari macainare to yare buhei sã.

Ñ jia ahri yahpai masa payu tirore wacū tuare.

Baharo muanopu Cohamacu naahre tirore.

Tí jira noaa buhea.

Noa buheare cohārīna cjirire yahuha Paulo Timoteore

4 ¹ Espíritu Santo ahrire noano yahura: Pihitiri dacho panocā cāina masa Jesu ya buheare cohāahca. Ñ cohāa mahñoa buheare watia ya buhea sehere tuho nuuahca tina. ² Tí buheare mahñorucuina yahuahca masare. Tina mahñorucuina sehe “Ñaa buhiri mariaha sãre”, ni tuhotuina jira. Ñ jia tina ti ñaa yoaare ne tuhotuerara. ³ Ñ sehe ni buheahca tina: “Namo tienā tjiga. Ahri chuare chuena tjiga”, ni buheahca tina. Ti ñ chu dutierapachuta Cohamacu chuare bajuamehnenno mari chuhti cjihtire noaare cūri jire tiro. Mari Cristore wacū tuaina jichu noaa buheare mari masiina jichu, mari ya cjihtire tí chuare bajuamehnea tiri jire tiro. Tí chuare cjuana tirore “Noana”, mari nichu cahmana tiro. ⁴ Jipihtia Cohamacu to bajuamehneri cjiri noaa jira. Ñ jina to bajuamehneri chuare nana, Cohamacure “Noana” nina, tíre marine cohāeraro cahmana. Tíre marine chu ji coaro cahmana. Ñ jicu paina ti chu dutierachu tuhocu tjiga tinare. ⁵ To bajuamehnea noaa ti jichu yahu tuhsua

tiri jire Cohamacu. Ñ jia tirore “Noana”, mari ni wahcheri baharo tí chua to yoari chua noaa waro jia nina.

Jesucristore dahra cohtaritore noarirore yahuha Paulo Timoteore

⁶ Ahri yu yahurire Jesu yainare mari coyeare buhecu Jesucristore dahra cohtariro noariro jira muhu. Ñ buhecu noaa buheare, quihōno mu tuhori cjiire muhure ti yahuriro seheta noano mu masiire yahuriro jiihca muhu. ⁷ Ñ jicu ti mu suro ti buherire, Cohamacu ya jieraare tuhoi tjiga. Cohamacu cahmaa sehere yoaporiro jiga muhu. ⁸ Mu murocapochu noa curera. Mu murocaporiro yuhdoro Cohamacu cahmaare mu yoapochu noa yuhduara muhure. Cohamacu cahmaare yoapocu mipure noano jiihca muhu. Mu yariari baharopu cūhure masa mujacu noano jiihca muhu. ⁹ Tí potocāta jira. Jipihtina tíre yu nirire masinare “Potocāta jira”, nino cahmana tinare. ¹⁰ Jipihtina tíre ti nihti cjihtire Cohamacu cahmaare ti yoahiti cjihtire mari tuaro dahraja. Ñ jina ñano yuhduja mari, paina marine ñano ti yoachu. Cohamacu catiriro, jipihtinare pichacapu wahaborinare yuhdoriro jira. Tirore wacu tuaina pinihtare tiro yuhdorohca. Ñ jina to yuhdohto cjihtore masina, cohtaja mari.

¹¹ Ahri jipihtia yu nirire dutiga Jesu yainare. Ñ yoa tíre buhega muhu. ¹² Wahmuno mu jichu ñua paina Jesu yaina muhure yuhduraca duaboca. Ti ñ yoerahto sehe ñ sehe yoa ñoga tinare. Masare cahiga. Ñ yoa Jesure wacu tuarucu, buhiri marieriro jiga. Wahmuno jipaihta mu ñ yoachu ñua muhure yuhduracasi tina. Ñ jia mu durucurire tuhoa, mu yoirire ñua muhure ñu cūahca. ¹³ Ñ jicu mu cahapu yu suhto pano Jesu yainare Cohamacu yare ti joari püre buhe tuhsu, musa cahmachupe tahari tinare ñ yahurucuga. ¹⁴ Jesu yaina mehne macaina puhto Cohamacu yare yahu tuhsu mu bui ti wamomacarine duhu payore. Ti ñ duhu payochu Cohamacu ya cjihtire mu yoa masihto sehe cūre muhure Cohamacu. To ñ cūrire boecu tjiga. Ñ yoa tíre ñ yoarucuga.

¹⁵ Ahri dutiare tuaro cahmaga. Ñ cahmacu ahri dutiare ñ yoarucuga muhu. Mu ñ yoari baharo noaare mu yoa namochu jipihtina ñuahca. ¹⁶ Muhu sehe noano yoaga, “Soro yoari”, nicu. Ñ yoa noano buhega muhu, “Soro buheri”, nicu. Ñ jicu mu basita pichacapu wahaboriro yuhdoriro jiihca. Ñ jia muhure tuhoriga cūhu pichacapu wahaborina yuhdurina jiahca.

“Paina Jesu yainare ñ sehe yoaga muhu”, niha Paulo Timoteore

5 ¹ Ne bucurore tuhtiecu tjiga. Mu pucure mu noano yoiriro seheta bucuro cūhure noano mehne yahuga. Ñ yoa mu bahanare mu noano yoiriro seheta wahma yapia cūhure noano ño payoro mehne tinare yahuga. ² Ñ yoacu mu pocore mu noano yoiriro seheta bucu numia cūhure noano ño payoa mehne yahuga. Mu bahana numiare mu noano ño payoriro seheta nuhmia cūhure ñano goa pjaro marieno, noano ño payoa mehne yahuga tina numiare.

³ Ñ jicu wapewahyaa numiare potocāta pjacnoa numiare ño payoa mehne yoadohoga tí numiare. ⁴ Wapewahyoro pohna tiricoro to jichu, o panamana tiricoro to jichu cūhure tina sehe ticorore yoadohojaro. Ñ yoadohoa Cohamacu masare ti coyeare to yoa dutirire yoaa nina tina. Ñ yoaa tina ticorore ti wapamonore wapaa nica ticoro to bucurore wapa. Ti ñ yoachu ñuno

Cohamacu noano wahchera. ⁵Pjacuoricoro, wapewahyoro coyea marienico jiro, Cohamacu tiorore to yoadohohto cjihtore cohtara ticoro. ã jiro ñaminipe, dachoripe ticoro Cohamacu mehne ã durucurucura. ⁶Pacoro sehe wapewahyoro ã yoamacanocaricoro carericoro jiro, ticoro catiricoro jiparota pichacapu butihticoro ji tuhsura. ⁷Ahri jipihtia yu yahurire Jesu yaina cûhure yoa dutiga muhu, noa dihtare ti yoahti cjihtire. Ti ã yoachu ñua paina tinare “Nano yoa nina”, ni masierara. ⁸Cûiro to coyeare ñu wihboeraro, to pohna, ti pocoro cûhure noano ñu wihboeraro “Jesu yairo jija”, ni masierara. ã jiro Jesure cahmaeraina yûhdoro ña yûhduariro jira tiro.

⁹Wapewahyaa numiare yoadohonahca musa. Õ sehe besega musa yoadohohti numiare. Ti wamare joa õhti pûi joai tai õ sehe besega tí numiare: Sesenta cuhmari sueraricorore to wamare joa õi tjiga. Tuhsu, tó pano puaro cjirore manu tiricoro wape wahyoro to wamare joa õi tjiga. Cûirota manu tiricoro wapewahyoro wamare joa õga. ¹⁰Tí numiare, “Noaare yoa numia jira”, masa ti nia numiare, ti pohmare noano bucua numiare besega. ã yoa tuhsu, ti wuhusei painare noano sãa ta dutia numiare, dahra cohtaina yoaro sehe Jesu yainare yoadohoa numiare, ñano yûhduinare yoadohoa numiare, noa dihtare yoa numiare besega. Tí numiare musa yoadohohti numiare bese tuhsucu, ti wamare joa õga muhu.

¹¹Wiho mejeta wapewahya numia nuhmia curero ti jichu tí numia sehere besei tjiga. ã jicu tí pûi ti wamare joa õi tjiga. Baharo tina muare goa pja, Cristore cohã, pari turi manu tiboca. ¹²Tina Cristore “Pari turi manu tisi sã. Mu yainare yoadohonahtja”, niri numia jipahta baharopure ti niriro seheta yoaeraboca tí numia. Ti ã yoaerari buhiri buhiri tiaha. ¹³Tí numia õ sehe yoa numia jira: Dahraera numia jipora. ã jia paina ya wuhusepu waharucu, ñaa quitidahre, tí numiare mari sinituerapachuta ti mu saro mari jia tiare ã yahurucura. Tuhsu, ti yahu dutierari cjirire yahura tí numia. ¹⁴ã jicu ti õ sehe yoachu cahmaja yûhu: Wapewahya numia nuhmia curero jia numia manu tijaro. ã manu tia, pohna tijaro. Ti ya wuhu macainare noano ñu wihbojaro. Mari ya numia wapewahyaa numia ti ã yoachu marine ñu tuhtiina marine “Ñaaare yoa nina”, ni tuhti masierara. ¹⁵Mipu pinihtare cãa numia wapewahya numia Cristo yare duhu, watino cahmaa sehere yoa tuhsura. ã jicu ã ni yahuja muhure.

¹⁶Jesu yaina ti coyeacoro wapewahyoro to jichu tina to coyea tiorore yoadohojaro. Paina Jesu yaina sehe tiorore yoadohoea tjijaro. ã jia tina paina Jesu yaina tiorore coyea cjuaricorore yoadohoeraa, paye numia wapewahya numia coyea mariea numia sehere yoadoho masina.

¹⁷Jesu yaina puhtoa musare ti noano buhechu ti dahraare ti noano yoachu ñuna ji coaro mehne ñuga tinare. ã yoa noano wapaga tinare. Cãina tina mehne macaina Cohamacu yare yahuina, musare buheina cûhu jira. Tina pinihtare paina yûhdoro ji coaro mehne ñuga. ¹⁸Cohamacu yare ti joari pûi õ sehe nina, dahrariorore ti wapahtore yahuro: “Wachu trigo yaparire to dahpori mehne suhti weriorore to chu duachu to duserore ducataena tjiga”, ni joa tiri jire. ã yoa pa pûi õ sehe nina: “Dahrariorore to dahrari wapare waro cahmana”, nina Cohamacu yare ti joari pûi. (To ã nichu tûhona Jesu yaina puhtoare ji coaro mehne ñu, noano wapaga tinare.)

¹⁹Jesu yaina puhtorore to ñano yoachu ñuno cûirota paina Jesu yaina cahmachuinare yahusã masierara. Puhtoro to ñaare yahusãhtina tiaro jia, tiore

yahusā masina. Tiaro mariachu puaro yahusā masina. ²⁰ Ā yoa ñaare yoa-rucuritore jipihtina musa watoi to jichu tirore tuhtiga, cuia, paina ñaare ti yoaerahto cjihtore. ²¹ Ā jicu Cohamacu, Jesucristo, to beserina anjoa cūhu ti ñurocaroi ahrire dutija mūhure: Mipū mūhure yū dutiri cjiire yoa pahñoga. Ā yoiri jicu jipihtinare Jesu yainare cāno potori yoaga. Pairore soro, pairore soro yoi tjiga. ²² Painare Cohamacu dahraare mū cūhti cjihtire ti bui mū wamomacarine mū duhu payohto pano soaro marieno noano tuhotu pahño, tinare besega. Tina ñaina jiboca. Ā jiinare Cohamacu dahraare cūi tjiga. Ā cūcu mūhu cūhu mū beseina ti ñaare yoro seheta yoi nica. Tó sehe yoi tjiga. Ā yoa ñaa marieriro jiga mūhu.

²³ Suroca pjaro cariro jira mūhu. Mipure co dihtare sihnimana mūhu. Ā jicu mahanocā vino cūhure sihniga mūhu. Co jira tí.

²⁴ Cāina ti ñaare yoachu mari ñuja. Ā jina Cohamacu tinare to buhiri dahrehtore masija mari. Paina sehere ti ñaa yoiri mari masieraja. Ti ñaa yoiri baharo masinahca. ²⁵ Tó seheta cāina noaare ti yoachu tíre mari masija. Paye ti noaa ti yoaerare mari masierapanahca baharo masinahca mari. Tíre nuohto basierara.

6 ¹ Dahra cohtaina Jesu yaina sehe ti puhtoare noano ño payojaro. Ti ā ño payochu ñua paina Cohamacure, mari buhea cūhure ne ni dojomehne masierara. ² Ti puhtoa Jesu yaina ti jichu ñua tinare dahra cohtaina sehe Jesu yaina jia, tinare ñupoa ño payoeraboca. Ā yoaeraro cahmana. Ti puhtoa Jesu yaina ti jichu pinihtare tinare dahra cohtaina noano ño payojaro tinare. Ā ño payoa dahra cohtaina sehe Jesu yainare, ti cahñinare ti coyeare yoadohoa nina. Ti puhtoare Jesu yainare dahra cohtaina jia, Jesure cahmaerainare ti ño payoriro yuhdoro Jesu yaina sehere ño payojaro puhtoa ti cahñina ti jichu. Ahri yū yahurire buhega. Ā jicu ahrire dutiga.

Cohamacure ño payoa cūhure noano jia cūhure yahuha Paulo

³ Soro jia buheare buheriro mari puhtoro Jesucristo ya buheare noaa buheare “Potocā tjira”, ni tuho duaerara. Ā tuho duaeraro, mari ya buheare Cohamacure ño payoa buheare cahmaerara. ⁴ Ā jiro tiro “Masí pahñoriro jija”, niparota tíre ne masierara. Ā masieraro, tuho masierariro yoro seheta tuaro cahma sayo duara tiro. Ā yoa Cohamacu yare ā nimacanoca sayorucuriro tjira. Masa tiro yoro sehe jiina cahma sayoa, paina ti noano wahachu ñu tuhtia, cahma ñu duaeraa, noano mehne jierara. Tuhsu, painare ñano quití dahre, masierapahta masare ñano ni tuhotura tina. ⁵ Tina ñaa dihtare tuhotuina, potocā jiare ne masieraina ā cahma sayorucuina jira. Ā yoa “Cohamacu yare buhena niñerure wapatanahca mari”, ni tuhotura tina. ⁶ Mari ya mahanocā mari cjuua mehne wahchena, Cohamacure ño payona, to cahmano seheta yoana, potocāta noano jina nija. ⁷ Ahri yahpapore masa bajuana ne paye barore na taerahi mari. Ā yoa mari yariari baharo wahana ne paye barore naa masieraja mari. ⁸ Ā jina mari chuare mari suhti cūhure cjuana payere cahma namoena tjijihna. Mari cjuaro purota wahchejihna mari. ⁹ Pache pua ji duainare watino ñaare to yoa dutichu tina sehe jiape ñaare yorucuina jiboca. Ā yoaa tina payu tahari tuho masieraina seheta paye barore tuaro cahmaa, ñaa yoaare duhueraa, ti basita ñano yuhdura. Ā duhueraa pichacapu wahaahca tina. ¹⁰ Niñerure tuaro cahmaa, jiape ñaare yoa ducara

masa. Căina niñerure cahĩa, tuaro cahmaa, Jesure wacũ tua duhua, payũ tahari ñano yũhdũra tina.

Cohamacũ yare yoana ñaare duhuga

¹¹Mũhũ pini Cohamacũ yairota jira. ã jicũ ahri ñaare yoai tjiga. Noaa sehere cahmaga. Cohamacũ yare yoaga. ã yoacũ Jesure wacũ tuaga. Painare cahĩa. Nano yũhdũpaihta cũno pjaga. ã yoa painare noano dero yoaga. ¹²Surara cahmachero tuaro to yoiro sehetã, mũhũ cũhũ Cohamacũre wacũ tuacũ to yare tuaro yoaga. Mũanopũ ã jirucuhtiro cjihtore Cohamacũ beseri jire mũhũre. ã jicũ Cohamacũre mũ wacũ tuaare payũ masare noano yahuhre mũhũ. ã jicũ ñano yũhdũpaihta tirore wacũ tua duhui tjiga. Mũanopũ ã jirucuhtiro jiga. ¹³Cohamacũ jipihtinare, jipihtiare jichũ yoiro jira. Jesucristo sehe Poncio Pilato Cohamacũ yare noano yahuriro jira. ã jicũ tina Cohamacũ, Jesucristo cũhũ ti ñurocaroi ahrire mũhũre yoa dutiitjã: ¹⁴Mũhũre Cohamacũ to dutirire yoa pahñonocahga. Jesucristo to tjua tahto pano masa mũhũre ñaare ti ne yahusãerahto cjihtore to dutirireta yoiarucuga. ¹⁵To quiñiroihta Cohamacũ Cristore tjua tachũ yoirohca. Cohamacũ noiariro, tiro dihta masare dutiriro jira. ã jiro jipihtina paina puhtoã ti bui puhtoro jiriro jira tiro. ¹⁶Tiro dihta ne yariaerariro jira. To si sitea mehne jiriro jira. To si sitea cahapũ waha masierara masa. ã yoa tirore masa ne ñuerare. Mipũ cũhũre tirore ñuerara. Tiro sehere ño payojihna. ã jina “Jipihtia dachoripe tuariro jira tiro”, nijihna tirore. ãta yoijihna.

¹⁷Ahri yahpa macaina pache puare õ sehe ni dutiga mũhũ: “Painare yũhdũrũcaja”, ni ti basi tuhotuea tjijaro tina. Ti pache ti cjuua pihtia wahaahca. ã jia ti cjuua dihtare wahchea tjijaro. Cohamacũ sehere tuaro wahchejaro. Jipihtia pototi mari cahmaare wariro jira tiro. Tiro sehere wacũ tuajaro tina pache puã. ¹⁸ã jia tina noaa sehere yoiaro pjĩro noaare yoiaina ti jihto sehe. ã yoa ti cjuuare waina jijaro. ¹⁹Ti ã yochũ mũanopũ Cohamacũ cahai ti ya jiahca. Ti ya tũpũ jia, ne butisi. ã jia tũpũ ã jirucuahca tina.

Paulo Timoteore duti batoaha

²⁰Timoteo, mũhũre Cohamacũ to cũrire to buhe dutirire noano yoiãohbũ. Boi ninohbũ mũhũ. Căina masa Cohamacũre cahmaeraina yoiro sehetã mahñoare, tuho masieraina ya buheare durucurucura. ã durucua “Noano masiina ya buhea jira”, nimana tina. ã ti ni durucua tuho nũnũi tjiga. ²¹Căina tí durucua tuho nũnũina Cristo yare cohãnocare. Cohamacũ to cahĩa mehne mũsare noano yoiaro.

2 Timoteo

Paulo Timoteore pari turi joarocaha

1 ¹Yuhu Paulo, ahrire muhare Timoteore joarocaja tjoa. “Jipihina Jesucristore wacū tuaina manopu ā jirucuahca” ni, cūre marine Cohamacu marine yuhdachu yoariro. To ā ni cūrire yahuhtiro cjihtore yuhare bese cūre Jesu. Ā cūno Cohamacu to cahmano seheta yoaro nire yuhare. ²Muhu Timoteo yu cahīro jira. Muhare Jesu yare yu buhechu tuhocu tirore noano wacū tua ducare muhu. Ā jicu yu macu yoaro sehe jira muhu. Ā jicu Cohamacu mari Pucu, mari puhtoro Jesucristo mehne muhare noa dutija. Ā yoa muhare pja űua, cahīa tina ti yoadohoa mehne noano jiga muhu.

Masare Cristo yare ti yahurire yahuha Paulo

³Ņamipu dachopu cūhare Cohamacu mehne durucucu mu ya cjihtire sini payocu muhu mehne wahcheja. Ā wahchecu Cohamacure “Noana”, nija yuhu. Panopu macaina yu coyea Cohamacu yare ti yoariro seheta yuhu cūhu “Buhiri tija”, ni tuhuturo marieno mipure to yare yoaja. ⁴Sohō jiri pjare yu wahachu mu tii nunu tirire wacūcu muhare tuaro űu duaja muhu mehne noano wahche duacu. ⁵Ā jicu Jesure potocāta mu wacū tuarire wacūja yuhu. Mu űuchocoro Loida, mu poco Eunice cūhu Jesure wacū tua muhtare mu pano. Ā yoa mipure muhu cūhu tirore mu wacū tuachu noano masija yuhu.

⁶Ā jicu ahrire muhare wacūchu yoa duaja. Mu bui yu wamomacarine yu duhu payochu Cohamacu yare mu yohti cjihtire tuaare ware muhare. Tí tuaa mehne yoa namoga muhu. ⁷Cohamacu marine Espiritu Santore wari jire. Ā jiro masare marine cuierachu yoara Espiritu Santo. Ā yoaro tuaina, masare cahīina, tuho masiina marine jichu yoara tiro. ⁸Ā jicu mari puhtoro ya cjihtire painare yahucu, buo tiecu tjiga muhu. Yuhu to yare yu yoari buhiri peresui jiro jija. Peresui yu jichu yuhare buo tisāi tjiga muhu. Wiho mejeta noa buheare mu buheri buhiri űano yuhducu “Noanohca”, niga muhu cūhu. Mu ā űano yuhdachu Cohamacu muhare yoadohorohca. ⁹Cohamacu sehe marine pichacapu wahaborinare yuhdachu yoare. Ā yoa noaina to yaina jihina cjihtire tiro besea tiri jire marine. Mari noano yoari mehne besera tiri jire marine Cohamacu. To mu sūro to cahmariro seheta yoaro ahri yahpare to bajuamehnehto pano marine cahīno, tiro marine besea tiri jire. Marine ā cahīno marine yuhdachu yohtiore Jesucristore warocari jire Cohamacu. ¹⁰Mipure Jesucristore marine yuhdachu yohtiore warocaro, marine potocāta to cahīare noano masichu yoaro niri jire Cohamacu. Jesu marine to yainare pichacapu wahaerachu yoare. Ā yoaro “Yuhare wacū

tuana Cohamacu mehne ā jirucunahca” nino, buhriaro marine to ñu masichu yoaro seheta noaa buheare marine masichu yoaro tari jire tiro.

¹¹Tí buhea noaa buheare yahuhtiro cjihtore to cūhtiro cjihtore besesa tiri jire yuhure. ¹²Ā to beseriro jicu mipure ñano yuhduja yuhu. Ō sehe ñano yuhdupacuta yuhu buo tieraja. Yu wacū tuarirore Jesure masija yuhu. Tuariro jira tiro. Ā jiro yuhure to yare buhe duti cūno noano yoadohorohca yuhure. Ā yoa ahri yahpapu to tjua tahto pano, “Muhure yuhduchu yoihtja”, to niriro seheta sohtori tiarohca yuhure. Yuhure yuhduchu yoarohca tiro. Tíre noano masija.

¹³Muhure noano yu yahurire yoa pahñoga. Cristo Jesu yaina jina tirore noano wacū tuaja mari. Ā yoa painare noano cahija. Ā jicu tirore ā wacū tuarucuga muhu. Tuhsu, painare noano cahirucuga. ¹⁴Espíritu Santo mari mehne jiriro to yoadohoro mehne noaa buheare noano yoaga. Quihōno buhega. Soro ni buhecu tjiga.

¹⁵Jipihtina Asia yahpa macaina Jesu yaina yuhure yoadoho duaeraa cohā wahcāa wahare. Tina mehne macaina puaro Figelo, Hermógenes āta yoare tina cūhu. Ti ā cohā wahcārire masi tuhsura muhu. ¹⁶⁻¹⁷Ti ā cohāpachuta Onesíforo sehe payu tahari yuhure yoadohoro noano yajeri sāachu yoare. Ā yoaro peresui yu jichu tiro yuhure buo tisāaerare. Ā jiro Romai yu jichu ā macarucuri jire yuhure. Ā macarucuro yuhure bocare. Ā jiro tirore, jipihtina to ya wuhu macaina cūhure pja ñunohca Jesu mari puhtoro. To ā yoahto sehe tirore sini payoja. ¹⁸Ā yoa ahri yahpapu Jesu mari puhtoro to tjua tahti dachoi tirore pja ñunohca. To ā yoahto sehe tirore sini payoja. Efesoi payu tahari yuhure to yoadohorire noano masina muhu.

Ñano yuhduparota Jesu yairore cūno pjaro cahmana

2 ¹Muhu sehe yu macu yoaro sehe jiriro, Jesucristo marine noano yoiro to yoadohoro mehne tirore wacū tuarucuga. ²Ā yoaçu payu masare yu buherire mu tuhorire paina cūhure buhega muhu. Tina mu buheina Cohamacu yare yoarucuina jijaro. Ā jia painare buhe turiaina jijaro.

³Surara ñano yuhduparota to cūno pjariro seheta muhu cūhu Jesu yairo jicu ñano yuhducu cūno pjaga muhu. ⁴Surara to puhtoro dutia sehere yoara tirore wahchechu yoaro taro. Ā yoaro tiro surara jieraina yoaro sehe wiho jiare yoaerara tiro. (Muhu cūhu tó seheta Cohamacu dutia dihtare yoaga.) ⁵Murocaperiro muroca dutiina ti dutiare quihōno yoaeraro to muroca yuhdari wapare na masierara. (Ā jicu murocaperiro ti dutiare quihōno to yoiro seheta Cohamacu dutiare quihōno yoa pahñoga muhu.) ⁶Ā yoa wese dahrariro wapu tiro mehne noano dahrariro sehe tí wese maca dichare noano na muhta, noano wapataro. (Ā jicu muhu cūhu tiro yoaro sehe Cohamacu yare mu noano yoaçu tiro muhure noano yoarohca.) ⁷Jipihtiare noano masichu yoarohca Jesu mari puhtoro muhure. Ā jicu mipure muhure yu nirire noano wacū tuhotuga.

⁸Ā jicu Jesucristore wacūga. Tiro puhtoro Davi cjiro panopu macariro to panamino ji turariro jia tiri jire. Ā jiro yariaro masa mujari jire tiro. Noaa buheare buhecu to ā waharireta buhei nija. ⁹To yare buhecu ñano yuhduja yuhu. Ā jicu tíre yu buheri buhiri ñaare yoiro yoaro sehe peresupu jija yuhu. Yu ā jipachuta Cohamacu ya durucua buhe duhuchu yoa masierara

masa. ¹⁰ Ñ yoa Cohamacu to beserinare buhecu payu tahari ñano yuhduja yuhu, tina cūhu Jesucristo yaina ti jihti cjihtire. To yaina jia tina pichacapu wahaborina sehe to yuhduchu yoahcina jiahca. Ñ jia tina Cohamacu mehne ā jirucuahca.

¹¹ Ahri yu yahuhti potocā tjira: Cristo crusapu to yariariro seheta wahana, yariaina ti yoaare ti duhuriro seheta mari ñaa yoirire mari duhuna, Cristo mari mehne macariro ā jirucurohca.

¹² Ñ yoa to yare mari yoiari buhiri ñano yuhdupanahta cūno pjana puhtoro to suho jiropure tiro mehne puhtoata jinahca mari cūhu.

“Cristore sā masieraja”, mari nichu, tiro cūhu marine āta ninohca.

¹³ Tiore mari yuhdurucachu ñuno to niriro seheta marine yoarohca.

To niriro seheta yoiario jira tiro.

Ne mahñoerara tiro.

Cohamacu to ñu ji coainare, to yare buheinare yahuha Paulo Timoteore

¹⁴ Ahrire muhu mehne macainare wacūchu yoaga. Ti mu suro durucu ti yuhdurucaa yaba cjihti jierara. Ñ jia tinare tuhoinare ñano yoachu yoa, tinare dojomehnena. Ñ jicu mari puhtoro to ñurocaroi ō sehe ni yahuga tinare. “Ñ ni durucuena tjiga mūsa”, niga tinare. ¹⁵ Mūhu sehe Cohamacu yare noano buhega. Ñ yoa Cohamacu yare tuaro yoaga. Mu ā yoachu ñuno “Noano yoare mūhu”, ninohca Cohamacu mūhure. Ñ jicu mu buherire to ñuchū buo tisi mūhu. Ñ jicu to buheare noano masiga mūhu. Tíre quihōno buhega. ¹⁶ Ti mu suro durucu yuhdurucaina ñaare ā yoiarucu, Cohamacu yare yoiarara. Ñ jicu ti ā ni durucuare ā ñunocahga. Tinare tuhoi tjiga mūhu. ¹⁷ Tina ti durucua sehe camino to ñano baa mujano yoiaro sehe jira. Camino to ñano baa mujano seheta ti durucua cūhu paina Jesu yainare ñaina wahachu yoaahca. Ñ durucuina mehne macaina Himeneo, Fileto cūhu jira. ¹⁸ Tina “Jesu yaina masa muja tuhsuhre”, ni buhea, noaa buheare duhunocahre tina. Ñ soro buhea cāina Jesu yainare tiore wacū tua duhuchū yoiare tina. ¹⁹ Ti ā ñano buhepachuta Cohamacu ya buhea sehe ne cohtotaerara. Ō sehe nina to buhea: “Mari puhtoro Jesu to yainare masina”, nina. Ñ yoa ō cūhure nina: “Jipihtina, ‘Jesu yaina jija’, niina ñaare duhunocajaro”, ni yahura Cohamacu ya buhea.

²⁰ Mari piti dahre buhechu masa pja wahwari yoiaro sehe jira. Pjiri wuhui uru, plata mehne ti yoa wahwari jira. Tuhsu, tí wuhui paye wahwari yucucu mehne, dihi mehne ti yoa wahwari jira. Uru, plata mehne ti yoa wahwari noaare ti posahti jira. Paye wahwari wiho jiare ti posahti jira. ²¹ Ñ yoa ñaare yoiarariro uru wahwa noari wahwa yoiaro sehe jirohca. Ñ jiro tiro sehe Jesu ya dihtare yoiaruciro jirohca. Wuhu puro noari wahwa mehne noaare to yoiario seheta, ñaare yoiarariro Jesu ya cjihtire noaare yoiarohca.

²² Wahmūno jira mūhu. Ñ jicu wahma yapia ñaare goa pja ti yoiario seheta yoi tjiga mūhu. Ñ jicu noaare yoaga. Jesure wacū tuarucuga. Tuhsu, tiore, masa cūhure cahiga. Ñ yoa mūhu mehne macaina Jesu yaina mehne jicu cahmacheno marieno noano jiga mūhu. Tina Cohamacure yahtiina tiore sinirucuina cūhu āta yoiararo. ²³ Ñ jicu tuhoturo marieno ti durucu yuhdurucare mūhu cūhu tuho nūnui tjiga. Tuhsu, mūhu cūhu durucu yuhdurucacai tjiga. Ñ durucu yuhdurucaa masa ti basi cahma suara. ²⁴ Cohamacure

dahra cohtarirore durucu yuhdurucaeraro cahmana. Ā yoa jipihtinare noano yoariro, buhe mihniro, dóicāta suaerariro tirore jiro cahmana. ²⁵ Ā jiro paina tiro mehne ti durucu yuhdurucachu tiro tinare yahuro noano mehne suaro marieno yuhtiro cahmana tirore. To ā yuhtichu űua Cohamacu to yoadohoa mehne tina sehe ti űaa yoaare cahyaboca. Ā jia noaa buheare masi ducaboca. ²⁶ Tinare watino sehe peresu yoaro sehe jiinare cjuamare to cahmaare yoahtina cjihtire. Ā jia quihōno ti tuhoturi baharo noaa buheare masia, watinore cohānocaahca.

Pihtiri dacho cjihtore yahuha Paulo Timoteore

3 ¹ Pihtiri dacho panocāre űano yuhduahca masa. Tíre noano masiga muhū. ² Tí pjare masa painare wacū payoeraina, niñerure cahma yuhdurucaina, “Painare yuhdurucaja”, ni ti basi tuhotuina, tíre painare ā ni yahurucuina, Cohamacure űano durucuina, ti pucusumare yuhdurucaina, ti wapachuta “Noana”, nieraina, Cohamacure űo payoeraina jiahca. ³⁻⁴ Ā jia masare cahīeraina, paina mehne sua, tíre bo duaeraina, űaa quti dahreina, ti mu sūro űano yoarucuina, masare ā cjarucuina, noaare űu yabiina, tina mehne macainare űano yoina, tuhotua marieina, “Masi pahñoina jija”, ni tuhotuina jiahca masa. Tina űaare ti goa pjaare yoa ji coaina jia Cohamacu sehere cahmaeraina jiahca. ⁵ Ā jia tina masa ti űurocaroi Cohamacure űo payopahta “Cohamacu wiho jiro jira”, ni tuhotumana tina. Ā niinare piti tii tjiga muhū.

⁶ Tina mehne macaina tuho masieraa numia ya wuhūsei sāa, tí numiare mahñoare buhera. Tí numia sehe ā űaare yorarucua numia, tuaro űaare yoa duara. ⁷ Tí numia wiho jia buheare ā buherucua numia jia, soro jia buheare tuhoa numia jia, Cohamacu ya buhea sehere ne masierara. ⁸ Panopū Jane, Jambre yaya jirina Moise cjirore ti űu tuhtiro sehetā pihtiri dacho panocā jiina masa noaa buhea sehere űu yabiahca. Tina űaa dihtare tuhotuina jiahca. Ā jia Jesure wacū tuaina waro jierara. ⁹ Tó sehe yoina mahñoa bihosi. Baharo ti mahñoare tuho masieraina ti jia cūhure jipihtina masiahca. Jane, Jambre mehne ti mahñoare panopū masa ti masiro sehetā āta masiahca pihtiri dacho panocāi jiina ti mahñoare.

Paulo Timoteore duti batoaha

¹⁰ Ūu buheare, yu yoa tiare, yu jia tiare, Jesure yu wacū tuaare masina muhū. Ūu ā jiro jichū, suaro marieno yoariro yu jichū, masare cahīro yu jichū, űano yuhdupaihta yu cūno pjachu masina muhū. ¹¹ Ā yoa yuhure ti űano yoaare, yu űano yuhduare masina muhū. Antioquai, Iconioi, Listrai yuhure űabiario ti yoari cūhure masina muhū. Ūu ā wahachu űuno mari puhtoro Jesu sehe yuhure yoadohore. ¹² Jipihtina Jesucristo yaina ti ji duachu Cohamacu to dutiro sehetā ti yorucu duachu paina tinare űano yoaahca. Tí potocā tjira. ¹³ űaina sehe mahñō buheina cūhu űabiaina wahaahca. Painare mahñō, ti basi cūhu mahñōare tuhoa, āta űabiaina wahaahca.

¹⁴ Muhū sehe muhure yu buherire, noano mu tuhorire ā wacūrucuga. Ā jicu yu buheriro sehetā yoaga. Muhure buherinare masina muhū. ¹⁵ Muhū wihāriro jicupūta Cohamacu yare ti joari pūre masi ducari jire. To yare ti joari pūi ō sehe ni yahura muhure: “Jesucristore wacū tuaina dihtare pichacapū

wahaborinare yuhduchu yoara Cohamacu”, ni yahura mūhure. ¹⁶Cohamacu yare ti joari pūi jipihtiare Cohamacu sehe joa dutia tiri jire. Ā jina tí pūre buhena mari masi namoja. Tí pūre buhena Cohamacu dutiare mari yoahtire masija. Ā buhena mari űaa yoirire “Ahri űaa jica”, ni tuhotuja mari. Ā jiro tí pū marine noaa sehere cohtota dutira. Ā jiro dachoripe mari noaare yoarucuhti cjihtire yahura tí pū. ¹⁷Cohamacu yairo to ya pūre buhero, masi pahñonohca. Ā masino jipihtia noaare yoa masinohca tiro.

4 ¹Jesucristo jipihtina bui puhtoro, tjua tahtiro, catiinare, yariaina cūhure buhiri dahre dutihtiro to ñurocaroi mūhure ō sehe ni yahuihtja. Cohamacu cūhu to ñurocaroi ō sehe ni yahuihtja mūhure. ²Dachoripe masa ti tuho duachu ti tuho duaerachu cūhure Cohamacu yare yahuga. Ā yahucu masa ti űaa yoiri buhirire masichu yoaga tinare. Ā yoa ti űaa yoirire “Yoa namoena tjiga”, ni yahuga tinare. Noaa sehere yoa dutiga. Ā buhecu ne suae-rariro, pumerariro jiga mūhu. Ā jicu ne painare buhe duhui tjiga. ³⁻⁴Baharo, pa tehepūre masa noaa buheare tuho duasi. Ā tuho duaeraa ti cahmano seheta yoa, ti tuho ji coaa dihtare buheinare cahmaahca tina. Ā jia mahñoa buheare payu buheinare cjuahca. Tina ā yoa noaa buhea sehere cohā, ā ti buhemacanocarire tuho nūnūahca. Ā jicu noaa buheare buhe duhui tjiga mūhu. ⁵Mūhu cūhu ā jicu dachoripe tuho masiro jiga. Nano yuhdūpaihta cūno pjaga. Ā yocu noaa buheare ā buherucuga. Cohamacu mūhure to yoa dutirire yoa pahñonocahga mūhu.

⁶Yūhu Cohamacu yare yu yoiri buhiri yu variahto mahanocā dūhsara. Ā jicu mahaa dachoricā catisiniihca. Ā jicu mipure mūhure dutija. ⁷Yū variahto panocā ahrire yahuihtja: Jesu noaa buheare yūhure buhe dutiro to cūrire noano buhe sohtori tihi. To dutiare noano yoa pahñonocahi. Ā jicu űano yuhdūpaihta tirore ne wacū tua duherahi. ⁸Mipure Cohamacu yare yu yoiri wapare muanopu wihboro nica. Ā jiro mari puhtoro buhiri dahre dutiro quihōno yahuriro to tjua tahti dachoi to yare yu yoiri wapare warohca yūhure puhtoro to pisari soro uru mehne ti yoiri sorore yūhure to waboriro seheta. Paina cūhure to tjua tahtore cohtinare tirore cahñinare to yare ti yoiri wapare warohca Jesu.

Paulo yahu namoha Timoteore

⁹Yū cahapu cjero ñui taga mūhu. ¹⁰Dema ahri yahpa macaa jipihtiare tuaro cahmano yūhure yoadoho duaeraro yūhure cohā wahcāa wahahre Tesalónicapu. Crescente cūhu Galacia yahpapu wahahre. Ā yoa Tito Dalma-ciapu wahahre. ¹¹Luca dihta yūhu mehne jira. Marco yūhure noano yoado-hohtiro jira Cristo yare yu buhechu. Ā jicu tirore na tahga mūhu. ¹²Ā yoa Tíquicore Efesopu warocahi. ¹³Ōpu tacu, yu bui sāari suhtirore, Troai Carpo ya wūhui yu cūri suhtirore na tahga. Ā yoa sohō jia tjuri joaa tjuri cūhure na tahga. Sohō jia cahsari joaa cahsari pinihtare tuaro cahmaja yūhu. Ā jicu tí cahsari cūhure na tahga.

¹⁴Alejandro comaare dahrariro yūhure ñabiaro yoare. Ā jiro to ā yoiri buhiri Cohamacu tirore buhiri dahrerohca. ¹⁵Tiro Alejandro mari buheare tuaro ñu yabire. Ā jicu tiro mūhure “Ñano yoiri” nicu, tirore ñacu noano wacū masiga.

¹⁶Masare beserirore peresu yoa dutirirore yu yoirire, yu buheri cūhure tirore yu coā yahuchu ne cūiro baro Jesu yairo yūhure yoadohoerare.

Jipihtina yuhure yoadohoeraa cohã wahcãa wahahre. Ti ã cohãpachuta yuhure ti cohãri buhiri Cohamacu buhiri dahrero tjijaro. ¹⁷Yu ã wahapachuta Cohamacu yuhure yoadohohre. Ñ jiro to buheare yu noano yahuhti cjihtire to tuaare wahre yuhure, jipihtina judio masa jieraina tí buheare ti tuhohti cjih-tire. Ñ jiro yuhure ñano ti yoa duapachuta yuhure ti wajāborirote yuhduchu yoare mari puhtoro suaina yayare yuhure to yuhduchu yoaboriro sehetā. ¹⁸Jipihtina yuhure ñano yoinare yuhdurucaro, yuhure yoadohorohca mari puhtoro. Ñ jiro muanopu puhtoro to suho jiropu yuhure ji dutiro yuhure yuhduchu yorohca tiro. Ñ jina “Tiro noa yuhduariro, tua yuhduariro jira”, nijihna mari jipihtia dachoripe. Āta nijihna.

Paulo noa dutiha Timoteo cahai jiinare

¹⁹Prisca, Aquila, Onesíforo ya wuhu macaina cūhu noajaro. ²⁰Erasto Corinto tjuahre. Trófimo Miletoi dohatia wahahre. Ñ jicu tirore tói cūhi yuhu. ²¹Puhiro pano cjero taga muhu. Eubulo, Pudente, Lino, Claudia cūhu, jipih-tina paina Jesu yaina mehne muhure noa dutira.

²²Mari puhtoro Jesucristo muhu mehne jirohca. Ñ jiro Cohamacu to cahia mehne musare jipihtinare noano yoajaro.

Tito

Paulo Titore joarocaha

1 ¹Yuhu Paulo Cohamacure dahra cohtariro, Jesucristo yare buhe dutiro to cūriro jija. Cohamacu to beserina Jesure ti wacū tuahti cjihtire noaa buheare ti masihti cjihtire Jesu buhe dutiro yuhure cūre. Tí buhea Cohamacu to dutiro seheta mari yoahtire yahura. ²Ã jicu jipihtia dachoripe Cohamacu yaina muanopu ti jirucuhto cūhure buheja tinare. Cohamacu ne mahñoa marieriro ahri yahpare to bajuamehnehto pano õ sehe ni cūa tiri jire marine: “Muanopu ã jirucunahca”, ni cūa tiri jire marine. ³Ã jiro to quihōri pjai Cohamacu to ni cūrire yahu dutire masare. Tó seheta yuhure ni yahu dutire tiro. Marine pichacapu wahaborinare yuhdoriro jira tiro. ⁴Muhure Titore Jesu yare buhei. Yu ã buhechu tuhocu Jesure wacū tua dūcare muhu. ã jicu muhu potocāta yu macu yoaro sehe jicuta nina. Muhure ahrire joarocai nija. Cohamacu mari Pucu mehne, Jesucristo marine yuhdoriro mehne muhure noa dutija. Muhure pja ñua, cahña ti yoadohoa mehne noano jiga muhu.

Creta wama tiri nūcoi Tito to yoahtire yahu quihōha Paulo

⁵Creta wama tiri nūcoi muhure yu cūchu Jesu yaina ti buhehto cjihto dūhsasinire tí pjare. ã jicu ti yoahtire yahuhtiuro cjihtore cūi yuhu muhure. ã yoa macaripe macaina Jesu yaina puhtoia cjihtire bese duticu cūi muhure. ⁶⁻⁸Tina puhtoia Cohamacure dahra cohtaina jira. ã jicu tinare besecu noainare besega soro yoaerainare. ã besecu, cāa numiata namo tiinare, “Painare yuhdurucaja”, ni tuhotuereinare, suaerainare, cahaerainare, cahmacherainare, paina yare mahñoa mehne tuaro na duaerainare besega. ã besecu ti wuhusere sãa suinare noano ñu wihboinare, noaa sehere noano ji coainare, tuho masiinare, noaare yoarucuinare, ñaa marieinare, ñaare yoaerainare, caparo marieno dahrainare besega. ã yoa mu besehtina pohnare õ sehe jiina jiro cahmana: Jesure wacū tuaina, noano yoarucuina, jipihtinare noano yuhtiina jiro cahmana puhtoia pohnare. ⁹⁻¹⁰Ã yoa noaa buheare quihōno mari buherucuriro seheta ne duhueraina jijaro puhtoia mu besehtina. ã jia tina noaa buheare yahuina jiahca paina tí buhea mehne ti wahchehto sehe. ã yoaa noaa buheare ñu yabiinare buhea, ti ya mahñoa ti jichu masichu yoaahca tina. ã jicu noano besega Jesu yaina bui puhtoia jihtinare.

Payu ti puhtoare yuhdurucaina, noano tuhutu durucueraina, mahñoina jira mipure. ã yoaia judio masa pinihta ñabiario yoaa nina. Ti ya buhea ti potocā jierachu tinare masichu yoaro cahmana. ¹¹Tina judio masa sehe niñerure wapata duaa mahño buhera. ã yoaeraro cahmana tinare. ã buhea cāa

wuhuse macainare jipihtinare Cohamacu ya sehere cohächu yoaa nica tinare. Ti ä yoachü tinare ä yoa dutieraro cahmana.

¹²Ti yare panopü yahuriro tina mehne macariro jiparota ö sehe ni yahuri jire: “Creta nucu macaina ä mahñorucuina jira. Tina nucu macaina wahi-quina yoaro sehe suaina jira. Ä yoa ä churucuina jia ne dahra duaeraa, capa bujuina jira”, niri jire tiro to ya nucu macainare. ¹³To ä nia potocä tjira. Ti ä jichü nucu tinare tuaro tuhtiga Jesu ya buhea sehere noano ti masihtö cjihtore. ¹⁴Ä jicu judio masa panopü macaina ti mu suro ti nimacanocari cjirire, Jesu yare potocä jiare cahmaeraina ti dutia cühure Creto macaina ti tuho nunerahto cjihtore tuhtiga tinare.

¹⁵Buhiri marieina noa dihtare tuhotura. Ñaare yorucuina, Jesure wacü tuaeraina sehe ñaa dihtare tuhotura. Tina ti tuhotua sehe ñaa yuhduara. Ä jia noa sehere bese masierara.

¹⁶Tina “Cohamacure masija sä” nipahta, ñaare yoara. Ä yoina ti jichü ñña Cohamacure masieraina ti jichü masija mari. Ä jia tina ñaa yuhduaina, Cohamacu yare yuhdurucaina jira. Ne noaare yoa masierara.

Noa buheare quihöno yahu dutiha Paulo Titore

2 ¹Muhu sehe buhecu noaa buhea ti nino sehetä noano buhega. ²Bucu-nare ö sehe ni yahuga: Cua pisaina, masa ti ño payoina, tuho masiina, Jesure noano wacü tuaina, Jesure, masa cühure cahiina, ñano yuhdupahta cño pjaina jijaro tina. ³Bucu numia cühure ätä ni yahuga: Cua pisaa numia, Cohamacure ño payoa numia, ñaa quiti dahrera numia, cahaera numia jijaro ti numia cühü. Ä jia numia jia, noaare buhejaro paye numiare. ⁴⁻⁵Paye numiare ö sehe ni buhejaro bucu numia: Ti manusumare, ti pohna cühure ti cahihtore, tuho masia numia, paina mua mehne ñano yoeraa numia, cü wuhü macaina jiina noano ñu wihboa numia, masa noaa numia, ti manusumare noano yuhtia numia ti jihtore buhejaro ti numia Cohamacu ya buheare paina ti dojomehnerahto sehe.

⁶Ä yoa wahma yapia cühure ö sehe ni yahuga: Tuho masiina jijaro tina. ⁷Muhu sehe noaa dihtare yorucuga muhure ti ñu cühö sehe. Buhecu ne mahñono marieno buhega. Ä buhecu cua pisaro mehne buhega muhu. ⁸Ä buhecu noano tuho masino mehne noano buhega ne paina “Ahriri ñano yoaro nina” ni, muhure ti yahusäerahto sehe. Mu ä buhechü ñua marine ñu tuhtiina jipahta marine wiho warota yahusä masierara. Marine wiho waro ä yahusämacanoca buoro wahaahca tina.

⁹Ä yoa dahra cohtinare ö sehe ni yahuga: Ti puhtoare noano yuhtiina jijaro. Ä jia ti puhtoare noano wahchechü yoajaro. Ä dihta yoajaro. Ä jia ti puhtoare puriño yuhtiea tjijaro. ¹⁰Ä yoa ti puhtoa yare yacaea tjijaro. Tuhsu, noaina, ti puhtoa dutiare quihöno yorucuina jijaro. Ä noano yuhtiina ti jichü ñua Cohamacu marine yuhdoriro to buheare tuho ji coahca paina.

¹¹Masare to cahiare Cohamacu masare ño tuhsure. Ä cahino jipihtina pichacapü wahaborinare Cohamacu tuaro yuhdo duara. ¹²⁻¹³Masare ä cahino Cohamacu marine ö sehe ni buhera: Cohamacure ñu yabiare, ñaa goa pjaare duhunoca dutira marine. Cohamacu tuariro, Jesucristo marine yuhdoriro to si siteare mari ñuhti dachore, noari dachore mari cohtana nija. Ä jiro mari cohtari dacho panoi tuho masiina, noaare yorucuina, Cohamacu cahmaare

yoarucuina, marine ji dutira Cohamacu. ¹⁴Tiro Jesucristo mari ya cjihtireta yariari jire jipihtia mari ñaa yoaare duhuchu yoaro taro marine to yaina wahachu yoaro taro. Mari ñaa yoari cjiirire to ã cohâchu mari ñaa yoari buhiri marieina jinahca. Æ jina tuaro noaare yoa duaina jinahca.

¹⁵Ahri jipihtiare tí nũco macainare Jesu yainare buhega muhu. Ti puhtoro jinocaita nina muhu. Æ jicu tinare yahuga. Ti ñaare yoachu ñũcu yahuga tinare. Jipihtina paina muhure ño payoa mehne yuhtijaro.

Jesu yaina ti yoahti cjihtire yahuha Paulo

3 ¹Õ sehe ni yahuga tó macaina Jesu yainare: Ti puhtoare paina tinare dutiina cũhure noano yuhtiina jijaro. Jipihtia noaare yoahtina jijaro. ²Æ yoa painare ne ñano quitu dahrea tjijaro. Æ jia masa noaina, jipihtinare ño payoina jijaro.

³Panopure mari cũhu tuho masieraina, yuhdurucaina, mahñoare tuho nunuina, ñaare yoa ji coaina, tíre goa pja duhu masieraina, dachoripe ñaare yoarucuina, paina ti cjuaare cjoina jia timai mari cũhu. Æ yoa marine paina ñũ tuhtire. Mari cũhu tinare ñũ tuhtimai. ⁴⁻⁵Æ jirina cjiri mari jipachuta Cohamacu marine pichacapu wahaborinare yuhduchu yoare. Æ yuhduchu yoaro to noariro jiare, masare to cahña cũhure marine ñono nire tiro. Noano mari yoari mehne yuhduchu yoaerare marine. Marine pja ñũno mari ñaa yoari buhirire cosaro, Espiritu Santo mehne marine yuhduchu yoare. Æ yoaro marine to pohna wahachu yoare. Æ to yoachu Espiritu Santo sehe noaina mari jihtina cjihtire cohtotachu yoare marine. ⁶Jesucristo marine yuhduchu yoariro to yaria masa mujaa mehne Cohamacu to yairo Espiritu Santore ware marine pjíro to tuaa mehne marine yuhduchu yoahtiro cjihto. ⁷Marine cahño, marine noano yoa duare. Æ yoa duaro tiro to yairo Espiritu Santore marine ware ñaa buhiri marieina mari jihto cjihtore, muanopu mari ã jirucuhto cjihtore. Mari ã jirucuhtore masina, tíre cohtana nija.

⁸Tí yu niri potocãta jira. Æ jicu tíre yu ni joariro sehetã masare buhecu tí dutiare yoa pahño dutiga muhu. Æ jicu Cohamacure wacũ tuainare tíre buhega noaare ti noano yoahto cjihtore. Ahri yu ni buheri noaa buhea jira. Æ jia jipihtina masa ahri buheare ti tuho nunuchu wiho waro jierara. ⁹Paina ti durucua sehe yaba cjihti jierara. Æ jia masierapahta ti ni yuhdurucaare mu tuho nunuchu yaba cjihti jierara. Æ jia ti coyeyã panopu macaina ti jia tiare ti ni yuhdurucaare, Cohamacu Moise cjirore to dutirire ti ni yuhdurucaare tí jipihtiare noano mu tuho nunuchu yaba cjihti jierara. Æ jicu tíre tuho nunui tjiga.

¹⁰Musa mehne macariro ã ni yuhdurucararo musare cahma tju wachu to yoachu ñũcu “Yoai tjiga”, niga tirore. Pua taha tíre tirore mu yoa dutierari baharo to yuhtierachu ñũcu tirore piti tiecu tjiga. ¹¹Tó sehe yoariro ñaa dihtare goa pjarucuriro jira. To ã jichu ñũna to ñariro to jichu masija mari.

Paulo duti batoaha

¹²Nicopolipũ puhiro puro jii tai nija. Æ jicu Artemare o Tíquicore mu cahapu yu waroca muhtachu yu warocahtiro tópure to suchu, Nicopolipũ yuhure piti bocaga muhu tiro mehne. ¹³Æ yoa dutiare noano mihnirirore Zena wama tirirore, Apolo cũhure noano yoadohoga ti wahahto cjihtore. Æ

yoacu ti cahmaare jipihtiro tinare waga “Paye baro duhsari”, nicu. ¹⁴ ã jia Jesu yaina mari mehne macaina noaare yoapojaro paye barore duhsainare ti yoadohohto sehe noaare yoarucuina ti jihto sehe.

Paulo noa dutirocaha Jesu yainare

¹⁵ Jipihtina yuhu mehne macaina muhure noa dutira. Tói jiina Jesu yaina sare cahina noajaro. Cohamacu to cahia mehne musare jipihtinare noano yoajaro.

Filemón

Paulo Filemo wama tirirore joarocaha

¹Yuhũ Paulo, Jesucristo yairo yũ jiri buhiri peresupũ jija. Yuhũ, mari coyeiro Jesu yairo Timoteo mehne muhũre Filemore joarocaja sã. Muhũ sã cahĩriro Cristo yare sã mehne dahradohoriro jira muhũ. ²Ã jina Jesu yaina mu ya wuhũ cahmachuina cũhũre joarocaja sã. Mari coyeacoro Jesu yacoro Apia cũhũre joarocaja sã. Arquipo cũhũre joarocaja sã. Arquipo sehe sã yoaro sehe Cristo yare yahuriro jira. ³Ã jina Cohamacũ mari Pũcũ, mari puhtoro Jesucristo mehne musare noa dutija. Cohamacũ to macũno mehne ti cahĩa mehne, ti yoadohoa mehne noano jiga musa.

Filemo painare to cahĩare, Cristore to wacũ tuaare yahuha Paulo

⁴⁻⁵Yũ coyeiro Jesu yairo Filemo, Cohamacũre muhũre sini payocũ muhũre wacũcũ “Noana”, nija tirore. Cristore mu cahĩchũ, tirore mu wacũ tuachũ, paina Cohamacũ yainare mu cahĩchũ tuhoroacahi yuhũ. Å jicũ Cohamacũre “Noana”, ni wahcheja. ⁶Cristore mari wacũ tuana cũno potori to yaina jina nija mari. Å wacũ tuaina jina, Cristore mari noano cahĩna, pjĩro noaare cjuannahca mari. Tĩre musa noano masihtu sehe sini payoja Cohamacũre. ⁷Coyeiro, mipure painare mu cahĩchũ tuhocu wahcheja yuhũ. Jipihtina Cohamacũ yainare noano wahchechũ yoayuhti muhũ. Mu å yoachũ tuhocu wahcheja yuhũ.

Paulo Onésimo ya cjihtire sini payoha Filemore

⁸⁻¹⁰Ã jicũ mipure Onésimore muhũre dahra cohtarirore mu yoahtire muhũre sini payo duaja. Peresupũ yuhũ mehne to jichũ Cristo yare yahuhi yuhũ tirore. Tĩre tuhoro Cristore cahmahre tiro. Å yoaro tiro Cohamacũ yairo wahahre. Å waharo yũ macũ yoaro sehe jiriro jira. Å jicũ yuhũ Paulo bucuro jicũ Cristo yare yũ buheri buhiri peresui jicũ muhũre yahurocaihtja Onésimore mu yoahtire. Cristo buhe dutiro to cũriro jija yuhũ. Å jiriro jicũ tirore mu yoahtire dutiboa yuhũ. Å jiriro jipaihta muhũre dutisi yuhũ. Cahĩa mehne muhũre yahurocaihtja tó purota.

¹¹Cristo yairo to jihto pano Onésimo muhũre dahra cohtariro jiro yaba cjihti jierasini jire. Muhũre noano yoadoho masierasiniri jire. Mipũ pinihtare tiro muhũre, yuhũ cũhũre noano yoadoho masiriro jirohca. Mipure Cristo yairo jiro wiho jiriro waro jierara. ¹²Ã jicũ mipure tirore muhũre waroca tjuĩ nija. Å jicũ tirore noano piti bocaga muhũ. Tirore tuaro cahĩja. ¹³Noaa buheare yũ buheri buhiri peresupũ yũ jiro watoi tirore yuhũre

yoadoho dutiboa yuhũ tirore warocaeracu. Yuhũ mehne tjua dutiboa yuhũ. Mũhũ sehe yuhũre mu yoadoho masierachu tiro sehe yuhũre yoadohoriro tjuaboa, tirore warocaeracu. ¹⁴Yuhũre yoadohoboriro to jipachuta tirore muhũre waroca tjuja. Mũhũ sehe tirore “Paulo mehne tjuasiniga”, mu nichũ masicu yuhũ mehne tirore tjua dutiboa yuhũ. Yuhũ sehe “Yuhũ mehne cũga tirore”, ni duaeraja muhũre. Ā jicu tirore waroca tjuĩ nija. ¹⁵Tiro Onésimo mahaa nũmaricã muhũre to duhti wahcãri baharo pari turi muhũ mehne jira. Cohamacu to cahmariro seheta muhũre duhti wahcãri jire tiro Cohamacu yairo to wahahto sehe, yũ tũhotuchũ. Ā jiro pari turi muhũ mehne jiro ā jirucurohca muhũ mehne. ¹⁶Ā jiro tiro mipũre dahra cohtariro jierara. Dahra cohtariro bui curero jiriho jira tiro, yũ ñũchũ. Mipũre tiro mu coyeiro Jesu yairo jira. Ā jicu tirore tuaro cahĩja. Mũhũ sehe yũ yuhdoro tirore cahĩihca. Mu ā cahĩriho jiro dahra cohtariro jisiniaparota mipũre dahra cohtariro to jiriho sehe jierara tiro. Tiro mu coyeiro Jesucristo yairo jira.

¹⁷Ā jicu yuhũre mu piti bocaboriro seheta Onésimo cũhũre noano piti bocaga. Mũhũ mehne macariro yũ jichũ tũhotucu tiro cũhũre noano piti bocaga muhũ. ¹⁸Ā jicu muhũre soro to yoiro jichũ muhũre to wapamoriho jichũ yuhũ sehe tĩre wapaihtja. ¹⁹Yuhũ Paulo yũ basi ahĩre muhũre yahu joaihtja: Yuhũ sehe wapaihtja muhũre. Muhũre yũ buheri baharo Cristo yairo wahacu jipihtia dachoripe Cohamacu mehne jirucuhtiro jira muhũ. Muhũre yũ ā buheri baharo muhũ cũhũ yuhũre pĩjĩro wapamoriho jiboca. Mu ā jipachuta muhũre wapaihtja to wapamonore. ²⁰Yũ coyeiro yũ cahĩriho mari pũhtoro Cristo yairo jira muhũ. Cristo yairo jicu yũ coyeiro jira muhũ. Ā jiriho jicu yuhũre noano wahchechũ yoaga. (Ā jiriho jicu Onesimore noano piti bocaga.)

²¹Ahri yũ yahurire noano yoihca muhũ. Yũ yahuri yuhdoro yoihca muhũ. Tĩre masicu muhũre joarocai nija. ²²Ahri cũhũre yahuihtja muhũre. Mũsa cahapũ yũ wahahto sehe Cohamacure sini payoyuhti mũsa yuhũre. Mũsa ā sini payorire tiro yũhtiboca. “Jai” to nichũ cahmaja yuhũ. Ā jicu mũsa cahapũ yũ suhti tahtiare cahnoyuga muhũ.

Paulo noa duti batoaha Filemore

²³Epafra muhũre noa dutira. Tiro sehe Cristo yare to yoiro buhiri yuhũ mehne peresupũ jiriho jira. ²⁴Ā jia Marco, Aristarco, Dema, Luca mehne muhũre noa dutira. Cristo yare yũ buhechũ tina sehe yuhũ mehne buheina jira.

²⁵Mari pũhtoro Jesucristo to cahĩa mehne mũsare noano yojaro.

Hebreos

Cohamacu macuno to Pucurore yahubasaha masare

1 ¹Panopu Cohamacu payu tahari mari coyeare panopu macaina cjiire to yare yahua tiri jire. Payu to beserina to yare yahu turiaa tiri jire. To yare yahu muhtaina cjiire yahu dutiro, a yahua tiri jire tiro mari coyeare. ²Mipure pihtiri dacho panocai jia dachorire to macunore to yare to yahu dutichu tiro sehe marine yahua tire. Tiro to Pucuro to yoa dutiro mehne ahri yahpare, muano cuhure yoariro jira. To Pucuro sehe pihtiri dacho panoca jipihtiare cjuahthiire cua tiri jire tiore. ³A jiro to macuno sehe to Pucuro si siteare cjuariro jiro, cuno potori to Pucuro yoaro seheta jiro, to Pucuro to jia tiare marine nona. A yoa to macuno to tuua mehne to dutichu ahri yahpa, muano cuhu a jirucura. A yoa mari nano yoari buhirire to cosari baharo muanopu to Pucuro tua yuhduariro poto buhusehei dujiri jire tiro, to puhtoro jiare nono.

Cohamacu macuno anjoa bui jira

⁴Tiro Cohamacu macuno wama tira. Ti wamare cūri jire Cohamacu tiore. A wama tiro paina bui puhtoro jira. A jiro tiro anjoa yuhdoro tua yuhdurucariro jira. ⁵To yaina anjoa sehere Cohamacu ne o sehe ni yahuerari jire:

“Yu macu jira muhu.

Michare yu macu mu jiare masichu yoaihca”,

niri jire Cohamacu to macunore. Anjoa sehere ne o sehe ni yahuerari jire. Tinare ahri cuhure ne yahuerari jire:

“To pucuro jira yuhu.

A yoa tiro yu macu jira”,

niri jire Cohamacu to macunore. Anjoa sehere ne o sehe ni yahuerari jire. (A jiro to macuno tina yuhdoro tua yuhdurucariro jira.) ⁶Pa tehe to macunore wahma masa bajuarirore ahri yahpai cuno o sehe niri jire Cohamacu tiore:

“Jipihitina yu yaina anjoa na tuhcuu caha su, no payoahca tina yu macure”,

niri jire tiro. ⁷A yoa to yaina anjoa sehere yahuro taro o sehe niri jire tiro:

“Yu yaina anjoare wihnono yoaro sehe pjacu tichu yoaja yuhu.

Tina yuhure dahra cohtaina jira.

Tinare pichaca yoaro sehe pjacu tichu yoaja yuhu”,

ni yahuri jire Cohamacu. ⁸Tinare a niparota to macuno sehere o sehe niri jire:

“Muhu Cohamacu jipihitina bui puhtoro a jirucuihca.

Quihõno dutiihca mũhu mũ yainare.

⁹ Mahñono marieno yoaare, noano yoaare tuaro cahmana mũhu.

Ã jicu ñaa yoaare ñu yabira mũhu.

Mũ ã jiriro jichũ ñucu yũhu mũ Pucu jipihtina paina yũdoro mũhure wahchechu yoahi”,

niri jire Cohamacu to macunore. ¹⁰ Ahri cũhure niri jire tiro to macunore “Puhtoro”, ni pisuro:

“Puhtoro, wahmanopure ahri yahpare, mũano cũhure bajuamehnere mũhu mũ basi.

¹¹ Tĩ jipihtia cohtota pihtia wahaahca.

Mũhu sehe ne cohtotasi.

Ã jirucuihca mũhu.

Tĩ jipihtia suhtiro to baa boraro seheta pihtia wahaahca.

¹² Tĩ jipihtia mũanore ahri yahpa cũhure cohtotachu yoaihca mũhu.

Mũnaro suhtirore mũ cohãboro seheta tĩ jipihtiare cohtotachu yoaihca mũhu.

Suhtirore tjuwe na mũ cohtotaro seheta tĩ jipihtia cohtotaahca.

Mũhu sehe ne cohtotasi.

Ã jirucuihca mũhu”,

niri jire Cohamacu to macunore. ¹³ Ne anjoa sehere ahrire yahuerari jire Cohamacu:

“Yũ poto buhusehei dujiga mũhu.

Puhtoro jira mũhu.

Ã jicu mũhure ñu tuhtiinare doca dahre, yũhdurucabasaihtja.

Tina bui puhtoro jiihca mũhu”,

niri jire Cohamacu to macunore. ¹⁴ Jipihtina anjoa sehe Cohamacure dahra cohtaina jira. Ã jiro Cohamacu warocara tinare to yaina anjoare Cristo to yũhdachu yoahhtinare yoadoho dutiro.

Cohamacu yare noaa buheare marine ã tũhotunocano cahmaerara

2 ¹ ã yoa Cohamacu macũno waro marine yahuriro to jichũ masina to yahuare mari tuhorire noano wacũno cahmana marine, “Tĩre bori”, nina. ² Anjoa masare Cohamacu dutia cjirire ti yahu cũ turiariro seheta tĩ dutiare yũhduruca dutierari jire. ã jia masa sehe anjoa ti yahurire ti yũhdurucachu ñũno Cohamacu tinare quihõno buhiri dahreri jire. ³ Anjoa ti yahurire mari yũhtiri yũdoro Cristo sehere yũhtiro cahmana. Tiro mari puhtoro marine to yũhdachu yoahhtore yahu mũhtari jire. ã jia tirore tuhorina sehe to yahurire marine yahu turiare marine noano masichũ yoa taa. ã jiro tĩ buheare marine to yũhdachu yoahhtu buheare mari ã tũhotunocachu Cohamacu tuaro marine buhiri dahrerohca. Tĩre duhti masieraja mari. ⁴ Tĩ buheare tuho mũhtaina painare ti buhero watoi Cohamacu sehe tĩ buhea quihõnota ti jichũ ñono nire. To tuua mehne ñono nire. ã yoa payũ tahari to tuua mehne yoa ñono, tĩ buheare quihõno ti jichũ ñono nire. ã yoro to yainare ti yoahhtire to cahmano seheta cũri jire to buhea quihõno ti jiare ti masihtu. Espĩritu Santo sehe jira marine ã yoa masichũ yoariro.

Jesucristo mari yoaro seheta pjacu tiroto masa bajuaha

⁵ Pihtiri dacho baharoi jiina Cohamacu cahai jiina michapucacã yũ yahurina cjiri bui puhtoa jisi anjoa sehe. Tina anjoare puhtoa sõi Cohamacu.

⁶ Wiho mejeta cũiro Cohamacure to durucurire õ sehe ni joari jire panopũ:

“Masa wiho jiina ti jipachuta tinare wacūna muḥu. Masare noano yoara muḥu.

⁷ Mahaa numuricā anjoa docai masare cūri jire muḥu.

Ā cūpacuta mipure tinare tuaare wacu puḥtoa sōri jire muḥu.

⁸ Mu ā sōchu ahri yahpa macaa bui jipihtia bui jira masa”,

niri jire panopu macariro Cohamacure. Ā cūno ahri yahpa macaina wahi-quina jipihtina bui, jipihtia bui cūri jire Cohamacu. Masare to ā puḥtoa sōpachuta jipihtina ahri yahpa macaina, ahri yahpa macaa bui jierasinicā masa. ⁹ Ā tina bui jierasinipanahta, Jesu sehere masija mari. Mahaa numuricā anjoa docai Cohamacu to macūno cūhure cūri jire, mari yaro jiborirore yariahtirore. Cohamacu marine cahīno Jesure mari yariaborirore to yariachu cahmari jire. Ā jiro to ā yariachu nūno tirore tuaare waro, puḥtoro sōri jire tirore.

¹⁰ Cohamacu jipihtiare bajuamehneriro jira. Ā yoa jipihtia to ya dihta jira. Ā jiro Jesure to yaria dutichu, tiro sehe mari nāa yoari buhirire cohāri jire. Ā cohāri jire tiro masa payu to yaina jihtinare muanopu naano taro. Jesu to nāno yūhduchu masare yūhduchu yoahtiro Cohamacu to waha dutiro seheta yoaro niri jire tirore. To ā yochu pinihta noa nina. Ā jiro Jesu sehe marine yūhduchu yoariro waro, mari puḥtorota jira. ¹¹ Jipihtina masare ti nāa yoari buhirire Jesu, to cosawerina mehne pucu tira Cohamacure. Ā jiro mari Pucu cūirota jira. Mari Pucu to jichu Jesu marine to yainare to cosawerinare “Yu coyea jira”, ni pisuro ne buo tierara. To ā ni pisurire masare yahuihtja. ¹² Ō sehe nino niri jire tiro:

“Cohamacu, mu jia tiare yahuihtja yu coyeapure.

Jipihtina yu yaina panoi muḥure ņo payocu ‘Tuariro jira’, ni yahuihtja yuhu tinare”,

niri jire tiro to Pucurore. ¹³ Ahri cūhure niri jire tiro:

“Cohamacure wacū tuaihca yuhu”,

niri jire tiro. Ahri cūhure niri jire tiro:

“Ōi jija yuhu.

Cohamacu pohna mehne ōi jija.

Yuhure to cūrina yu coyea mehne ōi jija’, niri jire tiro to yainare ‘Yu coyea’”,

ni pisuro.

¹⁴ “Cohamacu pohna”, to niina pjacu tiina mari jichu nūno, Jesu sehe mari ya pjacu yoaro sehe jiro tari jire. Ā jiro tari jire tiro crusapu yariaro taro, watīnore butichu yoaro taro. Tiro watīno sehe yariachu yoariro jira. ¹⁵ Ā yoa watīnore butichu yoaro, marine yūhduchu yoare. Mari sehe dachoripe mari yariahtore cuimai. Ā cuiina jina pichacapu wahaborina jimai mari. Ā jiina mari jichu nūno tiro marine yūhduchu yoare. ¹⁶ Ā yūhduchu yoaro anjoa sehere yoadohoro taerari jire tiro. Abrahā panamanare Cohamacu yainare mari sehere yoadohoro tari jire. ¹⁷ Ā taro tiro mari coyeiro warota tari jire. Cūno potori mari yoaro sehe pjacu tiro tari jire. Ā taro mari yūhdutire mari nāa yoari buhirire Cohamacure cohā dutiro taro niri jire. Ā yoaro mari sacerdotea puḥtoa bui puḥtoro to yoariro sehe yoaro taro niri jire. Mari yoaro sehe jiro marine noano pja nūna. Ā yoa marine noano yoadohora. Ā jiro tiro mari sacerdotea puḥtoa ti bui puḥtoro jiro nina Cohamacure dahra

cohtariro jiro. ¹⁸Tiro ñano yuhduri jire. Ñ jiro watino tirore ñano yoa duti-mari jire. Yoerari jire tiro. Ñ ñaare yoerariro jiro, tiro sehe mari cūhure ñaare yoaerachu yoa masina. Watino to ñaare to yoa dutichu ñuno marine ñaare yoaerachu yoa masina Jesu.

Jesu Moise cjiro bui jiri jira

3 ¹Jesu to ñ jiri jichu ñuna tirore noano wacūga musa. Yū coyea Jesu yaina, Cohamacu to beseina jira musa. Tiro Jesu sehe Cohamacu to warocariro jiro mari sacerdotea puhtoa ti bui puhtoro jira. To buheare noa buheare mari quihōno tuho, buheja. Tiro sehe Cohamacu warocariro, mari sacerdotea bui puhtoro to jia tiare noano wacūga musa. ²Cohamacu tirore marine to yuhdachu yoahtore to cūchu tiro sehe to cūriro seheta yoari jire. Ne yuhdurucarari jire. Moise cjiro cūhu Cohamacu yaina Israe masare yoadohoro ne yuhdurucarari jire. Āta yoari jire Jesu cūhu. ³Moise cjirore ti ño payoriro yuhdoro Jesu sehere ño payoro cahmana marine. Ō sehe jira tí mari piti dahre buhechu: Wuhure mari ño payoriro yuhdoro wuhu dahreriro sehere ño payoro cahmana marine. Ā jiro Jesu sehe wuhu dahreriro yoaro sehe jiri jira to jichu Moise cjirore mari ño payoriro yuhdoro tiro sehere ño payoro cahmana marine. ⁴⁻⁶Ō sehe jira ti: Mari Cristo yaina Cohamacu ya curua macaina jija. Cristo sehe wuhure to cūboriro seheta marine to ya curua macaina cjihtire cūno nina. Masa sehe wuhuse yoina jira. Cohamacu sehe jipihtiare yoariro jira. Moise cjiro sehe Cohamacu ya curua macainare yoadohorucuriro jiro, baharopu Cohamacu to yahuhtore yahua tiri jire masare. Cristo sehe Cohamacu macuno jiro, Cohamacu yare yoarucuriro jiro, Cohamacu ya curua macaina bui puhtoro jira. To ñ jiri jichu ñuna Moise cjirore mari ño payoriro yuhdoro Cristo sehere ño payoro cahmana marine. Ā jina mari sehe Cristore wacū tua duhuerana, marine to yuhdachu yoahtore ñ wahcherucuna to ya curua macaina jija mari.

Cohamacu to yainare tiro mehne ti noano sochu cahmana

⁷Ñ jina Cristore mari wacū tua duhuerahore ō sehe yoaro cahmana marine. Ō sehe nina Espiritu Santo:

“Michare yuhu Cohamacu musare yū yahuchu, yuhti duaeraina jiena tjiga.

⁸Noano yuhtiga musa yuhure.

Panopu Israe masa masa marienopu jia, āta yuhdurucarucure yuhure.

Ā jina tina yoaro sehe yoena tjiga musa yuhure.

⁹Tōpūre cuarenta cūhmaro waro tinare yū tuua mehne yoa ñomai.

Yū ñ yoa ñopachuta tina sehe ō sehe ni tuhotua timare: ‘¿Ñaare mari yoaachu ñuno Cohamacu marine buhiri dahrebocari?’ ni tuhotua timare.

Ā ni tuhotua ñano yoa ñua tire.

¹⁰Ti ñ yoaachu ñucu tina mehne suai.

Ā suacu ō sehe nii: ‘Tina yū durucure tuho duaeraa, soro jia buheare ñ wacūmacarucua nina.

Ya sehere ne yuhti duaerara’, nii tinare.

¹¹Ā jicu tina mehne suacu ō sehe ni yahui: ‘Tina yuhu mehne macaina ne jisi.

Ã jia wapũ tiro marieno jisi tina', ni yahuri jire Cohamacũ',
niri jire Espĩritu Santo sehe.

¹²Ã jina yũ coyea, noano yoaga musa, "Cohamacure cohãri", nina. Musa ñaare tuhotuna, Cohamacure catirirore wacũ tuaerana, tirore cohãboca musa. Ne cũiro musa mehne macariro ã yoaero tjjaro. ¹³Ã jina ahri sehere yoaro cahmana musare: Musa mehne macainare dachoripe Cohamacũ yare musa basi cahma durucuga "Ñaare yoari", nina. Ñaare yoana, "Tĩ mehne wahcheja" nina, mahñoare tuhotuna nija mari. ã ni tuhotuena tjiga. Ñaare yorarucuna Cohamacũ ya sehere ji coaeraja mari. ã yoana ñaare duhu duaeraja. "ã yoari" nina, musa mehne macainare Cohamacũ yare musa basi cahma durucuga. Cristo to tahto pano dachoripe tíre ã cahma durucurucuga. ¹⁴Wahmanore Cristore mari wacũ tua ducariro seheta tó seheta mari wacũ tuarucuna, mari catiro puro to yare duhuerana, tiro mehne macaina jija.

¹⁵Õ sehe nina Cohamacũ yare ti joari pũ:

"Míchare yũhũ Cohamacũ musare yũ dutichũ noano yũhtiga musa yũhũre.

Panopũ macaina Israe masa yũ yahupachuta ño payo duaeraa, yũhũre yũhti duaerare.

Ã jina tina yoaro sehe yoaena tjiga musa, niri jire Cohamacũ',
ni joa tiri jire panopũre. ¹⁶Ã yoa Cohamacũ to yahurire tuhomarina jipahta tina tirore yũhtierari jire. Tina jipihtina Egiptopũ jiina Moise to na wiorina jipahta tirore ne yũhtierari jire. ¹⁷Ã jia ã ñano yorarucua, cuarenta cũhmari waro Cohamacure suachũ yoa mũjaa tiri jire. Ti ã yoari buhiri masa marienopũ yariari jire tina. ¹⁸Tirore ti ã yũhti duaerachũ ñuno õ sehe cua pisaro mehne niri jire tiro: "Tina yũhũ mehne macaina ne jisi. ã jia wapũ tiro marieno ne jisi tina", niri jire tiro. ¹⁹To ã nichu tuhona ahri sehere masinahca mari: Tina Cohamacure ti wacũ tuaerari buhiri tiro mehne macaina ji masierari jire. ã jia tiro mehne noano so masierari jire.

4 ¹Ã jiro panopũ macainare tiro mehne ti noano sohtore cahmano, tinare "Yũhũ mehne wapũ tiro marieno sonahca", ni cũri jire Cohamacũ. Mari cũhũre ãta ni cũri jire tiro. ã jina cuaro mehne Cohamacure yũhdũrucaena tjjijhna mari, "Cohamacũ yare yoa moñori", nina. ã yoa moñona tiro mehne noano sosi mari. ²Panopũ macaina cjiri Cohamacũ yare ti tuhoriro seheta mari cũhu noa buheare tuhohi. Tina tuho muhtaina cjiri sehe tuhoa, "Cohamacũ ya waro jira", ni tuhotuerari jire. ã jia ti tuhori cjiri yaba cjihti jierari jire. ³Mari sehe tirore wacũ tuana Cohamacũ mehne macaina jija. ã jina tiro mehne noano jinocahna, tiro mehne sonahca. Wapũ tiro marieno jinahca. Cohamacũ to niriro seheta jira tí. Õ sehe niri jire tiro tirore yũhtieraina cjirire:

"Tina mehne suacu cuaro mehne õ sehe ni yahui: 'Tina yũhũ mehne macaina ne jisi.

ã jia wapũ tiro marieno ne jisi', ni yahui",

niri jire Cohamacũ yare ti joari pũ. Ahri yahpare to yoari baharo dahra duhusiniri jire tiro. Yoari pja dahra duhuparota tina sehere tiro mehne so dutierari jire tiro. ⁴Ahrire mari masija. Seis dachori ahri yahpare to yoari baharo to dahra duhurire yahuro õ sehe niri jire Cohamacũ ya durucuaire ti joari pũ:

“Seis dachori baharo jipihitiare to dahraare pahñoño, Cohamacu dahra duhuri jire”,

niri jire to yare ti joari pui. ⁵ Ñ yoa pari turi Cohamacu yare ti joari pui ñ sehe ni yahura tiro mehne noano jierainare:

“Tina yuhu mehne macaina ne jisi.

Ñ jia wapu tiro marieno ne jisi, niri jire Cohamacu”,

nina to yare ti joari pui. ⁶ Noaa buheare tuho muhtaina tirore ti yuhdurucari buhiri tiro mehne macaina jisi tina. Ñ jia tiro mehne wapu tiro marieno jisi tina. Paina sehe tiro mehne macaina jiahca. Ñ jia tiro mehne wapu tiro marieno soina jiahca. ⁷ Ñ jiro masare to yuhdachu yoahti dachori paye dachorire cūri jire pari turi Cohamacu. Tí dachorita mipure jira. Payu cūhmari baharo Israe masa cjiri Cohamacure ti tuho muhtari baharo tí dachorire yahuri jire Davi cjiro sehe. Cohamacu tirore to yahu dutichu yahuri jire tiro. Cohamacu ya durucua ti joarire musare yu yahua dachorire ñ sehe ni joari jire Davi cjiro:

“Ahri dachorire yuhu Cohamacu musare yu yahucha yuhdurucaro marieno noano yuhtiga musa yuhure”,

ni joari jire panopure. ⁸ Tí pjapure Josué cjiro Israe masare Cohamacu to wari yahpai na suri jire. “Yuhu mehne wapu tiro marieno soina jiahca” nino, tí yahpai ti sohtore nino nierari jire Cohamacu. Tí yahpai so dutiro, paye dachori to yuhdachu yoahti dachorire cūeraboa tiro. ⁹ Wiho mejeta seis dachori baharo ahri yahpare to yoari baharo Cohamacu to dahra duhuriro sehetu mari to yaina cūhu tiro mehne wapu tiro marieno mari sohto jirohca. Tiro mehne mari noano jihto jirohca. ¹⁰ Cohamacu sehe to dahrarire duhucasiniri jire. Tó sehetu tiro mehne soina cūhu mari wapu tirire duhunocanahca. ¹¹ Ñ jina mari to yaina noano yojihna. Cohamacu yare noano yuhtijihna tiro mehne mari noano sohto sehe. Panopu macaina mari coyea cjiri ti yuhdurucari baharo Cohamacu mehne macaina ji masierari jire tina. Tina yoaro sehe yoarena tjijihna mari.

¹² Cohamacu ya durucua marine catichu yoara. Noaa sehere marine cohtotachu yoara. Ñ jia to ya durucua wiho jia jierara. Ñ yoa ñosari pji pu buhuseheri siori pji mehne dihiore ti yihso ñu ti masiriro sehetu to ya durucua cūhu mari jia tiare noano masichu yoara. To durucua mari tuhochu, tíre mari buhechu mari jia tiare, mari tuhutua cūhure noano masi pahñochu yoara marine. ¹³ Ne Cohamacure mari jia tiare mari dohse yoarire ñuo masieraja mari. Jipihitiare to bajuamehnerire, to bajuamehnerina cūhure ñuna tiro. Ñ jina mari yoarire tirore yahu yuhdaro cahmana marine.

Jesu tuariro mari sacerdotea puhtoa bui puhtoro jira

¹⁴ Jesu Cohamacu macuno to Pacuro cahapu tjuariro jira. Tiro tuariro mari sacerdotea puhtoa bui puhtoro jira. Ñ jiro marine Cohamacure sini payora. To ñ jiro jichu ñuna mari sehe to yare noano yuhtijihna. Tirore noano wacu tuarucujihna. ¹⁵ Tiro mari sacerdotea puhtoa bui puhtoro mari ñano yuhdachu ñuno noano pja ñuriro jira. Mari ñaa goa pjaare masina tiro. Watino jipihitiare ñaare marine to yoa dutiriro sehetu tiro cūhure ñaare yoa dutimari jire. To ñ yoa dutipachuta tiro ñaare yoaerari jire. Ñ ñaare to yoa dutimariro jiro, marine pja ñuno tiro yoadoho masina marine. ¹⁶ Ñ jina cuiro marieno

Cohamacure sinijihna. Tiro marine cahĩna. Ā jiro tirore mari sinichu tiro sehe pja ñuno, marine yoadohorohca. Watĩno marine to ñaare yoa dutichu, mari ñano yuhdunchu cūhure tiro marine yoadohorohca.

5 ¹Sacerdotea puhtoa bui puhtoro besero, masunore besera Cohamacu. Ā to beseriro jiro sacerdotea puhtoa bui puhtoro sehe tiro mehne macainare yoadohoro taro, Cohamacure dahra cohtariro jira. Ā jiro ti ñaare ti yoari buhiri Cohamacure sinibasara tiro mehne macainare. Wahiquirore wajā jū mūono, Cohamacure sinibasara. ²Sacerdotea puhtoa bui puhtoro paina masa yoaro sehe noano masi pahñoerariro jira. Ā masi pahñoerariro jiro paina masierainare yoadoho masina. Ā jiro noano yoeraina cūhure noano yoadoho masina. ³Ā jia sacerdotea noano yoa pahñoeraina jia ñaa buhiri tiina jira tina cūhu. Ā jia ti basi ti ñaare ti yoari buhiri wahiquirore wajā jū mūo, Cohamacure sinina. Paina masare yoadohoa taa, ti ñaa buhiri ti sinibasariro seheta ti basi ti ñaa buhiri cūhure sinina Cohamacure.

⁴To basi to mu suro sacerdotea puhtoa bui puhtoro sāaerara. Cohamacu sehe tirore besero, sacerdotea puhtoa bui puhtoro sōna. Panopu macariro Aarō cjirore to cūriro seheta paina sacerdotea puhtoa bui puhtoro cūhure cūna tiro. ⁵Tō seheta Cristo cūhu to basi to mu suro sacerdotea puhtoa bui puhtoro sāaerari jire. Cohamacu sehe tirore puhto sōno, ō sehe niri jire:

“Yū macu jira mūhu.

Michare yū macu mu jiare masichu yoaihca”,

niri jire Cohamacu. ⁶Pa tehe ō sehe niri jire Cohamacu Cristore:

“Jipihitia dachoripe sacerdote jirucuihca mūhu.

Melquisede to jiro seheta sacerdote jirucuihca mūhu”,

niri jire to macunore. ⁷Cristo ahri yahpai jiro sañurucua mehne, yahco mehne Cohamacure tuaro siniri jire tiro “Yuhure masoga”, nino. Cohamacu sehe tirore yarirore maso masiriro jira. To ā sinichu Cohamacu tuhori jire tirore. Cohamacu cahmaa dihtare to yochu ñuno Cohamacu sehe to sinirire tuhoro, tirore yuhtiri jire. ⁸Cristo Cohamacu macuno jiparota ñano yuhduri jire tiro. Ā ñano yuhduro yuhtiri jire Cohamacure. Ā yuhtiro noano yuhtiare masiri jire. ⁹Ā ñano yuhduro, crusapu yariaro jipihitina tirore yuhtihtinare yuhdunchu yoahitiro wahari jire. ¹⁰Ā jiro Cohamacu sehe tirore sacerdotea puhtoa bui puhtoro cūri jire. Ā jiro Melquisede sacerdotea puhtoro to jiro seheta jira Cristo.

Cristo yaina tirore wacū tua duhuchu cua nina

¹¹Payū ō sehe jiare musare yahu namo duaia sã. Sã ā yahu namo dua-pachuta musa sehe dapu butiina jira. Ā jina musare sã yahuchu mijo nina sãre. ¹²Yoari pja Cristo yaina jimana musa. Ā jina mipure painare buheipapū ji tuhsuboa musa. Musa ā jinaapu jiborina jipachuta paina musa sehere buheahca tjoa. Cohamacu yare mijoera curea buhea dihtare tuhora musa. Wihāinacā pēcho dihtare ti sihni masino seheta musa cūhu mijoera curea dihtare noano tuhora. Wahma buhe ducaina yoaro sehe jira musa. ¹³Pēcho sihniina wihāinacā jisinina. Tina yoaro seheta musa cūhu jira mijo cureare tuhoerana. “Ahri ñaa jira. Ahri noaa jira”, ni bese masierara musa. ¹⁴Chuare chuina sehe bucuna jira. Tina yoaro sehe jiina noano tuho masiina noano buheina jira. “Ahri ñaa jira. Ahri noaa jira”, ni bese masina tina sehe.

6¹⁻² Æ jina Cohamacu yare noano masiina, noano yuhtiina jijihna. Cristo yare wahmanore mari buhe ducana ò sehe masi ducal: Mari mu sũro mari yoaa yaba cjihti jierara. Mari noano yoaa mehne yũhdusi mari. Cohamacure wacũ tuaro cahmana marine. Ahrire wahmanopure buhe ducare marine. Æ jia bautisaare, wamomacarire marine ti duhu payoare, yariaina ti masa mujaare, ahri dacho to pihtiri baharo Cohamacu to buhiri dahreh-tore, to buhiri dahrehtina ti ñano yũhdurucuhto cũhure ahri cũhure wahmanopure marine buhe ducare. Õ sehe jia buheare masi tuhsu, paye sehere noano buhe namojihna tjoa.³ Æ jina Cohamacu to cahmachũ ãta yoanahca mari.

⁴ Mari ã yoaerana Cohamacu yare duhuboca mari. Cohamacu yare masiina jipahta tíre duhuinare ne pari turi pano ti ñaa tuhotumarire cohtotachu yoaa masierara. Tó sehe jiina Cohamacu tinare to noano yoahore masia, Espĩritu Santo to yoaa tiare mahanocã masimare.⁵ Æ yoa Cohamacu ya durucuaare tuhoa noaa durucua ti jichũ masimare. Tuhsu, pihtiri dacho baharopũ Cohamacu to tuaa mehne mari ã jirucuhore, masare to buhiri dahrehore cũhure tina masimare.⁶ Æ jiinapure Cristo yare duhurinare pari turi ti ñaa tuhotumarire tinare cohtotachu yoaa masierara. Tó sehe yoaina Cohamacu macunore pari turi crusaũ ti cã puharo sehetã tirore yoaa nina. Ti ã yoachũ ñua paina masa Cristore bujupera. Ti ã yoachũ tinare ti ñaa tuhotumarire tinare cohtotachu yoaa masierara.⁷ Õ sehe jira tí mari piti dahre buhechũ: Noari yahpare pĩro coro tachũ tí toaa noano du, dicha tira. Æ jiro tí wese pũro dichare cjuara to chuhtire. Tí yahpa Cohamacu noano to yoari yahpa jira. (Tó sehetã noano yoara tiro to yaina cũhure.)⁸ Wiho mejeta agã pota mehne, tjã mehne tí yahpa diaro yaba cjihti jierara. Æ jiri yahpa Cohamacu to jũ cohãhti yahpa jira. Æ jiro tí yahpare jũnocanohca. (Tó sehetã yoara tiro tirore duhuinare.)

Cristore ã ño payorucuinare yũhduchũ yoara Cohamacu

⁹ Yũ cahĩina, musare ã ni yahupaihta musa sehere “Cristore duhuina jira”, nii nieraaja. Musa sehe Cristo to yũhduchũ yoaina jira. Æ jina noaare yoana nica musa. Tĩre masija yũhũ.¹⁰ Noano mari yoari wapa quihõno marine noano yoariro jira Cohamacu. Æ jiro to yare musa tuaro dahrari wapare bosi tiro. Tirore cahĩna noano yoadohore musa tirore. Paina Cristo yaina cũhure yoadohore musa. Æ yoa tinare yoadohosinina nica musa. Æ yoaina musa jichũ ñũno bosi tiro.¹¹ Musa catisinino puro painare musa cahĩrucuchũ, musa yoadohorucuchũ cũhure cahmaja sã, baharopũ Cohamacu yare musa duhuri nina. Musa ã noano yoachũ ñũno noano yoarohca Cohamacu musare.¹² Æ jina musa capa bujũina musa jichũ cahmaeraja sã. Paina Cristo yaina ñano yũhdũpahta to yare ne duhuerara. Ti ã yoachũ ñũno Cohamacu “Musare waihtja”, to nirire tinare wa pahĩnonohca. Æ jina musa cũhũ tina yoaro sehetã yoarucuga.

¹³⁻¹⁴ Panopũ Cohamacu Abrahã cjirore ò sehe ni cũa tiri jire: “Yũ wama mehne ahrire potocã nii nija muhure. Muhure noano yoihtja. Æ yoacũ mu panamana ji turiaĩnapure payũ masa jichũ yoihtja”, ni yahu cũa tiri jire Cohamacu Abrahã cjirore. Æ ni yahu cũno to ya wama mehne ã ni yahuro niri jire. Pairo tiro bui jiriro ne mariachũ to ya wama mehne to basita ã ni yahua tiri jire.¹⁵ “Muhure noano yoihtja”, Cohamacu to ni cũire Abrahã

cjiro sehere noano to cohtachu ñuno to niriro seheta tirore noano yoaa tiri jire. ¹⁶ “Cohamacu mehne potocã nina nija”, masa sehe nia, tina ti bui jiriro wama mehne ã ni yahua nina. “Cohamacu mehne potocã nii nija”, cüiro to nichu tuhoro tiro paio mehne cahma sayoriro “Potocã tjira”, ninohca. Ñ jia cahma sayo duhuahca tina. ¹⁷ Cohamacu Abrahãre “Muhure noano yoaih-tja”, ni cüno to ya wama mehne ã ni yahua tiri jire. To ã ni yahurire tuhona “Potocã tjira tí. Ñ yoa to niri ne cohtotasi” ni, masija mari. Tíre mari masiht to sehe to ni cüri mehne “Yu wama mehne potocã nii nija”, ni yahua tiri jire Cohamacu. ¹⁸ Ñ jiro puaro to ni durucuri mehne potocãta to nirire masichu yoari jire Cohamacu marine: To ni cüri cühu “Yu wama mehne potocã nii nija”, to ni yahuri cühu tí puaro mehne to ni durucurire yahua tiri jire tiro. To ni cüri cühu, “Yu wama mehne potocã nii nija”, to ni yahuri cühu ne cohtotaerara. Cohamacu ne mahñoerara. To ã jiriro jichu masina, marine to yoadohohtore macana, tirore noano wacü tuana, wahchea mehne marine to yuhduchu yoahore cohtanahca mari. ¹⁹⁻²⁰ Ñ to yuhduchu yoahore cohtana, wacü tuaina jia mari. Ñ jina cuieraja. Sacerdotea puhto bui puhtoro Cohamacu to jiri tahtia waropu säano, ducataru suhtirore yuhdu säahna. Ñ säano masa ya cjihtire sini payobasara Cohamacure. To ã yoariro seheta Jesu cühu baharo mari wahahto seheta muanopu Cohamacu cahapu waharo, mari ya cjihtire sini payobasara Cohamacure. Tópu mari wahahto pano tiro sehe wahari jire. Ñ jiro jipihitia dachoripe sacerdotea puhto bui puhtoro jira tiro. Melquisede sacerdote to jiriro seheta sacerdotea puhtoro jirucura tiro cühu.

Melquisede sacerdote to jiriro seheta Jesu sacerdote jira

7 ¹ Melquisede cjiro sehe Salë wama tiri maca macaina bui puhtoro jia tiri jire. Sacerdote jiro Cohamacu tuarirore, muano macarirore sini payobasariro jia tiri jire. Ñ jiro paina puhtoare Abrahã cjiro cahma wajã yuhduruca tuhsu, to tjua tachu waro Melquisede cjiro to ya macai jiriro Abrahã cjirore piti bocaro sua tiri jire. Ñ piti bocaro tirore sini payobasaa tiri jire Cohamacure: “Noano yoaga ahrirore”, ni sini payobasaa tiri jire Cohamacure Abrahã cjirore. ² To ã piti bocahto pano Abrahã cjiro sehe tirore ñu tuhtiinare wajã tuhsu to wajärina cjiri puhto yare naa tiri jire. To ã nari cjirire mahanocã waa tiri jire Melquisede cjirore. Cohamacu to dutiriro purocãta mahanocã waa tiri jire Melquisede cjirore. Melquisede cjiro to wama sehe “Bui puhtoro noano yoariro jira”, nino nina. Tiro cjiro Salë wama tiri maca macaina puhtoro to jichu to wama õ sehe nino nina: “Bui puhtoro noano jichu yoariro”, nino nina. “Salë” nino, “Noano jia”, nino nina. ³ Ne Melquisede cjiro pucusumare, to pano ji muhtainare to coyeare ti yahu joa õri mariahna. To masa bajarire, to yariari cühure yahu joa õri mariahna. Ñ jiro ã jirucuriro yoaro sehe jira tiro cjiro. To ã jiriro jichu Cohamacu tiro mehne marine piti dahre buhera. Cohamacu to macuno to sacerdote to jirire marine buhera. Melquisede cjiro sacerdote ã jirucuriro yoaro sehe jira. Tiro yoaro seheta Cristo cühu sacerdote ã jirucuriro jira.

⁴ Ñ jiro Melquisede ne wiho jiriro jiera tiri jire. Abrahã mari ñachu cjiro puhtoro waro jiparota mahanocã to tjua narire tiro sehere waa tiri jire. Mahanocã waa tiri jire Melquisedere. ⁵ Ñ jia Cohamacu dutia Moise cjirore to cüri dutia jipihitina paina Israe masare tó purota wapa dutira. Ñ dutiro Leví

panamana ji turiainare ti coyea waparire ñaha dutiro, cúa tiri jire. Leví panamana sacerdotea wahaa tiri jire. Ñ jia Israe masa Abrahã panamana ji turiaina jipahta ti sacerdoteare wapaa tiri jire. ⁶Melquisede sehe Leví panamino ji turiariro jieraparota wapa naa tiri jire Abrahãre. Cohamacu “Muhure noano yoihtja”, to ni cûiro jiparota Abrahã sehe Melquisedere wapaa tiri jire. Ñ jiro Melquisede sehe Cohamacure Abrahãre sini payobasaro noano yoa dutia tiri jire. ⁷Noano yoa dutiriro Melquisede cjiro sehe to noano yoa dutiriro bui Abrahã bui jira. Tíre mari noano masija. ⁸Mari mehne macaina sacerdotea marine mahanocã wapa naina mari yoaro sehetã masa jira. Ñ jia yariahtinata jira tina cûhu. Ahriro Melquisede sehe Abrahãre mahanocã wapa nariro cjiro ã catirucuriro yoaro sehe jira, mari piti dahre buhechu. To yariarore yahueraro, ãta nino nia tiri jire Cohamacu yare ti joari pûi. ⁹Mipu macaina Leví panamana ji turiaina sacerdotea jia, mahanocã wapa nana. Ñ jiina ti jipachuta Abrahã Melquisedere mahanocã waparo jipihtina Leví panamana ji turiaina ya cjihti cûhure wabasaro sehe yoaro nia tiri jire. Ñ jia tina cûhu Melquisedere mahanocã wapaina yoaro sehe jira. ¹⁰Melquisedere Abrahã to wapari pjare Leví sehe masa bajuerasinia tiri jire. Ñ masa bajuerasiniparota to ñuchuno cjiro Abrahã pjacupu to jiboriro sehetã Leví sehe ji tuhsaro nia tiri jire. Ñ jiro Melquisede Abrahãre to piti bocachu Leví cûhu to ñuchuno cjiro mehne jiro sehe jiro nia tiri jire. Ñ jia Leví, to panamana ji turiaina mehne Melquisedere mahanocã wapaina yoaro sehe jia, tina to docai jia nia tiri jire.

¹¹To dutiare cûno Cohamacu Levíre to coyea cûhure sacerdotea ji dutia tiri jire. Ñ jia to dutia ti niriro sehetã tina sacerdotea wahiquinare wajã jû muo, sinibasaa tiri jire Cohamacure masa ya cjihtire. Ti ã yoari mehne mari yuhduna, paio sacerdotere soro sehe jiriro sacerdotere cahma namoera-boã mari. Ñ jina paio sacerdotere cahmaja mari mipure, Melquisede yoaro sehe jirirore. Leví ya curua macariro Aarõ cjiro yoaro sehe jiina sacerdoteare mipure mari cahmaeraja. ¹²Ñ jina sacerdotere mari cohtotana, marine dutia cûhure cohtotaro cahmana marine. (Sacerdotea ti yoadohoa mehne mari yuhdueraro sehetã tí dutia mehne mari yuhdueraja. Ñ yoana tí dutiare cohtota pahõno cahmana marine.) ¹³Aarõ, Leví cûhu ti ya curua macaina dihtare sacerdotea sãa duti muhtaa tiri jimare Cohamacu to dutiare cûno. To ã dutipachuta mipure mari puhtoro sacerdote to sõiro pa curua macariro jira. Tí curua macariro ne sacerdote jierasinire. ¹⁴Tiro Cristo Juda ya curua macariro masa bajuari jire. Tíre mari noano masija. Moise cjiro sehe sacerdotea sõno, Juda ya curua macainare ne cûiro sacerdote sõera tiri jire.

¹⁵Ahrire masina, õ sehe mari noano masija: Mipure wahma to sõiro sacerdote Cristo Melquisede yoaro sehe jiriro jira. ¹⁶Panopu macaa dutia ti niriro sehetã Leví ya curua macaina dihta sacerdotea sãari jire. Mipure to sõiro sacerdote ti yoaro sehe jiriro sacerdote sãaerari jire. Tiro Cohamacu tuua mehne jipihtia dachoripe jiriro jira. Ñ jiro tí tuua mehne sacerdote sãari jire tiro. ¹⁷Õ sehe nina Cohamacu yare ti joari pûi:

“Jipihtia dachoripe sacerdote jirucuihca mûhu.

Melquisede sacerdote to jiriro sehetã sacerdote jirucuihca mûhu, nia tiri jire Cohamacu to macunore”,

ni joaa tiri jire panopu. ¹⁸To dutia to cû muhtari dutiare masa ti bihoerachu yaba cjihti jierari jire. Ñ jiro tí dutiare duti namoerari jire Cohamacu. ¹⁹Moise

cjirore to cūri dutia mehne ne yūhduerara masa. Ā jiro mipu sehere Cohamacu marine to yūhduchu yoahitore marine cūre. To ā yoachu mipure tiro cahapu waha masija mari. Ā yoa tiro mehne durucu masija.

²⁰ Ā yoa Cristore sacerdote sōno, “Yū wama mehne potocā nii nija”, nino tirore sōri jire to Pucuro. Paina sacerdoteare tirore to yoiri sehe wama payo sōerari jire. ²¹ Cristo sehe Cohamacu tuaro to yahuri mehne sacerdote sāari jire. Ō sehe nia tiri jire to Pucuro Cristore:

“Yūhu mu puhtoro yū wama mehne mūhure potocā yahuihtja.

Ahrire ne duhu cūno marieno yahuja mūhure.

Jipihtia dachoripe sacerdote jirucuihca mūhu”,

ni cūa tiri jire Cohamacu to macunore. ²² Ā “Yū wama mehne potocā nii nija”, to nino mehne cūno, wahma buheare noaa buheare marine cūno, marine to yūhduchu yoahitire cūno nia tiri jire. Panopu macaa dutia yūhdoro mari noano jihtore cūno nia tiri jire. Ā cūno Cohamacu “Musare yūhduchu yoihtja”, to niriro seheta yoro taro, Jesure warocari jire marine yūhduchu yoahitiro cjihtore. ²³ Ji muhtaina sacerdotea ti yariachu űua paina cohtota sāana tjoa. Ā jia tina payu sacerdotea wahara. ²⁴ Jesu sehe ā jirucura. Ā jia tirore cohtotaina mariahna sacerdotea. ²⁵ Ā jiro tiro ā jirucuro, Cohamacure ā sini payobasarucura to yaina ya cjihtire. Ā yoa Cohamacu mehne ti ā jirucuhto sehe masare yūhduchu yoa masina tiro. Jipihtina tirore wacū tuaina Cohamacu cahapu wahaahca. Ā jiro Jesu jira pototi tinare yūhduchu yoiri.

²⁶ Ā jiro Jesu jira mari sacerdotea puhtoa bui puhtoro. Tiro pinihtare tuaro cahmaja mari. Ne űaa buhiri marieriro jira tiro. Masa yoro sehe ne űaare yoeare. Ā jiro Cohamacu tirore űaina cahai jirirore naahno, muanopu cū, jipihtina paina bui puhtoro sōri jire. ²⁷ Paina sacerdotea yoro sehe jierara tiro. Tina sehe dachoripe wahiquinare wajā, jū muoa, Cohamacure sinia tihre. Ti basi ti űaa yoiri buhirire sini muhtaa tihre. Baharo paina masa ti űaa buhiri cūhure sinibasaa tihre tina. Ā jia payu tahari tina Cohamacure sinia tihre. Jesu sehe sacerdote jiro, cū tahata to yariaa mehne siniri jire Cohamacure masa ti űaa buhirire cohāno taro. Ā yariaro to basi to pjacure to catia cūhure Cohamacure to waboriro seheta yoro niri jire. ²⁸ Cohamacu dutia Moise cjirore to cūri cjiri sacerdotea puhtoare sāa dutira. Ā sāapahta űaa marieina jierara ā sacerdotea sāa. Tī dutia baharo jia buhea mehne Cohamacu “Yū wama mehne potocā nii nija”, to nino mehne to yahuri buhea mehne to macuno sacerdotea puhtoro sāari jire. Tiro sehe űaa marieriro ā jirucura.

**Cohamacu “Musare yūhduchu yoihtja”, ni cūha tjoa Moise
cjirore to cūrire cohtotaro. Tíre yahubasariro jira Jesu**

8 ¹ Tī jipihtiare yahuna, ahri pinihtare musare yahuna nija: Musare sā yahuriro sacerdotea puhtoa bui puhtoro tiro pini mari yairo waro jira. Muonopu Cohamacu tua yūhduariro to puhtoro dujiro cahai to potu buhusehei dujira Cristo mari sacerdotea puhtoro. ² Ā jiro ahri yahpa macari wūhui, masa ti yoiri wūhui sacerdotea dahraare yoeerara tiro. Muonopu jiri wūhupure mari puhtoro to yoiri wūhupure sacerdotea dahraare yora tiro. Tī wūhu pinihta Cohamacu waro ya wūhu jira.

³ Jipihtina ahri yahpa macaina sacerdotea puhtoa wahiquinare wajā jū muoa, wara, Cohamacure űo payoa. Āta yoa dutia tiri jire tinare. Mari yairo sacerdote

cūhure wa dutia tiri jire Cohamacure mari ño payohto sehe. Mari ñaa buhirire tirore wa dutia tiri jire. Ñ jiro Cristo mari ñaa buhiri yariaro wahchechu yoari jire Cohamacure sacerdotea puhtoa Cohamacure waa ti wahcheriro seheta.

⁴Mari judio masa mari dutia ti niriro seheta ahri yahpapu sacerdotea masa ti ñaa buhirire wara Cohamacure sinia. Ahri yahpapu sacerdotea ji tuhsura. Ñ jiro Jesu sehe mari yairo sacerdote ahri yahpapu jisinino, sacerdote jieraboa tiro sehe. ⁵Ahri yahpa macaina sacerdotea ti dahraare ahri yahpa macari wuhuihta dahrara. Tí wuhui Cohamacure ti ño payorire ñuna muano macari wuhupure tirore mari ño payohtore masi cureja. “Tí wuhu yoaro sehe jira”, nino nia tiri jire Cohamacu tūcui Moise cjirore to wuhure dahre dutiro. To ã dahrehto panocã Cohamacu õ sehe nia tiri jire tirore: “Tūcui muhure yu ñoriro seheta tí wuhu to jiriro seheta yu ya wuhure quihōno dahrega”, nia tiri jire Cohamacu tirore.

⁶Mipu sehene Jesu sacerdote jiro to dahraa paina sacerdotea ya dahraa yuhdoro jira. Wiho waro jierara. Cohamacu marine “Musare yuhdachu yoihtja”, to ni yahuri cjiri panopu macaa dutia Moise cjirore to cūri dutia yuhdoro jira. Marine to yahuri cjiri tí dutia yuhdoro marine noano jichu yoaahca. Ñ jiro marine Cohamacure yuhdachu yobasariro jiro, Cristo sehe paina sacerdotea yuhdoro jira.

⁷Wahmanopure to dutiri cjiri mehne mari yuhdueraja. Tí dutia mehne mari yuhdachu, paye buheare cūeraboa Cohamacu. ⁸Wiho mejeta tí dutiare ti yoa pahño masierarire yahuro õ sehe nia tiri jire to yainare Israe masare:

“Õ sehe nina mari puhtoro: ‘Noano tuhoga.

Baharopu paye buheare “Õ sehe yoadohoihtja musare”, ni yahuihtja yu yainare Israe masare, Juda ya curua macaina cūhure.

⁹Tí buhea ti ñachusuma cjirire yu yahu cūri cjiri yoaro sehe ne jisi.

Yu basi tinare Egipto yahpai jiinare na wiocu tinare yahumai.

Yu ã ni yahurire yuhdurucare tina.

Ti ã yoaachu ñucu tinare ã ñunocahi.

¹⁰Ñ jicu baharopu Israe masare õ sehe ni yahuihtja: Yu dutiare tinare wacūchu yoihtja.

Ñ jia yu dutiare yuhtiahca.

Ñ jicu yuhu Cohamacu ti puhtoro, tinare ñu wihboriro jiihtja.

Tina sehe yu yaina masa jiahca.

¹¹Ñ jia tí pjare tina mehne macainare ne tina õ sehe cahma nisi: “Mari puhtoro Cohamacure masiga musa”, ne ni cahma buhesi.

Tina jipihtina yuhure masi tuhsuahca.

Wihāinacā, bucuna cūhu yuhure masiina dihta jiahca.

¹²Ñ jicu ti ñaa yoari buhirire boihca yuhu.

Tinare buhiri dahresi yuhu.

Ti ñaa yoari buhirire pari turi wacūsi yuhu’, nia tiri jire mari puhtoro”, nina Cohamacu yare ti joari pūi. ¹³Mipure marine wahma buheare cūno, panopu macaa dutiare duhuro nire. Ñ yoa muna dutia cjirire mahanocā to duhuri baharo tí dutia cjiri cohtotaa wahara.

**Ahri yahpa macari tahtiare muano macari tahtia
cūhure Cohamacure ño payori tahtiare yahuha**

9 ¹Wahmanore Cohamacu to dutiare Moise cjirore cūno masa tirore dohse ti ño payohto cūhure cūa tiri jire. Ñ yoa Cohamacure ti ño payohti

wuhũ cũhure yoa dutiro cũa tiri jire. ²Tí wuhũ wahiquina cahsari wuhũ jia tiri jire. Pua tahtia cjuaa tiri jire. Pjiwacũri tahtia ti sãa su muhtari tahtia Cohamacũ ya tahtia wama tia tiri jire. Tí tahtiai ti sihã buhriade jia tiri jire. ã jiro mesa cũhũ jia tiri jire. Tí mesa bui Cohamacure ti wari pão pisaa tiri jire. ³Pa tahtia suhti cahsari mehne ti ducataru tahtia jia tiri jire. Tí tahtia Cohamacũ to jiri tahtia waro wama tia tiri jire. ⁴Tí tahtiai uru mehne ti yoari altar, inciensore ti jũ muori altar jia tiri jire. ã yoa uru noaa mehne ti duhu òri caro tói coãa tiri jire. Tí caro puhichapũ uru wahwa manã wama tia chua posa tiri wahwa jia tiri jire. ã jiro tí caro puhichapũ Aarõ to tjuadu cjiro pũri tidũ jia tiri jire. ã yoa pua pjĩ tãa pjĩni Cohamacũ to dutiare to joa òa pjĩni cũhũ tí caro puhichapũ sãa tiri jire. ⁵Tí caro bui puaro anjoa masũ jia tiri jire. Tí masũ Cohamacũ to si siteare, tí tahtiai to jiare ñoa nia tiri jire. Tí caro mohano bui ti wua dupuri mehne mohaa tiri jire. Tí caro mohano bui masa ñaa buhirire ti warire wajã site payoa tia tiri jire sacerdotea puhtoro. Tó purota yahuihtja ahri wuhũ macaare mipure.

⁶ã yoa tí wuhure ti noano cahnori baharo sacerdotea dachoripe ti sãa su muhtari tahtiai sãa su, ti dahraare yoa tia tiri jire. ⁷Sacerdotea puhtoa bui puhtoro dihta pa tahtiapũ sãa tiri jire. Cuhmaripe cũ tahata to sãari dacho baroihta sãa tiri jire tiro. ã sãano ti wajãriro wahiquiro ti wariro dire na sãano, Cohamacure ño payoa tiri jire. Di marieno ne sãaera tiri jire. To basi wacũenoca to yoari buhirire, to ñaa buhirire, jipihtina paina Israe masa wacũenoca ti yoari buhirire, ti ñaa buhirire dire na sãa tiri jire tiro Cohamacure sini payoro taro. ⁸Jipihtia ahri mehne Espíritu Santo ò sehe ni marine buhero nina: Tí wuhũ Moise cjirore to cũri wuhũ mari ño payosinina, to cũri dutiare yoahina jisninina, wiho jiina Cohamacure ño payona wahaeraboa mari. Sacerdotea puhtoa bui puhtoro dihta Cohamacũ to jiri tahtia waropũ sãa masina. ã jina wiho jiina ti ño payoa wahaeraro seheta ãta jiboa mari cũhũ Moise cjirore to cũri dutiare cjuasinina. ⁹Ahri jipihtiare Cohamacure ño payori wuhũpũ jiare marine cũno, marine mipũ macainare buhero niri jire Cohamacũ. Wahiquinare wajã jũ muoa, masa Cohamacure ti ño payori mehne ne Cohamacũ cahapũ wahasi. Ti ã yoari mehne ti ñaa yoari buhirire cosawerara. ¹⁰ã wahiquinare waa, ti chua, ti sihnia, ti pjacu cosaa, ti ò sehe yoa mehne Cohamacure ño payoa timari jire. Ahri ti ã yoari wiho warota jira mipure. ã yoa tí dutia Moise cjirore to cũri dutia marine noaina wahachũ yoaerari jire. Tí dutiare yoapanahata munanota jirucunocaja mari. Mari tuhutuare cohtotaeraja mari. ã jia wahma buheare Cohamacũ to cũri baharo muna dutia sehe yaba cjihti jierara.

¹¹Cristo sehe mari sacerdotea puhtoro jiro ta tuhsuri jire. ã jiro marine noaare cũ tuhsuri jire. Cohamacure ño payori wuhũ muanopũ sacerdotea puhtoro to dahrari wuhũ paina sacerdotea ti dahraa wuhuse yuhdoro noari wuhũ jira. Muano macari wuhũ jira. Tí wuhũ ahri yahpa macari wuhũ jierara. ã yoa masa ti yoari wuhũ jierara.

¹²Cristo muanopũ Cohamacũ to jiro waropũ cũ tahata sãari jire mari ñaare yoari buhirire Cohamacure waro sehe yoaro taro. Tõpũ muanopũ õpũ to jiri tahtia waro yoaro sehe jira mari piti dahre buhechũ. ã yoaro cabritoa dire, wachuacã dire na sãa, waerari jire tiro. Tiro sehe to ya di warore Cohamacure to waro sehe yoaro niri jire yariaro. Jipihtia dachoripe Cohamacũ

mehne mari jirucuhto sehe to dire cohāri jire. Mari ñaa buhirire yariari jire. ¹³“Yariainare pihana musa pjacu wete tiina jira”, ni cūa tiri jire Cohamacu Moise cjirore. Tó sehe jia ñaare wete tiare cosawea tiri jire cabritoa dire ti wari mehne. Wachua dire ti wari mehne, wachuacāre ti jūri nitine ti wari mehne tó sehe jia ñaare cosawea tiri jire. ¹⁴Tó sehe jia ñaare wahiquina dire ti wari mehne, nitine ti wari mehne ti cosaweriro seheta tí yuhdoro Cristo sehe to dire to cohāno mehne mari ñaare yoarire noano cosawe pahñonocahna. Tiro ñaa marieriro jiro, crusapu yariaro to basita to pjacu to catia mehne Cohamacure waro sehe yoari jire. Espiritu Santo ã jirucuriro to yoadohoa mehne ã yoari jire tiro. Æ yoa mari ñaa yoari buhirire Cristo to cosawechu ñūno mari ñaa buhirire Cohamacu bonocahno, mari ñaa yoarire duhuchu yoara. Tí ñaa buhirire cjuasinina pichacapu wahahtina jimai mari. To cosawerina jina, Cohamacu catiriro yare yoina jija mari.

¹⁵Æ jiro “Ô sehe musare yuhdachu yoihtja”, masare Cohamacu to ni yahu cūchu Cristo sehe to yahuaire yahubasariro jira. Æ yahubasara tiro Cohamacu to beserinare yuhdachu yoaro taro. To ã yuhdachu yoachu jipihtia dachoripe tiro mehne jirucunahca mari to yaina. Æ jina mari to yainare Cohamacu to wahtire cjuanahca mari. Moise cjirore to cūri dutia dihta jichu masa ti ñaa buhiri jisinia tiri jire. Æ yoa crusapu yariaro tí pjata ti ñaa yoari buhirire yuhdachu yoari jire tiro to yainare. ¹⁶⁻¹⁷Masuno baharo to coyeare to wahtire joa ôyura papera pūi. To wahtire yahuro taro joa ôyura. Tí pūre joa ôyuriro to yariaerasinichu tí pū yaba cjihti jierara. To coyea to cjuarire na masierasina. Wiho mejeta, to yariachu ñua tí pūi to ni joariro seheta to yare naahca tina. ¹⁸To yariahto pano tí pū to yaba cjihti jieraro seheta yariaro marieno di wijaro marieno Cohamacu Moise cjirore to cūri dutia cūhu ne yaba cjihti jieraboa. Æ jiro wahiquiro dire sacerdote to wajā siteri baharo to dutiare quihōnota yoaro nia tiri jire. ¹⁹Æ yoaro ô sehe yoa muhtaa tiri jire Moise cjiro: Cohamacu to cūri dutiare masare yahu pahñoa tiri jire. Baharo wachuacā dire, cabritoa dire co mehne morea tiri jire. Tuhsu, hisopo wama tidu dapu mehne oveja pjoari sohāa mehne ti ñimiori pjoarire torēa tiri jire. Tí dapu mehne dire soharo, Cohamacu dutiare to joari tju bui wajā site payoa tiri jire. Jipihtina masa bui cūhure wajā site payoa tiri jire. ²⁰Æ yoaro ô sehe nia tiri jire tiro: “Cohamacu marine to yahuri cjiri to dutiri cjiri ahri di mehne ti potocā jichu masija mari. Ahri dire ñūna to niriro seheta marine to yoahtire masija mari. Tí dutiri cjirire yuhti dutiri jire tiro marine”, nia tiri jire Moise cjiro. ²¹Æ yoaro masare to yoiaro seheta Cohamacure ti ño payori wuhu wahiquina cahsari wuhure, jipihtia tí wuhui jia cūhure wajā sitea tiri jire. ²²Æ tjira. To dutia ti niriro seheta payu ñaare di cohāno mehne cosawero cahmana. Mahanocā duhsaa ñaare paye baro mehne ti cosawechu noana. Æ jiro Cohamacu mari ñaa yoari buhirire ne bosu to di cohāerachu.

Cristo to dire cohāno, to yaina ti ñaa yoari buhirire cosaweha

²³Tí jipihtia Cohamacure ti ño payori wuhu, tí wuhui jia cūhu muano macari wuhui jia yoaro seheta jiri jire mari piti dahre buhechu. Muano macari wuhu sehe potocāta Cohamacu ya wuhu waro jira. Æ jia ahri yahpa macari wuhure, tí wuhui jia cūhure wahiquina dire to wajā siteri mehne cosawero cahmari jire. Tí yuhdoro muanopu wahahtinare ti ñaa buhiri

cjuainare cosawero cahmana. Ñ jiro wahiquina yuhdoro jiriro ya di to cohãno mehne tinare ti ñaa yoari buhirire cosawero cahmana. ²⁴ Ñ yoa Cohamacure ti ño payori wuhũ masa ti yoari wuhũ jira. Muano macari wuhũ yoaro seheta jira tí wuhũ cũhũ, mari piti dahre buhechu. Ñ jiro Cristo sacerdote jiro marine sini payobasaro taro ahri yahpa macari wuhũre sãaerari jire. Potota muanopũ wahari jire tiro Cohamacũ panoi marine sini payobasaro taro. ²⁵ Mari judio masa mari sacerdotea puhtoa bui puhtoro cuhmaripe Cohamacũ to jiri tahtia waropũ sãa tiri jire wahiquina dire waro taro. Cristo sehe to dire Cohamacure waro sehe yoaro taro, yariaro payũ tahari sãaerari jire. ²⁶ Payũ tahari yariariro jiro, ahri yahpa to jiro puro payũ tahari variaboa tiro. Payũ tahari tiro mari ñaa buhirire yariarucuriro jiboa. Wiho mejeta pihtiri dacho panocã mipure marine jipihtinare yuhdũchu yoaro taro cũ tahata bajuari jire tiro ahri yahpai. Ñ bajuari jire to yariaa mehne mari ñaa buhirire cohãno taro. ²⁷ Jipihtina masa cũ tahata yariaahca. Ti ã yariari baharo masa noainare, ñaina cũhũre beserohca Cohamacũ. ²⁸ Cũ tahata mari yariaro seheta Cristo cũhũ cũ tahata yariari jire payũ masa ti ñaa yoari buhirire cohãno taro. Baharo pari turi tarohca. Mari ñaa yoari buhirire cohã tuhsuriropũ jirohca. Ñ jiro pari turi mari ñaa yoari buhirire cohãno taro nisi. Ñ taro tirore cohtainare wahchea mehne tirore ñũ duainare yuhdũchu yoaro tarohca.

10 ¹ Cohamacũ to dutia Moise cjirore to cũri cjiiri noaa buhea yoaro seheta jipahta, cãno potori jierara. Tí dutia ti yoa dutiriro seheta cuhmaripe wahiquinare wajã, jũ muo, Cohamacure ño payorucura. Ti ã yoa mehne masa ti ñaa yoari buhirire cohãerara. ² Tí mehne ti ñaa yoari buhirire cohãa, cũ tahata Cohamacure ti ño payori baharo “Mipure ñaa buhiri mariahna sãre”, ni tuhotuboa masa. Ñ jia pari turi wahiquinare wajã jũ muo Cohamacure ño payoeraboa. Ti ã yoirire duhunocaboa. ³ Cuhmaripe wahiquinare wajã jũ muo, Cohamacure ti ño payochũ tí tinare ti ñaa yoari buhirire wacũchu yoara. Tó purocãta yoadoho duara tí tinare. ⁴ Wachua di mehne mari ño payori mehne, cabrito di mehne mari ño payori mehne ne mari ñaa yoari buhirire cohãerara.

⁵ Tí potocãta jira. Ti ã jichũ ñũno Cristo ahri yahpapore to tahto pano ñ sehe nia tiri jire Cohamacure:

“Wahiquinare jũ muo ti wachu, trigo pohcare ti wachu cũhũre muhũ
ñũcu ñũ ji coaerara muhũ.

Ñ jicu yũ pjacure yoare muhũ yũ ya pjacu cjihtore.

⁶ Ñaa yoari buhirire ti cohãhtore wahiquinare wajã ti jũ muochũ ñũcu
ñũ ji coaerara muhũ.

⁷ Mu ã ñũ ji coaerachũ ñũcu ñ sehe nihi muhũre:

‘Õi jija. Mu cahmano seheta yahpapu yoai wahaihtja.

Áta yuhũre ni yahura mu ya tjupu’, nihi yuhũ”,

nia tiri jire Cristo to Pucurore. ⁸ “Wahiquinare jũ muo ti wachu ñũcu, trigo pohcare ti wachu cũhũre ñũcu ñũ ji coaerara muhũ”, ni yahu muhtaa tiri jire tiro. Wahmanopure to dutia wahiquinare, trigo pohca cũhũre ti waa mehne ti ño payo dutipachuta ã nia tiri jire tiro. ⁹ Ñ ni tuhsũ ñ sehe ni namoa tiri jire: “Õi jija. Mu cahmano seheta yahpapu yoai wahaihtja”, nia tiri jire. To ã nichũ ñ sehe masija mari. Panopũ wahiquinare wajã jũ muoa mehne ti ño

payori cjiire duhuchũ yaro paye buhea sehere cũno niri jire Cohamacũ. Ā cũno mipure Cristo to yariaro mehne masare yuhduchũ yorohca Cohamacũ. ¹⁰ Jesucristo to pjacure waro, yariaro, jipihtina mari to yainare mari ñaa buhirire cohãri jire. Cũ tahata to pjacure wari jire mari ñaa yari buhirire cohãno taro. Ā yaro Cohamacũ to cahmano seheta yaro niri jire.

¹¹ Jipihtina mari judio masa mari yaina sacerdotia dachoripe Cohamacure ño payori wuhũ dahrarucura. Ā dahrarucua dachoripe munanota wahiquinare wajã, jũ muo, Cohamacure sinirucura. Ti ã wajã jũ muopachuta tí mari ñano yari buhirire ne cohãerara. ¹² Cristo sehe cũ tahata mari ñaa yari buhirire yariaro, mari ñaa yari buhirire noano cohã pahñonocari jire. Tíre cohã tuhsũ wahaa wahari jire to Pucuro cahapũ to poto buhusehei dujiro waharo. Puhtoro jiro tópu dujira. ¹³ Tópu dujiro cohtaro nina. Tiore ñũ tuhtiinare Cohamacũ sehe to yuhdurucabasahore cohtaro nina Cristo. ¹⁴ Ā jiro cũ tahata to yariaro mehne ti ñaa yari buhirire to cohãbasarinare ñaa buhiri marieina ti ã jirucuchũ yaro tiro. ¹⁵ Tí potocã tjira. Āta ni yahura Espiritu Santo marine. Ō sehe ni yahura tiro:

¹⁶ “Ō sehe nina Cohamacũ: ‘Baharopure ō sehe ni yahuihtja Israe masare, “Yũ dutiare ti wacũapũ cũihtja”’, ni yahuihtja”,

nina tiro. ¹⁷ Ō sehe ni namona Cohamacũ:

“Ti ñaa yari buhirire yũ dutiare ti yuhdurucari cũhure pari turi wacũ namosi yuhũ’, nina tiro”,

ni yahura Espiritu Santo. ¹⁸ Mari ñaa yari buhirire to ã bochu pari turi mari ñaa yari buhiri yariahtiore cahmaeraja mari.

Cohamacũ cahai sũna cuiro marieno tiro mehne mari durucuboriro seheta tiro mehne durucu masija mipure

¹⁹ Ā jina yũ coyea Cristo to yariaro mehne to di cohãno mehne mipure mari cũhũ cuiro marieno Cohamacũ to jiri tahtia waropũ sãana, tiro mehne durucu masija. Ā yoana tiore sini masija. ²⁰ Mari catirucuhto cjihtore Cohamacũ marine ã coã yaro niri jire. Cristo sehe mari ñaare yari buhirire yariaro to di cohãri mehne Cohamacũ mehne durucu masija mari. Sacerdotia puhtoa bui puhtoro tí tahtiapũ to sãariro seheta Cristo sehe Cohamacũ cahapũ sũri jire mari ñaa yari buhirire bo dutiro waharo. Tí tahtia macari suhtiore ducaturi suhtiore to tuhrẽ cohãboro seheta Cristo to pjacure cohãri jire Cohamacũ mehne mari jirucuhto sehe. ²¹ Ā jiro Cohamacũ ya wuhũ dahrariro mari Yairo Sacerdote tua yuhduariro jira tiro. ²² Ā jina Cohamacure sinijihna mahñono marieno. Tiore noano wacũ tuua mehne, cuiro marieno tiore sinijihna. Cristo mari ñaa yari buhirire to cosawinapũ jija. Ā jina “Buhiri tiina jija mari”, ni tuhotuina jieraja mari. Ā yoa wete mariea co mehne mari cosawero seheta Cristo to cosawinapũ jija. Ā jiina jina Cohamacure sinijihna. ²³ “Musare yuhduchũ yoihtja”, to niriro seheta yorohca. Ā jina tiro marine to yuhduchũ yoahtore noano masija mari. Tíre masina, ne boena tjijihna. Cohamacure ã wacũ tuarucujihna. ²⁴ Mari mehne macainare cahĩna, tinare yoadohojihna mari jipihtina mari cahma cahĩ yoadohohoto sehe. ²⁵ Ā jina noano cahmachurucujihna Cohamacũ yare yoana tana. Paina sehe ti cahmachumariore duhua nina. Tina yaro sehe yoana tjijihna. Mari mehne macainare wahchechũ yojihna. Ahri yahpapore mari puhtoro

to tahto mahanocā dūhsara. Tíre masina tuaro wahchechū yoajihna mari mehne macainare Jesu yainare.

²⁶Potocā jia buheare noaa buheare mari masipanahta ñaare mari pari turi ā yoarucuchū mari ñaa yoari buhirire cosawe namohto basioerara. ²⁷Ā jiro tó sehe yoainare cua nina. Jipihtina tirore ñu tuhtiinare buhiri dahrero, tuaro jūnoi cohānohca Cohamacū tinare. Ā jia to buhiri dahrehtore cuiina dihta jimana tirore duhuina. ²⁸Cohamacū dutia Moise cjirore to cūri cjirire yūhdurucainare buhiri dahrea, mari coyea judio masa wajāna tinare. Ne pja ñuno marieno wajāna tinare. Tiaro ti yahusāchū tūhoro beseriro ti yūhdurucarire masino tinare buhiri dahre dutira. Tiaro mariachū puaro ti yahusāchū tinare buhiri dahre dutira. To ā dutichū tinare wajāna. ²⁹Tí yūhdoro Cohamacū macunore ñu yabiina to buhiri dahrehtina jiahca. Cohamacū Cristo to di cohāno mehne mari ñaa yoari buhirire cohāna. To ā cohāhtore yahuri jire tiro marine. Ā jia tina ti ñaa yoari buhirire cohārīna jipahta baharo pari turi ñaare yoarucua ti ñaa yoari buhirire to cohārīre to di cūhure “Wiho waro jira”, nia nina. Ā niina, to buhiri dahrehtina waro jia niahca. Ā niina Espíritu Santore ñano ni durucuina jira. Tiro tinare cahīro jira. Ti ā ñano durucuchū ñuno tuaro buhiri dahrerohca Cohamacū tinare. ³⁰Ahrīre mari noano masija. Cohamacū to basita ō sehe nia tiri jire: “Yūhū jija buhiri dahrehtiro. Ti ñaare yoari buhiri buhiri dahreihtja yūhū”, nia tiri jire tiro. Ō sehe ni namoa tiri jire: “Yūhū ñano yoainare yū yainare buhiri dahreihtja”, nia tiri jire tiro. ³¹Cohamacū catiroro marine to buhiri dahrechū cua yūhduara.

³²Panopū musa jirire wacūga musa. Tí pjare Cohamacū yare wahma masi ducana payū tahari ñano yūhdūpanahta to yare duhuerare musa. ³³Cāa tahari masa ti ñurocaroi paina musare ñano ni, ñano yoapere musare. Paina Jesu yainare ti ñano yoachū ñuna, tinare pja ñu, tinare piti tire. ³⁴Ti peresu yoainare pja ñure musa. Tuhsū, musa yare ti mapachuta wahchea mehne, “Noanohca”, nire musa. Ahri yahpa macaa yūhdoro noaare cjuara musa muanopū. Tí noaa ā jirucuahca. Tíre masina, musa cjuaare ti machū cahyaerare musa. ³⁵Ā jina cuiena tjiga. Cohamacūre ā wacū tuarucuga. Musa ā yoachū ñuno tiro noano yorohca musare. ³⁶Cohamacū “Musare ō sehe yoadohihtja”, to ni cūrire noano cohtaga musa ñano yūhdūpanahta. Ā cohtaina jina to cahmaare yorahca musa. Ā yoana to ni cūrire cjuanaahca. ³⁷Ō sehe nina Cohamacū yare ti joari pūi:

“Mahanocā dūhsara Cristo to wihihto.

Ā taro dói wihi bahrañonohca.

³⁸Yū yaina noaina sehe yūhure wacū tuarucuahca.

Ā yoaa yaina jirucuahca.

Yūhū mehne ā jirucuahca.

Yū yare cohāina sehere ñu yabija yūhū”,

nia tiri jire to ya durucua ti joari pūi. ³⁹Mari sehe Cohamacū yare cohāina jieraja mari. Ā jina pichacapū wahahtina jieraja mari. Cohamacūre wacū tuaja mari. Ā jina to yūhduchū yoina jija.

Wacū tuaare yahuha

11 ¹Ō sehe jira wacū tuaa: Cohamacūre wacū tuana, marine to noano yoahtore noano masija mari. Cohamacū to niriro seheta to

yoerasinipachuta to yahuare “Potocā tjira”, ni tuhoutuja mari tirore wacū tuana. Tirore ñuerapanahuta, tirore wacū tuana, “Potocā tjira”, ni tuhoutuja mari to yahuare tuhona. ²Panopu macaina Cohamacure ti wacū tuachu ñuno ñu ji coaa tiri jire tiro sehe.

³Cohamacu to durucua mehne jipihtiare bajuamehnea tiri jire. Ā jiro tiro mari ñuerari mehne jipihitia mari mipu ñuare bajuamehnea tiri jire. Tíre mari noano masija Cohamacure wacū tuana pinihta.

⁴Cohamacure wacū tuaro Abe sehe corderore wajā, jū muo, Cohamacure ño payoro “Noana”, nia tiri jire. To wahmino Caī yuhdoro noanore waro, ño payoa tiri jire tiro Cohamacure. Ā jiro Cohamacu to warire wahchea tiri jire. Ā wahchero “Noariro jira”, ni ñua tiri jire tiro Abere. Ā Cohamacure to wacū tuachu ñuna mari tirore ñu cūja. To yariari baharo jipachuta to wacū tuarire ñu cūja mari.

⁵Enoco Cohamacure to wacū tuachu ñuno wahchea tiri jire Cohamacu. Ā wahchero tirore to cahapu na mūoa tiri jire. Āta nina Cohamacu yare ti joari pūi. To na mūori baharo ne masa tirore bocaera tiri jire. To na mūoriro jiro ne yariaera tiri jire. ⁶Cohamacure wacū tuaerana, tirore wahchechu yoa masieraja mari. Cohamacure wacū tuaerana, tirore ño payo masieraja mari. “Potocāta tiro Cohamacu warota jira. Ā jiro tirore mari ño payochu marine noano yora tiro”, mari ni tuhoutuera tirore sini masieraja mari.

⁷Noé Cohamacure wacū tuaro, tirore to yahurire noano yuhtia tiri jire. Baharopu ti ñano wahahtore to yahuchu tuhoro noano yuhtia tiri jire tiro. Ā yuhtiro, pjiria dohoriare yoa tiri jire. Ā yoa tia dohoria mehne tiro to coyea mehne dia mininore yuhdua tiri jire. Ā wacū tuariro jiro ahri yahpa macaina ñaina ti wacū tuaerare ti pichacapu ti wahahto cūhure ñono nia tiri jire. Ā jiro to wacū tuachu ñuno “Noariro jira”, ni ñua tiri jire Cohamacu tirore.

⁸Abrahā cjiro cūhu Cohamacure wacū tuaro tirore yuhtia tiri jire. Pa dihtapure tirore to wahti dihtapure Cohamacu to waha dutichu tuhoro Abrahā yuhtia tiri jire. To ya dihtai jiro wjaa waharo, to masierari dihtapu sua tiri jire. ⁹“Ahri dihtare mūhure waihtja”, Cohamacu to nichu tuhoro tirore wacū tuaro tí dihtaihta tjuaa tiri jire tiro. Tói jiro pa dihta macariro jiparota tóihta tjuanocaa tiri jire. Tirore, to macuno Isaa cūhure to panamino Jacobo cūhure tina cañare “Ahri dihtare musare waihtja”, ni yahua tiri jire Cohamacu sehe. Ā jia tina tí dihtai jia, waihuina cahsari wuhusei jia tiri jire munano jie-raina jia. ¹⁰Tói jisinia tiri jire Abrahā Cohamacu mehne to jihtore cohtaro. Pa macapu Cohamacu to jiri macapu muanopu to wahahtore cohtaro nia tiri jire tiro. Tí macare dahrea tiri jire Cohamacu. Ā jiro tí maca ne pihtisi.

¹¹Cohamacure wacū tuaro Abrahā cjiro bucuro waro jiparota, to namono Sara mehne pohna tia tiri jire. To namono pohna marienicoro to jipachuta, “To niriro seheta yorohca”, Cohamacure nino, tirore wacū tuaro pohna tia tiri jire Abrahā. ¹²Ā jiro Abrahā bucuro waro jiparota pohna tia tiri jire. Ā jia to panamana ji turiainapu payu wahanocari jire. Ñahpichoha perire, padu pohcaricā cūhure mari quihōna bihoeraro seheta to panamana ji turiaina cūhure quihōna bihoeraja mari.

¹³Jipihitia ahrina yu yahuina cjihipu Cohamacure wacū tua tuhsuinapu yariaa tiri jire. Cohamacu tinare “Musare waihtja”, to ni quihō cūrirore sue-rapahta yariaa tiri jire. Tíre ñahaerapahta Cohamacu to niriro seheta yoari

pja baharopu ti cjuahdire masia tiri jire. Ñ masia wahchea tiri jire. Ñ jia õ sehe nia tiri jire tina: “Ahri yahpai tiniina jija. Pa yahpa macaina jija”, nia tiri jire tina. ¹⁴Tó sehe niina pa yahpare ti ya yahpa cjihtore cohtaa nina. Tíre mari noano masija. ¹⁵“Pa yahpa macaina jira”, nicu panopu ti cohāri yahpare nicu nieraja. Pa yahpapu ti ji muhtari yahpapu waha duaa, wahaboa. ¹⁶Noa yuhduari yahpa sehere cahmaa nia tiri jire. Tí yahpa muanopu jira. Ti ã cahmachu ñuno “Cohamacu sã puhtoro jira”, ti nichu tuhoro buo tierara Cohamacu. Ti ya maca cjihtore dahrebasa tuhsua tiri jire tiro.

¹⁷⁻¹⁸Cohamacu Abrahāre to macunore Isaare wajã jũ muo dutia tiri jire. Tirore ñu duaro ã dutia tiri jire, “¿Potocāta yuhure wacũ tuajari?” nino. Cohamacure wacũ tuaro to niriro seheta yoaa tiri jimare Abrahã. “Mu macu Isaa mehne mu panamana ji turiainare payu cjuaiha muhu”, Cohamacu to niriro jipachuta to macunore wajãno taro nia tiri jimare Cohamacure ño payoro taro. ¹⁹“Yu macu Isaare yu wajachu Cohamacu tirore masonohca”, ni tuhoturo tirore wajãno taro nia tiri jimare. Ñ niriro jiparota Cohamacu tirore ducata, wajã dutiera tiri jire. To pucuro to ã wajaboriro jiro, masariro yoaro sehe jia tiri jire Isaa, Abrahã to ñuchu. Ñ jiro Abrahã tirore catirirore pari turi cjuaa tiri jire.

²⁰Isaa Cohamacure wacũ tuaro, to pohnare Jacobore, Esaú cūhure “Baharopu Cohamacu musare pjíro noano yorohca”, nia tiri jire. ²¹Cohamacure wacũ tuaro Jacobo to yariahto panocã José pohnare, muare “Cohamacu musare pjíro noano yorohca”, nia tiri jire Jacobo. Na tuhcuca caha su, to tjuadu mehne tjua ñaha caha su, Cohamacure ño payoro, “Cohamacu musare noano yorohca”, ni cūa tiri jire. ²²Cohamacure wacũ tuaro José to yariahto panocã Israe masa Egiptoí jiina ti wijaahore yahuyua tiri jire. Ñ ti wijaahore masiyuro to yariari baharo to pjacu cjirore naa dutia tiri jire to pohnare.

²³Cohamacure wacũ tuua, Moiscẽre tia sũ waro nuo cjuaa tiri jire to pucusuma, to masa bajuari baharo. Noarirocã to jichu ñua tirocãre nuoa tiri jire. Tí yahpa macaina bui puhtoro ti pohnare to wajã dutirore yuhdurucanocaa tiri jire tina. Tirore cuiera tiri jire. ²⁴Moise cjirore bucuoricoro Egipto yahpa macaina bui puhtoro macono jia tiri jire. Ñ to bucuoriro jiro Cohamacure wacũ tuaro “Ticoro macuno”, tirore ti ni pisuchu cahmaera tiri jire Moise. ²⁵Cohamacure yuhdurucariro jiro tirore bucuoricoro cahapu mahaa numuricã noano jiboa. Ñ jiboriro jiparota tí yuhdoro tiro Cohamacu yaina mehne ñano yuhdu duaa tiri jire. ²⁶Ñ ñano yuhduro Cristore ti bujupehto seheta ti bujuperiro jia tiri jire. Baharopu to noano yoari wapa Cohamacu tirore to noano yoahore masino ñano yuhdu duaa tiri jire Cristo to ñano yuhduho seheta. Jipihina Egipto macaina ti noare ti cjuaro yuhdoro tiro Cohamacu sehere tuaro cahmaa tiri jire. Ñano yuhduparota, Cohamacure cahmaa tiri jire. ²⁷Cohamacure wacũ tuaro, Egipto macaina bui puhtoro tiro mehne to suachu cuieraa tiri jire Moise. Ñ cuieraro tí yahpai jiro tí yahpare cohã wahcãa wahaa tiri jire. Ñ waharo Cohamacure bajuerarirore to ñuboriro seheta cuierariro jia tiri jire. Cohamacu tirore to yoa dutirire ne duhuera tiri jire Moise cjiro.

²⁸Cohamacure wacũ tuaro Moise cjiro Israe masare Cohamacu to yuhduchu yoahore masia tiri jire. Ñ masino Cohamacu to dutiriro seheta Israe masa ti sopacarire õa pjĩnine di mehne wajã site dutia tiri jire tiro. Ti ã

yoachũ ñuno anjo masare wajãriro ti masa wahmisumare wajãboriro Israe masa ti wahmisumare wajãera tiri jire. ²⁹Cohamacure wacũ tuaa, Israe masa “Sohãri ma”, ti niri mapũ co watoi jiri wahsai co marieni wahsai wahaa wahaa tiri jire. Ti ã wahachũ ñua Egipto macaina cũhu tinare ñu cũ, nunu ti wahcãmaa, mini yariaa wahaa tiri jire.

³⁰Cohamacure wacũ tuaa Israe masa Jericó wama tiri maca macari sahrĩno tãa mehne ti yoari sahrĩno sê butiri sahrĩno baharo buhusehei soroa majarea tiri jire. Siete dachori waro tí macare soroa tinia tiri jire. Tópe dachori ti soroa tiniri baharo tí sahrĩno sehte bora pihtia wahaa tiri jire. ³¹Cohamacure wacũ tuaro tó pano mua mehne ñano yoarucuricoro cjiro Rahab wama tiricoro, tí maca macaricoro Israe masare yoadohoa tiri jire. Tí macare ti cohãhto pano mahainacã Israe masa tópu sãa ti duhti ñuchũ ticoro tinare yoadohoa tiri jire. To ã yoadohochũ ñua Israe masa wajãera tiri jire ticorore. Tí maca macainare Cohamacure yuhdurucainare wajãpahta ticoro sehere wajãera tiri jire.

³²Painare Cohamacure wacũ tuainare yahu namoboa yũhũ. ã yahu dua-paihta payũre ã Cohamacure wacũ tuainare yahu joa pahño masieraca yũhũ. Payũ jira tina. Gedeõ, Baraca, Sansõ, Jefté, Davi, Samue, Cohamacu yare yahu muhtaina cũhu ahrina jipihtina yũ yahuborina jira. ³³Cohamacure wacũ tuaina cãina paye yahparipu jia, tí yahpari macainare cahma wajã yuhdurucãa tiri jire. ã yoa paina noano dutiina jia tiri jire. Cohamacu tinare “Musare yoadohoihtja”, to niriro sehta tinare yoadohoa tiri jire. Tiore ti wacũ tuachũ ñuno ã tinare yoadohoa tiri jire. ã wacũ tuaa, yaya tinare ti chũ duachu ti duserire bihachũ yoaa tiri jire tina. ³⁴Tuaro jũri pichacapũ jipahta jũera tiri jire tina Cohamacure wacũ tuaa. Paina tinare ti ñosa wajã duachũ duhti wahcãa wahaa tiri jire Cohamacure wacũ tuaa. Tuairaina jipahta Cohamacure wacũ tuaa, tuaina wahaa tiri jire. Cohamacure wacũ tuaina jia, cahma wajã tuaina jia tiri jire. ã jia paye yahpari macaina surara tinare wajãa taina ne cũno pjaera tiri jire tinare. ³⁵Cãa numia Cohamacure ti wacũ tuachu ñuno ti coyeyã ti yariachũ ñuno Cohamacu sehe tinare maso-basaa tiri jire.

Paina “Cohamacure cahmaena tjiga”, ti ni peresu yoaina ti ñabiario yoapeina Cohamacure wacũ duhuera tiri jire. “Cohamacure musa wacũ duhuchũ musare wionahca”, nia tiri jimare tinare peresu yoaina Cohamacu yainare. Ti ã nipachuta tinare yuhtiera tiri jire Cohamacu cahapũ tuaro waha duaa. ã jia tinare ñabiario ti yoapechu yariaa wahaa tiri jire. ³⁶Painare Cohamacure wacũ tuainare ñano ni bujũpe tinare tjana mujaa tiri jire. ã yoa painare dahporire, yachurire duhtenoca peresu yoaa tiri jire. ³⁷Cohamacure wacũ tuainare ñaina tãa mehne doca wajãa tiri jire. Painare ti pjacurire seroti mehne yihso ta mujaa tiri jire. Painare ñosaa pjĩni mehne ñosa wajãa tiri jire tina. Ti ã ñano yoapeina oveja cahsari mehne, cabra cahsari mehne suhti tiina pjacũina jia tiri jire. ã jia paina tinare ñano yoapea tiri jire. ³⁸Tina Cohamacure wacũ tuaina peri yũ yahuina noa yuhduaina ti jichũ ahri yahpa macaina ñaina tina mehne jiborina jierara. Ahrina Cohamacure wacũ tuaina wuhuse marieina jia, masa marienopũ, tũyucupũ ji sitotaa tiri jire. ã ji sitotaa, tũyucupũ jia coparipu, yahpai jia coparipu cũhure carĩ sitotaa tiri jire. ³⁹Ahrina jipihtina Cohamacure ti wacũ tuachũ ñuno wahchea tiri jire

tiro. Ti ã wacũ tuapachuta Cohamacu tinare “Musare yuhdachu yoaihtja”, to niriro mu sũerasinia tiri jire. ⁴⁰To yuhdachu yoerasinirire yahuro ò sehe ni tuhutua tiri jire Cohamacu. “Ahrina yu yainare baharopu jiina yu yaina mehne cũno potori yuhdachu yoaihtja”, ni tuhutua tiri jire. Æ ni tuhuturo to niriro seheta yoarohca. To ã yoachu noa yuhduara to pano yoariro yuhdoro.

Jesure ã wacũrucujihna mari

12 ¹Æ jina ahrina yu yahurinare payu Cohamacure wacũ tuainare masina, jipihtia ñaa yoaare duhunocajihna mari cũhu. Ò sehe jira mari piti dahre buhechu: Murocaperiroke tiroke muroca tuachu dojomehnea jira paye. To dahpo suhti nucua suhti tiroke muroca tuaerachu yoaboca. Tí yoaro seheta Cohamacu cahmaare mari yoa duachu dojomehnea cũhu jira. Ahri cũhure duhujihna mari. Æ yoana murocapeina soro marieno ti murocaro seheta mari cũhu Cohamacu to cahmano seheta soro marieno yoajihna. ²Æ jina Jesure ã wacũrucujihna mari. Tirota jira marine wacũ tua ducachu yoariro. Æ yoa marine wacũ tua namochu cũhure yoara tiro. Crusapu yariaro cũno pjari jire. Baharo to wahchehtore masino crusapu yariari jire. Æ yariaro buo tiboriro jiparota buo tierari jire tiro. Æ yoaro mipure Cohamacu to puhtoro dujiro poto buhusehei duitjiãhno tiro dutiriro jira.

³Ñaina masa tiroke ti ñabiaro yoapachuta cũno pjari jire tiro. Tíre wacũga musa, musa cũhu ñano yuhduna, “Cũno pjaerari”, nina. Tíre wacũga musa “Tiroke wacũ tua duhuri”, nina. ⁴Jesu to ñano yuhduriro sehe ñaare yoe-rapanahta ñabiaro waro yuhduerasinica musa. Ñaina musare wajãerasinica. ⁵¿Cohamacu musare to pohnare to yahurire bonocajari musa? Musa ñano yuhduhtire to yahurire wacũga musa. Ò sehe nia tiri jire tiro:

“Yu macu, muhure yu yahuchu yuhure ã ñunocai tjiga ñano yuhdupaihta.

Muhure yu tuhtichu tuhocu cahyai tjiga.

⁶Jipihtina yu cahĩinare yahuja.

Æ yoa jipihtina ‘Yu pohna jira musa’, yu ni ñuinare yuhduruca dutieraja.

Æ jicu ti yuhdurucachu ñucu tinare buhiri dahreja”,

nia tiri jire Cohamacu. ⁷Ñano yuhduna Cohamacu yare duhuena tjiga. Cohamacu musare to pohnare buhero nina. Ti pucũsuma ti pohnare ã yahurucura. Æ yoa tinare buherucura. Tó seheta yoara Cohamacu cũhu marine to pohnare. ⁸Cohamacu jipihtina to pohnare ã yahurucura. Æ jina musare to yahuerachu to pohna waro jierara musa. Pucũsuma marieina yoaro sehe jira musa to yahueraina. Æ jina “Sã Pucu waro jira”, ni masierara musa Cohamacure, musare to yahuerachu. ⁹Mari pucũsuma marine ti yahuchu tuhona tinare ño payoja mari. Mari pucũsumare mari ño payoriro yuhdoro ño payoro cahmana mari Pucure Cohamacure to yahuchu. Æ jina tiroke yuhtiro cahmana marine. Æ yuhtiina jina jipihtia dachoripe tiro mehne jinahca. ¹⁰Mahaa nũmũricã ahri yahpai mari jisnichu mari pucũsuma marine yahua, buhiri dahrera. Ti mu suro ti masino purocãta marine yahua, buhiri dahrera. Cohamacu sehe marine noano yahura. Æ jiro to masia mehne marine buhiri dahrera marine noaina bucua dutiro. Æta yoara tiro marine tiro yoaro sehe noaina mari jihto sehe. ¹¹Marine to buhiri dahrechũ wahcheraja mari. Wiho

mari cahyaja. Ā cahyapanahta to ā buhiri dahreri baharo noaina bucuānahca mari. Ā jina soro yoaro marieno noano jinahca.

Cohamacu marine to dutiare mari yuhtierachu cua nina marine

¹² Ā jina wacū tuaera cureina jipanahta Cohamacure wacū tuaina jiga. Tire duhuena tjiga. ¹³ Noano potori mahare musa wahaboro sehta noano potocā yoaga musa. Musa ā yoachu űu cūa, paina Jesu yaina soro jiare yoasi. Musa noano yoachu űu cūa, noano wacū tuaera cureina cūhu wacū tuaina wahaahca.

¹⁴ Jipihtina masa mehne noano jiga, cahmacheno marieno. Ā yoa űano yorucuenta tjiga. űaa buhiri marieina dihta mari puhtoro Cristore űuahca.

¹⁵ Noano yoaga musa. Cohamacu musare to yoadohochu tire noano yuhtiga. űaa diaa ti toaare ti dojomehnenno sehta musa cūhu Cristo yare duhuena tjiga, “Painare dojomehneri”, nina. ¹⁶ Ne numia mehne űano yoina jiena tjiga. Ā yoa Cohamacu yare cahmaeraina jiena tjiga. Cohamacure cahmaerariro jia tiri jire Esaú cjiro. Tiro masa wahmino jia tiri jimare. Ā jiro to pucuro to yariari baharo to pucuro yare cjuah tiro jisinia tiri jimare. Cohamacu to pucuro to ni cūri cūhure cjuah tiro jisinia tiri jimare. Ā jiro jiro cū dacho cū wapailta chuare cahmano, tí wapa mehne to bahuro sehere to wahmino yoaro taro cohtotaa tiri jire. ¹⁷ To ā yoari baharo to dohse waharire masina musa. To pucuro tire to wahtire tuaro cahmaa tiri jimare Esaú. To ā cahmapachuta to bahuro to wahmino to yoari buhiri, baharo to cjuaborire waera tiri jire to pucuro Esaúre. Tíre yahco mehne to sinipachuta tire waera tiri jire to pucuro.

¹⁸ Cohamacu to dutiare Moise cjirore to cūhu mari coyea Israe masa cjiro Cohamacu mehne jia tiri jire. Tina tiro mehne ti jiro sehta musa sehe jierare. Ō sehe yoaa tiri jire tina sehe. Tūcupu Cohamacu mehne jia taa, sua tiri jire. Tu sehe Sinaí wama tidu jira. Tūpu ti suchu tuaro pichaca jūa tiri jire. Ā jiro nahitiano, buiri, tuaro wiñnono cūhu jia tiri jire tu tūcui. ¹⁹ Tópu ti suchu corneta bisiro coa taa tiri jire. Ā yoa durucua bisiro coa taa tiri jire. To ā durucua bisiro coa tachū tuhoa, masa cūno pjaeraa, “Ā durucu namoeno tjijaro”, tuaro ni sinia tiri jire. ²⁰ Cohamacu cuaro mehne ō sehe ni, dutia tiri jire tinare: “Jipihtina ahdū tūcure pihainare taa mehne doca wajāga tinare. Ahdure pihariro wahiquiro waro to jipachuta tiro cūhure taa mehne doca wajāga tire. O űosadu mehne űosa wajāga tire”, nia tiri jire Cohamacu. To ā nichu tuhoa to ā ni dutiare cūno pjaera tiri jire tina. ²¹ Jipihtia tu tūcui jiro to űarire űu cuiro, ō sehe nia tiri jire Moise cjiro: “Cuicu teterei nija”, nia tiri jire tiro.

²² Tó sehta Cohamacu mehne ti ji ducariro sehta jierara musa sehe. Cohamacu mehne jina wahana, Siō wama tidupu muano macadupu musa suboro sehta potota Cohamacu mehne durucure musa. Cohamacu catiriro to ya macapu musa suboro sehta potota tiro mehne durucure musa. Tí maca pa maca wahma maca Jerusalē muano macari maca jira. Tópare payu anjoa peri jira. ²³ Tina Cohamacu mehne wahchea taa cahmachuina jira. Ā jina musa sehe to ya maca macaina jina, tópu Cohamacu pohna ji muhtaina mehne musa cahmachuboriro sehta jira. Tina to pohna wamare to joa ōri pui muanopu ti wamare to joa ōina jira. Tiro Cohamacu sehe jipihtinare

besehtiro jira. Tiro mehne macaina jira msa sehe. Ā jina paina noaina Cohamacu yaina mehne cahmachuina seheta jira msa cūhu. Tinareta űaa marieina jichu yoa tuhsuri jire Cohamacu. ²⁴ Ā jina Jesu mehne macaina jira msa sehe. Wahmanopu Moise cjirore to duti cūri cjirore cohtotaro “Musare yūhdūchu yoaihtja yūhu”, ni cūa tiri jire Cohamacu marine. To ā ni cūiro seheta yoiro jira Jesu. To dire cohā to yariaro mehne ā marine yūhdūchu yoara. Abe cjiro to di cohāchu űuno Cohamacu Abere wajārirore buhiri dahrea tiri jire. Jesu sehe to dire cohā to yariaro mehne noano yūhdūja mari. Ā jiro Abe to di cohāri wiho warota jia tiri jire. Cristo sehe to di cohāri baharo noa yūhdūaro yoari jire Cohamacu marine. Ā jia to di cohāri wiho warota jierara.

²⁵ Ā jina noano yoaga msa. Cohamacu yare msare yahurirore noano yūhtiina jiga. Panopu ahri yahpai jiro Moise cjiro Cohamacu yare to yahuchū tuhoa, payu tīre tuho duaera tiri jire. Ā ti tuhoerari buhirire buhiri dahrea tiri jire Cohamacu tinare. Cristo sehe muanopu jiro Cohamacu yare yahuriro jira. Ā jiro panopu macainare to buhiri dahreriro yūhdoro buhiri dahrerohca Cohamacu Cristore cahmaerainare. Cristo sehe muanopu jiro Cohamacu yare yahuriro jira. ²⁶ Tī pjare Moise cjirore to dutiare to cūri pjare Cohamacu to durucuro mehne yahpa űuhmichu yoaa tiri jire. Mipu sehere ō sehe ni yahuri jire tiro: “Ahri yahpa to űuhmichu cū taha yoa namoihtja. Ahri yahpa dihtare űuhmichu yoasi yūhu. Muanopu cūhure űuhmichu yoaihtja”, ni yahuri jire tiro. ²⁷ “Ahri yahpa to űuhmichu cū taha yoa namoihtja”, nino jipihtiare to bajuamehnerire to cohāhtore masichu yoaro niri jire. Puhtoro Cohamacu to suho jiropure cohāhto basioerara. Ā jiro to bajuamehneri cjirore to cohāchu puhtoro to suho jiro dihta tjuarohca. ²⁸ Puhtoro to suho jiropure wahanahca mari. Ā jina puhtoro to suho jiropure to cohāerachū űuna, Cohamacure “Noana”, nijihna mari. Ā jina tirore űo payoa mehne, cua pisaro mehne to yare yoajihna mari tirore wahchechu yoana tana. ²⁹ Pichaca jūno to cuaro to jiro seheta Cohamacu cuaro choro buhiri dahreriro jira.

Ō sehe Cohamacure wahchechu yoaga

13 ¹ Msa mehne macainare cahī duhuena tjiga. ² Masa msa masieraina ti jipachuta tinare msa wuhusepu noano mehne sāa ta dutiga. Paina ā yoaa, masierapahta anjoare ti wuhusepu sāa ta dutiri jire. Ā jina ti yoaro seheta yoaga msa cūhu.

³ Peresui jiinare pja űuga. Msa sehe tina mehne peresui jiina msa jiboro seheta tinare pja űuga. Paina ti űano yaina cūhure pja űuga. Tina yoaro sehe msa cūhu msa űano yūhdūboro seheta tinare pja űuga.

⁴ Wamomaca duhteina jipihtina msa basi noano cahma űo payoga. Ā yoa paina mehne űano yoaena tjiga. Jipihtina numia mehne űano yoinare, msa mehne űano yoa numia cūhure buhiri dahrerohca Cohamacu.

⁵ Niűerure cahīina ne jiena tjiga. Ō sehe nia tiri jire Cohamacu: “Musare ne cohāsi. Ā yoadohorucuihtja msare”, nia tiri jire tiro. Noho puro msa cjuaa mehne tō purota wahchega. Pjīro cahma namoena tjiga. ⁶ Ā jina cuiro marieno ō sehe ni tuhotunahca mari:

“Mari puhtoro Cohamacu marine yoadohoriro jira.
Ne cuisi mari.

Masa marine ti ñano yoahatore cuisu mari”,
ni tuhutunahca mari.

⁷Cohamacu yare musare yahurinare musare dutirinare wacūga musa. Ña yoa noano ti jia tirire noano ti yoa tirire wacūga. Ña wacūna, Cristore ti wacū tuariro seheta yoaga musa cūhu.

⁸Jesucristo ne cohtotaerara. Panopu, mipu cūhure, baharopu cūhure to jiro sehta jirucurohca tiro. ⁹Payu buheare soro jia buheare tuhoena tjiga musa “Noa buheare sāpu cohāri”, nina. “Ahrire chuga. Ahrire chuena tjiga”, ni buhera caina. Ña ni ti nia buheare mari yuhtichu ti marine yoadohoerara. Ña jiro tó sehe jia buheare mari yochu wiho warota jira. Ti marine wacū tuaina jichu yoerara. Cohamacu sehe marine pja ñuno wacū tuaina jichu yoara. Ña jina to ya tuaa mehne tiore wacū tuaina jiga musa cūhu.

¹⁰Cristo mari ñaa buhirire yariari jire mari ñaare cohāno taro. Sacerdotea sehe ò sehe niina jira: “Wahiquina mari wajā jū muoina, mari waina mehne yuhdunahca”, niina jira sacerdotea. Ña niina ti ñaa yoari buhirire cohāina ne ji masierara. Cristo to crusai to yariaro mehne yuhduina ji masierara tina ña ni tuhutuina. ¹¹Mari judio masa mari sacerdotea puhtoro Cohamacu to jiri tahtia waropu dire na sāano wajā sitea tiri jire, masa ti ñaa yoari buhirire cosawero taro. Ña yoa to wajāriro wahiquiro to pjacure ti maca duhtu cahapu jū cohānolahca. ¹²To yariro sehta Jesu cūhu maca duhtu cahapu yariari jire, masa ti ñaa buhirire to di cohāno mehne cosawero taro. ¹³Maca duhtu cahapu to yariachu ñua, ti ya buheare to cohāchu ñua judio masa puhtoa tiore ñu tuhtiri jire. Ña jina mari cūhu tiro mehne macaina jijihna. Mari ña jichu ñua, masa mari cūhure ñu tuhtiahca. ¹⁴Ahri yahpapu mari ji dojahti maca ne mariaha. Ña jina mipure mari baharopu jihti macare cohtana nija mari. ¹⁵Ña jina Jesu to yoadohoro mehne Cohamacu mehne durucuja mari. Ña jina tiore noano sinijihna. Sacerdote wahiquirore jū muo, Cohamacure to ño payoriro sehta Cohamacure mari duseri mehne noano durucu ño payojihna mari. “Cohamacu tuariro jira”, ni ño payorucujihna. Mari ña nichu tiro wahcherohca. ¹⁶Musa mehne macainare noano yoaga. Ña yoa tinare yoadohoga. Tíre boena tjiga. Musa ña noano yoana Cohamacure ño payona nica musa. Ña yoana tiore wahchechu yoana nica.

¹⁷Musa puhtoare noano yuhtiga. Ti dutiro sehta yoaga. Cohamacu musare ñu wihbo, buhe dutiro cūre tinare. To ña cūrina jia musare ña ñu wihborucua nina “Cohamacure yuhdurucari”, nia. Ña jina tinare noano yuhtiga musa. Musa ña yuhtichu ñua wahchea mehne musare yoadohohca tina. Musa yuhtierachu ñua tina cahyaahca. Ña yuhtierana noano jisi musa.

¹⁸Sāre sini payorucuga Cohamacure. Dachoripe noaa dihtare yoa duaja sā. Ña jina “Ñaare yoana nija”, ni tuhutueraja sā. ¹⁹Ahri pinihtare tuaro sini payoga Cohamacure yuhure: Soaro mehne musa cahapu yu wahahtore tiore sini payoga.

Ahri pūre joariro noa duti batoaha

²⁰Cohamacu mari puhtoro Jesure yariarirore masori jire. Marine noano jichu yariro jira. Tiro “Musare yuhduchu yoihtja”, ni cūa tiri jire Cohamacu marine. To ña ni cūire yariro marine yuhduchu yariro Jesu sehe jira. Mari ñaa buhirire yariari jire tiro. Ña jiro tiro tuariro ovejare ñu wihboriro

yoaro sehe jiro, marine to yainare noano ñu wihbora. ²¹ Ñ jiro Cohamacu tirore masoriro musa cūhure yoadohojaro jipihtia noare to cahmaare musa yoahito sehe. Ñ jiro Jesucristo to yoadohoro mehne Cohamacu to cahmano seheta jipihtinare marine noaa sehere cohtotachu yoajaro. Jipihtia dachoripe Cristore ño payojihna. Ñta yoajihna.

²² Yu coyea, ahrire tuaro musare dutiitja: Ahri pui yu yahurire noano mehne tuhoga musa. Ahri musare yu joarocari pu pñiri tju jierara. Ñ jina ahrire noano tuhoga. ²³ Ahri cūhure musare yahuihtja: Mari coyeirore Timoteore peresu jirirore wioyuhti. Soaro mehne to wihichu musare ñui wahacu tirore naaihtja. Yuhu mehne waharohca.

²⁴ Musa puhtoare, jipihtina painare Cohamacu yainare toi jiinare noa dutija. Italia macaina Jesu yaina cūhu musare noa dutira.

²⁵ Cohamacu to cahia mehne musare jipihtinare noano yoajaro.

Santiago

Santiago Israe masare macari waharinare joarocaha

1 ¹Yuhũ, Santiago ahri pũĩ musare noa duti joarocai nija. Cohamacure, mari puhtoro Jesucristo cũhure dahra cohtariro tjija yuhũ. Ā jicu Israe masa ya curuari macainare doce curuari macainare Jesu yainare macari waharinare yũ coyea musare joarocai nija.

Cohamacũ sehe noano masichũ yoara

²Yũ coyea, payũ jiahca musa ñano yuhduhti. Ā ñano yuhdũna noano wahchea mehne tuhutuga. ³Ā ñano yuhdũna, potocãta Jesure musa wacũ tuaare ñona ninahca musa. Ā jina ñano yuhdupanahta Jesure musa noano wacũ tuaina jina, tirore wacũ tua namoina wahanahca. Ā wahana musa ñano yuhduare cũno pjanahca. ⁴Ā yoana duhuro marieno ā cũno pjarucuina jiga musa, tuho masiina, Cohamacũ cahmaare noano masiina musa jihto sehe. Ā jina duhsaro marieno to yare yoarucuina jinahca musa.

⁵Cohamacũ duhsaro marieno jipihtinare wara. Ā waro tirore siniinare soro nino marieno wara tiro. To ā jiroro jichũ masina, musa masihtĩ duhsachũ tuhutuna, tirore siniga. Musa ā sinichũ musare masi namochũ yoarohca tiro. ⁶Ā sinina Cohamacure noano wacũ tuatjiãhna siniga musa. “Sã sinichũ Cohamacũ waeraboca sãre”, ni tuhotuena tjiga. Tó sehe ni tuhotuina pjiri ma macaa pahcõri yoaro sehe jira. Pahcõri ti suroca cohtotaro seheta tina cũhũ ti wacũapũre suroca cohtotara. Cũno potori yoaerara tina. Ā jia Cohamacure wacũ tuaerara. ⁷Tó sehe ni tuhotuinare ti sinipachuta ne mahanocã ti siniare tinare wasi mari puhtoro Cohamacũ. ⁸Michare ahrire cahmariro jiparota ñamichacapure soro tuhutura tjoa. Ā yoarirore tó wahaerara.

⁹Jesu yainare wiho jiinare Cohamacũ sehe puhtoa sõnohca. To ā yoahtina jia wahchejaro tina. ¹⁰Ā jia Jesu yaina pache pua jia ti ya pache pihtihtore masia wahchejaro. Tí pache wiho warota jira, Cohamacũ to ñuchũ. Cohori ti dói baa boraa waharo seheta tí pache pihtia wahaahca. Ā jia tina cũhũ wahchejaro. ¹¹Sũ muja taro to tuaro sichũ tja sehe ñaia wahara. Ā yoa cohorĩ cũhũ ñai boraa waha, noaa cohorĩ ti jia cjiri pihtia wahara. Āta waharohca pache puare ti pachere ti na cahmachuno watoi. Tina ti pache mehneta butia wahaahca.

Ñano yoa dutiare yoaerariro wahcheriro jira

¹²Ñano yuhduĩro cũno pjaro, ñano yoa dutiare yoaeraro wahcheriro jirohca. To ā cũno pjachũ, to ñaare yoaerachũ jipihtia dachoripe muano

macaa catiare tirore warohca Cohamacu. “Tí catiare waihca”, ni cūa tiri jire Cohamacu jipihtina tirore cahīinare. ¹³Musare ti ñano yoa dutichu “Cohamacu yuhure ñano yoa dutiro nina”, ni tuhotuena tjiga. Ñano yoaare tuhotuerariro jira Cohamacu. Ña jiro tiro sehe masare ñano yoa dutiriro jierara. ¹⁴Masa tuaro ñaare ti goa pjaata tita tinare ñano yochu yoara. ¹⁵Ña jia ñaare goa pjara masa. Ña goa pjaa, tí sehere tuhotura. Ña tuhotua, tí ñaare yoarucura tina. Ti ña yoarucuri buhiri Cohamacu tinare pichacapu cohānohca.

¹⁶Ña jina yu coyea yu cahīina, “Cohamacu yuhure to dutichu ñano yoahi”, ni tuhotuena tjiga. Potocā jierara tí. ¹⁷Cohamacu muano macariro marine noaa dihtare wara. Tiro pinihta sū dacho macarirore, ñami macarirore, ñahpichoha poca cūhure bajuamehneriro jiro, tiro sehe to jiriro seheta ña jirucunocahna. Ne cohtotaerara. ¹⁸To cahmariro seheta tiro noaa buhea mehne marine to pohna wahachu yoare. Ña yoare tiro to pohna ji muhtaina mari jihto sehe.

Potocāta Cohamacure ño payoa ño sehe jira

¹⁹Yu cahīina, yu coyea ahrire noano tuhoga musa. Cohamacu yare noano tuhoga musa. Ña tuhona, noano tuhoturo marieno durucuena tjiga. Ña yoa suaena tjiga. ²⁰Cūiro suariro jiro, Cohamacu to cahmano seheta quihōno yoiriro jierara. ²¹Ña jina jipihtia musa ñaa yoirire, musa ñaare goa pjarire duhuga musa. Ña jina Cohamacure noano yuhtiina jina to buheare tuaro cahmaga musa. To ya buheare musa tuaro cahmachu Cohamacu sehe musare pichacapu wahaborinare yuhdachu yorohca.

²²To yare tuhopanahta to nino sehe yoerana mahñoare tuhotuna nica musa. “To nino sehe yu yoerachu noanohca”, ni tuhotuna mahñoare tuhotuna nica musa. Ña jina to yare tuhona tí sehere yoaga. ²³Cohamacu yare tuhopanahta, to nino sehe yoerana, to wuhduare ñono mehne ñuriro yoro seheta jira musa. ²⁴Tiro to wuhduare to ñuri baharo waha, to ñurire boa wahara. ²⁵Pairō sehe to ñurire to boerariro seheta Cristo to dutirire tuhoro tíre yoro, wahcheriro jirohca. Tí dutia Cristo to cahīa mehne masare to yuhdachu yohti buhea jira. Tí buheare ne cohāerariro wahcheriro jirohca. Tiro pinihta to tuhorire yoiriro jira. Ña yoirirore noano yorohca Cohamacu.

²⁶Cūiro to ña durucumacancarire duhu masieraro, potocāta Cohamacure ño payoerara. “Cohamacure noano ño payoja”, ni tuhoturiro jiparota mahñoare tuhotura tiro. “Cohamacure ño payoja”, niriro to jipachata to ño payoa ne yaba cjihti jierara. ²⁷Potocāta Cohamacure mari Pucure mari ño payona, to cahmano seheta ño payona, ño sehe yoaja mari: Pucusuma marieinare, wapewahya numia cūhure ñano ti yuhdachu ñuna, tinare yoadohoja mari. Ña jina ahri yahpa macaina ñaare ti yoaa barore ne yoa duaeraja mari. Ña yoana potocāta Cohamacure ño payoina jija mari.

Masare cūno potori noano yoro cahmana marine

2 ¹Yu coyea, noa yuhduarirore Jesucristore mari puhtorore tuhona, tirore wacū tuaina jira musa. Ña wacū tuaina jina masare cūno potori noano yoro cahmana musare. ²⁻³Ña yoa uru sororire, wamomaca sāa sororire cjuariro, wapa tia suhtire sāariro musa Jesu yaina cahmachuno cahapu to tachu ñuna tirore noano mehne piti bocaboca. “Ōi dujiro jira”, niboca musa tirore.

Ã nìpanahta tí pjata pjacuoriro cùhu ñano suhti tirirowa mûsa cahai to tachû ñûna tiro sehere noano piti bocaeraboca. “Ôi ducuga. O yahpai døjiga”, niboca mûsa tireore. ⁴Mûsa ã yoana masare cûno potori yoaerana nica mûsa. Æ yoana ñaare tuhoutuina masare beseina yoaero sehe jina nica mûsa. “Ahriri sehe noariri jira. Ahriri ñariri jira”, ni besemana mûsa.

⁵Yû coyea, yû cahîina, yûhure tuhoga. Payû pjacuoina sehere Cohamacure noano wacû tuatîna cjihtire, puhtoro to suho jiropure jîhtina cjihtire besea tiri jire Cohamacu. “Tôpure wahanahca mûsa”, ni cûa tiri jire Cohamacu tireore cahîinare. ⁶Tinare to ã besepachûta mûsa sehe pjacuoinare noano yoaerare. Pache pua sehe musare ñano yoaara. Æ yoa tina masare beseriro cahapû musare naahna musare yahusâa taa. ⁷Mûsa sehe “Cristo yaina”, masa ti niina jira. Payû pache pua sehe Cristore ñano ni durucuina jira. (Æ jiro pjacuoinare mûsa ño payoriro yûhdoro pache puare mûsa ño payochû sehere ñaa nina.)

⁸Cohamacu dutia mehne macaa dutiare paye dutia bui curero jia dutiare ô sehe ni joaa tiri jire: “Mû basi mû cahîno sehetaw mû cahai jiina cûhure cahîga”, nina Cohamacu dutia. Ahri dutiare yoana, noaare yoaara mûsa. ⁹Wiho mejeta masare cûno potori yoaerana ñano yoana nina mûsa. Æ jina Cohamacu dutiare yûhdurucaina jira mûsa. Æta nina Cohamacu yare ti joari pûi. ¹⁰Cohamacu dutiare yoaîna jipanahta cûnotare mûsa yoaerachû paye dutiare mûsa yoa pahñopachûta yaba cjihti jierara. Ñaa buhiri tiina jisi-nina mûsa. ¹¹“Pairo namono mehne ñano yoaena tjiga” ni, musare dutiriro Cohamacuta jira. “Masare wajâena tjiga”, niriro tirota jira Cohamacu. Pairo namono mehne ñano yoaerapanahta masûnore wajâna Cohamacu to dutiare yûhdurucaina jira mûsa. ¹²Cristo marine tuaro cahîno, marine dutira marine yûhduchû yoaero taro. To dutiare mari yoaerare, mari yoaerari cûhure ñûno marine besero tarohca. To ã besehtina jina to dutiare noano yoaîhna. Æ yoa to cahmano sehetaw durucujihna mari. ¹³Mipure painare mari pja ñuerachû Cohamacu sehe masare to beseri pja jichû marine pja ñûsi. Wiho mejeta painare mari pja ñuchû Cohamacu sehe pja ñûno, marine buhiri dahresi.

Cristore wacû tuaina sehe noaare yoaara

¹⁴Yû coyea tuhoga mûsa. “Cristore wacû tuaja yûhû”, cûiro to nipachûta painare to noano yoadohoerachû to ã nimari cjiri sehe ne yaba cjihti jierara. Tô sehe ni wacû tuamacanocariroro Cohamacu yûhduchû yoasi. ¹⁵⁻¹⁶¿Jesu yairo, Jesu yacoro ñaa suhti dihta ti cjuachû ñûna ti chuhti mariachû ñûna dohse yojari mûsa tinare paye baro cjuaina jina? “Noano jiga mûsa. Æ yoana noano suhti tîga. Æ jina noano chûa mehne yapi wahcâga”, nìpanahta ti cahmaare mûsa waerachû mûsa ã nimari cjiri ne yaba cjihti jierara. ¹⁷Æ yoa “Cristore wacû tuaja”, mûsa nipachûta noaare mûsa yoaerachû Cristore mûsa wacû tuaa ne yaba cjihti jierara.

¹⁸Mûsa mehne macariro ahri yû buherire tuho duaeraro ô sehe masijaro. Noaare yoaeraparota “Cristore wacû tuaja”, niboca tiro. Noaare yoaeraro Cristore to wacû tuare painare masichû yoa masierara. Noaare yoariri pinihta noaare to yoa mehne Cristore to wacû tuare masichû yoa masina. ¹⁹“Cohamacu cûirota jira”, ni tuhutura mûsa. Mûsa ã ni tuhutuchû noa nina. Æ jipachûta tô purota Cohamacure yûhtiro marieno tireore mûsa masichû tí

yaba cjihti jierara. Watia cūhu msa tuhoturo sehta tuhotura. Ā yoa Cohamacu to jia tiare masina tina. Ā masia, cuia, teterera. ²⁰ Cūiro noano yoaeraparota “Cristore wacū tuaja”, ni tuhoturiro jiro tuho masierariro jira. Cristore wacū tuamariro painare noano yoaeraro potocāta Cristore wacū tuarera. Ō sehe ni yahuihtja musare ahrire: ²¹ Abrahā mari űuchū cjiro to macūno Isaa wama tiroiro cjirore wajābasaa tiri jimare Cohamacure. Ā yoaro tirore taa mehne ti yoari tuhu bui duhu payoa tiri jimare. Ā duhu payoro Cohamacu to dutiuro sehta to macūnore wajāno taro nia tiri jimare Cohamacure ño payoro taro. To ā yoachū űūno potocāta Cohamacure to wacū tuarire masia tiri jire Cohamacu. To ā wacū tuariro to jichū masino, “Potocāta noariro jira”, ni űua tiri jire Cohamacu tirore. ²² To ā ni űuchū ahrire masina msa: Abrahā Cohamacure wacū tuaro tirore yuhtia tiri jire. Ā yuhtiro Cohamacure to wacū tuarire masichū yoaro nia tiri jire. ²³ Ā jiro Cohamacu yare ti joari pui to niriuro sehta ā wahaa tiri jire: “Abrahā Cohamacure wacū tuaa tiri jire. To ā yoachū űūno ‘Noariro jira tiro’, ni űua tiri jire Cohamacu tirore”, ni joaa tiri jire Cohamacu yare ti joari pui. To ā ni űuchū masia “Abrahā Cohamacu mehne macariro jira”, nina masa tirore.

²⁴ Ā jina ahri yu yahuhtire masina msa: “Cohamacure wacū tuaja” niriuro, to noano yoaerachū űūno Cohamacu sehe tirore “Noariro jira”, ni űuerara. Cohamacure wacū tuariro sehere potocāta to noano yoachū űūno “Noariro jira”, ni űūna Cohamacu tiro sehere. ²⁵ Āta ni űua tiri jire Cohamacu Rahab wama tiricorore msa mehne űāno yoarucuricoro cjirore. Josué cjiro to warocarinare noano piti boca “Noano sāa tahga”, nia tiri jire ticoro. Ā yoaro tina ti tjuaa duachū ticoro sehe pa maha sehere űoa tiri jire tinare “Tinare űu tuhtiina wajāri”, nino. To ā yoachū űūno “Noaricoro jira”, ni űua tiri jire Cohamacu ticorore. ²⁶ Ā tjira. Mari pjacupure catia mariachū ji masieraja mari. Ā jiro catia marieno mari pjacu yaba cjihti jierara. Tó sehta “Cohamacure wacū tuaja”, nipanahta painare mari noano yoaerachū potocā jierara mari wacū tuaa. Ā jiro mari noano yoaa mariachū mari wacū tuaa yaba cjihti jierara, catia marieni pjacu to yaba cjihti jieraro sehta.

Mari duseroi wijaare yahuha

3 ¹ Cohamacu yare masare buheina to yare ti noano yoaerachū űūno tina pinihtare masare buheraina yuhdoro Cohamacu buhiri dahrerohca. Tíre masina msa, yu coyea. Ā jina msa mehne macaina masare buheina payu jiena tjiga. ² Jipihtina payu tahari mari űaare yoaja. Cūiro űaare durucuaririro Cohamacu cahmaare noano yoiro jira tiro. Ā jiro paye űaa cūhure yoaerara. ³ Ō sehe jira ahri mari piti dahre buhechū: Cawalo to duseroi comaa pjī to űahmanore űa dihohti pjīne mari cūja, tirore mari majare-rucachū yoana tana. Ā yoana tí pjī comaa pjī mehne tirore to wahahto mari waja majareruca dapoja. Tí pjīca mahari pjīca to jipachuta tí pjī mehne tirore wahachū yoaja mari. (Ō sehta mari dusero mahanocā to jipachuta tí dusero mehne pjīro űāno yoaja mari.) ⁴ Dohoria quiti mehne piti dahre yahu namoihtja musare: Busoca pjīria to jipachuta tiare wiñnono to tuaro wārocapachuta oturiro sehe mahari pjīca mehne tia nohoi to waha duaro oturocara. ⁵ Tó sehta jira mari duseroi wijaa. Mari dusero mahanocā to jipachuta tí dusero mehne pjīro yoaja mari. Mahari pichacacā pjīro to jū wahcāno sehta mari

dusero mehne pjíro ñaare yoa masija. ⁶ Ña jiro mari dusero pichaca yoaro sehe jira. Mari duseroi wijaa jipihitia ñaare yoachũ yoara marine. Pichaca to jũ ducaro sehetã mari duseroi wijaa mehne mari noano jiborirore ñabiaro yoaja mari. Ñaare durucuna watĩno to dutiro sehetã mari yoana nija. ⁷ Jipih-tinare nũcũ macainare wahiquinare, minichahcare, chihchõ wahcãinare, wahire mari masa sitichũ yoa masija. Mari payũ tina barore masa sitichũ yoa tuhsuja. Ña jia tina noano tuho masina. ⁸ Tinare mari yũhtichũ yoapachuta mari dusero sehe ñaare durucuro ne tjuaeraputiara. Ña jiro nuina ti niji siariro sehetã mari dusero sehe ne niji siaeraputiara. Mari duseroi wijaa ñabiaa jira. Ña jiro ñima painare to wajãno sehetã marine paina cũhũre ñabiaro wahachũ yoara mari duseroi wijaa. ⁹ Mari dusero mehne Cohamacũ mari puhtoro mehne mari noano durucuja. Ña durucupanahta masa Cohamacũ yoaro sehe jiinare to bajuamehnerina ti jipachuta tinare ñabiaro ni durucuja mari. ¹⁰ Cũ duseroihta noaa durucua cũhũ, ñaa durucua cũhũ wijara. Yũ coyea, ña ni durucueraro cahmana. ¹¹ Máca pohtai mũ wiori copai noaa co, ñaa co cũhũ ne wijaaerara. ¹² Yũ coyea, higuerao olivo pocare dicha tierara. Tuhsũ, secũ higuera pocare dicha tierara. Ña yoa máca pohtai mũ wiori copai moa tia co to wijaaachũ moa mariea co wijaaerara. (Tó sehetã mari duseroi noaa durucua, ñaa durucua mehne wijaaachũ yoaeraro cahmana. Ña ni durucuaeraro cahmana.)

Noano masia waro õ sehe jira

¹³ Cãina musa mehne macaina noano masiina jira. Noano masiina musa jia tiare õ sehe yoa ñonahca musa. “Paina yuhdoro noano masija sã”, niena tjiga. Ña nienata noaare yoaga musa. Ña noaare yoana potocãta noano masiina jira musa. ¹⁴ Wiho mejeta paio paye barore to cjuachũ ñuna tíre tuaro cahmaina jina, paina mehne suarucuina jina, painare yuhdurũca duaina jina, “Noano masiina jija sã”, niena tjiga musa. Musa ña niina jina mahñoina jira musa. ¹⁵ Ña yoaina ti tuhotua ne Cohamacũ ya tuhotua jierara. Ti tuhotua Cohamacũre yuhdurucaina ti ñano tuhotua jira. Tí tuhotua sehe watĩno ya jira. ¹⁶ Masa ti cjuaaare tuaro cahmaina, painare yuhdurũca duaina ña cahma sayorucura. Ña yoaina jia jipihitia ñaare yoaerucura. ¹⁷ Paina sehe Cohamacũ yare noano masiina sehe tina pinihta ña yoaamacanocaa nierara. Ña yoa tina ne cahma sayoerara. Ña jia masa noaina, painare noano yuhtiina, pja ñuina, masare yoadohoina, masare cũno potori yoaina jira tina. Tíre yoa, mahñono marieno yoara tina. ¹⁸ Ña yoana cahmachea marieno jina, painare “Cahmachena tjiga”, mari ni yahuna, noaina wahachũ yoana nija mari masare.

Ahri yahpa macaa ñaare cahmana, Cohamacũre cahmaeraina jira musa

4 ¹ ¿Dohse jiro baro musa cahma sayojari? ¿Ña jina dohse jiro baro cahma-chejari musa? Ñaare goa pjana, cahmache duara musa. Noaare yoa duapanahta ñaare yoara musa. ² Paye barore musa cahmana. Ña cahmana masare wajãna musa ti yare nana tana. Pairo paye barore to cjuachũ ñuna tíre musa tuaro cahmana. Ña cahmapanahta tíre na masierara musa. Ña yoa tíre cahma sayorucura musa. Cohamacũre sinierana, musa cahmaare ne bocaerara. ³ Ña yoa sinina, musa ya cjihti dihtare sinimana musa, musa cahmano sehetã yoaerucuna tana. Paina ya cjihti sehere sini payoerara musa. Ña jiro musa

sinichu Cohamacu musa siniare waerara. ⁴Cohamacure cohaina jira musa. Ahri yahpa macaa ñaare cahmana, Cohamacure cahmaeraina jira musa. Ahri yahpa macaa ñaare cahmaina Cohamacure cahmaeraina ji tuhsura. ¿Tíre masierajari musa? ⁵Õ sehe nia tiri jire Cohamacu yare ti joari pui: “Cohamacu Espiritu Santore mari mehne jihtirore cùhre. Æ jiro Espiritu Santo sehe marine cahino, ñaare mari tuaro cahmapachuta cahmasaerara tiro. To manuno to namonore to cahĩ doaro sehetã marine tuaro cahina Espiritu Santo”, ni joa tiri jire panopure. To Æ ni joari wiho warota jierara. Potocãta jirota nina. ⁶Æ yoa Cohamacu marine noano yoadohora tirore mari noano yuhtihto cjihtore. Õ sehe nina Cohamacu yare ti joari pui: “Yuhu pinihta painare masi yuhdurucaja’ niriore, Cohamacu ñu tuhtira. Pairo sehere Ñariro, wiho jiro jija’, niriore sehere Cohamacu yoadohora”, nina to yare ti joari pui. ⁷Æ jina Cohamacure noano yuhtiina jiga musa. Æ yoa watĩnore yuhtiena tjiga. Musa Æ yuhtierachu ñuno tiro sehe musare duhti wahcã murocaa waharohca. ⁸Cohamacure noano yuhtiga musa. Musa Æ yoachũ tiro sehe musare yoadohorohca. Ñaina jira musa. Æ jina ñaare yoa namoena tjiga. Ñaa cùhure cahmana, noaa cùhure cahmaina jira musa. Æ jina musa ñaa tuhotumarire cohtotaga. Musa Æ yoachũ ñuno Cohamacu musa ñaa yoari buhirire cohãnohca. ⁹Musa ñaa yoarire tuaro cahyana, bujua witiga. Æ yoana musa ñaare yoari buhirire tiiga. Tíre wahcheina jiena tjiga. Æ jina musa ñaa yoarire ñano yajeripohna tiga. ¹⁰“Ñariro, wiho jiro jija yuhu”, nina Cohamacure ño payoga. Musa Æ yoachũ ñuno tiro sehe ño payoa mehne noano yorohca musare.

Ti coyeare Jesu yainare ti basi ñano quti dahre dutieraha

¹¹Yu coyea Jesu yaina jina, musa basi ñano quti dahrena tjiga. Musa coyeirore ñano quti dahrena, tirore buhiri dahre duti duaina jina nica musa. Cristo ya dutia sehe masare buhiri dahrehti dutia ji tuhsura. Æ jina masare ñano quti dahrena Cristo ya dutiare õ sehe nina nica musa: “Marine noano dutierara Cristo ya. Æ jina mari mu suro buhiri dahre dutijihna”, nina nica musa masare ñano quti dahrena. Æ nina Cristo ya dutiare ñano ni durucuina tjuara musa. Æ jina tí dutiare yoeraina tjuara. ¹²Masare dutiare wariro, masare beseriro Cohamacuta jira. Masare pichacapu wahaborinare tirota yuhduchu yoa masina. Æ yoa tirota masare pichacapu cohã masina. Æ jina mari sehe masare “Ñaina jira”, ni masieraja. Cohamacu dihta mari coyeare besehtiro jira.

Ñamichacapure dohse mari jihtore masieraja mari

¹³Mipure yuhure tuhoga musa. Õ sehe niina tuhoga yuhure: “Michare, ñamichacare pa macapu jina wahanahca. Tópure cã cùhma jina, paye baro dua, nuchunahca. Æ yoana wapatanahca mari”, nina cãina musa mehne macaina Cohamacure wacũno marieno. Æ niina jina, yuhu sehere tuhoga musa. Tó sehe niinare ahrire yahui tai nija: ¹⁴Ñamichacapu dohse musa jihtore masierara musa. Me ti ji, dói pihti muano sehetã jira mari jia tia. Me mahanocã jiro, pihtia wahara. Tó sehetã mari cùhu mahanocã jina, yarianahca. ¹⁵Æ jina õ sehetã ni tuhoturo cahmana musare: “Cohamacu to cahmachu jinahca mari. Æ jina õ sehe yoanahca mari”, ni tuhoturo cahmana

musare. ¹⁶ Ñ jipanahta mipure “Mari mu suro ñ sehe yoanahca”, nirucumana musa Cohamacure wacũno marieno. Tó sehe nirucuna painare yuhdurucaina jina, ñaare yoara musa. ¹⁷ Ñ jina noaare mari yoachtire masipanahta tíre yoaerana ñaare yoana nija mari.

Pache puare yahuha Santiago

5 ¹ Pache puá musa mipure tuhoga yuhure. Baharopure musa ñano yuhdunahca. Ñ jina tii sañurucuga musa. ² Musa pache ba pihtia wahaahca. Ñ yoa musa suhtire casĩpoca cũhu chu pahñoahca. ³ Ahri dachorire, pihtiri dacho pano niñerure musa pjíro wihbochu ne tí yaba cjihti jierara. Musa ñ wihbochu ñuno niñerure musa cahĩchu masina Cohamacu. Tí niñeru to wapo wijiboriro seheta tí niñeru pihtia waharohca. Ñ jina niñerure musa cahĩri buhiri ñano yuhdunahca pichacapu musa jũchu musa pjacure jũ pjaro seheta. ⁴ Musa weserire dahra cohtainare wapaerare musa. Tinare mahñore musa. Ñ jiro tinare musa wapaerari niñerure ñuno, musa mahñorire masina Cohamacu. Musare dahra cohtaina wapa na duaa, sañurucura tina. Tí ñ ni sañurucuchũ mari puhtoro Cohamacu tinare tuhora. ⁵ Ahri yahpapure payũ pache mehne jia tira musa. Ñ jina musa ji coa dihtare yoa tira musa. Ñ jina pjiriro wachu ti noano nuriro yoaro sehe jira musa. Pjiriro wachu pjíro to churi baharo tirore ti wajãhti cuhtupu na wahcãna. Tó seheta musa cũhure pjíro musa cjuari baharo musare to buhiri dahrehtopũ na wahcãnohca Cohamacu. ⁶ Noainare ñano ti yoerapachuta peresu yoa wajã dutire musa tinare. Musa ñ yochu tina sehe musare yuhduruca masierare.

Cristo to tjua tahtore noano cohta dutiha marine Santiago

⁷ Ñ jina yũ coyey, mari puhtoro Cristo ahri yahpapure to tjua tahtore noano cohtaga. Wese puro to toaa dicha tihti pjare noano to cohtaro seheta noano cohtaga. Puhiro to ducachu. baharopũ coro to ta namochu cũhure to toaapure “Coro ta sãajaro” nino, to wesere to noano duhtore noano cohtara tiro. ⁸ To ñ cohtariro seheta musa cũhu noano cohtaga. Mari puhtoro to tjua tahto mahanocã duhsara. Ñ jina Cohamacure ñ wacũ tuarucuna to tahtore ñ cohtarucuga musa.

⁹ Yũ coyey musa basi nurena tjiga Cohamacu musare to buhiri dahrehta sehe. Ñ yoa ahrire wacũga musa. Buhiri dahrehtiro to tahto mahanocã duhsara. ¹⁰ Yũ coyey, ñano yuhdupanahta mari puhtoro noano cohtaga Cohamacu yare yahu muhtaina cjiri ti yoariro seheta. Tina ti cũno pjariro seheta cũno pjaga musa cũhu tinare ñu cũna. ¹¹ Ñ yoa ahri yũ yahuhtire wacũga musa. Ñano yuhdupahta Cohamacure duhueraina wahcaina jira. Panopũ macarirore Job wama tiroro cjirore tuhore musa. Tiro ñano yuhduparota Cohamacure duhuerari jire. Ñ jiro to ñano yuhdũri baharo Cohamacu tirore noano yoari jire. Cohamacu mari puhtoro noano pja ñuriro jiro ãta yoari jire tiro. Tí jipihtiare masina musa.

¹² Yũ coyey ahrire noano tuhoga tjoa. Ñ sehe ni wama payora masa: “Muano macariro mehne potocã nina nija”, nina masare tuho dutia. Tuhsũ, “Ahri yahpa mehne potocã nina nija”, nina masa. Paye mehne cũhure wama payora tina. Tina yoaro sehe ñ ni wama payoena tjiga. Ahrire musare tuaro dutija. Musa painare yahuna, noano potota yahuga tinare. Wama payoro

marieno ni yahuga tinare. Ā mŭsa potocā yahuchŭ ñño Cohamacŭ soro mŭsa niri buhirire buhiri dahresi.

¹³Mŭsa mehne macariro ñano yŭhdŭriro jiro, Cohamacure sinijaro tiro. Pairo wahcheriro jiro Cohamacure wahchea mehne basajaro. ¹⁴Mŭsa dohatina, Jesu yaina puhtoare pjirocaga mŭsa. Mŭsa ā pjirocachŭ tina sehe musare se mehne wiŭōahca mari puhtoro Jesu wama mehne to tuaa mehne. Ā wiŭō tuhsŭ, mari puhtore Cohamacure musare sini payoahca tina. ¹⁵Ā ti sini payochŭ “Mari sinino sehta tiro yoarohca”, ti ni tuhotuchŭ Cohamacŭ musare dohatiinare mŭsa dohatiare yŭhduchŭ yoarohca. Ā yoa mŭsa ñaa yoari buhiri mŭsa dohatiina jichŭ ñua musare sini payoahca. Ti ā sini payochŭ ñño mŭsa ñaa yoari buhirire borohca Cohamacŭ. ¹⁶Ā yoa mŭsa mehne macaina mehne mŭsa ñaa yoarire cahma pu buhuseheri yahuga. Ā ni tuhsŭ, mŭsa basi Cohamacure cahma sini payoga. Mŭsa ā sini payochŭ mŭsa sini payoinare Cohamacŭ yŭhduchŭ yoarohca. Noare yoaina mŭsa jichŭ Cohamacure tuaro mŭsa sini payoriro sehta yoarohca tiro. Ā jia mŭsa sini payoa tua nica. Wiho jia jierara. ¹⁷Cohamacŭ yare yahu muhtariro cjiro Elia wama tiro mari yoaro sehta masuno jia tiri jimare. Ā jiro “Coro taero tjijaro” ni, tuaro sinia tiri jire Cohamacure. To ā ni sinichŭ tia cuhma noano pa cuhma dacho macai ahri yahpapure ne coro taera tiri jire. ¹⁸Pari turi tjoa Cohamacure corore to sinichŭ coro taa tiri jire. Ā jiro pari turi ahri yahpai yucŭri bucŭa, dica tia tiri jire. (Ā jia Cohamacure mari sinia wiho jia jierara.)

¹⁹Yŭ coyea, mŭsa mehne macariro Cohamacŭ yare duhuriro cjiro Cohamacŭ yare pari turi to cahmahto cjihtore tirore yahuna, noano yoana nina mŭsa. ²⁰Ā yoa ahrire masiga mŭsa: Cohamacure duhuriro cjirore Cohamacure pari turi cahmachŭ yoana, pichacapŭ wahaborirore yŭhduchŭ yoana nica mŭsa. Ā jiro payŭ to ñaa yoari buhirire Cohamacŭ bo pahñonohca.

1 San Pedro

Jesu yainare macari waharinare joarocaha Pedro

1 ¹Yuhũ, Pedro, Jesucristo buhe dutiro to cūrirota jija. Ā jicu musare yoaro macaa macaripũ waha siterinare Ponto yahpawũ, Galacia yahpawũ, Capadocia yahpawũ, Asia yahpawũ, Bitinia yahpawũ tí yahparipũ waharinare musare jipihtinare joarocaja yuhũ. Musare noa duti joarocaja yuhũ. ²Wahmanopũre Cohamacũ mari Pucũ “Ō sehe yoaihtja”, to ni wacũyuriro seheta musare besea tiri jire. To ā beseri baharo to yairo Espiritu Santo sehe musare Cohamacũ yaina cjihtire sōri jire. Ō seheta sōri jire tiro Jesucristore noano yuhtihtina musa jihto sehe, to di cohāri mehne musa ñaa buhirire cosarina musa jihto sehe. Cohamacũ to cahĩa mehne musare noano jichũ yoajaro.

Jesu yaina jina marine muanopũ to nahtore cohtana nija mari

³⁻⁵ Cohamacũ marine tuaro pja ñũno, Jesucristo yariaro to masa mujari mehne marine pichacapũ wahaborinare yuhdũchũ yoare tiro. Ā marine yuhdũchũ to yochũ pari turi mari masa bajuariro seheta Cohamacũ to pohnata wahaja mari. Ā wahana tiro mehne mari ā jirucũhtore noano masija mari. Ā jiro musare noano yoaro taro musare cohtaro nina. Tiro mehne musa ā jirucũhtire cūnohca tiro. Ā jina ā jirucunahca musa. Tópũ Cohamacũ musare to wahto ne baasi. Ahri yahpawũ mari ya ti wete wahāno seheta, ti ñaia waharo seheta Cohamacũ musare to wahto ne ā wahasi. Ā jia ne pihtisi. Ā jiro tiore musa wacũ tuachũ, Cohamacũ to tuaa mehne musare ñũ wihboro, yuhdũchũ yorarohca. Pihtiri dacho jichũ musare to yuhdũchũ yoirire masichũ yorarohca tiro. Marine to ā pja ñũchũ ñũna, Cohamacũre mari puhtoro Jesucristo pũcũrore ño payo, “Noana”, nijihna tiore.

⁶ Ā to yuhdũchũ yoahina jina, mahano ahri yahpai musa jiro puro payũ tahari musa ñano yuhdũpanahta wahchera musa. ⁷ Ā ñano yuhdũpanahta Cohamacũre duhuerana musa tiore noano wacũ tuarire masichũ yoana nica musa. Uru ahri yahpa macaa pini pihtia wahaahca. Uru yuhdoro musa wacũ tuaa sehe wiho waro jierara. Ā jia masa uru to jiare masi duaa doha ñũna. Urure ti doha ñũno seheta musa wacũ tuaare Cohamacũ ñũ duaro “Ñano yuhdũjaro”, niboca musare. Musa ā ñano yuhdũri baharo potocāta tiore musa noano wacũ tuarucuchũ, Cristo ño payoa mehne musare “Noano yoahre musa”, ninohca. Ahri yahpawũ tjua taro ā ninohca.

⁸⁻⁹ Tiore Jesucristore musa ñuerapanahca cahĩna musa. Ā yoa mipũre tiore ñuerapanahca tiore wacũ tuara. Ā wacũ tuana, tuaro wahchera musa. Cohamacũ ā musare to wahchechũ yochũ pjĩro wahchera musa. Tí wahchea

noa yuhduara. Cohamacu musare pichacapu wahaborinare yuhduchu yoarohca musa tirore noano wacu tuachu. Ñ jina pjiro wahchera musa.

¹⁰Cohamacu musare to ñ yuhduchu yoahcore, musare to tuaro cahiare panopu macaina Cohamacu yare yahu muhtaina cjiiri tíre masi duaa, buhe, sinitu ñua tiri jire. Ñ jia tíre yahuyu joaa tiri jire. ¹¹Cristo to ñano yuhduhtore, to masa mujahtore, jipihtina bui puhtoro to suho jihtore tina to masa bajuahcore panoputa yahuyu tuhsua tiri jire. Jesucristo to yairo Espiritu Santo to yoadohoa mehne ñ yahuyua tiri jire tina. Ñ yahuyua tina Cohamacu yare yahu muhtaina cjiiri ti yahurire noano masi duaa sinitu ñua tiri jire tina Cohamacure. Espiritu Santo “Cristo wihirohca”, to nirirore “¿Dohse jichu wihirohcari?” ni sinitu ñua tiri jire tina. “¿To wihihu dohse waharohcari?” nia, tó cūhure sinitu ñua tiri jire. ¹²Tí ti yahuyuri cjiiri ti basi ti masihtu cjihti jiera tiri jire. Tíre tinare masichu yoaa tiri jire Cohamacu. Mari sehe mari masihtu cjihti jiri jire Cohamacu yare yahu muhtaina cjiiri ti joari cjiiri. Muanopu tariro Espiritu Santo to yoadohoa mehne mipure noaa buheare musare sã yahuja. Panopu musa masihtu cjihtire ti yahuyuri cjiiri títa jino-caata nina mipure musare sã yahua. Tí buheare anjoa cūhu tuaro masi duaa tiri jire.

Cohamacu marine ñaa marieina ji dutira

¹³Ñ jina noano wacu masitjiāhna jiyuga musa. Ñ yoana noano tuho masiina jiga. Cristo to tjua tachu Cohamacu musare noano to yoahcore wacūga. Ñ yoa tíre noano cohtaga. ¹⁴Panopu Cohamacure masierasina ñaare goa pjaina jimare musa. Mipure tíre yoarena tjiga. Ñ yoarana ti pohna ti pucsumare noano ti yuhtiro sehta Cohamacure yuhtiga musa. ¹⁵Ñ yoana to yaina cjihtire musare beseriro ñaa marieriro to jiro sehta musa cūhu ñaa marieinata jiga. Ñ jina noaa dihtare yoina jiga. ¹⁶Ña ni joaa tiri jire Cohamacu yare ti joari pūi: “Ñaa marieriro jija yuhu. Yu ñ jichu musa cūhu ñaa marieina jiga”, ni joaa tiri jire.

¹⁷Tiro Cohamacu jipihtina cāinare ti yoirire ñuno cūno potori besera tinare. Ñainare, noinare besera. To ñ beseriro jichu tirore “Yu Pucu” ni duana noano yoaga. Ahri yahpai musa jiro puro cua pisaro mehne Cohamacure ño payoro mehne noano jirucuga musa jiape nino marieno. ¹⁸Musa ñuchusuma cjiiri ti yoiari cjiiri ne yaba cjihti jierari jire. Musa cūhu ti yoiario sehe yoina musa jipachuta Cristo musare to yaina cjihti yoare. Wapamoinare ti wapamorire ti boriro sehta tiro sehe musa ñaa yoiari buhirire potota bonocare. Tíre noano masina musa. Musare ñ yoiaro plata mehne, uru mehne wapa woiere tiro musare ñ yoiaro. Plata, uru butia wahaahca. ¹⁹Tiro sehe oveja noariro, wete marieriro yoiaro sehta jiriro Cristo to di mehne to yariari mehne musa ñaa yoiari buhirire cohã, musare yuhduchu yoare. To di mehne marine ñ yoiaro wiho waro ñ yoiaro nierare. ²⁰Panopure ahri yahpare to bajuamehnehto pano Cristo to ñ wahahto cjihtore masi tuhsua tiri jire Cohamacu. Mipu sehere pihtiri dacho panocã to jichu, Cristore noano masichu yoare Cohamacu musare. ²¹Cristo to yoadohoro mehne Cohamacure wacu tuara musa. Cohamacu sehe Cristore yariarirore masori jire. Ñ yoiaro tirore muanopu cūno jipihtinare tirore ño payochu yoiari jire Cohamacu. To ñ yochu tirore Cohamacure wacu tuara musa. Musa ñ wacu tuachu tiro noano

yoara musare. Æ jina musare to yuhduchu yoahore noano masi, cohtara musa.

²²Noaa buhea ti niriro seheta yoaina jina, musa ñaa yoari buhirire cohãrina jira musa. Æ jiina jina potocãta mari coyeare Jesu yainare cahĩ masina musa. Æ jina musa mehne macainare musa yajeripohnari mehne tuaro cahĩga. ²³Æ yoa pari turi wahma masa bajuaina yoaro sehe jiina Cohamacu pohna wahare musa. Mari pucsuma ti pohna tirina jina baharo yarianahca. Tĩ yoaro sehe jierara Cohamacu pohna musa wahachu. Cohamacu to buhea mehne to catichu yoa buhea mehne to pohna wahare musa. Tĩ buhea mehne Cohamacu mehne ã jurucunahca mari. ²⁴Õ sehe nina Cohamacu yare ti joari pũi:

“Jipihtina masa tja yoaro sehe jira.

Æ yoa noaa ti cjuaa, tja cohuri yoaro sehe jira.

Tja ñaia wahara. Cohori cũhu buru bora, baa wahara.

Tĩ yoaro seheta yariara masa cũhu.

²⁵Mari puhtoro ya buhea sehe ne pihtisi.

To niriro seheta ã waharohca”,

ni joaa tiri jire. Tĩ buhea musare ti yahuri cjiri noa buheata jira.

2 ¹Æ Cohamacu pohna jina jipihtia ñaa yoaare, mahñoare, ti baharo buhusehei ñano yoa cohtaare, paina ti cjuare cjoare, painare ñaa quiti dahreare tĩre duhuga musa. ²Æ yoa wahma masa bajuaina pẽchore ti tuaro cahmano seheta musa cũhu noa buheare Cohamacu yare tuaro cahma namoga. Æ cahma namoga musa tirore musa wacũ tua namohto sehe, to yuhduchu yoaina musa wahahto sehe. ³Æ yoaga musa mari puhtoro musare to noano yoaare masiina jina.

Cristo catichu yoariro tãca yoaro sehe jiriro jira

⁴Cristo catichu yoariro tãca yoaro sehe jiriro jira. Wuhu dahreina cũria tãcare ti cahmaeraro seheta masa tirore cahmaerare. Cohamacu sehe tirore to ñachu to beseriro noa yuhduariro jira. To ã jiriro jichu tirore wacũ tuaga.

⁵Musa cũhu wuhu macaa tãa yoaro sehe jira. Musa ã jina Cohamacu ya wuhu macaa tãare noano ti cũriro seheta musa to yaina cũhu noano mehne jinahca musa. Æ yoana Cohamacu ya wuhu macaina noaina sacerdotea jinahca musa. Æ jina sacerdotea wahiquinare wajã jũ muoa Cohamacure ti wariro seheta Jesucristo to yoadohoa mehne Cohamacu yare noano yoanahca musa. Musa ã yochu ñu ji coarohca Cohamacu. ⁶Õ sehe nina Cohamacu yare ti joari pũi:

“Tãca wuhui ti cũ muhtari tãca marieno wuhure yoa ãca masierara.

Tó seheta Cristo marieno yu yaina waha masierara masa.

Æ jiro tiro wiho jiriro jierara.

Æ jicu tirore Jerusalẽpu mipure cũi nija.

Tiro yu beseriro noa yuhduariro jira.

Æ jia tirore wacũ tuaina wahche, ne buo tisi”,

ni joaa tiri jire Cohamacu yare ti joari pũi. ⁷Tirore wacũ tuaina sehe noa yuhduaro wahaahca. Æ jiro wiho jiriro jierara tiro. Tirore wacũ tuaeraina sehe soro wahaahca. Tinare õ sehe nina Cohamacu yare ti joari pũi:

“Ahiro Cristo tãca yoaro seheta jira.

Tãcare wuhu dahreina ti cohãno seheta masa tirore cohãahca.

Ti ā yoapachuta mipure wuhū dahreina wuhūre yoa ti cū mūhtari tācare ti cūno seheta Cohamacu tirore puhtoro sōre”, ni joaa tiri jire. ⁸ Ō cūhure nina Cohamacu yare ti joari pūi:

“Murocariro tācare doca wahā suro to wacū wahcānore ne suerara.

Tó seheta tāca yoaro sehe jiriore Cristore cahmaerana, tirore yuhdurucana, Cohamacu cahapū susi mari”,

ni joaa tiri jire panopū. Tina Cohamacu ya buheare yuhtierare. Cohamacu panopū “Ā waharohca”, to niriro seheta Cristore cahmaerare tina. Ā yoahtinare cūa tiri jire Cohamacu tinare.

Ō sehe jira Cohamacu yaina

⁹ Musa sehe Cohamacu to beserina jira. Tiro mari puhtoro to yaina sacerdotia tirore dahra cohtaina jira musa. Ā jina to ya curua macaina űaa marieina Cohamacu yainata jira musa. Āta jira musa. Cohamacu noa yuhduare to yoirare painare yahuhtina cjihti jira musa. Musare besea tiri jire nahitianoi jiina musa jiboro seheta űaare yoarucu dutieraro. Ā besero noano buhriaroi jiina ti noano űū masino seheta, Cohamacure noano masiina, to yare yoarucuina ji dutira musare. ¹⁰ Panopure Cohamacu yaina jierari jire musa. Mipū pinihtare to yaina jira musa. Panopure musare pja űuriro musare mariasiniri jire. Mipū sehere musare Cohamacu pja űure.

Cohamacu yare yoaina jiga musa

¹¹ Yū cahīina, ahri yahpai ji dojahtina jierara musa. Cohamacu yaina jira musa. Musa ā jiina jichu ahrire tuaro yahuja musare: Musa űaare goa pjaare ne yoaena tjiga. Tí űaare yoana, Cohamacure űū tuhtiina, űaina wahana nica musa. ¹² Cohamacure cahmaeraina watoi jina noano yoaina jiga musa, musare “Yahusāari”, nina. Musa ā yoaina jichu tina mipure musare űano yahusā dua-pahta, musa noano yoaare masiahca tina. Ā masia, tina Cohamacure “Noariro, tuariro jira”, niahca. Ō seheta niahca Cristo ahri yahpapū to tjua tachū.

¹³ Mari puhtore yuhti duana ahri yahpa macaina puhto cūhure yuhdurucaina jiena tjiga musa. Ahri yahpa macariore musa jipihtina bui puhtoro jiriore tiro cūhure yuhtiga. ¹⁴ Puhtoare yuhdurucainare buhiri dahre dutiro, warocara tiro tirore yoadohoinare. Ā yoa noano yoinare “Noano yoare musa”, ni dutiro warocara tiro. To ā warocachū, tina cūhure yuhtiga musa. ¹⁵ Musa noano yoachū űua tuho masieraina ti mū suro musare quiti dahre duapahta quiti dahre masierara. Musa āta yoachū cahmana Cohamacu. Ā jina musa puhtoare yuhtiga.

¹⁶ Cohamacu musa puhtoro jira. Painare dahra cohtaina jierara musa. Ā jipanahta “Sāre dutiriore mariaha. Ā jina űaare yoa nahca”, ni tuhotuena tjiga “űaare yoiari”, nina. Cohamacure dahra cohtaina jira musa. Ā jina tirore noano yuhtiina jiga musa. ¹⁷ Jipihtina masare űo payoga. Mari coyea Jesu yainare cahiga. Cohamacure cua pisaro mehne űuga. Ahri yahpa macaina jipihtina ti bui puhtoro jiriore cūhure űo payoga.

Cristo űano yuhduro to cūno pjariro seheta cūno pjaga musa cūhu

¹⁸ Dahra cohtaina, cua pisaro mehne musa puhtoare yuhtiina jiga. Noaina, musare noano yoaina dihtare yuhtiina jiena tjiga. Musa mehne suaina cūhure

yuh̄tiga musa. ¹⁹Musa ñano yoerapachuta musare ti buhiri dahrech̄u Cohamacu to cahmano seheta tíre musa cūno pjach̄u “Noano yoare musa”, ninohca Cohamacu musare. ²⁰Musa ñano yoari buhiri tina musare ti buhiri dahrech̄u tíre musa cūno pjach̄u tí yaba c̄ijhti jierara. Tí yaba c̄ijhti jierapachuta noano musa yoapach̄u ti buhiri dahrech̄u tíre noano mehne musa cūno pjach̄u Cohamacu “Noano yoare musa”, ninohca musare. ²¹Ā ñano yuh̄duhtinare ji dutire Cohamacu musare to yainare. Cristo musa ya c̄ijhtire ñano yuh̄d̄are tirore musa ñu cūhto sehe. ²²Tiro ne ñano yoerare. Ā yoa ne mah̄noerare. ²³Tirore ti tuhtich̄u, tiro sehe tinare tuhti cahmaerare. Tirore ti ñano yoapachuta “C̄j̄iht̄ja musare”, ne nierare tiro. Tí Ā yoapachuta tinare Cohamacu to buhiri dahrehtore quih̄ono to yoahtore masino, “Yū P̄uc̄up̄u tinare buhiri dahreh̄ohca”, ni tuh̄oture tiro. ²⁴Tiro to basi crusap̄u mari ñaa buhirire yariare. Ā waha yariare pari turi mari ñaare yoerahto sehe, Cohamacu cahmaa seh̄ere mari yoahto sehe. Tiro ñano cam̄i tíre marine pichacap̄u wahaborinare yuh̄d̄uch̄u yoaro taro. ²⁵Oveja wisia ti butiro seheta mari cūhu pichacap̄u butih̄tina jimai. Mip̄u seh̄ere Cristore ovejare ñu wih̄boriro yoaro sehe jiriore, marine ñu wih̄boriire wacū tuaja mari. Ā wacū tuana, to yaina wahai mari.

Wamomaca duhteinare ō sehe yoaro cahmana tinare

3 ¹Ā yoa dahra cohtainare yū dutihiro seheta musa namos̄ānumiare dutiht̄ja. Musa manusumare yuh̄d̄ur̄ucaena tjiga tina Cohamacu ya buheare ti cahmahto sehe. Cāina tina to ya buheare cahmaeraina jia, tinare musa yuh̄d̄ur̄ucaerach̄u ñua Cohamacu ya buheare cahmaboca tina. Tí buheare musa yahuerapachuta to yare cahmaboca tina. ²Āta cahmaboca tina musa noano yoaare, musa ño payoa cūhure ñua. ³Musa numia, carea numia yoaro sehe yoaena tjiga. Ā yoa musa pjoaire wuhawe sapahtaa numia, uru darire busaa numia, wapa ti yuh̄d̄ua suhtire s̄aa numia jiena tjiga musa, musare “Goa pjach̄u yoari”, nina. ⁴Ā yoa musa cua pisaro mehne painare niji siaroca mehne yoa numia jina, noano suh̄dua numia jina, ahrireta ñu ji coach̄u yoaga. Ahrire musa yoch̄u wiho waro jierara, Cohamacu to ñuch̄u. ⁵Ō seheta yoa tiri jire panop̄u macaa numia Cohamacu ya numia c̄jiri. Tí numia Cohamacure wacū tuaa numia jia, ti manusumare yuh̄d̄ur̄ucaera tiri jire. ⁶Tó seheta Sara c̄jiro to man̄no Abrah̄ā c̄jiore noano mehne yuh̄tia tiri jire. Ā jiro tirore “P̄uhtoro”, ni pisua tiri jire. Ā jina musa noano yoa numia jina, cuiro mariea numia jina, Sara c̄jiro poh̄na numia yoaro sehe jira musa cūhu.

⁷To noano yoariro seheta musa cūhu mua musa namos̄ānumiare noano yoaga. Tí numia mari mua yoaro sehe tua numia jierara. Ā jina ño payoa mehne noano yoaga tí numiare. Cohamacu jipihtia dachoripe tiro mehne mari jihtore marine to wariro seheta tí numia cūhure warohca tiro. Tí Ā jiina jich̄u tí numiare noano yoaga. Cohamacure musa siniare musa dojomehne-rah̄to sehe tí numiare noano yoaga.

Noano ti yoapachuta paina tinare ti ñano yoaare yahuha Pedro

⁸Ahri mehne yahu batoiht̄ja: Musa jipihtina cūno mehne noano mehne jiga. Ā jina musa mehne macainare noano p̄ja ñuina jiga. Musa coȳea Jesu yainare p̄u buhuseheri cahma cah̄ga. Ā jina noano yoaga tinare. Ā yoa “Wiho jiina

jija”, ni tuhotuga. ⁹Paina musare ñano ti yoachu tinare ñano yoa cahmaena tjiga. Musare ti tuhtichu tinare tuhti cahmaena tjiga. Musare ti ã yoapachuta noano yoaga tinare. Ñ yoana “Noano jiga”, niga tinare. Tíre yoachtina cjihti-reta to yaina cüre musare Cohamacu sehe musare noano yoaro taro.

¹⁰Áta nina Cohamacu yare ti joari pui:

“Musa noano wahchea mehne ji duana ne ñano ni durucuenta tjiga.

Painare mahñoena tjiga.

¹¹Ñaa yoaare duhunocahga.

Noaa sehere yoaga.

Cahma musa basi ñu tuhtiro marieno jiga.

Musa noano jihtore tuaro cahmaga.

¹²Cohamacu cahmaare yoaina mari puhtoro ã ñu wihborucuro nina.

Tirote ti siniare ã tuhorucuro nina.

Ñano yoaina sehere tiro ñu tuhtira”,

ni joaa tiri jire.

¹³Noare musa tuaro yoachu paina sehe musare ñano yuhduchu yoa dua bihosi tina. ¹⁴Noano musa yoapachuta musare ñano yuhduchu ti yoachu ñuno Cohamacu musare noano yorohca. Ñ jina painare cuiena tjiga. Ñ yoa pjíro tuhotuena tjiga. ¹⁵Cristore “Sã puhtoro jira” ni, musa tuhotuna, ño payoga tirote. Ñ yoana Cristore musa wacü tuaare, Cohamacu mehne musa jihtore paina ti sinituhto pano tinare musa yuhtihtore noano masiyuga. Ñ yuhtina niji siaro mehne, noano ño payoa mehne yahuga tinare. ¹⁶Noaina jiga. Ñ jina “Ñaare yojaja”, ni tuhotusi musa. Ñ jia Cristo yare noano yoaina musa jichu paina musare ñaa quitu dahrea, buoro wahaahca tina. ¹⁷Ñaare musa yoari buhiri musa ñano yuhduchu noaerara. Ñ yoa Cohamacu cahmachu noaare musa yoapachuta musa ñano yuhduchu noa nina tí pinihta.

¹⁸Õ sehetu yuhdure Cristo. Cũ tahata jipihtina ti ñaa buhirire yariare tiro. Noariro jire. Ñ jiro ñaina mari jichu mari yaro jiborirore ñano yuhdure tiro. Ñano yuhdure tiro marine Cohamacu yaina wahachu yoaro taro. To pjacu yariaa wahare. Ñ yariaparota to catia mehne masari jire. ¹⁹Ñ masariro jiro tiro ti buhiri dahrehtore cohtaina cjiri presu jiina cjiri yariarina cjirire buheri jire. ²⁰Tina cohtaina panopu Cohamacure yuhtieraina cjiri jia tiri jire. Tí pjapure Noé cjiro to jiri pjapure, pjiria dohoriare dohoro ñia tiri jire. Tiare to dohoro watoi Cohamacure yuhtieraina cjirire ti yuhtichu cahmano yoari pja cohtaa tiri jimare Cohamacu. Ñ yoa mahainacã ochota dia mininore yuhdua tiri jire. ²¹Minia ti yuhdariro sehetu bautisaa mehne yuhdura masa. Mari pjacure mari wete tju cosaro sehe jierara bautisaa. Soro sehe jira bautisaa. “Ñaa buhiri marieina jija”, mari ni masihto cjihtore Cohamacure “Muhure wacü tuaja”, mari ni yahua jira ahri bautisaa. Ñ yoa Jesucristo to masa mujari mehne yuhduja mari. ²²Tiro Jesucristo manopu wahari jire Cohamacu poto buhusehei jiro, tiro mehne dutiro taro. Ñ jiro tiro anjoa bui, manano macaina puhto bui, dutiina bui ti puhtoro jira.

Cristo yaina jina noa sehere cohtotaina jinahca

4 ¹Mari ñano yuhduna ñano yoaare duhunocaja mari. Cristo ñano yuhdari jire. Ñ jina tiro ñano yuhdure to cuierariro sehetu to suaerariro sehetu musa cühu to yoariro sehetu yoaga. ²Õ sehetu yoaga musa ñaare

musa goa pjaare pari turi musa yoerahto sehe, Cohamacu cahmaa sehere musa yorucuhto sehe. ³Panopu Cohamacure cahmaeraina ñaare goa pjaare ti yoriro sehta yorucuri jimare musa cūhu. Buo tiro marieno ñano yoana, ñaare goa pjaare yoana, cahana, cahaa bose numurine yoana, “Cohamacu jira”, musa nia masurine, Cohamacu to ñu yabia masurine ño payona ahri sehereta yoari jimare musa. Ā jina tó purota yoa batoaga. ⁴Ā jia tí ñaputiare yoaina mehne musa jisinchu mipure musa tíre yoerachu ñua tina sehe ñu cuaa wahara. Ā yoa musare ñano quti dojomehnena. ⁵Ti ā yoachu ñuno ti ñaa yorire Cohamacu sehe sinitu ñuno, yahu yuhdu dutirohca tinare. Tiro catinare, yariaina cūhure besehtiro buhiri dahrehtiro jira. ⁶To ā besehtiro jichu jipihtina masa sehe mipu yariarina cjirire noa buheare yahure Cristo ti yariahto pano. Ō sehta ni yahure ti pjacurire Cohamacu to yaria dutipachuta. Ā yahure tiro Cohamacu jipihtia dachoripe to jiro sehta tiro mehne ti jirucuhto cjihtore.

⁷Pihtiri dacho cjihto mahanocā duhsara. Ā jina noano tuho masiina jiga, mipure Cohamacu mehne musa durucuhto noano. ⁸Painare cahīna payu tahari ñaare ti yoapachuta ā ñunocaja mari. Ā jina musa mehne macainare ā cahīrucuga. Paye dutia yuhdoro tíreta yoaga. ⁹Musa mehne macainare ne nureno marieno musa wuhsepū sāa ta dutiga tinare. ¹⁰Cohamacu musare cāinare musa yoa masihtipe cūri jire. To ā cūchu, musa yoa masiro sehta musa mehne macainare tíre noano yoaga. To cūriro sehta painare noano yoadohona, Cohamacu to cūriro sehta noano yoana nica musa. ¹¹Musa Cohamacu yare noano yahuina jina, Cohamacu to yahuboriro sehta noano yahuga musa cūhu. Masare yoadohoina jina Cohamacu to cūri tuaa mehne painare yoadohoga. Tí jipihtiare yoana Cohamacure masa ti ño payohto sehe ā yorucuga. Jesucristo sehe tíre musa yoachu yoadohorohca. Tirore jipih-tia dachoripe ño payoa, “Tuariro jira”, nino cahmana jipihtinare. Āta nijaro.

Jesu yaina ti jiri buhiri ti ñano yuhduare yahuha Pedro

¹²Yu cahīina, mipure ñaputiario yuhduna, “Cue, soro jiro wahaca yuhure” ni, wacū cuaena tjiga. Musa ñano yuhduchu Cohamacu musa tirore wacū tua namochu yoa duaro, “Ñano yuhdujaro”, nino nica tiro. ¹³Cristo to ñano yuhduriro sehta musa cūhu ā wahana, wahchega musa. Ā wahchena Cristo to si sitea mehne to tjua tachu musa noano wahchenahca. ¹⁴Cristo yaina musa jiri buhiri paina musare ti tuhtichu Cohamacu to yairo Espiritu Santo to si siteriro musa mehne jiro nina. Ā jina wahchega musa. ¹⁵Ā yoa masare musa wajāri buhiri, musa yacari buhiri, paina ti yorire ñuna tinare musa soro ni dojomehneri buhiri musa ñano yuhduchu ñaa nina. ¹⁶Ā jipachuta Cristo yaina musa jiri buhiri ñano yuhduna, buo tiena tjiga. Ñano yuhdupanahta Cristo yaina musa jiare wahchena, Cohamacure “Noana” ni, ño payoga musa.

¹⁷Cohamacu to yaina ti yorire ñuno to besehti pja jiro nina mipure. Jipih-tina mari to yaina mari yorire ñuno bese muhtanohca “Ahri ñaa jira. Ahri noaa jira”, nino. Ā bese muhtano dohse yorohcari to yaina jieraina sehere? Tirore yuhtieraina sehere tuaro buhiri dahrerohca. ¹⁸Ō sehe nina Cohamacu yare ti joari pū: “Noaina yuhduahca. Ti ā yuhduhto mijo curera. To ā mijo curechu Cohamacure cahmaeraina sehe ne yuhdusi. Basioerara tinare”, nina Cohamacu yare ti joari pū. ¹⁹Ā jina Cohamacu to cahmachu musa ñano

yuhduina jina, noaare musa yoarire ne duhuena tjiga. Ñ yoa musare bajua-mehnerirore musare ne duhuerarirore tirore wacū tuarucuga musa.

Jesu yaina ti yoahtore yahuha Pedro

5 ¹Mipure Jesu yaina cahmachuina puhtoare yahuihtja. Yuhu Jesu yaina puhtoro jija. Musa cūhu ti puhtoa tjira. Musare yu yoaro sehe puhtoa jiinare ahrire yahui tai nija yuhu. Cristo to ñano yuhdurire ñuriro cjiro jicu, manopu Cristo mehne yuhduhtiro jicu ahrire musare yahuihtja: ²Cohamacu yaina oveja yoaro sehe jira. Musa sehe ovejare ñu wihboina yoaro sehe jira. Tinare Cohamacu musare to cūrinare musa yaina masare noano ñu wihboga. Ñ yoana Cohamacu to cahmariro seheta noano yajeripohna tia mehne tinare ñu wihboga. Ñ tinare ñu wihbona, “Sā ñu wihbori wapa niñerure wapa-tanahca”, niena tjiga musa. Wahchea mehne tinare ñu wihboga. Wahchea mehne tinare ñu wihboga. ³Ñ ñu wihbona tinare ñano dutipena tjiga. Ñ jina noano yoaga musa Jesu yaina musare ti ñu cūhto sehe. ⁴Musa ñ yoana Cristo jipihtinare marine ñu wihboriro to tjua tachū puhtoro to pisari soro noano si siteri sorore musare to waboriro seheta tiro musare noaare to wahtore cjuanahca. Tí musa cjuahiti ne pihtisi. Ñ jina tiro mehne yuhduhahca musa.

⁵Tinare yu dutiriro seheta musa wahma yapia cūhu tinare musa puhtoare yuhtiina jiga. Ñ yoa musa mehne macainare jipihtinare ño payoa mehne yoadohoga. Ñ sehe nina Cohamacu yare ti joari pūi:

“Masare yuhduruca duainare Cohamacu ñu tuhtira.

Painare ño payoina sehere ‘Wiho jiina jija’, ni tuhotuina sehere noano yoara tiro”,

nina to yare ti joari pūi. ⁶Ñ jina Cohamacu tuariro musare to dutichū “Wiho jiina jija” ni, tirore ño payoga. Musa ñ yochū to quihōri pja jichū musare paina ño payoahca to dutiro mehne. ⁷Tiro musare pjíro tuhotu ñu wihbora. Ñ jina ne pjíro tuhotuena tjiga musa sehe.

⁸Ñ yoa wacū masi jinohbū. Musare ñu tuhtiriro watino yairo suariro to maca churo seheta musare ñano yuhduchū yoa duara. Ñ yoa musare ñano yoa dutira. ⁹Jipihtiropu ahri yahpapure paina Jesu yainare ñano yuhduchū yoa, ñano yoa dutira watino. Tíre masina, tirore yuhtiēna tjiga. Ñ jina Cristore tuaro wacū tuaga musa. ¹⁰Ñ yoa mahanocā musa ñano yuhduri baharo Cohamacu musare yoadohorohca. Musare noaina jichū yoarohca. Tirore musa wacū tua namochū, tirore musa ne duhuerachū yoarohca musare. Tiro jipihitia dachoripe manopu Cristo mehne musa jihtore musare cūriro jira. Tiro Cohamacu jira jipihtinare pja ñuriro. ¹¹“Jipihitia dachoripe tiro tuariro jira”, ni ño payojihna tirore. Ñta yoarucujihna.

Noa duti batoaha Pedro

¹²Ahri pūcāre mahari pūcāre musare yu waroca duachū Silvano sehe yuhure joabasahre. Tiro Jesu yairo yu coyero, Jesu yare ñ yoarucuriro jira, yu tuhotuchū. Musare noano yahu duaja. Ñ jicu “Ahri buhea potocāta Cohamacu musare to cahia buhea jira”, ni yahucu musare ahri pūre joarocaja. Ñ jina ahri buheare ne duhuena tjiga musa.

¹³Musare to yaina cjihtire to beseriro seheta Jesu yaina Babilonia macaina cūhure besea tiri jire Cohamacu. Tina sehe musare noa dutira. Marco yu

macu yooaro sehe jiro cūhū mūsare noa dutira. ¹⁴Mūsa mehne macainare
noano mehne piti bocasiniga.

Jipihina Jesucristo yaina noano jiga mūsa.

2 San Pedro

Jesu yainare joarocaha Pedro

1 ¹Yuhu Simo Pedro Jesucristo buhe dutiro to cūirota jija. Tirore dahra cohtariro jija. Jesucristo, Cohamacu waro jiro, ñaa buhiri marieriro jiro marine cūno pоторita yuhduchu yoariro jira. Ñ jiro tirore musa wacū tuachu, to yaina wahachu yoare musare. Musa ñ wacū tuachu wiho waro jierara, Cohamacu to ñuchu. Ñ to yaina musa wahachu mari cūno pоторita to yaina jija. Ñ jicu musare joarocaja.

² Ñ yoa Cohamacu cūhure mari puhtoro Jesu cūhure masi namona ti cahia mehne noano jirucunahca musa. Ñ noano musa jihto sehe musare sini payoja. Ñ nicu musare noa dutija. Cohamacu musare pjiro noano yoa namojaro.

Õ sehe jira Cristo yaina

³ Cohamacu ñaa marieriro jiro, to tuaa mehne marine to yaina jih-tinare bese cū tuhsua tiri jire. To ñ bese cūchu tuhona, tirore masina to yaina wahaja mari. Ñ wahana Cohamacu masi namona, to tuaa mehne to cahmano seheta noaina jinahca mari. ⁴ Tí to tuaa mehne marine noa yuh-duaro yoare. “Õ seheta musare noano yoihtja”, to niriro seheta marine noa yuhduaro yoara. Marine to ñ yoachu ñuna Cohamacu to jiro seheta waha namonahca mari. Ñ jina ahri yahpa macaa ñaare, mari ñaare goa pjaare mari duhunocaja. Tí ñaa sehe marine dojomehne yuhduamahre.

⁵ Cristore noano wacū tuaina ji tuhsua musa. Ñ jina õ sehe yoa namoga tjoa: Noaare yoina jiga musa. Ñ jina Cohamacu cahmaare noano masiina jiga musa. ⁶ Nano yoa duapanahta Cohamacu cahmaa sehere yoarucuina jiga musa. Ñ yoa Cristo yaina musa jiri buhiri ñano yuhdupanahta ñ cūno pjarucuga musa. Ñ jina Cohamacu ño payoina, to cahmaare yoina jiga musa. ⁷ Ñ yoa musa mehne macainare cahma ño payoina, tinare noano yoadohoina jiga musa. Ñ yoa jipihtina paina cūhure cahiina jiga.

⁸ Musa õ sehe yoa namochuta noa yuhduara. Musa ñ yoa namona, noano yoina jirucunahca. Ñ jina Cristo to cahmaare noano yoarucuina jinahca musa. Wiho waro jiina jisi musa. Ñ yoa Cristore musa wacū tuari wiho waro jisi. Yu niriro seheta musa yoa namochu pinihtare noa yuhduara. ⁹ Musa ñ yoa namoerana Cohamacu yare ne masieraputiara musa. Ñ yoa namoe-raina jina capari ñueraina o capari noano ñu bocaeraina yoaro sehe jina, Cohamacu cahmaare ne masierara musa. Ñ yoa namoerana Cristo musa ñaa yoari buhirire to cohāri cjirire ne wacū payoerara musa. Ñta bonoca duara musa. ¹⁰ Ñ jina, yu coyea, Cohamacu to yaina cjihtire musare to ji dutichu

yuh̄tire m̄sa. Ā yuh̄tiina jina, to yare ne wacū duhuerana to cahmaare tuaro yoarucuga. M̄sa ā yoarucuna potocāta Cohamacu mehne jinahca m̄sa. Ā yoa potocāta to beserina jinahca m̄sa. Ā yoana to yare duhuina jisi m̄sa. ¹¹ M̄sa ā to cahmano sehe yoaina jina mari puhtoro marine yuh̄duchu yoiaro Jesucristo to suho jiropu noano wahanahca m̄sa. Tōpu tiro mari puhtoro ā jirucurohca. Potocā to yaina waro m̄sa jichu n̄uno “Noano mehne yuh̄u mehne jiga m̄sa”, ninohca Jesu musare.

¹² Ā yoa ahrire musare ā wacūchu yoarucuihtja. Ahri musare yu yahuire masi tuhsuh̄re m̄sa. Ā masina Cohamacu yare m̄sa tuhoro sehta noano yoana nina m̄sa. Ā yoaina m̄sa jipachuta ahri musare yu yahurire ā wacūchu yoarucuihtja musare. ¹³⁻¹⁴ Mahanocā duhsara yu yariahto. Tíre noano yahure mari puhtoro Jesucristo yuh̄re. Ā jicu catisinicu waro ahri yu yahurire musare ā wacūchu yoarucuihtja. Yu ā yochu noa nina. ¹⁵ Ā jicu ahri yu yahu joari cjirire musare joa cū pahñoihca yu yariari baharo m̄sa noano masihtō sehe. Ā jina ahri yu yahurire ā wacūrucunahca m̄sa.

Cristo to tuariro to jia tiare n̄uha Pedro cūhu

¹⁶ Ā yoa Cristo to tuaa cūhure to tahto cūhure musare yahuna, s̄a m̄u suro yahuna nieraja. Masa ti m̄u suro ti masia mehne ti yahua jierara musare s̄a yahua. Tuariro to jiare s̄a basita n̄ui. ¹⁷ Cristo to tua yuh̄duariro to jiare s̄are n̄ore Cohamacu mari Pucu. To ā n̄ochu tiro sehe noano si siteriro jire. To ā si sitechu ō sehe nino coa tare to si sitero watoi: “Ahriro yu macu, yu cah̄iriro jira. Tiro mehne tuaro wahcheja”, nino coa tare Cohamacu tua yuh̄duariro. ¹⁸ Muanopu to ā nino coa tachu tuhoi s̄a. Tūcu buipu Cohamacu to jiri tūcui Cristo mehne jii s̄a.

¹⁹ Tíre n̄urina jina, Cohamacu yare yahu muhtaina cjiri panopu macaina ti joari cjiri potocā ti jichu noano masija s̄a. Ti joari cjirire noano n̄u buherucuna noano yoana nina m̄sa. Tí ti joari cjiri Cohamacu yare marine noano masichu yoara. Ahri yahpai n̄aare ti yoari yahpai nahitianoi mari jiboro sehta buhriaro marine to noano n̄u masichu yoaro sehta Cohamacu noano masichu yoara marine. Ā jina Cohamacu yare ti joarire ā buherucuga. Ā buherucuna Cristo to tjua tachupu buhe duhunahca. Ā tjua taro to yare mari masierarire marine noano masi pahñochu yorohca. ²⁰ Jipihtia ahri yu yahuri yuh̄doro ahri sehere noano masiga m̄sa: Cohamacu yare yahu muhtaina cjiri panopu ti joari cjirire mari m̄u suro tíre buhena, “Ō sehe nino nica”, ni masieraja. ²¹ Ne masa ti m̄u suro Cohamacu yare joaera tiri jire. Panopu macaina cjiri Cohamacu yare ti joachu Espiritu Santo sehe ti johtore tinare masichu yoaa tiri jire.

Cohamacu yare potocā buherainare yahuha Pedro

2 ¹ Panopu mari coyea judio masa mehne macaina “Cohamacu yare yahu muhtaina jija”, ni mahñoina jia tiri jire. Ti yoaro sehta mipu cūhure m̄sa mehne macaina ā ni mahñoina jiahca. Tina potocā ti buheboro sehta mahñoa sehere buheahca. Ā buhea Cristo ya sehere dojomehneahca. Ā yoa Cristo to yuh̄duchu yoaborina jipahta tirore “S̄a puhtoro jira”, ni tuh̄otue-rara. Tí jipihtiare ti ā yoari buhiri dóihtā Cohamacu tinare tuaro buhiri dah-erohca. ² Ā mahño ti buhechu tuh̄oa tina ti n̄aare goa pjariro sehta payu

masa tinare ñu cū ñano yoaahca. Ti ã ñano yoaachū ñua paina masa cūhu noaa buheare ñano quití dahreahca. ³ Ñ jia tina mahñoína niñerure wapa cahmaa, mahñoa, ti mu suro ti yahua buheare buheahca musare. Ti ã buheri buhiri Cohamacu tinare tuaro buhiri dahrerohca yuhduro marieno. Panoputa ã yoinare buhiri dahre duti tuhsua tiri jire tiro.

⁴ Tó seheta panoputa Cohamacu ñaina anjoa cūhure to buhiri dahrehtore cū tuhsua tiri jire. Tinare pichacapū nahitianopū peresu yoa tiri jire. Á yoaró pihtiri dacho baharo tinare buhiri dahrerohca. ⁵ Tó seheta panopū macainare Cohamacure cahmaerainare tiro buhiri dahrea tiri jire. Á yoaró jipihtiro ahri yahpare miono, jipihtina masa ñainare mio wajāa tiri jire. To ã miohto pano Noe cjiro sehe tí pja macaina cjiire noaare yoa dutiro yahua tiri jimare. To ã yoaró watoi Cohamacu ahri yahpare miono, Noéne tiro mehne macaina cūhure yuhdūchū yoa tiri jire. Tina jipihtina to yuhdūchū yoarina ocho masa jia tiri jire. ⁶ Tó seheta Sodoma wama tiri maca macaina cjiire Gomorra wama tiri maca macaina cjiire cūhure Cohamacu buhiri dahrea tiri jire. Tí macarine pichaca mehne noano jū pahñonocaa tiri jire. Á yoaró baharopū jihtinare tirore cahmaerainare ñono nia tiri jire. Ñainare to buhiri dahrehtore ñono nia tiri jire tinare. ⁷ Á yoaró Lote wama tiroiro cjiro sehere yuhdūchū yoa tiri jire. Lote sehe noariro jia tiri jire. Á jiri jiro Sodoma macaina Cohamacu dutiare yuhdūrucaina ñabiaro ti yoaachū ñuno pomea waha, ñano tuhutua tiri jire. ⁸ Tiro noariro ñaina watoi jiro, dachoripe ñabiaro ti yoaachū ñuno, ñano ti durucuchū tuhoro ñano yajeripohna tia tiri jire.

⁹ Tirore to yuhdūchū yoaachū ñuna ahri yu yahuhtire masija mari. Cohamacu mari puhtoro tirore cahmainare ti ñano yuhdūchū ñuno tinare yoadohorohca. Á jiro ñaina sehere peresu yoaró tinare cjuara pihtiri dacho jichū to buhiri dahrehto sehe. ¹⁰ Ñaare tuaro goa pjainare Cohamacure yuhdūrucainare tina pinihtare ñano buhiri dahrerohca tiro. Ahrina musa mehne macaina mahño buheina ñaare yoa, ne cuierara. Á yoa buo tierara tina. “Painare masi yuhdūrucaja”, ni tuhutuina jira tina. Á jiina jia muano macaina tuainare ne ño payoeraa, cuiro marieno ñano ni bujupepa tinare. ¹¹ Anjoa sehe ne ti yoaró sehe yoaerara. Tina sehe mahño buheina yuhdoro tuaina jira. Á jipahta tina ne bujupepa mehne muano macaina tuainare ñano yahusāerara Cohamacure, “Painare yuhdūrucaja”, nieraina jia.

¹² Wiho mejeta ahrina mahño buheina sehe nūcū macaina wahiquina yoaró sehe tuho masieraina jira. Nucupū boca sua ti wajāhtina yoaró sehe jira tina. Ti cahmano seheta yoa tina. Á jia ti masierainare bujupe, ñano ni durucu cohtara. Á yoina jia wahiquina yariahtina ti jiro seheta tina cūhū to buhiri dahrehtina jirucuahca. ¹³ Tinare ti ñano yoi buhiri buhiri dahrerohca Cohamacu. Tina ñaare goa pja yuhduara. Á yoa dachopū masa ti ñurocaroi to jipachuta ñano yoarucura. Musa mehne bose numū yoa, tí bose numū ñaare yoa yuhduara. Á jia musa bose numūre ti wetē dahrero seheta tinare musa ñu cūchū tí ñaa pihara musare.

¹⁴ Á yoa numiare ñua, ñaha duara tina. Tuhsū, ñaare ã yoarucu duara. Cohamacure wacū tuaera cureinare ñaare yoa dutia, tó sehe jiinare tinare ñu cūchū yoa. Á yoa ti sahsero paye barore, niñeru cūhure mahño ma mihniina jira. Tina Cohamacu to buhiri dahrehtina jira. ¹⁵ Tina Cohamacu

yare buheraa, soro jia buhea sehere buhera. Ñ yoa Balāa yoaro sehe yoa nina. Balāa, Beor macuno jia tiri jire. Tiro sehe panopu to ñaa yoari mehne niñerure wapata duaa tiri jimare. ¹⁶To ã yoachu ñuno Cohamacu tuhtia tiri jire tirore. To burro durucueraricoro jiparota masuno yoaro sehe to purore durucu tuhtia tiri jire. To ã tuhtichu tuhoro Balāa tuaro to ñaare yoa duamarire duhunocaa tiri jire. Tuhō masierariro to yoa duamarire duhunocaa tiri jire.

¹⁷Ahrina mahñoina mári pohtaripu co marieno yoaro sehe jira. Co mariea mári pohtari ti yaba cjihti jieraro sehetā tina mahñoina ne yaba cjihti jierara. Ñ yoa me curuari muano macaa core waboa curuarire wihnono to wārocachu ti curuari yaba cjihti jierara. Ñ ti yaba cjihti jieraro sehetā, tina mahñoina cūhu masare yoadohoera, ne yaba cjihti jierara. Ñ jiro nahitiano warore yoa tuhsua tiri jire Cohamacu tōpu tinare buhiri dahrero taro. ¹⁸Tina mahñoina ti durucua yaba cjihti jierara. Masiina yoaro sehe masare ã buhemacancocahna. Ñ sehe ni buhera tina: “Mari cahmano sehetā mari yoachu noa nina”, ni buhemana tina. Ti ã ni buhechu masa tuhōa ñaare goa pjaa, ti ya buheare cahmana. Paina masa Cohamacure potocāta wahma cahma ducaina mahanocāta wahara ti ñaare ti duhuri baharo, quihōno yoaeraina mehne macaina ti jiri baharo. Tinare mahñoina ti buhechu tuhōa ñaare cahmana tjoa Cohamacu yaina jiborina jipahta. ¹⁹Tinare ñ sehe ni buhera mahñoina: “Mari cahmano sehetā mari yoachu noa nina”, ni buhemana tina. Ti ã ni buhepachuta ti niriro sehe wahaerara tinare. Ñaare duhu duaeraa, tíre duhu masieraputiarā. Ti ã duhu masierachu, tí ñaa ti puhtoro yoaro sehe jira. ²⁰Mari puhtoro Jesucristore marine yuhduchu yoarirore wahma cahma ducaina sehe ahri yahpa macaa ñaare duhunocamare. Ti ã duhuri baharo pari turi ñaare yoa tjoa, ñabiario waro tjuara tina. Cristore ti masihto pano ti ji muhtariro yuhdoro ñabiario tjuara juna, pari turi ñaare yoa tjoa. ²¹Ñ ñabiario tjuaa, Cohamacu tinare to dutiare yuhducaaa, noaa buhea sehere ti ne masi muhtaerachu noabiaboa tinare. ²²Ñ jia pari turi ñaare yoa, masape ti ni durucurucuri sehetā yoa nina tina. Ñ sehe ni durucura masa: “Diero toa tuhsu pari turi to toa cūri cjirire chura. Ñ yoa yesere ti cosari baharo pari turi tiro ñari sahba cuhsura tjoa. (Tō sehetā yoa noaa buheare cahmamarina cūhu pari turi ñaare cahmaa tjoa)”, ni durucura masa.

Cristo ahri yahpau to tjua tahtore yahuha Pedro

3 ¹Yu cahñina, musare cū pū joaroca tuhsui. Ñ jicu ahri pūre mipure musare joarocai nija tjoa. Tuhsu pua taha joarocacu ahri jipihtiare musare wacūchu yoa duai nija noaa dihtare musa tuhoutu sehe. ²Panopu macaina noaina Cohamacu yare yahu muhtaina cjiri ti yahu joari cjirire wacūga musa. Mari puhtoro marine yuhduchu yoariro Cristo to dutia cūhure wacūga. Tí dutiare sã to cūrina musare buhei.

³Ahrire musa masichu tuaro cahmaja. Ñ jina wahmanore ahrire wacū muhtaga: Pihtiri dacho panocā Cohamacu yare bujupeina jiahca. Tina ñaare goa pjarucuina jiahca. Ñ sehe ni bujupeahca: ⁴“Cristo ‘Tjua taihtja’, niparota ne tjua tasi. ¿Tjua ta duaparota dohsearo ne bajuerajari tiro? Ahri yahpa to ji ducari baharo mari ñuchusuma muna ti yariari baharo jipihtiro soro sehe waharo marieno ã jirucura. Ñ jiro ahri yahpare tahtiro muanopure

mariahna", ni bujupeina jiahca. ⁵ Ñ ni bujupea ahri sehere ne wacüerara tina: Panopure Cohamacu to dutiro mehne ahri yahpare, muano cühure bajuamehnea tiri jire. Ñ yoa tuhsu ahri yahpai co dihta jiriro cjirore yahpa jichu yoaa tiri jire tiro. Ñ yoaro co mehne ahri yahpa mipu to jiro seheta ahri yahpare yoaa tiri jire tiro. ⁶ Ñ yoa baharopu ahri yahpare miono, cohã pahñoa tiri jire ahri yahpa macaare ahri yahpa macaina cühure. (Ñ jiro ahri yahpare cü tahata soro wahachu yoa tuhsua tiri jire Cohamacu.) ⁷ Ñ soro wahachu yoaparota mipure muanore, ahri yahpa cühure pari turi cohtotachu yoerasinire tiro. Tiro to dutiro mehne ahri yahpare muano cühure mipure ti jiro seheta jirucu namochu yoaro nina. Ñ jiro cohtaro nina baharo jipihtiropure jüno taro. Ñ cohtaro nina Cohamacu tiore cahmaerainare buhiri dahrero taro. Ñ buhiri dahrero tinare pichacapu cohãnohca.

⁸ Yu cahüina ahrire wacüga musa: Mil cühmarine "Yoabiari pja jira", mari ni tuhotupachuta cü dachota jira Cohamacu to ñuchu sehere. ⁹ "Cohamacu to niriro sehe ne so yoeraputiara", nina masa. Ñ jierara. Masare noano yoa duaro cohtasinino nina. Ne cüiro masunore pichacapu cohã duaerara tiro. Ñ jiro jipihitina pano ti ñaare tuhotumarire ti duhuchu, Cohamacure ti cahmachu cahmasinina tiro.

¹⁰ Namipure yaca bucuro to wacüenoca yacaro säariro seheta Cristo ahri yahpature wacüenoca tarohca. To tachu to tuaro bisichuta muano macaa pihitia wahaahca. Jü pihitia wahaahca. Ñ yoa ahri yahpa, ahri yahpa macaa cühu jü pihitia wahaahca. Cohamacu ahri yahpa macainare buhiri dahrero taro nina.

¹¹ "Ahri jipihitia pihitia wahaahca", Cohamacu to nichu tuhona ñaare duhuina, Cohamacu cahmaare yoina jiro cahmana marine. ¹² Mari puhtoro Cristo ahri yahpau to tahtore cohtaina jina, soaro mehne to tachu yoaga musa. Tí dachoi muano macaa jü pihitia wahaahca. Jipihitia jü sipia wahaahca. ¹³ To ñ cuaro wahahto to jipachuta mari sehe Cohamacu to ni cüriro seheta jipihitiare to cohtotahtire cohtaja mari. Jipihitia ti jü pihtiari baharo ñ sehe jirohca. Muano pu cühu ahri yahpau cühu wahma jiahca. Ñ yoa tí pjapure noaa dihtare yoaahca jipihitina. Ahrireta cohtaja mari.

¹⁴ Ñ yoa yu cahüina, mari puhtoro to tahtore cohtaina jina Cohamacu to ñurocaroi noano yoina jiga musa ñaa buhiri marieina musa jihto sehe. Ñ noano yoina jiga musa Cohamacu musa mehne to wahchehto sehe. ¹⁵ Yoa cureri pja to bajuerachu ñuna ahrire masiga musa. Masa tiore cahmaina to yuhduchu yoachtina duhsasinina mini. Ñ jiro tinare cohtasinino nina Cohamacu. Æta ni musare joarocari jire mari coyeiro mari cahüiro Paulo. Cohamacu to masia mehne täre joarocari jire tiro. ¹⁶ Ñ dihta ni joarocara Paulo to joarocaa taharipe. Cristo to tahtore, ñaare yoeraina mari jihto cühure yahuro ñ sehe dihta ni joarocari jire tiro. Cãa tahari mijo cureare tiro yahu joarocari jire. Paina ne masieraina, tuho masieraina mahñoa mehne to ñ nirire cohtota mujana. To ñ niri jipachuta soro ni cohtota yahura tina. Paye Cohamacu yare ti joaa püri cühure tó seheta yoara tina. Ti ñ yoachü ñuno Cohamacu tinare tuaro buhiri dahrerohca.

¹⁷ Yu coyea, yu cahüina ahri jipihitiare ti ñ wahahto pano yahuyui nija musare. Ñ jina ahrire masina, noano yoaga musa. Ñaina musare soro ni ti buhechu ne tuhoena tjiga tinare, "Cristore wacü tua duhuri", nina. ¹⁸ Ñ jina

mari pũhtorore marine yũhdũchũ yoiroro Cristore noano wacũ tua namoga mũsa. Tirore, marine to cahĩa cũhũre noano masi namoga mũsa. Mipũre, jipĩhtia dachoripe tirore noano wahche payojihna mari. “Noariro, tuariro jira”, nijihna mari tirore. Āta nijihna.

1 San Juan

Jesucristo catiare wariro jira

1 ¹ Jesu Cohamacu ya duserore yahuriro jira. Dóiputa wahmanoputa jiriro tiro masare Cohamacu mehne ã jirucuchu yoiriro jia tiri jire. Mipure sã tirore yahu joana nija. Tirore tuhona, catiroro warore tirore ñui sã. Æ tjira. Tirore ñuna, sã wamomacari mehne tirore dahra ñui sã. ² Ahriro Cohamacu mehne ã jirucuchu yoiriro ahri yahpapu to masa bajuari baharo tirore sã ñui. Æ jina tirore yahuja sã musare. Tiro jipihtia dachoripe to Pucuro mehne jirucuriro to jichu, mipure Cohamacu tirore ñore sãre. Tíre yahuja sã musare. ³ Cohamacu mehne macaina jija sã. To macuno mehne macaina cūhu jija sã. Æ jina musa cūhu sã mehne macaina, Cohamacu mehne macaina, to macuno mehne macaina musa jihto cjihtore sã ñurire, sã tuhorire musa cūhure sã yahuja. ⁴ Ahrireta sã joaja noano mari wahchehti cjihtire.

Buhriaro to wete marieno seheta Cohamacure ñaa yoaa ne mariahna

⁵ Ahri buhea Cohamacu macuno sãre to yahuri cjiri jia nina. Miputa ahrire yahunahca sã musare: Cohamacu buhriaro yoaro sehe jira. Buhriaro wete marieno to jiro seheta tirore ne ñaa yoaa mariahna. Ñaa sehe nahitiano yoaro sehe jira. Cohamacure ne ñaa yoaa mariahna. To ã jia tiare yahuja musare. ⁶ Æ jina nahitiano jina yoaro seheta mari ñaare yoina jipanahta “Cohamacu mehne macaina jija” nina, mari mahñona nija. Æ yoa Cohamacu yare quihōno yoaeraja. ⁷ Æ yoa buhriaropu jina yoaro seheta Cohamacu to yoiriro seheta mari noaa sehere yoana, paina Jesu yaina mehne noano jina nija. Mari ã yoina jichu Cohamacu macuno Jesu to di cohāno mehne, crusai to yariari mehne jipihtia mari ñaa yoari buhirire cohāna.

⁸ “Yuhu pini ne ñaare yoaeraja”, ni wacūna, mahñoare tuhotuna nija mari. Mari ã ni tuhotuna Cristo yare potocā jiare ne masieraja. ⁹ Wiho mejeta Cohamacure mari ñaa yoirire mari yahuchu tiro quihōno yoiriro jiro, mari ñaare borohca. Æ boro jipihtia mari ñaa buhirire cosawerohca tiro. To niriro seheta yoiriro jira tiro. ¹⁰ “Ñaare yoaeraja” nina, “Cohamacu mahñoriro jira”, nina nija mari. Õ seheta niina to buheare cahmaerara.

Cristo marine yoadohora

2 ¹ Yu pohna, musa ñaare yoaerahito sehe ahrire joai nija. Yu ã ni joapachuta ñaare yoaboca musa. Musa ã yochu ñuno Jesucristo noariro musa ya cjihtire to Pucurore ò sehe ni sini payorohca: “Ahrina ti ñaare yoari buhirire buhiri dahrei tjiga”, ni sini payorohca to Pucurore. ² Cristo mari ñaa

yoari buhirire cohāriro jira. Mari ñaa yoari buhirire mari dihtare cohāerara. Jipihti ro macainapū cūhure ti ñaa yoari buhirire cohā masina tiro.

³Cohamacu to dutiare yoana, tirore potocāta noano masija mari. ⁴Cūiro Cohamacu dutiare yoeraparota “Yūhu Cohamacure masija” nino, tiro mahñoriro jira. Ā jiro Cristo yare potocā jiare ne masierara. ⁵Pairo sehe Cohamacu dutiare yoariro Cohamacure tuaro cahīriro jira. “¿Cohamacu mehne macaina jijari mari?” ni masi duana, ō sehe mari masinahca: ⁶“Cohamacu mehne macariro jija”, niriro Jesucristo yoaro seheta noaare yoariro jiro cahmana tirore. To ā yoariro jichu ñūna “Cohamacu mehne macariro jija”, ni masija mari.

Wahma dutiare yahu dūcaha

⁷Yū cahīina, ahri dutia mipure musare yū yahuhto wahma dutia jierara. Ahri dutia musa wahmanopure cjuariro cjiro muna dutia tjira. Tí dutiare musa tuho tuhsure. ⁸Mipu sehere musare yū yahuhto muna dutia jiparota wahma dutia cūhu jira. Cristo, musa cūhu tí dutiare yoara. Miputa nahitiano to pihti wahcāchu mari ñū masino seheta mari masierarire masi dūca wahcāna nija mari. Ā jiro buhriaro mehne mari ñū masino seheta Cristo musare potocā jiare masichu yoaro ta tuhsure.

⁹“Yūhu buhriaropu jiriro yoaro seheta Cohamacu dutiare yoariro jija”, cūiro niparota, painare ñū tuhtiriro jiro, tiro Cohamacu dutiare yoerara. ¹⁰Ā yoa pairore cahīriro pinihta buhriaropu jiriro yoaro seheta Cohamacu dutiare yoariro jira tiro. Ā jiro ñaare pari turi yoa duaerara. ¹¹Pairore ñū tuhtiriro sehe nahitianopu jiriro yoaro seheta jiro nina. Tiro capari ñuerariro yoaro seheta jira. To wahahtore ñū masierara tiro.

¹²Yū pohna, Cristo to yariaro mehne musa ñaa yoari buhirire cohāri jire. Ā jicu musare yahu joai nija. ¹³Musa pucusuma cūhu, musa Cristore wahmanopure jirirore masina musa. Musa ā masiina jichu musa cūhure yahu joai nija. Musa wahma yapia ñariro watīnore yuhdurucare musa. Musa ā yuhdurucaina jichu musa cūhure yahu joai nija.

¹⁴Yū pohna, Cohamacu mari Pucure musa masina. Musa ā masiina jichu musare mipure yahu joai nija. Musa pucusuma, musa Cristore wahmanopure jirirore masina musa. Musa ā masiina jichu musare yahu joai nija. Musa wahma yapia potocāta musa Cohamacure wacū tuaina jira. Ā jina musa Cohamacu yare yoara. Ā yoana, musa ñariro watīnore yuhdurucare. Ā jicu musare yahu joai nija.

¹⁵Ahri yahpare ahri yahpa macaa ñaare cahmaena tjiga. Ahri yahpa macaa ñaare cahmaina jina Cohamacu mari Pucu sehere cahmaerara musa. ¹⁶Ñaina ti basi ñaare ti goa pjari, ñaare ti ñū duari mari Pucu Cohamacu ya jierara. “Noano cjuā pahñoriro, masi pahñoriro jija yūhu. Ne cūiro masuno yūhure yuhdurucaerara”, masa ti ni tuhotua mari Pucu Cohamacu ya jierara. Tí jipihitia ahri yahpa macaa jira. ¹⁷Ahri yahpa, ahri yahpa macaa cūhu masa ti cahmari cjiri pihitia wahaahca. Cohamacu cahmaare yoariro sehe jipihitia dachoripe Cohamacu mehne jirucurohca.

Cristore ñū tuhtiriro sehere yahuha João

¹⁸Yū pohna, ahri dacho to pihitito mahanocā dūhsara. “Cristore ñū tuhtiriro tarohca” ni, Jesu yaina musare yahu tuhsure. Mipure Cristore ñū tuhtiina

payu ji tuhsure. Ti ã jichu ñuna mipure pihthi dacho cjihto mahanocã to duhsachu masija mari. ¹⁹Ahrina Cristore ñu tuhtiina sehe mari mehne jipahta potocã mari mehne macaina jierare. Æ jia tina marine cohãnocare. Tina mari mehne macaina jia, mari mehne jiboa. Marine cohãnocare. Ti ã cohãchu mari mehne macaina ti jierachu masija mari.

²⁰Cristo Espiritu Santore musa sehere ware. Æ jiro Espiritu Santo musa mehne jira. Æ jina musa jipihthina Cristo yare potocã jiare masi tuhsura. ²¹Musare yahucu “Cristo yare masierara musa”, ni tuhotueraja yuhu. Musa Cristo yare masiina jichu ñucu musare yahuja. Cristo ya ne mahñoa jierara. Tí cùhure masiina musa jichu masija yuhu.

²²Ahriro jira mahñoriro: “Jesu Cohamacu masare yuhduchu yoa duti to warocariro Cristo waro jierara”, niriro sehe mahñoriro jira. Potocãta Cristore ñu tuhtiriro jira tiro. Cohamacure, to macuno cùhure cahmaerariro jira Cristore ñu tuhtiriro. ²³Õ sehe tjira: Jesure cahmaerariro sehe to Pucuro cùhure cahmaerariro tjira. Jesure cahmariro sehe to Pucuro cùhure cahmariro jira.

²⁴Wahmanopure Cohamacure musa tuhori cjirire noano wacùga. Tíre wacùna, Jesu mehne macaina jinahca musa. Æ yoa to Pucuro mehne macaina jinahca. ²⁵Tíreta Jesu marine yahure. Õ sehe jira to yahuri cjiri: “Musa jipihthia dachoripe Cohamacu mehne jirucunahca”, ni cùre Jesu marine.

²⁶Paina musare mahñoa nina. Ti ã mahñoare masicu musare yahu joai nija. ²⁷Æ ti mahñoa musa jipachuta musa sehere Cristo Espiritu Santore wa tuhsure. Espiritu Santo musa mehne jira. Musa mehne jiro musare buheriro jira. Æ jiro tiro jipihthiare musare yahura. To yahua potocãta jira. Mahñoare yahuerara tiro. Æ jina paio musare buhehtirore cahmaerara musa. Espiritu Santo to niriro seheta yoga musa mipure. Æ yoana musa Cristo yare tuhona, tiro mehne macaina jiga.

²⁸Æ tjira. Yu pohna, Cristo mehne macaina jiga musa. Æ jina Cristo to tahti dachore musa cuisu. Æ jina tiro to tahti dachore musa buo ti duhtisi. ²⁹Cristo noaare yoiro to jichu musa masina. Tíre masina ahri cùhure masiga musa. Jipihthina noaare yoaina Cohamacu pohnata jira. Ahri cùhure masiga musa.

Musata Cohamacu pohna jira

3 ¹“Musa yu pohna jira” nino, tuacaro cahĩ yuhdurucajari Cohamacu marine. To ã cahĩina jinata to pohna jija mari. Ahri yahpa macaina ñaina Cohamacure masierara. Æ jia Cohamacu pohna mari jichu ñua tina mari cùhure masierara. ²Yu cahĩina, mipure Cohamacu pohna jija mari. Æ jipanahta baharo mari jihti cjihtire mari noano masierasinija. Æ masierapanahta ahri sehere masija. Cristore mari ñuna, dóihtha mari tirore ñu masinahca. Æ jina Cristo marine to bajuachu tiro to jiro seheta mari cohtotannahca. ³Jipihthina ahrire masiina Cristo to tahtore cohtaina tirore ñu cùa ñaare yoa duaerara.

⁴Ñaare yoana to dutiare yuhdurucana nija. Æ jia jipihthina ñaare yoaina Cohamacu dutiare yuhdurucaina jira. ⁵Cristo masare ti ñaa buhirire cohãhtiro cjihto bajuari jire. Tiro ne ñaare yoaerara. Tíre masina musa. ⁶Æ jia jipihthina Cristo yaina ñaare yoaerucuerara. Pairo sehe ñaare ã yoaerucuriro Cristore wacũ tuaeraro, ne tirore masierara. Æ jiro Cristo yairo jierara. ⁷Yu pohna, musare mahñoinare ne tuhoena tjiga. Jipihthina noaare yoaina Cristo yoaero sehe noaina

jira. ⁸Pairo sehe ñaare ã yoarucuriro watĩno yairo jira. Watĩno pinihta dóihta ñaare yoiriro jia tiri jire. Ñ jiro watĩno to ñaare yoaare, to ñaare yoa dutia cũhũre duhuchũ yoahtiro cjihto Cohamacũ macuno bajuari jire.

⁹Cohamacũ pohna jina Cohamacũ yoaaro sehetã jiina jija. Ñ jinata ñaare yoa-
rucueraja. Cohamacũ mari Pũcũ to jichũ mari sehe ñaare yoaaru masieraja. ¹⁰Õ
sehe jiinare Cohamacũ pohñare masinahca: Cohamacũ pohna watĩno pohna yoaaro
sehe jierara. Ñaare yoaaruina, painare cahĩeraina Cohamacũ pohna jierara.

Musa mehne macainare cahĩga

¹¹“Mari mehne macainare cahĩjihna”, ni buheare wahmanopũre tuho
tuhsũre musa. ¹²Mari Caĩ to ñano yoiriro sehetã yoaena tjijihna. Tiro watĩno
yairo jiro, to bahũrore wajãa tiri jire. ¿Dohse yoaaro tirore wajãri, musa tuho-
tuchũ? Tĩre yahuihtja musare: Caĩ to yoiari cjiri ñaa jia tiri jire. To bahũro
sehe to noaare yoiriro jichũ ñũ tuhtiro to wahmino sehe tirore wajãa tiri jire.

¹³Ñ jina yũ coyera, ahri yahpa macaina musare ti ñũ tuhtichũ “¿Dohse jiro
baro marine ñũ tuhtijari tina?”, ni tuhotuena tjiga. ¹⁴Mari pichacapũ wahabo-
rina jimai. Mipũre mũanopũ ã jirucutina cohtotarinaapũ jina nija mari. Jesu
yainare cahĩna, Cohamacũ marine to cohtotachũ yoiare masija mari. Masare
cahĩerariro pichacapũ wahahtiro jira. ¹⁵To coyeroire ñũ tuhtiriro masare wajã-
riro jira, Cohamacũ to ñũchũ. Masare wajãina ne mũanopũ Cohamacũ mehne
jirucusi. Tĩre noano masina musa. ¹⁶Masare cahĩare õ sehe masinahca. Jipihtia
dachoripe Cohamacũ mehne mari jihto cjihtore Cristo yariaro marine tuaro
cahĩre. Ñ yariaro marine to ã cahĩrucurire masichũ yoaaro nire. Ñ jina Coh-
macũ to cahmachũ mari cũhũre Jesu yaina yaro jiboriore yariaro cahmaboca.
¹⁷Payũ cjuariro Jesu yoiore pjacuoriore ñũparota tirore pja ñueraro, Coh-
macure cahĩerara tiro. ¹⁸Yũ pohna, mari cahĩa sehe mari dũsero dihta wijaero
tjijaro. Masare mari cahĩna, potocãta tinare yoadohoro cahmana marine.

Cuiro marieno Cohamacũ cahai ji masija mari

¹⁹Tó sehetã cahĩna mari potocã Cohamacũ yaina mari jia tia cũhũre masi-
nahca. Ñ jina Cohamacũ cahai ne cuiro marieno mari ji masija. ²⁰Ñ jina “Ñaa
buhiri jica yũhũre”, mari ni tuhotupanahta, Cohamacũ cahai cuiro marieno ji
masija. Tiro sehe mari yũdoro tuariro jiro jipihtiare masi pahñoriro jira. ²¹Yũ
cahĩina, noaare yoana, “Noaa sehere yoana nija”, ni tuhotuna, Cohamacũ cahai
mari cuiro marieno ji masija. ²²Cohamacũ to dutiare, to cahmaa cũhũre mari
yoachũ, tirore mari sinino purota tiro warohca. ²³Õ sehe dutira tiro marine:
“Cohamacũ macunore Jesucristore wacũ tuaga. Ñ yoa Cristo marine to dutiriro
sehetã musa mehne macainare cahĩga musa”, ninota dutira marine.

²⁴Cohamacũ dutiare yoiriro Cohamacũ mehne macariro jiro nina. To ã
jiriro jichũ, Cohamacũ tiro mehne macariro jira. Cohamacũ mari mehne
macariro to jiare mari masi duachũ marine to wariro Espĩritu Santo tĩre
marine masichũ yoaohca.

Mahĩnoare ti buhechũ, Cohamacũ yare ti buhechũ cũhũre noano ñũ masi dutiha

4 ¹Yũ cahĩina, paina “Cohamacũ yairo Espĩriture cjuaja”, niina ti jipachũta
ti buhea mahĩnoa jira. Paina sehe Espĩritu Santo warore cjuaina ne

mahñoño marieno buhera tina. Payu “Cohamacu yare yahu muhtaina jija”, nipahta mahñoína jira mipure. Jipihtiropu jira tina. Á jina paina musare ti buhea sehe mahñoa buhea jichu ñu masiga musa. Cohamacu ya ti jichu cūhure ñu masiga musa. ²Cohamacu yairo Espíritu Santore cjuainare musa ñu masi duana, ò sehe masinahca: “Jesucristo ahri yahpapu mari yoaro sehe pjacu tiroto bajuari jire” ni, buheina Cohamacu yairo Espíritu Santore cjuaina jira tina. Á jina ã ni buheinare ñu masinahca musa. ³Paina sehe “Jesu ahri yahpapu mari yoaro sehe pjacu tiroto bajuerari jire” ni, buheina Cohamacu yairo Espíritu Santore cjuaraina jira. Ti ya tuhotua Cristore ñu tuhtiriro to tuhoturo seheta jira. “Cristore ñu tuhtiriro tarohca”, ti nirire tuho tuhsure musa. Á yoa to ya buhea ahri yahpapore wihi tuhsure.

⁴Musa sehe yu pohna, Cohamacu yaina jira musa. Á jina “Cohamacu yare yahu muhtaina jija sã” ni, mahñoínare yuhduruca tuhsure musa. Musa mehne jiriro Espíritu Santo sehe tua yuhdurucara. Á jiro ahri yahpa macaina yairo watño yuhdoro tuara. Á jina mahñoínare yuhdurucare musa. Á jina ti buheare cahmaerare musa. ⁵Mahñoína sehe ahri yahpa macaina ñaina jira. Á jia tina ahri yahpa macaa ñaare ti buhechu ahri yahpa macaina ñaina sehe tinare noano tuhora. ⁶Mari sehe Cohamacu yaina jija. Á jia Cohamacure masiina marine noano tuhora. Paina sehe Cohamacu yaina jieraa, marine ne tuho duaerara. Ti ã tuho duaerachu ñuna ti ya buhea Cohamacu ya buhea ti jierachu masinahca mari. Paina sehe marine ti tuhochu ti ya buhea noaa buhea ti jichu cūhure masija mari.

Cohamacu painare tuaro cahīrucuriro jira

⁷Yu cahīina, Cohamacu marine painare cahīchu yoariro jira. To ã yoariro jichu ñuna mari mehne macainare cahījihna mari. Masare noano cahīina sehe Cohamacu pohna jira. Á jia tina Cohamacure noano masina. ⁸Cohamacu jipihtinare tuaro cahīrucuriro jira. To ã cahīrucuriro to jichu masare cahīeraina sehe Cohamacure masierara. ⁹Cohamacu marine to cahīare mari masi duana, ò sehe masinahca: Cohamacu sehe to macunore cūirota jirirore marine yuhduchu yoahitiro cjihtore ahri yahpapore warocari jire. Á warocaro marine to cahīare marine masichu yoaro niri jire. ¹⁰Cahīa waro ò sehe jira: Cohamacure mari cahīri cjiri sehe potocã cahīa waro jierara. Marine Cohamacu to cahīa sehe potocãta cahīa waro jira. Á yoa to macunore mari ñaa buhirire cohāhtiro cjihtore warocaro marine tuaro cahīna tiro.

¹¹Yu cahīina, Cohamacu ã tuaro marine to cahīchu ñuna mari cūhu mari mehne macainare cahījihna. ¹²Masa sehe ne Cohamacure ñuerare. Tirore ñueraina mari jipachuta mari mehne macainare mari cahīchu, Cohamacu sehe mari mehne ã jirucuro nina. Á jiro potocãta marine cahī namorucuchu yoara tiro. ¹³Cohamacu sehe marine to yairo Espíritu Santore ware. Á jina Espíritu Santore cjuana, Cohamacu mehne mari noano jia tiare, tiro sehe mari mehne to noano jia tia cūhure masija mari. ¹⁴Á yoa Cohamacu mari Pucu to macunore ahri yahpa macainare yuhduchu yoahitiro cjihtore to warocarire sã ñui. Tíre ñuna painapure tíre yahuja sã. ¹⁵Cohamacu mehne macariro ò sehe niriro jira: “Jesu Cohamacu macuno jira”, niriro tiro pini Cohamacu mehne macariro jiro nina. Á yoa Cohamacu cūhu tiro mehne macariro jiro nina.

¹⁶ Ñ yoa marine Cohamacu to cahĩare masija mari. Cohamacu jipihtinare tuaro cahĩrucuriro jira. Ñ jiro cũiro masare cahĩrucuriro jiro, Cohamacu mehne macariro jira. Ñ jiro Cohamacu cũhu tiro mehne macariro jira. ¹⁷ Ñ jina mari noano cahĩ namorucuja Cohamacure, paina cũhure, buhiri dahreri dacho jichu mari cuiro marieno mari jihto cjihtore. Ñ jina cui si mari ahri yahpai Cristo yoaro sehe jina. ¹⁸ Painare cahĩa mehne ne cuiro mariahna. Cohamacu marine to cahĩare masina mari ñano wahahtore ne cuieraja. Masa cuia tinar buhiri dahrehtore cuiina jira. Ñ jiro cuiro sehe Cohamacu cahĩare masierariro jira.

¹⁹ Marine Cohamacu cahĩ muhtari jire. Ñ jina mari cũhu tiore cahĩja. ²⁰ Cũiro “Cohamacure cahĩja”, niriro jiparota paire ro ñu tuhtiriro jiro, mahñoriro jira tiro. Tiro to ñurirore cahĩeraro, Cohamacure cahĩ masierara tiro, tiore ñueraro. ²¹ Ñ jiro õi jira marine Cristo to dutia: Cohamacure cahĩro jicu mu cahai jiriro cũhure cahĩga.

Cohamacu pohna ahri yahpa macaa ñaare yoa duaerara

5 ¹ Jipihina Jesure “Cohamacu masare yũdũchu yoa duti to warocariro Cristo jira” niina, Cohamacu pohna jira. Paina pucurore cahĩna, to pohna cũhure cahĩja mari. ² Tó sehet Cohamacure cahĩna, to dutiare noano yoana to pohna cũhure mari cahĩna nija. ³ To dutiare noano yoana Cohamacure cahĩna nija. Cohamacu to dutiare mari yoachũ marine wapuoerara. Mari jipihina Cohamacu pohna jina, ahri yahpa macaa ñaare cahmaeraja mari. Ñ jia to dutiare mari yoachũ wapuoerara. ⁴ Cohamacure wacũ tuana ne ahri yahpa macaa ñaare cahmaeraja. Ñ jina tiore mari wacũ tuari baharo ñano yoa duaeraja. ⁵ Ñaare cahmaerana õ sehe niina jija mari: “Jesu Cohamacu macuno jira”, niina jina ahri yahpa macaa ñaare cahmaeraina jija mari.

Cohamacu macunore yahuha João

⁶ Jesucristo ahri yahpapũ to tachũ tiore João co mehne to bautisarire masina, crusapũ to di cohãri cũhure masina, Cohamacu macuno to jiare masija mari. To bautisari dihta Cohamacu macuno to jiare marine masichũ yoarera. To di cohãri cũhu marine tíre masichũ yoara. Espĩritu Santo “Jesucristo Cohamacu macuno jira”, ni yahura marine. Tiro potocã ni yahuriro jira. ⁷ Ñ jia Jesu Cohamacu macuno to jiare tiaro marine yahura: ⁸ To macuno to jiare Espĩritu Santo sehe marine yahura. Ñ yoa Jesure co mehne to bautisari cũhure masina, Cohamacu macuno to jiare masija mari. Ñ jina mari ya cjihtire to yariare to di to cohãre masina, Cohamacu macuno to jiare masija mari. Ñ jia tí sehe cũno potori marine masichũ yoara Jesu Cohamacu macuno to jiare. ⁹ Masa ti yahua re tuhona “Potocã tjira”, nija mari. Ñ niina jipanahta Cohamacu to macunore to yahuchũ masa ti yahua yũdoro tiro sehere noano tuhoro cahmana marine. Cohamacu waro to jichũ to macunore to yahua re tuhoro cahmana marine. ¹⁰ Ñ jia jipihina Cohamacu macunore wacũ tuaina Jesure yahua buheare noano tuhora. “Potocã tjira”, ni tuhura tina Jesure yahua buheare. Cohamacu to macunore to yahua re tuhoerariro “Cohamacu mahñoriro jira”, niriro jira tiro. ¹¹ Cohamacu marine jipihia dachoripe to catia mehne ñ jirucuchũ yoarohca. Cohamacu macuno yaina mari jichũ ñuno ñ jirucuchũ yoarohca marine. Ahri jira Cohamacu marine

to yahua. ¹² Cohamacu macuno yaina jia to catia mehne ã jirucuahca. Paina tirore cahmaeraina sehe to catia mehne ne ã jirucusi.

Yahu to joa batoa jira

¹³ Musa Cohamacu macunore wacũ tuaina Cohamacu catia mehne ã jirucunahca. Tíre musa masihtĩ cjihtire musare yahu joai nija.

¹⁴ Cohamacu to cahmariro seheta mari tirore dohse jiare mari sinichu tiro marine noano tuho nununohca. Ñ mari sinina “Potocãta noano tũhora tiro”, ni masija mari. ¹⁵ Tirore mari sinichu, tiro marine tũhora. To ã tũhorire masina, tirore mari sinino purota to wahtiro jichu cũhure masija mari.

¹⁶ Musa coyeiro to ñaare yoachũ ñũna, tí ñaa Cohamacu pichacapũ to waha dutia ñaa jierachũ, tirore sini payobasaga Cohamacure. Ñ jiro Cohamacu tirore yoadohoro to catia mehne ã jirucuchũ yoarohca tirore. Cohamacu pichacapũ to waha dutieraina dihtare sini payobasaga musa. Paye ñaa sehe Cohamacu pichacapũ to waha dutia ñaa waro jira. Cũiro tí ñaa warore to yoachũ “Tirore sini payobasaga musa”, nieraja yũhũ. ¹⁷ Jipihitia ñaa yoa ñaa warota jira, Cohamacu to ñuchũ. Ti ã jipachũta paye ñaa Cohamacu pichacapũ to waha dutia ñaa jierara.

¹⁸ Cohamacu macuno Jesu sehe Cohamacu pohnare noano ñũ wihbora. To ã ñũ wihbochũ watĩno sehe Cohamacu pohnare ne ñano yoa masierara. Ñ jia Cohamacu pohna sehe ñaare ã yoarucuerara. Ahrire mari masija.

¹⁹ Mari sehe Cohamacu yaina jija. Watĩno sehe ahri yahpa macaina puhtoro jira. Ahri cũhure mari masija.

²⁰ Cohamacu macuno ahri yahpapurẽ taro marine noano masichũ yoare tiro. To ã yoachũ potocãta Cohamacu waroreta mari noano masija. Ahri cũhure mari masija. Cohamacu macuno Jesucristo yaina jija mari. Ñ jina potocãta Cohamacu waro mehne macaina jina nija. Ahriro yũ niriro potocãta Cohamacu waro jira. Ñ yoa ahriro to macuno to catia mehne ã jirucuchũ yoiriro jira. ²¹ Yũ pohna, “Cohamacu jira”, ti nia masurine ño payoena tjiga.

2 San Juan

Jesucristo yare, potocã cahĩa cūhure yahuha

¹⁻²Yūhū bućuro muhure Cohamacu to besericorore mū pohna cūhure ahri pūre joarocaja. Jesucristo yare yuhtiina jija mari. Tiro to buhea cūhū mari mehne jipihtia dachoripe ā jirucuahca. Ā jicu potocāta musare cahīja yūhū. Yūhū dihta cahīcu nieraja musare. Paina Jesu yare masiina tina cūhū potocāta cahīna musare. ³Cohamacu mari Pucu, Jesucristo to macuno cūhū potocāta ti cahĩa mehne marine noano yoaahca. Ā jia pja nūa mehne marine noano jichū yojaro tina.

⁴Cohamacu mari Pucu marine to dutiriro seheta cāina mū pohna to yare yuhtiina ti jichū masicu wahcheja yūhū. ⁵Yu cahīricoro, mipure muhure yu dutihto wahma dutia jierara. Wahmanopure ahri dutia marine dōiputa ji tuhsuri jire. Ō sehe dutira marine. Mari mehne macainare cahījihna. ⁶To dutiare yoa pahñona mari tirore cahīja. Wahmanopure musa tūhoriro seheta mipu cūhure ō sehe dutira musare. Painare ā cahīrucuina jiga.

Payu mahñoina jira

⁷Payu mahñoina “Potocã Jesucristo ahri yahpapu mari yoaro sehe pjacu tiroiro masa bajuerari jire”, niina cūhū ahri yahpa macainare buhea wahare. Tó sehe niina mahñoriro, Cristore nū tuhtiriro yoaro sehe jiina jira. ⁸Noano yoaga musa. Cohamacu ya wapare musa noano yoi wapare boena tjiga. Musa ā boerachū Cohamacu noa yūhduaro yorohca musare.

⁹Jipihtina Cristo yare yūhduacaina, Cristo yare quihōno buheraina Cohamacu yaina jierara. Ā yoa Cristo yare ne cohāeraina Cohamacu mari Pucu, to macuno mehne macaina jira tina. ¹⁰Cristo ya buheare ne cahmaerariro, paye buheare yahuriro musa cahai to tachū, tirore musa wūhūi sãa ta dutiena tjiga. Tirore piti bocaena tjiga. ¹¹Paye buheare yahuriro Cristo yare cahmaerariro ñano yoara. Ā jiro tirore piti bocariro sehe ñano yoiarore yoadohoro nina.

Yahu joa batoa jira

¹²Payu musare yahu duapaihta tīre joa duaeraja. Musare nūi waha duaja. Musare nūcu musa mehne suhūduihtja mari noano wahchehti cjihtire.

¹³Cohamacu to besericoro mū baho pohna sehe muhure noa dutira.

3 San Juan

João Gayo wama tirirore “Noariro jira”, niha

¹Yuhũ bũcũro mũhũre Gayore potocã yũ cahĩrirore ahri pũre joarocaja.

²Yũ cahĩriro, Cohamacũ mehne macariro mũ jichũ masija yuhũ. Tiro mehne mũ noano jiriro seheta mũ noano yuhũduhti cjihtire, mũ pjacũ doha-tiro marieno mũ jihti cjihtire Cohamacũre sini payoja mũhũre. ³Mahainacã Jesu yaina yũ cahai wihia mũ jia tiare yahuhre yuhũre. “Cristo to cahmano seheta potocãta yoa namono nihre Gayo”, ni yahuhre tina yuhũre. Ti ã ni yahuchũ tuhocũ tuaro wahchehi yuhũ. ⁴Musa Jesu yare yũ buherina cjiri to cahmano seheta musa yoachũ tuhocũ tuaro wahcheja.

⁵Yũ cahĩriro, Jesu yainare yoadohocũ noano yoara mũhũ. Mũ ñũ masieraina ti jipachũta, tinare yoadohocũ noa yuhũduaro yoara mũhũ. ⁶Tina panopũ mũ ñũ masieraina sehe Jesu yainare õi cahmachuinare sãre õ sehe ni yahuhre: “Gayo Jesu yainare noano cahĩna”, ni yahuhre panopũ mũ ñũ masieraina sehe. Baharo mũ ya macare ti yuhũ wahcãchũ ñucũ tinare noano yoadohoga Cohamacũ to wahchehto sehe. ⁷Tina Jesu yare buhe tinia wahaa, Cohamacũre cahmaeraina ti yoadohochũ cahmaerara. ⁸Ã jina tinare Jesu yare buhe tiniinare yoadohojihna mari. Tinare ã yoadohona nija potocã jiare ti yahuhti cjihtire.

Diotrefe to ñaa yoirire yahuha João

⁹Tó macainare Jesu yainare mahanocã joarocamahi. Yũ ã joarocapachũta Diotrefe to basi ti puhtoro yoaro sehe ji duaro, yuhũre tuho duaerayuhca.

¹⁰Musa cahai yũ suri baharo to yoirire musare yahu pahũoihtja. Sãre ñano durucuyuhca tiro. Mahũoa payũriro jira tiro. ã yoa paye ñaa cũhũre yoa-yuhca tiro. Jesu yainare to yare buhe tiniinare ne tiro to wuhũre sãa ta dutierayuhca. ã yoa paina tó macaina Jesu yaina sehe buhe tiniinare ti sãa ta dutichũ ñũno tiro sehe “Buhe tiniinare sãa ta dutiena tjiga musa ya wuhũ-sepũre”, ni yahusãyuhca tinare. “Musa ya wuhũsepũ buhe tiniinare musa sã ta dutiri buhiri mari Jesu yaina mari cahmachuri wuhũpũre sãaena tjiga musa sehe”, niyuhca Diotrefe tó macainare Jesu yainare.

¹¹Yũ cahĩriro ñainare ñũ cũi tjiga. Noano yoina sehere ñũ cũga. Noare yoina Cohamacũ yaina jira. Ñaare yoina Cohamacũre masierara.

Demetrio noaa to yoirire yahuha João

¹²Jipihtina noano durucura Demetrio sehere. ã yoa to yoirire ñua noano to yoiriro jichũ masina masa. Sã cũhũ tirore ãta ni yahuja. Sã yahua sehere potocã jichũ masina musa.

Yahu batoaha João

¹³Muhure payu yahu duamahi. ã yahu duapaihta tíre joaeraja. ¹⁴Mahanocã baharota muhure ñu duaja. ã jina tópu mari basi suhúdunahca.

¹⁵Noano jiga muhu. Mari mehne macaina õ macaina Jesu yaina cūhu muhure noa dutira. Tó macaina mari mehne macaina jipihtina noajaro.

San Judas

Juda Jesu yainare joarocaha

¹Yuhū Juda Santiago bahuro Jesucristore dahra cohtariro musare Jesu yainare ahri pūre joarocaja. Musare Cohamacu mari Pucu besea tiri jire. Ā jina to cahīa mehne noano jira musa. Ā yoa musare Jesucristo ñu wihboro nina. ²Noa dutija musare. Cohamacu musare pja ñuno to yoadohoro mehne to cahīa mehne noano jiga musa.

Mahñoina ti buheare yahu dūcaha Juda

(2P 2.1-17)

³Cohamacu marine pichacapu wahaborinare to yuhdūchu yoa sehere tuaro joaroca duamahi musare, yu cahīinare. Ā joa duapaihta musare mipure mahñoa buheare cahma sāaeracu musare joarocaja. Ā jina Jesucristo ya yahua sehere tuaro yahuga. Ahri yahua sehere tūhona, mari Cohamacure noano wacū tuaja. Ahri yahua sehe Jesu to cūrina to yainare ti yahuri cjiři āta jirucunocahna cohtotaro marieno. ⁴Mahainacā masa ñaina Cohamacure cahmaeraina wacūenoca musa cahai wihire. Musa mehne jia tina ō sehe ni yahumana musare: “Cohamacu yaina musa jichu, tiro cahīna musare. Ā jiro numia mehne musa ñano yochu tiro musare ne buhiri dahresi”, ni yahumana tina. Ā jia mari puhtorore cūirota jiriore Jesucristore “Cohamacu macuno jierara”, ni yahumana tina. Ō sehe ni yahuinare Cohamacu to buhiri dahrehtore yahua tiri jire panopure. To yare ti joari pūi ā ni yahua tiri jire.

⁵Mipure musare payere wacūchu yoa duaja. Ahrire musa masipachuta pari turi ahrire musare wacūchu yoa duaja. Cohamacu judio masare Egiptoi jiinare to naa wiori baharo tina mehne macainare tirore wacū tuaerainare tiro wajāa tiri jire. ⁶Ā yoa paina cūhure wacūga musa. Paina anjoa sehe Cohamacu dutiare yoa duaera tiri jire. Ā jia tinare to ji duti to cūriore tina ji duaera tiri jire. Ā yoa ti jimarire cohānoca tiri jire tina. Ti ā cohāchu ñuno Cohamacu nahitianopu tinare peresu yoa tiri jire. Ā jia tina pihtiri dacho pano comaa dari mehne dūhterina yaro sehe jirucuahca tina to peresu yoarina. Ā jiro pihtiri dacho jichu tinare buhiri dahrerohca Cohamacu. ⁷Āta yoa tiri jire paina cūhu. Tina cūhure wacūga musa. Tina Sodoma wama tiri maca macaina, Gomorra wama tiri maca macaina tí macari cahacāi jia macari macaina cūhu numia mehne ñano yoa tiri jire. Soro yoa cūhure yoa, tina mua sehe ti basita ti pjacuri mehne ñano yoa tiri jire. Numia cūhu āta yoa tiri jire. Ti ā yoari buhiri Cohamacu tinare jū pahñonocaa tiri jire. Tinare jūno Cohamacu jipihtina tirore yuhdūcainare to buhiri dahrehtore masare ñono nia tiri jire. Tinare to buhiri dahreri pichaca ne yatisi.

⁸Tina Cohamacu to buhiri dahrerina cjiro yoaro seheta mipu cūhure āta yorarucura mahñoare buheina. Tina tuho masieraina yoaro seheta ti pjacuri mehne ñano yoara. Ā yoa Cohamacu dutiare ne cahmaerara tina. Ā yoa muano macaina si siteinare tina sehe ñano durucu cohtara. ⁹Noaina anjoa sehe tuaina jipahta ā ni durucuerara. Miguel wama tiroiro anjoa puhtoro sehe Moise pjacu cjirore cahmano, watino mehne cahma sayoa tiri jire. Tua yuhduariro jiparota tiro “Watino yuhdoro yuhu pinihta tuaja”, ni tuhotuera tiri jire. Ā jiro to mu sūro watinore ñano durucuera, tirore tuhtiera tiri jire. Ā jiro ō sehe nia tiri jire watinore. “Cohamacupu muhure tuhtijaro”, nia tiri jire Miguel watinore. ¹⁰To ā yoiro jipachuta ahrina mahñoina sehe ti masierainare ñano durucu cohtara. Ā yoa wahiquina tuho masieraina ti mu sūro ti yoaro seheta tina mahñoina cūhu yoara. Ā yoina jia, pichacapu wahaahca.

¹¹Tinata ñano yuhduahca. Caī cjiro to yoiro seheta ñano yoara tina cūhu. Ā jia Balāa to yoiro seheta tina niñerure na duaa, mahñoare buhera. Ā yoa Coré to puhtoro cohā duariro cjiro yoaro seheta tina cūhu tó seheta yoara. Ā jia tiro yoaro seheta tina cūhu pichacapu wahaahca. ¹²Tina mahñoina sehe musa cahma cahīhti bose numurine chūa, ño payoa marieno mehne tina ti cahmano pape, ti sahserota chūare bora painare waro marieno. Wete yoaro sehe tina musa bose numurine noaa dachori jiboriore dojomehne cohtara. Me curuari wiwnono to wārocaa curuari, co mariea me curuari ti yaba cjihti jieraro seheta tina mahñoina ne yaba cjihti jierara. Ā yoa dicha tiri pja jichu dicha tieraa yucuri yoaro sehe jira tina. Tí yucuri pua tahapu yariaa wahara. Cū taha dicha tieraa yucu, yariaa yucuri yoaro sehe waha tuhsura. Tí yucuri ti duhari baharo pari turi yariaa wahara tjoa. Tí yucuri yoaro seheta jia yaba cjihti jierara tina mahñoina. ¹³Ā yoa pjiri ma macaa pahcōri bujua pahcōri yoaro sehe jira tina. Tí pahcōri ti cjāruca ōchu, wete tia sahpo wahara. Dohse jiare tina mahñoina ti yoachu pahcōri macaa sahpo wete tia sahpo ti waharo seheta mahñoina ti ñaa yoa jira. Ā yoa si mu wahcāa poca ñahpichoha poca yoaro sehe jira tina. Tí ñahpichoha poca ti wahahti mahare duhunoca, ti ā cohtotarucuro seheta tina cūhu quihōno buheraa, ā cohtotarucura. Ti ā yoiro buhiri nahitianopu, ñanopu ā jirucuahca tina mahñoina.

¹⁴⁻¹⁵Enoco panopu macariro cjiro Adão panamana seis baharo to panami tiroiro ō sehe nia tiri jire tinare mahñoinare: “Tuhoga yuhure. Cohamacu payu to yaina anjoa noaina mehne jipihtina ñainare ti ñaa buhiri buhiri dahrero tarohca. Ā yoaro jipihtina Cohamacure ñu tuhtiinare ti ñaa yoiro buhirire tinare buhiri dahrero tarohca Cohamacu. Cohamacure ñano ti durucuri buhiri cūhure tinare buhiri dahrero tarohca”, ni yahuyua tiri jire Enoco. ¹⁶Tina mahñoina painare tuhtiina, nurerucina ti ñano wacūa dihtare yoara tina. Ā yoa “Painare masi yuhdurucaja sā”, nirucura tina. Ā jia ti cahmano sehe yoa duaa, paina ti cjuaare na duaa, mahño cū durucura tuho ji coaroputa.

Jesu yainare yahu namoha Juda

¹⁷Mari puhtoro Jesucristo buhe duti to cūrina ti buherire wacūga musa, yu cahīina. ¹⁸Ō sehe ni buhere tina marine. “Ahri yahpa to pihtiho panocā Cohamacure, musa to yaina cūhure ñano durucu bujupeina jiahca. Tina Cohamacure cahmaeraa, ñaare ti goa pjaare yoaahca”, ni yahure Jesu to

cūrina musare. ¹⁹ Jesu yainare ti basi ti cahma ñu tuhtichu yoara tina mahnoina sehe. Ñ yoa tina ñaina ti mu suro yoina jia, Espiritu Santore ne cjuarara tina. Ti ñaa goa pjaa dihtare yoara tina.

²⁰ Musa sehe yu cahina, Jesucristo ya buheare noano tuho namoga, noano wacu tuaina musa jihto sehe. Ti buhea sehe ñaa mariea buhea noa yuhduara. Espiritu Santo yoadohoa mehne Cohamacu mehne durucuga musa. ²¹ Cohamacu musare tuaro cahina. Tire masina tirore noano yuhtiina jiga musa. A yuhtiina jiga, Jesucristo mehne musa a jirucutire musa cohtaro watoi. Tiro marine pja ñuno manopu a jirucuchu yorohca.

²² Cristo yare “Quihono jieraboca”, ni tuhotuinare pja ñuga. ²³ Painare yoadohoga pichacapu ti wahaerahto sehe. A jina painare pja ñuga musa. Tinare yoadohona musa cuhu ti ñaa yoaare nu cuna tjiga. Wete tiri suhtirore musa cahmaeraro seheta, paina ti ñaa yoaare cahmaena tjiga musa, “Ti ñaa yoaare nu cu yoiari”, nina.

Juda Cohamacure to ño payoa jira

²⁴ Cohamacu mari puhtoro marine nu wihbo masina ñaare mari yoaerahto sehe. A jiro tiro si siteriro marine ñaa buhiri marieinare manopu to cahapu cu masina. A marine topu to cuhu mari wahchenahca. ²⁵ Tiro Cohamacu cuirota jira. Pairo mariaha. Pichacapu wahaborinare marine yuhduchu yoiaro jira. Tiro sehe panopu, mipure, jiphtia dachoripe cuhare noa yuhduariro, mari bui puhtoro jiro, tua yuhduariro, jiphtinare dutiro jira. To a jiro jichu mari puhtoro Jesucristo to yoadohoa mehne tirore ño payoa mehne wahchejhna. Ata yojihna.

Apocalipsis

Baharopure ahri dacho to dohse wahahtore marine masichu yoaha Jesucristo

1 ¹ Ahri pui Jesucristo marine to masichu yoarire yahu joarocai nija. Cohamacu sehe tře yahu dutiro cūri jire tirore, to yainare tirore dahra cohtainare masichu yoa dutiro. Ā jiro michapucacāta to dohse wahahtore masichu yoari jire tiro. Mahanocā dūhsa mujano nina to ā wahahto. Jesucristore to ā cūchu tiro sehe anjore tře yūhure Joāore yahu dutiro warocari jire. ² Ā jicu yūhu João jipihtiare yu nūrire yahu joarocai nija. Cohamacu ya durucuare Jesucristo ya buheare yahu joarocai nija.

³ Ahri pui baharopu to dohse wahahtore yahu joai nija. Mahanocā dūhsa mujano nina ahri jipiehtia ti ā wahahto. Ā jia jipiehtina ahri pūre buheina, yu yahuare noano tuhoina yu yahuriro sehe yoaina wahcheina jiahca.

Siete curuari macainare Jesu yaina cahmachuinare joarocaha João

⁴ Yūhu, João musare siete curuari macainare Jesu yainare Asia yahpa macainare joarocaja: Cohamacu to cahia mehne musare noa dutija. Ā yoa to yoadohoa mehne noano jiga musa. Tiro panoputa ā jirucuriro jia tiri jire. Mipu cūhure ā jirucura. Baharopu tarohca. To puhtoro dujiro panoi jiina siete pjacu bajueraina jira. Tina ti cahia mehne noano jiga musa tjoa. ⁵ Jesucristo to cahia mehne noano jiga musa tjoa. Cohamacu yare mahñono marieno yahuriro jira tiro. Ā jiro to yariari baharo to masa mujari baharo ne pari turi yariasi tiro. “Ō sehe masa mujaahca yu yaina”, ni ñu quihō muhtariro jira tiro. Ā jiriro jiro jipiehtina ahri yahpa macaina puhtoa ti bui puhtoro jira tiro. Marine cahño to di cohāri mehne mari ñaare cosawere tiro. ⁶ Ā cosawero marine puhtoa sōre tiro. Sacerdotea marine wahachu yoare tjoa. Cohamacu Jesu Pucuro to yare yoahhtinare marine sacerdotea sōre tiro. Jipiehtia dachoripe “Tuariro jira”, ni wahche payorucunahca mari jipiehtina tirore. Jipiehtina bui puhtoro ā jirucura tiro. Āta jirucujaro.

⁷ Noano wacū masi cohtaga musa. Me curuari watoi duji tarohca Cristo. To ā tachū ñuahca jipiehtina. Tirore cǵa puha wājārina cjiri cūhu tirore ñuahca. To ā tachū ñua ahri yahpa macaina tirore cahmaeraina jipiehtia curuari macaina tuaro cahya, tiiahca. Āta yoajaro.

⁸ Ō sehe nina mari puhtoro Cohamacu: “Yūhu jipihtiare bajuamehneriro jija. Ā yoa jipihtiare pihtichu yoahhtiro jija. Tua yūhdurucariro jija yūhu. Panopu ā jirucua tii. Mipu cūhure ā jirucuja. Baharopu taihtja”, nina Cohamacu tua yūhdurucariro.

Cristore si siterirote to ñurire yahuha João

⁹Yuhu João musa coyeiro Jesu yairo jija. Ñ jicu musa yoaro seheta yuhu cūhu Jesu yare yu yoari buhiri ñano yuhduhi. Ñ yoa musa yoaro seheta yuhure ti ñ ñano yoapachuta Jesu yoadohoa mehne Jesure cohærahi. Mari cūno potori puhtoro to suho jiro macaina cjihti jija. Yu ya dihta macaina ti cohāiro jicu Patmo wama tiri nūcopu jihi. Cohamacu yare, Jesucristo to buheri cūhure painare yu buheri buhiri tōpu ti cohāiro jihi. ¹⁰Tói yu jichu cū dacho domingo jichu Espiritu Santo yuhure cahānopu ñono nihre. To ñ ñochu yu baharo buhusehei tuaro durucua bisiro coa tahre. Corneta to tuaro bisiro seheta tó seheta bisiro coa tahre to durucua. ¹¹Õ sehe nino coa tahre yu tuhochu:

—Mipu mu ñuhtire joari pūi joa ōga. Mu ñ joa ōri baharo siete curuari macainare Cohamacu yainare warocaga tí pūre. Tina siete curuari Asia yahpai jia macari macaina jira. Efeso macainare, Esmirna macainare, Pérgamo macainare, Tiatira macainare, Sardis macainare, Filadelfia macainare, Laodicea macainare mu ñuhtire joarocaga —nino coa tahre yuhure.

¹²To ñ nichu tuhocu majarerucahi yuhure durucurirote ñui tai. Ñ majarerucacu siete sihāa pocare ti duhu payoa yucure uru mehne ti yoari yucure ñui.

¹³Tí yucu watoi ducurirote masuno yoaro sehe bajurirote ñui. Tiro yoari suhtiro to dahporipu suri suhtirote sāraro jihre. Ñ jiro uru mehne ti yoari cahsaro mehne to pēbuhu bui tuā dihoriro jihre. ¹⁴Ñ yoa to pjoa yaja pjoari yoaro sehe noano yehsehre. To capari pichaca pohna yoaro sehe sihre. ¹⁵To dahpori bronce wama tiri comaa siri comaa yoaro sehe si sitehre. Broncere pichaca mehne ti noano jāweri baharo tíre wahtara noano si pa dutia. Ti noano wahtariro yoaro sehe to dahpori noano si sitehre. Ñ yoa to durucua payu poayeri yoaro sehe tuaro bisiro coa tahre. ¹⁶To wamomaca poto buhusehei siete ñahpichoha pocare cjuahre. Ñ yoa to duseroi ñosari pji pu buhuseheri siori pjiñe cuhcūhre. Ñ yoa sū dacho macariro to tuaro minoano seheta to wuhdua tuaro si sitehre.

¹⁷Ñ jicu tirote ñucu to dahpori cahai doca caha sūhi yariariro yoaro sehe. Yu ñ doca caha suchu ñuno tiro to wamomaca poto buhusehe mehne yuhure duhu payo ō sehe nihre:

—Cuii tjiga. Yuhu jipihtiare bajuamehneriro jija. Ñ yoa jipihtiare pihtichu yoahitiro jija. ¹⁸Catiriro jija yuhu. Yariariro jimai. Mipure ñuga. Jipihtia dachoripe ñ catirucuriro jija yuhu. Ñ yoa yariaina ti jiroi puhtoro jija. Yariaina ti jiro macari sopaca sawire yu cjuaboriro seheta tōpu jiinare na wio, pari turi catichu yoa masija yuhu. ¹⁹Ñ jicu mipu wahahtore ñucu, joa ōga. Baharopu to dohse wahahto cūhure ñucu joa ōga muh. ²⁰Ahri siete ñahpichoha pocare yu poto buhusehei yu cjuaa pocare yahuihtja muhure. Siete sihāa pocare ti duhu payoa yucu uru yucu cūhure yahuihtja. Õ sehe jia yahuare panopu masare ne yahuera tii. Õ sehe jira tí: Siete ñahpichoha poca siete curuari macaina yu yaina cahmachuina puhtoa jia nina mari piti dahre buhechu. Ñ jia siete sihāa pocare ti duhu payoa yucu siete curuari macaina yu yaina jia nina mari piti dahre buhechu —nihre yuhure.

Efeso macainare Jesu yainare joa dūca dutiha João

2 ¹Ñ ni tuhsu ō sehe ni namohre yuhure joa dutiriro:

—Efeso macaina yu yaina, ti puhtoro cūhure ō sehe ni joarocaga muh: “Yu wamomaca poto buhusehei siete ñahpichoha pocare cjuariro jija.

Ã jicu siete sihãa dapoa yucu uru mehne ti yoaã yucu watoi tiniriro jija. Ã tiniriro jicu musare õ sehe ni yahuja: ²Jipihtia musa yoirire masi pahñoja. Yu ya cjihtire tuaro musa dahrarire, yuhure musa wacũ tua duhuerari cũhure noano masija. Ñaare yoinare musa ñu yabichu cũhure masija. Ã yoa 'Jesu buhe dutiro to cũrina jija', nimirare quihõno ti buherachu, quihõno ti yoaerachu ñuna, mahñoina ti jichu masire musa. ³Yu yare musa yoiari buhiri musa ñano yuhdũpanahta yuhure ne duhuerare musa. ⁴Ã noano yoina jipanahta cũnore tó yoaerare musa. Ahri jira tí: Yuhure musa noano cahĩ muhtariro seheta mipure yoaerara musa. ⁵Yuhure musa cahĩ muhtarire wacũga musa tjoa. Mipure yuhure musa cahiera curerire wacũga. Ã yoa Cohamacu yare tuaro cahmaga tjoa. Ã cahmana, yu yare musa yoa muhtariro seheta yoaga tjoa. Musa ã yoaerachu sihãiare yu duhu payodu musa ya dure yu dapodure musare nanocaihtja. (Ã nicu õ sehe ni yahui nija musare. Musa tó macaina yuhure cohãboca. Ã cohãna tó purota pihtinahca musa ñaa yoaare duhuerana.) ⁶Yuhure cahiera cureina jipanahta ahrire noano yoare musa: Nicolaita wama tiina ti ñaa yoirire ñu yabira musa. Yuhu cũhu ti yoirire ñu yabija. ⁷Cahmori tiina jira musa. Ã jina musa ya curuari macainare yu yainare Espiritu Santo to yahurire tuhoga musa. O sehe nina tiro: 'Jipihtinare Jesure wacũ tua duhuerainare Cohamacu masare to cũno paraíso wama tiro macadu dichare chu dutiitja. Tu dicha catichu yoaã jira', nina Espiritu Santo", ni yahu joarocaga Efeso macaina yu yainare, ti puhtoro cũhure.

Esmirna macainare Jesu yainare joaroca dutiha Joãore

⁸Esmirna macaina yu yainare, ti puhtoro cũhure õ sehe ni joarocaga muhu: "Yuhu jipihtiare bajuamehneriro jija. Ã yoa jipihtiare pihtichu yoahtiro jija. Yariaa wahai. Pari turi catija tjoa. Ã jicu õ sehe ni yahuja musare: ⁹Musa ñano yuhdurire masija. Pjacuoina musa jichu cũhure masija. Ã jipanahta Cohamacu yare noaare pjíro cjuara musa. Paina sehe 'Judio masa jija', nimirina mahñoina jira. Tina musare ti ñano quiti dahrerire masija. Tina Satana yaina jira. ¹⁰Mipure musa ñano yuhduhtire cuiena tjiga. Tuhoga musa. Watino musare Cohamacure duhu dutiro cãina musa mehne macainare peresu yoa dutirohca. Diez dachori waro ñano yuhdũnahca musa. Ti ã ñano yoachu musare ti ã wajãmoñopachuta yuhure yu ya cũhure cohãena tjiga. Musa ã yuhure cohãerachu ñucu jipihtia dachoripe Cohamacu cahapu musare ã jirucuchu yoihtja. ¹¹Cahmori tiina jira musa. Ã jina musa ya curuari macainare yu yainare Espiritu Santo to yahurire tuhoga musa. O sehe nina tiro: 'Jipihtina Jesure wacũ tua duhueraina pichacapu wahasi. Ti yariari baharo pichacapu wahasi', nina Espiritu Santo", ni joarocaga Esmirna macaina yu yainare, ti puhtoro cũhure.

Pérgamo macainare Jesu yainare joaroca dutiha Joãore

¹²Pérgamo macaina yu yainare, ti puhtoro cũhure õ sehe ni joarocaga muhu: "Yuhu ñosari pjí pu buhuseheri siori pjine cjuariro jija. Musare õ sehe ni yahuihtja: ¹³Musa yoirire, musa ya maca macaina ti yoiari cũhure masija. Tó macaina puhtoro Satana jira. Tó macaina Satanare ño payoina Antipare yu yare noano yahuriro cjirore wajãre. Tirote ti ã wajãchu ñũpanahta yu yare yoarucuna yuhure ne wacũ tua duhuerare musa. ¹⁴Musa ã wacũ tua

duhuerapanahta mahanocã yuhure yuhdurucare musa. Căina musa mehne macaina Balăa ya buheare cahmana. Panopu Balăa puhtoro Balac wama tirirore ô sehe ni buhea tire: 'Israe masare yuhduruca duacu "Cohamacu jira", musa nia masurine ño payo musa duhu payoa chuare chu dutiga tinare. Â yoa numia mehne ñano yoachu yoaga tinare', ni buhea tire Balăa cjiro. Căina musa mehne macaina to buheare cahmana. ¹⁵ Â yoa paina musa mehne macaina Nicolaita wama tiina ya buhea sehere duhu duaerara. ¹⁶ Â jina musa ñaa tuhotumari cjirire tuhotu cohtota, Cohamacu yare tuaro cahmaga tjoa. Musa â cahmaerachu ñucu soaro mehne musa cahapu wahacu, â ñano yoina mehne cahmacheihca yu duseropu jiri pjî ñosari pjî mehne. ¹⁷ Cahmori tiina jira musa. Â jina musa ya curuari macainare yu yainare Espiritu Santo to yahurire tuhoga musa. Ô sehe nina tiro: 'Jipihtinare Jesure wacu tua duhuerainare maná wama tiri chuare to nuori chuare waihtja. Yehsea tâa cûhure waihtja tinare. Tí tâare wahma wamare yu joa ôa tâa jiahca. Paina tí wamare ne masisi. Tí tâare naina dihta tí wamare masiahca', nina Espiritu Santo", ni joarocaga Pérgamo macaina yu yainare, ti puhtoro cûhure.

Tiatira macainare Jesu yainare joaroca dutiha Joãore

¹⁸ Tiatira macaina yu yainare, ti puhtoro cûhure ô sehe ni joarocaga muhu: "Yuhu Cohamacu macuno yu capari picha pohna yoaro sehe sira. Â jia yu dahpori bronce wama tiri comaa ti wahtari comaa yoaro sehe si sitera. Musare ô sehe ni yahuja: ¹⁹ Musa yoirire masija yuhu. Cohamacure paina cûhure musa cahîrre, yuhure musa cohâerare, painare musa yoadohorire, ñano yuhdupanahta yuhure musa duhuerare masija. Wahmanopu musa yoiri yuhdoro mipu sehere noano yoa namona nina musa. Tí cûhure masija yuhu. ²⁰ Musa â noano yoina jipanahta ô sehe yuhure yuhdurucahre musa: Jezabe wama tiricoro 'Cohamacu yare yahu muhtaricoro jija', ni mahñoricoro musare to ñano buhechu tuhona ticorore tuhtierare musa. Mahño buhero yu yainare yuhure dahra cohtainare numia mehne ñano yoachu yoara. Â jiro 'Cohamacu jira', ti nia masurine paina ño payo ti duhu payoa chuare chu dutira ticoro yu yainare. ²¹ To ñaare to cahyahtore cohtasinimai. Yu â cohtapachuta mua mehne to ñano yoaare duhu duaerare. ²² Yuhure tuhoga musa. Ticorore dohatichu yoihtja. Ticoro mehne ñano yoina cûhure dohatichu yoihtja. Â jia tina pjîro ñano yuhduahca. Âta yoihca tinare ticoro mehne ti ñano yoaare ti cahyaerachu, tíre ti duhuerachu. ²³ Â yoa ticoro ya buheare cahmainare wajâihtja. Yu â yoachu ñua jipihtina yu yaina yu noano masiriro jichu masiahca. Masa ti tuhotuare ti goa pjaa cûhure masija. Yu â masiriro jichu masiahca tina ticorore yu buhiri dahrechû ñua. Jipihtina musa ñaare yoiri buhirire buhiri dahreihtja musare. Â yoa musa noaare yoiri wapa sehere noano yoihtja musare. ²⁴ Paina musa mehne macaina Tiatira macaina ticoro ya buheare cahmaerare. Musa sehe Satana ya buheare 'Pano to yahuerari cjiri', ti nia buheare cahmaerare musa. Â jicu musa sehere duti namosi yuhu. ²⁵ Ahri dihtare yoa duti namoihtja musare: Musa cahapu yu tahto pano yu buheare musa masirire ne mahanocã duhuena tjiga. ²⁶⁻²⁷ Jipihtina ñaare duhuinare yu yare â yoarucuinare puhtoa sôihtja. Yu Pucu yuhure to puhto sôiro seheta musa cûhure puhtoa sôihtja. Jipihtia yahpari macaina bui puhtoa sôihtja musare. Â puhtoa sâana, musa docai jiinare jipihtia yahpari

macainare tuaro dutinahca mŭsa. Dihi biatore mari yucucu mehne pohachu dŏi to wahtiaro seheta Cohamacure yuhdurucainare āta yonahca mŭsa. ²⁸Ā jicu musare yu yare ne duhuerainare bohrea muja tachu muja tariare waithta musare. ²⁹Cahmori tiina jira mŭsa. Ā jina mŭsa ya curuari macainare yu yainare Espiritu Santo to yahurire tuhoga mŭsa”, ni joarocaga Tiatira macaina yu yainare, ti puhtoro cūhure.

Sardis macainare Jesu yainare joaroca dutiha Joāore

3 ¹Sardis macaina yu yainare, ti puhtoro cūhure ō sehe ni joarocaga muhu: “Yuhu siete pjacu bajuerainare Cohamacu yainare dutiriro jija. Ā yoa siete nāhpichoha pocare cjuariro jija. Musare ō sehe ni yahuja: Mŭsa yoirire masija. Ō sehe ni tuhotumana paina musare: ‘Tina Cohamacu yare noano yoa pahñoina jira’, ni tuhotumana musare paina. Ti ā ni tuhotupachuta Cohamacu yare noano yoaerara mŭsa. ²Ā jina noano yoaga mŭsa ‘Nāare yoiri’, nina. Cohamacu yare mŭsa masirire noano wacūga, ‘To yare duhuri’, nina. Cohamacu to nūchu noano yoa pahñoeasinire mŭsa. ³Ā jina yu yare mŭsa tuho muhtarire noano wacūga mŭsa. Ā wacūna yu yare yoaga tjoa. Cohamacu yare pari turi cahmaga tjoa. Yu nino sehe mŭsa yoaerachu wacūenoca musare buhiri dahreihtha. Yacariro wacūenoca to yacaro sāariro seheta musare wacūenoca buhiri dahreihtha. ⁴Cāina mŭsa mehne macaina Sardis macaina nāare yoarucuina jierara. Wete marieni suhtirore mŭsa sāaboriro seheta tí suhtirore mŭsa wete piho duaeraro seheta ti nāa yoaare piha duaerare mŭsa. Ā noaina jina, yehseri suhtiro sāaina yuhu mehne tininahca mŭsa sehe. Ā yoahtina cjihti jira mŭsa. ⁵Jipihtina yu yare duhueraina āta yehsea suhti sāaina jiahca. Ā yoa yuhu mehne ā jirucuhtina ti wamare to joa ōri pui tina cūhu ti wamare joa ōina jiahca. Ti wamare to joa ōrire pahā cohāsi yuhu. Yu Pucu to nūrocaroi, anjoa cūhu ti nūrocaroi yu yaina mŭsa jirire yahuihtja tinare. ⁶Cahmori tiina jira mŭsa. Ā jina mŭsa ya curuari macainare yu yainare Espiritu Santo to yahurire tuhoga mŭsa”, ni joarocaga Sardis macaina yu yainare, ti puhtoro cūhure.

Filadelfia macainare Jesu yainare joaroca dutiha Joāore

⁷Filadelfia macaina yu yaina, ti puhtoro cūhure ō sehe ni joarocaga muhu: “Yuhu nāa marieriro jija. Yu nino seheta yoiriro jija. Davi cjiro panopu macariro puhtoro dutiriro waro sawire cjuariro jiro masare to dutiriro seheta tuua mehne duihtja yuhu cūhu. Tí tuua mehne yu yoa dutichu ne paina tíre ducata masierara. Yu yoa dutierachu ne paina tíre yoa masierara. ⁸Jipihtiare mŭsa yoaare masija yuhu. Wacu tuaera cureina jipanahta yu buheare noano tuho, tíre ne duhuerare mŭsa. Ā jicu yu yare cūi musare tíre buhe duticu. Ā jia paina ‘Tíre buhena tjiga’, ni ducata masierara musare. ⁹Ā jicu ō sehe yoihtja: Paina mŭsa cahai jiina Satana yaina jira. ‘Judio masa jija’, nipahta judio masa waro jierara. Tinare mŭsa panoi na tuhcu caha su musare nio payochu yoihtja tinare. Yu ā yochu nua musare yu cahiare masiahca tina. ¹⁰Musare yu yare yu duhu dutierachu tuhona noano yuhtire mŭsa. Mŭsa ā yochu nūcu ahri yahpa macaina jipihtina ti nāno yuhduhti pja jichu musare ducataihtja mŭsa nāno yuhduerahto sehe. Tí pja jipihtina ti nāno yuhduhti pja jirohca. ¹¹Mahanocā duhsara ahri yahpau yu tjua tahto. Yu yare mŭsa

masirire boena tjiga. Ñ yoa yuhure ã yuhtirucuga, musa noano yoari wapare ‘Butiri’, nina. ¹² Ñ jicu yu yare ã yoarucuinare yu Pucu ya wuhu macaina cjihtire cûihtja tinare. To ya wuhu macaa botari ti yoari pja ti jirucuro seheta Cohamacu mehne jirucuchu yoihtja tinare. Ñ jia Cohamacu mehne macaina ã jirucuahca. Ñ jicu Cohamacu wuhu macaa botaripu yu joa ñno seheta tinare ti pjacuripu ñ sehe ni joa ñihtja: Cohamacu yu Pucu wamare, to ya maca wama cûhure joa ñihtja. To ya maca wahma maca Jerusalê jirohca. Tí maca muanopu Cohamacu cahapu tari maca jirohca. Yuhu wahma wama cjuaihca. Tí wama cûhure joa ñihtja ti pjacuripu. ¹³ Cahmori tiina jira musa. Ñ jina musa ya curuari macainare yu yainare Espiritu Santo to yahurire tuhoga musa”, ni joarocaga Filadelfia macaina yu yainare, ti puhtoro cûhure.

Laodicea macainare Jesu yainare joaroca dutiha Joãore

¹⁴ ‘Laodicea macaina yu yainare, ti puhtoro cûhure ñ sehe ni joarocaga mûhu: “Yuhu Cohamacu jipihtia to yoirire, to yoahti cûhure yoa sohtori tiro jija. Yuhu potocã yoiriro jija. Ñ jicu mahñono marieno yu ñurire ã yahurucuro jija. Jipihtiare yu Pucu to yoirire yoabasariro jija yuhu. ¹⁵ Jipihtia musa dohse yoirire masija yuhu. Yuhure wacû tuaina jipanahta mahanocã wacû tuaina jira musa. Ñ sehe jira tí: Co yusæra co sũ mehne pjiroca si putia co yaro sehe jira musa. Tó sehe jia core mari ji coareraro seheta yuhure wacû tuaera cureina musa jichu yuhu cûhu musare ji coaeraja. Yuhure musa noano wacû tuachu noaboa yuhure. Yuhure musa wacû tuaerachû ña niboa yuhure. Yuhure musa wacû tuaerari yuhdoro mahanocã wacû tuaina musa jichu ña yuhduara. ¹⁶ Musa ã jichu ñucu ñu yabi yuhduaja yuhu. Ñaa core yu cho cohãno seheta yuhure mahanocã wacû tuainare ñu yabi yuhduaja yuhu. ¹⁷ Ñ jina ñ sehe ni tuhotumana musa: ‘Jipihtiare cjuaja. Ne yaba duhsaerara marine’, ni tuhotumana musa. Ñ nipanahta pjacuoina yaro sehe jira musa. Ñ jina capari ñueraina ti ñu duaare ti masieraro seheta Cohamacu yare ne masierara musa. Ñ jina suhti marieina ti buo tiro seheta Cohamacu to ñurocaroi musa ñaa yoirire buo tihtina jira musa. ¹⁸ Musa ã jiina jichu ñucu ñ sehe ni yahuihtja musare: Uru warore musa nuchuboro seheta noare yu cjuare naga musa. Musare yuhure wacû tuachu yoihtja. Ñ jina potocãta Cohamacu ya mehne pjíro cjuannahca. Ñ yoa yehseri suhtirore musa nuchu musa sãano seheta yu di cohãri mehne yu yariaro mehne musa ñaa yoaare cosawerina jiga. Ñ yoana noaa suhti sãaina ti buo tieraro seheta musa ñaare cosawerina jina buo tisi musa cûhu. Ñ yoa musa caparire musa co tiri baharo noano musare bajuro seheta Cohamacu yare noano tuhoga, musa noano masihto sehe. ¹⁹ Jipihtina yu cahiinare yahuja. Ñ jicu yu cahiina ti jichu ñucu, ti tuhoerachû tinare quihõno yoa dutija, tinare yoadohocu tacu. Ñ jina yu ya sehere tuaro cahmaga. Ñ yoa musa ñaare tuhotumari cjirire cohtota, tí ñaare duhuga. ²⁰ Tuhoga yuhure. Musa wuhure bihari wuhure yu suruca yu sãa dua yu pisurucuboro seheta, musa mehne macariro ji duai nija. Yu ã ji duachu tuhoina jina yuhure musa mehne ji dutiga. Yu yaina jiga. Musa ã ji dutichu musa mehne jiihtja. Ñ jicu mari suho churo seheta musa mehne noano jiihtja. Ñ jina yuhu mehne macaina jinahca musa. ²¹ Watínore yu yuhdurucari baharo yu Pucu puhtoro to dujiro cahai dujija, yuhu cûhu duticu tacu. Tó seheta musa cûhu ñaa yoirire musa yuhdurucari baharo yu

pūhtoro dujiro cahai dujinahca, mūsa cūhu dutina tana. Mūsare yū cahai dujičū yoahtja. ²²Cahmori tiina jira mūsa. Ā jina mūsa ya curuari macainare yū yainare Espiritu Santo to yahurire tuhoga mūsa”, ni joarocaga Lao-dicea macaina yū yainare, ti puhtoro cūhure —nihre yūhure joa dutiri.

Muanopu Cohamacure na tuhcuca caha sū ti ño payoare ñuha João

4 ¹Yūhure to ā ni yahuri baharo muanopu pjōari sopacare ñuhi. Pari turi corneta to tuaro bisiro seheta tuaro durucua bisiro coa tahre yū tuhochū. Ō sehe nihre yū tuhochū:

—Ōpu muja taga. Ahri yū yahuhti cjihti baharopure wahahtore mūhure ñoihtja. Yū niriro seheta ā waharohca —nino coa tahre muanopu.

²To ā ni yahuchuta tōpu muja sucu Espiritu Santo tuaa mehne ñui nihi. Ā jicu puhtoro dujirore muanopu ñuhi. Tōi cūiro dujihre. ³Noano si siteriro dujihre. Diamante wama tia taa yoaro seheta, rubí wama tia taa yoaro seheta noano si siteriro dujihre tiro. Ā jiro buhini soro esmeralda yoaro sehe si siteri soro dacho macai dujihre tiro. ⁴Ā yoa to dujiro cahai veinticuatro dujiare ñuhi. Tí dujia puhtoa dujia yū ñu muhtaritore duji soroahre. Tí dujiapu veinticuatro Jesu yaina puhtoa dujihre. Yehsea suhti tiina jihre. Ā yoa puhtoa ti pisaa sorori uru sororire pisaina jihre tina. ⁵Yū ñu muhtariro dujiroi orocasitehre. Ā yoa soro sehe jiro choro bisiro coa tahre. Wupo cūhu bisiro coa tahre. Tí dujiro panoi siete sihāa poca jihre. Siete sihāa poca mehne to piti dahre buhechū Cohamacu yaina siete pjacu bajueraina jihre. ⁶Ā yoa to dujiro panoi pjiri ma yoaro sehe vidro yoaro sehe sipari ma jihre. Noano co sitiri ma yoaro sehe jihre.

Ti dujiro cahai pititiaro soro sehe bajuina jihre. Ti pjacuri panoi ti baharo buhusehe cūhure payu capari tiina jihre tina. ⁷Yū ñu muhtariro soro bajuriro yairo sohāriro yoaro sehe bajuhre. To baharo jirirowachu yoaro sehe bajuhre. Ti baharo jirirowachu masuno wuhdu sehe wuhdu tiro jihre. Tina tiaro baharo jirirowachu to cjamuadupure saño dujirirowachu yoaro sehe bajuhre. ⁸Tina seis dupuri wua dupuri tiina jihre. Ā jia ti wua dupuri pu buhuseheriputa payu capari tia dupuri jihre. Ā yoa dachoripe, ñaminipe ā dururucua nihre. Ne durucu duhuerare. Ō sehe ni durucuhre:

“Noariro, noariro, noariro Cohamacu mari puhtoro tua yuhduariro jira.

Tiro panoputa ā jirucua tiri jire.

Mipu cūhure ā jirucura.

Baharopu tarohca”,

ni durucurucua nihre.

⁹Ā ni durucua tina pititiaro soro bajuina to tuaare durucua nihre puhtoro dujiroi dujiriore. Ā durucua, tirore jipihtia dachoripe jirucurire wahche payoa “Noana”, nia nihre. ¹⁰Ti ā yoa payochū ñua veinticuatro Jesu yaina puhtoa sehe puhtoro dujiroi dujirirowachu panoi na tuhcuca caha sū, tirore ño payohre. Tiro jipihtia dachoripe jirucuriro jira. Ā ño payoa ti puhtoa pisaa sororire to dujiro panoi doca payohre. Ā doca payoa ō sehe nihre tina:

¹¹“Mūhu Cohamacu sã puhtoro waro jira.

Tuariro, noariro jira mūhu.

Mūhu sã ño payoriro jii nina.

Mūhure ā ño payorucuro cahmana sãre.

Jipihtiare bajuamehneriro jira muhu.

Mu cahmariro seheta tí jipihtiare bajuamehnea tiri jire muhu”,
nihre tina Cohamacure, tói dujiriore.

Joari püre turëri tiare cordero cühure yahuha João

5 ¹Baharo tói dujiriore to wamomaca poto buhusehei to cjuari püre joari püre nuhi. Tí pü pu buhuseheri to joari pü to turëri tia jihre. Á yoa siete wihtä ñahaa mehne to wihtä ñahari tia jihre. ²Tí tiare turëri tiare nu tuhsu, tuariro anjore nuhi. Tiro tuaro durucua mehne õ sehe ni yuhure:

—¿Ahri tiare wihtä ñahaare pahrëboriro ñaa buhiri marieriro diro sehe jijari, musa tuhutuchu? —nihre tiro anjo.

³Á niparota tí tiare pahrëhtiore bocaerare. Muanopu, ahri yahpapu, catiina watoi, varia tuhsuina watoi ne tí tiare ñahaare pahrëhtiore mariahe. Á jiro tí tiare buhehtiore mariahe. ⁴Á jicu pahrëhtiore, tí püre nuhtiore ti bocaerachu ñucu tuaro tihi yuhu. ⁵Yu á tiichu ñuno cüiro Jesu yaina puhtoia mehne macariro õ sehe nihre yuhure:

—Tiiecu tjiga. Tí tiare ñahaare cüiro pahrë masina. Tiro Juda ya curua macariro tuariro jira. Tuariro jiro “Yairo sohãriro”, ti ni pisuriro jira. Tiro puhtoro Davi panamino ji turiariro jira. Watinore yuhdurucariro jira tiro. Á jiro tiro tí tiare siete ñahaare pahrë masiriore jira —nihre tiro yuhure.

⁶To á nichu tuhocu puhtoro dujiro panoi cordero to ducuchu nuhi. Cuatro soro bajuina, Jesu yaina puhtoia tina watoi ducuhre tiro cordero. Tiro ti wajã-riro cjiro sehe bajuhre. Siete sahari tiro, siete capari tiro jihre. Tí siete sahari á yoa siete capari mehne to piti dahre buhechu Cohamacu yaina pjacu bajueraina siete bajueraina yoaro sehe jira. Tina to yaina pjacu bajueraina jipihitiro ahri yahpapu Cohamacu to warocarina jihre. ⁷Á jiro cordero sehe puhtoro dujiro cahapu suro, tirore to poto buhusehei to cjuari tiare tuãwe nahre. ⁸To á tuãwe nachu ñua cuatro soro bajuina, veinticuatro puhtoia cühü cordero panoi na tuhcu caha su, tirore ño payohre. Tina puhtoia jipih-tina arpa wama tia buaputëare, uru wahwari cühure cjuahre. Tí wahwari incienso noano wahpaa posa tia wahwari jihre. Tí incienso mehne to piti dahre buhechu Cohamacu yaina tirore ti sini payori yoaro sehe jihre. ⁹⁻¹⁰Á tirore ño payoa õ sehe ni wahmaa basaare tina basa payohre tirore:

“Muhu ti wajãriro cjiro jira.

Á jicu mu di cohãri mehne sã ñaa yoari buhirire cohãre muhu
Cohamacu yaina sã jihto sehe.

Á jicu jipihitia curuari macainare cãinare, jipihitia duseri durucuinare
cãinare, jipihitia yahpuri macainare cãinare sã ñaa yoari buhirire mu
di cohãri mehne cosawere muhu Cohamacu yaina sã jihto sehe.

Sãre jipihitinare Cohamacu yaina cjihtire cüre muhu.

Á jicu sacerdotia cühre muhu sãre Cohamacure dahra cohtaina sã jihto
sehe.

Á yoacu ahri yahpa macaina bui puhtoia söhre muhu sãre.

Á yoariro jicu tí tiare wihtä ñahaare pahrëhtiore jira muhu”,

ni basa payohre tina corderore.

¹¹Pari turi ñucu millones anjoa perire nuhi. Puhtoro dujiore cuatro soro bajuinare, veinticuatro puhtoia anjoa sehe tinare soroa ducu sühre. Tina

anjoa peri tuaro ti sañurucu payochu ñuhi. ¹² Ñehe ni tuaro sañurucu payohre tina:

“Cordero ti wajāriro muhu jipihtinare dutiro, jipihtiare cjuariro, masi pahñoriro, tua yuhduariro jira muhu.

Masa ti ñaa buhiri ti wajāriro mu jichu ñana ā ni ño payoja muhure.

‘Noabiariro jira’, ninahca muhure.

Muhure noano durucunahca”,

ni sañurucu payohre anjoa peri.

¹³ Ñehe jicu paina cūhure ti sañurucu payoa coa tachu tuhohi. Jipihtina muano macaina, ahri yahpa macaina, catiina, yariaina cahapu jiina cūhu, pjiri ma macaina, jipitiropu jiina ñehe ni durucu payoa coa tahre:

“Cohamacure to dujiropu dujiriore, Cordero cūhure musare puarore noano durucunahca.

Musare wahche payonahca.

‘Noa Yuhduaina, Tua Yuhduaina jira’ nina, jipihtia dachoripe ā nirucunahca musare”,

ni durucu payoa coa tahre.

¹⁴ Ñehe jia tina cuatro soro bajuina ti ā durucu payochu tuhoa “Āta ni durucu payojaro”, nihre. Ñehe jia Jesu yaina puhtoahca sehe na tuhcuca caha su Cohamacure, Cordero cūhure ño payohre.

Papera tiare to nari tiare wihtā ñaharire pahrēna Cordero

6 ¹ Baharo papera tiare to nari tiare Cordero wihtā ñaha muhtanore pahrēhre. To ā pahrēchu ñuhi. To ā pahrēri baharo cūiro soro bajuina mehne macariro, “Ñana taga”, nihre. Ñehe nino wupo yoro sehe bisihre tiro.

² To ā niri baharo ñuhi yuhu. Yehseriro cawalore ñuhi. Tiro bui pisariro buedure cjuahre. Tireore puhtoro pisariro sorore wahre pairo sehe. To ā wari baharo tiro sehe tireore ñu tuhtiinare yuhdurucaro wahahre.

³ Baharo cū wihtā ñahanore pahrē tuhsu Cordero pa wihtā ñahanore pahrēhre tjoa. To ā pahrēri baharo pairo soro bajuina mehne macariro “Ñana taga”, to nichu tuhohi tjoa.

⁴ Ñehe jicu pairo cawalore sohāriore ñuhi tjoa. Tiro bui pisarirore tuaare wahre pairo sehe. Ahri yahpa macainare cahma wajā dutihtiore cūhre tireore. Ñehe jia jipitiro macaina cahma wajāahca ahri yahpahu. Ñehe yoa pjiri pjī ñosari pjīne wahre tireore.

⁵ Baharo puarore pahrē tuhsu Cordero parore pahrēhre tjoa. Ñehe jicu puaro ti durucuri baharo pairo soro bajuina mehne macariro “Ñana taga”, to nichu tuhohi.

To ā niri baharo ñiri cawalore ñuhi. Tiro bui pisariro balanza quihōnore cjuahre. ⁶ Tireore yu ñuri baharo soro bajuina watoi ñehe nino coa tahre:

—Cū dacho dahrari wapa mehne trigore cū kilota nuchuahca masa. Cū dacho dahrari wapa mehne cebada wama tia yaparire tia kilota nuchuahca masa. (Trigo, cebada cūhu pihitia wahaahca. Ñehe jia tí wapa buju niahca.) Wiho mejeta chua dahrea sere, vino cūhure dojochu yoaena tjiga —nino coa tahre.

⁷ Baharo tiarore pahrē tuhsu Cordero parore pahrēhre tjoa. To ā pahrēri baharo pairo soro bajuina mehne macariro ji bato tiriro “Ñana taga”, nihre tjoa.

⁸To ã nichu tuhocu wapoariro cawalore ñuhi. Tiro bui pisariro “Yariachu yoariro” wama tihre. Ñ yoa to baharo tariro “Yariaina ti jiro” wama tihre. Ñ jiro tinare tuaare wahre paio sehe. Ahri yahpapore cuarta parte masare wajã dutihre. Cahma wajãa mehne, juca baa mehne, dohatia mehne, wahi-quina nũcũri macaina suaina mehne tópeina masare ti wajãhtore cũhre tinare.

⁹Baharo pititiaro wihtã ñahaare pahrẽ tuhsu Cordero paro ñahanore pahrẽhre tjoa. To ã pahrẽchu altar docai Jesu yaina ti wajãrina ti catiri yajeripohnarine ñuhi. Cohamacu yare ti yahuri buhiri, “Jesu yaina jija”, ti ni yahuri buhiri tinare wajãri jire. ¹⁰Tina sañurucua ò sehe nihre Cohamacure:

—Mũhu sã puhtoro, ñaa marieriro, mahñono marieno, mu niriro seheta yoariro jira mũhu. ¿Ahri yahpa macainare, sãre wajãrinare dohse jichu buhiri dahreihcari mũhu? —ni sañurucuhre tina.

¹¹Ñ jiro tinare yehsea suhti yoaa suhtire wahre. Tinare ã waro ò sehe nihre tinare:

—Sosiniga. Paina musa coyea Jesu yaina musa yoariro seheta mipu cũhure noaa buheare buhesinia nina. Musare ti wajãriro seheta tina cũhure ti wajã pahñohto duhsasinina. Ñ jina tinare jipihtinare ti wajãhto pano mahanocã sosiniga musa —nihre tinare.

¹²Baharo cinco wihtã ñahaare pahrẽ tuhsu Cordero paro wihtã ñahanore pahrẽhre tjoa. Tóre to ã pahrẽchuta tuaro yahpa ñuhmihre. To ñuhmini baharo sũ dacho macariro ñiri choro wahahre. Ñiri suhtiro yoaro seheta ñiri choro wahahre. Ñ yoa sũ ñami macariro di yoaro sehe sohãriro wahahre. ¹³Ñ yoa ñahpichoha poca yahpapu boraa wahahre. Yucucu dicha yahsaare wiñono to wã bure bororo seheta ñahpichoha poca boraa wahahre.

¹⁴Ti ã wahari baharo muano butia wahahre. Papera tiare mari turẽchu to bajueraro seheta bajuerare muano. Ñ yoa jipiehtia tũyucu cũhu nũcopo cũhu pa sehẽpu surucahre. ¹⁵To ã wahachu ñua, ahri yahpa macaina bui puhtoa coparipu tũyucu macaa tãa docapu cũhure duhtihre. Paina puhtoa, surara puhtoa, pache pua, tuaina, jipiehtina tinare dahra cohtaina, dahra cohtaina jieraina cũhu tóhta duhtimahre. ¹⁶Ñ duhtia tũyucure, tãa cũhure ò sehe nihre:

—Sã bui bora pjaga. Sãre nuoga. Siro puhtoro to dujiro dujiroro cui yũh-duaja. Cordero suaro, sãre ñano buhiri dahrerohca. “Ñ buhiri dahreri”, nina nuoga sãre. ¹⁷Jipihtinare tuaro ti buhiri dahrehti dacho ji tuhsura. Ñ jia ti buhiri dahrehtore ne cũiro duhtiro bihoeraro, cũno pjasi —nihre tina jipiehtina.

Israe masa pjacũrre Cohamacu to wama ña õhtore yahuha João

7 ¹Baharo pititiaro anjoare ñuhi. Tina jipiehtiropu wahahre. Cũiro nortepu waharo tópu tari wiñnonore taerachu yoahre. Pairo surpu, paio sũ muja taropu, paio sũ sãanopu wahahre. Nortepu wahariro yoaro seheta yoahre tina cũhu. Ñ jiro ahri yahpapu, pjiri mapu cũhure ne wiñnono taerare. Ne cãdu yucucure wiñnono wã ñuhmichu yoerare. ²Ñ yoa paio anjore ñuhi tjoa. Sũ muja taropu taro nihre tiro. Cohamacu catiriro to wama ña õnore na taro nihre tiro. Ñ na taro paina pititiaro anjoare tiro sañurucuhre. Tina anjora sehe ahri yahpare, pjiri ma cũhure Cohamacu to dojomehne dutiina jihre.

³Tinare sañurucuro ò sehe nihre anjo:

—Cohtasiniga. Cohamacure dahra cohtaina ti wuhdua pocare to wamare òna tana nija. Sã ã òhto pano ahri yahpare, pjiri mare, yucuri cùhure dojomehnesiniena tjiga masa —nihre tiro paina pititiaro anjoare.

⁴ Ì jiro Cohamacu to wama mehne ti wuhdua pocare ti òhtinare “Òpeina jira”, ni yahuhre yuhure cùiro. Israe masa doce curuari macaina ciento cuarenta y cuatro mil masa ti òhtina jiyuhti. ⁵ Ahrina jiyuhti ti òhtina: Doce mil masa Juda panamana ji turiaina ti òhtina jihre. Paina doce mil masa Rubē panamana ji turiaina ti òhtina jihre. Paina doce mil masa Gad panamana ji turiaina ti òhtina jihre. ⁶ Paina doce mil masa Aser panamana ji turiaina, paina doce mil masa Neftalí panamana ji turiaina, paina doce mil masa Manase panamana ji turiaina ti òhtina jihre. ⁷ Paina doce mil masa Simeo panamana ji turiaina, paina doce mil masa Leví panamana ji turiaina, paina doce mil masa Isacar panamana ji turiaina ti òhtina jihre. ⁸ Paina doce mil masa Zabulō panamana ji turiaina, paina doce mil masa José panamana ji turiaina, paina doce mil masa Benjami panamana ji turiaina ti òhtina jihre. Tópeinata jipihtina masa ciento cuarenta y cuatro mil to wama mehne ti òhtina jihre.

Payu yehsea suhti tiinare yahuha João marine

⁹ Baharo payu masare ñuhi. Jipihtia yahpari macainare, jipihtia curuari macainare, jipihtia duseri durucuinare, jipihtia macari macainare cāinare Cristore cahmaina dihtare tói ducuinare ñuhi. Pùhtoro to dujiro panoi, Cordero panoi ducuhre tina masa. Payu masa jihre. Ì jia quihō bihoina jierare. Yehsea suhti tiina jihre tina. Ì yoa pjaa pō pūrīne cjuahre. ¹⁰ Ì jia tina jipihtina ò sehe ni tuaro sañurucuhre:

“Cohamacu jira sãre yuhduchu yoariro.

Tiro to dujiroi dujiro jira.

Cordero cùhu sãre yuhduchu yoariro jira”,

ni sañurucuhre tina. ¹¹ Ì jia jipihtina anjoa, Jesu yaina puhto cùhu, soro bajuina mehne puhtoro to dujiro cahai ducuhre. Ì ducua to dujiro panoi doca caha su, Cohamacure wahche payohre. ¹² Ò sehe ni wahche payohre tina:

“Ì tjira.

Cohamacu sã puhtoro mùhure noano durucuja.

Noa yuhduariro, masi pahñoriro jira mùhu.

Mùhure ‘Noana’, nija.

Mùhure ño payoja.

Tua yuhduariro jira mùhu.

Mu tuaa mehne yoariro jira mùhu.

Tó sehetā jirucuriro jira mùhu jipihtia dachoripe.

Ì tjira”,

ni wahche payohre tina.

¹³ Ti ã nichu tuhoro cùiro Jesu yaina puhto mehne macariro yuhure ò sehe ni sinituhre:

—¿Ahrina yehsea suhti tiinare masijari mùhu? ¿Ti tariore masijari mùhu? —ni sinitu ñuhre yuhure.

¹⁴ To ã nichu tuhocu:

—Masieraja —ni yuhtihi.

—¿Noa jijari tina? —ni sinituhi tirore.

Yü ä nichu tuhoró ò sehe nihre yuhure:

—Ahrina ñabiaro yuhduri dacho jichu cūno pjaina jira. Ti suhti cosawerina ti jiro seheta Cordero to di cohāno mehne ti ñaa buhirire cosawerina jira. Ä jia noano yehsea suhti tiina jira. ¹⁵Ä to cosawerina jia Cohamacu to dujiro panoi tirore ä ño payorucura. Dachoripe, ñaminipe tirore ä ño payorucura, sacerdotea Cohamacu wuhui ti yoiro seheta. Ä jiro tina mehne ä jirucuro, tinare yoadohorohca Cohamacu “Soro wahari”, nino. ¹⁶Ne pari turi jüca baasi tina. Ä jia ñahma yapiosi tina. Ne sū dacho macariro siro tinare ne jū pjasi. Tuaró sia tinare ñano yuhduchu yoasi. ¹⁷Puhtoro dujiro potoi ducuriro Cordero tinare ñu wihborohca. Ovejare ñu wihboriro yoaro sehe tinare ñu wihborohca. Ä ñu wihboro mári pohtaripu catichu yoaa mári pohtaripu tinare mü tä wahcānohca, ovejare ñu wihboriro to mü tāno seheta. Ä yoaro ä wahcherucuchu yorohca tinare. Ä jia ne pari turi tiisi tina —ni yahuhre Jesu yaina puhtoa mehne macariro yuhure.

Seis papera ti wihtā ñahaare pahrē tuhsuro parore pahrēha Cordero

8 ¹Seis papera ti wihtā ñahaare pahrē tuhsuro parore pahrēhre tjao Cordero. To ä pahrē tuhsuchu cū hora dacho macai tópu müanopu noano dihta marieaa wahahre. ²To ä wahari baharo siete anjoare Cohamacu panoi ducuinare ñuhi. Tinare siete cornetarire wahre paio. ³Paio anjo uru wahware inciensore posa tihti wahware cjuariro altar cahapu sü, ducuhre. Tóto ducuchu payu inciensore tirore wahre, jipihtina Cohamacu yaina tirore ti siniri mehne morehtire. Ä jiro uru altarpü Cohamacu to dujiro panoi jiri altarpü tí inciensore jū müohre Cohamacure. ⁴Ä jia anjo to cjuari wahwa macaa inciensore altarpü to poho siteri baharo tí incienso macaa me Cohamacu yaina tirore ti siniri mehne mujaa wahahre. ⁵Ä wahari baharo altar macaa niti mehne tí wahwa wahpa wahachu, yahpai poho cūnocahre. To ä poho cūnocachuta wupo pja, soro sehe jiro bisi müa, oroca site müa, yahpa ñuhmi muahre.

Cornetarire yahuha João

⁶Baharo siete anjoa cāina ti cornetarire putia taa nihre.

⁷Cūiro anjo to yariare puti mühtahre. To ä putichu co poca yusua poca pichaca mehne, di mehne morea poca yahpapu bora sü cahahre. Ti bora sü cahachuta yahpa jüa wahahre. Ö puro jühre: Ahri yahpa dacho maca saro caharoi jüa wahahre. Ä jiro tó puro posata yucuri cūhu jüa wahahre. Tó puro posata tja cūhu jüa wahahre.

⁸Anjo cūiro to ä puti mühtari baharo paio anjo to yaria cornetare putihre tjao. To ä putichu pjidu tūcu yoaro sehe bajudu noano jürucudu pjiri mapure waharoca ñojaa wahahre. Ä jiro yahpa to jūiro puro tó purota pjiri ma di ma dojoo wahahre. ⁹Ä jia pjiri ma macaina wahi dacho maca mahano suboro waroi yariaa wahahre. Tópe busota dohoa buso cūhu minia wahahre pjiri mapure.

¹⁰Puaro anjoa ti putiri baharo paio anjo cūhu to yaria cornetare putihre tjao. To ä putichu pjiria ñahpichohaca, sihāria yoaro sehe siria yahpapu bora sü cahaa wahahre. Ahri yahpa macaa mári dacho macabo cureroi tópe mári

bui bora su cahaa wahahre ñahpichohaca. Tópe co wijaa copari bui cūhure bora su cahaa wahahre. ¹¹Tópe márita suēa mári wahahre. To ã wahachu payu masa tí mári macaa core, tí copari macaa co cūhure sihnimaa, yariaa wahahre. Tia ñahpichohaca “Suēnia”, wama tihre.

¹²Tiaro anjoa ti putiri baharo paio anjo cūhu to yaria cornetare putihre tjoa. To ã putichu sū dacho macariro, ñami macariro cūhu dacho maca suboro waroi dojoa wahahre. Ñahpichoha peri cūhu dacho maca suboro waroi jia poca tópe pocata dojoa wahahre. Tópe poca muano macaa poca noano buhrierare. Dachopu pititia horari waro sū dacho macariro ne buhrierare. Ñamine pititia horari waro sū ñami macariro, ñahpichoha poca cūhu ne buhrierare.

¹³Baharo ñuroca muohi tjoa. Muanopu wurirore cjare ñuhi. Æ jicu to sañu-rucuchu tuhohi. Ó sehe nihre tiro:

—Ñabiara. Ñabiara. Tiaro anjoa mipu putierasiniina ti putiri baharo pinihtare ñabiario waharohca. To ã wahachu ahri yahpai jiina ñabiario yuhduahca —nihre tiro.

9 ¹Baharo pititiaro anjoa ti putiri baharo paio anjo to yaria cornetare putihre tjoa. To ã putichu ñahpichohaca yoaro sehe jiro anjo muanopu bora tarirore ñuhi. Yu ã ñuno watoi tirore cuári copa macari sawire wahre. ²Æ jiro tiro tí copare to pjóochu pichaca me wijaahe. Pjiri pichaca macaa me yoaro seheta pjíro me wijaahe tí copare. Æ wijaahe tí me dóihtu sū dacho macarirore, muano cūhure butia wahachu yoahre. ³Æ yoa tí me puhichai jiina poreroa yahpapu tahre. Pichōno soroa ti tuaro purino seheta tina cūhu tuaro purihre. ⁴Æ jiro tjare, yucurire, paye toaare ñano yoa dutierare tinare. Masa dihtare ñano yoa dutihre tinare. Cohamacu to wamare ti wuhduu pocare ōmahnoeraina dihtare ñano yoa dutihre tinare poreroare. ⁵Æ ñano yoa dutiparota tinare wajā dutierare. Tinare wajā dutieraparota cinco sūri waro tinare ñano purichu yoa dutihre. Pichōno soroa tjoaa ti purino seheta purichu yoaia jihre poreroa cūhu. ⁶Tinare ti ã purichu yoachu masa yariaa waha duaahca. Ti ã yaria duapachuta tinare yaria dutisi.

⁷Poreroa sehe cawaloa yoaro sehe bajuhre. Ti cahma wajāhto pano cawaloare ti suhti sāraro seheta tó seheta bajuina jihre tina poreroa cūhu. Ti dapu pocai puhto ti pisaa sorori uru sorori yoaro sehe bajuhre. Ti wuhduu poca masa yoaro sehe bajuhre. ⁸Ti pjoari numia pjoari yoaro sehe jihre. Æ yoa ti piri yaya piri yoaro sehe jihre. ⁹Pē buhu ducataru cahsaro comaa cahsaro yoaro sehe bajuhre ti cutiro. Æ yoa tina ti wuchu payu cawaloa murocaina ti murocaro sehe ti waa dupuri bisihre. Cawaloa tunua busore wajaina ti cahma wajānopu wahaa, ti bisiro seheta bisihre poreroa waa dupuri. ¹⁰Æ yoa pichōno soroa ti pichōno tiro seheta, tjoariaca ti cjuaro seheta jihre tina poreroa. Ti pichōri mehne tjoaa, cinco sūri waro masare purichu yoahre. ¹¹Tina puhtoro cjuaina jihre. Cuári copa puro jihre ti puhtoro. Tiro anjo jihre. Hebreo ya mehne Abadón wama tihre tiro. Griego ya mehne Apolión wama tihre. (Apolión “Pihtichu yoariro”, nino nina.)

¹²Poreroa masare ñano ti purino yoiro baharo ahri ti ñano yuhdu muhtariro cjiro pihtia wahahre. Tó baharo puu taha pari turi ñano yuhdusinihca masa.

¹³Baharo cū wamomaca pihtiina anjoa ti putiri baharo paio anjo to yaria cornetare putihre tjoa. To ã putichu Cohamacu panoi ducuri altarpu uru

altarpũ durucua bisi wijaro coa tahre. Tí altar macaa sahari pititia saharipũ durucua bisi wijaro coa tahre. ¹⁴ ã durucuro cornetare putiriro anjore yahuhre:

—Eufrates wama tiri ma pjiri mapũ peresupũ jiinare anjoare wioga. Tina pititiaro anjoa jira —nino coa tahre.

¹⁵ ã nino coa tachũ tuhorõ anjo sehe tinare pititiarore wiohre, payũ masare wajãhtinare. Ahri horare, ahri dachore, ahri sũre, ahri cuhmare quihõno cohtaa nihre tina pititiaro anjoa. Ti cohtariro mu sũra. ã jia wajãa taa nina. Jipihtina dacho maca doca curero masare wajãahca. ¹⁶ ã yoa ti surarare “Õpeina jira”, ti nichũ tuhohi. Tina cawaloa bui pisaina jihre. Doscientos millones surara jihre.

¹⁷ ã yoa cawaloare tina bui pisaina cũhure ñuhi. Tina cawaloa bui pisaina ti pẽ buhure ducataa suhti, comaa suhti, sohãa suhti, yahsaa suhti, ewũ sehe bajua suhti jihre. ã jia cawaloa ti dapu poca yaya sohãina yoaro sehe bajuhre. Ti duseripũ pichaca, me, azufre wama tia me cũhũ wijaahre. ¹⁸ ã jia cawaloa duseri wijaa masare wajãhre. Jipihtina dacho maca mahano suboro waroi tõeina masare wajãhre. Pichaca mehne, me mehne, azufre mehne payũ masare wajãhre. ¹⁹ Tina cawaloa ti duseri mehne wajãhre. ã yoa ti pichõri mehne wajãhre tjõa. Ti pichõri sohtoapũ agãa dapu poca yoaro sehe bajuhre. ã jia ti pichõri mehne ñano yoahre tina masare.

²⁰ Payũ masa yariaeraina ti wajã duharina sehe ti ñaa yoarire ne duhuerare. Watĩare ño payo duhuerare. “Cohamacũ jira”, ti nia masuri cũhure ño payo duhuerare. Tí masuri uru mehne, plata mehne, bronce wama tiri comaa mehne, tãa mehne, yucuri mehne ti yõari masuri jihre. Tí masuri sehe ñuerare. Tuhoerare. Tinierare. ²¹ Paye ñaa cũhure tina ne cahyaerare. Masare ti wajãrire, numia mehne ti ñano yoarire, ti yacari cũhure ne cahyaerare tina. ã jia yaya ti yoaro sehe yõaa, tí cũhure ne cahyaerare tina.

Mahari tiacãre papera tiacãre na taha anjo

10 ¹ Baharo paio tuariro anjo muanopũ to duji tachũ ñuhi. Me curua watoĩ tahre. ã yoa buhini soro to dapu bui pisahre. To wuhdua sũ dacho macariro yoaro sehe si sitehre. To ñuchua pichaca yoaro sehe bajuhre. ² ã yoa mahari tiacã papera tiacãre to pjãri tiacãre cjuahre tiro. To dahporo poto buhusehe macari dahporo mehne pjiri mápũ tu cũhre. To dahporo cõ buhusehe macari dahporo sehe macarocai tu cũhre. ³ ã ducuro yaya ti sañurucuro seheta tiro tuaro sañurucuhre. To ã sañurucuri baharo siete wũpoa yahua coa tamahre. ⁴ Ti ã yahuchũ tuhocũ joa ducamahi. Yũ ã joa ducapachuta muanopũ yuhure õ sehe ni durucuro coa tahre:

—Siete wũpoa ti nire painare yahui tjiga. ã jicũ tíre joa nai tjiga —nino coa tahre yuhure.

⁵ To ã niri baharo pjiri mapũ ducuriro, macarocai ducuriro anjo to wamomaca poto buhusehe siõroca muohre muanopũ. ⁶ ã siõroca muono Cohamacũ ã catirucuriro wama mehne wama payohre. Tiro Cohamacũ sehe jipihtiare muanore, muano macaare, ahri yahpare, ahri yahpa macaare, pjiri mare, pjiri ma macaare yõariro jira. ã wama payoro õ sehe nihre anjo:

—Cohamacũ mehne potocã nii nija. Tõ purota cohtanahca. ⁷ Seis anjoa cornetarire ti putiri baharo paio anjo to putichũ Cohamacũ panopũ “Õ sehe

yoaihtja”, to niriro seheta ā yorohca. Panopu masare tīre noano yahuera tiri jire. Baharo tirore dahra cohtainare, to yare yahu muhtaina sehere noano yahu pahñoa tiri jire tiro. Tí to yahu cūrire mipure yorohca tiro —nihre anjo.

⁸To ā niri baharo muanopu yuhure durucuro coa tariro pari turi durucuro coa tahre tjoa. Ō sehe nino coa tahre yuhure:

—Pjiri mápū ducuriro macarocai ducuriro siro anjo cahapu wahaga. Ā wahacu papera tiacāre to cjuari tiacāre naga —nino coa tahre yuhure.

⁹To ā nino coa tachū tuhocu anjo cahapu wahahi. Tirore papera tiacāre yu sinichū tuhoro ō sehe ni yuhtihre yuhure:

—Naga. Ā jicu ahri tia papera tiacāre chūga. Mu wahma chuchū mi yoaro sehe noano bisirohca. Mu pjaropu mu burori baharo suēa waharohca —nihre yuhure.

¹⁰To ā nichū tuhocu tí tiacāre anjore yu nari baharo chuhi. Yu wahma chuchū mi yoaro sehe bisihre. Yu chū burori baharo yu pjaropu suēa wahahre. ¹¹Yu ā chūri baharo ō sehe nihre yuhure:

—Pari turi macari macaina, yahpari macaina, payu dūseri durucuina, tina bui puhtoa cūhu baharo ti dohse wahahtore, Cohamacu tinare to dohse yoahito cūhure yahuuga muhu —nihre yuhure.

Puaro Cohamacu yare yahuhtinare yahu joaha João marine

11 ¹Baharo yuhure quihōdure wahre Cohamacu. Tjuadu puro yoadu jihre tu. Ture waro ō sehe nihre yuhure:

—Yu ya wuhure quihōi wahaga. Tí wuhū macari altar cūhure quihōga. Ā yoa tuhsu, tí wuhū yuhure űo payoinare quihōga. ²Sopaca wija surucari wapare noari wapare quihōi tjiga. Tí wapa yuhure cahmaerainare ti cūri wapa jira. Tina cuarenta y dos sūri waro Cohamacu ya macare tí maca macaina cūhure űano yoaahca. Ā jicu quihōi tjiga ti ya wapare noari wapare. ³Ā jicu yu yare yahuinare puarore warocaihtja. Mil doscientos sesenta dachori waro yu yare yahuahca. Masa ti coyeyā ti yariari baharo ti sāa suhti barore sāaina jiahca tina yu yahu dutiina —ni yahuhre yuhure.

⁴Ahri yahpa macaina bui puhtoro Cohamacu panoi puadu Olivo wama tia yucu ducura. Puadu sihā payoya yucu cūhu tí yucu cahai ducura. Tí yucu mehne piti dahre to buhechū ahrina puaro to yare yahuina tí yucu yoaro sehe jira. ⁵Ā jia tinare űu tuhtiina tinare ti űano yoa duachū tina sehe ti dūsero macaa picha pohna mehne jū pahñoahca tinare űu tuhtiinare. Ō seheta tinare űano yoainare wajāahca tina puaro Cohamacu yare yahuina. ⁶Ā yoa tina puaro ti coro ta dutierachū coro tasi. Ā jiro Cohamacu yare ti yahuro puro coro tasi. Ā jia mārīne di mārī wahachū yoaahca tina. Ā jia ahri yahpare űano wahachū yoaahca. Jipihtia dohse jiare, jipihtina dohse jiinare masare űano wahachū yoaahca. Ti dohse yoa duaro puro ā űano wahachū yoaahca ahri yahpare. ⁷Ti ā yoa pahñochu waro cuārī copapu jiriro űariro nucu macariro wijaarohca. Ā wijaaro Cohamacu yare yahuina mehne cahmachenohca. Ā cahmacheno tua yuhdūrucaro tinare wajānōhca. ⁸To ā wajāri baharo ti pjacūri cjiri pjiri maca macari mahapu coāahca. Yahuina puhtorore ti cjā puha wajāri maca jira tí maca. Tí maca macaina űaina jia Sodoma macaina, Egipto macaina yoaro seheta jia, tí pjare Sodoma, Egipto cūhu wama tirohca

tí maca mari piti dahre buhechũ. ⁹ ã coãa tia numũ noano coãa, pa numũ dacho macai ti pjacuri tí mahai coãahca. ã jia jipihtia yahpari macaina, jipih-tia curuari macaina, jipihtia duseri durucuina tópe numuri waro ti pjacurire ñurucuahca. ã ñurucua tópe numuri waro ti pjacurire ya dutisi. ¹⁰ Ti ã yaria-rina jichũ ñua ahri yahpa macaina wahcheahca. ã wahchea bose numure yoaa, ti basi paye barore ã wanocaahca. Tina puaro Cohamacu yare yahuina masare ñano yuhduchũ yoarina jiri jire. ã jia ti ã yariachũ ñua wahche yuh-duahca ahri yahpa macaina. ¹¹ ã jiro tia numũ baharoi pa numũ dacho macai Cohamacu ti pjacurire masonohca. To ã masochũ tina pari turi wahcãrucu suahca. Ti ã wahcãrucu suchũ ñua jipihtina cui yuhduahca tinare. ¹² Baharo tina puaro muanopu tuaro durucuro coa tachũ tuhoahca. Õ sehe ninohca tinare:

—Opũ muja taga musa —nino coa tarohca.

To ã nichũ tuhoa me curua watoi mujaa wahaahca. Ti yabirina cjiri ti mujachũ ñuahca. ¹³ Ti ã mujachuta yahpa tuaro ñuhminohca. To ã ñuhmichũ tí maca macaa wuhuse décima parte boraa wahaahca. ã jia yahpa ñuhmino mehne siete mil masa yariaa wahaahca. Paina duhsaina sehe cãaa waha, Cohamacure muano macarirore “Tuariro jira”, ni ño payoahca tireore.

¹⁴ Ahri jipihtia ti ã wahari baharo puu taha masa ñano yuhdu tuhsuina jiahca. Ti ã yuhduri baharocãta pari turi dóihta masa ñano yuhduahca tjoa.

Seis cornetarire ti putiri baharo paio putiha

¹⁵ Baharo seis cornetarire ti putiri baharo paio anjo to yariare putihre. To ã putichũ muanopu tuaro durucua coa tahre. Õ sehe nia coa tahre:

“Mipũ Cohamacu Cristo mehne ahri yahpa macaina bui puhtoa jiahca.

ã jia jipihtina bui puhtoa ã jirucuahca”,

nia coa tahre. ¹⁶ ã yoa Cohamacu panoi puhtoa dujiapu dujiina veinticuatro Jesu yaina puhtoa Cohamacu panoi caha su, tireore ño payohre. ¹⁷ ã ño payoa õ sehe nihre:

“Sã puhtoro Cohamacu, tua yuhduariro jira muhũ.

Muhũ panopu ã jirucua tiri jire.

Mipũ cũhure ã jirucura muhũ.

Mu tuaa mehne masa ti puhtoro mu jirucachũ ‘Noana’, nija muhure.

¹⁸ Jipihtina ahri yahpa macaina muhure cahmaeraina muhũ mehne suamare.

Mipure tinare mu buhiri dahrehti pja jira.

Yariaina cũhure mu buhiri dahrehti pja jira.

ã jiro mu yaina sehere noare ti yoari wapare mu wahti pja jira.

Cãina tina muhure dahra cohtaina mu yare yahu muhtaina jira.

ã yoa tina, paina mu yaina mehne jipihtina muhure ño payoina jira.

ã jicu puhtoare, wiho jiina cũhure mu yaina ti jiri wapa noano yoaihca muhũ.

ã jiro ahri yahpa macainare dojomehne cohtainare mu cohãhti pja jira mipure”,

ni ño payohre puhtoa Cohamacure.

¹⁹ Ti ã yoari baharo muano macari wuhũ Cohamacu ya wuhũ to pjõori wuhũ jihre. ã jina tí wuhũ jiri carore ñuhi sã. Tí caro puhichapu Cohamacu

masare to dutiare joa òa pjīni tāa pjīni sāahre. Sā ā ñuchuta orocasite mua, wupo pja mua, soro jiro bisi mua, yahpa ñuhmi mua, co poca yusua poca muanopu payu bora tahre.

Numinore pinono cūhure yahuha João

12 ¹Baharo ahri yahpa to dohse wahahtore muanopu ñohre. To ā ñori wiho waro jierara. Ò sehe ñu muhtahi: Muanopu numinore ñuhi. Ticoro to suhtiro sū dacho macariro yoaro sehe si sitehre. Sū ñami macariro bui ducuhre. Puhtoro to pisari soro barore doce ñahpichoha poca cjuari sorore pisaricoro ducuhre. ²Ā ducuro mahanocā duhsahre to pohna tihto. Ā jiro ticoro sañurucuhre. ³Baharo pari turi ñuhi muanopu: Pjiriro pinonore sohārirore ñuhi. Siete dapu poca tiro jihre. Jipihtia to dapu poca puhtoa ti pisaa sorori barore pisaa dapupoca jihre. Ā jiro diez sahari tiro jihre tiro. ⁴To pichōno mehne ñahpichoha pocare wahba siteroca borohre. Jipihtia ñahpichohare dacho macabo cureroi wahba siteroca borohre. Ā jiro numino pohna tihticoro panoi ducuhre pinono. To macunocā to bajuachu churo taro nimahre. ⁵Baharocāta cjuu tuhsuhre wihārirocāre. Jipihtia yahpari macaina ti puhtoro cjihto jihre tirocā. To ā puhtoro tuariro jichu, masa tirore yuhdurucāa cūno pjasi. To ā masa bajuachuta Cohamacu to dujiro cahapu tirocāre naa wahcāa wahahre. ⁶To ā yoachu numino sehe masa mariepopu duhti wahcāa wahahre. Cohamacu to cahnoyuriropu duhti wahcāhre ticoro. Tópure mil doscientos sesenta dachori waro Cohamacu ticorore ñu wihborohca.

⁷Wahmanore muanopu cahma wajā ducaa tiri jire. Miguel wama tiroiro anjo to yaina anjoa cūhu pinono mehne cahmachea tiri jire. Ti ā cahmachechu pinono to yaina anjoa mehne Miguere cahmachea tiri jire. ⁸Ā yoa Miguel cūhu pinonore yuhdurucāa tiri jire. Ā jiro pinono yaina anjoa cūhure muanopu ji namo dutiera tiri jire. ⁹Ā jiro pjiriro pinonore cohānoca tiri jire Cohamacu. Tiro pinono watīnota jiro nina. Satana wama tiroiro jira. Panopu tiro pinono pjacu tiroiro jia tiri jire. Tiro jipihtiro yahpa macainare mahñoriro jira. Tirore to yaina anjoa mehne muanopu jirirore yahpapu cohā boroa tiri jire.

¹⁰Baharo muanopu sañurucuro coa tachu tuhohi:

—Mipure Cohamacu masare yuhduchu yoahre juna. Mipu pinihtare Cohamacu mari puhtoro jiro tahre to tuaare ñono taro. To warocariro Cristo cūhu to puhtoro jiare to tuaare ñohre jipihtinare. Watīnore muanopu jirirore yahpapu cohā borohre. Ā cohā bororo to tuaare ñohre Cohamacu. Tiro watīno sehe dachoripe, ñaminipe Jesu yainare “Ahrina ñaina jira”, ni yahusāno niri jire Cohamacure. Ā jiro mari coyeare Jesu yainare yahusāriro jiri jire. ¹¹Cristo Cordero wama tiroiro to di cohāri mehne mari coyea Jesu yaina tirore wacū tuaina ti ñaa yoari buhirire cohāre tiro. Ā wacū tuaina jia watīnore yuhdurucare. Ā yoa Cohamacu yare yahua, watīnore yuhdurucare. To yare ti yahuri buhiri paina tinare ti wajā duapachuta, tina cuieraa, Cristo yare duhuerare. ¹²Ā jina musa muano macaina wahchega. Watīnore yahpapu to cohā borochu ñuna wahchega. Wiho mejeta ahri yahpa macaina, pjiri ma macaina cūhu pjacuoina wahanahca musa sehe. Ahri yahpapu tirore to cohā borori baharo musa cahapu jira watīno. Tirore to buhiri dahrehto mahanocā

duhsara. ã jiro sua yuhduara tiro. Musa cahapu suro, pjacuoina musare tjuachu yoarohca tiro —ni sañurucuro coa tachu tuhohi.

¹³ Pinonore yahpau to cohã borochu ñuno, pinono sehe numinore, wihãri-rocã pocorore nunu ti wahcãhre. ¹⁴ ã jiro ticorore pjiriro cja to wua dupurire wahre Cohamacu, masa marienopu to wu duhti wahcãhto sehe. Tõpu to suri baharo tia cuhma noano pa cuhma dacho maca waroi ticorore ñu wihbohre Cohamacu. To ã ñu wihbochu pinono ticorore ñano yoa masierare. ¹⁵ Tõi to jichu ñuno pinono pjíro core cho cohãhre ticorore muroca burochu yoaro taro. ¹⁶ To ã yoachu yahpa sehe ticorore yoadohohre. Pinono to duseroi wijaa core yahpa sehe wihmi na pahñonocahre. ¹⁷ To ã wahachu ñuno pinono sua yuhduahre. ã suaro cãina ticoro panamana ji turiaina mehne cahmacheno wahahre pinono. Tina sehe Cohamacu dutiare yoaina jia, Jesu ya buheare noaa buheare ne duhueraina jihre. ¹⁸ ã yoa pinono pjiri ma duhtu cahai ducuhre.

Puaro nucu macainare yahuha João

13 ¹ ã yoa nucu macarimore tí mai jirirore to wahcã wihichu ñuhi. Tiro sehe siete dapu poca, diez sahari tiriho jihre. To sahari puhtoa ti pisaa sorori barore pisahre. To dapu pocare to wamare joa õri dapu poca jihre. Tí wama to ñari wama jichu ñu yabira Cohamacu. ² Tiro nucu macariro yairo dohroriro yoaro sehe bajuhre. ã jiro oso yoaro sehe dahpori tiriho jihre. Yairo sohãriro pjiriro wuru yoaro sehe dusero tiriho jihre. ã yoa pinono sehe to tuaare wahre nucu macarimore. ã waro tirore to puhtoro dujiroi cño, tiro yoaro sehe payu masare dutichu yoahre pinono nucu macarimore. ³ Cũ dapu nucu macariro dapu ti wajãmariro dapu yoaro sehe bajuhre. To ã bajupachuta to camino sehe yatia wahahre. Tí dapu to catichu ñua, cuaa wahahre jipihtina ahri yahpa macaina. ã cuaa, nucu macarimore ño payohre. ã jia tiro mehne macaina wahahre masa. ⁴ ã yoa nucu macarimore pinono to tuaare to wachu ñua masa sehe tirore pinonore na tuhcuca caha su, ño payohre. ã jia nucu macariro cũhare na tuhcuca caha su, tirore ño payohre. ã ño payoa õ sehe nihre:

—Ne paio mu yoaro sehe tuariro mariahna. Pairo muhare ne yuhduruca masierara —ni ño payohre masa nucu macarimore.

⁵ ã yoa tiro nucu macariro “Tua yuhdurucariro jija”, to nipachuta Cohamacure to ñano durucupachuta ã tuhutunocasinihre Cohamacu sehe. ã jiro cuarenta y dos sũri waro tiro nucu macariro masare dutisinimahre. Tõ purota to puhtoro jihtore cũre Cohamacu. ⁶ ã jiro tiro Cohamacure ñano durucuhre. To wamare, to wuhure, muanopu to jiro macaina cũhare ñano durucuhre nucu macariro. ⁷ ã yoaro Cohamacu yainare cahma wajãno tinare yuhdurucahre. To ã yoapachuta ã ñunocasinihre Cohamacu. Cohamacu to ã yoa dutierachu yoaeraboa. ã jiro jipihtina ahri yahpa macaina bui puhtoro sãasinimahre nucu macariro. Jipihtina yahpari macaina bui, macari macaina bui, jipihtia duseri durucuina bui puhtoro sãasinimahre tiro. ⁸ ã jia jipihtina ahri yahpa macaina tiro nucu macariro panoi na tuhcuca caha su tirore ño payohre. Ahri yahpare Cohamacu to bajuamehnehto pano to yaina cjihtire ã jirucuhtinare ti wamare joa õ tuhsua tiri jire. Tí tju to ã joa õri tju Cordero ti wajãriro ya tju jira. Tí tju ti wamare joa õeraina dihta nucu macarimore ño payohre.

⁹ Cahmori tiina jira musa. Ñ jina tuhoga. ¹⁰ Jipihtina Cohamacu yaina peresu wahahtina, baharo peresu wahaahca. Jipihtina tina ñosari pjĩ mehne ti ñosa wajahtina, baharo tí pjĩ mehne yariaahca. Tíre masina mari Cohamacu yaina ñano yuhdũpanahta tirore cohãena tjijihna. Ñ yoa tirore wacũ tuarucujihna.

¹¹ Baharo paio nucu macarirore ñuhi tjoa. Yahpa puhichapu jiro to wijaachu ñuhi. Pua saharo oveja sahari yoaro sehe bajua sahari sahari tiroro jihre. Ñ yoa pinono yoaro sehe durucuhre. ¹² Ñ jiro nucu macariro ji muhtariro sehe baharo jiro sehere puhtoro sũhre. To ñ puhtoro sũro sehe jipihtia yahpari macainare ji muhtarirore ño payochu yoahre. Ji muhtariro nucu macariro ti wajamaro camino yatiroro jihre. ¹³ Ñ yoa baharo jiro nucu macariro bajuamehneare yoahre masa ti ñu cuahto sehe. Ñ yoaro masa ti ñurocaroi pichaca pjiri pichaca muanopu bora tachu yoahre. ¹⁴ Ñ yoa ji muhtariro to ñurocaroi paio nucu macariro sehe bajuamehnea mehne masare mahũohre “Ahriro musa ño payoh-tiro jira”, nino. Tiro masare mahũono, ji muhtariro masure masare yoa dutihre tirore ti ño payohto sehe. Tiro ji muhtariro ñosari pjĩ mehne ti ñosari jiparota catiroro jihre. Tiro yoaro sehe bajuri masureta yoa dutihre paio nucu macariro masare. ¹⁵ Ñ yoa baharo jiro nucu macariro sehe ji muhtariro masure catichu yoahre masare to dutihtu sehe. Ñ jiro tí masure ño payoerainare wajã dutihre masare masu sehe. ¹⁶ Ñ yoaro jipihtinare ti wamomacari potu buhusehei ti wuhduu poca cũhure joa õ dutihre nucu macariro baharo jiro. Wiho jiinare, puhtoare, pache puare, pjacuoinare, dahra cohtainare, dahra cohtaina jierainare, jipihtinare ti wamomacarine ti wuhduu poca cũhure joa õ dutihre. ¹⁷ Tiro ji muhtariro nucu macariro to wamare, to númerore joa õerainare ne nuchu dutierare. Tuhsu, tinare dua dutierare. ¹⁸ Tíre noano wacũ masiga musa. Tuho masiina jina nucu macariro to númerore noano ñu masiga. Tí número muno wama yoaro sehe jira. Tí número seis cientos sesenta y seis jira.

Cohamacu to yuhdũchu yoaina cũnota wahma basaare basaha

14 ¹ Baharo Siõ wama tidũ tũcu bui ducurirore Corderore ñuhi. Tiro mehne ciento cuarenta y cuatro mil masa jihre. Tina to ya wamare to Pucuro ya wama cũhure ti wuhduu pocare ti joa õrina jihre. ² Tinare yu ñuchuta muanopu durucuro coa tahre. Pjiri poaye to bisiro seheta wupo pjiro to bisiro seheta bisiro coa tahre to durucua. Ñ yoa arpa wama tiare ti buaputẽno seheta bisiro coa tahre to durucua. ³ Tõi puhtoro to dujiro cahai pititiaro soro bajuina, Jesu yaina puhtoa cũhu paina jihre. Ñ jia tina panoi ciento cuarenta y cuatro mil masa ducuhre. Tõi ducua cũnota wahma basaare basaa nihre. Tí basaare tina dihta masihre. Ahri yahpai jiina ciento cuarenta y cuatro mil Cristo to yuhdũchu yoaina dihta tí basaare masihre. ⁴ Ne tina cũ tahacã numino mehne ñano yoaerare. Ñ yoa Corderore ñu cũina jia, to yare ñ yorucuina jihre. Ñ jiro tinare ñaina mehne jiinare to yuhdũchu yoahinare naahre Cohamacu sehe. Ñ to yuhdũchu yoraina jia, Cohamacu yaina cjihti, Cordero yaina cjihti cũhu ji muhtaina jihre. ⁵ Tina mehne macaina ne cũro mahũoriro mariahna. Ñ jia Cohamacu to tuhotuchũ ñaa buhiri marieina jihre tina.

Tiaro anjoa yahuroca boroha

⁶ Baharo muanopu wurirore anjore ñuhi. Tiro ahri yahpa macainare jipih-tia curuari macainare, jipihtia dũseri durucuinare, jipihtia yahpari macainare

noaa buheare yahuhtiro jihre. Tí buhea ne cohtotaeraa, ā jirucura. ⁷Ā jiro anjo sañurucuro ō sehe niroca borohre:

—Cohamacure cui, ño payoga. “Tua yuhduariro, noa yuhduariro jira”, niga tirore. Mipure tiro masare to buhiri dahrehti pja jiro nina. Tiro muanore, yahpare, pjiri mare, mári pohtari cūhure yoariro jira. Ā jina tirore na tuhcuca caha sū, wahche payoga —ni sañurucuhre anjo.

⁸To ā niri baharo paio anjo muanopu wūriro ō sehe niroca borohre:

—Tinare cohānocahre. Pjiri maca Babilonia wama tiri maca macainare cohānocahre Cohamacu. Tina to cohārina sehe jipihtina painare ñano yoachū yoare. Masa tinare ñū cūa ñaare goa pjaa, tīre yoare. Cahaina vinore ti tuaro goa pjaro seheta tina ñaare tuaro goa pjare Babilonia macainare ñū cūa —ni yahuroca borohre paio anjo.

⁹⁻¹⁰Tina puaro anjoa ti ā niri baharo paio anjo ti baharo wūriro ō sehe tuaro niroca borohre:

—Jipihtina nūcu macarirore ño payoinare, to masure ño payoinare, ti wūhduā pocare, ti wamomacarine to wamare joa ōrina cūhure buhiri dahre-
rohca Cohamacu. Tina mehne suaro, tina pinine tuaro waro buhiri dahrerucu-
rohca Cohamacu. Nūcu macarirore ño payoina jipihtina pichacapū wahaahca. Tópū tuaro purīnohca tinare pichaca mehne, azufre wama tia mehne ti wijāri pichaca mehne. Noaina anjoa, Cordero cūhu ti ñurocaroi ñano yuhduahca tina.

¹¹Tí pichaca ā me tirucurohca. Ne yatisi. Tinare ā purīrucuchū yoara. Jipihtina nūcu macarirore na tuhcuca caha sū ño payoinare ā purīrucurohca. Dachoripe, ñaminipe ā purīrucunocanohca. To masure ño payoina, to wamare ti joarina cūhu tó seheta ñano yuhduahca —niroca borohre anjo.

¹²Ti ā ñano yuhduchū ñuna Cohamacu yaina to dutiare yoaina, Jesure cohāeraina jina, to yare duhuena tjiga. Ñano yuhdupanahta Cohamacu yare cohāena tjiga.

¹³Baharo muanopu yuhure durucuro coa tachū tuhohi. Ō sehe nihre yuhure:

—Ahrire joaga mūhu. Cohamacu yaina tirore cohāeraina jina mipure mūsa yariari baharopu cūhure wahcheina jira mūsa —niroca borohre yuhure.

To ā niri baharo Espiritu Santo sehe ō sehe ni namohre tjoa:

—Ā tjira. Potocā tjira. Tina tuaro ti dahraare duhu, soahca. Muanopu ti wahachū noano ti yoarire wacūnohca Cohamacu. Ā yoa ti ā yoari wapa tinare noano yoarohca. Ā jia tina wahcheina jira —ni namohre Espiritu Santo.

**Wese macaa toaa dichare mari bese nano seheta Cohamacu to
yainare bese nanohca. Ñaina sehere soro bese daporohca**

¹⁴Baharo me curua yehseri curuare ñūhi. Tí curua bui masūno yoaro sehe bajuriro dujihre. Tiro uru soro puhtoro to pisari soro barore pisahre. Ā yoa yoari pjī siori pjīne cjuahre tiro. ¹⁵Baharo paio anjo Cohamacu wūhui jirirowijaa tahre. Ā wijaa taro tuaro sañurucuhre me curua bui dujirirowe:

—Mū yoari pjī mehne wese macaa dichare ahri yahpa macaa dichare dūte naa pahñoga. Mipure to quihōri pja sūra. Mipū dica sehe sohā tuhsūhre —nihre anjo.

¹⁶To ā nichū tuhoro to yoari pjī mehne ahri yahpa macaa dichare naa dūcahre me curua bui dujirirowe.

¹⁷Baharo paio anjo cūhu muano macari wuhui Cohamacu wuhui jiroi wijaa tahre. Tiro cūhu yoari pjī siori pjīne cjuahre. ¹⁸Ā yoa paio anjo altar cahapu jiroi wijaa tahre. Tiro sehe altar macari pichacare ñu wihboriro jihre. Ā wijaa taro yoari pjī siori pjīne cjuariroro ò sehe ni sañurucuhre:

—Mu yoari pjī mehne ahri yahpai jiri wese, se wese macaa dichare naaga. Se sehe ñi tuhsuhre —ni sañurucuhre.

¹⁹To ā nichu tuhoro anjo to yoari pjī mehne ahri yahpa macaa se tōhorine yihso nahre. To ā yoari baharo tí tōhorine se tōhorine to tu tihāhtoi cohāhre. To ā cohāriro seheta Cohamacu tirore cahmaerainare tuaro suaro, cohānohca. ²⁰Tí maca duhtu cahai ti tu tihāhtoi tí se tōhorine tu tihāhre. Tói ti tu tihāchu di wijaaahre. Di ma yoaro sehe jihre tí di. Tres cientos kilómetros yoari ma, cū metro noano pa metro dacho macai cuári ma jihre.

Masa ti ñano yuhduhtore anjoa cū batoaha masare

15 ¹Baharo muanopu soro jirore ñuhi. Tíre ñua masa cuaa wahaca. Ahri yahpapure to dohse wahahtore marine ñohre. Ā jiro tí wiho waro jia nierara. Ō sehe ñuhi: Siete anjoa jihre. Cohamacu suaro, siete tahari masare buhiri dahre batoaro taro nihre. Ā jia tina siete anjoa sehe buhiri dahre dutiro to cūhtina jihre.

²Anjoare yu ñuri baharo pjiri mare noano co sitiri ma yoaro sehe jiri mare ñuhi. Tí ma pichaca mehne jiri ma jihre. Ā yoa nucū macariroro to masu cūhure yuhdurucainare ñuhi. Tina to wamare to número cju aeraina jihre. Tina yu ñuchū pjiri ma co sitiri ma duhtu cahai ducuhre. Tói ducuína arpa wama tiare buaputēare cjuahre. Tí buaputēa Cohamacu to wari jihre. ³Ā jia Cohamacure dahra cohtariro Moise cjiro ya basaare cūnota basaa nihre tina. Cordero ya basaa cūhure basaa nihre. Ō sehe ni basahre:

“Sā puhtoro muhu Cohamacu tua yuhduariro jira.

Mu yoirire ñuna ñu cuaa wahaja sā.

Mu yoari noa yuhduara.

Muhu jipiehtia yahpari macaina bui puhtoro jira.

Noano mahñoño marieno, quihñoño yoarucura muhu.

⁴Jipiehtina muhure wahche payoahca.

Jipiehtina muhure ‘Tuariro jira’, niahca.

Muhu dihta ñaa marieriro jira.

Jipiehtia yahpari macaina mu cahapu sua, na tuhcuca caha su, muhure wahche payoahca.

Āta yoaahca tina jipiehtina noano mu yoirire ñua”,
ni basaa nihre tina.

⁵Baharo muanopu ñuroca muocu, Cohamacu wuhure pjōori wuhure ñuhi. Tói Cohamacu to ya tahtia waroi to dutia to joaa pjīni tãa pjīni ti wihbori pjīni jihre. ⁶Tí wuhure yu ñuchuta siete anjoa tí wuhu puhichapu jirina wijaa tahre. Tina Cohamacu to buhiri dahre dutiro to cūhtina jihre. Tinape ti buhiri dahrehtire cjuahre tina siete anjoa. Noaa suhti, wetē maria suhti, si sitea suhti tiina jihre. Ā jia ti cutiro bui uru cahsaro mehne tuā dihorina jihre. ⁷Tí wuhupu jirina ti wijaa tachū pititiaro soro bajuina mehne macariro tinare siete anjoare siete uru wahwarire wahre. Tí wahwari Cohamacu suaa to buhiri dahrehti mehne noano wahpaa wahwari jihre tí wahwari. Tiro

Cohamacu ã jirucuriro jira. ⁸To ã wachu Cohamacu wuhu puhichapu to si sitea mehne to tuaa mehne me ti sahsea wahahre. To ã me wuhu wahachu ne masa tí wuhure sãa masierare. Siete anjoare Cohamacu buhiri dahre dutiro to cûriro seheta masare ti buhiri dahre batoari baharo pari turi tí wuhupu sãa masina tjoa. To buhiri dahrehto pano sãa masierare.

Cohamacu masare to buhiri dahrehtore yahuha

16 ¹Baharo Cohamacu wuhui tuaro durucuro coa tahre. Siete anjoare yahuro nihre:

—Siete wahwarihi posa tiare yahpapu pio siteroca borona wahaga. Yahpa macainare Cohamacu to niriro seheta buhiri dahresiniga mipure —ni durucuro coa tahre.

²To ã nino coa tachu tuhoru ji muhtariro anjo to cjuari wahwai posa tiare yahpapu pio siteroca borohre. To ã pio sitechu nucu macariro wamare joa ôrina, to masure ño payoina ñano cami tihre. Tí cami tuaro purihre tinare.

³To ã pio siteri baharo paio anjo tjoa to cjuari wahwai posa tiare pio siteroca borohre tjoa pjiri mapu. To ã pio sitechuta tí ma di ma wahahre. Yariariro di yoaro sehe jihre tí di. Æ wahachu tí ma puhichapu jiina yaria pihitia wahahre.

⁴Puaro ti ã pio siteri baharo paio anjo tjoa to cjuari wahwai posa tiare pio siteroca borohre tjoa máripu, tí mári pohtaripu cûhure. To ã pio sitechu mári di mári dihta wahahre. ⁵To ã wahachu ñuno paio anjo márire cohtariro ô sehe nihre:

—Cohamacu muhu ñaa marieriro jira. Mipu cûhure ã jirucuriro jira muhu. Panopu cûhure ã jirucua tíre muhu. Æ jicu masa ti ñano yoachu ñucu quihôno tinare buhiri dahrehe muhu. Di márine yoacu noano yoahre muhu. ⁶Nucu macariro yaina sehe mu yainare wajãa, di cohãchu yoahre. Mu yare yahuina cûhure wajãa, di cohãchu yoahre. Ti ã wajãri buhiri mári di mári wahahre. Æ yoa tinare dire mu ã sihnicu yoachu noa nina. Ô seheta mu yoachu cahmahre tina —nihre márine cohtariro anjo.

⁷To ã niri baharo altarpu durucuro coa tahre:

—Æ tjira. Cohamacu sã puhtoro tua yuhduariro jira muhu. Mahñono marieno, quihôno masare bese, buhiri dahrera muhu —ni durucuro coa tahre.

⁸Tiaro anjoa ti pio siteri baharo paio anjo to cjuari wahwai posa tiare pio siteroca borohre tjoa sũ dacho macariro bui. To ã pio sitechuta sũre masare tuaro sichu yoahre Cohamacu. ⁹Æ jiro sũ dacho macariro masare tuaro sihre. Æ jia Cohamacu tinare to buhiri dahre dutichu masia, tirore ñano durucuhre masa. Æ ñano yuhdupahta Cohamacure maca duaerare. Cohamacure “Tuariro jira”, ni wahche payo duaerare.

¹⁰Pititiaro anjoa ti pio siteri baharo paio anjo tjoa to cjuari wahwai posa tiare pio siteroca borohre tjoa nucu macariro to dujiro bui. Puhtoro dujiro jihre to dujiro. To ã pio siteri baharo nucu macariro to yaina ti jiri yahpapu nahitiano wahahre. Æ jia to yaina masa ñano purichu bahca dihohe.

¹¹Tinare ñano puripachuta, ñano cami tipahta, ne ti ñaa yoirire cahyaerare. Æ yoa tíre duhuerare. Æ jia Cohamacu tinare to cami dahrechü masia tirore muano macarirore ñano durucuhre.

¹²Cū wamomaca pihtiina anjoa ti pio siteri baharo paio anjo tjoa to cjuari wahwai posa tiare pio siteroca borohre tjoa Eufates wama tiri ma pjiri mapu. To ā pio sitechuta tí ma sihbi cahaa wahahre. Sū mja taro macaina puhto ti yaina masa mehne tí máre ti pahā tahto sehe ā yoahre.

¹³Baharo tiaro watīare taharo bucuna yoaro sehe bajuinare űhi. Cūiro pinono puhichapu jiro to duseropu wijaa tahre. Pairo watīno nucu macariro duseropu wijaa tahre. Pairo watīno “Cohamacu yare yahuriro jija”, ni mahñoriro duseropu wijaa tahre. ¹⁴Tina tiaro watīa bajuamehneare yoaina jihre. Jipihti macaina puhtoare cahmachuchū yoahre tina cahma wajā dutia taa. Ti ā cahma wajāhti dacho Cohamacu tua yuhduariro jipihtinare to dutihti dacho, pihtihti dacho jira. ¹⁵Ō sehe nihre Jesu: “Nuga musa. Yacariro wacūenoca to yacaro taro seheta yuhu cūhu wacūenoca taihtja. Yu tahtore noano cohtariro wahcheriro jirohca. To yare noano cahnoriro, to suhti sāariro jira wahcheriro. Ā yoariro jiro yu tachū buo tisi tiro suhti marieriro yoaro sehe jieraro”, nihre Jesu. ¹⁶Baharo tiaro watīa yahpari macaina bui puhtoare cahmachuchū yoahre tinare. Ti cahmachuno Hebreo ya dusero mehne “Armagedon” wama tihre.

¹⁷Seis anjoa ti pio siteri baharo paio anjo tjoa to cjuari wahwai posa tiare me curuari cahapu pio siteroca borohre tjoa. To ā pio siteri baharo puhtoro dujiropu Cohamacu wuhui jiri dujiropu tuaro durucuro coa tahre:

—Tó puro tjica —nino coa tahre.

¹⁸To ā nichuta orocasite mua, wupo pja mua, soro jiro bisi mua, cuaro yahpa űhmihre. Ahri yahpai masa ti ji ducari baharo ne tó sehe űaca yahpa űhmiere tihre. Paye űhmiere yuhdoro cuaro yahpa űhmihre. ¹⁹Ā to űuhmichū pjiri macare tia maha yihti muua wahahre. Ā jia bujua macari ahri yahpai jia macari bora wahahre. Ā jiro Babilonia wama tiri maca pjiri maca macainare wacūhre Cohamacu tinare buhiri dahrero taro. Ti űaare yoari buhiri tina mehne tuaro suahre. Ā suaro tinare tuaro buhiri dahrehre. ²⁰To ā yoachū jipihtia nucopo, tūyucu cūhu cohō phtia wahahre. Ā jia ne mariahre. ²¹Ā yoa bujua poca co poca yusua poca yahpau masa bui bora tahre. Jipih-tia poca co poca cuarenta kilos nucu poca jihre. Tina bui ti ā bora tachū Cohamacu masare to tuaro buhiri dahrehū masia űano durucuhre masa Cohamacure.

**Mua mehne űano yoarucuricorore űabiario
yoaricorore buhiri dahre dutirohca**

17 ¹Baharo siete wahwarire cjuaina anjoa mehne macariro yu cahapu wihiro ō sehe nihre yuhure:

—űui taga. Payu mări bui dujiricorore mua mehne űano yoarucuricorore űabiario yoaricorore Cohamacu to buhiri dahrehore űuihca muhu. ²Ahri yahpa macaina puhto ticoro mehne ti űano yoaboro seheta ticoro yoaro seheta yoare tina. Cohamacu ya sehere cahmaerare. Ahri yahpa macainare to cahachū yoaboro seheta tina mehne to űano yoaboro seheta ticoro masare űaare goa pjachū yoare. Ā yoaro űaare yoachū yoare masare —ni yahuhre anjo yuhure.

³To ā niri baharo Espiritu Santo sehe to bajuamehneare yuhure ñohre. Anjo sehe masa marienopu naahre yuhure. Tói numinore űhi. Ticoro nucu

macariro sohāriro bui pisaricoro jihre. Nucu macariro sehe to pjacui payu wama ti joa ōriro jihre. Tí wama ñaa wama Cohamacu to ñu yabia wama jihre. Ñ yoa siete dapu poca tiro, diez sahari tiro jihre nucu macariro. ⁴Tuhsu, numino sehe noano yahsaa suhti puhtoa ti sãa suhti sehe jiare sãaricoro jihre. Sohãa suhti cūhure sãaricoro jihre. Payu urure, wapa tia tãare, perla yapari cūhure ōa suhtire sãaricoro jihre ticoro. Uru wahware cjuhre ticoro. Tí wahwai posa tia ñaa to yoari jihre. Mua mehne ñano yoaro pjíro ñano yoahre ticoro. Tí ñaare ñu yabira Cohamacu. ⁵To wuhduai to wama ti joa ōricoro jihre. Tí wamare noano masieraja mari. Tí wama piti dahre buheri wama jira. Ahri jira tí wama: “Pjiri maca Babilonia wama tiri maca jira. Jipihtia ñaa yoare goa pjaare yoa ducaricoro, Cohamacure cahmaerachu yoaricoro jira” ni, to wuhduai ti joa ōricoro jihre. ⁶Á jicu ticoro payu Cohamacu yainare wajāricoro to jichu masihi. Cahaare to wahchero seheta tinare wajāno ti di cohāchu wahchehre ticoro. Jesu yare ti yahuri buhiri ticoro wajāhre tinare. Tidorore ñucu, ñu cuaa wahahi.

⁷—¿Dohseacu muhu ñu cuaa waharide? —nihre anjo yuhure—. Mu masierarire mūhure yahuihtja. Numinore mūhure yahuihtja. To pisariro cūhure yahuihtja. Tiro nucu macariro, siete dapu poca tiro, diez sahari tiro jihre. ⁸Tiro panopu jiri jire. Mipure mariaha tiro. Baharo tiro cuāri copapu jiri wijaa tarohca. To ā wijaa tari baharo pichacapu waharohca. Ahri yahpa macaina tirore ñu cua, ño payore tirore. Ahri yahpa to jihto pano Cohamacu to yaina cjihtire ā jirucuhtinare ti wamare joa ōa tiri jire. To joa ōeraina jire nucu macarirore ño payoina. Tiro sehe panopu jia tiri jire. Mipu sehere mariaha. Baharo pari turi bajuarohca tjoa. Á jia to bajuachu ñua masa tirore ñu cuaa wahaahca.

⁹Mipure yu yahuhire masi duana, noano tuhonahca masa. Á yoana noano masiina jiga. Nucu macariro dapu poca siete dapu poca siete tūyucu jira, mari piti dahre buhechu. Tí tūyucu bui pisara ticoro mua mehne ñano yorarucicoro. Tí dapu poca siete puhtoa yoaro sehe jira, mari piti dahre buhechu. Payu masa bui puhtoa jira. ¹⁰Cinco puhtoare cohā tuhsure. Pairo tina baharo jiri puhtoro jira mipure. Pairo sehe baharo puhtoro sãanohca. Á sãano mahanocā puhtoro jirohca tiro. ¹¹Á jiro nucu macariro panopu ji muhtariro, mipu marieriro tina siete puhtoa baharo puhtoro jirohca. Siete puhtoa mehne macariro jira. Baharo pichacapu waharohca.

¹²Nucu macariro sahari diez sahari diez puhtoa yoaro sehe jira mari piti dahre buhechu. Payu masa bui puhtoa jira. Tina puhtoa sãaerasinihne. Baharopu puhtoa sãa mahanocā puhtoa jiaha. Yoari pja ji dutisi tinare. Á puhtoa jia nucu macariro mehne puhtoa jiaha. ¹³Tina diez puhtoa cūno potori tuhoutuina jira. Tina nucu macarirore ti ya yahpari macaina bui puhtoro sōahca. ¹⁴Á jia Cordero mehne cahma wajāahca. Ti ā cahma wajāpachuta Cordero to beseina mehne tirore ne cohāeraina mehne tinare yuhdurucaahca. Tiro jipihtina paina puhtoa bui puhtoro jira. Á jiro tinare yuhdurucarohca —ni yahure yuhure anjo.

¹⁵Ahrire yuhure yahu namohre anjo:

—Mua mehne ñano yorarucicoro mári bui dujire. Tí mári ahri yoaro sehe jira mari piti dahre buhechu: Yahpari macaina, payu curuari macaina, payu duserire durucuina yoaro sehe jira tí mári. ¹⁶Nucu macariro, diez puhtoa

mehne mua mehne ñano yoarucuricorore ñu yabiahca. Tina diez puhtoa nucu macariro mehne ticoro yare ma pahño, suhti marienicoro cohāahca ticorore. Ñ yoa to pjacure chuaahca. Ti ñ yoiari baharo ticorore jū pahñoahca. ¹⁷Tina diez puhtoa cūno potori tuhotua nucu macarirore ti ya yahpari macaina bui puhtoro sōahca. Tinare ñ yoauchu yoare Cohamacu, to cahmano seheta yoaro taro. Ñ jiro nucu macariro sehe puhtoro jirohca. Jipihtia Cohamacu panopu to yahuriro seheta to yoiari baharo nucu macarirore cohānohca. ¹⁸Ticoro mu ñuricoro mehne ñ sehe ni piti dahre buhera: Ticoro pjiri maca Babilonia wama tiri maca yoaro sehe jira. Jipihtina paina puhtoa bui jira tí maca macaina —nihre anjo yuhure.

Babilonia wama tiri maca to cohāri maca jira

18 ¹Baharo paio anjo muanopu dujiarirore ñuhi. Tiro puhtoro waro jihre. To si sitea jipihtiropu noano buhria sahsea wahahre. ²To ñ dujiari baharo ñ sehe ni tuaro sañurucu yahuhre:

—Cohāri jihre. Babilonia wama tiri maca pjiri maca macainare cohāri jihre. Mipure watia, payu ñaina pjacu bajueraina cūhu tí macai jia nina. Ñaina baro wahiquina wuina peri cūhu masa ti ñu yabiina tí macai jia nina. ³Jipihtia yahpari macaina tí maca macainare ñainare ñu cūa, tina cūhu ñano yoare. Ñ yoa yahpari macaina bui puhtoa tí maca macaina numia mehne ñano yoare. Ticoro ñ mua mehne ñano yoarucuricoro jiro wapa tiare nuchua tire. Pjiro to ñ nuchuchu ahri yahpa macaina pache duaina pjiro wapatare —ni yahuhre anjo.

⁴Baharo pari turi muanopu durucuro coa tahre. Ñ sehe nihre:

—Yu yaina ahricoro mua mehne ñano yoarucuricoro mehne jiena tjiga musa. Ticoro mehne musa jichu musa cūhure buhiri dahrerohca. Ñ jina to ñano yoaare ñu cūena tjiga. ⁵To ñano yoiari payu jinocahna. To ñano yoiare pari tju mari duhu payo muochu tí tju sehe muanopu wahā sunocaboa. Ñ jia to ñano yoiari payu jinocahna. Ñ jiro to ñano yoiare wacūna Cohamacu. Ñ wacūno ticorore buhiri dahre dutirohca. ⁶Ticoro tuaro to buhiri dahrehticoro jijaro. Masare to ñano yoauchu yoiariro seheta ticoro cūhure ñano yuhdachu yoajaro. Masare ñ ñano to yoiariro seheta tí yuhdoro ticorore ñano buhiri dahrejaro. ⁷Ticoro “Noaricoro jija”, ni tuhotumare. Ñ ni tuhoturo, wapa bujuare pjiro cjuare ticoro. To wapa bujuare pjiro to cjuaro purota ticorore pjiro ñano yuhdachu yoajaro. Tó purota ticorore cahyachu yoajaro. To basi ñ sehe ni tuhotumana ticoro: “Ñi puhtorocoro yoaro sehe jiricoro dujija. Wape-wahyoro jieraja. Ñ jico ne ñano yuhdusi yuhu”, ni tuhotumana ticoro. ⁸Ñ ni tuhoturicoro to jichu wacūenoca ticorore buhiri dahrehto jirohca. Ticoro dohati, yariainare yahco tii, juca barohca. Tuhsu, ticorore jū borohca. Musa puhtoro Cohamacu ticorore buhiri dahre dutiriro tua yuhduariro jira. Ñ jiro tó seheta yu niriro seheta ticorore buhiri dahre dutirohca —nino coa tahre muanopu.

⁹Ñ jia ticoro yoaro sehe jiri macare Babiloniare Cohamacu to buhiri dahreri baharo ahri yahpa macaina puhtoa tuaro cahya, tiiahca. Tí maca macaina mehne ñano yoina jire. Ñ jia tí maca to jūchu ñua tiiahca tina. ¹⁰To ñ jūchu ñua tina puhtoa yoiaropu ñurocarucuahca, “Mari cūhure buhiri dahreri”, nia. Tó ñurocarucua ñ sehe niahca:

—Cue, pjacuori maca jira, Babilonia. Sí maca pjiri maca tuari maca jimahre. Wacüenoca sí macare buhiri dahrehre —niahca tina.

¹¹ Jipihtiropu macaina pache duaina tí macare ñua tuaro cahya tiiahca. Tí maca to pihtichu ñua, ti pachere nuchuina mariachu ñua cahyaahca tina. Æ jia tiiahca. ¹² Ti na tarire urure, platare, wapa bujua tãare, perla wama tia poca cühure nuchuina mariaha. Æ yoa paye ti na tari cjirire suhti noaa suhtire, yahsaa suhti puhtoa ti sãa suhti yoaro sehe jia suhtire, seda wama tia suhtire, sohãa suhtire nuchuina mariaha. Æ yoa paye ti na tarire yucuri me sitia yucurire nuchuina mariaha. Æ yoa paye ti na tarire marfil wama tiro mehne ti yoirire, wapa bujua yucuri mehne ti yoirire, bronce wama tiri comaa mehne ti yoirire, comaa mehne ti yoirire, marmol wama tiro mehne ti yoirire nuchuina ne mariaha. ¹³ Æ yoa paye ti na tarire canela wama tiare ti chũare coachu yoaare, paye ti chũare coachu yoaare, incinsore, mirra wama tia me sitiare, paye me sitiare nuchuina mariaha. Æ yoa paye ti na tarire vinore, chũa wajaa sere, trigo pohcare noano ti sũhaweri pohcare, trigo yaparire, wachũare, corderoare, cawaloare, tunua buso cawaloa ti wajaa busore nuchuina mariaha. Dahra cohtainare nuchũ tinare cjuaina cũhu mariaha. Masa ti jipachuta tinare nuchuina jimahre. Mipure mariaha. Æ jia cahyaahca pache duaina. ¹⁴ Æ jia õ sehe niahca tina tí maca macaina cjirire:

—Ade, ñacaro wahajari. Jipiehtia musa cahĩri cjiri pihtia wahahre. Æ yoa jipihtia noaa musa cjuari cjiri pihtia wahahre. Æ ti pihtia wahachu tĩre pari turi bocasi musa —niahca pache duaina.

¹⁵ Tina tí macare pachere duaa, pjíro wapatamare. Æ jia tina tí macare yoropu ñurocarucua, “Mari cühure buhiri dahrerĩ”, nia. Æ ñurocarucia tí macare tuaro cahya, tiiahca. ¹⁶ Õ sehe niahca tí macare:

—Cue, pjacuoina jira sí maca pjiri maca noari maca macaina cjiri. Sí maca numino yoaro sehetã noaare cjuahre. Numino sehe noaa suhtire, yahsaa suhti puhtoa ti sãa suhti yoaro sehe jia suhtire, sohãa suhti cühure sãahre. Æ yoa uru, wapa bujua tãa, perla wama tia poca õa suhtire sãahre. Tó sehetã yoahe sí maca macaina. ¹⁷ Æ jia wacüenoca sí maca buti pihtia wahahre — niahca tí macare.

Æ yoa jipihtina dohoa buso mehne tiniina, tí buso puã, ti mua, paina pjiri mapu dahra wapataina cũhu tí macare yoropu ñurocarucua. ¹⁸ Tói ñurocarucia tí macare to jũchu ñua õ sehe ni sañurucua:

—Noaa macari sí maca yoaro sehe jia macari ne paye macari mariaha —ni sañurucua tina.

¹⁹ Æ cahyaina jia ti dapu poca bui dihtare orẽ payoahca. Æ jia tuaro yahco tiia õ sehe niahca:

—Cue, pjacuoina jira sí maca macaina cjiri. Noari maca jimare. Jipihtina dohoa buso cjuaina pjiri mapu tiniina sí maca macaa pache mehne noano wapatamahi mari. Æ yoa dóihtã sí maca macaa buti pihtia wahahre —niahca buso macaina.

²⁰ Tí macare to cohãchu ñuna wahchega musa muano macaina. Cohamacu yaina, Jesu to cürina, to yare yahu muhtaina jipihtina musa wahchega. Tí maca macaina musare ñano yũhduchu yoare. Ti ã yoari buhiri buhiri dahrehre Cohamacu. Æ jina wahchega musa.

²¹ Ñ yoa tuariro anjo pjiria tãcare arëni soro puro jiria tãcare na wahcõ, pjiri mapu doca ñohre. Ñ doca ñono ò sehe nihre:

—Ahria tãca to bora ñojariro seheta pjiri maca Babilonia wama tiri maca tuaro boraro bisirohca. To ã borari baharo tí macare pari turi ñusi masa. ²² Tí macare butia wahachu yoarohca. Ñ jia tí macai basaare musa basarucuriro sehe ne coa tasi. Arpa wama tiare musa buaputêrucuriro sehe, flauta wama tia pocare, corneta cûhure musa putirucuriro sehe pari turi tí macai coa tasi. Ñ yoa tí maca mariachu pari turi tí macai dahraina dahrasi. Ñ yoa tãca mehne musa soari cûhure tuhomahnosi. ²³ Ne tí maca to buhria coãriro sehe ne jisi. Ñ yoa wamomaca duhteina musa bose numûre musa dahreriro sehe pari turi ne coa tasi. Tí maca macaina pache duaina nuchûina mehne paina yuhdoro cjuahre musa. Ñ jina yaya wijõ wijîina yoaro sehe yoana jipihtiromo macainare mahñohe musa. Musa ã yoarire ñu cûaa, Cohamacu sehere cahmaerare masa —nihre tuariro anjo.

²⁴ Tí maca macaina Cohamacu yare yahu muhtainare paina to yaina cûhure jipihtiromo macainare wajãri jire.

19 ¹ Babilonia to dohse wahahtore yu ñuri baharo muanopu payu masa sañurucua coa tahre yu tuhochu. Ò sehe ni sañurucuhre:

“Aleluya.

Cohamacure noano durucujihna.

Cohamacu marine yuhduchu yoariro jira.

Tirome noano ño payojihna.

Tua yuhduariro jira tiro.

² Mahñoño marieno quihõno masare buhiri dahrera tiro.

Ñaricorore mua mehne ñano yoarucuricorore ñu cûa jipihtiromo macaina, ahri yahpa macaina ñano yoahre.

Ticoro sehere buhiri dahrehre Cohamacu.

Ñ jiro tirome dahra cohtainare ticoro to wajãri buhiri buhiri dahrehre tiro”,

ni sañurucua coa tahre.

³ Pari turi sañurucua coa tahre:

“Aleluya. Cohamacure noano durucujihna. Tí maca ñari maca to jûri maca ã me tirucurohca”,

ni sañurucua coa tahre.

⁴ Ñ yoa veinticuatro Jesu yaina puhtoa, pititiaro soro bajuina mehne na tuhcu caha su, Cohamacure to dujiroi dujirirome wahche payohre. Ò sehe ni wahche payohre tina: “Amén. Aleluya. Ñ tjira. Cohamacure noano durucujihna”, nihre tina.

⁵ Baharo puhtoro dujiropu ò sehe nino coa tahre:

“Mari puhtoro Cohamacure wahche payoga.

Tirome dahra cohtaina, tirome ño payoina, wiho jiina, puhtoa cûhu jipihitina musa tirome noano durucuga”,

nino coa tahre.

Cordero to wamomaca duhtehti numu bose numure yahuha João

⁶ Baharo payu masa ti durucuchu tuhohi. Pjiri poaye, wupo mehne to bisiro coa taro seheta durucua coa tahre yu tuhochu:

“Aleluya.

Cohamacure noano durucujihna.

Tiro mari puhtoro sehe puhtoro sãa tuhsure.

Tua yuhduariro jira tiro.

⁷⁻⁸ Cordero to wamomaca duhtehti pja jira mipure.

To wamomaca duhtehticoro noano ti cahno tuhsuricoropu jira.

Ticorore noari suhtiro wete marieni suhtirore wahre.

Tí suhtiro Cohamacu yaina noaare ti yoari yoaro sehe jira, mari piti dahre buhechu.

Ã jina ti wamomaca duhtehti pja to jichu wahchejihna mari.

Cohamacure “Tua yuhduariro jira”, nijihna”,

ni durucua coa tahre.

⁹ Ti ã niri baharo anjo õ sehe nihre yuhure:

—Ahrire joa naga: “Cordero to wamomaca duhteri numu bese numure to pjirocarina wahcheina jira”, ni joa naga —nihre anjo yuhure.

Ã ninota õ sehe ni namohre:

—Potocã tjira ahri yu yahuri. Cohamacu ya durucua jira —ni namohre yuhure.

¹⁰ To ã nichu tuhocuta tiro panoi na tuhcuca caha su, tirore ño payoi tai nimahi. Yu ã yoai cahachu waro õ sehe nihre tiro yuhure:

—Tíre yoai tjiga. Mu yoaro seheta yuhu cûhu Cohamacure dahra cohtari-rota jija. Mu coyea Jesu yaina jipihina to ya buheare duhueraina yoaro sehe yuhu cûhu Cohamacure dahra cohtarirota jija. Ã jicu Cohamacure na tuhcuca caha su, tiro sehere ño payoga —nihre anjo yuhure.

Cohamacu yare yahu muhtaina cjiri panopu macaina Espíritu Santo to yoa-dohoro mehne Jesu ya buheareta yahuyua tiri jire.

Cawalo yehseriro bui pisarirore yahuha João

¹¹ Baharo muano parí mua wahachu ñuhi. Tói cawalo yehseriro jihre. Tiro bui pisariro õ sehe wama tihre: To niriro seheta yoariro potocã yoariro wama tihre tiro. Quihõno masare ñaina, noainare bese, tirore ñu tuhtiina mehne cahma wajãna. ¹² To capari picha pohna yoaro sehe jihre. Ã yoa to dapui payu puhtoa pisaa sorori jihre. Ã jiro to pjacui wama joa õriro jihre. Tí wamare tiro dihta masihre. Paina masierare. ¹³ To sãari suhtiro yoari suhtiro di wahãri suhtiro jihre. Tiro õ sehe wama tihre: Cohamacu ya duserore yahuriro wama tihre tiro. ¹⁴ Ã jia to yaina surara muano macaina tiro baharo wahare. Yehseina cawaloa bui pisaina noano yehsea suhtire, wete mariea suhtire sãaina jihre. ¹⁵ To duseroi ñosari pjine siori pjine cuhcûhre. Tí pji yahpari macainare to yuhdurucahti pji jihre. Ã jiro to tuua mehne to dutichu ne cûiro tirore yuhdurucaro bihosi. Cohamacu tua yuhduariro payu yahpari macaina mehne sua yuhduara. To ã suachu cawalo bui pisariro tinare tuaro buhiri dahrerohca. ¹⁶ To suhtiroi, to ñuchucu cûhure ahri wamare joa õri jihre: “Jipihina paina puhtoa bui puhtoro”, ni joa õri jihre.

¹⁷ Baharo sũ siroi ducurirore anjore ñuhi. Jipihina muanopu wuinare yucaa perire sañurucu muohre tiro. Õ sehe ni tuaro sañurucu muohre:

—Cahmachuna taga. Cohamacu to bese numui chuna taga. ¹⁸ Payu yahpari macaina bui puhtoare, surara puhtoare, surara perire, cawaloare, tina bui

pisainare, jipihtina paina masare, dahra cohtainare, dahra cohtaina jierainare, paina puhtoare, wiho jiinare tina jipihtina ti pjacuri cjirire chuna taga —nihre anjo yucaare.

¹⁹Baharo nucu macarirore, ahri yahpa macaina bui puhtoa ti surara peri cūhure űuhi. Tina cahmachuhre cawalo bui pisariro mehne to yaina surara peri mehne cahma wajāa taa. ²⁰Ti ā cahma wajāchu cawalo bui pisariro nucu macarirore peresu yoahre. Pairo “Cohamacu yare yahu muhtariro jija”, ni mahñoriro cūhure peresu yoahre. Tiro mahñoriro sehe nucu macariro to űurocaroi bajuamehneare yoariro jihre. To bajuamehnea mehne nucu macariro to wamare wahāinare to masure űo payoinare mahñohre “Ahri Cohamacu ya jira”, nino. Tina puarore to peresu yoari baharo tinare catiinareta pichacapu cohāhre. Tí pichaca pjiri ma puro jiri pichaca pjiri pichaca azufre mehne jūri pichaca jihre. ²¹Ā jiro duhsainare ti surara peri cjirire űosari pjī mehne to duseroi jiri pjī mehne wajāhre cawalo bui pisariro sehe. Ā to wajāri baharo yucaā peri ti pjacuri cjirire chūa, yapi yuhdua wahahre.

Mil cūhmari waro Cristo to yaina mehne masare dutirohca

20 ¹Baharo pairo anjo muanopu to dujia tachū űuhi. Cuāri copa macari sawire, pjiri da, comaa da cūhure cjuahre tiro. ²Ā duji wihiro pino-nore űahahre tiro. Tiro pinono panopu pinono sehe pjacu tiri-ro jiro, watīno Satana wama tiri-ro jihre. Tirore űahano tirore duhtehre mil cūhmari waro peresu yoaro taro. ³Ā duhte tuhsu, cuāri copapu cohāhre tirore jipihtia yahpari macainare mil cūhmari waro to mahñoerahto sehe. Ā cohā tuhsuro tí copare biha, wihtā űahanocahre. Ā jiro mil cūhmari baharo pari turi mahaa dachoricā tirore wiosinohca.

⁴Baharo puhtoa dujiare űuhi. Tí dujiai dujiina cūhure űuhi. Tinare masa bui dutihtinare cūhure Cristo. Paina cūhure űuhi. Tina sehe Jesu yare Cohamacu yare ti yahuri buhiri ti dapu pocare dute cohārina cjiri jihre. Nucu macarirore to masu cūhure ne na tuhcuca caha su űo payoerare. Ā yoa ti wuhdua pocare ti wamomacari cūhure to wamare joa űo dutierare tina. Ā jia paina tinare ti wajāri baharo masaa wahahre tjoa. Masahre tina mil cūhmari waro Cristo mehne puhtoa jia taa. ⁵Paina Cristo yaina yariaina cjiri sehe masaerasinire. Ti wajārina ti masari baharo mil cūhmari puhtoa ti jiri baharo paina cūhu masaa wahaahca. Ā jia ti wajārina cjiri Cristo yaina to baharo masa muhtaina jihre. ⁶To maso muhtaina sehe tuaro wahcheina jiahca. űaa marieina jiahca tina. Ā jia pichacapu wahasi tina. Masa pichacapu wahaa, pari turi ti yariaro sehe wahara. Ā jia tina to maso muhtaina pichacapu wahaerara. Tina yaria masa muhtaina sacerdotēa jiahca, Cohamacure, Cristo cūhure űo payoa taa. Ā jia mil cūhmari waro Cristo mehne masa bui puhtoa jiahca.

⁷Mil cūhmari baharo Satanare peresui jiri-rore wiorohca. ⁸To ā wiori baharo ahri yahpa macainare mahñono waharohca tiro. Gog wama tiinare, Magog wama tiina cūhure mahñono waharohca. Ā jia tina to mahñoare tuhoa, ti surara perire cahmachuahca cahma wajāa taa. Tina surara peri payu jiahca. Pjiri ma macaa padu pohcaricā payu ti jiro seheta payu surara jiahca. ⁹Tina ahri yahpapure waha sitea, Cohamacu yaina ti jiri macare Cohamacu to cahīri macare soroa wahaahca. Ti ā soroari baharo Cohamacu

tinare muano macari pichaca mehne jüroca bororohca. ¹⁰ Ñ wahari baharo watñore tinare mahñorirore pichacapü cohãnohca. Tí pichaca pjiri ma puro jiri pichaca azufre mehne jüri pichaca jira. Tópu nucu macarirore “Cohamacu yare yahu muhtariro jija”, ni mahñorirore cohã tuhsühre. Tói ti jichü dacho, ñamipü cühure ã ñano purürucurohca tinare.

Cohamacu masare buhiri dahre batoara

¹¹ Baharo pjíro puhtoro to dujirore noano yehserore ñuhi. Tí dujiro bui dujiro cühure ñuhi. Tói to dujichü, ahri yahpa macaa cühü muano macaa cühü pihtia wahahre. Ñ pihtia wahaa pari turi ji namoerare. ¹² Ñ yoa puhtoro panoi yariaina cjiri ti ducuchü ñuhi. Tina wiho jiina, puhtoa cjiri cühü jihre. Tói ti ducuchü joa ña tjurire pjöohre. Tí tjuri masa ti yoarire ti joa ña tjuri jihre. Ñ jiro beseriro tí tjurire ñu tuhsu ti yoarire masihre. Tíre masino yariainare besahre ñaina, noainare. Baharo pa tju cühure pjöohre. Tí tju Cohamacu mehne ã jirucuhtinare ti wamare joa ñi tju jihre. ¹³ Baharo pjiri mapü yaria miniina, diapü ti cohãrina cühü wahcã mujaa wahahre. Ñ yoa yahpa puhichapü jiina, yariaina ti jiropü jiina cühü mujaa wahahre. Tí ña muja suchü tói dujiriro ti yoarire masi pahñono, tinare besahre ñaina, noainare. ¹⁴ Baharo yariarore, yariaina ti jiro cühure cohãnocahre Cohamacu pari turi mari yariaerahto sehe. Pichacapü cohãnocahre. Tí pichaca pjiri ma puro jiri pichaca pjiri pichaca jihre. Pichacapü wahaina sehe pari turi yariaina seheta wahara. ¹⁵ Ñ jiro ã jirucuhtina ti wamare Cohamacu to joa ñi tjui jipihtina ti wamare joa ñmahnoeraina sehene pichacapü cohãhre tiro.

Muano, yahpa cühure wahmaare cohtotarohca Cohamacu

21 ¹ Baharo muano, ahri yahpa cühure wahmaare to cohtotarire ñuhi. Muano pü ji muhtarí, yahpapü ji muhtarí, pjiri mapü ji muhtarí cühü pihtia wahahre. Mariahre. ² Ñ yoa yuhu João noari macare, wahma macare Jerusalene ñuhi. Tí maca muano pü Cohamacu cahapü to duji tachü ñuhi. Wamomaca duhtehticorore noaa suhti mehne wahma suora wamomaca duhtehtirore wahchechü yoaro taro. Tó seheta tí macare cahnoyure Cohamacu, to yainare wahchechü yoaro taro. ³ Tíre yu ñuri baharo puhtoro dujiropü to sañurucuro coa tachü tuhohi:

—Ñuga. Mipure masa watoi jiro nina Cohamacu. Tina mehne jirohca tiro. Ñ jia to yaina jiahca tina. Ñ yoa Cohamacu to basi tina mehne macariro jiro, ti yairo Cohamacu jirohca. ⁴ Ñ jiro ã wahcherucuchü yorohca tiro tinare. Ñ jia pari turi cahyasi tina. Ñ jia ne pari turi yariasi tina. Ne ñano yajeripohna tia, yahco tia, puria cühü mariahca tinare. Ahri jipihtia panopü macaa cjiri pihtia wahaahca —ni sañurucuro coa tahre.

⁵ Baharo puhtoro dujiropü dujiriro ña sehe nihre:

—Ñuga. Jipihtiare wahma cohtotachü yoaihca —nihre.

To ña niri baharo yuhure ña sehe nihre tjoa:

—Ahri yu ñiare joa naga. Yu ñia potocã tjira. Ñ jiro yu niriro seheta ña waharohca. Ñ jicu yu ñiare joa naga —nihre yuhure.

⁶ Baharo ña sehe nihre tjoa yuhure:

—Tó puro tjica. Yuhu jipihtiare bajuamehneriro jija. Ñ yoa jipihtiare pih-tichü yoahtiro jija tjoa. Ñahma yapioina tuaro ti core cahmano seheta yu

cahapu waha duaina Jesure cahmaahca. Ñ jia Jesure yuhtiahca. Tiro catichu yoaa co yoaro sehe jira. Tirore cahmainare wapa cahmano marieno yuhu mehne ã jirucuchu yoihtja tinare. ⁷Jipihtina yuhure wacu tua duhuerainare ò sehe yoihtja: Ti yairo Cohamacu jiihtja. Ñ jia tina sehe yu pohna jiahca. ⁸Wiho mejeta cuia yu yare duhuina, yuhure cahmaeraina, ñabiaare yoaina, masare wajaina, numia mehne ñano yoaina, mua mehne ñano yoaa numia, yaya, “Cohamacu jira”, ti nia masurine ño payoina, jipihtina mahñoina pichacapu wahaahca. Tói pjiri ma puro jiri pichaca pjiri pichaca azufre mehne juno nina. Tópu wahaina pari turi ti yariaro sehe wahaa nina —nihre yuhure.

Wahma maca Jerusalēne yahuha

⁹Baharo cūiro anjo yu cahapu wihihre. Tiro siete wahwari cjuaina, to buhiri dahre dutiro to cūina anjoa mehne macariro jihre. Ñ wihiro, ò sehe nihre yuhure:

—Ñui taga. Cordero to wamomaca duhtericorore ñoihca muhure —nihre anjo yuhure.

¹⁰To ã nini baharo Espiritu Santo yuhure Cohamacu ya macare ñohre. Ò sehe bajuro ñohre yuhure: Muadu tūcu buipu yuhure na mujahre. Tópu Jerusalēne Cohamacu ya macare noari macare ñohre yuhure. Cohamacu cahapu muanopu jiri maca duji taro nihre ahri yahpapu. ¹¹Cohamacu to si sitea mehne si siteri maca jihre tí maca. Wapa tia tãa yoaro sehe si sitehre. Diamante wama tia tãa yoaro sehe si sitehre. Ñ yoa vidro yoaro sehe noano co sitiri maca jihre tí maca. ¹²Pjiri sahrino muari sahrino ti sahrĩ sãari maca jihre tí maca. Doce sopacari tihre tí sahrino. Tí sopacaripe cohtahre anjoa. Tí maca macaa sopa pahmaripu Israe masa curuari doce curuaripe ti wama wahahre. ¹³Sũ muja taro sehe tí sahrino cjuahre tia sopaca. Norte sehe tia sopaca jihre. Sur sehe tia sopaca jihre. Sũ sãano sehe cūhure tia sopaca jihre. Jipihtiro doce sopacari waro cjuahre tí sahrino. ¹⁴Tí sahrino doce tãa bui pisahre. Tí tãape Cordero to cūrina doce to cūrina sã caina wama wahahre.

¹⁵Ñ yoa anjo yuhure yahuriro quihōdu uru mehne ti yoadure cjuahre. Tí macare, tí maca macaa sopacaripe, sahrino cūhure quihōno taro nihre. ¹⁶Tí maca to yoaro purota sahre. Muano cūhu tó purota muahre. Ñ yoa anjo to quihōdu mehne tí macare quihōhre. Tí maca dos mil doscientos kilómetros yoari maca jihre. Tó purota sari maca jihre. Tó purota muari maca jihre. ¹⁷Ñ jiro tí maca macari sahrinore quihōhre anjo. Sesenta y cinco metros muari sahrino jihre. Masa mari quihōno seheta quihōno nihre tiro anjo.

¹⁸Tí sahrino diamante wama tia tãa mehne to yoari sahrino jihre. Ñ yoa tí maca sehe uru mehne to yoari maca jihre. Tí uru wete mariea jia vidro yoaro sehe noano co sitehre. ¹⁹Tí sahrino docai jia tãare payu soro jia wapa tia tãa wahahre. Tí tãa sahrino pisaa tãa doce tãa jihre. Ji muhtaria tãcare diamante wama tia tãa wahahre. To baharo jiria tãcare zafiro wama tia tãa wahahre. Puaria baharo jiria tãcare ágata wama tia tãa wahahre. Tiaria baharo jiria tãcare esmeralda wama tia tãa wahahre. ²⁰Pititia poca baharo jiria tãcare ónice wama tia tãa wahahre. Cū wamomaca pihtia poca baharo jiria tãcare rubí wama tia tãa wahahre. Seis poca baharo jiria tãcare crisólito wama tia tãa wahahre. Siete poca baharo jiria tãcare berilo wama tia tãa wahahre. Ocho poca baharo jiria tãcare topacio wama tia tãa wahahre.

Nueve poca baharo jiria tãcare crisoprasa wama tia tãa wahãhre. Diez poca baharo jiria tãcare jacinto wama tia tãa wahãhre. Once poca baharo jiria tãcare amatista wama tia tãa wahã batoahre. ²¹ ã yoa doce sopa pahmari doce perla mehne to yoaa pahmari jihre. Tí pahmaripe cū yapa perla yapa mehne to yoaa pahmari jihre. ã jiro tí maca macari maha uru mehne to yoari maha jihre. Tí uru wete marieni uru jihre. ã jiro vidro yoaro sehe noano co sitiri maha jihre tí maha.

²² Tí macai Cohamacu wuhure ñuerahi. Mariahre. Tí macai jipihtiropu mari puhtorore Cohamacu tua yuhduariore, Cordero cūhure ño payora masa. ã jiro tí maca jipihtiro Cohamacu wuhu yoaro sehe jihre. ²³ Tí macai Cohamacu to si sitea noano buhriahre. Cordero cūhu sihãria yoaro sehe buhriahre. ã jia sū dacho macariro cūhure ñami macariro cūhure tói ti buhriachu cahmaerare. ²⁴ ã yoa ahri yahpai ti buhria mehne jiahca jipihtiro macaina. ã jia jipihtia yahpari macaina puhtoa tí macapu noa yuhdua ti cjuare na wihiahca. ²⁵ ã yoa dachore tí maca macaa sopacari pjōori sopacari jiahca. Tópū ne ñami marianohca. ã jia ti sopacarire ne bihasi. ã susu-rucuahca. ²⁶ ã yoa jipihtia yahpari macaina noaare ti cjuare tí macapu naa wihiahca. ²⁷ Ñaa sehere tí macapu ne naa wihisi. Buo tichu yoaina, ñaare yoaina cūhu tí macapu ne wahasi. Mahñoina cūhu wahasi. Cordero to joari tjuí ti wama wahãina dihta tí macapu wahaahca. Tí tju to yuhdachu yoaina ti wamare to joa ōri tju jira. Tí tjuí ti wama wahãina ã jirucuahca.

22 ¹ Baharo noari mare catichu yoari mare ñohre yuhure anjo. Tí ma noano co sitiri ma Cohamacu, Cordero cūhu ti dujiropu tari ma jihre. ² ã yoa tí maca macari maha dacho macai buruahre tí ma. Tí ma pu buhuseheri duhtu cahai catichu yoaa yucu ducuhre. Tí yucu sūripe dica tihre. Cū cuhmare doce tahari dica tihre. ã yoa tí yucu macaa pūri mehne noano co tiahca jipihtia yahpari macaina. ³ Tí macare ne ñaa marianohca. Tí macai Cohamacu to dujiro jirohca. Cordero to dujiro cūhu jirohca tói. ã jia jipihitina masa tói jiina tinare dahra cohtaina tina pano na tuhcuca caha sū, tinare wahche payoahca. ã jiro tói ñaa marianohca. ⁴ Tina Cohamacure ñu piti boca dujiahca. ã yoa ti wuhdua pocai to wama wahãina jiahca. ⁵ Tópure ñami marianohca. ã jia sihãa pocare cahmasi tói jiina. Sū to buhriachu cūhure cahmasi. Mari puhtoro Cohamacu to buhriaro jirohca. ã jia tí macai jiina pa sehe macaina bui puhtoa ã jirucuahca.

Jesucristo ahri yahpau to tjua tahto mahanocã duhsara

⁶ Baharo anjo yuhure ō sehe nihre:

—Jipihtia ahri ti yahuri cjiri potocã tjira. ã jia ti niriro sehetã waharohca. Mari puhtoro Cohamacu to yare yahu muhtainare masichu yoariro jira. Tiro sehe mipure to yairo anjore warocahre tirore dahra cohtainare masichu yoaro taro. Baharocã to dohse wahahtore masichu yoaro taro to yairo anjore warocahre —nihre anjo yuhure.

⁷ Jesu sehe ō sehe nihre:

—Tuhoga musa. Mahanocã duhsara yu tjua tahto. Ahri tju macaa yahware yuhduucaeraina wahcheina jiahca —nihre Jesu.

⁸ Yuhu João ahri jipihtiare yu joa narire tuhohi. ã yoa tíre ñuhi. ã jicu yu tuhori baharo, yu ñuri baharo yuhure ñoriro anjo panoi na tuhcuca caha sumahi. Tirore ño payoi tai nimahi. ⁹ Yu ã yoachū ñuno ō sehe nihre yuhure:

—Tíre yoai tjiga. Mú jiro seheta jiriro yuhú cūhú Cohamacure dahra cohtarirota jija. Mú coyea Cohamacu yare yahu muhtaina, jipihtina ahri tju macaa dutiare yoaina cūhú ti jiro seheta yuhú cūhú Cohamacure dahra cohtarirota jija. Ā jicu Cohamacu panoi na tuhcuca caha sú, tiro sehere ño payoga —nihre anjo yuhure.

¹⁰ Ā yoa ō sehe ni yahu namohre yuhure:

—Ahri tjuí baharo to dohse wahahtore yahura. To ā wahahto mahanocā duhsara. To ā mahanocā duhsachú ahri tjuí yahurire nuoi tjiga muhú. ¹¹ Tí pja yú yahuri pjare ñaina sehe ā yoarucuwahnojaro ñaare. Ñaputiina cūhú ñabiario yoarucuwahnojaro. Noaina sehe noano yoarucujaro. Ā yoaga ñaa marieina ā ñaa marieina jirucujaro tí pjare —nihre anjo yuhure.

¹² Ō sehe nihre Jesu:

—Tuhoga musa. Mahanocā duhsara yú tjua tahto. Musare yú yainare yú wahtore na tai tai nija. Ā jicu noaare musa yoari wapa musare noano yoaih-tja. ¹³ Yuhú jipihtiare bajuamehneriro jija. Ā yoa jipihtiare pihtichú yoahtiro jija tjoa.

¹⁴ Jipihtina wete mariea suhtire sáaina ti jiro seheta ti ñaa yoari buhirire cosaweina tí macapú suahca. Ā sua, tí maca macaa yucu catiare waa yucu dichare chuahca. Ā jia wahcheina jahca tina. ¹⁵ Tí macapú sueraina sehe ahrina jira: Ñabiaina, yaya, numia mehne ñano yoaina, mua mehne ñano yoa numia, masare wajáina, “Cohamacu jira”, ti nia masurine ño payoina, mahño ji coaina, mahñoa payuina cūhú jira tí macapú sueraina —nihre Jesu.

¹⁶ Ā yoa ō sehe ni yahu namohre Jesu:

—Yuhú, Jesu yú yairo anjore warocahi musare yú yainare ahri tju macaare yahui tai. Puhtoro Davi panamino ji turiariro jija yuhú. Yuhú bohrea muja tachú muja taria noano si siteria ñahpichoca yoaro sehe jiriro jija —ni yahu namohre Jesu.

¹⁷ Espíritu Santo Jesure “Tjua taga”, nina. Jesu yaina to wamomaca duhteh-ticoro yoaro sehe jiina cūhú “Tjua taga”, nina. Jipihtina ti “Tjua taga”, nirire tuhoina cūhú “Tjua taga”, nijaro Jesure.

Ñahma yapioina core tuaro ti cahmano seheta Cohamacu cahapú waha duana Jesure tuaro cahmaga. Tiro catichú yoa co yoaro sehe jira. Tirore cahmainare wapa cahmano marieno ā jirucuchú yorohca Cohamacu.


¹⁸ Yuhú João, jipihtina ahri tju macaare Cohamacu yare tuhorinare musare ō sehe ni cua pisaro mehne yahuihtja. Ahri buhea mehne paye buhea mehne more suhu yahu namoina Cohamacure yuhdurúcaa nina. Tí ā yuhdurúcachú ñño jipihtia ahri tjuí to buhiri dahrehtore to yahuriro seheta cūnohca tina cūhure. Ā jiro tó seheta tina cūhure buhiri dahrerohca. ¹⁹ Ā yoa ahri tju macaa yahuare yahu duhaina Cohamacure yuhdurúcaina jira. Tí ā yuhdurúcachú ñño catichú yoa yucu dichare tinare chú dutisi. Ā jia ā jirucusi tina. Tuhsú, to ya macapú noari macapú waha dutisi. Tí yucú, tí maca cūhú ahri tjuí ti yahuripú jira.

²⁰ Jipihtia ahri tju macaare yahuriro ō sehe nina:


—Ā tjira. Mahanocā duhsara yahpapú yú tjua tahto —nina tiro.

Ā tjia. Sā puhtoro Jesu tjua tahga.


²¹ Mari puhtoro Jesu to cahíā mehne jipihtina musa noano jiga.



PRIMER VIAJE MISIONERO DE PABLO




SEGUNDO VIAJE MISIONERO DE PABLO




TERCER VIAJE MISIONERO DE PABLO




VIAJE DE PABLO A ROMA



El Templo en el tiempo de Jesucristo



Plano del Interior del Templo



1. La Mesa y los Panes de la Proposición
2. El Candelabro
3. El Altar del Incienso
4. El Velo
5. El Arca del Pacto
6. Los Querubines

Tierra de
PALESTINA
en el tiempo de
NUESTRO SEÑOR
JESUCRISTO



